


Tupanaarü Ore i Tóriu Cori ya Ngechuchu ya

Cristuchiga



New Testament in Ticuna (PE:tca:Ticuna)

Tupanaarü Ore i Tóru Cori ya Ngechuchu ya Cristuchiga

New Testament in Ticuna (PE:tca:Ticuna)

copyright © 2008 Wycliffe Bible Translators, Inc.

Language: Ticuna

Translation by: Wycliffe Bible Translators, Inc.

Ticuna

tca

Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Ticuna

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files dated 29 Jan 2022
9d5dc22a-30be-5d26-85a9-76047f4c89e6

Contents

MATEU	1
MARCU	73
LUCA	115
CUAŨ	189
PURACŪĜŪ	242
DUMACŪĀX	307
1 CORĪTIUCŪĀX	340
2 CORĪTIUCŪĀX	370
GÁRATAANECŪĀX	389
EPÉCHIUCŪĀX	401
PIRIPUCŪĀX	412
COROCHACŪĀX	420
1 TECHARÓNICACŪĀX	427
2 TECHARÓNICACŪĀX	433
1 TIMUTĒU	437
2 TIMUTĒU	446
TITU	452
FILEMUŪ	456
EBRĒUGŪ	458
CHAŨTIAGU	484
1 PEDRU	491
2 PEDRU	499
1 CUAŨ	505
2 CUAŨ	512
3 CUAŨ	513
YUDA	515
APOCARÍCHIU	518

ORE I MEXÜ GA MATEU ÜMATÜXÜ

Ngechuchu ya Cristu natanüwa ngóxü ga duixügüchiga

(Lc 3.23-38)

¹ Ñaã nixĩ ga yema nuxcümáxügüxü ga duixügü ga Ngechuchu ya Cristu natanüwa ngóxü. Rü yematanüwa rü Dabí nixĩ ga wüxi, rü Abráü nixĩ ga to.

² Rü Abráü rü Ichaánatü nixĩ.

Rü nüma ga Ichaá rü Acóbunatü nixĩ.

Rü nüma ga Acóbo rü Yudánatü rü naëneëgünatü nixĩ.

³ Rü Yudá rü Fárenatü rü Záranatü nixĩ. Rü Támara iyixĩ ga norü mamá.

Rü nüma ga Fáre rü Eróünatü nixĩ.

Rü nüma ga Eróü rü Aráünatü nixĩ.

⁴ Rü Aráü rü Aminadánatü nixĩ.

Rü nüma ga Aminadá rü Nachóünatü nixĩ.

Rü nüma ga Nachóü rü Charmóünatü nixĩ.

⁵ Rü Charmóü rü Boónatü nixĩ, rü Raá iyixĩ ga naë.

Rü nüma ga Boó rü Obénatü nixĩ, rü nae rü Rux iyixĩ.

Rü nüma ga Obé rü Ichaxínatü nixĩ.

⁶ Rü nüma ga Ichaxí rü aëxgacü ga Dabínatü nixĩ.

Rü nüma ga aëxgacü ga Dabí rü Charomóünatü nixĩ. Rü ngima ga Bechabé ga Üría namëxchirëx ixïcü iyixĩ ga naë ga Charomóü.

⁷ Rü Charomóü rü Roboáünatü nixĩ.

Rü nüma ga Roboáü rü Abíanatü nixĩ.

Rü nüma ga Abía rü Achánatü nixĩ.

⁸ Rü Achá rü Yochapánatü nixĩ.

Rü Yochapá rü Yoráünatü nixĩ.

Rü nüma ga Yoráü rü Uchíanatü nixĩ.

⁹ Rü Uchía rü Yotáünatü nixĩ.

Rü Yotáü rü Acánatü nixĩ.

Rü nüma ga Acá rü Echequíanatü nixĩ.

¹⁰ Rü Echequía rü Manachénatü nixĩ.

Rü Manaché rü Amóünatü nixĩ.

Rü nüma ga Amóü rü Yochíanatü nixĩ.

¹¹ Rü Yochía rü Yeconíanatü rü naëneëgünatü nixĩ. Rü yexguma nixĩ ga Babiróniäcüüx ga churaragü Yudiügüxü íyauüxü rü Babiróniäänewa nagagüäxü.

¹² Rü yexguma Babiróniäwa Yudiügüxü nagagüguwena, rü Yeconía nane ga Charatíe nabu. Rü nüma ga Charatíe rü Chorobabénatü nixĩ

¹³ Rü Chorobabé rü Abiúnatü nixĩ.

Rü Abiú rü Eriaquíünatü nixĩ.

Rü nüma ga Eriaquíü rü Achónatü nixĩ.

¹⁴ Rü Achó rü Chadóxnatü nixĩ.

Rü Chadóx rü Aqüíünatü nixĩ.

Rü nüma ga Aqüü rü Eriúnatü nixĩ.

¹⁵ Rü Eriú rü Ereachánatü nixĩ.

Rü Ereachá rü Matáünatü nixĩ.

Rü nüma ga Matáü rü Acóbunatü nixĩ.

¹⁶ Rû Acóbu rû Yúchenatü nixí. Rû nûma ga Yúche rû María ngíte nixí. Rû ngima ga María rû Ngechuchu ya Cristu naë iyixí. Rû guma Ngechuchuxü nixí ga naxunetaxü ga Tupana.

¹⁷ Rû yemaäcü Abráüwa inaxügü ga yema duüxügü rû 14 nixí ñuxmata Dabíwa nangu. Rû yemawena to ga 14 inaxügü ga Dabíwa rû ñuxmata Babiróniäcüäx ga churaragü Yudiügüxü íyauüxguwana nangu. Rû yemawena to ga 14 inaxügü ga yexguma Yudiügüxü ínayauüxguwana rû ñuxmata Cristu buxguwana nangu.

Ngechuchu ya Cristuarü buxchiga (Lc 2.1-7)

¹⁸ Rû ñaäcü nixí ga yexguma nabuxgu ga Ngechuchu. Rû naë ga María rû marü Yúchemaa íxátechaü. Natürü naxüpa ga nügüna na nangugüxü rû marü Tupanaäë i Üünexüärü ínúäxü íxäxäcü.

¹⁹ Rû Yúche ga María ngítechaü íxícü rû wüxi ga mecü nixí. Rû yemacëx tama nanangoxëëchaü ga yema na naxäxäcüxü ga María. Rû nagu narüxínü ga hexmamare ngüxü na ínatäxü. ²⁰ Rû yexguma yemagu ínaxínüyane, rû wüxi ga daxücüäx ga Tupanaärü orearü ngeruü, rû nanegüwa naxcëx nangox rû namaä nidexa. Rû ñanagürü nüxü: —Pa Yúche Pa Dabítanüxüx, ítäxü i ngíxü cuxoxü i María na ngímaä cuxämaxü! Erü Tupanaäë i Üünexü ngíxna ínúxügagu nixí i naxäxäcüxü. ²¹ —Rü ngíma tá ngíxü nangëxma ya wüxi ya ngine, rû cuma rû tá Ngechuchugu cunaxüéga. Rû ngëma naega rû ‘maxëëruxü’ ñaxüchiga nixí, erü nûma tá norü pecadugüwa ínananguxüëë i norü duüxügü —ñanagürü. ²² Rû guxüma ga yema orearü ngeruü nüxü íxuxü rû nangupetü na yanguxüçëx ga Cori ga Tupanaärü ore ga nuxcümaüxü ga norü orearü uruüwa nüxü yaxuxü ga ñaxü:

²³ “Rü tá tauemacü ngíxü inayarütaxu i ngëma nge i taguma yatüxü cuëxcü. Rû tá nayatü. Rû Emanue tá nixí i naega. Rû ngëma naega rû ‘Tupana tatanüwa nangu’, ñaxüchiga nixí”,

ñanagürü. ²⁴ Rû yexguma pewa nabëjächigu ga Yúche, rû nanaxü ga yema Tupanaärü orearü ngeruü ga daxücüäx namaä nüxü íxuxü. Rû Mariamaä naxämëx. ²⁵ Natürü taguma ngíxünexü nacüëx ñuxmata nabu ga guma ngíne. Rû Ngechuchugu nanaxüéga.

2

Ngechuchuxü ínayadaugü ga yatügü ga nüxü cuëxüchigüxü

¹ Rû Ngechuchu rû Yudéaanewa yexmane ga íäne ga Beréügu nabu ga yexguma Erode äëxgacü íxíxgu ga yema nachíüañewa. Rû yexguma nixí ga íäne ga Yerucharéüwa nangugüxü ga ñuxre ga yatügü ga nüxü cuëxüchigüxü ga woramacuriwa ngüxü ga yaxüwa ne íxü ga üëxcü ne üxüwa. ² Rû duüxügüna nacagüe, rû ñanagürügü: —¿Ngextá nixí i nangëxmaxü ya yima Yudiügüarü äëxgacü ya ngëxwacëx bucü? Toma rû yéama tochiüañewa nüxü tadau ya norü woramacuri rû ngëmacëx núma taxí na nüxü tayarücuëxüügüxüçëx —ñanagürügü. ³ Rû yexguma yemachi-gaxü nacüëxgu ga äëxgacü ga Erode rû poraäë naxoegaäë. Rû guxüma ga duüxügü ga Yerucharéüçüäxgü rû ta naxoegaäëgü. ⁴ Rû yexguma ga äëxgacü ga Erode rû naxcëx nangema ga guxüma ga paigüarü äëxgacügü rû ngüexëëruügü ga ore ga mugüwa nguxëëtaëgüxü. Rû nüxna naca, rû ñanagürü: —¿Ngexta nixí i nabuëgaxü ya Cristu? —ñanagürü. ⁵ Rû nümagü

nanangãxũgũ, rü ñanagürügũ: —Nuã Yudéaanewa ngëxmane ya ñãne ya Beréügu tá nixĩ i nabuxũ. Yerü nuxcũmaũcũ ga Tupanaãrũ orearũ uruũ rü nachiga nanaxũmatũ, rü ñanagürũ ga yema ore:

⁶ “Rü Beréü ya ñãne ya Yudéaanewa ngëxmane, rü yima rü tama wüxi ya ngexnerüünemare ya ñãne nixĩ, erü nagu tá nabu i ngëma ãëxgacũ i taxũ i Cristu. Rü nüma tá nüxna nadau i guxũma i Tupanaãrũ duũxũgũ i Yudüügũ”,

ñanagürũ. ⁷ Rü yexguma ga ãëxgacũ ga Erode rü bexma naxcèx naca ga yema yatügũ ga nüxũ cuèxüchigüxũ ga yaxüwa ne ìxũ. Rü nüxna naca ga tãxacũ rü ngunexũ na nangóxũ ga noxri ga guma woramacuri. ⁸ Rü ñuxüchi ga Erode rü Beréüwa nanamugũ ga yema yatügũ. Rü ñanagürũ nüxũ: — ¡Rü ngëma pexĩ rü meã naxcèx peyadëux i ngëma buxũ. Rü ngëxguma nüxũ ñpeyangauxu rü chomaã nüxũ pixu na choma rü ta ngëma chaxüxüçèx, na nüxũ chayaruçuèxüüxüçèx i ngëma buxũ! —ñanagürũ. ⁹ Rü yexguma yema orexũ naxĩnüëguwena, rü inaxĩãchi ga yema yatügũ. Rü guma woramacuri ga noxri nüxũ nadaugüçü rü napëxegu nixüchigü rü ñuxmata guma bucü ga Ngechuchu ñyexmaxüëtüwa nangu. Rü yéma nayachaxãchi. ¹⁰ Rü yexguma guma woramacurixũ nadaugüga ga yema yatügũ, rü poraãcũ nataãëgũ. ¹¹ Rü nagu nichocu ga guma ñ ga nawa nayexmane, rü yexma nüxũ nayangu ga guma bucü ngĩmaã ga naë ga María. Rü guma bucüpegu nacaxãpüxügũ, rü nüxũ nicuèxüügũ. Rü ñuxüchi nayawãxna ga norü baüxacügũ, rü õxchanana nanaxãmaregũ ga uiru rü pumaragũ ga yixichixũ. ¹² Rü yemawena, ga yexguma napeeyane ga yema yatügũ, rü nanegüwa Tupana nayaxucüxëgũ na tama Erodecèx nawoeguxüçèx. Rü yemacèx to ga namagu nachüãnecèx nawoegu.

Equituanewa nabuxmü

¹³ Rü yexguma marü ñyaxüxguwena ga yema yatügũ rü wüxi ga daxüçüãx ga Tupanaãrũ orearũ ngeruũ, rü nanegüwa Yühecèx nangox, rü ñanagürũ nüxũ: — ¡Nabëixãchi rü írüda! ¡Rü ñnaxüxü namaã ya yima bucü rü naë rü Equituanewa naxũ! ¡Rü ngëma pengëxmagü ñuxmatáta choma cumaã nüxũ chixu na ñuxgu tá cutaeguxũ! Erü ãëxgacũ i Erode rü yima bucüçèx tá nadau na yamáãxüçèx —ñanagürũ nüxũ. ¹⁴ Rü yexguma ga Yüche rü nabëixãchi rü ñnarüda. Rü yexgumatama chütacü namaã ñnaxüãchi ga guma bucü ga Ngechuchu rü naë. Rü Equituanewa naxĩ. ¹⁵ Rü Equituanewa nayexmagü ñuxmata nayux ga ãëxgacũ ga Erode. Rü yemaãcũ nangupetü na yanguxüçèx ga Tupanaãrũ ore ga nuxcũmaũcũ ga norü orearũ uruũ nüxũ ñxüxũ ga ñnaxũ:

“Naxcèx changema ya Chaune rü Equituanena chanataeguxëë”, ñaxũ ga yema ore.

Erode nanamu na tüxü nadëixüçèx ga buxegü

¹⁶ Rü yexguma ãëxgacũ ga Erode nüxũ cuèxgu ga to ga namagu na nawoeguxũ ga yema yatügũ ga nüxũ cuèxüchigüxũ ga yaxüwa ne ìxũ, rü poraãcũ nanu. Rü Beréüwa nanamugũ ga norü churaragũ na guxũ ga yema naãnewa tüxü nadëixüçèx ga guxãma ga guxema buxegü ga iyatüxe ga yexwacèx buexe rü ñuxmata taxre ga taunecü tüxü yexmagüxewa nangu. Yerü yema yatügũ ga yaxüwa ne ìxũ rü marü nüxũ nixugügũ rü taxre ga taunecü nixĩ ga noxri na nangóxũ ga guma woramacuri. ¹⁷ Rü yemaãcũ ñingu ga ore ga nuxcũmaũxũ ga Tupanaãrũ orearũ uruũ ga Yeremíã ümatüxũ ga ñnaxũ:

18 “Rü Ramáwa nüxŭ taxĩnŭe i wŭxi i naga i poraãcŭ ngechaŭgaãcŭma auxexŭ. Rü Raquera iyixĩ i ngĩxãcŭgŭcèx poraãcŭ auxcŭ. Rü taxuacŭma ngĩxŭ tataãxèèëga, erŭ nayue i ngĩxãcŭgŭ”, ñanagŭrŭ ga yema ore. 19 Natŭrŭ yexguma marŭ nayuxguwena ga ãëxgacŭ ga Erode, rŭ Equitanewa rŭ wŭxi ga daxŭcŭãx ga Tupanaãrŭ orearŭ ngeruŭ rŭ nanegŭwa Yŭcheçèx nangoxè. Rü ñanagŭrŭ nüxŭ: 20 —Pa Yŭcheç, jĩrŭda, rŭ pechiŭñanecèx namaã powoegu ya yima bucŭ ya Ngechuchu! Erŭ marŭ nayue i ngema duŭxŭgŭ ya yima bucŭxŭ imèxgŭchaxŭxŭ —ñanagŭrŭ. 21 Rü yexguma ga Yŭche rŭ Inarŭda rŭ nachiŭñanecèx namaã nataegu ga guma bucŭ rŭ naè. 22 Natŭrŭ yexguma Yŭche nüxŭ cuáchigagu na Aqueránu ãëxgacŭxŭ ingucuchixŭ nanatŭ ga Erodechicŭi ga Yudeaanewa, rŭ namuŭ ga Yŭche ga yema na naxŭxŭ. Yerŭ wŭxi ga daxŭcŭãx ga Tupanaãrŭ orearŭ ngeruŭ nanegŭwa nanaxucŭxè na tama yema Yudeaanewa na naxŭxŭcèx. Rü yemacèx Gariréaanewa naxŭ. 23 Rü yexguma Gariréaanewa nangugŭgu, rŭ ñane ga Nacharétuwa naxĩ, rŭ yexma naxãchiŭgŭ. Rü yemaãcŭ nangupetŭ na yanguxŭcèx ga yema ore ga nuxcŭmaŭgŭxŭ ga Tupanaãrŭ orearŭ uruŭgŭ nüxŭ ixugŭxŭ ga ñaxŭ: “Ngechuchu ya Cristu rŭ Nacharétucŭãxmaã tá nanaxugŭ”, ñaxŭ.

3

Cuáŭ ga baiŭxèëruŭ nüxŭ nixu ga Tupanaãrŭ ore ga dauxchitawa ga ngextá taxúema íxãpataxŭwa

(Mr 1.1-8; Lc 3.1-9, 15-17; Cu 1.19-28)

1-2 Rü yexguma Nacharétuwa nayexmagu ga Ngechuchu, rŭ Cuáŭ ga baiŭxèëruŭ inanaxŭgŭ ga Tupanaãrŭ orexŭ na yaxuxŭ ga Yudeaanewa ga dauxchitawa ngextá taxúema íxãpataxŭwa. Rü duŭxŭgŭmaã nüxŭ nixu rŭ ñanagŭrŭ: —jNüxŭ perŭxoe i pecŭma i chixexŭ! Erŭ marŭ ningaica na perŭ ãëxgacŭ na yĩxŭ ya Tupana —ñanagŭrŭ. 3 Rü guma Cuáŭ ga baiŭxèëruŭchiga nixĩ ga naxŭmatŭãxŭ ga nuxcŭmaŭcŭ ga Tupanaãrŭ orearŭ uruŭ ga Ichaxía ga yexguma ñaxgu:

“Rü dauxchitawa i ngextá taxúema íxãpataxŭwa tá nangèxma i wŭxi i duŭxŭ i ngema tagaãcŭ ñaxŭ: ‘jPegŭ pemexèëx naxcèx ya Cori! jRŭ naxcèx ipeyanawèxãchixèëx i perŭ maxŭ!’ ”

ñaxŭ. 4 Rü naxchiru ga Cuáŭ rŭ cameyutèxanaxcèx nixĩ, rŭ norŭ goyexŭ rŭ naxchèxmŭnaxcèx nixĩ. Rü beruremaã rŭ munŭmaã naxãwemŭ. 5 Rü yema Cuáŭxŭtawa inayarŭxĩnŭègŭxŭ ga duŭxŭgŭ ga Yerucharéucŭãx, rŭ duŭxŭgŭ ga guxŭ ga Yudeaanewa ne íxŭ, rŭ duŭxŭgŭ ga natŭ ga Yudaŭãrŭ ngaicamagu áchiŭgŭxŭ. 6 Rü guxema duŭxègŭ ga nüxŭ ixugŭexe ga túmaãrŭ pecadugŭ, rŭ Cuáŭ rŭ tŭxŭ ínabaiŭxèë ga natŭ ga Yudaŭwa. 7 Natŭrŭ yexguma Cuáŭ nüxŭ dèuxgu ga naxŭtawa na nangugŭxŭ ga muxŭma ga ãëxgacŭgŭ ga Parichéugŭ rŭ Chaduchéugŭ na ínabaiŭxèèãxŭcèx, rŭ Cuáŭ ñanagŭrŭ nüxŭ: —Pa Áxtapearŭ Duŭxŭgŭx, jRŭ texè pemaã nüxŭ tixu na naxchaxwa pibuxmŭxŭcèx i ngèma Tupanaãrŭ poxcu i ãicŭmaxŭ i marŭ ingaicaxŭ? 8 —jRŭ penaxwèxe na Tupana naxwèxexŭãcŭma pemaxèxŭ na ngèmaãcŭ guxŭma i duŭxŭgŭ nüxŭ nadaugŭxŭcèx na aixcŭma marŭ nüxŭ perŭxoexŭ i ngèma pecŭma i chixexŭ! 9 —Erŭ Tupanapèxewa rŭ taxuwama name na pegŭ pixuxŭ na Abráŭtanŭxŭ i Yudŭgŭ pixŭgŭxŭ erŭ tama ngèmacèx nixĩ ya Tupana i duŭxŭgŭxŭ nayaxuxŭ. Rü pemaã nüxŭ

chixu rü ngëxguma Tupana naxwëxegu, rü tama nüxü naguxcha na daa nutawa Abráútanüxü nanguxüxëxü. ¹⁰—Rü Tupanaärü yuema rü marü ímemare na nadaxüxcëx i ngëma nanetügü i tama mexü. Rü guxüma i nanetügü i chixearü õõxü rü tá nadaxü, rü ñuxüchi tá ínagu—ñanagürü. ¹¹Rü ñanagürü ta ga Cuáú: —Choma rü aixcüma dexáwamare pexü íchabaiüxëe na togü i duüxügü nüxü cuáxcëx na aixcüma marü nüxü perüxoexü i pecüma i chixexü. Natürü choweama tá ínangu i to i Tupanaärü orearü urüü. Rü nüma tá pexütawa nanamu i Tupanaãe i üünexü na naporaexëeãxü i ngëma Tupanawe rüxüxü, rü nüma tá nanapoxcue i ngëma Tupanaxü oexü. Erü nüma rü poraãcü choxü narüyexera na ãëxgacü yüxü. Rü choma rü napëxewa rü taxuwama chame rü bai i norü chatatürü ngewaxüra chame. ¹²—Rü nüma rü marü ínamemare na ñoma i nañewa yadexechiãxüxcëx i norü duüxügü ñoma wüxi i yatü trigu naãtuna idexechixürüü. Rü ngëmaãcü tá nayadexechi i ngëma noxrü ixígüxü na naxütawa nangëxmagüxüxcëx, natürü ngëma tama noxrü ixígüxü rü tá ínanagu nawa ya yima üxü ya taguma ixoxüne—ñanagürü ga Cuáú.

Ngechucharü baiechiga (Mr 1.9-11; Lc 3.21-22)

¹³ Rü yexguma nixí ga Gariréanewa ne naxüxü ga Ngechuchu. Rü Cuáúxütawa nanguxü ga Yudáú ga natüwa, na Cuáú ínabaieüxëxüxcëx. ¹⁴ Rü noxri rü tama Ngechuchuxü ínabaieüxëchaü ga Cuáú. Rü ñanagürü nüxü: —Choxü waxi nixí i namexü na ícubaieüxëxü. ¿Rü ñuxãcü i cuma i chauxütawa cuxüxü na choma cuxü íchabaieüxëxüxcëx? —ñanagürü. ¹⁵ Natürü ga Ngechuchu rü ñanagürü nüxü: —Name nixí i choxü ícubaieüxëe i ñuxmax. Erü name nixí i tanaxü i guxüma i ngëma Tupana tüxü muxü —ñanagürü. Rü yexguma ga Cuáú rü: —Ngü —ñanagürü. ¹⁶ Rü yexguma marü Cuáú Ngechuchuxü íbaieüxëguwena, rü dexáwa ínaxüãchigu ga Ngechuchu. Rü yexgumatama niwãxna ga daxüguxü ga naãne, rü Ngechuchu nüxü nadau ga Tupanaãe i Üünexü ga wüxi ga muxtucurüü na inagoxü rü nüxna na nanguxü. ¹⁷ Rü dauxüwa ínanaxü ga wüxi ga naga ga ñaxü: —Daa nixí ya Chaune ya nüxü changechaüxüchicü, rü poraãcü namaã chataãëxüchicü —ñaxü.

4

Ngechuchuxü naxü ga Chataná (Mr 1.12-13; Lc 4.1-13)

¹ Rü yemawena rü Tupanaãe i Üünexü rü wüxi ga nachica ga ngextá taxüema íxãpataxüwa Ngechuchuxü naga na yéma Chataná nüxü üxüxcëx. ² Rü taguma nachibü ga 40 ga ngunexü rü 40 ga chütaxü. Rü yemawena rü nataiya. ³ Rü yexguma ga ngoxo ga Chataná rü Ngechuchuxütawa nangu, na nüxü naxüxcëx. Rü ñanagürü nüxü: —Ega aixcüma Tupana Nane quixígu, ¡rü daa nutagüxü namu na pãuxü nanguxüxcëx! —ñanagürü ga Chataná. ⁴ Natürü Ngechuchu nanangãxü, rü ñanagürü: —Tupanaärü ore i ümatüxü rü ñanagürü: “Tãütáma pãuxíca nanamaxëxëe i duüxügü, natürü guxüma i ore i Tupana nüxü ixuxü nixí i duüxügüxü maxëxëxü”, ñanagürü. ⁵ Rü yexguma ga ngoxo ga Chataná rü guma ñãne ga üünene ga Yerucharéüwa nanaga. Rü tupaoca ga taxünetapëxegu nanamunagü. ⁶ Rü ñanagürü nüxü: —Ega aixcüma Tupana Nane quixígu, ¡rü nuã cugü rütáe! Erü Tupanaärü ore i ümatüxüwa rü ñanagürü:

“Tupana tá nanamu i norü orearü ngeruügü i daxüçüâx na cuxna nadaugüxüçèx. Rü naxmèxmaã tá cuxü niyauxgü na tama țacü rü nutagu cunguxüçèx”,

ñanagürü. ⁷ Rü Ngechuchu nanangãxü rü ñanagürü: —Rü Tupanaãrü ore i ümatüxü rü ñanagürü ta:

“¡Tama name i nüxü na cuxüxü ya Cori ya curü Tupana!”

ñanagürü. ⁸ Rü yexguma wenaxãrü ga ngoxo ga Chataná rü wüxi ga mèxpüne ga máxpüxüchinetapèxewa nanaga. Rü yéma Ngechuchuxü nanawèx ga guxüma ga nachüñanegü na ñuxãcü yamexèchixü. ⁹ Rü Chataná rü ñanagürü nüxü: —Choma chi cuxna chanaxã i guxüma i ñaã cuxü chawéxü i ngèxguma chi chopèxegu cucaxãpüxügu rü choxü quicuèxüügu —ñanagürü. ¹⁰ Rü yexguma ga Ngechuchu rü ñanagürü nüxü: —¡Choxna ixügachi, Pa Chataná! Erü Tupanaãrü ore i ümatüxü rü ñanagürü:

“¡Nüxü icuèxüü ya Cori ya curü Tupana, rü yimaãxüxücatama napuracü!”

ñanagürü. ¹¹ Rü yexguma ga ngoxo ga Chataná rü Ngechuchuna nixügachi. Rü Ngechuchuxütawa nangugü ga daxüçüâx ga Tupanaãrü orearü ngeruügü. Rü Ngechuchuxü narüngüxëëgü rü nüxna nadaugü.

Ngechuchu rü inanaxügu ga norü puracü ga Gariréaanewa

(Mr 1.14-15; Lc 4.14-15)

¹² Rü yexguma Ngechuchu nüxü ñnügü ga na napoxcuxü ga Cuáü ga baiüxëëruü, rü Gariréaanewa naxü. ¹³ Natürü tama ñane ga Nacharétugu narüxãüx, rü ñane ga Capernáüwa naxü na yexma yaxächüxüçèx. Rü guma ñane rü nextaxa ga Gariréacutüwa nayexma ga Chaburãütanüxü rü Netarítanüxü ga duüxügu ixächüügüxüwa. ¹⁴ Rü yema nangupetü na yangüçüçèx ga ore ga nuxcümaücü ga Tupanaãrü orearü uruü ga Ichaxía ümatüxü ga ñaxü:

¹⁵⁻¹⁶ “Rü duüxügüçèx tá nangox i wüxi i ngóonexëëruü i Chaburãüãrü naãnewa, rü Netaríarü naãnewa, rü Yudãüãrü tocutüwa rü ngéma nama i taxtütütüwa nadaxüwa, rü Gariréaanewa i ngextá duüxügu i tama Yudiügu ixügüxü ixächüügüxüwa. Rü ngémaãcü i ngéma duüxügu ga noxri èãnexüwa yexmagüxü, rü tá nüxü nadaugü i wüxi i taxü i ngóonexëëruü. Rü ngéma duüxügu ga noxri yutüüwa yexmagüxü rü tá nüxü nabaxi i ngéma ngóonexëëruü”,

ñanagürü ga yema Ichaxiaarü ore. ¹⁷ Rü yexgumaücüü nixü ga inaxügüãxü ga Ngechuchu ga nüxü na yaxuchigaxü ga norü ore ga ñaxü: —¡Nüxü perüxoe i pecüma i chixexü! Erü marü ningaica na perü ãëxgacü na yüxü ya Tupana —ñaxü.

Ngechuchu rü naxçèx naca ga ägümücü ga püchaetanüxü

(Mr 1.16-20; Lc 5.1-11)

¹⁸ Rü yexguma nextaxa ga Gariréaanacügu yaxüxgu ga Ngechuchu, rü yéma nüxü nadau ga taxre ga yatü ga nügüeneëgü ixügüxü. Rü wüxi rü Chimáü ga Pedrugu äegaxü nixü. Rü to rü Aüdrégu äegaxü nixü. Rü nümagü rü ñnapüchaegü, yerü woetama püchaetanüxü nixügu. ¹⁹ Rü yexguma ga Ngechuchu rü ñanagürü nüxü: —¡Chowe perüxü! Rü chorü puracüwa tá pexü chamugü na chauxütawa penagagüxüçèx i duüxügu —ñanagürü. ²⁰ Rü yexgamatama ga yema taxre, rü yema nanatëxgü ga norü püchagü. Rü Ngechuchuwe narüxü. ²¹ Rü yéamaxüra naxü ga Ngechuchu, rü yéma nüxü nadau ga to ga taxre ga nügüeneëgü. Rü Acobu nixü ga wüxi, rü Cuáü nixü ga to. Rü Zebedéu nanegü nixü ga nümagü. Rü nanatümaã wüxi ga

nguewa nayexmagü. Rü yéma İnanangáitagü ga norü püchagü. Rü Ngechuchu naxcèx naca. ²² Rü yexgumatama yéma guewa tüxü natèxgü ga nanatü. Rü Ngechuchuwe narüxi.

Ngechuchu nanangüexêê ga muxüma ga duüxügü
(Lc 6.17-19)

²³ Rü guxü ga Gariréaanegu nixügüchigü ga Ngechuchu. Rü wüxichigü ga İanewa, rü duüxügüarü ngutaquëxepataüwa ninguxêêtaechigü. Rü duüxügümaâ nüxü nixuchiga ga ore ga mexü na ñuxâcü âëxgacü yïixü ya Tupana. Rü guxüma ga duüxügü ga yema idaaweexü rü nanameëxêê ga woo nañuxraüxü ga norü ðaawe nüxü yexmaxü, rü naxcèx nitaanegü. ²⁴ Rü Ngechuchuxü nacuáchigagü ga guxüma ga duüxügü ga Chíríaanecüâx. Rü naxütawa nanagagü ga nagüxüraüxü ga ðaxweanemaâ idaaweexü. Rü yematanüwa nayexma ga duüxügü ga ngüanemaâ idaaweexü, rü duüxügü ga poraacü naxünewa nangüxü, rü duüxügü ga ngoxo nawa yexmaxü, rü duüxügü ga óxwaâxgüxü, rü duüxügü ga nawâixâchigüxü. Rü Ngechuchu nanameëxêê ga guxüma ga yema. ²⁵ Rü Ngechuchuwe narüxi ga muxüma ga duüxügü ga Gariréaanecüâx, rü Decaporíchiuanecüâx rü Yerucharéücdüâx, rü Yudeaanecüâx, rü natü ga Yudáüarü tocutüdüâx.

5

Ngechuchu rü mëxpünewa nüxü nixu ga Tupanaarü ore

¹ Rü yexguma Ngechuchu nüxü dèuxgu ga yema muxüma ga duüxügü, rü wüxi ga mëxpünewa İnachüâchi namaâ ga norü ngüexügü. Rü yéma narüto, rü norü ngüexügü nüxü İnachomaëguâchi.

Yixema taâëgüxechiga
(Lc 6.20-23)

² Rü İnanaxügü ga Ngechuchu ga na nangüexêêâxü, rü ñanagürü: ³ —Tataâëgü ya yixema nüxü icuëxâchitanüxê i tumaârü pecadu rü nüxü rüxoexe. Erü tûmacèx nixi i ngema daxügüxü i naane i Tupana âëxgacü İxixüwa. ⁴ —Tataâëgü ya yixema ngechaügüxe, erü Tupana tá tüxü nataâëxêê. ⁵ —Tataâëgü ya yixema tama tügü icuëxüxügüxe, erü tá tanayauxgü i ñoma i naâne i Tupana tûmamaâ ixunetaxü. ⁶ —Tataâëgü ya yixema poraacü tüxü nangüchaüxê na Tupanapëxewa meâ tamaxêxü, erü Tupana tá tüxna nanaxâ i ngêma maxü i mexü i naxcèx tadaugüxü. ⁷ —Tataâëgü ya yixema togü i duüxügü tüxü ngechaütümüügüxe, erü tûmagü rü tá ta Tupanaâxü tangechaütümüügü. ⁸ —Tataâëgü ya yixema tama chixexügu rüxñüxê i tumaâëwa, erü yixemagü tá tixigü ya Tupanaxü daugüxe. ⁹ —Tataâëgü ya yixema togüarü chogürü İxigüxe, erü Tupana rü nanegümaâ tá tüxü naxu. ¹⁰ —Tataâëgü ya yixema togü i duüxügü tûmachi aiexe naxcèx na Tupana naxwëxexüâcüma meâ tamaxêxü. Erü tûmacèx nixi i ngema daxügüxü i naane i Tupana âëxgacü İxixüwa. ¹¹ —Petaâëgü i pema ega duüxügü tacü pemaâ ixugüegu, rü chixri pemaâ namaxëgu, rü chaugagu doramaâ poraacü chixri pechiga yad exagügu. ¹² —Rü petaâëgüama rü tama pexoegaâëgü! Erü daxügüxü i naânewa tá penayauxgü i wüxi i perü âmare i mexêchixü. Rü ngêma ñuxma pexü ngupetüxürü nixi ga nüxü nangupetüxü ga nuxcümaügüxü ga Tupanaarü orearü uruügü, yerü ga duüxügü rü naxchi rü ta naxaie.

Yucürarüü rü omürüü pixigü i ñoma i naânewa
(Mr 9.50; Lc 14.34-35)

13 —Pema rü ñoma yucürarüü pixīgü i ñoma i naãnewa. Erü yima yucüra rü ñna na namexëëxürüü, rü ngëxgumarüü ta i pema rü ñoma i naãnecüãx i duüxügüarü mexëëruü pixīgü. Natürü ngëxguma chi nangeacagu ya yucüra, çrü ñacüwa chi i namexü i ngëxgumax? Rü dücax, rü taxuwama name, rü itanatëxmare, rü ngema duüxügü nawa nangagü. 14 —Pema rü ñoma i naãnecüãxärü ngóonexëëruü pixīgü. Rü wüxi ya ñane ya wüxi ya mëxpünewa ngëxmane, rü taxuacüma inicux. 15 —Rü taxüema wüxi i omüwa tanangixichi na wüxi i caichãütüügu na tayaxücuchixüçëx. Natürü wüxi i omüwa tanangixichi na norü üchicãügu tanaxünagüxüçëx, na ngema tüxü nabaxixüçëx ya guxãma ya yixema yima ñwa ngëxmagüxe. 16 —Rü name nixü i duüxügüpëxewa na meã pemaxëxü. Erü ngëmaãcü i pema rü omügürüü tá pinaigü. Rü ngëmaãcü duüxügü tá nüxü nadaugü i ngëma mexü i pexüxü, rü tá nüxü nicuëxüügü ya Penatü ya daxüwa ngëxmacü.

Ngexchuchu nanangüexë ga mugüchiga

17 —Tama name i nagu perüxnüë na núma chaxüxü na ichayanaxoxëëxüçëx i Tupanaärü mugü ga Moïché umatüxü, rü yema ore ga nuxcümaügüxü ga Tupanaärü orearü uruügü namaã nguxëëtaegüxü. Natürü núma chaxü na meã chayanguxëëxüçëx i ngëma mugü, rü tama na ichayanaxoxëëxüçëx. 18 —Rü aixcüma pemaã nüxü chixu, rü ñuxma na tama nangupetüxü i daxüguxü i naane rü ñoma i naãne rü taxucürüwa naxüchicüxü i ngëma mugü, rü bai i írarüwa ñuxmatáta yangu i gaxüma i ngema mugü nüxü nixuxü. 19 —Rü ngëmacëx ya yixema tama naga ñnuxë i ngëma mugü, rü woo i ñacü i íraxü i ngëma nüxü yaxuxü rü duüxügüxü tangüxëëxgu na nümagü rü ta tama naga naxüñüëxüçëx, rü yixema rü tá guxüärü yexera wixweama tatëx i Tupana ãëxgacü íxixüwa. Natürü yixema naga ñnuxë i Tupanaärü mugü rü duüxügüxü ngüexëëxë na tümagü rü ta naga taxüñüëxüçëx, rü guxüpëxewa tá taxü i Tupana ãëxgacü íxixüwa. 20 —Rü pemaã nüxü chixu, rü ngëxguma tama Parichëgü rü ngüexëëruügü i ore i mugüwa nguxëëtaegüxüärü yexera meã pemaxëgu, rü tagutáma Tupana íngexmaxüwa pichocu.

Ngexchuchu nanangüexë na tama namexü na texé tümaëneëmaã na nuxü (Lc 12.57-59)

21 —Pema rü marü nüxü pexüñüë ga Moïchëarü ore ga nuxcümaügüxü ga duüxügümaã nüxü yaxuxü ga ñaxü: “¡Tãxü i pemáëtagüxü! Erü texé yamáëtaxe rü tá tapoxcu”, ñaxü. 22 —Natürü choma rü pemaã nüxü chixu rü texé ya tümaëneëmaã nuxë, rü tá tapoxcu. Rü texé ya ñacü tümaëneëmaã íxugüxe, rü ãëxgacügüpëxewa tá tüxü nagagü na tüxü napoxcuxüçëx. Rü texé ya tümaëneëxü ngoxo wogüxe, rü äücümaxüwa tangëxma, erü ngürüãchi tá tapoxcu nagu ya yima üxü ya ngoxo nagu poxcuene. 23-24 —Rü ngëxguma tupaucawa Tupanana cunaxãxgu i curü díeru, rü ngema nüxna cucüëxãchigu na ñacüçëx cumaã nanuxü i cueneë, ¡rü ngëxma tupaucagutama naxü i ngëma curü ãmare i Tupanana cuxãxchãxü! ¡Rü cueneëxütawa naxü, rü namaã yamexëëxíra i ngëma cuxchi na naxaixü! Rü ngëmawena rü marü name i tupaucacëx cutaegu na Tupanana cuyaxãmarexüçëx i curü díeru. 25 —Rü ngëxguma chi wüxie wüxi i ngetanüçëx cuxü íxuaxügu, rü ãëxgacüxütawa cuxü tagaxgu, rü name nixü i namawatama tüxü curüngüxmüxëë na tama ãëxgacüpëxewa cuxü tagaxüçëx. Erü wüxicana na ãëxgacüxütawa cunguxü, rü ãëxgacü tá purichíagüna cuxü namu na cuxü napoxcuxüçëx. 26 —Rü aixcüma cumaã

nüxü chixu rü täütáma ngema poxcupataüwa ícunguxuchi ñuxmatáta ngíxü cúxütanü i guxcü i ngéma díeru i nüxü ngíxü cungetanücü. Rü name nixí i paxa Tupanana peca na pexü nüxü nangechaüxcèx i perü pecadugü na tama pexü napoxcuexücèx.

Ngechuchu namaã nangúexêtae na tama namexü na wüxi i ngemaã chix-exügu rüxinüxü

²⁷ —Pema marü nüxü pexinüë ga Tupanaärü mu ga Moíché nuxcüma nüxü ixuxü ga ñaxü:

“¡Tama name i naí i ngemaã na icupexü!”

ñaxü. ²⁸ —Natürü choma rü pemaã nüxü chixu, rü yíxema texé ya wüxi i ngexü dawanüxé rü tüxü nangúchaüxé na ngímaã itapexü, rü Tupanapëxewa rü marü chixexü ngímaã taxü i tümaãewa. ²⁹ —Rü ngëxguma chi yima curü tügünexëtü pecadu cuxü üxêëgu rü jnoxtacüma nayaxu rü yaxügu naña! Erü narümemaë nixí na yima cuxetüxicatama iyarütaxuxü na tama guxü i cuxune iyarütaxuxücèx nagu ya yima üxü ya ngoxogü nagu poxcuene. ³⁰ —Rü ngëxguma chi yima curü tügünemexé pecadu cuxü üxêëgu, rü name nixí i noxtacüma ícunadae rü yaxügu cuyaña. Erü narümemaë nixí na yima cuxmëxicatama iyarütaxuxü na tama guxü i cuxune iyarütaxuxücèx nagu ya yima üxü ya ngoxogü nagu poxcuene. Rü ngémaãcü ega woo pexü naguxchagu rü name nixí i nüxna pixígachi i guxüma i chixexü i nagu piyixchaüxü —ñanagürü.

Ngechuchu namaã nangúexêtae na tama namexü na texé tümamèxü ítáxü (Mt 19.9; Mr 10.11-12; Lc 16.18)

³¹ Rü ñanagürü ta ga Ngechuchu: —Moíché rü üpa nüxü nixu rü yíxema tümamèxü ítáxe, rü tanaxwèxe i ngíxna tanaxá i wüxi i popera i nawa nüxü tixuxü na marü ngíxü ítátáxü. ³² —Natürü choma rü pemaã nüxü chixu, rü ngëxguma wüxi ya yatü naxmèxü ítèxgu, rü chi tama naí ya yatümaã nangéãëxügagu yixígu, rü äücümáxüwa ngíxü tangëxmaxêë erü ngémaãcü ngürüächí pecadu ixü. Rü yíxema ngímaã ämaxé i wüxi i nge i marü ngíte ngíxü ítèxcü, rü tüma rü ta pecadu taxü.

Ngechuchu namaã nangúexêtae ga unetachiga

³³ Rü ñanagürü ta ga Ngechuchu: —Pema rü marü nüxü pexinüë ga Moíchéarü ore ga nuxcümaügüxü ga duüxügümaã nüxü yaxuxü ga ñaxü:

“Ngëxguma Tupanaegagu texémaã tacücèx icuxunetagu, rü name nixí i cuyanguxêë i ngéma curü uneta”,

ñaxü. ³⁴ —Natürü choma rü pemaã nüxü chixu rü tama name i texéégagu rü éxna tacüéégagu wüxi i duüxümaã ipexuneta. Rü tama name i daxügüxü i naãneegagu ipexuneta, erü ngema narüto ya Tupana. ³⁵ —Rü tama name i ñoma i naãneegagu ipexuneta, erü Tupanaärü cuaixcutüchica nixí. Rü tama name i Yerucharéégagu ipexuneta, erü Tupana ya guxüärü äëxgacüarü ñane nixí. ³⁶ —Rü tama name i cugüéégagu icuxuneta, erü woo wüxitama i cuyae rü taxucürüwa cunaxüchicüü na nachóxcèx rü éxna nawaxüxcèx. ³⁷ —Rü ngémacèx rü ngëxguma icuxunetagu rü narümemaë nixí i: —Ngü, tá chanaxü —ñaperügü, rü éxna: —Täütáma chanaxü —ñaperügü. Erü guxüma i to i ore i namaã icuxunetaxü, rü ngoxo i Chatanáwa ne üxü nixí.

Ngechuchu namaã nangúexêtae na ñuxäcü namexü na namaã ichopetüxü i ngéma duüxügü i chixri tamaã maxèxü

38 Rū ñanagürü ta ga Ngechuchu: —Pema rü marü nüxü pexĩnũe ga Tupanaärü mu ga Moĩché nuxcũma nüxü ixuxü ga ñaxü:

“Ngẽxguma texé wüxi i duũxüxü icháixetüxẽẽgu, rü tümaxẽtũmaãtama tayangutanüxẽẽ. Rü texé wüxi i duũxüxü ibüepütagu, rü tümapütamaãtama tayangutanüxẽẽ”,

ñaxü. 39 —Naturü choma rü pemaã nüxü chixu rü tama name i pegütama ípepoxü nüxna i duũxü i chixecũmaxü. Rü ngẽxguma texé cuxü pechiwegu, rü marü name i curü tochiwe rü ta icunaxã na ngema rü ta cuxü tapechiwexüçex rü tama name na cuxütanüxü. 40 —Rü ngẽxguma texé cuxü íyaxuaxügu rü cuxna tayapuchaxügu i curü daxü, rü name nixĩ i curü gáuxüchiru rü ta noxtacũma tüxna cunaxã. 41 —Rü ngẽxguma texé cuxü müxu na wüxi na kilómetrugu tacü tüxü quingexüçex, rü name nixĩ i taxre i kilómetrugu tüxü cuyange. 42 —Rü ngẽxguma texé curü ngẽmaxüçex cuxna caxgu, rü name nixĩ i tüxna cunaxã. Rü tama name na namaã cuxaüxü i curü ngẽmaxügu ega texé paxaãchi cuxna naxcèx caxgu.

Name nixĩ i nüxü tangechaü i ngema tamaã rüuwanüguüxü

43 Rū ñanagürü ta ga Ngechuchu: —Pema rü marü nüxü pexĩnũe ga Tupanaärü mu ga Moĩché nuxcũma nüxü ixuxü ga ñaxü:

“¡Nüxü nangechaü i cumüçü, rü naxchi naxai i curü uwanü!”

ñaxü. 44 —Naturü i choma rü pemaã nüxü chixu rü: —¡Nüxü pengechaü i perü uwanügu! ¡Rü naxcèx peyumüxẽ i ngẽma duũxügu i chixexümaa pewe ingexütanüxü! 45 —Rü ngẽxguma ngẽmaãcü pemaxẽgu rü aixcũma Penatü ya daxüguçü nanegü tá pixĩgü. Erü nüma rü inanabáixẽe ya üexcü naxcèx i mexü i duũxügu rü chixexü i duũxügu. Rü nanapuxẽe naxcèx i duũxügu i meã maxẽxü rü duũxügu i chixri maxẽxü. 46 —Rü ngẽxguma chi ngẽma duũxügu i pexü ngechaüguüxüxüçatama pengechaügu, çrü tacü rü ãmare tá Tupanaxütawa peyaxügu naxcèx i ngẽma? Erü ngẽma yatügu i Dumaärü ãxgacüçex diëru ngixü ideetanüxüta puracüexü rü ngẽxgumarüü nanaxügu. 47 —Rü ngẽxguma chi peeneëguüxüçatama perümoxëgu, rü guxü i duũxügürüütama pixĩgü. Erü woo ngẽma duũxügu i tama Tupanaxü cuëxgüxü, rü ngẽxgumarüütama nanaxügu. 48 —Rü ngẽmacèx penaxwae na aixcũma namexü i perü maxü naxrüxü ya Penatü ya Tupana ya aixcũma mearü maxüãcü.

6

Ngechuchu rü norü ngúetanüxüxü nangüxẽe na ñuxãcü mexü naxüguüxü

1 Rū ngẽxguma tacü rü mexü pexüxchaügu, rü name nixĩ i pexuãe na tama duũxügüpëxewa penaxüxü i ngẽma na duũxügu pexü dauxüçex rü pexü yacuëxüüguüçex. Erü ngẽxguma duũxügu pexü icuëxüüguüçex mexü pexüxgu, rü Penatü ya daxüguçü rü tãütama ãmare pexna naxã. 2 —Rü ngẽmacèx ngẽxguma texéxü curüngüxẽeçhaügu, rü name nixĩ i tama poraãcü nüxü quixuchiga i ngẽma. Rü tama name i ngẽma duũxügu i togüpëxewa meã maxënetaxürüü na quixü. Erü nümagü rü norü me nixĩ i ngutaquëxepataüguwa rü ítamüguwa nüxü nixuchiga ega tacü rü mexü naxügu. Rü ngẽmaãcü nanaxügu na togü meã nachiga idexagüxüçex. Naturü choma rü aixcũma pemaã nüxü chixu rü ngẽma na duũxügu nüxü icuëxüüguüxü nixĩ i norü ãmare, rü tãütama nanayaxügu i to i ãmare i Tupanaxütawa. 3-4 —Naturü i cuma rü ngẽxguma tacü tüxna cuxãxgu ya yixema ngearü ngẽmaxüãxgüxe, rü name nixĩ i taxüema cuxü dauãcũma na cunaxüxü

i ngēma. Rū woo cumūcūxūchi rū tama name i nūxū na nacuáxū i ngēma. Rū Cunatū ya daxūgucū ya nūxū daucū i ngēma cuxicatama cuxūxū, rū tá cuxna nanaxā i curū āmare.

Ngechuchu nanangúexēē ga yumūxēchiga
(Lc 11.2-4)

⁵ —Rū ngēxguma peyumūxēgūgu, rū tama name i ngēma duūxūgū i togūpēxewa meā maxēnetaxūrūū pixīgū. Erū nūmagū rū ngēxguma nayumūxēgūgu, rū norū me nixī na chiācū nayumūxēgūxū i ngutaquēxepataūgūwa rū ítamūgūwa na duūxūgū nūxū na daugūxūcēx. Rū aixcūma pemaā nūxū chixu rū ngēma na duūxūgū nūxū daugūxūxīcatama nixī i norū āmare. ⁶ —Natūrū ngēxguma cuyumūxēgu, rū name nixī i curū ucapugu cuxūcu, rū cunawāxta i curū íāx, rū ngēma cuyumūxē namaā ya Cunatū ya bexma cumaāxīcatama ngēma ngēxmacū. Rū ngēxguma ya yima Cunatū ya Tupana ya nūxū daucū i ngēma cúācū cuxūxū, rū nūma tá cuxna nanaxā i curū āmare. ⁷ —Rū tama name i natūcēxma cunamēxēē i curū yumūxē naxrūū i ngēma duūxūgū i tama Tupanaxū cuēxgūxū. Erū nūmagū rū nagu narūxīnūē rū ngēma na namēxēēgūāxūcēx i norū yumūxē rū Tupana tá nūxū naxīnū. ⁸ —Rū tama name i ngēma duūxūgūrūū pixīgū, erū woo tauta naxcēx ípēcaxgu rū Penatū ya Tupana rū marū nūxū nacuēx na tacū pexū taxuxū. ⁹ —Rū ngēmacēx rū űāācū tá peyumūxēgū i pemax:

“Pa Tonatū ya Daxūgucūx, rū aixcūma űūnecū quixī i cumax. ¹⁰ |Rū nūma naxū na torū āēxgacū quīxūcēx! Rū tanaxwēxe i curū ngūchaū na naxūgūxū i duūxūgū i űoma i naānewa ngēxgumarūū i daxūgūxū i naānewa na curū ngūchaū ínaxūgūxūrūū. ¹¹ |Rū toxna naxā i torū űna i űoma i ngunexūcēx ixīxū! ¹² |Rū toxū nūxū nangechaū i torū chixexū i taxūxū ngēxgumarūū i toma rū tūxū nūxū na tangechaūxūrūū ya yīxema chixexū tomaā űgūxe! ¹³ |Tāxū i tacū rū chixexūpēxewa toxū cuwogūxū na tama nagu tayixūcēx! Natūrū tanaxwēxe i toxna cudau na tama ngēma chixexū taxūgūxūcēx. Erū cuma rū guxūguma guxūārū āēxgacū quixī rū cuporaxūchi rū cumexēchi. Rū ngēmaācū yī”.

¹⁴ —Rū ngēxguma pema nūxū nūxū pengechaūgu i ngēma duūxūgū i chixexū pemaā űgūxū, rū Penatū ya daxūgucū rū tá ta pexū nūxū nangechaū i perū pecadugū. ¹⁵ —Natūrū ngēxguma tama nūxū nūxū pengechaūgu i ngēma duūxūgū i chixexū pemaā űgūxū, rū Penatū ya daxūgucū rū tá ta tāūtáma pexū nūxū nangechaū i perū pecadugū.

Ngechuchu nanangúexēē ga aurechiga

¹⁶ —Rū ngēxguma tama pechibūēācūma peyumūxēgūgu rū tama name i pegū pengechaūchīwexēē naxrūū i ngēma duūxūgū i togūpēxewa meā maxēnetaxū. Erū nūmagū rū ngēmaācū nanaxūgū na togū nūxū na daugūxūcēx i ngēma na Tupanacēx naxaureexū. Rū aixcūma pemaā nūxū chixu rū ngēma na duūxūgū nūxū daugūxūxīcatama nixī i norū āmare. ¹⁷ —Natūrū ngēxguma cuma rū tama cuchibūācūma cuyumūxēgu rū name nixī i meā cugū cyauxchiwe rū meā cugū curūxīxēēru. ¹⁸ —Rū ngēmaācū i togū i duūxūgū rū tāxūtáma nūxū nacuēxgū na tama cuchibūācūma cuyumūxēxū. Rū Cunatū ya bexma cumaā ngēma ngēxmacūxīcatátama cuxū nadau, rū tá cuxna nanaxā i curū āmare naxcēx i ngēma cuxūxū.

űūxācū tūxū nangēxma i tórū meruūgū i daxūgūxū i naānewa
(Lc 12.33-34)

19 —Rü tama name i pegücêx penanutaquêxe i muxûma i perü meruügü i ñoma i nañewa. Erü ñoma i nañewa rü paxama nagux i perü ngêmaxûgü, rü naweane rü paxama nanachixexêê, rü ngîtêxgüxü rü naxcêx nangîxgü. 20 —Rü narûmemaê nixî i penamuxêê i perü meruü i daxûguxü i nañewa. Erü ngema rü tâxûtâma nagux, rü naweane rü tâxûtâma nanachixexêê, rü ngîtêxgüxü rü tâxûtâma ngexma nachocu na naxcêx nangîxgüxüçêx. 21 —Erü ngextâ ínangêxmaxûwa i perü ngemaxûgü, rü ngêxma nixî i perüñnûêxü.

Taxûneârü omûchiga

(Lc 11.34-36)

22—Cuxetügü rü ñoma wüxi i omürüü nixî i cuxunecêx. Rü ngêxguma ngêma Tupana cuxü naxwêxexüçêx cudêuxgu, rü guxûma i curü maxü rü name. 23 —Natürü ngêxguma ñoma i nañeârü ngûchaüçêx cudêuxgu, rü guxûma i curü maxü rü chixexüwa nangêxma. Rü aixcûma nataxuma i êânexü i ngêmaârü yexera ixixü i Tupanapêxewa.

¿Texêcêx tá cumaxü, Tupanacêx rü êxna dîerucêx?

(Lc 16.13)

24 —Taxucürüwa wüxi i duüxü rü nataxrearü coriâx. Erü wüxi i norü corichi rü tá naxai, rü ngêma to rü tá nüxü nangechaü. Rü êxna wüxícêx rü tá meâ napuracü, rü ngêma to rü tá nüxü naxo. Rü taxucürüwa Tupanacêx pemaxê, ega perü dîeruguama perüñnûêgu.

Tupana rü naxâcügüna nadau

(Lc 12.22-31)

25 —Rü ngêmacêx pemaâ nüxü chixu rü: ¡Tâxü i pexoegaâêgüxü naxcêx na tacü tá pengôxgüxü rü tacü tá pixaxgüxü, rü tacümaâ tá na pexâxchirugüxü! Erü perü maxü rü ñnaârü yexera nixî, rü pexene rü naxchiruarü yexera nixî. 26 —¡Dücêx penangugü i werigü i tama toegüchirêxü, rü tama nanetüaru o ibuxgüxü, rü ngepatagüxü na ngexta namaâ nanguxûgüxüçêx i norü ñna! Natürü Penatü ya daxûgucü rü nanaxüwemü. Rü pema rü Tupanacêx rü guxûma i werigüaru yexera pixîgü. 27 —Rü taxuwama name na tacücêx pexoegaâêgüxü. Erü taxucürüwa ya wüxie i pema rü wüxi i oragu rü ipenamêxâchixêê i perü maxü ega woo poraâcü naxcêx pexoegaâêgügu. 28 —¿Rü tüxcüü pexoegaâêgü naxcêx i pexchiru? ¡Dücêx penangugü i ngêma putüragü i ngextámare yaexü i tama puracüexü, rü tama nügü üxchirugüxü! 29 —Natürü pemaâ nüxü chixu rü woo guma âêxgacü ga Charumóu ga na namexêchixü ga naxchiru, rü taguma wüxi ga putürachacurüü namexêchi. 30 —Rü ngêxguma Tupana ngêmaâcü nangêxâêgu i ngêma putüragü i ñuxma ngêxmagüxü natürü moxü rü marü taxuxü, rü yexera tá pexna nadau i pemax, Pa Yatügü i Tama Aixcûma Meâ Yaxôgüxü. 31 —Rü ngêmacêx tama name i pexoegaâêgü rü ñaperügügü: —¿Tacü tá tangôxgü? rü êxna —¿tacü tá tixaxgü? rü êxna —¿tacümaâ tá taxâxchirugü? —ñaperügügü. 32 —Erü ñoma i nañecüâx i duüxügü rü naxcêx nadaugü i guxûma i ngêma pemaâ nüxü chixuxü. Natürü pema rü pexü nangêxma ya Penatü ya daxûgucü ya nüêchama nüxü cuácü i pexü na nataxuxü i guxûma i ngêma. 33 —Natürü narûmemaê nixî i Tupanacêxira pedaugü na ngêma nüma pexü nanaxwêxexüxira pexügüxüçêx. Rü naêtü tá pexna nanaxâ i guxûma i tacü i pexü taxuxü. 34 —¡Tâxü i naxcêx pexoegaâêgüxü i ngêma moxü tá üpetüxü! Erü ngêma moxüârü ngunexü rü tá nüxü nangêxma i guxchaxügü i namaâ

ínanguxũ. Erũ wũxichigũ i ngunexũ rũ nũxũ nangẽxma i noxrũtama guxchaxũgũ, rũ ngẽmacèx tama name i moxũãrũ guxchaxũgũcèx pexoegaãgũ i ñuxmax —ñanagũrũ.

7

Tama name i toguexũ tixu (Lc 6.37-38, 41-42)

¹ Rũ Ngechuchu rũ ñanagũrũ ta: —jRũ taxũ i toguexũ pixuxũ! Rũ ngẽxguma ya Tupana rũ tãxũtãma pexũ nixu na pechixexũ. ² —Erũ ngẽxgumarũũ na toguexũ pixuxũ rũ Tupana rũ tá pexũ nixu na pechixexũ. Rũ ngema na toguexũ pepoxcuexũ, rũ ngemaãcũ tãtama nixĩ ya Tupana i pexũ napoxcuexũ. ³ —¿Rũ tũxcũũ i nũxũ cudawenũxũ i ngẽma cueneẽãrũ ùxaxetũxũ i íraxũ, ega chi tama naxcèx cuxoegaãgũ i ngẽma cuxetũwatama ngẽxmaxũ i naĩpũta i taxũ? ⁴ —Rũ ngẽxguma cuxetũwatama nangẽxmagu i wũxi i naĩpũta i taxũ ¿rũ ñuxãcũ i cueneẽxũ cuchixewexũ, rũ ñãcuxũ nũxũ:

“jPa Chaueneẽx, cuxũ chanayauxchaũ i ngẽma curũ ùxaxetũxũ!” —ñãcuxũ?

⁵ —Pa Duũxũ i Meã Maxnetaxũx, rũ name nixĩ i cunayauxira i ngẽma naĩpũta i cuxetũwatama ngẽxmaxũ, rũ ngẽmaãcũ tá mea nũxũ cadua na cunayax-uxũcèx i ngẽma cueneẽãrũ ùxaxetũxũ. [Rũ ngẽmacèx name nixĩ i cuxira nũxũ curũxo i ngẽma chixexũ i taxũ i cumatama cuxũxũ, rũ ngẽxguma tá come na nũxũ curũngũxẽxũcèx i cueneẽ na nũxũ naxoxũcèx i ngẽma chixexũ i íraxũ i naxũxũ.] ⁶ —Rũ tama name i Tupanaãrũ ore i ùunexũmaã penachixewe i ngẽma duũxũgũ i chixecũmagũxũ i tama yaxõgũchaũxũ, erũ ngũrũãchi ngẽmacèx tá pexũ nimèxgũ. Rũ ngẽxgumarũũ tama name i Tupanaãrũ oremaã penachixewe i ngẽma duũxũgũ i tama nũxũ cuèxgũchaũxũ, erũ tá ínanatèxgũ.

Name nixĩ i tórũ yumũxèwa Tupanana naxcèx taca rũ naxcèx tadaugũ rũ ãxwa: Tu tu tu, ñatarũgũgũ

(Lc 6.31, 11.9-13)

⁷ —jTupanana naxcèx peca! rũ nũma tá pexna nanaxã. jRũ Tupanaxũtagu naxcèx pedau! rũ tá nũxũ ipeyangau. jRũ norũ ãxwa: Tu tu tu, ñapegũ! rũ tá pexcèx nayawãxna. ⁸ —Erũ guxãma ya yixema naxcèx ícaxe, rũ tanayaxu. Rũ guxãma ya naxcèx dauxe, rũ nũxũ itayangau. Rũ guxãma ya yixema ãxwa: Tu tu tu, ñagũxe, rũ tá tũmacèx niwãxna. ⁹ —Rũ dũcax i pemax, rũ ngẽxguma chi wũxi i pexacũ pãucèx ícaxgu, rũ ¿ñuxãcũ chi wũxi ya nuta nũxna pexãxũ? ¹⁰ —Rũ ngẽxguma chi choxnicèx pexna nacaxgu rũ ¿ñuxãcũ chi i ãxtape nũxna pexãxũ? ¹¹ —Rũ pema na pichixecũmachirèxũ rũ nũxũ pecuèx na mexũ i ãmare pexacũgũna pexãxũ. Natũrũ Penatũ ya daxũgucũ rũ ngẽma pema pexacũgũna pexãxũãrũ yexera tá tũxna naxã ya yixema naxũtawa naxcèx ícaxe. ¹² —Rũ pemaã nũxũ chixu, rũ ngẽma pema penaxwèxexũ i togu pemaã na naxũxũ, rũ name nixĩ i pema rũ ta ngẽmaãcũtama namaã penaxũ. Erũ ngẽmaãcũ tũxũ namu i Tupanaãrũ ore ga Moíche ùmatũxũ rũ yema ore ga nuxcũmaũgũxũ ga Tupanaãrũ orearũ uruũgũ ùmatũxũ.

Ãax i íraxũchiga (Lc 13.24)

¹³ —Name nixĩ i ngẽma ãx i íraxũwaama pichocu. Erũ ngẽma ãx i yuwa tũxũ gaxũ rũ ngẽma nama i yuwa daxũ rũ nata. Rũ muxũchixũma i duũxũgũ nagu naxĩ. ¹⁴ —Natũrũ ngẽma nama i maxũwa nadaxũ rũ ngẽma ãx i maxũcèx nawa ixũcuxũ rũ naxĩra. Rũ noxretama nixĩ i duũxũgũ i nũxũ iyangaugũxũ.

Wüxi i nanetü rü norü owa nixî i nüxü icuáxü
(Lc 6.43-44)

¹⁵—Rü naxcèx pexuãègü i ngëma doratèèxgüxü i nügü ixügünetaxü na Tupanaârü orearü uruügü yixîgüxü. Erü nümagü rü petanüwa nangugü, rü nügü mexü i duüxügüneta nixîgüxë. Natürü naãewa rü poraãcü chixexügu narüxinüë. ¹⁶—Rü pema rü nacümawa tá nüxü pecuèx i ngëma duüxügü, ngëxgumarüü i wüxichigü i nanetügü rü norü owa na nüxü icuáxürüü ngoxi name rü ãxna tama. Rü wüxi i torawa rü taxucürüwama ubagü tayaxu. Rü wüxi i chuchuxüwa rü taxucürüwama orix i igu tayaxu. ¹⁷—Erü guxüma i nanetü i mexü rü name i norü o. Rü guxüma i nanetü i chixexü rü nachixe i norü o. ¹⁸—Rü wüxi i nanetü i mexü rü taxucürüwama nachixe i norü o. Rü wüxi i nanetü i chixexü rü taxucürüwama name i norü o. ¹⁹—Rü guxüma i nanetü i tama mexü i norü o rü tayadaxüchi, rü ñuxüchi tayagu. ²⁰—Rü ngëxgumarüü nacümawa tá nüxü pecuèx i ngëma duüxügü i Tupanaârü orearü uruügüneta ixîgüxü.

Tātáma guxüma i duüxügü nichocu i ngextá Tupana ãëxgacü ñixüwa
(Lc 13.25-27)

²¹—Rü tama guxüma i duüxügü i nügü ixügüxü na chorü duüxügü yixîgüxü rü tá nichocu i ngextá Tupana ãëxgacü ñixüwa. Natürü yíxema aixcuma Chaunatü ya daxügücüga ñnüëxëxícatátama tixî ya ngëma ichocuxe. ²²—Rü ngëxguma ngëma ngunexü i naãeârü guxwa nanguxgu, rü muxüma i duüxügü rü choxü tá ñanagürügü: —Pa Corix, toma rü togü i duüxügümaã nüxü tixu i curü ore, rü cuégagu ítanawoxü i ngoxogü, rü cuégagu tanaxü i muxüma i mexü i taxü i Tupanaârü poramaã taxüxü —ñanagürügü tá choxü. ²³—Natürü ngëxguma rü tá ñacharügü nüxü: —Taguma chorü duüxügü pixîgü. ¡Rü choxna pixîgachi i pema i chixexü ügüe! —ñacharügü tá.

Yatü i Cristuga ñnüxü rü yatü i tama Cristuga ñnüxüchiga
(Mr 1.22, Lc 6.47-49)

²⁴—Rü ngëmacèx ya yíxema choxü ñnüxë rü naxüxe i ngëma choma tüxü chamuxü, rü wüxi ga yatü ga meã naãèxü cuácü ga nuta ga taciétügu üpatacürüü tixî. ²⁵—Rü pucü ga tacü ínangu, rü narümèx ga taxtü, rü nixüüchi ga wüxi ga tacü ga buanecü rü guma ígu nanguema. Natürü guma í rü tama niwëxtaü yerü wüxi ga nutaétügu naxü. ²⁶—Natürü yíxema choxü ñnüxë rü tama naxüxe i ngëma choma tüxü chamuxü, rü wüxi ga yatü ga tama naãèxü cuácü ga naxnücügumare üpatacürüü tixî. ²⁷—Rü pucü ga tacü ínangu, rü narümèx ga taxtü, rü wüxi ga tacü ga buanecü nixüüchi rü nagu nanguema ga guma í. Rü niwëxtaü, rü yexma nayarüxo ga guxüma —ñanagürü ga Ngechuchu. ²⁸ Rü yexguma yagüegagu ga Ngechuchu ga na yadexaxü, rü ga duüxügü rü nabëjächiaãgü namaã ga norü nguxëëtae. ²⁹ Yerü nüma rü Tupanaârü poramaã nanangüxëë, rü tama yema ngüxëëruügü ga ore ga mugüwa nguxëëtaegüxürüü nixî.

8

Ngechuchu rü wüxi ga rüchaxünexüçèx nayataanexëë
(Mr 1.40-45; Lc 5.12-16)

¹ Rü yexguma guma mëxpünewa yanaxüegu ga Ngechuchu, rü muxüma ga duüxügü nawe narüxî. ² Rü Ngechuchucèx nixü ga wüxi ga yatü ga chaxünemaã idaawecü. Rü Ngechuchupëxegu nayacaxápüxü, rü ñanagürü nüxü: —Pa Corix, ngëxguma chi cuma cunaxwëxegu, rü chí cuxü natauxcha

na choxũ curũmexẽẽxũ —ñanagũrũ. ³ Rũ yexguma ga Ngechuchu rũ nüxũ ningõgũ, rũ ñanagũrũ nüxũ: —Ngũ, chanaxwẽxe. ¡Rũme! —ñanagũrũ. Rũ yexguma yema ñaxgu ga Ngechuchu, rũ naxcẽx nitaane ga guma yatũ ga na nachaxũneãxũ. ⁴ Rũ Ngechuchu rũ ñanagũrũ nüxũ: —¡Dũcẽx, taxuemaã tá nüxũ quixu! ¡Natũrũ ngema paixũtawa naxũ, rũ cugũ iyawẽx! ¡Rũ nüxna naxã i ngẽma ãmare ga Moichẽ tũxũ muxũ na duũxũgũ nüxũ cuãxũcẽx na curũmexũ! —ñanagũrũ.

Ngechuchu rũ Dumacũãx ga churaragũarũ ãẽxgacũarũ duũxũxũ narũmexẽẽ
(Lc 7.1-10)

⁵⁻⁶ Rũ Capernãũwa naxũ ga Ngechuchu. Rũ yexguma yẽma nanguxgu, rũ wũxi ga churaragũarũ ãẽxgacũ ga capitãũ ga Dumacũãx rũ Ngechuchucẽx nixũ. Rũ Ngechuchuxũ nacẽxũ, rũ ñanagũrũ: —Pa Corix, chorũ duũxũ rũ nanawãixãchi. Rũ ngũrũcarewa nangẽxma i chopatawa, rũ poraãcũxũchima ngũxũ ninge —ñanagũrũ. ⁷ Rũ Ngechuchu rũ ñanagũrũ nüxũ: —Marũ tá ngema chaxũ na naxcẽx chayataanexẽẽxũcẽx —ñanagũrũ. ⁸ Natũrũ nũma ga capitãũ nanangãxũ, rũ ñanagũrũ: —Pa Corix, choma rũ taxuwama chame na chopatagu na cuxũcuxũcẽx. Rũ chanaxwẽxe i curũ orewaxicatama nüxũ quixu, rũ tá naxcẽx nitaane i chorũ duũxũ. ⁹ —Erũ choma rũ ta rũ chorũ ãẽxgacũmẽxẽwa changẽxma. Rũ choxmẽxwa nangẽxmagũ ta i ñuxre i churaragũ. Rũ ngẽxguma chanamuxgu i wũxi na ngextã naxũxũcẽx, rũ ngema naxũ. Rũ ngẽxguma chaugũxũtawa naxcẽx changemagu i to, rũ chauxũtawa nangu. Rũ ngẽxguma wũxi i chorũ duũxũxũ chamuxgu na tacũ na naxũxũcẽx, rũ choxũ nanaxũ —ñanagũrũ. ¹⁰ Rũ yexguma yemaxũ naxĩnũgu ga Ngechuchu rũ nabẽixãchiãẽ. Rũ ñanagũrũ nüxũ ga yema duũxũgũ ga nawe rũixũ: —Aixcũma pemaã nüxũ chixu rũ taxuũma i Yudiũgũtanũwa nüxũ ichayangau i wũxi i duũxũ i ñaã yatũrũã aixcũma yaxõxũ. ¹¹ —Rũ choma rũ pemaã nüxũ chixu rũ muxũchixũ i duũxũgũ rũ guxũwama tá ne naxĩ, rũ Tupana ãẽxgacũ íixĩxũwa tá nachibũe namaã ya tórũ oxigũ ya Abrãũ rũ Ichaã, rũ Acobu. ¹² —Natũrũ muxũma i Abrãũtanũxũgũ i Yudiũgũ rũ tãũtãma nichocu i ngextã Tupana ãẽxgacũ íixĩxũwa. Rũ eãnexũwa tá nawogũ. Rũ ngema tá naxauxe, rũ tá nixũxchapũtagũ —ñanagũrũ. ¹³ Rũ yexguma ga Ngechuchu rũ ñanagũrũ yema capitãũxũ: —¡Cupatacẽx nataegu! Rũ tá naxcẽx nitaane i curũ duũxũ, erũ cuyaxõ na naxcẽx tá yataanexũ —ñanagũrũ. Rũ yexgumatama naxcẽx nitaane ga yema capitãũãrũ duũxũ.

Ngechuchu rũ Pedru nẽxẽcẽx nayataanexẽẽ
(Mr 1.29-31; Lc 4.38-39)

¹⁴ Rũ Pedrupatawa naxũ ga Ngechuchu. Rũ yẽma ngĩxũ nadau ga Pedru nẽxẽ ga ngũrũcaregu irũxãũxũcũ yerũ iyaxaxũne. ¹⁵ Rũ Ngechuchu ngĩxmẽxgu ningõgũ, rũ yexgumatama igẽuxãchi ga yema na yaxaxũnẽxũ. Rũ íirũda ga ngĩmax. Rũ ñuxũchi naxcẽx inamexẽẽ ga õna.

Ngechuchu rũ muxũma ga idaaweexũcẽx nayataanexẽẽ
(Mr 1.32-34; Lc 4.40-41)

¹⁶ Rũ yexguma marũ yanaxũcuchaũgu ga uẽxcũ, rũ Ngechuchuxũtawa nanagagũ ga muxũma ga duũxũgũ ga ngoxoãxgũxũ. Rũ wũxitama ga oremaã Ngechuchu ínanawoxũ ga yema ngoxogũ. Rũ nanameẽxẽẽ ta ga guxũma ga yema togũ ga idaaweexũ. ¹⁷ Rũ yemaãcũ Ngechuchu nayanguxẽẽ ga yema ore ga nuxcũmaũxũ ga Tupanaãrũ orearũ uruũ ga Ichaxía nüxũ ixuxũ ga ñaxũ:

“Rü nüma rü tüxü naporaexêê i ngêxguma ituraegu, rü tüxü narümeexêê i ngêxguma idaaweegu”, ñaxü.

Duüxügü ga Ngechuchuwe rüixchaxüchiga
(Lc 9.57-62)

¹⁸ Rü yexguma Ngechuchu nüxü dëuxgu ga muxüma ga duüxügü na nüxü íchomaëguächixü, rü norü ngúexügümaã nüxü nixu, rü ñanagürü: —¡Rü ngíxã, rü naxtaxaarü tocutüwa taxí! —ñanagürü. ¹⁹ Rü wüxi ga ngúexêëruü ga ore ga mugüwa ngúxêëtaexü, rü Ngechuchucëx nixü, rü ñanagürü nüxü: —Pa Ngúexêëruü Pa Ngechuchux, cuwe charüxüxchaxü i ngextá cuma ícuxüxüwa —ñanagürü. ²⁰ Rü Ngechuchu nanangãxü rü ñanagürü: —Ngowagü rü nüxü nangëxma i naxmaügü, rü werigü rü nüxü nangëxma i naxchiãügü. Natürü choma i Tupana Nane na duüxüxü chüxü, rü nataxuma i chauchica i ngextá naga chicuxeruxü —ñanagürü. ²¹ Rü wüxi ga to ga norü ngúexü, rü ñanagürü nüxü: —Pa Corix, cuwe charüxüxchaxü, natürü chanaxwëxe i chaunatu tüxü ichayatëxira —ñanagürü. ²² Rü Ngechuchu nanangãxü, rü ñanagürü nüxü: —¡Noxtacüma chowe rüxü! Rü nüë i ngëma cutanüxü i tama yaxögüxü iyatëxgü i ngëma yuexü —ñanagürü.

Ngechuchu rü buanecüxü rü yuapexü inayachaxächixêê
(Mr 4.35-44; Lc 8.22-25)

²³ Rü yexguma ga Ngechuchu rü wüxi ga nguëgu nixüë. Rü norü ngúexügü rü ta inayaxümcügü, rü inaxiãchi. ²⁴ Rü ngürüãchi naxtaxaarü ngãxütügu nüxü naxü ga wüxi ga buanecü ga taxüchicü. Rü guma nguëwa rü niyau-cuchichigü ga dexá. Natürü ga Ngechuchu rü nape. ²⁵ Rü yexguma ga norü ngúexügü rü inanabëixgügü, rü ñanagürügü nüxü: —Pa Corix, ¡toxü rüngüxêê, erü ngëmama itabaxügü! —ñanagürügü. ²⁶ Rü Ngechuchu nanangãxü, rü ñanagürü nüxü: —Pa Duüxügü i Tama Aixcüma Yaxögüxüx, ¡tüxücüü pemüê? —ñanagürü. Rü yexguma ga Ngechuchu rü inarüda. Rü buanecü rü yuapena nachogü. Rü inayachaxächica ga buanecü, rü inayarüxo ga yuape, rü inachaxanemare. ²⁷ Rü nümagü ga norü ngúexügü rü nabëixächiciãëgü, rü nügümaã ñanagürügü: —¡Tacü éxna nixí i ñaã yatü rü ngëmacëx woo ya buanecü rü yuape rü naga naxinüëxü? —ñanagürügü.

Yatügü ga Gadarácülãx ga ngoxogü nawa yexmagüxü
(Mr 5.1-20; Lc 8.26-39)

²⁸ Rü Ngechuchu rü norü ngúexügü rü naxtaxaarü tocutüwa nangugü ga Gadáaarü naãnewa. Rü yexguma yëma nangugügu, rü Ngechuchucëx yëma nibuxmü ga taxre ga yatügü ga duüxëchiquëxetanügu yarüxachigütanüneüxü. Rü yëma taxre rü ningoxoãx, rü nidüraëxüchi. Rü yëmacëx taxucürüwama texé yëma namawa taxüpetü. ²⁹ Rü yëma taxre rü aita naxüë, rü ñanagürügü: —¡Tüxücüü toxü nuã cuyachixewe, Pa Ngechuchu ya Tupana Nane? ¡Éxna nuã cuxü na toxü ícuyawoxüxüçëcë tauta nawa nanguyane na Tupana toxü poxcuëxü? —ñanagürügü. ³⁰ Rü yëma nachicaarü ngaicamana nachibüë ga muxüma ga cuchigü. ³¹ Rü yëma ngoxogü rü Ngechuchuxü nacëëxügü, rü ñanagürügü: —Rü ngëxguma toxü ícuwoxügü, ¡rü ngëma cuchigügu toxü nachocuxëê! —ñanagürügü. ³² Rü yexguma ga Ngechuchu, rü ñanagürü nüxü: —Écü, ¡ngëma pexí! —ñanagürü. Rü yexguma ga yëma ngoxogü rü inachoxü nawa ga yëma taxre ga yatügü, rü yëma cuchigügu nayachocu. Rü ñuxüchi guxüma ga yëma cuchigü rü

inaxũãchi, rü naxtaxacutũarũ mèxpũxũwa nayarũyuxgũ, rü yexma nayi.
 33 —Rü yema cuchigũarũ dauruũgũ rü nabèixãchiãègũ, rü ìãnecèx nibuxmũ.
 Rü yexguma ìãnewa nangugũgu, rü nüxũ nixugũgũ ga guxũma ga yema
 ngupetũxũ ga ñuxãcü naxcèx na yataanegũxũ ga yema taxre ga yatũgũ ga
 ngoxoãngxũxũ. 34 —Rü yexguma ga guxũma ga yema ìãnecũãx ga duũxũgũ,
 rü Ngechuchuxũtawaxũ. Rü yexguma Ngechuchuxũ nadaugũgu, rü nüxũ
 nacèxũgũ na ìnaxũxũxũcèx ga yema norũ naãnewa.

9

Ngechuchu rü wũxi ga yatũ ga nawãixãchicũcèx nayataanexèè (Mr 2.1-12; Lc 5.17-26)

1 Rü yexguma ga Ngechuchu rü wũxi ga ngeugu nixũe. Rü naxtaxaarũ to-
 cutũwa naxũ, rü noxrũtama ìãnewa nangu. 2 Rü yema guma ìãnewa rü duũxũgũ
 rü Ngechuchuxũtawaxũ nanangetaũgũ ga wũxi ga yatũ ga nawãixãchicũ. Rü
 yexguma Ngechuchu nüxũ dèuxgu ga ñuxãcü aixcũma na yaxõgũãxũ ga
 yema duũxũgũ rü ñanagũrũ nüxũ ga guma idaawecũ: —¡Nataãè, Pa Chaunex!
 Erũ curũ pecadugũ rü marũ cuxũ nüxũ changechaũ —ñanagũrũ. 3 Rü
 yema nayexma ga ñuxre ga ngũxèèruũgũ ga ore ga mugũwa ngũxèètaegũxũ.
 Rü nümagũ rü naãxègũwa ñanagũrũgũ: —¿Ñãã yatũ rü tacũ Tupanamaã
 nixugũ? —ñanagũrũgũ. 4 Natũrũ ga Ngechuchu rü nüxũ nacũxama ga yema
 naãèwa nagu naxĩnũxũ. Rü yemacèx ñanagũrũ nüxũ: —¿Tũxcũxũ chixexũgu
 perũxĩnũè? 5 —¿Tacũ nixĩ i ngèma rũtauxchamaèxũ na namaã nüxũ ixuxũ ya
 daa nawãixãchicũ:

“Rü curũ pecadugũ rü marũ cuxũ nüxũ changechaũ”, rü èxna:

“¡Inachi rü ìixũ!” ñagũxũ nüxũ? 6 —Natũrũ i ñuxma rü tá pexũ nüxũ
 chadauxèè na Chaunatũ ya Tupana núma choxũ muxũ na duũxũgũaxũ nüxũ
 changechaũxũcèx i norũ pecadugũ —ñanagũrũ. Rü yexguma rü ñanagũrũ
 nüxũ ga guma nawãixãchicũ: —¡Inachi, rü nayaxu i curũ carũ, rü cupatawa
 naxũ! —ñanagũrũ. 7 —Rü yexgumatama ga guma nawãixãchicũ rü inachi,
 rü napatawa naxũ. 8 Rü yexguma yemaxũ nadaugũgu ga duũxũgũ, rü
 poraãcü namuèè. Rü Tupanaxũ nicuèxũgũ, rü ñanagũrũgũ: —Moxè, Pa
 Tupanax, erũ canaporaxèè i ñãã yatũ na ngèmaãcü mexũ toxcèx naxũxũcèx
 —ñanagũrũgũ.

Mateucèx naca ga Ngechuchu (Mr 2.13-17; Lc 5.27-32)

9 Rü yexguma yema inaxũãchigu ga Ngechuchu, rü yema nüxũ nadau
 ga wũxi ga yatũ ga Mateugu àegaxũ ga yema rũtoxũ ga ngextá Dumaãrũ
 àèxgacũcèx dũru ngĩxũ ìnayauxgũxũwa yerũ woetama yemawa napuracũ. Rü
 Ngechuchu rü ñanagũrũ nüxũ: —¡Chowe rũxũ! —ñanagũrũ. Rü yexguma ga
 Mateu rü inachi, rü nawe narũxũ. 10 Rü Mateupatawa naxũ ga Ngechuchu,
 rü yema nachibũ. Rü ìnangugũ ta ga muxũma ga togũ ga duũxũgũ ga Du-
 maãrũ àèxgacũcèx dũru ngĩxũ yauxgũxũwa puracũxũ, rü togũ ga duũxũgũ
 ga taxũema nacũmamaã taãègũxũ. Rü yema duũxũgũ rü yema mechawa
 narũtogũ namaã ga Ngechuchu rü norũ ngũxũgũ. 11 Natũrũ yexguma
 yemaxũ nadaugũgu ga Parichègũ, rü Ngechuchuarũ ngũxũgũna nacagũ, rü
 ñanagũrũgũ: —¿Ñuxãcü i perũ ngũxèèruũ rü namaã nachibũ i àèxgacũarũ
 duũxũgũ i dũruarũ yauxwa puracũxũ, rü duũxũgũ i pecaduãngxũxũ? —
 ñanagũrũgũ. 12 Rü yexguma yemaxũ naxĩnũgu ga Ngechuchu, rü ñanagũrũ
 nüxũ ga Parichègũ: —Ngèma poraxũ rü tama nanaxwèxegũ ya duturu,

natürü ngêma idaaaweexü nixî i naxwêxegüxü. ¹³ —jRü ípixî, rü nawa pengúe i Tupanaärü ore i ümatüxü i ñaxü:

“Choma rü tama chanaxwêxe i chauxcêx peyamêx i carnerugü, natürü chanaxwêxe i togü pexü nangechaütümüügü”, ñaxü! Rü ñanagürü ta ga Ngechuchu: —Choma rü tama mexüguna na chauxücêx nixî i núma chaxüxü, natürü núma chaxü na núma chauxücêx i ngêma pecaduãxgüxü na ngêmaãcü nüxü naxoexücêx i nacümagü i chixexügü —ñanagürü.

Ngechuchuna nacagüe ga aurechiga
(Mr 2.18-22; Lc 5.33-39)

¹⁴ Rü yexguma ga Cuáü ga baiüxêëruüärü ngüexügü, rü Ngechuchucêx naxî, rü núma nacagüe, rü ñanagürügü: —Toma i Cuáüärü ngüexügü na tixígüxü rü númagü i Parichéugü rü muëxpüxcüna tama tachibüeácüma tayumüxégü. ¿Rü tüxcüü i curü ngüexügü rü tama toxrüü tama nachibüácüma nayumüxégü? —ñanagürügü. ¹⁵ Rü Ngechuchu nanangäxü rü ñanagürü: —¿Éxna wüxi i ngígüarü petawa rü pexcêx namexü na nangechaüêxü rü naxaureexü i ngêma núma naxugüxü ega natanüwa nangêxmagu i ngêma yatü i ngexwacêx ämaxü? Maneca tama nixî. Natürü wüxi i ngunexügu rü ngêma yatü i ngexwacêx ämaxü rü tá namücügüna nixügüchi. Rü ngêma ngunexügu tá nixî i aixcüma naxaureexü i namücügü. ¹⁶ —Rü taxüema tanapaita i wüxi i naxchiru i ngauxü namaã i wüxi i natüchi i ngexwacaxüxü i tauta nañaächimüxü. Erü ngêxguma nayauxgu i ngêma naxchiru rü tá nügü Ínanaxíraxächi i ngêma natüchi i ngexwacaxüxü, rü tá nanagauxêë i ngêma wexachiru. Rü noxriarü yexera tá nixî i na nagauxü. ¹⁷ —Rü ngêxgumarü ta rü taxüema ngexwacaxücü ya binu rü nagu tayabacuchi i wüxi i naxchixü i marü ngauxü i naxchêxmünaxcêx. Erü ngêxguma ngêmaãcü naxüxgu rü yima binu ya ngexwacaxücü rü narüngu, rü tá nayawäixêë i ngêma naxchixü i ngauxü i naxchêxmünaxcêx. Rü ngêxma tá nayarütaxu ya binu rü ngêma naxchixü rü ta. Rü ngêmacêx tanaxwêxe ya ngexwacaxücü ya binu rü ngexwacaxüxü i naxchixügu tayabacuchi. Rü ngêmaãcü táitáma inayarütaxu. [Rü chorü nguxêëta i ngexwacaxüxü rü ngêxgumarü ta nixî na taxucürüwama namaã nawüxigüxü i ngêma nuxcümaüxü i pecümagü —ñanagürü ga Ngechuchu.]

Yáiruxacüchiga rü yema nge ga Ngechuchuchirugu ingögücüchiga
(Mr 5.21-43; Lc 8.40-56)

¹⁸ Rü yexguma yemaãcü íngüexêëtaeyane ga Ngechuchu, rü naxütawa nangu ga wüxi ga äëxgacü ga Yudíugüarü. Rü Ngechuchupêxegu naya-caxápüxü, rü ñanagürü nüxü: —Pa Corix, chauxacü rü ngexwacêx iyu. Natürü ngêxguma chi ngema cuxüxgu rü ngíxü quingögügu, rü wena chixarü imaxü —ñanagürü. ¹⁹ Rü inachi ga Ngechuchu, rü norü ngüexügümaã yema äëxgacüwe narüxü. ²⁰ Rü yexguma yéma naxüyane ga Ngechuchu rü wüxi ga ngecü ga 12 ga taunecü ägüechacü rü naweama ne ixü. Rü naxpechinüchirugu iyangögü. ²¹ Yerü ngíma rü nagu irüxínü rü yexguma chi naxchiruxüxícatama yangögümaregu, rü chi ngíxcêx nitaane. ²² Natürü núma ga Ngechuchu rü nügü inidau, rü ngíxü nadau ga yema nge. Rü ñanagürü ngíxü: —jNataãë, Pa Chauxacü! Marü cuxcêx nitaane, erü cuyaxö —ñanagürü. Rü yexgumatama ngíxcêx nitaane. ²³ Rü yexguma yema äëxgacüpatawa nanguxgu ga Ngechuchu, rü nüxü nadau ga paxetatanüxü ga marü na inamemaregüxü na ngíxü iyatêxgüxü ga yema bucü. Rü ga duüxügü rü nixáicha rü naxauxe. ²⁴ Rü

Ngechuchu ñanagürü nüxü ga yema duüxügü: —Ípechoxü i nuã! Erü ngëma bucü rü tama iyu. Rü ipemare —ñanagürü. Natürü nümagü ga duüxügü rü Ngechuchuxü nacugüeama. ²⁵ Rü yexguma Ngechuchu inachoxüxëëxgu ga duüxügü, rü yema buciarü ucapugu naxücu. Rü ngïxmëxgu nayayauxächi, rü yexgumatama írüda ga ngïmax. ²⁶ Rü guxüwama ga yema naãnewa, rü duüxügü nüxü nixuchigagü ga yema Ngechuchu üxü.

Ngechuchu naxcëx nayataanexëë ga taxre ga yatü ga ingexetüxü

²⁷ Rü yexguma yëma ínaxüüxgu ga Ngechuchu, rü taxre ga ngexetüxü rü nawe nangëgü. Rü tagaãcü ñanagürügü: —Pa Ngechuchux, Pa Dabítanüxüx, ¡cuxü tangechaütümüügü! —ñanagürügü. ²⁸ Rü yexguma Ngechuchu guma í ga nagu napexünegu naxücuxgu, rü yema taxre ga ngexetüxü rü naxcëx naxí. Rü Ngechuchu nüxna naca, rü ñanagürü: —¿Peyaxögüxü yíxü na chaporaxü na pexü charümeëxëëxücëx? —ñanagürü. Rü nümagü nanangãxügü, rü ñanagürügü: —Ngü, Pa Corix, tayaxögü —ñanagürügü. ²⁹ Rü yexguma ga Ngechuchu rü naxëtügügu ningögü, rü ñanagürü nüxü: —¡cü pexcëx yataane, erü peyaxögü! —ñanagürü. ³⁰ Rü naxcëx nitaanegü. Rü Ngechuchu rü poraãcü nayaxucuxëgü na taxúemaãma nüxü na yaxugüxücëx ga yema nüxü ngupetüxü. ³¹ Natürü yema taxre rü yexguma yëma inachoxügu rü guxüwama ga yema naãnewa rü nüxü nixugüeama ga yema Ngechuchu üxü.

Ngechuchu rü naxcëx nayataanexëë ga wüxi ga yatü ga tama idexacü

³² Rü yexguma yema taxre ga yatü íchoüxguwena, rü ñuxre ga duüxügü rü Ngechuchuxütawa nanagagü ga wüxi ga yatü ga tama idexacü yerü ngoxo nawa nayexma. ³³ Rü Ngechuchu ínatëxüchi ga yema ngoxo. Rü yexgumatama ínanaxügü ga na yadexaxü ga guma yatü. Rü nümagü ga duüxügü rü nabëixächiaëgü. Rü ñanagürügü: —Taguma nüxü tadau i nuã tachiüãnewa i ¡tacü i ñaarüü íxíxü —ñanagürügü. ³⁴ Natürü ga Parichëgü rü ñanagürügü: —Ñaa yatü rü ngoxogüarü äëxgacü i Chatanáarü poramaã nixí i ínawoxüãxü i ngoxögü —ñanagürügü.

Ngechuchuaxü nangechaütümüügü ga duüxügü

³⁵ Rü yema naãnewa rü guxüñema ga íãnegügu rü íãnexãcügügu nixügüchigü ga Ngechuchu. Rü wüxichigü ga íãnewa, rü duüxügüarü ngutaquëxepataüwa ningüëëtaechigü. Rü duüxügümaã nüxü nixuchigü ga ore ga mexü na ñuxãcü äëxgacü na yíxü ya Tupana. Rü nanameëxëë ga duüxügü ga idaaweexü. Rü woo nañuxraüxü ga norü daawe nüxü yexmaxü, rü nanameëxëë. ³⁶ Rü yexguma Ngechuchu nüxü deüxgu ga yema muxüma ga duüxügü ga naxütawa ngugüxü, rü nüxü nangechaütümüügü. Yerü carnerugü ga ngearü dauruüãxürüü nanaxixächiaëgü, rü tama nataaëgü. ³⁷ Rü yexguma ga Ngechuchu rü ñanagürü nüxü ga norü ngüexügü: —Aixcüma pemaã nüxü chixu rü nangëxma i muxüchixü i duüxügü i ímemaregüxü na yaxögüãxü i Tupanaarü ore. Natürü nanoxreëxpüx i Tupanaarü puracütanüxü na namaã nüxü yaxugüxücëx i ngëma ore. ³⁸ Rü ngëmacëx name nixí i duüxügüarü yora ya Tupanana naxcëx peca i perü yumüxëwa na yamugüãxücëx i norü puracütanüxü i orearü uruügü na ngëma duüxügümaã nüxü yaxugüxücëx i norü ore i mexü —ñanagürü ga Ngechuchu.

10

Ngechuchu nanade ga 12 ga norü ngüexügü na toxnamana namugüãxücëx (Mr 3.13-19; Lc 6.12-16)

¹ Rū yexguma ga Ngechuchu, rū yema 12 ga norū ngúexǔgúcèx naca. Rū nūxna naxāga rū nanaporaexēē na ínawoxǔāxǔcèx ga ngoxogū rū nameēxēēāxǔcèx ga duǔxǔgū ga idaaweexǔ ga woo nañuxraǔxǔ ga daawe nūxǔ yexmaxǔ. ² Rū ñaā nixǔ ga naegagū ga yema 12 ga Ngechucharū ngúexǔgū ga imugǔxǔ. Rū natanūwa rū Chimáú ga Pedrugū āegacū nixǔ ga naēru íxǔ. Rū to nixǔ ga Pedrueneē ga Aǔdré. Rū to nixǔ ga Chaǔtiágu rū to nixǔ ga Chaǔtiágueneē ga Cuáú. Rū yema taxre rū Zebedéu nanegū nixǔgū. ³ Rū togū nixǔ ga Piripi, rū Baturumé, rū Tumachi, rū Mateu ga Dumaārū āēxgacūcèx díeruarū yauxwa puracūchirécū. Rū togū nixǔ ga Chaǔtiágu ga Arupéu nane, rū Tadéu. ⁴ Rū to nixǔ ga Chimáú ga iporaāēcūcū. Rū to nixǔ ga Yuda ga Icariúte ga yixcama bexma cúācū Ngechuchuxǔ íxuaxǔxǔ.

Ngechuchu rū norū ngúexǔgǔxǔ nimugū na nūxǔ yanaxugúexǔcèx ga norū ore

(Mr 6.7-13; Lc 9.1-6)

⁵ Rū Ngechuchu nayamugū ga yema 12 ga norū ngúexǔgū. Rū nūxna naxāga, rū ñanagūrū: —¡Tāútama natanūwa pexǔ i ngēma duǔxǔgū i tama Yudíugū íxǔgǔxǔ! ¡Rū tāútama Chamáriacǔāx i duǔxǔgūarū íānegūwa pexǔ! ⁶—Natūrū chanaxwèxe i ngēma Yudíugū i carnerugūrū iyarūtauxexǔtanūwa pexǔ. ⁷—¡Rū ngēma natanūwa nūxǔ peyarǔxu na marū yangaicaxǔ ya Tupana na norū āēxgacū yǔxǔ! ⁸—¡Rū penameēxēēx i ngēma duǔxǔgū i idaaweexǔ! ¡Rū wena penamaxēxēēx i ngēma duǔxǔgū i marū yuexǔ! ¡Rū penameēxēēx i ngēma duǔxǔgū i chaxúnemaā idaaweexǔ! Rū ngēma duǔxǔgū i ngoxogū nawa ngēxmagǔxǔ ¡rū nūxǔ ípenawoxǔxǔ! Rū tama name i penaxātanū ega texéxǔ perǔmexēēxgu, erū pema rū pexǔ nangetanūmare i ngēma pora. ⁹⁻¹⁰—¡Rū tāútama ípingearū díeruāxǔgū na perǔ ꜜacūcèx petaxegǔxǔcèx rū bai i perǔ choca i perǔ namawaǔ! ¡Rū wūxitama i pexchiru ípinge, rū bai i perǔ chapatu, rū bai ya perǔ caxǔchigǔxǔ ya naǔxmenēxā ípinge! Rū pemaā nūxǔ chixu rū wūxi i puracūtanǔxǔ rū name nixǔ i ngēma duǔxǔ i nūxǔ napuracūǔxǔtawa nachibū. ¹¹—Rū ngēxguma wūxi ya íānewa rū ēxna wūxi ya íānexācūwa pengugūgu i pemax, ¡rū naxcèx pedèux i wūxi i duǔxǔ i mecūmaxǔ! ¡Rū ngēmaxǔtagu perǔcho ñuxmatáta ípexǔāchi i ngēma íānewa! ¹²—Rū ngēxguma yima ípatagu pechocugu, rū meā tá nūxǔ perǔmoxégū i ngēma duǔxǔgū i ngēma ngēxmagǔxǔ rú: “¡Tupana pexǔ rǔngǔxēēx!” ñaperǔgūgu tá nūxǔ. ¹³—Rū ngēxguma ngēma duǔxǔgū rū meā pexǔ nayauxgu rū Tupana tá nūxǔ narǔngǔxēē. Natūrū ngēxguma tama meā pexǔ nayauxgu i napatawa rū ñaperǔgūgu tá nūxǔ:

“Marū name i toxnamana taxǔ”, ñaperǔgūgu tá. ¹⁴—Rū ngēxguma wūxi ya íwa rū ēxna wūxi ya íānewa duǔxǔgū tama meā pexǔ yauxgūgu rū tama nūxǔ naxǔñūēchaǔgu i perǔ ore, ¡rū ípechoxǔ! Rū ngēxguma ípechoǔxǔgu, ¡rū meā pegū ípepagūcutū i perǔ úxaxǔcutū, na ngēmawa nūxǔ nacuēxǔgǔxǔcèx na chixexǔ na naxǔgǔxǔ i ngēma duǔxǔgū! ¹⁵—Rū aixcuma pemaā nūxǔ chixu rū ngēma ngunexǔ i nagu nagǔxǔ i naāne, rū Chodomacǔāx rū Gomoracǔāx i duǔxǔgūarū yexera Tupana tá nanapoxcxe i ngēma duǔxǔgū i tama meā pexǔ yauxgǔxǔ.

Guxchaxǔgumaā tá pewé ningexǔtanū i duǔxǔgū

¹⁶—Dúcèx, āucūmaxǔtwa pexǔ chamugū, ngēxgumarū i carnerugǔxǔ aigǔtanūwa imugǔxǔrū. ¡Rū ngēmacèx penaxwèxe i āxtapegūrū pexuāégū, natūrū muxtucugūrū taxuǔma i chixexǔ pexǔgū! ¹⁷—¡Rū pegūna pedaugǔ!

Erü duïxügü rü tá pexü ínayauxü, rü ãëxgacügüxütawa tá pexü nagagü na pexü napoxcuexüçèx. Rü ngutaquëxepataügü tá pexü niçuaixgü. ¹⁸ —Rü chaugagu tá ãëxgacügü ya tacügüpëxewa pexü nagagü. Rü ngëmaacü tá chauchigagu pidexagü napëxewa i ngëma ãëxgacügü rü napëxewa i ngëma duïxügü i tama Yudiügü íxígüxü. ¹⁹ —Natürü ngëxguma ãëxgacügüpëxewa pexü nagagü na pexü napoxcuexüçèx, jrü taxucëxéx pexoegaãëgü na facümaã tá penangãxüxü rü éxna çacüxü tá namaã na pixuxü! Erü ngëxguma nawa nanguxgu na pidexagüxü, rü Tupanaãë tá pexü nanguxëë na çacüxü tá namaã pixuxü. ²⁰ —Rü täütáma pema nixí i pidexagüxü, natürü Tupanaãë i Ünexü tá nixí i pewa idexaxü. ²¹ —Rü nügüeneëgüwa rü tá nügü ínaxuaxügü na ãëxgacügü yamëxgüxüçèx. Rü ngëxgumarüü tá ta nanatügü rü naxãcügüxü ínaxuaxügü, rü naxãcügü rü nanatügüxü tá ínaxuaxügü na ãëxgacügü tüxü imëxgüxüçèx. ²² —Rü chaugagu tá guxü i duïxügü pexchi naxaie. Natürü yíxema aixcüma yaxõmáxë i chorü ore rü tama choxü ítäxe, rü yíxema tá tixí ya nayaxúxe i ngëma maxü i taguma gúxü. ²³ —Rü ngëxguma wüxi ya íãnewa rü duïxügü pexü daixchaügu, rü name nixí i pibuxmü ya yima íãnewa, rü náí ya íãnewa pexí. Rü aixcüma pemaã nüxü chixu rü täütáma guxüne ya Yudiügüarü íãnewa pengugü naxüpa na chataeguxü i chomax. ²⁴ —Rü taxuüma i wüxi i ngüexü rü norü ngüexëëruüxü narüyexera. Rü taxuüma i wüxi i coriarü rü norü corixü narüyexera. ²⁵ —Rü ngëma norü ngüexëëruüxü üpetüxürüü tátama nüxü naxüpetü i ngëma norü ngüexü. Rü ngëma norü corixü üpetüxürüü tátama nüxü naxüpetü i ngëma norü duïxü. Rü ngëxguma duïxügü rü ngoxo i Bechebú choxü nawogüegu, çrü ñuxãcü tá pexü naxu i pemax?

Name nixí na Tupanaxü pemuüëxü
(Lc 12.2-7)

²⁶ —Rü ngëmacèx jtãxü i nüxü pemuüëxü i ngëma duïxügü! Erü guxüma i ngëma cúãcü üxü rü tá nangoxoma. Rü guxüma i ngëma ñuxma duïxügüçèx ëxügüxü, rü yixcüra rü tá nüxü nacüëxgüma. ²⁷ —Rü guxüma i ngëma pemaãxícatama nüxü chixuxü, jrü meã duïxügüçèx penangoxëëx! Rü guxüma i ngëma bexma pemaã nüxü chixuxü, jrü tagaãcü guxü i duïxügümaã nüxü pixu! ²⁸ —jrü jtãxü i nüxü pemuüëxü i ngëma duïxügü i pexü daixchaüxü! Erü taxünexüxícatama nimëxgü. jrü Natürü name nixí i nüxü pemuüë ya yima Tupana! Erü nüma nüxü nangëxma i pora na napoxcuãxüçèx i pexene rü peãë rü tá i ngëma ngoxogüxü ínapoxcuexügu. ²⁹ —çTama éxna wüxítachinü i díerugu namaã petaxe i taxre i werixacügü? Natürü bai i wüxi i ngëma werixacü rü ñaxtüanegu nangu, ega tama nanaxwëxegu ya Penatü ya Tupana. ³⁰ —Rü woo i peyae rü Tupana rü wüxichigü rü nayaxugü, rü nüxü nacüëx na ñuxre ngëxmaxü. ³¹ —Rü ngëmacèx jtãxü i pemuüëxü! Erü pema rü muxüma i werixacügüarü yexeraxüchi pexü nangechaü ya Tupana.

Yíxema duïxügüpëxewa tügü ixuxe na Ngechuchu ya Cristuarü duïxügü tiixü
(Lc 12.8-9)

³² —Rü guxáma ya texé i ñoma i naãnewa i duïxügüpëxewa tügü ixuxe na chorü duïxü tiixü, rü choma rü tá ta Chaunatü ya daxügücüpëxewa tüxü chixu na chorü duïxü tiixü i tümax. ³³ —Natürü texé ya ñoma i naãnewa i duïxügüpëxewa tügü ixuxe na tama chorü duïxü tiixü, rü choma rü tá ta Chaunatü ya daxügücüpëxewa tüxü chixu na tama chorü duïxü tiixü i tümax.

Ngechuchugagu nixĩ i yatoyexũ i duĩxũgũ
(Lc 12.51-53; 14.26-27)

³⁴—Rũ tama name i nagu perũxĩnũe na nũma chaxũxũ na guxũ i duĩxũgũ rũ wũxigu naxĩnũxũcèx. Natũrũ pemaã nũxũ chixu rũ nũma chaxũ na chaugagu yatoyexũcèx i duĩxũgũ. ³⁵—Rũ nuã chaxũ na wũxi ya yatũ rũ tama nanatũmaã wũxigu naxĩnũxũcèx, rũ wũxi i paxũ rũ tama naẽmaã wũxigu naxĩnũxũcèx, rũ wũxi i naneãx rũ tama ngĩxẽmaã na wũxigu naxĩnũxũcèx. ³⁶—Rũ ngẽmaãcũ wũxi ya ĩwa, rũ nũgũtanũxũmaã tátama naxuwanũãxgũ. ³⁷—Rũ yĩxema texé ya choxũ na tangechaũxũãrũ yexera tũmanatũxũ rũ ěxna tũmaẽxũ ngechaũxẽ, rũ taxucũrũwama chorũ duĩxũ tixĩ. Rũ yĩxema texé ya choxũ na tangechaũxũãrũ yexera tũmanexũ rũ ěxna tũmaxãcũxũ ngechaũxẽ, rũ taxucũrũwama chorũ duĩxũ tixĩ. ³⁸—Rũ yĩxema tama yaxna namaã ĩnũxẽ i ngẽma guxchaxũgũ i chaugagu tũmacèx ĩnguxũ rũ ngẽmaãcũ chowe rũxũxẽ, rũ taxucũrũwama chorũ duĩxũ tixĩ. ³⁹—Rũ texé ya tũgũ maxẽẽchaũxẽ rũ tá itayarũtaxu. Natũrũ texé ya chauxcèx yuxe rũ tá tanayaxu i maxũ i taguma gũxũ.

Ãmarechiga
(Mr 9.41)

⁴⁰—Rũ texé ya pexũ yaxũxe rũ choxũ nixĩ i tayaxuxũ. Rũ texé ya choxũ yaxũxe rũ yima nũma choxũ mucũ ya Chaunatũxũ nixĩ i tayaxuxũ. ⁴¹—Rũ texé ya wũxi i orearũ uruũ i Tupana ngẽma muxũxũ yaxũxe, rũ ngẽmatama ãmare i wũxi i orearũ uruũ yaxuxũraũxũ tátama tayaxu. Rũ texé ya wũxi i yatũ i mecũmaxũxũ yaxũxe erũ namecũma, rũ ngẽmatama ãmare i wũxi i yatũ i mecũmaxũ yaxuxũraũxũ tátama tayaxu. ⁴²—Rũ texé ya wũxi i pochuyuãcu i dexá i gẽuxchiũxũ nũxna ãxẽ i ngẽxũrũũxũ i chorũ buxũgũ i chowe rũxĩxũ, rũ aixcũmaxũchi tá tanayaxu i tũmaãrũ ãmare —ñanagũrũ ga Ngechuchu.

11

Cuãũ ga baiũxẽerũũ nanamu ga ñuxre ga norũ duĩxũgũ na Ngechuchuxũtawa ĩyadaugũxũcèx
(Lc 7.18-35)

¹ Rũ yexguma nũxũ nachauxgu ga Ngechuchu ga na yaxucuxẽgũãxũ ga yema 12 ga norũ ngũxũgũ, rũ inaxũãchi ga yema na duĩxũgũxũ nangũxẽxũcèx rũ nũxũ yaxũxũcèx ga ore ga mexũ ga guxũne ga ĩãnegũ ga yema naãnewa yexmagũnewa. ²⁻³ Rũ Cuãũ ga baiũxẽerũũ rũ yexguma poxcupataxũwa nayexmayane, rũ nũxũ nacuãxchiga ga yema Ngechuchu xũxũ. Rũ yemacèx ga Cuãũ rũ Ngechuchuxũtawa nanamugũ ga ñuxre ga norũ duĩxũgũ na nũxna yacagũxũcèx rũ aixcũma Cristu ga ĩnguxẽẽgũcũ yĩ, rũ ěxna to tá yĩ ga Cristu. ⁴ Rũ Ngechuchu nanangãxũ rũ ñanagũrũ nũxũ ga yema duĩxũgũ: —jPewoegu rũ Cuãũmaã nũxũ peyarũxu i ngẽma pematama nũxũ pedaugũxũ rũ nũxũ pexĩnũxũ! ⁵—jRũ namaã nũxũ pixu rũ ngẽma ngexetũgũxũ rũ marũ nidauchigũ, rũ ngẽma ichixeparaxũ rũ marũ inachigũ, rũ ngẽma chaxũneãxgũxũ rũ marũ naxcèx nitaanegũ, rũ ngẽma ngauchĩxẽgũxũ rũ marũ ningoxnamachĩxẽgũ, rũ ngẽma yuexũ rũ wenaxãrũ namaxẽ, rũ ngẽma ngearũ ngẽmaxũãxgũxũ rũ marũ namaã nũxũ tixu i Tupanaãrũ ore i mexũ! ⁶ Rũ tataãe ya yĩxema texé ya tama nũxũ rũxoxe na choxũ tayaxõxũ —ñanagũrũ ga Ngechuchu. ⁷ Rũ yexguma nawoeguxgu ga yema Cuãũ ga baiũxẽerũũãrũ duĩxũgũ, rũ Ngechuchu inanaxũgũ ga guma Cuãũchiga na yadexaxũ. Rũ ñanagũrũ nũxũ ga duĩxũgũ: —jTacũ

nixĩ ga pema ípeyadaugũxũ ga dauxchitawa ga ngextá taxúema íxãpataxũwa? —¿Éxna wũxi ga ngẽxũrũũxũmare ga yatũ ga ñoma dexne ga buanecũ yaxĩãxtanũcũxẽẽcũrũũ íxĩxũ nixĩ ga ípeyadaugũxũ? ⁸—Rũ éxna ega tama guma ípeyadaugũgu, ¿rũ tacũ nixĩ ga ípeyadaugũxũ? ¿Éxna wũxi ga yatũ ga poraãcũ nũgũ ngẽxãẽxũ yĩĩxũ ga ípeyadaugũxũ? Pema nũxũ pecuẽx i ngẽma poraãcũ nũgũ ngẽxãẽgũxũ rũ ãẽxgacũgũ ya tacũgũpatawa nangẽxmagũ. ⁹—¿Tacũ éxna nixĩ ga ípeyadaugũxũ? ¿Éxna wũxi ga Tupanaãrũ orearũ uruũxũ? Ngẽmããcũ aixcũma yema nixĩ ga ípeyadaugũxũ. Rũ pemaã nũxũ chixu rũ Cuáũ ya baiũxẽẽruũ rũ tama wũxi i ngẽxũrũũxũmare i Tupanaãrũ orearũ uruũ nixĩ. ¹⁰—Rũ Cuáũchiga nixĩ ga naxũmatũxũ ga yema Tupanaãrũ ore ga ñaxũ: “Cupẽxegu chayama i chorũ orearũ ngerũ na cuxcẽx namexẽẽaxũcẽx i duũxũgũarũ maxũ”,

ñaxũ. ¹¹—Rũ aixcũma pemaã nũxũ chixu rũ guxũ i duũxũgũtanũwa rũ nataxuma i Tupanaãrũ orearũ uruũ i Cuáũ ya baiũxẽẽruũãrũ yexera íxĩxũ. Natũrũ yĩxema Tupana ãẽxgacũ íxĩxũwa wixwexũchi ùxe, rũ Cuáũãrũ yexera tixĩ. ¹²—Rũ yexguma noxri Cuáũ ya baiũxẽẽruũ inaxũgũgu na nũxũ yaxũxũ i ñuxãcũ Tupana ãẽgacũ íxĩxũwa nangugũxũ i duũxũgũ, rũ nũma ga duũxũgũ rũ norũtama ngũchaxũmaã nawa nangugũchaxũ i ngema nachica. Rũ ñuxma rũ ta ngemagutama narũxĩnũe. ¹³—Rũ guxũma ga Tupanaãrũ orearũ uruũgũarũ orewa, rũ ore ga mugũ ga Moĩché ũmatũxũwa rũ nũxũ nixuchigagũ na ínanguẽgaxũ ya Cristu na ãẽxgacũ na yĩĩxũcẽx. Rũ yemaãcũ nixĩ ñuxmata ínangu ga Cuáũ. ¹⁴—Rũ ngẽxguma chi peyaxõgũchaũgu i ñãã chorũ ore, rũ pemaã nũxũ chixu rũ Cuáũ ya baiũxẽẽruũ nixĩ ya yima yanguxẽẽcũ ga yema ore ga guma nuxcũmaũcũ ga orearũ uruũ ga Eria ga ípenanguxẽẽcũchiga ũmatũxũ. ¹⁵—Rũ yĩxema ãchixẽgũxe, jrũ naga taxĩnũe i ngẽma ore! —ñanagũrũ. ¹⁶ Rũ ñanagũrũ ta ga Ngechuchu: —¿Tacũgu tá chanangu i ñãã duũxũgũ i ñuxma maxẽxũ? Maneca ñãã duũxũgũ rũ taxumaãma nataãẽgũ ngẽxgumarũũ i ñuxre i buxũgũ i nũgũmaã ããxtũwa rũtogũxũ, rũ íxĩnũcẽxwẽgũxũ, rũ tagaãcũ namũcũgũxũ ñagũxũ:

¹⁷“Marũ wowerumaã pexcẽ tapaxetagũ, natũrũ tama ípixũãchitanũxũ. Rũ marũ ngechaũ i wiyagu pexcẽ tawiyagũ, natũrũ tama pexauxe”, ñagũxũ. Rũ ngẽma buxũgũrũũ nixĩ i ñãã duũxũgũ. ¹⁸—Yerũ núma naxũ ga Cuáũ ga baiũxẽẽruũ rũ tama pãũ nangõx rũ tama binu nayaxaxũ. Rũ yexguma ga nũmagũ rũ: “Nangoxõãx” ñanagũrũgũ nũxũ. ¹⁹—Rũ ñuxũchi núma chaxũ i choma ya Tupana Nane na duũxũxũ chíĩxũ. Rũ choma rũ õna changõx rũ binu chayaxaxũ. Rũ ngẽxguma i nũmagũ rũ taanũxũchixũ rũ ngãxwẽxẽxũ choxũ nawogũe. Rũ nũxũ nixugũe rũ pecaduãxgũxũmaã chaxãmũcũ, rũ namaã chaxãmũcũ i ngẽma duũxũgũ i Dumaãrũ ãẽxgacũcẽx dũeru ngĩxũ ideetanũxũ. Natũrũ Tupanaãrũ cẽx rũ meãma nangõx tũmawa ya yĩxema aixcũma nawe rũxĩxẽ —ñanagũrũ ga Ngechuchu.

Íãnegũ ga tama Tupanaga ñnũene (Lc 10.13-15)

²⁰ Rũ yexguma ga Ngechuchu rũ inanaxũgũ ga na yangagũãxũ ga yema duũxũgũ ga guma íãnegũcũãx ga ngextá yexeraãcũ ínaxũaxũwa ga taxũ ga mexũgũ ga Tupanaãrũ poramaã naxũxũ. Rũ poraãcũ nayangagũ, yerũ yema duũxũgũ rũ tama nũxũ narũxoe ga norũ chixexũ. ²¹ Rũ ñanagũrũ ga Ngechuchu: —Rũ wũxi i ngechaũ nixĩ i pexcẽx, Pa Corachũcũãxgũ rũ Pa Bechaidacũãxgũxũ, yerũ yexguma chi Tũruarũ íãnewa rũ Chidãũãrũ

ĩānewa chanaxũxgu ga yema mexũgũ ga cuẽxruũgũ ga Tupanaārũ poramaā petanũwa chaxũxũ, rũ woo ga na poraācũ yachixexũ ga yema duũxũgũ rũ nuxcũmama chitama nũxũ narũxoe ga yema nacũma ga chixexũ, rũ poraācũxũchi chima nũgũmaā nangechaũgũ rũ naxauxe, yerũ chi nũgũ nicuẽxāchitanũ ga na yapecaduāxgũxũ. ²² —Natũrũ pemaā nũxũ chixu rũ ngẽma ngunexũ i Tupana nagu napoxcuexũ i pecaduāxgũxũ, rũ ngẽma ngunexũgu rũ Tirucũāxgũ rũ Chidāũcũāxgũarũ yexera tá pexũ napoxcue i pemax, Pa Corachĩũcũāxgũ rũ Bechaĩdacũāxgũx. ²³ —Rũ pemax, Pa Capernāũcũāxgũ i Duũxũgũx, ħrũ pema nagu perũxĩnũẽgu rũ daxũguxũ i naānewa tá ipexĩxũ? Pemaā nũxũ chixu rũ naānetũũwa i ngextā Tupana Chatanāxũ ĩpoxcuxũwa tá nixĩ i pewogũxũ. Rũ yexguma chi Chodomaārũ ĩānewa chanaxũxgu ga yema mexũgũ ga cuẽxruũgũ ga Tupanaārũ poramaā petanũwa chaxũxũ, rũ guma ĩāne ga nuxcũma norũ pecadugagu iyarũxoxũne rũ ñuxma rũ chi nangẽxma. ²⁴ —Natũrũ pemaā nũxũ chixu rũ ngẽma ngunexũ i Tupana nagu napoxcuexũ i pecaduāxgũxũ, rũ ngẽma ngunexũgu rũ Chodomacũāxgũarũ yexera tá pexũ napoxcue i pemax, Pa Capernāũcũāxgũx —ñanagũrũ.

*Chauxcẽx pexĩ na chauxũtagu perũngũẽxũcẽx
(Lc 10.21-22)*

²⁵ Rũ yexguma rũ ñaācũ nayumũxẽ ga Ngechuchu, rũ ñanagũrũ: —Pa Chaunatũ ya Daxũguxũ i Naāne rũ Ñoma i Naāneārũ Yorax, cuxũ chicuẽxũũ, erũ ñaā chorũ ngũexũgũxũ nũxũ cucuẽxẽẽ i ñaā ore i naxchaxwa iquicũxũ i duũxũgũ i ñoma i naānewa nũxũ cuẽxũchigũxũ. ²⁶ —Rũ moxẽ cuxna chaxā, Pa Chaunatũx, erũ cuma cunaxwẽxe na ngẽmaācũ cunaxũxũ —ñanagũrũ. ²⁷ Rũ ñanagũrũ ta ga Ngechuchu: —Chaunatũ choxna nanaxā i guxũma i řacũ i ngẽxmaxũ. Rũ Chaunatũxicatama choxũ nacuẽx na texẽ chĩxũ i choma i Nane. Rũ tama guxũma i duũxũgũ aixcũma nũxũ nacuẽx na texẽ yĩxũ ya Chaunatũ. Rũ choma ya Nane, rũ ngẽma duũxũgũ i Chaunatũxũ nũxũ chadauxẽẽchaũxũxĩcatama nixĩ i aixcũma nũxũ cuẽxgũxũ na texẽ yĩxũ ya Chaunatũ. ²⁸ —jRũ nuā chauxũtawax pexĩ i guxāma i pema ya ipaexe nagagu i perũ chixexũgũ rũ perũ ĩxāchĩāẽgũ! Rũ choma rũ tá pexna chanayaxu i pexweta na ĩperũngũẽxũcẽx. ²⁹ —jRũ ñuxũchi penayaxu i chorũ ucuxẽgũ rũ naxcẽx pedauxũtaegũ i chauxcũma! Erũ choma rũ yaxna pemaā chaxĩnũ rũ taguma chaugũ chicuẽxũxũ. Rũ ngemaācũ tá nũxũ ipeyangau i ngema taāẽ i aixcũma ixĩxũ. ³⁰ —Erũ ngẽma pexũ chamuxũ rũ natauxcha na naga pexĩnũẽxũ. Rũ ngẽma pexũ chanaxwāexũ rũ tama naguxcha na penaxũxũ —ñanagũrũ ga Ngechuchu.

12

*Ngechuchuarũ ngũexũgũ rũ trigu nicāũẽtanũ ga ngũchigarũ ngunexũgu
(Mr 2.23-28; Lc 6.1-5)*

¹ Rũ wũxi ga ngũxchigarũ ngunexũgu rũ Ngechuchu rũ norũ ngũexũgũmaā triguncẽgu nixũ. Rũ nataiyae ga norũ ngũexũgũ, rũ yemacẽx ĩnaxĩācũma yoxocũne triguta nicāũẽtanũ, rũ ĩnayangũẽtanũ. ² Rũ yexguma yemaxũ nadaugũgu ga Parichẽgũ rũ ñanagũrũgũ Ngechuchuxũ: —Dũcẽx i curũ ngũexũgũ rũ chixexũ naxũe. Erũ ngũxchigarũ ngunexũgu napuracũe, rũ nachũxu nixĩ i ngẽma —ñanagũrũgũ. ³ Rũ Ngechuchu nanangāxũ, rũ ñanagũrũ: —ħTaguma ěxna poperawa nũxũ pedau ga řacũ na naxũxũ ga nuxcũmaũcũ ga āẽxgacũ ga Dabĩ ga yexguma nataiyẽxgu ga nũma rũ

natanüxügü? ⁴—Rü Tupanapatagu naxücu rü nanangõx ga yema pãu ga üünexü ga Dabícex rü natanüxügücex chuxuxü ga na nangõxgüãxü. Yerü paigücëcicatama nixi ga yema pãu. ⁵—Rü pemax, Pa Parichéugüx çtaguma êxna nawa pengúe ga yema ore ga mugüpanegu Moíché ümatüxü ga ñaxü rü marü name i paigü rü ngüxchigaarü ngunexügu napuracüe i tupauca ya taxünewa? Rü ngêma rü tama wüxi i pecadu nixi naxcëx i ngêma paigü. ⁶—Natürü pemaã nüxü chixu rü nuã petanüwa nangêxma i wüxi i duüxü i tupauca ya taxüneärü yexera ixixü i Tupanapêxewa. ⁷—Natürü pema rü tama nüxü pecuëx i ñuxü ñaxüchiga nixi i ngêma Tupanaärü ore i ümatüxü i ñaxü:

“Choma rü tama chanaxwëxe i chauxcëx peyamëx i carnerugü, natürü chanaxwëxe i togü pexü nangechaütümüügü”, ñaxü. Rü ngêxguma chi meã nüxü pecuëxgügu i ngêma ore, rü tãu chima chixri nachiga pidexagü i ñaã chorü ngüexügü i taxuüma i chixexü ügüxü i Tupanapêxewa. ⁸—Rü choma i Tupana Nane na duüxüxü chiixü, rü aixcüma ngüxchigaarü yora chixi—ñanagürü ga Ngechuchu.

Wüxi ga yatü ga yumécüchiga
(*Mr 3.1-6; Lc 6.6-11*)

⁹Rü yexguma yema nachicawa ínaxüüxgu ga Ngechuchu, rü guma ñãneärü ngutaquëxepataügu naxücu. ¹⁰Rü yéma nayexma ga wüxi ga yatü ga norü wüxichacüüwa yumécü. Rü nümagü ga Parichéugü rü naxcëx nadaugü ga ñuxãcü norü ãëxgacügüxütawa Ngechuchuxü na ínaxuaxügüxü. Rü yemacëx Ngechuchuna nacagüe, rü ñanagürügü: —çNamexü yíixü na texé naxcëx yataanexêëxü i wüxi i ðaawexü i ngüxchigaarü ngunexügu? —ñanagürügü. ¹¹Rü Ngechuchu nanangãxü, rü ñanagürü: —çTexé i petanüwa rü ngêxguma chi ngüxchigaarü ngunexügu wüxi i perü carneru puchugu nguxgu, rü taux êxna i ngêxgumatama ípeyadaugüxü rü ípenatüächixü woo ngüxchigaarü ngunexü yixígu? ¹²—Natürü Tupanapêxewa rü wüxi i duüxü rü poraãcüxüchima wüxi i carneruarü yexera nixi. Rü ngêmacëx name nixi i mexü taxü i woo ngüxchigaarü ngunexü yixígu —ñanagürü. ¹³Rü ñuxüchi ga Ngechuchu rü ñanagürü nüxü ga guma yatü ga yumécü: —çIyarüwêxãchimêxë! —ñanagürü. Rü guma yatü rü inayarüwêxãchimêxë, rü yexgumatama narümemëx, rü naí ga naxmëx ga mexünerüü nixi. ¹⁴Rü yexguma yemaxü nadaugügu ga Parichéugü, rü ínachoxü ga yéma. Rü inanaxügüe na naxcëx nadaugüxü ga ñuxãcü tá na Ngechuchuxü yamëxgüxü.

Nuxcümaixü ga ore ga Ngechuchuchiga

¹⁵Rü yexguma Ngechuchu nüxü cuáchigagu na Parichéugü na yamëxgüchaixü, rü ínaxüxü ga guma ñãnewa. Rü muxüma ga duüxügü rü nawe narüxi. Rü nüma ga Ngechuchu rü nanameëxêë ga guxüma ga yema duüxügü ga idaaweexü. ¹⁶Rü duüxügüna naxãga na tama nüxü yaxugüexüdcëx na texe na yíixü ga nümax. ¹⁷Rü yemaãcü nanaxü ga Ngechuchu na yanguxêëãxüdcëx ga yema ore ga nuxcümaücü ga Tupanaärü orearü uruü ga Ichaxia nüxü ixuxü ga ñaxü:

¹⁸“Daa nixi ya chorü duü ya chomatama nüxü chaxunetacü rü nüxü changechaücü rü namaã chataãëxüchicü. Rü Chauãe i Üünexü rü nüxna tá chanamu. Rü nüma tá guxü i duüxügü i tama Yudíugü ixígüxümaã nüxü nixu i ore i mexü i aixcüma ixixü. ¹⁹Rü tagutáma

ngextá texémaã niporagacüü rü taxúemaãtáma ngextá nipura. Rü tagutáma texé iãneärü ítamüğüwa nüxü taxínü na natagaxü. ²⁰ Rü nüma rü tãütáma nanadai i ngëma duüxüğü i norü öwa turaexü, rü tãütáma inayanaxoxëë i ngëma duüxüğü i írarüwatama yaxögüxü. Rü ngëmaãcü tá nixí ñüxmatáta guxü i naãnewa nangu i ngëma norü ore i aixcüma ixíxü. ²¹ Rü guxü i duüxüğü i tama Yudiüğü ixíğüxü rü tá naxcëx naxí na ngëmaãcü naxütawa nayauxgüãxücëx i norü maxü i taguma güxü”, ñanagürü ga Ichaxía.

Parichéugü rü Ngechuchuxü nixugüe na ngoxoarü poramaã napuracüxü (Mr 3.20-30; Lc 11.14-23, 12.10)

²² Rü Ngechuchuxütawa nanagagü ga wüxi ga yatü ga ngoxoãcü ga ngexetücü rü tama idexacü. Rü Ngechuchu nanamexëë. Rü guma yatü rü yexgumatama nidauchi rü nidexa. ²³ Rü guxüma ga duüxüğü rü nabëjxãchiãëgü ga yexguma yemaxü nadaugügu. Rü ñanagürüğü: —¿Taux éxna daa yíxü ya Dabí nane ya Cristu? —ñanagürüğü. ²⁴ Natürü yexguma yemaxü naxínüëgu ga Parichéugü, rü ñanagürüğü: —Ñãã yatü i Ngechuchu, rü ngoxogünatü i Behebúarü poramaã nixí i ínawoxüãxü i ngoxogü —ñanagürüğü. ²⁵ Natürü nüma ga Ngechuchu rü nüxü nacüëxama ga tacügu na naxínüëxü. Rü yemacëx ñanagürü nüxü: —Ngëxguma chi wüxi i nachíüãnecüãx i duüxüğü nügü itoyegu rü nügütanüwa chítama nügü nadaixgu, rü nügü chítama naguxëë. Rü ngëxguma chi wüxi ya iãnecüãx rü éxna wüxi ya ícüãx nügümaã nuëëchagu rü nügü nadaixgu, rü nügü chítama naguxëë. ²⁶ —Rü ngëxguma chi Behebú nügütama ítëxüchigu rü nügütama yamëxgu, ¿rü ñuxãcü chi ãëxgacüecha yíxü? ²⁷ —Rü pemax, Pa Parichéugüx, rü choxü pixuxgu rü Behebúarü poramaã íchanawoxü i ngoxogü. Natürü ngëxguma chi Behebúarü poramaã íchanawoxügu i ngoxogü, ¿rü texëarü poramaã nixí i perü ngüexügü rü ínawoxüãxü i ngoxogü? Rü dücax, rü ngëma perü ngüexügütama nixí i pexcëx nangoxëëxü na ípetüexü. ²⁸ —Natürü pemaã nüxü chixu rü aixcüma Tupanaãe i Üünexüãrü poramaã nixí i íchanawoxüxü i ngoxogü. Rü ngëmawa pexü nüxü chacuëxëë na marü núma petanüwa nanguxü ya Tupana, na perü ãëxgacü yíxücëx. ²⁹ —¿Rü ñuxãcü texé wüxi ya yatü ya poracüpatagu taxücu na tanapuxüxcëx i norü ngëmaxügü, ega tama tayanëjiragu i noxrix? Rü ngëxguma tayanëjiraguxicatama nixí i nüxna tanapuxüxü i norü ngëmaxügü ya yima yatü ya poracü. ³⁰ —Rü yíxema tama choxü ngechaüxë rü chauxchi taxai. Rü yíxema tama choxü rüngüxëxë na Tupanacëx tananutaquëxexü i duüxüğü rü chauxchawa tanangianexëë. ³¹ —Rü ngëmacëx pemaã nüxü chixu rü Tupana tá nüxü nüxü nangechaü i guxüma i pecadugü i duüxüğü ügüxü rü guxüma i norü dexagü i chixexü. Natürü yíxema Tupanaãe i Üünexümaã tacü ixugüxe, rü Tupana rü tagutáma tüxü nüxü nangechaü i ngëma chixexü. ³² —Rü guxáma ya texé ya tacü chomaã ixugüxe rü Tupana tá tüxü nüxü nangechaü i ngëma. Natürü texé ya Tupanaãe i Üünexümaã tacü ixugüxe, rü Tupana rü tagutáma tüxü nüxü nangechaü i ngëma, rü bai i ñoma i naãnewa, rü bai i daxügüxü i naãnewa.

Wüxi i nanetü rü norü owa nixí i nüxü icuáxü na tacü rü nanetü yíxü (Lc 6.43-45)

³³ —Rü ngëxguma wüxi i nanetü rü namexgu, rü norü o rü ta name. Natürü ngëxguma wüxi i nanetü rü nachixëxgu, rü norü o rü ta nachixe. Rü wüxi

i nanetü rü norü owa nixĩ i nüxü icuáxü ngoxi name rü éxna tama. ³⁴ — Pa Áxtapearü Duüxügüx, ¿ñuxácü i mexü i orexü pixuxü ega pematama rü pichixecümagu? Erü ngêma ore i peêxmaã nüxü pixuxü rü peãêwa nixĩ i ne naxüxü. ³⁵ —Wüxi ya mecü ya yatü rü mexü i orexü nixu, erü naãêwa rü aixcüma mexügu narüxĩnü. Natürü wüxi i yatü i chixecümaxü rü chixexü i orexü nixu, erü naãêwa rü chixexügu narüxĩnü. ³⁶ —Rü choma pemaã nüxü chixu rü ngêma ngunexü i nagu nagüxü i naãne, rü Tupana rü tá nüxna naca i guxü i duüxügü naxcèx i guxüma i ore i chixexü i nüxü yaxuxü i ñoma i naãnewa. ³⁷ —Erü ngêma curü dexagüwa rü Tupana tá cuxü nangugü, rü tá cumaã nüxü nixu ngoxita cume i napêxewa rü éxna tama —ñanagürü ga Ngechuchu.

Duüxügü ga tama yaxögüchaxü rü naxcèx ínacagü ga to ga cuèruü ga Tupanaärü poramaã üxü
(Mr 8.12; Lc 11.29-32)

³⁸ Rü yexguma rü ñuxre ga Parichégü rü Yudígüarü ngüexêëruügü ga ore ga mugüwa ngüxêëtaegüxü rü ñanagürügü Ngechuchuxü: —Pa Ngüexêëruüx, cuxü tadauxchaü na cunaxüxü i wüxi i cuèruü i mexü i Tupanaärü poramaã cuxüxü —ñanagürügü. ³⁹ Rü Ngechuchu nanangãxü, rü ñanagürü: —Ñaa duüxügü i chixecümagüxü rü tama yaxögüxü rü naxcèx ínacagü i wüxi i cuèruü i mexü i Tupanaärü poramaã üxü. Natürü yema cuèruü ga nuxcümaücü ga Tupanaärü orearü uruü ga Yonáxü ngupetüxüxüxüca tátama nadaugü. Rü taxuütáma i to i cuèruü nüxü tadauxêë i ñaa duüxügü. ⁴⁰ —Rü yexgumarüü ga Yoná ga tomaëxpüx ga ngunexü rü tomaëxpüx ga chütaxü choxni ga taxü ga bayenaänüwa na nayexmaxü rü wenaaxärü na nangóxü, rü ngëxgumarüü tá ta nixĩ i choma i tomaëxpüx i ngunexü rü tomaëxpüx i chütaxü i chatáxüwa changëxmaxü. Natürü wena táxarü changox. ⁴¹ —Rü ngëxguma naãneärü guxgu rü Tupana rü ñaa duüxügüna nacaxgu i norü pecaduchiga, rü nuxcümaügüxü ga Nínibecüñax ga duüxügü rü tá inachigü. Rü Tupanapêxewa tá inanaxuaxügü i ñaa duüxügü i ñuxma maxëxü. Yerü nümagü ga Nínibecüñax rü nüxü narüxoe ga nacümagü ga chixexü ga yexguma Yoná namaã nüxü ixuxgu ga Tupanaärü ore. Natürü ñuxma nuã petanüwa nangëxma i wüxi i Yonáärü yexera ixüxü. ⁴² —Rü ngëxguma naãneärü guxgu rü Tupana rü ñaa duüxügüna nacaxgu i norü pecaduchiga, rü ngüma ga nuxcümaücü ga Chabaaneärü äëxgacü rü tá iichi. Rü tá ínaxuaxü i ñaa duüxügü i ñuxma maxëxü. Yerü ngüma rü yaxüwaxüchi ne ixü na äëxgacü ga Charumóüxü naxñüxüçèx ga ñuxácü poraãcü nüxü na nacüxüchixü. Natürü ñuxma nuã petanüwa nangëxma i wüxi i Charumóüärü yexera ixüxü.

ngoxo i taeguxüchiga
(Lc 11.24-26)

⁴³⁻⁴⁴ —Rü ngëxguma wüxi i ngoxo rü wüxi ya yatüwa ínaxüüxgu, rü dauxchitawa i ngexta taxüema íxãpataxüwa rü nu ne nanaxümare. Rü naxcèx nadau na ngexta na nangüxüçèx. Rü ngëxguma taxuxguma nüxü iyangauxgu na ngexta nangülegaxü, rü nagu narüxĩnü na wena nataeguxü naxcèx ya yima yatü ga noxri nawa ínaxüxüchirécü. Rü ngëxguma nataegugü, rü nüxü inayangau ya yima yatü na wüxi ya i ya ngëácüne rü mexêëne rü meã nabixichinerüü na yüxü. ⁴⁵ —Rü ngêma ngoxo rü ínixü rü naxcèx nayadau i to i 7 i ngoxogü i norü yexera i chixexü. Rü guxüma i ngêma rü yima yatügu nayachocu, rü ngëxma naxächüügü. Rü ngëxguma ya yima yatü rü noxriarü

yexera nachixe. Rū ngēxgumarūl tá ta nūxū naxūpetū i ñaā duūxūgū i chixecūmagūxū —ñanagūrū ga Ngechuchu.

Ngechuchuarū mamá rū naēneēgūchiga
(Mr 3.31-35; Lc 8.19-21)

⁴⁶ Rū yexguma duūxūgūmāā íyadexayane ga Ngechuchu, rū yéma tangu ga naē rū naēneēgū. Rū ípataarū dūxētūgu tarūcho, rū Ngechuchumaā tidexagūchaū. ⁴⁷ Rū wūxi ga duūxū Ngechuchumaā nūxū nixu, rū ñanagūrū: —Yéa dūxētūwa tangēxma ya cue rū cueneēgū, rū cumaā tidexagūchaū —ñanagūrū nūxū. ⁴⁸ Natūrū Ngechuchu nanangāxū ga yema duūxū ga namaā nūxū ixuxū ga yema ore, rū ñanagūrū nūxū: —¿Texé tixī ya chaue? ¿Rū texégū tixī ya chaueneēgū? —ñanagūrū. ⁴⁹ Rū yexguma ga Ngechuchu rū norū ngúexūgūxū naxuneta, rū ñanagūrū: —Dūcèx, daxe tixī ya chaue, rū daagū nixī ya chaueneēgū. ⁵⁰ —Erū guxāma ya texé ya naxūxe i Chaunatū ya daxūgucūarū ngūchaū, rū yíxema tixī ya chaueneē rū chaueyèx rū chaue —ñanagūrū ga Ngechuchu.

13

Ore ga toecūgu ixuxū
(Mr 4.1-9; Lc 8.4-8)

¹ Rū yematama ngunexūgu ga Ngechuchu rū ínaxūxū nawa ga guma í ga nagu napexūne. Rū naxtaxaānacūwa nayarūto. ² Rū muxūma ga duūxūgū rū yéma naxcèx nangutaquēxegū. Rū yemacèx dūxwa wūxi ga nguegu nixūe ga Ngechuchu, rū guma nguewa narūto. Rū guxūma ga duūxūgū rū yexma naxnecūtēxegu nachigū. ³ Rū yexguma ga Ngechuchu rū muxūma ga ore ga cuèxruūwa nanangúexēē ga duūxūgū. Rū norū nguxēētaewa rū ñanagūrū: —Rū wūxi ga yatū ga toecū rū trigumaā nanagūane. ⁴ —Rū yexguma trigumaā nagūaneāgu, rū ñuxre ga guma trigu rū namacūwagu nayí. Rū ínangugū ga werigū, rū nanawecu. ⁵ —Rū náigū ga trigu rū nutatanūgu nayí ga ngextá ínachixcaxūwa ga waixūmū. Rū paxa narūxūgū ga guma trigu, yerū ga waixūmū rū tama nayaxcū. ⁶ —Rū yexguma nangunagūgu ga uèxcū, rū narūngēxgū ga guma trigu. Rū nayue yerū tama poraācū nixāmèxā. ⁷ —Rū náigū ga trigu rū tuxunecūgu nayí. Rū yexguma nayaegu ga tuxugū, rū guma triguxū inawocu, rū nanadai. ⁸ —Natūrū náigū ga trigu rū mexū ga waixūmūgu nayí. Rū yexguma nayaegu rū muxūma ga trigu nawa ínanguxuchi. Rū nūmaxū rū wūxireewa rū 100 pūxū ínanguxuchi ga norū o, rū náireegūwa rū 60, rū náireegūwa rū 30. ⁹ —Rū yíxema āchixēgūxe, jrū nagu tarūxínūē i ngēma ore! —ñanagūrū.

Tacūcèx nixī ga yema ore ga cuèxruūgūgu ixuxū
(Mr 4.10-12; Lc 8.9-10)

¹⁰ Rū yexguma ga norū ngúexūgū rū Ngechuchucèx naxī, rū nūxna nacagūe, rū ñanagūrūgū: —Pa Corix, ¿Tūxcūl i cuèxruūgūgu cuyaxuācūma cunangúexēēxū i ñaā duūxūgū? —ñanagūrūgū. ¹¹ Rū Ngechuchu nanangāxū, rū ñanagūrū nūxū: —Tupana rū pexūxīcatama nūxū nacuèxēē i ngēma ēxūguxū rū ñuxācū āēxgacū yīxū i nūmax. Natūrū nūma i togū i duūxūgū rū tama nūxū nūxū nacuèxēē i ngēma. ¹² —Rū texé ya aixcūma naga ínūxē i chorū ore, rū Tupana rū yexeraācū tá tūxū nūxū nacuèxēē. Rū ngēmaācū tá tūxū nangēxma i taxū i cuèx. Natūrū texé ya tama naga ínūxē i ñaā ore rū Tupana tá tūxna nanayaxu i ngēma íraxū i cuèx i tūxū ngēxmachiréxū. ¹³ —Rū ngēmacèx

nixi i ore i cuèxruümaã chanangúexêëxü i ngêma duüxügü. Erü nümagü rü woo nüxü nadaugügu, rü ñoma tama nüxü nadaugüxürüü nixigü. Rü woo nüxü naxinüëgu, rü ñoma tama nüxü naxinüëxürüü nixigü. Rü tama nüxü nacuëxgüéga. ¹⁴—Rü aixcüma ngêma duüxügüchiga nixi ga yema Tupanaärü ore ga nuxcümaücü ga norü orearü uruü ga Ichaxía nüxü ixuxü ga ñaxü:

“Rü ngêma duüxügü rü tá aixcüma nüxü naxinüë, natürü tãütáma nüxü nacuëxgüéga i tacüchiga na yïixü i ngêma nüxü naxinüëxü. Rü aixcüma tá nüxü nadaugü, natürü tãütáma nüxü nacuëxgü na tacüchiga yïixü i ngêma nüxü nadaugüxü. ¹⁵ Erü ngêma duüxügü rü tãütáma nüxü nacuëxgüchaü i chorü ore, rü naxchaxwa tá nügü narütütamachixêgü rü tá naxchaxwa napexetügü. Rü ngêmaäcü tá nanaxügü na tama nüxü nadaugüxüçex i ngêma mexü i naxcêx chaxüxü, rü tama nüxü naxinüëxüçex i chorü ore, rü tama nüxü nacuëxgüxüçex na ñuxäcü choma chanaxwêxexüäcüma na namaxêxü, rü tama chauxcêx nadaugüxüçex na chanamaxêxêëxüçex”,

ñanagürü. ¹⁶ Rü ñanagürü ta ga Ngechuchu: —Natürü pemax, Pa Chorü Ngüëxügüx, rü petaäëgü erü pexetügümaätama nüxü pedaugü i ngêma chaxüxü rü pexmachixêmaätama nüxü pexinüë i chorü ore. ¹⁷—Rü aixcüma pemaã nüxü chixu rü muxüchixü ga nuxcümaügüxü ga Tupanaärü orearü uruügü rü muxüchixü ga duüxügü ga imecümaxü, rü nüxü nadaugüchaü i ngêma ñuxma chauxütawa nüxü pedaugüxü. Natürü tama nüxü nadaugü. Rü nüxü naxinüëchaü i ngêma ore i ñuxma chauxütawa nüxü pexinüëxü. Natürü tama nüxü naxinüë —ñanagürü.

Ngechuchu rü meã nanangoxêë ga yema ore ga toecüchigagu yaxuxü
(Mr 4.13-20; Lc 8.11-15)

¹⁸ Rü ñanagürü ta ga Ngechuchu: —jDüçex, iperüxünüë na ñuxü ñaxüchiga yïixü i ngêma ore i cuèxruü i toecüchiga! ¹⁹—Rü guma trigu ga namagu yixünerüü tixigü ya yixema nüxü ñnüëxê i ore i mexü na ñuxäcü äëxgacü yïixü ya Tupana natürü tama nüxü cuëxgüxe i ñuxü ñaxüchiga na yïixü i ngêma ore. Rü tümáxüta nangu i Chataná, rü tüxü nüxü inayarüngümaëxêë i ngêma ore i tümáëwa ngëxmachirêxü. ²⁰—Rü guma trigu ga nutatanügu yixünerüü nixi i ngêma duüxügü i nüxü ñnüëxü i Tupanaärü ore rü taäëäcüma nayauxgüxü. ²¹—Natürü ngêma na tama aixcüma nagu naxinüëxü i ngêma ore, rü paxaächitama nayaxögü, rü yixcüra ngëxguma ngêma oregagu guxchaxügü nüxü üpetügu rü êxna duüxügü naxchi aiegu, rü ñanatêxgü i ngêma ore. ²²—Rü guma trigu ga tuxunecügu yixünerüü nixi i ngêma duüxügü i Tupanaärü orexü ñnüëxü rü yaxögüxü. Natürü ñoma i naãneärü ngëmaxügüçex oegaäëgüxü, rü ngëmaguama rüñnüëxü, rü düxwa nüxü inayarüngümaë i ngêma ore. Rü guxüma i ngêma rü Tupanaärü orexü nüxü narüxoxêë na tama aixcüma meã Tupanawe naxixüçex i ngêma duüxügü. ²³—Natürü guma trigu ga mexü ga waixümügu yixünerüü nixi i ngêma duüxügü i nüxü ñnüëxü i Tupanaärü ore, rü nüxü cuëxgüxü i tacüchiga na yïixü, rü naga ñnüëxü rü meã naxcêx maxêxü. Rü tümáxê rü guma trigu ga 100 püxü nawa ñnguxuchinerüü tixi. Rü tümáxê rü guma 60 püxü nawa ñnguxuchinerüü tixi. Rü tümáxê rü guma 30 püxü nawa ñnguxuchinerüü tixi —ñanagürü ga Ngechuchu.

Ore ga chixexü ga natüane ga trigutanügu toxüchigagu ixuxü

²⁴ Rü Ngechuchu rü to ga ore ga cuèxruüxü duüxügümaã nixu, rü ñanagürü: —Rü nüma ya Tupana rü ñoma wüxi ga yatü ga mexüne ga triguchire naãnegu tocürüü tá nanaxü. ²⁵—Rü guma yatü rü yexguma ñapeyane rü wüxi ga

norü uwanü ga naxchi aixü rü yéma naxü. Rü naëchita yexma trigunecügu nayatogü ga chixexü ga natüane. Rü ñuxüchi ínixü. ²⁶ —Rü yexguma naxügüga ga trigu rü nayaegu rü yexwacëx yaxoxgu, rü yema natüane rü ta nangox. ²⁷ —Rü yexguma ga yema yatüarü duüxügü, rü namaã nüxü nayarüxügü, rü ñanagürügü:

“Pa Corix, cuma rü cuanegu rü triguxicachirëx ngëxma cuto. ¿Natürü ñuxäcü i ñuxma rü chixexü i natüane rü ta ngema naxügüxü?” ñanagürügü. ²⁸ —Rü yexguma ga yema naãneärü yora, rü ñanagürü nüxü:

“Maneca wüxi i chorü uwanü i chauxchi aixü nixi i ngema ngexü wagüxü” ñanagürü. Rü yexguma ga norü duüxügü rü nüxma nacagü, rü ñanagürügü:

“Pa Corix, ¿cunaxwëxexü na tanabëxü i ngëma chixexü i natüane?” ñanagürügü. ²⁹ —Natürü nüma ga norü cori rü ñanagürü nüxü ga yema norü duüxügü:

“¡Nüetama ngema nangëxmagü! Erü ngëxguma chi penabëxgu, rü ngürüächi trigumaã chi ta penangauxëë na penabëxü. ³⁰ —Rü narümemaë nixi i nüetama ngema nayae ñuxmatáta triguarü buxgüwa nangu. Rü ngëxguma rü ngema tá chanamugü i chorü puracütanüxü, rü tá nanabëxira i ngëma chixexü i natüane. Rü tá ínanagoxücüta, rü ñuxüchi tá ínanagu. Rü ngëmawena tá nayabuxgü i trigu, rü naxchiügu tá choxü namaã nanguxügü” ñanagürü.

Ore ga motachachiregu ixuxü
(Mr 4.30-32; Lc 13.18-19)

³¹ Rü Ngechuchu rü to ga ore ga cuëxruüxü duüxügümaã nixu, rü ñanagürü: —Rü ngëma Tupanaarü ore rü yexera nixüchigü. Rü ñoma wüxi ya motachachire ya wüxi ya yatü naãnegu toxünerüü nixi. ³² —Rü woo naxiraxüchichirëx ya yima naxchire, natürü ngëxguma naxüxgu rü nayëxgu, rü wüxi i nanetü i taetaxü nixi. Rü ngëmacëx i werigü rü natanüwa naxi, rü ngëxma nayarüxüchiãügü —ñanagürü.

Ore ga päüarü puxëëruügu ixuxü
(Lc 13.20-21)

³³ Rü Ngechuchu rü to ga ore ga cuëxruüxü duüxügümaã nixu, rü ñanagürü: —Rü Tupanaarü ore rü duüxügütanüwa nangu. Rü nixüchigü rü nanaxüchicüxü i norü maxü. Rü ñoma íxraxü i päüarü puxëëruü i wüxi i nge taxü i ngürü päüchara namaã ipuxëëxürüxü nixi —ñanagürü ga Ngechuchu.

Cuëxruügu ixuxü ga oremaã nidexa ga Ngechuchu na yanguxëëãxücëx ga Tupanaarü ore
(Mr 4.33-34)

³⁴ Rü guxüma ga yema ore ga Ngechuchu duüxügümaã nüxü ixuxü, rü cuëxruügu yaxuäcüma namaã nüxü nixu. Rü yemaäcüxicatama nixi ga namaã nüxü yaxuxü. ³⁵ Rü yemaäcü nanaxü ga Ngechuchu na yanguxëëãxücëx ga yema Tupanaarü ore ga nuxcümaücü ga norü orearü urüü ga Ichaxía umatüxü ga ñaxü:

“Choma rü cuëxruügu ixuxü i oremaã tá duüxügümaã chidexa. Rü tá namaã chanangoxëë i ngëma cuëx i ëxüguxü ga yexguma noxri naãne ixügügumama iicüxü”,
ñaxü.

Ngechuchu nanangoxëë na tacüchiga yïxü ga yema ore ga chixexü ga natüane ga trigutanügu toxüchigagu ixuxü

³⁶ Rū Ngechuchu ínayamugü ga duüxügü, rü guma í ga nagu napexünegu naxücu. Rū norü ngüexügü rü yéma naxcèx naxí, rü ñanagürügü nüxü: —Pa Corix, ¡tomaã nangoxêê na ¡acüchiga yíixü i ngêma chixexü i natüanegu ixuxü i ore! —ñanagürügü. ³⁷ Rū yexguma ga Ngechuchu rü ñanagürü nüxü: —Rü yima mexü i trigumaã toecü, rü núma nixí ya Tupana Nane ya duüxüxü ixícü. ³⁸ —Rü ngêma naãne i nagu natoexü, rü ñoma i naãne nixí. Rū ngêma mexü i trigu rü ngêma nixí i duüxügü i Tupanaärü duüxügü ixígüxü. Rū ngêma chixexü i natüane, rü ngêma nixí i duüxügü i Chatanáärü ixígüxü. ³⁹ —Rü ngêma norü uwanü i chixexü i natüanemaã naêchita naãnegu yatoexü, rü ngêma nixí i Chataná. Rū ngêma ngunexü i nagu nabuxuxü i trigu rü naãneärü güxchiga nixí. Rū ngêma puracütanüxü i triguarü buxwa puracüexü, rü Tupanaärü orearü ngeruügü i daxücüãx nixígü. ⁴⁰ —Rü ngêxgumarüü i ngêma chixexü i natüane rü na nabéxü rü ñüxüchi na ínaguxü, rü ngêxgumarüü tá ta nixí i naãneärü güxgu. ⁴¹ —Rü choma i Tupana Nane na duüxüxü chíixü, rü tá chanamu i chorü orearü ngeruügü i daxücüãx na nadeãxüçèx i ngêma duüxügü i chixexü ügüxü rü ngêma duüxügü i ¡ogüãxü chixexü ügüxéèxü. Rū tá ínanawoxü. ⁴² —Rü tá üxüxetüwa nayawocu. Rū ngema tá naxauxe rü tá nixüxchapütägü. ⁴³ —Natürü güxüma i ngêma duüxügü i Tupanaga ínüèxü, rü tá üèxcürüü inabaixgü i ngextá Tanatü ya Tupana ãèxgacü íixixüwa. Rū yíxema áchixègüxe, ¡rü nüxü taxíñüé i ngêma ore! —ñanagürü.

Ore ga taxü ga ñèru ga icüxügu ixuxü

⁴⁴ Rū Ngechuchu rü to ga ore ga cuèxruüxü duüxügümaã nixü, rü ñanagürü: —Rü ngêma na ãèxgacü yíixü ya Tupana rü duüxügüçèx rü namexechi ñoma wüxi i uiru i wüxi i naãnegu icüxürüxü. Rū wüxi ya yatü rü ngêxguma nüxü iyangauxgu i ngêma uiru, rü paxa wena ngêma naãnegu nayacux. Rū taãèacüma namaã nataxe i güxüma i norü ngêmaxügü na naxcèx nataxèxèx i ngêma naãne na noxrü yíixüçèx i ngêma uiru —ñanagürü.

Ore ga nuta ga ngèxãèruü ga tatanücügu ixuxü

⁴⁵ Rū ñanagürü ta ga Ngechuchu: —Rü duüxügü rü ñoma wüxi i taxetanüxü i nutagü ya ngèxãèruüçèx dauxürüü nixígü na poraãcü Tupanaxcèx nadaugüxü na núma norü ãèxgacü yixixüçèx. ⁴⁶ —Rü ngêma taxetanüxü rü ngêxguma düxwa nüxü iyangauxgu ya wüxi ya nuta ya ngèxãèruü ya güxüärü yexera mexèchicü, rü namaã nataxe i güxüma i norü ngêmaxügü na naxcèx nataxèxèxèx ya yima nuta ya mexèchicü, na noxrü yíixüçèx.

Ore ga püchaqu ixuxü

⁴⁷ —Rü ngêma Tupana na ãèxgacü yixixü rü wüxi i pücha i nagüxüraüxü i choxni namaã iyaxuxüxürüü nixí. ⁴⁸ —Rü ngêxguma naxãacuxgu i ngêma pücha, rü ngêma püchaetanüxü rü naxnecüpechinügu ínanatüächigü. Rū ngema narütogü rü nayadexechi i ngêma mexü i choxni, rü pexchigu nananucu. Rū ngêma tama ingöxü i choxni rü ínanawogü. ⁴⁹⁻⁵⁰ —Rü ngêxgumarüü tá nixí i ngêxguma naguxgu i naãne. Erü Tupanaärü orearü ngeruügü i daxücüãx, rü núma tá naxí. Rū tá nayadexechi i ngêma mexü i duüxügü nüxna i ngêma ichixexü, rü tá üxüxetüwa nayawocu i ngêma duüxügü i chixexü. Rū ngema tá naxauxe, rü tá nixüxchapütägü —ñanagürü ga Ngechuchu.

Ngexwacaxügüxü rü nuxcümaügüxü i ngêmaxügüchiga

⁵¹ Rū yexguma ga Ngechuchu rü norü ngüexüügüna naca, rü ñanagürü: —¿Nüxü pecuáxü yïxü na ñacüchiga yïxü i ngëma pemaã nüxü chixuxü? —ñanagürü. Rū nümagü nanangäxüügü rü ñanagürüügü: —Ngëmaãcü, Pa Corix, nüxü tacuèx —ñanagürüügü. ⁵² Rū yexguma ga Ngechuchu rü ñanagürü nüxü: —Rū ngëxguma wüxi i ngüexëeruü i ore i mugüwa nguxëëtaexü aixcüma nüxü cüxgu na ñuxäcü äëxgacü yïxü ya Tupana, rü nanaxwëxe na meã nüxü nacuáxü i ngëma nuxcümaüxü i Tupanaärü ore rü ñaã ngexwacaxüxü i chorü ore rü ta, ngëxgumarüü i wüxi i cori i norü taxepatawa duüxüügücëx inawéxü i norü ngëmaxüügü i ngexwacaxüügüxü rü norü ngëmaxüügü i nuxcümaüügüxü ta —ñanagürü ga Ngechuchu.

Ngechuchu rü Nacharétuwa nayexma

(Mr 6.1-6; Lc 4.16-30)

⁵³ Rū yexguma Ngechuchu nüxü rüchaxgu ga yema ore ga cuèxruüügüxü na yaxuxü, rü inaxüächi ga yéma. ⁵⁴ Rū guma ñäne ga nawa nayaxüne ga Nacharétuwa naxü. Rū guma ñaneärü ngutaquëxepataügu naxücu rü yéma nanangüexëë ga duüxüügü. Rū yema duüxüügü rü nabëixächiäëgü namaã ga norü ore. Rū ñanagürüügü: —¿Ngextá nüxü nacuèx i ngëma nguxëëtae? ¿Rü ñuxäcü nüxü nacuèx na naxüäxü i ngëma mexüügü i taxüügü i Tupanaärü poramaã naxüxü? ⁵⁵ —¿Taux ëxna i daa yïxü ya carpinteru ya Yúche nane ya María ngëne, ya Chaütiágu rü Yúche rü Chimáü rü Yuda naëneë ixicü? ⁵⁶ —¿Rü taux ëxna i naëyëxgü rü nuxma tatanügu naxächiüügüxü? ¿Rü ngëxguma i ngextá yïxü i nayauxäxü i ngëma nüxü nacuáxü? —ñanagürüügü. ⁵⁷ Rū yemacëx ga duüxüügü rü tama nüxü inarüxïnüëchaü. Natürü Ngechuchu rü ñanagürü nüxü: —Guxüma i togü i duüxüügü rü namaã nataäëgü i wüxi i Tupanaärü orearü uruü. Natürü ngëma orearü uruüchiüñanewatama rü duüxüügü rü tama namaã nataäëgü —ñanagürü. ⁵⁸ Rū yema duüxüügütanüwa rü tama poraäcü nanaxü ga mexüügü ga taxüügü ga Tupanaärü poramaã naxüxü, yerü tama nüxü nayaxögüchaü ga yema duüxüügü.

14

Nayu ga Cuáü ga baiüxëëruü

(Mr 6.14-29; Lc 9.7-9)

¹ Rū yema ngunexüügü nixi ga Garirëaaneärü äëxgacü, ga Erode rü Ngechuchuxü nacüächigaxü. ² Rū Erode rü norü duüxüügümaã ñanagürü: —Yima nixi ya Cuáü ga baiüxëëruü rü marü wena namaxü. Rū ngëmacëx nüxü nangëxma i pora na naxüäxü i ngëma mexüügü i taxüügü i Tupanaärü poramaã naxüxü —ñanagürü. ³ Rū yema ñanagürü, yerü nümatama ga Erode rü üpaacü norü churaragüxü namu na Cuáüxü yayauxgüxüxcëx rü cadenaã yanëixgücüma poxcupataüwa nagagüäxüxcëx. Rū yemaäcü nanaxü ga Erode, yerü yemaäcü naxcëx íca ga naxmëx ga Erodía ga naëneë ga Piripi naxmëxchirëx ixicü. ⁴ Rū Erode rü Cuáümaã nanu yerü ga Cuáü rü ñanagürü nüxü: —Tama name na cuxumëxmaã cuxāmaxü —ñanagürü. ⁵ Rū Erode rü Cuáüxü nimáxchaü, natürü duüxüügüxü namuü yerü guxüma ga duüxüügü rü nagu narüxïnüë rü aixcüma Tupanaärü orearü uruü nixi ga Cuáü. ⁶ Natürü yexguma norü taunecüaruü ngunexüwa nanguxgu ga Erode rü wüxi ga peta naxü. Rū yema petawarü Erodíaxacü rü iyayüparachigüxü napëxewa ga yema petatanüxü. Rū nüma ga äëxgacü ga Erode rü poraäcü norü me nixi ga yema naxüxü ga naxäcüürücü. ⁷ Rū yemacëx ngímaã inaxuneta rü ñanagürü ngüxü: —¿Choxna naxcëx naca i ñacü i cunaxwëxexü, rü aixcüma

tá cuxna chanaxá! —ñanagürü. ⁸ Rû yexguma ga ngîma rû ngîxütawa ixû, rû ngîena iyaca, rû ngîgürügü: —Pa Ma, ¿tacü i cunaxwëxexü na naxcëx íchaçaxü? —ngîgürügü. Rû ngîe ngîxü ingäxü, rû ngîgürügü: —Naxcëx ínaca i Cuáü ya baiüxëëruüëru! —ngîgürügü ga ngîe. Rû yexguma ga yema pacü rû ngîgürügü nüxü ga Erode: —Chanaxwëxe i wüxi ya poratugu choxna cunaxá i Cuáü ya baiüxëëruüëru —ngîgürügü. ⁹ Rû yexguma ga äëxgacü ga Erode rû inayarümaächi namaã ga yema ore, natürü norü unetacëx rû norü petatanüxücëx rû tama ngîxü nawomüxëëchaü. Rû nanamu ga ñuxre ga norü churaragü na ngîxna naxägüäxücëx ga yema naxcëx ínaçaxü. ¹⁰ Rû yemaäcü poxcupataüwa nanamu na yéma Cuáüxü yanadaenaäxücëx. ¹¹ Rû yemawena wüxi ga poratugu ngîxütawa nanange ga Cuáüëru, rû yema pacüna nayaxá. Rû ngîma rû ñuxüchi ngîena iyaxá. ¹² Rû yexguma ga Cuáüârü ngüexügü rû yéma naxî, rû nayangëgü ga naxüne, rû inayatëxgü. Rû yemawena rû Ngechuchumaã nüxü nayarüxügüe.

Ngechuchu rû nanachibüexëë ga 5000 ga yatügü

(Mr 6.30-44; Lc 9.10-17; Cu 6.1-14)

¹³ Rû yexguma yemaxü nacuáchigagu ga Ngechuchu, rû nüxîcatama wüxi ga nguegu nixüe, rû ínaxüxü ga yéma. Rû wüxi ga nachica ga taxüema íxâpataxüwa naxü. Natürü ga duüxügü rû nüxü nacuëxgüama ga ngextá na naxüxü. Rû ínaxoxü ga norü íänegüwa, rû dauxchitagu nawe narüxî. ¹⁴ Rû yexguma nguewa ínaxüegu ga Ngechuchu rû nüxü nadau ga yema muxüma ga duüxügü. Rû nüxü nangechaütümüügü. Rû nanameëxëë ga yema duüxügü ga ídaaweexü ga naxcëx yéma nagagüxü. ¹⁵ Rû yexguma marü nachütachaügu rû Ngechuchucëx naxî ga norü ngüexügü, rû ñanagürügü nüxü: —Marü nachütachaü, rû ñuxüchi taxüema nuxma taxâpata i nuã. Rû name nixî ícuyamugü i ñaã duüxügü na íänexácügü ya ngaicamana ngëxmagünewa naxîxücëx, rû ngema norü ñnatëex yataxegüxücëx —ñanagürügü. ¹⁶ Natürü ga Ngechuchu rû ñanagürü nüxü: —Taxuacüma nawoegu. ¡Rû pematama penachibüexëë! —ñanagürü. ¹⁷ Rû nümagü nanangäxügü, rû ñanagürügü: —Natürü nuã rû wüximëxpüx i pâü rû taxre i choxnixîcatama toxü nangëxma —ñanagürügü. ¹⁸ Rû Ngechuchu nanangäxü rû ñanagürü: —¡Nuã chauxütawa penana! —ñanagürü. ¹⁹ Rû yexguma ga Ngechuchu rû duüxügüxü namu na maxëtëxewa natogüxücëx. Rû ñuxüchi nanade ga yema wüximëxpüx ga pâü rû yema taxre ga choxnigü. Rû daxügu nadawenüacüma Tupanana moxë naxá, rû ñuxüchi inanabücu ga yema pâügü. Rû norü ngüexügüna nanana, rû yema duüxügüxü nayanu. ²⁰ Rû guxüma ga yema duüxügü rû meãma nachibüe. Rû yemawena rû 12 ga pexchigü nanapagüamatama namaã ga yema pâü rû choxnichipëxegü ga iyaxügüxü. ²¹ Rû yema yéma chibüexü rû 5000 ga yatügü nixî, natürü ga ngëxügü rû buxügü rû tama nayaxügü.

Dexáétügu nixü ga Ngechuchu

(Mr 6.45-52; Cu 6.16-21)

²² Rû yemawena ga Ngechuchu rû duüxügüxü íyamugüyane rû wüxi ga nguegu nayachüxëë ga norü ngüexügü na yoxni naxtaxaarü tocutüwa naxîxücëx. ²³ Rû yexguma duüxügüxü íyamugüguwena rû guma mëxpünewa ínaxüächi ga Ngechuchu na nüxîca yéma yayumüxëxücëx. Rû yexma nüxîcatama nachütaü. ²⁴ Natürü ga norü ngüexügü rû naxtaxaarü ngäxütüchiügu nixägü ga yexguma. Rû tacü ga buanecü yexma nüxü

naxü, rü poraãcü nayuape. ²⁵ Rü yexguma marü yangunechaügu rü norü ngüexüğüwe inaxüãchi ga Ngechuchu. Rü dexáchiüétügu nixü naxcèx ga norü ngüexüğü. ²⁶ Rü yexguma norü ngüexüğü nüxü daugügu ga dexáchiüétügu na yaxüxü, rü poraãcü nabèixãchiãëgü. Rü norü muümaã aita naxüe, rü ñanagürügü: —Wüxi i naxchiximare nixi —ñanagürügü. ²⁷ Natürü ga Ngechuchu rü namaã nidexa rü ñanagürü nüxü: —¡Peporae! rü choma chixi. ¡Rü täxü ipemuüëxü! —ñanagürü. ²⁸ Rü yexguma ga Pedru rü Ngechuchumaã nidexa rü ñanagürü: —Pa Corix, ega chi cuma quixügu, ¡rü choxü namu na choma rü ta dexáétügu chixüxüccèx rü cuxütawa na chaxüxüccèx! —ñanagürü. ²⁹ Rü Ngechuchu ñanagürü nüxü: —Ëcü ¡nuã naxü! —ñanagürü. Rü yexguma ga Pedru rü ínaxüe ga nguewa. Rü inanaxüğü ga dexáétügu na yaxüxü na Ngechuchuxütawa naxüxüccèx. ³⁰ Natürü yexguma nüxü yacuëxãchigu ga na naporaxü ga buanecü rü namuü, rü inanaxüğü ga na dexáchiügu nanguxü. Rü aita naxü rü ñanagürü: —Pa Corix, ¡choxü rüngüxüë! —ñanagürü. ³¹ Rü yexgumatama ga Ngechuchu rü Pedrumëxëgu nayayauxãchi, rü ñanagürü nüxü: —Cuma rü irarüwatama cuyaxö. ¿Rü tüxcüü tama aixcüma cuyaxöxöchi? —ñanagürü. ³² Rü yexguma nguëgu yachoügu ga Ngechuchu rü Pedru, rü nangupetü ga guma buanecü. ³³ Rü guxüma ga norü ngüexüğü ga nguëwa yexmagüxü rü Ngechuchupëxëgu nacaxãpüxüğü rü nüxü nicuëxüğü, rü ñanagürügü nüxü: —Aixcümaxüchi cuma nixi i Tupana Nane quixü —ñanagürügü.

Yenecharétuanewa Ngechuchu nanameëxëë ga idaaweexü
(Mr 6.53-56)

³⁴ Rü yexguma marü yanguügu ga naxtaawa, rü Yenecharétuanewa nangugü rü yéma ínachoü. ³⁵ Rü yexguma yema duüxüğü ga yëmacüãx nüxü icuëxãchitanügu ga Ngechuchu na yixü ga guma, rü guxüma ga yema naãnewa nanguchiga ga yéma na nayexmaxü ga Ngechuchu. Rü yemacèx naxütawa nanagagü ga yema duüxüğü ga idaaweexü. ³⁶ Rü Ngechuchuxü naccëxüğü na naxchirupechinügamare yangögüxüccèx. Rü guxüma ga yema naxchirupechinügu ingögüexü rü narümeë.

15

Tacü nixi i Tupanapëxewa duüxüğüxü chixexëxü
(Mr 7.1-23)

¹ Rü Ngechuchucèx naxi ga ñuxre ga Parichéugü rü ngüexëëruüğü ga ore ga mugüwa nguxëëtægüxü ga Yerucharéüwa ne ixü. Rü Ngechuchuna nacagü, rü ñanagürügü: ² —¿Tüxcüü i curü ngüexüğü rü tama nagu naxi i nuxcümaüğüxü i torü oxigücüma? ¿Rü tüxcüü tama nayanguxëëgü i ngëma nacüma na Tupanacèx nayauxmëxgüxü naxüpa na nachibüexü? —ñanagürügü. ³ Natürü ga Ngechuchu rü nüxna naca ga yema Parichéugü rü ngüexëëruüğü, rü ñanagürü nüxü: —¿Rü tüxcüü i pema rü nüxü pexo i Tupanaärü mu na nagu pexüccèx i pecümagütama? ⁴ Erü Tupana rü norü orewa rü ñanagürü:

“¡Tüxü nangechaü ya cunatü rü cue!”

ñanagürü. Rü ngëma orewa rü ñanagürü ta:

“Rü texé ya tümanatümaã rü ëxna tümaëmaã guxchigaxe rü name nixi i noxtacüma ngëmacèx tüxü tayuxëë”,

ñanagürü. ⁵ Natürü pema rü ñaperügü:

“Marü name ega wüxi ya yatü nanatüxü rü naëxü ñaxgu: ‘Taxucürüwa chorü ngëmaxümaã cuxü charüngüxëë erü guxüma i chorü ngëmaxü rü marü Tupanana chanaxä,’ ñaxgu. ⁶ Rü ngëxguma texé ngëma ñagügu rü pexcèx rü marü namexü na tama tümanatüxü rü tümaëxü tarüngüxëëxü. Rü ngëmaäcü ipeyanaxoxëë i Tupanaärü mu na nagu pexixüçèx i pecümagütama. ⁷ Pema nixi i duüxügü i togüpëxewa rü meã pemaxënetaxü, natürü peãewa rü chixexügu perüxinüë. Rü aixcüma nixi ga yema ore ga nuxcümaücü ga Tupanaärü orearü uruü ga Ichaxía pechiga ümatüxü ga ñaxü:

⁸ “Ñaa duüxügü rü naãxmaãmare choxü nicuëxüügü. Natürü naãëwa rü tama aixcüma chaugu narüxinüë. ⁹ Rü taxuwama name na ngëmaäcü natüçèxma choxü yacuëxüügüxü. Rü guxüma i norü nguxëëtae rü yatügüarü mugümare nixi rü tama aixcüma chorü mu nixi,” ñaxü. ¹⁰ Rü ñuxüchi ga Ngechuchu rü duüxügüçèx naca, rü ñanagürü nüxü: —iMeã iperüxinüë i ñaa chorü ore, rü nagu perüxinüë! ¹¹ Ngëma ðna i duüxügü ngöxü rü tama ngëma nixi i napecaduãxëëgüxü. Natürü ngëma ore i chixexü i nüxü yaxuxü, rü ngëma waxi nixi i napecaduãxëëgüxü —ñanagürü. ¹² Rü ñuxüchi ga norü ngüexügu rü naxcèx naxi, rü ñanagürügü nüxü: —iPa Corix, tama ëxna nüxü cucuèx na Parichéugüãewa nangüxü i ngëma ore i namaã nüxü quixuxü? —ñanagürügü. ¹³ Natürü nüma ga Ngechuchu rü nanangaxü rü ñanagürü nüxü: —Guxüma i ngëma nanetü i tama Chaunatü itoxü rü tá nanabëx. ¹⁴ Rü nüëtama i ngëma Parichéugü, erü namaärü cuëxruügü i ngexetüxürü nixigü. Rü ngëxguma wüxi i ngexetüxü rü naxrüü ngexetüxümaã inacuëxgu rü ngürüãchi ngëma taxre rü wüxi i äxmaügu tá nügümaã nayayicu —ñanagürü. ¹⁵ Rü ñuxüchi ga Pedru rü Ngechuchuna naca, rü ñanagürü: —iTomaã meã nangoxëta na ñuxü ñaxüchiga yixü i ngëma ore i tomaã nüxü quixuxü! —ñanagürü. ¹⁶ Rü Ngechuchu nanangãxü rü ñanagürü: —iËxna pema rü ta tama nüxü pecuëxgüéga i ngëma ore? ¹⁷ iTama ëxna nüxü pecuëx rü guxüma i ngëma ðna i duüxügü ngöxü rü naänüwa naxü, rü yixcama rü ñuxüchi ínaxüxü? ¹⁸ Natürü guxüma i ngëma ore i duüxügü nüxü ixuxü rü naãëwa nixi i ne naxüxü. Rü ngëma ore i chixexü waxi nixi i napecaduãxëëgüxü i ngëma duüxügü. ¹⁹ Erü naãëwa nixi i chixexügu naxinüëxü i duüxügü. Rü ngëma ne naxü na namáetaxü, rü to i ngexü i ätexümaã na inapexü, rü na nangëãëmarexü, rü na nangixü, rü na yadoratëxáxü, rü na naguxchigawëxexü. ²⁰ Rü guxüma i ngëma chixexü waxi nixi i duüxügüxü pecaduãxëëxü. Natürü ngëma na tama nayauxmëxgüxü naxüpa na nachibüexü, rü ngëma rü tama nanapecaduãxëë i duüxügü —ñanagürü.

Wüxi ga ngecü ga to ga nachiiãnecüãx ga Ngechuchuaxü yaxüxcüchiga (Mr 7.24-30)

²¹ Rü yexguma yéma inaxüãchigu ga Ngechuchu, rü Tiruane rü Chidãüãneärü iãnegüwa naxü. ²² Rü Ngechuchuxütawa ingu ga wüxi ga ngecü ga Canácüãx ga Tiruanegu ächiücü. Rü tagaäcü ngigürügü nüxü: —Pa Cori Pa Dabitanüxüx, jcuüxü changechaütümü! Erü chauxacü rü wüxi i ngoxo ngüwa nangëxma i poraäcü ngixü chixewexü —ngigürügü. ²³ Natürü ga Ngechuchu rü tama ngixü nangãxü. Rü düxwa ga norü ngüexügu rü naxcèx naxi, rü Ngechuchuxü nacëëxügü, rü ñanagürügü: —Pa Corix iNgümaã nüxü iXu i ngëma nge rü íyaxü, erü tawe iyacaechigü! —ñanagürügü. ²⁴ Rü yexguma ga Ngechuchu rü ñanagürü: —Tupana nüma choxü namu na Yudiügü i pecaduãxgüxüçèxicatama na chadauxüçèx —ñanagürü. ²⁵ Natürü ngüma

ga yema nge ga tama Yudíu ixícü rü Ngechuchucèx iyaxü. Rü napêxegu iyacaxâpüxü, rü ngígürügü nüxü: —Pa Corix jchoxü rüngüxêê! —ngígürügü. ²⁶ Natürü Ngechuchu rü ñanagürü: —Tama name i taxacügüna tanapu i norü òna na airügüna naxâxücèx —ñanagürü. [Rü yema ñanagürü yerü nümagü ga Yudiügü rü nügü nixugüe na Tupanaxâcügüxüchi yígüxü rü yema togü rü ñoma airügürü na yixígüxü.] ²⁷ Natürü ngüma ga yema nge rü ngígürügü: —Rü aixcüma nixí i curü ore, Pa Corix, natürü airügü rü ta norü yoraarü ònatüchi i mechawa rüyixü nangõx —ngígürügü. ²⁸ Rü yexguma ga Ngechuchu rü ñanagürü ngíxü: —Pa Ngecüx, aixcümaxüchi cuyaxõ. Marü tá chanaxü i ngêma cuma cunaxwèxexü —ñanagürü. Rü yexgumatama ngíxcèx nitaane ga ngíxâcü.

Ngechuchu rü nanameêxêê ga muxüma ga idaaweexü

²⁹ Rü yemawena ga Ngechuchu rü inaxüâchi ga yema naânewa, rü nax-taxa ga Gariréacutüwa naxü. Rü ñuxüchi wüxi ga mëxpünewa ínaxüâchi, rü yéma nayarüto. ³⁰ Rü muxüma ga duüxügü naxütawa nangugü. Rü yéma naxütawa nanagagü ga duüxügü ga ichixeparagüxü, rü ngexetügüxü, rü tama idexagüxü, rü chixechacüügüxü, rü muxüma ga togü ga idaaweexü. Rü Ngechuchupêxegu nayamugü, rü nüma ga Ngechuchu rü nanameêxêê. ³¹ Rü ga duüxügü rü poraâcü nabèixâchiâégü ga yexguma nüxü nadaugüga ga ñuxâcü yema noxri tama idexagüxü rü marü na yadexagüxü, rü yema noxri chixechacüügüxü rü marü naxcèx na yataanegüxü, rü yema noxri chixeparagüxü rü marü na nameparagüxü, rü yema noxri ngexetügüxü rü marü na yadauchigüxü. Rü yemacèx ga duüxügü rü Tupanaxü nicüexüügü.

Ngechuchu nanachibüexêê ga 4000 ga yatügü

(Mr 8.1-10)

³² Rü ñuxüchi ga Ngechuchu rü norü ngüexügücèx naca, rü ñanagürü nüxü: —Choxü nangechaütümügü i ñaâ duüxügü, erü marü tomaêxpüx i ngunexü nuâ chauxütawa nangêxmagü, rü nüxü nataxuma i norü òna. Rü taxuacüma ngêmaâcümare nachiüwa chanamugü, erü ngürüâchi namagu tá natayurae —ñanagürü. ³³ Rü norü ngüexügü rü ñanagürügü nüxü: —¿Natürü ngextá tá tanayaxu i òna naxcèx i guxüma i ñaâ duüxügü? Erü taxüema nuxma taxâpata i nuâ —ñanagürügü. ³⁴ Rü Ngechuchu nüxna naca, rü ñanagürü: —¿Ñuxre i pâü pexü nangêxma i pemax? —ñanagürü. Rü nanangâxügü, rü ñanagürügü: —Toxü nangêxma i 7 i pâü rü noxretama i choxnixâcügüxicatama —ñanagürügü. ³⁵ Rü ñuxüchi ga Ngechuchu rü duüxügüxü namu na ñaxtúanewa natogüxücèx. ³⁶ Rü nanade ga yema 7 ga pâü rü yema choxnigü. Rü Tupanana moxè naxâ. Rü ñuxüchi inanabücu. Rü norü ngüexügüna nanana na duüxügüxü yanuâxücèx. ³⁷ Rü guxüma ga duüxügü rü meâma nachibüe. Rü yemawena rü 7 ga pexchigü nana-pagüamatama namaâ ga yema pâü rü choxnichipêxegü ga iyaxügüxü. ³⁸ Rü yema yéma chibüexü rü 4,000 ga yatügü nixí, natürü ga ngexügü rü buxügü rü tama nayaxugü. ³⁹ Rü yemawena ga Ngechuchu rü duüxügüxü ínimugü. Rü ñuxüchi wüxi ga nguëgu nixüe, rü Magadaarü naânewa naxü.

16

Parichéugü rü Chaduchéugü naxcèx ínacagü na nüxü nüxü nadauxêêgüxücèx ga wüxi ga cuèxruü ga Tupanaarü poramaâ naxüü
(Mr 8.11-13; Lc 12.54-56)

¹ Rū ga Parichéugū rū Chaduchéugū rū Ngechuchuxū ínayadaugū. Rū Ngechuchuna nacagüe na nüxū nüxū nadauxëégüxüxcèx ga wüxi ga cuèxruū ga Tupanaärü poramaã naxüxū, yerü nüxū naxügüchaümare. ² Natürü nüma ga Ngechuchu rü nanangäxū, rü ñanagürü nüxū: —Pema rü yáuanecü rü ñaperügü:

“Name tá nixí i moxüärü ngunexū, erü nadautüweane”, ñaperügü. ³ Rū ngëxguma pëxmama nadautüweanegu rü poraãcü nacaixanegu, rü:

“Nachixe tá nixí i ngunexū” ñaperügü. Pema nixí i duüxügü i togüpëxewa meã pemaxënetaxū, natürü chixexügu perüxinüë. Rū pema nüxū pecuèx na penangugüxū i ñuxgu tá nameänexū rü ñuxgu tá nachixeanexū. Natürü ñuxma na yanguxū i ngëma cuèxruügü ga nuxcüma Tupana pemaã ixunetaxū rü tama nüxū pecuèxgüega na ñacüchiga yïxū —ñanagürü. ⁴ Rū ñanagürü ta ga Ngechuchu: —Ñaa duüxügü i chixecümagüxū rü tama yaxögüxū rü naxcèx ínacagü i wüxi i cuèxruü i Tupanaärü poramaã üxū. Natürü yema cuèxruū ga nuxcümaücü ga Tupanaärü orearü uruū ga Yonáxū ngupetüxürüüxicatátama nadaugü. Rū yexgumarüü na bayenaänüwa na ínaxüxüxū, rü choma rü ichatáxüwa tá íchaxüxü. Rū taxuxütáma i to i cuèxruüxū nüxū chadauxëë i ñaa duüxügü —ñanagürü. Rū ñuxüchi nüxna yéma nixü ga Ngechuchu, rü ínaxüächi.

Parichéugüarü pãüärü puxëeruüchiga
(Mr 8.14-21)

⁵ Rū yexguma naxtaxaarü tocutüwa naxíxgu ga norü ngüexügü, rü nüxū ínayarüngümaë na nawemü ta íyangegüxū. ⁶ Rū yexguma ga Ngechuchu rü ñanagürü nüxū: —¡Dücèx, pexuãëgü naxcèx i Parichéugü rü Chaduchéugüarü pãüärü puxëeruü! —ñanagürü. ⁷ Rū yema norü ngüexügü rü ínanaxügüë ga nügü na ñagüxū: —Ngëma ñanagürü tüxū, erü tama tawemüta ítingegü —ñanagürügü. ⁸ Natürü ga Ngechuchu rü nüxū nacuèxama ga ñuxäcü na yadexagüxū ga norü ngüexügü. Rū yemacèx ñanagürü nüxū: —¿Tüxcüü,

“Tüxü nataxu i tawemü” ñaperügü? Pema rü tama aixcüma peyaxögü. ⁹ —¿Tama ëxna nüxū pecuèxgüega rü nüxna pecuèxächie ga yema wüximëxpüx ga pãü ga yema 5,000 ga yatügücèx ichabücuxū? ¿Rü ñuxre ga pexchi penaxüãcuxū namaã ga yema naxchipëxegü ga íyaxügüxū? ¹⁰ —¿Rü tama ëxna nüxna pecuèxächie ga yema 7 ga pãü ga yema 4,000 ga yatügücèx ichabücuxū? ¿Rü ñuxre ga pexchi penaxüãcuxū namaã ga yema naxchipëxegü ga íyaxügüxū? ¹¹ —¿Rü ñuxäcü nixí i tama nüxū pecuãxü i tama pãüchiga na chidexaxü i ngëxguma ñachagu:

“¡Pexuãëgü naxcèx i Parichéugü rü Chaduchéugüarü pãüärü puxëeruü!” ñachagu? —ñanagürü ga Ngechuchu. ¹² Rū yexguma ga norü ngüexügü rü nüxū nacuèxgü ga tama pãüärü puxëeruüchiga na yadexaxü ga Ngechuchu, natürü Parichéugü rü Chaduchéugüarü ngüxëëtaechiga na yïxü ga na yadexaxü.

Pedru nanangoxëë na Cristu na yïxü ga Ngechuchu
(Mr 8.27-30; Lc 9.18-21)

¹³ Rū yexguma Checharéa ga Piripuanearü ngaicamana nanguxgu ga Ngechuchu, rü norü ngüexügüna naca, rü ñanagürü: —¿Ñuxü ñaxü i duüxügü i chauchiga na texé chüxü i chomax? —ñanagürü. ¹⁴ Rū nüma ga norü ngüexügü rü nanangäxü rü ñanagürügü: —Nangëxma i duüxügü rü:

“Cuáü ya baiüxëeruü quixí” ñagüxū. Rū togü i:

“Ería quixí” ñagüxü. Rü togü i:

“Yeremía quixí” ñagüxü. Rü togü rü:

“Wüxi ga nuxcúmañcü ga Tupanaärü orearü uruü quixí” ñagüxü — ñanagürügü. ¹⁵ Rü yexguma ga Ngechuchu rü nüxna naca rü ñanagürü: — ¿Rü pema i ñuxü ñapegüxü choxü na texé chiixü? — ñanagürü. ¹⁶ Rü Chimáü ga Pedru nanangäxü, rü ñanagürü nüxü: —Cuma nixí i Cristu ya Tupana ya maxücü Nane quixü —ñanagürü. ¹⁷ Rü Ngechuchu nanangäxü rü ñanagürü nüxü: —Cuma rü aixcüma cutaãe, Pa Chimáüx, Pa Yoná Nanex, erü taxuüma i duüxü nixí i cuxü nüxü cuèxëexü i ngëma, natürü Chaunatü ya daxügücü nixí ya cuxü nüxü cuèxëecü na Nane chiixü. ¹⁸ —Rü choma cumaã nüxü chixu rü cuma rü Pedru quixí. Rü ngëma cuéga rü “nuta” ñaxüchiga nixí. Rü cuma tá nixí i chorü duüxügüarü dauruü quixü. Rü Chataná rü täütáma nüxü narüyexera i ngëma chorü duüxügü. ¹⁹—Rü choma rü tá cuxna chanaxá i chorü ore na duüxügümaã nüxü quixuxüçex na nüxü nacuxgüxüçex na ñuxäcü daxügüxü i nañewa nangugüxü i ngextá Tupana äëxgacü iixüüwa. Rü yíxema tama cuxü irüxñüëxë i ngëma ore rü täütáma ngema tichocu. Natürü yíxema meã cuxü irüxñüëxë i ngëma ore rü aixcüma ngema Tupana äëxgacü iixüüwa tá tangugü —ñanagürü. ²⁰ Rü yexguma ga Ngechuchu rü norü ngüexügümaã nüxü nixu, rü ñanagürü: —¿Taxüemaãtáma nüxü pixu na choma rü Cristu chiixü! —ñanagürü.

Ngechuchu nanaxunagü ga norü yuxchiga
(Mr 8.31-9.1; Lc 9.22-27)

²¹ Rü yemawena inanaxügü ga norü ngüexügümaã nüxü na yaxuxü ga ñacü tá nüxü na üpetüxü. Rü ñanagürü: —Choma rü Yerucharéüwa tá chaxü, rü ngema poraäcü ngüxü tá choxü ningexëëgü. Rü choxü tá nimëxgü i Yudiügüarü äëgacügerügü rü paigüarü äëxgacügü rü ngüxëeruügü i ore i mugüwa nguxëëtaegüxü. Natürü tomaëxpüx i ngunexü ngupetügu rü wena táxaruü chamaxü —ñanagürü. ²² Rü yexguma ga Pedru rü nüxica noxrüwama Ngechuchuxü naga, rü inanaxügü ga na naxucuxëaxü, rü ñanagürü: —Pa Corix, Tupana rü tama nanaxwëxe na ngëmaäcü quidexaxü. Rü täütáma ngëmaäcü cuxü nangupetü i cumax —ñanagürü. ²³ Natürü ga Ngechuchu rü Pedrucëx nadaueguãchi, rü ñanagürü nüxü: —¿Choxna ixügachi, Pa Chatanáx, erü chixexügu choxü cuxguxëëchaü! Rü tama Tupana nagu rüxñüxügü curüxñü, rü yatügü nagu rüxñüxügumare curüxñü i cumax —ñanagürü. ²⁴ Rü yexguma ga Ngechuchu rü norü ngüexügüxü ñanagürü: —Rü ngëxguma texé chowe rüxüxchaügu, jëcü nüxü tarüxo i tümaärü ngüchaü, rü namaã tabora i ngëma guxchaxügü i tümacëx ínguxü i ñoma curuchawa tipotaxürüü tüxü iixëëxü, rü ngëmaetüwa chowe tarüxüãma! ²⁵ Erü yíxema tügü maxëchaxëëchaüxë rü tá tayu. Natürü yíxema chauxcëx yúxe rü aixcüma tá tüxü nangëxma i maxü i taguma güxü. ²⁶ Rü ¿Täcüwa i nüxü namexü ya wüxi ya yatü ega nayauãxgu i guxüma i ñoma i naãneärü ngëmaxügü, natürü iyanatauxëëägu i norü maxü? Erü taxucürüwama wüxi ya yatü rü norü dïërumaã naxcëx nataxe i norü maxü. ²⁷ Erü choma i Tupana Nane na duüxüxü chiixü rü wena táxaruü núma chaxü. Rü ngëxguma rü Chaunatü ya Tupanarüü tá äëxgacü chixí, rü daxüçüãx i orearü ngeruügümaã tá íchangü. Rü ngëxguma tá nixí i nüxü chanaxütanüxü i wüxichigü i duüxügü i ngëma ñuxäcü chauxcëx na namaxëxürüüäcüma maxëxü. ²⁸ Rü aixcüma pemaã nüxü chixu rü nangëxma i ñuxre i duüxügü i núma ngëxmagüxü rü täütáma

nayu ñuxmatáta choxü nadaugü na yuwa ícharüdaxü rü aixcüma ãëxgacü ya poracü na chiixü —ñanagürü ga Ngechuchu.

17

Ngechuchu rü toraxüãcü nangox (Mr 9.2-13; Lc 9.28-36)

¹ Rü 6 ga ngunexüguwena rü Ngechuchu ínayagagü ga Pedru rü Chaütiágu rü Cuáü ga Chaütiágueneë. Rü nüxícatama wüxi ga mëxpúnewa noxrüwama namaã naxü. ² Rü yéma yema ngúexügüpëxewa rü toraxüãcü nangox ga Ngechuchu. Rü üëxcürüü nixí ga nachiwe ga na yayauracüüxü. Rü naxchiru rü ta üëxcüemarüü nixí ga na nangóonexëãxü. ³ Rü ngürüãchi yéma naxcëx nangoxgü ga Moiché rü Ería. Rü Ngechuchumaã yéma nidexagü. ⁴ Rü yexguma ga Pedru rü ñanagürü Ngechuchuxü: —Pa Corix, name nixí nuã tangëxmagü. Rü ngëxguma cunaxwëxegu rü tá tanaxü ya tomaëxpüx ya düxenü, rü wüxi ya cuxcëx, rü náí ya Moíhcécëx, rü náí ya Eriacëx —ñanagürü. ⁵ Rü yexguma íyadexayane ga Pedru rü wüxi ga caixanexü ga nangóonexëëxü rü natanügu nayangaixema. Rü yema caixanexüwa inanaxü ga wüxi ga naga ga ñaxü: —Daa nixí ya Chaune ya nüxü changechaüxüchicü rü namaã chataãëxüchicü. ¡Rü naga pexínüë! —ñanagürü. ⁶ Rü yexguma yemaxü naxínüëgu ga yema ngúexügü, rü ñaxtüanegu nanangücuchiãchitanü, yerü poraãcü namuë. ⁷ Natürü ga Ngechuchu rü naxcëx nixü, rü nüxü nayarüngögü, rü ñanagürü nüxü: —¡Ipechigü rü tãxü ipemuëxü! —ñanagürü. ⁸ Rü yexguma wenaxãrü nadaunagütanügu, rü Ngechuchuxüxícatama nadaugü rü taxüema ga toguexü nadaugü. ⁹ Rü yexguma ínaxígüga ga yema mëxpúnewa, rü Ngechuchu nayaxucüxëgü ga taxüemaãna na nüxü yaxugüëxüçëx ga yema yéma nüxü nadaugüxü, ñuxmatáta yuwa ínadaxgu rü wena namaüxgu. ¹⁰ Rü ñuxüchi ga yema ngúexügü rü Ngechuchuna nacagü, rü ñanagürügü: —¿Tüxcüü i ngëma ngüexëëruügü i ore i mugüwa ngüxëëtaegüxü rü ñanagürügü:

“Ería tá nixí ya nüxíra cuxüpa nuã ücü?” ñanagürügü. ¹¹ Rü Ngechuchu nanangãxü, rü ñanagürü: —Aixcüma nixí i Ería na nüxíra tá núma naxüxü na chauxüpa Tupanacëx yamexëëãxüçëx i duüxügü. ¹² Natürü choma pemaã nüxü chixu, rü Ería rü marü núma naxü, natürü duüxügü rü tama nüxü nacüëxgü na texe yíixü. Rü yemacëx chixri namaã nachopetü. Rü ngëxgumarüü tá ta nixí na chixri tá chomaã nachopetüxü i duüxügü —ñanagürü. ¹³ Rü yexguma ga yema ngúexügü rü nüxü nicüëãchitanü ga Cuáü ga baiüxëëruüchiga na yiixü ga yema Ngechuchu namaã nüxü ixixü.

Ngechuchu rü nanamexëë ga wüxi ga bucü ga ngoxo nawa yexmacü (Mr 9.14-29; Lc 9.37-43)

¹⁴ Rü yexguma duüxügü íyexmaxüwa nangugügu, rü wüxi ga yatü Ngechuchucëx nixü. Rü napëxegu nayacaxãpüxü rü ñanagürü nüxü: ¹⁵ —Pa Corix, ¡nüxü nangechaü ya chaune rü naxcëx yataanexëë! Erü muëxpüxcüna rü naxãüãëxü, rü poraãcü nüxü nangux. Rü muëxpüxcüna rü üxüxetügu nayanguxëë, rü éxna dexágu. ¹⁶ —Rü nuã curü ngúexügüxütawa chanaga, natürü nümagü rü tama nüxü nacüëxgü na namexëëgüãxü —ñanagürü. ¹⁷ Rü yexguma Ngechuchu nanangãxü, rü ñanagürü nüxü ga yema duüxügü ga yéma yexmagüxü: —Pa Duüxügü i Tama Yaxögüxü i Chixri Maxëxüx, ¿ñuxguratáta i pemaã chanuxmaxü rü yaxna pemaã chaxínüxü? ¡Nuã penaga ya yima bucü! —ñanagürü. ¹⁸ Rü Ngechuchu nananga ga yema ngoxo ga

guma bucüwa yexmaxü. Rü yemaäcü ínanatèxüchi ga yema ngoxo. Rü yexgumatama naxcèx nitaane ga guma bucü. ¹⁹ Rü yemawena ga norü ngúexüügü rü noxrüwama Ngechuchumaã nidexagü. Rü nüxna nacagüe, rü ñanagürügü nüxü: —Pa Corix, ¿tüxcüü i toma rü taxuacüma ínanatèxüchi i ngëma ngoxo? —ñanagürügü. ²⁰ Rü Ngechuchu nanangãxü, rü ñanagürü nüxü: —Pema rü taxuacüma ípenatèxüchi erü tama aixcüma peyaxögü. Rü aixcüma pemaã nüxü chixu, rü ngëxguma chi woo wüxi ya motachachirerüxü naxiraxüchigu i perü õ, rü chi daa mëxpünemaã nüxü pixuxgu na yaxügachixücèx, rü chi pega naxínü. Rü taxuxü chima pexü naguxcha ega aixcüma peyaxögü. ²¹ —Natürü ñaärüü i ngoxo rü tama ínaxüxü ega tama ixaureäcüma iyumüxëgu —ñanagürü.

Ngechuchu rü wenaxãrü nanaxunagü ga norü yuxchiga
(Mr 9.30-32; Lc 9.43-45)

²² Rü yexguma norü ngúexüügümaã Gariréaarü naãnegu yaxüxgu ga Ngechuchu, rü norü ngúexüügümaã nüxü nixu, rü ñanagürü: —Choma ya Tupana Nane na duüxüxü chiixü, rü chixri tá chomaã nachopetü rü äëxgacügüna tá choxü namugü i duüxüügü. ²³ —Rü tá choxü nimèxgü, natürü tomaëxpüx i ngunexüguwena rü wena táxarü chamaxü —ñanagürü. Rü yexguma yema orexü naxínüëgu ga norü ngúexüügü, rü poraäcü nangechaügü.

Ngechuchu ngíxü naxütanü ga yema dïeru ga tupauca ga taxüñecèx ngíxü nayauxgücü

²⁴ Ngechuchu rü norü ngúexüügümaã Capernáüärü íãnewa naxí. Rü yexguma yéma nangugügu rü Pedruxü ínayadaugü ga yema yatügü ga tupauca ga taxüñecèx dïeru ngíxü yauxgüxü. Rü Pedruna nacagüe rü ñanagürügü: —¿Yima curü Cori rü tama ëxna ngíxü naxütanü i ngëma dïeru i tupauca ya taxüñeärü ixícü? —ñanagürügü. ²⁵ Rü Pedru nanangãxü, rü ñanagürü: —Ngëmaãcü nanaxütanü —ñanagürü. Rü yixcama ga yexguma íxgu naxücxgu ga Pedru, rü Ngechuchuxira Pedrumaã nidexa, rü ñanagürü nüxü: —¿Ñüxü ñacuxü i cumax, Pa Pedrux, rü ngextá nixí i nayauxgüãxü i norü dïeru i guxü i nachüñãneärü äëxgacügü? ¿Cuxcèx i nügütanüwatama rü ëxna togü i duüxügütanüwa? —ñanagürü. ²⁶ Rü Pedru nanangãxü, rü ñanagürü: —Maneca togü i duüxügütanüwa nixí i nayauxgüãxü —ñanagürü. Rü ñüxüchi Ngechuchu nanangãxü rü ñanagürü: —Rü ngëxguma ngëmaäcü yixígu, rü yixema na Tupanaärü ixígüxü rü taxucèxma tanaxütanügü. ²⁷ —Natürü ngëma na taxüema tamaã nuxücèx, rü chanaxwëxe i cuyaxütanü i ngëma dïeru. ¡Rü yéa naxtaawa naxü, rü ngema yapoxwaxe! ¡Rü ngëma nüxíraüxü i choxni i cunapoxwaüxü rü naãxwa tá nüxü icuyangau i wüxi i dïeru i nagu mexü na yangutanüëëxücèx i chauxcèx rü cuxcèx rü ta! ¡Rü tupauca ya taxüñewa nange i ngëma dïeru, rü yaxütanü! —ñanagürü.

18

¿Texé tá tixí ya guxãrü yexera ixíxë?
(Mr 9.33-37; Lc 9.46-48)

¹ Rü yexguma ga norü ngúexüügü rü Ngechuchucèx naxí rü nüxna nacagü, rü ñanagürügü: —¿Pa Corix, texé tá tixí ya guxüärü yexera ixíxë i ngëma Tupana äëxgacü íixíxüwa? —ñanagürügü. ² Rü yexguma ga Ngechuchu rü wüxi ga buxücèx naca, rü norü ngúexüügüarü ngãxütanügu nanachixëë.

³ Rū ñuxũchi ñanagũrũ nũxũ: —Dũcèx, Pa Chorũ Ngũexũgũx, aixcũma pemaã nũxũ chixu, rũ ngẽxguma tama nũxũ perũxoegu i ngẽma na togũarũ yexera pegũ pixĩgũxẽechaũxũ rũ ñuxũchi tama ñaã buxũrũtũ pegũ íperũxĩragu, rũ taxucũrũwa pichocu i ngextá Tupana ãẽxgacũ íixĩxũwa. ⁴ —Rũ aixcũma yĩxema tũgũ írũxĩraxe rũ ñaã buxũrũtũ íxĩxẽ, rũ yĩxema tá tixĩ ya guxũãrũ yexera íxĩxẽ i ngextá Tupana ãẽxgacũ íixĩxũwa. ⁵ —Rũ texé ya chauẽgagu meã nayaxũxe i wũxi i buxũ i ñaãrũtũ íxĩxũ rũ choxũ nixĩ i tayaxuxũ.

Naxãucũma nixĩ na pecadugu inguxũ
(Mr 9.42-48; Lc 17.1-2)

⁶ —Rũ texé ya pecadugu nanguxẽexẽ i wũxi i ñaã buxũgũ i choxũ yaxõgũxũ rũ tũmacèx rũ narũmemaẽ chi nixĩ na noxtacũma wũxi ya nuta tũmanaãwa nayangacuchixũ, rũ ñuxũchi ngẽmaãcũ taxtũchiũwa tũxũ nayarũtãexũ na ngẽxma tayuxũcèx. ⁷ —Ñoma i naãnecũãx i duũxũgũcèx rũ wũxi i taxũ i ngechaũ nixĩ na nangẽxmaxũ i muxũchixũ i tacũ i pecadugu nayixẽẽxũ. Rũ guxũguma tá nangẽxma i ngẽma chixexũgũ, natũrũ wũxi i ngechaũxũchi tá nixĩ naxcèx i ngẽma yatũ i togũxũ pecadugu nguxẽẽxũ. ⁸ —Rũ ngẽmacèx i ngẽxguma chi cuxmèx rũ ãxna cucutũ pecadugu cuxũ nguxẽẽgu, rũ name nixĩ i noxtacũma ícunadae rũ yaxũgu cuyaña. Erũ narũmemaẽ nixĩ i cuboxmẽxãcũma rũ ãxna cubocutũãcũma na cunayaxuxũ i curũ maxũ na tama guxũne ya cuxmèxmaã rũ ãxna guxũne ya cucutũmaã ùxũ ya taguma ixoxũnewa quitèxcuchixũcèx. ⁹ —Rũ ngẽxguma chi cuxetũ pecadugu cuxũ nguxẽẽgu, rũ name nixĩ i ícunacaxũchi, rũ yaxũgu cunaña. Erũ narũmemaẽ nixĩ i wũxixetũmaã na cunayaxuxũ i curũ maxũ na tama guxũne ya cuxetũmaã ùxũ ya ngoxogũ nagu poxcuenewa na quitèxcuchixũcèx. [Rũ ngẽmaãcũ woo cuxũ naguxchagu, natũrũ name nixĩ i nũxna quixũgachi i guxũma i ngẽma chixexũgũ i nagu cunguchaũxũ.]

Ore ga carneru ga iyarũtaxuxũgu íxuxũ
(Lc 15.3-7)

¹⁰ —Rũ tama name i nũxũ pexoox i wũxi i buxũ i ñaãrũtũ choxũ yaxõxũ. Erũ ngẽma norũ daurũtũgũ i orearũ ngerũtũgũ i daxũcũãx rũ guxũguma Chaunatũ ya daxũgucũpèxewa nangẽxmagũ na ngema ngẽma buxũtũwa nachogũxũcèx. ¹¹ —Rũ choma i Tupana Nane na duũxũxũ chĩxũ rũ nũma chaxũ na chanamaxẽxẽẽxũcèx i duũxũgũ iyarũtauxexũ. ¹² —¿Rũ ñuxũ ñapegũxũ i pema ega wũxi ya yatũ rũ nũxũ nangẽxmagu i 100 i carnerugũ rũ wũxi nũxũ iyarũtauxgu? ¿Taux ãxna i nachitaũgu namugũãxũ i ngẽma 99, rũ ñuxũchi naxcèx yadauxũ i ngẽma nũxũ iyarũtaxuxũ? ¹³ —Rũ ngẽxguma nũxũ iyan-gauxgu, rũ namaã nataãẽxũchi i ngẽma norũ carneru. Rũ woo guxũguma namaã nataãe i ngẽma 99 i tama iyarũtauxexũ, natũrũ yexeraãcũxũchi namaã nataãe i ngẽma wũxi i iyarũtaxuxũ, erũ marũ nũxũ inayangau. ¹⁴ —Rũ ngẽxgumarũtũ ta nixĩ ya Penatũ ya daxũgucũ na tama nanaxwèxexũ na wũxi i ñaã buxũ na iyarũtaxuxũ.

Ñuxãcũ tamũcũxũ na ingechaũxũchiga
(Lc 17.3)

¹⁵ —Rũ ngẽxguma cueneẽ chixexũ cumaã ùxgu, rũ name nixĩ i nũxĩcatama namaã quidexa, rũ nũxna nũxũ cucuẽxãchixẽe i ngẽma norũ chixexũ i cumaã naxũxũ. Rũ ngẽxguma cuga naxĩnũgu, rũ marũ wenaxarũ mexũcèx cunataeguxẽe i ngẽma cueneẽ. ¹⁶ —Natũrũ ngẽxguma tama cuga naxĩnũgu i ngẽma cueneẽ, rũ name nixĩ i naxcèx cuca i wũxi rũ ãxna taxre i duũxũgũ na nũmagũ rũ ta namaã yadexagũxũcèx i ngẽma cueneẽ. ¹⁷ —Rũ ngẽxguma

rü ta tama nüxü inaxĩnũgu i ngẽma taxre i duũxũgũarũ ore, rü name nixĩ i guxü i yaxõgũxũmaã nüxü quixu na ngẽma cueneẽmaã yadexagũxũcẽx. Rü ngẽxguma rü ta tama nüxü inaxĩnũgu i ngẽma yaxõgũxũãrũ ore, rü name nixĩ i wũxi i duũxü i tama yaxõxũrũũgu namaã curũxĩnũ. ¹⁸—Rü aixcũma pemaã nüxü chixu rü yixema núma ñoma i naãnewa tama pexü irũxĩnũxẽ i choru ore rü tãütãma Tupana ãexgacü íixĩxũwa tichocu. Natũrũ yixema meã pexü irũxĩnũxẽ i ngẽma ore rü aixcũma ngema tá tangu. ¹⁹—Rü pemaã nüxü chixu rü ngẽxguma chi taxre i pema i núma ñoma i naãnewa rü wũxigu ãacũcẽx ípexaxgu i Chaunatu ya daxũgucũxũtawã, rü núma ya Chaunatu rü tá pexna nanaxã. ²⁰—Erũ ngẽma ngextã taxre rü ẽxna tomaẽxpũx i duũxũgũ chauẽgagu íngutaquẽxexũwa, rü choma rü ta norũ ngãxũtanũwa changẽxma—ñanagũrũ. ²¹Rü yexguma ga Pedru rü Ngechuchucẽx nixü, rü nüxna naca, rü ñanagũrũ: —¿Pa Corix, ngẽxguma chaueneẽ chixexü chomaã ùxgu, rü ñuxreẽxpũxcũna i namexü na nüxü nüxü changechaũxü naxcẽx i ngẽma chixexü i chomaã naxũxü? ¿Rü marũ namexü i cuxcẽx ega 7 ẽxpũxcũna yixĩgu na nüxü nüxü changechaũxü? —ñanagũrũ. ²²Rü Ngechuchu nanangãxü rü ñanagũrũ: —Tama name i 7 ẽxpũxcũnaxĩcatama nüxü nüxü cungechaũ. Natũrũ guxũgutãma nixü i nüxü nüxü na cungechaũxü woo 70 ẽxpũxcũna i 7 wa nangu—ñanagũrũ.

Ore ga ãexgacũarũ duũxü ga tama namücũaxü nüxü ngechaũxü ga norũ ngeñanũgu ixuxü

²³Rü Ngechuchu rü ñanagũrũ: —Rü ngẽma Tupana na ãexgacü íixĩxü, rü ñoma wũxi ga nachĩũãneãrũ ãexgacü ga norũ duũxũgũ ga nüxü nangeñanũgũxũmaã namexẽẽchaũxũrũ nixü. ²⁴—Rü yexguma inaxũgũãgu ga meã nüxü na yadaugũxü ga yema nüxü nangeñanũgũxũpane, rü naxũtawã nanagagü ga wũxi ga norũ duũxü ga taxũchicü ga dẽeru nüxü ngĩxü ngeñanũxü. ²⁵—Natũrũ ga yema norũ duũxü rü nangearũ dẽeruãx, rü taxuacũma norũ cori ga ãexgacũaxü nanaxũtanũega. Rü yemacẽx ga yema ãexgacü rü norũ churãragũxü namu na to ga corixü namaã nataxegũxũcẽx ga yema yatü, wũxigu tũmamaã ga naxmẽx rü naxãcũgü rü norũ yemaxũgü, na yema natanü ga dẽerumaã naxũtanũãxũcẽx ga norũ ngeñanũ. ²⁶—Rü yexguma ga yema norũ duũxü rü norũ ãexgacũpẽxegu nacaxãpũxü, rü nüxü nacẽẽxü, rü ñanagũrũ:

“Pa Corix ¡choxü nangechaũ! Rü marũ tá chapuracü, rü tá cuxü chanaxũtanü i guxũma”, ñanagũrũ. ²⁷—Rü yema norũ ãexgacũaxü nangechaũtũmũ, rü yemacẽx namaã nüxü nixu ga marũ tama nüxü na naxũtanũãxũcẽx ga yema norũ ngeñanũ. Rü ñuxũchi ínananguxuchixĩẽ. ²⁸—Natũrũ yexgumatama yema ãexgacũxũtawã ínaxũũxgu ga yema yatü, rü nüxü inayangau ga wũxi ga namücü ga írarũwatama nüxü nangeñanũxü. Rü yema yatü rü nüxna natũxũe, rü nananuxnaxã, rü ñanagũrũ nüxü:

“¡Choxü ngĩxü naxũtanü i ngẽma dẽeru i ngĩxü cungetanũcü!” ñanagũrũ. ²⁹—Rü yexguma ga yema namücü rü yema yatüpẽxegu nacaxãpũxü, rü nüxü nacẽẽxü, rü ñanagũrũ:

“Pa Chomücũx, ¡choxü nangechaũ! Rü marũ tá chapuracü, rü tá cuxü chanaxũtanü i guxũma”, ñanagũrũ. ³⁰—Natũrũ ga yema yatü rü tama nüxü naxũxũchãũ ga yema ore. Rü poxcupataũgu tũxü napoxcuama ñuxmata nüxü tanaxũtanü ga yema tũmaãrũ ngeñanũ. ³¹—Rü yexguma togu ga yema ãexgacũarũ duũxũgũ nüxü daugũgu ga yema ngupetũxü, rü porãacü naãẽwa nangũx ga yema naxũxü ga yema yatü. Rü norũ corixũtawã naxü rü nüxü

nayarüxügüe ga guxüma ga yema ngupetüxü. ³²—Rü yexguma ga yema äëxgacü rü nanamu ga norü churaragü na naxütawa nagagüäxüçex ga yema yatü. Rü yexguma naxütawa nanguxgu, rü ñanagürü nüxü:

“Wüxi i chixexü i chorü duüxü quixi. Choma rü cuxü nüxü changechaü ga yema choxü cungetanüxü, erü choxü cucëexü na tama cuxü chapoxcuxüçex. ³³—Rü cuma rü chita nüxü nüxü cungechaü i ngëma cumücü i cuxü nange-tanüxü, yexgumarüü ga choma rü cuxü nüxü na changechaüxürüü ga yema choxü cungetanüxü”, ñanagürü nüxü. ³⁴—Rü poraacü nanuxüchi ga yema äëxgacü. Rü norü churaragüxü namu na napoxcugüäxüçex ga yema yatü ñuxmata guxü nüxü naxütanü ga yema nüxü nangetanüxü —ñanagürü ga Ngechuchu. ³⁵ Rü ñuxüchi ñanagürü ta: —Rü ngëxgumarüü tá pemaä nanaxü ya Chaunatü ya daxügücü i ngëxguma tama wüxichigü aixcüma peenexëgüaxü nüxü perüngümaegu i ngema chixexü i pemaä naxüxü —ñanagürü.

19

Parichëügü rü Ngechuchuna nacagüe i táxmëxchiga

(Mr 10.1-12; Lc 16.18)

¹ Rü yema ñaxguwena ga Ngechuchu rü inaxüächi ga Garirëaarü naänewa. Rü natü ga Yudaüärü tocutüwa naxü ga Yudëaarü naänewa. ² Rü muxüma ga duüxügü nawe narüxi, rü nüma ga Ngechuchu rü yema nanameëxëë ga yema idaaweexü. ³ Rü Ngechuchucëx naxi ga ñuxre ga Parichëügü, rü nüxna nacagü rü ñanagürügü: —¿Cuxcëx namexü i wüxi i yatü na ínatáxmëxmarexü ega tacü rü chixexü taxüxgu ya naxmëx? —ñanagürügü. Rü yemaäcü nüxna nacagü yerü Ngechuchuxü chixexügu nanguxëëgüchaü. ⁴ Rü Ngechuchu nanangäxü rü ñanagürü: —¿Taguma éxna nawa pengüe i ngëma Tupanaärü ore i ümatüxü i nüxü ixuxü ga noxri Tupana naxüxgu ga duüxügü, rü yatüxü rü ngecüxü na naxüxü? ⁵—Rü ñanagürü ga Tupana:

“Rü ngëmacëx ya yatü rü tá nanatü rü naëna nixügachi na namëxmaä in-axäxüçex. Rü ngëmaäcü i ngëma taxre rü ñoma wüxitama i duüxürüü tá nixügü”.

⁶—Rü ñuxüchi tama taxre nixi, rü wüxitama nixi. Rü ngëmacëx taxucürüwa texé nüguna tayaxigachitanüxëë i ngëma taxre i Tupana nüguna mugüxü —ñanagürü. ⁷ Rü yexguma Ngechuchuna nacagü rü ñanagürügü: —¿Tüxcüü nixi ga Moiché ga duüxügümaä nüxü yaxuxü rü ngëxguma texé tümamëxü ítaxchaügu rü name nixi i wüxi i popera i tëxgüpane ngüxna taxä, rü ñuxüchi ngüxü ítatëx? ñaxü —ñanagürügü. ⁸ Rü Ngechuchu nanangäxü, rü ñanagürü nüxü: —Pegagu nixi ga Moiché ga tama pexna nachüxäxü na pexmëxü ípetäxü. Yerü nüma nüxü nacüex na tama aixcüma peyaxögüxü. Natürü noxriarü ügügu rü tama yemaäcü nixi. ⁹—Rü choma pemaä nüxü chixu rü tama name na texé tümamëxü ítaxü ega tama nai ya yatümaä nangëäxügagu yixügu. Rü ngëxguma chi yima yatü rü ñuxüchi nai i ngemaä naxäxmëxgu, rü chixexü naxü, rü ñoma nai i ngemaämare nangëäxüxürüü nixi. Rü texé ya ngümaä ämaxë i ngëma nge i ngíte ngüxü ítëxcü, rü ñoma nai i ngemaämare itapexürüü tixi —ñanagürü ga Ngechuchu. ¹⁰ Rü ñuxüchi ga norü ngüexügu rü ñanagürügü nüxü: —Ega ngëmaäcü yixügu rü name nixi i noxtacüma tama naxämëx ya yatü rü tama ixäte i nge —ñanagürügü. ¹¹ Rü Ngechuchu norü ngüexügüxü nangäxü rü ñanagürü: —Taxucürüwa guxüma i duüxügü nüxü nacüex i tacüchiga na yixü i ngëma nguxëëtae. Natürü yixema Tupana tüxü nüxü cuëxëxëxicatama tixi ya nüxü cuëxgüxe. ¹²—Rü nangëxma i

nagúxúrauxú i guxchaxú na tama naxámèxúcèx ya yatú. Erú nùmaxú i yatú rú woetama taxucürúwa naxámèx erú norú bucúma nangepüxüchare. Rú nùmaxú i yatú rú taxucürúwa naxámèx erú nayauxpüxücharee. Rú togú tama naxámèx erú Tupanaârú ngúchaúxícatama naxügüchaú. Rú texé ya ngémaâcü maxchaúxé rú marú name i ngémaâcü tamaxú —ñanagürú ga Ngechuchu.

Ngechuchu rú buxügüxú nameâxé
(Mr 10.13-16; Lc 18.15-17)

¹³ Rú duuxügü rú Ngechuchuxütawa nanagagü ga ñuxre ga buxügü na Ngechuchu nùxú ingögüxúcèx rú namaâ nayumüxèxúcèx. Natürü ga Ngechuchuarü ngüexügü rú inanaxügüe ga na yangagüâxú ga yema duuxügü ga Ngechuchuxütawa buxügüxú gagüxú. ¹⁴ Natürü ga Ngechuchu rú ñanagürü nùxú ga norú ngüexügü: —Marú name i chauxütawa naxí i buxügü. ¡Rú táxú i nùxna penachuxuxú! Erú Tupana âëxgacü ííxíxüwa rú tímácèx nixí ya yíxema ñaâ buxügürü meá yaxögüxe —ñanagürü. ¹⁵ Rú ñuxüchi ga Ngechuchu rú yema buxügüétü naxümèx. Rú yemawena inaxüâchi ga yéma.

Wüxi ga ngextüxücü ga diëruâxüchicü Ngechuchumaâ nidexa
(Mr 10.17-31; Lc 18.18-30)

¹⁶ Rú wüxi ga ngextüxücü rú Ngechuchuxütawa nangu, rú nùxna naca, rú ñanagürü: —Pa Ngüxèëruú ya Mecüx, ¿tacú tá chaxüxú na chanayauxúcèx i maxú i taguma gúxú? —ñanagürü. ¹⁷ Rú Ngechuchu nanangâxú rú ñanagürü nùxú: —¿Tüxcüú “Mecü” ñacurügü choxú? Erú Tupanaxícatama nixí ya mecü íxícü, rú nataxuma i to. Natürü ngëxguma cunayauxchaúgu i maxú i taguma gúxú, rú ¡naga naxínü i Tupanaârú mugú! —ñanagürü. ¹⁸ Rú yexguma ga guma ngextüxücü rú ñanagürü: —¿Ngëxürüxú tá nixí i Tupanaârú mugú i naga chaxínüxú? —ñanagürü. Rú Ngechuchu nanangâxú rú ñanagürü nùxú: —¡Täütáma cumáeta, rú täütáma naí i ngemaâ icupe, rú täütáma cungitèèx, rú täütáma doraxú quixu i togüchiga! ¹⁹ —¡Rú tímaga naxínü ya cunatú rú cue, rú nùxú nangechaú i cumücügü ngéma na cügü cungechaúxürüú! —ñanagürü. ²⁰ Rú yexguma ga guma ngextüxücü rú ñanagürü: —Guxüma i ngéma mugú i nùxú quixuxú rú woetama chorú bucúma meá chayanguxèë. ¿Rú tacú rú to tá chaxú na choxú nangëxmaxúcèx i maxú i taguma gúxú? —ñanagürü. ²¹ Rú Ngechuchu nanangâxú rú ñanagürü nùxú: —Ega aixcüma Tupanapëxewa mecü quixíxchaúgu, rú name nixí i namaâ cutaxe i guxüma i curú ngëmaxügü rú togú i ngearü ngëmaxúâxgüxüna cunaxá i ngéma curú natanü. Rú ngëxguma tá cuxú nangëxma i cuchica i daxügüxú i nañewa. Rú ñuxüchi marú name i chowe curüxü —ñanagürü. ²² Natürü yexguma yemaxú naxínügu ga guma ngextüxücü rú poraâcü nangechaú, yerü namuârü diëruâxüchi. ²³ Rú yexguma ga Ngechuchu rú norú ngüexügüxú ñanagürü: —Aixcüma pemaâ nùxú chixu rú naguchaxüchi nixí na wüxi i duuxú i diëruâxüchixú rú Tupana âëxgacü ííxíxüwa na nanguxú. ²⁴ —Rú aixcüma pemaâ nùxú chixu rú ñoma wüxi i cameyu na taxucürúwama wüxi ya ucumaxëtüwa naxüpetüxüârü yexera narügüxchamaë naxcèx i wüxi i duuxú i diëruâxüchixú na yaxücuxú i ngextá Tupana âëxgacü ííxíxüwa —ñanagürü. ²⁵ Rú yexguma yemaxú naxínüëgu ga norú ngüexügü rú poraâcü nabëxâchiâëgü. Rú nügüna nacagüe rú ñanagürügü: —¿Rú texé tá ëxna tixí ya nayaxüxe i maxú i taguma gúxú? —ñanagürügü. ²⁶ Rú Ngechuchu nùxú nadawenü rú ñanagürü nùxú: —Duuxügü rú taxuacüma nügü namaxèë, natürü Tupanaâxú rú natauxcha na namaxèëèâxú —ñanagürü. ²⁷ Rú yexguma ga Pedru rú ñanagürü nùxú:

—Pa Corix, toma rü marü ítanawogü ga guxüma ga torü yemaxügu na cuwe tarüxüxcèx. ¿Rü tacü tá nixí i torü natanü i ñuxmax? —ñanagürü. ²⁸ Rü Ngechuchu nanangäxü rü ñanagürü nüxü: —Aixcüma pemaã nüxü chixu rü ngëma ngunexü i Tupana nagu nangexwacaxüxëxü i guxüma, rü choma rü äëxgacü ya tacü tá chixí. Rü chorü tochica i mexëchixüwa tá charüto. Rü pema i 12 i chorü ngüexügu na chowe perüxü rü pema rü tá ta pexü nangëxma i perü tochicaxü i mexëchixü i chauxütawa. Rü ngema tá perütogü na norü maxüchigacèx nüxü picagüxü i guxüma i Yudiugü. ²⁹ Rü guxäma ya yixema tümapata chauxcèx ítaxe, rü ëxna tümaëneëgü rü tümaëyëxgüxü chauxcèx ítaxe, rü ëxna tümanatü rü tümaëxü chauxcèx ítaxe, rü ëxna tümamèx rü tümaxäcügüxü rü tümaärü naäne chauxcèx ítaxe, rü 100 ëxpüxcüna i ngëma noxri tüxü ngëxmaxülarü yexera tá tayaxu. Rü naetü tá tanayaxu i maxü i taguma güxü. ³⁰ —Natürü muxüma i nümaxü i ñoma i naänewa duüxügu wixpëxewa ügüxëxü, rü daxügüxü i naänewa rü Tupana tá wixweama nanaxügüxë. Rü muxüma i nümaxü i ñoma i naänewa duüxügu wixweama ügüxëxü, rü daxügüxü i naänewa rü Tupana tá wixpëxewa nanaxügüxë.

20

Ore ga puracütanüxügu ixuxü

¹ —Rü ngëma Tupana äëxgacü íixüwa rü ñoma wüxi ga ubanecüarü yora ga pëxmama norü puracütanüxü ta yadaucürü nixí. ² Rü yema puracütanüxümaã nanamexëë na wüxítachinü ga díerugu nüxü na naxütanüäxüxcèx ga wüxichigü ga ngunexügu. Rü ñuxüchi naänewa nanamugü na yéma yapuracüexüxcèx. ³ —Rü yixcama ga 9 arü oragu rü ínayadau ga ngextá yatügü ga puracücxèx daugüxü íngutaquëxëgüxüwa. Rü yexma nüxü nayangau ga ñuxre ga yatügü ga ngearü puracüäxgüxü. ⁴ —Rü ñanagürü nüxü:

“¡Ngëma chorü ubanecüwa peyapuracüe! Rü meã tá pexü chanaxütanü”, ñanagürü. Rü nümagü rü yéma naxí. ⁵ —Rü yema ubanecüarü yora rü tocuchigu rü wenaxärü togü ga puracütanüxü ta nayadau. Rü tomaëxpüxarü oragu ga yáuanecü rü wenaxärü yexgumarü ta nayadau. ⁶ —Rü yixcama ga wüximëxpüxarü oragu ga yáuanecü rü wenaxärü ínayadau ga ngextá yatügü ga puracücxèx daugüxü íngutaquëxëgüxüwa. Rü yexma nüxü nayangau ga ñuxre ga togü ga yatügü ga ngearü puracüäxgüxü. Rü ñanagürü nüxü:

“¿Tüxcüü i pema rü nuxã perüchomare i guxü i ñoma i ngunexügu, rü tama pepuracüe?” ñanagürü. ⁷ —Rü nümagü nanangäxügu, rü ñanagürügü nüxü:

“Tama tapuracüe erü taxüema toxcèx tadau na tüxü tapuracüexüxcèx”, ñanagürügü. Rü yexguma ga yema naänearü yora rü ñanagürü nüxü:

“¡Pema rü ta ngëma chorü ubanecüwa pexí rü peyapuracüe! Rü meã tá pexü chanaxütanü”, ñanagürü. ⁸ —Rü yexguma marü nachütagu rü yema naänearü yora, rü naxcèx naca ga norü puracütanüxüärü dauruü, rü ñanagürü nüxü:

“¡Naxcèx naca i ngëma puracütanüxü. Rü nüxíra nüxü naxütanü i ngëma wixwenaxüchima ngëma íxü, rü nawa tá icuyacuëxëë i ngëma nüxíra ngëma puracüexü!” ñanagürü. ⁹ —Rü yéma naxí ga yema puracütanüxü ga wüximëxpüxarü oragu ga yáuanecü puracüwa íxü. Rü wüxichigü ngíxü nayauxgü ga wüxítachinü ga díeru. ¹⁰ —Rü yemawena rü yéma naxí ga yema nüxírama puracüexü ga puracütanüxü. Rü nümagü nagu naxínüëgu rü yexera tá ngíxü nayauxgü ga díeru, natürü nümagü rü ta ngíxü nayauxgü ga

wüxítachinütama ga díeru ga wüxichigü. ¹¹—Rü yexguma ngîxü nayauxgügu rü inanaxügüe ga chixri na yadexagüxü nachigagu ga yema naâneärü yora. ¹²—Rü ñanagürügü:

“Yixema rü guxü i ngunexügu üèxcüxetüwa tapuracüe, natürü i ñaã puracütanüxü i wixwenaxüchi íngügüxü rü wüxi i oratama napuracüe. Natürü ngëma tüxü naxütanüãxüëxpüxtama nüxü nanaxütanü”, ñanagürügü. ¹³—Natürü ga yema ubanecüarü yora nanangäxü, rü ñanagürü nüxü ga wüxi ga yema puracütanüxü:

“Pa Chomücüx, tama cuxü changîx. ¿Tama êxna i wüxítachinügu yîxü ga chomaã cunamexëëxü na cuxü chanaxütanüxü i ngëma puracü? ¹⁴—¡Ñãã i curü díeru, rü íixü! Rü ngëma puracütanüxü i wüxi i oratama puracüexü, rü choma nüxna ngîxü chaxäxchaü i ngëma cuxna ngîxü chaxäcüëxpüx. ¹⁵—¿Tama êxna name i ngëma choma chanaxwëxexüãcüma ngëmaã na chaxüxü i chorü díeru? ¿Rü êxna quixäüxächi erü ngëmaãcü chamecüma?” ñanagürü. ¹⁶—Rü yixema ñuxma duüxügü wixweama tüxü ügüxëexë, rü daxügüxü i nañewa rü Tupana tá wixpëxewa tüxü naxügüxëë. Rü yixema ñuxma duüxügü wixpëxewa tüxü ügüxëexë rü daxügüxü i nañewa rü Tupana tá wixweama tüxü naxügüxëë. Erü Tupana rü muxüchiena naxu, natürü noxretama tíxí ya yixema tüxü nadexe —ñanagürü ga Ngechuchu.

*Ngechuchu rü norü tomaëxpücüna nanaxunagü ga norü yuxchiga
(Mr 10.32-34; Lc 18.31-34)*

¹⁷ Rü yexguma namagu yaxüxgu ga Ngechuchu ga Yerucharéüwa na naxüxü rü noxrüwama naxcëx naca ga yema 12 ga norü ngüexüügü, rü ñanagürü nüxü: ¹⁸—Pema nüxü pecüex na marü ingaicaxü na Yerucharéüwa íngügüxü. Rü ngëma rü duüxügü rü tá chixri chomaã nachopetü. Rü tá paigüarü äëxgacügü rü ngüexëëruügü i ore i mugüwa ngüxëëtaegüxüna tá choxü namugü. Rü nümagü rü tá chomaã nanaxuegügu na chayuxüçëx. ¹⁹—Rü tá to i nachüüãnecüãxna choxü namugü. Rü ngëmagü tá nixí i chaugu idaucüraügüxü rü choxü cuaixgüxü. rü ñuxüchi tá curuchawa choxü nipotagü na ngëxma chayuxüçëx. Natürü tomaëxpüx i ngunexüguwena rü tá wenaxärü chamaxü —ñanagürü.

*Wüxi ga ngüxëëçëx íca ga Chaütiágu rü Cuáüärü mamá
(Mr 10.35-40)*

²⁰ Rü yéma iyexma ga naë ga Chaütiágu rü Cuáü. Rü yema taxre rü Zebedéu nanegü nixigü. Rü ngíma rü Ngechuchucëx iyaxü namaã ga yema taxre ga ngínegü. Rü Ngechuchupëxegu iyacaxápüxü, rü wüxi ga ngüxëëçëx nüxna iyaca. ²¹ Rü nüma ngíxna naca, rü ñanagürü: —¿Tacü nixí i cunaxwëxexü? —ñanagürü. Rü ngíma ínangäxü rü ngígürügü: —Pa Corix, ngëxguma äëxgacüxü quíngucuchigu rü chanaxwëxe i cunamu na wüxi i ñaã chaune rü curü tügüñecüwawa na natoxü, rü ngëma to i curü toxwecüwawa na natoxü —ngígürügü. ²² Natürü Ngechuchu ngîxü nangäxü rü ñanagürü: —Pema rü tama nüxü pecüex na tacüçëx ípëçaxü. ¿Namaxä chi peporaexü i ngëma ngüxü i tá choxü üpetüxü? —ñanagürü. Rü nümagü nanangäxüügü rü ñanagürügü: —Ngëmaãcü namaã tá taporae —ñanagürügü. ²³ Rü Ngechuchu nanangäxü rü ñanagürü nüxü: —Aixcüma tá nixí i chauxrüü ngüxü pingëgüxü. Natürü ngëma chorü tügüñecüwawa rü chorü toxwecüwawa na perütögüxüçëx, rü tama choxmëxwa nangëxma na pexna chanaxäxü. Rü Chaunatumëxëwa nixí na nangëxmaxü i ngëma, rü nüma tá tüxna nanaxä ya yixema tümacëx

íyixē —ñanagürü. ²⁴ Rû yexguma yemaxû naxĩnũegu ga yema togü ga 10 ga Ngechucharü ngüexũgü, rû Chaũtiágumaã rû Cuáũmaã nanuē. ²⁵ Natürü Ngechuchu naxcèx naca rû ñanagürü nüxû: —Pema nüxû pecuèx rû guxû i nachĩñanegüarü ãèxgacügü rû poraãcü nanamu i norü duũxũgü. Rû ngēma ãèxgacügü i taxũgü rû norü duũxũgüarü yora nügü nixĩgüxē. ²⁶ —Natürü tãutãma ngēmaãcü nixĩ i petanüwa. Rû ngēxguma texé naxwèxegu na ãèxgacü tiixû i petanüwa, rû name nixĩ i noxri rû guxããrü ngüxēerü tiixĩ. ²⁷ —Rû ngēxguma chi texé i petanüwa naxwèxegu na tümamücügüeru na tiixû, rû name nixĩ i noxri rû guxũma i tümamücügüarü ngüxēerü tiixĩ. ²⁸ —Yerü chomatama i Tupana Nane na duũxũxû chiixû rû tama togü choxû rüngũxēèxücèx nixĩ i núma chaxũxû. Natürü núma chaxũxû na duũxũgüxû charüngũxēèxücèx rû naxcèx na chayuxücèx rû ngēmaãcü chanaxütanũxücèx na muxũma i nümagü rû nüxû nangèxmaxücèx i maxû i taguma gúxû —ñanagürü.

Ngechuchu nanameèxēè ga taxre ga ngexetügüxû

(Mr 10. 46-52; Lc 18.35-43)

²⁹ Rû yexguma Ngechuchu norü ngüexũgümaã Yericúarü ñanewa íchoũxgu, rû muxũma ga duũxũgü nawe narüxĩ. ³⁰ Rû yēma namacüwawa narütogü ga taxre ga ingexetüxû. Rû yexguma nüxû naxĩnũegu na Ngechuchu yēma üpetüxû, rû tagaãcü Ngechuchuna nacagüe, rû ñanagürügü: —Pa Corix, Pa Dabítanüxûx, ¡Cuxû tangechaũtümüügü! —ñanagürügü. ³¹ Rû yema duũxũgü ga Ngechuchuwe rüxixû rû nayangagü na iyanangeèxgüxücèx. Natürü nümagü ga yema ingexetüxû rû yexeraãcü Ngechuchuna nacagüe, rû ñanagürügü: —Pa Corix, Pa Dabítanüxûx, ¡cuxû tangechaũtümüügü! —ñanagürügü. ³² Rû yexguma ga Ngechuchu rû yexma nayachiãchi rû naxcèx naca ga yema ingexetüxû. Rû nüxna naca rû ñanagürü: —¿¡acü i penaxwèxexü na pexcèx chanaxüxû? —ñanagürü. ³³ Rû nümagü nanangãxũgü rû ñanagürügü: —Pa Corix, tanaxwèxe na toxû quidauchitanügüxēèxü —ñanagürügü. ³⁴ Rû yexguma ga Ngechuchu rû nüxû nangechaũtümüügü, rû naxētügügu ningögü. Rû yexgumatama nidauchigü, rû Ngechuchuwe narüxĩ.

21

Yerucharéügu naxücu ga Ngechuchu

(Mr 11.1-11; Lc 19.28-40; Cu 12.12-19)

¹ Rû yexguma marü yangaicagügu ga Yerucharéüwa na nangugüxû, rû nawa nangugü ga guma ñane ga Bechagué ga Oríbunecüarü mëxpüneärü ngaicamana yexmane. Rû Ngechuchu nanamu ga taxre ga norü ngüexũgü. ² Rû ñanagürü nüxû: —¡Gua tórü toxmèxtawa ngèxmane ya ñanexãcüwa pexĩ! Rû ngèxma tá ngxü pengau i wüxi i buru i ngèxma ngaxücü namaã i wüxi i ngxãcü i yatüxû i ngxütagu irüxãxû. ¡Rû ngxü piwèxû, rû nuã chauxütawa ngxü pega namaã i ngxãcü! ³ Rû ngèxguma texé pexna caxgu na ¡acücèx ngxü piwèxüxû, ¡rû tümamaã nüxû pixu rû ñapegügü:

“Torü Cori nangixwèxe namaã i ngxãcü, natürü paxa tá ngxü nawoexüèè”, ñapegügü tüxû! —ñanagürü. ⁴ Rû yema naxüpetü yerü yemaãcü Tupana nayangüxēè ga norü ore ga nuxcũmaũxû ga norü orearü uruü ümatüxû ga ñaxû:

5 “¡Yerucharéúćúâxgúmaã nüxü pixu rü ñapegü: ‘¡Düćèx ya perü âëxgacü ya nuã pexütawa ücü! Rü nüma rü tama nügü yacuëxüüâcü ínangu, rü wüxi i buruxacüétügumare naxaunagü!’ ”

ñanagürü ga yema ore. 6 Rü yexguma ga yema taxre ga norü ngüexügü rü yéma naxí, rü nanaxügü ga yema Ngechuchu namaã nüxü ixuxü. 7 Rü Ngechuchuxütawa ngxixü nagagü ga yema buru ngxixacümaã. Rü yema norü ngüexügü rü naxchirumaã nanachatagü ga yema ngxixacü, rü ñuxüchi ga Ngechuchu rü natagu naxaunagü. 8 Rü yema muxüma ga duüxügü ga nawe rüxixü rü naxchirumaã nayaçhamatanü ga nama. Rü togü rü naixátü ta nadaügü rü yemamaã nayaçhamatanü ga nama. 9 Rü yema duüxügü ga napëgegu ägüxü, rü yema togü ga wixweama ägüxü, rü tagaäcü ñanagürügü: —¡Nüxü ticuëxüxügü ya daa äëxgacü ya Dabítanüxü! ¡Rü namecümáxüchi ya daa Tupanaëgagu núma ücü! ¡Rü pema rü ta, Pa Daxüćüâx, rü nüxü picuëxüxügü ya Tupana! —ñanagürügü. 10 Rü yexguma Ngechuchu Yerucharéüwa ixüćuxgu, rü guxüma ga yema ñanecüâx rü nanaxixächiaëgü, rü ñanagürügü: —¿Texe nixí ya daa? —ñanagürügü. 11 Rü yema Ngechuchuwe rüxixü ga duüxügü rü nanangäxügü rü ñanagürügü: —Daa nixí ya Tupanaärü orearü uruü ya Ngechuchu ya Garirëaanewa ngëxmane ya ñane ya Nacharétüćüâx ixüćü —ñanagürügü.

Ngechuchu rü tupauca ga taxünewa ínanawoxü ga duüxügü ga yéma taxegüxü

(Mr 11.15-19; Lc 19.45-48; Cu 2.13-22)

12 Rü tupauca ga taxünegu naxücu ga Ngechuchu, rü ínanawoxü ga yema yéma taćümaã taxegüxü rü naxcëx taxegüxü. Rü nanangüegutanü ga norü mechagü ga yema duüxügü ga yéma Tupanaarü ämarewa mexü ga diërumaã taxegüxü rü muxtucügümaã taxegüxü. 13 Rü ñanagürü nüxü ga yema duüxügü: —Tupanaärü ore i ümatüxüwa rü ñanagürü:

“Chopata rü yumüxëpataü nixí”.

Natürü pema rü ngítëëxgüxüpataü peyaxixëë —ñanagürü. 14 Rü yéma tupauca ga taxünewa rü Ngechuchucëx naxí ga ñuxre ga ingexetügüxü rü ichixeparagüxü. Rü Ngechuchu nanameëxëë. 15 Natürü ga paigüarü äëxgacügü rü ngüexëëruügü ga ore ga mugüwa ngxüëëtaegüxü, rü nüxü nadaugü ga yema mexügü ga taxügü ga Tupanaärü poramaã naxüxü ga Ngechuchu rü buxügüxü naxínüë ga na ñagüxü: —¡Namexëchi ya daa äëxgacü ya Ngechuchu ya Dabítanüxü! —ñagüxü. Rü yemacëx ga yema äëxgacügü rü nanuë. 16 Rü ñanagürügü Ngechuchuxü: —¿Nüxü cuxínüxü i ngëma buxügü namaã idexagüxü? —ñanagürügü. Rü Ngechuchu nanangäxü, rü ñanagürü: —Ngü, nüxü chaxínü. ¿Natürü taguma ëxna nawa pengüé i Tupanaärü ore i ümatüxü i ñaxü:

“Rü ngëma buxügü i íraxüchixü rü õxchanagü rü tá ta cuxü nicuëxüügü”, ñaxü? —ñanagürü. 17 Rü yexguma ga Ngechuchu rü nüxna yéma nixü, rü ñuxüchi ínaxüxü ga guma ñanewa. Rü ñane ga Betániawa naxü, rü yexma nayape.

Ngechuchu rü orix ga iguera ga ngearü oõxümaã chixexü naxuegu

(Mr 11.12-14, 20-26)

18 Rü moxüäcü ga pëxmama rü yexguma wenaxärü Yerucharéüćèx nataegugu ga Ngechuchu rü nataiya. 19 Rü namacüwawa nüxü nadau ga wüxi ga orix ga iguera. Rü naxcëx nixü, natürü taxuüma ga norü oxü inayangau, rü naätüxüxücatama inayangau. Rü yemacëx ñanagürü nüxü ga yema orix:

—Rü tagutáma wena cuxox, —ñanagürü. Rü yexgumatama narüñexê ga yema orix. ²⁰ Rü yexguma yemaxü nadaugügu ga norü ngúexüü, rü nabèixächíiãëgü. Rü Ngechuchuna nacagüe rü ñanagürügü: —¿Rü ñuxácü i ñaã orix i paxama nañexêxü? —ñanagürügü. ²¹ Rü Ngechuchu nanangãxü rü ñanagürü: —Aixcüma pemaã nüxü chixu rü ngëxguma chi meã peyaxögügu rü tama ngëma igueramaã chaxüxüxica chi pexü. Natürü yexeraxü chi pexü. Rü ngëxguma chi daa mëxpúnemaã nüxü pixuxgu na yaxügachixüxëx rü taxtü i taxüchüüwa naxüxüxëx, rü pega chi naxüñü. ²² Rü guxüma i tacü i naxcëx ípëcaxü i perü yumüxëwa, rü tá penayauxgü ega aixcüma peyaxögüãcüma naxcëx ípëcaxgu.

*Ngechuchuna nacagüe na texégagu tupauca ga taxünewa nangüxëtaexü
(Mr 11.27-33; Lc 20.1-8)*

²³ Rü Ngechuchu rü tupauca ga taxünegu naxücu. Rü yexguma yéma ínangüxëëtaeyane rü naxcëx naxí ga paigüarü äëxgacügü rü Yudiügarü äëxgacügüerugü. Rü Ngechuchuna nacagüe rü ñanagürügü: —¿Rü texégagu nixí i cunaxüxü i ngëma núma cuxüxü? ¿Rü texé cuxü tamu na cunaxüxüxëx i ngëma? —ñanagürügü. ²⁴⁻²⁵ Rü Ngechuchu nanangãxü rü ñanagürü: —Choma rü tá ta pexna chaca, rü ngëxguma choxü pengãxügu i ngëma pexna naxcëx chaçaxü, rü choma rü tá ta pemaã nüxü chixu na ngëxürüüxü i äëxgacü na choxü muxü na nuã changüxëëtaexü. ¿Rü texé tanamu ga Cuátü na duüxügüxü ínabaiüxëëxüxëx? ¿Pëxcëx rü Tupana yixü ga namucü rü ëxna duüxügümare? —ñanagürü. Rü yexguma ga yema äëxgacügü rü inanaxügüe ga nügümaã na yaporagatanücüxü. Rü nügümaãtama ñanagürügü: —¿Ñuxü ñagügüxü tá? Erü ngëxguma chi nüxü ixuxgu na Tupana núma namuxü rü núma rü tá ñanagürü tüxü:

“¿Rü tüxücüü ga tama nüxü peyaxögüxü?” ñanagürü tá. ²⁶ —Rü ngëxguma chi nüxü ixuxgu na yatügümare núma namuxü rü taxcëx rü tá naxüãcüma, erü duüxügü tá tüxü nadai. Erü nümagü i duüxügü rü nagu narüxüñüë na Tupana yixü ga Cuátüxü núma mucü —ñanagürügü. ²⁷ Rü yemacëx Ngechuchuxü nangãxügu rü ñanagürügü: —Tama nüxü tacüxë ga texé núma na namuxü ga Cuátü ga baiüxëëruü —ñanagürügü. Rü yexguma ga Ngechuchu rü ñanagürü nüxü: —Choma rü tá ta täütáma pemaã nüxü chixu na texé choxü muxü na chanaxüxü i ngëma choxna naxcëx peçaxü —ñanagürü.

Ore ga taxre ga nanegügu ixuxü

²⁸ Rü ñanagürü ta ga Ngechuchu —¿Ñuxü ñapegüxü naxcëx i ñaã ore i tá pemaã nüxü chixuxü? Rü wüxi ga yatü rü nüxü nayexma ga taxre ga nane. Rü wüxi ga guma nanemaã nüxü nixu rü ñanagürü nüxü:

“Pa Chaunex, chanaxwëxe i yéa chorü ubaarü buxgüwa cuyapuracü”, ñanagürü. ²⁹ —Rü guma nane nanangãxü rü ñanagürü:

“Choxü nawëxtümüü na ngëma chaxüxü”, ñanagürü. Natürü ga yixca-maxüra rü nagu narüxüñü rü düxwa yéma nayapuracü. ³⁰ —Rü yixcüra ga guma nanatü rü naí ga nanexütawa naxü, rü yexgumarüü ta nüxü yema ñanagürü. Rü guma nane nanangãxü rü ñanagürü:

“Marü name, Pa Pa, rü ngëma tá chaxü”, ñanagürü. Natürü tama aixcüma yéma naxü. ³¹ —Rü ñuxma chanaxwëxe i chomaã nüxü pixu rü ngëxcürüücü ga guma taxre ga nane ga aixcüma naxücü ga yema nanatü naxwëxëxü —ñanagürü. Rü nümagü nanangãxügu rü ñanagürügü: —Ga guma nüxüra namuãcü nixí ga naga íñücü —ñanagürügü. Rü yexguma ga Ngechuchu rü

ñanagürü nüxü: —Aixcuma pemaã nüxü chixu rü ngēma yatügü i Dumaärü ãëxgacücëx diëru ngixü dexü rü ngēma ngexügü i chixri maxëxü tá nixi i pexüpa nüxira ichocuxü i ngextá Tupana ãëxgacü ñixüüwa. ³²—Yerü Cuáü ga baiüxëëruü rü núma naxü na pemaã nüxü yaxuxücëx na ñuxäcü tá na pemaxëxü, natürü ga pema rü tama nüxü peyaxögü. Natürü ga yema yatügü ga Dumaärü ãëxgacücëx diëru ngixü dexü rü yema ngexügü ga chixri maxëxü rü Cuáüñaxü nayaxögü. Natürü ga pema rü woo nüxü na pedaugüxü ga ñuxäcü na yaxögüäxü, rü tama nüxü perüxoechaü i pecüma i chixexü na peyaxögüxücëx —ñanagürü.

Ore ga chixexü ga puracütanüxügu ixuxü
(Mr 12.1-12; Lc 20.9-19)

³³ Rü ñanagürü ta ga Ngechuchu: —Rü chanaxwëxe i iperüxñnëe i ñaã to i ore i cuëxruü i tá pemaã nüxü chixuxü. Rü nayexma ga wüxi ga yatü ga nüxü nayexmacü ga wüxi ga norü naãne. Rü yexma nanatö ga muxüma ga orix ga uba. Rü ñuxüchi ñanapoxegu, rü nanaxü ga wüxi ga ubaarü yaxtütüxüchica rü wüxi ga dauxtütaechica. Rü ñuxüchi ñuxre ga puracütanüxüna nüxü nadauxëe. Rü namaã nanamexëe na ngäxügu namaã ngixü yatoyexücëx ga yema ubatanü. Rü ñuxüchi ga yema naãneärü yora rü wüxi ga to ga nachüñãne ga yaxüguxüwa naxü. ³⁴—Rü yexguma norü ubaarü buxgüwa nanguxgu, rü yema naãneärü yora rü yéma nanamugü ga ñuxre ga norü duüxügü na yema puracütanüxüna ngixcëx yaçaxücëx ga yema ubatanü ga nüxna ücü. ³⁵ Natürü ga yema puracütanüxügü rü ñanayauxü ga yema coriarü duüxügü. Rü nanaçuaixgü ga wüxi, rü ga to rü nayamëxüchigü, rü ga yema to rü nutamaã ñanamuxüchigü. ³⁶—Rü yema naãneärü yora rü wenaxärü noxriarü yexera rümumaëxü ga norü duüxügü yéma namugü. Natürü ga yema puracütanüxügü rü yema togürüütama chixri namaã nachopetü. ³⁷—Rü düxwa ga yema naãneärü yora rü yéma nanexüchixü namu yerü núma nagu naxñnëgu rü chi nanega naxñnëe ga yema puracütanüxügü. ³⁸—Natürü yexguma yema cori nanexü nadaugügu ga yema puracütanüxügü, rü nügümaã ñanagürügü:

“Ngēmaärü tá nixi i ñaã naãne i yixcama. ¡Rü ngixã tayamëxgü na tóxru yixücëx!” ñanagürügü. ³⁹—Rü nayayauxgü, rü toxnamana nanagagü, rü yexma nayamëxgü —ñanagürü. ⁴⁰ Rü yexguma ga Ngechuchu rü yema paigüarü ãëxgacügüna naca rü ñanagürü: —¿Rü ngëxguma ñananguxgu i ngēma naãneärü yora, rü ñacü tá yema puracütanüxümaã naxü? —ñanagürü. ⁴¹ Rü yema ãëxgacügü rü Ngechuchuxü nangäxügü, rü ñanagürügü: —Ngēma naãneärü yora rü tama nüxü nangechaütümüüläcüma tá nanadai i ngēma puracütanüxügü i chixri maxëxü. Rü ñuxüchi togü i puracütanüxügü i meã namaã ngixü itoyexü i diëruna tá nüxü nadauxëe —ñanagürügü. ⁴² Rü Ngechuchu rü ñanagürü nüxü: —¿Taguma ëxna nawa pengüe i Tupanaärü ore i ümatüxü? Erü ngēmawa rü ñanagürü:

“Rü yima nuta ya mecü ya ñärü üruügü nüxü oechirëcü rü ñuxma rü yimatama nixi ya Tupana nüxira yaxücuchicü na namaã inaxügüäxücëx ya ñpata. Rü törü Cori ya Tupana nixi ga naxücü ga yema, rü ñuxma rü namexëchi i taxcëx”, ñanagürü i ngēma ore. ⁴³—Rü ngēmacëx pemaã nüxü chixu rü woo pexcëxchirëx na yixü i ngēma naãne i ngextá Tupana ãëxgacü ñixüüwa, natürü pexna tá nanapu. Rü togü i duüxügü i aixcuma Tupanaga ñüëxüna tá nanaxä. ⁴⁴—Rü yima nuta ega texë namaã yarüñaxgu rü tá itapoügü. Rü

yixema tumaqtügu nanguxe ya yima nuta, rü tá tüxü niñaixmü —ñanagürü ga Ngechuchu. ⁴⁵ Rü yexguma ga paigüarü ãëxgacügü rü Parichéugü nüxü İnüëgu ga yema ore ga cuëxruü ga Ngechuchu namaã nüxü ixuxü, rü nüxü nicuëxächitanü ga nachiga na yïixü ga yema ore. ⁴⁶ Rü yexgumatama ga yema ãëxgacügü rü Ngechuchuxü niyauuxgüëga. Natürü taxucürüwama nayayauxgü yerü duüxügüxü namuüë, yerü nümagü ga duüxügü rü nayaxögü ga aixcüma Tupanaärü orearü uruü na yïixü ga Ngechuchu.

22

Ore ga ngigüarü petagu ixuxü (Lc 14.15-24)

¹ Rü Ngechuchu rü wenaxärü nanangüexëë. Rü ore ga cuëxruügu namaã nayaxu, rü ñanagürü nüxü: ²—Rü ngëma Tupana na ãëxgacü ixixü rü ñoma wüxi ga nachiiñaneärü ãëxgacü ga naneärü ngigü üchiücürüü nixi. ³—Rü norü duüxügüxü namu na naxcëx yaçaxücëx ga yema duüxügü ga marü üpaacü nüxna naxuxü. Natürü yema duüxügü ga marü nüxna naxuchirëxü rü tama yéma naxixchaü. ⁴—Rü wenaxärü togü ga norü duüxügüxü yéma namugü. Rü ñanagürü nüxü:

“iNgema pexi naxütawa i ngëma duüxügü i nüxna chaxuchirëxü, rü namaã nüxü peyarüxu rü marü íname i chorü ñna i taxü. Rü marü chanadai i chorü wocagü i ingüexü rü guxüma marü ínamemare. Rü chanaxwëxe i paxa nuã naxi naxcëx i ñaã chorü peta!” ñanagürü. ⁵—Natürü yema duüxügü ga nüxna naxuchirëxü rü tama naga naxinüë. Rü wüxi rü nañnewa naxü, rü ga to rü norü taxepataüwa naxü. ⁶—Rü ga togü rü yema ãëxgacüarü duüxügüxü ínayauxü rü nayacuaxgü ñuxmata nayuexëë. ⁷—Rü yexguma ga guma ãëxgacü rü poraäcü nanu. Rü norü churaragüxü yéma namugü na yadaiãxücëx ga yema duüxügü ga máëtagüxü, rü na yagugüãxücëx ga guma norü ñane. ⁸—Rü ñuxüchi ñanagürü nüxü ga norü duüxügü:

“Guxüma i chorü peta rü marü ínamemare. Natürü ga yema duüxügü ga nüxna chaxuchirëxü rü woetama nüxü chaxo na nuã naxixücëx. ⁹—iRü yéa taxü i ítamüwa pexi, rü nüxna peyaxu i guxü i duüxügü i ngema nüxü pedauxü, na núma chorü petawa naxixücëx!” ñanagürü. ¹⁰—Rü yema ãëxgacüarü duüxügü rü yéma ítamüwa naxi. Rü nüxna nixuetanü ga guxüma ga duüxügü ga mexügü rü chixexügü ga nüxü iyangaugüxü. Rü yemaäcü duüxügümaã nanapa ga guma ãëxgacüpata. ¹¹—Rü yexguma ga guma ãëxgacü rü nixücu nawa ga yema ucapu ga nawa peta naxuxü, yerü ínayadau ga yema duüxügü ga nüxna naxuxü. Natürü yéma nüxü nadau ga wüxi ga yatü ga tama norü ngëxãëchirugu icüxü. ¹²—Rü ñanagürü nüxü:

“Pa Chomücüx ññuxäcü i nuxã cuxücuxü na tama curü ngëxãëchirugu quicüxü?” ñanagürü. Natürü nüma ga yema yatü rü nangeëxmare. ¹³—Rü yexguma ga guma ãëxgacü rü ñanagürü nüxü ga yema norü duüxügü:

“iMeã peyanëxpara rü peyanëxchacüügü i ñaã yatü, rü yéma düxëtüwa i poraäcü ínaxëãnexüwa peyatá! Rü ngema tá narüdoxü rü tá nixüxchapüta erü poraäcü tá nüxü nangux”, ñanagürü. ¹⁴—Rü Tupana rü muxüchiena naxu, natürü noxretama tixi ya yixema aixcüma Tupana tüxü ndexe —ñanagürü ga Ngechuchu.

Dïeru i ãëxgacüna ngxü ixäcüchiga (Mr 12.13-17; Lc 20.20-26)

15 Rū yexguma ga Parichéugü rü nixīgachi. Rū noxrüwama nügümaā nayamexēēgü na facü rü oremaā tá Ngechuchuna nacagüexüxcēx na chixexügu nanguxēēgüāxüxcēx rü ñuxüchi āēxgacüxütawa na ínaxuaxügüāxüxcēx. 16 Rū yemacēx Ngechuchuxütawa nanamugü ga ñuxre ga norü duüxügü namaā ga ñuxre ga Erodearü duüxügü na yema oremaā Ngechuchuna na yacagüexüxcēx. Rū yexguma Ngechuchuxütawa nangugü rü ñanagürügü: —Pa Ngúexēēruüx, nüxü tacuēx rü aixcüma nixi i ngēma nüxü quixuxü i curü ore. Rū aixcüma cunangüexēē i duüxügü na Tupana naxwēxexüācüma namaxēxüxcēx. Rū tama duüxügügamare cuxinü, erü tama norü düxētüxüñegu cudawenü, natürü nacüma nixi i cungugüxü. 17 —jRü tomaā nüxü ixu! rü ngēma diēru ya āēxgacü ya tacü ya Dumacüāx totanüwa yayauxchaüxü, çrü namexü yüxü na nüxna ngixü taxāxü rü ēxna tama? —ñanagürügü. 18 Natürü Ngechuchu nüxü nacüexama na chixexügu naxinüēxü ga yema duüxügü, rü yemacēx ñanagürü nüxü: —Pema nixi i togüpēxewa meā pemaxēnetaxü, natürü peāēwa rü chixexügu perüxünü. çRü tüxcüü i chixexügu choxü penguxēēchaüxü? 19 —jChoxü ngixü pewé i wüxi i diēru i ngīmaā āēxgacüxü penaxütanücü. —ñanagürü. Rū yēma naxütawa ngixü nangegü ga wüxıtachinü ga yema diēru. 20 Rū yexguma Ngechuchu ngixü dēuxgu, rü nüxna naca, rü ñanagürü —çRü texēchicünēxā rü texēēga nixi i ngīgu üxü? —ñanagürü. 21 Rū nümagü nanangāxügü, rü ñanagürügü: —Dumacüāx ya āēxgacü ya tacüchicünēxā nixi —ñanagürügü. Rū yexguma ga Ngechuchu rü ñanagürü nüxü: —jĀēxgacüna ngixü pexā i ngēma āēxgacüarü ixicü, rü Tupanana ngixü pexā i ngēma Tupanaärü ixicü! —ñanagürü. 22 Rū yexguma yema orexü naxinüēgu, rü nabēixächiaēgü. Rū Ngechuchuna ínixi.

Ngechuchuna nacagüe rü ngoxi yuwa inadagü i duüxügü

(Mr 12.18-27; Lc 20.27-40)

23 Rū yematama ngunexügu rü ñuxre ga Chaduchéugü rü Ngechuchuxütawa naxi. Rū nümagü nixi ga nagu naxinüēxü na yuexü rü tagutāma wena namaxēxü. Rū yemacēx Ngechuchuna nacagüe, rü ñanagürügü: 24 —Pa Ngúexēēruüx, Moiché nüxü ixuxgu rü ngēxguma wüxi ya yatü naxāmēx rü nangexacüyane nayuxgu, rü name nixi i naēneētama ngīmaā naxāmēx i ngēma yutecü i naxümēx, na ngēmaācü naxāxäcüxüxcēx nüxü ya yima naēneē ya marü yucü —ñanagürü ga yema ore. 25 Rū ñanagürügü ta ga Chaduchéugü: —Nayexma ga totanüwa ga 7 ga nügüeneē. Rū naxāmēx ga guma yacü, natürü tauta naxāxäcüyane nayu. Rū yexguma ga naī ga naēneē nüxü ngīmaā naxāmēx ga yema ngecü. 26 —Rü guma rü ta nayu, rü nangexacü. Rū yexguma rü naī ga naēneē nüxü ngīmaā naxāmēx. Rū yemaācü gücüma ga guma 7 ga nügüeneē rü ngīmaā naxāmēx ga yema nge. Rū gücüma nayue tauta naxāxäcüyane. 27 —Rü yemawena rü ngīma rü ta iyu ga yema nge. 28 —Rü ngēxguma yuexü wena maxēgu, çrü ngexcürüücü ga guma 7 ga nügüeneē naxmēx tá iyixi i ngēma nge? Yerü gücüma ga guma 7 ga nügüeneē ngīmaā naxāmēx —ñanagürügü. 29 Rū yexguma ga Ngechuchu rü nanangāxü, rü ñanagürü: —Pema rü ipetüe erü tama nüxü pecuēx i Tupanaärü ore i ümatüxü, rü tama nüxü pecuēx i ñuxäcü na yüxü i Tupanaärü pora. 30 —Rü ngēxguma yuexü wena maxēgu rü taxütāma tixāmēxgü rü ēxna tixātegü. Erü daxüçüāx i Tupanaärü orearü ngeruügürüü tá tixīgü i ngēxguma. 31 —Pema choxna peca i yuexüärü dagüchiga. çNatürü tama ēxna nawa pengüe i Tupanaärü ore i ümatüxü i ngextá Tupanatama ngēmachigaxü pemaā iyaxuxüwa? Erü ngēma rü ñanagürü ya Tupana:

32 “Choma nixi i Abráũrũ Tupana, rü Ichaárũ Tupana, rü Acobuarũ Tupana”, ñanagũrũ. Rũ ngẽma orewa nüxũ tacuèx rü woo ñoma i naãnewa nayuegu i duũxũgũ, natũrũ Tupanaarũ ñnũwa rü guxũguma namaxẽ —ñanagũrũ ga Ngechuchu. 33 Rũ yexguma yemaxũ naxĩnũegu ga duũxũgũ, rü guxũma nabẽixãchiãegũ namaã ga norũ nguxẽetae ga Ngechuchu.

Ngẽma Tupanaarũ mu i guxũ i norũ mugũarũ yexera ixĩxũ
(Mr 12.28-34)

34 Rũ nangutaquẽxegũ ga Parichẽugũ ga yexguma nüxũ naxĩnũegu ga ñuxãcũ Ngechuchu rü yema Chaduchẽugũxũ na iyanangeẽxgũxẽẽxũ. 35 Rũ wũxi ga yema Parichẽugũ ga ore ga mugũwa nguxẽetaexũ rü Ngechuchuxũ chixexũgu nanguxẽẽchaũ. Rũ yemacèx Ngechuchuna naca rü ñanagũrũ: 36 — Pa Ngũxẽẽruũx, ¿ngẽxũrũxũ i Tupanaarũ mu nixi i guxũ i norũ mugũarũ yexera ixĩxũ? —ñanagũrũ. 37 Rũ Ngechuchu nanangãxũ rü ñanagũrũ: — Ngẽma Tupanaarũ mu i guxũ i norũ mugũarũ yexera ixĩxũ, rü ñanagũrũ: “iRũ nüxũ nangechaũ ya Cori ya curũ Tupana i guxũne ya curũ maxũnemaã, rü guxũ i cuãemaã, rü guxũ i nagu curũxĩnũxũmaã!”

ñanagũrũ. 38 —Rũ ngẽma nixi i Tupanaarũ mu i guxũ i norũ mugũarũ yexera ixĩxũ. Rũ ngẽma nixi i nüxĩraũxũ i norũ mu ga duũxũgũna naxãxũ ga Tupana. 39 —Rũ ngẽma norũ taxre i Tupanaarũ mu, rü ngẽma nüxĩraũxũ i norũ murũũtama nixi, rü ñanagũrũ:

“iNũxũ nangechaũ i cumũcũ ngẽma na cugũ cungechaũxũrũũ!” ñanagũrũ.

40 —Rũ ngẽma taxre i Tupanaarũ mugũwa nixi inaxũgũxũ i guxũma i Tupanaarũ mugũ ga Moichẽ umatũxũ rü nuxcũmaũgũxũ ga Tupanaarũ orearũ uruũgũ namaã nguxẽetaegũxũ —ñanagũrũ.

¿Texẽtaa yĩxũ ya Cristu?
(Mr 12.35-37; Lc 20.41-44)

41-42 Rũ yoxni ga Parichẽugũ rü yema nangutaquẽxegũ, rü Ngechuchu nüxna naca, rü ñanagũrũ: —¿Rũ ñuxũ ñapegũxũ i pema nüxũ ya Cristu? ¿Rũ texẽtaa yĩxũ? —ñanagũrũ. Rũ nümagũ ga Parichẽugũ rü nanangãxũgũ rü ñanagũrũgũ: —Cristu rü nuxcũmaũcũ ga ãẽxgacũ ga Dabĩtaa nixi —ñanagũrũgũ. 43 Rũ yexguma ga Ngechuchu rü ñanagũrũ: —¿Tũxcũũ ga Dabĩ ga norũ Corimaã naxuaxũ ga Cristu ga yexguma Tupanaãe ga Üũnexũ Dabĩxũ idexaxẽẽgu? Yerũ ga Dabĩ rü ñanagũrũ:

44 “Tupana rü chorũ Cori ya Cristuxũ ñanagũrũ: ‘iNuã chorũ tũgũnecũwawa rũto ñuxmatãta nüxũ charũporamaẽ i curũ uwanũgũ na cuga naxĩnũexũcèx!’ ” 45 —Natũrũ ¿ñuxũcũrũwa i Dabĩtaa yĩxũ ya Cristu ega nümatama ga Dabĩ rü norũ Corimaã naxuãgu? —ñanagũrũ ga Ngechuchu. 46 Rũ taxumaãma nanangãxũgũgẽga ga yema Parichẽugũ, rü bai ga wũxi ga oremaã. Rũ yemawena rü guxũma namuũe na taacũcèx Ngechuchuna nacagũxũ.

23

Ngechuchu rü duũxũgũtanũwa ñnaxuaxũ ga Parichẽugũ rü ngũxẽẽruũgũ ga Moichẽarũ mugũwa nguxẽetaegũxũ
(Mr 12.38-40; Lc 11.37-54, 20.45-47)

1 Rũ yemawena ga Ngechuchu rü duũxũgũxũ rü norũ ngũxũgũxũ ñanagũrũ: 2 —Ngẽma ngũxẽẽruũgũ i ore i mugũwa nguxẽetaegũxũ rü

Parichéugü, rü meãma nüxü nacuèxgü ga Tupanaãrü ore ga Moïché ümatüxü.
³ —Rü ngëmacèx name i naga pexinüë i guxüma i ngëma pemaã nüxü yaxugüxü. Natürü tama name i nüma namaxëxüãcüma pemaxë, erü nüma nüxü nixugü i mexü i ore natürü chixri namaxë. ⁴ —Erü nüma rü poraãcü pexü namu na naga pexinüëxücèx i norü mugü i guxchaxü i taxucürüwama texé aurexü. Natürü nümagütama rü bai i írarüwa naga na naxinüëxü i ngëma nawa pexü namuxü. ⁵ —Rü guxüma i ngëma naxügüxü, rü nanaxügü na duüxügü nüxü daugüxücèx. Rü ina-yangegü i Tupanaãrü ore na ngëmaãcü duüxügü nagu rüxinüëgu rü aixcüma Tupanaãrü duüxügü na yígüxü. Rü nügü nangëxãëgü na duüxügü nüxü rüdaunüxücèx. ⁶ —Rü petagüarü ònawa rü nümagü i Parichéugü rü nanaxwëxegü i ònäärü yoraxütawaxüchi na natogüxü na duüxügü ngema nüxü rüdaunüxücèx. Rü ngutaquëxepataügüwa rü nanaxwëxegü na napëxewaxüchi ügüxü i naxmëxwëxegüwa natogüxü. ⁷ —Rü ìãneãrü ítamügüwa rü nanaxwëxegü na duüxügü meã nüxü rümoxëgüxü ñoma ãëxgacüxü meã rümoxëxürüü. Rü nanaxwëxegü na duüxügü rü: “Pa Ngúexëëruüx” ñagüxü nüxü. ⁸ —¡Natürü pema rü täütãma ngëmagu perüxinüë! Erü guxãma i pema rü pegüeneëgü pixígü, rü wüxixicatama nixí ya perü ngúexëëruü ixícü. ⁹ —Rü tama name i ñoma i naãneçüãxmaã pexãnatü, erü wüxixicatama nixí ya Penatü, rü nüma rü daxüwa nangëxma. ¹⁰ —Rü tama name i texé: “Pa ãëxgacüx” ñatarügü pexü. Erü chaxixicatama nixí i perü ãëxgacü chiixü. ¹¹ —Rü yíxema petanüwa guxããrü yexera ixíxë rü tanaxwëxe na guxüma i tümamüciarü ngüxëëruü tíixü. ¹² —Erü yíxema tügü írütaxe rü Tupana tá tüxü naxãnexëë. Natürü yíxema tügü írúxífraxe, rü Tupana tá tüxü nicuëxüü. ¹³ —Pa Ngúexëëruügü i Ore i Mugüwa Nguxëëtaegüxü rü Pa Parichéugüx, pema nixí i togü i duüxügüpëxewa meã pemaxënetaxü natürü peãëwa rü chixexügu perüxinüëxü. Rü wüxi i ngechaü nixí i pexcèx erü pegagu nixí na tama Tupanaxütawa nangugüxü i togü i duüxügü. Rü pema rü ta rü täütãma ngëxma pechocu, Rü ngëxgumarüü ta rü nüxü penaguxchaxëë na tama ngëxma nachocuxücèx i togü i ngëxma chocuchaüxü. ¹⁴ —Pa Ngúexëëruügü i Ore i Mugüwa Nguxëëtaegüxü rü Pa Parichéugüx, pema nixí i togü i duüxügüpëxewa meã pemaxënetaxü natürü peãëwa rü chixexügu perüxinüëxü. Rü wüxi i ngechaü nixí i pexcèx erü tükna penapuxü ya tümapata ya yíxema yutegüxe. Rü ñuxüchi penamëxëë i perü yumüxëgü na duüxügü nagu rüxinüëgu rü aixcüma mexü i Tupanaãrü duüxügü na pixígüxü. Rü ngëmacèx pema tá nixí i togü i duüxügüarü yexera pepoxcuexü. ¹⁵ —Pa Ngúexëëruügü i Ore i Mugüwa Nguxëëtaegüxü rü Pa Parichéugüx, pema nixí i togü i duüxügüpëxewa meã pemaxënetaxü natürü peãëwa rü chixexügu perüxinüëxü. Rü wüxi i ngechaü nixí i pexcèx erü guxütüwama pexí na togü i duüxügümaã nüxü peyarüxuxücèx i ore na wüxitama ya duüxë pexrüü na yaxõxücèx. Rü ngëxguma marü pexü tanguüxgu, rü tüxü pechixexëë na düxwa taxreëxpüxcüna perü yexera chixexüwa tangëxmaxücèx. ¹⁶ —Pa Ngúexëëruügü i Ore i Mugüwa Nguxëëtaegüxü rü Pa Parichéugüx, pema rü ñoma cuëxruügü i ngexetüxürüü pixígü. Rü wüxi i ngechaü nixí i pexcèx, erü nüxü pixugü rü:

“Ngëxguma texé ya tupauca ya taxüneegagu ñacücèx ixunetagu, rü marü name ega tama tayanguxëëgu i ngëma tümäärü uneta”, ñaperügügü. Natürü ngëxguma texé tupauca ya taxüneãrü dïëruëgagu ñacücèx ixunetagu, rü:

“Tanaxwëxe i aixcüma tayanguxëë i ngëma tümäärü uneta”, ñaperügügü.
¹⁷ —Pema rü pengëãëgü rü ñoma pengexetügüxürüü pixígü. ¿Pexcèx rü ñacü

nixi i yexera rümemaëxũ, tupauca ya taxũneârũ dĩeru rü êxna nũmatama ya tupauca ya nagagu naxũunene i ngẽma dĩeru? ¹⁸—Rü tupauca ya taxũnewa nangẽxma i ngẽma âmarchica i ngexta Tupanacẽx inadaiaxũwa i naxũnagu na Tupanana naxãmarexũcẽx. Rü pema rü ñaperũgũgũ:

“Rü ngẽxguma texé ya tupauca ya taxũneârũ âmarchicaégagu tacũcẽx ixunetagu, rü marũ name ega tama tayanguxẽégu i ngẽma tũmaârũ uneta. Natũrũ ngẽxguma texé tupauca ya taxũneârũ âmarchicawa ngẽxmaxũ i âmareégagu tacũcẽx ixunetagu, rü tanaxwẽxe i aixcũma tayanguxẽé i ngẽma tũmaârũ uneta”, ñaperũgũgũ. ¹⁹—Pema rü pengẽãégũ rü ñoma pengexetũgũxũrũũ pixĩgũ. ¿Pexcẽx rü tacũ nixi i yexera rümemaëxũ, rü yima tupauca ya taxũneârũ âmarchicawa ngẽxmaxũ i âmare rü êxna nũmatama ya tupauca ya taxũneârũ âmarchica i nagagu naxũunexũ i ngẽma âmare? ²⁰—Erũ yĩxema tupauca ya taxũneârũ âmarchicaégagu tacũcẽx ixunetaxe, rü tama ngẽma nachicaégaguxicatama itaxuneta, natũrũ ngẽma âmare i ngẽma nachicawa ngẽxmaxũégagu rü ta itaxuneta. ²¹—Rü yĩxema tupauca ya taxũneégagu tacũcẽx ixunetaxe, rü tama ngẽma tupaucaégaguxicatama itaxuneta, natũrũ Tupana ya ngẽma maxũcũégagu rü ta itaxuneta. ²² Rü yĩxema daxũguxũ i naãneégagu tacũcẽx ixunetaxe, rü Tupanaârũ toruũégagu rü ta itaxuneta, rü ngẽxgumarũũ ta Tupana ya ngema rütocũégagu rü ta itaxuneta. ²³—Pa Ngũxẽêruũgũ i Ore i Mugũwa Ngũxẽêtaegũxũ rü Pa Parichéugũx, pema nixi i togũ i duũxũgũpẽxewa meã pemaxẽnetaxũ, natũrũ peãewa rü chixexũgu perũxinũëxũ. Rü wũxi i ngechaũ nixi i pexcẽx, erũ woo tacũ i iraxũ i pexũ ngẽxmaxũ rü Tupanana penaxã i ngẽma nũxna xũ. Natũrũ tama naga pexĩnũë i Tupanaârũ mugũ i guxũ i mugũarũ yexera ixĩxũ. Erũ pexũ nataxu na ãexgacũgũ i aixcũma meãma duũxũgũmaã icuëxũxũ na pixĩgũxũ, rü pexũ nataxu na duũxũgũ pexũ nangechaũtũmũũgũxũ, rü aixcũma meã Tupanamaã pixaixcũmagũxũ. Rü guxũma i ngẽma nixi i Tupana naxwẽxexũ na penaxũxũ, tama nũxũ ipeyarũngũmaëãcũma i ngẽma mexũ i marũ pexũxũ. ²⁴—Pa Cuëxruũgũ i Ngexetũgũxũx, pema rü guxũma i mugũ i woo iraxũchixũ rü meãma penaxaure, natũrũ tama Tupana naxwẽxexũãcũma pemaxẽ. Pema rü ñoma wũxi i duũxũ i tunucẽx norũ axexũ bapetũxũ rü ñuxũchi arũ wũxi i cameyu ixaxwetaxũrũũ pixĩgũ. ²⁵—Pa Ngũxẽêruũgũ i Ore i Mugũwa Ngũxẽêtaegũxũ rü Pa Parichéugũx, pema nixi i togũ i duũxũgũpẽxewa meã pemaxẽnetaxũ natũrũ peãewa rü chixexũgu perũxinũëxũ. Rü wũxi i ngechaũ nixi i pexcẽx, erũ perũ dũxëtũxũnewaxicatama pegũ pemexẽëchaũ, natũrũ perũ maxũwa rü poraãcũ pichixe. Erũ penawomũxẽëãcũma poraãcũ naxcẽx pengĩx i duũxũgũarũ ngẽmaxũgũ, rü pegũguxicatama perũxinũë. ²⁶—Pa Parichéugũ i Ñoma Ngexetũxũrũũ Ixĩgũxũx, name nixi i pegũ pimexẽë i perũ aixepewa i perũ maxũwa. Rü ngẽxguma tá nixi i perũ dũxëtũwa rü tá ta pimexũ. ²⁷⁻²⁸—Pa Ngũxẽêruũgũ i Ore i Mugũwa Ngũxẽêtaegũxũ rü Pa Parichéugũx, pema nixi i togũ i duũxũgũpẽxewa meã pemaxẽnetaxũ natũrũ peãewa rü chixexũgu perũxinũëxũ. Rü wũxi i ngechaũ nixi i pexcẽx, erũ ñoma yuetachiquẽxegũ i dũxëtũwa cómuxũmaã chauxetũgũxũ natũrũ aixepewa rü yuetachinaxãmaã rü nagũxũraũxũ i ãũãchixũmaã napagũxũrũũ pixĩgũ. Erũ perũ dũxëtũwa i duũxũgũ nũxũ idaugũxũwaxicatama pime, natũrũ aixepewa i peãewa rü poraãcũ pichixe. ²⁹—Rü wũxi i ngechaũ nixi i pexcẽx, Pa Ngũxẽêruũgũ i Ore i Mugũwa Ngũxẽêtaegũxũ rü Pa Parichéugũx. Pema rü peyamecagũ ga naxchiquẽxegũ ga nuxcũmaũgũxũ ga Tupanaârũ orearũ uruũgũ rü yema duũxũgũ ga imexũ ga yuexũ. ³⁰—Rü ñuxũchi ñaperũgũgũ:

“Rü yexguma chi nuxcúmaügüxü ga tóru oxigü maxēyane imaxēgu, rü tãu chima nüxü tarüngüxēē ga na nadaiãxü ga yema nuxcúmaügüxü ga Tupanaãrü orearü uruügu”, ñaperügu. ³¹—Rü ngēma oremaã rü pegü pengoxēē na nataagü pixüguxü ga yema duüxügu ga nuxcúmaügüxü ga Tupanaãrü orearü uruüguxü deüxü. ³²—jĒcü, noxtacüma chomaã rü ta peyangaüxēx ga yema chixexü ga nuxcúmaügüxü ga perü oxigü ügüxü! ³³—Pa Áxtapearü Duüxügu, pema rü poraãcü pichixe. ¿Nüxãcü tá naxchaxwa pibuxmü ya yima üxü ya Tupana tá namaã pexü poxcuene? ³⁴—Rü ngēmacēx i choma rü tá pexcēx núma chanamugü i Tupanaãrü orearü uruügu, rü yatügu i mexügu i nüxü cuēxüchigüxü, rü ngüxēēruügu i mexügu. Natürü pema rü tá curuchawa peyapotaüãcüma penadai i ñuxre. Rü togü rü ngutaquēxepataüguwa rü tá peyacuaxügu, rü togü rü ñanechigüwa rü tá nawe pingēxütanü na chixexü namaã pexüguxüxēx. ³⁵—Natürü Tupana tá pexü napoxcue naxcēx i guxüma ga norü duüxügu ga imexügu ga perü oxigü deüxü. Rü Abéwa nixi ga inaxüguãxü ga na nadaiãxü rü Chacaríga ga tupauca ga taxünegu peyamēxgücügu nixi ga yacuáxü ga yema. ³⁶—Rü aixcüma pemaã nüxü chixu rü guxüma ga yema chixexüxēx rü Tupana tá nanapoxcue i duüxügu i ñomaücüü maxēxü —ñanagürü ga Ngechuchu.

Ngechuchu rü Yerucharéücüãx ga duüxüguçēx naxaxu
(Lc 13.34-35)

³⁷ Rü ñanagürü ta ga Ngechuchu: —Pa Yerucharéücüãx, pema penadai i Tupanaãrü orearü uruügu, rü nutamaã ípenamuxüchigü i Tupanaãrü orearü ngeruügu i pexcēx núma namugüxü. Rü ñuxreēxpüxcüna wüxigu chaugüxütagu pexü chanutaquēxexēēchaü ñoma wüxi i ota i naxãcüxã nügütüügu tüxü nutaquēxexürü. Natürü pema rü tama penaxwēxe. ³⁸—Dücēx i ñuxma ya perü ñane, rü Tupana tá ínanatēx. ³⁹—Rü pemaã nüxü chixu rü tãütama wena choxü pedau ñuxmatáta daxüguxü i nañewa ne chaxü. Rü ngēxguma rü tá choxü pedaugü rü tá ñaperüguü:

“Namexēchi nixi ya yima Cori ya Tupana núma namucü”, ñaperüguü tá —ñanagürü ga Ngechuchu.

24

Ngechuchu nanaxunagü na tupauca ga taxüne rü tá nagu na napogüxü
(Mr 13.1-2; Lc 21.5-6)

¹ Rü yexguma tupauca ga taxünewa ínaxüüxgu ga Ngechuchu, rü norü ngüxügu naxcēx naxi. Rü ñanagürügu nüxü: —Dücēx, Pa Corix, ñuxãcü nimexēchi ya daa tupauca ya taxünearü ípatagü —ñanagürügu. ² Natürü Ngechuchu nanangãxü rü ñanagürü: —Pema nüxü pedaugü ya guxünema ya yima tupauca ya taxünearü ípatagü. Natürü pemaã nüxü chixu rü aixcüma guxünema ya daa ípatagü rü tá nagu napogüe. Rü naxtapüxarü nutagü rü taxucütáma nügütü naxüxüra, rü bai ya wüxi —ñanagürü.

Cuēxruügu i tá nüxü idaüxü naxüpa na nagüxü i nañe
(Mr 13.3-23; Lc 17.22-24, 21.7-24)

³ Rü ñuxüchi guma Mēxpüne ga Oríbunecügu äeganewa naxi. Rü yexguma guma mēxpünewa natoxgu ga Ngechuchu rü norü ngüxüguçicatama naxütawa naxi na noxrüwama nüxna nacagüxüxēx. Rü ñanagürügu: —Tanaxwēxe i tomaã nüxü quixu na ñuxgu tá nangupetüxü i ngēma nüxü quixuxü. ¿Rü ñacü tá nixi i norü cuēxruü i nawa nüxü tacuáxü i ñuxgu

tá wena núma na cuxũxũ rũ tá na nagũxũ i naãne? —ñanagũrũgũ. ⁴ Rũ yexguma ga Ngechuchu rũ ñanagũrũ nũxũ: —¡Pexuãëgũ na taxúema pexũ womũxëxũcëx! ⁵—Erũ muxũchixũ i duũxũgũ tá ñangugũ, rũ chaugu tá nũgũ nicuxgũ rũ tá ñanagũrũgũ:

“Choma nixĩ i Cristu”, ñanagũrũgũ tá. Rũ muxũchixũ i duũxũgũxũ tá nawomũxëë. ⁶—Rũ tá nũxũ pexĩnũëchiga na nũgũ nadëixũ i ñuxre i nachiũãnegũ rũ nũgũ na nadaixchaũxũ i togũ i nachiũãnegũ. ¡Natũrũ tãutãma ngëmacëx pebëixãchiãgũ! Erũ woetama ngëmaãcũ tãtama nangupetũ i noxrix. Natũrũ tãutãma naãneãrũ gux nixĩ i ngëma. ⁷—Erũ wũxi i nachiũãne rũ to i nachiũãnemaã tá nũgũ nadai. Rũ wũxi i ãëxgacũ rũ to i ãëxgacũmaã tá nanu, rũ norũ churaragũ rũ ngëma to i ãëxgacũarũ churaragũmaã tá nũgũ nadai. Rũ tá taiya nangux, rũ tá nataxũchi i ñaaweanegũ, rũ muxũma i nachicawa rũ tá naxĩãxãchiane. ⁸—Rũ guxũma i ngëma pemaã nũxũ chixuxũ, rũ ngëma nixĩ i norũ ùgũmare i ngëma ngũxũ i tá ngupetũxũ. ⁹—Rũ ngëxguma i togũ i duũxũgũ rũ tá pexũ ñayauxũ na chixexũ pemaã naxũgũxũcëx. Rũ tá pexũ nadai. Rũ guxũ i naãnewa i duũxũgũ rũ tá pexchi naxaie, erũ chorũ duũxũgũ pixĩgũ. ¹⁰—Rũ ngëxguma rũ tá muxũchixũ i chorũ duũxũgũ ñanatëxgũ i chorũ ore, rũ nũgũtanũwa rũ tá nũgũchi naxaie. Rũ nũgũechita tá ãëxgacũxũtawã nũgũ ñayaxuaxũgũ. ¹¹—Rũ muxũchixũ i orearũ uruũgũneta tá ñangugũ. Rũ tá nũxũ nixugũgũ na Tupana yĩxũ ya núma namugũcũ na nũxũ yaxugũxũcëx i ore. Rũ ngëmaãcũ tá muxũchixũ i duũxũgũxũ nawomũxëëgũ. ¹²—Rũ porãcũ tá nangëxma i chixexũ, rũ ngëmagagu rũ muxũchixũtãma i duũxũgũ rũ tãutãma nũgũ nangechaũgũ. ¹³—Natũrũ yĩxema naetũwa meã Tupanaãxũ yaxõdmãxë rũ yĩxema tá tixĩ ya aixcũma nayaxũxe i maxũ i taguma gũxũ. ¹⁴—Rũ ngëma Tupanaãrũ ore i mexũ rũ guxũ i naãnewa tá nũxũ nixugũgũ na guxũ i duũxũgũ nũxũ na cuëxgũxũcëx. Rũ ngëmawena tá nixĩ i nagũxũ i naãne. ¹⁵—Rũ nuxcũmaũcũ ga Tupanaãrũ orearũ uruũ ga Danië nachiga nanaxũmatũ i ngëma chixexũ i Tupanapëxewa ãũãchixũ i ñgxuchãxũ. Rũ ngëxguma nũxũ pedëuxgu na tupauca ya taxũnewa nangõxũ i ngëma chixexũ i Tupanapëxewa chixexũchixũ, rũ name nixĩ i pexuãëgũ. ¹⁶—Rũ ngëxguma ngëma ùpetũgu, rũ ngëma Yudëaanewa ngëxmagũxũ i duũxũgũ rũ nanaxwëxe na mëxpũneãnewa nabuxmũxũ. ¹⁷—Rũ ngëma ngunexũgu ega texë tũmapataëxtũwa ngëxmagu, rũ tama name i tũmapatagu tayangaxi na tũmaãrũ ngëmaxũ tayayaxuxũcëx. ¹⁸—Rũ texë ya tũmaãnewa ngëxmaxë rũ tama name i tũmapatacëx tataegu na tũmachirugũ tayayaxuxũcëx. ¹⁹—Rũ ngëma ngunexũgũgu rũ wũxi i ngechaũ tá nixĩ i tũmacëx ya yĩxema ngeãxtagũ ya tacharaũgũxe rũ yĩxema imaixãcũgũxe. ²⁰—¡Rũ Tupanana naxcëx peça i perũ yumũxëwa na tama gãuane ixũyane rũ ëxna ngũxchigarũ ngunexũgũyane pexũ na nangupetũxũcëx i ngëma chixexũ! ²¹—Erũ ngëma ngunexũgũgu rũ porãcũ tá nangëxma i ngũxũ ga noxri naãne ixũgũgumama taguma yexmaxũ, rũ ngëmawena rũ tagutãma wena nangëxma. ²²—Rũ ngëxguma Tupana tama nanoxrexëgũ i ngëma ngunexũgũ, rũ taxũetãma tamaxũ. Natũrũ Tupana tá nananoxrexëë i ngëma ngunexũgũ tũmacëx ya yĩxema núma tũxũ nadexe. ²³—Rũ ngëxguma texë pexũ ñagũgu:

“Dũcëx, daa nixĩ ya Cristu” ñagũgu, rũ ëxna:

“Gua nixĩ ya Cristu” ñagũgu, ¡rũ tama name i nũxũ peyaxõgũ! ²⁴—Erũ Cristugũneta rũ Tupanaãrũ orearũ uruũgũneta tá ñangugũ. Rũ tá nanaxũgũ i muxũma i cuëxruũgũ i taxũgũ na ngëmaãcũ, ega nũxũ natauxchagu, na

tüxü nawomüxëëgüxüccëx ëixrüxe ya yíxema duüxëgü ya Tupanatama tüxü dexe. ²⁵—Düccëx, naxüpa na nangupetüxü i guxüma i ngëma ngüxü, rü marü pemaã nüxü chixu i nachiga. ²⁶—Rü ngëmacëx i ngëxguma duüxügü ñagügu pexü:

“Düccëx, yéa taxúema íxápataxüwa nangëxma ya Cristu”, ñagügu, rü tama name i ngëma pexü. Rü ngëxguma ñagügu pexü:

“Düccëx, nuã ucapuwa nangëxma ya Cristu”, ñagügu, rü tama name i nüxü peyaxögü. ²⁷—Erü ñoma wüxi i bëixbëxane i guxüwama nangóonexëëxürüü tá nixü i ngëxguma wenaxärü núma chaxüxgu i choma i Tupana Nane na duüxüxü chiixü. ²⁸ Rü duüxügü rü tá chauxcëx nangutaquëxëgü ñoma ëchagü nawemüccëx ngutaquëxëxürüü.

Ñuxäcü tá nixü i ngëxguma nataegugu ya Tupana Nane ya duüxüxü ixüü
(Mr 13.24-37; Lc 21.25-33, 17.26-30, 34-36)

²⁹—Rü nawena i ngëma ngüxügü rü tá nixo ya üëxcü, rü täütáma inabáxi ya tauemacü. Rü woramacurigü rü ëxtagü rü tá narüyi. Rü guxüma i ñoma i naãne rü üëxcü rü tauemacü rü woramacurigü rü ëxtagü rü tá naxüäxächitanü rü tá nu ne nanaxímare. ³⁰—Rü ñuxüchi duüxügü tá nüxü nadaugü na ñuxäcü daxüwa ne chaxüxü. Rü guxü i nachüüñecüäx i duüxügü rü tá naxauxe. Rü tá choxü nadaugü i ngëxguma caixanëxügügu ícharüxüxgu rü núma chaxüxgu. Rü ngëxguma i choma rü äëxgacü ya poraxüchicü rü mexëchicü tá chixü.

³¹—Rü tá chanamu i chorü orearü ngeruügü i daxücüäx na yacuegüäxüccëx ya norü cornetagü na ngëmaäcü naxütaquëxëëäxüccëx i guxüma i ngëma duüxügü i chadëxü i guxüwama ngëxmagüxü ñuxmata naãne iyacuäxüwa ngëxmagüxü. ³²—¡Perüxnüë i ñaã ore i cuëxruü i orix i iguerachiga, rü naxcëx pengüé! Rü ngëxguma ngëxwacaxüxü i nachacüügü iyarüyixgu rü naxüátëgu, rü ngëmawa nüxü pecuëx na paxa tá tauncü na yüxü. ³³—

Rü ngëxgumarüü tá nixü i ngëxguma nagüxchaügu i naãne. Erü ngëxguma nüxü pedëuxgu na nangupetüxü i ngëma pemaã nüxü chixuxü, rü ngëmawa tá nüxü pecuëx na marü chingaicaxüchixü. ³⁴—Rü aixcüma pemaã nüxü chixu rü guxüma i ngëma nüxü chixuxü rü tá nangupetü naxüpa na nayuexü i duüxügü i ñomaücüü maxëxü. ³⁵—Rü ñoma i naãne rü ngëma daxüwa nüxü idauxü rü tá nagux. Natürü chorü ore rü tagutáma inayarüxo rü aixcüma tá ningü. ³⁶—Natürü ngëma ngunexü rü ora i nagu tá nangupetüxü i ngëma pemaã nüxü chixuxü, rü Chaunatü ya Tupanaxícatama nüxü nacuëx na ñuxgu tá nangupetüxü i ngëma, rü taxúema ya togue nüxü tacuëx. Rü woo i norü orearü ngeruügü i daxücüäx rü tama nüxü nacuëxgü, rü woo i choma i Nane na chiixü rü tama nüxü chacuëx na ñuxgu tá nangupetüxü i ngëma. ³⁷—Rü yëxgumarüü ga duüxügüxü ngupetüxü ga yëxguma Noë maüxgu, rü ngëxgumarüü tá ta nüxü nangupetü i ngëxguma íchanguxgu i choma i Tupana Nane na duüxüxü chiixü. ³⁸—Rü yëxguma, naxüpa ga guma mucü ga taxüchicü ga guxüwama inanguanëxëëcü, rü ga duüxügü rü nachibüë, rü naxaxëgü, rü nixämëxgü rü nixütëxacügü ñuxmata nawa nangu ga yema ngunexü ga nagu Noë naweügu ixüëxü. ³⁹—Rü noxri ga yema duüxügü rü tama nüxü nacuëxgüéga ga íacü tá nüxü na ngupetüxü. Natürü yëxguma ínanguxgu ga guma mucü ga taxüchicü ga yema duüxügüxü ðaicü, rü yëxguma nixü ga nüxü yacuëxächitanüxü. Rü ngëxgumarüü tá ta nixü i ngëxguma wenaxärü núma chaxüxgu i choma i Tupana Nane na duüxüxü chiixü. ⁴⁰—Rü ngëma ngunëxügu rü taxre i yatügü rü wüxi i naãnewa tá

nügümaã nangëxmagü. Rû wüxi tá nixî i Tupana igaxû rû ngëma to rû tá ngema natëx. ⁴¹—Rû taxre i ngexûgü tá nügümaã ínacaegü. Rû wüxi tá nixî i Tupana igaxû rû ngëma to rû tá ngema natëx. ⁴²—¡Rû pexuãëgü! Erû tama nüxû pecuèx i tacü rû ora tá íchangu i chomax. ⁴³—¡Rû nagu perüxîñüë i ñaã ore! Rû ngëxguma chi wüxi i ípataarü yora nüxû cuèxgu na tacü rû oragu tá inanguxû i ngítëxáxû rû tâü chima nape. Erû nüxna chi nadau ya napata na tama ngëxma naxücuüxcèx i ngëma ngítëxáxû na tacüxcèx ngema yangíxüxcèx. ⁴⁴—Rû ngëmacèx name nixî i pexuãëgü i pemax. Erû ngëma ngunexû i tama nagu íperüxîñüëxügu tá nixî i ngürüãchi íchanguxû i choma i Tupana Nane na duüxüxû chiixû.

Wüxi ga duüxû ga meã norü coriga ñnüxû rû to ga tama meã norü coriga ñnüxüchiga
(Lc 12.41-48)

⁴⁵—¿Rû texé tíxû ya túmaarü coriarü duüxû ya aixcüma yanguxëxë rû túmaãëxû cuáxe? ¿Tama ëxna yíxema tíxû ya túmaarü cori túxna ágaxe na meã nüxna tadauxüxcèx rû meã oragu tanachibüexëxüxcèx i norü duüxügü? ⁴⁶ Rû tataãë ya yíxema coriarü duüxë ega ngëxguma ínanguxgu i túmaarü cori rû túxû íyanguexügu na meãma ítanaxüxû i ngëma puracü i nagu túxû namuxû. ⁴⁷—Rû aixcüma pemaã nüxû chixu rû ngëma túmaarü cori rû tá guxüma i norü ngëmaxüguarü dauruüxû tá túxû nixîxëë. ⁴⁸⁻⁵⁰—Natürü ngëxguma chi ngëma coriarü duüxû rû wüxi i yatü i chixexû yixígu, rû chi nagu naxîñügu na táütáma paxa ínanguxû i norü cori, rû chi inaxüguãgu na chixri namuãxû i namücügü i norü coriarü duüxügü, rû chi ngãxëxütanügu naxãxgu na namaã nachibüxüxcèx rû naxaxexüxcèx, rû ngürüãchi ngëma ngunexû rû ngëma ora i tama nagu ínanguxëãxügu rû tá ínangu i norü cori. ⁵¹—Rû poraãcüxüchima tá nanapoxcu i ngëma norü duüxû, ñoma meã maxënetaxû i duüxüxüxû napoxcuexürü. Rû ngema tá narüdoxü rû nixüxchapüta.

25

Ore ga 10 ga pacügu ixuxû

¹ Rû ñanagürü ga Ngechuchu: —Pemaã tá nüxû chixu i wüxi i ore na nawa nüxû pecuãxüxcèx i ñüxãcü tá duüxüguarü ãëxgacü na yíxû ya Tupana i ngëxguma naguxgu i naãne. Rû iyexma ga 10 ga pacü ga ngürü daparinamaã ngígüarü petawa ícü na yaxümücügüãxüxcèx ga guma yatü ga ingíxchaücü. ²—Rû 5 ga yema pacü rû tama ixuãëgü. Rû yema naí ga 5 ga pacü rû meãma ixuãëgü. ³—Rû yema tama uãëgücü, rû yexguma ngürü daparina íyangegügu rû tama to ga ngürü queruchinu ta íyangegü. ⁴—Natürü ga yema uãëgücü rû to ga ngürü queruchinu ta íyangegü. ⁵—Natürü ga guma yatü ga ingíxchaücü rû tama paxa ínangu. Rû düxwa ga yema pacügu rû ipee yerü iyaxtae. ⁶—Rû yexguma ngãxücüüwa nanguxgu, rû yema pacügu nüxû ixîñüë ga wüxi ga naga ga ñaxû:

“Domama nixî ya yima yatü ya ingíxchaücü. ¡Rû íperüdagü, rû ípeyadaugü!” ñaxû. ⁷—Rû guxcüma ga yema pacügu rû íirüdagü, rû iyamexëëgü ga ngürü daparinagü. ⁸—Rû yexguma ga yema 5 ga pacügu ga tama uãëgücü rû ngígürügügu ngíxû ga yema pacügu ga uãëgücü:

“¡Íraxû i perü queruchinu toxnata pexã, erü torü omügü rû nixogü!” ngígürügügu. ⁹—Natürü ga yema pacügu ga uãëgücü rû ngíxû ingãxügu, rû ngígürügügu:

“Taxucürüwa pexna ta taxã, erü ngëxguma chi pexna ta taxãxgu rü tãu chima ningü i toxçèx rü pexçèx. Rü ngëmacèx narümemaë nixi i ngextã namaã ínataxegixüwa pegixü nawa pexi”, ngígürügügü. ¹⁰ —Natürü yexguma ga yema 5 ga pacügü ga tama uãëgücü ngirü queruchinuwa naxiyane, rü ínangu ga guma yatü ga ingíxchaüçü. Rü ga yema pacügü ga uãëgücü rü iyachocu nawa ga guma í ga nawa iyangíxüne. Rü ñuxüchi narüwãxta ga íãx. ¹¹ —Rü yemawena íngügü ga yema pacügü ga tama uãëgücü, rü ngígürügügü:

“¡Pa Corix, toxçèx yawãxna i íãx!” ngígürügügü. ¹² —Natürü nüma ga cori, rü ngixü nangãxü, rü ñanagürü:

“Pemaã nüxü chixu rü aixcüma tama pexü chacuèx na texëgü pixigüxü”, ñanagürü. ¹³ Rü ñuxüchi ñanagürü ga Ngechuchu: —¡Ípexuãëgü! Erü tama nüxü pecuèx i ñacü rü ngunexü rü ñacü rü ora tá íchangu i choma i Tupana Nane na duüxüxü chixü —ñanagürü.

Ore ga dñeru ixuxü

(Lc 19.11-27)

¹⁴ Rü ñanagürü ta ga Ngechuchu: —Rü ngëma Tupana na duüxügüarü äëxgacü na ixixü rü ñoma wüxi ga yatü ga ixüächichaüçü ga to ga nachüãnewa na naxüçèxrüü nixi. Rü nüma ga guma yatü rü norü duüxügücèx naca, rü nüxna ngixü naxã ga dñeru na nüxü ngímaã nanguxüxüçèx rü ngímaã na ínapuracüexüçèx. ¹⁵ —Rü wüxi ga yema norü duüxüna ngixü naxã ga 5000 tachinü ga dñeru. Rü yema tona ngixü naxã ga 2000 tachinü ga dñeru. Rü yema tona ngixü naxã ga 1000 tachinü ga dñeru. Rü yemaãcü nanangugü na ñuxãcü tá yema dñerumaã napuracüexü ga wüxichigü ga norü duüxügü rü yemaãcü wüxichigüna ngixü naxã ga yema dñeru. Rü ñuxüchi inaxüächi ga yema cori na to ga nachüãnewa naxüxüçèx. ¹⁶ —Rü yema norü duüxü ga 5000 tachinü ga dñeru ngixü yaxuxü, rü ngímaã napuracü, rü naí ga 5000 tachinü ngímaã nayaxu. ¹⁷ —Rü yexgumarüü ta ga yema norü duüxü ga 2000 tachinü ga dñeru ngixü yaxuxü, rü ngímaã napuracü, rü naí ga 2000 tachinü ngímaã nayaxu. ¹⁸ —Natürü ga yema norü duüxü ga 1000 tachinü ga dñeru ngixü yaxuxü, rü ngímaã ínixü. Rü ngixü nixaixmaü, rü yexma ngixü natèx ga yema norü coriarü dñeru. ¹⁹ —Rü nuxcüürama nataegu ga yema duüxügüarü cori. Rü yexguma ínanguxgu rü inanaxügü ga norü duüxügümaã na namexëãxü ga norü dñeruchiga. ²⁰ —Rü nüxíra norü corixütawa naxü ga yema norü duüxü ga 5000 tachinü ga dñeru ngixü yaxuxü. Rü norü corina ngixü naxã ga yema 5000 tachinü. Rü ngëtü ngixü inaxã ga naí ga 5000 tachinü ga ngixü nayaxucü ngímaã ga yema norü cori nüxna ngixü äcü ga dñeru. Rü ñanagürü norü corixü:

“Düçèx Pa Corix, ñaã iyixi ga yema 5000 tachinü ga dñeru ga choxna ngixü cuxãcü. Marü ngímaã chapuracü rü ngímaã cuxü ngixü chayaxu i ñaã naí i 5000 tachinü”, ñanagürü. ²¹ —Rü norü cori rü ñanagürü nüxü:

“Pa Chorü Duüxü, wüxi i mexëchixü quixi, rü meãma cupuracü. Rü meã nüxna cudau ga yema noxre ga dñeru ga cuxna ngixü chaxãcü, rü meãma ngímaã cupuracü. Rü ngëmacèx i ñuxma rü tá rümumaëcüna cuxü chadauxëë. ¡Rü ixücu i chopatawa rü ngixã tataãëgü!” ñanagürü. ²² —Rü yemawena ínangu ga yema to ga norü duüxü ga 2000 tachinü ga dñeru ngixü yaxuxü. Rü ñanagürü norü corixü:

“Düçèx Pa Corix, ñaã iyixi ga yema 2000 tachinü ga dñeru ga choxna ngixü cuxãcü. Marü ngímaã chapuracü rü ngímaã cuxü ngixü chayaxu i naí i 2000 tachinü. Rü ñaã iyixi”, ñanagürü. ²³ —Rü norü cori rü ñanagürü nüxü:

“Pa Chorü Duüxüx, wüxi i mexëchixü quixi, rü meäma cupuracü. Rü meä nüxna cudau ga yema noxre ga diëru ga cuxna ngixü chaxäcü, rü meäma ngëmaä cupuracü. Rü ngëmacëx i ñuxmax rü tá rümumaëcüna cuxü chadauxëë. jRü ixücu i chopatawa rü ngixä tataäëgü!” ñanagürü. ²⁴—Natürü yexguma norü corixütawa nanguxgu ga yema norü duüxü ga 1000 tacinü ga diëru ngixü yaxuxü, rü ñanagürü norü corixü:

“Düçëx Pa Corix, choma nüxü chacuëx rü wüxi i yatü i aüxü quixi. Rü cunayaxu i nanetüarü o i ngextá tama ícutoexüwa, rü cunabuxarü oöx i nanetü i tama icutoxü. ²⁵—Rü yemacëx chamuü. Rü waixümügu ngixü chixaixmaü rü ngixü ichatëx. Natürü ñaä iyixi i ngëma curü diëru”, ñanagürü. ²⁶ Rü yexguma ga norü cori rü nanangäxü rü ñanagürü:

“Pa Chorü Duüxüx, wüxi i chixexü rü oxü i chorü duüxü quixi. Rü cuma meäma nüxü cucuëx rü ngextá tama íchatoexüwa rü chanayaxu i nanetüarü o, rü chanabuxarü oöx i nanetü i tama ichatoxü. ²⁷—Rü yemacëx narümemaë chí nixi ga bancugu choxü ngëmaä na cunguxüxü ga chorü diëru na ngema choxü ngixü yamuxëëgüxüçëx, rü ngëmaäcü mucü ngixü na chayaxuxüçëx i ngëxguma íchanguxgu”, ñanagürü. ²⁸—Rü yexguma ga yema cori rü nanamu ga yema togü ga norü duüxügü ga yëma yexmagüxü, rü ñanagürü nüxü:

“jNüxna ngixü peyaxu i ngëma diëru, rü ngëma yatü i 10,000 i diëru nüxü ngëxmaxüna ngixü pexä! ²⁹—Erü yixema tüxü nangëmëxcü rü yexera tá tüxna ngixü taxä, rü ngëmaäcü tá tüxü imuxüchi. Natürü yixema tüxü natauxcü rü woo ngëma noxre i tüxü ngëmëxcü rü tá tüxna ngixü tayaxu. ³⁰—jRü yëama düxëtüwa i poraäcü ínaxëänexüwa peyatá i ñaä chorü duüxü i taxuwama mexü! Rü ngema tá narüdoxü rü tá nixüxchapüta”, ñanagürü.

Naäneärü guxgu rü Cristupëxegu tá nangutaquëxegü i guxü i nachüüänecüäx i duüxügü na yadexechiäxüçëx i ngëma mexügü rü na napoxcuëäxüçëx i ngëma chixexügü

³¹ Rü ñanagürü ga Ngechuchu: —Rü ngëxguma wenaxärü núma chaxüxgu i choma i Tupana Nane na duüxüxü chüxü, rü chorü orearü ngerüügü i daxüçüäx rü tá choxü naxümücügü. Rü äëxgacü ya tacü tá chixi rü chorü tochica i mexëchixüwa tá charüto. ³²—Rü guxü i nachüüänecüäx i duüxügü rü tá chopëxegu nangutaquëxegü. Rü choma rü tá chayadexechi ñoma wüxi i carneruarü dauruü i norü carnerugü rü chibugü noxrüwama mugüxürüü. ³³—Rü ngëma choxrü ixigüxü rü chorü tügüncüwawa tá chanangëxmagüxëë. Rü ngëma tama choxrü ixigüxü rü chorü toxwecüwawa tá chanangëxmagüxëë. ³⁴—Rü ngëxguma i choma i tá äëxgacü ya tacü na chixü rü ñacharügü tá nüxü i ngëma chorü duüxügü:

“jNuä pexi i pema ya texé ya Chaunatü ya Tupana tüxü rüngüxëëgüxe, rü penayaxu i ngëma pechica i ngextá núma äëxgacü iyixüwa! Yerü Chaunatü rü pexcëx nanamexëë i ngëma pechica ga yexguma tauta naäne naxüxgu. ³⁵—Rü ngëmaäcü tá pemaä namecüma yerü yexguma chataiyagu rü pema rü choxü pechibüxëë. Rü yexguma chiṭawagu rü choxü pexaxëë. Rü yexguma tama nüxü pecuëxgu na texé chixü rü meä choxü peyaxüxü ga pepatawa. ³⁶—Rü yexguma changexchirugu rü choxü pexüxchiru. Rü yexguma chidaawegu rü choxü perüngüxëë. Rü yexguma pöxcupataüwa chayexmagu rü choxü ípeyadau”, ñacharügü tá nüxü. ³⁷—Rü ngëxguma i ngëma duüxügü i chadexü rü ñanagürügü tá choxü:

“Pa Corix, ¿ñuxgu ga cuxũ tadauxũ ga na cutaiyaxũ rü cuxũ tachibũxëẽxũ? ¿Rü ñuxgu ga cuxũ tadauxũ ga na quiŕaawaxũ rü cuxũ taxaxëẽxũ? 38 — ¿Rü ñuxgu ga tochixũwa cunguxũ rü meã cuxũ tayauxgũxũ ga woo tama cuxũ tacuèxgũgu? ¿Rü ñuxgu ga cungexchiruxũ rü cuxũ taxũxchirugũxũ? 39 — ¿Rü ñuxgu ga cuxũ tadaugũxũ na quidaawexũ rü éxna poxcupataũwa cuyexmaxũ rü cuxũ itayadaugũxũ?” ñanagürügü tá choxũ. 40 —Rü choma na ãëxgacü ya tacü na chiĩxũ, rü tá chanangãxũ, rü ñacharügü tá:

“Aixcũma pemaã nüxũ chixu rü yexguma nüxũ perüngũxëẽgũgu i ngëma chorü duũxũ i yexeraãcü ngearü ngemaxũáxũ, rü choxũ nixĩ ga perüngũxëẽgũxũ”, ñacharügü tá nüxũ. 41 Rü ñuxũchi i choma na ãëxgacü ya tacü na chiĩxũ, rü ñacharügü tá nüxũ i ngëma tama chorü duũxũgü ixigũxũ:

“iChoxna pixĩgachi i pema i perü chixexüçëx poxcuexe! ¡Rü ngema pexĩ nawa ya yima üxü ya taguma ixoxũne ya Tupana ímexëene naxçëx i ngoxo i Chataná rü norü duũxũgü! 42 —Yerü yexguma chataiyagu rü pema rü tama choxũ pechibũxëẽ. Rü yexguma chiŕawagu rü tama choxũ pexaxëẽ. 43 —Rü yexguma tama nüxũ pecuèxgu na texé chiĩxũ rü tama meã choxũ peyauxgü ga pepatawa. Rü yexguma changexchirugu rü tama choxũ pexũxchirugü. Rü yexguma chiŕaawegu rü poxcupataũwa chayexmagu rü tama choxũ ípeyadaugü”, ñacharügü tá nüxũ. 44 —Rü ngëxguma i nümagü i tama chorü duũxũgü ixigũxũ, rü ñanagürügü tá choxũ:

“Pa Corix, ¿ñuxgu tochixũwa cingu rü tama meã cuxũ tayauxgü yerü tama cuxũ tacuèxgü? ¿Rü ñuxgu ga cuxũ tadaugũxũ ga na cutaiyaxũ, rü éxna na quiŕaawaxũ, rü éxna na cungexchiruxũ, rü éxna quidaawexũ, rü éxna poxcupataũwa na cuyexmaxũ, rü tama cuxũ tarüngũxëẽgũxũ?” ñanagürügü tá choxũ. 45 —Rü choma na ãëxgacü ya tacü na chiĩxũ, rü tá chanangãxũ, rü ñacharügü tá nüxũ:

“Aixcũma pemaã nüxũ chixu rü yexguma tama nüxũ perüngũxëẽgũgu ga wüxi ga duũxũ ga yexeraãcü ngearü ngemaxũáxũ, rü choxũ rü ta tama perüngũxëẽgũ”, ñacharügü tá nüxũ. 46 —Rü ñuxũchi i ngëma duũxũgü i tama chorü duũxũgü ixigũxũ rü tá poxcu i taguma gúxũwa naxĩ. Natürü ngëma duũxũgü i aixcũma meã chauxçëx maxëxũ rü tá nanayauxgü i maxũ i taguma gúxũ, —ñanagürü ga Ngechuchu.

26

Yudiũgüarü ãëxgacügü naxçëx nadaugü na ñuxãcü Ngechuchuxũ yayauxgũxũ

(Mr 14.1-2; Lc 22.1-2; Cu 11.45-53)

1 Rü yexguma Ngechuchu nüxũ rüchauxgu ga yema orexũ na yaxuxũ, rü ñanagürü norü ngúexũgũxũ: 2 —Pema nüxũ pecuèx rü taxre i ngunexũ nataxu na nangõxgũãxüçëx i ngëma õna i Üpetüchigaarü petacëx naxügũxũ. Rü ngëxguma tá nixĩ i choxũ yayauxgũxũ i chorü uwanügü na curuchawa choxũ yapotagũxüçëx —ñanagürü. 3 Rü yexgumaüçüü ga paigüarü ãëxgacügü, rü ngúexëẽruũgü ga ore ga mugüwa nguxëẽtaegũxũ, rü Yudiũgüarü ãëxgacügüerugü rü nangutaquëxëgü ga napatawa ga Caipá ga paigüarü ãëxgacü ixĩcü. 4 Rü yéma nügümaã nanamexëëgü na Ngechuchuxũ nawomüxëëgüãcüma na yayauxgũãxüçëx rü na yamëxgũãxüçëx. 5 Natürü nügümaã ñanagürügü: —Taxucürüwama i ñuxma petagu tayayauxgü, erü duũxũgü rü tá tamaã nanuë —ñanagürügü.

Wüxi ga nge rü Ngechuchuerugu inaba ga pumara

(Mr 14.3-9; Cu 12.1-8)

⁶ Rü Ngechuchu rü Betániãwa nayexma napatawa ga Chimáú ga rüchaxü necümaã naxugüãcü. ⁷ Rü Ngechuchucèx yéma iyaxü ga wüxi ga ngecü ga yéma nangecü ga wüxiweü ga pumara ga tatanüxüchixü ga mexèchicü ga butiyamaã áchiüxü. Rü yexguma mechawa ínachibüyane ga Ngechuchu, rü ngíma rü naèrugu inaba ga yema pumara. ⁸ Rü yexguma yemaxü nadaugügu ga Ngechucharü ngúexüügü, rü naãéwa nanguxgü, rü inanaxügüe ga na ñagüxü. —¿Tüxcüü ngéxma inaxaiyaxü i ngéma pumara? ⁹ —Rü narümeamaẽ chi nixí i tatanüxügu namaã itaxe, rü ñuxüchi ngéma díerumaã nüxü irüngüxèé i ngéma duüxüügü i ngearü ngemaxüãxgüxü —ñanagürügü. ¹⁰ Rü Ngechuchu nüxü naxinü. Rü ñuxüchi ñanagürü norü ngúexüügüxü: —¿Tüxcüü ngíxü pechixewe i ngéma nge? Erü ngéma chomaã naxüxü rü wüxi i mexü nixí. ¹¹ —Ngéma ngearü ngemaxüãxgüxü rü guxügutáma petanüwa nangéxmagü. Natürü choma rü táütáma guxügu petanüwa changéxma. ¹² —Rü ngéma chomaã naxüxü i ñaã ngecü na chaxunegu nabaãxü i ngéma pumara i yixixü, rü ngémaãcü inaxü erü paxa tá chayü rü tá choxü inatèxgü. Rü ngémacèx nixí i chaxunegu nabaãxü i ngéma pumara. ¹³ —Rü aixcüma pemaã nüxü chixu rü guxü i naãnewa i ngextá duüxüügü nüxü íxugügüxüwa i Tupanaärü ore i mexü, rü ñaã ngecü chomaã üxü rü tá ta nüxü nixugügü. Rü ngémaãcü tá ngíxna nacüexächie i duüxüügü —ñanagürü ga Ngechuchu.

Yuda rü ãëxgacügümaã nanamexèé na ñuxãcü Ngechuchuxü yayauxgüxüçèx

(Mr 14.10-11; Lc 22.3-6)

¹⁴ Rü ñuxüchi ga wüxi ga Ngechucharü ngúexü ga Yuda ga Icariúte rü paigüarü ãëxgacügüxütawa naxü rü namaã nayarüdexa. ¹⁵ Rü Yuda rü ñanagürü nüxü: —¿Ñuxre tá choxü penaxütanüxü i ngéxguma pexü chanatauxchaxèégu na Ngechuchuxü piyauxgüxüçèx? —ñanagürü. Rü yexguma ga númagü ga paigüarü ãëxgacügü rü 30 tachinü ga díerugu namaã naxuneta. ¹⁶ Rü yexgumama inanaxügü ga Yuda ga naxcèx na nadauxü ga ñuxãcü nüxü na natauxchaxèégüãxü na Ngechuchuxü yayauxgüxüçèx.

Coriarü ðnachiga

(Mr 14.12-25; Lc 22.7-23; Cu 13.21-30; 1 Co 11.23-26)

¹⁷ Rü nawa nangu ga ngunexü ga nugu inaxügüxü ga yema peta ga pãu ga ngearü puxèerüãxü nagu nangõxgüxü. Rü norü ngúexüügü rü Ngechuchucèx naxí, rü ñanagürügü nüxü: —¿Ngextá tá tanamexèé i nachica i nawa nangõxgüxü i ðna i Üpetüchigaarü petagu ingõxü? —ñanagürügü. ¹⁸ Rü nüma ga Ngechuchu rü ñanagürü nüxü: —¿Ngema íãnewa pexí, rü yima yatü ya pemaã nüxü chaxunetacüpatawa pexí! ¡Rü namaã nüxü pixu rü ñapegügü:

“Torü ngúexèerü rü ñanagürü: ‘Marü ningaicaxüchi na chayuxü rü nuã cupatawa rü chorü ngúexügümaã chanangupetüxèéchaü i Üpetüchigaarü peta,’” ñaperügügü tá nüxü! ¹⁹ Rü yéma naxí ga yema norü ngúexügü. Rü yema Ngechuchu namaã nüxü ixuxürüü nanaxügü. Rü nanamexèégü ga yema ðna ga Üpetüchigaarü petagu tá nangõxgüxü. ²⁰ Rü yexguma nachütagu rü yéma mechawa nachibü ga Ngechuchu namaã ga yema 12 ga norü ngúexügü. ²¹ Rü yexguma ínachibüeyane, rü Ngechuchu rü ñanagürü nüxü: —Aixcüma pemaã nüxü chixu rü wüxie i petanüwa tá tixí ya bexma chauechita choxü

íyaxuaxũxê —ñanagürü. ²² Rũ yexguma ga nũmagũ ga norũ ngũxũgũ rũ poraãcũ nangechaũgũ. Rũ wũxichigũ nũxna nicachigũ, rũ ñanagürügũ: —Pa Corix, çchoma êxna tá chĩixũ ya yixema cuxũ íyaxuaxũxê? —ñanagürügũ. ²³ Rũ nũma ga Ngechuchu nanangãxũ rũ ñanagürü: —Ngẽma wũxi ya poratuwa namaã tá chachibũxũ, rũ ngẽma tá nixĩ i chauechita choxũ íyaxuaxũxũ. ²⁴ —Rũ choma i Tupana Nane na duũxũxũ chĩixũ rũ tá chayũ ngẽxgumarũ i Tupanaãrũ ore i umatũxũ nũxũ ixuxürũ. Natürũ wũxi i ngechaũxũchi nixĩ naxcèx i ngẽma yatũ i choxũ íyaxuaxũxũ. Rũ narũmemaẽ chi nixĩ ga noxtacũma tãũ chima na nabuxũ —ñanagürü. ²⁵ Rũ nadexaãchi ga Yuda ga naẽchita íyaxuaxũxũ, rũ ñanagürü: —Pa Ngũxẽẽruũx, çtãütãma choma nixĩ? —ñanagürü. ²⁶ Rũ Ngechuchu nanangãxũ rũ ñanagürü: —Ngẽmaãcũ cuma nixĩ —ñanagürü. ²⁶ Rũ yexguma ínachibũeyane rũ Ngechuchu nanayaxu ga wũxi ga pãũ. Rũ Tupanaana moxê naxã, rũ inabũcũ, rũ norũ ngũxũgũxũ nayanu. Rũ ñanagürü: —Ñãã pãũ rũ chaxunchiga nixĩ. Rũ jpenangõ! —ñanagürü. ²⁷ Rũ yemawena rũ nanayaxu ga wũxi ga pochiyu ga binumaã ããcuxũ. Rũ yexgumarũ ta Tupanana moxê naxcèx naxãxĩra, rũ ñũxũchi norũ ngũxũgũna nanaxã, rũ ñanagürü nũxũ: —jRũ guxãma i pema rũ peyaxèux ya daa binu! ²⁸ —Erũ daa binu rũ nachiga nixĩ ya chaugũ ya muxũma i duũxũgũcèx tá íbacũ na ngẽmaãcũ Tupana nũxũ nũxũ nangechaũxũcèx i norũ pecadugũ. Rũ yimawa Tupana nanangoxèẽ na aixcũma yĩixũ i norũ uneta. ²⁹ —Rũ pemaã nũxũ chixu rũ tagutãma wena binu chayaxaxũ ñũxmatãta Chaunatũ ya Tupana ãẽxgacũ íixũxũwa ngexwacaxũcũ ya binu pemaã chayaxèux —ñanagürü.

Ngechuchu nũxũ nixu rũ Pedru rũ taxũtãma nũgũ nixu na norũ ngũxũxũ yĩixũ (Mr 14.26-31; Lc 22.31-34; Cu 13.36-38)

³⁰ Rũ ñũxũchi nawiyaegũ ga wũxi ga Tupanaãrũ wiyaegu. Rũ yemawena rũ guma Mèxpũne ga Oribunecũgu ãeganewa naxĩ. ³¹ Rũ yexguma ga Ngechuchu rũ ñanagürü nũxũ ga norũ ngũxũgũ: —Guxãma i pema rũ tá choxũ ípetèxgũ i ñoma i chũtaxũgu. Erũ Tupanaãrũ ore i umatũxũwa rũ ñanagürü: “Tã chayamèx ya carneruarũ dauruũ, rũ tá nanaxũanemare i carnerugũ”, ñanagürü i ngẽma ore. ³² —Natürũ ngẽxguma marũ yuwa ícharũdaxguwena, rũ tá chaxira pexũpa Gariréanewa chaxũ —ñanagürü. ³³ Rũ yexguma ga Pedru rũ nanangãxũ rũ ñanagürü: —Rũ woo guxũma i togũ cuxũ ítèxgu, natürũ i chomax rũ tãütãma cuxũ íchatèx —ñanagürü. ³⁴ Rũ Ngechuchu ñanagürü nũxũ: —Aixcũma cumaã nũxũ chixu rũ ñomatama i chũtaxũgu rũ naxũpa na otã íçaxũ, rũ tomaèxpũxcũna tá cugũ iquicux na chorũ duũxũ quĩixũ. ³⁵ Rũ Pedru nanangãxũ rũ ñanagürü: —Rũ woo wũxigu cumaã chayuxgu rũ tãütãma chaugũ ichicux na curũ duũxũ chĩixũ —ñanagürü. Rũ guxũma ga togũ ga norũ ngũxũgũ rũ ta yema ñanagürügũ.

Ngechuchu rũ Yechemaniãwa nayayumũxẽ (Mr 14.32-42; Lc 22.39-46)

³⁶ Rũ Ngechuchu rũ norũ ngũxũgũmaã nawa nangugũ ga wũxi ga nachica ga Yechemaniãgu ãegaxũ. Rũ Ngechuchu rũ ñanagürü nũxũ: —jNuã perũtogũ! Rũ paxa yoxni yéa chayayumũxẽ —ñanagürü. ³⁷ Rũ Ngechuchu nũgũwe nanagagũ ga Pedru rũ Zebedeu nanegũ ga Chaũtiãgu rũ Cuãũ. Rũ Ngechuchucèx inaxũgũ ga na poraãcũ nangechaũxũ rũ naxĩxãchiãèxũ. ³⁸ Rũ yexguma ga Ngechuchu rũ ñanagürü nũxũ: —Poraãcũ changechaũ rũ nagu charũxĩnũ rũ

ngēmamaã tá chayu. ¡Rü nuxa perücho i pemax, rü chauxrüü ipedaue! —ñanagürü. ³⁹ Rü yexguma ga Ngechuchu rü yéaxüra naxü. Rü waixümüãnegu nanangücuchi. Rü nayumüxê rü ñanagürü: —Pa Chaunatüx, ngëxguma cuma cunaxwëxegu, ¡rü nüxna choxü ñanguxuchixêê i ñaã ngüxü i tá choxü üpetüxü! Natürü chanaxwëxe i cuxrütama ngüchaü cuxü rü tama i choxrü —ñanagürü. ⁴⁰ Rü yemawena ga Ngechuchu rü nataegu ga yema norü ngüexüügü iyexmagüxüwa. Rü nüxü inayangau ga na ñapeexü. Rü ñanagürü Pedruxü: —Pa Pedrux, ¿taxucürüwama êxna namaã peporae na chomaã ipedauexü, rü bai i wüxi i ora? ⁴¹ —¡Rü pexuãëgü rü Tupanana naxcëx peça na pexü nangüxêëxücëx na tama choxü ípetáxücëx ega ngëxguma tacü rü guxchaxü pexü üpetügu! Erü aixcüma peãëwa rü ípememare, natürü pexene nixi ituraxü —ñanagürü. ⁴² Rü yexguma rü wenaxärü noxri ñayumüxêxücëx nataegu ga Ngechuchu. Rü wenaxärü nayumüxê, rü ñanagürü: —Pa Chaunatüx, ngëxguma tama cunaxwëxegu na nawa choxü ícunguxuchixêêxü i ñaã ngüxü i tá chingexü, rü marü name i ngëma cuma cunaxwëxexüãcüma chomaã cunaxü —ñanagürü. ⁴³ Rü ñuxüchi wenaxärü norü ngüexüügü iyexmagüxüwa naxü. Rü nüxü inayangau ga na ñapeexü, yerü poraãcü nayaxtaexüchi. ⁴⁴ Rü yéma nüxna nixü, rü wenaxärü nayayumüxê. Rü noxriãcüta nayumüxê. ⁴⁵ Rü yemawena rü norü ngüexüügü iyexmagüxüwa naxü. Rü ñanagürü nüxü: —¡Ñuxma waxi pepepe rü iperüngüê! Erü marü nawa nangu i ora na chorü uwanü choxü iyauxgüxü rü pecaduãxgüxüna choxü namugüxü. ⁴⁶ ¡Ipechigü rü ngüxã ítxixi! Erü marü ñomatáma nixi i ngëma choxü iyaxuaxüxü —ñanagürü.

Ngechuchuxü niyauxgü

(Mr 14.43-50; Lc 22.47-53; Cu 18.2-11)

⁴⁷ Rü yexguma iyadexayena ga Ngechuchu, rü ñangu ga Yuda ga norü ngüexüchirëx ixixü. Rü nawe narüxi ga muxüma ga duüxüügü ga taramaã rü naïmaã ixãxnexü. Rü yema nixi ga duüxüügü ga paigüarü ãëxgacügü rü Yudiugarü ãëxgacügüerugü yéma mugüxü. ⁴⁸ Rü ga Yuda ga ñaxuaxüxü rü marü yema duüxüügümaã nanamexêê, rü ñanagürü: —Ngëma nüxü chachüxuxü tá nixi i Ngechuchu. Rü ngëma tá nixi i piyauxgüxü —ñanagürü: ⁴⁹ Rü yexguma Ngechuchucëx nixü, rü ñanagürü nüxü: —Nuxmaê Pa Ngüexêëruüx —ñanagürü. Rü ñuxüchi nüxü nachüxu. ⁵⁰ Rü Ngechuchu nanangãxü rü ñanagürü: —Pa Chomücüx, ¿tacüwa nuã cuxü? —ñanagürü. Rü yexgumatama Ngechuchuxü niyauxgü ga yema duüxüügü ga Yudawe rüxixü. ⁵¹ Rü wüxi ga Ngechuchumücü nanawëxechi ga norü tara, rü paigüarü ãëxgacüarü duüxüxü ñadaechinü. ⁵² Rü yexguma ga Ngechuchu rü ñanagürü: —¡Naxchiügu yaxücuchi i curü tara! Erü guxãma ya yixema taramaã nuëxê, rü taragu tátama tayue. ⁵³ —¿Tama êxna nüxü cucüx rü ngëxguma chi choma chanaxwëxegu, rü Chaunatüna chi naxcëx chaca na choxü núma namugüãxücëx i muxüma i norü orearü ngeruügü i daxücüãx na choxü yanangüxêëgüxücëx? ⁵⁴ —Natürü ngëxguma chi ngëma chaxüxgu, rü ¿ñuxãcü chi ningü i Tupanaärü ore i ümatüxü i nüxü ixuxü na choma rü tá chayuxü? ⁵⁵ Rü yexguma ga Ngechuchu rü ñanagürü nüxü ga yema duüxüügü: —¿Tüxcüü taragü rü naixmenëxãgümaã chauxcëx nuã pexi na choxü peyarüyaxgüxücëx ñoma wüxi i ngftëxãxü chixürüü? Rü guxü ga ngunexügu rü tupauca ga taxünewa changuxêëtae natürü taguma yexma choxü piyauxgü. ⁵⁶ —Natürü guxüma i ñaã ñuxma ngupetüxü, rü ngëmaãcü nangupetü na yanguxücëx i Tupanaärü ore ga nuxcümaügüxü ga norü

orearü uruüügü ümatügüxü —ñanagürü. Rü yexguma ga guxüma ga norü ngüexüügü rü nüxna nibuxmü. Rü nüxīcatama yéma nanatēxgü ga Ngechuchu.

Āëxgacügü ga taxügüpēxewa Ngechuchuxü nagagü
(Mr 14.53-65; Lc 22.54-55, 63-71; Cu 18.12-14, 19-24)

⁵⁷ Rü Caipá ga paigüarü āëxgacüxütawa Ngechuchuxü nagagü ga yema duüxüügü ga yayauxgüxü. Rü yexma nixī ga nangutaquēxegüxü ga ngüexēruüügü ga ore ga mugüwa ngüxēētaegüxü rü Yüdügüarü āëxgacügüerugü. ⁵⁸ Natürü ga Pedru rü yaxügu nawe nixāchigü ñuxmata paigüarü āëxgacü ga Caipáxütawa nangu. Rü purichīagü ga tupaucarü dauruügümaā yéma īāxtüwa narüto, yerü nüxü nadauxchaü ga tacü tá Ngechuchumaā na naxüexü. ⁵⁹ Rü ga paigüarü āëxgacügü rü guxüma ga Yüdügüarü āëxgacügüerugü rü naxcēx nadaugü ga wüxi ga ore ga doramare ixīxü na yemamaā Ngechuchuxü īnaxuaxüügüxütēx na yamēxgüāxütēx. ⁶⁰⁻⁶¹ Natürü woo muxüma ga duüxüügü doraxümare nachigaxü yéma yarüxugüe, natürü taxüma ga chixexü inayangaugü ga naxcēx tá yamēxgüāxü. Rü düxwa yéma naxī ga taxre ga yatügü ga doraxümare yéma yarüxugüxü. Rü ñanagürügü: —Toma nüxü taxīnūē i ñāā yatü rü ñanagürü:

“Tá nagu chapogü ya daa tupauca ya taxüne ya Tupanaärü, rü tomaēxpüx i ngunexügu tá wenaxärü íchanadaxēē”, ñanagürügü. ⁶² Rü yexguma ga paigüarü āëxgacü ga Caipá rü inachi, rü ñanagürü Ngechuchuxü: —¿Rü tacümaā cunangāxü i ñuxmax? ¿Rü ñuxü ñaxü yīixü i ngēma cuchiga i nüxü yaxugüügüxü? —ñanagürü. ⁶³ Natürü ga Ngechuchu rü nangeēxmare. Rü yemacēx ga paigüarü āëxgacü ga Caipá rü ñanagürü nüxü: —Tupana ya Maxücüegagu chanaxwēxe i aixcūma tomaā nüxü quixu na texé quiixü. ¿Rü cuma ēxna i Cristu ya Tupana Nane quiixü, rü ēxna tama? —ñanagürü.

⁶⁴ Rü Ngechuchu nanangāxü rü ñanagürü: —Ngü, rü ngēma nüxü quixuxü chixī. Rü pemaā nüxü chixu rü tá choxü pedaugü i ngēxguma Chaunatü ya Poracüxütawa charütoꝝgu rü ngēxguma caixanexügu wenaxärü nūma chaxüxgu —ñanagürü. ⁶⁵ Rü yexguma ga paigüarü āëxgacü rü norü numaa nügüchirugu nagaugü. Rü ñanagürü: —Rü ñāā yatü rü tacü Tupanamaā nixugü. Rü taxucēxma marü tanaxwēxe i ñuxma i to i ore na napoxcuxücēx i ñāā yatü. Rü pematama marü nüxü pexīnūē na ñuxācū chixexümaā na yadexaxü. ⁶⁶ —¿Ñuxü ñapegüxü i pemax? —ñanagürü. Rü nūmagü ga togü ga āëxgacügü rü nanangāxüügü rü ñanagürügü: —Ngēmaācū chixexü naxü. Rü name nixī i noxtacüma nayu —ñanagürügü. ⁶⁷ Rü yexguma rü Ngechuchuchiwewa naꝥuaixgüe. Rü nüxna nanaꝥuaixcagü. Rü togü rü nanapegüchiwegü. ⁶⁸ Rü ñanagürügü: —Pa Cristux, ¡nüxü nacüex na texé cuxü pegüchiwegüxü rü cuxna naꝥuaixcagüxü! —ñanagürügü.

Pedru rü tama nügü nixu na Ngechuchuxü nacuáxü
(Mr 14.66-72; Lc 22.56-62; Cu 18.15-18, 25-27)

⁶⁹ Rü yoxni ga Pedru rü āëxgacüpataēxtüwa narüto. Rü wüxi ga pacü ga āëxgacüarü duüxü ixīcū, rü Pedrucēx iyaxü. Rü ngīgürügü nüxü: —Cuma rü ta namücü quixī i ngēma Ngechuchu i Garirēaanecüāx —ngīgürügü. ⁷⁰ Natürü ga Pedru rü guxü ga yema duüxüügüpēxewa rü tama nügü nixu na Ngechucharü duüxü yīixü, rü ñanagürü: —Choma rü tama nüxü chacuēx i tacüchiga nixī i ngēma nüxü quixuxü —ñanagürü. ⁷¹ Rü yexguma marü yema īpataēxtüarü īāxwa īnaxüüxgu ga Pedru, rü naī ga pacü nüxü idau. Rü ngīgürügü namaā ga yema duüxüügü ga yéma yexmagüxü: —Ñāā yatü rü

Ngechuchu ya Nacharétucūāxmücü nixī —ngīgürügü. ⁷² Natürü ga Pedru rü wenaxärü tama nügü nixu na Ngechuchuarü duūxū yīixū. Rū ñanagürü: — Choma rü tama nüxū chacuèx i ngēma yatü. Rü Tupana choxū poxcux ega tama aixcūma yixīgu i chorü ore —ñanagürü. ⁷³ Rū yixcamaxūra rü yema duūxügü ga yēma yexmagüxū rü Pedrucèx naxī, rü ñanagürügü nüxū: — Aixcūma nixī i cuma rü ta rü ngēma Ngechuchutanūxū quiixū, erü wüxi i Gariréaanecūāx idexaxürüü quidexa —ñanagürügü. ⁷⁴ Rū nūma ga Pedru rü poraäcū nügü nixā, rü ñanagürü nüxū: —Rü aixcūma tama nüxū chacuèx i ngēma yatü. Rū ngēxguma doraxū chixuxgu rü Tupana choxū poxcux —ñanagürü. Rü yexgumatama nica ga otā. ⁷⁵ Rū nūma ga Pedru rü yexguma nüxna nacuèxachi ga yema ore ga Ngechuchu namaā nüxū ixuxū ga ñaxū:

“Rü naxūpa na otā içaxū, rü cuma rü tomaēxpūxcūna cugü tá quixā na chorü duūxū quiixū”, ñaxū. Rü yēma inaxūxū ga Pedru rü poraäcūxūchima naxaxu.

27

Yudiügarü äëxgacügü rü Piratuxūtawa nanagagü ga Ngechuchu

(Mr 15.1; Lc 23.1-2; Cu 18.28-32)

¹ Rū yexguma yangunegu rü guxūma ga paigüarü äëxgacügü rü Yudiügarü äëxgacügüerugü, rü nügūmaā nanamexēēgü na ñuxācū Ngechuchuxū yamëxgüxū. ² Rū nayanëixgüchacüügü rü yemaäcū äëxgacü ga Piratuxūtawa nanagagü. Piratu nixī ga Dumacūāx ga äëxgacü ga Yudéaanemaā icuäcü.

Nayu ga Yuda

³ Rū nūma ga Yuda ga Ngechuchuxū iyaxuaxūxū rü nüxū nadau ga Ngechuchuxū na napoxcuxū. Rü poraäcū nagu narüxīnū ga yema chixexū ga nūmatama naxūxū. Rü yēma naxū naxūtawa ga yema paigüarü äëxgacügü rü yema Yudiügarü äëxgacügüerugü. Rü ngixū nayataeguxēē ga yema 30 tachinü ga dīeru ga nüxna ngixū naxāgücü. ⁴ Rū ñanagürü nüxū: — Choma rü marü chixexū chaxü, erü naēchita íchayaxuaxū i wüxi i yatü i taxuūma i chixexū üxū, rü ñuxma rü tá ngēmagagu nayu —ñanagürü. Natürü nūmagü ga äëxgacügü rü nanangāxügü, rü ñanagürügü: —Toma rü tama nüxū tacuáxchaū i ngēma. Cugagutama nixī, rü cuma i nüxū cucuáxū na ñuxācū cugūmaā cunamexēēxū i ngēma —ñanagürügü. ⁵ Rū yexguma ga Yuda rü yexma tupauca ga taxūnechiāgu ngixū nawotanü ga yema dīeru. Rü ñuxūchi ínixū rü nügü nayawēxnaxā. ⁶ Rū ga paigüarü äëxgacügü rü ngixū nade ga yema dīeru. Rū ñanagürügü: —Taxucürüwa tupauca ya taxūneärü dīeruchiügu ngixū tanu i ñaā dīeru, erü ngēmamaā tanaxütanü i ngēma yatü i tá yuxū —ñanagürügü. ⁷ Rū ñuxūchi nügūmaā nanamexēēgü na yema dīerumaā naxcèx nataxegüxcèx ga wüxi ga naāne ga waixūmü ga üwechixū nawa nayauxgüxū. Rü yema naānecèx nataxegü na nüxū nayexmaxücèx ga nachica ga ngexta na natëxgüāxücèx ga yema duūxügü ga togü ga nachiūānecūāx ixīgüxū. ⁸ Rū ngēmacèx i ñuxma rü ta i ngēma naāne rü Nagüchitaūgu naxāega. ⁹ Rū yemaäcū ningu ga Tupanaärü ore ga nuxcūmaäcü ga norü orearü uruū ga Yeremíā umatüxū ga ñaxū:

“Rü nūmagü ngixū nade ga yema 30 tachinü ga dīeru ga Cristutanü Yudiügü ngixū ixāgücü. ¹⁰ Rū yema dīerumaā naxcèx nataxegü ga wüxi ga naāne ga waixūmü ga üwechixū nawa nayauxgüxū, yema Cori ga Tupana chomaā nüxū ixuxürüü”

ñaxũ.

Piratupëxewa nayexma ga Ngechuchu
(Mr 15.2-5; Lc 23.3-5; Cu 18.33-38)

¹¹ Rũ ãëxgacũ ga Piratuxũtawa Ngechuchuxũ nagagũ. Rũ nüma ga Piratu rũ Ngechuchuna naca, rũ ñanagũrũ: —¿Cuma quixũ i Yudiũgũarũ ãëxgacũ ya tacũ? —ñanagũrũ. Rũ Ngechuchu nanangãxũ, rũ ñanagũrũ: —Ngũ, rũ ngẽma nüxũ quixuxũ chixĩ i chomax —ñanagũrũ. ¹² Rũ Ngechuchuxũ ñaxuxũgũ ga paigũarũ ãëxgacũgũ rũ Yudiũgũarũ ãëxgacũgũerugũ. Natũrũ ga Ngechuchu rũ taxuxũmaãma nanangãxũ. ¹³ Rũ yexguma ga Piratu rũ ñanagũrũ: —¿Tama ëxna nüxũ cuxĩnũ i ngẽma ore i namaã cuxũ ñaxuxũgũxũ? —ñanagũrũ. ¹⁴ Natũrũ ga Ngechuchu rũ taxuxũmaãma nanangãxũ. Rũ yemacëx poraãcũ nabëixãchiãë ga ãëxgacũ ga Piratu.

Piratu rũ Ngechuchumaã nanaxuegu na nayuxũcëx
(Mr 15.6-20; Lc 23.13-25; Cu 18.38-19.16)

¹⁵ Rũ guxũguma ga yema Ũpetũchigaarũ petagu, rũ Piratu ñananguxuchixëëxũ ga wũxi ga poxcuxũ ga duũxũgũ naxcëx ñcagũxũ, yerũ yema nixĩ ga nacũma. ¹⁶ Rũ yẽma nayexma ga wũxi ga poxcuxũ ga guxũ ga duũxũgũ meã nüxũ cuãxũ. Rũ Barabã nixĩ ga naega. ¹⁷ Rũ yexguma yẽma nangutaquëxegũ ga duũxũgũ, rũ Piratu nüxna naca, rũ ñanagũrũ: —¿Rũ ngexũrũxũxũ i penaxwãexũ na ñchananguxuchixëëxũ? ¿Penaxwëxexũ na Barabãxũ ñchananguxuchixëëxũ rũ ëxna Ngechuchu i Cristumaã naxugũxũxũ ñchananguxuchixëëxũ? —ñanagũrũ. ¹⁸ Rũ yema ñanagũrũ ga Piratu yerũ nüxũ nacuëx na Ngechuchuchi naxaïexũ ga Yudiũgũarũ ãëxgacũgũ, rũ yemacëx nixĩ ga naxũtawa nagagũãxũ. ¹⁹ Rũ yexguma norũ tochicawa natoxgu ga Piratu, rũ naxmëx yẽma imuga, rũ ngĩgũrũgũ: —Tama name i cunapoxcu i ngẽma yatũ i taxuũma i chixexũ ùxũ. Yerũ nagagu ñe chũtacũ rũ poraãcũ chachixenegũ —ngĩgũrũgũ. ²⁰ Natũrũ yema paigũarũ ãëxgacũgũ rũ Yudiũgũarũ ãëxgacũgũerugũ, rũ duũxũgũxũ naxucuxëgũ na naxcëx ñcagũxũcëx na Barabãxũ ñanguxuchixëëxũcëx rũ Ngechuchuxũ na nayuxëëgũxũcëx. ²¹ Rũ ãëxgacũ ga Piratu rũ wenaxãrũ duũxũgũna naca, rũ ñanagũrũ: —¿Ngëxũrũxũxũ i ngẽma taxrewa i pema penaxwëxexũ na ñchananguxuchixëëxũ? —ñanagũrũ. Rũ nümagũ ga duũxũgũ nanangãxũgũ, rũ ñanagũrũgũ: —Tanaxwëxe i Barabãxũ ñcunguxuchixëë —ñanagũrũgũ. ²² Rũ yexguma ga ãëxgacũ ga Piratu rũ nüxna naca, rũ ñanagũrũ: —¿Tacũ tá chaxũxũ namaã i ngẽma Ngechuchu i Cristugu ãegaxũ? —ñanagũrũ. Rũ guxũma ga duũxũgũ rũ nanangãxũgũ, rũ ñanagũrũgũ: —¿Curuchawa yapota! —ñanagũrũgũ. ²³ Rũ yexguma ga Piratu rũ ñanagũrũ nüxũ: —¿Natũrũ tacũ rũ chixexũ naxũ? —ñanagũrũ. Natũrũ ga nümagũ ga duũxũgũ rũ wenaxãrũ tagaãcũ ñanagũrũgũ: —¿Curuchawa yapota! —ñanagũrũgũ. ²⁴ Rũ yexguma Piratu nüxũ dëuxgu ga marũ taxucũrũwama Ngechuchuxũ na ñanguxuchixëëgaxũ, yerũ ga duũxũgũ rũ marũ nanaxixãchiãëgũchãũ, rũ yemacëx wũxi ga norũ duũxũxũ namu ga dexã naxũtawa na tanangexũcëx. Rũ nügũ nayauxmëx ga Piratu napëxewa ga guxũma ga yema duũxũgũ. Rũ ñanagũrũ: —Tama chaugagu tá nixĩ i na nayuxũ i ñaã yatũ i taxuũma i chixexũ ùxũ, rũ pegagu tátama nixĩ —ñanagũrũ. ²⁵ Rũ guxũma ga yema duũxũgũ nanangãxũgũ, rũ ñanagũrũgũ: —Togagu rũ toxocũgũgagu tá nixĩ i nayuxũ —ñanagũrũgũ. ²⁶ Rũ yexguma ga Piratu rũ Barabãxũ ñanguxuchixëë. Rũ ñuxũchi norũ churaragũxũ namu na Ngechuchuxũ

naçuaixgüxüçêx, rü yemawena curuchawa na yanapotagüäxüçêx. ²⁷ Rü ñuxüchi ga yema churaragü rü Piratupataarü aixepewa Ngechuchuxü nagagü. Rü yexma Ngechuchuxütagu nanangutaquêxexêê ga guxüma ga churaragü. ²⁸ Rü ñuxüchi Ngechuchuxü inaçuxuchigü, rü wüxi ga máxü ga naxchiru ga dauxügu nayaçuxêêgü. ²⁹ Rü naêruwa nayangêxuchigü ga wüxi ga boxü ga chuchuxüta naxügüxü. Rü wüxi ga naïxmenêxâxâcüxü nüxü nayayauxâchixêê ga norü tügünemêxêwa. Rü ñuxüchi napêxegu nacaxâpüxügü, rü nüxü nacugüe, rü ñanagürügü: —¡Namaüx ya Yudiügarü Äêxgacü ya Tacü! —ñanagürügü. ³⁰ Rü nüxna naçuaixgüe. Rü nüxna nanayauxgü ga guma naïxmenêxâxâcü, rü naêruwa namaã nanaçuaixcagü. ³¹ Rü yexguma nüxü nacugüeguwena rü inaçuxuchigü ga yema naxchiru ga daucharaxü. Rü wenaxârü naxchirugutama nayaçuxêêgü. Rü ñuxüchi nayagü na curuchawa yanapotagüäxüçêx.

Ngechuchuxü curuchawa nipotagü
(Mr 15.21-32; Lc 23.26-43; Cu 19.17-27)

³² Rü yexguma yéma inaxiächigu, rü nüxü nadaugü ga wüxi ga yatü ga Chirêneçüäx ga Chimäügu äegacü. Rü guma yatüxü ngixü iningexêêgü ga Ngechucharü curucha. ³³ Rü nawa nangugü ga wüxi ga nachica ga Gôrgutagu äegaxü. Rü ngêma naega rü Duüxêêruchinêxâ ñaxüchiga nixi. ³⁴ Rü nüxna nanaxägü ga binu ga ngüxüârü naächixêêruümaã äexüçü na yaxaxâxüçêx. Rü Ngechuchu nüxü naxaxneta, natürü tama nayaxaxü. ³⁵ Rü yexguma marü curuchawa yapotagüäxguwena rü ga churaragü rü nanade ga Ngechuchuchiru. Rü ñuxüchi wüxi ga diêru ngixü nañanagügü na yemawa nüxü nacüêgüxüçêx na ñacü tá nayaxuxü ga wüxichigü. ³⁶ Rü ñuxüchi yéma narütögü ga churaragü na Ngechuchuna yéma nadaugüxüçêx. ³⁷ Rü norü curuchatapêxewa nayapocuchi ga wüxi ga mürapewa ga äegatachinüxü ga nüxü ixuxü ga ñacüçêx Ngechuchuxü curuchawa na yapotagüxü. Rü ñanagürü: “Ñaa nixi i Ngechuchu i Yudiügarü Äêxgacü ya Tacü”, ñanagürü. ³⁸ Rü yexgumarü ta curuchawa nayapotagü ga taxre ga máêtagüxü. Rü wüxi rü Ngechucharü tügünecüwawa naxü, rü to ga norü toxwecüwawa. ³⁹⁻⁴⁰ Rü yema duüxügü ga yéma chopetüxü, rü Ngechuchumaã naguxchigagü, rü nanexâêrugüäcuma ñanagürügü: —Düçêx, cuma cunangutaüxêêega ya tupauca ya taxüne, rü tomaêxpüx i ngunexügu wenaxârü ícunadaxêêega. ¡Cugütama namaxêê i ñuxmax! Rü ngêxguma chi aixcüma Tupana Nane quixügu, rü jürüxü i curuchawa! —ñanagürügü. ⁴¹ Rü yexgumarü ta Ngechuchuxü nacugüecüraxü ga paigüarü äêxgacügü, rü ngüxêêruügü ga ore ga mugüwa nguxêêtaegüxü, rü Parichêügü, rü Yudiügarü äêxgacügüerugü. Rü nügümaã ñanagürügü: ⁴² —Rü nüma rü togüxü namaxêêê natürü i ñuxma rü tama nüxü nacüex na nügütama namaxêêxü. Rü ngêxguma chi aixcüma Yudiügarü äêxgacü yixügu, jrü ñuxma rü inaxix i curuchawa na nüxü yaxögüxüçêx! ⁴³ —Rü nüma nagu naxinügu rü Tupana tá nüxü narüngüxêê. Êcü, ñuxma rü Tupana nüxü rüngüxêêx ega aixcüma nüxü nangüxêêchaügu. ¿Tama êxna nümatama tamaã nüxü yaxuxü na Tupana Nane yiixü? —ñanagürügü. ⁴⁴ Rü woo ga yema máêtagüxü ga naxrü curuchawa ipotagüxü, rü namaã naguxchigagü.

Nayu ga Ngechuchu
(Mr 15.33-41; Lc 23.44-49; Cu 19.28-30)

45 Rū yexguma rū guxū ga naānēwa naxēāne. Rū tocuchigu inaxūgū ga yema űuxmata tomaēxpūxarū orawa nangu ga yáuanecū. 46 Rū yema tomaēxpūxarū oragu nixī ga Ngechuchu ga tagaācū aita naxūxū, rū űaxū: —Eri, Eri, ¿damá chabátani? —űanagūrū. Rū ngēma rū űaxūchiga nixī:

“Pa Chorū Tupana, Pa Chorū Tupanax, ¿tūxcūū choxna quixūgachixū?” űaxūchiga nixī. 47 Rū nūmaxū ga duūxūgū ga yéma yexmagūxū rū nūxū naxinūē, rū űanagūrūgū: —Naā yatū rū nuxcūmaūcū ga Tupanaārū orearū uruū ga Eriacēx naca —űanagūrūgū. 48 Rū yexgumatama rū wūxi ga yema duūxūgū ga yéma yexmagūxū rū inaűaāchi rū Ngechuchuxūtawa nanange ga wūxi ga tūaxmū ga binu ga marū ngūchiēxūchicūmaā yawaixēēxū. Rū wūxi ga dexnēwa nayanēix. Rū űuxūchi Ngechuchuēxgu nanawēx na nūxū natuxuxūcēx. 49 Natūrū ga yema togū ga duūxūgū ga yéma yexmagūxū rū űanagūrūgū: —Yixrūma. Rū ngīxā itarūdaunū ngoxita Eria nuā ū na nūxū yanangūxēēxūcēx —űanagūrūgū. 50 Rū wēmaxārū tagaācū aita naxū ga Ngechuchu, rū űuxūchi nayu. 51 Rū yexgumatama ga tupauca ga taxūnēārū tūyemachiāxū rū faxregu narūgaute. Rū daxūwa inanaxūgū ga na nagautexū rū űuxmata űaxtūwa nangu. Rū naxīāxāchiane, rū narūngūxtēgū ga nutagū ga itacū. 52 Rū yuetamaūgū rū ningenagū. Rū wēna namaxē ga muxūma ga duūxūgū ga yuechirēxū ga Tupanaāxū yaxōgūxū. 53 Rū yexguma Ngechuchu wēna maūxuwēna, rū naxmaūwa ínaxoxū ga yema duūxūgū ga wēna maxēxū. Rū Yerucharēūwa naxī. Rū muxūma ga duūxūgū nūxū nadaugū. 54 Rū yema churaragūarū āēxgacū rū norū churaragū ga Ngechuchuna ídaugūxū, rū nūxū nadaugū ga na naxīāxāchianēxū rū guxūma ga yema ngupetūxū. Rū yexguma rū poraācū namuūē, rū űanagūrūgū: —Aixcūma nixī ya daa yatū i Tupana Nane na yīixū —űanagūrūgū. 55 Rū iyexmagū ga mucūma ga ngecūgū ga yéma yaxūwa nūxū rūdaunūcū. Rū yema ngecūgū iyixī ga Ngechuchuxū íxūmūcūgūcū rū nūxū rūngūxēēgūcū ga yexguma Garirēaanēwa ne naxūxgu. 56 Rū yema ngecūgūtanūwa iyexma ga María ga Magadácūāx, rū María ga Chaūtiāgu rū Yúche naē, rū Zebedéu namēx ga Chaūtiāgu rū Cuāū naē.

*Ngechuchu rū naxmaūgu nayaxūcuchigū
(Mr 15.42-47; Lc 23.50-56; Cu 19.38-42)*

57 Rū yexguma marū nachūtachaūgu, rū yéma nangu ga wūxi ga yatū ga Arimatéacūāx ga taarū díēruācū ga Yúchegu āegacū. Rū nūma rū ta Ngechuchuaxū nayaxō. 58 Rū nūma rū Piratuna nayaca rū ngoxita name na nayauxāxū ga Ngechuchuxūne ga curuchawa. Rū Piratu norū churaragūxū namu na nūxna naxāgūāxūcēx ga Ngechuchuxūne. 59 Rū Yúche nanayaxu ga Ngechuchuxūne ga curuchawa. Rū wūxi ga naxchāpenūū ga ngēmataxūmaā nananuque. 60 Rū yema naxmaū ga yexwacaxūxū ga Yúche nūgūcēxtama duūxūgūxū yacaxmaxēēxū ga nuta ga tacūarū mēxpūxūwa yexmaxūgu nayaxūcuchi ga Ngechuchuxūne. Rū űuxūchi nanangūxtaū namaā ga wūxi ga nuta ga taxūchicū. Rū yemawēna rū ínixū. 61 Rū yéma Ngechuchumaūārū toxmēxtawa irūtogū ga María ga Magadácūāx rū naī ga María.

Purichiaqū nūxna nadaugū ga yema naxmaū ga Ngechuchuxū nagu yaxūcuchigūxū

62 Rū moxūācū ga ngūxchigaarū ngunēxūgu rū paigūarū āēxgacūgū rū Parichēugū rū yéma Piratuxūtawa naxī. 63 Rū űanagūrūgū nūxū: —Pa Corix,

nüxna tacuèxâchie ga yema yatü ga Ngechuchu ga idoratèxâxü rü yexguma namaüxgu rü ñanagürü tomaã:

“Ngëxguma chayuxgu rü tomaëxpüx i ngunexüguwena rü wena táxarü ícharüda”, ñanagürü tomaã. ⁶⁴—Rü ngëmacëx tanaxwëxe i churaragü ngema cumugü na nüxna yadaugüxcëx i ngëma naxmaü ñuxmatáta tomaëxpüx i ngunexüwa nangu na tama chütacü ngema naxüxcëx i norü ngüexügü na yayauxgüâxüxcëx i naxüne rü ñuxüchi duüxügümaã nüxü na yaxugüxcëx na marü wena namaxüxü. Erü ngëxguma chi ngëmaacü naxüpetügu, rü noxriarü yexera tá nixi na duüxügüxü nawomüxëëxü —ñanagürügü. ⁶⁵ Rü Piratu ñanagürü nüxü: —Ngëãgü nixi i churaragü i pexcëx. ¡Ëcü ngema namaã pexi na meãma pema penaxwëxexüâcüma nüxna pedaugüxcëx i naxmaü! —ñanagürü. ⁶⁶ Rü yema churaragümaã yëma naxi, rü meãma nayataixëëgü ga guma nuta ga Ngechuchumaxü namaã rüngüxtatücü. Rü nanaxüarü cuëxruüâxgü na taxüema naëchita ínaxügachigüxcëx ga guma nuta. Rü ñuxüchi yexma nanamugü ga churaragü na nüxna nadaugüxcëx.

28

Yuwa ínarüda ga Ngechuchu

(Mr 16.1-8; Lc 24.1-12; Cu 20.1-10)

¹ Rü sabaduarü ngunexüguwena ga yüxüarü pëxmama, rü yëma naxmaüwa íyadaugü ga María ga Magadácüâx rü naí ga María. ² Rü ngürüâchi poraãcü naxiâxâchiane, yerü wüxi ga daxücüâx ga Cori ga Tupanaärü orearü ngeruü ínarüxi, rü naxmaüwa nangu rü ínanangüxgachi ga guma nuta ga namaã nangüxtatücü ga yema naxmaü. Rü ñuxüchi guma nutaétüwa narüto. ³ Rü yema orearü ngeruü rü wüxi ga bëixbëxanexürüü niyauracüü. Rü nacómüxüchi ga naxchiru. ⁴ Rü yexguma yemaxü nadaugügu ga churaragü rü norü muümaã niduruxe, rü yexma niyuâchitanü. ⁵ Rü yexguma ga yema orearü ngeruü, rü ñanagürü ngixü ga yema ngecügü: —¡Tâxü i pemuüëxü! Choma nüxü chacuèx rü naxcëx pedaugü ya Ngechuchu ga guma curuchawa yapotagüâcü. ⁶ Nataxuma i nuã, erü marü wena namaxü, yema nüma üpa pemaã nüxü yaxuxürüü. ¡Rü nuã pexi, rü ípeyadëux i naxmaü i ngëma ínaxügüâxüwa ga naxüne! ⁷ ¡Rü paxa ípixi, rü norü ngüexügümaã nüxü peyarüxugüe rü marü ínarüda rü wena namaxü ya Ngechuchu! Rü ñuxma rü marü pexüpa nüxüra Garirëaanewa naxü i nümax. Rü ngëma tá nixi i nüxü peyadauxü. Rü ngëma nixi i ore i pemaã nüxü chayarüxuxü —ñanagürü. ⁸ Rü yexguma ga yema ngecügü rü paxama nüxna íyaxi ga yema naxmaü. Rü imuüë, natürü itaëgü ta. Rü poraãcü íixüâchi na Ngechuchuarü ngüexügümaã nüxü na yanaxugüxcëx ga yema ore ga daxücüâx ngímaã nüxü íxuxü. ⁹ Rü yexguma ínaxüâchiyane, rü ngürüâchi yëma ngíxcëx nangox ga Ngechuchu, rü ngixü narümoxë. Rü ngímagü rü Ngechuchucëx iyabuxmü rü nüxü iyacuëxüügü, rü naparawa ínëixâchitanü. ¹⁰ Rü nüma ga Ngechuchu rü ñanagürü ngixügü: —¡Tâxü i pemuüëxü! ¡Rü ípixi rü chaueneëgü i chorü ngüexügümaã nüxü peyarüxu rü Garirëaanewa naxi! Rü ngëma tá nixi i choxü nadaugüxü —ñanagürü.

Churaragü rü paigüarü âëxgacügümaã nüxü nayarüxugüe ga yema ngupetüxü

¹¹ Rü yexguma ga yema ngecügü rü namagu naxiyane, rü ñuxre ga churaragü ga yëma naxmaüwa dauxütaegüxü rü Yerucharéüwa naxi. Rü paigüarü âëxgacügümaã nüxü nayarüxugüe ga guxüma ga yema ngupetüxü.

¹² Rū yema paigüarü ãëxgacügü rü namaã nayarüdexagü ga Yudíugüarü ãëxgacügüerugü. Rū nügümaa nanamexëëgü ga tacümaa tá churaragüxü na yaxucuxëgüxü. Rū ñuxüchi nüxna ngixü naxägü ga tacü ga dïeru. ¹³ Rū namaã nüxü nixugüe rü ñanagürügü: —¡Pema rü ñaperügügü tá:

“Ngëxguma chütacü tapeeyane, rü norü ngüexügü toechita ngema naxï rü nayayauxgü ga naxüne” ñaperügügü tá! ¹⁴ Rū ngëxguma ãëxgacü ya Piratu tá nüxü cuëxgu i ngëma ngupetüxü, rü toma rü tá namaã tidexagü rü namaã tá tanamexëë na taxuüma pemaã naxüxüçëx —ñanagürügü. ¹⁵ Rū yexguma ga yema churaragü rü ngixü nayauxgü ga yema dïeru. Rū yema ãëxgacügü namaã nüxü ixugüxürüü duüxügümaa nüxü nixugüe. Rū ñuxma rü ta ngëmatama dexa nixï i nüxü yaxugüxü i Yudíugü.

Ngechuchu nanamu ga norü ngüexügü

(Mr 16.14-18; Lc 24.36-49; Cu 20.19-23)

¹⁶ Rū yema 11 ga Ngechuchuarü ngüexügü rü Gariréa- anewa naxï ga guma mëxpüne ga Ngechuchu namaã nüxü ixuxünewa. ¹⁷ Rū yexguma Ngechuchuxü nadaugügu rü nüxü nicuëxüügü, woo ñuxre ga norü ngüexügü rü tama aixcüma nayaxögü na Ngechuchu yïixü. ¹⁸ Rū yexguma ga Ngechuchu rü naxçëx nixü, rü ñanagürü nüxü: —Tupana rü ãëxgacüxü choxü nixixëë i guxü i daxügüxü i naãnewa rü guxü i ñoma i naãnewa. ¹⁹ —Rü ñuxma rü chanaxwëxe i guxü i nachiüãnewa pexï i guxü i duüxügütanüwa. ¡Rü chorü duüxügüxü peyaxígüxëëx! ¡Rü ípenabaiüxëëx chauégagu rü Chaunatüégagu rü Naãë i Üünexüëgagu! ²⁰ ¡Rü penangüexëëx na naga naxinüëxüçëx i guxüma i ngëma pexü chamuxü! ¡Rü dücax, guxügutáma pexütawa changëxmaëcha ñuxmatáta nagü i naãne! —ñanagürü ga Ngechuchu.

ORE I MEXÜ GA MARCU ÜMATÜXÜ

Cuáü ga baiüxëëruü nüxü nixu ga Tupanaärü ore ga dauxchitawa ga ngextá taxúema íxãpataxüwa

(Mt 3.1-12; Lc 3.1-9, 15-17; Cu 1.9-28)

¹ Ñaã nixi i norü ügü i ore i mexü ya Ngechuchu ya Cristu ya Tupana Nanechiga. ² Rü nuxcümaücü ga Tupanaärü orearü uruü ga Ichaxía ümatüxü ga Tupanaärü ore, rü ñanagürü:

“Cupëxegu chayamu i chorü orearü ngeruü na namexëëãxüçëx i cumaü. ³ Rü dauxchitawa i ngextá taxúema íxãpataxüwa rü tá nangëxma i wüxi i duüxü i ngema tagaäcü ñaxü: ‘¡Pegü pemexëëx naxcëx ya Cori. Rü naxcëx ipeyanawëxãchixëëx i perü maxü!’ ”

ñaxü tá. ⁴ Rü Cuáü rü dauxchitawa ga ngextá taxúema íxãpataxüwa nangox rü yéma ínanabaiüxëë ga duüxügü. Rü namaã nüxü nixu ga na namexü na Tupanacëx nadaugüxü rü ínbaiüxü na Tupana nüxü nüxü nangechaüxüçëx ga norü pecadugü. ⁵ Rü guxüma ga duüxügü ga Yudéanecüãx rü iãne ga Yerucharëüçüãx rü yéma Cuáüxütawa naxüxü ga na nüxü iyanaxínüëxüçëx. Rü nümagü rü norü pecadugüxü yéma nayarüxügüxü, rü Cuáü rü natü ga Yudáüwa ínayabaiüxëëtanü. ⁶ Rü naxchiru ga Cuáü rü cameyutëxanacëx nixi, rü norü goyëxü rü naxchëxmünaxcëx nixi. Rü beruremaã rü munümaã naxãwemü. ⁷ Rü Cuáü rü yema nüxü yaxuxü ga orewa, rü ñanagürü: — Choweama tá ne naxü ya choxü rüyexeracü. Rü choma rü taxuwama chame rü bai na ichayarümaxãchixü na íchayawëxüçëx i norü chapatucunügü. ⁸ — Choma rü dexáwamare pexü íchabaiüxëë, natürü nüma rü tá Tupanaãe i Üünexü pexna nanguxëë —ñanagürü ga Cuáü.

Ngechuchuarü baiechiga

(Mt 3.13-17; Lc 3.21-22)

⁹ Rü yema ngunexügü, rü Ngechuchu rü ínaxüxü nawa ga guma iãne ga Nacharétu ga Gariréaanewa yexmane. Rü Cuáü rü natü ga Yudáüwa ínanabaixëë. ¹⁰ Rü yexguma dexáwa ínaxüãchigu, rü Ngechuchu nüxü nadau ga na yangenaxü ga daxüwa. Rü yema Tupanaãe i Üünexü rü wüxi ga muxtucurüü ínanago, rü Ngechuchuna nangu. ¹¹ Rü daxüwa ínanaxü ga wüxi ga naga ga ñaxü: —Cuma nixi i Chaune i cuxü changechaüxüchixü rü cumaã chataëxüchixü —ñaxü.

Ngechuchuxü naxü ga Chataná

(Mt. 4.1-11; Lc 4.1-13)

¹² Rü yemawena rü Tupanaãe i Üünexü rü dauxchitawa ga ngextá taxúema íxãpataxüwa Ngechuchuxü naga. ¹³ Rü yéma nayexma ga 40 ga ngunexü. Rü naëügü ga idüraexü íyexmagüxüwa nayexma, rü ngoxo ga Chataná rü nüxü naxü. Natürü Tupanaärü orearü ngerüügü ga daxüçüãx rü Ngechuchuxü narüngüxëëgü.

Ngechuchu rü Gariréaanewa ínanaxügü ga norü puracü

(Mt 4.12-17; Lc 4.14-15)

¹⁴ Rü nawena ga poxcupataügu na napoxcuxü ga Cuáü, rü Gariréaanewa naxü ga Ngechuchu na naxunagüãxüçëx ga Tupanaärü ore i mexü. ¹⁵ Rü ñanagürü: —Marü nawa nangu i ngunexü ga Tupana naga unetaxü, rü

pexcèx ningaica na perü ãëxgacü na yîixü. ¡Rü ñuxma rü name nixî i Tupanacèx pedaugü rü peyaxögü i ngëma norü ore i mexü! —ñanagürü.

Ngechuchu rü ägümücü ga püchaetanüxcèx naca
(Mt 4.18-22; Lc 5.1-11)

¹⁶ Rü yexguma naxtaxa ga Gariréaanacügu yaxūxgu ga Ngechuchu, rü yéma nüxü nadau ga Chimáü rü naëneë ga Aüdré. Rü nūmagü rü woetama püchaetanüxü nixīgü rü yéma naxtaawa napüchaegü. ¹⁷ Rü Ngechuchu rü ñanagürü nüxü: —¡Chowe perüxî rü tá pexü charüngüxëë na chauxütawa penagagüxcèx i duüxügü! —ñanagürü. ¹⁸ Rü yexgumatama ga yema taxre, rü yéma nanawogü ga norü püchagü. Rü Ngechuchu narüxî. ¹⁹ Rü yéamaxüra naxü ga Ngechuchu, rü yéma nüxü nadau ga Chaütiágu rü naëneë ga Cuáü. Rü Zebedéu nanegü nixīgü ga nūmagü. Rü wüxi ga nguewa nayexmagü, rü yéma ínanangáitagü ga norü püchagü. ²⁰ Rü yexgumatama Ngechuchu naxcèx naca. Rü nūmagü rü yéma nguewa tüxü natëxgü ga nanatü ga Zebedéu namaã ga túmaärü puracütanüxügü, rü Ngechuchu narüxî.

Wüxi ga yatü ga ngoxo nawa yexmaxüchiga
(Lc 4.31-37)

²¹ Rü íâne ga Capernáüwa nangugü. Rü yexguma ngüxchigaarü ngunexüwa nanguxgu, rü Ngechuchu rü ngutaquëxepataüwa naxü rü yexma naxücu. Rü yéma ínanaxügü ga na nangüxëëtaexü. ²² Rü duüxügü rü nabëjixächiäëgü namaã ga norü nguxëëtae, yerü aixcüma Tupanaärü poramaã meã nanangüxëë rü tama ngüxëëruügü ga Moichéarü mugüwa nguxëëtaegüxürü nixî. ²³⁻²⁴ Rü guma íanéärü ngutaquëxepataüwa nayexma ga wüxi ga yatü ga ngoxo nawa yexmaxü. Rü aita yéma naxü, rü ñanagürü: —¿Tüxcüü totanüwa cuxü, Pa Ngechuchu Pa Nacharétucüãx? ¿Nuã cuxü na toxü cuyadëjüxcèx? Choma rü cuxü chacuëx na Tupana Nane ya Üünecü quiixü —ñanagürü. ²⁵ Rü Ngechuchu nüxü naxoqx ga yema ngoxo, rü ñanagürü: —¡Iyarüngeëx rü ínaxüxü nawa ya yima yatü! —ñanagürü. ²⁶ Rü yexguma ga yema ngoxo rü guma yatüxü niyuächixëë, rü tagaäcü aita naxüäcüma nawa ínaxüxü. ²⁷ Rü guxüma ga duüxügü rü nabëjixächiäëgü, rü namücügüna nicachigü rü ñanagürügü: —¿Tacü nixî i ñaã? Maneca wüxi i ngexwacaxüxü i nguxëëtae nixî. Nüma rü aixcüma Tupanaärü poramaã meã nanguxëëtae. Rü woo i ngoxogü rü naga naxínüë i ngëxguma namuãxgu —ñanagürügü. ²⁸ Rü yemaäcü nixî ga paxa guxüwama ga Gariréanewa rü Ngechuchuchigaxü nacüëxgüxü ga duüxügü.

Ngechuchu rü Chimáü ga Pedru nëxëcèx nayataanexëë
(Mt 8.14-15; Lc 4.38-39)

²⁹ Rü yexguma ngutaquëxepataüwa ínaxüxügu ga Ngechuchu, rü Chaütiágu rü Cuáümaã Chimáü rü Aüdrépatawa naxü. ³⁰ Rü Chimáü nëxë rü ngürücarewa iyexma, yerü iyaxaxüne. Rü Ngechuchumaã ngixü nixugüë. ³¹ Rü ngixcèx nixü, rü ngixmëxgu nayayauxächi, rü ngixü ínarüdaxëë. Rü yexgumatama igëuxächi ga na yaxaxünexü. Rü írüda, rü ínaxügü ga naxcèx na namexëëaxü ga ñna.

Ngechuchu rü muxüma ga idaaweexüxcèx nayataanexëë
(Mt 8.16-17; Lc 4.40-41)

³² Rü yexguma marü yanaxücuxgu ga üëxcü ga na nachütachaüxü, rü Ngechuchuxütawa nanagagü ga guxüma ga duüxügü ga idaaweexü rü guxüma ga ingoxoãxgüxü. ³³ Rü guxüma ga yema ínecüãx rü yexma

guma İpataarü İāxwa naxcèx nangutaquèxegü. ³⁴ Rū nūma nanameèxèē ga muxūma ga duūxūgü ga nagúxūraūxū ga daawemaā İdaaweexū. Rū İnanawoxū ga muxūma ga ngoxogü, natürü nüxna nanachuxu ga na yadex-agüxū, yerü nūmagü ga ngoxogü rü nüxū nacuèxgü na texè yīxū.

Ngechuchu rü nanaxunagü ga ore ga mexū ga ngutaquèxepataūwachigü (Lc 4.42-44)

³⁵ Rū ngunetūū ga tauta yangóonegu, rü inaxūāchi ga Ngechuchu. Rū İāneārü yéaxūra ga ngextá taxúema İxāpataxūwa naxū na yéamaxūra yayumūxèxūcèx. ³⁶ Rū Chimáū rü namúcügümaā Ngechuchucèx nayadaugü. ³⁷ Rū yexguma nüxū iyangaugügu, rü İnanagürügü nüxū: —Guxūma i duūxūgü rü cuxcèx nadaugü —İnanagürügü. ³⁸ Natürü ga nūma rü nanangāxū rü İnanagürü nüxū: —İNgīxā rü toxnamana taxī náigü ya İānexācügü ya ngaicamagūnewa na ngema rü ta chanaxunagūxūcèx i ore i mexū! Erü woetama ngēmacèx nixī i Capernáūārü İānewa İchaxūxūxū. ³⁹ Rū yemaācū ga Ngechuchu rü guxūma ga Gariréaanegu nixūāgūchigü. Rū wūxichigü ga İāneārü ngutaquèxepataūwa rü nüxū nixuchigü ga ore ga mexū, rü İnayawoxūētanü ga ngoxogü.

Ngechuchu rü wūxi ga rüchaxūnexūcèx nayataanexēē (Mt 8.1-4; Lc 5.12-16)

⁴⁰ Rū Ngechuchucèx nixū ga wūxi ga yatü ga chaxūnemaā İdaawecü. Rū napèxegu nayacaxāpūxūācūma İnanagürü nüxū: —Pa Corix, ngèxguma cunaxwèxegu na choxū curūmèxèēxū, rü cuxū natauxcha na chauxcèx cuyataanexèēxū —İnanagürü. ⁴¹ Rū Ngechuchuauxū nangechaūtūmūū ga guma yatü. Rū nüxū ningögü rü İnanagürü nüxū: —Ngü, chanaxwèxe. İMarü curūme! —İnanagürü. ⁴² Rū yexgumatama nüxū İnayarüxo ga na nachaxūnexū ga guma yatü. Rū meāma naxcèx nitaane. ⁴³⁻⁴⁴ Rū Ngechuchu rü yexgumatama İnayamu. Rū meāma nanaxucuxè rü İnanagürü nüxū: —İDücèx, tāxūtāma texémaā nüxū quixu! İNatürü ngema paixūtawa naxū, rü cugü nüxū yadauxèē! İRü curü mexèēcèx nüxna yaxuaxū i curü āmare ga yema Moīché tūxū muxū na nüxū nacuáxūcèx i duūxūgü na curūmèxū nawa i curü daawe! —İnanagürü. ⁴⁵ Natürü nūma ga guma yatü rü İnixū rü İnanaxūgü ga na guxāmaāma nüxū yaxuxū ga yema nüxū ngupetūxū. Rū yemacèx ga Ngechuchu rü marü taxucürüwa ngóxūwama duūxūgüpèxewa İānegügu naxūcu. Natürü dauxchitagu ga ngextá duūxūgü İtaxūxūgu narūxāūx. Rū yéma naxcèx naxūxū ga duūxūgü ga guxūānewa ne İxū.

2

Ngechuchu rü wūxi ga yatü ga nawāixāchicücèx nayataanexēē (Mt 9.1-8; Lc 5.17-26)

¹⁻² Rū yixcama ga İuxre ga ngunexūwena rü wenaxārü Capernáūārü İānegu naxūcu ga Ngechuchu. Rū yexguma duūxūgü nüxū cuáchigagügu na İpatawa nayexmaxū, rü yéma nangutaquèxegü ga muxūma ga duūxūgü. Rū dūxwa ga İāxtūwa rü nanapá. Rū nūma ga Ngechuchu rü namaā nüxū nixu ga ore i mexū. ³ Rū yéma nangugü ga āgūmücü ga yatügü ga yéma nange-taūgūxū ga wūxi ga yatü ga nawāixāchicü. ⁴ Natürü yema na namuxūchixū ga duūxūgü, rü taxucürüwama Ngechuchuxūtawa nangugü. Rū yemacèx İnanapogüētü ga Ngechuchu İyexmaxūwa ga guma İpata. Rū yéma norü caruūgu İnanachūxūetaūgü ga guma nawāixāchicü. ⁵ Rū yexguma Ngechuchu

nüxü dèuxgu ga ñuxácü aixcüma na yaxögüãxü ga yema duüxügü, rü ñanagürü nüxü ga guma nawãixächicü: —Pa Chaunex, curü pecadugü rü marü cuxü nüxü changechaü —ñanagürü. ⁶⁻⁷ Natürü ñuxre ga ngüexëëruügu ga Moïchéarü mugüwa nguxëëtaegüxü rü yéma narütogü. Rü naãëwa ñaxügu narüxñüë: —¿Ñuxácü tama namuü na ngëmaãcü yadexaxü? ¿Rü tacü Tupanamaã yaxügüxü? Erü Tupanaxícata nixi ya duüxügüarü pecaduxü ngechaücü —ñaxügu narüxñüë. ⁸ Natürü yexgumatama ga Ngechuchu rü nüxü nicuëxächi ga yema nagu naxñüëxü, rü yemacëx nüxna naca rü ñanagürü nüxü: —¿Tüxcüü ngëmagu perüxñüë i pemax? ⁹ —¿Tacü nixi i rütauchamaëxü na namaã nüxü ixuxü ya daa nawãixächicü:

“Curü pecadugü rü marü cuxü nüxü changechaü”, rü éxna:

“¡Inachi, rü nayaxu i curü caruü, rü íixü!” ñaxü? ¹⁰⁻¹¹ —Natürü ñuxma rü tá pexü nüxü chadauxëë na Chaunatü núma choxü muxü na duüxügüaxü nüxü changechaüxcëx i norü pecadugü —ñanagürü. Rü yexguma yema ñaxguwena rü guma nawãixächicüxü ñanagürü: —Cumaã nüxü chixu rü jinachi, rü nayaxu i curü caruü, rü cupatawa naxü! —ñanagürü. ¹² Rü yexgumatama inachi ga guma idaawecü. Rü nanayaxu ga norü caruü, rü ímaxüxü napëxewa ga guxüma ga yema duüxügü ga yéma yexmagüxü. Rü yemacëx ga yema duüxügü rü nabëixächiaëgü, rü Tupanaxü nicuëxügü, rü ñanagürügü: —Taguma nüxü tadau i tacü i ñaarüü íixü —ñanagürügü.

Lebícëx naca ga Ngechuchu
(Mt 9.9-13; Lc 5.27-32)

¹³ Rü yemawena rü wenaxärü naxtaacutüwa naxü ga Ngechuchu. Rü yema muxüma ga duüxügü rü naxcëx naxi. Rü núma rü nanangüexëë. ¹⁴ Rü yexguma yéma naxüpetügu ga Ngechuchu, rü yéma nüxü nadau ga Lebí ga Arupéu nane. Rü núma ga Lebí rü yéma narüto nawa ga yema nachica ga duüxügüna díëru ngíxü ínayaxuxüwa naxcëx ga Dumacüãxärü äëxgacü yerü woetama yema nixi ga norü puracü. Rü Ngechuchu rü ñanagürü nüxü: —¡Chowe rüxü! —ñanagürü. Rü inachi ga Lebí, rü nawe narüxü. ¹⁵ Rü yéma Lebípatawa nachibü ga Ngechuchu. Rü yéma nachibüë ga muxüma ga duüxügü ga Lebírüü Dumaärü äëxgacücxëx díëru ngíxü yauxgüxü. Rü nayexmagü ta ga togü ga duüxügü ga taxúema nacü mamaã taäëgüxü ga yéma mechawa rütogüxü namaã ga Ngechuchu rü norü ngüexügü. Yerü namu ga yema nawe rüíxü. ¹⁶ Rü yéma nayexmagü ta ga ñuxre ga Parichéugü rü ngüexëëruügu ga Moïchéarü mugüwa nguxëëtaegüxü. Rü yexguma nüxü nadaugüga ga yema togümaã na nachibüxü ga Ngechuchu, rü norü ngüexügüna nacagü, rü ñanagürügü: —¿Ñuxácü i perü ngüexëëruü rü namaã nachibü i äëxgacüarü duüxügü i díëruarü yauxwa puracüexü rü duüxügü i pecaduãxgüxü? —ñanagürügü. ¹⁷ Rü yexguma yemaxü naxñügu ga Ngechuchu rü ñanagürü nüxü: —Ngëma poraxü rü tama nanaxwëxë ya duturu, natürü ngëma idaawexü waxi nixi i naxwëxëxü ya duturu. Choma rü tama mexügüna na chaxuxücxëx nixi ga núma chaxüxü, natürü núma chaxü na nüxna chaxuxücxëx i pecaduãxgüxü —ñanagürü.

Ngechuchuna aurechigacëx nacagüë
(Mt 9.14-17; Lc 5.33-39)

¹⁸ Rü wüxi ga ngunexügu rü tama nachibüë yerü Tupanacëx naxauree ga Cuáü ga baiüxëëruüarü ngüexügü rü Parichéugüarü ngüexügü. Rü yemaxü nadaugüga ga ñuxre ga duüxügü, rü Ngechuchuxütawa naxi rü nüxna

nayacagüe, rü ñanagürügü: —Ngêma Cuáñârü ngúexüügü rü Parichéugüarü ngúexüügü rü naxauree. ¿Rü tüxcüü i curü ngúexüügü i tama naxaureexü? —ñanagürügü. ¹⁹ Rü Ngechuchu nanangäxü rü ñanagürü nüxü: —¿Éxna wüxi i ngígüarü petawa rü pexcêx namexü na naxaureexü i ngêma nüxna naxugüxü ega natanüwa nangêxmagu i ngêma yatü i ngexwacêx âmáxü? Pemaã nüxü chixu rü ngêxguma natanüwa nangêxmayane i ngêma yatü i ngexwacêx âmáxü rü taxucürüwama naxauree i ngêma nüxna naxugüxü. ²⁰ —Natürü wüxi i ngunexü rü ngêma yatü i ngexwacêx âmáxü rü tá namücügüna nixügachi. Rü ngêma ngunexügu tá nixí i naxaureexü. [Rü chorü ngúexüügü rü taxucürüwama naxauree i ñuxma erü natanüwa changêxma. Natürü ínangu tá i ngêma ngunexü na nüxna chixügachixü, rü ngêxguma tá nixí i naxaureexü.] ²¹ —Rü taxúema wüxi i naxchirutüchi i ngexwacaxüxümaã tanapaita i wüxi i naxchiru i ngauxü. Erü ngêxguma nañaächimügu i ngêma natüchi i ngexwacaxüxü, rü tá nanagáuxêe i ngêma ngauxü i naxchiru. Rü noxriarü yexera tá narügáu. ²² —Rü ngêxgumarüü ta taxúema ngexwacaxücü ya binu rü wüxi i marü ngauxü i naxchiü i naxchêxmünaxcêxgu tayabacuchi. Erü ngêxguma ngêmaãcü naxüxgu rü yima binu ya ngexwacaxücü rü narüngu, rü tá nayawáixêe i ngêma naxchiü i ngauxü i naxchêxmünaxcêx. Rü ngêxma tá inayarüxo ya binu rü naxchiü rü ta. Rü ngêmacêx tanaxwêxe ya ngexwacaxücü ya binu rü ngexwacaxüxü i naxchiügu tayabacuchi. [Rü chorü nguxêetae i ngexwacaxüxü rü ngêxgumarüü ta nixí na taxucürüwama namaã nawüxiguxü i ngêma nuxcümañxü i pecümagü —ñanagürü ga Ngechuchu.]

Ngechucharü ngúexüügü rü trigu nibuxetanü ga ngüxchigaarü ngunexügu (Mt 12.1-8; Lc 6.1-5)

²³ Wüxi ga ngüxchigaarü ngunexügu ga Ngechuchu rü norü ngúexüügümaã trigunecüwa nachopetü. Rü nümagü ga norü ngúexüügü rü inaxíacüma inanaxügüga ga trigu na yabuxetanüxü. ²⁴ Rü yema Parichéugü rü Ngechuchuna nacagü rü ñanagürügü: —Dücêx ¿rü tüxcüü i curü ngúexüügü rü nanaxügü i ngêma tama mexü i ngüxchigaarü ngunexügu na naxüxü? —ñanagürügü. ²⁵ Natürü nüma ga Ngechuchu rü ñanagürü nüxü: —¿Taguma éxna poperawa nüxü pedau ga ñacü na naxüxü ga nuxcümañcü ga âêxgacü ga Dabí rü natanüxüügü ga yexguma ðna nüxü tauxgu rü nataiyaegu? ²⁶ Rü yexguma paigüarü âêxgacü yixügu ga Abiatáru, rü Dabí rü Tupanapatagu naxücu. Rü nanangöx ga yema páu ga ünexü ga paigücêxcatama íxíxü. Rü nüma ga Dabí rü natanüxümaã rü ta nangau ga yema páu —ñanagürü. ²⁷ Rü ñanagürü ta ga Ngechuchu: —Ngêma ngüxchigaarü ngunexü rü duñxügücêx nixí ga naxüxü. Rü tama ngüxchigaarü ngunexücüx nixí ga naxüxü ga duñxügü. ²⁸ —Rü ngêmacêx ya Tupana Nane ya duñxüxü íxícu rü namaã inacuêx ta i ngüxchigaarü ngunexü —ñanagürü.

3

Wüxi ga yatü ga yumécüchiga (Mt 12.9-14; Lc 6.6-11)

¹ Rü wenaxäru ngutaquêxepataügu naxücu ga Ngechuchu. Rü yéma nayexma ga wüxi ga yatü ga norü wüxichacüüwa yumécü. ² Rü yema Parichéugü, rü Ngechuchuxü nangugügu ngoxi tá namexêeã ga ngüxchigaarü ngunexügu, na yemaãcü nüxü nayexmaxücüx ga ñacücüx na ínaxuaxügüãxü. ³ Rü yexguma ga Ngechuchu rü ñanagürü nüxü ga guma

yumécü: —¿Írúda, rü nuxã ngãxütanügu yachi! —ñanagürü. ⁴ Rü yexguma ga Ngechuchu rü yema togü ga yéma yexmagüxüna naca, rü ñanagürü nüxü: —¿Tacü nixi i mexü na naxüxü i ngüxchigaarü ngunexügu? ¿Namexü na naxüxü i mexü rü éxna chixexü? ¿Rü namexü na namaxëëxü rü éxna yamáxü? —ñanagürü. Natürü ga nümagü rü yexma nayarüngeëxgümare. ⁵ Rü nüma ga Ngechuchu rü nuchametüãcüma nüxü nidaugüãchi ga yema nüxü íchomaëguãchixü. Rü nangechaü yerü tama inaxínüëchaü ga yema duüxügü. Rü guma yatüxü ñanagürü: —¿yanawëxãchixëë ya cuxmëx! —ñanagürü. Rü yexguma ga guma yatü rü nügü inayarüwëxãchimëxëë. Rü yexgumatama rü narümemëx. ⁶ Natürü yexguma yemaxü nadaugügu ga Parichëügü, rü ínachoxü ga yéma. Rü Erodetanüümaã inanaxügüe ga na naxcëx nadaugüxü ga ñuxãcü tá na Ngechuchuxü yamëxgüxü.

Naxtaacutüwa Ngechuchucë nangutaquëxegü ga muxüma ga duüxügü

⁷ Rü Ngechuchu rü norü ngüexügümaã naxtaacutüwa naxü. Rü muxüma ga duüxügü ga Gariréaanecüãx rü nawe narüxí. ⁸ Rü yexguma nüxü nacuáchigagügu ga guxüma ga yema mexügü ga naxüxü ga Ngechuchu, rü naxcëx naxítaquëxe ga muxüma ga duüxügü ga Yudéaanecüãx, rü Yerucharéucüãx, rü Iduméãanecüãx, rü Yudaüärü tocutüçüãx rü yema naãne ga Tiru rü Chidãüärü ñanegü nawa yexmaxüçüãx. ⁹ Rü yemacëx ga Ngechuchu rü norü ngüexügüxü namu na wüxi ya ngue naxcëx namexëëgüxüçëx na tama yéma yaxüxtügüãxüçëx ga yema muxüma ga duüxügü. ¹⁰ Yerü nüma rü nanameëxëë ga muxüma, rü yemacëx guxüma ga yema idaaweexü rü naxcëx naxí na nüxü yangögügüxüçëx. ¹¹ Rü yexguma yema ngoxoãxgüxü ga duüxügü nüxü daugügu, rü napëxegu nacaxãpüxügü rü tagaãcü ñanagürügü: —Cuma nixi ya Tupana Nane quíxü —ñanagürügü. ¹² Natürü nüma ga Ngechuchu rü poraãcü nayaxucüxëgü na tama duüxügümaã nüxü yaxugüexüçëx ga nachiga.

Ngechuchu nanade ga 12 ga norü ngüexügü na toxnamana namugüãxüçëx (Mt 10.1-4; Lc 6.12-16)

¹³ Rü yemawena ga Ngechuchu rü wüxi ga mëxpünewa ínaxüãchi. Rü yéma naxcëx naca ga yema ngüexügü ga nüma nanaxwëxexü. Rü naxütagu naxítaquëxegü. ¹⁴ Rü yematanüwa nayadexechi ga 12 ga norü ngüexügü na namüçügüxüchi yíxüçëx, rü na yamugüãxüçëx ga norü orearü unagüwa. Rü yemagü rü Imugüxügu nanaxüéga. ¹⁵ Rü pora nüxna naxã na Tupanaãrü poramaã ínawoxüãxüçëx ga ngoxogü. ¹⁶ Rü ñaãgü nixi ga naega ga yema 12 ga norü ngüexügü ga nadexü. Rü wüxi nixi ga Chimáü ga Pedrugü naxüëgaxü. ¹⁷ Rü togü nixi ga Chaütiágu rü naëneë ga Cuáü. Rü nümagü rü Zebedü nanegü nixi. Rü Ngechuchu rü Boanéregu nanaxüéga. Rü ngëma nixi i Duruanexü Nanegü —ñaxüchiga. ¹⁸ Rü togü nixi ga Aüdré, rü Piripi, rü Baturumé, rü Mateu, rü Tumachi, rü Chaütiágu ga Arupéu nane, rü Tadéu, rü Chimáü ga iporaãcüücü. ¹⁹ Rü to nixi ga Yuda ga Icaríute ga yixcama bexma Ngechuchuxü íxuaxüxü.

Ngechuchuxü nixugüe na ngoxoarü poramaã napuracüxü (Mt 12.22-32; Lc 11.14-23, 12.10)

²⁰ Rü yemawena rü wüxi ga Ípatagu naxücu ga Ngechuchu. Rü we-naxãrü naxcëx nangutaquëxegü ga muxüma ga duüxügü. Rü yemacëx woo na nachibüexüçëx rü nangechicagü ga nüma rü norü ngüexügü. ²¹ Rü yexguma yemaxü taxínüëgu ga guxema natanüxügü ga Ngechuchu, rü

ítayadaugü na tayagagüxücèx, yerü nüxü tixugügü rü: —Naxãüãemare —ñatagürügü. ²² Rü yexgumarüü ta ga yema ngüexëëruüügü ga Moïchëarü mugüwa ngüxëëtaegüxü ga Yerucharëüwa ne Ìxü, rü ñanagürügü: —Ñã yatü i Ngechuchu, rü ngoxogünatü i Bechebúarü poramaã nixí i ínawoxüãxü i ngoxogü —ñanagürügü. ²³ Natürü ga Ngechuchu rü naxcèx naca ga yema ngüexëëruüügü. Rü wüxi ga ore ga cuëxruüxü namaã nixu, rü ñanagürü: —¿Rü ñuxãcü i Chataná i Nügütama ínatëxüchixü? ²⁴ —Rü ngëxguma chi wüxi i nachüüãnecüãx i duüxügü rü nügütanüxüwatama nügü nadaixgu, rü taxuacüma natai i ngëma nachüüãne. ²⁵ —Rü ngëxguma chi wüxi ya Ípatacüãx nügü itoyegu, rü taxuacüma natai ya yima Ípata. ²⁶ —Rü ngëxgumarüü chi ta nixí i Chataná ega nügümaã nanuxgu rü nügü yamëxgu, rü taxuacü chima natai i ngëxguma. Rü chi ngëxma nagux. ²⁷ —Rü taxuacüma texé wüxi ya yatü ya poracüpatagu taxücu na nüxna tanapuxüxücèx i norü ngëmaxügü, ega tama tayanëixiragu. Erü ngëmaãcücica tá nixí i tixü nanguxüxü na tanapuxüxü i norü ngëmaxügü. ²⁸ —Rü aixcüma pemaã nüxü chixu rü Tupana tá nüxü nüxü nangechaü i duüxügü i guxüma i norü pecadugü rü guxüma i ñacü i chixexü i namaã yadexagüxü. ²⁹ —Naturü texé ya chixexü namaã ixugüxe i Tupanaãe i Üünexü, rü tagutáma tüxü nüxü nangechaü ya Tupana. Rü guxügutáma chixexüwa tüxü natëx —ñanagürü. ³⁰ Rü yema ñanagürü ga Ngechuchu, yerü yema ngüexëëruüügü ga Moïchëarü mugüwa ngüxëëtaegüxü rü: “Nangoxoãx” ñanagürügü nüxü.

Ngechuchuarü mamá rü naëneëgüchiga
(Mt 12.46-50; Lc 8.19-21)

³¹ Rü yexgumayane rü ítangügü ga Ngechuchuarü mamá rü naëneëgü. Naturü Ípataarü düxétügu tarücho, rü naxcèx yéma tangemagü. ³² Rü yema duüxügü ga Ngechuchuxü íchomaëguãchixü, rü ñanagürügü nüxü: —Curü mamá rü cueneëgü rü cüeyëxgü, rü yéa düxétüwa tangëxmagü, rü cuxcèx tadaugü —ñanagürügü. ³³ Rü nüma nanangãxü, rü ñanagürü: —¿Texé tixí ya chae rü chaueneëgü? —ñanagürü. ³⁴ Rü yema nüxü íchomaëguãchixüxü nidaugüãchi, rü ñanagürü: —Rü daxegü tixí ya chae rü chaueneëgü. ³⁵ —Erü guxãma ya texé ya naxüxe i Tupanaarü ngüchaü, rü yíxema tixí ya chaueneë rü chaueyèx rü chae —ñanagürü.

4

Ore ga toecügu ixuxü
(Mt 13.1-9; Lc 8.4-8)

¹ Rü wenaxãrü ínanaxügü ga Ngechuchu ga na nangüexëëãxü ga duüxügü ga guma naxtaxaãnacüwa. Rü muxüma ga duüxügü yexma naxcèx nangantaquëxegü. Rü yemacèx düxwa wüxi ga ngue ga yéma naxtaawa yexmanegu nixüe ga Ngechuchu, rü gumawa narüto. Rü yema duüxügü rü naxtaxaãnacügu narücho. ²⁻³ Rü yexguma ga Ngechuchu rü ínanaxügü ga muxüma ga ore ga cuëxruüwa na nangüexëëãxü ga duüxügü. Rü norü ngüxëëtaewa rü ñanagürü: —¿Dücèx, iperüxüñüe i ñãã ore! Wüxi ga yatü ga toecü rü triguarü towa naxü. ⁴ —Rü yexguma triguchiremaã nagüaneãgu, rü ñuxre ga triguchire rü namagu nayí. Rü ínangügü ga werigü, rü nanawecu. ⁵ —Rü náigü ga triguchire rü nutatanügu nayí ga ngextá ínachicaxüwa ga waixüümü. Rü paxa narüxügü ga guma triguchire, yerü ga waixüümü rü tama nayaxcü. ⁶ —Naturü yexguma nangunagügu ga üexcü, rü ínanagu ga

guma trigu rü narüñexgü. Rü nayue, yerü tama poraäcü nixāmāxā. ⁷—Rü náigü ga triguchire rü toranecügu nayi. Rü yexguma nayaegu ga tora, rü guma triguxü inawocu, rü yemacèx tama nixo. ⁸—Natürü náigü ga triguchire rü mexü ga waixümügu nayi. Rü meāma nayae, rü muxüma ga trigu nawa ínganguxuchi. Rü nümaxüneyèxawa rü 30 püxü ínganguxuchi ga norü o, rü náigüwa rü 60, rü náigüwa rü 100 ínganguxuchi—ñanagürü. ⁹ Rü ñuxüchi ñanagürü ta:—Rü yíxema ächixègüxe, jrü nüxü taxínüë i ñāā ore!—ñanagürü.

Tacüchiga nixi ga yema ore ga cuèxruügu ixuxü

(Mt 13.10-17; Lc 8.9-10)

¹⁰ Rü yemawena ga yexguma nanüxícèxgu ga Ngechuchu, rü yema naxüttagügüxü wüxigu namaā ga yema 12 ga norü ngüexügü, rü nüxna nacagüe ga na tacüchiga yíxü ga yema ore ga cuèxruügu ixuxü. ¹¹⁻¹² Rü nüma nanangāxü rü ñanagürü nüxü:—Tupana rü pexü nüxü nacuèxèë i ngēma èxügüxü i taxuüma i togü nüxü cuáxü na ñuxäcü äëxgacü na yíxü i nümax. Natürü ngēma togü i tama tatanüxü íxíxücèx rü cuèxruügu chayaxücüma namaā nüxü chixu i ore na woo nüxü nadaunügu rü ñoma tama nüxü nadaugüxürüü na yíxücèx, rü woo nüxü naxínüëgu rü tama nüxü na nacuèxgüxücèx. Rü ngēmaäcü namaā nüxü chixu na tama nüxü naxoexücèx i nacüma i chixexü rü tama Tupana nüxü nüxü ngechaüxücèx i norü pecadugü—ñanagürü.

Ngechuchu rü meā nanangoxèë ga yema ore ga cuèxruü ga toecüchigagu ixuxü

(Mt 13.18-23; Lc 8.11-15)

¹³ Rü Ngechuchu ñanagürü nüxü:—¿Pema rü ta èxna tama nüxü pecuèxgü na tacüchiga yíxü i ngēma ore i cuèxruü i nüxü chixuxü? ¿Rü ñuxücürüwa tá nüxü nacuèxgü i ngēma togü? ¹⁴—Rü yíxema toexe, rü yíxema tixi ya ore i mexü unagüxe. ¹⁵—Rü nangëxma i duüxügü i guma triguchire ga namagu yixünerüü íxígüxü. Rü nümagü rü nüxü naxínüë i ore i mexü, natürü yixcama marü nüxü naxínüëguwena, ngema nangu i Chataná rü nüxna nanapu i ngēma ore i mexü ga noxri yaxögüxü. ¹⁶—Rü togü rü ngēma triguchire ga nutatanügu yixünerüü nixígü. Rü ngēmagü nixi i nüxü ínüëxü i ore i mexü, rü taäëäcüma nayauxgüxü. ¹⁷—Natürü ngēma na tama aixcüma nagu naxínüëxü i ngēma ore, rü paxaächitama nayaxögü. Rü ngēmacèx i yixcama ngëxguma ngēma oregagu guxchaxütgü nüxü üpetügu rü èxna duüxügü naxchi aiegu, rü nüxü narüxoe i ngēma ore ga noxri yaxögüxü. ¹⁸⁻¹⁹—Rü togü rü guma triguchire ga toranecügu yixünerüü nixígü. Nümagü nixi i nüxü ínüëxü i ngēma ore i mexü, natürü ñoma i nañeärü ngēmaxügücèx naxoegaäëgü rü norü dïeruguma narüxínüë, rü nanaxwèxegü i nüxü na nangëxmaxü i muxüma i to i norü ngēmaxügü. Rü guxüma i ngēma rü nüxü nüxü inayarüngümaèxèë i ngēma ore i mexü rü nüxü nüxü narüxoexèë na tama naxügüäxücèx i ngēma mexü i Tupana nüxü naxwèxexü. ²⁰—Rü togü rü guma triguchire ga mexü ga waixümügu yixünerüü nixígü. Ngēmagü nixi i nüxü ínüëxü i ore i mexü rü nayauxgüxü rü meā Tupana naxwèxexüäcüma maxëxü. Rü nümaxü rü guma trigu ga 30 püxü nawa ínguxuchinerüü nixígü. Rü nümaxü rü guma 60 püxü nawa ínguxuchinerüü nixígü. Rü nümaxü rü guma 100 püxü nawa ínguxuchinerüü nixígü—ñanagürü.

Ore ga omügu ixuxü

(Lc 8.16-18)

21 Rū yexgumarüü ta ñanagürü nüxü: —¿Éxna nuã tanange i wüxi i omü na wüxi i caichãütüügu rü éxna wüxi i pechicatüügu na yaxüchichixüçèx? Tama ngémaäcü nixi, erü wüxi i omü rü dauxnagu tanaxünagü na ngema inabaxixüçèx. 22 —Rü ngëxgumarüü ta i guxüma i tacü iicüxü, rü yixcüra rü duüxügu rü tá nüxü nacuëxgüama. Rü guxüma i ngéma ñuxma duüxüguçèx èxüguxü rü tá nangoxoma i yixcüra. 23 —Rü yixema açhixëgüxe, jrü nüxü taxinüë i ngéma ore! —ñanagürü. 24 Rū yexgumarüü ta ñanagürü nüxü: —¡Meã naga pexinüë i ngéma nüxü pexinüëxü! Rū ngéma pema naga na pexinüëxürüü tá nixi i Tupana i pexna naxããxü i cuëx. Rū naetü tá poraäcü pexü narüngüxëë. 25 —Rū pemaã nüxü chixu, rü texé ya aixcüma naga ñnuxë i ñãã ore i mexü rü Tupana rü yexeraäcü tá tüxü nüxü nacuëxëë. Natürü yixema tama naga ñnuxë i ñãã ore rü Tupana tá tüxna nanayaxu i ngéma íraxü i cuëx i tüxü ngëxmachiréxü —ñanagürü.

Ore ga triguchire ga rüxüügu ixuxü

26 Rū Ngechuchu rü ñanagürü ta: —Pemaã tá nüxü chixu i wüxi i ore i cuëxruü na nüxü pecuáxüçèx na ñuxäcü äëxgacü na yixüü ya Tupana. Rū wüxi ya yatü rü waixüümügu nanato ya triguchire. 27 —Rū nüma ya yatü rü chütacü nape rü moxüäcü ínarüda, rü yoxni ya yima triguchire rü narüxü rü niyachigü. Natürü nüma ya yatü rü tama nüxü nacuëx na ñuxäcü na naxüxü rü na nayaxü. 28 —Rū ngémaäcü i ngéma waixüümü rü nüëchamatama nanaxüxëë ya yima triguchire. Rū naätügüxira narüxü rü yixcama i nachacu rü ngémawena nachacuwa nanguxü i norü o. 29 —Rū ngëxguma marü yadauxgu i ngéma norü o, rü nanabuxu erü marü nawa nangu i norü buxgü —ñanagürü.

Ore ga motachachiregu ixuxü (Mt 13.31-32; Lc 13.18-19)

30 Rū ñanagürü ta ga Ngechuchu: —Rū Tupanaarü ore rü yexera nixüchigü ¿Rü nanañacüraxü rü tacügu tanangu? 31-32 —Rū ñoma wüxi ya motachachire ya waixüümügu itoxünerüü nixi. Rū woo guxüüma ya nanetüchirexü narüxíramaë, natürü ngëxguma inatoxgu, rü narüxü rü naya ñuxmata guxüma i togü i nanetüxü nayexera. Rū nachacüü rü nita, rü woo werigü rü natanügu nixüachiãü —ñanagürü.

Cuëxruügu ixuxü ga oremaã nidexa ga Ngechuchu (Mt 13.34-35)

33 Rū yemaäcü ga Ngechuchu rü muxüma ga nayexgumaächiraüxü ga ore ga cuëxruügümaã nanangüexëë ga duüxügu. Natürü yema cuëxruügü rü tama yema duüxüguarü cuëxü nangupetü. 34 Rū ore ga cuëxruügu ixuxüxícatama nixi ga norü ngüxëëtae. Rū yixcama ga yexguma nanüxüçëxgügu, rü norü ngüxüguçèx meãma nanangoxëë ga guxüma.

Ngechuchu rü buanecüxü rü yuapexü ínayachaxächixëë (Mt 8.23-27; Lc 8.22-25)

35 Rū yematama ngunexügu ga marü nachütachaügu, rü Ngechuchu rü ñanagürü nüxü ga norü ngüexügu: —¡Ngíxã rü naxtaxaarü tocutüwa taxí! —ñanagürü. 36 Rū yexguma duüxüguña yéma inaxíãchi. Rū norü ngüexügu rü Ngechuchuxü nigagü nagu ga guma ngue ga marü nawa nayexmane. Rū yexgumarüü ta ga togü ga duüxügu rü náigü ga nguegügu ínayaxümücügu. 37 Rū yexguma yaxäüyane rü inaxü ga wüxi ga buanecü ga taxüchicü. Rū yema na nataxüchixü ga buanecü, rü guma nguegu niyauxcuchichigü

ga yuape, rü yexma nabaxüügüchaü. ³⁸ Natürü ga Ngechuchu rü guma ngeuchinüwa wüxi ga cüxeruügu naca, rü yéma nape. Rü inanabaixgügü, rü ñanagürügü nüxü: —Pa Ngüexêëruüx, ¿éxna curü me nixi na nuxma ibaxüügüxü? —ñanagürügü. ³⁹ Rü yexguma ínarüda ga Ngechuchu. Rü buanecüna nachogü rü ñanagürü nüxü ga guma nextaxa: —¡Iyarüchiane rü iyachaxáchi! —ñanagürü. Rü ínayachaxáchi ga buanecü rü guxüwama ínachaxanemare. ⁴⁰ Rü yemawena ga Ngechuchu rü norü ngüexüügüxü ñanagürü: —¿Tüxcüü ngémaácü poraácü pemuê? ¿Ñüxma rü ta éxna tama aixcüma peyaxögü? —ñanagürü. ⁴¹ Natürü nümagü ga norü ngüexüügü rü poraácü namuê. Rü nügüna nacagüe rü ñanagürügü: —¿Texe éxna nixi ya daa rü èjxrcü ya buanecü rü yuape rü naga naxínüëxü? —ñanagürügü.

5

Yatü ga Gadarácūāx ga ngoxogü nawa yexmagüxi (Mt 8.28-34; Lc 8.26-39)

¹ Rü nextaxaarü tocutüwa nangugü ga Gadaraanewa. ²⁻³ Rü yexguma marü nguewa ínxüegu ga Ngechuchu, rü yéma naxcèx nixü ga wüxi ga yatü ga ngoxo nawa yexmaxü. Rü yema yatü rü duüxëgüchiquéxewa ne naxü, yerü yexma nixi ga yanaxauchigünëxüxü. Rü taxüexüma nanguxü na tayanáixü, woo cadenamaã. ⁴ Rü woo muëxpüxcüna cadenamaã nayanëixparagü rü nayanëixchacüügü, natürü nüma rü guxüguma íraxügu ínacauügüama, rü yemaácü taxüexüma nanguxü. ⁵ Rü ngunecü rü chütacü rü yuetachiquëxetanügu rü naxpüxgügu nanaxauchigüane. Rü yexma nanacaean, rü nutamaã nügügu napogü. ⁶ Natürü yexguma yaxügutama Ngechuchuxü nadëuxgu, rü naxcèx inañaáchi, rü napëxegu nayacaxápxü. ⁷ Rü aita naxüácüma ñanagürü nüxü: —¿Tüxcüü nuá choxü cuyachixewe, Pa Ngechuchux, Pa Tupanaxüchi Nanex? Rü Tupanaegagu cuxü chacèëxü na tama ngüxü choxü quingexêëxü —ñanagürü. ⁸ Rü yemaácü nidexa ga yema ngoxo yerü Ngechuchu rü marü ñanagürü nüxü: —Pa ngoxox, ¡ínaxüxü nawa ya yima yatü! —ñanagürü. ⁹ Rü yexguma ga Ngechuchu rü nüxna naca, rü ñanagürü: —¿Tacü nixi i cuéga? —ñanagürü. Rü nüma ga ngoxo nanangáxü, rü ñanagürü: —Muxüchixü nixi i chauéga, erü tamu i tomox —ñanagürü. ¹⁰ Rü poraácü Ngechuchuxü nacèëxügü na tama ínawoxüäxüdcèx ga yema naãnewa. ¹¹ Rü yema nachicaarü ngaicamana ga naxpüxpechinüwa rü nayexmagü ga muxüma ga cuchigü ga yéma chibüexü. ¹² Rü yemacèx ga yema ngoxogü rü Ngechuchuxü nacèëxügü, rü ñanagürügü: —¡Ngema cuchitanüwa toxü namugü na nagu tachocuxüdcè! —ñanagürügü. ¹³ Rü Ngechuchu rü: —Ngü —ñanagürü. Rü yexguma ga yema ngoxogü rü guma yatüwa ínachoxü, rü yema cuchigügu nayachocu. Rü yema cuchigü ga wixgu 2000 íxügüxü rü ínoxüächi, rü nextaacutüarü mëxpüxüwa nayarüyuxgü. Rü yexma nayi. ¹⁴ Rü yema cuchigüarü dauruügü rü íãnewa nabuxmü. Rü íãnewa rü yema íãnearü ngaicamana ipegüxü ga duüxügütanüwa nüxü nayarüxügügü ga yema üpetüxü. Rü ga duüxügü rü ínayadaugü. ¹⁵ Rü yexguma Ngechuchu íyexmaxüwa nangugügu, rü yéma nüxü nadaugü ga guma yatü ga ngoxoäxchirécü. Rü yéma narüto, rü naxáxchiru, rü meãma naãëxü nacüëx. Rü poraácü nañaixáchiãëgü ga duüxügü. ¹⁶ Rü yema cuchigüarü dauruügü ga nüxü daugüxü ga tacü na nüxü ngupetüxü ga guma yatü ga ngoxoäxchirécü rü tacü nüxü na ngupetüxü ga yema cuchigü, rü yema nixi

ga togü ga duüxügümaã nüxü ixugüexü ga guxüma ga yema ngupetüxü. ¹⁷Rü yexguma yemaxü naxüñüëgu ga duüxügü, rü inanaxügüe ga Ngechuchuxü na nacëëxügüxü ga na inaxüüxücëx ga yema naãnewa. ¹⁸Rü yexguma wenaxäru nguegu yaxüegu ga Ngechuchu, rü guma yatü ga ngoxoãxchirëcü, rü nüxü nacëëxü na Ngechuchuwe naxüxücëx. ¹⁹Natürü ga Ngechuchu rü tama nanaxwëxe, rü ñanagürü nüxü: —jCuchiüwa naxü rü cutanüxümaã nüxü yarüxu i guxüma i ngëma cuxcëx naxüxü ya Cori ya Tupana, rü ñuxäcü nüxü na cungechaütümüxü! —ñanagürü. ²⁰Rü nüma ga guma yatü rü inixü. Rü inanaxügü ga guxüma ga Decaporíchiuanewa yexmagüne ga ñanegüwa nüxü na yaxuxü ga yema Ngechuchu naxcëx üxü. Rü guxüma ga duüxügü rü nabaixächiaëgü.

Yáiruxacüchiga rü yema nge ga Ngechuchuchirugu ingögücüchiga (Mt 9.18-26; Lc 8.40-56)

²¹Rü yexguma nguegu naxtaxaarü tocutüwa nataegugu ga Ngechuchu, rü muxüma ga duüxügü rü naxcëx yéma nangutaquëxëgü. Rü nüma rü naxtaapechinüwa nayexma. ²²Rü yexguma yéma nayexmayane, rü yéma naxütawa nangu ga ngutaquëxepataüärü äëxgacü ga Yáirugu äegacü. Rü yexguma Ngechuchuxü nadeüxgu, rü napëxegu nanangücuchi. ²³Rü poraacü nüxü nacëëxü, rü ñanagürü nüxü: —Chauxacü rü ituraxüchi. Rü chanaxwëxe i ngema cuxü na ngixü cuyarüngögüxücëx na ngixcëx yataanexücëx rü namaxüxücëx —ñanagürü. ²⁴Rü yexguma ga Ngechuchu rü nawe narüxü. Rü muxüma ga duüxügü inayaxümücügü. Rü yéma nayaxüxtügü. ²⁵Rü yema muxü ga duüxügütanüwa iyexma ga wüxi ga nge ga 12 ga taunecü idaawecü namaã ga na naxägüechaxü. ²⁶Rü muxüma ga duturugü ngixü naxüxügü rü poraacü ngüxü ngixü ningexëëgü. Rü yemaacü natüçëxma ngixü iguxëë ga guxcü ga ngirü diëru. Natürü tama ngixcëx nitaaneega, rü niyexeraguchigüama ga ngirü daawe. ²⁷Rü üpaacü togüëxwa Ngechuchuchigaxü ixinü. Rü yemacëx yéma ixü. Rü natanüwa ga yema muxüma ga duüxügü rü Ngechuchuweama ne ixü rü naxchirugu iyangögü. ²⁸Yerü ñaxügu irüxünü: —Ngëxguma chi naxchiruxümare chingögügu, rü chi chauxcëx nitaane —ñaxügu iruxünü. ²⁹Rü yexgumatama inayachaxüchi ga ngigü, rü nüxü iyacuëxächi ga ngixñewa ga na ngixcëx yataanexü. ³⁰Natürü ga Ngechuchu rü nüxü nicuëxächi ga na nawa inaxüüxü ga pora. Rü naxcëx nadauegu ga yema muxüma ga duüxügü, rü nüxna naca, rü ñanagürü: —¿Texé tixü ya chauxchirugu ingögüxe? —ñanagürü. ³¹Rü norü ngüexügü nanangäxügü, rü ñanagürügü: —Cuma nüxü cudau i ñuxre i duüxügü ngema cuxü na yaxütügüxü rü ngëxguma rü ta:

“¿Texé ya choxü ingögüxe?” ñacuxü —ñanagürügü. ³²Natürü ga Ngechuchu rü nüxü nidaugüächiaama na tüxü nadauxücëx ga na texé na tiixü ga guxema nüxü ingögüxe. ³³Rü yexguma ga yema nge rü ngirü muümaã yaduruxächüma naxütawa ingu, yerü nüxü icuëx ga tacü na ngixü ngupetüxü. Rü napëxegu iyacaxäpüxü, rü aixcümäxüchi namaã nüxü iyaxu ga guxüma. ³⁴Rü nüma ga Ngechuchu rü ñanagürü ngixü: —Pa Chauxacüx, curüme erü cuyaxö. jRü taäëcüma iixü, erü marü naxüxü i curü daawe! —ñanagürü. ³⁵Rü yexguma iyadexayane, yéma nangugü ga ñuxre ga natanüxügü ga guma ngutaquëxepataüärü äëxgacü rü ñanagürügü nüxü: —Cuxacü rü marü iyu. ¿Tüxcüü nüxü cuchixeweecha ya Ngüexëëruü? —ñanagürügü. ³⁶Natürü ga Ngechuchu rü tama nüxü nacuáxchaü ga yema duüxügüarü dexa. Rü

yemacèx guma ngutaquèxepataũârũ ãèxgacũxũ ñanagũrũ: —¡Tãxũ i cumũxũ, rũ yaxõmare! —ñanagũrũ. ³⁷ Rũ yexguma ga Ngechuchu rũ ínayagagũ ga Pedru rũ Chaũtiãgu rũ Cuãũ ga Chaũtiãgueneê. Natũrũ tama nanaxwèxe na texè ga togue nawe rũxĩxũ. ³⁸ Rũ yexguma guma ngutaquèxepataũârũ ãèxgacũpatawa nangugũgu, rũ Ngechuchu nũxũ nadau ga na íyacuxcuxũ rũ porãcũ aita naxũeãcũma naxauxexũ ga duũxũgũ. ³⁹ Rũ guma ípatagu naxũcu ga Ngechuchu, rũ ñanagũrũ: —¿Tũxcũũ ípicuxcu rũ ngẽmaãcũ pexauxe? Ngẽma bucũ rũ tama iyu. Rũ ipemare —ñanagũrũ. ⁴⁰ Rũ nũxũ nacugũecũrãxũãma ga duũxũgũ. Natũrũ nũma ga Ngechuchu rũ íãxtũwa nanamugũ ga guxũma. Rũ yema bucũnatũcèx naca rũ ngĩe, rũ yema namũcũgũ, rũ namaã nixũcu ga ínayexmaxũwa ga yema bucũ. ⁴¹ Rũ ngĩxmèxgu nayayauxãchi, rũ ñanagũrũ ngĩxũ: —Tarita cumi —ñanagũrũ. Rũ ngẽma ore rũ ñaxũchiga nixĩ:

“¡Inachi, Pa Bucũ, ñacharũgũ cuxũ!” ñaxũchiga nixĩ. ⁴² Rũ yexgumatama ga yema bucũ ga 12 ga taunecũ ngĩxũ yexmèxcũ, rũ írũda rũ íyaxũ. Rũ porãcũ nãbaixãchiãègũ ga duũxũgũ. ⁴³ Natũrũ ga Ngechuchu rũ porãcũ nũxna nanachũxu na taxũemaãma nũxũ yaxugũexũcèx ga yema ngupetũxũ. Rũ ñũxũchi nanamu na ngĩxũ naxũwemũgũxũcèx ga yema bucũ.

6

Nacharétuwa nayexma ga Ngechuchu

(Mt 13.53-58; Lc 4.16-30)

¹ Rũ yema inaxũãchi ga Ngechuchu, rũ guma íãne ga Nacharétu ga nawa nayaxũnewatama naxũ. Rũ norũ ngũexũgũ rũ nawe narũxĩ. ² Rũ yexguma ngũxchigaarũ ngunexũwa nanguxgu rũ inanaxũgũ ga na nangũexèãtaexũ ga ngutaquèxepataũwa. Rũ yema muxũma ga duũxũgũ ga yema irũxĩnũèxũ, rũ nãbaixãchiãègũ. Rũ nũgũna nacagũe rũ ñanagũrũgũ: —¿Ngextã naxcèx nangux i guxũma i ngẽma nguxèãtae? ¿Rũ ngextã nanayaxu i ngẽma cuèx? ¿Rũ ñũxãcũ nanaxũ i ngẽma mexũgũ i taxũgũ i naxũxũ? ³ —¿Taux èxna ñãã yĩxũ i carpinteru i Ngechuchu, i Mariãne, ya Chaũtiãgu rũ Yũche rũ Chimãũ rũ Yudaeneê ixicũ? ¿Rũ taux èxna i naèyèxgũ rũ nuxma tatanũgu naxãchiũgũxũ? —ñanagũrũgũ. Rũ yemacèx ga yema duũxũgũ rũ tama naga naxĩnũèchaũ. ⁴ Natũrũ ga Ngechuchu rũ ñanagũrũ nũxũ: —Wũxi i Tupanaãrũ orearũ uruũ rũ guxũwama i duũxũgũ rũ nũxũ nangechaũgũ. Natũrũ norũ íãnewatama rũ natanũxũgũtanũwatama rũ napatawatama rũ tama aixcũma nũxũ nangechaũgũ —ñanagũrũ. ⁵ Rũ yemacèx taxuacũma yema nanaxũ ga muxũma ga mexũgũ ga Tupanaãrũ poramaã naxũxũ. Rũ noxretama ga duũxũgũ ga idaaweexũxũxĩcatama ningõgũ rũ naxcèx nayataanexèègũ. ⁶ Rũ nãbaixãchiãè ga Ngechuchu, yerũ yema duũxũgũ rũ tama nũxũ nayaxõgũ.

Ngechuchu rũ norũ ngũexũgũxũ nimugũ na nũxũ yanaxugũexũcèx ga Tupanachiga

(Mt 10.5-15)

Rũ Ngechuchu rũ guma ngaicamagũne ga íãnexãcũgũgu nixũgũchigũ, rũ nayangũexèãtanũ ga duũxũgũ. ⁷ Rũ naxcèx naca ga yema 12 ga norũ ngũexũgũ, rũ inanaxũgũ ga na namuãxũ ga taxrechigũ. Rũ nũxna nanaxã ga pora na ínawoxũxũcèx ga ngoxogũ. ⁸ Rũ nũxna naxãga ga na taxuũma íyangèxũxũcèx ga norũ namawaxũ, rũ bai ga choca rũ bai ga pãũ rũ bai ga norũ diẽru. Rũ nanaxwèxe ga naxnetũxũxĩcatama na íyangèxũxũ. ⁹ Rũ namaã nũxũ nixu na nacuaixcuxũ ga norũ chapatu. Natũrũ tama nanaxwèxe ga taxre ga naxchiru na íyangèxũxũ. ¹⁰ Rũ ñanagũrũ nũxũ: —Rũ ngèxguma wũxi

ya ñānewa wūxi ya ĩgu pechocuxgu, ĩrū ngēxma pepegū ñuxmata pema ñuxgu ngema ipexiāchix nawa ya yima ñāne! ¹¹ —Rū ngēxguma ngexnerūúne ya ñānewa tama meā pexū nayauxgūchaūgu rū tama pexū inaxīnūēchaūgu, ĩrū ĩpechoxū i ngema! Rū ngēxguma ipexiāchigu, ĩrū ĩpenapagū i perū ūxaxūcutū na ngēmawa nūxū nacuēxgūxūcēx na nataxūchixū tā i norū poxcu i ngēxguma naguxgu i naāne! —ñānagūrū. ¹² Rū yexguma inaxiāchi ga norū ngūexūgū. Rū duūxūgūmaā nūxū nixugūe ga na nūxū naxoexūcēx ga nacūma ga chixexū rū Tupanacēx na nadaugūxūcēx. ¹³ Rū ĩnanawoxū ta ga muxūma ga ngoxogū. Rū chixūmaā yachagūācūma nanameēxēē ga muxūma ga ĩdaaweexū.

*Nayu ga Cuáŭ ga baiŭxēēruŭ
(Mt 14.1-12; Lc 9.7-9)*

¹⁴ Rū Ngechuchuchigaxū naxīnū ga āēxgacū ga Erode, yerū guxūwama duūxūgū poraācū nachiga nidexagu. Rū yexguma ga Erode rū ñānagūrū: —Rū ngēma Ngechuchu nixī i Cuáŭ i baiŭxēēruŭ ĩxīxū rū wena namaxū, rū ngēmacēx nixī i nūxū nangēxmaxū i pora na naxūāxūcēx i ngēma taxū i mexū i Tupanaārū poramaā naxūxū. ¹⁵ Natūrū ga togū rū ñānagūrūgū: —Nuxcūmaŭcū ga orearū uruŭ ga Eria nixī —ñānagūrūgū. Rū togū rū ñānagūrūgū: —Wūxi i Tupanaārū orearū uruŭ i nuxcūmaŭgūxūrū nixī —ñānagūrūgū. ¹⁶ Natūrū yexguma yemaxū naxīnūgu ga Erode, rū ñānagūrū: —Rū ngēma Ngechuchu nixī i Cuáŭ ga chorū churragūxū chidayenaxāxēēchirēxū, rū ñuxma rū wenaxārū namaxū —ñānagūrū. ¹⁷ Rū yema ñānagūrū ga Erode yerū marūchirēx Cuáŭxū niyaxu rū poxcupataūgu cadenamaā nayachota. Rū yemaācū nanaxū ngīgagu ga naxmēx ga Erodía ga naēneē ga Piripimēxchirēx ĩxīcū ga ngīxū napucū ga Erode. ¹⁸ Yerū ūpaacū ga Cuáŭ rū Erodemaā ñānagūrū: —Tama name i cuxmēxū cuyaxīxēē i cueneēmēx —ñānagūrū. ¹⁹ Rū yemacēx ga Erodía rū poraācū Cuáŭchi ĩxai rū inaxwēxe ga na yamáāxū, natūrū poraācū ngīxū naguxcha. ²⁰ Yerū ngīte ga Erode rū Cuáŭxū namuŭ, yerū nūxū nacuēxchirēx na wūxi ga yatū ga mecū rū ūūnecū na yīŭxū, rū yemacēx nixī ga naētūwa nachogūxū. Rū yexguma Cuáŭārū orexū naxīnūgu ga Erode, rū naxoegaāē, natūrū meā nūxū ĩnarūxīnū. ²¹ Natūrū wūxi ga ngunexū nawa nangu na ngīxū natauxchaxū na yamáāxūcēx ga Cuáŭ, ga yexguma Erodearū taunecūarū ngunexūwa nanguxgu rū wūxi ga peta ga taxū naxūxgu naxcēx ga norū ñatūgumaēgūxū ga āēxgacūgū, rū norū churragūarū āēxgacūgū rū yema Garirēaanecūāx ga corīgū ga taxūgū. ²² Rū yema petawa iyaxūcu ga Erodíaxacū, rū yema petatanūxūpēxewa ĩyañaāchixūchigūxū. Rū poraācū norū me ĩyixī ga Erode rū norū petatanūxūgū. Rū yemacēx ga nūma ga āēxgacū ga Erode rū ñānagūrū ngīxū ga yema pacū: —ĭChoxna naxcēx naca i ŭacū i cunaxwēxexū, rū tá cuxna chanaxā! —ñānagūrū. ²³ Rū aixcūmaxūchi ngīmaā ĩnaxuneta, rū ñānagūrū: —Ngēxūrūūxū i ŭacū i choxna naxcēx cuçaxū rū tá cuxna chanaxā, woo ngāxūgu i chorū naāne yixīgu —ñānagūrū. ²⁴ Rū nūxna iyaxūgachi, rū ngīēna iyaca, rū ngīgūrūgū: —ĭŭacū i cunaxwēxexū na naxcēx ĩchaçaxū? —Ngīgūrūgū. Rū ngīē ngīxū ĩngāxū, rū ngīgūrūgū: —ĭNaxcēx ĩnaca i Cuáŭ ya baiŭxēēruŭēru! —ngīgūrūgū. ²⁵ Rū yexgumatama ga yema pacū rū paxa iyaxūcu ga āēxgacūxūtawa rū ngīgūrūgū: —Chanaxwēxe i ñuxmatama paxa wūxi ya poratugu choxna cunaxā i Cuáŭ ya baiŭxēēruŭēru —ngīgūrūgū. ²⁶ Rū nūma ga āēxgacū rū poraācū ĩnayarūmaāchi, natūrū yema

norü petatanüxpëxewa marü ngĩmaã na inaxunetaxüçèx, rü tama ngĩxü na-womüxëèchaü. ²⁷ Rü yemacèx ga Erode rü yexgumatama yéma ínapoxcuxüwa nanamu ga wüxi ga churara na naxütawa nangeaxüçèx ga Cuáüëru. ²⁸ Rü poxcupataüwa naxü ga yema churara, rü Cuáüxü nidaeru. Rü wüxi ga poratugu äëxgacüxütawa nanange ga yema naëru. Rü yema pacüna nanaxä. Rü ngĩma rü ngĩëna iyaxä. ²⁹ Rü yexguma yemaxü nacuächigagügu ga norü ngüexüğü ga Cuáü, rü yéma poxcupataüwa nayayauxgü ga naxüne, rü inayatëxgü.

Ngechuchu rü nanachibüexëë ga 5000 ga yatüğü
(Mt 14.13-21; Lc 9.10-17; Cu 6.1-14)

³⁰ Rü yemawena rü yema norü ngüexüğü ga yamugüxü rü Ngechuchumaã nangutaquëxegü. Rü namaã nüxü nixugüe ga guxüma ga yema naxügüxü rü yema nanguxëëtaegüxü. ³¹ Rü Ngechuchu rü ñanagürü nüxü: —¡Nuã pexí, rü ngĩxä, wüxi i nachica i ngextá taxüema íxãpataxüwa taxí, na paxaãchi ngëxma yarüngügüxüçèx! —ñanagürü. Rü yema ñanagürü yerü namu ga duüxüğü ga yéma ingugütanücüüxü rü woeguxü ga togü. Rü yemacèx ga Ngechuchu rü norü ngüexüğü rü woo na nachibüexüçèx rü nangechicagü. ³² Rü yemacèx wüxi ga nguegu nichoü, rü noxrüwama wüxi ga nachica ga taxüema íxãpataxüwa naxí. ³³ Natürü muxüma ga duüxüğü nüxü nadaugü ga yexguma inaxíächigu, rü nüxü nacüexgü ga texégü na yíixü. Rü yemacèx guxüne ga guma íänegücüäx ga duüxüğü, rü dauxchitagu nibuxmü rü napëxegu nayayi. ³⁴ Rü yexguma nguewa ínaxüegu ga Ngechuchu, rü nüxü nadau ga yema muxüma ga duüxüğü. Rü nüxü nangechaütümüüğü yerü ñoma carnerugü ga ngearü dauruüäxgüxürüü nixígü. Rü inanaxüğü ga na nangüxëëäxü ga muxüma ga norü ore. ³⁵ Rü yexguma marü nayáuanegu, rü norü ngüexüğü rü naxcèx naxí, rü ñanagürüğü: —Marü nayáuanexüchi rü ñaã rü wüxi i nachica i taxüema nagu äpataxü nixí. ³⁶ —Rü ngëmaccèx name nixí i ícuyamugü i duüxüğü na namapechinüwa ipeagüxü i duüxüğüxütawa rü íänexäcügü ya ngaicamagünewa naxíxüçèx na ngema norü õnacèx yataxegüxüçèx —ñanagürüğü. ³⁷ Natürü ga Ngechuchu rü nanangäxü, rü ñanagürü nüxü: —¡Pematama penaxüwemü! —ñanagürü. Rü nümagü nanangäxüğü rü ñanagürüğü: —¿Éxna cunaxwëxe i 200 tachinü i dīëru naguxü i pāücèx nüxü tayataxexü na ngëmamaã tanachibüexëëxüçèx? —ñanagürüğü. ³⁸ Rü yexguma ga Ngechuchu rü ñanagürü nüxü: —¿Ñuxre i pāü pexü nangëxma? ¡Rü ípeyadëux! —ñanagürü. Rü yexguma íyadaugüägu, rü ñanagürüğü nüxü: —Toxü nangëxma i wüximëëxpüx i pāü rü taxre i choxni —ñanagürüğü. ³⁹ Rü yexguma ga Ngechuchu rü duüxüğüxü namu na ñuxrechigü nügüxütawa rütögüxüçèx ga maxëtëxewa. ⁴⁰ Rü ínarütögü ga 100 chigü rü 50 chigü ga duüxüğü. ⁴¹ Rü yexguma ga Ngechuchu rü nanade ga yema wüximëëxpüx ga pāü rü yema taxre ga choxni. Rü daxügüxü ga naãnegu nadawenüäcüma Tupanana moxë naxä. Rü inanabücu ga yema pāü, rü norü ngüexüğüna nanana na yema duüxüğüxü yanuäxüçèx. Rü yema taxre ga choxni rü ta guxüma ga yema duüxüğüxü nüxü nayanuxëë. ⁴² Rü guxüma nachibüe ñüxmata meäma nüxü yangu. ⁴³ Rü yemawena rü 12 ga pexchigü nanapagüamatama namaã ga yema pāü rü choxni ga íyaxügüxü. ⁴⁴ Rü yema yéma pāüğü ngõxgüxü rü 5000 ga yatüğü nixí.

Dexáëtügu nixü ga Ngechuchu
(Mt 14.22-27; Cu 6.16-21)

45 Rū yemawena ga Ngechuchu rü duũxũgũxũ íyamugũyane rü wũxi ga ngeugu nayachõũxẽẽ ga norũ ngũexũgũ na yoxni naxtaxaarũ tocutũwa Bechaidawa naxĩxũcẽx. 46 Rū yexguma duũxũgũxũ íyamugũguwena, rü mẽxpũnewa naxũ ga Ngechuchu na yẽma yayumũxẽxũcẽx. 47 Rū yexguma marũ nachũtagu, rü naxtaxaarũ ngãxũttũwa nayexmagũ ga norũ ngũexũgũ. Rū Ngechuchu rü nũxĩcatama dauxchitawa nayaxũãchi. 48 Rū nũxũ nadau na guxchaxũãcũma yaxãgũxũ ga norũ ngũexũgũ, yerũ ga buanecũ rü nawaama nabuxuchi. Rū yexguma marũ yangunechaũgu, rü Ngechuchu rü dexãétũgu nawe narũxũ. Natũrũ ñoma nũxũ naxũpetũchaũxũrũrũ nũgũ nixĩxẽẽ. 49-50 Rū yexguma norũ ngũexũgũ nũxũ daugũgu ga dexãétũgu na yaxũxũ, rü nagu narũxĩnũẽ ga wũxi ga naxchiximare na yĩxũ. Rū yemacẽx aita naxũe, yerũ guxũma nũxũ nadaugũ rü poraãcũ nabaixãchiãẽgũ. Natũrũ yexgumatama ga Ngechuchu rü namaã nidexa rü ñanagũrũ nũxũ: —¡Peporae! Rū chomachirẽxtama chixĩ. ¡Tãxũ i pemuũẽxũ! —ñanagũrũ. 51-52 Rū ngeugu nixũe, rü inarũxõ ga buanecũ. Natũrũ nũmagũ ga norũ ngũexũgũ rü nabaixãchiãẽgũmare yerũ woo nũxũ na nadaugũxũ ga yema mexũ ga Tupanaãrũ poramaã naxũxũ ga Ngechuchu ga yexguma yema pãũ yamuxẽẽgu, natũrũ tama nũxna nacũe x-ãchie na Tupana Nane na yĩxũ yerũ nũxũ naguxcha na yaxõgũãxũ.

Yenecharétuanewa Ngechuchu nanameẽxẽẽ ga idaaweexũ
(Mt 14.34-36)

53 Rū yexguma marũ yanguũgu ga naxtaawa, rü Yenecharétuanewa nangugũ. Rū yexma naxãnacũgu nanangaxũgũ ga naweũ. 54 Rū yexguma nguewa ínachoũgu, rü yexgumatama ga duũxũgũ rü nũxũ nicuẽxãchitanũ ga Ngechuchu na yĩxũ. 55 Rū yema naãnewa rü guxũne ga ñgũwa nabuxmũ ga yema duũxũgũ. Rū yexguma nũxũ nacũxgũgu ga ngextã na nayexmaxũ ga Ngechuchu, rü yẽma norũ carũgũgu naxcẽx nanagagũ ga idaaweexũ. 56 Rū guxũwama ga ngextã íyanguchigũxũwa ga Ngechuchu, ga ñãnexãcũgũwa rü ñãnegũ ga itaxũnewa, rü ñãnepechinũwa, rü yexma ítamũpechinũgu naxcẽx nayamugũ ga idaaweexũ. Rū nũxũ nacẽxũgũ na tama nũxna nachũxãxũcẽx na naxchirupechinũgumare yangõgũgũxũcẽx. Rū guxũma ga yema nũxũ ingõgũexũ, rü naxcẽx nitaanegũ.

7

Tacũ nixĩ i Tupanapẽxewa duũxũgũxũ chixexẽẽxũ
(Mt 15.1-20)

1 Rū Ngechuchucẽx naxĩ ga Parichẽgũ namaã ga ñuxre ga ngũexẽẽruũgũ ga mugũwa nguxẽẽtaegũxũ ga Yerucharẽũwa ne ixũ. 2 Rū yexguma ñuxre ga Ngechuchuarũ ngũexũgũxũ nadaugũgu ga tama Yudiũgũcũma na yangũxẽẽgũxũ, rü tama Yudiũgũ yauxmẽxgũxũrũrũ na nayauxmẽxgũxũ naxũpa na nachibũexũ, rü chixri nachiga nidexagũ. 3 Yerũ nũmagũ ga Parichẽgũ rü guxũma ga togũ ga Yudiũgũ rü nagu naxĩ ga norũ oxigũcũma na nayauxmẽxiraxũ na yemaãcũ Tupanapẽxewa nũgũ yamexẽẽgũxũ naxũpa ga na nachibũexũ. 4 Rū ngẽxguma taxepataũwa ne naxĩxgu ga nũmagũ rü tama nachibũe ega tama ngẽmaãcũ nũgũ nayauxmẽxiragu. Rū nangẽxma i muxũma i togũ i nuxcũmaũxũ i nacũmagũ. Rū ngẽmacẽx nagu naxĩ i ngẽma nacũmagũ na Tupanacẽx nayauxgũãxũ i norũ pochiyugũ rü basugũ rü paneragũ rü pechicaxũgũ. 5 Rū yemacẽx ga yema Parichẽgũ rü ngũexẽẽruũgũ rü Ngechuchuna nacagũ, rü ñanagũrũgũ: —¿Tũxcũĩ i

curü ngúexügü i tama nagu naxixü i ngēma tórü oxigücüma rü tama toma tayauxmëxgüxürüü nayauxmëxgüxü naxüpa na nachibüexü? —ñanagürügü. ⁶ Natürü Ngechuchu nanangäxü rü ñanagürü: —Pa Duüxügü ya Pegü Naxaixcümarauügüxe, rü aixcüma pechiga nixi ga yema ore ga nuxcümaücü ga Tupanaärü orearü uruü ga Ichaxia ümatüxü ga ñaxü:

“Ñaa duüxügü rü naäxmaãmare choxü nicuëxüügü, natürü naäëwa rü tama chaugu narüxinüë. ⁷ Rü taxuwama name na ngēmaäcü natüçexma choxü yacuëxüügüxü. Erü guxüma i ngēma norü nguxëëtae rü yatügüarü mugümare nixi, rü tama aixcüma chorü mu nixi”, ñaxü. ⁸—Rü pema i ñuxma rü aixcüma nüxü perüxoe i Tupanaärü mugü na nagu pexixüçex i ngēma duüxügücümamare ixixü —ñanagürü. ⁹ Rü yexgumarüü ta ñanagürü nüxü: —Pema rü penangexrü i Tupanaärü mugü na pecümagügutama pexixüçex. ¹⁰—Yerü ga Moiché rü ñanagürü:

“jTüxü nangechaü ya cunatü rü cue!”
ñanagürü. Rü ñanagürü ta:

“Texé ya tümanatümaã rü éxna tümaëmaã chixexü ixugüxe, rü äëxgacü tá tümamaã nanaxuegu na tayuxüçex”, ñanagürü. ¹¹—Natürü pema rü ñaperügügü:

“Marü name ega wüxi ya yatü nanatüxü rü naëxü ñaxgu: ‘Taxucürüwama chorü ngēmaxümaã cuxü charüngüxëë, erü guxüma i chorü ngēmaxü rü marü Tupanana chanaxã’,” ñaxgu. ¹²—Rü ngëxguma texé ngēma ñagügu, rü pexçex rü marü namexü na tama tümanatüxü rü tümaëxü tarüngüxëëxü. ¹³—Rü ngēmaäcü ipeyanaxoxëë i Tupanaärü mugü, na nagu pexixüçex i pecümagütama i togüwa pexüexëëxü. Rü ngëxgumarüü ta muxüma i to i pecümagü i ngëmarüü ixixügu pexi —ñanagürü. ¹⁴ Rü yexgumawena duüxügüçex naca ga Ngechuchu, rü ñanagürü nüxü: —jMeã choxü iperüxinüë, rü nüxü pecuá i ñaa chorü ore! ¹⁵—Rü taxüma i tacü i düxétüwa ne üxü rü taëxwa ixüçuxü nixi i Tupanapëxewa tüxü chixexëëxü. Natürü ngēma taäëwa ne üxü, rü ngēma waxi nixi i tüxü chixexëëxü i Tupanapëxewa. ¹⁶—Rü ngëxguma pixächixëgu, jrü nüxü pexinüë i ngēma ore! —ñanagürü. ¹⁷ Rü yexguma Ngechuchu duüxügüna ixügachigu rü ipatagu naxüçuxgu, rü norü ngúexügü nüxna nacagü nachiga ga yema nguxëëtae. ¹⁸ Rü nüma rü ñanagürü nüxü: —jPema rü ta éxna tama nüxü pecuëxéga i ngēma? jÉxna tama i nüxü pecuáxü na taxüma i tacü i düxétüwa ne üxü rü taëxwa ixüçuxü yixü i Tupanapëxewa tüxü chixexëëxü? ¹⁹—Erü guxüma i ngēma düxétüwa ne üxü rü taëxwa ixüçuxü, rü tama taäëwa nangu. Natürü taanüwa naxümare na yixcama taxünewa ínaxüxüçex —ñanagürü. Rü yemaäcü nüxü nixu na guxüma i ñna rü namexü na nangöxü. ²⁰ Rü ñanagürü ta: —Rü ngēma duüxüäëwa ne üxü, rü ngēma waxi nixi i Tupanapëxewa nachixexëëxü. ²¹⁻²²—Erü norü aixepewa i naäëwa nixi i ne naxüxü i muxüma i chixexügu. Rü ngēma nixi i chixexügu na naxinüxü, rü naxüneärü ngüchaüwe na naxüxü, rü na nangixü, rü na namäëtaxü, rü na i ngēmaã na inapexü, rü togüarü ngēmaxü na nüxü nangüchaüxü, rü chixexü na naxüxü, rü na yadoratëxáxü, rü chixexü i nacümagügu na naxüxü, rü na yaxäüxächiwëxëxü, rü na naxoregütëxáxü, rü nügu na yacuëxüxü, rü tama meã naäëxü na nacuáxü. ²³—Rü guxüma i ngēma chixexügü rü duüxüarü aixepewa nixi i ne naxixü, rü ngēma nixi i Tupanapëxewa nachixexëëxü —ñanagürü.

*Wüxi ga ngecü ga to ga nachiiãnecũãx ga Ngechuchuauxĩ yaxõcũchiga
(Mt 15.21-28)*

²⁴ Rũ yemawena rũ ããne ga Tiru nawa yexmaxũ ga naãnewa naxũ ga Ngechuchu. Rũ yema wüxi ga ãpatawa nangu, natũrũ tama nanaxwẽne na texẽ nõxũ cuáxũ ga yema na nanguxũ. Natũrũ taxuacũma nõgũ inicux. ²⁵ Rũ paxama nõxũ icuáchiga ga wüxi ga nge ga ngĩãcũwa ngoxo yexmẽxcũ. Rũ yema ixũ, rũ Ngechuchupẽxegu iyacaxãpũxũ. ²⁶ Rũ yema nge rũ to ga nachiiãnecũãx ga Chiropenĩchiucũãx iyixĩ. Rũ Ngechuchucẽx iyaxũ, rũ nõxũ icẽẽxũ na ngĩãcũwa ãnatẽxũchiãxũcẽx ga yema ngoxo. ²⁷ Natũrũ ga Ngechuchu rũ ñanagũrũ ngĩxũ: —Name nixĩ i taxacũgũxũxĩra tachibũexẽẽ. Erũ tama name i taxacũgũna tanayaxu i norũ õna na airugũna naxãxũcẽx — ñanagũrũ. [Rũ yema ñanagũrũ yerũ nõmagũ ga Yudiũgũ rũ nõgũ nixugũe na Tupanaxãcũgũxũchi yixĩgũxũ rũ yema togũ rũ ñoma airugũrũũ na yixĩgũxũ.] ²⁸ Natũrũ ngĩma ga yema nge rũ inangãxũ, rũ ngĩgũrũgũ: —Aixcũma nixĩ i curũ ore, Pa Corix, natũrũ woo airugũ rũ ta nanangõx i ngẽma õnatũchi i mechatũũgu nayixẽẽxũ i ngẽma ãpataarũ yoraxacũgũ —ngĩgũrũgũ. ²⁹ Rũ yexguma ga Ngechuchu rũ ñanagũrũ ngĩxũ: —Aixcũma name nixĩ i ngẽma nõxũ quixuxũ. Rũ marũ name i cutaegu, erũ ngẽma ngoxo rũ marũ ãnaxũxũ ngĩwa i cuxacũ —ñanagũrũ. ³⁰ Rũ yexguma ngĩpatawa nanguxgu ga yema ngecü, rũ yema ngĩrũ ngũrũcarewa ngĩxũ iyanguẽũ ga ngĩrũ bucũ. Natũrũ marũ ngĩxna ãnaxũxũ ga yema ngoxo.

Ngechuchu nanamexẽẽ ga wüxi ga yatũ ga ngauchixẽcü rũ moxũcü

³¹ Rũ Tiruanewa nataegu ga Ngechuchu. Rũ Chidãũãrũ ããnewa naxũpetũ, rũ ñuxũchi Decaporichiuaneãrũ ããnegũwa rũ ta naxũpetũ rũ ñuxmata Garirẽaaaneãrũ naxtaawa nangu. ³² Rũ yema naxũtawa nanagagũ ga wüxi ga yatũ ga ngauchixẽcü rũ moxũcü, rũ nõxna naxcẽx nacagũ ga nõxũ na yangõgũxũcẽx. ³³ Rũ yexguma ga Ngechuchu rũ noxrũwama duũxũgũna nanaga. Rũ naxmachixẽgu nixuxmẽx, rũ naxbũxãgũmaã nõgũ yawaixmẽxẽẽãcũma norũ conũgu ningõgũ. ³⁴ Rũ yemawena rũ daxũ nadawenũãcũma yaxna narũngũ, rũ guma yatũxũ ñanagũrũ: —Epẽta — ñanagũrũ. Rũ ngẽma rũ: “¡Ingoxna!” ñaxũchiga nixĩ. ³⁵ Rũ yexgumatama ningõxnamachixẽ ga guma ngauchixẽcü, rũ norũ conũ rũ marũ narũme rũ meã nidexa. ³⁶ Rũ Ngechuchu rũ duũxũgũxũ namu na taxũemaãma nõxũ yaxugũexũcẽx. Natũrũ yexguma yexeraãcü duũxũgũna nachũxãgu ga na taxũemaãma nõxũ yaxugũexũcẽx ga nachiga rũ yexeraãcü nõxũ nixugũeama. ³⁷ Rũ porãcũ nabaixãchiãẽgũ ga duũxũgũ, rũ ñanagũrũgũ: —Meãma nanaxũ i guxũma rũ woo ngauchixẽgũxũ rũ nayangõxnamachixẽgũxẽẽ, rũ ngeẽxgũxũ rũ nayadexagũxẽẽ —ñanagũrũgũ.

8

*Ngechuchu nanachibũexẽẽ ga 4000 ga duũxũgũ
(Mt 15.32-39)*

¹ Rũ wüxi ga ngunexũgu wenaxãrũ naxcẽx naxĩtaquẽxe ga muxũma ga duũxũgũ, rũ nõxũ natakuma ga norũ õnagũ. Rũ Ngechuchu rũ norũ ngũexũgũcẽx naca, rũ ñanagũrũ nõxũ: ² —Choxũ nangechãtũmũũgũ i ñãã duũxũgũ, erũ marũ tomaẽxpũx i ngunexũ nuã chauxũtawa nangẽxmagũ, rũ natakuma i nawemũ i nangõxgũxũ. ³ —Rũ ngẽxguma chi ngẽmaãcũmare íchayamugũgu, rũ chi ngũrũãchi namagu tá nayaturae, erũ nõmaxũgũ rũ yaxũwama ne naxĩ —ñanagũrũ. ⁴ Rũ norũ ngũexũgũ rũ nanangãxũgũ, rũ

ñanagürügü: —¿Natürü ñuxácü tá tanachibüexêê i núma i ngextá taxúema íxãpataxüwa? —ñanagürügü. ⁵ Rû Ngechuchu nüxna naca, rû ñanagürü: —¿Ñuxre i pãu pexü nangëxma i pemax? —ñanagürü. Rû nümagü nanangãxügü, rû ñanagürügü: —Toxü nangëxma i 7 i pãu —ñanagürügü. ⁶ Rû ñuxüchi ga Ngechuchu rû duüxügüxü namu na ñaxtüanewa natogüxüçëx. Rû nanade ga yema 7 ga pãu, rû Tupanana moxë naxã. Rû ñuxüchi inanabücu, rû norü ngüexügüna nanana. Rû nümagü rû duüxügüxü nayanu. ⁷ Rû nüxü nayexma ta ga ñuxre ga choxnixãcügü. Rû Ngechuchu rû Tupanana moxë naxã, rû ñuxüchi norü ngüexügüxü namu na iyaxüçëx. ⁸ Rû guxüma ga yema duüxügü rû meãma nachibüe ñuxmata meã nüxü yangu. Rû yexguma rû ta 7 ga pexchi nanapagü namaã ga yema íyaxügüxü. ⁹ Rû yema duüxügü ga yema chibüexü rû maneca 4000 nixü. Rû yemawena ga Ngechuchu rû duüxügüxü ínimugü. ¹⁰ Rû ñuxüchi wüxi ga nguegu nixüe namaã ga norü ngüexügü, rû Damanútaanewa naxü.

Parichéugü naxcëx ínacagü ga wüxi ga cuëxruü ga Tupanaãrü poramaã üxü (Mt 16.1-4; Lc 12.54-56)

¹¹ Rû Ngechuchuxütawa nangugü ga Parichéugü, rû inanaxügüe ga na namaã yaporagatanüçüxü. Rû nüxna nacagüe na nüxü nüxü nadauxëêxüçëx ga wüxi ga cuëxruü ga Tupanaãrü poramaã naxüxü, na yemaãcü nüxü naxügüxüçëx, rû nüxü nacüexügüçëx ngoxi aixcüma Tupana Nane yüxü. ¹² Rû Ngechuchu rû poraãcü yaxna narüngü, rû ñanagürü: —¿Tüxcüü i ñãã duüxügü naxcëx ínacagü i wüxi i cuëxruü i Tupanaãrü poramaã üxü? Rû aixcüma pemaã nüxü chixu rü bai i wüxi i cuëxruü tá nüxü chawëx —ñanagürü. ¹³ Rû yema ñaxguwena, rû nüxna yema nixü ga yema duüxügü. Rû wenaxãrü nguegu nixüe rû naxtaxaarü tocutüwa naxü.

Parichéuarü pãüãrü puxëëruüchiga (Mt 16.5-12)

¹⁴ Natürü ga norü ngüexügü rû nüxü inayarüngümaë ga norü òna na íyangegüxü, rû wüxixicatama ga pãu nüxü nayexma ga nguewa. ¹⁵ Rû yexguma ga Ngechuchu rû nayaxucüxëgü, rû ñanagürü nüxü: —¿Düçëx, pexuãë naxcëx i Parichéugüarü rû Erodearü pãüãrü puxëëruü! —ñanagürü. ¹⁶ Rû yema norü ngüexügü rû inanaxügüe na nügümaã ñagüxü: —Ngëma ñanagürü tüxü erü tama tawemü ta ítingegü —ñanagürügü. ¹⁷ Natürü ga Ngechuchu rû nüxü nacüexama na yema ñagüxü, rû yemacëx ñanagürü nüxü: —¿Tüxcüü “Tangearü ònaãx”, ñaperügügü? ¿Éxna ñuxma rû ta tama nüxü pecüexgüega rû tama nüxü picüexãchitanü i ngëmachiga? ¿Éxna pexcëx naxë i ngëma? ¹⁸ Pema rû pexãëtügüchirëx, ¿rû ñuxácü i tama nüxü pedauxü? Rû pëxãmachixëgüchirëx, ¿rû ñuxácü i tama nüxü pëxínüexü? ¿Rü éxna tama nüxna pecüexãchie ga yexguma chayamuxëëgu ga yema pãu rü choxnü? ¹⁹ —Rû yexguma yema 5000 ga duüxügüxü chayanuxgu ga yema wüximëëxpüx ga pãu, ¿rû ñuxre ga pexchigü yüxü ga napagücü ga yexguma penadexgu ga yema íyaxügüxü? —ñanagürü. Rû nümagü nanangãxügü rû ñanagürügü: —Rû 12 ga pexchigü —ñanagürügü. ²⁰ Rû ñuxüchi ñanagürü ta ga Ngechuchu: —Rû yexguma yema 4000 ga duüxügüxü chayanuxgu ga yema 7 ga pãu, ¿rû ñuxre ga pexchigü yüxü ga napagücü ga yexguma penadexgu ga yema íyaxügüxü? —ñanagürü. Rû nanangãxügü rû ñanagürügü: —7 ga pexchigü —ñanagürügü. ²¹ Rû yexguma rû ñanagürü nüxü: —¿Rü ñuxma rû ta taütama

nüxü pecuèxgüégaxü na Parichéugücüma rü Erodecüma i chixexüchiga yixü i ngëma pãũarü puxëëruügu pemaã chixuxü? —ñanagürü.

Ngechuchu rü nanamexëë ga wüxi ga ngexetüciü ga Bechaídawa

²² Rü yemawena rü Bechaídaarü ñãnewa nangugü. Rü yéma Ngechuchuxütawa nanagagü ga wüxi ga ngexetüciü. Rü nüxü nacëèxügü na nüxü yangögüxüçëx. ²³ Rü Ngechuchu rü guma ngexetüciümëxëgu nayayauxãchi, rü ñãneãrü yéamaxüra nanaga. Rü yéma naxbüxãgümaã nayawaixetüxëë, rü ñuxüchi naxëtügu ningögü, rü nüxna naca ngoxi marü tacüxü nadau. ²⁴ Rü yexguma ga guma ngexetüciü rü inanaxügü ga na yadauchixü. Rü ñanagürü: —Nüxü chadau i duüxügü i ñoma naïgü i ixixünerüü ixigüxü —ñanagürü. ²⁵ Rü yexguma ga Ngechuchu rü wenaxãrü naxëtügu ningögü. Rü nüma ga guma yatü rü meãma inadawenü. Rü yemaãcü naxcëx nitaane rü meãma naxcëx nangox ga guxüma. ²⁶ Rü yemawena ga Ngechuchu rü napatawa nanamu. Rü namaã nüxü nixu na tama ñãnecëx nataeguxü.

Pedru nüxü nixu rü Ngechuchu nixü ya yima Tupana nüxü unetacü ya Cristu (Mt 16.13-20; Lc 9.18-21)

²⁷ Rü yemawena rü Checharéa ga Piripuanewa yexmane ga ñãnexãcüguwa naxü ga Ngechuchu norü ngüexügümaã. Rü namawa rü Ngechuchu rü norü ngüexügüna naca, rü ñanagürü nüxü: —¿Ñuxü ñagüxü i duüxügü i chauchiga na texé chiixü i chomax? —ñanagürü. ²⁸ Rü norü ngüexü nanangãxügü rü ñanagürügü: —Nangëxma i duüxügü rü:

“Cuáü ya baiüxëëruü quixü”, ñagüxü, rü togü i:

“Ería quixü”, ñagüxü, rü togü rü:

“Wüxi ga nuxcümaücü ga Tupanaãrü orearü uruü quixü”, ñagüxü —ñanagürügü. ²⁹ Rü yexguma Ngechuchu rü nüxna naca rü ñanagürü: —¿Rü pema i ñuxü ñapegügüxü choxü na texé chiixü? —ñanagürü. Rü Pedru nanangãxü rü ñanagürü: —Cuma nixü i Cristu i Tupana cuxü unetacü quixü —ñanagürü. ³⁰ Rü yexguma ga Ngechuchu rü norü ngüexügüxü namu na taxüemaãma nüxü yaxugüexüçëx ga yema ore ga nachiga.

Ngechuchu nanaxunagü ga norü yuchiga (Mt 16.21-28; Lc 9.22-27)

³¹ Rü yemawena rü Ngechuchu inanaxügü ga norü ngüexügümaã nüxü na yaxuxü ga tacü tá nüxü na üpetüxü. Rü ñanagürü nüxü: —Choma i Tupana Nane na duüxüxü chiixü, rü poraãcü ngüxü tá chinge. Rü choxü tá naxoxgü i Yudiugüarü ãëxgacügüerugü, rü paigüarü ãëxgacügü, rü ngëma ngüexëëruügü i Moïchéarü mugüwa nguxëëtaegüxü. Rü tá choxü nimëxgü, natürü tomaëxpüx i ngunexügu rü wena táxarü chamaxü —ñanagürü. ³² Rü yema ore rü meãma namaã nanangoxëë. Natürü yexguma ga Pedru rü nüxica noxrüwama Ngechuchuxü naga, rü inanaxügü ga na naxucüxëãxü na tama yemaãcü yadeaxüçëx. ³³ Natürü ga Ngechuchu rü nadauegu, rü norü ngüexügüxü nadawenü. Rü Pedruxü nanga, rü ñanagürü: —¡Choxna ixügachi, Pa Chatanáx! Cuma rü tama Tupana nagu rüxñüxügu curüxñü, erü yatügü nagu rüxñüxügumare nixü i curüxñüxü —ñanagürü. ³⁴ Rü yexguma ga Ngechuchu rü norü ngüexügüçëx rü duüxügüçëx naca. Rü ñanagürü nüxü: —Rü ngëxguma texé chowe rüxüxchaügu, jëcü nüxü tarüxo i tümaãrü ngüchaü, rü ñoma wüxi i curucha ngixü tayaxuxürüü namaã tapora i guxüma i ngüxü i chauxcëx tingexü, rü chowe tarüxü! ³⁵—Erü yixema tügü

maxēchaxēēchaũxē rü tá tayu. Natürü yixema chaugagu rü ore i mexũgagu yuxe, rü aixcũma tá tamaxũ. ³⁶ —¿Rü tacũwa nüxũ namexũ ya yatũ ega ngēxguma nayauxāgu i guxũma i ñoma i naāneārũ ngēmaxũgũ, natürü norũ maxũ iyanatauxēēgu? ³⁷ —Rü ngēxgumarũ ta, ¿rü ñuxre i dīeru iyangu na ngēmamaā naxcēx nataxexũ i norũ maxũ i wũxi ya yatũ? ³⁸ —Rü ngēxguma texē i ñaā duũxũgũ i pecaduāxgũũ i tama yaxõgũxũpēxewa chauxcēx taxānegu rü naxcēx taxānegu i chorũ ore, rü choma i Tupana Nane i duũxũxũ na chiixũ rü tá ta tũmacēx chaxāne i ngēxguma Chaunatũarũ poramaā rü norũ orearũ ngeruũgũ i daxũcũāx i uũnegũxũmaā wenaxārũ núma chaxũxgu.

9

¹ Rü yexgumarũ ta ga Ngechuchu rü ñanagürü nüxũ: —Aixcũma pemaā nüxũ chixu rü ñuxre i duũxũgũ i nuā ngēxmagũxũ rü tãitáma nayu ñuxmatáta nüxũ nadēux na ñuxácũ āēxgacũ ya poracũ na yĩxũ ya Tupana —ñanagürü.

Ngechuchu rü toraxũācũ nangox
(Mt 17.1-13; Lc 9.28-36)

² Rü 6 ga ngunexũguwena rü Ngechuchu rü wũxi ga mēxpũnewa naxũ. Rü ínayagagũ ga Pedru rü Chaũtiāgu rü Cuáũxĩcatama. Rü yēma yema ngúexũgũpēxewa toraxũācũ nangox ga Ngechuchu. ³ Rü niyauracũ ga naxchiru rü nacómũxũchi. Rü nataxuma i yaxuchiruxũ i nüxũ cuáxũ na ngēmaācũ nacómũxēēāxũ. ⁴ Rü nüxũ nadaugũ ga Eria rü Moĩché ga yēma Ngechuchumaā idexagũxũ. ⁵ Rü yexguma ga Pedru rü ñanagürü Ngechuchuxũ: —Pa Ngúexēeruũx, namexēchi nixĩ na nuā ingēxmagũxũ. Rü tá tanaxũ ya tomaēxpũx ya dũxenũ, rü wũxi ya cuxcēx, rü naĩ ya Moĩchécēx, rü naĩ ya Eriacēx —ñanagürü. ⁶ Rü yema na poraācũ nabaixāchiāēgũxũ ga yema ngúexũgũ, rü yemacēx ga Pedru rü tama nüxũ nacuēx ga na ñuxũ ñaxũ. ⁷ Rü yexgumatama wũxi ga caixanexũ ínaruĩ, rü natanũgu nayangējexema. Rü yema caixanexũwa inanaxũ ga wũxi ga naga ga ñaxũ: —Daa nixĩ ya Chaune ya nüxũ changechaũxũchicũ. ¡Rü nüxũ iperũxĩnũē! —ñaxũ. ⁸ Rü yexgumatama nũgücũwagu ínadaueguāchitanũ, rü taxũexũma ga toguxũ nadaugũ, rü Ngechuchuxũxĩcatama. ⁹ Rü yexguma ínaxĩgũgu nawa ga guma mēxpũne, rü Ngechuchu nüxna naxāga ga taxũemaāma na nüxũ yaxugũexũ ga yema yēma nüxũ nadaugũxũ, ñuxmatáta yema ínadxgu ga nũmax. ¹⁰ Rü yemacēx ga yema ngúexũgũ rü bexma nüxũ nacuēxgũ ga yema nüxũ nadaugũxũ. Natürü nũgũna nacagũ ga tacũchiga na yĩxũ ga:

“Yuwa ínadxgu”, ñaxũ. ¹¹ Rü ñuxũchi ga yema ngúexũgũ rü Ngechuchuna nacagũ, rü ñanagürũgũ: —¿Tũxcũũ i ngúexēeruũgũ i ore i mugũwa nguxēētaegũxũ rü ñanagürũgũ:

“Eria tá nixĩ ya nüxĩra cuxũpa núma ũcũ?” ñanagürũgũ. ¹² Rü Ngechuchu nanangāxũ, rü ñanagürũ nüxũ: —Aixcũma nixĩ i Eria na nüxĩra núma naxũxũ na chauxũpa namexēēāxũcēx i guxũma. ¿Natürü tũxcũũ i ore i ũmatũxũwa i ñaxũ:

“Rü Tupana Nane ya duũxũxũ ixĩcũ rü tá ngũxũ ninge, rü duũxũgũ rü tá nüxũ naxoe”,

ñaxũ? ¹³ Natürü i choma rü pemaā nüxũ chixu, rü Eria rü marũ núma naxũ. Natürü ga duũxũgũ rü nũmagũ nanaxwēxegũxũācũma poraācũ chixri namaā nachopetũ, yexgumarũ ga ore ga ũmatũxũwa nüxũ yaxuxũrũũ —ñanagürü.

Ngechuchu nanamexēē ga wũxi ga buxũ ga ngoxo nawa yexmaxũ
(Mt 17.14-21; Lc 9.37-43)

14 Rū yexguma yema togū ga norū ngúexūgūtānūwa nangugūgu, rū yéma nūxū nadaugū ga muxūma ga duūxūgū ga yema ngúexūgūxū īchomaēguāchixū. Rū űuxre ga ngúexēēruūgū ga Moīchēarū mugūwa nguxēētaegūxū, rū yéma nīporagatanūcūū namaā ga yema ngúexūgū. 15 Rū yexguma Ngechuchuxū nadaugūga ga yema muxūma ga duūxūgū, rū porācū nāḡaīxāchīāēgū. Rū guxūma naxcēx nībuxmū na nūxū yanamoxēgūxūcēx. 16 Rū nūma ga Ngechuchu rū nūxna naca, rū űanagūrū nūxū: —ĴTacū nīxī i pema namaā naxcēx īpīporagatanūcūūxū? —űanagūrū. 17 Rū wūxi ga yema duūxūgū ga yéma yexmagūxū rū nanangāxū, rū űanagūrū: —Pa Ngúexēēruūx, nuā cuxcēx tūxū chaga ya chaune, erū tūmawa nangēxma i wūxi i ngoxo i tūxū ngegaxēēxū. 18 —Rū ngextā ītangēxmaxūwa rū ngēxma tūxū yaxūgu rū waixūmūānegu tūxū naña. Rū tarūchiēx, rū tixūxchapūta, rū ngēxma tiyūāchi. Rū marū nūxū chacēēx i curū ngúexūgū na tūmawa īnatēxūchīāxūcēx i ngēma ngoxo, natūrū tama nūxū inaxīnū —űanagūrū. 19 Rū Ngechuchu nanangāxū, rū űanagūrū: —Pa Duūxūgū i Tama Yaxōgūxū, Ĵűuxgurātāta i pemaā chanuxmaxū rū yaxna pemaā chaxīnūxū? ĴNuā penaga ya yīma bucū! —űanagūrū. 20 Rū Ngechuchuxūtawa nanagagū ga guma bucū. Natūrū yexguma Ngechuchuxū nadēuxgu ga yema ngoxo, rū guma bucūxū naxū ga na yayuāchixēēāxū. Rū yexma űaxtūānegu nayangu. Rū yexma nīdixegugū, rū narūchiēx. 21 Rū Ngechuchu rū guma bucūnatūna naca, rū űanagūrū: —ĴRū űuxgumama nīxī ga naxcēx inaxūgūxū ga yema? —űanagūrū. Rū guma bucūnatū nanangāxū rū űanagūrū: —Nabuxgumamatama. 22 Rū muēxpūxcūna i ngēma ngoxo rū űxūxetūgu rū dexāgu nanañāxū na ngēmaācū yamāāxūcēx. Rū ngēmacēx ega cumaā nangūgu na Ĵacū toxcēx cuxūxū, Ĵrū cuxū tangechaūtūmūūgū, rū toxū rūngūxēē! —űanagūrū. 23 Rū yexguma ga Ngechuchu rū űanagūrū nūxū: —ĴRū tūxcūū “ega chomaā nanguūxgu”, űacurūgū? Erū guxūma natauxcha tūmacēx ya yīxema yaxōxē —űanagūrū. 24 Rū yexguma ga guma bucūnatū rū tagaācū űatarūgū: —Chayaxō. ĴChoxū rūngūxēē na yexeraācū chayaxōxūcēx! —űatarūgū. 25 Rū yexguma Ngechuchu nūxū dēuxgu na muxūma ga duūxūgū marū yexma ngutaquēxexū, rū nananga ga yema ngoxo. Rū űanagūrū nūxū: —Pa ngoxo i Ngegaxēēruū rū Ngauchīxēēēruūx, Ĵchoma cuxū chamu na nawa īcuxūxūxū ya daa bucū, rū tagutāma wena nagu cuyaxūcuxū! —űanagūrū. 26 Rū yexguma ga yema ngoxo rū aita naxū, rū wenaxārū guma bucūxū nīyuāchixēē. Rū űuxūchi nawa īnaxūxū, rū űoma nayuxuchixūrūū yéma nanatēx. Rū yemacēx ga muxūma ga duūxūgū rū űanagūrūgū: —Marū nayuxuchi nīxī —űanagūrūgū. 27 Natūrū ga Ngechuchu rū naxmēxgu nayayaxāchi, rū īnanadaxēē. Rū nūma ga guma bucū rū īnachi. 28 Rū yemawena ga Ngechuchu rū wūxi ga īpatagu nayaxūcu namaā ga norū ngúexūgū. Rū yéma nūxīca nūxna nacagū, rū űanagūrūgū nūxū: —Pa Corix, Ĵtūxcūū i toma rū taxuacūma ītanatēxūchi i ngēma ngoxo? —űanagūrūgū. 29 Rū Ngechuchu nanangāxū rū űanagūrū: —Tama ngēmaācūmare ītanatēxūchi i ngēmarūū īxīxū i ngoxo. Natūrū tanaxwēxe i Tupanana tanaxuaxū i tōrū yumūxēwa na nūma īnatēxūchīāxūcēx. Rū ngēmaācūxīcatama nīxī i īnaxūxūxū —űanagūrū.

Ngechuchu ru wenaxārū nanaxunagū ga norū yuchiga
(Mt 17.22-23; Lc 9.43-45)

30-31 Rū yéma inaxīāchi rū Gariréaanewa nachopetū. Natūrū ga Ngechuchu rū tama nanaxwēxe ga texē nūxū na cuāxū ga na yéma nayexmaxū, yerū norū

ngúexüügüxü ñangúexëë. Rû ñanagürü nüxü: —Tupana Nane ya duüxüxü ixïcü, rû duüxügü tá nayayauxgü rû tá nayamëxgü. Natürü tomaëxpüx i ngunexügu rû wena tá ñarüda —ñanagürü. ³² Natürü ga nümagü rû tama meã nüxü nacuéxgü ga ñacüchiga na yïxü ga yema ore, rû namuë ga nüxna na nacagüexü.

¿Texé tá tixí ya guxããrú yexera ixixë?

(Mt 18.1-5; Lc 9.46-48)

³³ Rû Capernáürü ñanewa nangugü. Rû yexguma ñxwa nayexmagügu, rû Ngechuchu nüxna naca, rû ñanagürü: —¿Rü tacü nixí ga pegümaã naxcëx piporagaetanüxü ga namawa? —ñanagürü. ³⁴ Natürü ga nümagü rû nangeëxgümare, yerü ga namawa rû nachigagu nügümaã niporagaetanü ga texé tixü ga natanüwa rüyexeramaëxë. ³⁵ Rû yexguma ga Ngechuchu rû ñarüto, rû naxcëx naca ga yema 12 ga norü ngúexüügü, rû ñanagürü nüxü: —Rü ngëxguma texé naxwëxegu na guxãëtüwa na taxüxü, rû name nixí i noxri rû guxããrú ñaxtúmaëwa tügü taxüxëë na guxããrú ngüxëëruü tixü —ñanagürü. ³⁶ Rû yemawena rû norü ngãxütanügu nayachixëë ga wüxi ga buxü. Rû ñuxüchi nachacüügu yayauxãchiãcüma ñanagürü: ³⁷ —Rü texé ya chauégagu meã nayaxúxe i wüxi i buxü i ñaãrüü, rû choxü nixí i tayaxuxü. Rû texé ya choxü yaxúxe, rû tama choxüxícatama tayaxu, natürü yima núma choxü mucü ya Chaunatüxü rû ta nixí i tayaxuxü —ñanagürü.

Texé ya tama taxchi aixe rü torü ngüxëëruü tixí

(Mt 10.42; Lc 9.49-50)

³⁸ Rû yexguma ga Cuãü rû ñanagürü nüxü: —Pa Ngúexëëruüx, nüxü tadau ga wüxi ga yatü ga cuégagu ngoxogü íwoxüxü. Natürü toma nüxna tanachuxu ga yema, yerü tama tatanüxü nixí ga nümax —ñanagürü. ³⁹ Natürü Ngechuchu nanangãxü, rû ñanagürü: —Tama name i nüxna na penachuxuxü. Erü texé ya chauégagu naxúxe i wüxi i mexü i Tupanaãrú poramaã üxü, rû taxucürüwama yixcama chixri chauchiga tidexa. ⁴⁰ Erü texé ya tama taxchi aixe, rû tórü ngüxëëruü tixí. ⁴¹ Rû texé ya woo wüxitama i pochuyuãcu i dexá pexna äxë naxcëx na chorü duüxügü pixíxüxü, rû aixcüma pemaã nüxü chixu rû tá tüxü nangëxma i túmaãrú ñmare —ñanagürü.

Naxãücüma nixí na pecadugu inguxü

(Mt 18.6-9; Lc 17.1-2)

⁴² Rû ñanagürü ta: —Texé ya pecadugu nangüxëxë i wüxi i ñaã buxügü i choxü yaxögüxü, rû tümacëx rû narümemae chi nixí i noxtacüma wüxi ya nuta ya tacü tümanaxãwa tayangacuchi, rû ngëmaãcü taxtüchiüwa tüxü tayatãe. ⁴³⁻⁴⁴ —Rü ngëxguma chí wüxi ya cuxmëx pecadugu cuxü nguxëëgu, rû name nixí i noxtacüma ñcnadae. Erü narümemae nixí i cuboxmëxãcüma cunayaxu i curü maxü na tama guxüne ya cuxmëx ya mexünemaã nawa quitëxcuchixücëx ya yima üxü ya ngoxogü nagu poxcuene ya taguma ixoxüne. ⁴⁵⁻⁴⁶ —Rü ngëxguma chí wüxi ya cucutü pecadugu cuxü nguxëëgu, rû name nixí i noxtacüma ñcnadae. Erü narümemae nixí i cubocutüãcüma cunayaxu i curü maxü na tama guxüne ya cucutü ya mexünemaã nawa quitëxcuchixücëx ya yima üxü ya ngoxogü nagu poxcuene. ⁴⁷⁻⁴⁸ —Rü ngëxguma chí wüxi ya cucetü pecadugu cuxü nguxëëgu, rû name nixí i noxtacüma ñcnacaxüchi. Erü narümemae nixí i wüxitama ya cucetümaã Tupana ñëxgacü ñixüxüwa quixücu, na tama guxüne ya cucetü ya mexünemaã nawa quitëxcuchixücëx ya yima üxü ya taguma ixoxüne ya ngoxogü nagu poxcuene

i ngextá òxmigü taguma íyuxüwa. ⁴⁹—Rü aixcüma ñoma ònawa yucüra nagüxürüü tá nixí na guxátáma guxchaxüwa chopetüxü. ⁵⁰—Name ya yucüra. Natürü ngëxguma chi nangeacagu, çrü ñuxácü tá wenaxärü naxääca? ¡Rü meã pegüna pedaugü na ñoma yucüra ya taguma iyarüngeacacürüü na namexücëx i perü maxü! ¡Rü meã pegümaã pemaxë! —ñanagürü.

10

Ngechuchu namaã nangüexëetae na tama namexü na texé tümamëxü ítáxü
(Mt 19.1-12; Lc 16.18)

¹ Rü yexguma ga Ngechuchu rü Capernáüärü ñánewa inaxüächi. Rü Yudéaanewa naxüpetü rü ñuxmata natü ga Yudáüärü tocutüwa nangu. Rü yéma rü wenaxärü naxcëx nangutaquëxegü ga duüxügü. Rü núma rü inanaxügü ga na nangüexëetaexü guxügurüü. ² Rü ñuxre ga Parichéügü rü naxcëx naxí ga na nüxü yaxügüxücëx yerü chixexügu nananguxëëgüchaü. Rü yemacëx nüxna nacagüe, rü ñanagürügü: —¿Namexü i cuxcëx na wüxi ya yatü rü naxmëxü ínatáxü? —ñanagürügü. ³ Rü núma nanangäxü, rü ñanagürü nüxü: —¿Rü tacü yíxü ga Moíché pexü muxü? —ñanagürü. ⁴ Rü nümagü nanangäxügü, rü ñanagürügü: —Moíché nüxü nixu ga na tama nachuxuxü na wüxi ya yatü rü ínatámaxü, ega wüxi i popera i tëxgüpane ngíxna naxäxgu —ñanagürügü. ⁵ Rü yexguma ga Ngechuchu rü nanangäxü, rü ñanagürü nüxü: —Rü yema na taxüegama na pexínüexügagu nixí ga Moíché ga tama pexna nachüaxü ga pexmëxü na ípetáxü. ⁶ —Natürü noxriarü ügügu, rü Tupana nanaxü ga yatüxü rü ngexü. ⁷ —Rü ngëmacëx ya yatü rü tá nanatü rü naëna nixügachi na naxmëxmaã inaxäüxücëx. ⁸ —Rü ngëmaäcü i ngëma taxre rü ñoma wüxitama i duüxürüü tá nixígü. Rü marü táütáma taxre nixí, erü wüxi tátama nixí. ⁹ —Rü ngëmacëx taxucürüwa texé nügüna tayaxígachixëë i ngëma taxre i Tupana nügüna mugüxü —ñanagürü. ¹⁰ Rü yexguma marü ípatawa nangugügu, rü norü ngüexügü rü wenaxärü nüxna nacagüe naxcëx ga yema. ¹¹ Rü Ngechuchu rü ñanagürü nüxü: —Rü yíxema tümamëxü ítáxe rü naí i ngëmaã ämaxë rü pecadu taxü ngímaã i ngëma noxriücü i tümamëx. ¹² —Rü ngëxgumarüü ta, ega wüxi i nge ítëxtegu rü naí ya yatümaã naxätegu, rü ngíma rü ta pecadu ixü —ñanagürü.

Ngechuchu rü buxügüxü nameãxë
(Mt 19.13-15; Lc 18.15-17)

¹³ Rü yéma Ngechuchuxütawa tüxü nagagü ta ga ñuxre ga buxegü na tüxü yangögügüxücëx. Natürü ga yema norü ngüexügü rü inanaxügüe ga tüxü na yangagüxü ga guxema tümaxäcüxëgüxü Ngechuchuxütawa gagüxe. ¹⁴ Rü yexguma yemaxü nadëuxgu ga Ngechuchu, rü naäëwa nangux, rü ñanagürü nüxü: —Chanaxwëxe i chauxütawa naxí i buxügü. ¡Rü täxü i nüxna penachuxuxü! Erü Tupana äëxgacü íixíxüwa rü tümacëx nixí ya yíxema ñaa buxügürüü taxuüma i chixexüxü icuáxe. ¹⁵ —Rü aixcüma pemaã nüxü chixu rü texé ya tama wüxi i buxürüü Tupanaxü yaxüxe na tümäärü äëxgacü yíxücëx, rü tagutáma nagu taxücu i ngëma naäne i Tupana äëxgacü íixíxüwa —ñanagürü. ¹⁶ Rü núma rü tüxü naganagütanü ga guxema buäxta, rü tümäärugügu naxümëxäcüma ñanagürü tüxü: —¡Tupana pexü rüngüxëëx! —ñanagürü.

Wüxi ga yatü ga dïerüxüchixü Ngechuchumaã nidexa
(Mt 19.16-30; Lc 18.18-30)

¹⁷ Rū yexguma marū inaxūāchichaũgu ga Ngechuchu, rū yéma naxcèx niña ga wūxi ga yatū. Rū napēxegu nayacaxāpūxū, rū nūxna naca rū ñanagūrū nūxū: —Pa Ngúexēēruū ya mecūx, ¿tacū tá chaxūxū na chanayaxuxūcèx i maxū i taguma gúxū? —ñanagūrū. ¹⁸ Rū Ngechuchu nanangāxū, rū ñanagūrū nūxū: —¿Tūxcūū, “Mecū” ñacurūgū choxū? Erū Tupanaxīcatama nixī ya mecū ixīcū, rū nataxuma i to. ¹⁹ Cuma rū marū nūxū cucuèx i Tupanaārū mugū i ñaxū:

“¡Tāūtáma cumáeta, rū tāūtáma naī i ngemaā icupe, rū tāūtáma cungītèex, rū tāūtáma doraxū quixu i togūchiga, rū tāūtáma quidoratèex, rū tūmaga naxīnū ya cunatū rū cue!”

ñaxū —ñanagūrū. ²⁰ Rū yexguma ga guma yatū rū ñanagūrū nūxū: —Pa Ngúexēēruūx, rū chorū bucūmatama meā chanaxaure i guxūma i ngēma mugū i nūxū quixuxū —ñanagūrū. ²¹ Rū yexguma ga Ngechuchu rū nūxū nangechaũācūma nūxū nadawenū, rū nanangāxū rū ñanagūrū: —Rū wūxixicatama cuxū nataxu. ¡Rū íixū, rū namaā yataxe i guxūma i curū ngēmaxūgū, rū ñuxūchi togū i ngearū ngēmaxūāxgūxūna naxā i ngēma curū natanū! Rū ngēmaācū tá cuxū nangēxma i cuchica i daxūguxū i naānewa. Rū ngēmawena rū marū name i chowe curūxū —ñanagūrū. ²² Natūrū nūma ga guma yatū rū nanaxīxāchiāē ga yexguma nūxū naxīnūgu ga yema ore. Rū nangechaũācūma ínixū, yerū namuxūchi ga norū yemaxūgū. ²³ Rū Ngechuchu rū nūxū nidaugūāchi, rū ñanagūrū norū ngúexūgūxū: —Naguxchaxūchi tá nixī na Tupana āēxgacū iyíixūwa na yachocuxū i ngēma díeruāxūchigūxū —ñanagūrū. ²⁴ Rū nabaixāchiāēgū ga norū ngúexūgū namaā ga yema ore. Natūrū ga Ngechuchu rū wenaxārū namaā nūxū nixu, rū ñanagūrū: —Pa Chauxacūgūx, ñuxācū wūxi i guxchaxūchixū nixī na Tupana āēxgacū iyíixūwa na yaxūcuxū i wūxi i duūxū. ²⁵ —Rū aixcūma pemaā nūxū chixu rū ñoma wūxi i cameyu na taxucūrūwama wūxi ya ucumaxētūwa naxūpetūxūlārū yexera narūguxchamaē naxcèx i wūxi i duūxū i díeruāxūchixū na yaxūcuxū i ngextá Tupana āēxgacū íixūxūwa —ñanagūrū. ²⁶ Rū yexguma yemaxū naxīnūēgu ga norū ngúexūgū, rū yexeraācū nabaixāchiāēgū. Rū nūgūna nacagūe, rū ñanagūrūgū: —¿Rū texé tá ēxna tixī ya nayaxūxe i maxū i taguma gúxū? —ñanagūrūgū. ²⁷ Rū Ngechuchu rū nūxū nadawenū, rū nanangāxū rū ñanagūrū nūxū: —Yatūgū rū taxuacūma nūgū namaxēē, natūrū Tupanaāxū rū natauxcha i ngēma, erū Tupanacèx rū nataxuma i tacū i guxchaxū —ñanagūrū. ²⁸ Rū yexguma inanaxūgū ga Pedru ga na yadexaxū, rū ñanagūrū nūxū: —Toma rū marū yéma tanawogū ga guxūma ga torū yemaxūgū na cuwe tarūxūcèx —ñanagūrū. ²⁹⁻³⁰ Rū Ngechuchu nanangāxū, rū ñanagūrū: —Aixcūma pemaā nūxū chixu rū texé ya chaugagu rū ore i maxēxēēruūgagu tūmapatana, rū ēxna tūmaēneēgūna, rū ēxna tūmaēyēxgūna, rū ēxna tūmaēna, rū ēxna tūmanatūna, rū ēxna tūmaxācūgūna, rū ēxna tūmaānegūna ngema íxūxē, rū tá tanayaxu i tūmaārū natanū. Rū aixcūma ñuxma i ñoma i naānewa rū tá tanayaxu i 100 ēxpūxcūna ya tūmapatagū, rū tūmaēneēgū, rū tūmaēyēxgū, rū tūmaēgū, rū tūmaxācūgū, rū tūmaānegū. Natūrū ngēxgumarūū tá ta tanayaxu i ngūxūgū i togū tá tūxū ingexēēgūxū. Natūrū yixcamaxūra i daxūguxū i naānewa rū tá tanayaxu i maxū i taguma gūxū. ³¹ —Natūrū muxūma i nūmaxū i ñuxma ñoma i naānewa duūxūgū wixpēxewa ūgūxēēxū, rū daxūguxū i naānewa rū Tupana tá wixweama nanaxūgūxēē. Rū muxūma i nūmaxū i ñuxma ñoma i naānewa duūxūgū wixweama ūgūxēēxū, rū daxūguxū i naānewa rū Tupana tá wixpēxewa

nanaxügüxêê —ñanagürü.

Ngechuchu rü wenaxârü nanaxunagü ga norü yuxchiga
(Mt 20.17-19; Lc 18.31-34)

³² Rü Yerucharêüwaama naxî. Rü nüma ga Ngechuchu rü norü ngüxügüpêxegu nixü. Rü nümagü rü nabaixächiâëgü, rü yema togü ga duüxügü ga wixweama âgüxü rü namuê. Rü Ngechuchu rü wenaxârü noxrüwama naxcêx naca ga yema 12 ga norü ngüexügü. Rü inanaxügü ga namaã nüxü na yaxuxü ga tacü tá nüxü na ngupetüxü. ³³ Rü ñanagürü nüxü: —Pema nüxü pecuêx na marü ingaicaxü na Yerucharêüwa ingugüxü. Rü ngema rü duüxügü rü tá chixri chomaã nachopetü. Rü paigüarü âëxgacügü rü ngüexêëruügü i ore i mugüwa nguxêëtaegüxüna tá choxü naxuaxügü. Rü nümagü rü tá chomaã nanaxuegugü na chayuxü, rü tá ngêma Dumacüâxgüna choxü namugü. ³⁴ Rü ngêmagü tá nixî i chaugu idauxcüraügüxü. Rü tá choxna nacuaixgüe, rü tá choxna nanaçuaixcagü, rü tá choxü nayuxêëgü. Natürü tomaëxpüx i ngunexüguwena táxarü chamaxü —ñanagürü.

Chaütiágu rü Cuáü rü wüxi ga ngüxêêcêx ínacagü
(Mt 20.20-28)

³⁵ Rü Ngechuchucêx naxî ga Chaütiágu rü Cuáü ga Zebedéu nanegü, rü ñanagürügü nüxü: —Pa Ngüexêëruüx, tanaxwêxe i toxcêx cunaxü i ngêma ngüxêê i naxcêx tá cuxna taçaxü —ñanagürügü. ³⁶ Rü nüma rü nüxna naca, rü ñanagürü: —¿Tacü nixî i penaxwêxexü na pexcêx chanaxüxü? —ñanagürü. ³⁷ Rü ñanagürügü: —Rü ngêxguma âëxgacüxü quingucuchigu, rü tanaxwêxe na wüxie i toma rü curü tügüneçüwawa tarüttoxü, rü togue i curü toxwecüwawa —ñanagürügü. ³⁸ Rü Ngechuchu nanangâxü, rü ñanagürü nüxü: —Pema rü tama nüxü pecuêx na tacücêx ípeçaxü. ¿Rü pexü chi natauxchaxü i na peyaxaxüxü i ngêma axexü i üxchiüxü i choma tá chixaxüxü? ¿Rü namaã chi peporaexü i ngêma ngüxü i tá chingexü? —ñanagürü. ³⁹ Rü nümagü nanangâxügü rü ñanagürügü: —Ngêmaâcü, namaã tá taporae —ñanagürügü. Rü Ngechuchu nanangâxü, rü ñanagürü nüxü: —Aixcüma tá nixî i chauxrüü peyaxaxüxü i ngêma axexü i üxchiüxü rü chauxrüü ngüxü na pingegüxü. ⁴⁰ —Natürü ngêma chorü tügüneçüwawa rü chorü toxwecüwawa na perütogüxücêx, rü tama choxmêxwa nangêxma na pexna chanaxâxü, erü Chaunatü tá tüxna nanaxâ ya yíxema tümacêx íyíxê —ñanagürü. ⁴¹ Rü yexguma yemaxü naxínüëgu ga yema togü ga 10 ga ngüexügü, rü Chaütiágumaã rü Cuáümaã nanuê. ⁴² Natürü Ngechuchu naxcêx naca rü ñanagürü nüxü: —Pema nüxü pecuêx i togü i nachüüñnegüwa rü nangêxmagü i âëxgacügü i nügü nacuêxgüga na namexü na nauçü namuâxü i norü duüxügü. Rü ngêma âëxgacügü i taxügü rü norü duüxügüarü yora nügü nixîgüxêê. ⁴³ —Natürü täütama ngêmaâcü nixî i petanüwa. Erü ngêxguma texê naxwêxegu na guxâärü yexera na tiixü i petanüwa, rü name nixî i noxri rü guxâärü ngüxêëruü na tiixü. ⁴⁴ —Rü ngêxguma chi texê i petanüwa naxwêxegu na tümamücügüeru na tiixü, rü name nixî i noxri rü guxüma i tümamücügüarü ngüxêëruü na tiixü. ⁴⁵ —Rü woo i choma i Tupana Nane na duüxüxü chiixü, rü tama togü choxü ringüxêêxücêx nixî i núma chaxüxü. Natürü nüma chaxü na duüxügüxü chángüxêêxücêx rü naxcêx ichanaxâxücêx i chorü maxü, na ngêmaâcü chanaxütanüxücêx na norü pecadugüna ínanguxüxücêx i muxüma i duüxügü —ñanagürü.

Bartiméu ga ngexetücüxü narü mexêê ga Ngechuchu
(Mt 20.29-34; Lc 18.35-43)

⁴⁶ Rû Yericüarü îānewa nangugü. Rû Ngechuchu narüxî ga norü ngüexügü rû muxüma ga togü ga duüxügü. Rû yexguma guma îāneärü guxwa nangugüchaüga ga nüxna na înachoxüxü, rû yéma namacüwawa narüto ga wüxi ga ngexetücü ga Bartiméüga äegacü ga Timéu nane. ⁴⁷ Rû yexguma guma ngexetücü nüxü îñügu ga Ngechuchu ga Nacharétüçüâx na yîxü ga guma yéma üpetücü, rû inanaxügü ga poraäcü aita na naxüxü, rû: —Pa Ngechuchu ya Dabitanüxüx, jçuxü changechaütümü! —ñanagürü. ⁴⁸ Natürü muxüma ga yema duüxügü rû înanangaxüchigüama ga na iyanangeáxüçèx. Natürü ga nüma rû yexeraäcü aita naxüama, ñaxümaä: —Pa Dabitanüxüx, jçuxü changechaütümü! —ñaxümaä. ⁴⁹ Rû yexguma ga nüma ga Ngechuchu rû inayachiächi, rû ñanagürü: —jNaxçèx peca! —ñanagürü. Rû guma ngexetücüçèx nacagü, rû ñanagürügü: —jNataäê rû inachi! Rû çuxçèx nixî i naçaxü —ñanagürügü. ⁵⁰ Rû guma ngexetücü rû yexacü nanaña ga norü gáuüxçhuru. Rû inayuxnagü rû Ngechuchuçèx nixü. ⁵¹ Rû Ngechuchu nüxna naca, rû ñanagürü nüxü: —çTacü nixî i cunaxwèxexü na çuxçèx çanaxüxü? —ñanagürü. Rû nüma ga guma ngexetücü, rû nanangäxü, rû ñanagürü: —Pa Ngüexêëruüx, çanaxwèxe na çidauchixü —ñanagürü. ⁵² Rû yexguma ga Ngechuchu, rû ñanagürü nüxü: —jËcü, îixü! Rû marü çuxçèx nitaane erü cuyaxö —ñanagürü. Rû yexgumatama ga guma ngexetücü rû nidauchi, rû Ngechuchu narüxü ga namawa.

11

Ngechuchu rû Yerucharéüga naxücu
(Mt 21.1-11; Lc 19.28-40; Çu 12.12-19)

¹ Rû marü Yerucharéüarü ngaicamana nangugü ga Oríbunecüarü Mèxpüneärü ngaicamana yexmagüne ga îānexäcügü ga Bechagué rû Betániä. Rû yexguma yéma nangugügu, rû Ngechuchu nanamu ga taxre ga norü ngüexügü. ² Rû ñanagürü nüxü: —jGua törü toxmèxtawa ngêxmane ya îānexäcüwa pexî! Rû ngêxguma nawa pengugügu, rû ngêxma tá nüxü peyangau i wüxi i buru i ngêxma ngaxüxü i taguma texé natagu aunagüxü. jRû peyawèxü rû nuä penaga! ³—Rû ngêxguma texé pexna çaxgu na çacücèx peyawèxüxü i ngéma buru, jrü tümamaä nüxü pixu rû ñapegügü:

“Torü Cori nanaxwèxe, rû ñuxma tátama nanataeguxêê”, ñapegügü! ⁴ Rû yéma naxî. Rû yexma namacüwagu nüxü nayangaugü ga yema buru ga wüxi ga îpataèxüttagu ngaxüxü. ⁵ Rû ñuxre ga duüxügü ga yéma yexmagüxü rû nüxna nacagü, rû ñanagürügü: —çTacü îpexü? çRü tüxçüü peyawèxü i ngéma buru? —ñanagürügü. ⁶ Rû nümagü ga yema ngüexügü, rû yema ore ga Ngechuchu namaä nüxü îxuxüäcü nanangäxügü. Rû yemacèx tama nüxna nanachuxgü. ⁷ Rû natagu nanaçagümü ga naxchirugü. Rû yemaäcü Ngechuchuxütawa nanagagü. Rû nüma ga Ngechuchu rû natagu naxaunagü. ⁸ Rû muxüma ga duüxügü rû naxchirumaätama nanaçhamagü. Rû togü rû naixätügü ga naānewa nadaüxümaä nayaçhamagü. ⁹ Rû yema duüxügü ga napèxegu ägüxü rû yema togü ga wixweama ägüxü, rû tagaäcü ñanagürügü: —jÇuxü ticuèxüxügü! jRü naxüüne ya daa Tupanaegagu nüma ücü! ¹⁰ jRü äëxgacü ya Dabírüxü namecümäxüchi ya daa äëxgacü ya nüma ngücü! jRü pema rû ta, Pa Daxüçüâx, rû nüxü picuèxüxügü ya Tupana! —ñanagürügü. ¹¹ Rû Yerucharéüga naxücu ga Ngechuchu, rû tupauca ga

taxüñecèx nixü. Rû meãma guxüwama inanadauaxüñe. Rû ñuxüchi yema norü 12 ga ngüexüğümaã Betániãärü ñãñecèx nataegu, yerü marü nayáuane.

Ngechuchu rü orix ga iguera ga ngearü oõxümaã chixexü naxuegu
(Mt 21.18-19)

¹² Rû moxüãcü yexguma Betániãwa inaxiãchigu ga Ngechuchu rü nataiya. ¹³ Rû yaxügu nüxü nadau ga wüxi ga orix ga iguera ga äãtixü. Rû nüma ga Ngechuchu rü naxcèx nixü na iyadauãxüçèx rü ngoxi nayexmèx ga norü o. Natürü yexguma naxütawa nanguxgu, rü taxuüma inayangau, rü naãtixüxícatama, yerü tauta norü owa nangu. ¹⁴ Rû yexguma rü ñanagürü igueraxü: —¡Tagutáma texé wena cuxü tamúärü oõx! —ñanagürü. Rû norü ngüexüğü rü nüxü naxüñüë ga yema.

Ngechuchu ínanawoxü ga yema tupauca ga taxüñewa taxegüxü ga duüxüğü
(Mt 21.12-17; Lc 19.45-48; Cu 2.13-22)

¹⁵ Rû yexguma Yerucharéüwa nangugügu, rü Ngechuchu rü tupauca ga taxüñegu naxücu. Rû inanaxüğü ga na ínawoxüãxü ga yema yéma ñacümaã taxegüxü rü naxcèx taxegüxü. Rû nanangüegutanü ga norü mechagü ga yema duüxüğü Tupanaarü ñmarewa mexü ga ñerumaã taxegüxü rü muxtucumaã taxegüxü. ¹⁶ Rû nanachüxu ga texé ñacü na yéma ngepetüxü tupauca ga taxüñemachiawa. ¹⁷ Rû inanaxüğü ga na nangüexëetaexü, rü ñanagürü: —Tupanaarü ore i úmatüxüwa rü ñanagürü:

“Chopata rü guxüma i nachiüñãñecüãxgüarü yumüxëpataügu tá naxãega”, ñanagürü. Natürü pema rü ngütxëxgüxüpataü peyaxixëë —ñanagürü.

¹⁸ Natürü yexguma yemaxü naxüñüëgu ga paigüarü äëxgacügü rü ngüexëeruüğü ga Moïchéarü mugüwa ngüxëetaegüxü, rü inanaxüğüe ga naxcèx na nadaugüxü ga ñuxãcü Ngechuchuxü na yamèxgüxü. Natürü duüxüğüxü namuüë, rü yemacèx taxucürüwama duüxüğüpegu nayayauxgü. Yerü nüma ga duüxüğü rü namaã nataãxëgü ga yema Ngechuchuarü ngüxëëtae. ¹⁹ Natürü yexguma marü nayáuaneagu, ga Ngechuchu rü norü ngüexüğümaã nawa ínachoüxü ga guma ñãne.

Narüñexë ga yema iguera ga ngearü oõxü
(Mt 21.20-22)

²⁰ Rû moxüãcü pèxmama rü igueraxütawa nachopetü. Rû yéma nüxü nadaugü ga na nañexëxü ñuxmata naxchümèxãwa nangu. ²¹ Rû yexguma ga Pedru rü nüxna nacüxãchi ga yema ñeãcü ngupetüxü, rü ñanagürü Ngechuchuxü: —Pa Ngüexëëruüx, dücax i iguera ga chixexü namaã cuxuegüxü, rü marü narüñexë —ñanagürü. ²² Rû Ngechuchu nanangãxü, rü ñanagürü: —¡Nüxü peyaxögü ya Tupana! ²³ —Rü aixcüma pemaã nüxü chixu rü ngëxguma chi wüxie daa mëxpünexü tamuxgu na yaxügachixüçèx rü taxtü i taxüchiüwa nügü na yatáexüçèx, rü chi pega naxüñü, ega aixcüma peyaxögüãcüma nüxü ngëma ñapegügu. ²⁴ —Rü ngëmaccèx pemaã nüxü chixu rü guxüma i ñacü i naxcèx ipeçaxü i perü yumüxëwa, rü name nixü na peyaxögüxü na marü penayaxuxü, rü aixcüma tá penayaxu. ²⁵ —Rü ngëxguma peyumüxëgügu, natürü nangëxmagu i ñacüçèx texëmaã na penuëxü, ¡rü tüxü nüxü pengechaü! na Penatü ya daxügucü rü ta pexü nüxü nangechaüxüçèx i perü pepadugü. ²⁶ —Natürü ngëxguma pema tama tüxü nüxü pengechaüğügu, rü Penatü ya daxügucü rü tá ta täütáma pexü nüxü nangechaü —ñanagürü.

Ngechuchuna nacagüe na texéarü oregagu tupauca ga taxünewa nangüxëetaexü
(Mt 21.23-27; Lc 20.1-8)

²⁷ Rü yemawena rü Yerucharéüçex nawoegu. Rü yexguma Ngechuchu rü tupauca ga taxünegu yaxügüchigüyane, rü naxcèx naxí ga paigüarü äëxgacügü, rü ngüexëeruügü ga Moïchëarü mugüwa ngüxëetaegüxü, rü Yudiüguarü äëxgacügüerugü. ²⁸ Rü nüxna nacagüe, rü ñanagürügü: —¿Texéarü mugagu nixí i cunaxüxü i ngëma núma cuxüxü? ¿Rü texé cuxü tamu na cunaxüxüçex i ngëma? —ñanagürügü. ²⁹⁻³⁰ Rü yexguma ga Ngechuchu rü nanangäxü, rü ñanagürü nüxü: —Choma rü tá ta pexna chaca, rü ngëxguma choxü pengäxügu i ngëma pexna naxcèx chaçaxü, rü choma rü tá ta pemaä nüxü chixu na texé choxü muxü na chanaxüxüçex i ngëma. ¿Rü texé tanamu ga Cuáü na duüxügüxü ínbaiüxëëxüçex? ¿Rü Tupana yíixü ga namucü rü éxna duüxügümare? —ñanagürü. ³¹ Rü yexguma ga nümagü rü inanaxügüe ga nügümaä na yaporagatanüçüxü, rü ñanagürügü: —Rü ngëxguma chi:

“Tupana núma nanamu”, ñagügügu, rü núma rü chi ñanagürü tüxü:

“¿Tüxüü ga tama nüxü peyaxögüxü?” ñanagürü chi tüxü. ³² ¿Rü ñuxüçürüwa rü:

“Yatügümare núma nanamu”, ñatarügügü tá? Rü yema ñanagürügü yerü duüxügüxü namuüë. Yerü guxüma ga duüxügü rü nayaxögü rü aixcüma Tupana nanamu ga Cuáü na nüxü yaxuxüçex ga norü ore. ³³ Rü yemacèx Ngechuchuxü nangäxügü, rü ñanagürügü: —Tama nüxü tacuèx ga texé núma na namuxü ga Cuáü ga baiüxëëruü —ñanagürügü. Rü yexguma ga Ngechuchu rü nanangäxü rü ñanagürü nüxü: —Choma rü ta täütama pemaä nüxü chixu na texé choxü muxü na chanaxüxü i ngëma choxna naxcèx peçaxü —ñanagürü.

12

Ore i puracütanüxü i chixexüügu ixuxü
(Mt 21.33-46; Lc 20.9-19)

¹ Rü Ngechuchu rü inanaxügü ga ore ga cuëxruügügu ixuxümaä na nangüxëëtaexü. Rü ñanagürü nüxü: —Nayexma ga wüxi ga yatü ga norü naänegu ubanecü ücü. Rü ínanapoxegu, rü nanaxü ga wüxi ga ubaarü yaxütüxüchica, rü wüxi ga dauxütaechica na meä nüxna nadauxüçex ga guxüma. Rü ñuxüchi ñuxre ga puracütanüxüna nüxü nadauxëë. Rü namaä nanamexëë na ngäxügu namaä ngíxü yatoyexüçex ga yema ubatanü. Rü ñuxüchi ga yema naäñearü yora rü to ga nachüüñewa naxü. ² —Rü yexguma nawa nanguxgu ga na yadauxü ga yema ubagü, rü guma yatü rü yéma puracütanüxügüxütawa nanamu ga wüxi ga norü duüxüxü na naxcèx íyaçaxüçex ga yema ubagü ga nüxna üxü. ³ —Natürü yema puracütanüxügü rü nayayauxgü, rü nanaçuaixgü ga guma yatüarü duüxü. Rü taxuüma ga ubagü nüxna naxägü, rü yemaäcü ínayamugü. ⁴ —Rü yexguma ga guma yatü rü to ga norü duüxüxü yéma namu. Natürü ga guma rü nayamëxërugü, rü namaä naguxchigagü. ⁵ —Rü yexguma rü to ga norü duüxüxü yéma namu. Natürü nayamëxgü. Rü yemawena, rü yéma nanamugü ga muxüma ga togü ga norü duüxügü. Natürü ga yema puracütanüxügü rü nayaçuaixgü ga ñuxre, rü togü rü nanadai. ⁶ —Rü yexguma rü nüxü ínayaxü ga nanexüchi ga poraäcü nüxü nangechaücü. Rü düxwa guma nanexü yéma namu, yerü

nüma nagu naxĩnũgu rü chi nanega naxĩnũẽ ga yema puracütanũxũgũ. ⁷ — Natürü yexguma guma cori nanexũ nadaugũga ga yema puracütanũxũgũ, rü nügũmaã ñanagürũgũ:

“Ngẽmaãrũ tá nixĩ i ñaã naãne i yixcama. ¡Rü ngĩxã tayamèxgũ na tóxrü na yĩixũcèx!” ñanagürũgũ. ⁸ —Rü yemaãcũ nayayauxgũ, rü nayamèxgũ. Rü yema ubanecũpechinũwa nayatèxgũ ga naxũne. ⁹ —Rü ñuxma rü pexna chaca, ¿pexcèx rü tacũ tá naxũ ya yima ubanecũarũ yora namaã i ngẽma puracütanũxũgũ i chixexũgũ? Rü dücax, rü ngema tá naxũ, rü tá nanadai i ngẽma puracütanũxũgũ, rü togũna tá nanaxã i ngẽma ubanecũ. ¹⁰ —¿Taguma èxna nawa pengũe i Tupanaãrũ ore i ùmatũxũ? Erũ ngẽmawa rü ñanagürũ:

“Rü yima nuta ya mecũ ya ñarũ üruũgũ nüxũ oechirècũ, rü ñuxma rü yimatama nixĩ ya Tupana nüxĩra yaxũcuchicũ na namaã inaxũgũãxũcèx ya Ìpata. ¹¹ Rü tórũ Cori ya Tupana nixĩ ga naxũcũ ga yema, rü ñuxma rü namexèchi i taxcèx”,

ñanagürũ i ngẽma ore. ¹² Rü yexguma ga yema paigũarũ àèxgacũgũ, rü ngũxèèruũgũ ga Moichèarũ mugũwa nguxèètaegũxũ, rü Yudiugũarũ àèxgacũgũerugũ, rü Ngechuchuxũ niyauxgũchaũ. Yerũ nüxũ nacuèxgũ ga nachiga na yĩixũ ga yema ore ga cuèxruũgu yaxuxũ. Natürü duũxũgũxũ namuũè rü yemacèx taxuũma namaã naxũe. Rü nüxna yéma Ìnixĩmare.

Àèxgacũaxũ dīerumaã naxũtanũxũchiga
(Mt 22.15-22; Lc 20.20-26)

¹³ Rü yexguma ga yema àèxgacũgũ rü Ngechuchuxũtawa nanamugũ ga ñuxre ga norũ duũxũgũ ga Parichèugũ rü Erodetanũxũgũ na nüxna yacagũexũcèx, rü ngoxi tacũ rü chixexũ ga dexamaã nüxũ nangãxũ na yemaãcũ àèxgacũgũxũtawa na Ìyaxuaxũgũãxũcèx. ¹⁴ Rü nümagũ rü naxũtawa naxĩ, rü ñanagürũgũ nüxũ: —Pa Ngũxèèruũx, nüxũ tacuèx rü aixcũma nixĩ i ngẽma nüxũ quixuxũ i ore. Rü tama duũxũgũgamare cuxĩnũ, erũ tama norũ düxètũxũnegu cudawenũ, natürü nacũma nixĩ i cungugũxũ. Rü aixcũma cunangũxèè i duũxũgũ na Tupana naxwèxexũãcũma namaxèxũcèx. ¡Tomaã nüxũ ixu! Rü ngẽma dīeru ya àèxgacũ ya tacũ ya Dumacũãx totanũwa ngĩxũ yauxchaũcũ ¿rũ namexũ yĩixũ na nüxna ngĩxũ taxãxũ, rü èxna tama? — ñanagürũgũ. ¹⁵ Natürü ga Ngechuchu rü nüxũ nacuèxama ga na chixexũgu namaã naxĩnũèxũ ga yema duũxũgũ woo meã namaã na yanadexagũxũ. Rü yemacèx ñanagürũ nüxũ: —¿Tũxcũũ chixexũgu choxũ penguxèèchaũxũ? ¡Nuã ngĩxũ pingè i wũxitachinũ i dīeru na ngĩxũ chadauxũcèx! —ñanagürũ.

¹⁶ Rü yéma naxũtawa ngĩxũ nangegũ ga wũxitachinũ ga dīeru. Rü Ngechuchu rü ñanagürũ nüxũ: —¿Texèchicũnèxã rü texéega nixĩ i ngĩgu üxũ? —ñanagürũ. Rü nümagũ nanangãxũgũ, rü ñanagürũgũ: —Dumacũãx ya àèxgacũ ya tacũchicũnèxã nixĩ —ñanagürũgũ. ¹⁷ Rü yexguma ga Ngechuchu rü ñanagürũ nüxũ: —¡Àèxgacũna ngĩxũ pexã i ngẽma àèxgacũarũ ixĩcũ, rü Tupanana ngĩxũ pexã i ngẽma Tupanaãrũ ixĩcũ! —ñanagürũ. Rü yexguma yema orexũ naxĩnũègu, rü namaã nabaixãchiãègũ.

Ngechuchuna nacagũe rü ngoxi wena namaxè i duũxũgũ
(Mt 22.23-33; Lc 20.27-40)

¹⁸ Rü yemawena rü Ngechuchuxũtawa Ìnayadaugũ ga ñuxre ga Chaduchèugũ. Rü nümagũ nixĩ i nüxũ yaxugũexũ na tagutãma wena namaxèxũ i yuexũ. Rü yemacèx Ngechuchuna nayacagũe, rü ñanagürũgũ: ¹⁹ —Pa Ngũxèèruũx, Moichèarũ mugũwa rü ñanagürũ:

“Rü ngëxguma wüxi ya yatü naxmëx ngexacüyane nayuxgu, rü name nixi i naëneëtama ngîmaã naxâmëx i ngëma yutecü i naxûmëx, na ngëmaäcü naxâxâcüxüçëx ya naëneë ga marü yucü”,

ñanagürü ga yema ore. ²⁰—Düçëx, nayexma ga 7 ga nüğüeneëgü. Rü naxâmëx ga guma yacü, natürü tauta naxâxâcüyane nayu. ²¹⁻²²—Rü yexguma ga nai ga naëneë nüxi ngîmaã naxâmëx ga yema ngecü, natürü guma rü ta nayu rü nangexacü. Rü yexguma ga guma norü tomaëxpüx ga naëneë nüxi ngîmaã naxâmëx, natür ü yexgumarüütama nüxü nangupetü. Rü yemaäcü, gücüma ga guma 7 ga nüğüeneë rü ngîmaã naxâmëx ga yema nge. Rü gücüma nayue tauta naxâxâcüyane. Rü düxwa ngîma rü ta iyu ga yema nge. ²³—Rü dücax, ngëxguma yuexü wena maxëgu, ¿rü ngexcürüücü naxmëx tá iyixi i ngëma nge? Yerü gücüma ga guma 7 ga nüğüeneëgü ngîmaã naxâmëx —ñanagürügü.

²⁴ Rü yexguma ga Ngechuchu rü nanangâxü, rü ñanagürü nüxü: —Pema rü ípetüe erü tama nüxü pecuëx i Tupanaärü ore i ümatüxü, rü tama nüxü pecuëx i ñuxâcü na naporaxü ya Tupana. ²⁵—Rü ngëxguma yuexü wena maxëgu, rü taxüetâma tixâmëxgü rü êxna tixâtegü. Erü daxüçüâxi i Tupanaärü orearü ngeruügürüü tá tixigü i ngëxguma. ²⁶—Pema choxna peca i yuexüârü dagüchiga. ¿Natürü tama êxna nawa pengüe i Tupanaärü ore ga Moïché ümatüxü ga naiçäcü ga iyauxratânüechigaxü iyaxuxüwa? Erü yema orewa rü Moïchéxü ñanagürü ga Tupana:

“Choma nixi i Abrâüârü Tupana, rü Ichaáarü Tupana, rü Acobuarü Tupana”, ñanagürü. ²⁷—Rü ngëma orewa nüxü tacuëx rü Tupana rü maxëxüârü Tupana nixi rü tama yuexüârü Tupana nixi, erü Tupanaarü ñüwa rü taxüema tayu. Rü ngëmaäcü i pema rü poraäcü ípetüe —ñanagürü.

Ngëma Tupanaärü mu i guxü i norü mugüarü yexera ixixü
(Mt 22.34-40)

²⁸ Rü wüxi ga ngüexëeruü ga Moïchéarü mugüwa nguxëëtaexü, rü nüxü naxînu ga yema togü ga namücügü ga Ngechuchumaã na iyaporagatanücüüxü. Rü nüma rü nüxü nicuëxâchi ga meâma na nangâxüâxü. Rü yemacëx Ngechuchucëx nixü, rü nüxna naca, rü ñanagürü nüxü: —Pa Ngüexëeruüx, ¿ngëxürüüxü i Tupanaärü mu nixi i guxü i norü mugüarü yexera ixixü? —ñanagürü. ²⁹ Rü Ngechuchu nanangâxü, rü ñanagürü: —Ngëma Tupanaärü mu i guxü i norü mugüarü yexera ixixü, rü ñaã nixi, ñanagürü:

“¡lperüxînüë, Pa Iraéanecüâxgü! Rü nüma ya Cori ya tórü Tupana, rü yixicatama nixi ya tórü Cori. ³⁰ ¡Rü nüxü nangechaü ya Cori ya curü Tupana guxüne ya curü maxünemaã, rü guxü i cuäëmaã, rü guxü i nagu curüxînxümaã, rü guxü i curü poramaã!”

ñanagürü. ³¹—Rü ngëma norü taxre i Tupanaärü mu, rü ñanagürü:

“¡Rü nüxü nangechaü i cumücü na cügü cungechaüxürüü!”

ñanagürü. Rü nataxuma i to i Tupanaärü mu i ngëmagüarü yexera ixixü —ñanagürü. ³² Rü yexguma ga yema ngüexëeruü ga mugüwa nguxëëtaexü, rü ñanagürü Ngechuchuxü: —Marü name, Pa Ngüexëeruüx, erü aixcüma nixi i ngëma nüxü quixuxü na wüxixicatama na yixü ya Tupana, rü nataxuma ya nai. ³³—Rü ngëma Tupanaärü na ingechaüxü guxüne ya tórü maxünemaã, rü guxü i nagu rüxînxümaã, rü guxü i tórü poramaã, rü nüxü na ingechaüxü i tamücü i yigü na ingechaüxürüü, rü ngëma rü güxüma i carnerügü i

Tupancëx idëixü rü ígüxüarü yexera narümemae —ñanagürü. ³⁴ Rü yexguma Ngechuchu nüxü dëuxgu ga mexügu na naxînüäcüma na nangâxüâxü ga

yema ngúexêëruũ ga mugúwa nguxêëtaexũ, rú ñanagürü nüxũ: —Marü tama taxũ cuxũ nataxu na cunayaxuxũ ya Tupana na curü âëxgacü yĩxũcèx —ñanagürü. Rú yemawena rú marü taxuũma nügü naporaxêë na nüxna yacachigüxũcèx.

*¿Texé nane nixĩ ya Cristu?
(Mt 22.41-46; Lc 20.41-44)*

³⁵ Rú yexguma tupaucá ga taxũnewa ínangúexêëtaeyane ga Ngechuchu, rú duũxũgũna naca, rú ñanagürü: —¿Tũxcüũ nixĩ i ngêma ngúexêëruũgü i mugúwa nguxêëtaegüxũ i ñagüxũ:

“Yíma Cristu ya Tupana nüxũ unetacü rú nuxcũmaũcü ga âëxgacü ga Dabítaa nixĩ”, ñagüxũ? ³⁶ —¿Rú ñuxácü i ngêmaácü yadexagüxũ? Yerü nümatama ga Dabí, rú yexguma Tupanaãe i Üünexũ naãewa ideaxgu rú ñanagürü:

“Cori ya Tupana rú chorü Corixũ ñanagürü: ‘¡Nuã chorü tũgũnecüwawa rüto ñuxmatáta nüxũ charüporamaë i curü uwanügü na cuga naxĩnüexũcèx!’ ”

ñanagürü ga yema orewa. ³⁷ —¿Natürü ñuxücürüwa i Dabítaa yĩxũ ya Cristu, ega nümatama ga Dabí, rú norü Corimaã naxuãgu? —ñanagürü. Rú yema muxũma ga duũxũgü ga yéma yexmagüxũ, rú taãëácũma Ngechuchuxũ inarüxĩnüë.

*Ngechuchu rú nüxũ nixu na tama yameärü maxũãxgüxũ ga yema ngúexêëruũgü ga Moíchéarü mugúwa nguxêëtaegüxũ
(Mt 23.1-36; Lc 11.37-54, 20.45-47)*

³⁸ Ngechuchu rú norü nguxêëtaewa rú ñanagürü: —¡Pexuãëgü naxcèx i ngêma ngúexêëruũgü i Moíchéarü mugúwa nguxêëtaegüxũ! Erü nümagü rú norü me nixĩ i mexĩ i naxchirumaã na naxĩãneãxũ. Rú nanaxwèxegü na ítamüwa duũxũgü meã nüxũ na rümoxëgüxũ. ³⁹ —Rú ngutaquëxepataũgüwa rú norü me nixĩ i âëxgacügümeëxwèxewa na natogüxũ. Rú õnagü i taxũwa rú ngêma õnaärü yoraxũtawá ügüxũ i nachicacèx nadaugü. ⁴⁰ —Natürü tüxna nanapuxũ ya tümapatagü ya yixema yutegüxe. Rú ñuxũchi nanamèxêë i norü yumüxëgü na ngêmagu nügü yacuxgüxũcèx rú duũxũgü nagu rüxĩnüexũcèx na aixcũma mexũgü na yixĩgüxũ. Natürü nümagü tá nixĩ i yexeraácü napoxcuxũ —ñanagürü.

*Yutecü ga ngearü dñeruãxcü ga Tupanacèx dñeru ngĩxũ ixãcü
(Lc 21.1-4)*

⁴¹ Wüxicana ga Ngechuchu rú tupaucá ga taxũneärü dñeruchiũärü toxmèxtawa narüto. Rú yéma inadawenü ga ñuxácü duũxũgü yexma ngĩxũ yanaxücuchigüxũ ga norü dñerugü. Rú muxũma ga duũxũgü ga idñeruãxgüxũchixũ rú yexma ngĩxũ nayarüxücuchigü ga muxüchicü ga norü dñeru. ⁴² Rú ngürü yéma ingu ga wüxi ga yutecü ga ngearü dñeruãxcü. Rú ngĩma rú wüxi ga yema dñeruchiũgu ngĩxũ iyarüxücuchi ga taxretachinü ga dñeruxacü ga ítanücü. ⁴³ Rú yexguma ga Ngechuchu rú norü ngúexũgücèx naca, rú ñanagürü nüxũ: —Aixcũma pemaã nüxũ chixu rú ñaã ngecü i yutecü i ngearü dñeruãxcü, rú guxũ i ngêma togü i dñeruchiũgu dñeru ngĩxũ ixücuchigüxũärü yexera ngĩxũ ixã. ⁴⁴ Erü guxũma i togü rú ngĩxũ inaxãgü i ngêma nüxũ íyaxügücü. Natürü ngĩma ngĩxũ natauxyane ngĩxũ ixã i guxcũma i ngĩxũ ngèxmèxcü i ngĩrü õnatanü —ñanagürü.

13

Ngechuchu nanaxunagü na tupauca ga taxünewu tá na napogüexü
(Mt 24.1-2; Lc 21.5-6)

¹ Rü yexguma tupauca ga taxünewa ínaxüxügu ga Ngechuchu, rü wüxi ga norü ngüexügu rü ñanagürü nüxü: —Pa Ngüexëëruüx jücxac ñuxácü nimexëchi ya daa tupauca ya itaxüne rü naxtapüxaru nutagü! —ñanagürü.
² Natürü Ngechuchu nanangäxü, rü ñanagürü: —Pema nüxü pedaugü ya guxünema ya yima tupauca ya taxünearü ípatagü. Natürü pemaã nüxü chixu rü aixcüma guxünema ya daa ípatagü rü tá nagu napogüe. Rü norü nutagü rü taxucütáma nügütü naxüxüra, rü bai tá ya wüxi —ñanagürü.

Cuëxruügu i tá nüxü idauxü naxüpa na nagüxü i naäne
(Mt 24.3-28; Lc 21.7-24, 17.22-24)

³⁻⁴ Rü yemawena rü Oríbunecüaru Mëxpüne ga tupauca ga taxünearü toxmëxtawa yexmanewa naxí. Rü yéma narüto ga Ngechuchu. Rü Pedru rü Chaütiágu rü Cuáü rü Aüdré rü naxütawa naxí na noxrüwama nüxna nacagüexücëx. Rü ñanagürügu: —Tanaxwëxe i tomaã nüxü quixu na ñuxgu tá nangupetüxü i ngëma nüxü quixuxü. ¿Rü tacü tá nixí i norü cuëxruü i nawa nüxü tacuáxü ega nawa tá nanguxgu i ngëma? —ñanagürügu. ⁵ Rü yexguma ga Ngechuchu rü nanangäxü rü ñanagürü nüxü: —jPexuãëgu na taxüema pexü womüxëëxücëx! ⁶—Erü muxüchixü i duüxügu tá ínangugü, rü chaugu tá nügu nicüxgü, rü ñanagürügu tá:

“Choma nixí i Cristu”, ñanagürügu tá. Rü muxüchixü i duüxügüxü tá nawomüxëë. ⁷—Rü ngëxguma nüxü pexínüëgu na nügu nadëjxü i nachiüñanëgu i ngaicamagüxü rü togü i nachiüñanëgu i yaxüugüxü, jrü tãütáma ngëmacëx peñaxächiaëgu! Erü woetama ngëmaãcü tá nangupetü. Natürü tãütáma naäneärü gux nixí i ngëma. ⁸—Erü wüxi i nachiüñane rü to i nachiüñanemaã tá nügu nadai. Rü wüxi ya äëxgacüaru churaragü rü to i äëxgacüaru churaragümaã tá nügu nadai. Rü muxüma i nachicawa rü tá naxíaxächiane. Rü tá taiya nangux. Natürü guxüma i ngëma rü norü ügümare nixí i ngëma ngüxü i tá ínguxü. ⁹—jRü meã pegüna pedaugü! Erü äëxgacügüpëxewa tá pexü nagagü, rü ngutaquëxepataügu tá pexü niçuaixgü. Rü nachiüñanëgüaru äëxgacügüpëxewa tá pexü nagagü naxcëx na chorü duüxügu na pixígüxü. Natürü ngëmaãcü tá pexü natauxcha na ngëma äëxgacügümaã nüxü pixuxü i chauchiga. ¹⁰—Natürü naxüpa na nagüxü i naäne rü tá nüxü nixugüe i Tupanaärü ore i guxü i nachiüñanëguwa. ¹¹—Natürü ngëxguma äëxgacügüpëxewa pexü nagagügu, jrü tãütáma pex-oeagaãëgu naxcëx na tacümaã tá penangäxüxü! jrü namaã nüxü pixu i ngëma ore i ngëxgumatama Tupana pexna äxü na nüxü pixuxücëx! Erü tãütáma pema nixí na pidexagüxü, natürü Tupanaãë i Üünexü tá nixí i pewa idexaxü. ¹²—Rü nügüeneëgüwa tátama rü äëxgacügüxütawa nügu ínayaxuaxügu na ngëmaãcü tüxü nadëjxücëx. Rü ngëxgumarüü tá ta i papágü rü mamágü rü tá naxácügüxü ínayaxuaxügu. Rü nümagü i naxácügü rü tá nanatügümaã rü naëgümaã nanue, rü tá tüxü ínayaxuaxügu na äëxgacügü tüxü nadëjxücëx. ¹³—Rü guxü i nañewa rü duüxügu tá pexchi naxaie naxcëx na chorü duüxügu pixígüxü. Natürü yixema naetüwa meã Tupanaãxü yaxöömáxë, rü yixema tá tíxí ya aixcüma nayaxúxe i maxü i taguma gúxü. ¹⁴—Rü ngëxguma nüxü pedëuxgu i ngëma äüächixü rü äücümaxüchixü i chixexëeruü i ngextá tama ínaxwëxexüwa na nangëxmaxü, rü ngëxguma ya

yíxema Yudeaanewa ngêxmagüxe, rü tanaxwêxe i mèxpúneãnewa tabuxmü. Rü texé ya yíxema nüxü daumatüxe, ¡rü name nixí i meã nagu tarüxñü i ngêma! ¹⁵—Rü ngêma ngunexügu texé tümapataëxtüwa ngêxmagu, rü tama name i tümapatagu tayangaxi na facü i tümäärü ngêmaxü tayayaxuxúcèx. ¹⁶—Rü texé ya tümäänewa ngêxmaxê rü tama name i tümapatacèx tataegu na tümachirugü tayayaxuxúcèx. ¹⁷—Rü ngêma ngunexügu, rü wüxi i ngechaü tá nixí i tümacèx ya yixema ngexegü ya itacharaüguxe rü yíxema maixácüguxe. ¹⁸—¡Rü Tupanana naxcèx peca i perü yumüxêwa na tama gáuane ixüyane pexü na nangupetüxúcèx i ngêma chixexü! ¹⁹—Erü ngêma ngunexügu rü poraácü tá nangêxma i ngüxü ga noxri Tupana naãne ixügügumama taguma yexmaxü, rü ngêmawena rü tagutáma nangêxma. ²⁰—Rü ngêxguma Tupana tama nanoxrexêëgu i ngêma ngunexügu, rü taxúetáma tamaxü. Natürü Tupana rü marü nananoxrexêë i ngêma ngunexügu erü tüxü nangechaü ya yíxema noxrüxü tüxü nadexe. ²¹—Rü ngêxguma texé pexü ñagügu:

“Dücèx, daa nixí ya Cristu”, ñagügu, rü êxna:

“Gua nixí ya Cristu”, ñagügu, ¡rü tãxü i nüxü peyaxögüxü! ²²—Erü Cristugüneta rü Tupanaärü orearü uruügüneta tá ínangugü. Rü tá nanaxügü i muxüma i cuèxruügü i taxügu. Rü ngêmaácü, ega nüxü natauxchagu, rü tá tüxü nawomüxêëgu woo ya yíxema duüxêëgu ya Tupanatama tüxü dexe. ²³—¡Pexuãëgü! Erü guxüma i ngêma tá ngupetüxü, rü marü naxüpa pemaã nüxü chixu.

Ñuxãcü tá nixí i ngêxguma nataegugu ya Tupana Nane ya duüxüxü ixícü (Mt 24.29-35, 42, 44; Lc 21.25-36)

²⁴—Natürü marü nangupetügu i ngêma ngüxügu, rü ngêma ngunexügu rü tá nixo ya üècü rü täütama inabaxi ya tauemacü. ²⁵—Rü woramacurigü rü êxtagü rü tá narüyi. Rü guxüma i daxüwa ngêxmaxü rü tá naxíãxãchitanü rü nachicana tá nixígachitanü. ²⁶—Rü ngêxguma i duüxügu rü tá nüxü nadaugü ya Tupana Nane ya duüxüxü ixícü na caixanexügu ínaxíxü i guxüma i norü poramaã rü norü ngóonexümaã. ²⁷—Rü tá nanamu i norü orearü ngeruügü i daxüçüãx na tüxü nanutaquèxexúcèx ya yíxema Tupana tüxü idexechixe ya guxüwama ngêxmagüxe ñuxmatáta naãne íyacuáxüwa nangu. ²⁸—¡perüxññé i ñaã nguxêëtae i orix i iguerachiga, rü naxcèx pengü! Rü ngêxguma ngexwacaxüxü i nachacüüxacügü iyarüyixgu rü naxüátügu, rü ngêmawa nüxü pecuèx na paxa tá taunecü yíxü. ²⁹—Rü ngêxgumarüü ta, rü ngêxguma nüxü pedèuxgu na nangupetüxü i ngêma pemaã nüxü chixuxü, rü ngêmawa tá nüxü pecuèx na paxaxüchi tá ínanguxü ya Tupana Nane ya duüxüxü ixícü. ³⁰—Rü guxüma i ngêma ñuxma pemaã nüxü chixuxü rü aixcüma tá nangupetü naxüpa na nayuxèü i ngêma duüxügu i ngêxguma maxêxü. ³¹—Daxüguxü i naãne rü ñoma i naãne rü tá inayarüxo. Natürü chorü ore rü tagutáma inayarüxo, rü aixcüma tá ningü. ³²—Natürü ngêma ngunexü rü ora i nagu tá nangupetüxü i ngêma pemaã nüxü chixuxü, rü Tanatü ya Tupanaxícatama nüxü nacuèx i ñuxgu tá na nangupetüxü i ngêma, rü taxúema ya togue nüxü tacuèx. Rü woo i norü orearü ngeruügü i daxüçüãx rü tama nüxü nacuèxgü, rü woo i choma na Nane chixü rü tama nüxü chacuèx i ñuxgu tá na nangupetüxü i ngêma. ³³—Rü ngêmacèx, ¡pedaue rü pexuãëgü! Erü tama nüxü pecuèx i facü rü ora tá íchangu i chomax. ³⁴—Rü guxüma i ngêma pemaã nüxü chixuxü, rü ñoma wüxi ga yatü ga ixüächichaücü na to ga nachíüãnewa naxüxúcèxrüxü nixí. Rü yemacèx norü

puracütanüxüna naxãga na mea nüxna nadaugüxüxcèx ga guma napata. Rü ñuxüchi wüxichigüna nanaxã ga norü puracü. Rü yéma ìãxãrü dauruü rü nagu nanamu na mea nadauxütaegüxüxcèx. ³⁵⁻³⁶ —;Rü ngëmacèx i pema rü name na ípexuãxëgüxü! Erü tama nüxü pecuèx i ñuxgu tá ínangu ya yima cori ya ípataarü yora, rü bexmana noxri nachütagu, rü éxna ngãxücüügu, rü éxna otã icaxgu, rü éxna noxri yangóonegu. ;Rü ngëmacèx ípedaue na ngürüächi ínanguxgu tama ípepeeyane pexü na íyanguéüxüxcèx! ³⁷ —Rü ngëma ore i pemaã nüxü chixuxü, rü guxü i duüxügüxcèx nixí. ;Rü ípedauecha! —ñanagürü.

14

Ãëxgacügü naxcèx nadaugü na ñuxãcu Ngechuchuxü yayauxgüxü (Mt 26.1-5; Lc 22.1-2; Cu 11.45-53)

¹ Rü taxre ga ngunexü nataxu ga na nawa nanguxü ga Yudiügarü peta ga Üpetüchiga ga nagu nangõxgüãxü ga pãu ga ngearü puxëëruüãxü. Rü ga paigüarü ãëxgacügü rü ngüexëëruüügü ga mugüwa nguxëëtaegüxü rü naxcèx nadaugü ga ñuxãcü bexma duüxügüechita Ngechuchuxü na yayauxgüxü rü na yamëxgüãxüxcèx. ² Yerü nümaxü rü ñanagürügü: —Taxucürüwama ñuxma petagu tayayauxgü, erü duüxügü rü tá tamaã nanuë —ñanagürügü.

Wüxi ga nge rü Ngechuchuerugu inaba ga pumara (Mt 26.6-13; Cu 12.1-8)

³ Rü Ngechuchu rü Betániãwa naxü napatawa ga Chimãu ga rüchaxüncëmaã naxugüãcü. Rü yexguma mechawa natoyane, rü yéma ingu ga wüxi ga ngecü ga wüxiweü ga pumara ga yixichixü ga tatanüxüchixü yéma ngecü. Rü iyapoyenagu ga yema pumarachixü ga nuta ga mexëchicünaxcèx, rü Ngechuchuerugu inaba. ⁴ Natürü ñuxre ga yema yéma yexmagüxü rü nanuë naxcèx ga yema naxüxü ga yema ngecü, rü nügümaã ñanagürügü: —¿Tüxcüü ngëxma inaxaiyaxü i ngëma pumara? ⁵ —Rü narümemaë chi nixí i 300 tachinü i díëruu namaã itaxe, rü ñuxüchi ngëma díërumaã nüxü irüngüxëë i ngëma duüxügü i ngearü díëruãxgüxü —ñanagürügü. Rü yemaãcü ngíchiga nidexagü ga yema nge. ⁶ Natürü ga Ngechuchu rü ñanagürü nüxü: —;Ngexrüma! ¿Tüxcüü ngíxü pechixewe? Erü ngëma chomaã naxüxü, rü wüxi i mexü nixí. ⁷ —Rü ngëma ngearü díëruãxgüxü rü guxügutãma petanüwa nangëxmagü, rü ngëmaãcü pexü natauxcha na nüxü perüngüxëëxü i ngëxguma penaxwëxegu. Natürü i choma rü täütãma guxügu petanüwa changëxma. ⁸ —Rü ñãa nge rü inaxü i guxüma i ngëma ngíxü tauxchaxü, rü ngëmacèx yoxni choxü ipumaraxüne naxüpa na ichatãxü. ⁹ —Rü aixcüma pemaã nüxü chixu rü guxü i naãnewa i ngextã duüxügü nüxü íxugügüxüwa i ore i maxëxëëruü, rü ñãa ngecü chomaã üxü rü tá ta nüxü nixugügü. Rü ngëmaãcü tá ngíxna nacuèxãchie i duüxügü —ñanagürü ga Ngechuchu.

Yuda rü ãëxgacügümaã nanamexëë na ñuxãcü tá na Ngechuchuxü yayauxgüxüxcèx
(Mt 26.14-16; Lc 22.3-6)

¹⁰ Rü Yuda Icaríute ga wüxi ga yema 12 ga ngüexütanüxü ixíxü, rü Yudiügarü paigüarü ãëxgacügütanüwa naxü na namaã yamexëëãxüxcèx na ñuxãcü tá na Ngechuchuxü yayauxgüxüxcèx. ¹¹ Rü yexguma yemaxü naxínüëgu, rü nümagü ga yema ãëxgacügü rü nataãëgü. Rü díëru Yudana ngíxü naxuaxügü. Rü yexgumama inanaxügü ga Yuda ga naxcèx

na nadauxũ ga ñuxãcü nüxũ na natauxchaxẽẽgũãxũ na duũxũgũechita Ngechuchuxũ yayauxgũxũcèx.

Coriarũ ònachiga

(Mt 26.17-29; Lc 22.7-23; Cu 13.21-30; 1 Co 11.23-26)

12 Rũ nawa nangu ga ngunexũ ga nagu inaxũgũxũ ga yema peta ga pãũ ga ngearũ puxẽẽruũãxũ nagu nangõxgũxũ. Rũ yema nixĩ ga ngunexũ ga nagu carneruxacũ naxcèx yamèxgũxũ ga Ûpetũchigaarũ peta. Rũ yexguma ga norũ ngũexũgũ rũ Ngechuchuna nacagũe, rũ ñanagũrũgũ: —¿Ngextá cunaxwèxe na tanamexẽẽxũ i òna i Ûpetũchigaarũ petagu ingõxũ? —ñanagũrũgũ. 13 Rũ yexguma ga nũma rũ nanamu ga taxre ga norũ ngũexũgũ, rũ ñanagũrũ nüxũ: —¡Ëcü, yéa ñãnewa pexĩ! Rũ ngèxma tá nüxũ peyangau i wũxi i yatũ i wũxi ya tũxũ ya dexámaã ããcuxe ngèxma tũxũ ingexũ. ¡Rũ nawe perũxĩ! 14 —¡Rũ yima ñpata ya nagu yaxũcune i ngèma yatũ, rũ yima ñãrũ yoramaã nüxũ pixu, rũ ñapegũgũ nüxũ:

“Torũ ngũexẽẽruũ nüxũ nacuáxchaũ na ngèxũ yĩxũ i ngèma ucapu i norũ ngũexũgũmaã tá nawa nachibũxũ i Ûpetũchigaarũ ònagu”, ñapegũgũ nüxũ! 15 —Rũ nũma tá pexũ nüxũ nadauxẽẽ i wũxi i ucapu i taxũ i marũ meã mexẽẽxũ i norũ daxũchiũwa ngèxmaxũ. ¡Rũ ngèma penamexẽẽx i tórũ òna i Ûpetũchigacèx ixĩxũ! —ñanagũrũ nüxũ. 16 Rũ inaxĩãchi ga yema taxre ga ngũexũgũ, rũ ñãnewa naxĩ. Rũ yexma nüxũ inayangaugũ ga guxũma yema Ngechuchu namaã nüxũ ixuxũrũ. Rũ yéma nanamexẽẽ ga òna ga Ûpetũchigacèx ixĩxũ. 17 Rũ yexguma marũ nachũtachaũgu, rũ ñangu ga Ngechuchu namaã ga yema 12 ga norũ ngũexũgũ. 18 Rũ yexguma mechewa ñnachibũeyane, rũ Ngechuchu rũ ñanagũrũ nüxũ: —Aixcũma pemaã nüxũ chixu rũ wũxie ya petanũwa i ñuxma chomaã nuã chibũxe tá tixĩ ya bexma choxũ ñyaxuaxũxè —ñanagũrũ. 19 Rũ yexguma ga nũmagũ ga norũ ngũexũgũ rũ poraãcü nangechaũgũ. Rũ inanaxũgũe ga na wũxichigũ nüxna lcachigũxũ, rũ ñanagũrũgũ: —Pa Corix, ¿choma tá chiĩxũ i cuxũ íchayaxuaxũxũ? —ñanagũrũgũ. 20 Rũ nũma ga Ngechuchu nanangãxũ rũ ñanagũrũ nüxũ: —Wũxi i pema i 12 tanũwa i daatama poratuwa norũ pãũ iwaixẽẽxũ, rũ ngèma tá nixĩ i choxũ ñyaxuaxũxũ. 21 —Rũ choma i Tupana Nane na duũxũxũ chiĩxũ, rũ tá chayu ngèma Tupanaãrũ ore i ùmatũxũ nüxũ ixuxũrũ. Natũrũ wũxi i ngechaũxũchi nixĩ naxcèx i ngèma yatũ i choxũ ñyaxuaxũxũ. Rũ narũmemaẽ chi nixĩ ga noxtacũma tãũ chima na nabuxũ —ñanagũrũ. 22 Rũ yexguma ñnachibũeyane, rũ Ngechuchu nanayaxu ga pãũ. Rũ Tupanana moxè naxã, rũ ñanabũcu, rũ norũ ngũexũgũxũ nayanu. Rũ ñanagũrũ nüxũ: —¡Penayaux i ñãã pãũ! Rũ ngèma rũ chaxunehiga nixĩ —ñanagũrũ. 23 Rũ yemawena nanayaxu ga wũxi ga pochiyu ga binumaã ããcuxũ. Rũ yexgumarũũ ta Tupanana moxè naxcèx naxãxĩra, rũ ñuxũchi norũ ngũexũgũna nanaxã. Rũ guxũma nawa naxaxegũ. 24 Rũ ñanagũrũ nüxũ: —Daa binu ya chaugũ i muxũma i duũxũgũcèx ibacũchiga nixĩ. Rũ yimawa Tupana meãma nanangoxèe na aixcũma yĩxũ i norũ uneta. 25 —Rũ aixcũma pemaã nüxũ chixu rũ tãxũtãma wena chayaxaxũ ya daa binu ñuxmatãta Tupana ãëxgacũ ñixĩxũwa binu ya ngexwacaxũcü chayaxaxũx —ñanagũrũ.

Ngechuchu nüxũ nixu rũ Pedru rũ taxũtãma nügũ nixu na norũ ngũexũ yĩxũ
(Mt 26.30-35; Lc 22.31-34; Cu 13.36-38)

26 Rũ ñuxũchi nawiyaegũ ñuxre ga Tupanaãrũ wiyaegu. Rũ yemawena rũ Orĩbunecũarũ Mèxpũnewa naxĩ. 27 Rũ yexguma ga Ngechuchu rũ ñanagũrũ

nüxü: —Guxāma i pema rü tá choxü ípetèxgü. Erü ngēmaācü nüxü nixu i Tupanaārü ore i ümatüxü i ñaxü:

“Tá chayamèx ya carneruarü dauruü, rü tá nanaxüanemare i carnerugü”, ñaxü. ²⁸ —Natürü ngèxguma marü yuwa ícharüdaxguwena, rü chaxira tá pexüpa Gariréaanewa chaxü —ñanagürü. ²⁹ Rü yexguma ga Pedru rü ñanagürü nüxü: —Woo guxüma i togü cuxü ítèxgu, rü choma rü tãütáma cuxü íchatèx —ñanagürü. ³⁰ Rü Ngechuchu nanangäxü rü ñanagürü nüxü: —Aixcüma cumaā nüxü chixu rü ñomatama i chütaxügu rü naxüpa na taxreëxpüxcüna yaçaxü i otá, rü tomaëxpüxcüna taxütáma cugü quixu na chorü duüxü quíxü —ñanagürü. ³¹ Natürü nüma ga Pedru rü ñanagürüama: —Woo wüxigu cumaā chayuxgu, rü tãxütáma chaugü ichicux na curü duüxü chiüxü —ñanagürü. Rü guxüma ga togü ga norü ngüexügü rü ta yema ñanagürügü.

Ngechuchu rü Yechemaníwa nayayumüxë
(Mt 26.36-46; Lc 22.39-46)

³² Rü yemawena rü Ngechuchu rü norü ngüexügü rü nawa naxí ga wüxi ga nachica ga Yechemanígu äegaxü. Rü Ngechuchu rü ñanagürü nüxü: —¡Nuā perütogü yoxni paxa yéa chayayumüxë! —ñanagürü. ³³ Rü ñüxüchi ínayagagü ga Pedru, rü Chaütiágu, rü Cuáü. Rü naxcèx ínaxügu ga na poraäcü nangechaüxü rü naxíxãchiãèxü. ³⁴ Rü yexguma rü ñanagürü nüxü: —Poraäcü changechaü, rü nagu charüxínü na ngēmamaā tá chayuxü. ¡Rü nuxa perücho i pemax, rü ipedaue! —ñanagürü. ³⁵ Rü yexguma ga Ngechuchu rü yéaxüra naxü. Rü ñaxtüanegu nanangücuchi. Rü Tupanana naxcèx naca na nawa ínanguxuchixüçèx ga yema ngüxü ga yexguma chi Tupanaārü ngüchaü yixígu. ³⁶ Rü norü yumüxëwa rü ñanagürü: —Pa Chaunatüx, cuxcèx rü guxüma natauxcha. ¡Rü nüxna choxü ínanguxuchixëë i ñaā ngüxü i tá choxü üpetüxü! Natürü chanaxwëxe i cunaxü i cuxrütama ngüchaü rü tama i choxrü —ñanagürü. ³⁷ Rü ñüxüchi nataegu ga norü ngüexügü íyexmagüxüwa. Rü nüxü inayangau ga na ínapeexü. Rü ñanagürü Pedruxü: —Pa Chimáüx, ¿ícupe? ¿Tama éxna namaā cupora na icudauxü, rü bai i wüxi i ora? ³⁸ —¡Rü ipedaue, rü Tupanana naxcèx peça na pexü nangüxëèxüçèx na tama choxü ípetáxüçèx i ngèxguma tacü rü guxchaxü pexü üpetügu! Erü aixcüma peäëwa rü ípememare, natürü pexene nixí i ngēma turaxü —ñanagürü. ³⁹ Rü wenaxärü ínixü, rü noxrirüütama nayayumüxë. ⁴⁰ Rü yexguma wenaxärü norü ngüexügüçèx nataegu, rü nüxü inayangau ga na wenaxärü ínapeexü, yerü poraäcü nayaxtaexüchi. Rü yemacèx ga nümagü rü tama nüxü nacuèxgü ga na tacümaā tá nangäxügüäxü. ⁴¹ Rü norü tomaëxpüxcüna wenaxärü norü ngüexügüçèx nataegu, rü ñanagürü nüxü: —¿Ñüxma rü ta éxna ípepeeama rü íperüngüèãma? ¡Rü marütama! Erü choma i Tupana Nane na duüxüxü chiüxü rü marü nawa nangu i ora na choxü na yayauxgüxü rü nüxna na choxü namugüxüçèx i duüxügü i chixexü i pecaduäxgüxü. ⁴² —¡Rü ipechigü, rü ngíxä ítixü! Erü marü ñomama nixí i ngēma choxü íyaxuaxüxü —ñanagürü.

Ngechuchuxü niyauxgü
(Mt 26.47-56; Lc 22.47-53; Cu 18.2-11)

⁴³ Rü yexguma íyadexayane ga Ngechuchu, rü ínangu ga Yuda ga norü ngüexüchirëx íxixü. Rü nawe narüxí ga muxüma ga duüxügü ga taramaā rü naímaā íxãxnexü. Rü yema nixí ga duüxügü ga yéma namugüxü ga paigüarü äëxgacügü rü ngüexëëruügü ga mugüwa ngüxëëtaegüxü rü

Yudíugüarü ãëxgacüguerugü. 44 Rü Yuda ga ínaxuaxüxü rü marü yema duüxüğümaã nanamexëë, rü ñanagürü:

“Ngëma nüxü chachüxuxü nixí i Ngechuchu. Rü ngëma tá nixí i piyauxgüxü rü meã peyanáíácüma peyagagüxü” —ñanagürü. 45 Rü yemaãcü Ngechuchucëx nixü, rü ñanagürü nüxü: —Pa Ngúexëëruüx —ñanagürü. Rü ñüxüchi nanachüxu. 46 Rü yexgumata Ngechuchuxü niyauxgü. 47 Natürü wüxi ga Ngechuchutanüxü nanawëxechi ga norü tara, rü yemamaã paigüarü ãëxgacüarü duüxüxü ínadaechinü. 48 Rü yexguma ga Ngechuchu rü yema duüxüğüna naca, rü ñanagürü nüxü: —¿Tüxcüü taragü rü naíxmenëxãgümaã chauxcëx nuã pexí na choxü peyarüyauxgüxüçëx ñoma wüxi i ngítëxáxü chiüxürüü? 49 —Rü guxü ga ngunexügu rü petanüwa chayexma ga yexguma tupauca ga taxünewa changüxëëtaegu, rü taguma choxü piyauxgü. Natürü ñaa ñuxma ngupetüxü, rü nangupetü na yanguxüçëx i Tupanaärü ore i umatüxü —ñanagürü. 50 Rü yexguma ga guxüma ga norü ngúexüğü rü nüxna nibuxmü. Rü nüxícatama yéma nanatëxgü ga Ngechuchu. 51 Natürü wüxi ga ngextüxücü ga düxruümaãxüca nügü nuquecü nawe nixüchigü. Rü yema duüxüğü rü nayayauxgü. 52 Natürü nüma rü nüxü ningëx ga yema düxruü, rü yemaãcü ngexchiruácüma ñíña.

*Ãëxgacügüpëxewa Ngechuchuxü nagagü
(Mt 26.57-68; Lc 22.54-55, 63-71; Cu 18.12-14, 19-24)*

53 Rü yexguma ga yema duüxüğü rü paigüarü ãëxgacüpëxewa nanagagü ga Ngechuchu. Rü yexma nangutaquëxegü ga guxüma ga togü ga paigü ga ãëxgacügü ixígüxü, rü yema Yudíugüarü ãëxgacügüerugü, rü yema ngúexëëruügü ga mugüwa nguxëëtaegüxü. 54 Natürü ga Pedru rü yaxügu nawe nixächigü ñuxmata guma paigüarü ãëxgacüpataëxtüwa nangu. Rü purichíagü ga tupauca ga taxüneärü dauruügümaã yéma íãxtüwa narüto. Rü nügü yéma nanaíxü üxüxütawa. 55 Rü yema paigüarü ãëxgacügü rü guxüma ga yema togü ga ãëxgacügü ga itaxü rü naxcëx nadaugü ga ñuxácü Ngechuchuxü na ínaxuaxügüxü rü na yamëxgüãxüçëx. Natürü taxucürüwa nüxü inayangaugü ga íacüçëx tá na yamëxgüãxü. 56 Yerü woo muxüma ga duüxüğü rü nüxü nixugüe ga doramare ga nachiga, natürü nügütanüwatama rü tama nawüxigu ga norü ore. 57-58 Rü ñuxre ga togü inachigü rü doraxümare nixugüe ga Ngechuchuchiga. Rü ñanagürügü: —Toma nüxü taxínüë ga na ñaxü:

“Tá chanangutaxüxëë ya daa tupauca ya taxüne ya duüxüğü üxüne. Rü tomaëxpüx i ngunexügu tá chanaxü ya náí ya tama duüxüğü üxüne”, ñaxü —ñanagürügü. 59 Natürü woo yema oremaã, rü tama nawüxiguéga ga norü ore. 60 Rü yexguma ga guma paigüarü ãëxgacü rü guxüpëxewa inachi.

Rü Ngechuchuna naca, rü ñanagürü: —¿Éxna taxuxümaãma cunangãxü i ñuxmax? ¿Rü íacü nixí i ngëma nüxü yaxugüxü i cuchiga? —ñanagürü.

61 Natürü ga Ngechuchu rü nangeëxmare, rü taxuxümaãma nanangãxü. Rü yemacëx ga nüma ga paigüarü ãëxgacü rü wenaxärü nüxna naca, rü ñanagürü: —¿Rü cuma quiüxü ya Cristu ya Tupana ya mecü Nane? —ñanagürü. 62 Rü Ngechuchu rü ñanagürü nüxü: —Ngü. Ngëma nüxü quixuxü chixí. Rü tá choxü pedaugü i ngëxguma Tupana ya poracüarü tügüneçüwawa charütoxgu rü ngëxguma caixanexügu wenaxärü núma chaxüxgu —ñanagürü. 63 Rü yexguma ga guma paigüarü ãëxgacü rü norü numaã nügüchirugu nagaugü. Rü ñanagürü: —¿Tüxcüü marü tanaxwëxe i to i duüxü i nüxü ixügüxü i

nachiga? ⁶⁴ —Rü pematama marü nüxü pexĩnüë na ñuxãcü Tupanamaã naguxchigaxü. ¿Rü ñuxü ñapegüxü i ñuxmax? —ñanagürü. Rü guxüma wüxigu narüxinüë rü: —Aixcúma nixĩ na chixexü naxüxü rü namexü na nayuxü —ñanagürügü. ⁶⁵ Rü ñuxre ga nümagü rü inanaxügüë ga nüxna na naçuaixgüëxü. Rü nanatüxetügü rü ñuxüchi nüxü nidagügü ñaxümaã: —¡Nüxü nacüëx na texë cuxü idagüxü! —ñanagürügü. Rü yema tupauca ga taxüñeãrú dauruügü ga purichigü rü nanapechewegü.

Pedru rü tama nügü nixu na Ngechuchuxü nacuáxü
(Mt 26.69-75; Lc 22.56-62; Cu 18.15-18, 25-29)

⁶⁶ Rü yoxni ga Pedru rü ñaxtüwa ãëxgacüpatãëxtüwa nayexma. Rü yexgumayane yéma ingu ga wüxi ga pacü ga guma ãëxgacüarü duñxü ixicü. ⁶⁷ Rü yexguma Pedruxü nadëuxgu ga yéma üxüxütawa nügü na nanaixüxü, rü meã nüxü idawenü, rü ngigürügü nüxü: —Cuma rü ta namücü quixĩ i ngëma Ngechuchu i Nacharëtucüãx —ngigürügü. ⁶⁸ Natürü ga Pedru rü nügü inicux na Ngechucharü duñxü yixü, rü ñanagürü: —Choma rü tama nüxü chacuëx ya yima. Rü tama nüxü chacuëx i tacüchiga nixĩ i ngëma nüxü quixuxü —ñanagürü. Rü yexguma ga nüma rü ñpataëxtüarü düxëtüwa naxü. Rü yexgumatama nica ga otá. ⁶⁹ Natürü ga yema pacü rü wenaxãrú Pedruxü idau, rü inaxügü ga yema togümaã nüxü na yaxuxü, rü ngigürügü: —Ñãã rü wüxi i natanüxü nixĩ —ngigürügü. ⁷⁰ Natürü nüma ga Pedru rü wena tama nügü nixu. Rü yixcamaxüra rü yema duñxügü ga yéma yexmagüxü rü wenaxãrú ñanagürügü nüxü: —Aixcúma nixĩ na cuma rü ta ngëma Ngechuchutanüxü na quixü, erü wüxi i Garirëaanecüãx quixĩ —ñanagürügü. ⁷¹ Rü yexguma ga Pedru rü porãcü nügü nixã, rü ñanagürü: —Rü aixcúma tama nüxü chacuëx i ngëma yatü i nachiga pidexagüxü. Rü ngëxguma doraxü chixuxgu rü ¡Tupana choxü poxcux! —ñanagürü. ⁷² Rü yexgumatama norü taxreëxpüxcüna nica ga otá. Rü yexguma ga Pedru rü nüxna nacüëxãchi ga yema ore ga üpaacü Ngechuchu namaã nüxü ixuxü ga ñaxü:

“Rü naxüpa na taxreëxpüxcüna otá icaxü, rü cuma rü tá tomaëxpüxcüna cugü quicux na chorü duñxü quixü”, ñaxü. Rü yexguma ga Pedru rü porãcüxüchima naxaxu.

15

Piratupëxewa nayexma ga Ngechuchu
(Mt 27.1-2, 11-14; Lc 23.1-5; Cu 18.28-38)

¹ Rü yexguma yangunegu, rü nangutaquëxegü ga ãëxgacügü ga taxügü ga paigüarü ãëxgacügü rü Yudiügüarü ãëxgacügüerügü rü ngüxëëruñgü ga mugüwa ngüxëëtaegüxü rü guxüma ga togü ga yema ãëxgacügütanüwa ügüxü. Rü Ngechuchuxü yanëixgüchacuüãcüma ãëxgacü ga Piratuxütawa nanagagü. ² Rü nüma ga Piratu rü Ngechuchuna naca rü ñanagürü: —¿Cuma quixü i Yudiügüarü ãëxgacü ya tacü? —ñanagürü. Rü Ngechuchu nanangãxü, rü ñanagürü: —Ngü, yima nüxü quixücü chixĩ —ñanagürü. ³⁻⁴ Natürü yema paigüarü ãëxgacügü rü porãcü ñanaxuaxügüama, rü yemacëx ga Piratu rü wenaxãrú Ngechuchuna naca, rü ñanagürü: —¿Éxna taxuxümaãma cunangãxü? ¡Dücëx i ñuxre i cuchiga i nüxü yaxügüëxü! —ñanagürü. ⁵ Natürü ga Ngechuchu rü taxuxümaãma nanangãxü. Rü yemacëx ga Piratu rü porãcü nabaixãchiãë.

Piratu rü Ngechuchumaã nanaxuegu na nayuxücëx
(Mt 27.15-31; Lc 23.13-25; Cu 18.38-19.16)

6 Rū gucü ga taunecügu ga yexguma yema Üpetüchigaarü petawa nan-guxgu rü Piratu ínananguxuchixêëxü ga wüxi ga poxcuxü ga duüxügü naxcèx ícagüxü, yerü yema nixí ga nacüma. 7 Rū wüxi ga yatü ga Barabágu äegaxü, rü poxcupataügu napoxcu wüxigu namaã ga togü ga natanüxü ga máëtagüxü ga yexguma äëxgacüxü ínatëxüchigüchaügu. 8 Rū yema duüxügü rü yéma Piratuxütawa nangugü. Rū ínanaxügüe ga Piratuna na nacagüexü na naxcèx yangéãxüçèx ga wüxi ga poxcuxü aixrügumarüü. 9 Rū Piratu nanangãxü, rü ñanagürü: —¿Penaxwëxexü na pexcèx íchananguxuchixêëxü ya yima Ngechuchu ya duüxügü Yudiügüarü äëxgacümaã naxugüäcü? —ñanagürü. 10 Rū yema ñanagürü ga Piratu yerü nüxü nacüèx ga na yema paigüarü äëxgacügü rü na yaxauxãchieüçèx yíixü ga Ngechuchu nüxna yamugüãxü. 11 Natürü ga yema paigüarü äëxgacügü rü duüxügüxü namugü ga na tagaäcü naxcèx ínacagüxü ga na Barabáxü yangëxüçèx. 12 Rū yexguma ga Piratu rü nüxna naca, rü ñanagürü: —¿Rü ñacü nixí i penaxwëxexü na chanaxüxü namaã ya yima Yudiügüarü Äëxgacügu pexüégaçü? —ñanagürü. 13 Rū nümagü ga duüxügü rü tagaäcü nanangãxügü, rü ñanagürügü: —¡Curuchawa yapota! —ñanagürügü. 14 Rū yexguma ga Piratu rü ñanagürü nüxü: —¿Natürü ñacü rü chixexü naxü? —ñanagürü. Natürü ga nümagü rü wenaxärü tagaäcü ñanagürügü: —¡Curuchawa yapota! —ñanagürügü. 15 Rū yexguma ga Piratu rü Barabáxü ínanuxuchixêë, yerü duüxügüxü nataãëxêëchaü. Rū yexguma churaragüxü Ngechuchuxü naçuaixêëguwena ga Piratu, rü ñuxüchi nüxna nanamu na curuchawa yanapotagüãxüçèx. 16 Rū yexguma ga nümagü ga churaragü rü äëxgacüpataëxtüwa nanagagü. Rū yéma nanangutaquëxexêë ga guxüma ga namüçügü ga churaragü. 17 Rū ñuxüchi ga yema churaragü rü wüxi ga máxü ga daucharaxü ga naxchirugu nayacüxêëgü. Rū naëruwa nayangëxcuchigü ga wüxi ga boxü ga chuchixütwa naxügüxü. 18 Rū yemawena ínanaxügüe na tagaäcü ñagüxü: —¡Namaxü ya Yudiügüarü äëxgacü! —ñagüxü. 19 Rū wüxi ga naïxmenëxãmaã naëruwa nanaçuaixcagü, rü nüxna nacuaixgüe. Rū napëxegu nacaxãpüxügü rü nüxü nicüèxüüügüneta. 20 Rū yexguma yemaäcü nagu yadauxcüraxüügüguwena, rü ínacacüxuchigü ga yema naxchiru ga daucharaxü. Rū wenaxärü nax-chirugutama nayacüxêëgü. Rū ñuxüchi ínanagaxüchigü na curuchawa yanapotagüãxüçèx.

*Ngechuchuxü curuchawa nipotagü
(Mt 27.32-44; Lc 23.26-43; Cu 19.17-27)*

21 Rū yéma naxüpetü ga wüxi ga yatü ga Chireneçüãx ga Chimáügu äegacü ga Areyáüdrü rü Rufu nanatü íxícü ga naãnewa ne ücü. Rū yexguma yéma naxüpetügu rü yema churaragü rü guma yatüxü ngíxü íningexêëgü ga Ngechuchuarü curucha. 22 Rū Ngechuchuxü nawa nagagü ga wüxi ga nachica ga Górgutagu äegaxü. Rū yema naega rü: Duüxêërchinëxãchitaü, ñaxüchiga nixí. 23 Rū nüxna nanaxägü ga binu ga miramaã äeücü. Natürü nüma ga Ngechuchu rü tama nayaxaxü. 24 Rū yemawena curuchawa nayapotagü. Rū nümagü ga churaragü rü wüxi ga díeru ngíxü nañanagügu na yemawa nüxü nacüèxgüxüçèx na ñuxäcü tá nügümaã yatoyeãxüçèx ga Ngechuchuchiru, rü ñacü tá na yangexü ga wüxichigü. 25 Rū meãma 9 arü or-agu ga pëxmama nixí ga curuchawa yapotagüãxü. 26 Rū yéma nayapocuchi ga wüxi ga mürapewa ga äegatachinüxü ga nüxü íxuxü ga ñacüçèx curuchawa na yapotagüãxü. Rū yema naega ga mürapewagu üxü, rü ñanagürü: “Yudiügüarü

Āēxgacū”, ñanagürü. ²⁷ Rū naxrūđ curuchawa nayapotagū ga taxre ga máetagūxū rü wūxi ga norū tūgūnecūwawa rü to ga norū toxwecūwawa. ²⁸ Rū yemaācū ningu ga Tupanaārū ore ga ūmatūxū ga ñaxū:

“Ngēma chixexū ūgūxūtanūwaama natèx”,

ñaxū. ²⁹⁻³⁰ Rū yema duūxūgū ga yēma chopetūxū, rü Ngechuchumaā naguxchigagū, rü nanexāerugūācūma ñanagürügū: —jDücèx! Cuma cunangutaūxēēga ya tupaucā ya taxūne, rü tomaēxpūx i ngunexūgu wēnaxārū ícunadaxēēga. jĒcū! jCugūtama namaxēē i ñuxmax, rü írūxī i curuchawa! —ñanagürügū. ³¹ Rū yexgumarūđ ta Ngechuchuxū nacugūecūraxū ga paigūarū āēxgacūgū, rü ngūexēerūgū ga ore ga mugūwa nguxēētagūxū. Rū ñanagürügū: —Nūma rü togūxū namaxēēē, natürü taxucürūwama nūgūtama namaxēē. ³² —jÑuxma rü ínaxīx i curuchawa i ngēma Cristu i Iraéanecūāxārū Āēxgacū na nūxū idaugūxūcèx rü nūxū yaxōgūxūcèx! —ñanagürügū. Rū woo ga yema máetagūxū ga naxrūđ curuchawa ipotagūxū, rü namaā naguxchigagū.

Nayu ga Ngechuchu

(Mt 27.45-56; Lc 23.44-49; Cu 19.28-30)

³³ Rū yexguma tocuchiwa nanguxgu, rü guxū ga naānewa naxēāne ñuxmata yáuanecū tomaēxpūxarū orawa nangu. ³⁴ Rū yematama oragu rü tagaācū aita naxū ga Ngechuchu, rü ñanagürü: —Erix, Erix, ¿damā chabátani? —ñanagürü. Rū ngēma rü ñaxūchiga nixī: “Pa Chorū Tupanax, Pa Chorū Tupanax ¿tūxcūđ choxū nuā cutèx?” ñaxūchiga nixī. ³⁵ Rū nūmaxū ga duūxūgū ga yēma yexmagūxū, rü nūxū naxīnūē rü ñanagürügū: —jDücèx, nūxū pexīnūē! Nuxcūmaūcū ga Tupanaārū orearū uruū ga Eriacèx naca —ñanagürügū. ³⁶ Rū yexguma rü wūxi ga yema duūxūgū ga yēma yexmagūxū, rü inañaāchi rü wūxi ga tūaxmū niwaixēē namaā ga binu ga marū ngūchièxūchicū. Rū wūxi ga dexnewa nayanēix, rü ñuxūchi Ngechuchuxū nanawēx na nūxū natuxuxūcèx. Rū yema togūxū ñanagürügū: —jYixrūma! jNgīxā rü itarūdaunū ngoxita Eriā nuā ū na curuchawa ínaxīxēēāxūcèx! —ñanagürügū. ³⁷ Natürü nūma ga Ngechuchu rü tagaācū aita naxū, rü ñuxūchi nayu. ³⁸ Rū yexguma ga tupaucā ga taxūneārū tūyemachiāxū rü taxregu narūgaute. Rū daxūwa ínaxūgū ga na nagautexū rü ñuxmata ñaxtūwa nangu. ³⁹ Rū guma churaragūarū āēxgacū ga Dumacūāx ga Ngechuchupēxewa yexmacū, rü yexguma nūxū nadēuxgu ga na nayuxū, rü ñanagürü: —Aixcūma nixī ya daa yatū i Tupana Nane na yīixū —ñanagürü. ⁴⁰ Rū iyexmagū ta ga ñuxre ga ngecūgū ga yēma yaxūwa nūxū rūdaunūcū. Rū yematānūwa iyexmagū ga María ga Magadácūāx, rü Charumé, rü María ga Yúche rü Chaūtiágu ga rūbūmaēcū naē. ⁴¹ Rū yema ngecūgū iyixī ga Ngechuchuxū íxūmūcūgūcū rü nūxū rūngūxēēgūcū ga yexguma Garirēaanewa nayexmagu. Rū yexgumarūđ ta yēma iyexmagū ga mucūma ga naīgū ga ngecūgū ga Ngechuchuwe rūxīcū ga yexguma Yerucharēūwa naxūxgu.

Ngechuchu rü naxmaxūgu nayanaxūcuchigū

(Mt 27.57-61; Lc 23.50-56; Cu 19.38-42)

⁴²⁻⁴³ Rū yexguma marū nachūtachaūgu ga yema ngunexū ga Yudīgū nāgu nūgū ímexēēgūxū naxcèx ga ngūxchigaarū ngunexū, rü noxtacūma Piratuxūtawa naxū ga Yúche ga Arimatéacūāx. Rū nūma ga guma Yúche rü Yudīgūarū āēxgacūgū ga tacūtanūwa naxū, rü wūxi ga āēxgacū ga poraācū nūxū nangechaūgūcū nixī. Rū nūma rü ta ínananguxēē na Tupana norū

ãêxgacü yîixücèx. Rû Piratuxûtawa naxcèx ínayaca ga Ngechuchuxüne. ⁴⁴ Rû nabaixãchiãê ga Piratu ga marü na nayuxü. Rû yemacèx norü churaragüarü ãêxgacücèx nangema na nüxna naçaxücèx na ñuxgumama yîixü ga marü na nayuxü. ⁴⁵ Rû yexguma norü churaragüarü ãêxgacü namaã nüxü ixuxgu ga marü na nayuxü, rü nüma ga Piratu rü Yúchena nanaxã ga naxüne. ⁴⁶ Rû yexguma ga Yúche rü naxcèx nataxe ga wüxi ga naxchápenüü ga mexêchixü. Rû curuchawa nanayaxu ga Ngechuchuxüne, rü yema naxchápenüümaã nananuque. Rû wüxi ga mëxpüne ga nutanaxcèxgu ùpaacü yacaxmaügüxü ga naxmaxügu nayanaxücuchi. Rû ñuxüchi wüxi ga nuta ga tacümaã nanangüxtaü. ⁴⁷ Rû María ga Magadácüãx rü María ga Yúche naê rü nüxü írúdaunü ga ngexta na yanaxücuchigüãxü.

16

Wenaxãrü namaxü ga Ngechuchu (Mt 28.1-10; Lc 24.1-12; Cü 20.1-10)

¹ Rû sabaduarü ngunexüguwena, rü María ga Magadácüãx, rü Charumé, rü María ga Chaütiágu naê naxcèx itaxegü ga pumara na namaã nachaãxücèx ga Ngechuchuxüne. ² Rû pèxmamaxüchi ga noxri üèxcü iyarügoxgu ga yüxüarü ngunexügu, rü yema ngecügü rü íiyadaügü ga yema naxmaxü ga nagu yanaxücuchigüãxüwa. ³ Rû ngîgü ngîgürügügü: —¿Texé tá taxcèx ítanaxügachi ya yima nuta ya namaã nangüxtaücü? —ngîgürügügü. ⁴ Natürü yexguma meãma nüxü nadaunügu, rü nüxü idaugü ga marü na ínaxügachixü ga guma nuta ga tacü ga namaã nangüxtaücü ga yema naxmaxü. ⁵ Rû yexguma nagu nadaugügu ga yema naxmaxü, rü nüxü idaugü ga wüxi ga ngextüxücü ga mëxchiruxü ga cómüchiruxü ga yema naxmaxüãrü tügüncëwawa rütöxü. Rû poraãcü íbaixãchiãêgü ga yema ngecügü. ⁶ Natürü nüma rü ñanagürü ngîxü: —¿Tãxü i pebaixãchiexü! Pema rü naxcèx pedaugü ya Ngechuchu ya Nacharétucüãx ga guma curuchawa yapotagüãcü. Marü wena namaxü, rü nataxuma i nuã. ¿Dücèx, meã nüxü pedèux i ñaã nachica ga nagu naxügüãxü! ⁷ —¿Rü paxa ípixi rü Pedrumaã rü ngëma togü i ngüexülgümaã nüxü peyarüxügü, rü ñapegügü nüxü:

“Nüma ya Ngechuchu rü marü nüxüira pexüpa Gariréaanewa naxü. Rü ngema tá nüxü peyadaugü ngëma pemaã nüxü yaxuxürüü”, ñapegügü nüxü! —ñanagürü. ⁸ Rû yexguma ga yema ngecügü rü nüxna íiyabuxmä ga yema naxmaxü, yerü ngîrü muüëmaã poraãcü iyaduruxe. Rû taxüemaãma nüxü iyaxugügü, yerü poraãcü imuüê.

Ngechuchu rü ngîxcèx nangox ga María ga Magadácüãx (Cü 20.11-18)

⁹ Rû yexguma Ngechuchu yuwa írúdaxguwena ga noxri yangunegu ga yüxüarü ngunexügu, rü ngîxcèxira nangox ga María ga Magadácüãx ga ngîwa ínawoxüãcü ga 7 ga ngoxogü. ¹⁰ Rû ngîma rü íiyaxü, rü namaã nüxü iyarüxu ga yema Ngechuchumücügü ga íngechaügüxü rü íxauxexü. ¹¹ Natürü ga nümagü rü tama nayaxögüchaü ga yexguma nüxü naxínüëgu ga na namaxüxü ga Ngechuchu rü na nüxü nadauxü ga ngîmax.

Ngechuchu rü taxre ga norü ngüexügücèx nangox (Lc 24.13-35)

¹² Rû yemawena ga Ngechuchu rü tööcü nangox naxcèx ga taxre ga norü ngüexügü ga yexguma nama ga naãnewaama nadaxügu naxüxgu. ¹³ Rû

nümagü rü nawoegu, rü yema togü ga ngúexüğümaã nüxü nayarüxügü. Natürü yemagüaxü rü ta tama nayaxögü.

Ngechuchu nanamu ga norü ngúexüğü
(Mt 28.16-20; Lc 24.36-49; Cu 20.19-23)

¹⁴ Rü yemawena ga Ngechuchu rü naxcèx nangox ga yema 11 ga norü ngúexüğü ga yexguma mechawa ínachibüeyane. Rü nayangagü naxcèx ga tama aixcúma na yaxögüaxü rü tama na inaxínüèxü. Yerü ga nümagü rü tama nüxü nayaxögüchaü ga yema nüxü daugüxü ga marü wena na namaxüxü.

¹⁵ Rü ñanagürü nüxü: —jGuxü i nañewa pexí rü guxü i duüxüğümaã nüxü peyarüxu i ore i mexü! ¹⁶—Rü yíxema yaxõxè rü íbaiexe rü tá tüxü nangèxma i maxü i taguma gúxü. Natürü yíxema tama yaxõxè rü tá tapoxcu. ¹⁷—Rü ñaã tá nixí i cuèxruüğü i nawa nüxü icuáxü i ngèma yaxögüxü. Rü chauégagu tá ínanawoxü i ngxogü. Rü ngexwacaxüxü i nagagüwa tá nidexagü. ¹⁸—Rü naxmèxmaã tá nüxü nayayauxächí i äxtapegü. Rü ngèxguma yaxaxgüägu i tacü i nawa iyuxü, rü täütáma nanachixexèè. Rü tá tüxü ningögügü ya ídaaweexe rü tá tümacèx nitaanegü —ñanagürü.

Ngechuchu rü daxügüxü ga nañewa naxü
(Lc 24.50-53)

¹⁹ Rü nüma ga Cori ga Ngechuchu rü yexguma norü ngúexüğümaã yadeaxguwena, rü Tupana rü daxügüxü ga nañewa nanaga. Rü Tupanaärü tügünecüwawa nayarüto. ²⁰ Rü nümagü ga norü ngúexüğü rü inaxíächí na guxüwama nüxü yanaxugüexü ga ore i mexü. Rü nüma ga Cori rü nüxü narüngüxèè, rü nanangoxèè na aixcúma yíxü ga yema ore, yerü wüxigu namaã napuracü na naxügüäxücèx ga mexü ga taxügü ga Tupanaärü poramaã naxügüxü.

ORE I MEXÜ GA LUCA ÜMATÜXÜ

Norü ügü i ore ga Ngechuchuchiga

1-2 Pa Mecü Pa Teóquirux, nayexma ga ñacü ga totanüwa ngupetüxü. Rü muxüma ga duüxügü rü marü nanaxümatügü ga yemachiga, yexgumarüü ga tomaã nüxü na yaxugüexürüü ga yema duüxügü ga noxriarü ügügumama Ngechuchuxü daugüxü rü nüxü rüngüxëëgüxü ga norü orearü uchigawa. 3-4 Rü ngëmacëx, Pa Teóquirux, rü choma rü ta meãma naxcëx íchaca ga nachiga ga guxüma ga yema Ngechuchu üxü. Rü ñuxma rü chauxcëx rü name na meãma cuxcëx chanaxümatüxü i ngëma na meãma nüxü cucuáxcëx na aixcüma yüxü ga yema ore ga marüchirëx cuxü nangüxëëgüxü ga togü.

Tupanaärü orearü ngeruü ga daxüçüãx nanaxunagü ga Cuáü ga baiüxëeruüärü buxchiga

5 Rü yexguma Erode äëxgacü ixüxgu ga Yudéaanewa, rü yéma nayexma ga wüxi ga Yudiügüarü pai ga Zacariagu äëgacü. Rü pai ga Aräütá ga Abiatanüxü nixü ga nümax. Rü namëxéga rü Erichabé nixü. Rü tüma rü ta pai ga Aräütanüxü tixü. 6 Rü nüma ga Zacaría rü namëx ga Erichabé rü meãma Tupanapëxewa, namaxë rü aixcüma naga naxüñüë ga norü mugü. Rü yemaäcü taxucürüwa texé chixri nachiga tidexagü. 7 Natürü nangexacügü yerü namëx rü ingexacü. Rü ñuxüchi ga nümagü rü marü yaguãxgü nixügü. 8 Rü wüxi ga ngunexügu rü yema paigütücumü ga Zacaría natanüwa üxügu nangu na tupauca ga taxünewa Tupanaärü puracü naxügüxüçëx. 9 Rü yema paigü rü nacüma nixü ga nüxü na naxunetagüxü ga wüxi ga natanüxü na tupaucaarü aixepëgu naxüçüçëx rü yéma Tupanacëx na yaguãxüçëx ga pumara ga yixixü. Rü yema ngunexügu rü Zacariagu nangu na tupaucaarü aixepëgu naxüçüçëx na yéma yaguãxüçëx ga pumara. 10 Rü yema pumara íyaguyane rü guxüma ga duüxügü ga düxétüwa yexmagüxü rü ínayumüxëgü. 11 Rü ngürüächü Zacariacëx nangox ga wüxi ga Tupanaärü orearü ngeruü ga daxüçüãx. Rü yema nachica ga pumara nawa yagugüüxüärü tügüñecüwagu nachi. 12 Rü yexguma Zacaría nüxü dëuxgu ga yema Tupanaärü orearü ngeruü ga daxüçüãx, rü poraäcü nabaixächüäë, rü poraäcü namuü. 13 Natürü yema daxüçüãx ga Tupanaärü orearü ngeruü rü ñanagürü nüxü: —Pa Zacaría, ¡täxü i cumuüxü! Erü Tupana rü marü nüxü naxüñü i curü yumüxë. Rü cumxë i Erichabé rü cuxü tá ixäxäcü, rü Cuáüga tá cunaxüéga. 14 —Rü cuma rü tá poraäcü cutaäëxüchi i ngëxguma nabuxgu. Rü muxüma i togü i duüxügü rü tá ta nataäëgüxüchi. 15 —Erü yima cune rü Tupanapëxewa rü tá wüxi ya mexëchicü nixü. Rü täütáma binu nayaxaxü, rü taxuüma to i ñacü rü ngüchixáxü tá nixaxü. Rü tauta nabuyane rü Tupanaäë i Üünexü rü tá nüxna nangu. 16 —Rü nüma tá muxüma i Yudiügüxü narüngüxëë na norü Cori ya Tupanacëx nawoëgüçëx. 17 —Rü nüma ya Cuáü rü tá Cori ya Cristupëxëgu nixü. Rü nuxcümaücü ga Tupanaärü orearü uruü ga Eriarüü tá nixü erü tá nüxü nangëxma i Tupanaäë i poraxü. Rü ngëmaäcü tá nüxü narüngüxëë i papágü na naxäçügüxü nangechaüxü, rü ngëma tama Tupanaga íñüëchaüxü rü na aixcüma inaxüñüëxüçëx. Rü ngëmaäcü tá duüxügüxü ínamëxëë naxcëx ya Cori ya Cristu —ñanagürü ga yema daxüçüãx. 18 Rü Zacaría rü yema daxüçüãxna naca, rü ñanagürü: —¿Ñuxäcü tá nixü i ngëma na naxäxäcüxü

i choxmèx? Erü marü chayaxüchi i chomax rü ngîma rü ta marü iya — ñanagürü. ¹⁹ Rû Zacariaxü nangâxü ga yema daxüçüâx, rü ñanagürü: — Choma nixî i Gabi i Tupanaârü puracü chaxüxü. Rû nüma núma choxü namu na cumaã nüxü na chixuxüçèx i ñaã ore i mexü. ²⁰ —Natürü ñuxma i cuma rü tama choxü cuyaxö i ngêma ore i cumaã nüxü chixuxü. Rû ngêmacèx i ñuxma rü tá cungega ñuxmatáta nabu i ngêma cune. Natürü ngêma cumaã nüxü chixuxü, rü aixcüma tá ningu nagu i ngêma ngunexü i Tupana ixunetaxü —ñanagürü. ²¹ Rû yoxni ga duüxügü rü tupaucaarü düxétüwa Zacariaxü nananguxèëgü. Rû nügüna nacagüe ga ñacüçèx na tama paxa yéma ínaxüxüxü. ²² Rû yexguma Zacaría tupaucawa íxüüxgu, rü taxucürüwa duüxügümaã nidexa, yerü nangega. Rû nümagü ga duüxügü rü nüxü nicuèxächitanü ga ñacüxü na nadauxü ga Zacaría ga tupaucaarü aixepena. Rû Zacaría rü taxmèxmaã duüxügüxü nüxü nacuèxèë ga ñacü nüxü na üpetüxü, yerü nangega. ²³ Rû yexguma Zacaría naguxèëgu ga na naxüâxü ga Tupanaârü puracü ga tupauca ga taxünewa, rü wenaxârü napataçèx nataegu. ²⁴ Rû yemawena rü Zacaría namèx ga Erichabé rü íxâxäcü. Rû ngîpatagu irüxâüêcha, rü wüximèëpxüx ga tauemacü taguma düxétüwa íxü. ²⁵ Rû ngîxícatama ngîgürügü: —Cori ya Tupana rü poraäcü choxü narüngüxèë. Rû ñuxma rü marü täütáma chixri chauchiga nidexagü i duüxügü naxçèx na changexacüxü —ngîgürügü.

Wüxi ga Tupanaârü orearü ngeruü ga daxüçüâx nüxü nixu ga Ngechuchuarü buxchiga

²⁶ Rû 6 ga tauemacü marü ngîxü mexgu ga Erichabé ga yema na naxâxäcüxü, rü Gariréaanewa yexmane ga íâne ga Nacharétuwa Tupana nanamu ga norü orearü ngeruü ga Gabi. ²⁷ Rû ngîxütawa naxü ga wüxi ga pacü ga taguma yatü ngîmaã maüxcü. Rû María nixî ga ngîëga. Rû ngîma rü íxâtechaü namaã ga wüxi ga yatü ga Yúhegu äëgacü. Rû nüma ga Yúche rü nuxcümaüçü ga äëxgacü ga Dabítanüxü nixî. ²⁸ Rû yema nachica ga María nawa yexmaxügu naxücu ga Gabi, rü ñanagürü ngîxü: —Nuxmaë Pa Mariáx. Tupana rü poraäcü cumaã nataãë. Rû Cori ya Tupana rü cuxütawa nangèxma, rü guxü i ngexügüarü yexera marü cuxü narüngüxèë —ñanagürü. ²⁹ Natürü yexguma María nüxü dèuxgu ga yema daxüçüâx ga Tupanaârü orearü ngeruü, rü namaã íhaxíchiãë ga yema norü ore ga ngîmaã nüxü yaxuxü. Rû ngîgüãëwa nagu irüxínü ga tüxcüü yemaäcü ngîxü na namoxèxü. ³⁰ Rû yexguma ga Gabi rü ñanagürü ngîxü: —Pa Mariáx, tama name na cumuüxü, erü Tupana rü poraäcü cumaã nataãë. ³¹ —Rü ñuxma rü tá tauemacü cuxü inayarütaxu, rü tá cuxâxäcü, rü tá nayatü i cuxacü. Rû Ngechuchugu tá cunaxüëga. ³² —Rü nüma rü wüxi ya äëxgacü ya taxüchicü tá nixî. Rû Tupana ya Taxüchicü Nane tá nixî i naëga. Rû Cori ya Tupana rü tá nuxcümaüçü ga äëxgacü ga Dabírüü äëxgacüxü nayaxíxèë. ³³ —Rü nüma rü guxügütáma Yudíngüarü äëxgacü nixî. Rû tagutáma ínanguxuchi na äëxgacü na yíixü —ñanagürü. ³⁴ Rû yexguma ga María rü Gabina ica, rü ngîgürügü: —¿Ñuxäcü tá nixî i ngêma na chaxâxäcüxü, erü tauta chaxâte? —ngîgürügü. ³⁵ Rû nüma ga Gabi rü ngîxü nangâxü, rü ñanagürü: —Tupanaãë i Üünexü tá cuxna nangu. Rû Tupana ya Tacüarü pora rü wüxi i caixanexürüü tá cugu nayangaixema. Rû ngêmacèx ngêma õxchana i namaã cuxâxäcüxü rü Tupanapèxewa mecüxüchi tá nixî, rü Tupana Nanemaã tá nanaxugü i duüxügü. ³⁶ —Rü cutanüxü i Erichabé rü marü íxâxäcü woo marü yaguãxchirèx na yíixü. Rû woo ga duüxügü rü:

“Tagutáma ixāxācū” ñanagürügü ngĩxũ, natürü i ñuxma rü marü 6 ya tauemacü ngĩxũ name na marü naxāxācūxũ. ³⁷ —Erü Tupanaāxũ rü taxuũma naguxcha —ñanagürü. ³⁸ Rũ yexguma ga María rü ngĩgürügü: —Chorü Cori ya Tupanaārũ duũxũ chixĩ i chomax. Rũ marü name i chomaā nanaxũ i ngēma chomaā nüxũ quixuxũācūma —ngĩgürügü. Rũ yexguma ngĩxna ínixũ ga yema Tupanaārũ orearü ngeruũ ga daxũcũāx ga Gabi.

María rü Erichabéxũtagu inaxũāne

³⁹ Rũ yexgumaācũü ga María rü paxama nawa ixũ ga guma iāne ga Zacariapata nawa yexmane ga Yudéaneārũ dauxchitawa. ⁴⁰ Rũ Zacariapatawa ingu, rü iyaxücu, rü Erichabéxũ irümoxē. ⁴¹ Rũ yexguma Erichabé nüxũ ínũgu ga Maríaarũ moxē, rü ngĩrũ õxchana ga ngĩānũwa yexmaxũ rü nixĩāxcüü. Rũ Tupanaāē ga Üünexũ rü Erichabéna nangu. ⁴² Rũ yexguma ga Erichabé rü tagaācũ Mariaxũ ngĩgürügü: —Guxũ i ngexũgũarũ yexera Tupana cuxũ narüngũxēē. Rũ ngēxgumarũ ta cunexũ narüngũxēē. ⁴³ —¿Tacıwa chame na nuā chauxũtagu cunaxũānexũ? Pa Chorü Cori Naēx. ⁴⁴ —Erü ngēxguma nüxũ chaxĩnũgu i curũ moxē, rü chauxacũ i chauanüwa ngēxmaxũ rü norũ taāēmaā nixĩāxcüü. ⁴⁵ —Cuma rü cutaāē erü nüxũ cuyaxõ i norũ ore ya Tupana. Rũ ngēmacèx Tupana tá nayanguxēē i ngēma ore i cumaā nüxũ yaxuxũ —ngĩgürügü ga Erichabé. ⁴⁶ Rũ yexguma ga María rü ngĩgürügü: —Choma rü chauāēwa poraācũ Tupanaxũ chicuèxũũ. ⁴⁷ —Rũ chorü Cori ya chorü Maxēeruũmaā chataāēxũchi. ⁴⁸ —Rũ woo wũxi i Tupanaārũ duũxũ i ngearũ dīeruāxē chixĩ, natürü Tupana chaugu narũxĩnũ. Rũ ñuxmaācũü i duũxũgũ rü taāēxcũmaā guxũgutáma choxũ naxugüē. ⁴⁹ —Erü Tupana ya Poracũ rü taxũ i mexũ chauxcèx naxũ. Rũ naxũüne i naega ya Tupana. ⁵⁰ —Rũ nüma ya Tupana rü guxũgutáma nüxũ tangechaũtũmũgũ ya guxāma ya yĩxema aixcũma nüxũ mutēxē. ⁵¹ —Rũ guxũ ga norũ poramaā tũxũ narüyexera ga guxema tũgũtama icuèxũũgũxe. ⁵² —Rũ marũ ínanawoxũ ga yema āēxgacũgũ ga nügũ icuèxũũgũxũ. Natürü guxema duũxēgũ ga tama tũgũ icuèxũũgũxe, rü poraācũ tũxũ narüngũxēē. ⁵³ —Rũ guxema tũxũ nataxũxe, rü muxũma tũxna naxā. Natürü guxema muārũ dīeruāxgũxe rü taxuũma tũxna naxāācũma tũxũ ínimugũ. ⁵⁴ —Rũ poraācũ nüxũ narüngũxēē ga norũ duũxũgũ ga Yudiũgũ. Rũ tama nüxũ inarüngũma na nüxũ ingechaũtũmũgũxũ, yexgumarũ ga nuxcũmaũgũxũ ga tatanũxũmaā na inaxunetaxũ. ⁵⁵ —Yerũ yemaācũ inaxuneta namaā ga tóru õxi ga Abráũ rü namaā ga tatanũxũgũ na guxũgutáma tũxũ nangũxēēxũ —ngĩgürügü ga María. ⁵⁶ Rũ tomaēxpũx ga tauemacü Erichabéxũtagu irũxāũx ga María. Rũ ñuxũchi ngĩpatacèx itaegu.

Cuáũ ga baiũxēerũārũ buxchiga

⁵⁷ Rũ nawa nangu ga ngunexũ ga na naxĩraxacũxũ ga Erichabé. Rũ nayatũ ga ngĩxācũ. ⁵⁸ Rũ yexguma nüxũ nacuèxgũgu na ñuxācũ Tupana ngĩmaā mecũmaxũ, rü ngĩrũ ngaicamagu pegũxũ ga duũxũgũ rü ngĩtanũxũgũ rü ngĩxũ ínayadaugũ, rü ngĩxũ narũmoxēgũ rü ngĩxũ nayataāēgũxēē. ⁵⁹ Rũ 8 ga ngunexũguwena rü ínayawiechèxmũpēxechiraũgũ ga guma ngĩne. Rũ nanatũ ga Zacariagu nanaxũégagũchaũ ga duũxũgũ. ⁶⁰ Natürü naē ga Erichabé rü tama inaxwēxe. Rũ ngĩgürügü: —Narũmemaē nixĩ i Cuáũgu tanaxũéga —ngĩgürügü. ⁶¹ Rũ duũxũgũ rü ñanagürügü ngĩxũ: —¿Tũxcũũ cunaxwēxe i ngēma naega? Erü cutanũxũtanũwa rü tataxuma ya texé ya ngēmagu āegaxe —ñanagürügü. ⁶² Rũ yexguma ga duũxũgũ rü naxmēxwa nanatũ ga Zacariana

nacagüe ga tacü rü naegagu tá na naxüégaãxü. ⁶³ Rü yexguma ga Zacaría rü poperaxü naxuneta na yexma na naxümatüãxücèx ga naega. Rü yexma nanaxümatü, rü ñanagürü:

“Cuáü tá nixí i naega”, ñanagürü ga namatü. Rü guxüma ga duüxügü rü nabaixächiaëgü ga yexguma yema naegaxü nadaugü. ⁶⁴ Rü yexgumatama wenaxärü nidexa ga Zacaría. Rü inanaxügü ga Tupanaxü na yacuèxüxü. ⁶⁵ Rü yemacèx guxüma ga yema duüxügü ga norü ngaicamagu âpatagüxü rü poraäcü nabaixächiaëgü. Rü guxüwama ga yema naãnewa ga Yudéaanewa rü duüxügü nüxü nixuchigagü ga yema ngupetüxü. ⁶⁶ Rü guxüma ga nüxü cuächigagüxü ga yema ngupetüxü, rü nügüãxëwa nagu narüxñüéecha, rü ñanagürügü: —¿Tacü tá nixí i ngëma buxü? Erü Tupana rü aixcüma naxütawa nangëxma —ñanagürügü.

Zacaría rü Tupanaxü nicuèxüü

⁶⁷ Rü nanatü ga Zacária nangu ga Tupanaäe i Üünexü. Rü nüxü nixu ga yema ore ga Tupana namaã nüxü ixuxü. ⁶⁸ Rü ñanagürü: —Name nixí i nüxü ticuèxüügü ya tórü Cori ga nuxcümaücü ga tórü oxí ga Iraéarü Tupana. Erü núma tatanüwa nangu na tüxü yamaxëxëxücèx i yixema i norü duüxügü na ixigüxü. ⁶⁹ —Rü ngëmacèx tüxna nanamu ya wüxi ya poracü ya tórü maxëxëëruü ga nuxcümaücü ga norü duüxü ga Dabítanüxüwa ne ücü. ⁷⁰ —Rü yemaäcü Tupana tamaã inaxuneta nawa ga yema nuxcümaügüxü ga norü orearü uruügü ga üünegüxü. ⁷¹ —Rü yema orearü uruügüwa nüxü nixu rü tá tüxü ñanguxüxëë naxmëxwa i tórü uwanügü rü guxüma i ngema duüxügü i taxchi aiexü. ⁷² —Rü nuxcümaügüxe ga tórü oxigümaã nüxü nixu na nüxü tangechaütümüügüxü rü tagutáma nüxü iyanangümaxü ga yema tümamaã inaxunetaxü. ⁷³⁻⁷⁵ —Rü yemaäcü ga Tupana rü nuxcümaücü ga tórü oxí ga Abráümaã inaxuneta. Rü namaã nüxü nixu rü tá tüxü ñanguxüxëë nüxna i tórü uwanügü na tama imuüëäcüma naxüxücèx i Tupanaärü puracü rü aixcüma mecü na ixigüxü napëxewa i guxü i tórü maxüwa i wüxichigü i ngunexügu —ñanagürü ga Zacaría. ⁷⁶ Rü ñanagürü ta: —Cumax, Pa Chaunex, rü Tupana ya Taxüchicüarü orearü uruümaã tá cuxü naxugü. Erü cuma rü tá Corixüpa yoxni duüxügümaã nüxü quixu i nachiga ya Cori. ⁷⁷ —Cuma rü Coriarü duüxügüxü tá nüxü cucuèxëë na Tupana tá nüxü nüxü ngechaütü i norü pecadugü na ngëmaäcü nayauxgüãxücèx i maxü i taguma güxü. ⁷⁸⁻⁷⁹ —Erü nüxü tangechaütümüügü ya Tupana ya poraäcü tüxü ngechaütü. Rü ngëmacèx daxügüxü i naãnewa taxcèx ne nanamu i ñoma i naãneärü ngóonexëëruü i ngexwacaxüxü na nangóonetanüxëëãxücèx i ngëma duüxügü ga noxri guxüguma norü chixexügüga äücümaxüwa yexmagüxü. Rü núma tá tüxü narüngüxëë na Tupanamaã rüngüxmüëxücèx —ñanagürü ga Zacaría. ⁸⁰ Rü yema buxü rü niyachigü rü wüxichigü ga ngunexügu yexeraäcü Tupanaxü nicuächigü. Rü dauxchita ga ngextá taxüema ixâpataxüwa nayexma ñuxmata yema ngunexüwa nangu na Yudiügüxü nügü nacuèxëëxü.

2

Ngechucharü buxchiga (Mt 1.18-25)

¹ Rü yexguma Agutu äëxgacü ga tacü ixüxgu ga Dumawa, rü nanaxunagü ga na yaxugüãxü ga guxüma ga duüxügü ga guxü ga naãnewa. ² Rü yema nüxüraüxü ga duüxügüarü ugüchiga, rü nanaxü ga yexguma Quirinu äëxgacü ixüxgu ga Chírriaarü naãnewa. ³ Rü guxüma ga duüxügü rü wüxichigü norü ñane

ga nagu nabuxūnēwa nixūchigū ga yēma na yaxugūāxūcēx. ⁴ Rū yemacēx ga Yúche rū Garirēaanēwa yexmane ga iāne ga Nacharētūwa inaxūxū, rū Yudēaarū naānēwa yexmane ga iāne ga Berēūwa naxū. Rū guma nixī ga iāne ga nuxcūmaūcū ga āēxgacū ga Dabī nagu buxūne. Rū yemacēx nixī ga Yúche ga yēma naxūxū, yerū Dabītanūxū nixī ga nūmax. ⁵ Rū Berēūwa naxū ga Yúche na yaxugūūcēx wūxigu ngīmaā ga María ga ngīmaā naxāmēxchaūcū. Natūrū ga María rū itacharaū ga na naxāxācūxū. ⁶ Rū yexguma Berēūwa nayexmagūyane, ngīxna nangu ga ngīrū ngunexū ga na naxīraxacūxū ga María. ⁷ Rū yexma nabu ga nūxīraūcū ga ngīne. Rū naxchápenūūmaā inanuque. Rū wūxi ga wocārū chibūchicagumare inacanagūxēē, yerū marū guxūma nixāācu ga ucapu nawa ga guma pegūpataū.

Tupanaārū orearū ngeruū ga daxūcūāx rū carnerugūarū dauruūcēx nangox

⁸ Rū Berēūārū ngaicamana nayexmagū ga űuxre ga carnerugūarū dauruūgū ga chūtacū nachitaūwa norū carnerugūna ídaugūxū. ⁹ Rū ngūrūāchi yema carnerugūarū dauruūgūcēx nangox ga wūxi ga orearū ngeruū ga daxūcūāx. Rū Cori ya Tupanaārū űūne rū nawa nayexma rū yemacēx poraācū nangóone. Rū yema carnerugūarū dauruūgū rū poraācū namuūē. ¹⁰ Natūrū yema orearū ngeruū ga daxūcūāx, rū űanagūrū nūxū: —¡Tāxū i pemuūēxū! erū pexcēx nuā chanange i wūxi i ore i mexēchixū i guxū i duūxūgūarū taāēxēēruū tá ixīxū. ¹¹ —Erū űuxma rū Berēūgu nabu ya perū maxēxēēruū. Rū nūma rū Cori ya Cristu nixī. ¹² —Rū űaā tá nixī i perū cuēxruū. Rū tá nūxū ipeyangau i wūxi i ōxchana i naxchápenūūmaā nuquexū rū wocārū chibūchicagu caxū —űanagūrū. ¹³ Rū yexgumatama ngūrūāchi yema daxūcūāx ga orearū ngeruūxūtawa nangox ga muxūma ga togū ga daxūcūāx ga orearū ngeruūgū. Rū Tupanaxū nicuēxūūgū, rū űanagūrūgū: ¹⁴ —Rū űuxma rū Tupanaxū ínicuēxūūgū rū ínataāēgū i daxūguxū i naānēwa. Rū pema i űoma i naānecūāx i Tupana pemaā taāēgūe, rū name nixī i pegūmaā perūngūxmūē —űanagūrūgū. ¹⁵ Rū yexguma daxūwa naxīxguwena ga yema orearū ngeruūgū rū yema carnerugūarū dauruūgū rū nūgūmaā űanagūrūgū: —¡Ngīxā ítayadau i Berēūwa i ngēma ngupetūxū i Cori ya Tupana tamaā nūxū ixuxū nawa i norū orearū ngeruūgū! —űanagūrūgū. ¹⁶ Rū paxa inaxīāchi, rū yēma naxī. Rū yexma inayangagū ga Yúche rū María rū guma bucū ga wocārū chibūchicagu cacū. ¹⁷ Rū yexguma yema bucūxū nadaugūgu ga yema carnerugūarū dauruūgū, rū duūxūgūmaā nūxū nixugūe ga yema ore ga Tupanaārū orearū ngeruū ga daxūcūāx namaā nūxū ixuxū ga guma bucūchiga. ¹⁸ Rū guxūma ga duūxūgū ga nūxū ínūēxū ga yema carnerugūarū dauruūgūarū ore rū namaā nabaixāchiāēgū. ¹⁹ Natūrū ga María rū inayaxu ga guxūma ga yema ngupetūxū rū ngīāēgu namaā inguxū rū nagu írūxínūēcha. ²⁰ Rū nawoegu ga yema carnerugūarū dauruūgū. Rū taāēcūma Tupanaxū nicuēxūūgū naxcēx ga guxūma ga yema nūxū naxīnūēxū rū nūxū nadaugūxū yerū aixcūma yema orearū ngeruū ga daxūcūāx namaā nūxū ixuxūācūma nangupetū.

Bucū ga Ngechuchu rū tupauca ga taxūnēwa nanagagū

²¹ Rū yexguma 8 ga ngunexū nūxū yexmagu ga na nabuxū ga ōxchana, rū ínanawiechēxmūpēxechiraūgū. Rū Ngechuchugu nanaxūégagū. Rū yematama nixī ga naega ga daxūcūāx ga Tupanaārū orearū ngeruū Maríamaā nūxū ixuxū ga tauta namaā naxāxācūgu. ²² Rū yexguma marū yan-guxgu ga yema ngunexū na tupauca ga taxūnēwa Tupanapēxewa na nūgū

yamexēēgūxū rü yéma naxī na yemaācū Tupanapēxewa yanguxēēgūāxūcèx ga yema Moīchéarū mugū nūxū ixuxūrū. Rū Yerucharéúwa ga tupaucā ga taxūnēwa nanagagū ga guma bucū na Tupanana namugūāxūcèx. ²³ Rū yemaācū nanaxūgū yerū Tupanaārū mugūwa naxūmatū, rü ñanagūrū:

“Ngēxguma wūxi i nge rü nayatūgu i nūxīraūxū i ngīxācū, rü name i Cori ya Tupanana inamu”,

ñanagūrū. ²⁴ Rū yéma naxī rü yéma nanagagū ga taxre ga muxtucugū ga yexwacèx yaexū, na Tupanacèx nadaiāxūcèx ga paigū ga tupaucawa, yerū yema ñanagūrū ga Tupanaārū mugūwa. ²⁵⁻²⁶ Rū yexgumaūcū Yerucharéūgu naxāchiū ga wūxi ga yatū ga Chimeūgu āegacū. Rū wūxi ga yatū ga mecūmacū nixī ga nūmax, rü aixcūma Tupanaxū ngechaūcū nixī. Rū nūma rü guxūguma ñnananguxēē na ñuxguacū tá ñanguxū ya Yudiūgūarū nguxūxēērū ya Cristu. Rū Tupanaāē i Ūñexū rü Chimeūxūtawa nayexma, rü nūxū nūxū nacūxēē na tāūtāma nayuxū ega tama nūxū nadauxiragu ya Cristu ya Cori ya Tupana nūma namucū. ²⁷ Rū yema ngunexūgu rü tupaucā ga taxūnēwa Chimeūxū naxūxēē ga Tupanaāē i Ūñexū. Rū yéma nayexma ga Chimeū ga yexguma Yúche rü María tupaucawa nagagūgu ga guma bucū ga Ngechuchu na Tupanana namugūāxūcèx na yemaācū yanguxēēgūāxūcèx ga Moīchéarū mu. ²⁸ Rū Ngechuchuxū naganagū ga Chimeū. Rū Tupanaxū nicūxūū, rü ñanagūrū: ²⁹ —Pa Corix, ñuxma rü marū name na chayūū, erū marū cuyanguxēē ga yema chomaā icuxunetaxū. ³⁰⁻³¹ —Rū chauxetūmaāxūchi nūxū chadau ya daa Maxēxēērū ya guxū i duūxūgūcèx nūma cunamucū.

³² —Rū nūma nixī i ngóonexēērū naxcèx i guxūma i duūxūgū i tama Yudiūgū ixīgūxū. Rū ñāā ōxchanagagu rü togū i duūxūgū tá nūxū nicūxūūgū i curū duūxūgū i Yudiūgū —ñanagūrū. ³³ Rū Yúche rü María rü nabaixāchiāēgū namaā ga Chimeūārū ore ga ñuxācū guma ōxchanachigamaā na yadexaxū. ³⁴ Rū yexguma ga Chimeū rü Tupanana naca na meā nūxū nangupetūgūxūcèx ga Yúche rü María rü guma ōxchana. Rū ñanagūrū ngīxū ga María ga Ngechuchu naē: —Dūcèx, daa ōxchana rü tá nanamaxēxēē i muxūma i Yudiūgū, natūrū ngēma tama nūxū yaxōgūchaūxū rü tá inayarūtauxe. Rū nūma rü wūxi i cuēxruū tá nixī i duūxūgūcèx, rü muxūma tá nūxū naxoe. ³⁵ —Rū ngēmaācū tá nanangoxēēāma i guxūma i naāēwa nagu naxīnūxū i muxūma i duūxūgū.

Rū guxūma i ngēma tá ñāā ōxchanaxū ngupetūxū rü ñoma wūxi i cūxchi i curū maxūnēwa yarūwāxūrū tá cuxū nangux, Pa Mariāx —ñanagūrū. ³⁶ Rū yéma ta iyexma ga wūxi ga ngecū ga Tupanaārū orexū ixucū. Rū Ana nixī ga ngīega. Rū Panuēxācū iyixī, rü Ácherutanūxū iyixī. Rū marū yaguāxūchi iyixī. Rū yexguma napaxūchigutama ixāte. Natūrū 7 ga taunecū- guxicatama ngītemaā iyarūxūūxū, yerū nayu ga ngīte. ³⁷ Rū yemaācū wūxi ga yutecū ga yaguāxūchi iyixī, yerū 84 nixī ga ngīrū taunecū. Rū taguma tupaucā ga taxūnēwa ñixūxū. Rū guxūguma ngunecū rü chūtacū rü naxaareācūma iyumūxēēcha. Rū yemaācū Tupanaxū iyacuēxūū rü inataxēē. ³⁸ Rū yexgumatama Chimeū ñidexayane, rü yéma ingu ga Ana. Rū Tupanana moxē ixā. Rū ñinaxūgū ga ōxchana ga Ngechuchuchiga na yadexaxū napēxewa ga guxūma ga yema Yudiūgū ga Yerucharéūcūāx ga Cristuxū ñnanguxēēgūxū na norū nguxuchixēērū yīxūcèx.

Īāne ga Nacharétucèx nawoegu

³⁹ Rū yexguma marū yanguxēēgūāguwena ga guxūma ga yema Tupanaārū mugū nūxū ixuxū, rü Yúche rü María rü naxcèx nawoegu ga norū ñāne

ga Nacharétu ga Gariréaanewa yexmane. ⁴⁰ Rū guma bucū rū niyachigū, rū yexeraācū niporachigū, rū yexeraācū nūxū nicuáchigū. Rū Tupana rū poraācū nūxū narüngtūxēē.

Bucū ga Ngechuchu rū tupauca ga taxūnewa naxo

⁴¹ Nanatū rū naē rū gucū ga taunecūgu Yerucharéuwa taxīxū naxcèx ga Üpetüchigaarū peta. ⁴² Rū yexguma Ngechuchu 12 ga taunecū nūxū yexmagu, rū Yerucharéuwa taxī namaā ga nanatū rū naē, yerū yema nixī ga Yudiügücūma naxcèx ga Üpetüchigaarū peta. ⁴³ Rū yexguma yagúechigagu ga Üpetüchigaarū peta, rū tūmachiüçèx tawoegu ga nanatū rū naē. Natürü ga Ngechuchu rū tūmaēchita tūxna Yerucharéügu narūxāüx. ⁴⁴ Rū tūma nūxū tacuèxgügu rū yema muxū ga duüxügu ga tūmaweama ixīxūtanüxūtanügu naxā ga Ngechuchu. Rū yemaācū marū itaxī ga wūxi ga ngunexū. Natürü yexguma naxcèx tadaugügu tūmatanüxūtanügu rū yema tūxū cuèxgüxūtanügu rū tama nūxū itayangaugū. ⁴⁵ Rū yemacèx wenaxārū Yerucharéüçèx tawoegu na yexma naxcèx tayadaugüxüçèx. ⁴⁶ Rū tomaēxpüx ga ngunexüguwena Ngechuchuxū itayangaugū ga tupauca ga taxūnegu. Rū yema narūto natanüwa ga yema ngüxèèruügu ga Tupanaārū mugüwa nguxèetaegüxū, rū inarüxīnū ga norū nguxèetae, rū nūxna nicachigū. ⁴⁷ Rū guxūma ga yema duüxügu ga Ngechuchuxū inüxū, rū nabaixāchiāēgū na ñuxācū nūxū nacuèxüchixū rū meāma nangāxūāxū. ⁴⁸ Rū yexguma nanatū rū naē nūxū daugügu rū tabaixāchiāēgū. Rū naē rū ñatarügu nūxū: —Pa Chaunex, ¿tüxcüü tomaā ngexū cuwagü? Cunatū rū choma rū poraācū cuçcèx taxoegaāēācūma cuçcèx tadaugüecha —ñatarügu. ⁴⁹ Rū yexguma ga Ngechuchu rū ñanagürü: —¿Tüxcüü chauxcèx pedaugü? ¿Tama éxna nūxū pecuèx na woetama Chaunatüchiüwa tá changèxmaxü? —ñanagürü. ⁵⁰ Natürü ga tūmagü rū tama nūxū tacuèxgüéga ga yema tūmamaā nūxū yaxuxū. ⁵¹ Rū yexguma ga Ngechuchu rū tūmawe nataegu ga Nacharétuwa. Rū guxügu yema meā tūmaga naxīnüecha. Rū naē ga María rū ngiāēwa nagu irüxīnüecha ga guxūma ga yema ngupetüxū. ⁵² Rū niyachigū ga Ngechuchu, rū yexeraācū nūxū nicuáchigū. Rū Tupana rū namaā nataāē, rū guxūma ga duüxügu rū ta namaā nataāēgü.

3

Cuáü ga baiüxèèruü nūxū nixu ga Tupanaarü ore ga dauxchitawa ga ngextá taxüema íxāpataxūwa

(Mt 3.1-12; Mr 1.1-8; Cu 1.19-28)

¹ Rū yexguma Tibériu 15 ga taunecū Dumaarü äëxgacü yixügu, rū yexguma nixī ga Pöüchiu Piratu rū Yudéaaneärü äëxgacü yixü, rū Erode rū Gariréaaneärü äëxgacü yixü, rū naēneē ga Piripi rū Itúreaane rū Tracóniteaneärü äëxgacü yixü, rū Lichániā rū Abiriniāaneärü äëxgacü yixü. ² Rū yexguma ga Aná rū Caipá rū paigüeru nixigü. Rū yexguma nixī ga Zacaría nane ga Cuáümaā yadexaxū ga Tupana ga dauxchitawa ga ngextá taxüema íxāpataxūwa. ³ Rū guxūma ga yema nachicagü ga Yudaücutüarü ngaicamana yexmagüxügu nixügüchigü ga Cuáü. Rū duüxügümaā nūxū nixuchigü na nūxū naxoexüçèx ga nacūmagü ga chixexü rū ínabaiüxüçèx na yemaācū Tupana nūxū nūxū rüngümaxüçèx ga norü pecadugü. ⁴ Rū guma nuxcūmaüçü ga Ichaxía ga Tupanaārü orearü urüü naxümatüxürüü nixī ga

nangupetüxü. Yerü duüxügüarü maxüärü mexëëchigaxü nixu ga yexguma ñaxgu:

“Ngëma nachica i ngextá taxúema íxâpataxüwa rü tá nangëxma i wüxi i duüxü i ngema tagaäcúma ñaxü: ‘¡Pegü pemexëë naxcëx ya Cori! ¡Rü naxcëx ipeyanawëxächixëë i perü maxü!’ ⁵ Rü guxäärü maxü rü tá inayarüwëxächi ñoma wüxi i ngatexü rügütaxürüü na iyawëxücëx i nama. Rü guxâma ya yíxema toguétüwa tügü ngëxmaxëëgüxe rü tá ítarüxí ñoma wüxi ya mëxpúne rü wüxi i ngüchitaeru idoxochixëëxürüü. Rü guxüma i nacüma i wüxü rü tá inayarüwëxächigü. Rü ngëma duüxügüarü maxüwa tama mexü rü tá nayamexëëgü. ⁶ Rü guxüma i duüxügü rü tá nüxü nadaugü ya yima Maxëxëeruü ya Tupana núma namucü”,

ñanagürü ga Ichaxía úmatüxü ga ore. ⁷ Rü yexguma Cuáüxütawa naxíxgu ga duüxügü na ínbaiüxëëäxücëx, rü núma ga Cuáü rü ñanagürüama nüxü: —Pa Äxtapearü Duüxügüx ¿Rü ñuxäcü nagu perüxínüe na naxchaxwa pibuxmüxü i ngema poxcu i marü ingaicamaxü ega tama nüxü perüxoegu i pecüma i chixexü? ⁸ —¡Rü meã pemaxë na ngëmaäcü guxüma i duüxügü nüxü daugüxücëx na aixcüma marü nüxü perüxoexü i pecüma i chixexü! Rü tama name i ñaperügügu:

“Täütáma Tupana toxü napoxcue, erü Abráütanüxü tixígü” ñaperügügü. Erü tama ngëmacëx nixí ya Tupana i duüxügüxü nayaxuxü. Rü pemaã nüxü chixu rü ngëxguma Tupana naxwëxegu rü tama nüxü naguxcha na daa nutawa Abráütanüxü nanguxüxëëxü. ⁹ —Tupanaärü yuema rü marü ímëmære na yadaxüãxücëx i ngëma nanetügü i tama mexü. Rü guxüma i nanetügü i chixearü ööxü rü tá nadaxü, rü ñuxüchi üxüwa tá ínagu —ñanagürü ga Cuáü. ¹⁰ Rü yexguma ga duüxügü rü Cuáüna nacagü, rü ñanagürügü: —¿Tacü ëxna nixí i mexü na tanaxüxü? —ñanagürügü. ¹¹ Rü Cuáü rü nanangäxü rü ñanagürü: —Texé ya taxrearü gáuxüchirüaxë rü name nixí i texé ya tüxü nataxüxena tanaxã. Rü texé ya önaãxë rü name nixí i texé ya ngearü önaãxëmaã tangau i túmaärü öna —ñanagürü. ¹² Rü Cuáüxütawa naxí ta ga ñuxre ga yatügü ga Dumaärü äëxgacücëx díëru ngíxü ideetanüxü. Rü nanaxwëxegü ga Cuáü na ínbaiüxëëxü. Rü Cuáüna nacagü, rü ñanagürügü: —Pa Ngüxëëruüx, ¿Tacü nixí i mexü na tanaxüxü i tomax? —ñanagürügü. ¹³ Rü Cuáü rü ñanagürü nüxü: —Tama name i äëxgacü pemaã nüxü ixuxüärü yexera penayauxgü i díëru i duüxügüxütawa —ñanagürü. ¹⁴ Rü ñuxre ga churaragü rü ta Cuáüna nacagüe, rü ñanagürügü: —¿Toma rü tacü nixí i mexü na tanaxüxü? —ñanagürügü. Rü nanangäxü ga Cuáü rü ñanagürü: —Tama name i texëxü pexäxüneäcüma túmaärü ngëmaxügü pepuxü. Rü tama name i tacü rü doraxü tümachigaxü pixu na ngëmaäcü túmaärü ngëmaxügü pepuxüxücëx. Rü name nixí i ngëma díëru i äëxgacü pexü ngímaã naxütanücümaãtama petaãëgü rü tama yexeracücëx ípeca —ñanagürü. ¹⁵ Rü yexguma ga duüxügü rü poraäcü ínananguxëëgü na paxa ínanguxü ga Tupana Nane ga Cristu. Rü nagu narüxínüë ga na bexmana Cuáü rü Cristu yíxü. ¹⁶ Natürü ga Cuáü rü guxäxü ñanagürü: —Aixcüma i choma rü dexáwamare pexü íchabaniüxëë, natürü tá ínangu i to i Tupanaärü orearü uruü, rü núma tá pexna nananguxëë i Tupanaäë i Üünexü wüxi i üxüemarüü. Erü núma rü poraäcü choxü narüyexera na äëxgacü yíxü. Rü choma rü napëxewa rü taxuwama chame rü bai i norü chapatucunüärü wëgüwa chame. ¹⁷ —Rü núma rü marü ínamemare na ñoma i naãnewa yadexechiäxücëx i norü

duüxüğü ñoma wüxi ya yatü trigu naätüna idexechixüürü. Rü ngēmaācü tá nayadexechi i ngēma noxrü ixīgüxü na naxü- tawa nangēxmagüxücëx, natürü ngēma tama noxrü ixīgüxü, rü tá ínanagu nawa ya yima üxü ya taguma ixoxüne —ñanagürü. ¹⁸Rü yema oremaā rü muxüma ga to ga ucuxëgümaā, rü Cuáü duüxügümaā nüxü nixu ga ore ga mexü ga Ngechuchuchiga. ¹⁹Rü Cuáü rü äëxgacü ga Erodexü nanga, yerü ngímaā naxāmëx ga Erodía ga naēnë ga Piripi namëx. Rü nananga ta naxcëx ga yema togü ga chixexü ga naxüxü. ²⁰Natürü ga Erode rü tama Cuáüga naxínü. Rü yexeraxü ga chixexü naxü, yerü poxcupataüwa Cuáüxü namu.

Ngechucharü baiechiga
(Mt 3.13-17; Mr 1.9-11)

²¹Rü yexguma taxüta napoxcugu ga Cuáü, rü guxü ga duüxügüxü ínabaiüxëëxyane, rü yexguma ta nixi ga Ngechuchuxü ínabaiëxëxü. Rü yexguma Ngechuchu íyumüxëyane rü ningena ga daxüguxü ga naäne. ²²Rü Tupanaäe i Üünexü rü wüxi ga muxtucurü ínanago rü Ngechuchuna nangu. Rü daxüwa inanaxü ga wüxi ga naga ga ñaxü: —Cuma nixi, Pa Chaunex, i cuxü changechaüxüchixü rü cumaaä chataäëxü —ñaxü.

Ngechuchu ya Cristu natanüwa ngóxü ga duüxügüchiga
(Mt 1.1-17)

²³Ngechuchu rü 30 ga taunecü nüxü nayexma ga yexguma ínaxügüägu na guxüwama duüxügümaā nüxü yaxuxü ga Tupanaarü Ore. Rü duüxügü nagu narüxínüë rü Yúche nane nixi ga númax.

Rü Yúche rü Eri nane nixi.

²⁴Rü Eri rü Matáx nane nixi.

Rü Matáx rü Lebí nane nixi.

Rü Lebí rü Merequí nane nixi.

Rü Merequí rü Yana nane nixi.

Rü Yana rü Yúche nane nixi.

²⁵Rü Yúche rü Matatía nane nixi.

Rü Matatía rü Amó nane nixi.

Rü Amó rü Naüü nane nixi.

Rü Naüü rü Echi nane nixi.

Rü Echi rü Nagaí nane nixi.

²⁶Rü Nagaí rü Maáx nane nixi.

Rü Maáx rü Matatía nane nixi.

Rü Matatía rü Chemeí nane nixi.

Rü Chemeí rü Yuchéx nane nixi.

Rü Yuchéx rü Yudá nane nixi.

²⁷Rü Yudá rü Yuanáü nane nixi.

Rü Yuanáü rü Récha nane nixi.

Rü Récha rü Chorobabé nane nixi.

Rü Chorobabé rü Charatía nane nixi.

Rü Charatía rü Nerí nane nixi.

²⁸Rü Nerí rü Merequí nane nixi.

Rü Merequí rü Adí nane nixi.

Rü Adí rü Cocháü nane nixi.

Rü Cocháü rü Elmadáü nane nixi.

Rü Elmadáü rü Erü nane nixi.

²⁹Rü Erü rü Yochué nane nixi.

Rü Yochué rü Erieché nane nixi.

Rü Erieché rü Yoríü nane nixi.

- Rü Yoríũ rü Matáx nane nixĩ.
 Rü Matáx rü Lebí nane nixĩ.
- 30 Rü Lebí rü Chimeũũ nane nixĩ.
 Rü Chimeũũ rü Yudá nane nixĩ.
 Rü Yudá rü Yúche nane nixĩ.
 Rü Yúche rü Yonáũ nane nixĩ.
 Rü Yonáũ rü Eriaquíũ nane nixĩ.
- 31 Rü Eriaquíũ rü Meréa nane nixĩ.
 Rü Meréa rü Ména nane nixĩ.
 Rü Ména rü Matáta nane nixĩ.
 Rü Matáta rü Natáũ nane nixĩ.
 Rü Natáũ rü Dabí nane nixĩ.
- 32 Rü Dabí rü Ichaxí nane nixĩ.
 Rü Ichaxí rü Obé nane nixĩ.
 Rü Obé rü Boó nane nixĩ.
 Rü Boó rü Cháru nane nixĩ.
 Rü Cháru rü Nachóũ nane nixĩ.
- 33 Rü Nachóũ rü Aminadá nane nixĩ.
 Rü Aminadá rü Admíũ nane nixĩ.
 Rü Admíũ rü Arni nane nixĩ.
 Rü Arni rü Esróũ nane nixĩ.
 Rü Esróũ rü Fare nane nixĩ.
 Rü Fare rü Yudá nane nixĩ.
- 34 Rü Yudá rü Acóbu nane nixĩ.
 Rü Acóbu rü Ichaá nane nixĩ.
 Rü Ichaá rü Abráũ nane nixĩ.
 Rü Abráũ rü Taré nane nixĩ.
 Rü Taré rü Nacúx nane nixĩ.
- 35 Rü Nacúx rü Cherúx nane nixĩ.
 Rü Cherúx rü Ragáu nane nixĩ.
 Rü Ragáu rü Peréx nane nixĩ.
 Rü Peréx rü Ebéx nane nixĩ.
 Rü Ebéx rü Cháru nane nixĩ.
- 36 Rü Cháru rü Caináũ nane nixĩ.
 Rü Caináũ rü Arpacháx nane nixĩ.
 Rü Arpachá rü Chéũ nane nixĩ.
 Rü Chéũ rü Noę nane nixĩ.
 Noę rü Laméx nane nixĩ.
- 37 Rü Laméx rü Matucharéũ nane nixĩ.
 Rü Matucharéũ rü Enóx nane nixĩ.
 Rü Enóx rü Yaréx nane nixĩ.
 Rü Yaréx rü Maararéx nane nixĩ.
 Rü Maararéx rü Caináũ nane nixĩ.
- 38 Rü Caináũ rü Enóx nane nixĩ.
 Rü Enóx rü Chex nane nixĩ.
 Rü Chex rü Adáũ nane nixĩ.
 Rü Adáũ rü Tupana nane nixĩ.

4

¹ Ngechuchuxõtawa nayexma ga Tupanaãe i Üünexũ. Rũ yexguma Yudaũchiũwa inaxũãchigu ga Ngechuchu, rũ Tupanaãe i Üünexũ rũ dau-chitawa ga ngextá taxúema ixãpataxũwa nanaga. ² Rũ yéma nayexma ga 40 ga ngunexũ. Rũ ngoxo ga Chataná rũ nüxũ naxũ. Rũ yexguma yéma nayexmagu rũ taguma nachibũ. Natürũ ga yixcama rũ nataiya. ³ Rũ yexguma ga ngoxo ga Chataná rũ ñanagürũ nüxũ: —Ega aixcũma Tupana Nane quixĩgu, rũ jdaa nutamaã nüxũ ixu na pãũxũ nanguxichixũcèx! —ñanagürũ ga Chataná. ⁴ Rũ Ngechuchu nanangãxũ rũ ñanagürũ: —Tupanaãrũ ore i ùmatũxũwa rũ ñanagürũ:

“Tãütãma õnamaãĩca namaxẽ i duũxũgũ, natürũ guxũma i ore i Tupana nüxũ ixuxũ tá nixĩ i duũxũgũxũ maxẽxẽxũ”,

ñanagürũ. ⁵ Rũ yexguma ga ngoxo ga Chataná rũ wũxi ga mèxpũnechitaeruwa nanaga. Rũ yéma paxaãchi nüxũ nüxũ nadauxẽe ga guxũma ga nachiũãnegũ ga ñoma ga naãnecũãx. ⁶ Rũ Chataná rũ ñanagürũ nüxũ: —Guxũ i ñaã nachiũãnegũ i mexũ rũ norũ ngẽmaxũgũ rũ chi cuxna chanaxã. Erũ choxrũ nixĩ i guxũma i ñaãgũ, rũ tũxna chanaxã ya texe ya choma chorũ me ixixẽ na tũxna na chanaxãxũ. ⁷ —Rũ ngẽxguma chi chopẽxegu cucaxãpũxũgu rũ choxũ quicũxũũgu rũ cuxrũ chi nixĩ i guxũma i ñaã cuxũ chawẽxũ —ñanagürũ.

⁸ Natürũ ga Ngechuchu rũ nanangãxũ, rũ ñanagürũ: —¡Choxna ixũgachi! Pa Chata- nãx. Erũ Tupanaãrũ ore i ùmatũxũwa rũ ñanagürũ:

“¡Nüxũ icuèxũũ ya Cori ya curũ Tupana, rũ yimaãxũĩcatama napuracũ!”

ñanagürũ. ⁹ Rũ yexguma ga ngoxo ga Chataná rũ Yerucharẽũ ga iãnewa nanaga. Rũ tupauca ga taxũnetapẽxegu nanamunagũ. Rũ ñanagürũ nüxũ: —Ega aixcũma Tupana Nane quixĩgu, rũ jnuã cugũ rũtae! ¹⁰ —Erũ Tupanaãrũ ore i ùmatũxũwa rũ ñanagürũ:

“Tupana tá nanamu i norũ orearũ ngeruũgũ i daxũcũãx na cuxna nadaugũxũcèx. ¹¹ Rũ naxmẽxmaã tá cuxũ niyaxũgu na tama tacũ rũ nutagu cunguxũcèx”,

ñanagürũ. ¹² Rũ Ngechuchu nanangãxũ rũ ñanagürũ: —Tupanaãrũ ore i ùmatũxũwa rũ ñanagürũ ta:

“¡Tama name i nüxũ na cuxũxũ ya Cori ya curũ Tupana!”,

ñanagürũ. ¹³ Rũ yexguma marũ taxucürũwama Ngechuchuxũ naxũxgu, rũ nüma ga Chataná rũ nüxna niña ñũxmata nüxũ iyangau na ñũxãcũ wena nüxũ na naxũxũ.

Ngechuchu rũ Gariréaanewa inanaxũgũ ga norũ puracũ (Mt 4.12-17; Mr 1.14-15)

¹⁴ Rũ Ngechuchu rũ Gariréaanecèx nataegu. Rũ Tupanaãe i Üünexũ rũ naxũtawa nayexma rũ poraãcũ nanaporaxẽe. Rũ ga duũxũgũ rũ nachiga nidexagũ ga guxũ ga yema naãnewa. ¹⁵ Rũ wũxichigũ ga iãneãrũ ngutaquẽxepataũgũwa rũ nanguxẽetæ. Rũ guxũma ga duũxũgũ rũ nüxũ nicuèxũũgũ.

Nacharẽtuwa nayexma ga Ngechuchu (Mt 13.53-58; Mr 6.1-6)

¹⁶ Rũ Nacharẽtuwa naxũ ga Ngechuchu. Rũ guma nixĩ ga iãne ga nanatũgũ nawa nayaxẽẽgũne. Rũ ngũxchigaarũ ngunexũgu rũ ngutaquẽxepataũgu naxũcu, yerũ yema nixĩ ga nacũma ga guxũ ga ngũxchigaarũ ngunexũgu. Rũ yéma inachi rũ duũxũgũcèx nüxũ nadaumatũ ga Tupanaãrũ ore ga ùmatũxũ. ¹⁷ Rũ nüxna nanaxãgũ ga popera ga Tupanaãrũ orearũ uruũ ga

Ichaxía ūmatūxū. Rū yexguma yangenaātūāgu, rū nūxū inayangau ga ngextá ínaxūmatūxūwa ga ore ga ñaxū:

¹⁸ “Cori ya Tupanaāē rū chauxūtawa nangēxma. Rū nūma rū choxū naxuneta na nūxū chixuxūcèx i ore i mexū namaā i ngēma duūxūgū i ngearū ngēmāxūāxgūxū. Rū choxū namu na ngēma duūxūgū i pecadutūūwa ngēmāgūxūmāā nūxū na chixuxūcèx rū tá na ínanguxūxū. Rū choxū namu na chayadauchixetūxēēgūxūcèx i ngēma ingexetūgūxū rū na íchananguxūxēēxūcèx i ngēma duūxūgū i togūmēxēwa ngēxmagūxū. ¹⁹ Rū nūma choxū namu na duūxūgūmāā nūxū chixuxūcèx na Tupana nūxū rūngūxēēchaūxū i ngēma nūxū yaxōgūxū”,

ñanagūrū ga yema ore. ²⁰ Rū yexguma ga Ngechuchu rū nūgūna nananuxāchiátū ga popera. Rū ngutaquēxepataūārū dauruūna nanaxā rū ñuxūchi ínarūto. Natūrū guxūma ga yema ngutaquēxepataūwa yexmagūxū ga duūxūgū rū nūxū narūdaunūēcha. ²¹ Rū yexguma ga Ngechuchu rū inanaxūgū ga na yadexaxū, rū ñanagūrū: —Ñuxmatama nixī i pepēxewa Tupana yanguxēēxū i ñāā ore ga Ichaxía ūmatūxū —ñanagūrū. ²² Rū guxūma ga duūxūgū rū meā Ngechuchuchiga nidexagū. Rū nabaixāchiāēgū namaā ga yema ore ga mexū ga namaā nūxū yaxuxū. Natūrū tama aixcūma nayaxōgūchaū. Rū yemacèx nūgūna nacagū rū ñanagūrūgū: —¿Taux ēxna daa yīxū ya Yúche nane? —ñanagūrūgū. ²³ Rū Ngechuchu rū ñanagūrū nūxū: —Choma nūxū chacuèx rū tá chomaā penaxuxuchi i ngēma ore i ñaxū:

“Pa Duturux ꞑCugūtama rūmexēē!” ñaxū. Rū ēxna tá choxū ñaperūgūgū:

“Yema mexū ga taxū ga nūxū taxīnūēxū ga Tupanaārū poramaā cuxūxū ga Capernáūwa, rū tanaxwēxe i nuā curū íānewa rū ta na cunaxūxū”, ñaperūgūgū tá. ²⁴ Rū nayadaxēē ga Ngechuchu na yadexāxū rū ñanagūrū: —Aixcūma pemaā nūxū chixu rū guxūma i Tupanaārū orearū uruū, rū norū íānewatama i duūxūgū rū tama meā nanayauxgū. ²⁵ —Rū aixcūma pemaā nūxū chixu rū Iraéanewa rū nayexma ga muxūchixūma ga ngexūgū ga iyutegūxū ga yexguma Eriá maūxgu. Rū yexguma nixī ga tomaēxpūx ga taunecūarū ngāxū rū taguma napuxū, rū porācū nangūxū ga taiya ga guxū ga ñāa nachixūanewa. ²⁶ —Natūrū ga Tupana rū tama wūxi ga Iraéanecūāx ga yutecūxūtawa Eriāxū namu. Natūrū ngīxūtawa nanamu ga yema yutecū ga Charépacūāx ga Chidāūārū íāneārū ngaicamagu āchiūcū. ²⁷ —Rū yexguma namaūxgu ga Erichéu, rū Iraéanewa nayexmagū ta ga muxūma ga duūxūgū ga chaxūnemaā ídaaweexū. Natūrū taxuūma ga yema ídaaweexū ga Iraéanewa yexmagūxū rū naxcèx nitaaneē. Rū Namāū ga Chíriaanecūāxīcatama nixī ga guma naxcèx yataanecū —ñanagūrū ga Ngechuchu. ²⁸ Rū yexguma yema orexū naxīnūēgū, rū guxūma ga yema duūxūgū ga guma ngutaquēxepataūwa yexmagūxū rū porācū naxcèx nanuē. ²⁹ Rū inachigū ga duūxūgū rū Ngechuchuxū ínatēxūchigū ga guma íānewa. Rū guma mēxpūne ga guma íāne nawa yexmanechitaeruwa nanagagū na yéma yanataegūāxūcèx. ³⁰ Natūrū ga Ngechuchu rū norū ngāxūtānūwa ínaxūxūāma, rū ínixū.

*Wūxi ga yatū ga ngoxo nawa yexmaxūchiga
(Mr 1.21-28)*

³¹ Rū yexguma ga Ngechuchu rū Gariréaneārū íāne ga Capernáūwa naxū. Rū ngūxchigaarū ngunexūgu yéma duūxūgūxū nangūexēē. ³² Rū duūxūgū rū nabaixāchiāēgū namaā ga norū nguxēētae, yerū Tupanaārū poramaā nidexa.

³³ Rū guma ngutaquēxepataūwa nayexma ga wūxi ga yatū ga ngoxo nawa

yexmaxũ. Rũ aita yéma naxũ, rũ ñanagũrũ: ³⁴ —¡Toxna ixũgachi! ¿Tũxcũũ totanũwa cuxũ, Pa Ngechuchux, Pa Nacharétucũãx? ¿Nuã cuxũ na toxũ cudẽxũcèx? Choma cuxũ chacuèx na Tupana Nane ya Üñecũ na quiĩxũ —ñanagũrũ. ³⁵ Rũ Ngechuchu nananga ga yema ngoxo rũ ñanagũrũ: —¡Iyarũngeèx rũ ínaxũxũ nawa ya yima yatũ! —ñanagũrũ. Rũ yexguma ga yema ngoxo rũ duũxũgũpẽxegu nayanguxẽẽ ga guma yatũ, rũ nawa ínaxũxũ. Natũrũ tama nanapixẽẽ. ³⁶ Rũ guxũma ga duũxũgũ rũ nabaixãchiãẽgũ. Rũ nũgũmũcũgũmaãchigũ nachiga nĩdexagũ, rũ ñanagũrũgũ: —¿Tacũ rũ ore nixĩ i ngẽma? Erũ ñãã yatũ rũ aixcũma ngẽma ngoxogũmaã inacuèx rũ porããcũ nanamu. Rũ nũmagũ rũ naga naxĩnũẽ, rũ ínachoxũ —ñanagũrũgũ. ³⁷ Rũ guxũwama ga yema naãnewa rũ Ngechuchuchigaxũ nixugũe ga duũxũgũ.

Ngechuchu rũ Chimáũ ga Pedru nẽxècèx nayataanexẽẽ
(Mt 8.14-15; Mr 1.29-31)

³⁸ Rũ guma ngutaquẽxepataũwa ínaxũxũ ga Ngechuchu rũ Chimáũpatawa naxũ. Rũ Chimáũ nẽxè rũ porããcũ iyaxaxũne. Rũ Ngechuchuna nacagũe ga ngĩxcèx na yataanexẽẽãxũcèx. ³⁹ Rũ nũma rũ ngĩxũtagu nayachi rũ narũmèxãchi rũ nananga ga yema axũne. Rũ yexgumatama igèuxãchi ga na yaxaxũnèxũ. Rũ yexgumatama írũda, rũ naxcèx inamexẽẽ ga òna.

Ngechuchu rũ muxũma ga idaaweexũcèx nayataanexẽẽ
(Mt 8.16-17; Mr 1.32-34)

⁴⁰ Rũ yexguma marũ yanaxũcuchaũgu ga uèxcũ, rũ Ngechuchuxũtawa nanagagũ ga guxũma ga duũxũgũ ga nagũxũraũxũ ga daaweanemaã idaaweexũ. Rũ ga Ngechuchu rũ wũxichigũ ga yema duũxũgũxũ ningõgũ, rũ yemaãcũ naxcèx nayataanexẽẽchigũ. ⁴¹ Rũ nanameẽxẽẽ ga muxũma ga duũxũgũ ga idaaweexũ ga ngoxo nawa yexmagũxũ. Rũ yema ngoxogũ rũ aita naxũe, rũ ñanagũrũgũ: —Cuma nixĩ i Tupana Nane quiĩxũ —ñanagũrũgũ. Natũrũ ga Ngechuchu rũ nayangagũ ga yema ngoxogũ. Rũ nũxna nanachuxu ga na yadexagũxũ, yerũ yema ngoxogũ rũ nũxũ nacuèxgũ na Cristu yĩĩxũ.

Ngechuchu rũ nanaxunagũ ga ore ga mexũ ga ngutaquẽxepataũwachigũ
(Mr 1.35-39)

⁴² Rũ yexguma noxri yangóonegu rũ yema ñãnewa ínaxũxũ ga Ngechuchu. Rũ wũxi ga nachica ga taxũema íxãpataxũwa naxũ. Natũrũ ga duũxũgũ rũ naxcèx nadaugũ rũ dũxwa naxũtawa nangugũ. Rũ nũxũ nacèèxũgũ ga tama na ínaxũxũxũcèx ga yema norũ naãnewa. ⁴³ Natũrũ ga Ngechuchu rũ ñanagũrũ nũxũ: —Taxucũrũwama petanũgu charũxãũẽcha erũ chanaxwèxe na naĩgũ ya ñãnegũwa ngẽmagũxũ i duũxũgũmaã rũ ta nũxũ chixuxũ na ñuxãcũ ãẽxgacũ yĩĩxũ ya Tupana. Erũ woetama ngẽmacèx nũma choxũ namu —ñanagũrũ. ⁴⁴ Rũ yemaãcũ Ngechuchu nũxũ nixuchigũ ga ore ga ngutaquẽxepataũgũwachigũ ga guxũma ga Gariréaanewa.

5

Muxũma ga choxni na ínayauxũxũchiga
(Mt 4.18-22; Mr 1.16-20)

¹ Rũ wũxicana ga yexguma nextaxa ga Yenecharétuanacũwa nayexmagu ga Ngechuchu, rũ muxũma ga duũxũgũ rũ naxũtawa nangugũ. Rũ dũxwa yéma nayaxãũtũgũ, yerũ nũxũ naxĩnũẽchaũ ga Tupanaãrũ ore. ² Rũ Ngechuchu yéma nũxũ nadau ga taxre ga ngue ga ingeãcune. Rũ guma nguegũ rũ naxnecũpechinũwa nanadagũ, yerũ ga pũchaetanũxũ rũ nũxna yéma ínachõũ,

yerü norü pücha niyauxgü. ³ Rü wüxi ga guma nguegu nixüe ga Ngechuchu. Rü guma ngue rü Chimáúârü nixĩ. Rü Chimáúna naca ga naxnecüpechinüârü ngâxütüwaxüra na nangeaxüxcèx. Rü guma nguewa narüto ga Ngechuchu. Rü yéma inanaxügü ga duüxügüxü na nangüxèëxü. ⁴ Rü yexguma yagüegagu ga Ngechuchu ga na yadexaxü, rü Chimáúxü ñanagürü: —jyéa ínamátamaxüwa namaã naxã ga daa ngue. Rü ngema penatãe i perü pücha na choxnita piyauxgüxüxcèx! —ñanagürü. ⁵ Rü Chimáú nanangãxü, rü ñanagürü nüxü: —Pa Ngüxèëruüx, ngewèx rü guxü i chütaxü rü tapüchae, natürü taxuüma i choxni tiyaxu. Natürü ñuxma na choxü cumuxü rü wena táxarü íchanatãe i chorü pücha —ñanagürü. ⁶ Rü yexguma ínatãegüãgu ga norü pücha, rü muxüma ga choxni ínayauxü. Rü düxwa narügãuxchaü ga norü pücha yerü namuxüchi ga choxni. ⁷ Rü naxmèxmaã náí ga nguewa yexmagüxü ga natanüxügüxcèx nacagü na nüxü yanangüxèëgüxüxcèx. Rü yéma naxí ga yema natanüxügü ga naxcèx nacagüxü. Rü nanaxüãcugü ga guma taxre ga ngue rü wixgutaèx inangutaügü yerü namuxüchi ga choxni. ⁸ Rü yexguma yemaxü nadèuxgu ga Chimáú ga Pedru, rü Ngechuchupèxegu nayacaxãpüxü, rü ñanagürü nüxü: —jChoxna ixügachi! Pa Corix. Erü choma rü wüxi i duüxü i pecaduãxü chixí —ñanagürü. ⁹ Rü yema ñanagürü ga Chimáú yerü nüma rü guxüma ga natanüxügü rü namaã nabaixãchiãëgü ga yema muxüma ga choxni na ínayauxüxü. ¹⁰ Rü nabaixãchiãëgü ta ga Chimáúmücügü ga Chaütiágu rü Cuáü ga Zebedéu nanegü. Natürü Ngechuchu rü Chimáúxü ñanagürü: —jTãxü i cumuüxü! Erü ñuxmacürüwa rü tá choxü cupuracü na chauxütawa cunagagüxüxcèx i duüxügü —ñanagürü. ¹¹ Rü yexguma naxãnacüwa namaã nangugüga ga naweügü, rü yéma nanawogü ga norü guxüma rü Ngechuchuwe narüxí.

*Ngechuchu rü wüxi ga rüchaxünexüxcèx nayataanexèë
(Mt 8.1-4; Mr 1.40-45)*

¹² Rü yexguma wüxi ga yéma yexmagüne ga íãnewa nayexmagu ga Ngechuchu, rü yéma naxütawa nangu ga wüxi ga yatü ga chaxünemaã idaawexü. Rü yexguma Ngechuchuxü nadèuxgu rü napèxegu naya-caxãpüxü rü yexma nanangücuchi. Rü Ngechuchuxü nacèëxü, rü ñanagürü: —Pa Corix, ngèxguma cuma cunaxwèxegu, rü cuxü natauxcha na choxü curümexèëxü nawa i chorü daawe —ñanagürü. ¹³ Rü yexguma ga Ngechuchu rü nüxü ningögü, rü ñanagürü nüxü: —Ngü, chanaxwèxe. jRüme! —ñanagürü. Rü yexguma yema ñaxgu ga Ngechuchu, rü naxcèx nitaane ga yema yatü ga chaxüneãxü. ¹⁴ Rü Ngechuchu nanaxucuxè rü ñanagürü nüxü: —jDücèx, taxúemaãtãma nüxü quixu, natürü paixü cugü yadauxèë na curümexü rü yanguxèë i ngèma Tupana Moíchéwa nüxü ixuxü na duüxügü nüxü cuãxüxcèx na marü curümexü nawa i curü daawe! —ñanagürü. ¹⁵ Natürü ga Ngechuchuchiga rü guxüwama ninguchigüama. Rü muxüma ga duüxügü rü naxcèx naxítaquèxegü na norü orexü naxínüëxüxcèx, rü naxcèx na yataaneëxèëãxüxcèx ga norü daawegüwa. ¹⁶ Natürü Ngechuchu rü ñuxguacü rü ngextã taxúema íxãpataxüwa naxüxü. Rü yéma nayayumüxèxü.

*Ngechuchu rü wüxi ga yatü ga nawãixãchicüxcèx nayataanexèë
(Mt 9.1-8; Mr 2.1-12)*

¹⁷ Rü wüxi ga ngunexü Ngechuchu ínguxèëtaeyane, rü yéma narütogü ga ñuxre ga Parichégü rü ñuxre ga ngüxèëruügü ga Moíchéarü mugümaã nguxèëtaegüxü ga guxü ga Gariréaaneârü íãnexãcügüwa ne íxü, rü Yudéanewa

ne íxǔ, rü Yerucharéúwa ne íxǔ. Rü Tupana rü poraãcü Ngechuchuwa inanawëx ga norü pora rü muxúma ga idaaweexǔ narümeëxëë. ¹⁸ Rü Ngechuchuxúttawa nangugü ga ñuxre ga yatügü, rü naxcëx yéma nanange-taügü ga wüxi ga yatü ga nawáixächicü. Rü Ípatagu nanangecuchi-taügüchaǎ na Ngechuchupëxegu yaxútaügüãxúcëx. ¹⁹ Natürü taxuacëma yexma nanangecuchitaügüega, yerü namuxüchi ga duüxügü. Rü yemacëx íacëxwëxgu naxígü. Rü meäma Ngechuchu íyexmaxúetüwa ínanapogüãxügü ga guma Ípata. Rü yéma duüxügütanüwa Ngechuchupëxewa ínanachüxüetaügü ga guma nawáixächicü. ²⁰ Rü yexguma Ngechuchu nüxǔ dëuxgu ga na nüxǔ yaxögüãxǔ ga yema yatügü, rü ñanagürü guma nawáixächicüxǔ: — Pa Chaunex, marü cuxǔ nüxǔ changechaǎ i curü pecadugü —ñanagürü. ²¹ Natürü yema ngüexëëruügü ga Moíchéarü mugüarü nguxëëtaeruügü rü Parichéugü, rü nagu narüxínüë, rü nügüãëwa ñanagürügü: —¿Tacü nixǔ i ñaã yatü ecëx Tupanamaã chixexǔ yaxugüxǔ? Erü taxúema pora tüxǔ nangëxma na duüxügüaxǔ pecaduxǔ tangechauxǔ. Rü Tupanaxícatama nixǔ ya nüxǔ nangëxmacü i ngëma pora —ñanagürügü naãëwa. ²² Natürü ga Ngechuchu rü nüxǔ nacüex ga tacügu na ínaxínüëxǔ. Rü yemacëx ñanagürü nüxǔ: — ¿Tüxcüü ngë-magu perüxínüë i pemax? ²³ —¿Tacü nixǔ írútauxchamaëxǔ na namaã nüxǔ íxuxǔ ya daa yatü ya nawáixächicü:

“Curü pecadugü rü marü cuxǔ nüxǔ changechaǎ”, rü ëxna:

“¡Inachi rü íxǔ!” ñágüxǔ nüxǔ? ²⁴ —Natürü ñuxma rü tá pexǔ nüxǔ chadauxëë na Chaunatü núma choxǔ muxǔ na duüxügüaxǔ nüxǔ changechauxúcëx i norü pecadugü —ñanagürü. Rü yexguma yema ñaxguwena rü guma nawáixächicüxǔ ñanagürü: —Cumaã nüxǔ chixu rü inachi, rü nayaxu i curü caruǔ, rü cupatawa naxǔ! — ñanagürü. ²⁵ Rü yexgumatama guxǔ ga duüxügüpëxewa inachi ga guma nawáixächicü. Rü nanayaxu ga norü caruǔ ga nagu nacaxǔ. Rü Tupanaxǔ yacuëxüüchigüiãcüma napatawa naxǔ. ²⁶ Rü guxǔma ga duüxügü rü nañaxíachíãëgü. Rü Tupanaxǔ nicüëxüügü. Rü poraãcü namuüëacüma ñanagürügü: —Ñuxma rü nüxǔ tadaugü i ñuxre i Tupanaärü puracügü i aixcüma mexëchixügü —ñanagürügü.

*Lebícëx naca ga Ngechuchu
(Mt 9.9-13; Mr 2.13-17)*

²⁷ Rü yemawena ga Ngechuchu rü ínaxüxǔ ga guma íwa. Rü wüxi ga yatü ga Dumaärü äëxgacücëx díëru ngíxǔ ideetanüxúttawa naxüpetü. Rü guma yatü rü Lebí nixǔ ga naëga. Rü yéma díëru ngíxǔ ínadëxúwa narüto. Rü Ngechuchu rü ñanagürü nüxǔ: —¿Chowe rüxǔ! —ñanagürü. ²⁸ Rü in-achi ga Lebí, rü yéma nanatëx ga norü guxǔma, rü Ngechuchuwa narüxǔ. ²⁹ Rü yixcama ga Lebí rü Ngechuchucëx napatawa wüxi ga taxǔ ga ñna naxǔ. Rü muxúma ga yatügü ga Lebírüü díëruarü degüwa puracüëxǔ, rü muxúma ga togü ga duüxügü rü ta yéma mechawa narütogü. ³⁰ Natürü ga yema Parichéugü rü ngüexëëruügü ga Moíchéarü mugüarü nguxëëtaeruügü, rü ínanaxügüë na Ngechuchuarü ngüexügüchigagu chixri yadëxagüxǔ. Rü ñanagürügü: —¿Tüxcüü wüxiwa pechibüë rü namaã pëxaxëgü i ngëma yatügü i Dumaärü äëxgacücëx díëru ngíxǔ dexǔ rü ngëma pecaduãxgüxǔ? — ñanagürügü. ³¹ Rü Ngechuchu nanangãxǔ, rü ñanagürü nüxǔ: —Ngëma poraëxǔ rü taxucëxma duturu nanaxwëxëgü, natürü ngëma idaaweexǔ nixǔ i duturu naxwëxëgüxǔ. ³² —Choma rü tama mexügüna na chaxuxúcëx nixǔ i núma chaxüxǔ, natürü pecaduãxgüxǔna na chaxuxúcëx nixǔ i núma chaxüxǔ

na ngēmaācü nüxü naxoexüçex i nacümagü i chixexüğü rü Tupanawe naxixü —ñanagürü.

Ngechuchuna nacagüe ga aurechiga
(Mt 9.14-17; Mr 2.18-22)

³³ Rü yexguma Ngechuchuna nacagüe ga duüxüğü, rü ñanagürüğü: —Cuáü ya baiüxëeruüärü ngüexüğü rü Parichéugärü ngüexüğü rü nayumüxëgüecha, rü muëxpüxcüna rü naxauree rü tama nachibüe erü Tupanagu narüxinüë. Natürü i curü ngüexüğü, rü guxüguma nachibüe rü naxaxegümare —ñanagürüğü. ³⁴ Natürü ga Ngechuchu rü nanangäxü, rü wüxi ga ore ga nügüchigaxütama namaã nixu, rü ñanagürü: —¿Éxna wüxi i ngügärü petawa rü pexcëx namexü na penaxaureexëëxü i ngēma nüxna naxugüxü ega natanüwa nangëxmagu i ngēma yatü i ngexwacëx ämaxü? Rü tama nixi. ³⁵ —Natürü wüxi i ngunexü rü ngēma yatü i ngexwacëx ämaxü, rü tá namücügüna nixügachi. Rü ngēma ngunexügu tá nixi i aixcüma naxaureexü i namücügü —ñanagürü. ³⁶ Rü yexguma ga Ngechuchu rü namaã nüxü nixu ga wüxi ga ore ga yema duüxügücüma ga nuxcümaüxüchiga rü noxrütama nguxëëtae i ngexwacaxüxüchiga. Rü ñanagürü: —Taxüema wüxi i ngexwacaxüxü i naxchiruta tiyo na namaã tanapaitaxüçex i wüxi i naxchiru i marü ngauxü. Erü ngëxguma ngēmaācü tanaxüxgu rü tanachixexë i ngēma naxchiru i ngexwacaxüxü. Rü ñüxüchi ngēma natüchi i ngexwacaxüxü rü tama nüxü nayatäxü i ngēma naxchiru i marü ngauxü. ³⁷ —Rü ngëxgumarüü ta rü taxüema ngexwacaxücü ya binu rü nagu tayabacuchi i wüxi i naxchiü i marü ngauxü i naxchëxmünaxcëx. Erü ngëxguma ngēmaācü naxüxgu rü yima binu ya ngexwacaxücü rü tá narüngu, rü tá nayawäixëë i ngēma naxchiü i ngauxü i naxchëxmünaxcëx. Rü ngëxma tá nayarütaxu ya binu rü ngēma naxchiü rü ta. ³⁸ —Rü ngëmacëx tanaxwëxe na yima ngexwacaxücü ya binu rü ngexwacaxüxü i naxchiügu yabacuchixü. Rü ngēmaācü rü taxuütama inayarütaxu. ³⁹ —Rü taxüema ya texé ya tümamaã yaxüxe na ngüchiacü ya binu tayaxaxüxü rü tüxü nangüchaü na tayaxaxüxü ya binu ya ngexwacaxücü ya maicuracü. Rü ngëxgumarüü ta nixi i ngēma duüxüğü i marü namaã yaxüxü i nuxcümaüxü i nacüma i chixexü rü tama nanayauxgüchaü i ngēma mexü i nguxëëtae i ngexwacaxüxü —ñanagürü ga Ngechuchu.

6

Ngechucharü ngüexüğü rü trigu nicäüetanü ga ngüxchigaarü ngunexügu
(Mt 12.1-8; Mr 2.23-28)

¹ Rü wüxi ga ngüxchigaarü ngunexügu rü Ngechuchu rü norü ngüexügümaã trigunecüwa nachopetü. Rü norü ngüexüğü rü inaxiäcüma yoxocüne trigu nicäüetanü. Rü naxmëxmaã nanadaxi ga trigu rü nayangöëtanü. ² Rü ñuxre ga Parichéugü rü yema ngüexügüna nacagü, rü ñanagürüğü: —¿Tüxcüü ngüxchigaarü ngunexügu penabuxu i trigu? Erü ngüxchigaarü ngunexügu rü nachuxu na texé puracüxü —ñanagürüğü. ³ Rü Ngechuchu nanangäxü, rü ñanagürü: —¿Taguma éxna poperawa nüxü pedau ga tacü na naxüxü ga nuxcümaücü ga äëxgacü ga Dabí ga yexguma nataiyagu ga nüma rü natanüxüğü? ⁴ —Rü Tupanapataga naxücu rü nüxü nadau ga yema päu ga üünexü ga yexma nuxü. Rü yema päu rü nachuxu ga ngexerüxemare na nangöxü, rü paigüçëxicatama nixi. Natürü Dabí nanayaxu ga yema päu rü nanangöx, rü natanüxümaã rü ta nangau —ñanagürü. ⁵ Rü

ñanagürü ta ga Ngechuchu: —Tupana Nane ya duũxũxũ ixĩcũ rü namaã inacuèx i ngũxchigaarũ ngunexũ —ñanagürü.

Wũxi ga yatũ ga yumécũchiga

(Mt 12.9-14; Mr 3.1-6)

⁶Rü to ga ngũxchigaarũ ngunexũgu rü Ngechuchu rü ngutaquèxepataũgu naxũcu. Rü inanaxũgũ ga na nanguxèetaexũ. Rü yéma nayexma ga wũxi ga yatũ ga norũ tügũnewa yumécũ. ⁷Rü yema ngũexèeruũgũ ga Moĩchearũ mugũwa nguxèetaegũxũ rü Parichéugũ, rü Ngechuchuxũ nangugũgũ ngoxita ngũxchigaarũ ngunexũgu guma yumécũxũ namexèe, yerũ naxcèx nadaugũ ga ñuxãcũ norũ àèxgacũgũxũtawã na ìnaxuaxũgũãxũ. ⁸Natürü nũma ga Ngechuchu rü nüxũ nacuèx ga yema naãèwa nagu naxĩnũèxũ ga yema yatũgũ. Rü yemacèx guma yumécũxũ ñanagürü: —ĩrũda rü nuxã ngãxũtanũgu yachi! —ñanagürü. Rü guma yumécũ rü inachi rü norũ ngãxũtanũgu nayachi. ⁹Rü yexguma ga Ngechuchu rü nüxna naca ga yema Parichéugũ rü yema mugũwa nguxèetaegũxũ, rü ñanagürü nüxũ: —çtacũ nixĩ i ngema mexũ ixũxũ i ngũxchigaarũ ngunexũgu? çRü ngema mexũ rü èxna chixexũ? çRü namexũ i na namaxèèxũ rü èxna yamáxũ? —ñanagürü. ¹⁰Rü yexguma Ngechuchu nüxũ nidaugũãchi ga yema duũxũgũ ga yéma yexmagũxũ. Rü guma yumécũxũ ñanagürü: —ĩyanawèxãchixèè ya cuxmèx! —ñanagürü. Rü guma yatũ rü nügũ inayarũwèxãchimèxèxèè, rü narũmemèx. ¹¹Natürü yema Parichéugũ rü ngũexèeruũgũ ga Moĩchearũ mugũwa nguxèetaegũxũ, rü poraãcũ nanuè. Rü nügũ nixucuxègũ na ñuxãcũ tá Ngechuchuxũ na yamèxgũxũ.

Ngechuchu nanade ga 12 ga norũ ngũexũgũ na tóxnãmãna namugũãxũcèx

(Mt 10.1-4; Mr 3.13-19)

¹²Rü yexguma ga Ngechuchu rü dauxchitawã, wũxi ga mèxpũnewã naxũ na yéma yayumũxèxũcèx. Rü guxũ ga yema chũtaxũgu rü yéma nayumũxè. ¹³Rü yexguma yangóonegu, rü Ngechuchu norũ ngũexũgũcèx naca. Rü natanũwa nayadexechi ga 12. Rü yema nixĩ ga yatũgũ ga Ngechuchu nüxũ unetagũxũ na tóxnãmãna nangegũãxũcèx ga norũ ore. ¹⁴Rü yema yatũgũ ga nadexũ rü Chimáũ ga Pedrugũ nanaxũéga nixĩ ga wũxi. Rü to nixĩ ga Aũdré ga Chimáũ naèneè, rü Chaũtiágu rü Cuáũ, rü Piripi, rü Baturumé, ¹⁵rü Mateu, rü Tumachi, rü Chaũtiágu ga Arupéu nane rü Chimáũ ga iporaãècũcũ, ¹⁶rü Yuda ga Chaũtiágueneè, rü Yuda Icariúte ga yixcama Ngechuchuxũ ìxuaxũxũ naèchita.

Ngechuchu rü muxũma ga duũxũgũxũ nangũexèè

(Mt 4.23-25)

¹⁷Rü Ngechuchu rü yema yatũgũ ga nadexũmaã ìnarũxĩgũ nawa ga guma mèxpũne. Rü wũxi ga nachica ga ìnãmetachinũãnexũtawã nayachaxãchitanũ. Rü yéma nayexmagũ ga muxũma ga duũxũgũ ga guxũ ga Yudéãanewa ne ìxũ, rü Yerucharéũwa ne ìxũ, rü taxtũ ga taxũãnacũwa ga Chidãũwa rü Tiruwa ne ìxũ. Rü yéma naxĩ yerũ Ngechuchuxũ naxĩnũèchaũ, rü nanaxwèxegũ ga Ngechuchu na nameèxèèxũ ga norũ ãawegũwa. ¹⁸Rü yema duũxũgũ ga chixexũ ga naãè nawa yexmagũxũ rü ta naxcèx nitaanegũ. ¹⁹Rü guxũma ga duũxũgũ rü Ngechuchuxũ ningógũgũchaũ, yerũ norũ poramaã nanameèxèè.

Duũxũgũ i taãègũxũchiga rü duũxũgũ i ngechaũgũxũchiga

(Mt 5.1-12)

20 Rū yexguma Ngechuchu rü norü ngüexüügüxü nadawenü, rü ñanagürü nüxü: —¡Petaãëgü i pema ya ingearü ngëmaxüãxgüxe! Rū Tupana aëxgacü ñixüüwa rü pema rü tá ta pexächica. 21 —¡Rü petaãëgü i pema i ñuxma taiyaexe! ¡Rü tá meãma pingãxcharaügu! ¡Rü petaãëgü i pema i ñuxma auxexe! Rū yixcama rü tá pecügë. 22 —¡Rü petaãëgü i pema i ngëxguma duüügü pexchi aiegu, rü pexü ñawoüxgu, rü tacü pemaã yaxugüegu, rü chaugagu chixri pechiga yadexagügu! 23 —Rü ngëxguma ngëma pexü üpetügu, rü ¡petaãëgüama rü tama pexoegaãëgü! Erü daxüügüxü i naãnewa rü tá penayauxgü i wüxi i perü ãmare i mexëchixü. Rü dücax, ñaã duüügü i ñuxma pexchi aiexüärü oxigü rü yexgumarüü ta nixi ga naxchi na naxaieü ga nuxcümaügüxü ga Tupanaärü orearü uruügu. 24 —Natürü wüxi i ngechaü tá nixi i pexcëx i pema ya muärü ngëmaxüãxgüxe erü nüma ñoma i naãnewa rü marü petaãëgü. 25 —Rü wüxi i ngechaü tá nixi i pexcëx i pema ya marü ingaxcharaügüxe erü tá petaiyae. Rü wüxi i ngechaü tá nixi i pexcëx i pema i ñuxma marü cugüexe, erü yixcama rü perü ngechaümaã tá pexauxe. 26 —Rü wüxi i ngechaü tá nixi i pexcëx i ngëxguma guxüma i duüügü pexü icuëxüügügu. Erü ngëma duüügü i ñuxma pexü icuëxüügüxüärü oxigü rü yexgumarüü nüxü nicuëxüügü ga nuxcümaügüxü ga orearü uruüguneta.

Name nixi i nüxü tangechaü i ngëma tamaã rüxuwänügüxü
(Mt 5.38-48, 7.12)

27 —Natürü pema i ñuxma na choxü pexinüexü rü pemaã nüxü chixu rü: —¡Nüxü pengechaü i ngëma pemaã rüxuwänügüxü! ¡Rü meã nüxü perüngüxëëx i ngëma pexchi aiexü! 28 —¡Rü meã nachiga pidexagü rü naxcëx ípeca i Tupanaärü ngüxëë naxcëx i ngëma pemaã guxchigagüxü! ¡Rü naxcëx peyumüxëgü i ngëma chixri pechigamaã idexagüxü! 29 —Rü ngëxguma texë cumaã nuxgu rü cuxü tapechiwegu rü name nixi i tama cuxütanü ega woo curü tochiwewa rü ta cuxü tapechiwegu. Rü ngëxguma texë cuxü napuarü gáuüchiruãxgu, rü name nixi i tüxü cungechaüãma ega woo curü daxü rü ta cuxna tanapuxgu. 30 —¡Rü tüxna naxã ya texë ya curü ngëmaxüçëx ícaxe! Rü ngëxguma texë curü ngëmaxü cuxna napuxgu, rü tama name i naxcëx cüngema. 31 —Rü ngëma mexü i pema penaxwëxexü na togü pemaã naxüxü, rü name nixi i pema rü ta ngëmaäcü mexü namaã pexü. 32 —Rü ngëxguma pema rü ngëma duüügü i pexü ngechaüxüxüçatama pengechaügu, rü çtacüwa namexü i ngëma? Erü ngëma duüügü i tama yaxögüxü rü ngëmaäcü nanaxügü. 33 —Rü ngëxguma ngëma duüügü i cuxü rüngüxëëxüxüçatama curüngüxëëgu, rü çtacüwa namexü i ngëma? Erü ngëma duüügü i tama yaxögüxü rü ngëmaäcü nanaxügü. 34 —Rü ngëxguma ngëma duüügü i ixãärü diëruãxünaçatama cunaxãxgu i curü diëru, rü çtacüwa namexü i ngëma? Erü ngëma duüügü i tama yaxögüxü rü ngëmaäcü nanaxügü, erü nüxü nacuëxü rü tá nüxü nanataeguxëë i ngëma diëru. 35 —Natürü pema rü name nixi i nüxü pengechaü i ngëma pemaã rüxuwänügüxü, rü nüxü perüngüxëë. Rü ngëxguma çacüçëx pexna nacaxgu, rü name nixi i tama pexoegaãëcüma nüxna penaxã ega woo nagu perüxüñüëgu na ngürüächi täütãma pexü nataeguxëëxü. Rü ngëxguma ngëmaäcü penaxüxgu, rü Tupana rü ngëmaärü yexera tá poraäcü pexü nanataeguxëë, rü naxacügü tá pixigü ya yima Tupana ya Poraxüchicü ya nüxü rüngüxëëcü ta i ngëma taguma moxë nüxna ägüxü rü ngëma chixecümagüxü. 36 —Rü pema rü name nixi i pengechaüwaxegü, ngëma Penatü ya Tupana na ngechaüwaxexürü.

Tama name i chixexũgu namaã perũxinũe i togũ
(Mt 7.1-5)

³⁷ —¡Rũ taxũ i togũxũ pixuxũ! Rũ ngẽxguma ya Tupana rũ tãxũtãma pexũ nixu na pechixexũ. ¡Rũ taxũ i poxcu namaã pexueguxũ i togũ! Rũ ngẽxguma ya Tupana rũ tãxũtãma poxcu pemaã naxuegu. ¡Rũ nüxũ nüxũ perũngũmae i norũ chixexũ i togũ! Rũ ngẽxguma ya Tupana rũ tá pexũ nüxũ narũngũma i perũ chixexũ. ³⁸ —¡Rũ togũmaã pengau i perũ ngemaxũgũ! Rũ ngexguma ya Tupana rũ tá pexna nanaxã. Rũ ñoma wũxi i choca i meãma napaxũrũ rũ meama ípoõcuxũrũ tá Tupana pexna nanaxã. Erũ ngema nguruxũ i namaã cumücũna cuxãxũ i curũ ngemaxũ rũ ngematama nguruxũmaã tá Tupana cuxna nanaxã —ñanagũrũ. ³⁹ Rũ Ngechuchu rũ ñaã cuẽrxũ norũ ngũexũgũmaã nixu, rũ ñanagũrũ: —¿Ñuxãcũ i wũxi i ngexetũxũ rũ to i ngexetũxũxũ namaxũ nacuexẽẽxũ? Erũ ngẽma taxre i ngexetũxũ rũ wũxi i ãxmaxũgu tá nũgũmaã nayayicu. ⁴⁰ —Rũ taxuũma i ngũexũ rũ norũ ngũexẽẽrũxũ narũyexera. Natũrũ ngexguma meã nanguxgu rũ tá naxrũxũ nixĩ ya norũ ngũexẽẽrũ. ⁴¹ —¿Rũ tũxcũũ nachiga quidexa i cumücũ naxcẽx i ngẽma íraxũ i chixexũ i naxũxũ natũrũ tama cugũtama cungugũ naxcẽx i ngẽma chixexũ i taxũ i cuxũxũ? ⁴² —Rũ ngẽxguma tama nüxna cucuexãchigu i ngẽma chixexũ i taxũ i cumatama cuxũxũ, rũ ¿ñuxũcũrũwa i nagu curũxinũxũ na cunamexẽẽxũ i ngẽma cumücũarũ chixexũ i íraxũ? Pa Duũxũ i Meã Maxnetaxũx, name nixĩ i cuxira nüxũ curũxo i ngẽma chixexũ i taxũ i cumatama cuxũxũ, rũ ngẽxguma tá cume na nüxũ curũngũxẽẽxũcẽx i cumücũ na nüxũ naxoxũcẽx i ngẽma chixexũ i íraxũ i naxũxũ.

Wũxi i nanetũ rũ norũ owa nixĩ i nüxũ icuáxũ
(Mt 7.17-20, 12.34-35)

⁴³ —Nataxuma i nanetũ i mexũ i chixearũ oóxũ. Rũ nataxuma i nanetũ i chixexũ i meãrũ oóxũ. ⁴⁴ —Rũ wũxichigũ i nanetũ rũ norũ owa nixĩ i nüxũ icuáxũ. Rũ wũxi i torawa rũ taxucũrũwama wũxi i orix i imũxũ tayaxu. Rũ wũxi i chuxchuxũwa rũ taxucũrũwa uba tayaxu. ⁴⁵ —Rũ wũxi ya mecũ ya yatũ rũ mexũ i orexũ nixu, erũ naãẽwa rũ aixcũma mexũgu narũxinũ. Natũrũ wũxi i yatũ i chixecũmaxũ rũ chixexũ i orexũ nixu, erũ chixexũgu narũxinũ. Rũ ngẽma naãẽwa ngexmaxũ i chixexũ nixĩ i nüxũ yaxuxũ.

Ípata ya nutaétiũgu iũxĩne rũ ípata ya naxnũcüétiũgu iũxĩnechiga
(Mt 7.24-27)

⁴⁶ —¿Tũxcũũ i pema rũ: “Pa Torũ Corix” ñaperũgũ choxũ, natũrũ tama penaxũ i ngẽma pemaã nüxũ chixuxũ? ⁴⁷ —Rũ ñuxma tá pemaã nüxũ chixu na ñuxãcũ tiixũ ya yixema chowe ruxũxẽ rũ choxũ ñuxẽ rũ naxũxe i ngẽma tũmamaã nüxũ chixuxũ. ⁴⁸ —Rũ tũma rũ wũxi ga yatũ ga upatacũ rũ yamẽxmaũcũ ga norũ caxta ñuxmata nutawa nangucũrũ tixĩ. Rũ yexguma namẽxgu ga taxtũ rũ yabaixũgu ga napata, rũ woo ga na naporaũchiũxũ, rũ tama niwẽxtaũ, yerũ meãma inapugũarũ caxtaãx ga guma í. ⁴⁹ —Natũrũ yixema nüxũ ñnumarexe i chorũ ore natũrũ tama naxũxe i ngẽma tũmamaã nüxũ chixuxũ, rũ wũxi ga yatũ ga naxnũcüétiũgumare upatacũrũ tixĩ. Rũ yexguma namẽxgu ga taxtũ, rũ nibaixũ ga napata, rũ naporaũchiũ. Rũ niwẽxtaũ ga napata, rũ yexma nayarũxo ga guma í.

7

Ngechuchu rũ Dumacũãx ga churaragũarũ ãẽxgacũarũ duixũxũ narũmexẽẽ
(Mt 8.5-13)

1 Rū yexguma nūxū nachauxgu ga duūxūgūmaã na yadexaxū ga Ngechuchu, rū Capernáúwa naxū. 2 Rū yéma nayexma ga wūxi ga churaragūarū capitáū ga Dumacūāx. Rū guma capitáū rū nūxū nayexma ga wūxi ga norū duūxū ga poraācū nūxū nangechaūxū. Rū yema norū duūxū rū nīdaawe, rū naturaxūchi. 3 Rū yexguma Ngechuchuxū naxīnūchigaga ga guma capitáū, rū Ngechuchuxūtawa nanamugū ga ñuxre ga Yudiūgūarū āēxgacūgūerugū. Rū ñanagūrū nūxū: —¡Ngema Ngechuchuxūtawa pexī na nūxū pecèèxūgūxūcèx rū nūma naxū na chorū duūxūcèx yanataanexēēāxūcèx! —ñanagūrū. 4 Rū Ngechuchuxūtawa naxī, rū poraācū nūxū nacèèxūgū, rū ñanagūrūgū: —Name nixī i nūxū curūngūxēē ya torū capitáū. 5 —Erū nūma rū guxū i Yudiūgūxū nangechaū. Rū nūmatama nanaxūtānū na naxūgūāxūcèx ga torū ngutaquēxepataū —ñanagūrūgū. 6 Rū yexguma ga Ngechuchu rū nawe narūxū. Natūrū yexguma marū capitáūpataxū yangaicagu, rū nūma ga capitáū rū Ngechuchucèx yéma nanamu ga ñuxre ga namūcūgū na namaã nūxū yanaxugūxūcèx ga norū ore ga ñaxū: —Pa Corix, tama cuxū chachixewechaū na chopatawa cunguxū erū choma rū taxuwama chame na chopatagu na cuxūcuxū. 7 —Rū ngēmacèx nixī i tama chomatama cuxcèx chayaçaxū. Rū chanaxwèxe i curū orewaxicatama nūxū quixu na naxcèx yataanexū tá i chorū duūxū. 8 —Erū choma rū ta chorū āēxgacūmēxēwa changēxma, rū choxmēxwa nangēxmagū ta i ñuxre i churaragū. Rū ngēxguma chanamuxgu i wūxi na ngextá naxūxūcèx, rū ngema naxū. Rū ngēxguma chaugūxūtawa naxcèx changemagu i to, rū chauxūtawa nangu. Rū ngēxguma chorū duūxūxū chamuxgu na tacū na naxūxūcèx, rū choxū nanaxū —ñanagūrū. 9 Rū nūma ga Ngechuchu rū yexguma nūxū naxīnūga ga yema capitáūārū ore rū nabaixāchiāē. Rū yema duūxūgū ga nawe rūxīxūxū nadawenū, rū ñanagūrū: —Aixcūma pemaã nūxū chixu rū taxuūma i Yudiūgūtanūwa nūxū ichayangau i wūxi i duūxū i ngēma yatūrūū aixcūma yaxōxū —ñanagūrū. 10 Rū yexguma nawoegugu ga yema capitáūmūcūgū ga Ngechuchuxūtawa namugūxū, rū nūxū inayangaugū ga marū naxcèx na yataanexū ga yema capitáūārū duūxū.

Ngechuchu ínanadaxēē ga wūxi ga yutecū ngīne

11 Rū yemawena ga Ngechuchu rū wūxi ga iāne ga Naīgu āeganewa naxū. Rū nawe narūxī ga norū ngūexūgū, rū muxūma ga togū ga duūxūgū. 12 Rū yexguma guma iāneārū ngaicamana nanguxgu, rū tūxū nadau ga wūxi ga yueta ga tēxgūwa tūxū nangegūxe. Rū guxema yuetaarū mamá rū tayute rū guma yucū rū guxicatama nixī ga tūmae ixīcū. Rū muxūma ga duūxūgū ga guma iānecūāx rū tūxū inixūmūcūgū. 13 Rū yexguma Cori ga Ngechuchu guma yucūarū mamaxū dēuxgu, rū nūxū ingechaūtūmūū. Rū ñanagūrū ngīxū: —¡Tāxū i cuxaxuxū! —ñanagūrū. 14 Rū yexguma ga Ngechuchu rū yuetacèx nixū, rū nūxū ningōgū ga tūmachiū. Rū yema tūxū ingetaūgūxū rū tūmamaã inayachiāchitanū. Rū ñanagūrū ga Ngechuchu tūxū ga guxema yueta: —Pa Ngextūxūcūx, ¡rūda! —ñanagūrū. 15 Rū yexguma ga guxema yuchiréxe rū itarūto, rū itanaxūgū ga na tidexaxū. Rū Ngechuchu rū tūmaēna tūxū namu. 16 Rū yexguma yemaxū nadaugūga ga duūxūgū, rū guxūma namuē. Rū inanaxūgūe ga Tupanaxū na yacuèxūūgūxū. Rū ñanagūrūgū: —Wūxi i Tupanaārū orearū uruū i poraxū tatanūwa nangox. Rū

ñanagürügü ta: —Tupana nuã naxũ na norü duũxügüxũ yanangũxëẽxũcëx —ñanagürügü. ¹⁷ Rũ guxũma ga Yudéaanewa rü norü ngaicamana, rü duũxügü nüxũ nacuáchigagü ga yema Ngechuchu üxũ.

Cuáũ ga baiũxëëruũ rü Ngechuchuxũtawa nanamugü ga taxre ga norü duũxügü

(Mt 11.2-19)

¹⁸ Rũ Cuáũ ga baiũxëëruũ rü nüxũ nacuáchiga ga guxũma ga yema Ngechuchu üxũ, yerü norü ngúexügü ga Cuáũ rü namaã nüxũ nix-ügü. Rũ yemacëx ga Cuáũ rü taxre ga norü ngúexügücëx naca. ¹⁹ Rũ Ngechuchuxũtawa nanamugü. Rũ Cuáũ rü ñanagürü nüxũ: —¡Ngëma pexĩ rü Ngechuchuna peca rü ñapegügü nüxũ: “¿Cuma yiĩxũ i Cristu i cuxũ ítananguxëẽxũ, rü éxna to tá yixĩ i Cristu?” ñapegügü nüxũ! ²⁰ Rũ yema yatügü ga Cuáũ Ngechuchuxũtawa mugüxũ, rü Ngechuchucëx naxĩ. Rũ ñanagürügü nüxũ: —Cuáũ ya baiũxëëruũ núma cuxũtawa toxũ namugü na cuxna tay-acagüxũcëx rü ¿aixcũma cuma quiĩxũ i Cristu ya núma nguxchaũcü, rü éxna to tá yixĩ i Cristu? —ñanagürügü. ²¹ Rũ yexgumatama Ngechuchuxũtawa nangugü ga Cuáũãrũ ngúexügü, rü Ngechuchu nanameẽxëẽ ga muxũma ga duũxügü ga nagúxũraũxũ ga ñaawemaã idaaweexũ rü yema ingoxoãxũ. Rũ nayadauchigüxëẽ ga muxũma ga ingexetüxũ. ²² Rũ yemacëx Ngechuchu nanangãxũ rü ñanagürü: —¡Pewoegu rü Cuáũmaã nüxũ peyarũxu i ngëma pematama nüxũ pedauxũ rü nüxũ pexĩnũxũ! ¡Rũ namaã nüxũ pixu i ñuxãcü i ngëma ingexetüxũ rü marũ nidauchigü, rü ngëma ichixeparaxũ rü marũ inachigü, rü ngëma chaxũneãxgüxũ rü marũ naxcëx nitaanegü, rü ngëma ngauchixëgüxũ rü marũ ningoxnamachixëgü, rü ngëma yuexũ rü wenaxãrũ namaxë, rü ngëma ingearü ngëmaxũãxũmaã rü marũ nüxũ tixu i Tupanaãrũ ore i mexũ! ²³ —Rũ tataãẽ ya yixema texé ya tama choxũ rüxoxe —ñanagürü ga Ngechuchu. ²⁴ Rũ yexguma nawoeguxgu ga yema duũxügü ga Cuáũ yéma mugüxũ, rü Ngechuchu inanaxügü ga guma Cuáũchiga na yadexaxũ. Rũ duũxügümaã nüxũ nixu, rü ñanagürü: —¿Tacü nixĩ ga pema ípeyadaugüxũ ga dauxchitawa ga taxúema íxãpataxũwa? ¿Éxna wüxi ga yatü ga turaxũ ga ñoma dexne ga buanecü yaxĩãxtanücüüxëẽcürüü ixĩxũ nixĩ ga ípeyadaugüxũ? ²⁵ —Rũ éxna tama guma ípeyadaugü, ¿rü tacü nixĩ ga ípeyadaugüxũ? ¿Éxna wüxi ga yatü ga poraãcü nügü ngëxãécü ípeyadaugü? Pema nüxũ pecuëx i ngëma poraãcü nügü ngëxãëgüxũ rü ãëxgacügü ya tacügüpatawa nangëxmagü, rü taxucëma dauxchitawa nangëxmagü. ²⁶ —¿Tacü éxna nixĩ ga ípeyadaugüxũ? ¿Éxna wüxi ga Tupanaãrũ orearü uruũ? Ngëmáãcü aixcũma yema nixĩ ga ípeyadaugüxũ. Rũ pemaã nüxũ chixu rü Cuáũ ya baiũxëëruũ rü tama wüxi i ngëxũrũxũ i Tupanaãrũ orearü uruũ nixĩ. ²⁷ —Rũ Cuáũchiga nixĩ ga naxũmatüxũ ga yema Tupanaãrũ ore ga ñaxũ:

“Cupëxegu chayamu i chorü orearü ngeruũ na cuxcëx namexëẽãxũcëx i duũxügüarü maxũ”,

ñaxũ. ²⁸ —Rũ pemaã nüxũ chixu rü guxũ i duũxügütanũwa rü nataxuma i Tupanaãrũ orearü uruũ i Cuáũ ya baiũxëëruũãrũ yexera. Natürü yixema Tupana ãëxgacü íxixũwa wixwexũchi üxe, rü Cuáũãrũ yexera tixĩ —ñanagürü. ²⁹ Rũ guxũma ga duũxügü rü woo yema yatügü ga Dumaãrũ ãëxgacücëx ñëru ngĩxũ ideetanüxũ, rü nüxũ naxĩnũë ga yema Ngechuchuarü ore rü ñuxũchi Tupanaxũ nicuëxüügü yerü nüxũ nicuëxãchitanü na aixcũma mecü yiĩxũ ga Tupana. Rũ yema nixĩ ga duũxügü ga ñpaacü Cuáũ íbaiũxëẽxũ.

³⁰ Natürü yema Parichéugü rü yema ngúexēēruüügü ga Moïchéarü mugüwa nguxēētaegüxü rü tama nanaxwëxegü ga Cuáü na ínbaiüxēēxü. Rü yemaäcü nüxü naxoe ga yema mexü ga Tupana naxcëx üxchaüxü. ³¹ Rü nüma ga Cori ga Ngechuchu rü ñanagürü: —¿Tacügu tá chanangu i ñomaücüü maxëxü i duüxügü? ¿Rü nanatacüräügü? ³² —Rü ñaä duüxügü rü taxuxümaäma nataäëgü ngëxgumarüü i ngema buxügü i íäxtüwa rütogüxü, rü íäñüxcëwëxegüxü, rü tagaäcü namücügüxü ñagüxü:

“Marü wowerumaä pëxcëx tapaxetagü natürü tama ípixüächitanüxü. Rü marü ngechaüxü i wiyaeagu pëxcëx tawiyaeü natürü tama pëxauxe”, ñagüxü. Rü ngëma buxügürüü taxuxümaäma nataäëgü i ñomaücüü i duüxügü. ³³ —Yerü ga Cuáü ga baiüxēēruü rü nüma naxü, rü tama päu nangöx rü tama binu nayaxaxü. Rü yëxguma ga pema rü: “Nangoxöx” ñaperügü nüxü. ³⁴ —Rü ñüxüchi núma chaxü i choma ya Tupana Nane na duüxüxü chiüxü, rü öna changöx rü binu chayaxaxü. Rü ngëxguma i pema rü ñaperügügü choxü:

“Choma rü chataanüxüchi rü changäxwëxe, rü pecaduä x-güxü i duüxügümaä chaxämücü, rü yatügü i Dumaärü äëxgacücëx diëru ngixü ideetanüxümaä chaxämücü, ñaperügügü choxü. ³⁵ —Natürü Tupanaärü cuëx rü meäma nangöx tümawa ya yíxema aixcüma nawe rüxixë —ñanagürü ga Ngechuchu.

Ngechuchu rü Chimáü ga Parichéupatawa nayexma

³⁶ Rü wüxi ga Parichéu rü Ngechuchuna naxu na napatawa nachibüxüxcëx. Rü yéma naxü ga Ngechuchu rü yema Parichéuarü mechawa nayarüto. ³⁷ Rü wüxi ga ngecü ga chixri maüxcü ga guma íanecüäx, rü yëxguma nüxü nacuächigagu na Parichéupatawa tá na nachibüxü ga Ngechuchu, rü yéma ixü. Rü yéma inange ga wüxi ga pumara ga yixixü ga wüxi ga butiya ga nutanaxcëxmaä äxchiüxü. ³⁸ Rü naxauxäcüma Ngechuchucutüxütawa iyarütöxöchi. Rü ngixgüxüxëtümaä iyawaicutüxëë. Rü ngíyaemaä ínapicutü, rü inachuxcutü. Rü ñüxüchi yema pumaramaä inachacutü. ³⁹ Rü yëxguma yemaxü nadëuxgu ga yema Parichéu ga Ngechuchuna uxü, rü naäëwa nagu narüxinü rü nügümaätama ñanagürü: —Ngëxguma chi ñaä Ngechuchu rü aixcüma wüxi i Tupanaärü orearü uruü yixígu, rü nüxü chi nacuëx na tacü yíixü i ñaä ngëxü i nüxü ingögüxü rü ñuxäcü na namaxüxü rü poraäcü na napecaduäxü —ñanagürü ga naäëwa. ⁴⁰ Rü yëxguma ga Ngechuchu rü nüxü nacuëxama rü Parichéuxü ñanagürü: —Pa Chimáüx, choxü nangëxma i wüxi i ore i cumaä nüxü chixuxchaüxü —ñanagürü. Rü nüma ga Parichéu rü Ngechuchuxü nangäxü, rü ñanagürü: —¡Ëcü, chomaä nüxü ixu, Pa Ngúexēēruüx! —ñanagürü. ⁴¹ Rü ñanagürü ga Ngechuchu: —Taxre ga yatügü rü wüxi ga corixütawa nanangetanü. Rü wüxi nanangetanü ga 50 tachinü ga diëru rü to nanangetanü ga 50 tachinü. ⁴² —Natürü yema taxre rü taxuacü nanaxütanü ga norü ngetanü. Rü yemacëx düxwa yema norü cori rü nüxü nüxü narüngüma ga yema nüxü na nangetanügüäxü. Rü ñüxmax, Pa Chimáüx, rü ¡chomaä nüxü ixu! rü ¿ngëxüxüüxü ga yema taxre ga yatügü rü yexeraäcü norü corixü nangechaü? —ñanagürü. ⁴³ Rü Ngechuchuxü nangäxü ga Chimáü, rü ñanagürü: —Chauxcëx ga yema yexeraäcü nüxü nangetanüxü nixü ga yexeraäcü norü corixü ngechaüxü —ñanagürü. Rü Ngechuchu rü ñanagürü nüxü: —Ngëmääcü aixcüma nüma nixü —ñanagürü. ⁴⁴ Rü yëxguma ga Ngechuchu rü ngixü nadawenü ga yema ngecü, rü ñanagürü Chimáüxü: —¿Ngixü cudauxü i ñaä ngecü? Rü cupatagu

chaxücu i chomax, Pa Chimáúx, natürü tama dexá choxnata cuxã chorü yauxcutürü. Natürü ñaã ngecü rü ngĩxgũxũxetümaã choxũ iyawaicutüxëë, rü ngĩyemaã choxũ ñipicutü. ⁴⁵ —Cuma rü tama choxũ cuchuxu i noxri choxũ curümoxëgu, natürü ngĩma i ñaã ngecü rü noxri núma changuxgumama rü choxũ iyachuxcutüchigü. ⁴⁶ —Cuma rü tama pumaramaã choxũ cuchaeruxüra, natürü ngĩma i ñaã ngecü rü chaucutügu inaba i pumara. ⁴⁷ —Rü ngëmacëx woo namu i ngĩrũ pecadugü natürü Tupana ngĩxũ nüxũ nangechaũ i guxüma, erü ngĩma rü aixcüma choxũ ingechaũ. Natürü yixema tama aixcüma ngechaũcëx iyacaxe, rü tama poraacü Tupanaxũ tangechaũ —ñanagürü. ⁴⁸ Rü yexguma ga Ngechuchu rü yema ngecüxũ ñanagürü: —Curü pecadugü rü marü cuxũ nüxũ changechaũ —ñanagürü. ⁴⁹ Rü yema togü ga nüxna naxugũxũ ga yéma Ngechuchumaã mechawa yexmagũxũ, rü inanaxügü ga nügümücügümaãchigü na yadexagũxũ. Rü ñanagürügü: —¿Tacü nixĩ i ñaã yatü, ecëx ngëmaãcü duũxügüaxũ pecaduxũ nangechaũxũ? —ñanagürügü. ⁵⁰ Natürü Ngechuchu rü ñanagürü ngĩxũ ga yema ngecü: —Marü cuxũ nangëxma i maxũ i taguma gũxũ, erü choxũ cuyaxõ. ¡Ñuxma rü taãëcüma cuchiüwa naxũ! —ñanagürü.

8

Ngexũgü ga Ngechuchuxũ rüngũxëëgũxũ

¹ Rü yemawena ga Ngechuchu rü Gariréaaneärü ñanagügu nixũägüchigü. Rü duũxügümaã nüxũ nixuchigü ga Tupanaärü ore na ñuxãcü ãëxgacü yĩxũ ya Tupana. Rü ñayaxümcügü ga yema 12 ga ngüexügü ga marü nadexũ. ² Rü yexgumarũ ta ñiyaxümcügü ga ñuxre ga ngecügu ga ñpaacü ngoxogü ngĩwa ñawoxücü rü ngĩrũ daaweewa ngĩxũ nameëxëëcü. Rü yematanüwa iyexma ga María ga Magadácũãxmaã ngĩxũ naxugücü ga ñpaacü Ngechuchu 7 ga ngoxo ngĩwa ñawoxücü. ³ Rü yéma iyexma ta ga Cuána ga Cuchu naxmëx. Rü Cuchu nixĩ ga wüxi ga ãëxgacü ga Erodeaxũ puracüxũ. Rü yéma nayexmagü ta ga Chuchana rü mucüma ga náigü ga ngecügu ga ngĩrũ ñerumaã Ngechuchuxũ rüngũxëëgücü.

Ore ga toecügu ixuxũ (Mt 13.1-9; Mr 4.1-9)

⁴ Rü muxüma ga yema ñanagücüãx ga duũxügü, rü Ngechuchuxütawa ñayadaugü. Rü yexguma yéma nangutaquëxegüga ga muxüma ga duũxügü, rü Ngechuchu namaã nüxũ nixu ga wüxi ga ore ga cuëxruũ, rü ñanagürü nüxũ: ⁵ —Wüxi ga yatü ga toecü rü trigumaã nanagüane. Rü yexguma trigumaã nagüaneägu rü ñuxre ga trigu, rü namagu nayi. Rü duũxügü nawa nangagüxũ, rü werigü rü nanawecu. ⁶ —Rü náigü ga trigu rü nutatanügu nayi. Rü yexguma naxügügu ga guma trigu, rü nipagü rü nayuemare, yerü nataxuma ga norü waianexũ. ⁷ —Rü náigü ga trigu rü tuxunecügu nayi. Natürü yexguma nayaegu ga tuxugü rü guma triguxũ ñawocu rü nanadai. ⁸ —Natürü náigü ga trigu rü mexü ga waixümcügu nayi. Rü yemacëx ga yexguma nayaegu rü muxüma ga trigu nawa ñanguxuchi. Rü wüxipüxü ga triguwa ñanguxuchi ga 100 püxü ga trigu —ñanagürü. Rü yemawena rü Ngechuchu tagaacü ñanagürü nüxũ ga duũxügü: —Rü yixema ãchixëgüxe, rü ñnaga taxĩnüe i ngëma ore! —ñanagürü.

Tacüchiga nixĩ ga yema ore ga cuëxruũgügu ixuxũ (Mt 13.10-17; Mr 4.10-12)

⁹ Rū yexguma ga norū ngúexǵǵū rū nūxna nacagüe na ƒacüchiga yǵǵǵū ga yema ore ga yatü ga toecügu ixuxǵ. ¹⁰ Rū Ngechuchu ñanagürü nūxǵ: — Tupana rü pexǵ nūxǵ nacuèxèè i ngēma èxǵǵǵǵū i taxuǵma i togü nūxǵ cuǵǵǵū i ñuxǵcü ãèxǵgacü na yǵǵǵū i nūmax. Natürü togücèx rü cuèxruǵgu chayaxüácüma namaǵ nūxǵ chixu i ore. Rū ngexguma woo nūxǵ nadaugügu rü ñoma tama nūxǵ nadaugüxürüǵ nixǵǵǵ, rü woo nūxǵ naxǵñüègu rü ñoma tama nūxǵ naxǵñüèxürüǵ nixǵǵǵ —ñanagürü.

Ngechuchu rü meǵ nanangoxèè ga yema ore ga toecüchigagu yaxuxǵ
(Mt 13.18-23; Mr 4.13-20)

¹¹ Rū Ngechuchu rü ñanagürü: —Ngēma ore i toecüchigagu pemaǵ chixuxǵ rü ñaǵchiga nixǵ. Rū ngēma trigupǵxü rü Tupanaǵrü orechiga nixǵ. ¹² — Rū guma trigu ga namagu yǵǵǵnerüǵ nixǵ i duǵǵǵǵü i ngēma orexǵ ñnüèxǵ. Natürü Chatanǵ rü ngēma duǵǵǵǵüǵ nūxǵ inayarüngümaèxèè i ngēma ore, na tama yaxöǵǵǵǵüèx rü tama nayauxǵǵǵǵüèx i maxǵ i taguma gúxǵ. ¹³ — Rū guma trigu ga nutatanügu yǵǵǵne, rü ngēma nixǵ i duǵǵǵǵü i nūxǵ ñnüèxǵ i Tupanaǵrü ore rü taǵèècüma yaxöǵǵǵǵü. Natürü tama aixcüma nanayauxǵü i ngēma ore, erü paxaǵchi nayaxöǵǵü, rü yǵǵcúra guxchaxǵ nūxǵ üpetügu, rü nūxǵ narüxoe i ngēma ore. ¹⁴ —Rü guma trigu ga tuxunecügu yǵǵǵne, rü ngēma nixǵ i duǵǵǵǵü i Tupanaǵrü orexǵ ñnüèxǵ rü yaxöǵǵǵǵü natürü ñoma i naǵneǵrü ngēmaxüèèx oegaǵèǵǵǵǵü, rü norü ngēmaxǵguama rüxǵñüèxǵ rü tama nūxǵ rüxoechaǵǵü i norü ngüchaǵǵü. Rū ngēmagagu düxwa tama Tupanacèx namaxè. ¹⁵ —Natürü guma trigu ga mexǵ ga waixǵmügu yǵǵǵne, rü ngēma nixǵ i duǵǵǵǵü i aixcüma taǵèècüma nayauxǵǵǵü i Tupanaǵrü ore, rü naga ñnüèxǵ, rü meǵ naxcèx maxèxǵ. Rū ngēma nixǵ i duǵǵǵǵü i aixcüma Tupanawe rüxǵǵü rü naxǵǵǵǵü i ngēma nüma nanaxwèxexǵ.

Cuèxruǵǵü ga omügu ixuxǵ
(Mr 4.21-25)

¹⁶ —Taxüema wüxi i omüwa tanangixixichi na tanatüxpechitaxüèèx rü èxna tümaǵrü pechicatüǵgu tayaxüchixüèèx. Natürü ngöǵǵügu tanaxǵ na tüxǵ nabaxixüèèx ya yǵǵema ngexma chocuxe. ¹⁷ —Rü ngèxgumarüǵ ta i guǵǵma i ƒacü i cüǵcüma ixuxǵ rü yǵǵcúra rü duǵǵǵǵü tá nūxǵ nacuèxǵüma. Rü guǵǵma i ngēma ñuxma duǵǵǵǵüèèx èxǵǵǵǵü rü tá nangoxoma. ¹⁸ —¡Meǵ iperüxǵñüè i ñuxmax! Erü texé ya naga ñnüèx i ngēma ore i mexǵ, rü Tupana tá yexeraǵcü tüxǵ nūxǵ nacuèxèè. Natürü yǵǵema tama naga ñnüèx, rü yexeraǵcü tá tüxna nanayaxu i ngēma íraxǵ i tümaǵrü cuèx i noxri tüxǵ ngèxmachirèxǵ —ñanagürü.

Ngechucharü mamǵ rü naèneèǵüchiga
(Mt 12.46-50; Mr 3.31-35)

¹⁹ Rū naè ga Ngechuchu rü naèneèǵü, rü yema Ngechuchu íyexmaxüwa tangüǵ. Natürü taxuacü naxütawaxüchi tangüǵü, yerü namuxüchi ga duǵǵǵǵü. ²⁰ Rū wüxi ga duǵǵǵü Ngechuchumaǵ nūxǵ nixu, rü ñanagürü: —Yèa düxétüwa tangèxma ya cue rü cueneèǵü, rü cuxǵ tadaugüchaǵ —ñanagürü. ²¹ Natürü nüma ga Ngechuchu rü ñanagürü nūxǵ ga duǵǵǵǵü: —Rü yǵǵema nūxǵ ñnüèx i Tupanaǵrü ore rü nagu maxexe rü yǵǵema tixǵ ya chaue rü chaueneèǵü ixǵǵüxe —ñanagürü.

Ngechuchu rü buanecüxǵ rü yuapexǵ ñayachaxèchixèè
(Mt 8.23-27; Mr 4.35-41)

²² Rū wūxi ga ngunexūgu ga Ngechuchu rū norū ngúexūgūmaã wūxi ga ngegu nichoũ. Rū ñanagürü nüxũ: —¡Ngĩã daa naxtaxaarü tocutüwa taxi! —ñanagürü. Rū inaxĩachi. ²³ Rū yexguma yaxãtũyane rū nipechigü ga Ngechuchu. Rū ngürũachi yexma nüxũ naxũ ga wūxi ga tacü ga buanecü. Rū guma nguewa rū niyauxcuchichigü ga dexã. Rū düxwa inayangutaũgüchaũ. ²⁴ Rū yemacèx nūma ga norū ngúexūgü rū Ngechuchuxũ nacagü ga na inadxũcèx. Rū ñanagürügü nüxũ: —Pa Ngúexèèruũx, ngēmama itabaxūgü —ñanagürügü. Rū yexguma ga Ngechuchu rū inarũda, rū buanecüxũ rū yuapexũ nanga. Rū inayachaxãchi ga buanecü, rū inayarũxo ga yuape, rū inachaxanemare. ²⁵ Rū yexguma ga Ngechuchu rū ñanagürü nüxũ ga norū ngúexūgü: —¿Tacü pexũ naxüpetü ecèx tama meã peyaxõgüxũ? —ñanagürü. Natürü ga nūmagü rū nañaxãchiãègü. Rū nügümücügüna nicachigü, rū ñanagürügü: —¿Tacü èxna nixĩ i ñãã yatü rü ngēmacèx èixrücü yä buanecü rü yuape rü naga naxĩnũèxũ? —ñanagürügü.

Yatü ga Gadarácũãx ga ngoxogü nawa yexmagüxũ
(Mt 8.28-34; Mr 5.1-20)

²⁶ Rū düxwa naxtaxaarü tocutüwa nangugü ga Gadaraarü nañewa. Rū yema naane rü Gariréaaneärü toxmèxtawa nayexma. ²⁷ Rū yexguma marü nguewa inaxüegu, ga Ngechuchu, rü naxcèx nixü ga wūxi ga yatü ga guma ñanecũãx ga mucü ga taunecü ngoxogü nawa yexmagüxũ. Rū guxũguma nangexchiruecha. Rū tama ñwa nayexma, yerü duũxèchiquèxetanügu nayarũauxchigünexũ. ²⁸ Rū yexguma Ngechuchuxũ nadèuxgu, rü napèxegu nayacaxãpüxũ. Rū aita naxũãcūma ñanagürü: —¿Tũxcüũ nuã choxũ cuyachixewe, Pa Ngechuchux, Pa Tupana ya Tacüxüchi Nanex? Rū cuxũ chacèèxũ na tama ngúxũ choxũ quingexèèxũ —ñanagürü. ²⁹ Rū yema ñanagürü yerü Ngechuchu marü nanamu ga yema ngoxogü na inachoxũxüçèx. Rū muèxpüxcüna rü guma yatüxũ naxãũãèxèèxũ ga yema ngoxogü. Rū duũxügü rü cadenamaã nayanèixchacüügüxũ rü nayanèixparagüxũ na taxuwama naxũxüçèx. Natürü nūma rü nagu nacaugüama ga cadenagü. Rū yema ngoxogü rü dauxchitawa ga taxüema ixãpataxüwa nanagagü. ³⁰ Rū Ngechuchu nüxna naca rü ñanagürü: —¿Tacü nixĩ i cüéga? —ñanagürü. Rū nūma rü Ngechuchuxũ nangãxũ, rü ñanagürü: —Muxüchixũ nixĩ i chauéga —ñanagürü. Rū yema ñanagürü yerü namuxüchi ga yema ngoxogü ga guma yatügu chocuxũ. ³¹ Rū yema ngoxogü rü Ngechuchuna nacagü ga tama ngēma poxcuchica i ãxmaxũ i taguma iyacuãxügu na nawocuãxüçèx. ³² Rū guma mèxpüñeärü tuãchiwa nayexmagü ga muxüma ga cuchigü ga yēma chibüèxũ. Rū yemacèx ga yema ngoxogü rü Ngechuchuxũ nacèèxügü na yema cuchigüga nayachocuxüçèx. Rū Ngechuchu rü: —Ngũ —ñanagürü. ³³ Rū yexguma ga yema ngoxogü rü guma yatüwa inachoxũ rü yema cuchigügu nayachocu. Rū guxüma ga yema cuchigü rü inaxũãchi, rü naxtaacutüarü mèxpüxüwa nayarüyuxgü, rü yexma nayi. ³⁴ Rū yexguma yema cuchigüarü dauruügü nüxũ daugügu ga yema ngupetüxũ, rü nañaxãchiãègü rü inibuxmü. Rū ñãnewa nüxũ nayarüxugüe, rü yema ñãneärü ngaicamana ipeagüxũ ga duũxügütanüwa rü ta nüxũ nayarüxugügü. ³⁵ Rū ga duũxügü rü inayadaugü ga yema ngupetüxũ. Rū yexguma Ngechuchuxütawa nangugügu, rü yēma nüxũ nadaugü ga guma yatü ga ngoxoãxchirécü. Rū Ngechuchucutüxütawa narüto, rü marü tama naxãũãè. Rū namuñè ga duũxügü. ³⁶ Rū yema duũxügü ga nüxũ daugüxũ ga yema ngupetüxũ, rü yema iyadaugüxümaã nüxũ nixugügü

ga ñuxãcü Ngechuchu na namexêẽxũ ga guma yatü ga ngoxoãxchirécü. ³⁷ Rü yexguma yemaxũ naxĩnüëgu, rü guxũma ga yema Gadáraanecũãx ga duũxũgü, rü Ngechuchuxũ nacêexũgü na ñaxũxũxũcêx ga yema naãnewa, yerü poraãcü namuê. Rü yemacêx ga Ngechuchu rü nguëgu nixüë, rü ñaxũũachi. ³⁸ Rü guma yatü ga ngoxoãxchirécü rü Ngechuchuxũ nacêexũ ga nawe na naxũxũcêx. Natürü ga Ngechuchu rü nanamu ga yexma na naxãxũcêx, rü ñanagürü nüxũ: ³⁹ —¡Cuchiũwa naxü, rü duũxũgũmaã nüxũ yarüxu ga ñacü cuxcêx na naxũxũ ga Tupana! —ñanagürü. Rü ñixü ga guma yatü, rü guxũma ga yema ñãnecũãx ga duũxũgũmaã nüxũ nayarüxu ga ñacü naxcêx na naxũxũ ga Ngechuchu.

Yáiruxacũchiga rü yema nge ga Ngechuchuchirugu ingögücũchiga
(Mt 9.18-26; Mr 5.21-43)

⁴⁰ Rü yexguma Ngechuchu wenaxãrü taëgu ga naxtaxaarü tocutüwa, rü duũxũgü rü taãëacũma nanayauxgü, yerü guxũma ñananguxêëgü. ⁴¹ Rü yema Ngechuchuxũtawu nangu ga wũxi ga yatü ga Yáiru ga naëga. Rü nüma ga Yáiru rü wũxi ga ngutaquëxepataũãrũ ãëxgacü nixĩ. Rü Ngechuchupëxegu nayacaxãpũxü rü nüxũ nacêexũ ga napatawa na naxũxũcêx. ⁴² Yerü nüxũ iyexma ga wũxi ga naxãcü ga ngĩgũmaã wũxicacü, rü iyadaawe, rü ituraxũchi. Rü ngĩma rü maneca 12 ga taunecü ngĩxũ nayexma. Rü yexguma Yáirupatawa naxũxgu ga Ngechuchu, rü muxũchixũ ga duũxũgü nawe narüxĩ, rü dũxwa ñayaxũtũgü. ⁴³ Rü yema duũxũgũtanüwa iyexma ga wũxi ga ngecü ga 12 ga taunecü ãgüechacü. Rü yemamaã iyadaaweëcha. Rü duturugũxũtagu ngĩxũ iguxêë ga guxcü ga ngĩrũ dñëru, natürü taxüema ga texé ngĩxcêx tayataanexêëga. ⁴⁴ Rü yema ngecü ga Ngechuchuweama ne ixũ, rü naxpechinũchirugu iyangögü. Rü yexgumatama ñayachaxãchi ga na naxãgũxũ. ⁴⁵ Rü yexguma ga Ngechuchu rü duũxũgüna naca, rü ñanagürü: —¡Texé tixĩ ya choxũ ingögũxe? —ñanagürü. Rü guxũma ga duũxũgü rü: —Taxüema —ñanagürügü. Rü yexguma ga Pedru rü namücügü rü ñanagürügü: —Pa Ngüexêëruũx, cuma nüxũ cudau i ñuxre i duũxũgü ngema cuxũ na nayaxũtũgũxũ, rü ngëxguma rü ta:

“¡Texé ya choxũ ingögũxe?” ñacuxũ —ñanagürügü. ⁴⁶ Natürü ga Ngechuchu rü ñanagürü: —Ngemããcü wũxie choxũ tingögü, erü nüxũ chicuëxãchi na chorü poramaã tüxũ na charümxêëxũ —ñanagürü. ⁴⁷ Rü yexguma nangoxomagu ga na nüxũ nacüëxamaxũ ga Ngechuchu ga yema nüxũ na yangögũxũ, rü yaduruxãcüma naxũtawu ixü ga yema ngecü. Rü napëxegu iyacaxãpũxü. Rü guxũ ga duũxũgüpëxewa namaã nüxũ iyaxu ga ñacücêx nüxũ na yangögũxũ, rü ñuxãcü yexgumatama ngĩxcêx na yataanexũ. ⁴⁸ Rü yexguma ga Ngechuchu rü ñanagürü ngĩxũ: —Pa Chauxacũx, cuxcêx nitaane, erü cuyaxõ. ¡Rü ñuxma rü taãëacũma ñixũ! —ñanagürü. ⁴⁹ Rü yexguma iyadexayane ga Ngechuchu, rü yema nangu ga wũxi ga duũxũ ga ngutaquëxepataũãrũ ãëxgacü ga Yáirupatawa ne üxũ. Rü ñanagürü Yáiruxũ: —Cuxacü rü marü iyu. ¡Rü tãxũ i cuyachixewechigũxũ ya Ngüexêëruũ! —ñanagürü. ⁵⁰ Natürü yexguma yema orexũ naxĩnügu ga Ngechuchu, rü ñanagürü Yáiruxũ: —¡Tãxũ i cuyanguãëxũ! Erü ngëxguma cuyaxõxgu rü cuxacü rü tá wena imaxũ —ñanagürü. ⁵¹ Rü yexguma Yáirupatawa nangugügu, rü Ngechuchu nayachocuxêë ga Pedru rü Chaũtiãgu rü Cuãũ rü ngĩnatü rü ngĩë ga yema bucü ga yuxcũ. Natürü tama nanaxwëxe na togü yexma chocuxũ. ⁵² Rü guxũma ga duũxũgü ga yema yexmagũxũ rü naxauxe rü ngĩxcêx nangechaũgü. Natürü Ngechuchu rü ñanagürü nüxũ: —¡Tãxũ i

pexauxexũ! Erũ ngẽma bucũ rũ tama nixĩ i nayuxũ. Rũ ipemare —ñanagũrũ.
⁵³ Natũrũ ga yema duũxũgũ rũ Ngechuchuxũ nacugũeama, yerũ ngĩxũ
 nadaugũ rũ aixcũma marũ iyu. ⁵⁴ Rũ yexguma ga Ngechuchu rũ ngĩxmẽxgu
 nayayauxãchi, rũ tagaãcũ ñanagũrũ: —Pa Bucũx, ¡rũda! —ñanagũrũ. ⁵⁵ Rũ
 yexguma ga ngĩma rũ wena imaxũ, rũ yexgumatama írũda. Rũ Ngechuchu
 rũ duũxũgũmaã nũxũ nixu na ngĩxũ naxũwemũgũxcẽx. ⁵⁶ Rũ ngĩnatũ rũ ngĩe
 ga yema bucũ, rũ poraãcũ tabaixãchiãegũ. Natũrũ Ngechuchu rũ tũxũ namu
 na taxũemaãma nũxũ na tixuxũcẽx ga yema ngupetũxũ.

9

Ngechuchu norũ ngũexũgũxũ namu na nũxũ yanaxugũexũcẽx ga Tupanaarũ ore

(Mt 10.5-15; Mr 6.7-13)

¹ Rũ Ngechuchu rũ nanangutaquẽxexẽẽ ga yema 12 ga norũ ngũexũgũ.
 Rũ pora nũxna naxã rũ nũxna naxãga na ínawoxũãxũcẽx ga nagũxũraũxũ ga
 ngoxogũ, rũ na nameẽxẽẽãxũcẽx ga duũxũgũ ga idaaweexũ. ² Rũ nayamugũ
 na duũxũgũmaã nũxũ yaxugũexũcẽx ga ore ga mexũ na ñuxãcũ ãẽxgacũ yĩĩxũ
 ya Tupana, rũ na nameẽxẽẽãxũcẽx ga duũxũgũ ga idaaweexũ. ³ Rũ ñanagũrũ
 nũxũ: —¡Rũ taxuxũtãma ípinge i perũ namawaũ, rũ bai ya perũ caxũchigũxũ
 ya naĩxmenẽxã, rũ bai i perũ choca, rũ bai i perũ pãũ, rũ bai i perũ dĩeru. Rũ
 wũxitama i perũ daxũ ípinge, rũ tama i taxre! ⁴—Rũ ngẽxguma wũxi ya íãnewa
 pengugũgu, ¡rũ wũxi ya ípatagutama perũcho rũ ñuxmata ipexĩãchi nawa ya
 yima íãne! ⁵—Rũ ngextã tama pexũ ínayauxgũxũwa, ¡rũ ípechoxũ nawa ya
 yima íãne! Rũ ngẽxguma ngẽma ipexĩãchigu ¡rũ ípepagũcutũ i perũ úxaxũcutũ
 na ngẽmawa nũxũ nacũxgũxũcẽx na chixexũ naxũgũxũ i ngẽma duũxũgũ!
 —ñanagũrũ. ⁶ Rũ inaxĩãchi, rũ guxũma ga íãnexãcũgũwa naxĩ. Rũ nũxũ
 nixugũetanũ ga Tupanaarũ ore ga mexũ. Rũ guxũwama nanameẽxẽetanũ ga
 duũxũgũ ga idaaweexũ.

Erode rũ tama nũxũ nacũxéga na texe yixũxũ ga Ngechuchu

(Mt 14.1-12; Mr 6.14-29)

⁷ Rũ Gariréaneãrũ ãẽxgacũ ga Erode, rũ nũxũ nacũãchiga ga guxũma ga
 yema Ngechuchu úxũ. Rũ poraãcũ nagu narũxĩnũ rũ naxoegaãẽ ga Erode,
 yerũ nũmaxũ ga duũxũgũ rũ ñanagũrũgũ: —Cuãũ ya baiũxẽeruũ nixĩ ya
 yima, rũ marũ wena namaxũ —ñanagũrũgũ. ⁸ Natũrũ togũ rũ ñanagũrũgũ:
 —Nuxcũmaũcũ ga Tupanaarũ orearũ uruũ ga Eria nixĩ, rũ wena nangox
 —ñanagũrũgũ. Rũ togũ rũ ñanagũrũgũ: —Bexmana náí ga nuxcũmaũcũ ga
 Tupanaarũ orearũ uruũ nixĩ, rũ wena namaxũ —ñanagũrũgũ. ⁹ Natũrũ
 Erode rũ ñanagũrũ: —Chomatama chanamu ga churaragũ na Cuãũxũ yadae-
 naxãgũxũcẽx. ¿Rũ tacũ éxna nixĩ i ngẽma yatũ i duũxũgũ ngẽmaãcũ poraãcũ
 nũxũ ixuchigagũchaxũ? —ñanagũrũ. Rũ Erode rũ nũxũ nangũchxũxũchi na
 ñuxãcũ Ngechuchuxũ na nadauxũ.

Ngechuchu rũ nanachibũxexẽẽ ga 5000 ga yatũgũ

(Mt 14.13-21; Mr 6.30-44; Cu 6.1-14)

¹⁰ Rũ yexguma nawoeguxgu ga yema Ngechuchuarũ ngũexũgũ ga ya-
 mugũxũ, rũ Ngechuchumaã nũxũ nixugũe ga yema naxũgũxũ. Rũ nũma ga
 Ngechuchu rũ yema norũ ngũexũgũmaã nixũgachi, rũ Bechaídaarũ íãnewa
 namaã naxũ. ¹¹ Natũrũ yexguma duũxũgũ nũxũ cuẽxgũgu ga ngextã na
 nayexmaxũ, rũ Ngechuchuwe narũxĩ. Rũ Ngechuchu rũ meãma yema

duñxügüxü nayaxu, rü namaã nüxü nixu na ñuxãcü ãëxgacü yïñü ya Tupana. Rü nanameëxëë ga yema duñxügü ga idaaweexü. ¹²Rü yexguma marü nayáuanegu, rü Ngechuchucëx naxí ga yema 12 ga ngúexügü ga yamugüxü. Rü ñanagürügü nüxü: —Íyamugü i ñaã duñxügü na ñanexãcügü rü ípatagü ya ngaicamana ngëxmagünewa na naxíxüçëx, rü ngëxma na napegüxüçëx rü norü ònatëex yataxegüxüçëx! Erü nuã íngëxmagüxüwa rü nataxuma i tacü rü òna —ñanagürügü. ¹³Natürü Ngechuchu rü ñanagürü nüxü: —¡Pematama penaxüwemü! —ñanagürü. Rü nanangãxügü, rü ñanagürügü: —Wüximëëxpüx i pãu rü taxre i choxnixícatama toxü nangëxma. ¿Rü éxna cunaxwëxe na naxcëx tayataxegüxü i òna naxcëx i guxüma i ñaã duñxügü? —ñanagürügü. ¹⁴Rü 5000 ga yatügü nixí ga yema yema yexmagüxü. Natürü Ngechuchu rü ñanagürü nüxü ga norü ngúexügü: —¡Ëcü ípenatogüxëëx rü 50 chigü i wüxi tücümüwachigü! —ñanagürü. ¹⁵Rü yemaãcü nanaxügü ga norü ngúexügü. Rü ínanatogüxëë ga guxüma ga duñxügü. ¹⁶Rü yexguma ga Ngechuchu rü nanade ga yema wüximëëxpüx ga pãu rü yema taxre ga choxni. Rü daxügu nadawenüãcüma Tupanana moxë naxã, rü ñuxüchi ínanabücu ga yema pãu rü choxni. Rü norü ngúexügüna nanaxã na nüxü yanüxüçëx ga yema duñxügü. ¹⁷Rü guxüma ga yema duñxügü rü meãma nachibüe. Rü yemawena rü 12 ga pexchigü nanapagüamatama namaã ga yema pãu rü choxnichipëxegü ga íyaxügüxü.

Pedru nanangoxëë na Cristu na yïñü ga Ngechuchu
(Mt 16.13-19; Mr 8.27-29)

¹⁸Rü wüxi ga ngunexü rü Ngechuchu norü ngúexügümaã noxrüwama yayümüxëgu, rü nüma rü norü ngúexügüna naca, rü ñanagürü: —¿Ñuxü ñaxü i duñxügü i chauchiga i choma na texé chíixü? —ñanagürü. ¹⁹Rü norü ngúexügü nanangãxügü rü ñanagürügü: —Nangëxma i duñxügü rü:

“Cuãü ya baiüxëëruñ quixí”, ñagüxü, rü togü rü:

“Eria quixí”, ñagüxü, rü togü rü:

“Wüxi ga nuxcümañcü ga Tupanaãrü orearü uruñ i wena maxücü quixí”, ñagüxü —ñanagürügü. ²⁰Rü yexguma Ngechuchu nüxna naca rü ñanagürü: —¿Rü pema i ñuxü ñapegüxü choxü na texé chíixü? —ñanagürü. Rü Pedru nanangãxü rü ñanagürü: —Cuma nixí i Cristu i Tupana Nane —ñanagürü.

Ngechuchu nanaxunagü ga norü yuxchiga
(Mt 16.20-28; Mr 8.30-9.1)

²¹Rü Ngechuchu rü nayaxucüxëgü ga norü ngúexügü na taxüemaãma nüxü yaxügüexüçëx ga nüma rü Cristu na yïñü. ²²Rü ñanagürü nüxü ga norü ngúexügü: —Choma i Tupana Nane na duñxüxü chíixü, rü poraãcü ngüxü tá chinge. Rü choxü tá naxooxgü i Yudiugüarü ãëxgacügüerugü, rü paigüarü ãëxgacügü, rü ngëma ngúexëëruügü i Moichëarü mugüwa nguxëëtaegüxü. Rü tá choxü nimëxgü, natürü tomaëxpüx i ngunexügu rü wena táxaru chamaxü —ñanagürü. ²³Rü yixcama rü guxüma ga norü ngúexügüxü ñanagürü: —Rü ngëxguma texé chowe rüxüxchaügu, ¡ëcü nüxü tarüxo i túmaãrü ngúchaü, rü namaã tabora i ngëma guxchaxügü i túmacëx íngüxü i ñoma curuchawa tipotaxürüxü tüxü íxíxëëxü, rü ngëmaëtüwa chowe tarüxüãma! ²⁴—Erü yixema tügü maxëchaxëëchaüxë rü tá tayu, natürü yixema chauxcëx yuxe rü aixcüma tá tüxü nangëxma i maxü i taguma güxü. ²⁵¿Rü tacüwa i nüxü namexü ya wüxi ya yatü ega nayauxägu i guxüma i ñoma i naãneãrü ngëmaxügü, natürü íyanatauxëëägu i norü maxü? ²⁶—Rü ngëxguma texé chauxcëx ãnegu rü

naxcèx taxānegu i chorü ore, rü choma i Tupana Nane i duüxüxü na chiixü rü tá ta tümacèx chaxāne i ngëxguma ãëxgacü chixiãcüma núma chaxüxgu. Rü ngëxguma wenaxärü núma chaxüxgu rü Chaunatü ya Tupanarüü tá chapora, rü daxüçüãx i Tupanaärü orearü ngeruügu i üünegüxürüü tá chamexëchi. 27 —Rü aixcüma pemaã nüxü chixu rü ñuxre i duüxügu i nuã ngëxmagüxü rü tá nüxü nadaugü na ñuxäcü ãëxgacü na yïixü ya Tupana naxüpa na nayuxü —ñanagürü.

Ngechuchu rü toraxü nangox
(Mt 17.1-8; Mr 9.2-8)

28 Rü 8 ga ngunexüguwena ga na yema ñaxü, rü Ngechuchu rü wüxi ga mëxpúnewa naxü na yéma yayumüxëxüçèx. Rü ínayaxümücügü ga Pedru rü Chaütüagu rü Cuatü. 29 Rü yexguma ínayumüxëyane ga Ngechuchu rü nachiwe rü ngürüächi niyauracüü, rü naxchiru rü ta niyauracüü, rü poraãcüxüchima nacómü. 30 Rü yexguma rü yéma nangox ga taxre ga yatügü ga Ngechuchumaã idexagüxü. Rü Moiché nixi ga wüxi, rü Eria nixi ga to. 31 Rü yema taxre íyexmagüxüwa rü poraãcüxüchi nangóone. Rü íindexagü nachiga ga ñuxäcü Yerucharëügu tá na nayuxü ga Ngechuchu. 32 Rü woo ga Pedru rü namücügü rü poraãcü na nayaxtaexü rü tama napee. Rü nüxü nadaugü ga ñuxäcü poraãcü na nangóonexü ga naxütawa ga Ngechuchu rü yema taxre ga yatügü ga namaã yexmagüxüxütawa. 33 Rü yexguma yema taxre ga yatügü Ngechuchuna ixigachitanügu, rü Pedru rü ñanagürü Ngechuchuxü: —Pa Ngüexëëruüx, namexëchi nixi na nuã ingëxmagüxü. ¡Rü ngixã tanaxü ya tomaëxpüx ya düxenü, rü wüxi ya cuxcèx, rü náí ya Moichéçèx, rü náí ya Eriacèx! —ñanagürü. Natürü ga Pedru rü tama nüxü nacüex ga na ñuxü ñaxü yerü poraãcü nabaixächiãë. 34 Rü yexguma íyadexayane ga Pedru, rü wüxi ga caixanexü natanügu nayangëixema. Rü poraãcü namuüë ga yema ngüexügu ga yexguma yema caixanexü natanügu yangëixemaga. 35 Rü yema caixanexüwa inanaxü ga wüxi ga naga ga ñaxü: —Daa nixi ya Chaune ya nüxü changechaüxüchicü. ¡Rü naga pexinüë! —ñaxü. 36 Rü yexguma yema ñaxguwena ga yema naga rü Ngechuchuarü ngüexügu rü taxüexüma ga toguexü nadaugü, rü Ngechuchuxüxícatama nadaugü. Rü yema ngüexügu rü taxüemaãma nüxü nixugüë ga yema nüxü nadaugüxü.

Ngechuchu rü nanamexëë ga wüxi ga bucü ga ngoxo nawa yexmacü
(Mt 17.14-21; Mr 9.14-29)

37 Rü yexguma moxüäcü ga guma mëxpúnewa yanachoügu, rü muxüma ga duüxügu yexma Ngechuchuxü nayangaugü. 38-39 Rü yema duüxügütanüwa rü wüxi ga yatü tagaãcü Ngechuchuxü ñanagürü: —Pa Ngüexëëruüx, ¡choxü rüngüxëë, rü tüxü nadau ya chaune! Erü tügümaã choxü tawüxícèx, rü wüxi i ngoxo tümawa nangëxma. Rü ngëxguma tüxü naxüxgu, rü aita tüxü naxüxëë, rü tüxü naxãüãëxëë, rü tüxü narüchiëxëë. Rü chixexü tümamaã naxü, rü tama tüxü ningéxchaü. 40 Rü marü nüxü chacèxü i curü ngüexügu na tümawa ínatëxüchigüãxüçèx i ngëma ngoxo, natürü tama nüxü inaxinü —ñanagürü. 41 Rü yexguma Ngechuchu nanangäxü, rü ñanagürü: —Pa Duüxügu i Tama Yaxögüxüx, ¡Ñuxuratá i pemaã chanuxmaxü rü yaxna pemaã cha xí-nüxü? ¡Nuã naga ya cune! —ñanagürü. 42 Natürü yexguma Ngechuchuxütawa nanguxgu ga guma bucü, rü yema ngoxo rü guma bucüxü ñaxtüanegu nayanguxëë, rü nanaxãüãëxëë. Natürü Ngechuchu nananga ga yema ngoxo, rü nanamexëë ga guma bucü. Rü ñuxüchi nanatüxütawa nanamu. 43 Rü

guxũma ga duũxũgũ rũ nabaixãchiãëgũ ga yexguma nüxũ nadaugũgu ga ñuxãcü na naporaxũ ya Tupana.

Ngechuchu rũ wenaxãrũ nanaxunagũ ga norũ yuxchiga
(Mt 17.22-23; Mr 9.30-32)

Rũ yexguma duũxũgũ namaã haixãchieyane ga yema Ngechuchu üxũ, rũ ñanagũrũ ga Ngechuchu nüxũ ga norũ ngũexũgũ: ⁴⁴ —¡Meã iperũxĩnũë i ñãã ore i pemaã nüxũ chixuxũ! ¡Rũ tãütãma nüxũ ipeyarũngũmaë! Choma i Tupana Nane na duũxũxũ chiĩxũ, rũ chauechita tá choxũ ínaxuaxũgũ i duũxũgũ na ãëxgacũgũ choxũ iyauxgũxũcëx —ñanagũrũ. ⁴⁵ Natürũ ga norũ ngũexũgũ rũ tama nüxũ nacuëxgũëga ga yema namaã nüxũ yaxuxũ. Yerũ Tupana rũ tama naxcëx nanangoxëë ga yema ore na nüxũ nacuëxgũxũcëx. Rũ yema ngũexũgũ rũ namuũë ga Ngechuchuna na nacagũxũ na meã namaã nangoxëëãxũcëx ga yema namaã nüxũ yaxuxũ.

¿Texé tá tixĩ ya guxããrũ yexera ixĩxë?
(Mt 18.1-5; Mr 9.33-37)

⁴⁶ Rũ yexguma ga norũ ngũexũgũ rũ inanaxũgũë ga nügũmaã na yaporaganũcüxũ nachiga ga texé tá tiĩxũ ya natanũwa guxããrũ yexera ixĩxë. ⁴⁷ Natürũ Ngechuchu rũ nüxũ nacuëxama ga yema norũ ngũexũgũ nagu rũxĩnũëxũ. Rũ yemacëx wũxi ga buxũ nügũxũtawã naga, rũ nügũxũtagu nayachixëë. ⁴⁸ Rũ ñanagũrũ nüxũ ga norũ ngũexũgũ: —Texé ya ñãã buxũxũ meã yaxũxe chauëgagu, rũ choxũ nixĩ i tayaxuxũ. Rũ yixema meã choxũ yaxũxe, rũ Chaunatũ ya núma choxũ mucũxũ rũ ta meã tayaxu. Rũ yixema guxããrũ yexera tũgũ írũxĩraxe, rũ yixema tixĩ ya guxããrũ yexera ixĩxë —ñanagũrũ.

Texé ya tama taxchi aixe rũ tóru ngũxëëruũ tixĩ
(Mr 9.38-40)

⁴⁹ Rũ yexguma ga Cuáũ rũ ñanagũrũ nüxũ: —Pa Ngũexëëruũx, nüxũ tadau ga wũxi ga yatũ ga cuëgagu ngoxogũ íwoxũxũ. Rũ toma nüxna tanachuxu ga yema yerũ tama tatanũxũ nixĩ ga númax —ñanagũrũ. ⁵⁰ Natürũ Ngechuchu rũ ñanagũrũ nüxũ: —Tama name i nüxna na penachuxuxũ. Erũ texé ya tama taxchi aixe, rũ tóru ngũxëëruũ tixĩ —ñanagũrũ.

Ngechuchu nayangagũ ga Chaũtiãgu rũ Cuáũ

⁵¹ Rũ yexguma marũ yangaicagu ga Ngechuchu ga daxũgũxũ ga naãnewa na naxũxũ, rũ tama namuũãcüma inaxũãchi ga Yerucharéũwa na naxũxũ. ⁵² Rũ nügũpëxegu nayamugũ ga ñuxre ga norũ orearũ ngeruũgũ. Rũ nümagũ rũ nawa naxĩ ga wũxi ga íanexãcü ga Chamãriaanewa yexmane, na yexma naxcëx yadaugũxũcëx ga wũxi ga í na Ngechuchu nagu pexũnëxũ. ⁵³ Natürũ yema Chamãriaanecũãx rũ tama nanayauxgũchaũ, yerũ nüxũ nacuëxgũ ga Yerucharéũwa tá na naxũxũ. ⁵⁴ Rũ yexguma yemaxũ nadaugũgu ga norũ ngũexũgũ ga Chaũtiãgu rũ Cuáũ, rũ ñanagũrũgũ Ngechuchuxũ: —Pa Corix, ¿cunaxwëxexũ na Tupanana naxcëx tacaxũ na daxũwa ne namuãxũcëx ya üxũ na naguxëëãxũcëx i guxũma i ñãã duũxũgũ, yema nuxcümaũcü ga Tupanaãrũ orearũ uruũ ga Ería üxũrũ? —ñanagũrũgũ. ⁵⁵ Rũ yexguma ga Ngechuchu rũ nüxũ nadawenũ, rũ nayangagũ, rũ ñanagũrũ nüxũ: —Pema rũ tama nagu perũxĩnũë na texëarũ duũxũgũ pixĩgũxũ. ⁵⁶ —Erũ choma i Tupana Nane na duũxũxũ chiĩxũ, rũ tama duũxũgũarũ tauxexëëwa núma chaxũ, natürũ núma chaxũ na duũxũgũxũ chamaxëxëëxũcëx —ñanagũrũ. Rũ yexguma rũ náĩ ga íanexãcüwa naxĩ.

*Duïxügü ga Ngechuchuwe rüixchaüxüchiga
(Mt 8.19-22)*

⁵⁷ Rü yexguma namagu naxixgu rü wüxi ga yatü Ngechuchuxü ñanagürü: —Pa Corix, cuwe charüxüxchaü i ngextá cuma ícuxüxüwa —ñanagürü. ⁵⁸ Rü Ngechuchu nanangäxü rü ñanagürü: —Ngowagi rü nüxü nangëxma i naxmaxügü, rü werigü rü nüxü nangëxma i naxchiäügü, natürü choma i Tupana Nane na duïxüxü chiïxü, rü nataxuma i chauchica i ngextá nagu chicuxeruxü —ñanagürü. ⁵⁹ Rü Ngechuchu ñanagürü nüxü ga wüxi ga to ga yatü: —¡Chowe rüxü! —ñanagürü. Natürü nüma ga yema yatü rü ñanagürü nüxü: —Pa Corix, noxri chanawëxe i chaunatüxü ichayatëxira —ñanagürü. ⁶⁰ Rü Ngechuchu nanangäxü rü ñanagürü: —Nüë ngëma cutanüxü i tama yaxögüxü iyatëxü i ngëma naxrüü yuexü, natürü cuma rü curü puracü nixü na paxa duïxügümaã nüxü cuyarüxüxü i Tupanaärü ore na ñuxäcü guxäärü äëxgacü na yïixü i nümax —ñanagürü. ⁶¹ Rü wüxi ga to ga duïxü rü ñanagürü Ngechuchuxü: —Pa Corix, ngëmäácü cuwe charüxüxchaü, natürü noxri chanaxwëxe i nüxü chayarümoxë i ngëma chopatacüäxgü —ñanagürü. ⁶² Natürü Ngechuchu rü ñanagürü nüxü: —Texé ya yixema inaxügüxe na Tupanaärü puracüwa tapuracüxü natürü tümaärü ngëmaxüguama rüxinüxë, rü tama tame na Tupanaäxü tapuracüxü —ñanagürü.

10

Ngechuchu nayamugü ga 72 ga norü ngüexügü

¹ Rü yemawena ga Cori ga Ngechuchu rü nayadexechi ga 72 ga to ga norü ngüexügü. Rü taxrechigü inayamugü na yoxni guxü ga yema iänegü rü nachicagü ga Ngechuchu nawa üxchaüxüwa na naxixücëx. ² Rü ñanagürü nüxü: —Aixcümäxüchi nangëxma i muxüchixü i duïxügü i yaxögüxchaüxü natürü ngema Tupanaärü orearü uwa puracüxü rü noxretama nixü. Rü ngëmacëx name i perü yumüxëwa nüxna peca ya yima puracüarü yora na ngema norü puracüwa namugüäxücëx i to i puracütanüxü. ³ —¡Rü ipexiächi rü ngema pexü! Rü dücax, ñoma carnerugü i aigütanüwa imugüxürütü nixü i pexü chimugüxü. ⁴ —¡Rü täütäma choca ípinge, rü bai i perü diëru, rü bai i perü chapatu! Rü tama chanaxwëxe i namagu penüxcü i ngëxguma namawa texëxü perümoxëgügu. ⁵ —Rü ngëxguma wüxi ya íwa pengugügu, rü ñaäcü tá nüxü perümoxëgü i ngëma duïxügü:

“¡Petaäxë erü Tupana rü napetanügu!”, ñaperügügü tá. ⁶ —Rü ngëxguma ngema nangëxmagu i duïxügü i Tupanaxü cuëxgüxchaüxü rü Tupana rü tá nüxna nanaxä i taäxë. Natürü ngëxguma ngema nataxuxgu i duïxügü i Tupanaxü cuëxgüxchaüxü, rü ngema Tupanaärü taäxë rü pexrütäma nixü. ⁷ —¡Rü wüxi ya ígutama perücho, rü ngema pechibüe rü peyaxü i ngëma nüxü ngëmaxü i ngëma ícüäxgü! Erü wüxi i puracütanüxü rü name nixü na nayauxäxü i norü natanü naxcëx i norü puracü. Rü yima iänewa pengëxmagüyane rü tama chanaxwëxe i náí ya ígu peyapëgü. ⁸ —Rü ngëxguma wüxi ya iäne ya nawa meã pexü nayaxunewa pengugügu, ¡rü penangó i ngëma õna i pexna naxägüxü! ⁹ —¡Rü penameëxëx i ngëma idaaweexü i yima iänewa ngëxmagüxü! ¡rü namaã nüxü pixu rü ñapegügü nüxü:

“Tupanaärü pora rü marü pexna nangaicama rü napexütägu”, ñapegügü nüxü! ¹⁰ —Natürü ega nawa pengugüga ya wüxi ya iäne i ngextá duïxügü tama meã pexü íyauxgüxüwa, ¡rü ngëma ítamügu ípechoxü rü ñapegügü nüxü i ngëma iänecüäx!:

11 “Rü woo ñaã perü ñãneãrũ üxaxũ i tocutüwa yaxũxũ, rü itanapagũ, na ngẽmawa nüxũ pecuãxũcẽx na Tupana rü tama pemaã nataãẽxũ. ¡Natürũ tama nüxũ ipeyarũngũmaẽ na marũ pexna nangaicamaxũchichirẽxũ ya Tupana na perü ãẽxgacũ yĩĩxũ”, ñaperũgũgũ tá nüxũ i ngẽma ñãneãũãx! 12 —Rü pemaã nüxũ chixu rü ngẽma ngunexũ i nagu nagũxũ i naãne, rü Chodomacũãx i duũxũgũarũ yexera Tupana tá nanapoxcue i ngẽma duũxũgũ i tama meã pexũ yauxgũxũ.

*Ñãnegũ ga tama Tupanaga ñnũẽne
(Mt 11.20-24)*

13 —Rü wũxi i ngechaũ nixĩ i pexcẽx, Pa Corachĩcũãx rü Bechaĩdacũãx i Duũxũgũx, yerũ yexguma chĩ Tiruarũ ñãnewa rü Chidãũarũ ñãnewa chanaxũxgu ga yema mexgũgũ ga cuẽxruũgũ ga Tupanaãrũ poramaã petanũwa chaxũxũ, rü woo ga na poraãcũ yachixexũ ga yema Tirucũãx rü Chidãũcũãx ga duũxũgũ rü nuxcũmama chitama nüxũ narũxoe ga nacũma ga chixexũ, rü poraãcũxũchi chima nũgũmaã nangechaũgũ rü naxauxe, yerũ chi nũgũ nicuẽxãchitanũ ga na yapedaduãxgũxũ. 14 —Natürũ pemaã nüxũ chixu rü ngẽma ngunexũ i Tupana nagu napoxcuexũ i pecaduãxgũxũ, rü ngẽma ngunexũgu rü Tirucũãx rü Chidãũcũãxãrũ yexera tá pexũ napoxcue i pemax. 15 —Rü pemax, Pa Capernãcũãxgũ i Duũxũgũx ¿ẽxna pema nagu perũxĩnũẽgu rü daxũgũxũ i naãnewa tá pexĩxũ? Pemaã nüxũ chixu rü naãnetũũwa i ngextã Tupana Chatanáxũ İpoxcuxũwa tá nixĩ i pewogũxũ. 16 Rü ñũxũchi norũ ngũexũgũxũ ñanagürũ: —Rü yĩxema pega ñnũẽxẽ, rü chauga rü ta taxĩnũẽ. Natürũ yĩxema tama pega ñnũẽxẽ, rü chauga rü ta tama taxĩnũẽ. Rü yĩxema tama chauga ñnũẽxẽ, rü tama naga taxĩnũẽ ya Chaunatũ ya núma choxũ mucũ —ñanagürũ ga Ngechuchu.

Nawoegu ga yema 72 ga Ngechucharũ ngũexũgũ

17 Rü taãẽacũma nawoegu ga yema 72 ga norũ ngũexũgũ ga yamugũxũ. Rü ñanagürũgũ nüxũ: —Pa Corix, ngẽxguma cuẽgagu tidexagũgu, rü ẽjrxũxũ i ngoxogũ rü toga naxĩnũẽ —ñanagürũgũ. 18 Rü Ngechuchu rü ñanagürũ nüxũ: —Ngẽmaãcũ aixcũma nixĩ. Yerũ nüxũ chadau ga Chataná ga daxũgũxũ ga naãnewa na nataẽxũ wũxi ga ãẽmacürũũ. 19 —Rü choma nixĩ ga pexna chanaxãxũ ga pora na tama chixexũ pemaã naxũgũxũcẽx ega woo ãxtapegũwa rü ẽxna tuxchinawegũwa pengagũgu. Rü yexgumarũũ ta pexna chanaxã ga pora na nüxũ perü yexeraxũcẽx i guxũma i Chatanáãrũ pora na ngẽmaãcũ taxucürũwama tacũ rü chixexũ pemaã naxũxũcẽx. 20 —¡Natürũ tãxũ i petaãẽgũxũ naxcẽx i ngẽma na pega naxĩnũẽxũ i ngoxogũ! Rü narũmemaẽ nixĩ i petaãẽgũ naxcẽx na marũ naxũmatũxũ i peẽga i Tupanaãrũ poperawa i daxũgũxũ i naãnewa —ñanagürũ.

*Ngechuchu rü nataãẽ
(Mt 11.25-27, 13.16-17)*

21 Rü yexgumatama ga Tupanaãẽ ga Üünexũ rü poraãcũ Ngechuchuxũ nataãẽxẽẽ. Rü ñanagürũ ga Ngechuchu: —Pa Chaunatũ, Pa Daxũgũxũ i Naãne rü Ñoma i Naãneãrũ Yorax, cuxũ chicuẽxũũ, yerũ ñaã chorũ ngũexũgũxũ nüxũ cucuẽxẽẽ i ñaã ore ga naxchaxwa iquicũxũ ga duũxũgũ i ñoma i naãnewa nüxũ cuẽxũchigũxũ. Rü yemaãcũ cunaxũ, Pa Chaunatũx yerũ yemaãcũ nixĩ ga cunaxwẽxexũ —ñanagürũ. 22 Rü ñanagürũ ga Ngechuchu: —Chaunatũ choxna nanaxã i guxũma i tacũ i ngẽxmaxũ. Rü taxũema choxũ tacuẽx na Tupana Nane chĩĩxũ. Rü Chaunatũxicatama nixĩ ya choxũ cuãcũ na

Nane chiixü. Rü ngëxgumarüü ta taxúema nüxü tacuèx na texe yiixü ya Chaunatü. Rü choma ya Nane rü ngëma duuxügü i Chaunatüxü nüxü chadauxëechaüxüxícatama nixí i nüxü cuèxgüxü na texe yiixü —ñanagürü. ²³ Rü yexguma norü ngüexügüxü nadawenü, rü namaãxíca ñanagürü: —Tataægü ya yíxema tímáxëtúmaãxüchi nüxü daugüxe i ñaã ñuxma pema nüxü pedaügüxü. ²⁴—Erü pemaã nüxü chixu, rü muxúma ga nuxcúmaügüxü ga Tupanaärü orearü uruügü rü äëxgacügü ga tacügü, rü nüxü nangúchaü ga nüxü na nadaugüchaüxü i ñaã ñuxma pema chauxútawa nüxü pedaügüxü. Natürü tama nüxü nadaugü. Rü nüxü nangúchaü ga nüxü na naxínüëchaüxü i ñaã ñuxma pema chauxútawa nüxü pexínüëxü. Natürü tama nüxü naxínüë —ñanagürü.

Ore ga mecü ga Chamáriacüãxgu ixuxü

²⁵ Rü yexguma inachi ga wüxi ga ngüexëëruü ga Moíchéarü mugüwa ngxëëtaexü, rü Ngechuchuxútawa naxü na namaã yanadexaxüçèx. Rü Ngechuchuxü naxüxchaü, rü yemacèx nüxna naca rü ñanagürü: —Pa Ngüexëëruü ya Ngechuchux, ¿Tacü nixí i mexü na chanaxüxü na choxü nangëxmaxüçèx i maxü i taguma gúxü? —ñanagürü. ²⁶ Rü Ngechuchu nanangãxü, rü ñanagürü: —¿Ñuxü ñaxü i ngëma ore i Moíchéarü mugüwa úmatüxü? ¿Rü tacüxü i cumaä yaxuxü? —ñanagürü. ²⁷ Rü yema ngüexëëruü ga Moíchéarü mugüwa ngxëëtaexü, rü Ngechuchuxü nangãxü, rü ñanagürü: —¡Nüxü nangechaü ya Cori ya curü Tupana i guxüma i curü maxümaã, rü guxü i cuãëmaã, rü guxü i curü poramaã, rü guxü i nagu curüxínüxümaã! ¡Rü nüxü nangechaü i cumücü ngëma na cugütama cungechaüxürü! —ñanagürü. ²⁸ Rü yexguma ga Ngechuchu rü ñanagürü nüxü: —Ngëma ore i choxü namaã cungãxüxü rü marü name. Rü ngëxguma ngëma ore quingüxëëxgu, rü tá cunayaxu i maxü i taguma gúxü —ñanagürü. ²⁹ Natürü ga yema ngüexëëruü ga Moíchéarü mugüwa ngxëëtaexü, rü nügüetüwa nachogüchaü. Rü yemacèx Ngechuchuna naca, rü ñanagürü: —¿Rü texé tixí ya chomücü? —ñanagürü. ³⁰ Rü yexguma ga Ngechuchu rü nanangãxü, rü ñanagürü nüxü: —Wüxi ga yatü Yerucharéüwa ne naxü, rü Yericü ga íanewa naxü. Rü namagu nüxü nangaugü ga ngítëëxgüxü. Rü guxüma ga norü yemaxüçèx nangíxgü, rü èjxrüxü ga naxchiru rü ta naxcèx nangíxgü. Rü nanaçuaixgü, rü nayayuächixëëgü, rü yemaãcü yéma nanatëxgü. ³¹ —Rü yematama namawa naxüpetü ga wüxi ga Yudíugüarü pai. Natürü yexguma yema yatüxü nadëuxgu rü nüxü yéma naxüpetümare. ³² —Rü yéma naxüpetü ta ga wüxi ga Lebítanüxü ga tupauca ga taxúnewa puracüxü. Rü yexguma yema yatüxü nadëuxgu, rü nüma rü ta nüxü naxüpetümare. ³³ —Natürü yixçüra rü wüxi ga Chamáriaanecüãx ga yatü rü yematama namawa naxüpetü. Rü yexguma guma yatüxü nadëuxgu rü nüxü nangechaütümüü. ³⁴ —Rü guma yatüçèx nixü. Rü chixü rü binumaã nanaxüxü ga norü oxrigü, rü meãma nayanëjxgü ga yema norü oxrigü. Rü ñuxüchi norü burugu nanamunagü, rü wüxi ga pegüchicawa nanaga. Rü yéma nüxna nadau. ³⁵ —Rü moxüãcü ga yexguma inaxüãchigu ga yema Chamáriaanecüãx, rü ngíxü nayaxu ga taxretachinü ga norü díëru, rü yema pegüchicaarü yorana ngíxü naxá. Rü ñanagürü nüxü:

“¡Nüxna nadau i ñaã yatü! Rü ngëxguma yexeragu naxátanügu na nuã nangëxmaxü, rü choma tá cuxü chanaxütanü i ngëxguma chataeguxgu”, ñanagürü. ³⁶ Rü ñanagürü ga Ngechuchu nüxü ga yema ngüexëëruü ga

Moïchéarü mugüwa nguxëêtaexü: —Ñuxma chanaxwëxe i chomaã nüxü quixu i ngëxüruüxü ga yema tomaëxpüxtanüwa ga aixcüma namücü ixixü ga yema yatü ga ngítëëxgüxü imëxgüxü —ñanagürü ga Ngechuchu. ³⁷ Rü yexguma ga yema ngüexëëruü ga Moïchéarü mugüwa nguxëêtaexü rü ñanagürü: —Yema Chamáriaanecüãx nixi ga yema yatümücü ixixü, yerü nüxü nangechaütümütü —ñanagürü. Rü yexguma ga Ngechuchu rü ñanagürü nüxü: —ñuxma rü ixixü rü yema Chamáriaanecüãx üxürütü naxü! —ñanagürü nüxü.

Marta rü Mariápatawa nangu ga Ngechuchu

³⁸ Rü yexguma Ngechuchu namagu ixüxgu norü ngüexügümaã rü wüxi ga ñänexäcüwa nangu. Rü yéma guma ñänexäcüwa rü wüxi ga nge ga Martagu äegacü ngügüpatawa inanguxëë. ³⁹ Rü Martaaxü iyexma ga wüxi ga ngíeyëx ga Mariágu äegacü. Rü ngíma rü Ngechuchucutüxütawa irüto na inaxinüxücëx ga Ngechucharü ore. ⁴⁰ Natürü ga Marta rü itaarü puracüãx rü yemaäcü ngírü puracüguama irüxinü. Rü yemacëx Ngechuchucëx iyaxü, rü ngígürügü nüxü: —Pa Corix, ¿tama êxna naxu curüxinü i ngëma na chataarü puracüãxü rü ngëma chaueyëx rü choxnaxica na natáãxü i guxüma i ngëma puracü? ¿Rü namaã nüxü ixu na choxü nangüxëëxücëx! —ngígürügü. ⁴¹ Natürü Ngechuchu rü ngíxü nangãxü, rü ñanagürü ngíxü: —Pa Martax, cuma rü poraäcü curü puracücëx cuxoegaãë, rü muxüma i ngëmaxügu curüxinü. ⁴² —Natürü wüxixicatama nixi i guxüärü yexera i mexü na nagu rüxinüxü. Rü María iyixi i ngëmagu rüxinücü. Rü taxüetama ngíxna tayanuxü i ngëma —ñanagürü ga Ngechuchu.

11

Ngechuchu nanangüexëë ga yumüxëchiga

(Mt 6.9-15, 7.7-11)

¹ Rü wüxicana wüxi ga nachicawa nayumüxë ga Ngechuchu. Rü yexguma nüxü nachauxgu, rü wüxi ga norü ngüexü rü ñanagürü nüxü: —Pa Corix ¿toxü nangüexëë na ñuxäcü tayumüxëgüxü, yema Cuáü ga baiüxëëruü norü ngüexügüxü nangüexëëxürütü! —ñanagürü. ² Rü Ngechuchu ñanagürü nüxü: —Rü ngëxguma peyumüxëgügu rü ñaperügügü tá:

“Pa Tonatü ya Daxügücüx, rü aixcüma Üñecü quixi i cumax. ¿Rü núma naxü na torü äëxgacü quiixücëx! Rü tanaxwëxe i curü ngüchaü na naxügüxü i duüxügü i ñoma i naãnewa, ngëma daxügüxü i naãnewa na curü ngüchaü inaxügüxürütü. ³ ¿Rü toxna naxä i torü ñna i wüxichigü i ngunexücëx ixixü! ⁴ ¿Rü toxü nüxü nangechaü i torü pecadugü, erü toma rü ta tüxü nüxü tangechaü ya guxäma ya yixema chixri tomaã chopetüxe! ¿Rü täxü i ¿tacü rü chixexüpëxewa toxü cuwogüxü na tama nagu tayixücëx!”

ñanagürü. ⁵ Rü ñanagürü ta ga Ngechuchu: —Ngëxguma chi wüxie i pema rü tüxü nangëmaxgu i wüxi i tümamücü, rü chi ngäxücüü napatawa taxüxgu rü ñatagügu nüxü:

“Pa Chomücüx, ¿tomaëxpüx i päü choxna naxä! ⁶ —Erü wüxi i chomücü rü yaxüwa ne naxü, rü ngexwacëx chopatawa nangu. Rü choma rü changearü ñnaãx, rü taxuümaãma chanachibüxëëega”, ñatagügu. ⁷ —Rü ngëma tümamücü i napatawa ngëmaxü, rü chi tüxü nangäüxgu rü ñaxgu:

“¿Täxü i choxü cuchixewexü! Chorü ñax rü marü narüwäxta, rü choma rü chauxacügü rü ngürücarewa tangëxmagü. Rü ngëmacëx taxucürüwa ícharüda na ¿tacü cuxna na chaxäxücëx”, ñaxgu chi tüxü. ⁸ —Rü pemaã nüxü chixu,

rü ngêma na tümamücü yîixüçèx rü tãütãma Ìnarüda na tacü tüxna naxãxüçèx. Natürü tá Ìnarüda na tama tanachixeweechaxüçèx, rü tá tüxna nanaxã i guxüma i tacü i tanaxwèxèxü. ⁹—Rü ngêmacèx pemaã nüxü chixu rü, ¡Naxcèx ìpeça rü Tupana rü tá pexna nanaxã! ¡Rü Tupanacèx pedèux rü tá nüxü ìpeyangau! ¡Rü Ìãxwa: Tu tu tu ñapegü, rü tá pexcèx niwãxna i Ìãx! ¹⁰—Erü guxãma ya yixema naxcèx Ìçaxe rü tanayaxu, rü guxãma ya naxcèx dauxe rü nüxü itayangau. Rü guxãma ya Ìãxwa: Tu tu tu ñagüxe, rü tümacèx tá niwãxna i Ìãx. ¹¹—¿Rü ñuxãcü i wüxi i pema na papágü pîixü rü penena penaxãxü ya wüxi ya nuta ega pãucèx pexna nacaxgu, rü êxna wüxi i äxtape ega choxnicèx pexna nacaxgu? ¹²—¿Rü texé i petanüwa rü penena penaxã i tuxchinawe ega wüxi ya otacharaüçèx pexna nacaxgu? ¹³—Rü ngêma pema na pichixecümachiréxü natürü nüxü pecuèx na ñuxãcü mexü i ãmare pexacügüna na pexãxü, rü pemaã nüxü chixu rü Penatü ya Daxügücü rü perü yexera tá nixü na pexna mexü naxãxü. Rü guxãma ya yixema Tupanaxütawa Naãe i Üünexüçèx Ìçaxe, rü tá tüxna nanaxã —ñanagürü ga Ngechuchu.

Ngechuchuxü nixugü na ngoxoarü poramaã napuracüxü nawogüe
(Mt 12.22-30; Mr 3.20-27)

¹⁴ Rü Ngechuchu Ìnanatèxüchi ga wüxi ga ngoxo ga wüxi ga yatüxü nge-gaxèèxü. Rü yexguma Ìnaxüüxgu ga yema ngoxo rü guma yatü rü nidexa. Rü guxüma ga duüxügü rü nabaixãchiãègü ga yexguma yemaxü nadaugügu. ¹⁵ Natürü ñuxre ga duüxügü rü ñanagürügü: —Ñãã yatü i Ngechuchu, rü Behebü i ngoxogüarü äëxgacüarü poramaã nixü i Ìnanawoxüãxü i ngoxogü —ñanagürügü. ¹⁶ Natürü ga togü rü nüxü naxügüchaü, rü yemacèx naxcèx Ìnacagü ga nüxü na nawéaxü ga wüxi ga cuèxruü ga daxüçüãx na yemawa nüxü nacuèxgüxüçèx rü ngoxi aixcüma Cristu yî. ¹⁷ Natürü nüma ga Ngechuchu rü nüxü nacuèxama ga tacügu na naxïnüèxü, rü yemacèx ñanagürü nüxü: —Ngëxguma chi wüxi i nachüãnecüãx i duüxügü nügü itoyegu rü nügütanüwa chitama nügü nadaixgu, rü nügü chitama naguxèè. Rü ngëxguma chi wüxi ya Ìçüãx nügümaã nuèèchagu rü nügü nadaixgu, rü nügü chitama naguxèè. ¹⁸—¿Rü ngëxguma chi Chataná nügümaãtama nuxgu, rü nügütama yamèxgu, rü ñuxãcü chi i äëxgacüecha yîixü? Rü ngêma ñacharügü i ñuxma erü pema choxü pixuxgu rü Behebüarü poramaã Ìchanawoxü i ngoxogü. ¹⁹—Natürü ngëxguma chi Chatanáãrü poramaã Ìchanawoxügu i ngoxogü, rü perü ngüexügü rü chita Chatanáãrü poramaã Ìnanawoxü i ngoxogü. Rü ngêmaawa meã nüxü tacuèx na pema rü ìpetüèxü. ²⁰—Natürü pemaã nüxü chixu rü aixcüma Tupanaãrü poramaã nixü i Ìchanawoxüxü i ngoxogü. Rü ngêmaawa pexü nüxü chachuèè na nüma petanüwa nanguxü ya Tupana na äëxgacü yîixüçèx. ²¹—Rü ngëxguma wüxi ya yatü ya poracü rü meãma nügü naxüxnegu rü nüxna nadèuxgu ya napata, rü taxüetãma naxcèx tangüx i norü ngêmaxü i napatawa ngëxmaxü. ²²—Natürü ngëxguma Ìnanguxgu i to i yatü i nüxü rüporamaèxü, rü nüxü nayexeragu, rü tá nüxna nanapuxü ya naxne ya nügü namaã Ìnaporaãxüne, rü tá nüxna nanapuxü i guxüma i norü ngêmaxü, rü tá nayana. ²³—Yixema tama choxü ngechaüxè rü chauxchi taxai. Rü yixema tama choxü rüngüxèèxè na Tupanacèx tayagagüxü i duüxügü rü chauxchawa tanangianèxè.

ngoxo i taeguxüchiga
(Mt 12.43-45)

24 —Rü ngëxguma wüxi i ngoxo rü wüxi ya yatüwa ínaxüüxgu, rü daux-chitagu nanañaãne, rü naxcëx nadau na ngextá na nangüxü. Rü ngëxguma taxuguma nangüëgagu, rü nügü ínicuëx rü ñanagürü:

“Maneca naxcëx tá chataegu ya yima yatü ga noxri nawa íchaxüxüchirécü”, ñanagürü. 25 —Rü ngëxguma nataegugu, rü yima yatüxü inayangau na ñoma wüxi ya í ya mexëne rü meã nabixichinerüü na yíxü. 26 —Rü ínixü rü naxcëx nayadau i to i 7 i ngoxogü i norü yexera i chixexü. Rü guxüma i ngëma ngoxogü rü wüxigu yima yatügu nachocu, rü ngëxma naxächüügü. Rü ngëxguma ya yima yatü rü noxriarü yexera nachixe —ñanagürü.

Taaë i aixcüma ixüüchiga

27 Rü yemaxü íyaxuyane, rü wüxi ga ngecü rü duüxügütanüwa tagaãcü ngígürügü: —Tataãe ya yíxema tügüanüwa cuxü yaxëxë rü tügü nixüwa cuxü maixë —ngígürügü. 28 Natürü ga Ngechuchu rü ñanagürü: —Yexeraãcü tataãe ya yíxema nüxü íñüxë i Tupanaärü ore rü naga íñüxë —ñanagürü.

Duüxügü ga tama yaxögüchaüxü rü naxcëx ínacagüama ga to ga cuëxruü ga Tupanaärü poramaã üxü (Mt 12.38-42; Mr 8.12)

29 Rü nimuëtanü ga duüxügü ga Ngechuchuxütawa ngutaquëxegüxü. Rü inanaxügü ga Ngechuchu ga namaã na yadexaxü. Rü ñanagürü: —Ñaa duüxügü i ñomaücüü maxëxü rü nichixecüma. Rü naxcëx ínacagü i wüxi i cuëxruü i mexü i Tupanaärü poramaã üxü. Natürü Tupana rü wüxixicatama i cuëxruü tá nüxü nawëx. Rü ngëma nixí i cuëxruü ga Tupanaärü orearü uruü ga Yonáwa duüxügüxü nawëxü na nüxü nacuëxgüxüxcëx na aixcüma Tupana yíxü ga guma yéma namucü. 30 —Rü yexgumarüü ga Yoná rü wüxi ga cuëxruü nixí naxcëx ga Níñibecüãx ga duüxügü, rü ngëxgumarüü tá ta nixí ya Tupana Nane ga duüxüxü íxícü na wüxi i cuëxruü tá yíxü naxcëx i ñomaücüü maxëxü i duüxügü. 31 —Rü ngëxguma naãneärü guxgu rü Tupana rü ñomaücüü maxëxü i duüxügüna nacëxgu i norü pecaduchigacëx, rü ngíma ga nuxcümaücü ga Chabaaneärü äëxgacü tá írúda rü tá ínanaxuaxü i ñomaücüü maxëxü i duüxügü. Yerü ngíma rü yaxüwaxüchi ne ixü ga na äëxgacü ga Charumóüxü naxíñüxüxcëx ga ñuxäcü poraãcü nüxü na nacuëxüchixü. Natürü ñuxma nuã petanüwa nangëxma i wüxi i Charumóüärü yexera íxícü. 32 —Rü ngëxguma naãneärü guxgu rü Tupana rü ñomaücüü maxëxü i duüxügüna nacëxgu norü pecaduchigacëx, rü nuxcümaügüxü ga Níñibecüãx ga duüxügü rü tá ínarüdagü rü tá ínanaxuaxügü i ñomaücüü maxëxü i duüxügü. Yerü nümagü ga Níñibecüãxgü ga duüxügü rü nüxü narüxoe ga nacümagü ga chixexü ga yexguma Yoná namaã nüxü íxuxgu ga Tupanaärü ore. Natürü ñuxma nuã petanüwa nangëxma i wüxi i Yonáärü yexera íxíxü.

Taxüneärü omüchiga (Mt 5.15, 6.22-23)

33 —Taxüema wüxi i omüwa tanangixichi rü ñuxüchi itayacux rü ëxna ñacütüügu tayaxücuchi. Natürü norü üchicaügu tanaxünagü na ngema tüxü nabaxixüxcëx ya yíxema duüxëgü ya yima ígu chocuxe. 34 —Cuxetügü rü ñoma wüxi i omürüü nixí i cuxunecëx. Rü ngëxguma ngëma Tupana cuxü nawëxëxüxcëx cudëuxgu, rü guxüma i curü maxü rü name. Natürü ngëxguma ñoma i naãneärü ngüchaüxcëx cudëuxgu, rü guxüma i curü maxü rü chixexüwa nangëxma. 35 —¡Meã cügüna nadau na tama eãnexüxü nanguxuchixüxcëx i ngëma ore i mexü i cuxü ngëxmaxü, i ñoma wüxi i omürüü íxíxü!

36 —Ngëxguma chi guxü i curü maxüwa nangëxmagu i Tupanaärü ngóonexü rü taxuwama nachixëxgu i curü maxü, rü meã chi nüxü cucuëx i Tupanaärü ngüchaü ñoma wüxi i omü i cuxü baxixürüü —ñanagürü.

Ngechuchu rü duüxügütanüwa ñnaxuaxü ga Parichéugü rü ngüxëëruügu ga Moïchéarü mugüwa nguxëëtaegüxü

(Mt 23.1-36; Mr 12.38-40; Lc 20.45-47)

37 Rü yexguma nüxü nachauxgu ga na yadexaxü ga Ngechuchu rü wüxi ga Parichéu nüxna naxu ga napatawa na yachibüxücëx. Rü yema Parichéupatawa naxü, rü mechawa nayarüto. 38 Rü yema Parichéu rü nabaixachiãë ga yexguma Ngechuchuxü nadëuxgu na tama yanguxëëãxü ga yema Moïchéarü mu na nayauxmëxgüxiraxü ga yexguma nachibüëgu. 39 Natürü nüma ga Cori ga Ngechuchu rü ñanagürü nüxü: —Pema i Parichéugü rü ñoma pochiyu rü poratu i düxétüwaxicatama iyaxuxürüü pixigü. Natürü i peãëwa rü nagu perüxünüë na pengixü rü chixexü pexüxü. 40 —Pa Naëchitamare Maxëxüx, çtama ëxna nüxü pecuë i na guma Tupana ga naxücü i ngëma tóru düxétüxüñewa ngëxmaxü, rü gumatama yüxü ga naxücü ga tóru maxü i tóru aixepewa ngëxmaxü? 41 —Rü name nixü i Tupanana penaxã i perü maxü na aixcüma naxcëx pemaxëxücëx. Rü ngëmaãcü tá pime i guxüwama. 42 —Natürü wüxi i ngechaü nixü i pexcëx, Pa Parichéugüx, erü pema rü perü ngëmaxüwa rü meã Tupanana penaxã i ngëma noxrü ixixü, natürü perü maxüwa rü tama aixcüma naga pexinüë rü tama nüxü pengechaü. Rü marü name na perü ngëmaxüwa Tupanana penaxãü i ngëma noxrü ixixü. Natürü perü maxüwa rü ta penaxwëxe i meã naga na pexinüëxü rü nüxü na pengechaüxü. 43 —Rü wüxi i ngechaü nixü i pexcëx, Pa Parichéugüx, erü pema rü pexü nangüchaü i ãëxgacüchicagüwa na perütogüxü i ngutaquëxepataügüwa. Rü penaxwëxe na ñoma ãëxgacüxü rümoxëxürüü na meã pexü namoxëgüxü i duüxügü i itamügüwa. 44 —Rü wüxi i ngechaü nixü i pexcëx, erü ñoma yuetamaügü i tama nüxü idauxü i duüxügü naëchitamare naëtüwa chopetüxürüü pixigü. Erü woo perü düxétüwa pime, natürü aixepewa i peãëwa rü poraãcü pichixe —ñanagürü ga Ngechuchu. 45 Rü wüxi ga ngüxëëruü ga Moïchéarü mugüwa nguxëëtaexü, rü Ngechuchuxü nangãxü rü ñanagürü: —Pa Ngüxëëruü Pa Ngechuchux, rü ngëma na ngëma ñacuxü, rü toma rü toãëwa nangux —ñanagürü. 46 Natürü Ngechuchu rü ñanagürü nüxü: —Wüxi i ngechaü nixü i pexcëx, Pa Ngüxëëruüügü i Moïchéarü Mugüwa Nguxëëtaegüxüx, erü poraãcü penamu i duüxügü na naga naxinüëxücëx i ngëma Moïchéarü mugü i guxchaxü i pematama bai i írarüwa naga pexinüëchaüxü. 47 —Rü wüxi i ngechaü nixü i pexcëx, erü peyamexëëgü i tümamaügü ga guxema nuxcümaügüxe ga Tupanaärü orearü uruügü ga perü oxigü tüxü deïxe. 48 —Rü ngëmawa nüxü tacuë i na pema rü ta ipexãgüxü nawa ga yema chixexü ga perü oxigü ügüxü. Yerü númagü rü tüxü nadai ga guxema Tupanaärü orearü uruügü, rü ñuxma i pema rü peyamexëëgü i tümamaügü. 49 —Rü yemacëx nixü ga Tupana ga ñaxü:

“Ngëma duüxügütanüwa tá chanamugü i chorü orearü uruügü rü chorü orearü ngeruügü. Natürü ngëma duüxügü i chixexügü rü tá nanadai i nümaxü rü togüxü rü tá nachixewegü rü tá nawe ningëxütanü”,

ñaxü ga Tupana. 50-51 Rü ñanagürü ga Ngechuchu: —Rü pemaã nüxü chixu rü Tupana tá nayapeguãchixëë i pema i ñuxma maxëxë erü pema rü ta perü oxigücümagu pexü. Númagü rü noxritama naãneärü ügügumama rü nanadai ga muxüma ga Tupanaärü orearü uruügü. Rü nüxüra nayamëxgü

ga Abé rü gumawena nayadaietanü ga muxüma ga togü ñuxmata Zacaría ga tupauca ga taxünegu yamëxgüäcüwa nangu. Rü guxüma ga yema orearü uruüügü ga perü oxigü dëixüçëx rü Tupana tá pexna naca, erü pema rü ta perü oxigürüütama pixüügü rü tama nüxü perüxoechaü i ngëma chixëxü i pexüxü. ⁵² —Rü wüxi i ngechaü nixi i pexçëx, Pa Ngüexëëruügü i Moïchéarü Mugüwa Nguxëëtaegüxüx, erü duüxügüchaxwa ipeyacux i Tupanaärü ore i aixcüma ixixü i pematama tama pixögüxü. Rü nüxna penachuxu i togü i duüxügü i aixcüma yaxögüchaüxü na nümagü rü ta tama yaxögüäxüçëx —ñanagürü ga Ngechuchu. ⁵³⁻⁵⁴ Rü yexguma Ngechuchu yema ñaxgu, rü yema ngüexëëruügü ga Moïchéarü mugüwa nguxëëtaegüxü rü yema Parichéugü rü poraäcü Ngechuchumaã nanuë. Rü inanaxügü ga nüxna na nacagüexü naxçëx ga muxüma ga ore ga guxchaxümaã na yemaäcü chi nüxü iyangaugüxüçëx ga ore ga chixexü na yemaã norü äëxgacügüxü- tawa Ngechuchuxü íyaxuaxügüxüçëx.

12

Ngechuchu nanangüexëë na tama namexü na duüxügüpëxewa meã imaxnetaxü natürü taãëwa rü chixexügu rüxñnüxü

¹ Rü yoxni yexma nangutaquëxegü ga muxüchixü ga duüxügü. Rü yema na namuxüchixüçëx rü düxwa nügücutüwa ningagüetanü ga duüxügü. Rü Ngechuchu inanaxügü ga norü ngüexügümaãxira na yadexaxü, rü ñanagürü: —¡Pexuãëgü naxçëx i Parichéugü! Erü duüxügüpëxewa meã namaxënetata natürü naãëwa rü chixexügu narüxñnüë. ² —Natürü guxüma i ñacü i wüxie cúacü üxü rü tá nangoxoma. Rü guxüma i ñacü iicüxü rü yixcüra rü tá duüxügü nüxü nacüxgüama. ³ —Rü ngëmacëx guxüma i ngëma ore i ëänexüwa cúacü nüxü pixuxü rü yixcüra rü tá nangoxoma rü guxü i duüxügü tá nüxü naxñnüë. Rü ngëma ore i ucapuarü aixepewa cúacü nüxü pixuxü, rü yixcüra rü guxäpëxewa tá nüxü nixugügü i duüxügü.

Name nixi na Tupanaxü pemuüëxü (Mt 10.26.31)

⁴ —Rü ngëmacëx i pemax, Pa Chomücügüx, rü pemaã nüxü chixu rü ñtama nüxü pemuüë i ngëma duüxügü i pexü daixchaüxü! Erü taxünexüxicatama nimëxgü, natürü taxucürüwama taãëxü nimëxgü. ⁵ —Natürü pemaã tá nüxü chixu na texëxü tá na pemuüëxü. ¡Nüxü pemuüë ya Tupana! Erü nüma nüxü nangëxma i pora na yamaãxü i pexene, rü napoxcuãxü i peãë i ngextá ngoxogüxü inapoxcuxügu. ¡Rü yimaxü tá nixi i pemuüëxü! ⁶ —¿Tama ëxna taxretachinü i diëruacügu namaã petaxe i wüximëxpüx i werixacügü? Natürü Tupana rü tama tüxü inayarüngüma ya yixema werixacüãxgü, rü bai ya wüxi. ⁷ —Rü woo i peyaegü rü Tupana nüxü nacüex na ñuxre i peyae ngëxmaxü. Rü ngëmacëx, ñtäxü i pexoegaãëgüxü! Erü pema rü muxüma i werixacügüarü yexeraxüchi pexü nangechaü ya Tupana.

Yixema duüxügüpëxewa tügü ixuxe na Ngechuchu ya Cristuarü duüxü tiixü (Mt 10.32-33, 12.32)

⁸ —Rü pemaã nüxü chixu rü guxäma ya texé i ñoma i naãnewa duüxügüpëxewa tügü ixuxe na chorü duüxü tiixü, rü choma i Tupana Nane na duüxüxü chiixü, rü napëxewa i Tupanaärü orearü ngeruügü i daxüçüãx rü tá tüxü chixu na chorü duüxü tiixü i tümax. ⁹ —Natürü texé ya ñoma i naãnewa duüxügüpëxewa tügü ixuxe na tama chorü duüxü tiixü, rü choma

rü tá ta napëxewa i Tupanaärü orearü ngeruügü i daxüçüâx rü tá tüxü chixu na tama chorü duüxü tiixü i tümax. ¹⁰—Rü guxāma ya texé ya chixri chauchiga idexaxe i choma i Tupana Nane na duüxüxü chiixü, rü Tupana tá tüxü nüxü nangechaü i ngēma. Natürü texé ya Tupanaāē i Üünexüchiga chixri idexaxe, rü Tupana rü täütāma tüxü nüxü nangechaü i ngēma. ¹¹—Rü ngëxguma duüxügü ngutaqëxepataüguwa rü éxna äëxgacügüpëxewa pexü nagagügu na pexü napoxcuexüçëx, rü jtāxü i pexoegaäëgüxü na tacümaā tá penangāxüxü rü éxna tacüxü tá namaā na pixuxü! ¹²—Erü ngëxguma nawa nanguxgu na pidexagüxü, rü Tupanaāē i Üünexü tá pexü nanguxëē na tacüxü tá namaā pixuxü —ñanagürü ga Ngechuchu.

Wüxi i äücümaxü nixi na imuärü dïeruäxü

¹³ Rü yema duüxügütanüwa rü wüxi ga yatü Ngechuchuxü ñanagürü: —Pa Ngüexëëruüx, jnamaā nüxü ixu ya chaueneë rü choxna naxāā i ngēma chau-natü ga yucüarü ngëmaxü i choxna üxü! —ñanagürü. ¹⁴ Natürü Ngechuchu rü ñanagürü nüxü: —Pa Yatüx, çtexé perü äëxgacüxü choxü tingucuchixëē na chatoyexüçëx i ngēma penatüarü ngëmaxü? —ñanagürü. ¹⁵ Rü ñanagürü ta ga Ngechuchu: —jPexuāē na tama pexü nangüchaüxüçëx i togüarü ngëmaxü! Erü wüxi i duüxü rü tama ngēma na namuärü ngëmaxüäxüçëx nixi i nayauxāxü i norü maxü i taguma güxü —ñanagürü. ¹⁶ Rü yexguma wüxi ga ore ga cuëxruüxü namaā nixu, rü ñanagürü: —Nayexma ga wüxi ga yatü ga muärü dïeruäçü, rü guxüma ga yema nanetügü ga naānegu natogüxü rü meāma nüxü nixo. ¹⁷—Rü guma yatü rü nagu narüxünü rü naāëwa ñanagürü:

“çTacü tá chaxüxü i ñuxmax? Erü nataxuma i chorü nachica i ngexta namaā na changüxüxü i chaunetügüarü o”, ñanagürü. ¹⁸—Rü naāëwa ñanagürü:

“Marü nüxü chacuëx na tacü tá chaxüxü. Rü nagu tá chapogü ya guxünema ya chorü ipatagü ga nagu namaā changüxüne ga chaunetügüarü o. Rü nái ya taxüragüne tá chaxü na ngëxma namaā changüxüçëx i guxüma i chaunetügüarü o rü guxüma i chorü ngëmaxügü. ¹⁹—Rü ngëxguma marü namexgu i guxüma, rü chaugümaā tá ñacharügü: ‘Ñuxma rü tá icharüngü rü meā tá chachibü rü meā chaxaxe rü ngëmaäçü tá chataāë. Erü namuxüchi i chorü ngëmaxügü, rü mucüma ya taunecü tá choxü natai’, ñacharügü tá chaugümaā”. ²⁰—Natürü Tupana rü ñanagürü guma yatüxü:

“Pa Yatüx, cungëäëmare i cuma erü ñoma i chütaxügu tátama cuyu. Rü ngēma curü ngëmaxügü i namaā cungüxüxü, rü çtexéarü tá nixi i ngëxguma?” ñanagürü ga Tupana. ²¹—Rü ngëxgumarüü tá na namaā nangupetü i ngēma duüxügü i nügüçëxtama norü ngëmaxügümaä nguxüxü rü tama nügü imexëëxü i Tupanapëxewa —ñanagürü ga Ngechuchu.

Tupana rü naxäçügüna nadau

(Mt 6.25-34)

²² Rü yemawena rü norü ngüexügüxü ñanagürü ga Ngechuchu: —Pemaā nüxü chixu jrü täxü i pexoegaäëgüxü naxçëx i tacü tá na pengöxü rü tacümaā tá na pixāxchiruxü! ²³—Erü perü maxü rü önaärü yexera nixi, rü pexene rü naxchiruarü yexera nixi. ²⁴—jDüçëx penangugü i werigü i tama toegüchiréxü, rü tama nanetüarü o ibuxgüxü, rü ngepatagüxü na ngexta namaā nangüxügüçëx i norü öna! Natürü Tupana rü nanaxüwemü. Rü pema rü Tupanacëx rü poraäçü guxüma i werigüarü yexera pixigü. ²⁵—Rü taxuwama name na pexoegaäëgüxü. Erü taxucürüwama wüxie i pema rü pegütama ipemëxächixëë ngāxü ya metruugu ega woo poraäçü naxçëx

pexoegaãëgügu. ²⁶—Rü ngëxguma tama pemaã nanguxü i ngëma íraxü rü taxucürüwama pegütama ipemëxächixëë ega woo naxcëx pexoegaãëgügu, rü çtùxcüü i ngëxguma rü ta tacü i togü i ngëmaxügcëx pexoegaãëgüxü? ²⁷—jDüçëx penangügü i putüragü na ñuxäcü nayaexü i nachacu! Rü tama napuracüexü, rü tama nügü üxchirugüxü. Natürü woo guma äëxgacü ga Charumóu ga na namëxëchixü ga naxchiru rü taguma wüxi ga putürachacuärü mexürüü nixi. ²⁸—Rü marü nüxü pedau i ñuxäcü Tupana na nangëxäëxü i putüragü i ñuxma naãnewa rüxügümarexü natürü moxü rü marü taxuxü. Rü ngëxguma Tupana ngëmaäcü nangëxäëgu i putüragü rü pema rü tá ngëmaärü yexera pexchiru pexna naxä, Pa Duüxügü i Írarüwatama Yaxögüxü. ²⁹—Rü ngëmacëx tama name i pexoegaãë naxcëx i tacü tá na pengöxü rü tacü tá na pixaxüxü. ³⁰—Erü ñoma i naãnecüäx i duüxügü rü naxcëx nadaugü i guxüma i ngëma pemaã nüxü chixuxü. Natürü pema rü pexü nangëxma ya Penatü ya Tupana ya nüëchama nüxü cuäcü na pexü nataxuxü i guxüma i ngëma. ³¹—Rü ngëmacëx narümemaë nixi na Tupanaärü ngüchaüçëx pedaugüxü na perü äëxgacü yíixüçëx. Rü ñuxüchi nüma rü tá pexna nanaxä i guxüma i tacü i pexü taxuxü.

Ñuxäcü tüxü nangëxma i törü ngëmaxügü i daxügüxü i naãnewa (Mt 6.19-21)

³²—jTäxü i pemuëxü, Pa Chauxacügüx! Pema rü noxretama pixügü natürü Penatü ya Tupana rü norü ngüchaü nixi na pexna naxäaxü i pechica i ngextá nüma äëxgacü íyíxüwa. ³³—jRü namaã petaxe i perü ngëmaxügü rü togü i duüxügü i nüxü nataxuxüna penaxä i ngëma díeru! Rü ngëmaäcü tá pegüxü penangëxmaxëë i perü ngëmaxügü i taguma pexü ngauxü rü taguma gúxü i daxügüxü i naãnewa i ngextá tama íyaxücuxüwa i ngítëxáxü rü naweane tama ínachixëxëxüwa. ³⁴—Erü ngextá ínangëxmaxüwa i perü ngëmaxügü, rü ngëxma nixi i perüxínüëxü.

Name nixi i yigü ítamëxëgü naxüpa na ínanguxü ya Cristu

³⁵—jRü ípememare namaã i perü omügü i naígüxü! ³⁶—Rü name nixi i wüxi i coriarü duüxügü i ímemaregüxürüü na pixügüxü. Rü penaxwëxe na ñoma duüxügü i íäxwa norü corixü nanguxëëgüxürüü na pixügüxü. Rü ngëxguma norü cori rü wüxi i ngígüarü petawa ne naxüxgu rü: Tu tu tu ñaxgu, rü paxa naxcëx nayawäxnagü i íäx. ³⁷—Rü nataãëgü i ngëma coriarü duüxügü ega inadauegu i ngëxguma ínanguxgu i norü cori. Rü pemaã nüxü chixu rü ngëma cori rü norü mechawa tátama nanatogüxëë i ngëma norü duüxügü i nüxü ínanguxëëgüxü, rü nüma tátama ngëma norü duüxügüxü inaxüwemü. ³⁸—Rü woo ngäxüçüü ínanguxgu rü ëxna marü yangunëchaügu rü nataãëgü i ngëma coriarü duüxügü ega inadauegu i ngëxguma ínanguxgu i norü cori. ³⁹—Rü ngëxguma chi wüxi ya íärü yora nüxü cuëxgu na ñuxguacü ínanguégaxü i ngítëxáxü, rü täu chima nape. Rü chi nüxna nadau ya napata na tama yawäxnaãxüçëx rü tama na nüxü nangüxüçëx. ⁴⁰—Rü pema rü ta penaxwëxe na ípememarexü. Erü ngürüächí tama nagu íperüxínüëyane tá íchangu i choma i Tupana Nane na duüxüxü chíxü —ñanagürü ga Ngechuchu.

Wüxi ga duüxü ga meã norü coriga ínüxü rü to ga tama meã norü coriga ínüxüchiga

(Mt 24.45-51)

⁴¹ Rü yexguma ga Pedru rü Ngechuchuna naca rü ñanagürü: —Pa Corix, çtoxcëxícatama ëxna nixi i ñaã ore i cuëxruü i tomaã nüxü quixuxü, rü ëxna

guxü i duüxügücèx yïixü? —ñanagürü. ⁴² Rû ñanagürü ga Cori ga Ngechuchu: —¿Texé tiixü ya yíxema túmaärü coriarü duüxé ya aixcüma yanguxéxé rü meã túmaãèxü cuáxe? ¿Tama éxna yíxema tiixü ya túmaärü cori túxna ágaxe na meã nüxna tadauxüçèx rü meã oragu tanachibüexèèxüçèx i norü duüxügü? ⁴³ —Rü tataãe ya yíxema coriarü duüxé i ngëxguma ínanguxgu i túmaärü cori rü túxü íyanguéügu na meãma ítanaxüxü i ngëma puracü i nagu túxü namuxü. ⁴⁴ —Rü aixcüma pemaã nüxü chixu rü ngëma túmaärü cori rü tá guxüma i norü ngëmaxügüarü dauruüxü tá túxü nixixèè. ⁴⁵⁻⁴⁶ —Natürü ngëxguma chi ngëma duüxü nagu rüxínügu rü norü cori rü tama paxa na ínanguxü, rü inaxügüägu na chixri namuãxü i natanüxügü i yatüxügü rü ngexügü, rü peta naxüxgu rü nachibüxgu, rü naxaxegu, rü nügü nangãxéègu, rü ngürüächi ngëma ngunexü rü ngëma ora i tama nagu ínanguxéèãxügu tá íngu i norü cori. Rü poraãcüxüchi tá nanapoxcu ngëma duüxügü i tama norü coriga ínüèxüxü napoxcuexürüü. ⁴⁷ —Rü ngëma coriarü duüxü i nüxü cuèxchirèxü na tacü nanaxwèxèxü i norü cori, natürü tama nügü ímexèèxü rü tama norü coriga ínüxü, rü tá poraãcü nanaçuaxi. ⁴⁸ —Natürü ngëma coriarü duüxü i tama nüxü nacuããcüma chixri norü coriga ínüxü, rü chixexü üxü, rü tá írarüwaxüra nanaçuaxi. Rü texé ya Tupana muxüma túxna äxè, rü muxüçéxtama túxna naca. Rü texé ya muxüna túxü nadauxéxé rü tá yexeraãcü túxna naca.

Ngechuchugagu nixí i yatoyexü i duüxügü
(Mt 10.34-36)

⁴⁹ —Núma chaxü na ñoma i naãnewa duüxügüxü chidauchitanüxèèxüçèx. Rü chierü aixcüma marü yadauchitanügu. ⁵⁰ —Rü choma rü tá poraãcü ngüxü chinge, rü chanaxixächiãè ñuxmatáta yangu i ngëma. ⁵¹ —Rü tama name i nagu perüxínüè na núma chaxüxü na guxü i duüxügü rü wüxigu naxínüèxüçèx. Natürü pemaã nüxü chixu rü núma chaxü na chaugagu yatoyexüçèx i duüxügü. ⁵² —Erü ñaãwena ega wüxi ya ípatawa nangëxmagu i wüximéèxpüx i duüxügü, rü tomaèxpüx tá choxü nayaxögü rü taxre i tama, rü éxna taxre tá choxü nayaxögü rü tomaèxpüx i tama. ⁵³ —Rü wüxi i papá tá nayaxö rü nane rü täütáma nayaxö, rü éxna nane tá nayaxö natürü nanatü i tama. Rü ngëxgumarüü ta wüxi i mamá tá iyaxö rü ngíxãcü rü täütáma iyaxöxchãü, rü éxna ngíxãcü tá iyaxö rü ngíè rü täütáma iyaxöxchãü. Rü wüxi ya ngíxè tá iyaxö rü ngíneãx rü täütáma iyaxö, rü éxna ngíneãx tá iyaxö rü ngíxè rü täütáma iyaxö —ñanagürü ga Ngechuchu.

Cuèxruügü i nachiga i tacü tá nangupetüxü
(Mt 16.1-4; Mr 8.11-13)

⁵⁴ Rû Ngechuchu ñanagürü ta nüxü ga duüxügü: —Ngëxguma nüxü pedèuxgu na naxèächianexü, rü nagu perüxínüè tá na napuxü. Rü aixcüma ngëmaãcü nixí. ⁵⁵ —Rü pema nüxü pecuèx na ñuxãcü penangugüxü ya buanecü, rü ngëmaãcü nüxü pecuèx rü tá na nanguxetüxü. Rü aixcüma ngëmaãcü nixí. ⁵⁶ —Pa Duüxügüx, pema rü togü i duüxügüpéxewa meã pemaxëneta, natürü peãewa rü chixexügu perüxínüè. Pema nüxü pecuèx na ñuxãcü penangugüxü ega tá napuxgu rü éxna tá nanguxetügu. ¿Rü ñuxãcü i ñuxma i tama nüxü pecuáxü na Tupana yïixü ya petanüwa ngucü?

Name nixí na curüngüxmüxü namaã i curü uwanü
(Mt 5.25-26)

57 —Rü tüxcüü tama nüxü pecuáxchaü i ngēma nama i mexü i Tupana pexü nawwēxexü na nagu pexixü. 58 —Rü ngēxguma chi wüxie wüxi i nge-tanücēx cuxü íxuaxügu rü âēxgacixütawa cuxü tagaxgu, rü name nixi i namawatama tüxü icurüngüxmüxēē na tama âēxgacüpēxewa cuxü tagaxücēx. Erü wüxicana na âēxgacixütawa cungguxü rü âēxgacü tá purichíagüna cuxü namu. Rü purichíagü tá cuxü napoxcu. 59 —Rü cumaã nüxü chixu rü ngēxma poxcuchicagu tá curüxâüx ñuxmatáta ngixü cuxütanü i guxcü i dīeru i nüxü ngixü cungetanücü. [Rü aixcüma ngēxgumarüü tá cumaã nanaxü ya Tupana ega tama namaã cunamexēēxgu i curü maxü —ñanagürü ga Ngechuchu.]

13

Wüxi i mexü nixi na nüxü rüxoexü i tacüma i chixexü

1 Rü yexgumatama Ngechuchuxütawa nangugü ga ñuxre ga duüxügü. Rü Ngechuchumaã nüxü nixugü ga na ñuxäcü âēxgacü ga Piratu namuxü ga norü churaragü na nadaiaxücēx ga ñuxre ga yatügü ga Gariréaanecüâx ga yexguma yema yatügü rü Tupanacēx carneru nadaixgu tupauca ga taxünewa. 2 Rü Ngechuchu nüxna naca rü ñanagürü nüxü: —¿Pema nagu perüxñüēgu rü yemaäcü nüxü nangupetü ga yema yatügü, yerü yema togü ga Gariréaanecüâxârü yexera nipecaduâxgü? 3 —Pemaã nüxü chixu rü tama nixi. Rü ngēxguma chi pema rü tama nüxü perüxoegu i pecüma i chixexü, rü guxâma i pema rü tá ta ipeyarütauxe. 4 —¿Rü êxna pema nagu perüxñüēgu rü guxü ga Yerucharéücüâxârü yexera nipecaduâxgü ga yema 18 ga yatügü ga yuexü ga yexguma Chiruéwa yexmaxü ga dauxütaechica naetü rüngutaügu? 5 —Pemaã nüxü chixu rü tama nixi. Rü ngēxguma chi pema rü tama nüxü perüxoegu i pecüma i chixexü, rü guxâma i pema rü tá ta ipeyarütauxe —ñanagürü ga Ngechuchu.

Ore ga nanetü ga iguera ga ngearü õõxügu ixuxü

6 Rü nüma ga Ngechuchu rü nüxü nixu ga wüxi ga ore ga igueragu ixuxü, rü ñanagürü: —Rü wüxi ga yatü nüxü nayexma ga wüxi ga ubanecü. Rü yexma nanato ga wüxi ga iguera. Rü nüma ga guma yatü rü ínayadauxü ga yema iguera rü ngoxi naxõõ, natürü taxuxüma ga norü oxü ínayangau. 7 —Rü yemacēx yema norü duüxü ga norü nañena dauxüxü ñanagürü:

“Dücēx, tomaēxpüx ya taunecü guxüguma íchayadauxü i ñaã iguera, rü taguma naxo. Rü ngēmacēx chanaxwēxe na cuyadaxüchixü na tama natücēxma nuã nañewa naxíaneâxücēx”, ñanagürü nüxü. 8 —Natürü ga yema norü duüxü ga norü nañena dauxü, rü norü corixü nangāxü, rü ñanagürü:

“Pa Corix, ¡nütama doma taunecüxícata ma nangēmèx! Rü tá chanaxaimüãnepüne rü waxmüãnexümaã tá chanagüpüne. 9 —Rü bexmana ngēxguma rü tá naxo. Natürü ngēxguma táütama naxoxgu rü tá chayadaxüchi”, ñanagürü.

Ngechuchu rü ngüxchigaarü ngunexügu ngixcēx nayataanexēē ga wüxi ga ngecü ga pücēxwecü

10 Rü wüxi ga ngüxchigaarü ngunexügu rü Ngechuchu nanguxēētae ga wüxi ga ngutaquēxepataüwa. 11 Rü yéma iyexma ga wüxi ga ngecü ga 18 ga taunecü ídaawecü. Rü ipücēxwe yerü wüxi ga ngoxo ngixü napücēxwexēē, rü taxuacüma iyarüwēxächi. 12 Rü yexguma Ngechuchu ngixü dēuxgu rü ngixcēx naca, rü ñanagürü ngixü: —Pa Ngecüx, ñuxma rü marü cuxcēx nitaane i

curü daawewa —ñanagürü. ¹³ Rü yexguma rü ngixü ningögü, rü yexgumatama iyarüwëxächiwemüxü, rü inaxügü ga Tupanaxü na yacuëxüüxü. ¹⁴ Natürü yema ngutaquëxepatalârü âëxgacü rü nanu, yerü Ngechuchu rü ngüxchigaarü ngunexügu ngixü narümemëë ga yema nge. Rü yemacëx ga yema âëxgacü rü ñanagürü duüxügüxü: —Nangëxma i 6 i ngunexü i nagu namexü na ipuracüexü. Rü ngëma ngunexügu nixi i namexü na nuâ pexixü na pegü peyarümemëëgüxüçëx rü tama i ngüxchigaarü ngunexügu —ñanagürü. ¹⁵ Rü yexguma ga Cori ga Ngechuchu rü nanangäxü, rü ñanagürü: —Pa Duüxügüx, pema rü togü i duüxügüpëxewa meâ pemaxënetä, natürü peâëwa rü chixexügu perüxünüë. ¿Tama êxna guxä i pema rü ngüxchigaarü ngunexügu peyawëxü i perü woca rü êxna perü buru na peyaxaxexëëgüxüçëx? ¹⁶ —Rü ñaâ ngecü rü Abrâltanüxü iyixi, rü Chataná rü 18 ya taunecü ngixü nachixexëë namaâ i ñaâ daawe. ¿Rü taux êxna i namexü na ngixcëx chayataanexëëxü i ngüxchigaarü ngunexügu? —ñanagürü. ¹⁷ Rü yexguma yema ñaxgu ga Ngechuchu, rü guxüma ga norü uwanügü rü poraäcü naxäneë. Natürü guxüma ga togü ga duüxügü rü nataäëgü ga yexguma nüxü nadaugüga ga yema mexügü ga Ngechuchu üxü.

Ore i motacha-chiregu ixuxü
(Mt 13.31-32; Mr 4.30-32)

¹⁸ Rü ñanagürü ga Ngechuchu: —¿Ñuxäcü nixi i âëxgacü na yiixü ya Tupana, rü nañuxraüxü i nüma âëxgacü iyixüüwa? ¿Rü tacügu tá chanangu? ¹⁹ —Maneca wüxi ya motachachire ya wüxi ya yatü naânegu toxünerüü nixi. Rü woo naxíraxüchichirëx ya naxchire natürü narüxü, rü naya ñuxmata wüxi i nanetü i taetaxü nixi. Rü ngëmacëx i werigü rü natanügu nixüachiäü —ñanagürü.

Ore i pâüärü puxëëruügu ixuxü
(Mt 13.33)

²⁰ Rü ñanagürü ta ga Ngechuchu: —¿Ñuxäcü nixi i Tupana âëxgacü iixüüwa? ¿Rü tacügu tá chanangu? ²¹ —Rü pâüärü puxëëruüü nixi na guxüwama nanguxü. Erü wüxi i ngecü rü íraxü- tama i pâüärü puxëëruümaâ inaxüëü i taxü i ngürü pâüchära. Rü ngëma pâüärü puxëëruü rü woo naxíra rü nayapuxëë i guxüma i ngürü pâüchära —ñanagürü ga Ngechuchu.

Îäx i íraxüchiga
(Mt 7.13-14, 21-23)

²² Rü inixüchigü ga Ngechuchu ga Yerucharëüwa na naxüxü. Rü yexguma namagu yaxüxgu rü iänegüwa rü iänexäcügüwa nixüpetüchigü, rü yéma nayanguëxëetanü ga duüxügü. ²³ Rü wüxi ga duüxü nüxna naca rü ñanagürü: —Pa Corix ¿noxretátama nixi i ngëma nayauxgüxü i maxü i taguma güxü? —ñanagürü. Rü nüma ga Ngechuchu nanangäxü, rü ñanagürü: ²⁴ —Daxügüxü i naâneärü îäx rü naxíraxüchi. ¿Rü paxa naxcëx pedau na nawa pichocuxüçëx! Erü pemaâ nüxü chixu rü muxüchixüma i duüxügü tá nüxü nangüchäü na nawa yachocuxü, natürü täütáma nawa nichocu. ²⁵ —Erü ngëxguma iärü yora marü nawäxtagu i îäx, rü pema i düxëtüwa ngëxmagüxe rü tá penatutuäü. Rü ñaperügügü tá:

“Pa Corix, ¡paxa toxcëx yawäxna i îäx!” ñaperügügü tá. Natürü nüma i cori rü tá pexü nangäxü, rü ñanagürü tá:

“Tama pexü chacuëx na ngextäcüîäx pixigüxü”, ñanagürü tá pexü. ²⁶ —Rü ngëxguma rü tá ñaperügügü nüxü:

“Cumaächirëx wüxiwa tachibüe rü taxaxegü. Rü toxü cungüexëë ga torü ïâneärü ítamüguwa”, ñaperüügü tá. ²⁷ —Natürü nüma rü tá pexü nangäxü rü ñanagürü tá: “Marü pemaã nüxü chixu rü tama pexü chacuëx na ngextácüãxgü pixigüxü. ¡Rü ípixí i nuã chauxütawa i guxäma i pemax, Pa Chixri Maxëxü!” ñanagürü tá. ²⁸ —Rü ngëma tá pexauxe, rü tá pixüxchapütägü i ngëxguma nüxü pedëuxgu i Abráü rü Ichaá rü Acobu rü guxüma i Tupanaärü orearü uruügu na Tupana äëxgacü íxixüwa na nangëxmagüxü rü pema rü nüxna na ípewoxüxü. ²⁹ —Erü guxüwatáma ne naxí i duüxügü. Rü Tupana äëx- gacü íxixüwa tá nangëxmagü. Rü ngëma tá narütögü na ngëma nachibüexüçëx. ³⁰ —Rü tá nangëxma i nümaxü i ñoma i naãnewa duüxügü nüxü oexü, natürü daxüguxü i naãnewa rü Tupana tá wixpëxewa nanaxügüxëë. Rü tá nangëxma i nümaxü i ñoma i naãnewa duüxügü nüxü icuëxüügüxü, natürü daxüguxü i naãnewa rü Tupana rü tá wixweama nanaxügüxëë —ñanagürü ga Ngechuchu.

Ngechuchu rü Yerucharëüçüãx ga duüxügüçëx naxaxu (Mt 23.37-39)

³¹ Rü yematama ga ngunexügu rü Ngechuchuxütawa nangugü ga ñuxre ga Parichëügü. Rü ñanagürügü Ngechuchuxü: —¡Íixü i nuã! Erü äëxgacü ya Erode rü cuxü nimëxëga —ñanagürügü. ³² Natürü nüma ga Ngechuchu nanangäxü rü ñanagürü: —¡Naxütawa pexí i ngëma yatü i nüxü cuëxüchixü na ñuxäcü duüxügüxü nawomüxëëxü, rü namaã nüxü pixu rü ñuxma rü moxü rü tá íchana- woxü i ngxogü, rü tá chanameëxëë i ngëma duüxügü i idaawëxü, rü pëxmaäcü tá chanaguxëë! ³³ —Natürü chanaxwëxe i ichixüchigü i ñuxma rü moxü rü paxmaäcü ñuxmatáta Yerucharëüwa changu. Erü Yerucharëügu nixí i na yayuexü i guxüma i Tupanaärü orearü uruügu. ³⁴ —Rü düçax, Pa Yerucharëüçüãx, pema peyadaietanü i Tupanaärü orearü uruügu, rü nutamaã ípenamuxüchigü i Tupanaärü orearü ngeruügu i pëxcë nüma namugüxü. Rü ñuxreëxpüxcüna wüxigu chaugüxütagu pexü chanutaquëxëxëçhaü, ñoma wüxi i ota ya naxäcüãx nügütüügu tüxü nutaquëxëxürüü. Natürü pema rü tama penaxwëxe. ³⁵ —Düçëx i ñuxma ya perü ïâne, rü Tupana tá ínanatëx. Rü pemaã nüxü chixu rü täütáma wena choxü pedau ñuxmatáta daxüguxü i naãnewa ne chaxü. Rü ngëxguma rü tá choxü pedau rü tá ñaperüügü:

“Namexëchi nixí ya yima Cori ya Tupana núma namucü”, ñaperüügü tá —ñanagürü ga Ngechuchu.

14

Ngechuchu rü naxçëx nayataanexëë ga wüxi ga yatü ga rüchaxünëxü

¹ Rü wüxi ga ngüxchigaarü ngunexügu rü Ngechuchu rü wüxi ga Parichëupatawa nayachibü. Rü yéma nayexmagü ga togü ga Parichëügü ga yéma bexma Ngechuchuxü ngugüxü. ² Rü yéma nayexma ta ga wüxi ga yatü ga idaawëxü ga rüchaxünëxü. ³ Rü yëxguma ga Ngechuchu rü yema ngüxëëruügu ga Moíçëarü mugüwa nguxëëtaegüxüna rü Parichëügüna naca, rü ñanagürü: —¿Tama penachuxuxü ega ngüxchigaarü ngunexügu chanamexëëxgu i wüxi i idaawëxü? —ñanagürü. ⁴ Natürü ga nümagü rü nangeëxgümare. Rü yëxguma ga Ngechuchu rü naxmëxgu nayayauxächi ga yema idaawëxü, rü nanamexëë. Rü namaã nüxü nixu ga na íyaxüxüçëx. ⁵ Rü Ngechuchu rü ñanagürü Parichëügüxü: —¿Texé i pema i ngëxguma perü

buru rü éxna perü woca puchugu nagoxgu, rü taux éxna i ngëxgumatama ípeyadauxü rü ípe- yatúächixü i woo ngüxchigaarü ngunexügu? —ñanagürü.
 6 Rü nümagü rü taxuümaãma nanangãxügu.

Duüxügu ga ngügarü petawa nüxna naxugüxüchiga

7 Rü yexguma mechawa natogüchaügu ga yema nüxna naxugüxü, rü Ngechuchu nüxü nadau na wüxichigü rü íärü yoraxütawaxüchi natoxchaüxü. Rü yexguma yemaxü nadëuxgu rü nayaxucuxëgü, rü ñanagürü: 8 —Ngëxguma texé cuxna uxgu i wüxi i ngügarü petawa, rü tama name i petaarü yoraxütawaxüchi üxü i naxmëxwëxewa cuyarüto. Erü yixcúra ngürüächi tá ínangu i to i nüxna naxuxü i curü yexeraxüchi ixíxü. 9 —Rü ngëma petaarü yora i pexna uxü, rü tá cumaã nüxü nayarüxu na icuchixücëx i ngëma nachicawa na ngëma natoxëëãxücëx i ngëma to i curü yexera ixíxü. Rü ngëxguma i cuma rü poraãcü cuxãneãcüma rü nawa iyacuáxü i naxmëxwëxewa tá cuyarüto. 10 —Rü narümemaë ega texé cuxna uxgu, rü nawa iyacuáxü i naxmëxwëxewa curüto. Rü ngëxguma i ngëma petaarü yora i cuxna uxü rü ñanagürü tá cuxü:

“Pa Chomücüx, ¡nuã chauxütawa yarüto!” ñanagürü tá cuxü. Rü ngëmaãcü ngëma petaarü yora rü wüxi i mexü tá cumaã naxü napëxewa i guxüma i duüxügu i nüxna naxuxü i cumaã ngema rütogüxü. 11 —Erü texé ya tügü írütaxe rü Tupana tá tüxü naxãnexëë. Natürü texé ya tügü írúxíraxe rü Tupana tá tüxü nicuëxüü —ñanagürü ga Ngechuchu. 12 Rü ñanagürü ta ga Ngechuchu nüxü ga yema yatü ga nüxna uxü: —Rü ngëxguma wüxi i ñnacëx rü éxna petacëx texéna cuxuxchaügu, rü tama name i nüxna cuxu i cumücügü, rü bai i cueneëgü, rü bai i cutanüxügu, rü bai i curü ngaicamagu pegüxü i duüxügu i díeruãxügu. Erü nümagü rü tá nüxü cuxna naxugüe, rü ngëmaãcü tá cuxü nanaxütanügu. 13 —Natürü ngëxguma wüxi i peta cuxüxgu, rü narümemaë nixü i nüxna cuxu i duüxügu i ngearü díeruãxügu, rü duüxügu i taxucürüwama puracüexü, rü ngëma íchixeparagüxü, rü ngëma ingexetügüxü. 14 —Rü tá cutaãëxüchi i ngëxguma erü nümagü rü taxucürüwama cuxü nanaxütanügu. Natürü tá cunayaxu i curü natanü i ngëxguma wena namaxëgu i Tupanaärü duüxügu i mexü —ñanagürü.

Ore i taxü i ñnagu ixixü

(Mt 22.1-10)

15 Rü yexguma yemaxü naxínügu ga wüxi ga yatü ga mechawa rütöxü rü Ngechuchuxü ñanagürü: —Rü tataãe ya yixema Tupana äëxgacü íxíxüwa chibüxe —ñanagürü. 16 Rü yexguma ga Ngechuchu rü ñanagürü nüxü: —Wüxi ga yatü nanaxü ga wüxi ga ñna ga taxü. Rü norü duüxüxü namu na nüxna yaxuxücëx ga muxüma ga duüxügu. 17 —Rü yexguma marü namexgu ga norü ñna, rü wena norü duüxüxü namu na yema duüxügu ga marü nüxna naxugüxümaã nüxü na yanaxuxücëx ga marü na namemarexü ga norü ñna, rü paxa yéma na naxüxücëx. 18 —Natürü guxüma ga yema nüxna naxugüxü, rü ínanaxügu ga nügu na ínaxuegüxü. Rü yema nüxíra nüxna naxu rü ñanagürü:

“Ngexwacaxtama naxcëx chataxe i wüxi i naãne. Rü paxa tá íchayadau. ¡Rü namaã nüxü íxu i cori rü taxucürüwama ngema chaxü!” ñanagürü. 19 —Rü ga yema to rü ñanagürü:

“10 i wocagü i puracürücëx chataxe, rü tá ngëmaxü chayaxü. ¡Rü namaxã nüxü íxu i cori rü taxucürüwama ngema chaxü!” ñanagürü. 20 —Rü ga to rü ñanagürü:

“Ngexwacaxtama chaxãmèx rü ngëmacèx taxucürüwama ngema chaxũ”, ñanagürü. ²¹—Rü yexguma nataegugu ga yema coriarü duũxũ, rü norü corimaã nüxũ nixu ga guxũma ga yema ore. Rü yexguma ga norü cori rü nanu, rü ñanagürü nüxũ ga norü duũxũ:

“¡Paxa ngema ítamügü i taxüwa rü ítamüacügüwa naxü, rü nuã nagagü i ngëma duũxügü i ngearü díeruãxgüxũ, rü ngëma duũxügü i taxucürüwama puracüexũ, rü ngëma ichixeparagüxũ, rü ngëma ingexetügüxũ!” ñanagürü. ²²—Rü yixcamaxũra ga yema norü cori namaã nüxũ ixuxũ naxüxguwena rü yema norü duũxũ ñanagürü nüxũ:

“Pa Corix, marü chanaxü i ngëma chomaã nüxũ quixuxürüü, natürü naxãchicaaneãmatama i nuã cupatawa”, ñanagürü. ²³—Rü yexguma ga norü cori rü ñanagürü nüxũ:

“¡Paxa ngëma nama i taxügüwa rü nama i íraxügüwa naxü, rü nuã nagagü i togü i duũxügü na nuxã chopatagu nachocuxüçèx, rü ngëmaãcü na naxããcuxüçèx ya daa chopata! ²⁴Erü pemaã nüxũ chixu rü taxuũma ga yema nüxĩra nüxna chaxuxü rü nuã chorü õnawa tá nachibüe”, ñanagürü.

Tama natauxcha na Cristuwe rüxüxũ
(Mt 10.37-38)

²⁵ Rü muxüchixũma ga duũxügü Ngechuchuwe narüxĩ. Rü nadauegu ga Ngechuchu, rü ñanagürü nüxũ: ²⁶—Rü ngëxguma texé chowe rüxüxchaũgu, rü tanaxwëxe i choxũ tangechaũ tümanatüarü yexera, rü tümaëärü yexera, rü tümamëxärü yexera, rü tümaxãcügüarü yexera, rü tümaëneëgüarü yexera, rü tümaëyëxgüarü yexera, rü tümaärü maxüärü yexera rü ta. Rü ngëxguma tama ngëmaãcü choxũ tangechaũgu rü taxucürüwama aixcüma chorü ngüexũ tixi. ²⁷—Rü yixëma tama naxwëxexè na chaugaga ngüxü tingeãcüma chowe tarüxüxũ, rü taxucürüwama chorü ngüexũ tixi. ²⁸—Rü ngëxguma chi wüxie i petanüwa rü wüxi ya ípata ya taxüne taxüxchaũgu, ¿rü tama éxna i noxri i tanangugüxiraxũ na ñuxre i díeru tá nagu ngüxũ ítatáxũ? Rü ngëmawa nüxũ tacuèx rü marü tüxũ iyangu i ngëma tümaärü díeru i tüxũ ngëxmacü na tayanguxëëxüçèx ya yima í. ²⁹—Erü ngëxguma chi tama meã tanangugügu i tümaärü díeru na ñuxregu tá naxãtanüxũ ya yima í, rü norü caxtaxica chi ítapugügu rü yixcüra rü taxucürüwa chi tanaguxëëgu i ngëma puracü, rü guxũma i duũxügü i nüxũ daugüxũ i ngëma tümaärü puracü rü tá tüxũ nacugüe. ³⁰—Rü ñanagürügü tá:

“Ngëma yatü inanaxügü na naxüpataxũ, natürü taxucürüwama nayan-guxëè”, ñanagürügü tá. ³¹—Rü ngëxguma wüxi i nachiũñaneärü äëxgacü rü to i nachiũñaneärü äëxgacümaã nügü nadaixchaũgu, ¿rü tama éxna i noxri inangugüãxũ rü ngoxi 10,000 i churaragü rü yangu na nügü nadaixüçèx namaã i norü uwanü i 20,000 i churaragü nüxũ ngëxmaxü? ³²—Rü ngëxguma nangugüãgu na tama yanguxü i norü churaragü rü, ¿taux éxna i ngëxguma yaxüwa nangëxmagutama i norü uwanü, rü naxütawa namugüãxũ i norü orearü ngerüügü, rü namaã nüxũ na yanaxugüexüçèx na nügümaã nangüxmüëxü? ³³—Rü ngëxgumarüü tá ta nixĩ i pemax, erü ngëxguma ngererüxüxe i petanüwa tama ngëma tanawogügu i guxũma i tüxũ ngëxmaxü na chowe tarüxüxüçèx, rü taxucürüwama aixcüma chorü ngüexũ tixi.

Ngëxguma nangeacaga ya yücüra rü taxuwama name
(Mt 5.13; Mr 9.50)

³⁴—Pema rü ñoma yucürarüü pixigü i ñoma i naãnewa, erü yima yücüra rü õna na namexëëxürüü rü pema rü ñoma i naãneçüãx i duũxügütanüwa rü

norü mexêëruü pixîgü. Name ya yucüra. Natürü ngêxguma chi nangeacagu, çrü ñuxácü tá wenaxärü naxããca? ³⁵ —Rü taxuwama name. Rü woo waixüümüärü waxmüänexêëruüçexrü tama name. Rü itanatêxmare. Rü yixema aixcüma achiçexê, jrü name nixî i nagu tarüxînüê i ñãã ore! —ñanagürü.

15

Ore i carneru i iyarütaxuxügu ixuxü (Mt 18.10-14)

¹ Rü guxüma ga yema yatügu ga Dumaärü âêxgacüçex dïëru ngîxü idee-tanüxü, rü togü ga duüxügu ga chixexü ga nacümagu îxü, rü Ngechuchüçex naxî na iyanaxîñüçex ga norü ore. ² Rü yemacê ga Parichëgü rü ngüexêëruügu ga Moïchëarü mugüwa ngüxêëtaegüxü, rü Ngechuchüxü nix-ugüe, rü ñanagürügü: —Ñãã yatü rü norü me nixî i pecaduãxgüxümaã na naxãmücüxü, rü namaã na nachibüxü —ñanagürügü. ³ Rü yexguma ga Ngechuchu rü ñãã ore ga cuèxruüxü namaã nixu, rü ñanagürü: ⁴ —ÇTexê i petanüwa rü ngêxguma tüxü nangêxmagu i 100 i tümaärü carnerugü rü wüxi tüxü iyarütauxgu, rü taux êxna i nachitaüwa tanawogüxü i ngêma 99, rü naxcêx tayadauxü i ngêma tüxü iyarütaxuxü ñüxmata nüxü itayangau? ⁵ —Rü ngêxguma nüxü itayangëuxgu rü taãêcümüa tügüätügu tayagaxü. ⁶ —Rü ngêxguma tümapatawa tanguxgu, rü tanangutaquêxexêe i tümamücügü, rü duüxügu i tümaärü ngaicamagu pegüxü, rü ñatagüxü nüxü:

“¡Wüxigu chomaã petaãëgü, Pa Chomücügüx! Erü marü nüxü ichayangau i ngêma chorü carneru ga iyarütaxuxü”, ñatagüxü nüxü. ⁷ —Rü pemaã nüxü chixu rü ngêxgumarüü ta nataãëgü i daxüçüãx i ngêxguma nangêxmagu i 99 i duüxügu i mexügu i marü Tupanaärü ixîgüxü, natürü yexeraãcü nataãëgü i ngêxguma wüxi i duüxü i pecaduãxü nüxü rüxoxgu i nacüma i chixexü rü Tupanaãxü yaxôögu —ñanagürü.

Ore ga dïëru ga iyarütauxcügu ixuxü

⁸ Rü Ngechuchu rü wüxi ga to ga ore ga cuèxruüxü nixu, rü ñanagürü: —Ngêxguma chi wüxi i ngecüaxü nangêxmagu i 10 tachinü i dïëru, rü wüxi ngîxü iyarütauxgu, çrü taux êxna i omüwa nangixichiãxü rü nabixichiãxü ya ngîpata, rü meãma ngîxcêx nadauxü ñüxmata ngîxü iyangau? ⁹ —Rü ngêxguma ngîxü iyangauxgu, rü inangutaquêxexêe i ngîmücügü i ngexügu rü ngîtanüxügu i ngîrü ngaicamagu pegüxü, rü ngîxü nüxü:

“¡Wüxigu chomaã petaãëgü, Pa Chomücügüx! Erü marü ngîxü ichayangau i ngêma chorü dïëru ga iyarütauxchirêxcü”, ngîxü. ¹⁰ —Rü pemaã nüxü chixu rü ngêxgumarüü ta nataãëgü i daxüçüãx i Tupanaärü orearü ngerüügu i ngêxguma wüxi i duüxü i pecaduãxü nüxü rüxoxgu i nacüma i chixexü rü Tupanaãxü yaxôögu —ñanagürü ga Ngechuchu.

Ore ga wüxi ga ngextüxücü ga nanatüna ixücügu ixuxü

¹¹ Rü ñanagürü ta ga Ngechuchu: —Nayexma ga wüxi ga yatü ga taxre ga nane nüxü yexmacü. ¹² —Rü guma rübumaêcü, rü nanatüxü ñanagürü:

“Pa Pa, ¡choxna naxã i ngêma curü ngêmaxügu i choxna üxü!” ñanagürü. Rü yexguma ga nanatü rü yema taxre ga nanemaã nayatoye ga norü yemaxügu. ¹³ —Rü ñuxre ga ngunexüguwena rü guma nane ga rübumaêcü rü nananutaquêxe ga guxüma ga norü yemaxügu rü namaã nataxe. Rü yema dïërumaã rü to ga nachüñãnewa naxü. Rü chixri yéma namaxü, rü yemaãcü ngîxü naguxêê ga guxcüma ga norü dïëru. ¹⁴ —Natürü yexguma marü ngîxü naguxêêguwena ga guxcüma ga norü dïëru, rü poraãcü nataxu ga ôna ga yema

nachiũñewa. Rũ yemacèx ga guma ngextũxücũ rũ inanaxügũ ga taiya nũxũ na ngũxũ. ¹⁵—Rũ yexguma rũ norũ puracücèx nadau naxũtagu ga wũxi ga yatũ ga yema nachiuñanecũãx. Rũ nũma ga yema yatũ rũ norũ nañewa nanamu na yema norũ cuchigũna yadauxũcèx. ¹⁶—Rũ dũxwa nũxũ nachixéga ga yema cuchiwemũ, yerũ poraãcũ nataiyaxũchi. Natürũ taxũema ðna nũxna taxa. ¹⁷—Rũ yexguma naãewa nãgu narũxĩnũ, rũ ñanagürũ:

“¿Ñuxre i chaunatuãrũ puracũtanũxũ rũ nũxũ nangẽxma i ðna rũ nũxũ ñnayaxũ? Rũ choma i nuã rũ taiyamaã tá nuxma chayũ. ¹⁸—Rũ chaunatuãcèx tá chataegu, rũ ñachagürũ tá tũxũ: ‘Pa Papax, marũ chixexũ Tupanapewa chaxũ rũ cupewa rũ ta. ¹⁹—Rũ tama marũ chame na Chaune, ñacuxũ choxũ. ¡Rũ wũxi i curũ puracũtanũxũxũ choxũ ixixèè!’ ñacharügũ tá tũxũ ya chaunatu”, ñanagürũ. ²⁰—Rũ inaxũãchi rũ nanatũpatacèx nataegu. Rũ yexguma yangaigacu ga nanatũpata, rũ yaxũgu nũxũ tãdau ga nanatũ, rũ tũxũ nangechaũtũmũ. Rũ naxcèx tiña, rũ nũxna tanẽixãchi, rũ nũxũ tachũxu. ²¹—Rũ yexguma ga nũma ga tũmane rũ ñanagürũ tũxũ:

“Pa Papax, marũ chixexũ Tupanapewa chaxũ, rũ cupewa rũ ta. Rũ ngemacèx marũ tama name na ‘Chaune’ ñacuxũ choxũ”, ñanagürũ. ²²—Natürũ tũma ga nanatũ rũ tũmaãrũ duũxũgũxũ ñatarügũ:

“¡Paxa nuã penange i naxchiru i mexẽchixũ rũ peyacuxcuchix! ¡Rũ wũxi i anera ta naxmẽxwa ngĩxũ pingèxcuchix! ¡Rũ chapatu rũ ta nuãta penge, rũ peyacuaixcuchix! ²³—¡Rũ peyayaxũx i ngẽma wocaxacũ i rüngũmaexũ, rũ peyamã, rũ ngĩxã namaã tachibũe rũ tapetae! ²⁴—Erũ daa chaune rũ chauxcèx rũ marũ nayu, natürũ maxũcũ chauxcèx ñangu. Rũ marũ inayarũtauxchirẽx, rũ wenaxãrũ nangox”, ñanagürũ. Rũ yexguma inanaxügũe ga na napetaegũxũ. ²⁵—Rũ yoxni ga guma nane ga rüyamaẽcũ, rũ nañewa nayexma. Rũ yexguma nataegugu rũ marũ ñãrũ ngaicamana nangugu, rũ nũxũ naxĩnũ ga na ñapaxetãgũxũ rũ ñyaxũãchitanũxũxũ. ²⁶—Rũ wũxi ga nanatũarũ duũxũcèx naca, rũ nũxna naca ga tacũ na ñaxũexũ ga ñwa. ²⁷—Rũ yema nanatũarũ duũxũ rũ nanangãxũ, rũ ñanagürũ: “Cueneẽ rũ marũ ñangu. Rũ ngẽmacèx cunatũ toxũ tamu na tayamáxũcèx i ngẽma wocaxacũ i rüngũmaexũ, erũ cueneẽ rũ mecũ ñangu rũ tama niãaawe”, ñanagürũ nũxũ. ²⁸—Natürũ ga guma nañeẽ ga rüyamaẽcũ rũ nanu, rũ tama ñgu naxũcuchaũ. Rũ yemacèx dũxwa ga nanatũ rũ naxcèx ñaxũxũ, rũ nũxũ tayacèexũ na yaxũcuxũcèx. ²⁹—Rũ nũma rũ ñanagürũ tũxũ ga nanatũ:

“Cuma nũxũ cucuèx i ñuxre ya taunecũ cuxũ chapuracũ, rũ taguma chixri cuga chaxĩnũ. Rũ bai i ñuxgu wũxicana wũxi i chibuxacũ choxna cumu na chomũcũgũmaã chapetaexũcèx. ³⁰—Natürũ ñuxma na ñanguxũ i ngẽma cune i chixri curũ dũeru ngĩxũ guxẽexũ nãgu i ngexũgũ i ngẽãexũ, rũ naxcèx cuyamèx i ngẽma wocaxacũ i rüngũmaexũ”, ñanagürũ. ³¹—Rũ yexguma ga nanatũ rũ ñatarügũ nũxũ:

“Pa Chaunex, cuma rũ guxũguma chauxũtãwa cungẽxma, rũ guxũma i chorũ ngẽmaxũgũ rũ cuxrũ nixĩ. ³²—Natürũ ñuxma rũ name nixĩ na ñpetaegũxũ rũ na ñtaãegũxũ erũ cueneẽ ga guma chauxcèx rũ marũ yucũ, rũ maxũcũ taxcèx ñangu. Rũ woo tũxna inayarũtaxu, rũ wenaxãrũ taxcèx nangox”, ñatarügũ.

16

Ore ga yatũ ga chixri norũ coriarũ yemaxũna dauxũgu ixuxũ

¹ Rū ñanagürü ta ga Ngechuchu norü ngúexüğüxü: —Nayexma ga wüxi ga cori ga muärü yemaxüäxüchixü. Rū nüxü nayexma ga wüxi ga norü duüxü ga norü yemaxüärü dauruü. Natürü togü ga duüxüğü rü norü corimaã nüxü nixugü na yema norü duüxü rü chixri norü yemaxüna na nadauxü. ²—Rü yexguma ga yema cori rü yema norü duüxüçex naca, rü ñanagürü nüxü:

“Düçex, cuchigaxü chomaã nixugüğü i duüxüğü. ¿Rü tacü nixi i ngëma? ¿Rü chomaã nüxü ixu rü ñuxäcü nixi i curü puracü, erü marü täütáma chorü ngëmaxüärü dauruüxü cuxü chixixëë!” ñanagürü nüxü. ³—Rü yexguma ga yema coriarü duüxü rü nagu narüxinü, rü nügüäëwa ñanagürü:

“¿Tacü tá chaxü i ñuxmax, erü chorü cori rü marü choxü ínatëxüchi i ngëma chorü puracüwa? Tama chapora na naänewa chapuracüxüçex, rü chaxäne na dñerucë na íchaçaxü nüxna i togü. ⁴—Rü marü nüxü chachuë na tacü tá na chaxüxü na choxü nangëxmaxüçex na texé tümapatawa choxü yaxuxü i ngëxguma changearü puracüäxgu”, ñanagürü. ⁵—Rü yexguma nügüxütawa naxçex naca ga wüxichigü ga yema duüxüğü ga norü coriaxü yangetanügüxü. Rü yema nüxira yëma naxütawa nguxüna naca, rü ñanagürü:

“¿Ñuxre i nüxü cungetanüxü i chorü cori?” ñanagürü. ⁶—Rü nüma nanangäxü, rü ñanagürü:

“Nüxü chanangetanü i 100 i data i chixü”, ñanagürü. Rü yema coriarü duüxü rü ñanagürü nüxü:

“Ñäã nixi i popera i curü ngetanü nawa ngóxü. ¿Rü paxa írúto rü to i popera naxü, rü 50 i dataguxicatama naxü i curü ngetanü!” ñanagürü. ⁷—Rü yemawena rü yema to ga duüxü ga norü coriaxü nangetanüxüna naca, rü ñanagürü:

“¿Cuma rü ñuxre yüxü i nüxü cungetanüxü i chorü cori?” ñanagürü. Rü nüma rü nanangäxü, rü ñanagürü:

“Nüxü chanangetanü i 100 i choca i trigu”, ñanagürü. Rü yema coriarü duüxü rü ñanagürü nüxü:

“Ñäã nixi i popera i curü ngetanü nawa ngóxü. ¿Rü paxa írúto rü to i popera naxü rü 80 i chocaguxicatama naxü i curü ngetanü!” ñanagürü.

⁸—Rü norü cori rü nüxü nicuëxüüäma ga yema norü duüxü ga chixexü, yerü nüxü nadau ga ñuxäcü na naxäãëxüchixü. Rü pemaã nüxü chixu rü ñoma i naänecüäx i duüxüğü, rü ngëma Tupanaãxü yaxögüxü i duüxüğüarü yexera paxa naxçex nadaugü na ñux- äcü nüxü natüxü i duüxüğü. ⁹—Rü pemaã nüxü chixu rü ngëma ñoma i naäne i chixexüwa pexü ngëxmaxü rü name nixi i ngëmamaã nüxü penangüchaüxëë i duüxüğü na Tupanaxütawa nangugüxü. Rü ngëmaäcü i ngëxguma naguxgu i ngëma ñoma i naänewa pexü ngëxmaxü rü peyuxgu, rü tá pexü nangëxma ya Penatü ya pexü yaxucü i daxügüxü i naänewa. ¹⁰—Yixema meã namaã icuáxe ega woo noxretama tümamëxëwa ngëxmagu, rü ngëxguma muxüma tümamëxëwa ngëxmagu rü tá ta meã namaã itacuëx. Natürü yixema chixri namaã icuáxe ega noxretama tümamëxëwa ngëxmagu, rü ngëxguma muxüma tümamëxëwa ngëxmagu rü ngëxgumarüü tá ta chixri namaã itacuëx. ¹¹—Rü ngëxguma tama meã namaã ipecuëxgu i ngëma pexmëxwa ngëxmaxü i ñoma i naäne i chixexüwa, ¿rü texé tá pexmëxgu tanaxü i ngëma aixcüma mexü i Tupanaärü ixixü? ¹²—Rü ngëxguma tama meã namaã ipecuëxgu i ngëma Tupana pexna äxü i ñoma i naänewa, ¿rü ñuxäcü tá pexna nanaxä i pechica i daxügüxü i naänewa? ¹³—Taxucürüwama i wüxi i duüxü rü nataxrearü coriaxü. Erü wüxi i norü corichi rü tá naxai, rü ngëma to rü tá nüxü nangechaü. Rü éxna wüxicëx rü tá meã napuracü rü ngëma to rü tá nüxü naxo. Rü pema rü taxucürüwama

Tupanacêx pemaxê ega perü dîeruguxicatama perüxîñüêgu —ñanagürü ga Ngechuchu. ¹⁴ Natürü ga yema Parichéugü rü poraäcü norü dîeruguama narüxîñüê. Rü yemacêx Ngechuchuxü nacugüe ga yexguma nüxü naxîñüêgu ga guxüma ga yema ore. ¹⁵ Rü yexguma ga Ngechuchu rü ñanagürü nüxü: —Pema nixi i duüxügüpêxewa meã pemaxênetaxü, natürü Tupana pexü nacuêx na ñacügu perüxîñüêxü. Rü woo duüxügü pexü nicuêxüügü naxcêx i ngêma pexüxü, natürü Tupana rü naãêwa nangux i ngêma —ñanagürü ga Ngechuchu.

Tupanaärü mugü ga Moïché ümatüxü rü ñuxäcü äêxgacü na yîxü ya Tupanachiga

¹⁶ Rü yexguma ga Ngechuchu rü ñanagürü: —Noxri nayexma ga Tupanaärü mugü ga Moïché duüxügüxü ngxêêxü, rü yema nguxêêtae ga nuxcümaügüxü ga Tupanaärü orearü uruügü duüxügüxü namaã nguxêêxü. Natürü yexguma Cuáü ga baiüxêêruü ínguxguwena, rü marü duüxügümaã nüxü chixuchiga i Tupanaärü ore i mexü i ñuxäcü äêxgacü na yîxü. Rü ñuxma rü guxüma i ngêma duüxügü rü poraäcü nügü naporaexêê na yachocuxücêx i ngema Tupana äêxgacü íxixüwa. ¹⁷ —Naxüpa na yanguxü i Tupanaärü mugü rü woo wüxi i mu i íramarexü yixügu, rü naguxchaxüchi na iyanaxoxü i ngêma nüxü yaxuxü. Natürü aixcüma narütauxchamaê nixi na iyanaxoxü i ñoma i naãne rü guxüma i ngêma daxüwa nüxü idauxü.

Ngechuchu namaã nangüxêêtae na tama namexü na texé tümamaxü ítáxü (Mt 19.1-12; Mr 10.1-12)

¹⁸ —Ngêxguma wüxi ya yatü ítamêxgu rü naí i ngemaã naxâmêxgu rü Tupanapêxewa rü pecadu naxü. Rü texé ya yixema ngîmaã ãmaxê i wüxi i nge i ngíte ngîxü ítêxü, rü Tupanapêxewa rü tüma rü ta pecadu taxü.

Yatü i dîeruãxüchixüchiga rü Dácharuchiga

¹⁹ —Nayexma ga wüxi ga yatü ga dîeruãxüchixü ga guxüguma mexêchixü ga naxchirugu icüxü. Rü guxü ga ngunexügu rü taxüma ga ðna naxü rü napetaexü. ²⁰ —Rü nayexma ta ga wüxi ga yatü ga ngearü dîeruäcü ga Dácharugu äegacü. Rü guxüguma yema dîeruãxüchixüpataêxwa nayarütooxü. ²¹ —Rü guma Dácharu rü nanangõxchaü ga yema õnatüchi ga yema yatü ga dîeruãxüchixüärü mechawa rüyüiixü. Rü naxcêx naxi ga airugü, rü nanawearü oxriãxgü. ²² —Rü wüxi ga ngunexü nayu ga guma ngearü dîeruäcü, rü daxücüãx ga Tupanaärü orearü ngeruügü rü daxüguxü ga naãnewa nanagagü na wüxiwa Abráümaã nayexmaxücêx. Rü nayu ta ga yema yatü ga dîeruãxüchixü, rü inayatêxgü ga duüxügü. ²³ —Rü ngêma nachica i Tupana ngoxogüxü nagu poxcuxüwa naxü ga yema yatü ga dîeruãxüchixü rü yema poraäcü ngüxü ninge. Rü daxü nadau, rü yaxügu Abráüxü nadau na Dácharumaã wüxiwa nayexmaxü ga daxüguxü ga naãnewa. ²⁴ —Rü yexguma ga yema yatü ga dîeruãxüchichirêxü rü aita naxü rü ñanagürü:

“Pa Oxi Pa Abráüx, jcxü changechaütümüü, rü nuã namu ya Dácharu na dexémaã nügü yawaixpêxemêxêäcüma choxü yanawaixpêxearü conüãxücêx! Erü poraäcü choxü nangux i nuã üxüwa”, ñanagürü. ²⁵ —Natürü Abráü rü ñanagürü nüxü:

“Pa Chaunex, jñuxna nacuêxächi na taxuüma cuxü taxuxü ga yexguma cumaüxgu! Natürü Dácharu rü poraäcü chixexü nüxü naxüpetü. Rü

ngēmācèx i ñuxma rü nuã mexüwa nangëxma, rü cuma rü ngema poxcuchicawa ngüxü quinge. ²⁶ —Rü ñuxüchi nangëxma i wüxi i taxüchixü i ngatexü i tórü ngäxüwa üxü. Rü ngēmācèx ega númacüãx ngema íxchaügu, rü taxucürüwama ngema naxí. Rü woo ngemacüãx núma íxchaügu rü taxucürüwama núma naxí”, ñanagürü. ²⁷ —Rü yexguma ga yema yatü ga díeruãxüchichiréxü rü ñanagürü:

“Cuxü chacèxü, Pa Oxi, Pa Abráüx, na chaunatüpatawa cunamuxücèx ya Dácharu. ²⁸ —Erü ngema nangëxmagü ya wüximèxpüx ya chaueneëgü. Rü chanaxwèxe na namaã nüxü na yanaxuxücèx na tama nuã ñaã poxcuchica i poraäcü choxü ínangüxüwa naxíxücèx”, ñanagürü. ²⁹ —Natürü ga Abráü rü ñanagürü nüxü:

“Cueneëgü nüxü nangëxma i Tupanaärü mugü ga Moiché ümatüxü rü yema ore ga nuxcümaügüxü ga Tupanaärü orearü uruügü ümatüxü. Rü name nixí i ngema orega na naxínüèxü”, ñanagürü. ³⁰ —Rü yexguma ga yema yatü ga díeruãxüchichiréxü rü Abráüxü nangäxü, rü ñanagürü:

“Ngēmācü, Pa Oxi, Pa Abráüx, natürü ngëxguma chi wüxi i duüxü i yuchiréxü ngema üxgu rü namaã nüxü yanaxuxgu, rü chi nüxü narüxoe i nacüma i chixexü”, ñanagürü. ³¹ —Natürü Abráü, rü ñanagürü nüxü:

“Ngëxguma tama naga naxínüègu ga yema ore ga Moiché ümatüxü rü yema ore ga nuxcümaügüxü ga Tupanaärü orearü uruügü ümatüxü, rü woo chi wüxi i marü yuwa írudaxü i duüxü ngema üxgu, rü namaã nüxü yanaxuxgu i ore, rü täu chima nüxü nayaxögü”, ñanagürü.

17

Naxücüma nixí na pecadugu inguxü (Mt 18.6-7, 21-22; Mr 9.42)

¹ Rü Ngechuchu rü norü ngüexügüxü ñanagürü: —Rü guxügutáma nangëxma i tacü i duüxügüxü pecaduãxèèxü. Natürü wüxi i ngechaü tá tümacèx nixí ya yíxema duüxè ya togüxü pecadugu nguxèèxè. ²⁻³ —Rü tümacèx rü narümemae nixí na tümanaxäwa yangacuchixü ya wüxi ya nuta ya tacü rü ngēmācü taxtüwa tüxü na itäexü naxüpa na pecadugu tananguxèèxü i wüxi i chorü duüxü. ¡Rü ngēmācèx name nixí i pexuãègü i pemax! Rü ngëxguma wüxi i cueneë chixexü cumaã üxgu rü ¡meã naxuxcuxè! Rü ngëxguma nüxü naxoxgu i nacüma i chixexü rü ¡nüxü nüxü nangechaü i ngema! ⁴ —Rü woo 7 èxpüxcüna chixexü cumaã naxüxgu i wüxi i ngunexügu, rü 7 èxpüxcüna cuxna yacaxgu na nüxü nüxü cungechaüxücèx, rü name nixí i nüxü nüxü cungechaü —ñanagürü ga Ngechuchu.

Ñuxäcü tapora ega yaxöxgu

⁵ Rü norü ngüexügü ga norü orearü uwa namugüxü rü ñanagürügü: —Pa Corix, ¡toxü rüngüxèè na yexeraäcü tayaxögüxücèx! —ñanagürügü. ⁶ Rü yexguma ga Cori ga Ngechuchu rü ñanagürü nüxü ga norü ngüexügü: —Rü ngëxguma chi woo naxíraxüchigu i perü õ, rü daa naí rü chi pega naxínü ega ñapegügu:

“¡Cugü nabèx i nuã rü taxtüchiügu cugü yato!” ñapegügu, rü chi pega naxínü.

Wüxi i ngüxèèruüärü puracüchiga

⁷ —Ngëxguma chi wüxie i petanüwa rü tüxü nangëxmagu i wüxi i tümaärü duüxü i tümaänewa ne üxü i puracüwa rü èxna carneruarü dauwa, rü tama nügücèxira naxüwemü. ⁸ —Natürü norü corixüxíra naxüwemü na

nachibüxüxcèx rü naxaxexüxcèx, rü nüma rü yixcama nachibü. ⁹—Rü norü cori rü tama moxè nüxna naxā na naxüwemüāxüxcèx, erü woetama ngēma nixī i norü puracü i ngēma norü duüxü. ¹⁰—Rü ngëxgumarüü tá pixīgü i pemax. Erü ngëxguma ngēma Tupana pexü üxëëxüxīcatama pexüxgu, rü penaxwèxe i pëgü ñaperügügü:

“Puracütanüxü i taxuwama mexü tixīgü, erü ngēma nawa tüxü namuxüxīcatama nixī i tinguxëëxü”, ñaperügügü —ñanagürü ga Ngechuchu.

Ngechuchu nanameëxëë ga 10 ga yatügü ga chaxüneāxgüxü

¹¹ Rü yexguma namagu yaxüxgu ga Ngechuchu ga Yerucharéüwa na naxüxü, rü Chamáriaane rü Gariréaane nügümaā íxüyexüwa naxüpetü. ¹² Rü yexguma wüxi ga ñānexācüwa nanguxgu, rü yexma napëxegu nayayi ga 10 ga yatügü ga chaxünemaā idaa weexü. Rü yaxügu nüxü nachigü. ¹³ Rü tagaācü ñanagürügü nüxü: —Pa Ngechuchux, Pa Ngüxëëruüx, jüxü tangechaütümügü! —ñanagürügü. ¹⁴ Rü yexguma Ngechuchu nüxü dëuxgu, rü ñanagürü nüxü: —jYéa paigüxütawa pexī, rü nüxü pëgü peyawëxgü! —ñanagürü. Rü yexguma namagu naxīyane, rü naxcèx nitaanetanü ga yema yatügü. ¹⁵ Natürü natanüwa rü nayexma ga wüxi ga Ngechuchucèx taeguxü ga yexguma marü nügü nadëuxgu ga naxcèx na yataanexü. Rü tagaācü Tupanaxü nicuèxüüchigü. ¹⁶ Rü Ngechuchupëxegu nanangücuchi rü moxè nüxna naxā. Rü yema yatü rü Chamáriaaneüāx nixī. ¹⁷ Rü yexguma ga Ngechuchu rü ñanagürü: —¿Taux éxna i 10 chirëx pixīgüxü na pexcèx chayataanexëëgüxü? ¿Ngëxügü nixī i ngēma togü i 9 i yatügü? ¹⁸ —¿Rü ñaā to i nachüñāneüāx i duüxüxīcatama nixī itaeguxü na Tupanaxü yacuèxüüxüxcèx? —ñanagürü. ¹⁹ Rü yexguma rü guma yatüxü ñanagürü: —jInachi rü íxü! Cuxcèx nitaane, erü cuyaxō —ñanagürü.

Ñuxācü tá nixī i ngëxguma ínanguxgu ya Tupana na ãëxgacü yüxü (Mt 24.23-28, 36-41)

²⁰ Rü Parichéugü rü Ngechuchuna nacagü, rü ñanagürügü: —¿Ñuxgu tá nixī na yangucuchixü ya Tupana na ãëxgacü yüxüxcèx i núma? —ñanagürügü. Rü Ngechuchu nanangāxü, rü ñanagürü: —Norü nguchiga ya Tupana rü tama wüxi i tacü i nüxü idaxürüü nixī. ²¹—Rü taxuacüma ñaperügügü:

“Daa nixī”, rü éxna “Gua nixī”, ñaperügügü. Erü marü petanüwa nangu ya Tupana na ãëxgacü yüxüxcèx —ñanagürü. ²² Rü yexguma norü ngüxügüxü ñanagürü: —Rü tá pexcèx ínangu i ngunexü i nagu poraācü tá choxü pedaugüchaüxü woo wüxi i paxaāchicèxtama yixīgu. Natürü täütāma choxü pedaugü i ngëxguma. ²³—Rü duüxügü rü tá ñanagürügü pexü:

“Daa nixī ya Cristu”, rü éxna, “Gua nixī ya Cristu”, ñanagürügü tá. Natürü pemax jrü täütāma nüxü peyaxögü, rü täütāma nawe perüxü! ²⁴ —Rü ngëxguma íchanguxgu i choma i Tupana Nane na duüxüxü chüxü, rü wüxi i äemacü i guxüāneguma baxixürüü tá chixī. ²⁵ —Natürü noxri rü tá poraācü ngüxü chinge, rü ñoma i naāneüāx i duüxügü i ñuxma maxëxü rü tá choxü naxoe. ²⁶ —Rü yexgumarüü ga duüxügü na chixri maxëxü ga yexguma Noë maüxgu, rü ngëxgumarüü tá ta chixri namaxë i duüxügü i ngëxguma íchanguxgu i choma i Tupana Nane na duüxüxü chüxü. ²⁷—Rü ga duüxügü ga yexguma rü nachibü, rü naxaxegü, rü nixāmëxgü, rü nixütexacügü ñuxmata nawa nangu ga yema ngunexü ga Noë nawetügu nagu ixüexü. Rü ínangu ga mucü ga taxüchicü, rü guxüma ga yema duüxügü rü nayue. ²⁸—Rü yexgumarüü ta nangupetü ga yexguma nuxcümaücü ga Lox maüxgu. Rü duüxügü

rü nachibüe, rü naxaxegü, rü norü yemaxüçex nataxegü, rü namaã nataxegü, rü nixüanegü rü nitoegü, rü nixüpatagü. ²⁹—Natürü yexguma Lox ixüxgu nawa ga guma ñane ga Chodoma, rü daxüwa narüyi ga üxü ga naxüchine, rü nanadai ga guxüma ga yema duüxüğü. ³⁰—Rü ngëxgumarüü tá ta nangupetü i ngëxguma íchangxgu i choma i Tupana Nane na duüxüxü chiixü. ³¹ Rü ngëma ngunexügu rü texé tama tümapataarü aixepewa ngëxmagu, rü tama name i tümapatagu tayangaxi na tümaärü ngëmaxüğü tayatoxüçex. Rü texé ya tümaãnewa ngëxmaxë, rü tama name i tümapatacëx tataegu na tacü ngema tayayaxuxüçex. ³²—Rü nüxna pecuëxächie ga ñuxäcü ngüxü na naxüpetüxü ga Lox namëx ga na nayuxü, ga yexguma ngügüweama nadëuxgu. ³³—Erü yixema tügü maxëchaxëëchaüxë rü tá itayarütaxu, natürü yixema chauxcëx yuxe rü aixcüma tá tüxü nangëxma i maxü i taguma güxü. ³⁴—Rü pemaã nüxü chixu rü ngëma chütaxügu rü wüxi i ngürücarewa tá nangëxmagü i taxre i duüxüğü. Rü wüxi tá niga, rü ngëma to rü tá ngema natëx. ³⁵—Rü taxre i ngëxüğü tá nügümaã ínacaegü. Rü wüxi tá niga rü ngëma to rü tá ngema natëx. ³⁶—Rü taxre i yatüğü rü wüxi i naãnewa tá nangëxmagü. Rü wüxi tá niga rü ngëma to rü tá ngema natëx —ñanagürü ga Ngechuchu. ³⁷ Rü yemaxü naxünüëgu ga norü ngüexüğü, rü Ngechuchuna nacagü, rü ñanagürüğü: —Pa Corix, çngëxá tá nixü i nangupetüxü i ngëma nüxü quixuxü? —ñanagürüğü. Rü nüma ga Ngechuchu rü nanangäxü, rü ñanagürü: —Duüxüğü rü tá chauxcëx nangutaquëxegü ñoma ëxchagü nawemüçex ngutaquëxexürü —ñanagürü.

18

Ore ga ãëxgacügu rü yutecügu ixuxü

¹ Rü Ngechuchu rü wüxi ga to ga orexü namaã nixu na yemawa nangüexëëaxüçex na ñuxäcü nanaxwëxexü na taguma nüxü nachaueäcüma guxüguma nayumüxëgüxü. ² Rü ñanagürü nüxü ga norü ngüexüğü: —Wüxi ga ñanewa nayexma ga wüxi ga ãëxgacü ga tama Tupanaga ñnuxü rü taxüexüma ngechaüxü. ³—Rü guma ñanewatama iyexma ga wüxi ga nge ga yutecü ga ngixü nayexmacü ga wüxi ga guxcha namaã ga to ga duüxü. Rü yemacëx yema ãëxgacüxütawa ixüxecha na ngixü namexëëäxüçex ga yema guxcha. ⁴—Rü muëxpüxcüna yéma ixüxü, natürü yema ãëxgacü rü tama ngüxü narüngüxëëchaü. Natürü düxwa nagu narüxinü ga yema ãëxgacü rü naãewa ñanagürü:

“Choma rü tama Tupanaxü changechaü, rü taxüexüma chachuáxchaü. ⁵—Natürü ngëma choxü na nachixeweechaxüçex i ñaã nge, rü noxtacüma tá ngüxü charüngüxëë na tama yeücürü choxü nachixeweechaxüçex”, ñanagürü. ⁶ Rü Cori ga Ngechuchu rü ñanagürü: —Yema nixü ga norü ore ga yema ãëxgacü ga chixexü. ⁷—¿Taux ëxna i Tupana rü paxa tüxü ínapoxüxü ya yixema duüxë ya tüxü nayaxuxe i ngëxguma chütacü rü ngunecü rü norü ngüxëçëcëx nüxna tacaxgu i tümaärü yumüxëwa? ⁸—Rü pemaã nüxü chixu rü Tupana rü paxatáma tüxü narüngüxëë. Natürü ngëxguma wenaxärü núma chaxüxgu i choma i Tupana Nane na duüxüxü chiixü, çrü ñuxre i duüxüğü i aixcüma yaxögüxüxü tá ichayangau i ñoma i naãnewa? —ñanagürü ga Ngechuchu.

Ore i Parichégu ixuxü rü dëruariü deruügu ixuxü

⁹ Rü Ngechuchu rü nüxü nixu ga ñaã ore nachiga ga yema duüxüğü ga nügü írümegünetaxü rü tama togüxü cuáxchaügüxü. ¹⁰ Rü ñanagürü: —Taxre

ga yatü rü tupauca ga taxünewa nayayumüxëgü. Rü wüxi rü Parichéu nixí, rü yema to rü wüxi ga yatü ga Dumaärü äëxgacüçèx diëru ngíxü dexü nixí. ¹¹—Rü yema Parichéu rü yexma nachi, rü ñaãacü nayumüxë:

“Pa Tupanax, moxë cuxna chaxã erü tama togü i duüxügürü chixí. Rü tama togürü changítèx, rü tama ngëmarüü taxü i chixexü chaxü rü éxna wüxi i nge i ätecümaã ichape. Rü bai i ñaã yatü i Dumaärü äëxgacüçèx diëru ngíxü dexürüü chixí. ¹²—Choma rü guxcü ya yüxügu rü taxreëxpüxcüna chaxaure rü tama chachibü na cugu charüxinüxüçèx. Rü chorü diëruwa rü guxüguma meã cuxna chanaxã i ngëma cuxna üxü”, ñanagürü. ¹³—Natürü ga guma yatü ga Dumaärü äëxgacüçèx diëru ngíxü decü, rü yaxügu narüxãüx. Rü namuü ga daxü na nadawenüxü, rü yema norü ngechaümaã nügü napaxremü, rü ñanagürü:

“Pa Tupanax, ¡Cuxü changechaütümüü! Erü wüxi i pecaduãxü chixí”, ñanagürü ga guma yatü. ¹⁴—Rü ngëmacèx pemaã nüxü chixu rü guma yatü ga Dumaärü äëxgacüçèx diëru ngíxü decü rü yexguma napatacèx nataegugu rü Tupanapëxewa rü mecü nixí. Natürü yema Parichéu rü Tupana rü tama namaã nataãe. Erü texé ya tügü icuëxüxüxe rü Tupana tá tüxü naxãnexëe. Natürü texé ya tama tügü icuëxüxüxe rü Tupana rü tá tüxü nicuëxüxü — ñanagürü ga Ngechuchu.

Ngechuchu rü meã buãxgüxü nayaxu
(Mt 19.13-15; Mr 10.13-16)

¹⁵ Rü yéma Ngechuchuxütawa tüxü tagagü ta ga buãxgü na tüxü yangögüchigüxüçèx. Natürü yexguma norü ngüexüügü yemaxü dauxgügu rü tüxü ningagü ga guxema tümamacüçègü Ngechuchuxütawa tüxü gagüxe. ¹⁶ Natürü Ngechuchu rü nügüxütawa tümacèx naca ga guxema buãxta rü ñanagürü norü ngüexüügüxü: —Chanaxwëxe i chauxütawa naxí i buxügü. ¡Rü täxü i nüxna penachuxuxü! Erü Tupana äëxgacü íixüxüwa rü tümacèx nixí ya yíxema ñaã buxügürüü ixígüxe. ¹⁷—Aixcüma pemaã nüxü chixu rü texé ya tama wüxi i buxürüü Tupanaxü yaxüxe na tümäärü äëxgacü na yíxüçèx, rü tagutáma nagu taxücu i Tupana äëxgacü íixüxüwa —ñanagürü ga Ngechuchu.

Wüxi ga yatü ga diëruãxüchicü Ngechuchumaã nidexa
(Mt 19.16-30; Mr 10.17-31)

¹⁸ Rü wüxi ga yema Yudiügürü äëxgacü rü Ngechuchuna naca rü ñanagürü: —Pa Ngüexëëruü ya Mecüx, ¡tacü tá chaxüxü na chanayaxuxüçèx i maxü i taguma güxü? —ñanagürü. ¹⁹ Rü Ngechuchu nanangãxü rü ñanagürü nüxü: —¿Tüxcüü “Mecü” ñacurügü choxü? Erü Tupanaxícatama nixí ya mecü ixícü, rü nataxuma i to i mecü ixíxü. ²⁰—Cuma nüxü cucuèx i Tupanaärü mugü i ñaxü:

“¡Tãütáma naí i ngemaã icupe, rü tãütáma cumáéta, rü tãütáma cungítèèx, rü tãütáma doraxü quixu i togüchiga, rü tümaga naxínü ya cunatü rü cue!” ñaxü. ²¹ Rü yexguma ga guma yatü rü ñanagürü Ngechuchuxü: —Woetama chorü bucüma meãma chayanguxëe i guxüma i ngëma mugü i nüxü quixuxü —ñanagürü. ²² Rü yemaxü naxínügu ga Ngechuchu rü ñanagürü: —Wüxixicatama cuxü nataxu, rü ngëma nixí na namaã cutaxexü i guxüma i curü ngëmaxügü rü togü i ngearü ngëmaxüãxgüxüna na cunaxãxü i curü natanü, rü ngëxguma rü tá cuxü nangëxma i cuchica i daxügüxü i naãnewa. Rü ñuxüchi marü name i chowe curüxü —ñanagürü. ²³ Natürü yemaxü naxínügu ga guma yatü rü poraãcü inayarümaãchi, yerü namuärü diëruãxüchi. ²⁴ Rü yexguma Ngechuchu nüxü dëuxgu ga ñuxãcü na nangechaüxü, rü ñanagürü

nüxü ga norü ngüexüğü: —Naguxchaxüchi tá nixí na Tupana ãëxgacü íxíxüwa na yachocuxü i ngëma diëruãxüchigüxü. ²⁵ —Rü dücax, wüxi i cameyu rü taxucürüwama wüxi ya ucumaxëtüwa naxüpetü. Rü ngëxgumarüü ta nixí i wüxi i duüxü i diëruãxüchixü rü taxucürüwama Tupana ãëxgacü íxíxüwa nixücu [ega norü diëruaguama naxínügu rü tama yaxöðgu —ñanagürü.]

²⁶ Rü yexguma yemaxü naxínüëgu ga duüxüğü rü ñanagürüğü: —¿Éxna texé tá ya nayaxüxe i maxü i taguma gúxü? —ñanagürüğü. ²⁷ Rü Ngechuchu ñanagürü nüxü: —Duüxüğü rü taxuacüma nüğü namaxëë, natürü Tupanaãxü rü natauxcha na namaxëxëëãxü —ñanagürü. ²⁸ Rü Pedru ñanagürü Ngechuchuxü: —Pa Corix, toma rü yéma tanawogü ga guxüma ga torü yemaxüğü na cuwe tarüixüxcëx —ñanagürü. ²⁹⁻³⁰ Rü yexguma ga Ngechuchu rü ñanagürü nüxü ga norü ngüexüğü: —Aixcüma pemaã nüxü chixu rü texé ya Tupanacë tümapatana, rü éxna tümanatüna, rü éxna tümaëna, rü éxna tümaëneëgüna, rü éxna tümaëyëxgüna, rü éxna tümamëxna, rü éxna tümaxäcügüna ngema ixüxë na Tupanaãxü tapuracüxüxcëx, rü ñoma i nañewa tátama poraäcü tanayaxu i tümaärü natanü. Rü daxüguxü i nañewa rü tá ta tanayaxu i maxü i taguma gúxü —ñanagürü.

Ngechuchu rü wenaxärü nanaxunagü ga norü yuxchiga
(Mt 20.17-19; Mr 10.32-34)

³¹ Rü Ngechuchu rü noxrüwama naxcëx naca ga norü ngüexüğü, rü ñanagürü nüxü: —Ñüxma rü Yerucharëüwa tá taxí na ngema yan-guxüxcëx i guxüma ga yema ore ga nuxcümaügüxü ga Tupanaärü ore-ärü uruügü ümatüxü ga chauchiga. ³² —Rü Yerucharëüxcüãx i duüxüğü rü tá to i nachüüñanecüãxna choxü namugü. Rü ngëma duüxüğü rü tá chaugu nidauxcüraügü, rü tá chomaã naguxchigagü, rü tá chauchiwewa nacuaixgüe. ³³ —Rü tá choxü naçuaixgü, rü yixcüra rü tá choxü nimëxgü. Natürü tomaëxpüx i ngunëxüguwena rü tá wenaxärü chamaxü —ñanagürü. ³⁴ Natürü yema norü ngüexüğü rü tama nüxü nacuëxgüëga ga na tacüchiga yíxü ga yema ore ga namaã nüxü yaxuxü. Yerü poraäcü nüxü naguxcha ga aixcüma nüxü na nacuëxgüxcëx.

Ngechuchu nanamexëë ga wüxi ga ngexetücü ga Yericüwa
(Mt 20.29-34; Mr 10.46-52)

³⁵ Rü yexguma Ngechuchu ñäne ga Yericüwa nguxchaügu, rü yéma namacüwawa narüto ga wüxi ga yatü ga ngexetücü ga diërucëx yéma iwémécü. ³⁶ Rü yexguma guma ngexetücü nüxü ínügu ga muxüma ga duüxüğü na yéma chopetüxü, rü duüxüğüna naca ga tacü na ngupetüxü. ³⁷ Rü nanangãxüğü, rü ñanagürüğü: —Ngechuchu ya Nacharëtüxcüãx nuã naxüpetü —ñanagürüğü. ³⁸ Rü yexguma ga guma ngexetücü rü tagaäcü ñanagürü: —Pa Ngechuchux, Pa Dabítanüxüx, ¡cuxüü changechaütümüü! —ñanagürü. ³⁹ Rü yema duüxüğü ga Ngechuchupëxegu íxü, rü nanangagü ga na iyanangeáxüxcëx. Natürü guma ngexetücü rü yexeraäcü tagaäcü ñanagürü: —Pa Dabítanüxüx, ¡cuxüü changechaütümüü! —ñanagürüama. ⁴⁰ Rü yexma nayachiächü ga Ngechuchu, rü duüxüğüxü namu na naxütawa nagagüãxüxcëx. Rü yexguma marü naxütawa nanguxgu, rü guma ngexetücüna naca ga Ngechuchu, rü ñanagürü: ⁴¹ —¿Tacü i cunaxwëxëxü na cumaã chanaxüxü? —ñanagürü. Rü guma ngexetücü nanangãxü rü ñanagürü: —Pa Corix, chanaxwëxe na choxü quidauchixëëxü —ñanagürü. ⁴² Rü Ngechuchu ñanagürü nüxü —¡Idauchi! Rü marü cuxcëx nitaane erü cuyaxö —ñanagürü. ⁴³ Rü yexgumatama nidauchi

ga guma ngexetücü, rü Ngechuchuwe narüxü, rü Tupanaxü nicuëxüüchigü. Rü guxüma ga duüxügü ga nüxü daugüxü ga yema ngupetüxü rü Tupanaxü nicuëxüügü ta.

19

Ngechuchu rü Zaquéuchiga

¹ Rü Ngechuchu rü Yericúarü ñanewa naxüpetü. ² Rü yéma nayexma ga wüxi ga yatü ga diëruäxüchixü ga Zaquéuü äegaxü. Rü nüma nixü ga naëru ga yema yatügü ga Dumaärü äëxgacüçëx diëru ngixü ideetanüxü. ³ Rü yema Zaquéu rü poraäcü nüxü nangüchaü ga Ngechuchuxü na nadauxü na nüxü nacuáxüçëx. Natürü taxuacüma nüxü nadau, yerü namuxüchi ga duüxügü, rü ñuxüchi nanuxchanexüchi ga nümax. ⁴ Rü yemacëx Ngechuchupëxegu nayangu, rü namacüwawa wüxi ga naügu naxüinagü na Ngechuchuxü nadauxüçëx ga yexguma yéma naxüpetügu. ⁵ Rü yexguma yéma naxüpetügu ga Ngechuchu, rü daxü nadau natüüwa ga guma naü. Rü ñanagürü nüxü: —Pa Zaquéu, ipaxa íruxü i ngema! Erü cupatawa tá changu i ñuxma —ñanagürü. ⁶ Rü paxa inarüxü ga Zaquéu, rü taäëäcüma Ngechuchuxü nayaxu. ⁷ Rü yexguma yemaxü nadaugüga ga duüxügü, rü guxüma inanaxügüe ga chixri Ngechuchuchiga na yadexagüxü. Rü ñanagürügü: —¿Ñuxäcü i nüma rü wüxi i duüxü i pecaduäxüpatawa nangu? —ñanagürügü. ⁸ Rü yexguma ga Zaquéu rü inachi rü ñanagürü Ngechuchuxü: —Düçëx, Pa Corix, choma rü ngearü diëruäxgüxüna tá chanaxä i ngäxügu i guxüma i chorü ngëmaxügü. Rü ngëxguma chi texë tüxü chawomüxëëäcüma tüxü changüxgu, rü ägümücüexpüxcüna tá tüxü ngixü chataeguxëë i ngëma tümaärü diëru —ñanagürü. ⁹ Rü Ngechuchu rü ñanagürü nüxü: —Rü ñoma i ngunexügu cupatawa nangu i maxü i taguma güxü, erü cuma rü ta rü Abráürü cuyaxö. ¹⁰ —Rü choma i Tupana Nane na duüxüxü chiüxü, rü ñoma i nañewa chaxü na naxcëx chayadauxüçëx i ngëma duüxügü i iyarütauxëxü na chanamaxëxëxüçëx —ñanagürü.

Ore i diëruü ixüü (Mt 25.14-30)

¹¹ Rü yoxni yema Ngechuchuarü ore inaxüñüeyane ga duüxügü, rü Ngechuchu rü wüxi ga to ga ore ga cuëxruüxü namaä nixu, yerü marü Yerucharëüxü ningaica, rü duüxügü nagu rüxüñüëgu rü paxa tá ínangu ga Tupana na norü äëxgacü yüxüçëx. ¹² Rü yexguma ga Ngechuchu rü nügüchiga nidexa rü ñanagürü nüxü: —Nayexma ga wüxi ga yatü ga taxü ga cori ixücü ga nayaxücü ga ore na nachüñäneärü äëxgacüxütawa naxüxüçëx ga yaxüwa na yema äëxgacü nüxü unetaxüçëx na guma nawa ne naxüxüne ga ñäneärü äëxgacü yüxüçëx. ¹³ —Rü yexguma tauta inaxüächigu, rü naxcëx nangema ga 10 ga norü duüxügü. Rü wüxichigüna ngixü naxä ga wüxıtachinü ga tatanücü ga diëru. Rü ñanagürü nüxü:

“iNgümaä pepuracüe rü ngixü pimuxëë i ñaä diëru ñuxmatáta chataegu!” ñanagürü. ¹⁴ —Natürü yema ñanecüäx ga duüxügü rü naxchi naxaie ga guma cori. Rü yemacëx nawenaäma nayamugü ga ñuxre ga orearü ngeruügu na nachüñäneärü äëxgacümaä nüxü yanaxugüxüçëx na tama nanaxwëxëgüxü na norü äëxgacüxü na yüxüçëx ga guma cori. ¹⁵ —Natürü nachüñäneärü äëxgacü rü nayangucuchixëëäma ga guma cori. Rü ñuxüchi ga guma cori rü norü ñanecëx nataegu na yéma äëxgacü na yüxüçëx. Rü yexguma ínanguxgu rü

naxcêx nangema ga yema 10 ga norü duüxügü ga dîêru nüxna ngîxü naxâxü, yerü nüxü nacuáxchaü ga ñuxrechigü ngîxü na yamuxêêxü ga norü dîêru ga wüxichigü ga yema norü duüxügü. ¹⁶ —Rü yema nüxîra dîêru nüxna ngîxü naxâxü rü norü corixütawa nangu, rü ñanagürü:

“Pa Corix, curü dîêru rü 10 êxpüxcüna ngîxü chimuxêê”, ñanagürü. ¹⁷ —Rü guma Cori ga yexwaca âêxgacüxü ingucuchicü rü nanangâxü, rü ñanagürü:

“Wüxi i mexü i chorü duüxü quixi. Maneca meäma namaã cupuracü i ngêma íraxü i dîêru i cuxna chaxâxü. Rü ñuxma rü 10 ya îänegüarü âêxgacüxü tá cuxü chixîxêê”, ñanagürü. ¹⁸ —Rü yéma nangu ga to ga norü duüxü, rü ñanagürü:

“Pa Corix, curü dîêru rü wüximêêxpüxcüna ngîxü chimuxêê”, ñanagürü. ¹⁹ —Rü norü cori nanangâxü rü ñanagürü nüxü:

“Cuma rü wüximêêxpüx ya îänegüarü âêxgacüxü tá cuxü chixîxêê”, ñanagürü. ²⁰ —Rü yéma nangu ga to ga norü duüxü rü ñanagürü nüxü:

“Pa Corix, ñaã iyixi i curü dîêru. Rü wüxi ya dechugu ngîxü chanuque, rü ngêmaãcü ngîmaã changuxü. ²¹ —Yerü cuxcêx chamuü, erü wüxi i yatü i aüxü quixi. Rü cunayauxtanü i ngêma tama cuxrü ixîxü, rü cunayaxu i nanetüarü o i ngextá tama cuma ícutuoxüwa”. ²² —Rü yexguma ga guma âêxgacü rü ñanagürü nüxü:

“Wüxi i chorü duüxü i chixexü quixi i cumax. Rü curü oretama nixi i cuxü ixuxü na cuxixexü. Marü nüxü cucuêxchirêx ga na chaxaüxü, rü chanayautanüxü i ngêma tama choxrü ixîxü, rü chanayaxuxü i nanetüarü o i tama choma ichatoxü. ²³ —¿Natürü tüxcüü tama bancugu choxü ngîmaã cünguxü i chorü dîêru na ngema choxü ngîxü yamuxêêgüxcêx, rü ngêmaãcü mucü ngîxü na chayaxuxücêx i ngêxguma íchanguxu?” ñanagürü. ²⁴ —Rü yexguma ga âêxgacü rü yema yexmagüxümaã nüxü nixu, rü ñanagürü:

“¡Nüxna ngîxü peyaxu i ngêma dîêru, rü ngêma 10 i dîêru nüxü ngêxmaxüna ngîxü pexâ!” ñanagürü. ²⁵ —Rü nümagü rü nanangâxügü, rü ñanagürügü:

“Natürü, Pa Corix, nüma rü marü nüxü ingêxma i 10 i dîêru”, ñanagürügü. ²⁶ —Rü guma âêxgacü nanangâxü, rü ñanagürü:

“Pemaã nüxü chixu rü texé ya chauga ñnûxê rü yexera tá tüxna chanaxâ. Natürü texé ya tama chauga ñnûxê rü tá tüxna chanayaxu i woo ngêma íraxü i tüxü ngêxmaxü. ²⁷ —Rü yema chorü uwanügü ga tama naxwêxegüxü ga norü âêxgacüxü na chiüxü, ¡rü nuã penagagü, rü nuã chopêxegu peyadai!” ñanagürü.

Ngechuchu rü Yerucharéügu naxücu

(Mt 21.1-11; Mr 11.1-11; Cu 12.12-19)

²⁸ Rü yema orexü yaxuxguwena ga Ngechuchu, rü inixüchigü ga Yerucharéüwa na naxüxü. ²⁹ Rü yexguma marü nawa nangugüchaügu ga guma îänegü ga Bechagué rü Betániã ga Oríbunecüarü Mêxpüneärü ngaicamana yexmagüne, rü Ngechuchu nanamu ga taxre ga norü ngüexügü.

³⁰ Rü ñanagürü nüxü: —¡Gua îänexâcüwa pexi! Rü ngêxma tá nüxü peyangau i wüxi i buru i ngexwaca yaxü i ngêxma ngaxüxü i taguma texé natagu aunagüxü. ¡Rü peyawêxü, rü nuã penaga! ³¹ —Rü ngêxguma texé pexna çaxgu na tacücêx peyawêxüxü i ngêma buru, ¡rü tümamaã nüxü pixu rü ñapegügü:

“Torü Cori nanaxwêx”, ñapegügü tüxü! ³² Rü yéma naxi ga yema taxre ga norü ngüexügü. Rü yexma nüxü nayangau ga yema buru ga Ngechuchu namaã nüxü ixuxürü. ³³ Rü yexguma yawêxügüãgu ga yema buru, rü

norü yoragü rü yema ngúexüügüna nacagüe, rü ñanagürügü: —¿Tüxcüü peyawëxü i ngëma buru? —ñanagürügü. ³⁴ Rü nümagü nanangäxügü, rü ñanagürügü: —Rü tayawëxü erü torü Cori nanaxwëxe —ñanagürügü. ³⁵ Rü Ngechuchuxütawa nanagagü ga yema buru. Rü yema norü ngúexügü rü norü gáuxüchirumaã nanatütägü. Rü ñuxüchi Ngechuchuxü nataga nax-aunagüxëëgü. ³⁶ Rü duüxügü rü Ngechuchupëxewa norü gáuxüchirumaã nayachmagü ga nama. ³⁷ Rü yexguma inaxügüäga na ínaxügüxü nawa ga yema nama ga Oríbunecüarü Mèxpünewa yarüdaexü, rü guxüma ga yema duüxügü ga yaxögüxü ga nawe rüixü rü inanaxügü ga taãëacüma aita na naxüexü rü tagaãcü Tupanaxü na yacuëxüügüxü naxcëx ga guxüma ga yema cuëxruügü ga taxü ga nüxü nadaugüxü ga Tupanaärü poramaã naxüxü ga Ngechuchu. ³⁸ Rü ñanagürügü: —¡Namecümáxüchi ya daa torü äëxgacü ya Tupanaégagu núma ücü! ¡Rü pema rü ta, Pa Daxüçüäx, rü petaãxëgü rü nüxü picuëxüügü ya Tupana! —ñanagürügü. ³⁹ Rü yéma duüxügütanüwa nayexmagü ga ñuxre ga Parichéugü. Rü ñanagürügü Ngechuchuxü: —Pa Ngúexëëruüx, ¡Yangagü i ngëma cuwe rüixü i duüxügü na yanachianegüxüçex! —ñanagürügü. ⁴⁰ Natürü Ngechuchu nanangäxü rü ñanagürü nüxü: —Pemaã nüxü chixu rü ngëxguma chi iyanangeëxgüga i ñaã duüxügü, rü daa nutagü ya namacüwawa ngëxmagücü rü chi nüxü aita naxüe —ñanagürü. ⁴¹ Rü yexguma Yerucharéüärü ngaicamana nanguxgu ga Ngechuchu, rü guma íñecüäx ga duüxügüçex naxaxu. ⁴² Rü ñanagürü: —Pa Yerucharéüçüäxgü, chierü ñoma i ngunexügu nüxü pecuëxgu na texé aixcüma taãë pexna äxü. Natürü ngëma rü pexchawa inüçx i ñuxma, rü taxuacüma nüxü pecuëx. ⁴³ —Rü tá guxchaxügü pexü naxüpetü. Rü perü uwanügü tá nanaxü i norü poxüchica i norü guxüçüwawa ya perü íäne. Rü norü churaragü tá pexü ínachoeguächi, rü guxüçüwawa tá pexcëx ne naxü. ⁴⁴ —Rü tá nagu napogüe ya perü íäne, rü tá pexü nadai. Rü taxucütáma ya nuta ngextá nügüxëtü nanugüxüra i perü íäneärü poeguxütapüwa. Rü ngëmaãcü tá pexü naxüpetü, yerü tama nüxü pecuëxgüchaü ga yexguma Tupana petanügu naxüänegu —ñanagürü.

Ngechuchu rü tupauca ga taxünewa ínanawoxü ga duüxügü ga yéma tax-egüxü

(Mt 21.12-17; Mr 11.15-19; Cu 2.13-22)

⁴⁵ Rü Ngechuchu rü tupauca ga taxünewa nangu rü yexma naxücu. Rü inanaxügü na ínawoxüäxü ga yema duüxügü ga tupauca ga taxünewa tax-egüxü. ⁴⁶ Rü Ngechuchu rü ñanagürü nüxü: —Tupanaärü ore i ümatüxüwa rü ñanagürü:

“Chopata rü yumüxëpataü nixü”.

Natürü pema rü ngítëëxgüxüpataü peyaxíxëë —ñanagürü. ⁴⁷ Rü guxü ga ngunexügu rü tupauca ga taxünewa nayanguxëëtae ga Ngechuchu. Natürü ga paigüarü äëxgacügü, rü ngúexëëruügü ga Moíchéarü mugüwa nguxëëtaegüxü, rü Yerucharéüärü äëxgacügü, rü naxcëx nadaugü ga ñuxäcü tá na yamëxgüäxüçex. ⁴⁸ Natürü taxucürüwa çacü namaã naxügü, yerü guxüma ga duüxügü rü namaã nataãëgü, rü meã inarüxüñüë ga norü ore.

20

Ngechuchuna nacagü na texéarü oregagu tupauca ga taxünewa nanguxëëtaexü

(Mt 21.23-27; Mr 11.27-33)

¹ Wüxi ga ngunexü ga Ngechuchu rü tupauca ga taxünewa nayexma. Rü nanangüexëë ga duüxügü, rü namaã nüxü nixu ga Tupanaärü ore. Rü yexguma iyadexayane rü yéma nangugü ga paigüarü äëxgacügü, rü ngüexëëruüügü ga Moïchéarü mugüwa nguxëëtaegüxü, rü Yudiügarü äëxgacügüerugü. ² Rü ñanagürügü nüxü: —¿Texëarü mugagu nixi i cunaxüxü i ngëma núma cuxüxü? ¿Rü texé cuxü tamu na cunaxüxücëx i ngëma? —ñanagürügü. ³ Rü yexguma ga Ngechuchu rü ñanagürü nüxü: —Choma rü tá ta pexna chaca, rü chanaxwëxe i choxü pengãxügü. ⁴ —¿Rü texé tanamu ga Cuáü na duüxügüxü ínabaiüxëëxücëx? ¿Pexcëx rü Tupana yíxü ga namucü rü ëxna duüxügümare? —ñanagürü. ⁵ Rü yexguma ga Parichëügü rü inanaxügüe ga nügümaã na yaporagatanücüüxü. Rü nügümaãtama ñanagürügü: —¿Ñuxü ñagügüxü tá? Erü ngëxguma chi:

“Tupana núma nanamu”, ñagügu, rü núma rü chi ñanagürü tüxü:

“¿Rü tüxücüü ga tama nüxü peyaxögüxü?” ñanagürü chi tüxü. ⁶ —Rü ngëxguma chi ñagügu:

“Yatügümare nuã nanamu”, ñagügu, rü guxü i duüxügü chi nutamaã tüxü ínamuxüchigü, rü tüxü chi nadai. Erü nümagü i duüxügü rü nagu narüxñnë na Tupana yíxü ga Cuáüxü mucü. ⁷ Rü Ngechuchuxü nangãxügü rü ñanagürügü: —Tama nüxü tacuëx ga texé núma na namuxü ga Cuáü ga baiüxëëruü —ñanagürügü. ⁸ Rü yexguma ga Ngechuchu rü ñanagürü nüxü: —Choma rü tá tãütáma pemaã nüxü chixu na texé choxü muxü na chanaxüxücëx i ngëma choxna naxcëx peçaxü —ñanagürü.

*Ore ga puracütanüxü ga chixexügu ixuxü
(Mt 21.33-44; Mr 12.1-11)*

⁹ Rü inanaxügü ga Ngechuchu ga duüxügümaã na yadexaxü. Rü ñaã ore ga cuëxruüxü namaã nixu, rü ñanagürü: —Nayexma ga wüxi ga yatü ga wüxi ga ubanecü ücü ga norü naãnewa. Rü ñuxüchi ñuxre ga puracütanüxüna nanaxã na nüxna nadaugüxücëx rü yixcama rü norü yoramaã na yayauxyegüãxücëx ga yema norü o. Rü ñuxüchi ga guma yatü rü nixü ga yéma rü nuxcüma nataegu. ¹⁰ —Rü yexguma nawa nanguxgu ga na yadauxü ga yema ubagü, rü guma yatü rü yéma puracütanüxügüxütawa nanamu ga wüxi ga norü duüxü na naxcëx íyaçaxücëx ga yema ubagü ga nüxna üxü. Natürü yema puracütanüxügü rü nanaçuaixgü ga guma yatüarü duüxü, rü taxuüma ga uba nüxna naxägü. Rü yemaãcü ínayamugü. ¹¹ —Rü yexguma ga guma yatü rü wenaxärü to ga norü duüxü yéma ta namu. Natürü ga yema puracütanüxügü rü chixexü namaã nixugüe, rü nanaçuaixgü, rü taxuüma ga uba nüxna naxägü. Rü yemaãcü ínayamugü. ¹² —Rü wenaxärü to ga norü duüxü yéma ta namu ga guma yatü. Natürü ga yema puracütanüxügü rü nanapixëë, rü ínatëxüchigü ga yema naãnewa. ¹³ —Rü düxwa ñanagürü ga guma naãneärü yora:

“¿Tacü tá chaxüxü i ñuxmax? Rü name nixi i chaune ya nüxü changechaücü ngëma chanamu. Rü ngëxguma nüxü nadaugügu rü bexmana naga tá naxñnë”, ñanagürü. ¹⁴ —Natürü ga yema puracütanüxügü rü yexguma guma yatü nanexü nadaugügu, rü nügümaã ñanagürügü:

“Ñaãrü tá nixi i ñaã naãne i yixcama. ¿Rü ngíã tayamëxgü na tóru na yíxücëxi!” ñanagürügü. ¹⁵ —Rü ínatëxüchigü ga yema naãnewa, rü nayamëxgü —ñanagürü ga Ngechuchu. Rü yexguma ga Ngechuchu rü duüxügüna naca, rü ñanagürü: —¿Tacü tá ngëma puracütanüxümaã naxü i ngëma naãneärü yora i ñuxmax? ¹⁶ —Rü ngëma tá naxü rü tá

nanadai i ngēma puracūtanūxūgū, rü togūna tá nanaxā i norū naāne — ñanagürü ga Ngechuchu. Rü yexguma yemaxū naxīnūēgu ga duūxūgū rü ñanagürügü: —Chierü tama ngēmaācū nangupetūxēēāxgu ya Tupana — ñanagürügü. ¹⁷ Natürü Ngechuchu rü nüxū nadawenü, rü ñanagürü nüxū: —¿Natürü ñuxū ñaxūchiga nixī i ngēma Tupanaārü ore i ūmatūxū i ñaxū?: “Yima nuta ya mecü ya ĩrū ūruūgū nüxū oechirécü, rü ñuxma rü yimatama nixī ya Tupana nüxīra yaxūcuchicü na namaā inaxūgūāxū ya ĩpata”, ñaxū. ¹⁸ Rü ñanagürü ta ga Ngechuchu: —Texé ya yima nutamaā yarūñaxē, rü tá itapoūgū. Rü yixema tūmaetūgu nanguxe ya yima nuta, rü tá tüxū niñáixmü —ñanagürü ga Ngechuchu. ¹⁹ Rü ga paigüarü āēxgacūgü rü ngūexēēruūgū ga Moīchēarü mugüwa nguxēētaegūxū, rü yexgumatama Ngechuchuxū niyaxūgūchá. Yerü nüxū nacūēxgū ga nachiga na yīxū ga yema ore ga cuēxruū ga nüxū yaxuxū. Natürü tama nayayauxgū, yerü duūxūgūxū namuē.

Āēxgacūaxū dīērumaā naxūtanūxūchiga
(Mt 22.15-22; Mr 12.13-17)

²⁰ Rü yemacēx ga yema paigüarü āēxgacūgü rü Ngechuchuxūtawa nanamugü ga ñuxre ga norū duūxūgū na mexū i duūxūgürü yēma iyanaxīnūēxūcēx natürü naxcēx na nadaugūxūcēx ga ñuxācū nachīñāneārü āēxgacūxūtawa Ngechuchuxū na ĩnaxuaxūgūxūcēx. ²¹ Rü yemacēx Ngechuchuna nacagü rü ñanagürügü: —Pa Ngūexēēruūx, toma nüxū tacuēx rü aixcūma nixī i ngēma nüxū quixuxū rü ngēma namaā cungūxēētaexū. Rü tama duūxūārü düxētūxūnegu cudawenü erü nacūma nixī i cungugūxū. Rü aixcūma cunangūxēē i duūxūgū na Tupana naxwēxexūācūma namaxēxūcēx. ²² —Rü dücax, ngēma ĩāneārü dīēru i āēxgacū ya tacū ya Dumacūāx naxwēxexū na tanaxūtanūxū, ¿rū namexū yīxū na nüxū tanaxūtanūxū rü ēxna tama? —ñanagürügü. ²³ Natürü Ngechuchu nüxū nacūēxama na chixexūgu naxīnūēxū ga yema duūxūgū, rü yemacēx ñanagürü nüxū: —¿Tūxcū i chixexūgu choxū penguxēēchaū? ²⁴ —¿Choxū ngīxū pewé i wūxi i dīēru na ngīxū chadauxūcēx! ¿Rü texēchicūnēxā rü texéēga ngīgu ūx? —ñanagürü. Rü nanangāxūgū rü ñanagürügü: —Dumacūāx ya āēxgacū ya tacūchicūnēxā nixī —ñanagürügü. ²⁵ Rü yexguma ga Ngechuchu rü ñanagürü nüxū: —¿Āēxgacūna ngīxū pexā i ngēma āēxgacūarü ĩxīcū, rü Tupanana ngīxū pexā i ngēma Tupanaārü ĩxīcū! —ñanagürü. ²⁶ Rü yemaācū ga Ngechuchu rü woo norū orewa rü taxucürūwama chixexūgu nananguxēēgū ga duūxūgūpēxewa, yerü meāma nanangāxū. Rü guxūma ga duūxūgū rü nangeēxgūmare yerü nabaixāchiāēgū namaā ga yema norū ore.

Chaduchēgū rü Ngechuchuna nacagūe rü ngoxi wena namaxē i duūxūgū
(Mt 22.23-33; Mr 12.18-27)

²⁷ Rü Ngechuchuxūtawa ĩyadaugū ga ñuxre ga Chaduchēgū. Rü nūmagü nixī ga nagu naxīnūēxū na tagutāma wena namaxēxū i yuexū. Rü yemacēx Ngechuchuxū ñanagürügü: ²⁸ —Pa Ngūexēēruūx, Moīchēarü mugüwa rü ñanagürü: “Ngēxguma wūxi ya yatū naxmēx ngexacūyane nayuxgu, rü name nixī i naēneētama ngīmaā naxāmēx i ngēma yutecü i naxūmēx, na ngēmaācū naxāxācūxūcēx nüxū ya naēneē ya marū yucū”, ñanagürü ga yema ore. ²⁹ Rü ñanagürügü ta ga Chaduchēgū: —Nayexma ga 7 ga nūgūeneē. Rü naxāmēx ga guma yacū, natürü tauta naxāxācūyane nayu. ³⁰ —Rü yexguma naī ga naēneē nüxī ngīmaā naxāmēx ga yema ngecū.

Rü guma rü ta nayu, rü nangexacü. ³¹ —Rü yexguma rü naĩ ga nañeñ nũxĩ ngĩmaã naxãmèx. Rü yemaãcü gucüma ga guma 7 ga nüğüeneëğü rü ngĩmaã naxãmèx ga yema nge. Rü gucüma nayue tauta naxãxãcüyane. ³² —Rü ngĩma rü ta düxwa iyu ga yema nge. ³³ Rü ngëxguma yuexũ wena maxëgu, çrũ ngeçürüüçü naxmèx tá iyixĩ i ngëma nge? Yerü yexguma namaxëgu rü gucüma ga guma 7 ga nüğüeneë ngĩmaã naxãmèx —ñanagürüğü. ³⁴ Rü yexguma ga Ngechuchu rü nanangãxũ rü ñanagürü: —Ñoma i nañewa rü yatügü rü nixãmëxğü rü ngeçüğü rü nixãtegü. ³⁵ —Natürü ngëma duũxüğü i Tupanapëxewa mexũ na wena namaxëxũ na daxüğüxũ i nañewa naxĩxũcèx rü ngema rü tãütãma nixãmëxğü rü ëxna nixãtegü. ³⁶ —Erü ngema rü tagütãma nayue. Rü daxüçũãx i Tupanaãrũ orearü ngeruüğürüũ tá nixĩğü. Rü aixcüma Tupanaxãcüğü nixĩğü erü yuwa ñarüdagü. ³⁷ —Rü yema ore ga naĩxãcü ga iyauratanüçüxũnechigawa, rü Moĩché tüxũ nüxũ nacüexëë rü yuexũ rü tá wena na namaxëxũ. Erü yema orewa, rü ñanagürü ga Cori ga Tupana:

“Choma nixĩ i Abrãũrũ Tupana, rü Ichaãrũ Tupana, rü Acobuarü Tupana”, ñanagürü. ³⁸ —Rü ngëmawa nüxũ tacüex rü woo ñoma i nañewa nayuegu i duũxüğü, natürü Tupanacèx rü guxüğüma namaxë —ñanagürü. ³⁹ Rü yexguma ga ñuxre ga ngüexëëruüğü ga Moĩchearü mugüwa ngüxëëtaegüxũ rü ñanagürüğü: —Aixcüma meãma nüxũ quixu, Pa Ngüexëëruũx —ñanagürüğü. ⁴⁰ Rü yemawena rü marü namuñë ga ñacüchigacèx Ngechuchuna na nacagüexũ.

*¿Texé nane nixĩ ya Cristu?
(Mt 22.41-46; Mr 12.35-37)*

⁴¹ Rü Ngechuchu rü ñanagürü nüxũ: —¿Tüxcüũ duũxüğü nüxũ nixügü rü Cristu rü nuxcümañcü ga ãëxgacü ga Dabítã nixĩ? ⁴²⁻⁴³ —Yerü Dabítãma ñããcü nanaxümatü ga Wiyægürü poperawa:

“Tupana rü chorü Cori ya Cristuxũ ñanagürü: ‘¡Nuã chorü tügüncüwawa rüto, ñuxmatãta cuxmëxwa chanangëxmagüxëë i curü uwanüğü na namaã icucüaxũcèx!’ ”
ñããcü nanaxümatü. ⁴⁴ Rü ñanagürü ga Ngechuchu: —¿Ñuxüçürüwa i Dabítã yĩxũ ya Cristu ega nümatãma ga Dabĩ rü norü Corimaã naxuãgu? —ñanagürü.

*Ngechuchu rü nüxũ nixu na tama nameãrũ maxũãxgüxũ ga yema ngüexëëruüğü ga Moĩchearü mugüwa ngüxëëtaegüxũ
(Mt 23.1-36; Mr 12.38-40; Lc 11.37-54)*

⁴⁵ Rü guxüma ga duũxüğü rü yéma ñarüxĩnñë ga yexguma Ngechuchu norü ngüexüğüxũ ñaxgu: ⁴⁶ —¡Pexuãëğü naxcèx i ngëma ngüexëëruüğü i Moĩchearü mugüwa ngüxëëtaegüxũ! Erü nümagü rü norü me nixĩ i mexũ i naxchirumaã na naxĩãneãxũ. Rü ñtamũwa nanaxwëxegü na duũxüğü meã nüxũ rümoçëğüxũ. Rü ngutaquëxepataüğüwa rü norü me nixĩ i ãëxgacügümeçwëxewa na natogüxũ. Rü õna i taxüwa rü ngëma õnaãrũ yoraxütawa ügüxũ i nachicacèx nadaugü. ⁴⁷ —Rü tüxũ nawomüxëëgüãcüma tüxna nanapuxũ ya tümapatagü ya yixema yutegüxe. Rü ñuxüchi nanamëxëë i norü yumüxëğü na duũxüğü nagu rüxĩnñëxũcèx na aixcüma mexüğü yĩgüxũ. Natürü nümagü tá nixĩ i yexeraãcü napocxuexũ —ñanagürü.

21

Yutecüarü ämarechiga (Mr 12.41-44)

¹ Rü yexguma tupauca ga taxünewa nayexmagu ga Ngechuchu, rü yéma nüxü nadau ga ñuxäcü duüxügü ga idïeruäxü Tupanana ngixü na naxägüxü ga norü diëru ga tupaucaarü diëruchiüwa. ² Rü ngixü nadau ta ga wüxi ga ngecü ga yutecü ga ngearü diëruäxcü ga tupaucaarü diëruchiügu taxretachinü ga iraxüchicü ga diëru ngixü ixücuchicü. ³ Rü ñanagürü ga Ngechuchu: —Aixcüma pemaã nüxü chixu rü ñaã ngecü i yutecü i ngearü diëruäxcü rü guxü i togü i diëru ngixü ixägüxüärü yexera ngixü ixä. ⁴—Erü guxüma i togü rü ngixü inaxä i ngema nüxü iyaxügücü. Natürü ngïma ngixü natauxyane ngixü ixä i guxcüma i ngixü ngexmaxcü i ngïrü ònatanü —ñanagürü.

Ngechuchu nanaxunagü na tupauca ya taxünegu tá napogüexü (Mt 24.1-2; Mr 13.1-2)

⁵ Rü ñuxre ga norü ngüexügü rü nidexagü nachiga ga tupauca ga taxüne ga ñuxäcü na namexëchixü ga naxtapüx ga nutanaxcëxgü, rü na namexëchixü ga guxüma ga guma tupaucaarü yemaxügü ga duüxügü nüxna ämarexü. Rü yexguma ga Ngechuchu rü ñanagürü: ⁶—Rü nawa tá nangu i ngunexügü i guxünetama ya daa tupauca ya nüxü pedauxüne, rü tá nagu napogüe. Rü naxtapüxarü nutagü rü taxucütáma nügüétü naxüxüra, rü bai ya wüxi —ñanagürü.

Cuëxruügü i tá nüxü idaaxü naxüpa na nagüxü i naäne (Mt 24.3-28; Mr 13.3-23)

⁷ Rü yexguma ga norü ngüexügü rü Ngechuchuna nacagü, rü ñanagürügü: —Pa Ngüexëëruüx, çïuxgu tá nixi i nangupetüxü i ngëma nüxü quixuxü? ¿Rü ñacüwa tá nüxü tacuëx na nangupetüxü tá i ngëma? —ñanagürügü. ⁸ Rü Ngechuchu rü ñanagürü: —¡Pexuäëgü tá na taxuüma pexü womüxëëxüxcëx! Erü muxüchixü tá chaugu nügü nicuxgü rü tá ínangugü rü ñanagürügü tá:

“Choma nixi i Cristu, rü paxa tá nagux i naäne”, ñanagürügü tá pexü. ¡Natürü täütáma nüxü peyaxögü! ⁹—Rü ngëxguma tá nüxü pexinüëgu na nügü nadëixü i wüxi i nachiüäne to i nachiüänemaã, rü ëxna nüxü pexinüëgu na wüxi i nachiüänewatama rü duüxügü rü norü äëxgacümaã nügü nadëixü, ¡rü täütáma pebaixächiäëgü! Erü ngëmaäcü tá nangupetü i noxrix. Natürü täütáma naäneärü gux nixi i ngëma. ¹⁰—Erü wüxi i äëxgacüarü churaragü rü to i äëxgacüarü churaragümaã tá nügü nadai. Rü wüxi i nachiüäne rü to i nachiüänemaã tá nügü nadai. ¹¹—Rü nümaxü i nachiüänegüwa rü poraäcü tá naxiäxächiane, rü poraäcü tá nangux i taiya, rü tá nataxüchi i daaweane. Rü duüxügü tá nüxü nadaugü i daxüwa i ñacü i namaã nabaixächixü, rü taxü i cuëxruügü. ¹²—Natürü naxüpa i guxüma i ngëma rü duüxügü tá pexü ínayauxü, rü tá pewe ningëxütanü. Rü ngutaquëxepataügüwa tá pexü nagagü na ngema pexna nacagüxüxcëx, rü tá pexü napoxcue. Rü nachiüänegüarü äëxgacügüpëxewa tá pexü nagagü, naxcëx na chorü duüxügü pixügüxü. ¹³—Rü ngëmaäcü tá pexü natauxcha na äëxgacügümaã nüxü pixuxü i chauchiga. ¹⁴—Rü ngëxguma tá ngema pexü nagagügu, ¡rü täxü i pexoegaäëgüxü naxcëx na ñacümaã tá penangäxüxü na pegüétüwa pechogüxüxcëx! ¹⁵—Erü choma tá pexü charüngüxëe na nüxü pecuáxüxcëx na ñacümaã penangäxüxü i perü uwanügü. Rü nümagü rü täütáma nüxü nacuëxgü na ñacümaã pexü nangäxügüxü i ngëxguma. ¹⁶—Natürü pema rü woo penatügü, rü peegü, rü

peeneëgü, rü peeyëxgü, rü petanüxügü, rü pemüçügü rü tá napeechitaegü na purichiaügüxütawa pexü iyaxuaxügüxü. Rü purichiaügü rü tá pexü nadai i ñuxre i pemax. ¹⁷—Rü guxü i naãnewa rü duüxügü tá pexchi naxaie, erü choxü peyaxögü rü chorü duüxügü pixigü. ¹⁸—Naturü woo tacü pexü üpetügu rü Tupanamëxëwa tá pengëxmagü, rü nüma tá pexü ínapoxü rü bai i wüxi i peyae tá inayarütaxu. ¹⁹—Rü ngëxguma aixcüma peyaxögümagu rü tama choxü ípetëxgu, rü tá penayauxgü i maxü i taguma güxü. ²⁰—Rü ngëxguma nüxü pedëuxgu na perü uwanügüarü churaragü Yerucharéüxü íchomaëguächixü, rü ngëmawa tá nüxü pecuëx na paxa tá nagu napogüexü ya yima íãne. ²¹—Rü yixema Yudeaanewa ngëxmagüxe rü name nixü i mëxpüneãnewa tabuxmü. Rü yixema Yerucharéüwa ngëxmagüxe rü tanaxwëxe na paxa ítachoxüxü. Rü yixema tümaãnewa ngëxmagüxe rü tama name na íãnecëx tawoegüxü. ²²—Erü ngëma ngunexüügü tá íangu i Tupanaarü poxcu. Rü ngëmaäcü tá nanguxëë i guxüma i ngëma norü ore i ümatüxüwa nüxü yaxuxü. ²³—Rü ngëma ngunexüügü rü tá poraäcü tüxü naguxcha ya yixema ngexegü ya iitacharaügüxe rü yixema imaixäcügüxe. Erü tá nangëxma i taxü i ngüxü, rü Tupana rü poraäcü tá nanapoxcue i ngëma duüxügü. ²⁴—Rü ñuxre, rü tá norü uwanügü taramaã nanadaí. Rü togü, rü tá ínanayauxü na to i nachiüãnewa nagagüaxüçëx. Rü ñuxüchi i ngëma norü uwanügü rü tá nagu napogüe ya yima íãne ya Yerucharéü. Rü ngëmaäcü tá nangupetü ñuxmatáta nawa nangu na Tupana ínamüxü i ngëma.

Tupana Nanearü taeguchiga
(Mt 24.29-35, 42-44; Mr 13.24-37)

²⁵—Rü ngëxguma rü tá nangox i cuëxruüxügü. Rü üëxcü rü tauemacü rü woramacurigü rü tá nixigachitanü i nachicawa.. Rü guxü i nachiüãnegüwa rü duüxügü rü tá nanaxixächiãëtanü rü tá nabaixächiãëgü namaã na poraäcü naxäügaächixü i taxü i taxtü rü norü yuapegü. ²⁶—Rü duüxügü rü norü muümaã tá inayayiaxë i ngëxguma nüxü nadaugu i ngëma üpetüchaüxü i ñoma i naãnewa. Erü woo guxüma i tacü i daxüwa nüxü idaüxü rü tá naxiãxächitanü rü tá nu ne nanaximare. ²⁷—Rü ngëxguma rü guxü i duüxügü i ñoma i naãnecüãx rü tá choxü nadaugü i ngëxguma wüxi i caixanexügu ícharüxüxgu rü nüma chaxüxgu namaã i chorü pora rü üüne. ²⁸—Rü ngëxguma inaxüügü na naxüpetüxü i ngëma pemaã nüxü chixuxü, rü name nixü na petaãëgüxü rü meã pedaunagüxü, erü paxa tá íchangu na pexü íchanguxüxëxüçëx —ñanagürü. ²⁹ Rü yemawena rü wüxi ga ore ga cuëxruüxü namaã nixu ga Ngechuchu, rü ñanagürü: —¡Düçëx penangugü i iguera, rü ëxna ngëxürüxümare i to i naigü! ³⁰—Rü ngëxguma nüxü pedëuxgu na ngëxwaca naxüátüxü, rü ngëmawa nüxü pecuëx na paxa tá taunecü na yixü. ³¹—Rü ngëxgumarüü ta i ngëxguma nüxü pedëuxgu na nangupetüxü i ngëma pemaã nüxü chixuxü, rü ngëmawa tá nüxü pecuëx na yimama yixü ya Tupana na äëxgacü yixüçëx. ³²—Aixcüma pemaã nüxü chixu rü guxüma i ngëma nüxü chixuxü rü tá ningu naxüpa na nayuexü i duüxügü i ñuxma maxëxü. ³³—Daxüguxü i naãne rü ñoma i naãne rü tá nagux. Naturü chorü ore rü tagutáma inayarüxo. ³⁴—¡Pexuãëgü na tama tacü rü chixexügagu düxwa nüxü perüxoexü na peyaxögüxü! Rü ngëmacëx penaxwëxe na pegüna pedaugüxü na tama pengäxëxü rü ëxna ñoma i naãneärü ngüchaüguama na perüxüñüëxü. Erü ngürüächi ngëmagu íperüxüñüëyane tá pexü íchayaüxgü. ³⁵—Rü ñoma wüxi ya yüta ya ngürüächi tacü iyaxünerüü

tá nixī naxcèx i guxūma i duūxūgū i ñoma i naānecūāx i ngēxguma we-naxārū nūma chaxūxgu. ³⁶ —Rū ngēmacèx name nixī i pegū ípēmexēēgū. ¡Rū guxūguma peyumūxégū na ngēmaācū tama pexū naxūpetūxūcèx i ngēma āucūmaxūgū, rū aixcūma pimexūcèx i ngēxguma chopéxewa pengugū! —ñanagūrū ga Ngechuchu. ³⁷ Rū guxū ga ngunexūgūgu rū tupauca ga taxūnewa nayexma ga Ngechuchu, rū duūxūgūxū nangūxēē. Rū chūtacū rū guma Mēxpūne ga Oribunecūgu āeganeгу nayapeexū. ³⁸ Rū guxūma ga duūxūgū rū pēxmamaxūchi tupauca ga taxūnewa nangugūxū na Ngechuchuxū naxīnūēxūcèx.

22

Āēxgacūgū naxcèx nadaugū na ñuxācū Ngechuchuxū yayauxgūxū (Mt 26.1-5, 14-16; Mr 14.1-2, 10-11; Cu 11.45-53)

¹ Rū marū ningaica ga Yudīgūarū peta ga Ūpetūchiga ga nagu nangōxgūāxū ga pāu ga ngearū puxēēruūāxū. ² Rū ga paigūarū āēxgacūgū rū ngūxēēruūgū ga Moīchearū mugūwa nguxēētaegūxū rū naxcèx nadaugū ga ñuxācū duūxūgūechita Ngechuchuxū na yamēxgūxū, yerū duūxūgūxū namuūē. ³ Rū yexguma ga Chataná rū Yuda ga Icarīuteгу nangaxi. Rū nūma ga Yuda rū yema 12 ga Ngechucharū ngūxūgū ga ímugūxūtanūxūchirēx nixī. ⁴ Rū nūma ga Yuda rū ínayadau natanūwa ga paigūarū āēxgacūgū rū tupauca ga taxūneārū purichīagūarū āēxgacūgū. Rū namaā nūxū nixu ga ñuxācū na natauxchaxū ga Ngechuchuxū na yayauxgūxūcèx. ⁵ Rū nūmagū ga yema āēxgacūgū rū nataāēgū. Rū dīeru Yudana ngīxū naxuaxūgū. ⁶ Rū Yuda rū ngīxū nayaxu ga yema dīeru. Rū inanaxūgū ga naxcèx na nadauxū ga ñuxācū duūxūgūechita Ngechuchuxū na yayauxgūxū ga āēxgacūgū.

Ūpetūchigaarū ōnawa nachibū ga Cori (Mt 26.17-29; Mr 14.12-25; Cu 13.21-30; 1 Co 11.23-26)

⁷ Rū nawa nangu ga yema petaarū ngunexū ga nagu nangōxgūāxū ga pāu ga ngearū puxēēruūāxū. Rū yema nixī ga ngunexū ga nagu carneruxacū yamēxgūxū naxcèx ga Ūpetūchigaarū peta. ⁸ Rū Ngechuchu nanamu ga Pedru rū Cuāū, rū ñanagūrū nūxū: —¡Peyamexēēx i tōrū ōna i Ūpetūchigacèx! —ñanagūrū. ⁹ Rū nūmagū Ngechuchuxū nangāxūgū, rū ñanagūrūgū: —¿Ngextā nixī i cunaxwēxexū na tanamexēēxū? —ñanagūrūgū. ¹⁰ Rū Ngechuchu nanangāxū, rū ñanagūrū: —Ngēxguma Yerucharēūwa pengugūxū rū ngēxma tá nūxū peyangau i wūxi ya yatū i wūxi i tūxū i dexámaā āācucxū ngīxū íngexū. ¡Rū nawe perūxī ñuxmatáta napatawa pengugū! ¹¹ —¡Rū yima ípata ya nagu yaxūcune ya yima yatū, rū yima íārū yoramaā nūxū pixu rū ñapegūgū nūxū:

“Torū ngūxēēruū rū nūxū nacuáxchaū na ngēxūrūxū yīxū i ngēma ucapu i norū ngūxūgūmaā tá nawa nachibūxū i Ūpetūchigaarū ōnacèx”, ñapegūgū nūxū! ¹² —Rū tá pexū nūxū nadauxēē i wūxi i ucapu i taxū i marū mexēēxū i norū daxūchiūwa ngēxmaxū. ¡Rū ngēmawa tá penamexēē i ngēma ōna i Ūpetūchigacèx íxīxū! —ñanagūrū nūxū. ¹³ Rū yéma naxī ga nūmagū rū nūxū ínayangaugū ga guxūma yema Ngechuchu namaā nūxū íxuxūrūū. Rū yéma nanamexēēgū ga ōna ga Ūpetūchigacèx íxīxū. ¹⁴ Rū yexguma nawa nanguxgu ga ora ga na nachibūxū, rū mechawa narūto ga Ngechuchu namaā ga norū ngūxūgū. ¹⁵ Rū yexguma ga Ngechuchu rū ñanagūrū: —Ñuxācū poraācū choxū nangūchaū na pemaā chachibūxū i ñāā Ūpetūchigaarū ōnawa naxūpa na

chayuxü. ¹⁶—Natürü pemaã nüxü chixu rü täütáma wenaxärü Üpetüchigaarü ònawa chachibü, ñuxmatáta chowa yangu i ngëma Tupana naxwëxexü —ñanagürü. ¹⁷ Rü yexguma nanayaxu ga wüxi ga pochiyu ga binumaã äácuxü. Rü Tupanana moxë naxãxíra, rü ñuxüchi ñanagürü nüxü ga norü ngúexügü: —¡Peyaxaxü ya daa binu, rü pegümaã pengau! ¹⁸ —Erü pemaã nüxü chixu rü tagütáma wena chayaxaxü ya binu ñuxmatáta nawa nangu na pecaduárü ütánüçëx chayuxü na aixcüma pemaã ínacuáxüçëx ya Tupana —ñanagürü. ¹⁹ Rü nanayaxu ta ga pãü, rü Tupanana moxë naxcëx naxã. Rü ñuxüchi inanabücu, rü norü ngúexügüna nanaxã. Rü ñanagürü nüxü: —Ñãã pãü rü chaxune i pexcëx yuxüchiga nixí. ¡Rü ñããwena rü ñããcü tá penaxü na choxna pecuëxãchiexüçëx! —ñanagürü. ²⁰ Rü marü chibüwena rü to ga pochiyu ga binumaã äácuxü norü ngúexügüna naxã, rü ñanagürü: —Daa binu rü Tupanaärü uneta i ngeçwacaxüüärü cuëxruü nixí. Rü chaugü ya pexcëx íbacüwa Tupana pexü nüxü nadauxëë na aixcüma yíxü i ngëma norü uneta. ²¹—Natürü ngëma yatü i chauechita äëxgacügüna choxü muxcháxü, rü nuã mechawa tamaã narüto i ñuxmax. ²²—Rü choma i Tupana Nane na duüxüxü chüxü, rü Chaunatü ixunetaxürüü tá chayü. Natürü wüxi i ngeçaxüchüchi tá nixí naxcëx i ngëma yatü i äëxgacügüna choxü muxü. ²³ Rü yexguma ga norü ngúexügü rü inanaxügüe ga nügüna na nacagüexü, rü ñanagürügü: —¿Texé tá tixí ya yíxema naëchita äëxgacügüna namuxë? —ñanagürügü.

Norü ngúexügü rü nügüna nacagüe na texé tá tixüxü ya guxãxü rü yexeraxe i natanüwa

²⁴ Rü yexguma ga yema ngúexügü rü nügümaã niporagatanücüü nachiga na texé tá tixü ya natanüwa guxãärü yexera ixíxë. ²⁵ Natürü ga Ngechuchu rü ñanagürü nüxü: —Ñoma i naãnewa rü guxü i nachüãnegüarü äëxgacügü, rü poraãcü norü duüxügüxü namugü. Rü ñuxüchi nügü yaxugügu rü norü duüxügüarü dauruü i mexügü nixígü. ²⁶ —¡Natürü pema rü täütáma ngëxgumarüü pixígü! Rü ngëxguma texé naxwëxegu na guxãärü yexera tixü i petanüwa, rü name nixí na tügü ítarüxíraxü i guxüma i tümamücügütanüwa. Rü texé naxwëxegu na peeru tixü i petanüwa, rü name nixí i noxri rü guxãärü ngüxëeruü tixí. ²⁷ —Rü ñoma i naãnewa rü corigü rü mechawa narütogü na nachibüexüçëx, rü norü duüxügü nixí i ngëma naxcëx òna ixüxü rü nüxü rüngüxëëxü. Natürü tatanüwa rü tama ngëmaãcü nixí, erü choma i perü cori na chüxü rü perü ngüxëeruü chixí. ²⁸ —Rü pemagü nixí ga guxügüma chauxütawa peyexmagüxü ga yexguma ngüxü chingexgu. ²⁹ —Rü ngëmacëx i choma rü äëxgacügüxü pexü chixígüxëë yema chaunatü äëxgacüxü choxü ingucuchixëëxürüü. ³⁰ —Rü ngëmaãcü äëxgacü íchixíxüwa rü chomaã tá pechibüe rü tá pexaxegü. Rü äëxgacüchicawa tá perütogü na norü maxüçëx nüxna pecagüxü i guxüma i Yudügü —ñanagürü.

*Ngechuchu nüxü nixu na Pedru tá nügü ícüxü na norü ngúexü yíxü
(Mt 26.31-35; Mr 14.27-31; Cu 13.36-38)*

³¹ Rü Pedruxü ñanagürü ta ga Cori ga Ngechuchu: —Pa Pedrux, Chataná rü pexcëx ínaca na chixexümaã poraãcü pexü naxüxüçëx. ³² —Natürü choma rü Chaunatüxü chixëç hacäëxü na taguma nüxü curüxoxüçëx na cuyaxöxü. Rü ngëmacëx i cumax, Pa Pedru, rü ngëxguma chaucëx cutaeguxgu, rü chanaxwëxe i nüxü curüngüxëë i cumücügü na nümagü rü yaxögüechaaxüçëx —ñanagürü. ³³ Rü ñanagürü ga Pedru: —Pa Corix, choma rü marü íchamemare

na wüxigu cumaã na chapoxcuxü rü êxna wüxigu cumaã na chayuxü — ñanagürü. ³⁴ Natürü Ngechuchu rü ñanagürü nüxü: —Pa Pedrux, cumaã nüxü chixu rü ñomatama i chütaxügu naxüpa na otá içaxü, rü cuma rü tomaêxpüxcüna tá nüxü quixu na tama choxü cucuáxü —ñanagürü.

Marü ningaica ga na guxchaxügü nüxü üpetüxü

³⁵ Rü yexguma ga Ngechuchu rü norü ngüexügüna naca, rü ñanagürü: —Yexguma pexü chimugügu ngearü chocaãxgüxemaã rü ngearü dîeruãxgüxemaã rü ngearü chapatuãxgüxemaã, çrü tacü pexü taxuxü ga yexguma? —ñanagürü. Rü nümagü nanangãxügü rü ñanagürügü: —Taxuüma —ñanagürügü. ³⁶ Rü yexguma norü ngüexügüxü ñanagürü ga Ngechuchu: —Natürü ñyxma rü texé ya petanüwa ya chocaãxë rü tanaxwëxe na ítayangexü i tümaärü choca rü tümaärü dîeruchixü rü ta. Rü ngëxguma texé ngearü taraãxgu rü tanaxwëxe i namaã tataxe i tümaärü gáuüchiru na tümaärü poxürü i taracëx tataxëxcëx. ³⁷ —Erü pemaã nüxü chixu rü chauchiga nixü i ngëma Tupanaärü ore i ümatüxü i ñaxü: “Wüxi i máetaxürü tá nanapoxcugü rü tá nayamëxgü”, ñaxü. Erü guxüma i ngëma chauchiga ümatüxü i Tupanaärü ore i ümatüxüwa rü aixcüma ngëmaäcü tá ningü —ñanagürü. ³⁸ Rü yexguma ga norü ngüexügü rü ñanagürügü: —Pa Corix, nuã nangëxma i taxre i tara —ñanagürügü. Rü nüma ga Ngechuchu rü nanangãxü rü ñanagürü: —Marü ningü i ngëma —ñanagürü.

Ngechuchu rü Yechemaníwa nayayümüxë (Mt 26.36-46; Mr 14.32-42)

³⁹ Rü yexguma ga Ngechuchu rü ínaxüxü ga guma íñewa. Rü Oríbunecüarü Mëxpünewa naxü, yerü woetama nacüma nixü ga yéma na naxüxüxü. Rü norü ngüexügü rü ta nawe narüxü. ⁴⁰ Rü yexguma yema nachicawa nanguxgu, rü norü ngüexügüxü ñanagürü: —¡Tupanana naxcëx peça na pexü nangüxëëxcëx na tama Chatanáärü ügagu chixëxügu peyixüxcëx! —ñanagürü. ⁴¹ Rü yexguma ga Ngechuchu rü yeamaxüra 50 ga metruwa norü ngüexügüna naxü. Rü yexma nacaxápüxü rü nayümüxë. ⁴² Rü ñanagürü: —Pa Chaunatüx, ngëxguma cuma cunaxwëxegu, çrü nüxna choxü ínanguxuchixëë i ñaã ngüxü i tá choxü üpetüxü! Natürü chanaxwëxe i cunaxü i curü ngüchaü rü tama i choxrü —ñanagürü. ⁴³ Rü yexguma wüxi ga daxücüãx ga Tupanaärü orearü ngerü rü naxcëx nangox, rü nanaporaxëë. ⁴⁴ Rü poraäcü nanaxixüchiãë ga Ngechuchu, rü yemacëx yexeraäcü nayümüxë. Rü yema na naxixüchiãëxümaã poraäcü nanaxiayächi. Rü guma norü aiyacümaã nichuruxüne. Rü ñoma nagü waixümüñewa ichuruxürü nixü ga norü aiyacü. ⁴⁵ Rü yema ínayümüxëxüwa rü inachi ga Ngechuchu, rü norü ngüexügütanüwa naxü. Rü nüxü inayangau ga na ínapeexü yerü norü ngechaümaã düxwa nayaxtae. ⁴⁶ Rü yexguma ga Ngechuchu rü ñanagürü nüxü: —¿Tüxcüü ípepee? ¡Íperüdagü rü Tupanana naxcëx peça na pexü nangüxëëxcëx na tama Chatanáärü ügagu chixëxügu peyixüxcëx! —ñanagürü.

Ngechuchuxü niyaxgü (Mt 26.47-56; Mr 14.43-50; Cu 18.2-11)

⁴⁷ Rü yexguma iyadexayane ga Ngechuchu, rü yéma nangugü ga muxüma ga duüxügü. Rü Yuda ga Ngechuchuarü ngüexüchirëx ixixü nixü ga naxüpëxëxü. Rü Ngechuchucëx nixü na nüxü nachüxäcüma nüxü

namoxëxüçëx. ⁴⁸ Rû Ngechuchu rû ñanagürü: —Pa Yudax, çtüxcüü wüxi i chüxumaã cuchauechitae? —ñanagürü. ⁴⁹ Rû yema togü ga Ngechucharü ngüexüŋgü ga naxütawa yexmagüxü, rû yexguma nüxü nadaugügu ga yema ngupetüxü rû ñanagürügü nüxü: —Pa Corix, çcunaxwëxexü na taramaã tanadëixü? —ñanagürügü. ⁵⁰ Rû wüxi ga Ngechucharü ngüexü rû paigüarü äëxgacüarü duüxü nanapixëë, rû ñanadae ga norü tügünechinü. ⁵¹ Natürü Ngechuchu rû ñanagürü: —ñNgexrüma na pegü namaã pedëixü! —ñanagürü. Rû yexguma ga Ngechuchu rû yema yatü ga ídaechinüxüxü ningögü, rû nanamexëë. ⁵² Rû Ngechuchu namaã nidexa ga yema äëxgacügü ga norü yaxwa yéma íxü. Rû yema äëxgacügütanüwa nayexmagü ga paigüarü äëxgacügü, rû tupauca ga taxünearü purichíagüarü äëxgacügü, rû Yudiügüarü äëxgacügüerügü. Rû Ngechuchu rû ñanagürü nüxü: —çTüxcüü taragü rû naíxmenëxägümaã chauxcëx nuã pexí ñoma wüxi i ngtëxáxü chiüxürüü? ⁵³ —Rû guxü ga ngunexügu ga yexguma petanüwa chayexmagu ga tupauca ga taxünewa, rû tama choxü piyauxgü. Natürü marü nawa nangu na pexü natauxchaxü na choxü piyauxgüxü, erü ñoma nixí i ora na naporaxü i Chataná —ñanagürü.

Pedru inayacux na Ngechuchuxü nacuáxü
(Mt 26.57-58, 69-75; Mr 14.53-54, 66-72; Cu 18.12-18)

⁵⁴ Rû Ngechuchuxü niyauxgü, rû paigüarü äëxgacüpatawa nanagagü. Rû Pedru rû nawe narüxü, natürü yaxüŋguma nüxü nixüchigü. ⁵⁵ Rû yéma paigüarü äëxgacüpataëxtüarü ngäxüwa, rû purichíagü nanaxügü ga wüxi ga üxü. Rû nüxü ñachomaëguáchi. Rû Pedru rû ta yéma natanüwa narüto. ⁵⁶ Rû yexguma yéma üxücutüwa natoxgu ga Pedru, rû wüxi ga ngecü ga äëxgacüarü duüxü nüxü idau. Rû meãma nüxü idawenü, rû ngígürügü: —Ñaa yatü rû Ngechuchutanüxü nixí —ngígürügü. ⁵⁷ Natürü Pedru rû tama nüxü nacuáxchaü ga yema ore, rû ñanagürü: —Pa Ngecüx, choma rû tama nüxü chacuëx ya yima Ngechuchu —ñanagürü. ⁵⁸ Natürü yixcamaxüra rû to ga duüxü Pedruxü nadau, rû ñanagürü nüxü: —Cuma rû ta Ngechuchutanüxü quixí —ñanagürü. Natürü Pedru nanangäxü rû ñanagürü: —Tama nixí, Pa Yatüx. Tama natanüxü chixí —ñanagürü. ⁵⁹ Rû wüxi ga ora ngupetüguwena rû to ga duüxü rû nüxü ñanagürüama: —Aixcümáxüchi ñaa yatü rû Ngechuchutanüxü nixí, erü Gariréaanecüäx nixí —ñanagürü. ⁶⁰ Rû yexguma ga Pedru rû ñanagürü: —Pa Yatüx, tama nüxü chacuëx na çacüchigaxü quixuxü —ñanagürü. Rû yexgumatama Pedru ídexayane rû nica ga otá. ⁶¹ Rû yexguma ga Cori ga Ngechuchu rû Pedrucëx nügü ínidau. Rû nüma ga Pedru rû nüxna nacuëxáchi ga yema ore ga Cori ga Ngechuchu namaã nüxü ixuxü ga ñaxü:

“Ñomatama i chütaxügu naxüpa na otá içaxü, rû tomaëxpüxcüna taxütáma cugü quixu na chorü duüxü quiixü”, ñaxü. ⁶² Rû yexguma ga Pedru rû ínaxüxü ga yéma. Rû poraäcüxüchi naxaxu.

Ngechuchugu nidaux-cüraügu
(Mt 26.67-68; Mr 14.65)

⁶³ Rû yema yatügü ga Ngechuchuna daugüxü, rû nagu nidauxcüraügu, rû nüxna nanaçuaixcagüxü. ⁶⁴ Rû nayadüxétügü, rû nachiwegu nidagügü, rû ñanagürügü: —ñNüxü nacuëx na texé cuxü na idagüxü! —ñanagürügü. ⁶⁵ Rû muxüma ga to ga ore ga chixexü namaã nixügüe.

*Āēxgacūgū ga tacūgūpēxewa nanagagū ga Ngechuchu
(Mt 26.59-66; Mr 14.55-64; Cu 18.19-24)*

⁶⁶ Rū yexguma yangunegu rū nangutaquēxegū ga Yudīugūarū āēxgacūgūerugū, rū paigūarū āēxgacūgū, rū ngūexēēruūgū ga Moīchéarū mugūwa nguxēētaegūxū. Rū űuxūchi norū purichīagūxū namu na napēxewa Ngechuchuxū nagagūxūcēx. Rū yēma Ngechuchuna nacagū, rū űanagūrūgū: ⁶⁷ —Toma rū nūxū tacuáxchaū rū cuma quīīxū i Cristu rū ēxna tama. ¡Tomaā cugū ixu! —űanagūrūgū. Rū Ngechuchu nanangāxū rū űanagūrū: —Ngēxguma chi pemaā nūxū chixuxgu na choma chiīxū i Cristu, rū tāu chima choxū peyaxōgū. ⁶⁸ —Rū ngēxguma chi pexna chacaxgu na tacūcēx choxna peçaxū, rū tāu chima choxū pengāxūga, rū tāu chima choxū pingēxgū. ⁶⁹ —Naturū űuxmawena rū choma i Tupana Nane na duūxūxū chiīxū rū Chaunatū ya Tupana ya poracūxūtawa tá changēxma —űanagūrū. ⁷⁰ Rū yexguma guxūma ga yema āēxgacūgū nūxna nacagū, rū űanagūrūgū: —¿Ēxna cuma quīīxū i Tupana Nane? —űanagūrūgū. Rū Ngechuchu nanangāxū, rū űanagūrū: —Ngū. Tupana Nane chixī ngēxgumarū i pematama nūxū pixuxūrū —űanagūrū. ⁷¹ Rū yexguma nūgūmaā űanagūrūgū ga yema āēxgacūgū: —űuxma rū marū taxucēxma naxcēx tadau i to i duūxūgū i nūxū ixuxū i űaā yatūchiga. Erū yixematama marū naāxwatama nūxū taxīnūē i norū ore na űuxū űaxū —űanagūrūgū.

23

*Piratupēxewa nayexma ga Ngechuchu
(Mt 27.1-2,11-14; Mr 15.1-5; Cu 18.28-38)*

¹ Rū guxūma ga yema āēxgacūgū rū inachigū, rū āēxgacū ga Dumacūāx ga Piratuxūtawa Ngechuchuxū nagagū. ² Rū yēma Piratupēxewa inanaxūgūe ga Ngechuchuxū na yaxugūexū. Rū űanagūrūgū: —űaā yatū rū nūxū itayangagū na cumaā nanuēxēēāxū i duūxūgū. Rū tomaā nūxū nixu na tama namexū na āēxgacū ya Dumawa ngēxmacūaxū na tanaxūtanūxū. Rū nūgū nixu na nūma na yīxū i torū āēxgacū i Cristu —űanagūrūgū. ³ Rū yexguma ga Piratu rū Ngechuchuna naca rū űanagūrū: —¿Cuma quīīxū i Yudīugūarū āēxgacū? —űanagūrū. Rū Ngechuchu nanangāxū rū űanagūrū: —Ngēmaācū, ngēma nūxū quixuxū chixī i chomax —űanagūrū. ⁴ Rū yexguma ga Piratu rū űanagūrū nūxū ga paigūarū āēxgacūgū rū togū ga duūxūgū: —Chauxcēx rū taxuūma i chixexū naxū i űaā yatū —űanagūrū. ⁵ Naturū nūmagū rū yexeraācū Ngechuchuxū nixugūeama, rū űanagūrūgū: —Nūma rū guxū i Yudeaanewa nanangūexēē i duūxūgū na cuxchi naxaīexūcēx. Rū Gariréaanewa inanaxūgū ga yemaācū na duūxūgūxū nangūexēēxū, rū ngēmaācū nanaxū űuxmata nūma Yudeaanewa nangu —űanagūrūgū.

Erodepēxewa nayexma ga Ngechuchu

⁶ Rū yexguma yemaxū naxīnūgu ga Piratu, rū duūxūgūna naca rū ngoxi Gariréaneçūāx yixī ga Ngechuchu. ⁷ Rū yexguma Piratu nūxū īnūgu ga aixcūma Gariréaneçūāx na yīxū ga Ngechuchu rū Gariréaneārū āēxgacū ga Erodexūtawa nanamu, yerū Yerucharēūwa nayexma ga Erobe ga yexguma. ⁸ Rū yexguma Ngechuchuxū nadēuxgu ga Erobe rū nataāēxūchi. Yerū nūxcūmama poraācū nūxū nadauxchaū, yerū űpaacū nūxū naxīnū ga nachiga. Rū īnanangūxēē na Ngechuchuxū nadauxchaūxū na napēxewa naxūāxū ga wūxi ga mexū ga taxū ga Tupanaārū poramaā naxūxū.

9 Rū muēxpūxcūna Ngechuchuna naca ga Erode. Natürü Ngechuchu rü tama nanangāxū. 10 Rū yéma nayexmagü ta ga paigüarü âëxgacügü rü ngüexêëruüügü ga Moïchearü mugüwa nguxêëtaegüxū. Rū nūmagü rü poraäcū Ngechuchuxū inaxuaxüügü. 11 Rū yexguma ga Erode rü norü churaragü rü poraäcū chixri Ngechuchumaä nachopetü. Rū nagu nidauxcūraügü. Rū ñuxūchi wūxi ga âëxgacūchirugu nayacuxêëgü na yemaäcū nūxū nacugüexūcèx. Rū yemawena Piratuxūta wenaxârü Ngechuchuxū namu ga Erode. 12 Rū woo ũpaacü ga Piratu rü Erodemaä nügüchi na naxaiaxū, natürü yema ngunexügu nixi ga nügümaä nangüxmüëxū.

Piratu rü Ngechuchumaä nanaxuegu na nayuxücèx
(Mt 27.15-26; Mr 15.6-15; Cu 18.39-19.16)

13 Rū yexguma ga Piratu rü nanangutaquëxexëë ga paigüarü âëxgacügü, rü togü ga Yudiügarü âëxgacügü, rü guxūma ga duüxügü ga yéma yexmagüxū. 14 Rū Piratu ñanagürü nūxū: —Pema nuâ chauxcèx penaga i ñaä yatü, rü nūxū pixu na chomaä nanuëxêëäxū i duüxügü. Natürü pepëxewa nūxna chaca i ngëmachiga rü ñuxma rü marü nūxū pedau na taxuüma nawa ichayangauxū i ngëma chixexū i naxcèx ũpenaxuaxūxū. 15 —Rü Erode rü ta taxuüma nawa inayangau i ngëma chixexū, rü ngëmamacèx wenaxârü taxcèx nanamuëgu. Rū dücac, taxuüma i chixexū naxü na ngëmagagu nayuxücèx. 16 —Rü ngëmamacèx chorü churaragüxū tá chamu na naçuaixgüäxüçèx, rü ñuxūchi tá chayangëx —ñanagürü. 17 Rū nūma ga Piratu rü guxüguma ga yexguma yema petawa nanguuüxgu rü duüxügüxū nataäëxêëchaü namaä ga na yangéäxū ga wūxi ga yatü ga poxcuxū. 18 Natürü guxūma ga yema duüxügü rü wūxigu inanaxügüe ga aita na naxüexū. Rū ñanagürügü: —¡Napoxcu i ngëma Ngechuchu! ¡Rü Barabáxū waxi ũnanguxuchixëë! —ñanagürügü. 19 Rū yema Barabá rü napoxcu yerü ũpaacü Yerucharéüwa âëxgacümaä nananuëxëë ga duüxügü, rü ñuxūchi namáëta. 20 Natürü ga Piratu rü wenaxârü duüxügümaä nidexa, yerü nūma rü Ngechuchuxū ningéxchaü. 21 Natürü ga duüxügü rü yexeraäcū aita naxüe rü ñanagürügü: —¡Curuchawa yapota! ¡Curuchawa yapota! —ñanagürügü. 22 Rū Piratu norü tomaëxpūxcūna duüxügümaä nidexa, rü ñanagürü: —Düçèx, çtacü rü chixexü êxna naxü? Choma rü taxuüma i chixexüxū nawa ichayangau na ngëmamacèx chanayuxëëxū. Rü chorü churaragüxū tá chamu na naçuaixgüäxüçèx, rü ñuxūchi tá chayangëx —ñanagürü. 23 Natürü nūmagü ga duüxügü rü yexeraäcū aita naxüeama, rü naxcèx ũnacagü na curuchawa yapotaäxüçèx. Rū yema na nayexer-agüamaxū ga yema duüxügü rü düxwa ga Piratu rü duüxügüga naxüñü. 24 Rū nūma ga Piratu rü norü churaragüxū namu na naxügüäxüçèx ga yema duüxügü naxwëxegüxū. 25 Rū Barabáxū ningëx, yerü yema nixi ga duüxügü naxcèx ícagüxū. Rū yema Barabá nixi ga poxcuxū naxcèx na duüxügüxū âëxgacümaä nanuëxêëxū rü namáëtaxū. Rū yexguma ga Piratu rü duüxügüna Ngechuchuxū namu na namaä naxügüäxüçèx ga yema nūmagü nanaxwëxegüxū.

Ngechuchuxū curuchawa nipotagü
(Mt 27.32-44; Mr 15.21-32; Cu 19.17-27)

26 Rū yema duüxügü rü Ngechuchuxū nigagü na curuchawa yanapotagüäxüçèx. Rū yexguma Ngechuchuxū yagagüyane, rü yexma namagu nūxū nangaugü ga wūxi ga yatü ga Chirenecüäx ga naänewa ne ücü. Rū Chimáü nixi ga naega. Rū Chimáüxū niyauxgü ga duüxügü, rü naätügu ngüxū naxünagügü ga curucha na Ngechuchuwe ngüxū nangexüçèx. 27 Rū

muxūma ga duūxūgū rū nawe narūxī. Rū yema duūxūgūtanūwa nayexmagū ga muxūma ga ngexūgū ga auxexū rū aita ūexū, yerū Ngechuchucèx nangechaūgū. ²⁸ Natūrū ga Ngechuchu rū yema ngexūgūxū nadawenū, rū ñanagūrū nūxū: —Pa Ngecūgūx, Pa Yerucharēūcūāx jtaxū i chauxcèx pexauxexū, natūrū pegēcèxtama pexauxe rū pexacūgūcèx! ²⁹ —Erū nawa tá nangu i ngunexūgū i nagu ñagūxū tá i duūxūgū:

“Tataāēgū ya yīxema ngeāxta ya taxuacūma āxācūgūxe, rū taguma tacharaūgūxe, rū taguma maīxācūgūxe, erū taxucatāma tūmaxācūgūcèx taxauxe”, ñagūxū. ³⁰ —Rū ngēxguma i duūxūgū rū tá mēxpūnegūxū nacèxūgū rū ñanagūrūgū tá:

“¡Toētūgu rūbuemū!” ñanagūrūgū tá. Rū tá ngūchitaerugūxūxū nacèxūgū, rū ñanagūrūgū tá:

“¡Toxū idūxētūgū!” ñanagūrūgū tá. ³¹ —¿Erū ñuxācū tá namaā nachopetū i ngēma duūxūgū i aixcūma chixexū ūgūxū, ega ñāā chixexū chomaā naxūgūgu na woo taxuūma i chixexū chaxūchirēxū? —ñanagūrū ga Ngechuchu. ³² Rū yēma nanagagū ta ga taxre ga máētagūxū na Ngechuchurūū curuchawa yanapotagūāxūcèx. ³³ Rū yexguma nawa nangugūgu ga yema nachica ga Duūxēeruchinēxāgu āegaxū, rū yēma curuchawa Ngechuchuxū nipotagū. Rū yema taxre ga máētagūxū rū ta Ngechuchurūū curuchawa nipotagū, wūxi ga norū tūgūnecūwawa rū to ga norū toxwecūwawa. ³⁴ Rū yexguma Ngechuchuxū curuchawa íyapotagūyane, rū ñanagūrū ga Ngechuchu: —Pa Chaunatūx, jnūxū nangechaū i ñāā duūxūgū, erū tama nūxū nacūxūgū na tacū rū chixexū naxūxū! —ñanagūrū. Rū yema churaragū rū nanade ga Ngechuchuchiru. Rū ñuxūchi wūxi ga díeru ngīxū nañanagūgū na yemawa nūxū nacūxūgūcèx na texēarū tá yīxū ga yema Ngechuchuchiru. ³⁵ Rū duūxūgū rū yēma inarūdaunū. Natūrū yema Yudíugūarū āēxgacūgū rū Ngechuchurūū nacugūe, rū ñanagūrūgū: —Nūma rū togūxū namaxēē. ¡Ēcū, ñuxma rū nūgūtama namaxēē ega aixcūma Cristu ya Tupana nūxū unetacū yixīgu! —ñanagūrūgū. ³⁶ Rū yema churaragū rū ta Ngechuchuxū nacugūe. Rū naxūtawa naxī, rū nūxna nanaxā ga binu ga ūxchiūcū. ³⁷ Rū ñanagūrūgū nūxū: —Ega Yudíugūarū āēxgacū ya tacū quixīgu, jrū cugūtama rūngūxēē i ñuxmax, na ícunguxuchixūcèx! —ñanagūrūgū. ³⁸ Rū norū curuchatapēxewa nipota ga wūxi ga mūrāpewaxacū ga āegatachinūxū ga Griégugūgawa rū Dumacūāxgūgawa rū Yudíugūgawa ūmatūxū ga ñaxū: —Daa nixī ya Yudíugūarū āēxgacū ya Tacūxūchi —ñaxū. ³⁹ Rū wūxi ga yema máētaxū ga naxrūū curuchawa ipotaxū rū Ngechuchumaā naguxchiga, rū ñanagūrū: —Ega aixcūma Cristu quixīgu, jrū cugūtama rūngūxēē na ícunguxuchixūcèx, rū toxū rū ta rūngūxēē na ítangūxūxūcèx! —ñanagūrū. ⁴⁰ Natūrū ga yema to ga máētaxū rū namūcūxū ínangaxūchiamā, rū ñanagūrū nūxū: —Cuma rū naxrūū na curuchawa quipotachirēxū, ¿rū ngēxguma rū ta tama Tupanaxū cumūxū? ⁴¹ —Yīxema rū name nixī na ipoxcuexū erū tagagutama nixī i ngūxū ingegūxū erū ngēma nixī i tórū natanū naxcèx ga yema chixexū ga ixūgūxū. Natūrū daa yatū rū taxuūma i chixexū naxū —ñanagūrū. ⁴² Rū yexguma ga yema máētaxū rū ñanagūrū: —Pa Ngechuchux, jchoxna nacūxāchi i ngēxguma wenaxārū nūma cuxūxgu rū āēxgacūxū ícunguxgu! —ñanagūrū. ⁴³ Rū Ngechuchu nanangāxū rū ñanagūrū: —Aixcūma cumāā nūxū chixu rū ñomatātama i ngunexūgu chomaā nangēxma i mexēchixū i nañewa —ñanagūrū.

*Nayu ga Ngechuchu**(Mt 27.45-56; Mr 15.33-41; Cu 19.28-30)*

⁴⁴ Rū yexguma tocuchiwa nanguxgu rū guxūwama naxēāne űuxmata tomaēxpūxarū orawa nangu ga yáuanecū. ⁴⁵ Rū ga űexcū rū nixo. Rū tupaaca ga taxūneārū tūyemachiūxū rū ngāxūgu narūgaute. ⁴⁶ Rū yexguma ga Ngechuchu rū poraācū aita naxū rū űanagūrū: —Pa Chaunatūx, cuxmēxwa chanangēx i chauāē —űanagūrū. Rū yema űaxguwena rū nayu. ⁴⁷ Rū yexguma yema churaragūrū āēxgacū ga Dumacūāx nūxū dēuxgu ga yema ngupetūxū, rū Tupanaxū nicuēxūū, rū űanagūrū: —Aixcūma űaā yatū rū taxuūma i chixexū naxū —űanagūrū. ⁴⁸ Rū guxūma ga yema togū ga duūxūgū ga yema yexmagūxū rū nūxū daugūxū ga yema ngupetūxū, rū poraācū nangechaūgūācūma napatacēx nawoegu. ⁴⁹ Natūrū guxūma ga yema duūxūgū ga aixcūma Ngechuchuxū cuēxgūxū rū yaxūwa- tama nūxū narūdaunū ga yema ngupetūxū. Rū yema duūxūgūtanūwa ta iyexmagū ga yema ngecūgū ga Ngechuchuwe rūxcū ga yexguma Gariréanewa ne naxūxgu.

*Ngechuchu rū naxmaūgu nayanaxūcuhigū**(Mt 27.57-61; Mr 15.42-47; Cu 19.38-42)*

⁵⁰ Rū nayexma ga wūxi ga yatū ga Yudéaanewa yexmane ga űāne ga Arimatéacūāx, rū Yúche nixī ga naega. Rū nūma rū Yudiūgūrū āēxgacūgūtanūwa naxū, natūrū namecūma rū meā namaxū. ⁵¹ Rū nūma rū poraācū ínananguxēē na ínanguxū ga Tupana na yéma āēxgacū yīxūcēx. Rū yemacēx tama norū me nixī ga yema Ngechuchumaā naxūgūxū ga yema togū ga namūcūgū ga āēxgacūgū. ⁵² Rū nūma ga Yúche rū Piratuxūtawa naxū, rū Ngechuchuxūnecēx ínayaca. ⁵³ Rū curuchawa nayayaxu ga Ngechuchuxūne, rū wūxi ga dūxruūmaā nananuque. Rū wūxi ga naxmaū ga nutaarū mēxpūxūwa yacaxmaūgūxūgu nayanaxūcuchi. Rū yema naxmaū rū nayexwacaxū, rū taguma texéxū nagu yaxūcuhigūxū nixī. ⁵⁴ Rū yema nixī ga ngunexū ga nagu Yudiūgū nūgū imexēēgūxū naxcēx ga ngūxchigaarū ngunexū. Rū marū ningóonechaū ga yema ngūxchigaarū ngunexū. ⁵⁵ Rū yema ngecūgū ga Ngechuchumaā Gariréanewa ne ícū, rū Ngechuchuxū iyaxūcuhigūxūwa íyadaugū. Rū nūxū idaugū ga űuxācū na íyaxūcuhigūāxū ga naxūne. ⁵⁶ Rū yexguma ngīpatawa nangugūgu, rū ínamexēēgū ga pumara rū chixū. Rū írūngūgū ga ngūxchigaarū ngunexūgu, yerū yema nixī ga Tupanaārū mu.

24*Yuwa ínarūda ga Ngechuchu**(Mt 28.1-10; Mr 16.1-8; Cu 20.1-10)*

¹ Rū pēxmamaxūchi ga yūxūarū ngunexūgu, rū yema ngecūgū rū wenaxārū naxmaūwa íyadaugū. Rū yéma inangegū ga yema pumara ga yamexēēgūxū. Rū naīgū ga ngecūgū rū ta ngīxū íyaxūmūcūgū. ² Rū yexguma yéma nangugūgu, rū nūxū íyangaugū ga marū na ínaxūgachixū ga guma nuta ga naxmaūārū ngūxtaūxū. ³ Rū yexma nagu ichocu, natūrū taxuūma idaugū ga naxūne ga Cori ga Ngechuchu. ⁴ Rū yema ngecūgū rū poraācū íbaixāchiāēgū, rū tama nūxū icuēxgūēga ga űacu na naxūgūxū. Rū ngūrūāchi nūxū idaugū ga taxre ga yatūgū ga ngīxūtagu chigūxū ga poraācū iyaurachirutanūcūūxū. ⁵ Rū yema ngecūgū rū íyarūmaxāchierugū, yerū poraācū imuūē. Rū yemacēx ga yema yatūgū rū űanagūrūgū ngīxū: —¿Tūxcūū nuxā yuetamaūgu naxcēx

peyadau ya yima maxücü? ⁶ —Nataxuma i nuã ya Ngechuchu, erü marü wena namaxü. ¡Rü nüxna pecuëxâchie ga yema ore ga pemaã nüxü yaxuxü ga yexguma Garirëaanewa nayexmagu! ⁷ —Yerü pemaã nüxü nixu ga ñuxâcü pecaduãxgüxü tá na yayauxgüxü, rü curuchawa na yapotagüãxü, rü ñuxâcü tomaëxpüx i ngunexügu tá wena na namaxüxü —ñanagürügü ga yema yatügü. ⁸ Rü yexguma ga yema ngecügü rü nüxna icuëxâchie ga yema Ngechucharü ore. ⁹ Rü nüxna iwoegu ga yema naxmaü. Rü yema 11 ga Ngechucharü ngüexügümaã nüxü iyarüxugüe ga guxüma ga yema nüxü nadaugüxü. Rü guxüma ga togü ga yaxögüxü ga yema yexmagüxümaã rü ta nüxü iyarüxugüe. ¹⁰ Rü María ga Magadácüãx, rü Cuána, rü María ga Chaütiágu naë, rü naïgü ga ngecügü iyixi ga wüxigu yema Ngechucharü ngüexügüxtawa nangecügü ga yema ore. ¹¹ Natürü yema ngüexügücëx rü ñucamare nixi ga yema ore, rü tama ngixü nayaxögüchaü. ¹² Natürü ga Pedru rü inañaãchi, rü ñayadau ga naxmaüwa. Rü yexguma nagu yadaucuchigu ga naxmaü, rü nüxü nadau ga düxruügü ga wüxicüwagu na nanuxü. Rü poraãcü nañaxiãchiãe namaã ga yema ngupetüxü, rü ñaxiãchiãeãcüma napatacëx nataegu.

*Emaüärü namawa nangox ga Ngechuchu
(Mr 16.12-13)*

¹³ Rü yema ngunexügutama rü taxre ga yema Ngechucharü ngüexügü rü wüxi ga ñane ga Emaüwa naxi. Rü norü yaxü ga guma ñane rü 11 ga kilómetru nixi nüxna ga Yerucharéü. ¹⁴ Rü yexguma namagu naxiyane, rü nachigagu nidxetanü ga guxüma ga yema ngupetüxü. ¹⁵ Rü yexguma yemachigagu iyadexatanüyane, rü numatama ga Ngechuchu rü ngürüãchi naxcëx yema nixü, rü natanügu nixüchigü. ¹⁶ Natürü yema ngüexügü rü woo Ngechuchuxü nadaugü, rü tama nüxü nacuëxgüéga na Ngechuchu yixü, yerü Tupana rü nanatoöëgü na tama Ngechuchuxü nacuëxgüxücëx. ¹⁷ Rü yexguma ga Ngechuchu, rü yema taxre ga ngüexügüna naca, rü ñanagürü: —¿Tacüchiga nixi i pidexatanüxü na nuxã namagu na pexixü? ¿Rü tacücëx nixi i pengechaüëxü? —ñanagürü. ¹⁸ Rü wüxi ga yema ngüexü ga Creopágu äegaxü nanangãxü, rü ñanagürü: —Guxüma i duüxügü nixi i nüxü cuáxü ga yema yexwaca ngupetüxü ga Yerucharéüwa. Rü cuma na yexma cunaxüãnechirëxü rü maneca cuxicatama nixi i tama nüxü cucuáxü ga yema ngupetüxü —ñanagürü. ¹⁹ Rü yexguma ga nüma ga Ngechuchu rü ñanagürü: —¿Tacü nangupetü ga Yerucharéüwa? —ñanagürü. Rü nanangãxügü ga yema ngüexügü, rü ñanagürügü: —Poraãcü chixexü nüxü naxüpetü ga Ngechuchu ga Nacharétucüãx. Nüma ga Ngechuchu rü Tupanaärü orearü urüü ga mecü nixi. Rü Tupanapëxewa rü duüxügüpëxewa namecüma rü nanaxü ga taxü ga cuëxruügü ga Tupanaärü poramaã naxüxü, rü meã duüxügüxü nangüexëë. ²⁰ —Natürü ga paigüarü äëxgacügü rü torü äëxgacügü rü nayayauxgü. Rü Dumacüãx ga äëxgacügüna nanamugü na curuchawa yapotagüãcüma nayuxëëgüãxücëx. Rü yemaãcü nayamëxgü. ²¹ —Toma nüxü tacuëxgu rü nüma tá nixi i tomaã naporaxü na ñanguxuchixücëx i tachiüñane nüxna i Dumacüãxärü äëxgacü. Rü ñuxma rü marü tomaëxpüx i ngunexü nawena nixi ga na yamëxgüãxü. ²²⁻²³ —Natürü tama ngëxicatama nixi, yerü ñuxre ga ngexügü ga totanüxü rü toxü ñayaxiãxgügü. Yerü yema ngexügü rü pëxmamaxüchi ñayadaugü ga naxmaüwa, rü tama nüxü ñayangaugü ga naxüne ga guma Ngechuchu. Rü yemacëx ga yema ngexügü rü toxcëx nawoegu, rü tomaã nüxü nayarüxugüe ga nüxü na nadaugüxü

ga Tupanaärü orearü ngeruügü ga daxüdüx. Rü yema daxüdüxgü rü namaã nüxü nixugügü ga Ngechuchu rü na namaxüxü —ñanagürügü. ²⁴ Rü yexguma yema ngexügarü orexü taxinüegu, rü ñuxre ga tomücügü rü naxmaüwa ínayadaugü. Rü yema ngexügü nüxü ixugüürüü nüxü inayangaugü ga naxmaü. Natürü tama Ngechuchuxü nadaugü —ñanagürügü. ²⁵ Rü yexguma ga Ngechuchu rü ñanagürü nüxü: —¿Tüxcüü tama peãeta ipexü i pemax? ¿Rü ñuxgura tá ta ipeyaxögüxü i nuxcümaügüxü ga Tupanaärü orearü uruügüarü ore? ²⁶ ¿Rü tama éxna nüxü pecuèx ga yema ngüxü tá na yangexü ga Cristu naxüpa na daxügüxü i nañewa naxüxü, na ngema aëxgacü yüüxcèx? —ñanagürü. ²⁷ Rü yexguma inanaxügü ga namaã na nangoxëëxü ga guxüma ga Tupanaärü ore ga nachiga ümatüxü. Rü yema Tupanaärü ore ga Moiché ümatüxümaã inanaxügü. Rü ñuxüchi namaã nüxü nixu ga guxüma ga yema Tupanaärü ore ga nuxcümaügüxü ga Tupanaärü orearü uruügü ümatügüxü. ²⁸ Rü yexguma yema ñane ga Emaüwa nangugüga, rü Ngechuchu rü nümaxü toxnamana nügu naxüxëeneta. ²⁹ Natürü ga yema ngüexügü rü nüxü nacëèxügü na yexma naxüxüxcèx, rü ñanagürügü: —¡Nuxma toxütagu nape, erü marü nayáuane, rü paxa tá nachüta! —ñanagürügü. Rü yexguma ga Ngechuchu rü nawe yexma narüxäüx. ³⁰ Rü yexguma chibücxè wüxiwa mechawa natogüga, rü Ngechuchu nanayaxu ga pãü. Rü Tupanana moxë naxcèx naxã. Rü ñuxüchi inanabücu, rü wüxichigüna nanaxã. ³¹ Rü yexgumatama naãexü nicuèxächitanü. Rü nüxü nacüèxgü na guma yüüxü ga Ngechuchu. Natürü yexgumatama ngürüächi inayarütaxu ga nümax. ³² Rü yema taxre ga ngüexügü rü nügümaã ñanagürügü: —¿Tama éxna ga itaãëgüxü ga törü maxünewa ga yexguma namawa tamaã yadeaxgu rü tamaã nangoxëëagu ga Tupanaärü ore i ümatüxü? —ñanagürügü. ³³ Rü yexgumatama ga yema taxre ga ngüexügü rü inaxüächi ga Yerucharëücxè na nawoegüxü. Rü yexma nüxü nayangau ga na ínangutaquëxegüxü ga yema 11 ga Ngechucharü ngüexügü rü togü ga natanüxügü. ³⁴ Rü yema duüxügü ga íngutaquëxegüxü rü ñanagürügü nüxü: —Aixcüma nixü i marü wena namaxüxü ya Cori ya Ngechuchu. Rü Chimãü ga Pedru rü marü nüxü nadau —ñanagürügü. ³⁵ Rü yexguma ga yema taxre ga ngüexügü rü ta nüxü nixugügü ga yema nüxü ngupetüxü ga namawa, rü ñuxäcü nüxü na yacuèxächitanüxü ga guma na yüüxü ga Ngechuchu ga yexguma pãü inabücxügu.

*Ngechuchu rü norü ngüexügücxè nangox
(Mt 28.16-20; Mr 16.14-18; Cu 20.19-23)*

³⁶ Rü yexguma yemaäcü íyadexagüyane, rü ngürüächi norü ngäxütanügu nachi ga Ngechuchu. Rü nüxü narümoxë, rü ñanagürü: —Nuxmaë Pa Chorü Duüxügü —ñanagürü. ³⁷ Natürü nümagü rü nabaixächiãëgü, rü poaäcü namuñë, yerü nagu naxinüegu rü wüxi ga naxchixüxümare nadaugü. ³⁸ Natürü ga Ngechuchu rü ñanagürü nüxü: —¿Tüxcüü pebaixächiãëgü rü tama peyaxögü na choma chiixü? ³⁹ —¡Dücxè, nüxü pedëux ya choxmëxgü rü chaucutügü! Rü chomatama chixü. ¡Rü choxü pingögü rü meã choxü perüdaunü! Erü wüxi i naxchixü rü tama choxü pedauxürüü naxãmachi rü naxächinèxã —ñanagürü. ⁴⁰ Rü yema ñaxguwena, rü nüxü nanawëx ga naxmëx rü nacutü. ⁴¹ Natürü ga yema duüxügü rü yexguma rü ta tama nüxü nayaxögü, yerü nabaixächiãëgü rü nataãëgü. Rü yemacèx ga Ngechuchu rü nüxna naca rü ñanagürü nüxü: —¿Pexü nangëxmaxü i õna i nuã? —ñanagürü. ⁴² Rü yexguma nüxna nanaxägü ga wüxi ga choxni ga igüxüchipëxe rü wüxiweü ga berure. ⁴³ Rü nüma ga Ngechuchu rü nanayaxu.

Rü yema duüxügüpêxewa nanangõx. ⁴⁴ Rü ñuxüchi ñanagürü nüxü: —Rü yema choxü ngupetüxü rü yema nixi ga pemaã nüxü chixuxü ga yexguma tauta chayuxgu rü petanüwa chayexmagu. Yerü yexguma rü pemaã nüxü chixu rü ñacharügü.

“Rü tá ningü i guxüma i Tupanaärü ore i chauchiga ümatüxü i Wiyaegüarü poperawa, rü Moïché ümatüxü i mugüwa, rü ore i nuxcümaügüxü ga Tupanaärü orearü uruügü ümatüxüwa”, ñacharügüchirêx pexü. ⁴⁵ Rü yemaãcü namaã nanangoxêê ga Tupanaärü ore ga ümatüxü. ⁴⁶ Rü ñanagürü nüxü: —Tupanaärü ore i ümatüxüwa rü nüxü nixu rü choma i Cristu rü tá chayü, rü tomaëxpüx i ngunexügu rü tá wena chamaxü. ⁴⁷ —Rü yematama ore i ümatüxüwa nüxü nixu rü tá chauégagu tá nixi i nüxü yaxugüxü i ore i mexü. Rü Yerucharéüwa tá inaxügu i ngêma ñuxmatáta guxü i naãnewa nangu na ngêmaãcü duüxügü nüxü rüxoexücèx i nacüma i chixexü na Tupana nüxü nüxü ngechaüxücèx i norü pecadugü. ⁴⁸ —Rü ñuxma rü pematama nixi i chorü orearü uruügü, rü tá duüxügümaã nüxü pixu ga yema chauxütawa nüxü pedaugüxü rü nüxü pexinüëxü. ⁴⁹ —Rü dücax, choma rü pexcèx tá núma chanamu i Naãe i Üünexü ga pexcèx nüxü naxunetaxü ya Chaunatü. Natürü chanaxwêxe i númatátama daa iãne ya Yerucharéüwa pengëxmagü, ñuxmatáta penayauxgü i ngêma Tupanaãe i Üünexü i daxüwa ne üxü i tá pexü poraexêëxü —ñanagürü.

Ngechuchu rü daxüguxü ga naãnewa naxü

(Mr 16.19-20)

⁵⁰ Rü yexguma ga Ngechuchu rü Yerucharéüärü toxnamana norü ngüexügüxü nagagü, ñuxmata Betániãärü ngaicamana nangugü. Rü yéma norü ngüexügüétü nawémèx, rü Tupanana naxcèx naca na nüxü nangüêëxücèx. ⁵¹ Rü yexguma yema ngüexügücèx nayümüxëguwena rü nüxna nixügachi. Rü Tupana daxüguxü ga naãnewa nanaga. ⁵² Rü nümagü ga norü ngüexügü rü Ngechuchuxü nicuëxüügü. Rü ñuxüchi taãëcüma Yerucharéücèx nawoegu. ⁵³ Rü guxüguma tupauca ga taxünewa naxixü, rü yéma Tupanaxü nicuëxüügü. Rü ngêmaãcü yii.

ORE I MEXŪ GA CUÁŪ ŪMATŪXŪ

Tupana Nane rü duŭxŭācŭ nangox

¹ Naxŭpa ga guxŭma, rü marŭ nayexma ga Tupana Nane. Rü Tupanamaā nayexma rü woetama Tupana nixŭ ga nümax. Nüma rü Tupanaārŭ Ore nixŭ i naega erŭ tamaā nüxŭ nixu i Tupanachiga. ² Rü naxŭpa ga guxŭma rü nüma ga Tupana Nane rü naxŭtawatama nayexma. ³ Rü guma Nanexŭ nixŭ ga namuxŭ ga Tupana na naxŭāxŭcèx ga guxŭma. Rü nataxuma i ŭacŭ i űuxma ngèxmaxŭ i tama nüma naxŭxŭ. ⁴ Rü Nanewa nixŭ i nangexmaxŭ i maxŭ. Rü ngema maxŭ rü guxŭ i duŭxŭgŭarŭ ngóonexèèruŭ nixŭ. ⁵ Rü yima Nane rü woo chixexŭ íporaxŭwa rü duŭxŭgŭxŭ nüxŭ nacuèxèè i Tupanachiga. Rü ngèma chixexŭ rü taxucŭ-rŭwama ngèma mexŭxŭ narŭyexera. ⁶⁻⁷ Rü nayexma ga wŭxi ga yatŭ ga Cuáŭ ga baiŭxèèruŭgu āegacŭ. Rü guma nixŭ ga Tupana nüma namucŭ na nüxŭ yaxuxŭcèx ga nachiga ga guma ngóonexèèruŭ na yemaācŭ guxāma nüxŭ yaxŭgŭxŭcèx. ⁸ Rü nüma ga Cuáŭ rü tama Tupana Nane ya duŭxŭgŭarŭ ngóonexèèruŭ nixŭ. Natŭrŭ nüma nixŭ ga Tupana nüma namuxŭ na nüxŭ yaxuxŭcèx ga nachiga ga guma ngóonexèèruŭ. ⁹ Rü űoma ga naānewa nangu ya yima aixcŭma Tupana Nane ixŭcŭ i guxŭma i duŭxŭgŭxŭ ngóonetanŭxèècŭ. ¹⁰ Rü nüma ga guma Nane ga Tupanaārŭ Ore ixŭcŭ rü űoma ga naānewa nayexma. Rü woo nagagu nixŭ ga naxŭāxŭ ga guxŭma ga űoma ga naāne, natŭrŭ űoma ga naāne-cŭāx ga duŭxŭgŭ rü tama nüxŭ nacuèxgŭ na texe yŭxŭ. ¹¹ Nuā norŭ naānewatama nangu, natŭrŭ norŭ duŭxŭgŭ ga Yudiŭgŭ rü tama nanayauxgŭ. ¹² Natŭrŭ guxema nayauxgŭxe rü nüxŭ yaxŭgŭxe rü tŭxŭ nanatauxchaxèè na Tupanaxācŭgŭ tixŭgŭxŭ. ¹³ Rü űuxma rü Tupanaxācŭgŭ tixŭgŭ ga guxema yaxŭgŭxe. Natŭrŭ tama noxri tabuxŭgagu nixŭ i ngèma rü tama tŭmanatŭgŭarŭ ngŭchaŭgagu nixŭ. Natŭrŭ i űuxma rü Tupanaxācŭgŭ tixŭgŭ ga guxema yaxŭgŭxe yerŭ nŭmatama ga Tupana rü naxācŭgŭxŭ tŭxŭ nixŭgŭxèè. ¹⁴ Rü nüma ya yima Nane ya Tupanaārŭ ore ixŭcŭ rü duŭxŭācŭ nangox. Rü totanŭwa nayexma rü poraācŭ toxŭ nangechaŭ rü aixcŭma nixŭ ga norŭ ore. Rü toma nüxŭ tadaugŭ ga űuxācŭ na naxŭūnexŭ. Rü Nanatŭxŭtawā nanayaxu ga yema ŭūne yerŭ nŭgŭmaā nüxŭ nawŭxŭcèx ga nüma. ¹⁵ Rü gumachigaxŭ nixŭ ga yaxuxŭ ga Cuáŭ ga yexguma űaxgu: —Daa nixŭ ga guma pemaā nüxŭ chixuchigacŭ ga yexguma űachaxgu:

“Rü yima choweama ne ŭcŭ rü choxŭ rŭyexeracŭ nixŭ, yerŭ woetama marŭ nayexma ga tauta chabuxgu ga chomax”, űanagŭrŭ ga Cuáŭ. ¹⁶ Rü yima Tupana Nane rü namecŭmaxŭchi rü naxmèxwa nangèxma i guxŭma. Rü naxŭtawā nixŭ i nayauxgŭxŭ i guxŭma i ngŭxèègŭ. ¹⁷ Rü Moŭchéxŭ nixŭ ga namuxŭ ga Tupana na tŭxŭ nangŭxèèxŭcèx ga yema norŭ mugŭ. Natŭrŭ Ngechuchu ya Cristuxŭ nixŭ ga namuxŭ na tŭxŭ nangŭxèèxŭcèx na yigŭ ingechaŭgŭxŭ rü nagu imaxèxŭcèx i ore i aixcŭma ixŭxŭ. ¹⁸ Taguma texé űuxgu nüxŭ tadau ga Tupana. Natŭrŭ Nane ya nŭgŭmaā nüxŭ wŭxicacŭ nixŭ ya tŭxŭ nüxŭ cuèxèècŭ. Rü yima Nane rü Tupanaxŭchi nixŭ, rü Nanatŭmaā wŭxiwa nangèxmagŭ.

*Cuáŭ ga baiŭxèèruŭ rü nüxŭ nixu ga Ngechuchu ya Cristuchiga
(Mt 3.11-12; Mr 1.7-8; Lc 3.15-17)*

19 Rũ yema Yudiũgũarũ ãẽxgacũgũ ga Yerucharẽũcũãx rũ Cuáũ ga baiũxẽerũxũtawã nanamugũ ga paigũ rũ Lebítanũxũgũ na nũxna yacagũexũcẽx na texe yĩxũ. 20 Rũ nũma ga Cuáũ rũ meãma nũgũ nĩxu, rũ ñanagũrũ: —Tama nĩxĩ i Cristu chĩxũ i chomax —ñanagũrũ. 21 Rũ wenaxãrũ nũxna nacagũ rũ ñanagũrũgũ: —¿Texẽ õxna quixĩ? ¿Ëxna cuma ga nuxcũmaũcũ ga Tupanaãrũ orearũ uruũ ga Eria quĩĩxũ? —ñanagũrũgũ. Rũ Cuáũ nanangãxũ rũ ñanagũrũ: —Tama Eria chixĩ —ñanagũrũ. Rũ nũmagũ rũ wenaxãrũ nũxna nacagũe rũ ñanagũrũgũ: —¿Ëxna cuma quĩĩxũ ya yima orearũ uruũ ga Moĩchẽ nũxũ ixucũ ga Ínguxchaũcũ? —ñanagũrũgũ. Rũ Cuáũ nanangãxũ rũ ñanagũrũ: —Tama yima chixĩ —ñanagũrũ. 22 Rũ yexguma ñanagũrũgũama: —¿Ëxna texẽ quĩĩxũ? Erũ tanaxwẽxe i ngẽma nũma toxũ mugũxũxũtawã tanange i curũ ngãxũga. ¿Rũ ñuxũ ñacuxũ i ñuxma na texẽ quĩĩxũ? —ñanagũrũgũ. 23 Rũ Cuáũ nanangãxũ rũ ñanagũrũ nũxũ: —Choma nĩxĩ i ngẽma duũxũ i dauxchitawã i ngextã taxũema Íxãpataxũwã tagaãcũ ñachaxũ:

“iRũ nũxũ perũxoe i pecũma i chixexũ rũ ipeyanawẽxãchixẽẽx i perũ maxũ naxcẽx ya Cori ya Tupana!” ñachaxũ, guma nuxcũmaũcũ ga orearũ uruũ ga Ichaxia nũxũ ixũrũrũ —ñanagũrũ. 24-25 Rũ yexguma ga yema paigũ rũ Parichẽgũ yẽma mugũxũ ga Cuáũmaã na yanadexagũxũcẽx rũ wenaxãrũ nũxna nacagũe, rũ ñanagũrũgũ: —Rũ ngẽxguma tama Cristu quixĩgu, rũ tama Eria quixĩgu, rũ tama yima orearũ uruũ ya Ínguxchaũcũ quixĩgu, ¿rũ tũxcũũ i duũxũgũxũ icubaiũxẽẽxũ i ñuxmax? —ñanagũrũgũ nũxũ. 26-27 Rũ Cuáũ nanangãxũ rũ ñanagũrũ: —Choma rũ dexãwamare Ichãnabaiũxẽẽ i duũxũgũ. Natũrũ petanũwã nangẽxma ya yima tama nũxũ pecuãcũ ya choweama ne ũcũ. Rũ choma rũ napẽxewa rũ taxuwama chame, rũ bai i norũ chapatucunũgũarũ wẽgũwã chame —ñanagũrũ ga Cuáũ. 28 Rũ yema nachica ga Betãniãgu ãegaxũwã nĩxĩ ga Cuáũ ga nũxũ yaxuxũ ga yema ore. Rũ natũ ga Yudaũãrũ tocutũwã nĩxĩ ga yema nachica ga ngextã Cuáũ duũxũgũxũ lbaiũxẽẽxũwã.

Ngechuchu nĩxĩ ga Tupana nũma namucũ na duũxũgũarũ pecaducẽx nayuxũcẽx

29 Rũ moxũãcũ ga Cuáũ rũ Ngechuchuxũ nadau ga naxcẽx na yaxũxũ. Rũ ñanagũrũ ga Cuáũ: —iRũ dũcax! Daa nĩxĩ ya yima Tupana nũma namucũ na nayuxũcẽx na ñoma i naãneçũãx i duũxũgũarũ pecaduxũ iyanaxoxẽẽxũcẽx. 30 —Rũ choma rũ daa Ngechuchuchigaxũ nĩxĩ ga chixuxũ ga yexguma ñachagu:

“Rũ choweama ne naxũ ya wũxi ya chorũ yexeracũ, yerũ nũma rũ woetama nayexma ga tauta chabuxgu ga chomax”, ñachagu. 31 —Rũ chomatama ga noxri rũ tama nũxũ chacuẽx ga texe na yĩxũ ga nũmax. Natũrũ nũma chaxũ na dexãwamare duũxũgũxũ Íchibaiũxẽẽtanũxũcẽx na tatanũxũ i Yudiũgũ nũxũ cuẽxgũxũcẽx na texẽ yĩxũ —ñanagũrũ. 32 Rũ ñanagũrũ ta ga Cuáũ: —Rũ chomatama nũxũ chadau ga Tupanaãẽ ga Ũnẽxũ ga yexguma wũxi ga muxtucurũũ daxũwã Ínaxexegũ rũ Ngechuchuxũnẽgu yanawẽxgux. 33 —Choma rũ noxri tama nũxũ chacuẽx ga texe na yĩxũ ga nũmax. Natũrũ ga Tupana ga choxũ mucũ na dexãwamare duũxũgũxũ Íchabaiũxẽẽxũcẽx, rũ ñanagũrũ choxũ:

“Rü yima nüxũ cudaucü ya chauãe i Üünexũ naetügu íruxexecü, rü yima tá nixĩ ya chauãe i Üünexũ duũxũgüna nguxêecü”, ñanagürü choxũ. ³⁴ — Choma rü marü yima Ngechuchuxũ chadau rü pemaã nüxũ chixu na nüma rü aixcũma Tupana Nane yiĩxũ —ñanagürü.

Nüxĩraũxũ ga norü ngüexũgü ga Ngechuchu

³⁵ Moxũãcü rü wenaxãrũ Cuãũmaã yema nachicawa tayexmagü ga toma ga taxre ga norü ngüexũgü. ³⁶ Rü yexguma Ngechuchuxũ nadêuxgu ga yéma na naxüpetüxũ, rü Cuãũ rü ñanagürü toxũ: —jDücè! Yima nixĩ ya Tupana nüma namucü na pecaducèx nayuxüçèx —ñanagürü. ³⁷ Rü toma ga Cuãũãrũ ngüexũgü rü nüxũ taxĩnũe ga yexguma yema ñaxgu. Rü Ngechuchuwe tarüxĩ. ³⁸ Rü nügü índau ga Ngechuchu, rü toxũ nadau ga nawe na tarüxĩxũ. Rü toxna naca rü ñanagürü toxũ: —¿Tacücèx pedau? —ñanagürü. Rü tomagü rü ñatarügügü: —Pa Ngüexêeruũx, ¿ngexta nixĩ i cupexü? —ñatarügügü. ³⁹ Rü Ngechuchu toxũ nangãxũ, rü ñanagürü toxũ: —jNuã chowe perüxĩ rü ípeyadêux! —ñanagürü. Rü nawe tarüxĩ, rü nüxũ tadaugü ga na ngexta napexũ. Rü yexguma yéma tangugü, rü marü ägümücüarü orawa nangu ga na nayáuanexũ. Rü yexma naxũtagu tarücho rü ñuxmata nachüta. ⁴⁰ Rü choma chixĩ ga noxri Cuãũ ga baiũxêeruũxũ chaxĩnũxũ ga yixcama Ngechuchuwe charüxũxũ. Rü chomücü rü Aũdré nixĩ. Rü nüma rü Pedru ga Chimáũeneê nixĩ. ⁴¹ Rü yexgumatama ga Aũdré, rü naêneê ga Chimáũcèx nayadau. Rü ñanagürü nüxũ: —Rü marü nüxũ itayangau ya yima Cristu ga nuxcũma Tupana nüxũ unetacü —ñanagürü. ⁴² Rü yemawena, rü Ngechuchu íyexmaxüwa Chimáũxũ naga ga Aũdré. Rü yexguma Ngechuchu Chimáũxũ dêuxgu, rü ñanagürü nüxũ: —Cuma nixĩ i Chimáũ i Cuãũ nane quiĩxũ. Natürü i ñuxmawena rü Nuta tá nixĩ i cuéga —ñanagürü. Rü ngêma naega rü Pedru ñaxũchiga nixĩ.

Ngechuchu rü naxcèx naca ga Piripi rü Natanae

⁴³ Rü moxũãcü ga Ngechuchu rü nügü namexêe na Gariréaanewa naxũxüçèx. Rü Piripixũ itayangau rü ñanagürü nüxũ: —jChowe rüxũ! —ñanagürü. ⁴⁴ Rü nüma ga Piripi rü íane ga Bechaĩdacũãx nixĩ. Rü yémacũãx ta nixĩ ga Aũdré rü Pedru. ⁴⁵ Rü Piripi rü Natanaecèx nayadau, rü ñanagürü nüxũ: —Marü nüxũ itayangau ya yima Cristu ga Moĩché nachiga naxümatücü ga mugüarü poperawa, rü nuxcũmaũgüxũ ga Tupanaãrũ orearü uruũgü ta nachiga naxümatügücü. Yima nixĩ ya Yúche nane ya Ngechuchu ya Nacharétucũãx —ñanagürü. ⁴⁶ Rü ñanagürü ga Natanae: —¿Nuxãcü i tacü rü mexũ i Nacharétuwa ne naxũxũ? —ñanagürü. Rü Piripi nanangãxũ, rü ñanagürü nüxũ: —jDücèx, ngixã rü itayadau! —ñanagürü. ⁴⁷ Rü yexguma Ngechuchu Natanaexũ dêuxgu ga naxcèx na yaxũxũ, rü ñanagürü: —jDücè! Yéa ne naxũ i wüxi i yatü i aixcũma Yudíu ixĩxũ i aixcũma ngearü chixexũãxũ —ñanagürü. ⁴⁸ Rü yexguma ga Natanae rü Ngechuchuna naca, rü ñanagürü nüxũ: —¿Nuxãcü i choxũ cucuáxũ? —ñanagürü. Rü Ngechuchu nanangãxũ rü ñanagürü nüxũ: —Naxũpa ga Piripi cuxcèx na yaçaxũ, rü choma rü cuxũ chadau ga yexguma orix ga igueratüũgu curüãũxgux —ñanagürü. ⁴⁹ Rü Natanae nanangãxũ rü ñanagürü nüxũ: —Pa Ngüexêeruũx, cuma rü Tupana Nane quiĩxũ. Rü cuma nixĩ i guxũma i Yudiugüarü Äexgacü quiĩxũ —ñanagürü. ⁵⁰ Rü Ngechuchu nanangãxũ, rü ñanagürü nüxũ: —Cuma rü choxũ cuyaxõ erü cumaã nüxũ chixu na igueratüũwa cuxũ na chadauxũ. Rü ngêmacèxicatama nixĩ i cuyaxõxũ. Natürü ngêma ñuxma nüxũ

cudauxďărü yexera tá nixĩ i nüxď cudauxď i yixcūra —ñanagürü. ⁵¹ Rű ñanagürü ta ga Ngechuchu: —Rű aixcűma pemaã nüxď chixu rű tá nüxď pedaugű na yawăxnaxű i daxűguxű i naãne. Rű tá nüxď pedaugű i Tupanaărü orearű ngeruűgű i daxűcűďax i ngema daxű ĩgűxű rű ĩrűxűgűűxű i naetűwa ya Tupana Nane ya duűxűxű ĩxűcű —ñanagürü.

2

Ngĩarű peta ga ĩãne ga Canáwa űxű ga Garirėaanewa

¹ Rű yexguma marű tomaďxpűx ga ngunexű Garirėaanearű ĩane ga Canáwa nayexmagu ga Ngechuchu, rű nayexma ga wűxi ga ngĩarű peta. Rű yemawa ngxina naxugű ga naė ga Ngechuchu. ² Rű Ngechuchuna rű toxna rű ta naxugűe na yema taxixűcėx. ³ Rű nagux ga norű axexű ga binu. Rű Ngechuchu naė ngĩgürűgű nüxű ga Ngechuchu: —Marű nagűarű binuăxgű —ngĩgürűgű. ⁴ Natürű Ngechuchu ngĩxű nangăxű, rű ñanagürű: —Pa Mamax, Źtűxcűű chomaã nüxű quixu i ngėma? Erű tauta nawa nangu na chanaxűcėx i Źacű rű mexű i Tupanaărű poramaã űxű —ñanagürű. ⁵ Natürű ga ngĩma ga naė rű ngĩgürűgű nüxű ga yema baegűxű namaã ga binuchiű: —ĭPenaxűx i guxűma i ngėma nűma pemaã nüxű yaxuxű! —ngĩgürűgű. ⁶ Rű yema iyexma ga 6 ga tűxű ga nutagűngűcėx. Rű wűxichigű ga yema tűxűwa rű maneca yexma name ga 50 rű ĩxna 70 litrugű ga dexă. Rű yema tűxűgű iyixű ga yema Yudiűgű ngĩxű ixűgűăcugűcű ga yexguma dexămaã nűgű yayauxmėxgűchaűgu na Tupanacėx nűgű yamexėėgűxűcėx. ⁷ Rű Ngechuchu rű yema baegűxűxű namu, rű ñanagürű: —ĭDexămaã ngĩxű pixűgűăcu i ñaã tűxűgű! —ñanagürű. Rű nűmagű ga yema baegűxű rű meăma ngĩxű nixűgűăcu. ⁸ Rű Ngechuchu ñanagürű nüxű: —Rű ñuxma chanaxwėxe i ĩraxű peyaxu, rű petaarű yoraxűtawa penange —ñanagürű. Rű yemaăcű nanaxűgű ga yema baegűxű. ⁹ Rű yema petaarű yora nüxű naxaxneta ga yema dexă ga binuxű nacėxichixű. Natürű tama nüxű nacuėx ga ngextă na nayauxgűăxű. Rű yema baegűxűcatama nixű ga nüxű cuėxgűxű ga dexămare na yűxű ga noxrix. Rű yexgumatama ga yema petaarű yora rű yema yatű ga ĩngűxűcėx naca. ¹⁰ Rű ñanagürű nüxű: —Guxű i naãnewa rű duűxűgű rű noxri rű namaã nabae ya mecű ya binu. Rű ngėxguma marű meăma guxűma axegűgu i ngėma nűxna naxuxű, rű ngėmawena rű nűxna nanaxă ya ngexcürűűcűmare ya binu. Natürű i cuma rű marű nagűxchaűgu i peta, rű mexėchicű ya binumaătama cuyaxaxegűxűė i duűxűgű —ñanagürű. ¹¹ Rű guma Garirėaanewa yexmane ga ĩãne ga Canáwa nixű ga yema naxűxű ga Ngechuchu. Rű yema nixű ga nüxűraűxű ga cuėxruű ga Tupanaărű poramaã űxű ga nawa nűgű inawėxű ga Tupana Nane na yűxű. Rű toma ga norű ngűexűgű rű nüxű tayaxűgű. ¹² Rű yemawena rű Capernău ga ĩãnewa naxű ga Ngechuchu. Rű naė rű naėneėgű rű toma ga norű ngűexűgű rű ta ĩtayaxűműcűgű. Rű yema guma ĩãnewa tayexmagű ga ñuxre ga ngunexű.

Ngechuchu rű tupauca ga taxűnewa ĩnanawoxű ga yema duűxűgű ga yema taxegűxű

(Mt 21.12-13; Mr 11.15-18; Lc 19.45-46)

¹³ Rű toma ga Yudiűgű rű marű ningaica ga torű peta ga Ũpetűchiga. Rű yemacėx ga Ngechuchu rű Yerucharėűwa naxű. ¹⁴ Rű yexma tupauca ga taxűnegu nüxű nayangau ga duűxűgű ga yema norű wocagűmaã rű carnerugűmaã rű muxtucugűmaã taxegűxű. Rű yema nüxű nadau ta ga

duŦxŦgŦ ga norŦ taxechicawa rŦtogŦxŦ rŦ TupanaarŦ āmarewa mexŦ ga dŦerumaā yēma taxegŦxŦ. ¹⁵ RŦ yexguma yemaxŦ nadēuxgu ga Ngechuchu, rŦ nanaxŦ ga wŦxi ga çuaixruŦ ga naxchēxmŦnaxçēx. RŦ yemamaā tupauca ga taxŦnewa ínanawoxŦ ga yema duŦxŦgŦ guxŦma ga norŦ carnerugŦmaā rŦ wocagŦmaā. RŦ yema dŦerucēx taxegŦxŦārŦ dŦeru rŦ ngŦxŦ narŦwoŦ ŦaxtŦuanegu. RŦ norŦ mechagŦ rŦ ta nŦxŦ nawoneta. ¹⁶ RŦ yema muxtucŦmaā taxegŦxŦ ŦnanagŦrŦ: —¡Ípeyana i ngēma peru muxtucugŦ i nuā! Tama name i taxepataŦxŦ peyaxŦxēē ya daa ChaunatuŦpata —ŦnanagŦrŦ. ¹⁷ RŦ yexguma ga toma ga norŦ ngŦexŦgŦ rŦ nŦxna tacuēxāchie ga nuxçŦmaŦxŦ ga ŦmatŦxŦ ga ŦnaxŦ:

“DuŦxŦgŦ rŦ tá chauxchi naxaie erŦ chanachuxŦ i çacŦ i chixexŦ na naxŦgŦxŦ i Tupanapatawa”,

ŦnaxŦ. ¹⁸ RŦ yexguma ga yema āēxgacŦgŦ rŦ Ngechuchuna nacagŦ, rŦ ŦnanagŦrŦgŦ: —¿ÇacŦ rŦ cuēxruŦxŦ toxŦ cudaduxēē na nawa nŦxŦ tacuāxŦçēx na aixçŦma Tupana yŦixŦ ya cuxŦ mucŦ na ícunawoxŦxŦçēx i Ŧnā duŦxŦgŦ i nuā? —ŦnanagŦrŦgŦ. ¹⁹ RŦ Ngechuchu nanangāxŦ, rŦ ŦnanagŦrŦ: —¡Nagu pepogŦe ya daa tupauca ya taxŦne! RŦ choma rŦ tomaēxpŦx i ngunexŦgu rŦ tá wena íchanadaxēē —ŦnanagŦrŦ. ²⁰ RŦ yexguma ga yema āēxgacŦgŦ rŦ nanangāxŦgŦ, rŦ ŦnanagŦrŦgŦ: —RŦ 46 ga taunecŦ nawa napuracŦe ga duŦxŦgŦ na naxŦgŦāxŦçēx ga daa tupauca ya taxŦne. ¿RŦ ŦnaxçŦ tá i cuma i tomaēxpŦx i ngunexŦ tátama wena ícunadaxēēxŦ? —ŦnanagŦrŦgŦ. ²¹ NatŦrŦ guma Tupanapata ga Ngechuchu nachiga idexane rŦ naxŦnechigatama nixŦ. ²² RŦ yemacēx ga toma ga norŦ ngŦexŦgŦ, rŦ yexguma Ngechuchu yuwa írŦdaxgu, rŦ nŦxna tacuēxāchie ga yema ore ga Ngechuchu nŦxŦ ixuxŦ. RŦ aixçŦma tayaxŦgŦ ga yema ore ga nŦxŦ yaxuxŦ rŦ yema TupanaarŦ ore ga nuxçŦmaŦgŦxŦ ga orearŦ uruŦgŦ Ngechuchigagu ŦmatŦgŦxŦ.

Ngechuchu rŦ nŦxŦ nacuēx i guxŦma i duŦxŦgŦ

²³ RŦ yexguma Ngechuchu ŦpetŦchigaarŦ petacēx YerucharéŦwa yexmagu, rŦ muxŦma ga duŦxŦgŦ rŦ nŦxŦ nayaxŦgŦ, yerŦ nŦxŦ nadaugŦ ga yema taxŦ ga mexŦgŦ ga TupanaarŦ poramaā naxŦxŦ. ²⁴ NatŦrŦ ga nŦma ga Ngechuchu rŦ tama yema duŦxŦgŦmēxēwa nŦgŦ nayexmaxēēchaŦ, yerŦ woetama marŦ nŦxŦ nacuēx ga çacŦgu na naxŦnŦxŦ ga guxŦma ga yema duŦxŦgŦ. ²⁵ RŦ yemacēx ga nŦma rŦ taxucēxma texē namaā nŦxŦ tixu na çacŦgu naxŦnŦxŦ ga yema duŦxŦgŦ. YerŦ nŦmatama marŦ nŦxŦ nacuēx ga çacŦgu na naxŦnŦxŦ ga naāēwa ga wŦxichigŦ.

3

NgechuchuxŦtagu nanaxŦāne ga Nicodēmu

¹ Nayexma ga wŦxi ga Parichéu ga Nicodémugu āegacŦ. RŦ nŦma rŦ wŦxi ga āēxgacŦ ga nŦxŦ nangechaŦgŦcŦ nixŦ ga YudŦgŦtanŦwa. ² RŦ guma Nicodēmu rŦ NgechuchuxŦtagu nanaxŦāne ga çŦtacŦ. RŦ ŦnanagŦrŦ NgechuchuxŦ: —Pa NgŦexēeruŦx, toma nŦxŦ tacuēx na aixçŦma Tupana nŦma cuxŦ muxŦ na toxŦ cungŦexēēxçēx. ErŦ taxucŦrŦwa texē cuxrŦŦ tanaxŦ i ngēma taxŦ i mexŦgŦ i TupanaarŦ poramaā ŦxŦ, ega tama Tupana tŦmaxŦtawa ngēxmagu —ŦnanagŦrŦ. ³ RŦ Ngechuchu nanangāxŦ rŦ ŦnanagŦrŦ nŦxŦ: —AixçŦma cuma nŦxŦ chixu, rŦ yŦxema tama wanaxarŦ buxe rŦ taxucŦrŦwama Tupana āēxgacŦ íxŦxŦwa tangu —ŦnanagŦrŦ. ⁴ RŦ Nicodēmu rŦ Ngechuchuna naca, rŦ ŦnanagŦrŦ nŦxŦ: —¿NatŦrŦ ŦnaxçŦ i wŦxi i yatŦ i marŦ

yaxŦ i wena nabuxŦ? ¿Éxna wena naēñnŦgu naxŦcuxŦ rŦ ngēmaācŦ wena nabuxŦ? —ñanagŦrŦ. ⁵RŦ Ngechuchu nanangāxŦ rŦ ñanagŦrŦ: —RŦ aixcŦma cumaā nŦxŦ chixu rŦ yŦxema tama nŦxŦ rŦxoxe i tŦmaārŦ pecadu rŦ tama Tupanaāē i ŦŦnexŦwa nayaxŦxe i maxŦ i ngexwacaxŦxŦ, rŦ taxucŦrŦwama Tupana āēxgacŦ íxŦxŦwa tichocu ⁶—YŦxema duŦxŦwa buxe rŦ duŦxŦtama tixŦ. NatŦrŦ yŦxema Naāē i ŦŦnexŦwa nayaxŦxe i maxŦ i ngexwacaxŦxŦ, rŦ TupanaxācŦ tixŦ. ⁷—ŦŦtātama cubaixāchiāē na cumaā nŦxŦ chixuxŦ na Tupana naxwēxŦ na guxŦma i duŦxŦgŦ rŦ wena nabuxŦ! ⁸—Ya buanecŦ rŦ nŦma ínanaxwēxŦwabu. RŦ nŦxŦ cuxŦnŦ i naga, natŦrŦ tama nŦxŦ cucuēx na ngextāama ne naxŦxŦ rŦ ngextāama na naxŦxŦ. RŦ ngēxgumarŦŦ ta tixŦgŦ ya guxāma ya yŦxema Naāē i ŦŦnexŦwa nayaxŦxe i maxŦ i ngexwacaxŦxŦ —ñanagŦrŦ. ⁹RŦ Nicodēmu wenaxārŦ Ngechuchuna naca, rŦ ñanagŦrŦ: —¿NatŦrŦ ñuxācŦ nixŦ i ngēma? —ñanagŦrŦ. ¹⁰RŦ Ngechuchu nanangāxŦ, rŦ ñanagŦrŦ nŦxŦ: —Cuma rŦ YudŦgŦarŦ ngŦxēēruŦ i nŦxŦ cuāxŦ quixŦ. ¿RŦ ñuxācŦ chi i cuma i tama nŦxŦ cucuāxŦ i ngēma? ¹¹—AixcŦma cumaā nŦxŦ chixu rŦ toma rŦ namaā tidexagŦ i ngēma nŦxŦ tacuāxŦ. RŦ norŦ uruŦ tixŦgŦ i ngēma nŦxŦ tadaugŦxŦ. NatŦrŦ pema rŦ tama toxŦ peyaxŦgŦ i ngēma pemaā nŦxŦ tixuxŦ. ¹²—RŦ ñuxma na tama choxŦ peyaxŦgŦxŦ i ngēma pemaā nŦxŦ chixuxŦ i ñoma i naānēārŦ ngēmaxŦchiga, rŦ ¿ñuxācŦ tá peyaxŦgŦxŦ ega pemaā nŦxŦ chixuxgu i daxŦgŦxŦ i naānēārŦ ngēmaxŦchiga? ¹³—Taguma texé daxŦgŦxŦ i naānēwa taxŦ. NatŦrŦ i choma i Tupana Nane na duŦxŦxŦ chiŦxŦ, rŦ chaxicatama nixŦ i ngema ne chaxŦxŦ rŦ ngēma tá chaxŦxŦ. ¹⁴⁻¹⁵—Pema nŦxŦ pecuēx ga ñuxācŦ nuxcŦmaxŦchima yema nachica ga ngextā taxŦema íxāpataxŦwa, rŦ Moiché wŦxi ga naŦgu nanaxŦnagŦ ga yema āxtape ga dŦerumŦnaxcēx. RŦ ngēxgumarŦŦ tá ta i choma i Tupana Nane i duŦxŦxŦ chiŦxŦ, rŦ wŦxi i naŦgu tá choxŦ naxŦnagŦgŦ i duŦxŦgŦ na guxāma ya texé ya choxŦ yaxŦgŦxe rŦ tŦxŦ nangēmaxŦcēx i maxŦ i taguma guxŦ.

Tupana rŦ poraācŦ nŦxŦ nangechaŦ i ñoma i naānecŦāx

¹⁶—RŦ Tupana rŦ poraācŦ nŦxŦ nangechaŦ i ñoma i naānecŦāx i duŦxŦgŦ. RŦ yemacēx inanamu ga Nane ga nŦgŦmaā wŦxicacŦ na guxāma ya texé ya nŦxŦ yaxŦgŦxe rŦ tama itarŦtauxexŦcēx rŦ tŦxŦ nangēmaxŦcēx i maxŦ i taguma guxŦ. ¹⁷—YerŦ ga Tupana rŦ tama ñoma ga naānēwa nanamu ga Nane na duŦxŦgŦmaā naxueguāxŦcēx na napoxcuxŦ. NatŦrŦ nŦma nanamu na namaxēēāxŦcēx i duŦxŦgŦ. ¹⁸—RŦ yŦxema Tupana NaneāxŦ yaxŦxē, rŦ Tupana rŦ tama tŦmamaā nanaxuegu na tapoxcuxŦ. NatŦrŦ yŦxema tama nŦxŦ yaxŦxē, rŦ marŦ tŦmamaā nanaxuegu na tapoxcuxŦ, erŦ tama nŦxŦ tayaxŦ ya yima Tupana Nane ya nŦgŦmaā wŦxicacŦ. ¹⁹—RŦ yŦxema tama nŦxŦ yaxŦgŦxe, rŦ Tupana rŦ marŦ tŦmamaā nanaxuegu na tapoxcuxŦ. YerŦ yexgema ñoma ga naānēwa nanguxgu ga Tupana Nane ya duŦxŦgŦarŦ ngŦonexēēruŦ, rŦ tama nawe tarŦxŦxchaŦ. NatŦrŦ yexera tŦmaārŦ me nixŦ ga ēānexŦwaama na tayexmagŦxŦ, yerŦ chixexŦ taxŦgŦ. ²⁰—Guxāma ya yŦxema chixexŦ ŦgŦxe rŦ naxchi taxaie i ngŦonexŦ. RŦ tama nŦxna tangaicamagŦchaŦ erŦ tama tanaxwēxe na nangŦxŦ i ngēma chixexŦ i ítaxŦgŦxŦ. ²¹—NatŦrŦ yŦxema aixcŦma TupanaārŦ ore nŦxŦ íxuxŦācŦma meā maxēx rŦ nŦxna tangaicama i ngēma ngŦonexŦ. RŦ ngēmaācŦ tanaxŦ na meā nangŦxŦcēx na TupanaārŦ ngŦchaŦācŦma na yŦixŦ i guxŦma i ngēma taxŦgŦxŦ —ñanagŦrŦ.

CuáŨ ga baiũxẽeruũ rũ wenaxãrũ nüxũ nixu ga Ngechuchuchiga

²² Rũ yemawena rũ tomaã Yudéanewa naxũ ga Ngechuchu. Rũ ñuxre ga ngunexũ tomaã yéma nayexma rũ yéma duũxũgũxũ ítabaiũxẽegũ. ²³ Rũ CuáŨ ga baiũxẽeruũ rũ Enóãrũ íãnewa ga Charíarũ ngaicamana rũ ínanabaiũxẽẽ ta ga duũxũgũ yerũ yéma nayexma ga taxũ ga dexã. Rũ yema yéma íngugüetanũxũ ga duũxũgũ, rũ CuáŨ ínayabaiũxẽetanũ. ²⁴ Rũ yemaãcũ nan-gupetũ naxũpa ga na poxcupataũgu yatẽxcuchixũ ga CuáŨ. ²⁵ Rũ yexguma rũ ñuxre ga norũ ngüexũgũ ga CuáŨ, rũ wũxi ga Yudíumaã niporagatanũcũũ nachiga ga nacũmagũ na ñuxãcũ namexũ na Tupanacẽx nügũ yamexẽegũxũ ga duũxũgũ. ²⁶ Rũ CuáŨmaã nüxũ nayarũxugüe, rũ ñanagürũgũ: —Pa Ngüexẽeruũx, dũcax guma yatũ ga tomaã nüxũ quixucũ rũ cumaã yexmacũ ga natũ i Yudáũãrũ tocutũwa, rũ yima rũ ñuxma rũ duũxũgũxũ ínabaiũxẽẽ, rũ guxũma i duũxũgũ rũ nawe narũxĩ —ñanagürũgũ. ²⁷ Rũ CuáŨ nanangãxũ rũ ñanagürũ nüxũ: —Taxũema ñacũ tũxũ nangẽxma ega Tupana tama tũxna naxãxgu. ²⁸ —Pematama rũ marũ choxũ pexĩnũẽ ga yexguma ñachagu:

“Choma rũ tama Cristu chixĩ. Natürũ choma chixĩ i Tupana yima Cristupẽxegu choxũ imuxũ na nüxũ chixuxũcẽx i nachiga”, ñachagu. ²⁹ —Rũ wũxi i ngĩgũwa rũ yima yatũ ya íngĩcũ rũ naxmẽxãrũ yora nixĩ. Rũ yima yatũmũcũ i naxũtawa ngẽxmaxũ rũ nüxũ ínarũxĩnũ i norũ ore. Rũ nataãẽ i ngẽxguma nüxũ naxĩnũgu i ngẽma na yadexaxũ. Rũ ngẽxgumarũĩ i choma rũ aixcũma Cristumaã chataãẽxũchi i ñuxmax. ³⁰ —Nũma rũ tá nixĩnagũchigũ na ãẽxgacũ yĩxũ, natürũ i choma rũ tá ícharũxĩchigũ.

Yima daxũwa ne ũxcũchiga

³¹ —Rũ yima Cristu ya daxũwa ne ũxcũ rũ guxãetũwa nangẽxma. Natürũ i choma rũ ñoma i naãnewa changẽxma, rũ ñoma i naãnecũãx chixĩ, rũ ngẽma ñoma i naãnewa ngẽxmaxũchigaxũ chixu. Natürũ i nũma ya Cristu ya daxũwa ne ũxcũ, rũ guxãetũwa nangẽxma. ³² —Rũ nũma rũ tamaã nüxũ nixuchiga ga yema nüxũ nadauxũ rũ nüxũ naxĩnũxũ. Natürũ noxretama nüxũ nayaxõgũ i ngẽma nüxũ yaxuxũ. ³³ —Natürũ ngẽxguma texé nüxũ yaxõxgu i norũ ore, rũ ngẽmaãcũ tanangõxẽẽ na aixcũma yĩxũ i ngẽma Tupana nüxũ ixuxũ. ³⁴ —Rũ yima Tupana nũma namucũ, rũ Tupanaãrũ orexũ nixu. Erũ Tupana rũ nüxna nanamu i Naãẽ i Üünexũ na guxũguma naxũtawa nangẽxmaxũcẽx. ³⁵ —Rũ Tanatũ ya Tupana rũ Nanexũ nangechaũ. Rũ ngẽmacẽx marũ naxmẽxwa nanangẽxmaxẽẽ i guxũma i ñacũ i ngẽxmaxũ. ³⁶ —Rũ yixema Tupana Naneãxũ yaxõxẽ rũ rũxũ nangẽxma i maxũ i taguma gũxũ. Natürũ yixema tama nüxũ yaxõxchaũxẽ ya Tupana Nane, rũ tãitãma tũxũ nangẽxma i ngẽma maxũ i taguma gũxũ. Natürũ tá tanayaxu i ngẽma ãũcũmaxũ i poxcu i Tupana tá namaã tũxũ poxcuxũ —ñanagürũ ga CuáŨ ga baiũxẽeruũ.

4

Ngechuchu rũ Chamãriaanecũãx ga ngecũ

¹ Rũ Parichéugũ rũ nüxũ nacuãchigagũ ga Ngechuchu rũ CuáŨãrũ yexera nüxũ na nayexmaxũ ga norũ ngüexũgũ, rũ norũ yexera duũxũgũxũ na ínabaiũxẽẽxũ. ² Natürũ tama Ngechuchu nixĩ ga ínabaiũxẽẽcũ ga duũxũgũ. Rũ toma ga norũ ngüexũgũ tixĩ ga tanaxũxũ ga yema. ³ Rũ yexguma Ngechuchu nüxũ ínũgu ga Parichéugũ rũ nachigagu na yadexagũxũ, rũ yéma Yudéanewa ítachoxũ na Gariréaanecẽx tawoeguxũ. ⁴ Natürũ ga yema nama ga nagu tawoeguxũ rũ Chamãriaanewa nadapetũ. ⁵ Rũ yemacẽx ga toma

rü nawa tangugü ga wüxi ga Chamáriaaneärü ñäne ga Chicaru. Rü guma ñäneärü ngaicamana nayexma ga yema naäne ga nuxcümaücü ga Acobuaxü yexmaxü rü yixcama rü nane ga Yúchena naxäxü. ⁶ Rü yéma nayexma ga wüxi ga puchu ga duüxügü dexácèx ixaixmaügücü ga Acobuarü Puchugu äegacü. Rü poraäcü nipa ga Ngechuchu ga namaga na yaxüxü. Rü yemacèx guma puchuxütawa nayarütoöchi. Rü tocuchiwa nanguxchaü ga yexguma. ⁷⁻⁸ Rü toma ga norü ngüexügü rü guma ñänewa taxí na torü ðnacèx tayatax-egüxücèx. Rü towena yéma ingu ga wüxi ga ngecü ga Chamáriaanecüäx ga guma puchuwa dexáwa ücü. Rü Ngechuchu rü ñanagürü ngíxü: —¡Íraxü i dexá choxna naxä! —ñanagürü. ⁹ Natürü ga yema nge rü ibaixächiaë yerü ga Yudíugü rü Chamáriaanecüäxgümaä nügüchi naxaie rü yemacèx ga yema nge rü inangäxü rü ngígürügü nüxü: —¿Ñuxäcü i cuma na Yudíu quíixü i dexácèx choxna cuçaxü i choma na Chamáriaanecüäx chíixü? —ngígürügü. ¹⁰ Rü Ngechuchu ngíxü nangäxü, rü ñanagürü: —Ngëxguma chi nüxü cucuèxgu i ngëma mexü i Tupana cuxna äxchaüxü, rü chi nüxü cucuèxgu na texé yíixü ya yima dexá cuxna taçacü, rü cuma rü chi nüxnata cuca i dexá i maxü nawa ngëxmaxü rü nüma rü chi cuxna nanaxä i ngëma dexá —ñanagürü. ¹¹ Rü yema ngecü inangäxü, rü ngígürügü nüxü: —Pa Corix, ¿ñuxäcü tá i dexáta cuyaxu? Erü daa puchu rü namátamaxüchi rü cuxü nataxuma na taçümaä cunayaxuxücèx i dexá. ¿Rü ngextá tá i cunayaxuxü? i ngëma dexá i maxü nawa ngëxmaxü na choxna cunaxäxücèx? ¹² —Nuxcümaücü ga tórü oxí ga Acobu toxçèx núma Chamáriaanewa nanatèx ga daa puchu. Rü gumawa nixí ga naxaxexü ga nüma rü nanegü rü norü wocagü. ¿Rü ñuxäcü chi i cuma i norü yexera quíixü? —ngígürügü. ¹³ Rü Ngechuchu ngíxü nangäxü, rü ñanagürü: —Rü guxäma ya texé ya daa pucharü dexáwa axexe, rü wena taçarü tiñawae. ¹⁴ —Natürü texé ya yíxema choma tüxna chaxäxü i dexáwa axexe, rü tagutáma wena tiñawa. Erü ngëma dexá i choma tüxna chaxäxü rü wüxi ya puchu ya guxüguma ibaibecürüü tá nixí i tümawa, erü ngëma dexáwa nangëxma i maxü i taguma gúxü —ñanagürü. ¹⁵ Rü ngíma ga yema nge rü inangäxü rü ngígürügü: —Pa Corix, ¡choxna naxä i ngëma dexá na taguma wena chiñawaxücèx, rü taguma wena daa puchuwa dexáwa chaxüxücèx! —ngígürügü. ¹⁶ Rü Ngechuchu ñanagürü ngíxü: —¡Yíyadau ya cute, rü naxçèx yaca, rü nuä pexí! —ñanagürü. ¹⁷ Rü yema ngecü rü inangäxü, rü ngígürügü nüxü: —Nataxuma ya chaute —ngígürügü. Rü Ngechuchu ñanagürü ngíxü: —Aixcüma nixí i ngëma nüxü quixuxü na nataxuüma ya cute. ¹⁸ —Yerü wüximèëxpüxchirèx nixí ga cute, rü yima ñuxma cuxütawa ngëxmacü rü tama aixcüma cutexüchi nixí. Rü ngëmacèx aixcüma nixí i curü ore i chomaä nüxü quixuxü —ñanagürü. ¹⁹ Rü yexguma yemaxü naxíñüga ya yema ngecü, rü ngígürügü: —Pa Corix, nüxü chicuèxächi rü cuma rü wüxi i Tupanaärü orearü uruü quixí. ²⁰ —Nuxcümaügüxü ga torü oxigü ga Chamáriaanecüäxgü rü daa mëxpüne ga Garachíüwa Tupanaxü nicuèxüügü. Natürü i pema i Yudíugü rü ñaperügü:

“Rü Yerucharéü nixí i nachica i mexü i ngextá Tupanaxü ticuèxüügü”, ñaperügü. ²¹⁻²² Rü Ngechuchu ngíxü nangäxü rü ñanagürü: —Pema i Chamáriaanecüäxgü rü tama aixcüma nüxü pecuèxgu ya yima nüxü picuèxüügücü. Natürü toma i Yudíugü rü aixcüma nüxü tacuèx ya yima nüxü ticuèxüügücü, erü Yudíugügagu nixí i Tupana namaxèxèèxü i guxüma i duüxügü. ¡Choxü yaxö, Pa Ngecüx! Rü aixcüma ínangu tá i ngunexü na

tãutãma daa mëxpúnëwa rü êxna Yerucharéüwa tá nüxü na picüëxüüügüxü ya Tanatü ya Tupana. ²³—Erü yíxëma aixcúma Tupanaxü icüëxüüügüxe rü nüëtamã nixí i ngëxürüüxümare i nachicawa Tupanaxü ticüëxüüügü. Erü ñuxma rü ngëma Naãë i Üünëxü naxwëxëxü nixí na guxüma i tumaãëmaã rü tumaãrü maxümaã aixcúma Tupanaxü ticüëxüüügüxü. Rü ngëmaãcü nixí i nanaxwëxëxü ya Tanatü na nüxü ticüëxüüügüxü. ²⁴—Erü Tupana rü wüxi i Naãë nixí. Rü ngëmacëx yíxëma texé ya nüxü icüëxüüügüxe rü tanaxwëxe i guxüma i tumaãëmaã rü tumaãrü maxümaã na aixcúma nüxü ticüëxüüügüxü, ngëma Naãë i Üünëxü naxwëxëxüãcüma —ñanagürü. ²⁵ Rü yëma ngecü inangãxü rü ngígürügü: —Choma nüxü chacuëx rü tá ñoma i naãnewa nangu ya yima Cristu ya Tupana nüxü unetacü. Rü ngëxguma yima núma üxgu rü tá tamaã nanangoxëë i guxüma i Tupanachiga —ngígürügü. ²⁶ Rü Ngechuchu rü ñanagürü ngíxü: —Choma na cumaã chidëxaxü, rü yima chixí —ñanagürü. ²⁷ Rü yëxguma iyadëxayane rü ítangugü ga toma ga norü ngüëxüügü. Rü tãbaixãchiãëgü yerü ga Ngechuchu rü wüxi ga ngecümaã ínidëxa. Natürü taxúëma ga toma rü togü taporaxëë ga nüxna na tacagüxü ga tacü ngímaã na nanaxwëxëxü rü tacüchiga yíxü ga ngímaã na iyadëxaxü. ²⁸ Rü yëxguma ga yëma ngecü rü yëma ngíxü itëx ga ngírü tüxü. Rü íãnewa ixü na duüxügümaã nüxü yanaxuxücëx. ²⁹ Rü ngígürügü: —¡Ngíxã rü ítayadaugü i wüxi i yatü i chomaã nüxü ixuxü ga guxüma ga tacü ga chaxüxü! ¡Taux êxna yima yíxü ya Cristu? —ngígürügü. ³⁰ Rü inaxíãchi ga yëma íãnecüãx, rü Ngechuchu íyëxmaxüwa naxí. ³¹ Rü yoxni ga toma ga norü ngüëxüügü rü Ngechuchuxü tachixewëgü na nachibüxücëx. ³² Natürü ga nüma rü ñanagürü toxü: —Choma rü choxü nangëxma i chowemü i pëma tama nüxü pecuáxü —ñanagürü. ³³ Rü yëxguma ga toma ga norü ngüëxüügü rü togüna tacagüë, rü ñatarügügü: —Bëxmana marü ¿texé nuã tanange i nawemü? —ñatarügügü. ³⁴ Natürü ga Ngechuchu rü ñanagürü toxü: —Ngëma ñna i choxü poraxëëxü nixí na chanaxüxü i norü ngüchaü ya yima nuã choxü mucü ya Chaunatü, rü na chayanguxëëxü i norü puracü. ³⁵—Rü pëma rü ñaperügügü:

“Rü ägümücü ya tauemacü nataxu na yabuxgüxü i trigu”, ñaperügügü. Natürü i choma rü ñacharügü pëxü:

“¡Dücëx, rü meã penangugü i duüxügü! Erü marü ínamegü na Tupanaxü nayauxgüxücëx, ngëxgumarüü i wüxi i trigunecü i marü nawa nanguxü na yabuxgüxü erü marü nidau”. ³⁶—Rü yíxëma Tupanacëx nadëxe i duüxügü rü tá tanayaxu i tumaãrü natanü. Rü guxüma i ngëma duüxügü i tüxü íruxínüëxü rü tá nanayauxgü i maxü i taguma gúxü. Rü ngëmaãcü rü wüxigu tá tataãëgü ya yíxëma tuxira ngëma duüxügümaã Tupanaãrü orexü ixuxe rü yíxëma yíxcama ngëma duüxügüxü Tupanacëx dëxe. ³⁷—Rü aixcúma nixí i ngëma ore i ñaxü:

“Wüxie tixí ya namaã toëxe i trigu rü toëge tixí ya yíxëma yabuxgüxe i norü o”, ñaxü. [Rü ngëxgumarüü rü wüxie tixí ya tuxira duüxügümaã nüxü ixuxe i Tupanaãrü ore, rü toëge tixí ya yíxcama ngëma duüxügüxü dëxe Tupanacëx.] ³⁸—Rü noxri rü togü nixí ga duüxügümaã nüxü ixuxü ga Tupanaãrü ore, natürü ga duüxügü rü tama nayaxögü ga yëxguma. Rü yëmawëna rü pëxü chamu na yëma duüxügümaã nüxü pixuxücëx ga yëma ore. Rü pëma nixí ga yëma duüxügüxü pedëxü Tupanacëx, yerü nayaxögü ga yëxguma namaã nüxü pixuxgu ga yëma ore. Rü yëmaãcü ga pëma rü marü peyoxnië nawa ga togüarü puracü —ñanagürü. ³⁹ Rü muxüma ga guma Chamáriaanëwa

yexmane ga iānecŭāx rŭ Ngechuchuaxŭl nayaxōgŭ, yerŭ nŭxŭl nayaxōgŭ ga yema ore ga yema ngecŭ namaā nŭxŭl ixuxŭl ga yexguma ngŭxgu:

“Guxŭma ga ŭacŭ ga ŭpa chaxŭxŭl rŭ chomaā nŭxŭl nixu” ngŭxgu. ⁴⁰ Rŭ yemacèx ga yema Chamáriaanecŭāxgŭ rŭ yexguma Ngechuchuxŭtawana nangugŭgu rŭ nŭxŭl nacèèxŭgŭ ga yexma natanŭgu na naxāŭxŭcèx. Rŭ taxre ga ngunexŭl yexma natanŭgu narŭxāŭx ga Ngechuchu. ⁴¹ Rŭ muxŭma ga togŭamachigŭ ga Chamáriaanecŭāxgŭ rŭ Ngechuchuaxŭl nayaxōgŭ ga yexguma nŭxŭl naxŭnŭègu ga yema norŭ ore ga nŭmatama nŭxŭl yaxuxŭl. ⁴² Rŭ yexguma ga yema duŭxŭgŭ rŭ ñanagŭrŭgŭ ngŭxŭl ga yema ngecŭ: —Ñuxma waxi nixŭl i aixcŭma nŭxŭl tayaxōgŭxŭl erŭ tomatama nŭxŭl taxŭnŭè i ngèma norŭ ore i tomaā nŭxŭl yaxuxŭl. Rŭ ngèmawa nŭxŭl tacuèx na aixcŭma yima yŭxŭl ya Cristu ya ñoma i naānecŭāx i duŭxŭgŭarŭ maxèxèerŭl. Rŭ tama ngèma cuma tomaā nŭxŭl quixuxŭcèxicatama tayaxōgŭ —ñanagŭrŭgŭ.

Ngechuchu rŭ nanamexèè ga wŭxi ga āèxgacŭ nane

⁴³ Rŭ taxre ga ngunexŭguwena ga Ngechuchu rŭ tomaā inaxŭāchi ga Chamáriaanewa na Gariréaanewa naxŭxŭcèx. ⁴⁴ Rŭ nŭmatama ga Ngechuchu ga ŭpaacŭ rŭ ñanagŭrŭ: —Wŭxi i Tupanaārŭ orearŭ uruŭl, rŭ norŭ naānewatama i duŭxŭgŭ rŭ tama meā nanayauxgŭ —ñanagŭrŭ. ⁴⁵ Natŭrŭ yexguma Gariréaanewa tangugŭgu, rŭ yema naānecŭāx ga duŭxŭgŭ rŭ meāma nanayauxgŭ. Yerŭ nŭmagŭ ga yema naānecŭāxgŭ rŭ Yerucharéŭwa naxŭl ta naxcèx ga Ũpetŭchigaarŭ peta, rŭ yema nŭxŭl nadaugŭ ga yema taxŭl ga mexŭgŭ ga Tupanaārŭ poramaā naxŭxŭl ga Ngechuchu ga yexguma. ⁴⁶ Rŭ ga Ngechuchu rŭ tomaā nataegu naxcèx ga guma iāne ga Caná ga Gariréaanewa yexmane. Rŭ guma iānewa nixŭl ga binuxŭl nanguxuchixèèāxŭl ga dexá. Rŭ iāne ga Capernáŭwa nayexma ga wŭxi ga tacŭ ga āèxgacŭ, rŭ niŭaaawe ga wŭxi ga nane. ⁴⁷ Rŭ yexguma guma āèxgacŭ nŭxŭl cuāchigagu ga Ngechuchu rŭ Gariréaanewa na nanguxŭl ga Yudéaanewa na ne naxŭxŭl, rŭ naxŭtawana naxŭl. Rŭ nŭxŭl nayacèèxŭl na napatawa naxŭxŭcèx, rŭ naxcèx na yanataanexèèāxŭcèx ga guma nane ga marŭ turaxŭchicŭ. ⁴⁸ Rŭ Ngechuchu nanangāxŭl, rŭ ñanagŭrŭ nŭxŭl: —Pema rŭ tama peyaxōgŭ ega tama nŭxŭl pedauxiragu i taxŭl i cuèxruŭgŭ i Tupanaārŭ poramaā ŭxŭl —ñanagŭrŭ. ⁴⁹ Natŭrŭ ga guma āèxgacŭ rŭ ñanagŭrŭ nŭxŭl: —Pa Corix, ŭpaxa chowe rŭxŭl naxŭpa na nayuxŭl ya chaune! —ñanagŭrŭ. ⁵⁰ Rŭ Ngechuchu nanangāxŭl rŭ ñanagŭrŭ nŭxŭl: —ŭNataegu i cupatawa! Erŭ cune rŭ marŭ naxcèx nitaane —ñanagŭrŭ. Rŭ guma yatŭ rŭ nayaxō ga yema ore ga Ngechuchu namaā nŭxŭl ixuxŭl. Rŭ napatacèx nataegu. ⁵¹ Rŭ yexguma napatawa nanguxchaŭgu ga guma āèxgacŭ, rŭ norŭ duŭxŭgŭ napèxegu nayayŭ, rŭ ñanagŭrŭgŭ nŭxŭl: —Cune rŭ marŭ naxcèx nitaane —ñanagŭrŭgŭ. ⁵² Rŭ yexguma rŭ norŭ duŭxŭgŭna naca, rŭ ñanagŭrŭ nŭxŭl: —¿Tacŭ rŭ oragu inaxŭgŭxŭl na naxcèx yataanexŭl? —ñanagŭrŭ. Rŭ yema norŭ duŭxŭgŭ nanangāxŭl rŭ ñanagŭrŭgŭ: —Īne tocuchiguwena nixŭl ga nŭxŭl nangupetŭxŭl ga na yaxaxŭnexŭl —ñanagŭrŭgŭ. ⁵³ Rŭ guma bucŭ nanatŭ rŭ nŭxŭna nacuèxāchi ga yema oragu na yŭxŭl ga Ngechuchu ga ñaxŭl nŭxŭl:

“Cune rŭ marŭ naxcèx nitaane” ñaxŭl. Rŭ nŭma ga guma āèxgacŭ rŭ guxŭma ga napatacŭāx rŭ Ngechuchuaxŭl nayaxōgŭ. ⁵⁴ Rŭ yexguma Yudéaanewa ne naxŭxgu ga Ngechuchu, rŭ yema nixŭl ga norŭ taxre ga cuèxruŭl ga taxŭl ga Tupanaārŭ poramaā duŭxŭgŭxŭl nawéxŭl ga Gariréaanewa.

5

Ngechuchu rü nanamexêẽ ga wüxi ga yatü ga idaawexü ga Betechawa yexmaxü

¹ Rü ñuxre ga ngunexügu ngupetüguwena rü nayexma ga wüxi ga peta ga Yudiügu auregüxü na yemaäcü Tupanaxü yacuëxüügüxüçex. Rü yemacëx ga Ngechuchu rü Yerucharéüçex nataegu. ² Rü guma ñañearü poxeguxü rü nüxü nayexma ga wüxi ga ñax ga Carneruarü Choxüchicagu äegaxü. Rü yema ñaxärü ngaicamana nayexma ga wüxi ga puchu ga Yudiügu gawa Betechagu äegaxü. Rü guma puchuanacüwa nayexma ga wüximêëxpüx ga chopetüchica ga äxpataüetügüxü. ³ Rü yema chopetüchicagu nacagü ga muxüma ga duüxügu ga idaaweexü. Rü nümaxü rü nangexetügu, rü togü rü nachixeparagü, rü togü rü nanawäixächigü. Rü yema idaaweexü rü yéma nananguxêëgü ga guma puchu ga na naxiäxächichiüxüçex. ⁴ Yerü ñuxguacü rü guma puchugu ñarüxüxü ga wüxi ga daxüçüäx ga Tupanaärü orearü ngeruü, rü nayaxiäxchiüçüxêëxü. Rü guxema tüxira tügü yéma táxe nachiüwa ga guma puchu ga yexguma yaxiäxchiüçüügu, rü tümacëx nitaane woo ga ngëxürüümare ga daawe tüxü yexmaxê. ⁵ Rü yéma natanüwa nayexma ga wüxi ga yatü ga marü 38 ga taunecü idaawecü. ⁶ Rü yexguma Ngechuchu nüxü dëuxgu ga guma yatü ga yexma na nacaxü, rü nüxü nacuächiga ga marü mucüma ga taunecü na yaðaawexü. Rü yemacëx nüxna naca rü ñanagürü nüxü: —¿Cunaxwëxexü i cuxcëx na yataanexü? —ñanagürü. ⁷ Rü Ngechuchuxü nangäxü ga guma idaawecü, rü ñanagürü: —Pa Corix, tataxuma ya texé ya choxü rüngüxêëxê na ngema choxü tatäexüçex i ngëxguma naxiäxächichiügu ya daa puchu. Rü guxüguma i ngëxguma ngema chaugü chatäechaügu, rü yoxni i togü rü marü nüxira nügü ngema natäegü —ñanagürü. ⁸ Rü Ngechuchu rü ñanagürü nüxü: —¡Inachi, rü nayaxu i curü caruü, rü ñixü! —ñanagürü. ⁹⁻¹⁰ Rü yexgumatama naxcëx nitaane ga guma yatü. Rü nanayaxu ga norü caruü, rü ñixü. Natürü ga yema ngunexü rü ngüxchigaarü ngunexü nixi. Rü yemacëx ga yemacüäxgü ga Yudiüguarü äëxgacügü rü ñanagürügü nüxü ga guma yatü ga naxcëx itaanecü: —Ñoma nixi i ngüxchigaarü ngunexü. Rü ngëmacëx nachuxu nixi na cuyangexü i curü caruü erü yemaäcü tamaã nüxü nixu ga Moïché —ñanagürügü. ¹¹ Natürü ga guma yatü rü yema Yudiüguarü äëxgacügüxü nangäxü, rü ñanagürü: —Yima choxü rü mexêëcü rü ñanagürü choxü:

“¡Nayaxu i curü caruü rü ñixü!” ñanagürü. ¹² Rü yexguma ga yema äëxgacügü rü nüxna nacagü, rü ñanagürügü: —¿Texé ngëma ñatarügü cuxü:

“¡Nayaxu i curü caruü rü ñixü!” ñatarügü cuxü? —ñanagürügü. ¹³ Natürü ga guma yatü rü tama nüxü nacüex ga texé naxcëx na yataanexêëxü, yerü namuxüchi ga duüxügu ga yéma, rü yexma nayarütaxu ga Ngechuchu. ¹⁴ Natürü yixcama ga Ngechuchu rü tupauca ga taxünegu nüxü nayan-gau ga guma yatü, rü ñanagürü nüxü: —¡Düçex i ñuxma marü cuxcëx na yataanexü, rü täütama wena chixexü cuxü na tama quidaawexüçex namaã i wüxi i daawe i ngëma marü cuxü ngupetüxüärü yexera ixixü! —ñanagürü. ¹⁵ Rü ñixü ga guma yatü, rü Yudiüguarü äëxgacügümaã nüxü nayarüxu ga Ngechuchu na yixü ga guma namexêëcü. ¹⁶ Rü yemacëx nixi ga yema äëxgacügü ga Ngechuchucëx nadaugüxü na yamëxgüäxüçex, yerü ngüxchigaarü ngunexügu napuracü. ¹⁷ Natürü ga Ngechuchu rü ñanagürü nüxü: —Chaunatü ya Tupana rü guxü i ngunexügu napuracü rü mexü naxü.

Rü ngëmacèx i choma rü ta naxrüü chapuracü —ñanagürü. ¹⁸ Rü yemacèx ga yema Yudüügäarü äëxgacügü rü yexeraäcü Ngechuchuxü nimëxgüchaü. Yerü tama naxrüü nanaxaure ga ngüxchigaarü ngunexü rü ñuxüchi nüxü nixu ga Nanatüxüchi na yïxü ga Tupana, rü yemaäcü nügü nixu ga Nanatü ga Tupanamaä na nawüxiguxü.

Nüma ga Tupanatama nixi ga Nanena naxäxü ga pora

¹⁹ Rü yexguma ga Ngechuchu rü ñanagürü nüxü ga yema äëxgacügü: —Aixcüma pemaä nüxü chixu rü choma i Tupana Nane rü tama chorü poramaä chanaxü i tacü rü puracü i mexü. Natürü ngëma nüxü chadauxü i Chaunatü üxüxicatama nixi ichaxüxü. Rü guxüma i ngëma Chaunatü üxü, rü choma ya Nane rü ta chanaxü. ²⁰ —Chaunatü ya Tupana rü choxü nangechaü, rü ngëmacèx choxü nüxü nadauxëë i guxüma i tacü i nüma naxüxü. Rü ngëma ñuxma choxü nüxü nadauxëëüärü yexera tá choxü nüxü nadauxëë i yixcüra. Rü ngëxguma i pema ega ngëmaxü pedaugügu, rü tá pebaixächiäëgü namaä. ²¹ —Rü Chaunatü rü ñanadagüxëë i yuexügü rü wena nanamaxëëë. Rü ngëxguma-rüü ta i choma i Nane rü tüxna chanaxä i maxü ya yixema chatümawëxëxe na tüxna chanaxäxü. ²²⁻²³ —Rü tama Chaunatü nixi ya duüxügüxü icagücü i norü maxüchiga. Natürü choxü nixi i namuxü na chanaxüxcëx i ngëma, na choxü yacuëxüügüxcëx i duüxügü, ngëma Chaunatüxü na yacuëxüügüxürü. Rü yixema tama choxü icuëxüxüxë, rü tama nüxü ticuëxüü ta ya Chaunatü ya choxü nuä mucü. ²⁴ —Aixcüma pemaä nüxü chixu rü yixema texé ya choxü irüxünüxë i chorü ore, rü nüxü yaxöxë ya yima Chaunatü ya núma choxü mucü, rü tüxü nangëxma i maxü i taguma güxü. Rü Chaunatü rü täütäma tümamaä nanaxuegu na tapoxcuxü erü marü itanguxuchi na tayuxü, rü tüxü nangëxma i maxü i taguma güxü. ²⁵ —Rü aixcüma pemaä nüxü chixu rü marü nawa tá nangu i ngunexü rü ñuxmatama nixi i chauga naxünüxü tá i ngëma duüxügü i norü pecadugu yuexü rü iyarütauxexü. Rü texé ya chauga ñünüxë rü tá tamaxë. ²⁶ —Nüma ya Chaunatü rü nüxü nangëxma i pora na namaxëëäxüxcëx i duüxügü. Rü ngëma pora rü choxna nanaxä ya Chaunatü na choma rü ta duüxügüxü chamaxëëëxüxcëx. ²⁷ —Rü Chaunatü ya Tupana choxü namu na duüxügüna chaçaxüxcëx naxcëx i norü maxüchiga, erü choma nixi i Nane i duüxüxü chiixü. ²⁸ —¡Täxü i pebaixächiäëgüxü namaä i ñaä ore i pemaä nüxü chixuxü! Erü tá ñangu i ngëma ngunexü i nagu guxüma i duüxügü i yuexü rü tá na nüxü naxünüxü i chauga. ²⁹ —Rü naxmaügüwa tá ñachoxü. Rü ngëma meä maxëxü, rü tá ñarüdagü na nayauxgüäxüxcëx i maxü i taguma güxü. Natürü ngëma chixexü ügüxü, rü tá ñarüdagü na napoxcuëxüxcëx.

Nawa nüxü icuäxü na Tupana yïxü ga Ngechuchuna naxäcü ga pora

³⁰ —Choma rü taxucürüwa tacü chaxü chauchamatama ega tama choxü naxüxëägu ya Chaunatü. Rü Chaunatü chomaä nüxü ixuxüäcüma nixi i nüxna chaçaxü i duüxügü i norü maxüchiga. Rü ngëxguma nüxna chaçaxgu rü aixcüma meäma chanangugü i duüxügü. Erü tama choxrütama ngüchaü nixi i ngëma chaxüxü, natürü Chaunatü ya nuä choxü mucüarü ngüchaü nixi i ngëma chaxüxü. ³¹ —Rü ngëxguma chi chauchigaxütama chixuxgu rü taxuwama name i ngëma. ³² —Natürü nangëxma i to i chauchigaxü ixuxü. Rü nüxü chacuëx rü aixcüma nixi i norü ore i pemaä nüxü yaxuxü. ³³ Pema rü Cuáü ya baiüxëëruüxütawa penamugü ga perü duüxügü na nüxü pecuäxüxcëx ga ore ga aixcüma ixüxü ga chauchiga. Rü yema ore ga Cuáü pexü namaä ngäxüxü rü aixcüma nixi. ³⁴ —Natürü i choma rü

tama chanaxwêxe i tacü rü yatü chauétüwa nachogü, erü choma tátama chaugüna chadau. Natürü pemaã nüxü chixu i ngêma Cuáũrü ore na choxü peyaxögüxcêx rü na penayauxgüxcêx i maxü i taguma gúxü. ³⁵—Cuáũ rü wüxi ga omü ga iyauracüxü rü pexü báyixü-rüü nixü ga pexcêx. Rü pema rü paxaãchi namaã petaãegü. ³⁶—Natürü nangêxma i tacü i Cuáũrü orearü yexera chauétüwa íchogüxü. Rü ngêma nixü ga yema taxügü ga cuèxruügü ga Chaunatü choxü muxü na norü poramaã chanaxüxcêx. Rü yemawa pexü nüxü chadauxêê na aixcüma Chaunatü ya Tupana yiixü ga núma choxü mucü. ³⁷—Rü ngêxgumarüü ta ya Chaunatü ga guma núma choxü mucü, rü marü chauétüwa ínachogü, woo taguma nüxü pexínüê ga naga rü taguma nüxü pedau. ³⁸—Rü ngêma Chaunatüarü ore rü ta tama peãêwa nixücu, erü tama choxü peyaxögü woo Chaunatü núma choxü na muxü. ³⁹⁻⁴⁰—Pema meãma nawa pengü i Tupanaarü ore i umatüxü, erü nagu perüxínüê rü ngêmawa tá nüxü ipeyangau i perü maxü i taguma gúxü. Natürü woo ngêmatama Tupanaarü ore i umatüxüwa rü chauchiga meã na yadexaxü, natürü i pema rü tama choxü peyaxögüchaü na ngêmaãcü penayauxgüxcêx i ngêma maxü. ⁴¹⁻⁴²—Rü choma rü tama chanaxwêxe na choxü picüxüüügüxü erü meãma pexü chacuêx, rü nüxü chacuêx na tama aixcüma Tupanaxü pengechaügüxü. ⁴³—Chaunatü ya Tupana nixü ga núma choxü mucü, natürü i pema rü tama choxü peyaxügüchaü. Natürü ngêxguma chi tomare i yatü nagagutama núma üxgu, rü ngêma chi nixü i taãêacüma peyaxügüxü. ⁴⁴—¿Rü ñuxácü chi choxü peyaxögü ega penaxwêxegu na pemücügütama pemaã taãêxü rü tama naxcêx pedaugüga na Tupanaxüchi pemaã taãêxü? ⁴⁵—¡Tãxü i nagu perüxínüêxü na choma tá yiixü na pexü chixugüxü i Chaunatüxütawa! Erü Moiché ga guma perü maxüxcêx nüxü peyaxögüxcêx tátama nixü ya yima pexü ixugücü i Chaunatüxütawa. ⁴⁶—Rü ngêxguma chi peyaxögüga i ngêma ore ga Moiché umatüxü, rü choxü rü chi ta peyaxögü. Yerü ga Moiché rü chauchigagu nixü ga naxümatüãxü ga norü poperawa. ⁴⁷—Natürü ngêxguma tama peyaxögüga i ngêma Moiché umatüxü i ore, ¿rü ñuxácü tá peyaxögü i ngêma choma pemaã nüxü chixuxü? —ñanagürü ga Ngechuchu.

6

Ngechuchu rü nanachibüexêê ga 5000 ga yatügü (Mt 14.13-21; Mr 6.30-44; Lc 9.10-17)

¹ Rü yemawena ga Ngechuchu rü nextaxa ga Gariréagu äeganearütocutüwa tomaã naxü. Rü norü toéga ga guma nextaxa rü Tibéria nixü. ² Rü muxüma ga duüxügü rü nawe narüxü. Yerü üpaacü rü marü nüxü nadaugü ga ñuxácü Ngechuchu na naxüxü ga taxü ga mexügü ga Tupanaarü poramaã üxü ga yexguma duüxügü ga ídaaweeügüxcêx yataanexêêgüãgu. ³ Rü yexguma ga Ngechuchu rü wüxi ga mëxpúnewa tomaã ínaxüãchi. Rü wüxigu tomaã yéma narüto. ⁴ Rü marü ningaica ga yema Yudiügüarü peta ga Üpetüchiga. ⁵ Rü yexguma Ngechuchu nüxü dawanügu rü nüxü nadau ga muxüma ga duüxügü ga nawe rüxixü. Rü yemacêx Piripina naca, rü ñanagürü: —¿Rü ngextá tá naxcêx tataxe i nawemü i ñaã duüxügü na nachibüexêêxüxcêx? —ñanagürü. ⁶ Rü nümatama ga Ngechuchu rü marü nüxü nacuêx ga tacü tá na naxüxü. Natürü yema ñanagürü Piripixü, yerü nüxü nacuãxchaü ga facümaã tá na nangäxüãxü. ⁷ Rü yexguma Ngechuchuxü nangäxü ga Piripi, rü ñanagürü: —Woo chi naxcêx itaxegüga i 200 i dïeru naguxü i pãu, rü tãu chima nüxü ningü ega woo wüxichigüna íraxü íxächigüga —ñanagürü. ⁸⁻⁹ Rü

yexguma ga Aůdré ga Ngechucharů ngúexů ga Pedru ga Chimáů naēneē, rů űanagůrů: —Nuā nangēxma i wůxi i buxů rů nůxů nangēxma i 5 i pāů i chebadanaxcèx rů taxre ta i choxni. ¿Natůrů facůwa name i ngēma naxcèx i űaā muxůchixů i duůxůgů? —űanagůrů. ¹⁰ Rů yexguma ga Ngechuchu rů űanagůrů toxů: —¡Ēců, namaā nůxů pixu i duůxůgů na ínatogůxůcèx! —űanagůrů. Rů yema nachicawa rů nametēxane ga guma maxē. Rů gumatēxewa narůtogů ga duůxůgů. Rů maneca 5000 wa nangu ga yexguma yatůgůxica ixugů. ¹¹ Rů yexguma ga Ngechuchu rů nanade ga yema pāůgů, rů Tupanana moxē naxā. Rů yemawena rů toxů nayanu na yema duůxůgů ga yēma růtogůxůxů tayanuxůcèx. Rů yexgumarůů ta ga choxni rů nůxů toxů nayanuxēē, űůxmata meāma nachibůe ga guxůma ga yema duůxůgů. ¹² Rů yexguma marů meā nachibůegu ga guxůma, rů Ngechuchu toxů namu rů űanagůrů toxů: —¡Penade i ngēma naxchipēxegů i íyaxůgůxů na tama inaxaiyèxůxůcèx! —űanagůrů. ¹³ Rů tanade ga yema naxchipēxegů ga yema 5 ga pāůwa íyaxůxůů, rů 12 ga pexchi namaā tanaxůācugů. ¹⁴ Rů yexguma yema duůxůgů nůxů daugůga ga yema mexů ga taxů ga Tupanaārů poramaā naxůxů ga Ngechuchu, rů űanagůrůgů: —Aixcůmaxůchi daa nixů ya Tupanaārů orearů uruů ga guma ínanguxēēců —űanagůrůgů. ¹⁵ Natůrů ga Ngechuchu rů nůxů nicuēxāchi ga duůxůgů rů na norů āēxgacůxů yangucuchixēēgůchaůāxů. Rů yemacèx nůxna nixůgachi rů yēamaxůra naxů nawa ga guma mēxpůne na nůxůcatama nayexmaxůcèx.

Dexáétůgu nixů ga Ngechuchu (Mt 14.22-27; Mr 6.45-52)

¹⁶ Rů yexguma marů nachůtagu, rů toma ga Ngechucharů ngúexůgů rů wenaxārů naxtaacutůwa taxů. ¹⁷ Rů poraāců naxēāne. Rů tama ínangu ga Ngechuchu. Rů yemacèx wůxi ga ngue ga taxůnegu tichoůů, rů itaxůāchi ga na tocutůwa taxůxů ga Capernāůārů íānewa na tangugůxůcèx. ¹⁸ Rů yexguma tixāůyane rů inaxůgů ga na poraāců yabuaxů. Rů yemagagu rů poraāců nayuape. ¹⁹ Rů yexguma marů 5 ga kilómetru tixāůgu, rů Ngechuchuxů tadaugů ga na dexāchiůétůgu yaxůxů. Rů toma ga norů ngúexůgů rů poraāců tamuůē. ²⁰ Natůrů nůma ga Ngechuchu rů űanagůrů toxů: —Choma chixů. ¡Rů tāxů i pemuůēxů! —űanagůrů. ²¹ Rů yexguma ga toma ga norů ngúexůgů rů taāēācůma tanayauxgůchaů ga toweůwa. Rů yexgumatama ítangugů ga yema ítaxůůwa.

Ngechuchucèx nadaugů ga duůxůgů

²² Rů moxůāců ga yema duůxůgů ga naxtaxaarů tocutůgu růchoxůů, rů nůxů nicuēxāchanů ga toma ga Ngechucharů ngúexůgů ga marů nagu na taxůxů ga guma ngue ga taxůne ga nůgůmaā wůxicane. Rů nůxů nacuēxgů ta ga Ngechuchu rů tama towe na naxůxů. ²³ Rů yexguma yemagu ínaxůnůēyane, rů yoxocůne ínangugů ga náigů ga ngue ga itaxůne ga Tibériaarů íānewa ne íxůne. Rů norů ngaicamana nangugů ga yema nachica ga ngextá Ngechuchu ínachibůexēēxůwa ga yema muxůma ga duůxůgů ga yexguma moxē inaxāxgu naxcèx ga yema pāů. ²⁴ Rů yexguma yema duůxůgů nůxů daugůga ga guma nguewa na Ngechuchu rů toma ga na tatauxexůma rů yexma guma nguegůgu nichoů na Ngechuchucèx yadaugůxů Capernāůārů íānegu.

Ngechuchu nixů i pāů i maxůů tůxna āxů

²⁵ Rŭ yexguma guma naxtaxaarŭ tocutŭwa nangugŭga ga yema duŭxŭgŭ, rŭ Ngechuchuxŭ yexma nayangaugŭ. Rŭ nŭxna nacagŭ, rŭ űanagŭrŭgŭ: — Pa Ngŭexŭeeruŭx, ŭűuxgu nixŭ i nuā cunguxŭ? —űanagŭrŭgŭ. ²⁶ Rŭ Ngechuchu nanangāxŭ, rŭ űanagŭrŭ nŭxŭ: —Aixcŭma pemaā nŭxŭ chixu rŭ tama yema nŭxŭ na picuēxāchitanŭxŭcēx ga yema mexŭgŭ ga Tupanaarŭ poramaa chaxŭxŭ nixŭ i chauxcēx pedaugŭxŭ. Natŭrŭ chauxcēx pedaugŭ yerŭ meāma pechibŭe nawa ga yema ōna ga pexna chaxāxŭ. ²⁷ —ŭTāxŭ i naxcēx pepuracŭxŭ i ōna i paxama gŭxŭ! Rŭ narŭmemaē nixŭ i naxcēx pepuracŭe i ngema maxŭ i aixcŭma ixŭxŭ i taguma gŭxŭ. Rŭ ngēma nixŭ i maxŭ i choma i Tupana Nane ya duŭxŭxŭ chixŭcŭ tā pexna chaxāxŭ, erŭ Chaunatŭ ya Tupana rŭ marŭ nanangŭxŭēē na aixcŭma Nane chiŭxŭ —űanagŭrŭ. ²⁸ Rŭ yexguma ga nŭmagŭ rŭ nŭxna nacagŭ, rŭ űanagŭrŭgŭ: —ŭTacŭ tā taxŭe na tayangŭxŭcŭcēx i ngēma Tupana toxŭ naxwēxexŭ? —űanagŭrŭgŭ. ²⁹ Rŭ Ngechuchu nanangāxŭ rŭ űanagŭrŭ nŭxŭ: —Rŭ Tupana rŭ nŭma choxŭ namu. Rŭ ngēma nŭma pexŭ nanaxwēxexŭ nixŭ na choxŭ peyaxŭgŭxŭ —űanagŭrŭ. ³⁰ Rŭ yexguma ga nŭmagŭ rŭ nŭxna nacagŭ, rŭ űanagŭrŭgŭ nŭxŭ: —ŭTacŭ rŭ cuēxruŭxŭ tā toxŭ cudauxŭēē na cuxŭ tayaxŭgŭxŭcēx na aixcŭma Cristu quiŭxŭ? ŭRŭ tacŭ i to i mexŭ tā toxcēx cuxŭxŭ i űŭxmax? ³¹ Yerŭ nuxcŭmaŭgŭxŭ ga tŭrŭ oxigŭ, rŭ nanangŭxŭgŭ ga yema pāu ga Tupana nŭxna āxŭ ga chianexŭtwa ga ngextā taxŭema ixāpataxŭtwa. Rŭ Tupanaarŭ ore i űmatŭxŭtwa rŭ űanagŭrŭ:

“Tupana rŭ daxŭcŭŭāx ga pāumaā nanachibŭexŭēē ga duŭxŭgŭ”, űanagŭrŭ i ngēma orewa. ³² Rŭ Ngechuchu nanangāxŭ rŭ űanagŭrŭ nŭxŭ: — Aixcŭma pemaā nŭxŭ chixu rŭ tama nixŭ ga Moŭché yiŭxŭ ga nŭxna naxāxŭ ga yema pāu ga daxŭ- cŭāx, natŭrŭ Chaunatŭ ga Tupana nixŭ ga nŭxna naxācŭ. Rŭ nŭma nixŭ i űŭxma i pexna naxāāxŭ i pāu i aixcŭma ixŭxŭ i daxŭwa ne ŭxŭ. ³³ —Erŭ ngēma pāu i Tupana ixāxŭ, rŭ daxŭgŭxŭ i naānewa ne naxŭ rŭ nanamaxŭxŭēē i űoma i naānecŭŭāx i duŭxŭgŭ —űanagŭrŭ. ³⁴ Rŭ nŭmagŭ rŭ naxcēx űnacagŭ, rŭ űanagŭrŭgŭ nŭxŭ: —Pa Corix, ŭguxŭguma toxna naxāēcha i ngēma pāu! —űanagŭrŭgŭ. ³⁵ Rŭ Ngechuchu űanagŭrŭ nŭxŭ: —Choma nixŭ i ngēma pāu i maxŭxŭeeruŭ chiŭxŭ. Rŭ yŭxema texŭ ya chauxŭtwa ŭxŭ rŭ tagutāma tataiya. Rŭ texŭ ya choxŭ yaxŭxŭ rŭ tagutāma tiŭawa. ³⁶ —Natŭrŭ marŭ pemaā nŭxŭ chixu rŭ woo na choxŭ pedaugŭxŭ rŭ tama choxŭ peyaxŭgŭ i pemax. ³⁷ —Rŭ guxāma ya yŭxema duŭxŭgŭ ya Chaunatŭ choxna tŭxŭ mugŭxe rŭ chorŭ duŭxŭgŭ tixŭgŭ. Rŭ texŭ ya choxŭ yaxŭgŭxe rŭ tātŭtāma tŭxŭ chaxoŭx. ³⁸ —Yerŭ tama choxrŭtama ngŭchaŭ na chaxŭxŭcēx nixŭ ga daxŭgŭxŭ ga naānewa ne chaxŭxŭ. Natŭrŭ nŭma chaxŭ na chanaxŭxŭcēx i norŭ ngŭchaŭ ya Chaunatŭ ya nŭma choxŭ mucŭ. ³⁹ —Rŭ ngēma norŭ ngŭchaŭ ya Chaunatŭ ya Tupana ya nŭma choxŭ mucŭ nixŭ na taxŭexŭtma ichayarŭtauxŭxŭēēxŭ ya yŭxema choxna tŭxŭ namugŭxe. Rŭ nŭma ya Chaunatŭ nanaxwāe na tŭxŭ yuwa ŭcharŭdagŭxŭxŭēēxŭ i naānearŭ guxgu. ⁴⁰ —Choma nixŭ i Tupana Nane chiŭxŭ. Rŭ ngēma norŭ ngŭchaŭ ya Chaunatŭ ya Tupana ya nŭma choxŭ mucŭ nixŭ na tŭxŭ nangŭxmaxŭ i maxŭ i taguma gŭxŭ ya guxāma ya texŭ ya choxŭ daugŭxe rŭ choxŭ yaxŭgŭxe. Erŭ choma tā nixŭ i tŭxŭ ŭcharŭdagŭxŭxŭēēxŭ i naānearŭ guxgu —űanagŭrŭ. ⁴¹ Rŭ yexguma yema orexŭ naxŭnŭgŭ ga yema Yudŭgŭ, rŭ inanaxŭgŭe ga Ngechuchhiga na yadexagŭxŭ. Yerŭ űanagŭrŭ ga Ngechuchu: —Choma nixŭ i pāu i daxŭgŭxŭ i naānewa ne chaxŭxŭ —űanagŭrŭ. ⁴² Rŭ űanagŭrŭgŭ: —ŭTaux ŭxna űāā yiŭxŭ i Ngechuchu i Yŭche nane? Rŭ yŭxema rŭ tŭxŭ tacuēx ya nanatŭ rŭ

naē. ¿Rü ñuxācü i nūma i “Daxūwa ne naxūxū”, ñaxū? —ñanagürügü. ⁴³ Rü Ngechuchu ñanagürü nüxū: —¡Nüxū perūxoe na choxū na pixuechaxū! ⁴⁴— Taxúema chauxūtawa tangu ega tama choxna tüxū namuxgu ya chaunatū ga guma núma choxū mucū. Rü texé ya chauxūtawa ngugūxe rü choma rü tá wena tüxū chamaxēxēē i naāneärü guxgu. ⁴⁵—Nuxcūmaŭgüxū ga Tupanaärü orearū uruŭgüarū poperawa naxūmatū i ore i ñaxū:

“Tupana tá guxāxū nangúxēē”,

ñaxū. Rü ngēmacēx guxāma ya texé ya Chaunatūxū ñnūxē rü naxūtawa ngūxe, rü chauxūtawa taxī. ⁴⁶—Taguma texé Chaunatū ya Tupanaxū tadau. Rü chaxicatama nixī i nüxū chadauxū erū naxūtawa ne chaxū. ⁴⁷—Aixcūma pemaā nüxū chixu rü texé ya choxū yaxōxē rü tüxū nangēma i maxū i taguma gúxū. ⁴⁸—Choma nixī i pāu i maxēxēerū chīxū. ⁴⁹—Rü perū oxigü ga nuxcūmaŭgüxū rü nanangōx ga yema pāu ga Tupana nüxna āxū ga yema nachica ga ngextá taxúema íxāpataxūwa. Natürü woo nanangōxgü ga yema pāu rü nayueamatama. ⁵⁰—Natürü ñaā pāu i pemaā nüxū chixuxū i daxūwa ne ūxū rü chomatama chixī. Rü guxāma ya texé ya choxū yaxúxe ñoma pāu tangōxürüü rü tá tamaxēcha. ⁵¹—Chomatama nixī i pāu i maxēxēerū i daxūwa ne chaxūxū. Rü texé ya ñoma chomaā taxāwemüxürüü choxū yaxōxē rü guxūgutáma tamaxēcha. Erū ngēma pāu i choma tüxna chaxāxū rü chaxunetama nixī. Rü ichanaxā i chaxune na namaxēxūcēx i ñoma i naānecūāx i duūxūgü —ñanagürü ga Ngechuchu. ⁵² Rü yexguma ga yema Yudiügü rü poragaācü nügūna nacagüe, rü ñanagürügü: —¿Ñuxācü tá i ñaā yatū i naxūne tátama tüxū nangōxēxū? —ñanagürügü. ⁵³ Rü Ngechuchu ñanagürü nüxū: —Rü choma i Tupana nane na duūxūxū chīxū rü aixcūma pemaā nüxū chixu rü ngēxguma pema rü tama chaxunemaā pexāwemügügu rü tama nawa pexaxegügu ya chaugü, rü tāütáma pexū nangēxma i maxū i taguma gúxū. ⁵⁴—Texé ya chaxunemaā āwemüxē rü chaugüwa axexe rü tüxū nangēxma i maxū i taguma gúxū. Erü choma rü tá tüxū chamaxēē ega naāneärü guxgu. ⁵⁵—Erü chaxune rü ñnaxūchi nixī rü chaugü rü axexūxūchi nixī. ⁵⁶—Texé ya chaxunemaā āwemüxē rü chaugüwa axexe rü chowa tayaxūx rü choma i tūmawa. ⁵⁷—Chaunatū ga núma choxū mucū rü namaxū. Rü nüma choxna nanaxā i maxū. Rü ngēxgumarūü ta i choma rü tá tüxna chanaxā i maxū ya yixema choxū yaxúxe rü choxū yaxōxē. ⁵⁸—Marū pemaā nüxū chixu na choma rü pāu i daxūwa ne ūxū chīxū. Natürü choma rü tama yema pāu ga nuxcūmaŭgüxū ga perū oxigü ngōxgüxū ga pāürüü chixī. Yerü woo ga yema pāu na nangōxgüxū ga perū oxigü rü nayueamatama. Natürü texé ya choxū yaxúxe, ñoma pāu tangōxürüü, rü choxū yaxōxē rü guxūgutáma tamaxū —ñanagürü. ⁵⁹ Rü Ngechuchu rü duūxūgūmaā nüxū nixu ga yema ore ga yexguma nangúxēēāgu ga Yudiügüarū ngutaquēxepatāwa ga ñāne ga Capernāwa.

Ngechucharü orewa nangēxma i maxū i taguma gúxū

⁶⁰ Rü yexguma nüxū naxīñūēgu ga yema nguxēētae, rü muxūma ga yema duūxūgü ga nawe rüxīxū rü ñanagürügü: —Rü ngēma tamaā nüxū yaxuxū, rü naguxchaxūchi na nüxū icuáxū na ñuxū ñaxū. ¿Ñuxācü texé tüxū natauxcha na naga taxīnüxū? —ñanagürügü. ⁶¹ Natürü ga Ngechuchu rü nüxū nacuéxama ga yemaācü nügūmaā na iyadexagüxū naxcēx ga yema nguxēētae, rü yemacēx nüxna naca, rü ñanagürü: —¿Éxna peāēwa nangux i ngēma ore? ⁶²—Rü ngēxguma peāēwa nanguxgu i ngēma ore i pemaā nüxū chixuxū, rü ¿tacügu chi perūxīñūēxū ega choxū pedēuxgu na wenaxārū daxū na chaxīxū,

ga noxri ne chaxũxũwa na chaxũxũ i choma i Tupana Nane na duũxũxũ chiũxũ? ⁶³—Tupanaãe i Ũünexũ nixĩ i inaxãxũ i maxũ i taguma gũxũ. Rũ tama pexene nixĩ i pexũ maxẽxẽxũ. Rũ ngẽma ore i pemaã nüxũ chixuxũ rũ peãecèx nixĩ, rũ nawa nangẽxma i maxũ i taguma gũxũ. ⁶⁴—Natürũ tangẽxma i petanũwa ya ñuxre ya tama yaxõgũxe —ñanagürũ. Rũ yema ñanagürũ ga Ngechuchu yerũ noxriarũ ügũgumama marũ nüxũ nacuèx ga texé tá nüxũ na yaxõgũxũ, rũ texé tá cúãcü inaxuaxũxũ. ⁶⁵ Rũ ñanagürũ ta: —Rũ ngẽmacèx marũ pemaã nüxũ chixu rũ taxuacũma texé chauxũtawa tangu ega tama Chaunatũ chauxũtawa tũxũ gaxgu —ñanagürũ. ⁶⁶ Rũ yexguma inanaxũgũe ga nüxna na yaxĩgũxũ ga muxũma ga yema duũxũgũ ga noxri nawe rũxichirẽxũ. Rũ marũ tama nawe inaxũxũ. ⁶⁷ Rũ yexguma ga Ngechuchu rũ norũ 12 ga ngũxũgũna naca, rũ ñanagürũ nüxũ: —¿Ëxna pema rũ ta choxna pixĩgachitanũchaũ? —ñanagürũ. ⁶⁸ Natürũ Chimãũ ga Pedru rũ nanangãxũ, rũ ñanagürũ: —Pa Corix, ¿Texẽxũtawa chi taxĩxũ ega cuxna tixĩgachitanũgu? Erũ cuma rũ cuxũ nangẽxma i ore i nawa nangẽxmaxũ i maxũ i taguma gũxũ. ⁶⁹—Toma rũ marũ cuxũ tayaxõgũ, rũ nüxũ tacuèx na cuma quiũxũ ya Cristu ya Ũünecũ ya Tupana Nane —ñanagürũ. ⁷⁰ Rũ Ngechuchu toxũ nangãxũ, rũ ñanagürũ: —¿Taux Ëxna choma yĩxũ ga pexũ chidexechixũ ga pema ga 12? Natürũ nangẽxma i wũxi i petanũwa i Chatanáãrũ duũxũ ixĩxũ —ñanagürũ. ⁷¹ Rũ Yuda ga Icarĩute ga Chimãũ nanechiga nixĩ ga yadexaxũ ga Ngechuchu. Yerũ Yuda tá nixĩ ga cúãcü inaxuaxũxũ rũ woo ga nüma rũ wũxi ga totanũxũchirẽx na yĩxũ.

7

Ngechuchueneëgũ rũ tama nüxũ nayaxõgũ

¹ Rũ yemawena ga Ngechuchu rũ Gariréaanewa yexmagũne ga ñanegũgu nixũãgũchigũ. Rũ tama Yudéaanewa nayexmachaũ yerũ yemacũãx ga Yudiũgũarũ ãëxgacũgũ rũ naxcèx nadaugũ ga na yamèxgũchaũãxũcèx. ² Natürũ marũ ningaica ga yema Yudiũgũarũ peta ga nagu norũ düxenũgũ yaxũgũxũ na yemawa nüxna nacuèxãchiexũcèx ga ñuxãcü nuxcũmaũgũxũ ga norũ oxigũ na naxũgũxũ ga norũ düxenũgũ ga naĩxãtũnaxcèx ga yexguma Moĩchẽwe naxĩxgu ga ngextã taxũema íxãpataxũwa. Rũ yemacèx nixĩ ga Düxenũgũarũ Petagu naxãegaxũ. ³ Rũ naẽneëgũ ga Ngechuchu rũ ñanagürũgũ nüxũ: —Tama name i nuxã Gariréaarũ naãnegu curũxãũx. Rũ name nixĩ i petacèx Yudéawa cuxũ, na ngẽma duũxũgũ i cuwe rũxĩxũ i ngema ngẽxmagũxũ nüxũ daugũxũcèx i ngẽma cuèxruũgũ i mexũgũ i Tupanaãrũ poramaã cuxũxũ. ⁴—Erũ ngẽxguma chi wũxi ya yatũ rũ duũxũgũxũ nügũ nacuèxẽchaũgu rũ tama cúãcü nanaxũ i tacũ i naxũxũ. Rũ ñuxma na cunaxũxũ i muxũma i mexũgũ i Tupanaãrũ poramaã cuxũxũ, rũ name nixĩ i guxũ i duũxũgũpèxewa cunaxũ —ñanagürũgũ. ⁵ Rũ yema ñanagürũgũ ga naẽneëgũ yerũ woo ga nümagũ rũ ta tama nüxũ nayaxõgũ. ⁶ Rũ yexguma ga Ngechuchu rũ nanangãxũ, rũ ñanagürũ nüxũ: —Tauta nawa nangu i ngunexũ na petawa chaxũxũ. Natürũ pexcèx rũ ngẽxũrũxũmare i ngunexũ nixĩ i mexũ na petawa nagu pexĩxũ. ⁷—Ngẽma duũxũgũ i ñoma i naãnecũãx rũ tama pexchi naxaie. Natürũ chauxchi naxaie erũ chanangõxẽ i ngẽma naxũgũxũ rũ na nachixexũ. ⁸—Name nixĩ i petawa pexĩ i pemax. Choma rũ tauta ngema chaxũ erũ tauta nawa nangu i ngunexũ i nagu ngema chaxũxũ

—ñanagürü ga Ngechuchu. ⁹ Rü yexguma yema ñaxguwena, rü Gariréaanegu narüxãüx.

Ngechuchu rü Düxenügüarü Petawa naxü

¹⁰ Natürü nawena ga naëneëgü ga petawa na naxixü, rü Ngechuchu rü ta yema naxü. Natürü cüácü yema naxü, rü tama poraacü duüxügüxü nügü nadauxëë. ¹¹ Rü yema Yudiügüarü äëxgacügü rü naxcèx nadaugü ga yema petawa, rü ñanagürügü: —¿Ngextá nangëxma i ngëma yatü? —ñanagürügü. ¹² Rü nügütanüwa ga yema duüxügü ga yema yexmagüxü, rü poraacü Ngechuchuchiga índexagü. Rü ñuxre ga yema duüxügü rü ñanagürügü: —Yima rü wüxi ya yatü ya mecü nixí —ñanagürügü. Natürü ga togü rü ñanagürügü: —Ngëma yatü rü tama name erü duüxügüxü nawomüxëë —ñanagürügü. ¹³ Natürü taxuüma ga duüxügü rü mea togüpëxewa Ngechuchuxü nicuëxüügüchaü, yerü yema Yudiügüarü äëxgacügüxü namuüë. ¹⁴ Rü yexguma marü yema petaarü ngäxüwa nanguxgu, rü nixücu ga Ngechuchu nawa ga tupauca ga taxüne. Rü inanaxügü ga na nanguxëëtaexü. ¹⁵ Rü yema Yudiügüarü äëxgacügü, rü nabaixächiäëgü namaã ga yema ore ga Ngechuchu nüxü ixuxü. Rü ñanagürügü: —¿Ñuxacü i ngëmaacü poraacü nüxü nacuáxü, rü taguma texé nanguxëë? —ñanagürügü. ¹⁶ Rü Ngechuchu nanangäxü rü ñanagürü nüxü: —Ñaa chorü nguxëëtae rü tama choxrü nixí, erü Chaunaty ya núma choxü mucüarü nixí. ¹⁷ —Ngëxguma texé naxüxchaügu i Tupanaärü ngüchaü rü yixema tá nüxü tacuëx ngoxi aixcüma Tupanaxütawa chanayaxu i ngëma chorü nguxëëtae rü ëxna chaugüxütawatama chayaxuxü yixí i ngëma. ¹⁸ —Yixema texé ya mexü i tümachigaxütama ixuxe rü ngëmaacü tanaxü erü tanaxwëe i duüxügü na tüxü icuëxüügüxü. Natürü texé nüxü tixu i ore i mexü nachiga i ngëma tüxü muxü, rü aixcüma nixí i tümäärü ore. Rü tama dora nixí i ngëma nüxü tixuxü. ¹⁹ —¿Tama ëxna aixcüma yixü ga Moiché pexna naxäxü ga Tupanaärü mugü? Natürü taxüema i pema naga pexñüë i ngëma mugü. ¿Rü ñuxma rü tüxcüü nixí i choxü pimëxgüchaüxü? —ñanagürü. ²⁰ Rü yema duüxügü nanangäxügü, rü ñanagürügü: —Cuma rü ngoxo cuwa nangëxmamare. ¿Éxna texé cuxü timëxgüchaü? —ñanagürügü. ²¹ Natürü ga Ngechuchu rü ñanagürü nüxü: —Choma rü ngüxchigaarü ngunexügu chanamexëë ga wüxi ga yatü. Rü guxäma i pema rü penuäëgü naxcèx ga yema wüxitama ga mexü ga ngüxchigaarü ngunexügu chaxüxü. ²² —Natürü pema rü ta ngüxchigaarü ngunexügu pepuracüe na nagu pexixücèx ga Moichéarü mugü. Rü Moiché pemaã nüxü nixu na tüxü ípewiechëxmüpëxechiraüxü ya guxäma ya yatüxe ya buxe. Natürü tama Moiché nixí ga inaxügücü ga yema, yerü nuxcümaügüxü ga perü oxigüwa nixí ga ne naxüxü. Rü ñuxma i pema rü yema mugagu rü tüxü ípewiechëxmüpëxechiraü ya guxäma ya buxe ya yatüxe woo ngüxchigaarü ngunexü yixügu. ²³ —Rü ngëmaacü i pema rü ngüxchigaarü ngunexügu buxexü ípewiechëxmüpëxechiraü erü naga pexñüëchaü i Moichéarü mugü. ¿Rü ñuxma rü tüxcüü yixü i chomaã penuëxü naxcèx na ngüxchigaarü ngunexügu chanamexëëxü ga wüxi ga yatü ga idaaweecü? ²⁴ —Rü ngëmacèx tama name i ngürümare penangugü i ngëma chaxüxü. Rü penaxwëe i meã nagu perüxñüëxira, na aixcüma meã penangugüxücèx —ñanagürü ga Ngechuchu.

Ngechuchu rü Tupana Nane nixí

²⁵ Rŭ ñuxre ga yema duŭxŭgŭ ga Yerucharéŭgu āchiŭgŭxŭ rŭ nŭgŭna nacagŭe, rŭ ñanagŭrŭgŭ: —¿Taux éxna daa yŭxŭ ya yima yatŭ ya āēxgacŭgŭ naxcèx daugŭcŭ na yamēxgŭchaŭŭāxŭcèx? ²⁶ —¡Dŭcèx! Gua nixŭ rŭ yéa guxŭ i duŭxŭgŭpēxewa nidexa rŭ taxŭéma ñuxŭ ñatarŭgŭ nŭxŭ. ¿Taux éxna i tóru āēxgacŭgŭ i marŭ nŭxŭ yaxŭgŭāxŭ na aixcŭma Cristu na yŭxŭ i nŭmax? ²⁷ —Natŭrŭ i yixema rŭ nŭxŭ tacuèxgŭ na ngextá ne naxŭxŭ i nŭmax. Natŭrŭ ngēxguma aixcŭma Cristu nŭma ŭxgu rŭ taxŭétama nŭxŭ tacuèx na ngextá na ne naxŭxŭ —ñanagŭrŭgŭ. ²⁸ Rŭ nŭma ga Ngechuchu rŭ tupauca ga taxŭnewa ínanangŭexēē ga duŭxŭgŭ. Rŭ yexguma nŭxŭ naxŭnŭgu ga yema ore ga Yudiŭgŭ nŭxŭ ixugŭexŭ ga nachiga, rŭ tagaācŭ ñanagŭrŭ: —Pema rŭ marŭ choxŭ pecuèx rŭ nŭxŭ pecuèx na ngextá na ne chaxŭxŭ. Natŭrŭ tama chaugagu nixŭ i nŭma chaxŭxŭ. Choma nŭma chaxŭ yerŭ nŭma choxŭ namu ga Tupana ya naxwèxecŭ na nŭxŭ yaxŭgŭxŭ natŭrŭ i pema rŭ tama nŭxŭ pecuācŭ. ²⁹ —Choma rŭ nŭxŭ chacuèx yerŭ naxŭtawa ne chaxŭ, rŭ nŭma nixŭ i nŭma choxŭ namuxŭ —ñanagŭrŭ. ³⁰ Rŭ yexguma ga yema āēxgacŭgŭ rŭ Ngechuchuxŭ niyauxgŭchaŭ. Natŭrŭ taxuŭma nayayauxgŭ, yerŭ tauta nawa nangu ga ngunexŭ ga na yayauxgŭāxŭ rŭ na yamēxgŭāxŭcèx. ³¹ Natŭrŭ muxŭma ga duŭxŭgŭ rŭ nŭxŭ nayaxŭgŭ. Rŭ ñanagŭrŭgŭ: —¿Ngēxguma ínanguxgu ya Cristu rŭ íacŭ rŭ cuèxruŭ i taxŭ tá naxŭ ya daa yatŭ tama ŭxŭ i ñuxmax? —ñanagŭrŭgŭ.

Parichéugŭ rŭ Ngechuchuxŭ niyauxgŭchaŭ

³² Rŭ yema Parichéugŭ rŭ duŭxŭgŭxŭ naxŭnŭe ga yemaācŭ Ngechuchuchiga na yadexagŭxŭ. Rŭ yemacèx ga nŭmagŭ rŭ paigŭarŭ āēxgacŭgŭ rŭ yéma nanamugŭ ga tupauca ga taxŭneārŭ purichíagŭ na Ngechuchuxŭ yanayauxgŭxŭcèx. ³³ Rŭ yexguma ga Ngechuchu rŭ ñanagŭrŭ nŭxŭ: —Paxaāchi tátama nixŭ i petanŭwa changēxmaxŭ, rŭ ñuxŭchi tá chataegu naxŭtawa ya yima nŭma choxŭ mucŭ. ³⁴ —Pema rŭ tá chauxcèx pedaugŭ, natŭrŭ tātáma choxŭ ipeyangaugŭ. Erŭ ngēma ngextá tá íchangēxmaxŭwa rŭ taxuacŭ ngema pengugŭ. ³⁵ Rŭ yexguma ga yema Yudiŭgŭarŭ āēxgacŭgŭ rŭ nŭgŭna nacagŭe, rŭ ñanagŭrŭgŭ: —¿Ngextá tá naxŭ ega taxuacŭtáma nŭxŭ iyarŭngaugŭgu? ¿Éxna ngēma Yudiŭgŭ i to i nachŭŭānewa ngēxmagŭxŭtanŭwa tá naxŭ rŭ éxna ngēma tama Yudiŭgŭ ixŭgŭxŭtanŭwa tá naxŭ na yangŭexēēāxŭcèx? ³⁶ —¿Rŭ íacŭchiga nixŭ i ngēma na ngēma ñaxŭ:

“Tá chauxcèx pedaugŭ natŭrŭ tātáma choxŭ ipeyangaugŭ, erŭ taxuacŭtáma ngema pexŭ i ngēma tá íchangēxmaxŭwa”, ñaxŭ? —ñanagŭrŭgŭ.

Dexá i maxēerŭŭchiga nidexa ga Ngechuchu

³⁷ Rŭ yema nawa iyacuāxŭ ga petaarŭ ngunexŭ nixŭ ga guxŭ ga togŭ ga ngunexŭārŭ yexera rŭmemaēxŭ naxcèx ga Yudiŭgŭ. Rŭ yema ngunexŭgu nixŭ ga inachixŭ ga Ngechuchu rŭ tagaācŭ ñaxŭ: —Rŭ ngēxguma texé ítawaxgu rŭ ¡nuā chauxŭtawa taxŭ rŭ tayaxax! ³⁸ —Rŭ “texé ya choxŭ yaxŭxé rŭ túmaārŭ maxŭnewa tá nibaibe i taxŭ i dexá i maxēerŭŭ” ngēma Tupanaārŭ ore i ŭmatŭxŭ nŭxŭ ixuxŭrŭŭ —ñanagŭrŭ. ³⁹ Rŭ yexguma yema ñaxgu ga Ngechuchu rŭ Tupanaāē i Ŭŭnexŭchiga nixŭ ga yadexaxŭ. Rŭ nŭxŭ nixu ga guxŭma ga yema nŭxŭ yaxŭgŭxŭ rŭ tá na nayauxgŭāxŭ i

Naãe i Üünexŭ. Natürü tama yexgumatama nanayauxgü, yerü tauta wenaxärü daxüguxŭ ga naãnecèx nataegu ga Ngechuchu na guxŭärü äëxgacü na yïxŭcèx.

Ngechuchugagu nügü nitoye ga duŭxŭgü

⁴⁰ Rŭ nümaxŭ ga yema duŭxŭgü rŭ yexguma nüxŭ naxŭnŭëgu ga yema Ngechuchu nüxŭ ixuxŭ, rŭ ñanagürügü: —Aixcŭma ñaã yatü nixŭ i ngëma Tupanaärü orearü uruŭ i ínguxchaŭxŭ —ñanagürügü. ⁴¹ Rŭ togü rŭ ñanagürügü: —Daa nixŭ ya Cristu —ñanagürügü. Natürü togü rŭ ñanagürügü: —Tama nixŭ, erü taxucürüwa Gariréanecŭŭax nixŭ ya Cristu. ⁴²—Erü Tupanaärü ore i ümatŭxŭwa rŭ ñanagürü:

“Cristu rŭ tá Dabítaa nixŭ, rŭ tá nangox i ñãne i Beréŭwa ga ngextá Dabí íbuxŭŭwa”, ñanagürügü. ⁴³ Rŭ yemaãcü Ngechuchugagu nügü nitoye ga duŭxŭgü. ⁴⁴ Rŭ ñuxre ga yema duŭxŭgü rŭ Ngechuchuxŭ niyauxgüchaŭ, natürü taxuŭma nayauxgü.

Yudüguärü äëxgacügü rŭ tama Ngechuchuxŭ nayaxögüchaŭ

⁴⁵ Rŭ yema tupauca ga taxŭneärü purichíagü, rŭ Parichéugücèx rŭ paigüärü äëxgacügücèx nawoegu. Rŭ yema äëxgacügü rŭ nüxna nacagü, rŭ ñanagürügü: —¿Tŭxcüŭ tama nuã penaga? —ñanagürügü. ⁴⁶ Rŭ yema purichíagü rŭ nanangãxŭgü rŭ ñanagürügü: —Taguma texé tidexa i ñaã yatü idexaxŭrŭŭ —ñanagürügü. ⁴⁷ Rŭ yexguma ga Parichéugü rŭ ñanagürügü nüxŭ: —¿Éxna pexŭ rŭ ta marü nawomŭxëë i nümax? ⁴⁸—Dücèx, rŭ taxúema i tomax i Parichéugü rŭ taxuŭma i tóru äëxgacügü rŭ nüxŭ nayaxögü i ngëma Ngechuchu. ⁴⁹—Natürü ñaã duŭxŭgü i tama Tupanaärü mugŭxŭ cuèxgŭxŭ rŭ marü nachixexŭgugü —ñanagürügü. ⁵⁰ Natürü Nicodému ga Parichéu ixŭcü ga wŭxicana Ngechuchuxŭtagu naxŭñanecü, rŭ ñanagürü nüxŭ: ⁵¹—Ngëma tóru mugü i ümatŭxŭwa rŭ ñanagürü:

“Taxuacüma wŭxi i yatŭxŭ tapoxcu ega tama nüxŭ ixŭnŭëxŭragu i norü dexa na nüxŭ icuáxŭcèx na ŭacü na naxŭxŭ”, ñanagürü. ⁵² Rŭ yexguma ga natanŭxŭgü rŭ nanangãxŭgü, rŭ ñanagürügü nüxŭ: —¿Éxna cuma rŭ ta Gariréanecŭŭax quixŭ? ¡Nawa nangŭx i Tupanaärü ore i ümatŭxŭ rŭ ngema tá nüxŭ cudadu rŭ taxuŭtáma i Tupanaärü orearü uruŭ rŭ Gariréanecŭŭax nixŭ! —ñanagürügü. ⁵³ Rŭ yexguma ga wŭxichigü rŭ nachiŭwa naxŭ.

8

Nge ga ätecü ga naŭ ga yatümaã ngëãexcü

¹ Rŭ Ngechuchu rŭ Oríbunecügu äegane ga mëxpŭnewa naxŭ. ² Rŭ moxŭãcü ga yexguma yangunegu, rŭ wenaxärü tupauca ga taxŭnecèx nataegu. Rŭ ga duŭxŭgü rŭ naxcèx naxŭ. Rŭ nüma ga Ngechuchu rŭ ínarŭto, rŭ inanaxŭgü ga na nangúexëëãxŭ ga duŭxŭgü. ³ Rŭ yema ngúexëëruŭgü ga Moíchéarü mugüwa nguxëëtaegŭxŭ rŭ Parichéugü, rŭ Ngechuchuxŭtawa ngŭxŭ nagagü ga wŭxi ga nge ga ätecü ga ngŭxŭ nadaugcü ga naŭ ga yatümaã na inapexŭ. Rŭ guxŭma ga yema duŭxŭgü ga yéma yexmagŭxŭpéxegu ngŭxŭ nayachixëëgü. ⁴ Rŭ ñanagürügü Ngechuchuxŭ: —Pa Ngúexëëruŭx, ñaã nge i ätecü rŭ ngŭxŭ itayangau na naŭ ya yatümaã na inapexŭ. ⁵ Moíchéarü mugüwa tamaã nüxŭ nixu na nutamaã ngŭxŭ ímŭxŭchiãcŭma ngŭxŭ imáxŭ i wŭxi i nge i ngëmaãcü maxŭcü. ¿Ñuxŭ ñacuxŭ i cuma i ñuxmax? —ñanagürügü.

⁶ Rŭ yema ñanagŭrŭgŭ ga nŭmagŭ, yerŭ Ngechuchuxŭ guxchaxŭgu nan-guxŕŕŕgŭchaŭ na nŭxŭ nayexmaxŭcŕx ga ŭacŭcŕx na ínaxuaxŭgŭãxŭ. Natŭrŭ ga Ngechuchu rŭ inayarŭmaxãchi rŭ inanaxŭgŭ ga naxmŕxmaã waixŭmŭwa na naxŭmatŭãxŭ. ⁷ Natŭrŭ nŭxŭ nacŕxŭgŭama, rŭ yemacŕx dŭxwa wenaxãrŭ nadaunagŭ ga Ngechuchu, rŭ ñanagŭrŭ nŭxŭ: —Ngexerŭxe i petanŭwa ya ngearŭ pecaduãxŕ rŭ tŭxira nuta ngŭxŭ tanaña —ñanagŭrŭ. ⁸ Rŭ wenaxãrŭ inayarŭmaxãchi ga Ngechuchu rŭ naxmŕxmaã nanaxŭmatŭ ga waixŭmŭwa. ⁹ Natŭrŭ yexguma nŭxŭ naxŭnŭŕŕga ga yema ore ga Parichŕgŭ rŭ inanaxŭgŭ ga nŭgŭ na yawŭxŭxŭ ga nŭgŭwe na ínachoxŭxŭ. Rŭ yaguãxgŭ ga Parichŕgŭwa inaxŭgŭ ga na ínachoxŭxŭ rŭ dŭxwa guxŭma ínachoxŭ. Rŭ yexguma marŭ guxŭma ga Parichŕgŭ íchoŭxgu, rŭ Ngechuchu rŭ yema ngecŭxicatama yŕma duŭxŭgŭpŕxewa nayaxŭgŭ. ¹⁰ Rŭ yexguma ga Ngechuchu rŭ wena nadaunagŭ. Rŭ ngŭxna naca rŭ ñanagŭrŭ ngŭxŭ: —Pa Ngecŭx, ¿Ngŕxŭgŭ nixŭ i ngŕma cuxŭ ixugŕxŭ? ¿Rŭ taxuŭma cuxŭ imãxchaŭ? —ñanagŭrŭ. ¹¹ Rŭ ngŭma rŭ ngŭgŭrŭgŭ nŭxŭ: —Taxuŭma Pa Corix —ngŭgŭrŭgŭ. Rŭ yexguma ga Ngechuchu rŭ ñanagŭrŭ ngŭxŭ: —Choma rŭ ta tama cuxŭ chapoxcu. Ñuxma rŭ marŭ name rŭ íquixŭ rŭ tama wena pecadu cuxŭ —ñanagŭrŭ.

Ngechuchu rŭ ñoma i naãneãrŭ ngŕonex-ŕŕruŭ nixŭ

¹² Rŭ wenaxãrŭ duŭxŭgŭmaã nidexa ga Ngechuchu, rŭ ñanagŭrŭ nŭxŭ: —Choma nixŭ i ñoma i naãneçŭãxãrŭ ngŕonexŕŕruŭ. Rŭ yŭxema chowe rŭxŭxŕ rŭ chorŭ ngŕonexŭwa tangŕxma rŭ tŭxna chanaxã i maxŭ. Rŭ tá nŭxna ítanguxuchi i tŭmaãrŭ chixexŭ —ñanagŭrŭ. ¹³ Rŭ yexguma ga Parichŕgŭ rŭ ñanagŭrŭgŭ nŭxŭ: —Cuma rŭ cugŭchigaxŭtama quixu. Rŭ ngŕma cuchiga i nŭxŭ quixuxŭ rŭ taxuwama name —ñanagŭrŭgŭ. ¹⁴ Rŭ Ngechuchu nanangãxŭ rŭ ñanagŭrŭ nŭxŭ: —Rŭ ngŕma ore i chauchiga nŭxŭ chixuxŭ rŭ aixcŭma nixŭ woo chomatama yixŭgu i namaã chaugŕŕtŭwa chidexaxŭ. Erŭ choma rŭ nŭxŭ chacuŕx i ngextã ne chaxŭxŭ, rŭ ngextã tá chaxŭxŭ. Natŭrŭ pema rŭ tama nŭxŭ pecuŕx na ngextã ne chaxŭxŭ rŭ tama nŭxŭ pecuŕx na ngextã tá chaxŭxŭ. ¹⁵ Pema rŭ choxŭ pengugŭ i ñoma i naãneçŭãx i duŭxŭgŭ nagu rŭxŭnŭŕŕãcŭmamare. Natŭrŭ i choma rŭ taxŭxŭma changugŭ. ¹⁶ Natŭrŭ ngŕxguma chi texŕxŭ changugŭgu rŭ aixcŭma meãma tŭxŭ changugŭ. Erŭ tama chaxicatama tŭxŭ changugŭ, natŭrŭ yima Chaunatŭ ga nŭma choxŭ mucŭmaã nixŭ i wŭxigu tŭxŭ tangugŭxŭ. ¹⁷ Rŭ ngŕma mugŭ ga Moŭchŕ ŭmatŭxŭ i nagu pexŭxŭ, rŭ ñanagŭrŭ:

“Ngŕxguma taxre i duŭxŭgŭ rŭ wŭxitama i orexŭ yaxugŭgu, rŭ ngŕmawa ãŕxgacŭ nŭxŭ nacuŕx na aixcŭma yŭxŭ i ngŕma nŭxŭ yaxugŕxŭ”, ñanagŭrŭ. ¹⁸ Rŭ dŭcax, choma nixŭ i wŭxi i chauchigaxŭ chixuxŭ rŭ Chaunatŭ ga nŭma choxŭ mucŭ nixŭ ya naŭ. ¿Rŭ tŭxçŭtŭ tama choxŭ peyaxŕgŭchaŭ i ñuxmax? —ñanagŭrŭ. ¹⁹ Rŭ yexguma ga nŭmagŭ rŭ nŭxna nacagŭe rŭ ñanagŭrŭgŭ: —¿Ngexçŭ ya yima Cunatŭ? —ñanagŭrŭgŭ. Rŭ Ngechuchu nanangãxŭ rŭ ñanagŭrŭ: —Choxŭ rŭ tama pecuŕx rŭ Chaunatŭxŭ rŭ ta tama pecuŕx. Rŭ ngŕxguma chi choxŭ pecuŕxgŭgu rŭ Chaunatŭxŭ rŭ chi ta pecuŕxgŭ —ñanagŭrŭ. ²⁰ Rŭ yema orexŭ nixu ga Ngechuchu ga yexguma nanguxŕŕtaegu ga tupauga ga taxŭnewa naxŭtawaga ga yema nachiga ga ngextã duŭxŭgŭ tupaucana diŕru ngŭxŭ íxãgŭxŭwa. Natŭrŭ taxuŭma Ngechuchuxŭ niyauxgŭ, yerŭ tauta nawa nangu ga yema ngunexŭ ga nagu yayauxgŭãxŭ.

Ngechuchu rŭ Parichéugŭmaã nŭxŭ nixu rŭ ngextã nŭma ínaxŭxŭwa rŭ taxucŭrŭwama ngema naxŭ

²¹ Rŭ Ngechuchu rŭ wenaxãrŭ namaã nŭxŭ nixu, rŭ ñanagŭrŭ: —Choma rŭ tá pexna chixŭ i nŭma, rŭ pema rŭ tá chauxcèx pedaugŭ, natŭrŭ tá perŭ pecadugu peyue. Rŭ ngextã íchaxŭxŭwa rŭ taxucŭrŭwama ngema pexŭ —ñanagŭrŭ. ²² Rŭ yexguma ga yema Yudiŭgŭ rŭ ñanagŭrŭgŭ: —¿Éxna nŭgŭ tátama nimèx rŭ ngèmacèx tamaã nŭxŭ yaxuxŭ na taxucŭrŭwama ngema íxŭxŭ i ngèma ínaxŭxŭwa? —ñanagŭrŭgŭ. ²³ Rŭ Ngechuchu ñanagŭrŭ nŭxŭ: —Pema rŭ ñoma i naãnecŭãx i duŭxŭgŭ pixŭgŭ, natŭrŭ i choma rŭ daxŭguxŭ i naãnewa ne chaxŭ. Pema rŭ ñoma i naãnèãrŭ duŭxŭgŭ pixŭgŭ natŭrŭ i choma rŭ tama ñoma i naãnecŭãx chixŭ. ²⁴ —Rŭ ngèmacèx pemaã nŭxŭ chixu rŭ tá perŭ pecadugu peyue. Erŭ ngèxguma tama choxŭ peyaxôgŭgu na choma chŭxŭ ya Cristu, rŭ perŭ pecadugu tá peyue —ñanagŭrŭ. ²⁵ Rŭ yexguma nŭxna nacagŭe, rŭ ñanagŭrŭgŭ: —¿Natŭrŭ texé quixŭ i cumax? —ñanagŭrŭgŭ. Rŭ Ngechuchu nanangãxŭ, rŭ ñanagŭrŭ: —Marŭ noxritama pemaã nŭxŭ chixu na texé chŭxŭ. ²⁶ —Rŭ choma rŭ choxŭ nangèxma i muxŭma i ñacŭ i chomatama pexŭ changŭexèèchaŭxŭ rŭ ñacŭcèx pexna na chaçaxŭ, natŭrŭ táutãma chanaxŭ i ngèma. Erŭ yima Chaunatŭ ga nŭma choxŭ mucŭ chomaã nŭxŭ íxuxŭ i orexicatama nixŭ i ñoma i naãnecŭãxgŭmaã nŭxŭ chixuxŭ. Rŭ guxŭma i ngèma nŭxŭ yaxuxŭ ya Chaunatŭ, rŭ aixcŭma nixŭ —ñanagŭrŭ. ²⁷ Natŭrŭ nŭmagŭ rŭ tama nŭxŭ nacuèxgŭéga ga Nanatŭ ya Tupanachiga na yŭxŭ na yema ñaxŭ ga Ngechuchu. ²⁸ Rŭ yemacèx ga Ngechuchu rŭ ñanagŭrŭ nŭxŭ: —Choma nixŭ i Tupana Nane i duŭxŭxŭ chŭxŭ. Rŭ yixcŭra ngèxguma curuchawa choxŭ pipotagŭgu, rŭ tá nŭxŭ picuèxãchitanŭ na Cristu na chŭxŭ. Rŭ tá nŭxŭ pecuèx na taxuŭma chauechamatama chaxŭxŭ. Rŭ ngèma Chaunatŭ chomaã nŭxŭ íxuxŭícatama nixŭ i pemaã nŭxŭ chixuxŭ. ²⁹ —Yima nŭma choxŭ mucŭ ya Chaunatŭ rŭ chauxŭtawa nangèxma. Rŭ taguma choxna nixŭgachi, erŭ choma rŭ guxŭguma chanaxŭ i ngèma norŭ ngúchaŭ íxŭxŭ —ñanagŭrŭ. ³⁰ Rŭ yexguma yema ñaxgu ga Ngechuchu rŭ muxŭma ga duŭxŭgŭ nŭxŭ nayaxôgŭ.

Yŭxema Tupanaxãcŭgŭ íxŭgŭxechiga, rŭ yŭxema pecadutŭŭwa ngèxmagŭxechiga

³¹ Rŭ yexguma ga Ngechuchu rŭ ñanagŭrŭ nŭxŭ ga yema Yudiŭgŭarŭ ãèxgacŭgŭ ga nŭxŭ yaxôgŭxŭ: —Ngèxguma pema meãma peyaxôgŭechagu i ngèma pemaã nŭxŭ chixuxŭ, rŭ aixcŭmaxŭchi tá chorŭ ngúexŭgŭ pixŭgŭ. ³² —Rŭ tá nŭxŭ pecuèx i ore i aixcŭma íxŭxŭ. Rŭ ngèma ore tá pexŭ ínanguxŭxèè —ñanagŭrŭ. ³³ Rŭ nŭmagŭ rŭ Ngechuchuxŭ nangãxŭgŭ, rŭ ñanagŭrŭgŭ: —Toma rŭ nuxcŭmaŭcŭ ga torŭ oxŭ ga Abrãŭtaa tixŭgŭ rŭ taguma texémèxèwa tangèxmagŭ. ¿Nŭxãcŭ i cumax rŭ tá na ítanguxŭxŭ, ñacuxŭ? —ñanagŭrŭgŭ. ³⁴ Rŭ Ngechuchu ñanagŭrŭ nŭxŭ: —Aixcŭma pemaã nŭxŭ chixu rŭ guxãma ya pecaduãxè rŭ pecadutŭŭwa tangèxmagŭ. ³⁵ —Wŭxi i coriarŭ duŭxŭmare rŭ tama norŭ corŭpataçŭãx nixŭ. Natŭrŭ wŭxi i cori nane rŭ guxŭguma nanatŭ nane nixŭ. ³⁶ —Choma rŭ Tupana Nane chixŭ. Rŭ ngèxguma chi choma pecaduna pexŭ íchanguŭxèègu, rŭ aixcŭma tá nŭxna ípengŭ. ³⁷ —Marŭ nŭxŭ chacuèx na Abrãŭtaa pixŭgŭxŭ i pemax. Natŭrŭ choxŭ pimèxgŭchaŭ erŭ tama aixcŭma choxŭ peyaxôgŭ i ngèma ore i pemaã nŭxŭ chixuxŭ. ³⁸ —Choma rŭ yema Chaunatŭ choxŭ wéxŭ nixŭ i pemaã nŭxŭ chixuxŭ. Natŭrŭ pema rŭ penaxŭ i ngèma penatŭ pemaã nŭxŭ íxuxŭ —ñanagŭrŭ ga

Ngechuchu. ³⁹ Rŭ nŭmagŭ rŭ Ngechuchuxŭ nangãxŭ rŭ ñanagŭrŭgŭ: — Torŭ oxŭ nixŭ ga Abrãŭ —ñanagŭrŭgŭ. Natŭrŭ Ngechuchu nanangãxŭ rŭ ñanagŭrŭ nŭxŭ: —Ngẽxguma chŭ aixcŭma Abrãŭtaa pixŭgŭgŭ rŭ chŭ Abrãŭ ũxŭrŭŭ penaxŭ. ⁴⁰ —Natŭrŭ woo pemaã nŭxŭ chixu i ore i aixcŭma ixŭxŭ ga Chaunatŭ ga Tupana choxŭ nguxẽẽxŭ, rŭ pema rŭ choxŭ pimẽxgŭchaŭ. Natŭrŭ ga Abrãŭ rŭ taguma yemaãcŭ nanaxŭ. ⁴¹ —Pema rŭ penaxŭ i penatŭgŭcŭmatama —ñanagŭrŭ. Rŭ yexguma ga nŭmagŭ rŭ ñanagŭrŭgŭ: — Toma rŭ tama tangŭrŭwaŭgŭmare, rŭ toxŭ nangẽxma ya wŭxitama ya tonatŭ. Rŭ yima nixŭ ya Tupana —ñanagŭrŭgŭ. ⁴² Rŭ Ngechuchu nanangãxŭ, rŭ ñanagŭrŭ nŭxŭ: —Ngẽxguma chŭ aixcŭma Tupana yixŭgu ya penatŭ rŭ choxŭ chŭ pengechaŭ, erŭ choma rŭ Tupanaxŭtawa nixŭ i ne chaxŭxŭ, rŭ ngẽmacẽx chanuxma. Rŭ tama chauechamatama nŭma chaxŭ, natŭrŭ nŭma chaxŭ yerŭ Chaunatŭ ya Tupana nŭma choxŭ namu. ⁴³ —¿Tŭxcŭŭ tama nŭxŭ pecuẽxẽga i ngẽma pemaã nŭxŭ chixuxŭ? Pexŭ naguxcha erŭ woetama tama iperŭxŭnŭẽchaŭ i ngẽma pemaã nŭxŭ chixuxŭ i ore. ⁴⁴ —Penatŭ rŭ Chatanã nixŭ rŭ pema rŭ naxãcŭgŭ pixŭgŭ. Rŭ ngẽmacẽx penaxŭ i ngẽma nŭma pexŭ nanaxwẽxexŭ. Rŭ ngẽma Chatanã rŭ noxriarŭ ũgŭgumama wŭxi i maẽtaxŭ nixŭ. Rŭ taguma ore i aixcŭmaxŭgu narŭxŭnŭ rŭ taguma ore i aixcŭmaxŭ nixu. Rŭ ngẽxguma yadeaxgu rŭ doraxŭxŭcatama nixu, erŭ nŭma rŭ wŭxi i doratẽxãxŭ nixŭ. Rŭ guxŭma i doratẽxãxŭnatŭ nixŭ. ⁴⁵ —Natŭrŭ i pema rŭ tama choxŭ peyaxŭgŭchaŭ erŭ ore i aixcŭmaxŭ chixu. ⁴⁶ —¿Texẽ ya petanŭwa choxŭ dauxe na pecadu chaxŭxŭ? Rŭ ñuxma na nŭxŭ chixuxŭ i ore i aixcŭma ixŭxŭ, rŭ ¿tŭxcŭŭ tama choxŭ peyaxŭgŭ? ⁴⁷ —Texẽ ya Tupanaãrŭ duŭxŭ ixŭxẽ rŭ itarŭxŭnŭ i Tupanaãrŭ ore. Natŭrŭ i pema rŭ tama Tupanaãrŭ duŭxŭgŭ pixŭgŭ, rŭ ngẽmacẽx nixŭ i tama iperŭxŭnŭẽchaŭxŭ i Tupanaãrŭ ore —ñanagŭrŭ.

Tauta nangoxgu ga Abrãŭ rŭ Cristu rŭ marŭ nayexma

⁴⁸ Rŭ yexguma ga yema Yudiŭgŭarŭ ãẽxgacŭgŭ rŭ ñanagŭrŭgŭ nŭxŭ: —Rŭ aixcŭma nixŭ ga yema torŭ ore ga yexguma ñatagŭgŭgu:

“Cuma rŭ wŭxi i Chamãriacŭãx quixŭ, rŭ ngoxo cuwa nangẽxma”, ñatagŭgŭgu —ñanagŭrŭgŭ. ⁴⁹ Rŭ Ngechuchu nanangãxŭ, rŭ ñanagŭrŭ nŭxŭ: —Chowa rŭ nataxuma i ngoxo. Rŭ ngẽma chaxŭxŭ nixŭ na Chaunatŭxŭ chŭcuẽxŭxŭ, natŭrŭ i pema rŭ chixri chauchiga pidexagŭ. ⁵⁰ —Choma rŭ tama naxcẽx chadau na texẽ choxŭ icuẽxŭŭgŭxŭcẽx. Natŭrŭ Tupana nixŭ ya naxwẽxecŭ na duŭxŭgŭ choxŭ icuẽxŭŭgŭxŭ. Rŭ nŭma tá nanapoxcue i ngẽma chauxchi aiexŭ. ⁵¹ —Aixcŭma pemaã nŭxŭ chixu, rŭ texẽ ya naga ñnũxẽ i ngẽma tŭmamaã nŭxŭ chixuxŭ rŭ guxŭgutãma tamaxẽcha —ñanagŭrŭ. ⁵² Rŭ yexguma ga yema Yudiŭgŭarŭ ãẽxgacŭgŭ, rŭ Ngechuchuxŭ nangãxŭgŭ, rŭ ñanagŭrŭgŭ: —Ñuxma rŭ meãxŭchima nŭxŭ tacuẽx na cuwa nangẽxmaxŭ i wŭxi i ngoxo. Yerŭ ga Abrãŭ rŭ guxŭma ga nuxcŭmaŭgŭxŭ ga Tupanaãrŭ orearŭ uruŭgŭ rŭ nayue. Natŭrŭ cuma rŭ ñuxma tomaã nŭxŭ quixu rŭ texẽ ya naga ñnũxẽ i ngẽma curŭ ore rŭ guxŭgutãma tamaxẽcha —ñacurŭgŭ. ⁵³ —¿Éxna cuma rŭ torŭ oxŭ ga Abrãŭãrŭ yexera quixŭ? Yerŭ nŭma rŭ nayu rŭ guxŭma ga nuxcŭmaŭgŭxŭ ga Tupanaãrŭ orearŭ uruŭgŭ rŭ ta nayue. ¿Rŭ cugŭcẽx rŭ texẽ quixŭ? —ñanagŭrŭgŭ. ⁵⁴ Rŭ Ngechuchu nanangãxŭ, rŭ ñanagŭrŭ nŭxŭ: —Ega chaugŭ chitama chŭcuẽxŭŭgu rŭ ngẽma rŭ taxuwama name. Natŭrŭ yima choxŭ icuẽxŭŭcŭ rŭ Chaunatŭ nixŭ. Rŭ yima Chaunatŭtama nixŭ ya perŭ Tupana ixŭcŭ —ñapegŭcŭ nŭxŭ. ⁵⁵ —Natŭrŭ

i pema rŭ tama aixcŭma nŭxŭ pecuèx ya Chaunatŭ ya Tupana. Natŭrŭ i choma rŭ ngēmaācŭ nŭxŭ chacuèx. Rŭ ngēxguma chi:

“Tama nŭxŭ chacuèx”, ñachaxgu, rŭ pexrŭŭ chi wŭxi i doratèxáxŭ chixŭ. Natŭrŭ i choma rŭ aixcŭmaxŭchima nŭxŭ chacuèx ya Chaunatŭ ya Tupana, rŭ naga chaxŭnŭ i guxŭma i norŭ ore i chomaā nŭxŭ yaxŭŭ. ⁵⁶ —Perŭ oxŭ ga Abráŭ rŭ nataāē yerŭ aixcŭma nayaxŭ rŭ tá na íchangxŭŭ i ñoma i naānewa. Rŭ yemaxŭ nacuèx rŭ yemacèx nataāē — ñanagŭrŭ ga Ngechuchu. ⁵⁷ Rŭ yexguma ga yema Yudŭgŭarŭ āēxgacŭgŭ rŭ Ngechuchuxŭ nangāxŭgŭ, rŭ ñanagŭrŭgŭ: —Cuma rŭ tauta 50 ya taunecŭ cuxŭ nangēxma. ¿Ñuxācŭ Abráŭxŭ cudau ga tauta cungoxgux ga yexguma? —ñanagŭrŭgŭ. ⁵⁸ Rŭ Ngechuchu nanangāxŭ rŭ ñanagŭrŭ nŭxŭ: —Aixcŭma pemaā nŭxŭ chixu rŭ tauta Abráŭ ngoxgu rŭ choma rŭ marŭ chayexma — ñanagŭrŭ. ⁵⁹ Rŭ yexguma ga nŭmagŭ rŭ nutane nanayauxgu na gumamaā ínamuxŭchigŭāxŭcèx. Natŭrŭ ga Ngechuchu rŭ naxchaxwa inicŭx. Rŭ yemaācŭ ínaxŭxŭ nawa ga guma tupauca ga taxŭne.

9

Ngechuchu nanamexē ga wŭxi ga yatŭ ga norŭ bucŭma ngexetŭcŭ

¹ Rŭ yexguma namagu tomaā yaxŭxgu ga Ngechuchu, rŭ yēma nŭxŭ nadau ga wŭxi ga yatŭ ga woetama norŭ bucŭma ngexetŭcŭ. ² Rŭ toma ga norŭ ngŭxŭgŭ rŭ nŭxna tacagŭ, rŭ ñatarŭgŭgŭ: —Pa Ngŭxēēruŭ, ¿Tŭxcŭŭŭ ngexetŭcŭma nabu ya daa yatŭ? ¿Éxna nanatŭ rŭ naēārŭ pecadugagu rŭ éxna norŭ pecadugagutama? —ñatarŭgŭgŭ. ³ Rŭ Ngechuchu toxŭ nangāxŭŭ, rŭ ñanagŭrŭ toxŭ: —Tama norŭ pecadugagu rŭ tama i nanatŭ rŭ naēārŭ pecadugagu nixŭ i ngēmaācŭ nabuxŭ. Natŭrŭ ngēmaācŭ nabu na nawa nŭxŭ pedauxŭcèx na ñuxācŭ Tupana tŭxŭ na rŭmexēēxŭ. ⁴ —Rŭ ñoma rŭ ta nangune rŭ name nixŭ na paxama na naxŭxŭ i ngēma puracŭ ya Chaunatŭ ga nŭma choxŭ mucŭ tŭxna āxŭ. Erŭ paxa tá nachŭta rŭ ngēxguma rŭ taxucŭrŭwama texé tá tapuracŭ. ⁵ —Rŭ ñuxma na ñoma i naānewa changēxmaxŭŭ rŭ ñoma i naāneārŭ ngŭonexēēruŭ chixŭ —ñanagŭrŭ. ⁶ Rŭ yexguma yema ñaxguwena rŭ Ngechuchu waixŭmŭānewa nacuaxi. Rŭ yema waixŭmŭ ga íwaixŭmaā nanachaxetŭ ga guma yatŭ ga ngexetŭcŭ. ⁷ Rŭ yexguma guma ngexetŭcŭxŭ ñanagŭrŭ: —¡Dexámaā cugŭ yayauxetŭ i Chiruéarŭ puchuwa! —ñanagŭrŭ. Rŭ ngēma naega rŭ “Tŭxŭ muxŭ”, ñaxŭchiga nixŭ. Rŭ yēma naxŭ ga guma ngexetŭcŭ rŭ ngŭgŭ dexámaā nayauxetŭ. Rŭ yexguma nataegugu rŭ marŭ nidauchixetŭ. ⁸ Rŭ yexguma ga yema duŭxŭgŭ ga guma ngexetŭcŭpataarŭ ngaicamagu pegŭxŭ rŭ yema duŭxŭgŭ ga ŭpacŭ nŭxŭ daugŭxŭ ga na nangexetŭxŭ, rŭ ñanagŭrŭgŭ: —¿Taux éxna i ñaā yŭŭxŭ ga yema yatŭ ga ngexetŭchiréxŭ ga duŭxŭgŭxŭ diērucèx cèèxŭxŭ? —ñanagŭrŭgŭ. ⁹ Rŭ nŭmaxŭŭ rŭ ñanagŭrŭgŭ: —Ngēmaācŭ nŭma nixŭ —ñanagŭrŭgŭ. Rŭ togŭ rŭ ñanagŭrŭgŭ: —Tama nixŭ i yima yŭŭxŭ, natŭrŭ nanangēxgumarāxŭchŭ —ñanagŭrŭgŭ. Natŭrŭ nŭmatama ga guma yatŭ ga ngexetŭchirécŭ, rŭ ñanagŭrŭ: —Ngēmaācŭ choma chixŭ —ñanagŭrŭ. ¹⁰ Rŭ yexguma ga yema duŭxŭgŭ rŭ nŭxna nacagŭ rŭ ñanagŭrŭgŭ: —¿Rŭ ñuxācŭ nixŭ i marŭ quidauchixŭ i ñuxmax? —ñanagŭrŭgŭ. ¹¹ Rŭ nŭma nanangāxŭ rŭ ñanagŭrŭ: —Yima yatŭ ya Ngechuchugu āegacŭ rŭ yima waixŭmŭānewa nacuaxi. Rŭ yema waixŭmŭ ga íwaixŭmaā choxŭ nachaxetŭ. Rŭ ñanagŭrŭ choxŭ:

“¡Yéa Chiruéarŭ puchuwa naxŭ rŭ ngema dexámaā cugŭ yayauxetŭ!” ñanagŭrŭ choxŭ. Rŭ yēma chaxŭ, rŭ yexguma dexámaā chaugŭ chayauxetŭgu

rü chidauchi —ñanagürü ga guma yatü. ¹² Rü yexguma nüxna nacagüe, rü ñanagürügü: —¿Ngextá nangëxmaxü i ñuxma ya yima yatü ya cuxü rümexëëcü? —ñanagürügü. Rü nüma ga guma yatü ga ngexetüchirécü rü ñanagürü: —Tama nüxü chacuèx —ñanagürü.

Parichéugü rü guma ngexetücü ga Ngechuchu namexëëcüna nacagüe

¹³⁻¹⁴ Natürü yema ngunexü ga Ngechuchu nagu namexëëxü ga guma ngexetücü, rü ngüxchigaarü ngunexü nixí. Rü yemacëx ga duüxügü rü Parichéugüxtawa nanagagü ga guma yatü ga ngexetüchirécü. ¹⁵ Rü yexguma ga yema Parichéugü rü nüxna nacagüe ga guma yatü, rü ñanagürügü: —¿Ñuxácü i marü curümexëtüxü i ñuxmax? —ñanagürügü. Rü nüma nanangäxü rü ñanagürü: —Waixümü ga naxbüxágümaã yawaixëëxümaã choxü nachaxetü ga Ngechuchu, rü ñuxüchi dexámaã chaugü chayayauxetü, rü ngëmacëx marü chidauchi —ñanagürü. ¹⁶ Rü yexguma ga ñuxre ga Parichéugü rü ñanagürügü: —Yema yatü ga cuxü rümexëëxü rü tama Tupanaärü duüxü nixí, erü tama nanaxaure i ngüxchigaarü ngunexü —ñanagürügü. Natürü togü ga Parichéugü rü ñanagürügü: —¿Ñuxácü nanaxü i ngëma cuèxruü i mexü i taxü ega wüxi i pecaduáxü yixíxugü? —ñanagürügü. Rü yemaãcü nügü nitoye ga nagu naxínüëxüwa ga yema Parichéugü. ¹⁷ Rü wena nüxna nacagüe ga guma yatü ga ngexetüchirécü, rü ñanagürügü: —¿Natürü cuma rü ñuxü ñacuxü nachiga i ngëma yatü ga cuxü rümexëëxü? —ñanagürügü. Rü nüma nanangäxü, rü ñanagürü: —Chauxcëx rü wüxi i Tupanaärü orearü uruü nixí —ñanagürü. ¹⁸ Natürü ga yema Yudiügüarü äëxgacügü rü tama nüxü nayaxögüchaü ga nüma na yíxü ga na ngexetüchirécü ga noxrix, rü ñuxma rü marü na yadauchixü. Rü yemacëx ga yema äëxgacügü rü tümacëx nangemagü ga nanatü rü naë ga guma yatü ga rümexëtücü. ¹⁹ Rü tüxna nacagü, rü ñanagürügü: —¿Daa yíxü ga guma pene ga nüxü pixucü ga woetama ngexetüäcü bucü? ¿Ñuxácü i ñuxma i yadauchixü? —ñanagürügü. ²⁰ Rü nanatü rü naë tanangäxügü rü ñatarügügü: —Ngëmaäcü nüxü tacuèx rü daa nixí ya tone ga ngexetüäcüma buchirécü. ²¹ Natürü tama nüxü tacuèx ga ñuxácü na yadauchixü i ñuxmax. Rü tama nüxü tacuèx ga texé na namexëtüxëëxü. ¡Ëcü nüxnatama pecagü! Erü nüma rü marü naya, rü nümatama pemaã nüxü na yaxuxüçëx —ñatarügügü. ²² Rü yema ñatarügügü ga nanatü rü naë, yerü tamuüë. Yerü ga Yudiügüarü äëxgacügü rü marü nügümaã nanamexëëgü na tüxü ínatëxüchigüxüçëx ga ngutaquëxepataüwa ga texé ga Ngechuchuaxü yaxöxë na Cristu yíxü. ²³ Rü yemacëx nixí ga nanatü rü naë ga ñatagügüxü: “¡Ëcü, nüxnatama pecagü! Erü nüma rü marü naya rü nümatama pemaã nüxü na yaxuxüçëx”, ñatagügüxü. ²⁴ Rü yexguma ga yema Yudiügüarü äëxgacügü rü wenaãrü naxcëx nacagü ga guma ngexetüchirécü. Rü ñanagürügü nüxü: —Rü ñuxma tanaxwëxe i Tupanapëxewa rü aixcüma tomaã nüxü quixu na texé cuxü rümexëëxü. Erü toma rü meãma nüxü tacuèx i ngëma Ngechuchu rü wüxi i pecaduáxü na yíxü —ñanagürügü. ²⁵ Rü nüma nanangäxü rü ñanagürü nüxü: —Choma rü tama nüxü chacuèx ega wüxi i pecaduáxü yixígu rü ëxna tama. Rü ngëma nüxü chacuáxü nixí ga na changexetüchirécü ga noxrix rü ñuxma rü na chidauchixü —ñanagürü. ²⁶ Rü wenaãrü nüxna nacagüe, rü ñanagürügü: —¿Rü tacü nixí ga cumaã naxüxü? ¿Rü ñuxácü ga naxüãxü ga cuxü na yadauchixetüxëëxü? —ñanagürügü. ²⁷ Rü nanangäxü rü ñanagürü nüxü:

—Marü pemaã nüxü chixu, rü tama choxü iperüxüñëchaü. ¿Tüxcüü penaxwëxe na wena pemaã nüxü chixuxü? ¿Éxna pema rü ta nüxü peyaxögüchaü? —ñanagürü. ²⁸ Rü yexguma rü guma yatümaã chixexü nixugüe, rü ñanagürügü: —Cumaërü nixi i nüxü cuyaxöxü i ngëma yatü, natürü i toma rü Moïchéarü oreaxü nixi i tayaxögüxü. ²⁹ —Toma rü nüxü tacuëx ga Tupana rü aixcüma Moïchémaã na yadexaxü, natürü ngëma Ngechuchu rü tama nüxü tacuëx na ngextá na ne naxüxü —ñanagürügü. ³⁰ Rü guma yatü nanangäxü, rü ñanagürü nüxü: —¿Ñuxäcü nixi i ngëma? Nüma rü marü choxü narü mexëtüxëë, natürü ¿ñuxäcü i pema i tama nüxü pecuáxü na ngextá ne naxüxü? ³¹ —Rü guxäma i yixema rü meäma nüxü tacuëx rü Tupana tama nüxü naxinü i pecaduäxgüxüärü yumüxë. Natürü Tupana rü tüxü nüxü naxinü i tümaärü yumüxë ya yixema nüxü icuëxüüügüxe rü naxüxe i Tupanaärü ngüchaü. ³² —Taguma ñuxgu nüxü taxinüchiga i wüxi i yatü na yadauchixëëäxü i wüxi i duüxü i norü bucüma ngexetüxü. ³³ —Rü ngëxguma chi tama Tupana nüma namüxgux ya daa yatü ya choxü rümexëëcü, rü taxuacü chima mexü naxü —ñanagürü ga guma yatü ga ngexetüchirëcü. ³⁴ Rü yexguma ga yema Yudiügüarü äëxgacügü, rü ñanagürügü nüxü: —Cuma na pecadugu na cubuxü, ¿rü ñuxäcü cunaxwëxe na toxü cungüxëëchaüxü? —ñanagürügü. Rü ñuxüchi ñanatëxüchigü ga ngutaquëxepataüwa.

Duüxügü i tama yaxögüxü rü ngexetüxürüü nixigü

³⁵ Rü Ngechuchu rü nüxü nacuáchiga ga na ñnatëxüchigüäxü ga guma ngexetüchirëcü. Rü yexguma nüxü nadëuxgu, rü ñanagürü nüxü: —¿Nüxü cuyaxöxü ya Tupana Nane ya duüxüxü ixicü? —ñanagürü. ³⁶ Rü yexguma ga nüma rü Ngechuchuxü nangäxü rü ñanagürü: —Pa Corix, ¡chomaã nüxü ixu na texe yïxü na nüxü chayaxöxüçëx! —ñanagürü. ³⁷ Rü Ngechuchu nanangäxü, rü ñanagürü: —Marü nüxü cudau ya Tupana Nane. Rü chomatama nixi i cumaã na íchidexaxü chiixü —ñanagürü. ³⁸ Rü yexguma ga guma yatü ga ngexetüchirëcü rü Ngechuchupëxegu nacaxápüxü, rü nüxü nicuëxüü, rü ñanagürü nüxü: —Ngëmäácü cuxü chayaxö, Pa Corix —ñanagürü. ³⁹ Rü yexguma ga Ngechuchu rü ñanagürü: —Rü ñoma i naänewa chaxü na chayadexechixüçëx i chorü duüxügü nüxna i ngëma duüxügü i tama choxrü ixigüxü. Rü nuã chaxü na chanameëxëëxüçëx i ngëma duüxügü i noxri tama Tupanaxü cuëxgüxü. Rü ngëxgumarüü ta nüma chaxü na duüxügü i tama choxü cuëxgüchaüxüxü chanawëxü na duüxügü i ngexetüxürüü na yixigüxü, erü tama choxü nayaxögüchaü —ñanagürü. ⁴⁰ Rü ñuxre ga Parichëügü ga yëma Ngechuchumaã yexmagüxü, rü yexguma yema orexü naxinüëgu, rü Ngechuchuna nacagü, rü ñanagürügü: —¿Éxna toma rü ta tama Tupanaxü tacuëxgü ñacuxü? —ñanagürügü. ⁴¹ Rü Ngechuchu nanangäxü rü ñanagürü nüxü: —Ngëxguma chi tama aixcüma Tupanaxü pecuëxgügu rü täü chima pegagu nixi na pepecaduäxgüxü. Natürü ngëma na pegü pixuxü na Tupanaxü pecuáxü rü ngëmacëx pegagutama nixi na pepecaduäxgüxü i ñuxmax —ñanagürü.

10

Carnerügüarü dauruü rü norü carnerugü

¹ Rü yexguma ga Ngechuchu rü ñanagürü: —Rü aixcüma pemaã nüxü chixu rü ngëma yatü i tama carnerupüxüärü iäxwa ixücuxü rü wüxi i ngitëxáxü

nixi i ngēma, erū ngextámare nixūcu. ² —Natürü ngēma carnerupúxǎrū iǎxwa meāma ixūcuxǎ, rü ngēma nixi i norü dauruǎxǎchi i carnerugü. ³ —Rü ngēma yatü i carnerupúxǎrū iǎxna dauxǎ rü nayawǎxna i iǎx na yaxūcuxǎcèx i carnerugüarü dauruǎ. Rü nüma i carnerugü rü nüxǎ nacuèxgü i naga i ngēma norü dauruǎ. Rü ngēma norü dauruǎ rü wüxichigü i norü carneru rü naegamaā naxcèx naca na ínamuxǎxǎcèx i naxpúxǎwa. ⁴ —Rü ngēxguma ínamuxǎxǎxgu i guxǎma i norü carnerugü, rü nüma i norü dauruǎ rü napèxegu nixǎchigü. Rü nümagü i carnerugü rü nawe narüxǎ, erü nüxǎ nacuèxgü i naga. ⁵ —Natürü ngēxguma wüxi i yatü i tama aixcūma norü dauruǎ ixǎxǎ, rü tama nawe narüxǎ i ngēma carnerugü. Rü nüxna naxǎgü, erü tama nüxǎ nacuèxgü i naga i ngēma tama norü dauruǎ ixǎxǎ —ñanagürü ga Ngechuchu. ⁶ Rü Ngechuchu rü duǎxǎgümaā nüxǎ nixu ga yema ore ga cuèxruǎ, natürü ga nümagü rü tama nüxǎ nacuèxgüéga ga ñacúchiga na yǎxǎ.

Ngechuchu rü carneruarü dauruǎ ya mecü nixi

⁷ Rü yexguma ga Ngechuchu rü wenaxǎrü ñanagürü nüxǎ: —Aixcūma pemaā nüxǎ chixu rü choma nixi i carnerupúxǎrū iǎx i nawa yachocuxǎxǎ i carnerugü. ⁸ Guxǎma ga yema chopegu nüxira nüma íxǎ rü ngítèèxǎgǎxǎ rü máètagǎxǎ nixǎgü. Natürü yema carnerugü rü tama naga naxǎñüè. ⁹ Choma nixi i iǎx. Rü texé ya chowa ixūcuxè rü tá tamaxǎ. Rü meāma tá tüxǎ naxǎpetü ngēxgumarüǎ i wüxi i carneru i naxpúxǎgü ücuxǎ rü íxǎxǎxǎxǎ rü nüxǎ iyan-gaucü ya mecü ya maxè. ¹⁰ Ngēma ngítèxǎxǎ rü nüma naxǎ na yangǎxǎcèx rü namáètaxǎcèx rü nachixèxèèxǎcèx. Rü ngémacèxícátama nüma naxǎ. Natürü i choma rü nüma chaxǎ na chanamaxèxèèxǎcèx i duǎxǎgü rü na aixcūma nüxǎ nangèxmaxǎcèx i maxǎ i taguma gúxǎ. ¹¹ Choma nixi i carneruarü dauruǎ ya mecü chíxǎ. Erü wüxi i carneruarü dauruǎ ya mecü rü norü carnerugüxǎ ínapoxǎ rü ñuxmata naxcèx nayux. ¹² Natürü ngēma díèrucèxmare puracüxǎ, rü ega ngēxguma aixǎ nadèuxgux rü carnerugüna ngēma niña. Rü ngēmaäcü nanaxǎ erü tama aixcūma norü dauruǎ nixi i nümax, rü tama noxrü nixi i ngēma carnerugü. Rü ngēma ai rü carnerugüxǎ ínayauxǎ rü ngèxma tüxǎ naxǎñèèxèmare. ¹³ Rü ngēma yatü rü niña, erü norü díèrucèxícátama ngēma napuracü. Rü tama aixcūma carnerugü narüxǎñü. ¹⁴⁻¹⁵ Choma nixi i carnerugüarü dauruǎ ya mecü chíxǎ. Rü ngēxgumarüǎ ya Chaunatü na choxǎ nacuǎxǎ rü choma rü Chaunatüxǎ na chacuǎxǎ, rü ngēxgumarüǎ ta nüxǎ chacuèx i chorü carnerugü, rü nümagü rü choxǎ nacuèxgü. Rü choma rü naxcèx chayü i chorü carnerugü. ¹⁶ Rü choxǎ nangèxmagü ta i togü i carnerugü i tama ñaā naxpúxǎwa ngèxmagüxǎ. Rü ngèmagü rü tá ta nuā chanagagü, rü tá chauga naxǎñüè. Rü wüxitücumü tátama nixi rü choma tátama nixi i norü dauruǎ chíxǎ. ¹⁷ Chaunatü rü choxǎ nangechaǎ, erü chorü carnerugücèx chayü rü wena táxarü chamaxǎ. ¹⁸ Taxúema choxǎ tayuxèè, natürü chomatama chorü ngúchañmaātama ichanaxǎ i chorü maxǎ. Erü choxmèxwa nangèxma na ichanaxǎxǎcèx, rü wena na chanayaxuxǎcèx, yerü yemaäcü choxǎ namu ga Chaunatü —ñanagürü. ¹⁹ Rü yexguma yema orexǎ naxǎñüègu ga yema Yudiugüarü àèxgǎgü rü wenaxǎrü nügü nitoye ga yema nagu naxǎñüèxǎwa. ²⁰ Rü müxuma ga nümagü rü ñanagürügü: —¿Tüxcüǎ nüxǎ iperüxǎñüè i ñaā yatü i ngèèèxǎ i ngoxo nawa ngèxmaxǎ? —ñanagürügü. ²¹ Natürü ga togü rü ñanagürügü: —Taxuñma i yatü i ngoxo nawa ngèxmaxǎ rü ñaärüǎ meā

nidexa. ¿Ñuxăcŭ i wŭxi i yatŭ i ngoxo nawa ngĕxmaxŭ rŭ tŭxŭ narŭmexĕtŭxĕĕ ya wŭxi ya ngexetŭxe? —ñanagŭrŭgŭ.

Yudiŭgŭarŭ Ăĕxgacŭgŭ rŭ Ngechuchuxŭ naxoe

²² Rŭ nawa nangu ga yema peta ga gucŭ ga taunecŭgu norŭ tupauca ga taxŭnecĕx naxŭgŭxŭ ga Yudiŭgŭ na nŭxna nacuĕxăchigŭxŭcĕx ga yema ngunexŭ ga nagu yanguxŭ ga guma tupauca. Rŭ nagăuane ga Yerucharĕŭwa ga yexguma. ²³ Rŭ guma tupauca ga taxŭnewa nayexma ga wŭxi ga chopetŭchica ga Charumŭarŭ Chopetŭchicagu Ăegaxŭ. Rŭ yemagu narŭxŭxŭxŭ ga Ngechuchu. ²⁴ Rŭ ga yema Yudiŭgŭarŭ Ăĕxgacŭgŭ rŭ nŭxŭ ĩnachomaĕguăchi, rŭ ñanagŭrŭgŭ nŭxŭ: —¿Ñuxguratăta tomaă quixaixcŭma na cucŭ quixuxŭ na texĕ na quiŭxŭ? Ega aixcŭma cuma rŭ Cristu quiŭĭgu, rŭ ĩmeă noxtacŭma tomaă nŭxŭ ĩxu! —ñanagŭrŭgŭ. ²⁵ Rŭ Ngechuchu nanangăxŭ, rŭ ñanagŭrŭ nŭxŭ: —Marŭ pemaă nŭxŭ chixu, natŭrŭ i pema rŭ tama choxŭ peyaxŭgŭ. Guxŭma i řacŭ i chaxŭxŭ rŭ Chaunatŭarŭ poramaă nixŭ i chanaxŭxŭ, rŭ ngĕmawa meăma pexŭ nŭxŭ chadauxĕĕ na choma rŭ Cristu na chiŭxŭ. ²⁶ —Natŭrŭ pema rŭ tama peyaxŭgŭ, erŭ tama chorŭ carnerugŭtanŭxŭ pixŭgŭ. ²⁷ —Chorŭ carnerugŭ rŭ nŭxŭ nacuĕx i chauga, rŭ choma rŭ chorŭ carnerugŭxŭ chacuĕx, rŭ nŭma rŭ chowe narŭxŭ. ²⁸ —Rŭ choma rŭ nŭxna chanaxă i maxŭ i taguma gŭxŭ. Rŭ nŭmagŭ rŭ tagutăma inayarŭtauxe, rŭ taxŭĕtăma choxna tanapuxŭ i choxmĕxwa. ²⁹ —Rŭ yĭxema Chaunatŭ choxna tŭxŭ mugŭxe ya chorŭ carnerugŭ, rŭ guxŭarŭ yexera tixŭ i napĕxewa. Rŭ taxŭema texĕ nŭxna tŭxŭ tapuxŭ. ³⁰ —Chaunatŭ rŭ choma rŭ wŭxitama tixŭgŭ —ñanagŭrŭ. ³¹ Rŭ yexguma ga yema Yudiŭgŭarŭ Ăĕxgacŭgŭ rŭ wenaxărŭ nutane nanayauxgŭ na gumamaă Ngechuchuxŭ ĩnamuxŭchigŭxŭcĕx. ³² Natŭrŭ ga Ngechuchu rŭ ñanagŭrŭ nŭxŭ: —Pepĕxewa chanaxŭ i muxŭma i mexŭgŭ i Chaunatŭarŭ poramaă chaxŭxŭ. ¿Rŭ ngĕxŭrŭxŭxŭ i ngĕma mexŭ i chaxŭxŭcĕx nixŭ i choxŭ nutamaă ĩpemuxŭchigŭchaŭxŭ? —ñanagŭrŭ. ³³ Rŭ yema Yudiŭgŭarŭ Ăĕxgacŭgŭ rŭ Ngechuchuxŭ nangăxŭgŭ, rŭ ñanagŭrŭgŭ: —Tama wŭxi i puracŭ i mexŭcĕx cucŭ ĩtamuxŭchigŭchaŭ. Natŭrŭ cucŭ ĩtamuxŭchigŭchaŭ erŭ Tupanamaă rŭ řacŭ quixugŭ. Cuma rŭ wŭxi i duŭxŭmare quixŭ rŭ cucŭ Tupanaxŭ quixŭxĕchaŭ —ñanagŭrŭgŭ. ³⁴ Rŭ nŭma ga Ngechuchu rŭ ñanagŭrŭ nŭxŭ: —Perŭ mugŭpanewa rŭ naxŭmatŭ i Tupanaărŭ ore i ñaxŭ: “Rŭ pematama nixŭ i tupanagŭ pixŭgŭxŭ”, ñaxŭ. ³⁵ —Rŭ ngĕma Tupanaărŭ ore i ũmatŭxŭwa nŭxŭ yaxuxŭ, rŭ nŭxŭ tacuĕx rŭ taxucŭrŭwama texĕ itayanaxoxĕĕ. Rŭ ngĕma orewa rŭ Tupana rŭ ñanagŭrŭ:

“Guxăma ya yĭxema texĕ yanayauxgŭxe i chorŭ ore rŭ tupanagŭ tixŭgŭ”, ñanagŭrŭ i ngĕma orewa. ³⁶ —Rŭ Tupana choxŭ nayaxu na chanaxŭxŭcĕx i norŭ puracŭ, rŭ yemacĕx ñoma ga naănewa choxŭ namu. ¿Rŭ ñuxăcŭ i pema nagu perŭxŭnŭĕgu rŭ chixexŭ Tupanamaă chaxŭxŭ i ngĕxguma Tupana Nane chixŭ —ñachagu pemaă? ³⁷ —Rŭ ngĕxguma chi tama chanaxŭxgu i ngĕma mexŭ i Chaunatŭ ŭxŭ, rŭ marŭ name ega woo tama choxŭ peyaxŭgŭgu. ³⁸ —Natŭrŭ ngĕxguma chanaxŭxgu i ngĕma Chaunatŭ ŭxŭ, rŭ woo tama choxŭ peyaxŭgŭgu, rŭ chanaxwĕxe i nŭxŭ peyaxŭgŭ i ngĕma taxŭ i mexŭgŭ i Chaunatŭarŭ poramaă chaxŭxŭ. Erŭ ngĕmawa tă nŭxŭ pecuĕx na Chaunatŭ rŭ chowa nangĕxmaxŭ rŭ choma i nawa —ñanagŭrŭ. ³⁹ Rŭ wenaxărŭ Ngechuchuxŭ niyauxgŭchaŭ ga yema Yudiŭgŭarŭ Ăĕxgacŭgŭ. Natŭrŭ nŭma

ga Ngechuchu rü naxchaxwa niña. ⁴⁰ Rü yexguma ga Ngechuchu rü natü ga Yudáŭrü tocutücèx tomaã nataegu. Rü yema nachica ga Cuáŭ duŭxügüxü ũpaacü nawa ibaiŭxèxügu tomaã narüxãŭx. ⁴¹ Rü muxüma ga duŭxügü rü Ngechuchuxü ñayadaugü, rü ñanagürügü: —Cuáŭ rü taxuüma ga taxü ga mexü ga cuèxruŭ naxü ga Tupanaärü poramaã. Natürü guxüma ga ore ga Cuáŭ tamaã nüxü ixuxü ga ñaa yatüchiga rü aixcüma nixi —ñanagürügü. ⁴² Rü yema nachicawa rü muxüma ga duŭxügü rü Ngechuchuxü nayaxögü.

11

Dácharuarü yuxchiga

¹ Nayexma ga wüxi ga yatü ga idaawecü ga Dácharugu äegacü. Rü nüma rü naèyèxgü ga María rü Marta rü ñane ga Betániacüŭx nixigü. ² Rü yema María iyixi ga Cori ga Ngechuchucutügu pumara bacü rü ñuxüchi ngïyaemaã ñapicutücü. Rü guma Dácharu ga idaawecü nixi ga ngïeneë. ³ Rü poraãcü nidaawe ga Dácharu. Rü yemacèx ga naèyèxgü, rü Ngechuchuxütawa imugagü, rü ngïgürügü: “Pa Corix, cumücü ya Dácharu ya nüxü cungechaücü rü nidaawe”, ngïgürügü. ⁴ Rü yexguma yema orexü naxinügu ga Ngechuchu, rü ñanagürü: —Ngëma daawe rü täütama yumaã ñayacuèx. Natürü nidaawe na duŭxügü nüxü nadaugüxücèx na ñuxäcü naporaxü ya Tupana rü ñuxäcü choma i Nane rü ta na chaporaxü —ñanagürü. ⁵ Rü Ngechuchu poraãcü María rü Marta rü Dácharuxü nangechaü. ⁶ Natürü yexguma nüxü naxinügu ga na yaðaawexü ga Dácharu, rü tama paxa ñayadau. Rü taxre ga ngunexüŭamatama yexma narüxãŭx ga yema nachica ga nawa nayexmaxüwa. ⁷ Rü yixcama ga yemawena rü toxü ñanagürü: —¡Ngïã rü wena Yudéanewa taxü! —ñanagürü. ⁸ Rü toma ga norü ngüexügü rü ñatarügügü nüxü: —Pa Ngüxèèruŭx, yexwacatama nixi ga yemacüŭx ga Yudiügütarü äèxgacügü yexma nutamaã cuxü imuxüchigüchaüxü. ¿Rü tüxcüü wena ngema cuxüxchaü i ñuxmax? —ñatarügügü. ⁹ Rü Ngechuchu rü tomaã nüxü nixu ga wüxi ga ore na nüxü tacuèxgüxücèx na tauta nawa nanguxü na nayuxü ga nümax. Rü ñanagürü toxü: —¿Taux èxna i wüxi i ngunexü rü 12 i ora nawa ngëxmaxü? Ngëxguma texé ngunecü ixüxgu rü tama ŭacümaã itayarüña, erü tümacèx nangóone. ¹⁰ —Natürü ngëxguma wüxie chütacü ixüxgu rü ngëmáacü ŭacümaã itayarüña, erü tümacèx naxèãne —ñanagürü. Rü yemaãcü nanangoxèè na tauta nawa nanguxü na nayuxü ga nümax. ¹¹ Rü yemawena ga Ngechuchu rü ñanagürü toxü: —Tamücü ya Dácharu rü napemare. Natürü ñuxma rü tá chayahaixächixèè —ñanagürü. ¹² Rü yexguma ga toma ga norü ngüexügü rü ñatarügügü: —Pa Corix, ega napemaregu, rü ngëmawa nüxü tacuèx na naxcèx tá yataanexü —ñatarügügü. ¹³ Natürü ga Ngechuchu rü nüxü nixuxchaüchirèx ga Dácharu ga marü na nayuxü. Natürü ga toma nüxü tacuèxgügu rü na napemarexüchigaxü yixü ga tomaã yaxuxü. ¹⁴ Rü yexguma ga Ngechuchu rü mëama tomaã nüxü nixu rü ñanagürü: —Dácharu rü marü nayu. ¹⁵ —Natürü choma rü chataãne na tama ngema changëxmaxü, erü ngëmaãcü nixi i namemaèxü i pexcèx na choxü peyaxögüxücèx. ¡Rü ngïã rü itayadaugü! —ñanagürü. ¹⁶ Rü yema nayexma ga totanüxü ga Tumachi ga Wüxigu Buexü ga Taxrexpüxümaã, naxugüxü. Rü nüma ga Tumachi rü ñanagürü toxü: —¡Ngïã i yixema rü ta ngëma taxi na wüxigu Ngechuchumaã iyuxücèx! —ñanagürü.

Ngechuchu nixi i wena namaxèxèxü i yuxü

17 Rŭ yexguma Betániãwa tomaã nanguxgu ga Ngechuchu, rŭ marŭ ägŭmŭcŭ ga ngunexŭ nangupetŭ ga na iyatëxgŭãxŭ ga Dácharu. 18 Rŭ guma Betániã rŭ Yerucharëŭãrŭ ngaicamana nayexma. Rŭ tomaëxpŭx ga kilómetru nixŭ ga norŭ yaxŭ. 19 Rŭ muxŭma ga Yudiŭgŭ rŭ Dácharueyëx ga Marta rŭ Mariãxŭtawa naxŭ na ngŭxŭ yataãëxëëgŭxŭcëx, yerŭ nayu ga ngŭeneë. 20 Rŭ yexguma Marta nŭxŭ cuëxgu ga marŭ na inanguxŭ ga Ngechuchu, rŭ nŭxŭ iyatŭxãchi. Natŭrŭ ga Mariã rŭ İxgutama irŭxãŭx. 21 Rŭ Marta rŭ ngŭgŭrŭgŭ nŭxŭ ga Ngechuchu: —Pa Corix, yexguma chi cuma cunumëxgu rŭ tãu chima nayu ga chaueneë. 22 —Natŭrŭ choma nŭxŭ chacuëx na woo i ñuxma na nayuxŭ, rŭ Tupana tá cuxna nanaxã i guxŭma i ñacŭ i naxcëx İcuçaxŭ —ngŭgŭrŭgŭ. 23 Rŭ Ngechuchu ngŭxŭ nangãxŭ rŭ ñanagŭrŭ: —Cueneë rŭ wena tá namaxŭ —ñanagŭrŭ. 24 Rŭ Marta ngŭgŭrŭgŭ nŭxŭ: —Ngëmããcŭ nŭxŭ chacuëx rŭ wena tá namaxŭ i ngëxguma naguxgu i naãne rŭ ngëxguma wena namaxëgu i guxŭma i yuexŭ —ngŭgŭrŭgŭ. 25 Rŭ yexguma ga Ngechuchu rŭ ñanagŭrŭ: —Choma nixŭ i İchanadagŭxëëxŭ i yuexŭgŭ, rŭ wena chanamaxëxëëxŭ. Rŭ yŭxema choxŭ yaxõxë rŭ woo tayuxgu rŭ tá wenaxãrŭ tamaxŭ. 26 —Rŭ guxãma ya texë ya maxŭxë rŭ choxŭ yaxõxë, rŭ guxŭgutãma tamaxŭ. ¿Cuyaxõxŭ yŭxŭ i ngëma? —ñanagŭrŭ ga Ngechuchu. 27 Rŭ ngŭma rŭ ngŭgŭrŭgŭ nŭxŭ: —Ngŭ, Pa Corix, choma rŭ chayaxõ na cuma rŭ Tupana Nane ya Cristu ga İtananguxëëcŭ na quixŭ —ngŭgŭrŭgŭ.

Dácharu itãxŭwa naxaxu ga Ngechuchu

28 Rŭ yema ñaxguwena rŭ Marta rŭ ngŭyëx ga Maríacë x iyaca. Rŭ bexma ngŭmãã nŭxŭ iyarŭxu, rŭ ngŭgŭrŭgŭ: —Marŭ nuã nangu ya Ngŭxëëruŭ ya Ngechuchu, rŭ choxŭ cuxcëx nayacaxëë —ngŭgŭrŭgŭ. 29 Rŭ yexguma Mariã nŭxŭ İnŭgu ga marŭ yëma na nanguxŭ ga Ngechuchu, rŭ paxa ichi, rŭ Ngechuchuxŭ İyadau. 30 Rŭ Ngechuchu rŭ tauta İãnewa nangu ga yexguma, rŭ yema nachica ga Marta nŭxŭ İdauxŭwatama nixŭ ga nayexmaxŭ. 31 Rŭ Mariãpatawa nayexma ga ñuxre ga yëmacŭŭx ga Yudiŭgŭãrŭ äëxgacŭgŭ ga ngŭxŭ yëma taãëxëëgŭxŭ. Rŭ yexguma ngŭxŭ nadaugŭgu ga paxa na inachixŭ rŭ na İnaxŭxŭxŭ, rŭ ngŭwe narŭxŭ. Yerŭ nŭma nŭxŭ nacuëxgŭgu rŭ yëma Dácharu itãxŭwa ixŭ na yëma yaxaxuxŭcëx. 32 Rŭ yexguma Ngechuchuxŭtawa nanguxgu ga Mariã, rŭ napëxegu iyacaxãpŭxŭ, rŭ ngŭgŭrŭgŭ: —Pa Corix, yexguma chi cuma cunumëxgu rŭ tãu chima nayu ga chaueneë ya Dácharu —ngŭgŭrŭgŭ. 33 Rŭ yexguma Ngechuchu ngŭxŭ dëuxgu ga na naxaxuxŭ rŭ na naxauxexŭ ga yema Yudiŭgŭãrŭ äëxgacŭgŭ ga ngŭwe rŭxŭxŭ, rŭ poraãcŭ ngechaŭ nŭxŭ nangux. 34 Rŭ Ngechuchu nŭxna naca rŭ ñanagŭrŭ: —¿Ngexta nixŭ i ipenatãxŭ? —ñanagŭrŭ. Rŭ nŭmagŭ nanangãxŭ rŭ ñanagŭrŭgŭ: —Pa Corix, İdŭcax, nuã naxŭ, rŭ İyadau! —ñanagŭrŭgŭ. 35 Rŭ naxaxu ga Ngechuchu. 36 Rŭ yema Yudiŭgŭ rŭ ñanagŭrŭgŭ: —İDŭcëx ñuxãcŭ poraãcŭ Dácharuxŭ nangechaŭ! —ñanagŭrŭgŭ. 37 Natŭrŭ ñuxre ga yema äëxgacŭgŭ ga Yudiŭgŭãrŭ rŭ ñanagŭrŭgŭ: —Daa nixŭ ga guma yatŭ ga ngexetŭcŭxŭ rŭmexëëcŭ. ¿Rŭ tŭxcŭtŭ taxucŭrŭwa ñacŭ rŭ mexŭ Dácharucëx naxŭ na tama nayuxŭcëx? —ñanagŭrŭgŭ.

Wenaxãrŭ namaxŭ ga Dácharu

38 Rŭ Ngechuchu poraãcŭ ngechaŭ nŭxŭ nangux rŭ Dácharumaxŭcëx nixŭ. Rŭ wŭxi ga mëxpŭneãrŭ äxmaxŭ nixŭ ga yema naxmaxŭ. Rŭ nayexma

ga wüxi ga nuta ga norü ngüxtaŦruŦ. ³⁹ RŦ Ngechuchu rŦ ñanagŦrŦ: —ÍŦpenangŦxgachix ya yima nuta ya namaã nangŦxtaŦcü! —ñanagŦrŦ. NatŦrŦ ga Marta ga Dácharueyèx rŦ ngígŦrŦgŦ: —Pa Corix, cuxá marŦ nayixane nixí, erŦ marŦ ágŦmŦcü i ngunexŦ naetŦ nixí ga na nayuxŦ —ngígŦrŦgŦ. ⁴⁰ NatŦrŦ ga Ngechuchu rŦ ñanagŦrŦ ngíxŦ: ¿Taux éxna i marŦ cumaã nüxŦ chixuchiréxŦ rŦ ngéxguma cuyaxŦxgu rŦ tá nüxŦ cudau i wüxi i mexŦ i taxŦ i Tupana üxŦ? —ñanagŦrŦ. ⁴¹ RŦ yexguma ínanangŦxgachigŦ ga guma nuta. RŦ Ngechuchu daxŦgu nadawenüãcüma ñanagŦrŦ: —Pa ChaunatŦ Pa Tupanax, moxé cuxna chaxá erŦ marŦ choxŦ cuxínü. ⁴² —Choma nüxŦ chacuèx rŦ guxŦguma choxŦ cuxínü. NatŦrŦ moxé cuxna chaxá i ñuxma erŦ chanaxwèxe i ñaã duŦxŦgŦ na yaxŦgŦãxŦ na cuma núma choxŦ cumuxŦ —ñanagŦrŦ. ⁴³ RŦ yexguma yema ñaxguwena, rŦ tagaãcü ñanagŦrŦ: —Pa Dácharux, ínaxŦxŦ i ngema! —ñanagŦrŦ. ⁴⁴ RŦ ínaxŦxŦ ga Dácharu ga naxchápenümaã guxŦwama rŦbuxpŦxŦcü. RŦ Ngechuchu ñanagŦrŦ nüxŦ ga duŦxŦgŦ: —ÍŦpeyawèxpŦxŦ na íyaxŦxŦcèx! —ñanagŦrŦ.

ĀëxgacŦgŦ naxcèx nadaugŦ na ñuxãcü NgechuchuxŦ yayauxgŦxŦ
(Mt 26.1-5; Mr 14.1-2; Lc 22.1-2)

⁴⁵ RŦ yema YudiŦgŦarŦ äëxgacŦgŦ ga Mariawe rŦixŦxŦ rŦ nüxŦ nadaugŦ ga yema Ngechuchu üxŦ, rŦ muxŦma NgechuchuxŦ nayaxŦgŦ ga yexguma nüxŦ nadaugŦgŦ ga ñuxãcü wena DácharuxŦ na namaxéèxŦ. ⁴⁶ NatŦrŦ ñuxre ga yema äëxgacŦgŦ rŦ ParichéugŦmaã nüxŦ nayarŦxugŦ ga yema Ngechuchu üxŦ. ⁴⁷ RŦ yexguma ga yema ParichéugŦ rŦ paigŦarŦ äëxgacŦgŦ rŦ nangutaquèxegŦ namaã ga guxŦma ga yema äëxgacŦgŦtŦcumŦwa ügŦxŦ. RŦ ñanagŦrŦgŦ: —¿TacŦ tá taxŦe? ErŦ ñaã yatŦ i Ngechuchu rŦ nanaxŦ i muxŦma i mexŦ i cuèxruŦgŦ. ⁴⁸ —Ngéxguma chi tama yayauxgŦgŦ, rŦ guxŦtáma i duŦxŦgŦ rŦ tá nüxŦ nayaxŦgŦ, rŦ DumacŦãxgŦarŦ churaragŦ rŦ núma chi naxí rŦ nagu napogŦe ya tŦrŦ tupauca ya taxŦne, rŦ düxwa táu chima tŦxrŦ nixí i ñaã tachiŦñane —ñanagŦrŦgŦ. ⁴⁹ NatŦrŦ guma taunecŦgu rŦ yema paigŦtanŦwa rŦ Caipá nixí ga norŦ äëxgacŦ. RŦ núma rŦ ñanagŦrŦ nüxŦ: —PemagŦ rŦ taxuŦma pecuèx. ⁵⁰ —¿Éxna tama nüxŦ pecuèx rŦ taxcèx rŦ na namemaèxŦ na wüxitama i yatŦ guxŦ i duŦxŦgŦcèx na yuxŦ, na tama nayuèxŦcèx i guxŦma i tachiŦñanecŦãx i duŦxŦgŦ? —ñanagŦrŦ. ⁵¹ NatŦrŦ ga Caipá rŦ tama nüèchama yema ñanagŦrŦ, yerŦ guma taunecŦgu rŦ núma nixí ga paigŦarŦ äëxgacŦ yíxŦ. RŦ yemacèx rŦ Tupana nixí ga Caipáwa idexacŦ ga yexguma nüxŦ yaxuxgu na Ngechuchu rŦ guxŦma i YudiŦgŦcèx tá na nayuxŦ. ⁵² RŦ yema orewa rŦ nanangoxéè na tama YudiŦgŦcèxcatama tá na nayuxŦ, natŦrŦ guxŦma i TupanaãrŦ duŦxŦgŦ i guxŦ i naãnewa ngéxmagŦxŦcèx rŦ tá ta na nayuxŦ, na ngémaãcü wüxigu nangutaquèxexŦcèx i guxŦma i ngéma duŦxŦgŦ i TupanaãrŦ íxŦgŦxŦ. ⁵³ RŦ yexgumaãcü nixí ga inaxŦgŦeãxŦ ga YudiŦgŦarŦ äëxgacŦgŦ ga nagu na naxínüèxŦ ga ñuxãcü tá na NgechuchuxŦ yamèxgŦxŦ. ⁵⁴ RŦ yemacèx ga Ngechuchu rŦ marŦ tama yema YudiŦgŦ ímuxŦtanŦgu naxã. RŦ tomaã ínaxŦxŦ ga Yudéaanewa, rŦ wüxi ga íanèxãcü ga Efraígu äeganewa naxŦ. RŦ yexma tomaã narŦãŦxŦ. RŦ guma íane rŦ wüxi ga nachica ga ngèxtá taxŦema íãpataxŦãrŦ ngaicamana nayexma. ⁵⁵ RŦ marŦ ningaica ga yema YudiŦgŦarŦ peta ga ÜpetŦchiga. RŦ yemacèx muxŦma ga duŦxŦgŦ ga náí ga íanecŦãx rŦ YerucharéŦwa naxí na Tupanacèx nügŦ yamèxègŦxŦcèx naxŦpa ga yema peta. ⁵⁶ RŦ Ngechuchucèx nadaugŦ ga duŦxŦgŦ. RŦ

tupaucu ga taxŦnewa nŦgŦna nicagŦetanŦ, rŦ ŦnanagŦrŦgŦ: —ŦŦuxŦ ŦnapegŦxŦ i pemax? ŦŦoma i petawa tá naxŦxŦ rŦ éxna tama? —ŦnanagŦrŦgŦ. ⁵⁷ RŦ yema ParichéugŦ rŦ paigŦarŦ áéxgacŦgŦ rŦ duŦxŦgŦna naxágagŦ, rŦ ŦnanagŦrŦgŦ: —Ngéxguma ngextá nŦxŦ pedaugŦgu i ngéma Ngechuchu, ¡rŦ tomaá nŦxŦ peyarŦxu na tayayauxgŦxŦcèx! —ŦnanagŦrŦgŦ.

12

WŦxi ga nge rŦ NgechuchucutŦgu pumara iba (Mt 26.6-13; Mr 14.3-9)

¹ RŦ 6 ga ngunexŦ naxŦpa ga ŦpetŦchigaarŦ peta, rŦ Ngechuchu rŦ tomaá Betániáwa naxŦ. RŦ guma íane nixŦ ga nagu naxáchixŦne ga Dácharu ga Ngechuchu wena namaxéécŦ. ² RŦ yéma DácharuchixŦwa Ngechuchucèx nanaxŦgŦ ga taxŦ ga Ŧna. RŦ totanŦwa ga yema mechawa yexmagŦxe rŦ Dácharu nixŦ ga NgechuchuxŦtawaama chibŦcŦ. RŦ Marta iyixŦ ga inaxŦcŦ ga Ŧna. ³ RŦ yexguma ga María rŦ yéma inange ga wŦxi ga taxŦraweŦxŦ ga pumara ga yixichixŦ rŦ tatanŦxŦchixŦ. RŦ NgechuchuxŦ namaá iyixcutŦ. RŦ ŦuxŦchi ngŦyaemaá ínapicutŦ. RŦ guma í rŦ guxŦwama nayixmachíã namaá ga yema pumara. ⁴⁻⁵ RŦ yexguma ga Yuda ga Icariúte ga wŦxi ga totanŦxŦchiréx ixŦxŦ ga yixcama bexma cúácŦ NgechuchuxŦ íxuaxŦxŦ, rŦ ŦnanagŦrŦ: —ŦŦŦxcŦtŦ tama tatanŦxŦgŦ namaá itaxe i ngéma pumara na ngéma díerumaá nŦxŦ nangŦxééxŦcèx i ngéma duŦxŦgŦ i ngearŦ díeruáxgŦxŦ? —ŦnanagŦrŦ. ⁶ NatŦrŦ ga Yuda rŦ tama aixcŦma nagu narŦxŦnŦ ga yema ngearŦ díeruáxgŦxŦ. NatŦrŦ yema ŦnanagŦrŦ yerŦ nŦma rŦ wŦxi ga ngŦtèxáxŦ nixŦ. RŦ namxéxwa nayexma ga yema choca ga díeru ngŦxŦ nagu taxŦgŦxŦ ga guxáma ga toma ga NgechuchuarŦ ngŦexŦgŦ. RŦ Yuda rŦ ŦuxguacŦ rŦ noxrŦxŦtama ngŦxne nangŦxŦxŦ. ⁷ RŦ yexguma ga Ngechuchu rŦ ŦnanagŦrŦ nŦxŦ: —¡ŦáxŦ i ngŦxŦ cuchixewexŦ! ErŦ choma rŦ paxa tá chayu rŦ tá ichatèx. RŦ ngémacèx nixŦ i ngéma pumaramaá choxŦ nachaxŦ. ⁸ —Ngéma ngearŦ díeruáxgŦxŦ rŦ guxŦgutáma petanŦwa nangéxmagŦ. NatŦrŦ i choma rŦ táitáma guxŦgu petanŦwa changéxma —ŦnanagŦrŦ.

PaigŦarŦ áéxgacŦgŦ rŦ nŦgŦmaá nanamexéégŦ ga ŦuxácŦ DácharuxŦ tá na yaméxgŦxŦ

⁹ RŦ muxŦma ga YudiŦgŦ rŦ nŦxŦ nacuáchiga ga Betániáwa na nayexmaxŦ ga Ngechuchu. RŦ yéma naxŦ na nŦxŦ nadaugŦxŦcèx. RŦ tama NgechuchuxŦxŦcatama nadaugŦchaŦ natŦrŦ nŦxŦ nadaugŦchaŦ ta ga Dácharu ga Ngechuchu wena namaxéécŦ. ¹⁰ RŦ yexguma ga paigŦarŦ áéxgacŦgŦ rŦ nŦgŦmaá nanamexéégŦ ga DácharuxŦ rŦ ta na yaméxgŦxŦcèx. ¹¹ YerŦ Dácharugagu nixŦ ga muxŦma ga YudiŦgŦ ga NgechuchuaxŦ yaxŦgŦáxŦ rŦ yema paigŦna naxŦgŦxŦ.

Ngechuchu rŦ YerucharéŦgu naxŦcu (Mt 21.1-11; Mr 11.1-11; Lc 19.28-40)

¹² RŦ muxŦma ga duŦxŦgŦ rŦ YerucharéŦwa naxŦ naxcèx ga ŦpetŦchigaarŦ peta. RŦ moxŦácŦ duŦxŦgŦ nŦxŦ nacuáchigagŦ ga Ngechuchu rŦ guma íanewa na nanguxchaŦxŦ. ¹³ RŦ yexguma moruátŦta nadaŦgŦ rŦ yemamaá NgechuchuxŦ nayatŦxgŦtanŦáchi. RŦ tagaácŦ ŦnanagŦrŦgŦ: —¡RŦ naxŦŦne rŦ namecŦmaxŦchi ya daa Tupanaégagu nŦma ŦcŦ! ¡RŦ yixema na IraétanŦxŦ íxŦgŦxŦ rŦ namecŦmaxŦchi ya daa tŦrŦ áéxgacŦ! —ŦnanagŦrŦgŦ. ¹⁴ RŦ

Ngechuchu nüxŭ inayangau ga wüxi ga buru, rü naetügu naxaunagü ga yema Tupanaärü ore ga ümatüxŭ nüxŭ ixuxürüŭ ga yexguma ñaxgu:

¹⁵ “;Täxŭ i pemuüëxŭ, Pa Yerucharéüçüãxgüx! ;Rü iperüdaunü na ngema ne naxüxŭ ya perü äëxgacü ya wüxi i buru i íraxŭetügu aunagücü!”

ñaxŭ. ¹⁶ Rü noxri ga toma ga norü ngüëxŭgü rü tama nüxŭ tacuëxgüéga ga Ngechuchuchiga na yïxŭ ga yema ore. Natürü yixcúra marü Ngechuchu Tupanaxütawa üxgu, rü yexguma nixi ga nüxna tacuëxächieüŭ ga guxüma ga yema Ngechuchuxü ngupetüxŭ, rü yema Tupanaärü ore nüxŭ ixuxŭäcütama nüxŭ na nangupetüxŭ. ¹⁷ Rü yema duüxŭgü ga Ngechuchuxütawa yexmagüxŭ ga yexguma Dácharuxŭ wena namaxëëgu, rü nüxŭ nixugüë ga yema nüxŭ nadaugüxŭ. ¹⁸ Rü yemacëx nixi ga duüxŭgü ga Ngechuchuxŭ yatüxächitanüxŭ na nayauxgüãxüçëx, yerü nüxŭ nacuáchigagü ga yema taxŭ ga mexŭ ga Tupanaärü poramaä naxüxŭ. ¹⁹ Natürü ga yema Parichéugü rü nügümaä ñanagürügü: —Marü nüxŭ pedauxŭ i ñuxma na taxucürüwama facü namaä ixüxŭ. ;Rü dücax, guxüma i duüxŭgü rü nawe narüxŭ! —ñanagürügü.

Griégügü rü Ngechuchuxŭ nadaugüchaŭ

²⁰ Rü muxüma ga duüxŭgü rü petacëx Yerucharéüwa naxŭ na yéma Tupanaxŭ na yanacuëxüŭgüxüçëx. Rü yema duüxŭgütanüwa nayexma ga ñuxre ga Griégügü. ²¹ Rü yema Griégügü rü Piripicëx naxŭ. Rü nüma ga Piripi rü Gariréaaneärü ñäne ga Bechaídacŭãx nixi. Rü nüxŭ nacëëxŭgü rü ñanagürügü: —Pa Corix, nüxŭ tadauxchaŭ ya Ngechuchu —ñanagürügü. ²² Rü Piripi rü Aüdrémaä nüxŭ nayarüxu. Rü yema taxre rü wüxigu Ngechuchuxütawa naxŭ, rü namaä nüxŭ nayarüxugü. ²³ Rü yexguma ga Ngechuchu rü ñanagürü nüxŭ: —Rü marü nawa nangu tá na chayuxŭ rü wenaxärü Chaunatüxütawa tá na chaxüxŭ i choma i Tupana Nane i duüxŭxŭ chiüxŭ. ²⁴ —Rü aixcüma pemaä nüxŭ chixu rü ngëxguma chi wüxipüxü i trigu tama waixüümüñegu toxgu rü wüxipüxüechatama nixŭ. Natürü ega waixüümügu natoxgu, rü ngema naxüxgu, rü muxüchinema ínguxuchi. [Rü ngëxgumarüŭ tá ta Tupanaxütawa nangugü i muxüma i duüxŭgü ega chayuxgux.] ²⁵ —Rü pemaä nüxŭ chixu rü texé ya yixema tümaärü maxüxŭ ngechaüxë i ñoma i naänewa rü tá itayarütaxu. Natürü texé ya yixema tama tümaärü maxüxŭ ngechaüxë rü tama yuxŭ muüxë i ñoma i naänewa, rü tá tüxŭ nangëxma i maxŭ i taguma güxŭ. ²⁶ —Rü ngëxguma texé choxŭ puracüchaügu rü name nixi i chowe tarüxŭ. Rü ngëma choma tá íchangëxmaxüwa rü ngema rü tá ta tangëxma i tümax. Rü ngëxguma texé choxŭ puracügu rü Chaunatü ya Tupana rü tá tümamaä nataäë —ñanagürü.

Ngechuchu nanaxunagü ga norü yuxchiga

²⁷ —Rü Ngechuchu ñanagürü: —Rü ñuxma rü poraäcü changechaŭ rü chanaxixächiaë. ;Rü tacüxŭ tá Chaunatümaä chixuxŭ? Taxucürüwa namaä nüxŭ chixu na choxŭ ínguxuchixieëxüçëx na tama chayuxüçëx, erü woetama ngëmacëx núma chaxü —ñanagürü. ²⁸ Rü ñanagürü: —Pa Chaunatüx, ;Choxŭ rüngüxëë na duüxŭgüpëxewa cuxŭ chataxëëxüçëx! —ñanagürü. Rü yexguma ga yema duüxŭgü ga yéma yexmagüxŭ rü nüxŭ naxinüë ga wüxi ga naga ga daxüwa inaxüxŭ ga ñaxŭ: —Marü cuxŭ charüngüxëë na choxŭ cutaxëëxŭ ga noxrix, rü wena táxarü cuxŭ charüngüxëë na choxŭ cutaxëëxüçëx —ñanagürü ga yema naga. ²⁹ Rü yema duüxŭgü ga yéma yexmagüxŭ ga nüxŭ ínüëxŭ ga yema naga, rü ñanagürügü:

—Wüxi i duruanexũ nixĩ —ñanagürügü. Natürü togü rü ñanagürügü: —Wüxi i Tupanaärü orearü ngeruũ i daxüçũãx nixĩ i namaã idexaxũ —ñanagürügü. ³⁰ Rü yexguma ga Ngechuchu rü ñanagürü nüxũ: —Tama chauxcèx nixĩ i nüxũ pexĩnüèxũ i ngèma naga. Rü pexcèxtama nixĩ i nüxũ pexĩnüèxũ. ³¹ —Rü ñuxma tá nixĩ i Tupana inaxügüãxũ na tüxũ napoxcuxetü ya duũxè naxcèx i túmaärü pecadugü. Rü ñuxma tá nixĩ i Tupana ínatèxüchixũ i ngèma ñoma i naãnewa poraxũ i Chataná. ³² —Rü ngèxguma curuchawa chipotagu rü chaugüxütawa tá chanagagü i guxũma i duũxügü —ñanagürü ga Ngechuchu. ³³ Rü yema orewa duũxügümaã nüxũ nixu ga ñuxácü tá na nayuxũ. ³⁴ Rü yema duũxügü nanangãxügü, rü ñanagürügü: —Torü mugü i úmatüxüwa nüxũ tadaugü na guxügutáma namaxèchaxũ ya Cristu. ¿Rü ñuxácü i cuma rü ñacurügü: “Rü Tupana Nane ya duũxüxũ ixícü rü curuchawa tá nipota”, ñacurügü? ¿Rü texé tixĩ ya yíxema Tupana Nane ya duũxüxũ ixĩxè? —ñanagürügü. ³⁵ Rü yexguma ga Ngechuchu rü ñanagürü nüxũ: —Ñoma rü ta petanüwa changèxma na ñoma i naãnewa pexũ changüxèxèxüçèx rü ngèmaácü pexũ changóonetanüxèxèxüçèx. Natürü paxaächicècatama petanüwa changèxma. Rü name nixĩ i paxa choxũ peyaxögü ñoma rü ta pexcèx chanangóonexèè naxüpa na naxèãnexũ. Erü yíxema èãnexüwa ngèxmaxè rü tama nüxũ tacuèx na ngextá taxüxũ. ³⁶ —Rü ñoma rü ta petanüwa changèxma rü name nixĩ i paxa choxũ peyaxögü na chorü ngóonexüwa pengèxmagüxüçèx —ñanagürü. Rü yema ñaxguwena rü natanüwa ínaxüxũ ga Ngechuchu. Rü naxchaxwa inicux.

Tacüçèx nixĩ ga Yudüguü ga tama Ngechuchuxaũ yaxögüãxũ

³⁷ Rü woo ga Ngechuchu rü duũxügüpèxewa nanaxü ga muxũma ga taxũ ga mexũ ga cuèxruügü ga Tupanaärü poramaã naxüxũ, natürü yexguma rü ta tama nüxũ nayaxögü ga duũxügü. ³⁸ Rü yemaácü Tupana nayanguxèè ga yema ore ga Ichaxía úmatüxũ ga ñaxũ:

“Pa Corix, taxüema tayaxö ga yema ore ga tüxũ tangüxèèxũ. Rü woo nüxũ tadaugü na ñuxácü naporaxũ ya Tupana, rü tama tayaxögü”,

ñaxũ. ³⁹⁻⁴⁰ Rü yemaácü ga yema duũxügü rü tama nayaxögü yema Ichaxía úmatüxüwa nüxũ yaxuxürüũ, rü:

“Yema duũxügü rü tama nüxũ nadaugüchaũ rü tama nayaxögüchaũ rü tama Tupanacũ nawoeguchaũ. Rü yemacèx ga Tupana rü nüxna nixũ na tama nüxũ nadaugüxüçèx rü tama yaxögüãxüçèx rü tama naxcèx nawoegüxüçèx na núma nüxna naxããxüçèx i maxũ i ngexwacaxüxũ”,

ñaxũ. ⁴¹ Rü yema ñanagürü ga Ichaxía yerü nangoxetügu marü nüxũ nadau na ñuxácü ãèxgacü ya tacüxüchi na yíxũ ya Ngechuchu ya Cristu. Rü yemaácü nachiga nidexa. ⁴² Natürü muxũma ga yema Yudüguärü ãèxgacügü rü Ngechuchuxaũ nayaxögü, rü woo ga ñuxre ga naèrugü rü ta nayaxögü, natürü tama nügü nixugüchaũ ga duũxügüpèxewa, yerü namuüè na Parichègü ngutaquèxepataüwa ínawoxüxũ. ⁴³ Rü yemaácü tama nügü nixugüchaũ, yerü norü me nixĩ ga duũxügü namaã nataègüxũ rü tama aixcüma naxcèx nadaugü na Tupana namaã taãèxũ.

Texé ya tama Ngechuchuarü oreaxũ yaxöxè rü tá tapoxcu

⁴⁴ Rü tagaácü ñanagürü ga Ngechuchu: —Texé ya choxũ yaxöxè rü tama choxüxícatama tayaxö. Natürü Chaunatü ya núma choxũ mucüaxũ rü ta tayaxö. ⁴⁵ —Rü texé ya choxũ dauxe, rü Chaunatü ya núma choxũ mucüxũ rü ta tadau. ⁴⁶ —Choma na ngóonexèèruũ chíxũ, rü ñoma i naãnewa changu na

guxāma ya texé ya choxŭ yaxōxē rŭ tama ēānexŭwa na tangēxmagŭechaxŭcèx.
 47 —Natŭrŭ ngēxguma texé nŭxŭ ĩnŭgu i chorŭ ore rŭ tama tayaxōxgu rŭ
 tama choma nixŭ i tŭxŭ chapoxcuxŭ. Erŭ tama űoma i naānewa changu na
 chanapoxcuxŭcèx i duŭxŭgŭ, natŭrŭ nŭma chaxŭ na chanamaxēxēxŭcèx.
 48 —Yŭxema texé ya tama choxŭ yaxōxē rŭ tama chauga ĩnŭxē rŭ marŭ
 tŭxŭŭ nangēxma na űacŭcèx tá Tupana tŭxŭŭ poxcuxŭ. Erŭ ngēma ore i nŭxŭŭ
 chixuxŭgagu táama nixŭ ya Tupana i tŭxŭŭ napoxcuxŭ i naānearŭ guxgu, erŭ
 tama tayaxō i ngēma ore i nŭxŭŭ chixuxŭ. 49 —Tama chaugagutama chidexa,
 natŭrŭ guma Chaunatŭ ga nŭma choxŭ mucŭ, rŭ guma nixŭ ga chomaā nŭxŭŭ
 ixucŭ na űacŭxŭŭ tá duŭxŭgŭmaā chixuxŭŭ rŭ űuxācŭ tá chanangŭexēxŭ. 50 —
 Rŭ nŭxŭŭ chacuèx na Chaunatŭarŭ orewa nangēxmaxŭŭ i maxŭŭ i taguma gŭxŭŭ.
 Rŭ ngēmācèx i ngēma ore i nŭxŭŭ chixuxŭŭ, rŭ ngēmatama ore nixŭ i Chaunatŭ
 choxŭŭ muxŭ na nŭxŭŭ chixuxŭŭ —ñanagŭrŭ ga Ngechuchu.

13

Ngechuchu rŭ norŭ ngŭexŭgŭxŭŭ niyaxgŭcutŭ

1 Rŭ wŭxi ga ngunexŭ nataxu ga nawa na nanguxŭŭ ga yema Yudiŭgŭarŭ
 peta ga Ũpetŭchiga. Rŭ Ngechuchu nŭxŭŭ nacuèx ga marŭ nawa na nanguxŭŭ
 ga űoma ga naānewa na yaxŭxŭŭ rŭ wenaxārŭ Nanatŭxŭtawā na naxŭxŭŭ.
 Rŭ nŭma rŭ yexguma űoma ga naānewa nayexmagu rŭ guxŭguma tŭxŭŭ
 nangechaŭŭ ga guxema noxrŭ ixŭgŭxe. Rŭ yexgumarŭŭ ta ga yexguma
 toxna yaxŭxchaŭgu ga daxŭguxŭŭ ga naānewa na naxŭxŭŭ, rŭ yemaācŭ po-
 raācŭ toxŭ nangechaŭŭ. 2-4 Natŭrŭ ga Chataná rŭ marŭ Yuda ga Chimáŭ
 ga Icarŭŭte nanena nangu na bexma cúācŭ Ngechuchuxŭŭ ĩnaxuaxŭxŭcèx.
 Rŭ Ngechuchu rŭ marŭ nŭxŭŭ nacuèx ga Nanatŭxŭtawā na ne naxŭxŭŭ
 rŭ wena táxarŭ Nanatŭcèx na nataeguxŭŭ. Rŭ nŭxŭŭ nacuèx ga Nanatŭ
 rŭ naxmēxgu na naxŭāxŭŭ ga guxŭma ga pora. Rŭ yemācèx ga yema
 chŭtaxŭgu ga yexguma mechawā ĩtachibŭeyane, rŭ inachi ga Ngechuchu. Rŭ
 ĩnacŭxuchi ga norŭ gāuxŭchiru, rŭ wŭxi ga tuayamaā nŭgŭ nigoye. 5 Rŭ
 űuxŭchi yaxmēxŭpāxŭgu dexāta naba, rŭ toxŭŭ niyaxgŭcutŭ. Rŭ guma
 tuaya ga namaā yagoyecŭmaā toxŭŭ ĩnapigŭcutŭ. 6 Rŭ yexguma Chimáŭ ga
 Pedruxŭŭ nayauxcutŭchaŭgu rŭ ñanagŭrŭ ga Pedru: —Pa Corix, űñuxācŭ tá
 i cuma i choxŭŭ cuyauxcutŭxŭŭ? —ñanagŭrŭ. 7 Rŭ Ngechuchu nanangāxŭŭ
 rŭ ñanagŭrŭ: —Ñŭxma rŭ tama nŭxŭŭ cucuèx i tŭxcŭŭŭ na chanaxŭxŭŭ i
 ñāā, natŭrŭŭ yixcama rŭ tá nŭxŭŭ cucuèx —ñanagŭrŭ. 8 Natŭrŭ ga Pedru
 rŭ ñanagŭrŭ: —Choma rŭ tāŭtāma chanaxwēxe na choxŭŭ cuyauxcutŭxŭŭ —
 ñanagŭrŭ. Rŭ Ngechuchu nanangāxŭŭ rŭ ñanagŭrŭ nŭxŭŭ: —Ngēxguma tama
 cuxŭŭ chayauxcutŭgu, rŭ tāŭtāma choxrŭŭ quixŭŭ —ñanagŭrŭ. 9 Rŭ yexguma
 ga Chimáŭ ga Pedru rŭ ñanagŭrŭ nŭxŭŭ: —Pa Corix, űTama choxŭŭ cuyaux-
 cutŭxicatama! Natŭrŭŭ chanaxwēxe i choxŭŭ cuyauxmēx rŭ choxŭŭ cuyaxeru
 ta —ñanagŭrŭ. 10 Natŭrŭŭ Ngechuchu nanangāxŭŭ rŭ ñanagŭrŭ nŭxŭŭ: —Texé ya
 ngexwacèx aiyaxe rŭ tanaxwēxe i tŭmacutŭxicatama tayaxu, erŭ guxŭŭwama
 tangemata. Rŭ pema rŭ marŭ pingematagŭ, natŭrŭŭ tama guxāma aixcŭma
 tingemata —ñanagŭrŭ. 11 Rŭ Ngechuchu nŭxŭŭ nacuèx na texé tá bexma
 cúācŭ ĩnaxuaxŭxŭŭ, rŭ yemācèx ñanagŭrŭ nŭxŭŭ: —Natŭrŭŭ tama guxāma
 aixcŭma tingemata —ñaxŭŭ. 12 Rŭ yexguma toxŭŭ yayauxgŭcutŭguwena, rŭ
 Ngechuchu wena nicŭxuchi ga norŭ gāuxŭchiru. Rŭ wenaxārŭŭ mechawā
 narŭto. Rŭ ñanagŭrŭŭ toxŭŭ: —űNŭxŭŭ pecuāxŭŭ yŭixŭŭ i ngēma chaxŭxŭŭ? 13 —
 Pema rŭ: “Pa Ngŭexēruŭŭ” rŭ “Pa Corix”, ñaperŭgŭ choxŭŭ. Rŭ marŭ name

i ngēma ñaperügü, erü aixcūmaxüchi ngēma chixī. ¹⁴—Rü ñuxma i choma na ngúexēeruü chixixü rü pemaã na ichacuáxü, rü pexü chiyauxgücütü. Rü ngexgumarüxü ta i pema rü name i wüxichigü i pemücüxü piyauxgücütü. ¹⁵—Choma rü pexü nüxü chadauxēē na ñuxácü tá penaxüxü na pema rü ngema pemaã chaxüdüácü penaxüxücèx. ¹⁶—Rü aixcūma pemaã nüxü chixu rü taxuüma i wüxi i coriarü duüxü rü norü coriétüwa nügü nangexmaxēē. Rü taxuüma i ãëxgacüaru orearu ngeruxü i norü ãëxgacü i namuxüétüwa nügü nangexmaxēē. ¹⁷—Rü ngëxguma nüxü pecuëxgu i chorü ore rü penaxüxgu i ngēma pemaã nüxü chixuxü, rü aixcūma tá petaãëgü. ¹⁸—Rü tama guxâma i pechiga nixī i chidexaxü. Erü choma rü tüxü chacuëx rü texégü tixī ya yíxema tüxü chidexechíxe. Natürü Tupana nayanguxēēchaü i norü ore i umatüxü i ñaxü:

“Texé ya chomaã chibüxe rü chomaã tarüxuwaniü”,
ñaxü. Rü ngēmaäcü tá nangupetü na yanguxücèx i ngema Tupanaaru ore. ¹⁹—Natürü naxüpa na nangupetüxü i ngēma, rü pemaã nüxü chixu na choxü peyaxögüxücèx i ngëxguma nangupetüxgu. ²⁰—Aixcūma pemaã nüxü chixu rü texé ya tüxü yaxüxe ya yíxema choma ngema tüxü chamuxé, rü choxü nixī i tayaxuxü. Rü texé ya choxü yaxüxe, rü Chaunatu ga núma choxü mucüxü nixī i tayaxuxü —ñanagürü ga Ngechuchu.

Ngechuchu nüxü nixu ga Yuda rü tá bexma cúäcü na ínaxuaxüãxü
(Mt 26.20-25; Mr 14.17-21; Lc 22.21-23)

²¹ Rü yexguma yema ñaxguwena ga Ngechuchu rü poraãcü ngechaü nüxü nangux, rü meãma tomaã nanangoxēē, rü ñanagürü toxü: —Aixcūma pemaã nüxü chixu rü wüxie i petanüwa tá nixī i bexma cúäcü choxü ítaxuaxüxü —ñanagürü. ²² Rü yexguma ga toma ga norü ngúexügü rü wüxichigü togü tadawenü, rü tama nüxü tacuëxgü ga texéchiga na yema ñaxü. ²³ Rü choma ga norü ngúexü ga poraãcü choxü nangechaüxé rü nacüwawa charüto ga Ngechuchu ga mechawa. ²⁴ Rü Chimáü ga Pedru rü bexma choxü naxuneta ga na Ngechuchuna chaçaxücèx ga texéchiga na yíxü ga yema. ²⁵ Rü yexguma ga choma rü yexeraãcü Ngechuchuna chimaxcuchi rü nüxna chaca, rü ñacharügü: —Pa Corix, ¿texé tá tixī ya yíxema? —ñacharügü. ²⁶ Rü Ngechuchu choxü nangäxü, rü ñanagürü: —Wüxi i päüärü bücuxü tá íchacúe, rü yíxema tüxna chanaxäxé, rü yíxema tixī —ñanagürü. Rü yexguma ínanacúe ga wüxi ga päüärü bücuxü rü Yuda ga Icaríute ga Chimáü nanena nanaxä. ²⁷ Rü yexgumatama Yuda nayauxgu ga yema päüärü bücuxü rü ngoxo ga Chataná rü Yudagu naxücu. Rü yexguma ga Ngechuchu rü ñanagürü nüxü: —Rü ngēma cuxüxchaüxü, ¡rü paxa naxü! —ñanagürü. ²⁸ Natürü taxüema ga toma ga mechawa chibiëxe nüxü tacuëxgü ga ¡acüchiga na yíxü ga yema ñaxü ga Ngechuchu. ²⁹ Rü núma ga Yuda rü díeruchiüärü dauruü nixī. Rü yemacèx ñuxre ga toma nüxü tacuëxgü rü Ngechuchu taxewa nanamu, na ¡acücèx yataxexücèx naxcèx ga peta, rü éxna duüxügü ga ngearu díeruãxüna ngíxü na naxäxücèx ga díeru. ³⁰ Rü yexguma Yuda nayauxgu ga yema päü, rü ínaxüxü ga yema ucapuwa. Rü marü nachüta ga yexgumax.

Ngechuchu norü ngúexügümaã nüxü nixu ga yexwacaxüxü ga norü mu

³¹ Rü yexguma Yuda íxüxguwena, rü Ngechuchu rü ñanagürü: —Rü ñuxma rü tá aixcūma nangox na ñuxácü naporaxü ya Tupana Nane ya duüxüxü ixícü. Rü yimawa tá nixī i nangoxēēãxü ya Tupana i norü pora. ³²—Rü ngëxguma yima Tupana Nane nangoxëëxgu i Tupanaärü

pora, rü ngëxgumarüü tá ta ya Tupana rü nanangoxëë i Naneärü pora. Rü paxa tá nixí i ngëma. ³³—Pa Chauxacüãxgüx, täütáma muxü i ngunexü petanüwa changëxma. Rü pema rü tá chauxcëx pedaugü, natürü ngëma choma íchaxüxüwa rü taxucürüwama ngëma pexí. Rü ñaãtama ore nixí ga marü Yudiügüarü äëxgacügümaã nüxü chixuxü, rü ñuxma rü pemaã rü ta nüxü chixuxü. ³⁴—Rü pemaã nüxü chixu i wüxi i ngexwacaxüxü i mu. Rü ngëma pexü chamuxü nixí i pemücügüxü na pengechaüxü i wüxichigü. Rü ngëma na choma pexü changechaüxürüü, rü chanaxwëxe i wüxichigü i pema rü pemücügüxü pengechaügü. ³⁵—Rü ngëxguma wüxichigü pemücügüxü pengechaügu, rü guxüma i duüxügü tá nüxü nicuëxãchitanü na chorü ngüexügü pixíxüxü —ñanagürü.

Ngechuchu nüxü nixu rü Pedru rü täütáma nügü nixu na norü ngüexü yixüxü (Mt 26.31-35; Mr 14.27-31; Lc 22.31-34)

³⁶ Rü Chimáü ga Pedru rü Ngechuchuna naca, rü ñanagürü: —Pa Corix ¿ngextá tá cuxü? —ñanagürü. Rü Ngechuchu nanangãxü, rü ñanagürü: —Ngëma íchaxüxüwa rü taxucürüwa chowe curüxü i ñuxmax. Natürü yixcama rü ngëmaãcü tá chowe curüxü —ñanagürü. ³⁷ Rü yexguma ga Pedru rü ñanagürü: —Pa Corix, ¿tüxcüü taxucürüwa cuwe charüxü i ñuxmax? Erü marü íchamemare na cuxcëx na chayuxü —ñanagürü. ³⁸ Rü Ngechuchu nanangãxü, rü ñanagürü: —¿Aixcüma yíxü i marü ícunemarexü na chauxcëx cuyuxü? Aixcüma cumaã nüxü chixu rü täütátama yacaxgu ya otá, rü tomaëpüxcüna tá nüxü quixu na tama choxü cucuáxü —ñanagürü ga Ngechuchu.

14

Ngechuchu rü nama i Nanatüxütawa nadaxü nixí

¹—¡Tãxü i penaxíxãchiãëgüxü i pemax! ¡Tupanaãxü peyaxögü rü choxü rü ta peyaxögü! ²—Chaunatüxütawa nangëxma i muxüchixüma i nachicagü. Ngëxguma chi natauxguma, rü täu chima pemaã nüxü chixu na pexcëx chayamexëëxüçëx i pechicagü. ³—Rü ngëxguma marü ngëma chaxüxgu rü wüxi i pechica chamexëëxgu, rü wena táxarü núma chaxü. Rü pexü tá chayagagü na ngëma nachica i chomatátama nawa changëxmaxüwa na pengëxmagüxüçëx i pemax. ⁴—Rü pema rü nüxü pecuëx na ngextá tá na chaxüxü, rü marü nüxü pecuëx i nama i ngëma nadaxü —ñanagürü ga Ngechuchu. ⁵ Rü Tumachi rü ñanagürü: —Pa Corix, tama nüxü tacuëx na ngextá na cuxüxü. ¿Rü ñuxãcü tá i nüxü tacuáxü i ngëma nama? —ñanagürü. ⁶ Rü Ngechuchu nanangãxü, rü ñanagürü: —Choma nixí i ngëma nama i Chaunatüxütawa nadaxü chüxü. Rü aixcüma nixí i ngëma ore i nüxü chixuxü. Rü choma nixí i duüxügüxü chamaxëëxü. Rü chaugaguxicatama nixí i Chaunatüxütawa nangügüxü i duüxügü. ⁷—Rü ngëxguma chi pema rü aixcüma meã choxü pecuëxgügu, rü Chaunatüxü rü chi ta pecuëxgü. Rü ñuxmaçüü nixí i Chaunatüxü pecuáxü, erü marü nüxü pedaugüecha —ñanagürü. ⁸ Rü yexguma ga Piripi rü ñanagürü: —Pa Corix, ¡Toxü nüxü nadaxëë ya Cunatü! Rü ngëxícatama i tanaxwëxëgüxü —ñanagürü. ⁹ Rü Ngechuchu nanangãxü, rü ñanagürü: —Pa Piripix, ¿ñuxre ya taunecü marü petanüwa changëxma rü ñuxma rü ta tama choxü cucuëxégaxü? Yíxema choxü dauxe rü Chaunatüxü rü ta tadau. ¿Rü tüxcüü i ngëxguma rü ta cunaxwëxëxü i pexü nüxü na chadauxëëxü ya Chaunatü? ¹⁰—¿Tama ëxna

cuyaxō na choma rŭ Chaunatŭmaã rŭ wŭxitama tixĭgŭxŭ? Rŭ guxŭma i ore i pemaã nŭxŭ chixuxŭ rŭ tama chauechama nŭxŭ chixu. Erŭ yima Chaunatŭ ya wŭxiwa chomaã ngĕxmacŭ, rŭ yima nixĭ ya naxŭcŭ i guxŭma i noxrŭtama puracŭ. ¹¹—Chanaxwĕxe i choxŭ peyaxōgŭ na choma rŭ Chaunatŭmaã wŭxitama tixĭgŭxŭ. Natŭrŭ woo tama ngĕma pixōgŭgu rŭ chanaxwĕxe na choxŭ peyaxōgŭxŭ naxcĕx i ngĕma mexŭgŭ i taxŭ i Tupanaãrŭ poramaã chaxŭxŭ. ¹²—Aixcŭma pemaã nŭxŭ chixu rŭ yĭxema choxŭ yaxōxĕ rŭ tá tanaxŭ i guxŭma i choma chaxŭxŭ. Rŭ ngĕma chaxŭxŭãrŭ yexera tá taxŭ, erŭ choma rŭ tá Chaunatŭxŭtawa chaxŭ. ¹³—Rŭ guxŭma i űacŭ i chauĕgagu Tupanaxŭtawa naxcĕx ipeçaxŭ rŭ tá pexna chanaxã. Rŭ ngĕmaãcŭ tá chanaxŭ na chaugagu nangōxŭcĕx i Chaunatŭarŭ pora. ¹⁴—Rŭ choma tá chanaxŭ i guxŭma i űacŭ i chauĕgagu choxna naxcĕx peçaxŭ.

Ngechuchu rŭ norŭ ngŭexŭgŭmaã inaxuneta na naxcĕx tá nŭma namuãxŭ i Naãe i Ŭŭnexŭ

¹⁵—Rŭ ngĕxguma aixcŭma choxŭ pengechaŭgu, rŭ naga tá pexŭnŭe i chorŭ mugŭ. ¹⁶—Rŭ choma tá Chaunatŭna naxcĕx chaca na nŭma pexcĕx namuãxŭcĕx i to i perŭ ngŭxĕerŭi i Naãe i Ŭŭnexŭ, na guxŭgutama petanŭwa nangĕxmaxŭcĕx. Rŭ nŭma tá nixĭ i pexcĕx nangoxĕãxŭ i ore i aixcŭma ixŭxŭ. ¹⁷—Rŭ ñoma i naãnecŭãx i duŭxŭgŭ rŭ taxucŭrŭwama nanayauxgŭ, erŭ tama nŭxŭ nadaugŭ rŭ tama nŭxŭ nacuĕxgŭ. Natŭrŭ i pema rŭ marŭ nŭxŭ pecuĕx, erŭ nŭma rŭ petanŭwa nangĕxma. Rŭ guxŭgutama pemaã inarŭxãŭx. ¹⁸—Rŭ tãŭtama nŭma pexŭ chawogŭmare i chomax, erŭ wena táxarŭ pexcĕx chataegu, na petanŭwa changĕxmaxŭcĕx. ¹⁹—Rŭ paxa tá nixĭ na tãŭtama choxŭ nadaugŭxŭ i ñoma i naãnecŭãx i duŭxŭgŭ. Natŭrŭ i pema rŭ tá choxŭ pedaugŭ. Rŭ tá pemaxĕ, erŭ choma rŭ chamaxŭ. ²⁰—Rŭ ngĕxguma yuwa ícharŭdaxgu rŭ wena chamaŭxgu, rŭ ngĕxguma tá nŭxŭ picuĕxãchitanŭ na choma rŭ Chaunatŭwa chamaxŭxŭ rŭ pema i chowa rŭ choma i pewa. ²¹—Yĭxema texĕ ya nŭxŭ cuãxe rŭ naga ñnŭxĕ i chorŭ mugŭ, rŭ tanangoxĕĕ na aixcŭma choxŭ tangechaŭxŭ. Rŭ Chaunatŭ tá tŭxŭ nangechaŭ ya yĭxema choxŭ ngechaŭxĕ, rŭ choma rŭ tá ta tŭxŭ changechaŭ. Rŭ tŭxŭ tá chaugŭ chawĕx —ñanagŭrŭ ga Ngechuchu. ²² Rŭ nayexma ga to ga Ngechucharŭ ngŭexŭ ga Yudagu ãegaxŭ ta. Rŭ yema rŭ ñanagŭrŭ: —Pa Corix, űtŭxcŭŭ toxŭ cugŭ cuwĕx, rŭ tama ñoma i naãnecŭãx i duŭxŭgŭxŭ cugŭ cuwĕx? —ñanagŭrŭ. ²³ Rŭ Ngechuchu nanangãxŭ, rŭ ñanagŭrŭ: —Yĭxema choxŭ ngechaŭxĕ rŭ naga taxŭnŭ i ngĕma ore i tŭmamaã nŭxŭ chixuxŭ. Rŭ Chaunatŭ tá tŭxŭ nangechaŭ. Rŭ choma rŭ Chaunatŭmaã wŭxigu tŭmaxŭtawa tá tangĕxmagŭ. ²⁴—Yĭxema tama choxŭ ngechaŭxĕ rŭ tama naga taxŭnŭ i ngĕma chorŭ ore. Rŭ ngĕma ore i chauxŭtawa nŭxŭ pexŭnŭxŭ rŭ tama chorŭ ore nixĭ, natŭrŭ guma Chaunatŭ ga nŭma choxŭ mucŭarŭ ore nixĭ. ²⁵—Ñoma rŭ ta petanŭwa changĕxma rŭ pemaã nŭxŭ chixu i guxŭma i ngĕma ore i pexcĕx choxŭ ngĕxmaxŭ. ²⁶—Natŭrŭ Chaunatŭ rŭ tá chauĕgagu nŭma nanamu i Naãe i Ŭŭnexŭ na pexŭ nangŭxĕĕxŭcĕx. Rŭ nŭma i Naãe i Ŭŭnexŭ tá pexŭ nangŭxĕĕ i guxŭma, rŭ tá nŭxna pexŭ nacuĕxãchixĕĕ i guxŭma i ore ga pemaã nŭxŭ chixuxŭ. ²⁷—Rŭ ñŭxma na pexna íchixŭxŭ, rŭ pexna chanaxã i taãe. Natŭrŭ ngĕma taãe i pexna chaxãxŭ, rŭ tama ñoma i naãnecŭãx pexna ãxŭ i taãerŭŭ nixĭ. Rŭ tama chanaxwĕxe i penaxŭãchiãĕgŭ rŭ pemuĕĕ. ²⁸—Marŭ pemaã nŭxŭ chixu na pexna tá íchixŭxŭ rŭ wena táxarŭ pexcĕx chataeguxŭ na pemaã changĕxmaxŭcĕx. Rŭ choxŭ pexŭnŭe ga yexguma

yema ñachaxgu. Rũ ngẽxguma aixcũma choxũ pengechaũgu rũ tá petaãẽgũ ega nũxũ pecuẽxgu na Chaunatũcẽx chataeguxũ, erũ Chaunatũ rũ chorũ yexera nixĩ. ²⁹—Rũ naxũpa na nangupetũxũ i ngẽma, rũ pemaã nũxũ chixu na choxũ peyaxõgũxũcẽx i ngẽxguma nangupetũgu. ³⁰—Marũ tãitãma poraãcũ pemaã chidexa, erũ marũ ñangu i Chataná i ñoma i naãneãrũ ãẽxgacũ ixĩxũ. Natũrũ nũma rũ taxuwama choxũ narũyexera. ³¹—Natũrũ ngẽma tá choxũ ngupetũxũ, rũ ngẽmaãcũ tá nixĩ na guxũma i ñoma i naãnecũãx i duũxũgũ nũxũ nacuáxũcẽx na choma rũ Chaunatũxũ na changechaũxũ, rũ chanaxũxũ i ngẽma nũma choxũ namuxũ. ¡Rũ ipechigũ, rũ ngĩãx itixĩ! —ñanagũrũ ga Ngechuchu.

15

Ubanegu nũgũ nangu ga Ngechuchu

¹ Rũ ñanagũrũ ga Ngechuchu: —Choma nixĩ i ñoma wũxi i ubanerũũ chũxũ rũ Chaunatũ nixĩ ya norũ yora ixĩcũ i ngẽma uba. ²—Rũ chorũ duũxũgũ rũ ngẽma ubachacũgũrũ nixĩgũ. Rũ ngẽma ubachacũ i tama oxũ, rũ norũ yora rũ nayadae. Natũrũ ngẽma nachacũ i oxũ, rũ meã nanamexẽẽtanũ na yexeraãcũ poraãcũ naxoxũcẽx. ³—Pema rũ marũ pime, yerũ naga pexĩnũẽ ga yema ore ga pexũ changũexẽẽxũ. ⁴—Rũ name nixĩ i guxũguma chowa peyaxũxgũ, ngẽma na choma rũ pewa chayaxũxũrũ. Erũ wũxi i ubachacũ rũ tama nũxĩca naxo, ega tama nanewa yaxũxgux. Rũ ngẽxgumarũ ta i pema rũ taxuacũma chauxcẽx pemaxẽ, ega tama chowa peyaxũxgũechagu. ⁵—Choma nixĩ i ubane, rũ pema i nachacũgũ. Rũ yĩxema chowa yaxũẽchaxe rũ choma i tũmawa, rũ aixcũma tá chauxcẽx tamaxũ. Rũ ngẽmaãcũ wũxi i ubachacũ i oxũrũ tá tixĩ. Natũrũ ngẽxguma tama chowa peyaxũxgũechagu, rũ taxucũrũwama ñacũ pexũ. ⁶—Rũ texẽ ya tama chowa yaxũẽchaxe rũ tá itatẽxũchi. Rũ wũxi i ubachacũ i daexũ rũ ipaxũ rũ iguxũrũ tá tixĩ, rũ ngẽxma tá tayarũxo. ⁷—Rũ ngẽxguma chowa peyaxũxgũechagu rũ taguma nũxũ ipeyarũngũmaẽgu i ngẽma ore i pexũ changũexẽẽxũ, rũ marũ name i naxcẽx ipeca i ñacũ i penaxwẽxexũ, rũ choma rũ tá pexna chanaxã. ⁸—Rũ ngẽxguma aixcũma meã chauxcẽx pemaxẽgu, rũ Chaunatũxũ tá nicuẽxũũgũ i duũxũgũ. Rũ ngẽmaãcũ aixcũma chorũ nguẽxũgũ tá pixĩgũ. ⁹—Choma rũ pexũ changechaũ ngẽma na Chaunatũ choxũ ngechaũxũrũ. Rũ chanaxwẽxe i aixcũma meã chauga pexĩnũẽẽcha, erũ choma rũ guxũguma pexũ changechaũ. ¹⁰—Choma rũ naga chaxĩnũ i Chaunatũarũ mugũ rũ nũma rũ guxũguma choxũ nangechaũ. Rũ ngẽxgumarũ tá ta nixĩ ega naga pexĩnũẽgu i chorũ mugũ, rũ guxũgutãma pexũ changechaũẽcha. ¹¹—Choma rũ ngẽmaãcũ pemaã nũxũ chixu na wũxigu chomaã petaãẽgũxũcẽx. Rũ ngẽmaãcũ tá aixcũma petaãẽgũ. ¹²—Rũ choma pexũ chamu na pemũcũgũxũ pengechaũgũxũcẽx, ngẽma choma na pexũ changechaũxũrũ. ¹³—Rũ ngẽxguma wũxie aixcũma tũmamũcũxũ ngechaũgu, rũ nũxũ tangechaũãma rũ nũẽtama ega woo tũmamũcũcẽx tayũxgu. Rũ nataxuma i to i ngechaũ i ngẽmaãrũ yexera. ¹⁴—Pema rũ chomũcũgũ pixĩgũ i ngẽxguma chauga pexĩnũẽgu. ¹⁵—Choma rũ marũ tama chorũ duũxũgũmareãcũ pexũ chaxu. Erũ wũxi i coriarũ duũxũmare rũ tama nũxũ nacuẽx i ngẽma norũ cori xũ. Natũrũ ñũxma rũ chomũcũgũmaã pexũ chaxu, erũ pexũ nũxũ chacuẽxẽ i guxũma i ore ga Chaunatũ chomaã nũxũ ixuxũ. ¹⁶—Pema rũ tama pexira chauxcẽx pedaugũ, natũrũ chaxira nixĩ ga pexcẽx chadauxũ rũ pexũ chamuxũ na aixcũma chauxcẽx pemaxẽxũcẽx

rü chauxütawa penagagüxcèx i muxüma i duüxügü na guxüguma choxü yaxögüäxcèx. Rü Chaunatü ya Tupana tá pexna nanaxä i guxüma i tacü i chauégagu nüxna naxcèx pecaxü. ¹⁷—Rü ngëma nixi i pexü chamuxü na pemücügüxü pengechaügüxcèx.

Ñoma i nañecüäx i duüxügü rü Ngechuchuchi rü norü ngüexügüchi naxaie

¹⁸—Ngëxguma ñoma i nañecüäx i duüxügü pexchi aiegu, rü jñuxna pecuëxächie ga chaxira chauxchi na naxaie xü! ¹⁹—Rü ngëxguma chi ñoma i nañecüäx i duüxügürüü pixigügu, rü ñoma i nañecüäx i duüxügü rü chi pexü nangechaügü ngëma natanüxügüxü na nangechaügüxürüü. Natürü choma nixi ga pexcèx chadauxü natanüwa ga ñoma ga nañecüäx ga duüxügü. Rü ngëmacèx nixi i pexchi naxaie xü, erü marü tama naxrüü pixigü. ²⁰—jNüxna pecuëxächie ga pemaä ñachagu:

“Taxuxüma i wüxi i coriarü duüxü rü norü coriétüwa nügü nangexmaxëë, ñachagu! Rü yema na chauxchi na naxaie xü, rü pexchi rü tá ta naxaie. Rü yexguma chi chauga naxinüëgu rü ñuxma rü chi ta pega naxinüë. ²¹—Rü ngëmaäcü ta chaugagu pexchi naxaie i ñoma i nañecüäx i duüxügü erü tama nüxü nacuëxgü ya Chaunatü ga núma choxü mucü. ²²—Rü ngëxguma chi choma tama namaä chanangoxëëgu na ñuxäcü chixri na namaxëxü, rü täü chima nüxü nacuëxgü ga pecadu na naxügüxü. Natürü ñuxma namaä nüxü na chixuxü na ñuxäcü chixri namaxëxü, rü ngëmacèx i ñuxma rü taxuacüma nüxü nixugü na yangearü pecaduäxü. ²³—Rü guxüma i duüxügü i chauxchi aie xü rü Chaunatüchi rü ta naxaie. ²⁴—Rü ngëma duüxügüpëxewa rü Tupanaärü poramaä chanaxü i mexügü i taxü i taguma texé ya togue üxü. Rü ngëxguma chi tama napëxewa chanaxüxgu i ngëma mexügü rü täü chima Tupana namaä nanaxuegu na nagagutama yapecaduäxgüxü. Natürü na woo marü nüxü nadaugüxü i ngëma mexügü i taxü i Tupanaärü poramaä chaxüxü, rü ngëxguma rü ta chauxchi naxaieama rü Chaunatüchi rü ta naxaie. ²⁵—Natürü ngëmaäcü nangupetü erü Tupana nayanguxëëchaü i norü ore i ümatüxü i ñaxü:

“Chauxchi naxaie woo taxuüma i chixexü chaxüxgu”, ñaxü. ²⁶—Natürü choma rü tá Chaunatüégagu pexcèx núma chanamu i perü ngüxëëruü i Tupanaäë i Üünexü i tá pexü nüxü cuëxëëxü i ore i aixcüma ixixü. Rü nüma tá nixi i meäma pemaä nüxü yaxuxü i chauchiga. ²⁷—Rü pema rü tá ta chauchigaxü pixugüë, yerü noxri ichanaxügüga duüxügümaä nüxü na chixuxü ga chorü ore, rü woetama marü chauxütawa peyexmagü —ñanagürü ga Ngechuchu.

16

¹ Rü Ngechuchu rü ñanagürü nüxü: —Rü pemaä nüxü chixu i ñaä ore na tama nüxü na perüxoexüxcèx na choxü peyaxögüxü. ²—Rü ngutaquëxepataügüwa tá pexü ínawoxü. Rü aixcüma tá nawa nangu na texé pexü dëixü rü tá nagu tarüxinüxü na ngëmaäcü mexü Tupanacèx taxüxü. ³—Rü ngëmaäcü tá pemaä namaxë i duüxügü, erü taguma nüxü nacuëxgü ya Chaunatü, rü choxü rü ta tama nacuëxgü. ⁴—Rü pemaä nüxü chixu i ñaä ore i ñuxmax, na nüxna pecuëxächie xüxcèx i ngëxguma yixcüra ngëmaäcü pexü nangupetüga.

Tupanaäë i Üünexüärü puracüchiga

—Noxri rü tama pemaã nüxü chixu i ñaã ore, yerü petanügu charüxãüx.
 5 —Natürü i ñuxma rü tá pexna íchixü na Chaunatü ga núma choxü mucüxütawa na changëxmaxüçëx. Rü pema rü taxúema choxna peca na ngextá tá na chaxüxü. 6 —Natürü poraãcü pengechaügüama erü pemaã nüxü chixu i ngëma ore. 7 —Natürü aixcüma pemaã nüxü chixu rü pexcëx narümemã nixi na Chaunatüçëx chataeguxü. Rü ngëxguma chi tama Chaunatüxütawa chaxüxgu rü tãu chima núma naxü i Naãe i Üünexü i pexü rüngüxëëxü. Natürü ngëxguma ngëma chaxüxgu rü choma tá núma chanamu i Naãe i Üünexü. 8 —Rü ngëxguma Naãe i Üünexü núma üxgu rü tá guxü i duüxügüxü nüxü nacüëxëë na yapëcaduãxgüxü. Rü tá nanangoxëë i ñuxãcü na yïixü i ngëma maxü i Tupanapëxewa aixcüma mexü. Rü tá duüxügüxü nüxü nacüëxëë na Tupana tá napoxcuexü i duüxügü naxcëx i norü pecadugü. 9 —Rü núma i Naãe i Üünexü tá duüxügüxü nüxü nacüëxëë na pecaduãxgüxü yïixü erü tama choxü nayaxögü. 10 —Rü tá nanangüxëë i ñuxãcü na yïixü i ngëma maxü i Tupanapëxewa aixcüma mexü, erü choma rü tá Chaunatüxütawa chaxü, rü pema rü tãütáma marü choxü pedaugü. 11 —Rü Naãe i Üünexü tá duüxügüxü nüxü nacüëxëë na Tupana tá napoxcuexü i duüxügü i chixexü ügüxü, erü Tupana rü namaã nanaxuegu na marü napoxcuãxü i Chataná i ñoma i naãnemaã icuáxü. 12 —Choma rü choxü nangëxma i muxüma i to i ore i pemaã nüxü chixuxchaüchirëxü. Natürü ega ñuxma chi pemaã nüxü chixuxgu rü tãu chima nüxü pecüëxgü. 13 —Rü Tupanaãe i Üünexü rü nüxü nixu i ore i aixcüma ixixüícatama. Rü ngëxguma núma naxüxgu rü núma tá pexü nangüëxëë i guxüma i ore i aixcüma ixixü. Erü núma rü tama nüëchama tá nidexa, natürü ngëma ore i Chaunatüxütawa rü chauxütawa nüxü naxinüxüxüxica tátama nixu. Rü tá pexü nüxü nacüëxëë i guxüma i ñacü i yixcüra tá ngupetüxü. 14 —Rü núma rü tá choxü nataxëë, erü chauxütawa tá nanayaxu i norü nguxëëtae, rü ñuxüchi tá pexü nangüëxëë namaã i ngëma nguxëëtae. 15 —Guxüma i Chaunatüaxü ngëxmaxü rü choxrü ta nixi. Ngëmacëx pemaã nüxü chixu rü Naãe i Üünexü rü chauxütawa tá nanayaxu i norü nguxëëtae, rü ñuxüchi pexü tá namaã nangüëxëë. 16 —Rü paxa tãütáma choxü pedau. Natürü ngëmawena rü wena táxaru choxü pedau erü Chaunatüxütawa tá chaxü —ñanagürü ga Ngechuchu.

Ngema guxchaxügü rü yixcüama rü tá taãëxü nananguxuchi

17 Rü yexguma ñuxre ga toma ga Ngechucharü ngüëxügü rü togüna tacagü, rü ñatarügügü: —¿Tãcüchiga nixi na ngëma ñaxü:

“Rü paxa tãütáma choxü pedaugü. Natürü ngëmawena rü wena táxaru choxü pedaugü”, ñaxü? ¿Rü ñacüchiga ta nixi na ñaxü:

“Choma rü Chaunatüxütawa tá chaxü”, ñaxü? 18 —¿Rü ñacüchiga ta nixi na ñaxü:

“Rü paxa tãütáma choxü pedaugü”, ñaxü? Rü yixema rü tama nüxü tacüëxgüéga na ñacüchigaxü tamaã yaxuxü —ñatarügügü. 19 Rü Ngechuchu rü nüxü nacüëxama ga nuxna na tacagüchaüxü ga tomax. Rü yemacëx ñanagürü toxü: —Choma rü marü pemaã nüxü chixu rü paxa tãütáma choxü pedau, natürü ngëmawena rü wena táxaru choxü pedau. ¿Rü ngëma dexacëxtama i pegüna pecagüxü? 20 —Rü aixcüma pemaã nüxü chixu rü pema rü tá pexauxe, rü tá pengechaügü. Natürü ñoma i naãnecüãx i duüxügü rü tá nataãëgü. Natürü woo pema tá pengechaügü, rü ngëma perü ngechaü rü tá taãëxü nananguxuchi. 21 —Ngëxguma wüxi i nge íraxacüchaügu rü

inaxixächiaê, erü inguxneca. Natürü ngëxguma marü tabuxgu ya ngîrü õxchana, rü nüxü iyarüngüma na ñuxäcü poraäcü ngîxü na nanguxchiréxü i noxrix, erü tümamaã itaê ya ngîrü õxchana. ²²—Rü ngëxgumarüü tá ta pexü nangupetü i pemax, erü ñuxma rü penaxixächiaêgü. Natürü wena táxarü chataegu rü pexü íchayadau. Rü ngëxguma rü tá pexü nangëxma i wüxi i taê i taxucürüwama texé pexna yaxuxü. ²³—Rü ngëxguma ínanguxgu tá i ngëma ngunexü na yanguxü i ñaã pemaã nüxü chixuxü, rü taxucëttáma ñacüçex choxna pecagü erü aixcüma Chaunatü tá nixü ya pexna naxäcü i guxüma i ñacü i chauégagu nüxna naxcëx pecaxü. ²⁴—Ñuxmarüta i pema rü taxuüçexma chauégagu ípecagü. ¡Naxcëx ípeca rü tá penayaxu i ngëma naxcëx ípeçaxü! Rü ngëmaäcü rü tá aixcüma petaêgü.

Ngechuchu rü marü nüxü narüyexera i guxüma i ñacü i ñoma i naãnewa ngëxmaxü

²⁵—Ñuxma rü cuëxruügügu chayaxuäcüma pemaã nüxü chixu i ore. Natürü nawa tá nangu i ngunexü i marü täütáma ngëmaäcü pemaã nüxü chixu. Rü ngëxguma rü tá noxtacüma meã pemaã chanangoxëe i Chaunatüchiga. ²⁶⁻²⁷—Rü ngëma ngunexügu i pema rü Chaunatüxütawa tá chauégagu naxcëx ípeca i ñacü i penaxwëxexü. Rü taxucëxma tüxcüü choma tá Chaunatüxütawa pexü naxcëx íchaca, erü nümatama ya Chaunatü rü woetama pexü nangechaü, erü pema rü choxü pengechaü rü peyaxögü na naxütawa ne chaxüxü. ²⁸—Chaunatüxütawa ne chaxü na ñoma ga naãnewa chaxüxüçex. Rü ñuxma rü tá nüxna chataegu i ñoma i naãne na wenaxärü Chaunatüxütawa chaxüxüçex —ñanagürü. ²⁹ Rü yexguma ga toma ga norü ngüexügu rü ñatarügügu: —Ñuxma waxi nixü i meãxüchima tomaã cunangoxëëxü i curü ore i tomaã nüxü quixuxü. Rü tama ñacügu ixuxüäcüma tomaã nüxü quixu. ³⁰—Rü ñuxma rü nüxü tacuëx na aixcüma guxüxüma na cucuáxü. Rü taxuacüma texé ñuxü ñanagürü cuxü. Rü ngëmacëx nixü i tayaxögüxü na aixcüma Tupanaxütawa na ne cuxüxü —ñatarügügu. ³¹ Rü Ngechuchu toxü nangäxü rü ñanagürü: —¿Aixcüma peyaxögüxü i ñuxmax? ³²—Rü nawa tá nangu i ngunexü rü ñuxmatátama nixü i na pegü pewoonexü. Rü wüxichigü i pema rü tá pepatawa pexü, rü chaxica tá nuã choxü petëx. Natürü tama chaxica tá icharüxäüx, erü Chaunatü rü chauxütawa nangëxma. ³³—Rü guxüma i ñaã ore rü pemaã nüxü chixu na chauagagu petaêgüxüçex. Rü ñoma i naãnewa rü tá ngüxü pinge. Natürü ¡peporae! erü choma rü marü nüxü charüyexera i guxüma i ñacü i ñoma i naãnewa ngëxmaxü —ñanagürü.

17

Ngechuchu rü norü ngüexüçex nayümüxë

¹ Rü yema ñaxguwena rü Ngechuchu daxügu nadawenü, rü ñanagürü: —Pa Chaunatüx, marü nawa nangu i ngunexü na chayuxü. Rü chanaxwëxe na duüxügüxü nüxü cucuëxëëxü na aixcüma choma rü cune chiixü. Rü ngëmaäcü i choma rü tá nüxü nüxü chacuëxëe na cuma rü aixcüma Tupana na quiixü. ²—Erü marü guxü i duüxügüarü äëxgacüxü choxü quixüxëe, na chanamaxëxëxüçex i guxüma i duüxügü i choxna cumugüxü. ³—Rü ngëma duüxügü tá nüxü nangëxma i maxü i taguma gúxü ega cuxü nacuëxgügu na cuxicatama Tupana na quiixü, rü choxü nacuëxgügu na choma rü Cristu ga núma choxü cumucü na chiixü. ⁴—Choma rü marü cuxü chataxëe i ñoma i

naānewa rü chayanguxēē i guxūma i puracū ga nawa choxū cumuxū. ⁵—Rü ñuxma Pa Chaunatūx, rü chanaxwēxe i cugūxūtawa choxū cungēxmaxēē na choxū nangēxmaxūcēx ga yematama pora ga cumaā choxū yexmaxū ga noxri tauta naāne ūxgu. ⁶—Rü guxema duūxēgū ya tūxū quidexechixe ga ñoma ga naānewa na choxna tūxū cumugūxūcēx, rü marū tūxū nūxū chachuēē i texe na quiixū i cumax. Rū woetama cuxrūgū tixīgū rü cuma nixī ga choxna tūxū cumugūxū. Rū tūmagū rü marū naga taxīnūē i curū ore. ⁷—Rü ñuxma rü marū nūxū tacuēx rü guxūma i ngēma choxna cuxāxū, rü aixcūma cuxūtawa ne naxū. ⁸—Rü choma rü marū tūmamaā nūxū chixu ga curū ore ga chomaā nūxū quixuxū. Rū tūmagū rü marū tayaxōgū i ngēma ore. Rū nūxū ticuēxāchitanū na aixcūma cuxūtawa na ne chaxūxū i chomax. Rū tayaxōgū ga cuma nūma choxū na cumuxū. ⁹—Rū ngēmacēx cuxna chaca na tūxū na curūngūxēēxūcēx. Rū tama cuxna chaca na nūxū curūngūxēēxūcēx i ñoma i naānecūāx i duūxūgū, natūrū cuxna chaca na tūxū curūngūxēēxūcēx ya guxema choxna tūxū cumugūxe, erū curū duūxūgū tixīgū. ¹⁰ Rū guxāma ya yixema choxrūgū ixīgūxe rü cuxrūgū tixīgū. Rū guxāma ya cuxrūgū ixīgūxe rü choxrūgū tixīgū. Rū tūmagagu rü duūxūgū choxū nicuēxūūgū. ¹¹—Choma rü marū tāūtama ñoma i naānewa changēxmaēcha, natūrū i tūmagū rü ngēmaācū ñoma i naānewa tá tangēxmagū ngēxguma cuxūtawa chaxūyane. Pa Chaunatū ya Ūnecūx, rü chanaxwēxe na curū pora ga choxna cuxāxūmaā tūxna cudaduxū ya yixema choxna tūxū cumugūxe, na ngēmaācū guxāma wūxigu rūxīnūēxūcēx, ngēma cuma rü choma na wūxigu rūxīnūēxūrūū. ¹²—Rū yexguma guxema choxna tūxū cumugūxetanūwa chayexmagu ga ñoma ga naānewa, rü curū pora ga choxna cuxāxūmaā tūxna chadau rü tūxū ichapoxū. Rū taxūema ga guxema choxna tūxū cumugūxe rü itayarūtauxe. Rū Yuda ga woetama iyarūtaxūxūcicatama inayarūtaxu na yanguxūcēx i curū ore i ūmatūxū. ¹³—Rū ñuxma rü cuxūtawa tá chaxū. Natūrū ñomarūta ñoma i naānewa changēxma-yane rü nūxū chixu i ñaā curū ore na tūmagū rü ta tūxū nangēxmaxūcēx i ngēma taāē i aixcūma ixīxū i choma choxū ngēxmaxū. ¹⁴—Choma rü marū tūmamaā nūxū chixu i curū ore. Natūrū ñoma i naānecūāx i duūxūgū rü tūmachi naxaie, erū tūma rü tama naxrūū tixīgū, ngēxgumarūū i choma rü tama ñoma i naānecūāx rūū chixī. ¹⁵—Tama cuxna tūmacēx chaca na tūxū na quigagūxūcēx i ñoma i naānewa. Natūrū cuxna chaca na tūxū na icupoxūxūcēx nūxna i ngoxo i Chataná. ¹⁶—Choma rü tama ñoma i naānecūāx chixī. Rū tūmagū rü ta tama ñoma i naānecūāx tixīgū, erū cuxrūgū tixīgū i ñuxmax. ¹⁷—Curū ore rü aixcūma nixī. Rū chanaxwēxe i tūxū cūngūxēē i curū ore, na aixcūma cupēxewa tixūūnēxūcēx ya yixema choxna tūxū cumugūxe. ¹⁸—Rū yexgumarūū ga ñoma ga naānecūāx ga duūxūgūtanūwa choxū na cumuxūrūū, rü ngēxgumarūū i choma rü ta ñoma i naānecūāx i duūxūgū-tanūwa tūxū chamugū. ¹⁹—Rū tūmagagu chaugū ichaxā na tūxū changūxēēxūcēx i curū ore i aixcūma ixīxū, na cupēxewa tixūūnēxūcēx ya yixema choxna tūxū cumugūxe. ²⁰—Natūrū tama yixema ñuxma yaxōgūxēcēcicatama cuxna chaca. Natūrū cuxna chaca ta tūmacēx ya yixema yixcūra tá yaxōgūxe nagagu i tūmaārū ore ya yixema ñuxma yaxōgūxe. ²¹—Rū guxāma ya yixemacēx cuxna chaca na aixcūma wūxitama tixīgūxūcēx. Rū ngēma cuma rü choma na wūxitama ixīgūxūrūū, Pa Chaunatūx, rü chanaxwēxe i guxāma i tūma rü ta wūxitama tixīgū. Rū ngēmaācū i ñoma i naānecūāx i duūxūgū, rü tá nayaxōgū na cuma nūma choxū cumuxū. ²²—Rū choma rü marū tūxna chanaxā i ngēmatama pora i cuma

choxna cuxãxũ na ngẽmaãcü wũxitama tixĩgũxũcèx ngẽma cuma rü choma na wũxitama ixĩgũxũrũü. ²³—Rü chanaxwẽxe na tũmawa changẽxmaxũ rü cuma i chowa na cungẽxmaxũ na ngẽmaãcü aixcũma wũxi-tama ixĩgũxũ i guxãma i yixema. Rü ngẽmaãcü i ñoma i naãnecũãx i duũxũgũ rü tá nüxũ nicuèxãchitanũ na cuma núma choxũ cumuxũ, rü tá nüxũ nicuèxãchitanũ na tũxũ cungechaũxũ ya yixema choxna tũxũ cumugũxe ngẽma na choxũ cungechaũxũrũü. ²⁴—Pa Chaunatũx, cuma choxna tũxũ cumugũ. Rü chanaxwẽxe i chauxũtawa tangẽxmagũ i ngema tá íchangẽxmaxũwa, na nüxũ tadaugũxũcèx i chorũ pora ga choxna cuxãxũ. Yerũ choxũ cungechaũ ga yexguma tauta naãne ixũgũgumama. ²⁵—Pa Chaunatũ ya Mecũx, ñoma i naãnecũãx i duũxũgũ rü tama cuxũ nacuèxgũ. Natürũ choma rü cuxũ chacuèx. Rü yixema choxna tũxũ cumugũxe rü ta marũ nüxũ tacuèxgũ na cuma núma choxũ cumuxũ. ²⁶—Rü marũ tũxũ nüxũ chacuèxẽẽ na texé quiixũ. Rü guxũgutãma tũxũ nüxũ chicuèxẽẽãmachigũ na cuma choxũ cungechaũxũrũü tũgũ tangechaũgũxũcèx rü choma rü tũmaxũtawa na changẽxmaxũcèx —ñanagürũ ga Ngechuchu.

18

Ngechuchuxũ niyauxgũ

(Mt 26.47-56; Mr 14.43-50; Lc 22.47-53)

¹ Rü yema ñaxguwena ga Ngechuchu rü tomaã inaxũãchi, na Cheduruarũ ngatexũãrũ tocutũwa taxĩxũcèx. Rü yẽma nayexma ga wũxi ga nanetũnecũ. Rü yemawa naxũ ga Ngechuchu tomaã. ² Rü Yuda ga yema bexma cúãcü Ngechuchuxũ íyaxuaxũxũ rü nüxũ nacuèx ga yema nachica, yerũ Ngechuchu rü muèxpũxcũna yẽma tomaã nangutaquẽxexũ. ³ Rü yẽma nangu ga Yuda namaã ga ñuxre ga churaragũ rü ñuxre ga tupauca ga taxũneãrũ purichíagũ ga yẽma namugũxũ ga paigũarũ ãẽxgacũgũ rü parichéugũ. Rü meãma nixãxne, rü yẽma nanangegũ ga omũgũ. ⁴ Natürũ ga Ngechuchu rü marũ nüxũ nacuèx ga guxũma ga ñacũ tá nüxũ na ngupetũxũ. Rü yemacèx naxcèx nixũ, rü nüxna naca, rü ñanagürũ: —¿Texécèx nixĩ i pedaugũxũ? —ñanagürũ. ⁵ Rü nũmagũ rü Ngechuchuxũ nangãxũgũ, rü ñanagũ-rũgũ: —Nacharétucũãx i Ngechuchucèx nixĩ i tadaugũxũ —ñanagürũgũ. Rü Ngechuchu nanangãxũ, rü ñanagürũ: —Choma chixĩ —ñanagürũ. Rü Yuda ga bexma cúãcü ínaxuaxũxũ rü yema churaragũtanũwa nayexma. ⁶ Rü yexguma yema ñaxgu ga Ngechuchu: “Choma chixĩ”, ñaxgu, rü nügũweama nacaixũtanũ ga yema churaragũ, rü yexma nayayi. ⁷ Rü yexguma ga Ngechuchu rü wena nüxna naca, rü ñanagürũ: —¿Texécèx nixĩ i pedaugũxũ? —ñanagürũ. Rü nũmagũ rü nanangãxũgũ rü ñanagürũgũ: —Nacharétucũãx i Ngechuchucèx nixĩ i tadaugũxũ —ñanagürũgũ. ⁸ Rü Ngechuchu rü wenaxãrũ ñanagürũ nüxũ: —Marũ pemaã nüxũ chixu rü choma chixĩ. Rü ngẽxguma chauxcèx pedaugũgu rü ¡ipeyaxĩxẽẽ i ñãã chorũ ngũexũgũ! —ñanagürũ. ⁹ Rü yemaãcü nangupetũ na yanguxũcèx ga norũ ore ga nũmatama ga Ngechuchu nüxũ yaxuxũ ga ñaxgu:

“Yixema Chaunatũ choxna tũxũ mugũxe rü taxũetãma itayarũtauxe”, ñaxgu.

¹⁰ Rü Chimãũ ga Pedru rü nüxũ iyexma ga wũxi ga cũxchi. Rü ngĩxũ nayaxu ga norũ cũxchi rü yemamaã ínanadaechinũ ga paigũarũ ãẽxgacũarũ duũxũ ga Macugu ãegaxũ. Rü norũ tũgũnechinũ ínae. ¹¹ Natürũ ga Ngechuchu rü Pedruxũ ñanagürũ: —¡Ngĩxchixũgu ngĩxũ ixĩcuchi i curũ cũxchi! ¿Tama èxna nüxũ cucuèx na choma rü tá ngũxũ chingexũ ngẽma Chaunatũ chomaã naxueguxũrũü? —ñanagürũ.

Anápatawa Ngechuchuxũ nagagũ*(Mt 26.57-58; Mr 14.53-54; Lc 22.54)*

¹² Rũ yexguma ga churaragũarũ ãëxgacũ, namaã ga norũ churaragũ rũ tupaucaarũ purichĩagũ, rũ Ngechuchuxũ niyauxgũ. Rũ nayanẽixchacũũgũ. ¹³ Rũ noxri rũ ãëxgacũ ga Anápatawa nanagagũ. Rũ Aná rũ Caipánẽxtũ nixĩ. Rũ guma taunecũgu ga Caipá rũ paigũeru nixĩ. ¹⁴ Rũ yema Caipá nixĩ ga ũpaacũ yema Yudiũgũarũ ãëxgacũgũmaã nũxũ ixuxũ ga na namemaẽxũ ga wũxitama ga yatũ guxũma ga Yudiũgũcẽx na yuxũ.

Pedru rũ Ngechuchuxũ nixã*(Mt 26.69-70; Mr 14.66-68; Lc 22.55-57)*

¹⁵ Rũ choma rũ Chimáũ ga Pedru rũ wũxigu Ngechuchuwe tarũxĩ. Rũ yema paigũarũ ãëxgacũ rũ choxũ nacuẽx. Rũ yemacẽx ga choma rũ wũxigu Ngechuchumaã tichocu ga ãëxgacũpataẽxtũwa. ¹⁶ Natũrũ ga Pedru rũ ãëxãrũ dũxëtũgutama narũxãũx. Rũ yemacẽx ichaxũx ga choma, rũ yema ãëxãrũ dauruũ ga ngecũmaã chayarũdexa rũ yexguma Pedruxũ iyamucuchi. ¹⁷ Rũ yexguma ga yema ngecũ ga ãëxãrũ dauruũ, rũ Pedruna ica, rũ ngĩgũrũgũ: —¿Tama ãxna cuma rũ ta wũxi i norũ ngũexũ quĩxũ i ngẽma yatũ i yayauxgũxũ? —ngĩgũrũgũ. Rũ Pedru ngĩxũ nangãxũ, rũ ñanagũrũ: —Tama nixĩ—ñanagũrũ. ¹⁸ Rũ yema ãëxtũwa rũ ãëxgacũarũ duũxũgũ rũ purichĩagũ rũ nanaxũgũ ga wũxi ga ũxũ, yerũ nagãuane. Rũ guma ũxũxetũarũ ngaicamagu nachigũ, rũ yema nũgũ ninaĩxũgũ. Rũ Pedru rũ ta yema nũgũ nanaĩxũ naxëtũwa ga guma ũxũ.

Paigũarũ ãëxgacũ rũ Ngechuchuna naca*(Mt 26.59-66; Mr 14.55-64; Lc 22.66-71)*

¹⁹ Rũ yema paigũarũ ãëxgacũ rũ inanaxũgũ ga Ngechuchuna na naçaxũ, rũ ñanagũrũ: —¿Tacũ nixĩ ga duũxũgũxũ namaã cungũxẽẽxũ? ¿Rũ texégũ tixĩ ya yĩxema curũ ngũexũgũ? —ñanagũrũ. ²⁰ Rũ Ngechuchu ñanagũrũ nũxũ: —Choma rũ guxũ ga duũxũgũpẽxewa nũxũ chixu ga chorũ ore. Rũ ngutaquẽxepataũgũwa rũ tupauca ya taxũnewa i ngextá guxũma i Yudiũgũ ãngutaquẽxegũxũwa chanangũxẽẽ ga duũxũgũ. Rũ yemaãcũ taxuũma ichicux ga chorũ ore. ²¹ —¿Rũ tũxcũũ i choxna cuçaxũ i ñũxmax? Ëcũ, ñnũxna naca i ngẽma duũxũgũ ga nũxũ ñnũxũ ga chorũ ore! Rũ nũmagũ tá cumaã nũxũ nixugũe ga ãacũchigaxũ namaã na chixuxũ. Erũ nũmagũ rũ nũxũ nacuẽxgũ i guxũma ga ãacũ ga namaã nũxũ chixuxũ —ñanagũrũ. ²² Rũ yexguma Ngechuchu yema ñaxgu, rũ wũxi ga tupauca ga taxũneãrũ purichĩa ga naxũtagu chixũ, rũ Ngechuchuchiwegu nidagũ. Rũ ñanagũrũ Ngechuchuxũ: —¿Tũxcũũ ngẽmaãcũ cunangãxũ ya daa paigũarũ ãëxgacũ? —ñanagũrũ. ²³ Rũ Ngechuchu nanangãxũ rũ ñanagũrũ: —Rũ ngẽxguma ãacũ rũ chixexũxũ chixuxgu, irũ nũxũ ixu na ñnũxũ chixri na chidexaxũ! Natũrũ ega chorũ ore rũ aixcũma yixĩgu, rũ ¿tũxcũũ i choxũ quidagũxũ i ñũxmax? —ñanagũrũ. ²⁴ Rũ yexguma ga Aná rũ Ngechuchuxũ yanáĩacũma paigũarũ ãëxgacũ ga Caipãxũtawa nanamu.

Pedru rũ wenaxãrũ tama Ngechuchuxũ nacuẽxnetã*(Mt 26.71-75; Mr 14.69-72; Lc 22.58-62)*

²⁵ Rũ yoxni ga Pedru rũ ũxũarũ ngaicamagu nachiecha, rũ yema nũgũ nanaĩxũãma. Rũ yema yema yexmagũxũ rũ nũxna nacagũe, rũ ñanagũrũgũ: —¿Tama ãxna cuma rũ ta norũ ngũexũ quĩxũ i ngẽma yatũ i yayauxgũxũ? —ñanagũrũgũ. Natũrũ ga Pedru rũ tama nũgũ nixu, rũ ñanagũrũ: —Tama nixĩ —ñanagũrũ. ²⁶ Rũ yema nayexma ga wũxi ga paigũarũ ãëxgacũarũ duũxũ. Rũ

yema rü Pedru ídaechinüxütanüxü nixí. Rü Pedruna naca, rü ñanagürü: — ¿Tama éxna cuma yíixü ga nanetünecüwa Ngechuchumaã cuxü chadauxü? —ñanagürü. ²⁷ Rü Pedru rü wena tama nügü nixu. Rü yexgumatama nica ga otá.

Ngechuchu rü Piratu- pëxewa nayexma
(Mt 27.1-2, 11-14; Mr 15.1-5; Lc 23.1-5)

²⁸ Rü yexguma Ngechuchumaã nüxü nachauegu ga nüxna na nacagüxü, rü Caipápatawa Ínanagaxüchigü rü Yudéaaneärü äëxgacü ga Dumacüãxpatawa nanagagü. Natürü marü ningóonechaü ga yexguma rü yemacëx ga yema Yudíugü rü tama guma äëxgacüpatagu nachocu, yerü norü mugü nüxü nixu rü taxü ga pecadu nixí na wüxi ga Dumacüãxpatagu na nachocuxü ga yema ngunexügu. Rü yemaäcü tama Tupanapëxewa nügü nixüxaarü maxüãxëëgüchaü, yerü yexguma nügü yaxüxaarü maxüãxëëgügu, rü taxucürüwa nanangöxgü ga ðna ga Üpetüchigaarü petacëx namexëëxü. ²⁹ Rü yemacëx ga guma äëxgacü ga Dumacüãx ga Piratu rü napatawa Ínaxüxü ga duüxügümaã na yadexaxüçëx. Rü ñanagürü nüxü: —¿Tacüçëx ípenaxuaxü ya daa yatü? —ñanagürü. ³⁰ Rü nümagü rü Piratuxü nangäxügü, rü ñanagürügü: —Ngëxguma chi tama wüxi i taxü i chixexü naxüxgu, rü tãu chima cuxütawa tanaga —ñanagürügü. ³¹ Rü yexguma ga Piratu rü ñanagürü nüxü: —¿Écü perü äëxgacügüxütawa penaga, rü perü mugü pemaã nüxü ixuxüäcüma penapoxcux! —ñanagürü. Natürü ga yema Yudíugü rü Piratuxü nangäxügü, rü ñanagürügü: —Natürü pema i Dumacüãxgü rü marü toxna penachuxu na texëxü timëxgüxü tumaärü chixexüçëx —ñanagürügü. ³² Rü yemaäcü ningü ga yema ore ga Ngechuchu üpaacü nüxü ixuxü ga ñuxäcü tá na nayuxü. ³³ Rü Piratu rü wenaxärü napatagu naxücu, rü Ngechuchucëx nangema. Rü nüxna naca, rü ñanagürü: —¿Cuma yíixü i Yudíugüarü Äëxgacü quíixü? —ñanagürü. ³⁴ Rü Ngechuchu ñanagürü nüxü: —¿Cuechamatama i nagu curüxínüxü na ngëmaäcü choxna cuçaxü, rü éxna togü marü cumaã nüxü nixu na ngëmaäcü choxna cuçaxüçëx? —ñanagürü. ³⁵ Rü Piratu Ngechuchuxü nangäxü, rü ñanagürü: —¿Éxna cuma nagu curüxínügu rü Yudíu chíixü? Rü ngëma cuchiüñanecüãxgü rü paigüarü äëxgacügütama nixí i chauxütawa cuxü gagüxü. ¿Éxna tacü rü chixexü cuxü? —ñanagürü. ³⁶ Rü yexguma ga Ngechuchu rü nanangäxü, rü ñanagürü: —Choma rü tama ñoma i naãnewa äëxgacü chixí. Rü ngëxguma ñoma i naãnewa äëxgacü chixígu, rü chorü duüxügü rü chi Yudíugüarü äëxgacügümaã nügü nadai rü tãu chima choxü niyaxügü i ngëxguma. Natürü tama ñoma i naãnewa äëxgacü chixí —ñanagürü. ³⁷ Rü yexguma ga Piratu rü ñanagürü nüxü: —¿Éxna to i nachíüñaneärü äëxgacü quixí i cumax? —ñanagürü. Rü Ngechuchu nanangäxü rü ñanagürü: —Cumatama marü nüxü quixu na äëxgacü chíixü. Rü yemacëx ga choma rü chabu rü ñoma ga naãnewa chaxü na duüxügümaã nüxü chayarüxuxüçëx i ore i aixcüma íxíxü. Rü guxãma ya texé ya nüxü cuáxchaüxë i ngëma ore i aixcüma íxíxü, rü choxü itarüxínüë i ngëma ore i nüxü chixuxü —ñanagürü. ³⁸ Rü Piratu rü ñanagürü nüxü: —¿Tacü nixí i ngëma ore i aixcüma íxíxü? —ñanagürü.

Ngechuchumaã nanaxuegu na yamëxgüãxü
(Mt 27.15-31; Mr 15.6-20; Lc 23.13-25)

Rü yemaãcü Ngechuchuna nacaxguwena ga Piratu, rü wenaxârü Yudiügümaã nayarüdexa. Rü ñanagürü nüxü: —Taxuüma i chixexüxü nawa chadau i ñaã yatü. ¿Rü tüxcüü chi inapoxcuxü? ³⁹ —Natürü guxüguma ega Üpetüchigaarü petawa nanguxgu, rü pecüma nixi na choxna naxcex na peçaxü na íchananguxuchixêêxücèx i wüxi i duüxü i poxcuxü. ¿Rü penaxwèxexü na pexcèx íchananguxuchixêêxü i ñaã perü ãëxgacü, Pa Yudiügüx? —ñanagürü. ⁴⁰ Rü yexguma ga guxüma ga yema duüxügü, rü tagaãcü aita naxüe, rü ñanagürügü: —Tama tanaxwèxexü na cuyangéxü —ñanagürügü. Rü yema Barabá rü wüxi ga máetaxü nixi.

19

¹ Rü yexguma ga Piratu rü churagüxü namu na Ngechuchuxü naçuaixgüxücèx. ² Rü yema churagü rü chuchuxüwa nanaxügü ga wüxi ga boxü, rü ñuxüchi naëruwa nayangèxcuchigü. Rü wüxi ga máxü ga naxchiru ga dauxcharaxügu nayacüxêëgü. ³ Rü ñuxüchi naxcèx naxi, rü nüxü nacugüècüma ñanagürügü nüxü: —¡Namaxü, Pa Yudiügüarü ãëxgacü! —ñanagürügü. Rü nanapechiwegü. ⁴ Rü Piratu rü wenaxârü düxétüwa naxü, rü Yudiügüxü ñanagürü: —¡Düxcèx! ñuxma tá nuã pepèxewa chanaga na nüxü pecuáxücèx na taxuüma i chixexüxü nawa chadauxü —ñanagürü. ⁵ Rü düxétüwa naxü ga Ngechuchu. Rü namaã nangèxcueru ga yema boxü ga chuchuxüwa naxügüxü. Rü nagu nicüx ga yema máxü ga naxchiru ga dauxcharaxü. Rü yex-guma ga Piratu rü Yudiügüxü ñanagürü: —Daa nixi ya yima yatü —ñanagürü. ⁶ Natürü yexguma Ngechuchuxü nadaugügu ga paigüarü ãëxgacügü rü purichíagü, rü inanaxügüe ga aita na naxüexü. Rü ñanagürügü: —¡Curuchawa yapota! ¡Curuchawa yapota! —ñanagürügü. Rü Piratu rü ñanagürü nüxü: —¡Ëcü, peyaga rü pematama curuchawa peyapota! Erü choma rü taxuüma i chixexüxü nawa chadau —ñanagürü ga Piratu. ⁷ Natürü ga yema Yudiügü rü Piratuxü nangäxügü, rü ñanagürügü: —Toma toxü nangèxma i wüxi i torü mu. Rü ngèma torü mu toxü nüxü nacüèxèe na namexü na nayuxü i ñaã yatü, yerü núma rü nüxü nixu ga Tupana Nane na yiüxü —ñanagürügü. ⁸ Rü yexguma yemaxü naxinügu ga Piratu, rü yexeraãcü namuü. ⁹ Rü wena Ngechuchumaã napatagu naxücu. Rü yéma Ngechuchuna nayaca, rü ñanagürü: —¿Ngextáçüãx quixi i cumax? —ñanagürü. Natürü ga Ngechuchu rü tama nanangäxü. ¹⁰ Rü yexguma ga Piratu rü Ngechuchuxü ñanagürü: —¿Ëxna ngèma täütáma choxü cungäxü? ¿Tau èxna i nüxü cucuáxü na choxmèxwa cungèmaxü na curuchawa cuxü chipotaxü rü èxna cuxü na íchananguxuchixêêxücèx? —ñanagürü. ¹¹ Rü Ngechuchu nanangäxü, rü ñanagürü: —Täu chima cuxmèxwa changèxma, ega tama Tupana naxwèxegu. Rü ngèmacèx nixi i ngèma duüxügü i cuxna choxü mugüxü rü curü yexera poraãcü napecaduãxgu —ñanagürü. ¹² Rü yemawena rü Piratu nagu narüxinü ga ñuxäcü Ngechuchuxü na ínanguxuchixêêegaxü. Natürü yema Yudiügü rü poraãcü aita naxüe, rü ñanagürügü: —Ngèxguma tá ícananguxuchixêêëxgu rü tama curü ãëxgacü ya tacü ya Dumacüãx ya Chécharuxü cungechaü. Erü ngexerüxe ya ãëxgacü ya tacüxü tügü ingucuchixêëxè, rü Dumacüãx ya ãëxgacü ya tacü ya Chécharuarü uwanü tixi —ñanagürügü. ¹³ Rü yexguma yemaxü naxinügu ga Piratu, rü churagüxü namu ga Ngechuchuxü düxétüwa na nagagüxücèx. Rü nawa nayarüto ga

wüxi ga tochicaũ ga taxũ ga nutagũnaxcèx ga togawa rü Gabatagu äegaxũ. Rũ yema nachicawa nixĩ ga poxcuexũ ga duũxũgũna naçaxũ ga äëxgacũ. ¹⁴ Rũ wüxi ga ngunexũ nataxu ga Üpetũchigaarũ petawa na nanguxũ ga yexguma, rü marũ tocuchiwa nangu. Rũ Piratu rü Yudiũgũxũ ñanagũrũ: —¡Daa nixĩ ya yima perũ äëxgacũ! ñanagũrũ. ¹⁵ Natürũ ga nũmagũ rü aita naxũ, rü ñanagũrũgũ: —Tanaxwèxe na nayuxũ. Rũ ¡curuchawa yapota! —ñanagũrũgũ. Rũ Piratu nũxna naca rü ñanagũrũ nũxũ: —¿Ñuxãcũ i choma rü ichanamu na curuchawa yapotagũãxũcèx ya perũ äëxgacũ? —ñanagũrũ. Natürũ ga paigũarũ äëxgacũgũ rü Piratuxũ nangãxũgũ, rü ñanagũrũgũ: —Yima äëxgacũ ya tacũ ya Chécharu ya Dumawa ngëxmacũ rü yima nixĩ ya torũ äëxgacũ, rü nataxuma i to —ñanagũrũgũ. ¹⁶ Rũ yexguma ga Piratu rü yema Yudiũgũna Ngechuchuxũ namu na curuchawa yapotagũãxũcèx. Rũ nũmagũ rü nayagagũ.

*Curuchawa Ngechuchuxũ nipotagũ
(Mt 27.45-56; Mr 15.33-41; Lc 23.44-49)*

¹⁷ Rũ ñaxũxũ ga Ngechuchu, rü norũ curucha ngĩxũ ininge. Rũ yéma nana-gagũ nawa ga wüxi ga nachica ga “Duũxëêruchinèxãgu” äegaxũ. Rũ yema rü Górguta nixĩ ga naega ga togawa. ¹⁸ Rũ yéma curuchawa Ngechuchuxũ nayarũpotagũ. Rũ Ngechuchurũ curuchawa nayapotagũ ga taxre ga to ga yatũgũ, rü wüxi ga norũ tũgũnecũwawa rü to ga norũ toxwecũwawa. ¹⁹ Rũ Piratu rü churaragũxũ namu na Ngechucharũ curuchatapèxewa na yapocuchigũãxũcèx ga wüxi ga mürapewaxacũ ga äegatachinũxũ ga ñaxũ:

“Ngechuchu ya Nacharétucũãx ya Yudiũgũarũ Äëxgacũ”, ñaxũ. ²⁰ Rũ muxũma ga yema Yudiũgũ nũxũ nadaumatũ ga yema namatũ ga mürapewaxacũgũ üxũ. Yerũ yema nachica ga Ngechuchuxũ curuchawa íyanapotagũxũwa, rü ñãneãrũ ngaicamana nixĩ. Rũ tomaëxpũx ga nagawa naxũmatũ ga yema naega ga yema mürapewawa. Rũ togawa rü Griégugũgawa rü Dumacũãxgũgawa naxũmatũ. ²¹ Rũ yemacèx ga yema Yudiũgũarũ paigũarũ äëxgacũgũ rü Piratuxũ ñanagũrũgũ: —Toma rü tama tanaxwèxe i cunaxũmatũ i “Yudiũgũarũ Äëxgacũ”, ñaxũ. Rũ narũmemaë nixĩ i cunaxũmatũ rü ñacurũgũ:

“Nũgũ ixucũ na Yudiũgũarũ Äëxgacũ yiĩxũ”, ñacurũgũ. ²² Natürũ Piratu nanangãxũ rü ñanagũrũ: —Ngëma chaxũmatũxũ rü marũ ngëxma naxũmatũ —ñanagũrũ. ²³ Rũ curuchawa marũ Ngechuchuxũ yapotagũguwena ga churaragũ, rü nanade ga Ngechuchuru. Rũ yema ägũmũcũ ga churaragũ rü nũgũmaã nayatoye ga naxchiru. Rũ nanayauxgũ ta ga norũ gáxũxchiru ga máxũ. Natürũ taxuwama narũngèixte, yerũ woetama yemaãcũ naxũ. ²⁴ Rũ yemacèx ga yema churaragũ rü nũgũmaã ñanagũrũgũ: —¡Tãütãma nagu tagaugũ! Rũ narũmemaë nixĩ i naxcèx tá naxĩnũcèxwèxegũ rü ngĩxũ tañanagũgũ i wüxi i dïëru na ngëmawa nũxũ icuèxgũxũcèx na texéarũ tá na yiĩxũ —ñanagũrũgũ. Rũ yemaãcũ ningu ga Tupanaãrũ ore ga umatũxũ ga ñaxũ:

“Nũgũmaã nayatoye i chauxchiru, rü naxcèx ngĩxũ tanañanagũgũ i wüxi i dïëru”,

ñaxũ. Rũ aixcũma yemaãcũ nixĩ ga naxũgũãxũ ga churaragũ. ²⁵ Rũ Ngechucharũ curuchapũnewa iyexma ga naë ga María, rü ngiëyèx, rü María ga Creopá naxmèx, rü María ga Magadãcũãx. ²⁶ Rũ yexguma Ngechuchu naëxũ dèuxgu ga yexma chauxũtagu na nachixũ, rü ñanagũrũ ngĩxũ: —Pa Mamax, yima nixĩ ya cune, —ñanagũrũ. ²⁷ Rũ yemawena, rü ñanagũrũ choxũ:

—Ngêma iyixĩ i cue —ñanagürü. Rũ yexgumamama rũ chopatawa ngĩxũ chayaxu. Rũ chauxũtawa iyexmaêcha.

Nayu ga Ngechuchu

²⁸ Rũ Ngechuchu nüxũ nacuèx ga marũ na yanguxũ ga guxũma ga norũ puracũ ga ñoma ga nañewa. Rũ yema Tupanaärũ ore ga ñmatũxũ na yanguxêèxũcèx, rũ ñanagürü: —Chĩtawa —ñanagürü. ²⁹ Rũ yéma iyexma ga wũxi ga tũxũxácũ ga binu ga marũ üxchiücümaã äâcuxcü. Rũ wũxi ga tũèxmũ guma binumaã niwaixêègũ, rũ wũxi ga dexnemenèxãwa nayanèix. Rũ yemamaã nañxgu nanawèxgũ. ³⁰ Rũ Ngechuchu nayaxaxũ ga guma binu ga üxchiücü rũ ñanagürü: —Marũ ningu i guxũma i chorũ puracũ —ñanagürü. Rũ ñuxũchi inayarũmaxãchieru, rũ nayu.

Wũxi ga churara rũ wocaxemaã Ngechuchuxũ nacanapacütũxũ

³¹ Natürũ ga yema Yudĩugüarũ äèxgacügũ rũ tama nanaxwèxegũ ga curuchagüwa na nayexmagũxũ ga yema naxũnegũ. Yerũ moxũácũ rũ ngũxchigaarũ ngunexũ nixĩ. Rũ yema Yudĩugücèx rũ yema nixĩ ga guxũ ga ngũxchigaarũ ngunexũärũ yexera ga üünexũ, yerũ norũ peta ga Üpetũchigaarũ ügũ nixĩ. Rũ yemacèx Piratuna naxcèx nacagũ na churaragũ yéma namugũxũcèx na yapoyeparagũäxũcèx na paxa nayuxècèx ga yema curuchawa ipotagũxũ, rũ paxa na nadeäxũcèx ga curuchawa naxũpa ga ngũxchigaarũ ngunexũ. ³² Rũ yéma naxĩ ga churaragũ rũ inanapoeparagũ ga yema taxre ga yatügũ ga Ngechuchumaã yéma curuchawa ipotagũxũ. ³³ Rũ Ngechuchucèx naxĩ ga churaragũ, natürũ nüxũ nadaugũ ga marũ na nayuxũ. Rũ yemacèx tama nayapoyeparagũ. ³⁴ Natürũ wũxi ga churara rũ Ngechuchuxũ nacanapacütũxũ. Rũ yexgumatama inayèxũchi ga nagũ rũ dexá. ³⁵ Rũ choma i Cuáũ rũ nüxũ chadau i guxũma ga ñaã pemaã nüxũ chixuxũ. Rũ aixcüma nixĩ i ñaã chorũ ore. Rũ chomatama nüxũ chacuèx i aixcüma na yĩxũ, rũ pemaã nüxũ chixu na pema rũ ta peyaxögũxũcèx. ³⁶ Rũ yema nangupetũ na yanguxũcèx i Tupanaärũ ore i ñmatũxũ i ñaxũ: “Rũ taxũnetama ya naxchinèxã nipoyegũ”, ñaxũ. ³⁷ Rũ toxnamana i Tupanaärũ ore i ñmatũxũtwa rũ ñanagürü: “Tá nüxũ narũdaunũ ya yima nacanapacütũxũgũäcü”, ñanagürü.

Ngechuchuxũ inatèxgũ

(Mt 27.57-61; Mr 15.42-47; Lc 23.50-56)

³⁸ Rũ nayexma ga wũxi ga yatũ ga Arimatéacũäx ga Yúchegu äegacũ. Rũ nüma rũ ta Ngechuchuaxũ nayaxõ, natürũ cuäcü nayaxõ yerũ natanũxũ ga Yudĩugüarũ äèxgacügũxũ namuũ. Rũ guma nixĩ ga Piratuna yaçacũ na nayauxãxũcèx ga Ngechuchuxũne. Rũ Piratu rũ: —Ngũ, —ñanagürü. Rũ yexguma ga Yúche rũ yéma naxũ ga curuchawa íyapotaxũtwa, rũ curuchawa nayayaxu ga naxũne ga Ngechuchu. ³⁹ Rũ yéma nangu ga Nicodému ga üpaacũ chütacũ Ngechuchuxũtagu naxũãnecũ. Rũ yéma nanange ga 30 kilo naguxũ ga pumara ga yixichixũ na Ngechuchuxũ namaã nachaxũnegũxũcèx. ⁴⁰ Rũ yemaäcü ga Yúche rũ Nicodému rũ curuchawa nanayauxgũ ga naxũne ga Ngechuchu. Rũ naxchiru ga marũ pumaracharaxũmaã nayanáixpũxũgũ. Yerũ yema nixĩ ga tocüma ga toma ga Yudĩugũ ga yexguma wũxi ga yueta tũxũ itatèxgũgu. ⁴¹ Rũ yema nachica ga Ngechuchu curuchawa ípotaxũtwa nayexma ga wũxi ga nanetüncü. Rũ yema nanetüncüwa nayexma ga wũxi ga naxmaxũ ga yexwacaxũxũ ga taguma texèxũ nagu natèxgũxũ. ⁴² Rũ yema

naxmaxŭgu nayaxŭcuchigŭ ga Ngechuchuxŭne yerŭ nangaicama, rŭ paxa tã ningune ga ngŭxchigaarŭ ngunexŭcèx.

20

Ínarŭda ga Ngechuchu

(Mt 28.1-10; Mr 16.1-8; Lc 24.1-12)

¹ Rŭ yŭxŭarŭ pèxmamaxŭchi ga tauta meã yangóonegu, rŭ María ga Magadãçŭax rŭ Ngechuchuxŭ ÿaxŭcuchigŭxŭwa ixŭ. Rŭ nŭxŭ idau ga guma nuta ga Ngechuchumaxŭ namaã rŭngŭxtaŭcŭ, rŭ marŭ na ínaxŭgachixŭ.

² Rŭ yexgumatama íiñaãchi, rŭ yema choma rŭ Chimãu ga Pedrumaã ítayexmagŭxŭwa íña. Rŭ ngŭgŭrŭgŭ toxŭ: —Rŭ marŭ nanayauxgŭ ya Cori ya Ngechuchu i naxmaxŭwa. Rŭ tama nŭxŭ tacuèx na ngexta na naxŭgŭãxŭ —ngŭgŭrŭgŭ. ³ Rŭ yexguma ga choma rŭ Pedru rŭ Ngechuchuxŭ ÿaxŭcuchigŭxŭwa taxŭ. ⁴ Rŭ wŭxigu itaxŭãchi ga tomãx, natŭrŭ ga choma rŭ poraãcŭ Pedruarŭ yexera ichañaãchi. Rŭ chaxira Ngechuchuxŭ ÿaxŭcuchixŭwa changu. ⁵ Rŭ ichayarŭmaxãchi na nagu chidaucuchixŭcèx. Rŭ nŭxŭ chadau ga naxchiru ga namaã yanãxpŭxŭgŭãxŭ ga yexma na naxŭxŭ. Natŭrŭ tama aixepegu chaxŭcu. ⁶ Rŭ choweama ínangu ga Chimãu ga Pedru. Rŭ nŭma rŭ yema naxmaxŭgu naxŭcu. Rŭ nŭma rŭ ta nŭxŭ nadau ga yema naxchiru ga namaã yanãxpŭxŭchirèxŭ. ⁷ Rŭ nŭxŭ nadau ta ga naxchiru ga namaã yanèxpŭrŭgŭãxŭ ga meãma dixcumŭxŭ ga nŭxpŭguma ŭxŭ. Rŭ tama wŭxigu namaã nanu ga yema naxchiru ga namaã yanãxpŭxŭgŭãxŭ.

⁸ Rŭ yexguma ga choma ga chaxiraxŭchi yema na changuxŭ, rŭ choma rŭ ta chixŭcu. Rŭ nŭxŭ chadau ga guxŭma, rŭ chayaxŭ ga Ngechuchu rŭ marŭ wena na namaxŭxŭ. ⁹ Yerŭ noxri rŭ tama nŭxŭ tacuèxgŭéga ga yema Tupanaãrŭ ore ga ŭmatŭxŭ ga ñaxŭ:

“Cristu rŭ tá wena namaxŭ”, ñaxŭ. ¹⁰ Rŭ yexguma ga toma rŭ tochiŭcèx tawoegu.

Ngechuchu rŭ ngŭxcèx nangox ga María ga Magadãçŭax

(Mt 16.9-11)

¹¹ Natŭrŭ ga María rŭ yexma irŭxãŭx naxŭtagu ga Ngechuchumaxŭ. Rŭ yema íxaxu. Rŭ naxauxãcuma iyarŭmaxãchi, rŭ nagu iyadaucuchi ga naxmaxŭ. ¹² Rŭ nŭxŭ idau ga taxre ga daxŭcŭãx ga Tupanaãrŭ orearŭ ngerŭgŭ ga ícómŭchiruxŭ. Rŭ Ngechuchuxŭne íxŭchirèxŭwa narŭtogŭ, rŭ wŭxi ga Ngechuchueru íxŭxŭwaama rŭ to ga nacŭtawaama. ¹³ Rŭ yema daxŭcŭãx ga duŭxŭgŭ rŭ ngŭxna nacagŭe, rŭ ñanagŭrŭgŭ: —Pa Ngecŭx, çtacŭcèx cuxaxu? —ñanagŭrŭgŭ. Rŭ ngŭma rŭ inangãxŭ, rŭ ngŭgŭrŭgŭ: —Chaxaxu erŭ nayangegŭ i naxŭne ya chorŭ Cori, rŭ tama nŭxŭ chacuèx na ngexta naxŭgŭãxŭ —ngŭgŭrŭgŭ. ¹⁴ Rŭ yexgumatama yema ngŭxgu, rŭ ngŭgŭweama idau. Rŭ nŭxŭ idau ga Ngechuchu ga ngŭxŭtawana na yayexmaxŭ. Natŭrŭ tama nŭxŭ icuèx ga Ngechuchu na yŭixŭ ga guma. ¹⁵ Rŭ yexguma ga Ngechuchu rŭ ngŭxna naca, rŭ ñanagŭrŭ: —Pa Ngecŭx, çtacŭcèx cuxaxu? çRŭ texècèx nixŭ i cudauxŭ? —ñanagŭrŭ. Rŭ ngŭma nŭxŭ nacuèxgu rŭ yema nixŭ ga yema nanetŭnecŭarŭ dauruŭ. Rŭ yemacèx ngŭgŭrŭgŭ nŭxŭ: —Pa Corix, ega cuma cuyangexgu i naxŭne ya Ngechuchu, rŭ çchomaã nŭxŭ íxu na ngexta na cunaxŭxŭ na choma chayayaxuxŭcèx! —ngŭgŭrŭgŭ. ¹⁶ Rŭ yexguma ga Ngechuchu rŭ ñanagŭrŭ ngŭxŭ: —Pa Maríax —ñanagŭrŭ. Rŭ ngŭma rŭ naxcèx idaueguãchi, rŭ togawa ngŭgŭrŭgŭ nŭxŭ: —Pa Rabunix —ngŭgŭrŭgŭ. Rŭ ngèma rŭ “Pa Ngŭxèèruŭx”, ñaxŭchiga nixŭ. ¹⁷ Rŭ Ngechuchu

rü ñanagürü ngĩxũ: —¡Tãxũ i choxũ quingögũxũ, erü tauta Chaunatũxũtawaxũ! ¡Natürü ngema chaueneëgũtanũwaxũ rü namaã nüxũ yarũxu na choma rü tá Chaunatũ ya chorũ Tupana ya Penatũ ya perũ Tupanaxũtawaxũ! —ñanagürü. ¹⁸ Rü yexguma ga María ga Magadácũãx rü tomaã nüxũ iyarũxu ga marũ nüxũ na nadauxũ ga Cori ga Ngechuchũ. Rü ñũxũchĩ tomaã nüxũ iyaxu ga yema ore ga Ngechuchũ ngĩmaã nüxũ ixuxũ.

Norü ngũexũgũcèx nangox ga Ngechuchũ
(Mt 28.16-20; Mr 16.14-18; Lc 24.36-49)

¹⁹ Rü yema yũxũarũ ngunexũärũ chũtacũ, rü tangutaquẽxegũ ga toma ga Ngechuchuarũ ngũexũgũ. Rü togũ tarũwãtaũgũ, yerũ yema Yudiugũarũ ãẽxgacũgũxũ tamuñẽ. Rü Ngechuchũ rü ngürũãchĩ yẽma nangox, rü torũ ngãxũtanũgũ nachĩ. Rü toxũ narũmoxẽ, rü ñanagürü: —¡Petaãẽgũ! —ñanagürü. ²⁰ Rü yema ñaxuwena rü toxũ nügũ nawẽmẽx, rü nügũ inawẽpacũtũxũ. Rü tomagũ ga norũ ngũexũgũ rü tataãẽgũ, yerũ nüxũ tadaugũ ga guma torũ Cori. ²¹ Rü yexguma rü wenaxãrũ ñanagürü toxũ: —¡Petaãẽgũ! Rü yema Chaunatũ núma choxũ na muxũrũ tãtama nixĩ i pexũ chamuxũ i chomax —ñanagürü. ²² Rü yexguma rü toẽtũ “cue” ñanagürü ga Ngechuchũ. Rü ñũxũchĩ ñanagürü toxũ: —¡Penayauxgũ i Tupanaãe i Üünexũ! ²³ Rü ngẽxguma duũxũgũ nüxũ rũxoegu i norũ pecadugũ, rü pema rü pexũ nangẽxma i pora na namaã nüxũ pixuxũ na Tupana marũ nüxũ nüxũ rũngũmaxũ i norũ pecadugũ. Natürü ngẽxguma duũxũgũ tama nüxũ rũxoegu i norũ pecadugũ, rü pema rü pexũ nangẽxma i pora na namaã nüxũ pixuxũ na marũ ngẽma norũ pecadugũwatama nangẽxmagũxũ —ñanagürü ga Ngechuchũ.

Tumachi nüxũ nadau ga Cori ga wena maxũcũ

²⁴ Natürü totanũxũ ga Tumachi ga Wũxigu Buexũmaã taxugũxũ, rü tama totanũwaxũ nayexma ga yexguma Ngechuchũ toxcèx ngoxgu. ²⁵ Rü yĩxcama ga toma rü Tumachĩmaã nüxũ tixugũe, rü ñatarũgũgũ: —Marũ nüxũ tadau ya torũ Cori ya Ngechuchũ —ñatarũgũgũ. Natürü ga Tumachi rü toxũ nangãxũ rü ñanagürü: —Ngẽxguma tama nüxũ chadẽuxgu i norũ itapuamaxũ i naxmẽxwaxũ rü tama nüxũ chĩngögũgũ i ngẽma itapuamaxũ rü ngẽma norũ cana-pacũtũxũ, rü tãũtãma chayaxõ i ngẽma ore i chomaã nüxũ pixuxũ —ñanagürü. ²⁶ Rü 8 ga ngunexũguwena rü wenaxãrũ tangutaquẽxegũ ga toma ga wũxi ga İpatawa. Rü totanũwaxũ nayexma ga Tumachi ga yexguma. Rü woo ga na nawãxtaxũ ga ããx, rü ngürũãchĩ yẽma nangox ga Ngechuchũ, rü torũ ngãxũtanũgũ nachĩ. Rü toxũ narũmoxẽ, rü ñanagürü: —¡Petaãẽgũ! —ñanagürü. ²⁷ Rü yexguma Tumachixũ ñanagürü ga Ngechuchũ: —¡Nũxũ ingögũ i ñãã chorũ itapuamaxũ i choxmẽxwaxũ ngẽxmaxũ, rü nüxũ nadau ya daa choxmẽx! ¡Rü nuxa chorũ canapacũtũxũgũ ingögũ! ¡Rü nüxũ rũxo na tama cuyaxõxũ! ¡Rü meãma yaxõ i ñũxmax! —ñanagürü. ²⁸ Rü yexguma ga Tumachi rü Ngechuchuxũ nangãxũ, rü ñanagürü: —Pa Chorũ Corix, cuma nixĩ i chorũ Tupana quiĩxũ —ñanagürü. ²⁹ Rü Ngechuchũ rü ñanagürü nüxũ: —Pa Tumachix, cuma cuyaxõ i ñũxma erũ choxũ cudau. Natürü tataãẽgũ ya yĩxema tama choxũ daugũãcũma yaxõgũxẽ —ñanagürü.

Tacũcèx naxũmatũ i ñãã popera

³⁰ Rü Ngechuchũ rü topẽxewaxũ nanaxũ ga muxũma ga to ga mexũgũ ga cuẽxruũgũ i tama ñãã poperagu ùmatũxũ. ³¹ Natürü guxũma i ñãã poperagu ùmatũxũ, rü naxũmatũ na peyaxõgũxũcèx na Ngechuchũ rü Cristu ya Tupana

Nane na yĩxũ. Rũ ngẽxguma nũxũ peyaxõgũgu rũ tá pexũ nangẽxma i maxũ i taguma gũxũ.

21

Ngechuchu rũ 7 ga norũ ngũxũgũcèx nangõx

¹ Rũ yemawena ga Ngechuchu rũ wenaxãrũ toxcèx nangõx naxtaxa ga Gariréaanacũwa. Rũ Tibéria nixĩ ga to ga naega. Rũ ñããcũ nixĩ ga toxcèx nangõxũ. ² Rũ wũxiwa tayexmagũ ga choma rũ Chaũtiãgu ga Zebedeu nanegũ rũ Chimãu ga Pedru, rũ Tumachi ga Wũxigu Buexũmaã taxugũxũ, rũ Natanae ga Gariréaanegune ga ñãne ga Canãcũãx, rũ to ga taxre ga tomũcũgũ ga Ngechuchuarũ ngũxũgũ. ³ Rũ Chimãu ga Pedru rũ ñanagũrũ toxũ: — Tá chayapũchae —ñanagũrũ. Rũ yexguma ga toma rũ tanangãxũgũ, rũ ñatarũgũgũ nũxũ: —Toma rũ tá ta cuwe tarũxĩ —ñatarũgũgũ. Rũ yéma taxĩ, rũ wũxi ga ngegu tichoũ. Natũrũ yema chũtaxũgu rũ taxuũma ga choxni tiyaxugũ. ⁴ Rũ yexguma noxri yangõonegu rũ Ngechuchu toxcèx nangõx ga naxtaxaanacũwa. Natũrũ ga toma rũ tama nũxũ tacuèxgũ ga Ngechuchu na yĩxũ. ⁵ Rũ yexguma ga Ngechuchu rũ toxna naca, rũ ñanagũrũ toxũ: —Pa Ngextũxũcũgũx, zẽxna taxuũma i choxni piyaxugũ? —ñanagũrũ. Rũ toma rũ tanangãxũgũ rũ ñatarũgũgũ: —Taxuũma —ñatarũgũgũ. ⁶ Rũ yexguma ga Ngechuchu rũ ñanagũrũ toxũ: —jPeweũãrũ tũgũnecũwawaama penatãe i perũ pũcha! rũ tá ipenayauxũ i choxni —ñanagũrũ. Rũ yémaãma tanatãegũ ga torũ pũcha, rũ taxucũrũwa ítanatũãchigũ, yerũ muxũchixũ ga choxni tiyaxugũ. ⁷ Rũ yexguma ga choma rũ Pedruxũ ñacharũgũ: —Yima nixĩ ya Cori ya Ngechuchu —ñacharũgũ. Rũ yexguma yemaxũ naxĩnũgu ga Pedru ga guma na yĩxũ ga Cori, rũ nicũxcuchi ga naxchiru yerũ noxri rũ ínacũxuchichirẽx. Rũ natũchiũwa nayuxu, rũ naxãnacũwa naxcèx nawẽxẽ. ⁸ Rũ toma ga natanũxũ rũ nguemaãtama naxãnacũwa taxãgũ. Rũ yéma tanatũgũ ga yema pũcha ga choxnimaã ããcuxũ yerũ 100 metruxicatama nataxu ga na naxãnacũwa na tangugũxũ. ⁹ Rũ yexguma nguewa ítachoũgu rũ yéma nũxũ tadau ga wũxi ga ùxũ, rũ naxẽtũgu naxũ ga wũxi ga choxni. Rũ yéma nayexma ta ga wũxi ga pãũ. ¹⁰ Rũ Ngechuchu rũ ñanagũrũ toxũ: —jNuãta penge i ñuxre i ngẽma choxni i ípeyaxũxũ! —ñanagũrũ. ¹¹ Rũ Chimãu ga Pedru rũ ngegu nixũe. Rũ yema pũchamaã naxnũcũgu ínanatũãchiwetaũ ga choxni ga ínayauxũxũ. Rũ 153 ga choxni ga itaxũ nayexma nawa ga yema pũcha. Rũ woo ga na namuxũchixũ, rũ tama narũgãu ga pũcha. ¹² Rũ yexguma ga Ngechuchu rũ ñanagũrũ toxũ: —jNuã pexĩ rũ peyachibũe! —ñanagũrũ. Rũ taxũema ga toma rũ nũxna tacaxchaũ na texẽ yĩxũ ga nũmax, yerũ marũ nũxũ tacuèxgũ ga guma na yĩxũ ga Cori ga Ngechuchu. ¹³ Rũ yexguma ga Ngechuchu rũ yéma toxũtawa naxũ. Rũ nanayaxu ga pãũ rũ wũxichigũ toxna nanaxã. Rũ yexgumarũtũ ta ga choxni rũ toxna nanaxã. ¹⁴ Rũ yema nixĩ ga norũ tomaẽxpũxcũna ga toxcèx na nangõxũ ga Ngechuchu ga yuwa ínadaxguwena.

Ngechuchu rũ Pedrumã nidxa

¹⁵ Rũ yexguma chibũewa tingugũguwena rũ Ngechuchu rũ Chimãu ga Pedruna naca, rũ ñanagũrũ: —Pa Chimãu Pa Cuãũ Nanex, zãixcũma choxũ cungechaũxũ i ñãã cumũcũgũxũ na cungechaũxũãrũ yexera? —ñanagũrũ. Rũ Pedru nanangãxũ, rũ ñanagũrũ: —Ngũ, Pa Corix, cuma nũxũ cucuèx

na cuxũ changechaũxũ —ñanagũrũ. Rũ Ngechuchu rũ ñanagũrũ nũxũ: — ¡Nachibũexẽẽ i chorũ duũxũgũ! —ñanagũrũ. ¹⁶ Rũ wenaxãrũ Pedruna naca, rũ ñanagũrũ: —Pa Chimãu Pa Yonã Nanex, ¿aixcũma i choxũ cungechaũxũ? —ñanagũrũ. Rũ Pedru nanangãxũ, rũ ñanagũrũ: —Ngũ, Pa Corix, cuma nũxũ cucuèx na cuxũ changechaũxũ —ñanagũrũ. Rũ Ngechuchu rũ ñanagũrũ nũxũ: —Ëcũ, ¡nũxna nadau i chorũ duũxũgũ! —ñanagũrũ. ¹⁷ Rũ norũ tomaẽxpũxcũna wena Pedruna naca, rũ ñanagũrũ: —Pa Chimãu Pa Yonã Nanex, ¿aixcũmaxũchi yĩxũ i choxũ cungechaũxũ? —ñanagũrũ. Rũ yexguma ga Pedru rũ dũxwa nangechaũ, yerũ norũ tomaẽxpũxcũna Ngechuchu nũxna naca ngoxĩ aixcũma nũxũ nangechaũ. Rũ ñanagũrũ ga Pedru: —Pa Corix, cuma nũxũ cucuèx i guxũma. Rũ cuma nũxũ cucuèx na aixcũmaxũchi cuxũ changechaũxũ —ñanagũrũ. Rũ Ngechuchu ñanagũrũ nũxũ: —Ëcũ ¡nachibũexẽẽ i chorũ duũxũgũ! ¹⁸—Rũ aixcũma cumaã nũxũ chixu rũ yexguma cungextũxũgu rũ cugũ quicuxcuchi ga na ngextã cuma ¡cunaxwèxewã cuxũxcèx. Natũrũ ngẽxguma yaguãx quixĩgu rũ tá quixuuchichacũũ na togue cuxũ icuxcuchixũcèx. Rũ ngẽma tama cuma ¡cunaxwèxewã tá cuxũ nagagũ —ñanagũrũ. ¹⁹ Rũ Ngechuchu rũ yema ñanagũrũ na nũxũ nũxũ nacuexẽẽxũcèx ga ñuxãcũ tá na nayuxũ ga Pedru na yemaãcũ Tupanaxũ nataxẽẽxũcèx. Rũ yemawena ga Ngechuchu rũ ñanagũrũ nũxũ: —¡Chowe rũxũ! —ñanagũrũ.

Yema ngũxũ ga Ngechuchu porãcũ nũxũ ngechaũxũchiga

²⁰ Rũ yexguma nũgũweama nadẽuxgu ga Pedru rũ choxũ nadau ga naweama na ne chaxũxũ. Rũ chomachirẽx nixĩ ga chibũwa Ngechuchucũwawa charũtoxũ rũ nũxna chaçaxũ rũ ñachaxũ:

“Pa Corix, ¿texẽ tá tixĩ ya yĩxema bexma cuechita cuxũ ¡xuaxũxẽ?” ñachaxũ.

²¹ Rũ yexguma Pedru choxũ dẽuxgu rũ Ngechuchuna naca, rũ ñanagũrũ: —Pa Corix, ¿ñaã Cuãũ rũ tacũ tá nũxũ ùpetũxũ? —ñanagũrũ. ²² Rũ Ngechuchu nanangãxũ, rũ ñanagũrũ nũxũ: —Ngẽxguma choma chanaxwèxegu rũ chanamaxẽẽ ñuxmatãta wena núma chaxũ. ¿Rũ tũxcũxũ i nagu curũxĩnũxũ i ngema? Rũ cuma ¡rũ chowe rũxũ! —ñanagũrũ. ²³ Rũ yexguma yema chomũcũgũ nũxũ ¡nũẽgu ga yema chauchiga, rũ nagu narũxĩnũe na taxũtãma chayuxũ. Natũrũ Ngechuchu rũ tama nũxũ nixu ga tãxũtãma na chayuxũ. Natũrũ ñanagũrũmare:

“Ngẽxguma choma chanaxwèxegu rũ chanamaxẽẽ ñuxmatãta wena núma chaxũ. ¿Rũ tũxcũxũ i nagu curũxĩnũxũ i ngẽma?”, ñanagũrũmare. ²⁴ Rũ chomatama nixĩ ga nũxũ chadauxũ i guxũma i ñãã pemaã nũxũ chixuxũ, rũ chomatama nixĩ i pexcèx chanaxũmatũxũ i ñãã ore. Rũ guxãma i toma rũ nũxũ tacuèx na aixcũma na yĩxũ i ñãã pemaã nũxũ chixuxũ. ²⁵ Rũ nayexma ga to ga muxũchixũma ga tacũ ga Ngechuchu ùxũ. Rũ ngẽxguma chĩ naxũmatũgu i guxũma ga yema naxũxũchiga, rũ nagu charũxĩnũgu rũ tãũ chima ñoma i naãnegu name i ngẽma poperagũ i nachiga ùmatũxũ.

NGECHUCHUARÜ NGÜEXÜGÜ GA YAMUGÜXÜÄRÜ PURACÜCHIGA

Tupana inaxuneta rü tá ínangu i Naãe i Üünexü

¹⁻² Pa Mecü Pa Teóquirux, nüxíra chaxümatüxü ga poperawa cumaã nüxü chixu ga guxüma ga Ngechuchu üxü rü duüxügüxü namaã nangüexëëxü ga noxritama inaxügüägu ga norü puracü ñuxmata yema ngunexü ga Tupana daxügüxü ga naãnewa nagaxgu. Rü yexguma tauta daxügüxü ga naãnewa naxüxgu ga Ngechuchu rü nayadexechi ga norü ngüexügü ga yamugüchaüxü na Tupanaärü puracü naxügüxüçex. Rü Tupanaãe i Üünexüärü poramaã nanangüexëë ga yema duüxügü, rü namaã nüxü nixu ga tacü tá na naxüexü. ³ Rü yexguma marü yuwa inadxeguwena ga nüma ga Ngechuchu rü 40 ga ngunexügu rü nügü nangoxëëxü naxcëx ga norü ngüexügü rü muxüma ga togü ga nüxü yaxögüxü na yemaãcü nüxü nacüexgüxüçex na aixcüma wena namaxüxü. Rü namaã nüxü nixuchiga na ñuxäcü na yixüxü i Tupana äëxgacü íyixüwä. ⁴ Rü yexguma yema ngüexügü ga yamugüxütanüwa nayexmagu ga Ngechuchu, rü namaã nüxü nixu ga tama nüxna na ngextá naxüxüçex ga Yerucharéü. Rü ñanagürü nüxü: —Ípenangüxëëx i ngëma Tupanaãe i Üünexü ga Chaunatü pemaã ixunetaxü ga pemaã nüxü chixuchigaxü! ⁵ Aixcüma nixü ga Cuáü rü dexáwa duüxügüxü inabaiüxëëxü, natürü i pema rü täütäma muxü i ngunexü nangupetü na Tupanaãe i Üünexü tá pexna nguxü —ñanagürü.

Daxügüxü ga naãnewa naxü ga Ngechuchu

⁶ Rü yexguma nangutaquëxegüga ga yema norü duüxügü, rü Ngechuchuna nacagü, rü ñanagürügü: —Pa Corix, çéxna ñoma tá nixü i ngunexü i marü ícunawoxü i nuã Yudiügüchiüãnewa i torü uwanügüarü churragü na wenaxärü tomatama namaã itacuáxüçex i ñaã tochiüãne? —ñanagürügü. ⁷ Rü Ngechuchu nanangäxü, rü ñanagürü: —Pema rü taxucëxma nüxü pecuáxchaü i ñuxgu tá nixü i ngëma ngunexü, erü Chaunatüxicatama nüxü nangëxma i pora na nüxü naxunetaxü i ngëma ngunexü i choxna naxcëx peçaxü. ⁸ Natürü ngëxguma pexna nanguxgu i Tupanaãe i Üünexü, rü tá pexü naporaexëë. Rü tá ípechoxü na nüxü peyarüxügüxüçex i chauchiga i Yerucharéüwa, rü guxüma i Yudéaanewa, rü Chamáriaanewa, rü ñuxmatáta guxü i naãnewa nangu —ñanagürü. ⁹ Rü yexguma yema ñaxguwena rü nüxü ínadaunüyane ga norü ngüexügü, rü Tupana rü daxügüxü ga naãnewa Ngechuchuxü naga. Rü wüxi ga caixanexügu nayaxücu, rü yemaãcü tama wenaxärü nüxü nadaugü. ¹⁰ Rü yexguma Ngechuchuxü ínadaunüyane ga daxüwa na naxüxü, rü ngürüächí natanüwa nangox ga taxre ga yatü ga ícómüchiruxü. ¹¹ Rü ñanagürügü nüxü: —Pa Yatügü i Gariréaanecüãx, çtüxücüü daxügu íperüdaunü? Erü daatama Ngechuchu ga petanüwa yexmacü rü ñuxma Tupana daxüwa nagacü, rü ngëma ñuxma nüxü na pedauxü na ñuxäcü daxüwa naxüxü, rü ngëmaãcü tátama nixü i wena nüma naxüxü —ñanagürügü.

Yudachicüü nanayauxgü ga Matía

¹² Rü yema ngüexügü ga Ngechuchu imugüxü na Tupanaärü puracü naxügüxüçex, rü nüxna ínixü ga guma mëxpüne ga Oríbunecügu äegane. Rü

Yerucharéúçex nawoegu. Rû guma ïanearû yaxû nüxna ga guma mèxpúne rû wüxi ga kilómetru nixî. ¹³ Rû yexguma Yerucharéúârû ïanewa nangugûgu, rû nagu nachocu ga guma ï ga nagu napegüne. Rû dauxna naxîgû naxçèx ga yema ucapu ga taxû ga nagu napegüxû. Rû nümagû nixî ga Pedru, rû Cuáû, rû Chaútiágu, rû Aúdré, rû Piripi, rû Tumachi, rû Baturumé, rû Mateu, rû Chaútiágu ga Arupéu nane, rû Chimáú ga Iporaáèçüüçü, rû Yuda ga Chaútiágu naèneê. ¹⁴ Rû guxûma ga nümagû rû guxûguma nangutaquèxegüxû na wüxigu nayumüxègüxüçèx namaã ga Ngechuchueneègü, rû ngîmaã ga María ga Ngechuchu naè, rû ñuxre ga togû ga ngèxügü. ¹⁵ Rû guxûma ga yema ngunexügügu rû nangutaquèxegüxû ga yema yaxôgüxû. Rû 120 nixî. Rû wüxi ga ngunexügu ga Pedru rû inachi ga norû ngâxûtanüwa, rû ñanagürü: ¹⁶—Pa Chomüçügüx, marû ningu ga yema Tupanaãe i Üünexû nuxçuma Dabíxû muxû na naxümatüãxüçèx nachiga ga Yuda ga namaãrû cuèxruû ixîxû naxçèx ga yema duûxügü ga Ngechuchuxû iyaxügüxû. ¹⁷—Rû tatanüxüchirèx nixî ga Yuda, rû nüma rû ta taxrûû ñaã Tupanaãrû puracüwa napuracü ga noxrix. ¹⁸—Natürü nüma ga Yuda rû bexma Ngechuchuxû ïnaxuaxû. Rû yemacèx ga àèxgacügü rû nüxû nanaxütanü. Natürü yixcama ga Yuda rû naxçèx ïnicuèx ga yema chixexû ga naxüxû, rû yemacèx nanaæaguxèè ga yema díeru. Rû yemawena rû nügü nawèxnaxâ rû naítanüwa nügü narütáe. Rû yexguma duûxügü nadaexügügu rû inanago, rû niwãixpütüwe rû ïnayixû ga naúnüta. Rû yema díeru ga nataeguxèèxümaã ga àèxgacügü rû naxçèx nataxe ga wüxi ga naãne. ¹⁹—Rû nüxû nacuáçhigagü ga guxûma ga Yerucharéúçâx, rû yemacèx Achédamagu nanaxüéga ga yema naãne. Rû ngèma nixî i “Nagüchitaû” ñaxüchiga. ²⁰—Rû Wiyaegüarû poperawa yemachiga nanaxümatü ga Dabí, rû ñanagürü: “Yixrûma rû ngèma natá ya napata, rû taxüema nagu pe”, ñanagürü. Rû toxnamana i ngèma poperawa rû ñanagürü ta: “Rû name nixî na togue naxüxû i ngèma norû puracü”, ñanagürü. ²¹⁻²²—Rû nuã tatanüwa nangèxmagü i ñuxre i yatügü ga guxûguma tüxû ümüçügüxû ga yexguma tatanüwa nanuxmagu ga Cori ga Ngechuchu. Rû nümagü rû tawe narüxî ga noxritama Cuáû Ngechuchuxû ïbaixèègu rû ñuxmata yema ngunexû ga daxügüxû ga naãnewa naxüxgu. Rû name nixî i ngèmatanüwa na nayaxuxû i wüxi i Yudachicüüxû na tamüçü yîxüçèx rû tarüû nüxû yaxuxüçèx i ñuxäçü wena na namaxüxû ya Ngechuchu. ²³ Rû yemawena rû nüxû naxunetagü ga taxre ga yatügü. Rû wüxi nixî ga Yúche ga Yuchugu àegaxû ga Bachabámaã naxugüxû. Rû Matía nixî ga to. ²⁴⁻²⁵ Rû ñaãçü nayumüxègü: —Pa Corix, cuma nüxû cucuèx i guxûma i duûxügüarü maxû. ¡Rû ñuxma rû toxû nawèx i ngèxürüüxû i cuçcèx mexû i ñaã taxrewa na cunamuxüçèx rû nüma na naxüãxüçèx i ñaã puracü ga Yuda itáxû ga yexguma norû poxcuwa naxüxgu! —ñanagürügü. ²⁶ Rû wüxi ga díeru ga cuèxruû ngîxû nañanagügü na yemawa nüxû nacuèxgüxüçèx ga ngèxürüüxû ga yema taxre tá na ixüçuxû. Rû Matíagu nangu na yangucuchixüçèx. Rû yexgumatama rû yema 11 ga duûxügü ga Ngechuchu imügüxûtanügu naxâ ga Matía.

2

Ínangu ga Tupanaãe i Üünexû

¹ Rû nawa nangu ga yema Yudiügüarü peta ga Pètecósteçu àegaxû. Rû yema ngunexügu rû guxûma ga yema yaxôgüxû rû wüxi ga nachicawa

nangutaquēxegū. ² Rū ngūrūāchi daxūwa ne naxū ga wūxi ga naga űoma wūxi ya buanecū ya taxūchicū icuxcugurū, rū guxūne ga guma ī ga nawa nayexmagūnegu nayaxūga. ³ Rū naxcēx nangox ga űūxema ga űoma naconūgūraūxū. Rū yema űūxema rū nūgūna nixīgū, rū wūxichigū ga yema yaxōgūxūna ninguchigū. ⁴ Rū guxūma ga yema yexmagūxū rū Tupanaāxē ga űūnēxū nūxna nangu. Rū yema Naāē ī űūnēxū yadexagūxēēxūācūma inanaxūgū ga to ga nagawachigū na yadexagūxū. ⁵ Rū yema ngunēxūgūgu rū yema petacēx Yerucharēūwa nayexmagū ga muxūma ga toxnamana ne īxū ga Yudīugū ga Tupanaga īnūēxū ga guxū ga togū ga nachīūānēwa ne īxū. ⁶ Rū yexguma nūxū naxīnūēgu ga űūxācū na yadexagūxū ga yema yaxōgūxū, rū nangutaquēxegū ga muxūma ga yema duūxūgū ga toxnamana ne īxū. Rū űaᵇaixāchiāēgū yerū yema yaxōgūxū rū wūxichigū ga yema togū ga duūxūgūgawachigū nidexagū. ⁷ Rū yema na porācū űaᵇaixāchiāēgūxūcēx, rū nūgūmaā rū űanagūrūgū: —¿Tama ēxna Garirēaanecūāx yixīgūxū ī guxū ī űāā duūxūgū ī tagawa idexagūxū? ⁸ —¿Rū űūxācū ēxna ī nūxū ixīnūēxū ī wūxichigū ī yixema ī taga ī nawa iyaēxūwa na yadexagūxū? ⁹⁻¹¹ —Yixema tixīgū ī Pārtīaanecūāx, rū Médiaanecūāx, rū Eraūānecūāx, rū Mechopotāmiāānecūāx, rū Yudēaanecūāx, rū Capadochiaanecūāx, rū Pōtuanecūāx, rū Áchiaarū naānecūāx, rū Pirīquiaanecūāx, rū Paūpīriaanecūāx, rū Equituarū naānecūāx, rū Dībiaarū naānecūāx ī Chirenecūāx. Rū tatanūwa nangēxma ta ī duūxūgū ī Crētaanēwa rū Arābiaarū naānēwa ne īxū. Rū űuxre ī yixema rū Dumacūāx ī Yudīugū tixīgū. Rū nuā tatanūwa nangēxma ta ī Dumacūāx ī tama Yudīugū ixīgūxū natūrū tacūmagu īxū. Rū guxāma rū nūxū taxīnūē na wūxichigū ī tagawachigū na yadexagūxū ī űāā ngūēxūgū. Rū tagawa tamaā nūxū nixugūē ī űūxācū na namēxēchixū ya Tupana —űanagūrūgū. ¹² Rū guxūma porācū űaᵇaixāchiāēgū, rū tama nūxū nacuēxgū ga űūxācū na yīxū ga yema. Rū nūgūna nacagūē, rū űanagūrūgū: —¿Tacūchiga nixī ī guxūma ī űāā? — űanagūrūgū. ¹³ Natūrū ga togū rū nūxū nacugūecūraxū, rū űanagūrūgū: —Nangāxēmare rū ngēmacēx nixī ī ngēmaācū yadexagūxū —űanagūrūgū.

Pedruarū dexa

¹⁴ Rū yexguma inachi ga Pedru namaā ga yema 11 ga namūcūgū, rū tagaācūma űanagūrū: —Pa Yudīugū ī nuxma Yerucharēūgu naxīānēxū rū Pa Nuācūāxgūx, ꞑrū dūcax, meā iperūxīnūē ī űāā tá pemaā nūxū chixuxū! ¹⁵ —Rū űāā chomūcūgū rū tama nangāxē ī pema nagu perūxīnūēxūrū, erū pēxmamatama nixī rū ngexwacēx 9 arū orawa nangu. ¹⁶ —Natūrū űāā űuxma nūxū pedauxū nixī ga yema Tupanaārū orearū uruū ga Yoē marū nūxū ixuchigaxū ga yexguma űaxgux:

¹⁷ “Rū űanagūrū ya Tupana: ‘Ngēma nawa iyacuāxū ī ngunēxūgūgu rū guxū ī duūxūgūtanūwa tá chanamu ī Chauāē ī űūnēxū, rū penēgū rū pexacūgū rū tá chauchigagu nidexagū. Rū choma rū tá chayangoxētūxēē ī perū ngextūxūxūgū rū tá nūxū nadaugū ī ngēma tá nūxū chawéxū. Rū perū yaguāxgūmaā tá chidexa ī nanēgūwa. ¹⁸ Rū chorū duūxūgūtanūwa tá chanamu ī Chauāē ī űūnēxū ī ngēma ngunēxūgūgu, rū tá chauchigagu nidexagū. ¹⁹ Rū naānetūwewa tá ichanawēx ī mexūgū ī taguma nūxū idauxū. Rū űoma ī naānēwa tá ichanawēx ī cuēxruūgū ī nagū, rū űūxēma, rū taemaxū. ²⁰ Rū űēxcū rū tá nixōema rū tauemacū rū tá nagūrūū naduema naxūpa na wenaxārū nūma naxūxū ya Cori. Rū ngēma ngunēxū ī nagu nūma naxūxū, rū wūxi ī ngunēxū ī mexēchixū

tá nixī. ²¹ Rū guxāma ya yixema Corina çaxe na tūxū nangūxēēxūcēx, rū tá tamaxē' ”,

ñanagürü ga yema orewa. ²² Rū ñanagürü ga Pedru: —Pa Duūxūgū Pa Yudiūgūx, jiperūxīnūē i ñaā ore! Rū pema rū meāma nūxū pecuēx rū Ngechuchu ga Nacharētūcūāx rū guma nixī ga wūxi ga yatū ga Tupana pepēxewa nūxū yaxucū na Nanexūchi yīxū. Rū yemacēx ga Tupana rū norū poramaā nūxū nanaxūxēē ga muxūma ga mexūgū rū cuēxruūgū ga noxri taguma nūxū idauxū. ²³—Rū Tupana pexna nanamu ga guma Ngechuchu na pecaducēx nayuxūcēx yerū yemaācū nanaxūxchaū ga Tupana, rū yemaācū nagu narūxīnū ga noxri tauta naxūxgux ga naāne. Rū pema penamu ga yatūgū ga tama yaxōgūxū na yayauxgūāxūcēx rū curuchawa na yapotagūāxūcēx. Rū yemaācū penayuxēē. ²⁴—Rū woo nayuchirēx natürü tama yexma nayacuēx, yerū Tupana wena nanamaxēē rū Inanadaxēē. Rū yemaācū ga yema yu rū taxuacūma marū nūxū narūporamaēēcha. ²⁵—Yerū ga āēxgacū ga Dabí rū Ngechuchuchigagu nidexa, rū ñanagürü:

“Guxūguma nachauxūtagu ya Cori ya Tupana rū choxū narūngūxēē na taxucēxma chaxoegaāēxūcēx. ²⁶ Rū yemacēx marū chataāē rū taāēxū ga oremaā chidexa. Rū choma nūxū chacuē na mexū tá choxū ūpetūxū i ngēxguma chayūxgux. ²⁷ Erū cuma tāūtāma yuexūchicawa choxū cutēx, rū tāūtāma cunaxwēxe na yayixixū i chaxune i choma ya Cune ya Ūñecū na chīxū. ²⁸ Marū choxū nūxū cucuēxēē i ñuxācū tá chanayaxu i maxū i taguma gūxū, rū tá poraācū choxū cutaāēxēē, erū chomaā tá icurūxāūx”,

ñanagürü ga Dabí. ²⁹ Rū ñanagürü ga Pedru: —Pa Chaueneēgūx, rū aixcūma pemaā nūxū chixu na nayuxū ga nuxcūmaūcū ga tórū āēxgacū ga Dabí, rū marū inatēx, rū ñuxma rū ta tatanūwa nangēxma i naxmaxū. ³⁰—Natürü nūma ga Dabí rū wūxi ga Tupanaārū orearū uruū nixī. Rū yemacēx nūxū nacuēx rū wūxi ga nataa tá nixī i āēxgacū ya Cristuxū ingucuchicū, yerū ga Tupana rū yemaācū namaā inaxuneta. ³¹—Rū yemacēx nuxcūmaxūchima ga Dabí rū ñoma marū nūxū nadauxuchixūrū nūxū nixu rū Cristu rū tá yuwa inarūda rū tāūtāma naxmaxūwa nangēxmaēcha rū tāūtāma niyixi i naxūne. ³²—Rū ñuxma ya Tupana rū marū wena nanamaxēē ga guma Ngechuchu, rū guxāma ga toma rū nūxū tadaugū na wena namaxūxū, rū ngēmacēx pemaā nūxū tixuchiga. ³³—Rū Tupana rū daxūguxū ga naānewa nanaga na norū tūgūñecūwawa yanatoxūcēx. Rū Tanatū ya Tupana rū marū nūxna nanamu ga Naāē i Ūñexū ga nuxcūma nūxū yaxuxū rū tá nuā na namuāxū. Rū ñuxma ya yima Ngechuchu rū nūma totanūwa nanamu i ngēma Naāē i Ūñexū. Rū ngēma Naāē nuā ūxū nixī i ñuxma nūxū pedauxū rū nūxū pexīnūēxū. ³⁴⁻³⁵—Rū taguma daxūwa naxū ga Dabí, natürü nūmatama rū ñanagürü:

“Tupana rū chorū Cori ya Cristumaā nūxū nixu rū ñanagürü: ‘¡Rū chorū tūgūñecūwawa rūto ñuxmatāta cuxmēxwa chanangēxmagūxēē i curū wuanūgū!’ ”

ñanagürü. ³⁶ Rū ñanagürü ga Pedru: —Name nixī i guxāma i pema i Yudiūgū na nūxū pecuēxgūxū rū guma Ngechuchu ga curuchawa peyapotacū, rū Tupana rū marū perū Cori ya Cristuxū nayaxīxēē —ñanagürü ga Pedru. ³⁷ Rū yexguma yemaxū naxīnūēgu ga yema duūxūgū ga yēma yexmagūxū, rū poraācū nanaxīxāchiāēgū. Rū Pedruna nacagūe, rū yema togū ga Pedrumūcūgūna rū ta nacagūe, rū ñanagürügū: —¡Rū tacū tá taxūēxū i ñuxmax,

Pa Toeneëgūx? —ñanagürügü. ³⁸ Rū Pedru nanangāxū, rū ñanagürü: —iNūxū perūxoe i pecūma i chixexū rū Tupanacēx pedaügüe rū Ngechuchuégagu ípebaiū na pexū nūxū nangechaūxūcēx i perū pecadugū ya Tupana! Rū Tupana tá pexna nanamu i Naāē i Ūūnexū. ³⁹ —Rū ñaā Tupanaārū uneta, rū pexcēx nixī, rū pexacūgūcēx, rū guxū i duūxūgū i yaxūwa ngēxmāgūxūcēx nixī. Erū guxū i duūxūgū i tōrū Cori ya Tupana nūgūxūtawa naxcēx çaxūcēx nixī i ngēma uneta —ñanagürü ga Pedru. ⁴⁰ Rū yema oremaā rū muxūma ga to ga oremaā nayaxucuxēgū ga Pedru, rū ñanagürü: —iNūxna pixīgachi i ngēma duūxūgū i chixexū ūgūxū na pema rū ta tama chixexū pexūgūxūcēx! —ñanagürü. ⁴¹ Rū yema duūxūgū ga naga Inūēxū ga yema ore ga Pedru namaā nūxū ixuxū, rū ínabaiū. Rū yema ngunexūgu rū poraācū nayexera ga na yamuxū ga yema yaxōgūxū. Rū 3,000 ga duūxūgū nixī ga Ngechuchuauxū yaxōgūxū ga yexguma. ⁴² Rū yema yexwacēx yaxōgūxū rū guxūguma inarūxīnūē ga yema ngūexūgū ga Ngechuchu imugūxūārū nguxēētae. Rū meā nūgūmaā nangaugū ga norū yemaxūgū. Rū guxūguma nayumūxēgūxū rū chibūcēx nangutaqūxēgūxū.

Yema yaxōgūxū rū aixcūma nūgū nangechaxūgū

⁴³ Rū yema ngūexūgū ga Ngechuchu imugūxū rū nanaxūgū ga muxūma ga mexūgū ga Tupanaārū poramaā naxūgūxū. Rū yexguma yemaxū nadaugūgu ga togū ga duūxūgū, rū poraācū nabaixāchiāēgū ga guxūma. ⁴⁴ Rū guxūma ga yema yaxōgūxū, rū wūxigu narūxīnūē. Rū meā nūgūmaā nangaugū ga norū yemaxūgū. ⁴⁵ Rū namaā nataxegūxū ga norū naānegū rū guxūma ga togū ga norū yemaxūgū. Rū nūgūmaā ngīxū nitoyegūxū ga yema dīeru yexgumarūū na ñuxre natūmawēxexū ga norū ōnatanū ga wūxichigū. ⁴⁶ Rū guxū ga ngunexūgu tupauca ga taxūnēwa nangutaqūxēgūxū, rū chibūcēx nangutaqūxēgūxū ga napatagūwa, rū taāēācūma nūgūmaā nachibūxū. ⁴⁷ Rū guxūguma Tupanaxū nicūēxūūgūxū. Rū guxūma ga yema íānecūāx rū nūxū nangechaūgū ga yema yaxōgūxū. Rū wūxichigū ga ngunexūgu rū nimūētanū ga duūxūgū ga yaxōgūxū, yerū nūma ga Cori ga Ngechuchu rū nūxū narūngūxēē na nayauxgūāxūcēx ga norū maxū i taguma gūxū.

3

Naxcēx nitaane ga wūxi ga yatū ga chixeparacū

¹ Rū wūxi ga ngunexūgu ga Pedru rū Cuáū rū tomaēxpūxarū oragu ga yáuanecū rū tupauca ga taxūnēwa naxī, yerū yema nixī ga yumūxēārū ora. ² Rū yēma guma tupauca ga taxūnēwa nayexma ga wūxi ga yatū ga norū bucūmatama chixeparacū. Rū guxū ga ngunexūgu rū natanūxūgū rū guma tupauca ga taxūnēārū íāx ga Mexēchixūgu āegaxūgu nayamugūxū, na dīerucēx ínacaūūxūcēx nūxna ga duūxūgū ga guma tupauca ga taxūnegu chocūxū. ³ Rū yexguma Pedru rū Cuáūxū nadēuxgux ga tupauca ga taxūnegu na nachocuxū, rū guma chixeparacū rū nūxū nawémēx rū dīerucēx nūxna naca. ⁴ Rū Pedru rū Cuáū meāma nūxū narūdaunū, rū Pedru rū ñanagürü nūxū: —iToxū nadawenū! —ñanagürü. ⁵ Rū nūma ga yatū rū nūxū nadawenū, yerū nūma nūxū nacūēxgu rū chi íacū nūxna naxāgū. ⁶ Natūrū ga Pedru rū ñanagürü nūxū: —Choxū nataxuma i dīeru. Natūrū ngēma choxū ngēxmaxū tá cuxna chaxā. Rū naegagu ya Ngechuchu ya Crīsta ya Nacharētucūāx cuxū chamu, rū jinachi rū ixū! —ñanagürü. ⁷ Rū yema ñaxguwena ga Pedru, rū norū tūgūnemēxēgu nayayauxāchi, rū inanachixēē, rū yexgumatama napura ga namēxtūxūgūwa rū nacutūgūwa. ⁸ Rū nayuxnagū

rū inachi, rū inanaxŭgŭ na iyaxŭxŭ. Rŭ nŭmatama iyaxŭācŭma Pedru rū Cuāŭwe tupauca ga taxŭnegu naxŭcu. Rŭ nanayuxnagŭane rū Tupanaxŭ nicuēxŭŭ. ⁹ Rŭ guxŭma ga duŭxŭgŭ nŭxŭ nadaugŭ ga na iyaxŭxŭ, rū Tupanaxŭ na yacuēxŭŭxŭ. ¹⁰ Rŭ poraācŭ nabaixāchiāēgŭ ga duŭxŭgŭ naxcēx ga yema nŭxŭ ngupetŭxŭ ga guma yatŭ. Yerŭ nŭxŭ nacuēxgŭ ga na guma yŭxŭ ga tupauca ga taxŭneārŭ īax ga Mexēchixŭgu āegaxŭwa rūtooxŭchirēcŭ rū yēma diērucēx icacŭ.

Tupaucacŭwawa yexmaxŭ ga chopetŭchica ga Charomōŭlarŭ Ūpetŭchicagu āēgaxŭwa nidexa ga Pedru

¹¹ Rŭ guma chixeparachirēcŭ ga marŭ naxcēx yataanecŭ, rū tama Pedru rū Cuāŭna nixŭgachichaŭ. Rŭ guma tupauca ga taxŭnecŭwawa nayexma ga wŭxi ga chopetŭchica ga “Charomōŭlarŭ Ūpetŭchicagu” āegaxŭ. Rŭ yema chopetŭchicawa rū Pedru rū Cuāŭcēx naxŭtaquēxe ga guxŭma ga duŭxŭgŭ yerŭ poraācŭ nabaixāchiāēgŭ. ¹² Rŭ yexguma Pedru nŭxŭ dēuxgu ga yema duŭxŭgŭ ga yēma naxcēx ŭtaquēxegŭxŭ, rū űanagŭrŭ nŭxŭ: —Pa Chau-tanŭxŭgŭ i Yudiugŭx, ŭTŭxcŭŭ pēbaixāchie namaā i ngēma űaā yatŭmaā ngu-petŭxŭ? ŭRŭ tŭxcŭŭ toxŭ perŭdaunŭ űoma torŭ poramaā rū torŭ mexŭmaā tanamexēēxŭrŭŭ? ¹³ —Nuxcŭmaŭgŭcŭ ga tŭrŭ oxigŭ ga Abrāŭ rū Ichaā rū Acobu rū togŭ ga tŭrŭ oxigŭ rū nŭxŭ nayaxŭgŭ ga Tupana. Rŭ yimatama Tupana nixŭ ya űuxma Ngechuchuxŭ taxēēcŭ, na guxŭlarŭ yexera yŭxŭcēx. Rŭ gumatama Ngechuchu ya Tupanaārŭ ngŭxēēruŭ ixŭcŭ nixŭ ga pema āēxgacŭ ga Piratuxŭtawa penagagŭcŭ. Rŭ yexguma nŭxŭ yangēxchaŭgu ga Piratu, rū pema rū tama penaxwēxegŭ ga na yangēāxŭ. ¹⁴ —Pema rū tama penaxwēxe ga na űnanguxuchixŭ ga guma űŭnecŭ ga aixcŭma mecŭ ga Ngechuchu, natŭrŭ naxcēx űpeca na pexcēx űnanguxuchixēēāxŭcēx ga wŭxi ga māētaxŭ. ¹⁵ —Rŭ yemaācŭ pematama peyamēxgŭ ga guma Ngechuchu ya tŭxŭ maxēēēcŭ. Natŭrŭ ga Tupana rū wena nanamaxēē. Rŭ toma nixŭ ga nŭxŭ tadaugŭxŭ ga wena na namaxŭxŭ. ¹⁶ —Rŭ űaā yatŭ ga chixeparachirēcŭ i pema nŭxŭ pedauxŭ rū nŭxŭ pecuāxŭ rū marŭ naxcēx nitaane erŭ Ngechuchuaxŭ nayaxŭ. Rŭ ngēma Ngechuchuaxŭ na yaxŭōxŭcēx nixŭ i naxcēx yataanexŭ ngēma űuxma guxāma i pema nŭxŭ pedauxŭrŭŭ. ¹⁷ —Rŭ dŭcax i űuxma Pa Chaueneēgŭx, rū yexguma pema rū wŭxigu perŭ āēxgacŭgŭmaā peyamēxgŭgu ga Ngechuchu, rū tama nŭxŭ pecuēxgŭ ga űacŭ na pexŭxŭ. ¹⁸ —Natŭrŭ ga Tupana rū yemaācŭ nayanguxēē ga yema unēta ga nuxcŭma nŭmatama nŭxŭ yaxuxŭ nawa ga guxŭma ga norŭ orearŭ uruŭgŭ. Yerŭ yema norŭ ore ga űmatŭxŭwa rū űanagŭrŭ: “Cristu rū tā ngŭxŭ ninge”,

űanagŭrŭ. ¹⁹⁻²⁰ —Rŭ ngēmacēx, Pa Chaueneēgŭx, rū name nixŭ i nŭxŭ perŭxoe i pecŭma i chixexŭ, rū Tupanacēx pedaugŭ, rū nŭxŭ peyaxŭgŭ na nŭma pexŭ űnapiāxŭcēx i perŭ pecadugŭ. Rŭ ngēxguma i nŭma rū tā pexŭ nŭmataēgŭxēē, rū tā nŭma nanamu ya Ngechuchu ga noxritama naāne ixŭgŭgu pexcēx nŭxŭ naxunetacŭ na perŭ āēxgacŭ ya Cristu na yŭxŭcēx. ²¹ —Natŭrŭ i űuxma rū Tupana nanaxwēxe i daxŭguxŭ i naānegu na naxāxŭxŭ ya Ngechuchu űuxmatāta nŭma ya Tupana wena namexēēāgu i guxŭma i űoma i naānewa ngēxmaxŭ. Yerŭ yemaācŭ nixŭ ga nŭxŭ yaxuxŭ ga Tupana nawa ga nuxcŭmaŭgŭxŭ ga norŭ orearŭ uruŭgŭ ga ixŭnecŭ. ²² —Rŭ Moŭché rū tŭrŭ oxigŭmaā nŭxŭ nixu rū űanagŭrŭ:

“Rŭ perŭ Cori ya Tupana rū petanŭwa tā nŭxŭ naxuneta i wŭxi i norŭ orearŭ uruŭ i chauxrŭŭ ixŭxŭ. Rŭ name nixŭ na naga pexŭnŭxŭ i guxŭma i

ngēma pemaā nūxū yaxuxū. ²³ Rū texé ya tatanūwa tama naga ĩnūxē i ngēma orearū uruū, rū tá tūxū ĩnatēxūchi i tatanūwa”,
 űanagūrū ga Moiché. ²⁴ —Rū Chamuē rū guxūma ga togū ga Tupanaārū orearū uruūgū ga naweama ūgūxū rū ta nūxū nixugūe ga űacū tá na ūpetūxū i űomaūcūū. ²⁵ —Rū nuxcūmaxūchima ga Tupana rū tōrū ōxi ga Abráūmaā nūxū nixu rū űanagūrū:
 “Rū wūxi i cutaa tá nixī i nūxū rūngūxēēxū i guxūma i duūxūgū i űoma i naānecūāx”,
 űanagūrū. Rū yemaācū ta Tupana ĩnaxuneta nawa ga nuxcūmaūgūxū ga norū orearū uruūgū. Rū pemaā nūxū chixu i űuxma, rū pexcēx nixī ga yema unetagū ga nuxcūmaūgūxū ga orearū uruūgūwa tōrū ōxigūmaā nūxū yaxuxū ga Tupana. ²⁶ —Rū pemaā nūxū chixu Pa Chautanūxūgū i Yudūgūx, rū yexguma Tupana wena namaxēēgu ga Nane ga Ngechuchu rū petanūwaxira nanamu na pexū nangūxēēxūcēx, erū nanaxwēxe i wūxichigū i pema na nūxū perūxoexū i pecūmagū i chixexū —űanagūrū ga Pedru.

4

Āēxgacūgūpēxewa nayexmagū ga Pedru rū Cuáū

¹ Rū yexguma duūxūgūmaā ĩyadexagūga ga Pedru rū Cuáū, rū yexgumayane yēma nangugū ga guma tupauca ga taxūneārū purichīaarū āēxgacū, rū paigū, rū Chaduchēgū. ² Rū Pedru rū Cuáūmaā nanuē ga paigū yerū duūxūgūxū nangūxēē ga na marū wena namaxūxū ga Ngechuchu, rū naxrūū tá ta wena namaxēxū i guxūma i duūxūgū i marū yuexū. ³ Rū ĩnanayauxū, rū poxcupataūgu nanawocu űuxmata moxūācū, yerū marū nayāuane. ⁴ Natūrū muxūma ga yema duūxūgū ga nūxū ĩnūxū ga yema Tupanaārū ore rū nayaxōgū. Rū 5000 wa nangu ga yatūxūxica ixugūgu. ⁵ Rū moxūācū Yerucharēūwa nangutaquēxegū ga Yudūgūarū āēxgacūgū namaā ga naerugū, rū ngūxēēruūgū ga ore ga mugūwa ngūxēētaegūxū. ⁶ Rū yēma nayexma ta ga Aná ga paigūeru ĩxīcū, rū Caipá, rū Cuáū, rū Areyáūdru, rū guxūma ga yema togū ga paigū ga paigūerutanūxū ĩxīgūxū. ⁷ Rū nanamu na naxūtawa nagagūāxūcēx ga Pedru rū Cuáū. Rū yexma norū ngāxūtanūgu nanachigūxēē rū nūxna nacagū, rū űanagūrūgū: —¿Texé pexū tamu, rū texé pexna tanaxā i pora na penamexēēxūcēx i űaā yatū? —űanagūrūgū. ⁸⁻⁹ Rū Pedruwa nayexma ga Tupanaāē ga Ūūnexū rū nanaporaxēē. Rū yemacēx ga Pedru rū nanangāxū, rū űanagūrū: —Pa ĩāneārū Āēxgacūgūx, rū Pa Yudūgūarū Āēxgacūgūerugūx, rū űuxma toxna naxcēx peca naxcēx ga norū mexēē i űaā chixeparachirēxū erū nūxū pecuāxchaū ga űuxācū na namexū. ¹⁰ —Rū űuxma tá pemaā nūxū tixu na nūxū pecuāxūcēx i guxāma i pema rū nūxū nacuēxgūxūcēx i guxūma i tatanūxūgū i Yudūgu. Rū űaā yatū i űuxma pepēxewa ngēxmaxū rū Ngechuchu ya Cristu ya Nacharētucūāx nixī ga namexēēcū. Rū guma nixī ga pema curuchawa peyapotacū rū peyuxēēcū. Natūrū ga Tupana rū wena nanamaxēē. ¹¹ —Rū gumatama Ngechuchu nixī ga pema nūxū pexoecū. Natūrū ga Tupana rū nayamucuchi na guxūarū āēgacū yixīxūcēx. ¹² —Rū yima Ngechuchuxicatama nixī ya tōrū maxēēēruū, erū yixicatama nixī ga Tupana nūxū unetacū i űoma i naanewa na tūxū namaxēēxūcēx —űanagūrū ga Pedru. ¹³ Rū yexguma yema āēxgacūgū nūxū daugūga ga űuxācū tama muūēācūma na yadexagūxū ga Pedru rū Cuáū, rū naḡaixāchiāēgū, yerū nūxū nicuēxāchitanū ga tama meā poperaxū na yacuāxū rū puracūtanūxūmare yixīgūxū. Rū aixcūma

nūxū nicuèxāchitanū ga Ngechucharū ngúexūgū na yixīgūxū. ¹⁴ Rū ñuxūchi nūxū nadaugū ta ga guma yatū ga rümecū ga Pedru rü Cuáũxūtagu na nachixū. Rū yemacèx ga yema àèxgacūgū rü taxuacūma ñuxū ñanagürügüéga nachiga ga yema ngupetūxū. ¹⁵ Rū yexguma ga yema àèxgacūgū rü inanamuxū ga yema inangutaquèxegūxūwa, rü nūxīcatama nūgūmaā nidexagū. ¹⁶ Rū ñanagürügü: —¿Tacū tá namaā ixūxū i ñāā yatūgū? Erū guxūma i Yerucharéúçūāx i duũxūgū rü nūxū nacuèxgū i ngēma mexū i taxū i naxūgūxū, rü taxuacūma itayacux. ¹⁷ —Natürü ngēma na tama yexeraācū duũxūgūtanūwa nanguchigaxūcèx i ngēma ngupetūxū, ¡rū ngīxā tanamuñèxèè na ñuxmawena rü taxúemaāma ngēma Ngechuchichigagu yadexagūxūcèx! —ñanagürügü. ¹⁸ Rū wenaxārū Pedru rü Cuáũcèx nacagū, rü nūxna naxāga na tama Ngechuchichigamaā yadexagūxūcèx, rü bai i texéxū na nangúexèèxūcèx i nachiga. ¹⁹ Natürü ga Pedru rü Cuáũ rü nanangāxūgū, rü ñanagürügü: —¡Nagu perūxīnūè i pematama! ¿Rū namexū i Tupanapèxewa na pega taxīnūèxū rü èxna Tupanaga taxīnūèxū? ²⁰ —Erū toma rü taxuacūma nūxū tarūxoe na nūxū tixuxū ga yema nūxū tadaugūxū rü nūxū taxīnūèxū —ñanagürügü. ²¹ Rū yexguma ga yema àèxgacūgū rü nayaxāxūnegū rü yemaācū inayamugū, yerū nataxuma ga ¡acūcèx na napoxcueāxū rü duũxūgūxū namuñè, yerū guxūma ga duũxūgū rü Tupanaxū nicuèxūgū naxcèx ga yema nūxū ngupetūxū ga guma yatū ga chixeparawa rümecū. ²² Rū guma yatū ga yemaācū Tupanaārū poramaā naxcèx itaanecū, rü 40 arū yexera nixī ga norū taunecū.

Yema yaxōgūxū rü Tupanaarū ngūxèècèx ínacagū

²³ Rū yexguma marū inamuxūāxgu, rü Pedru rü Cuáũ rü namūcūgū iyexmagūxūwa naxī. Rū namaā nūxū nixugūè ga guxūma ga yema ore ga Yudiūgiarū àèxgacūgū rü paigiarū àèxgacūgū namaā nūxū ixuxū. ²⁴ Rū yexguma Pedru rü Cuáũxū naxīnūègu ga namūcūgū, rü guxūma wūxigu nayamūxègū rü Tupanamaā nidexagū rü ñanagürügü: —Pa Corix, cuma cunaxū ga daxūgūxū ga naāne rü ñoma ga naāne, rü taxū i taxtū, rü guxūma i ¡acū i nawa ngèxmaxū. ²⁵ —Rū cumatama nixī ga nuxcūma Cuāè i Ūñexūxū cumuxū na curū ngūxèèruñ ga Dabiwa yanadexaxūcèx rü ñaxūcèx:

“¿Tūxcūñ inipurae i ñoma i naānecūāx i duũxūgū i tama yaxōgūxū? ¿Rū tūxcūñ ngēma natūcèxmamare ixīgūxūgu narūxīnūè i guxū i nachīñānecūāx?

²⁶ —Nūmagū i nachīñānegūarū àèxgacūgū rü Tupanamaā nanuè, rü nūgūmaā nangutaquèxegū na wūxigu nūgūmaā nagu naxīnūèxūcèx na ñuxācū tá nūxū na nayexeragūxūcèx ya Cori ya Tupana rü Nane ya nūxū naxunetacū ya Cristu”,

ñanagürü. ²⁷ —Rū aixcūma nixī ga ñoma ga ñānewa ga àèxgacūgū ga Erode rü Piratu ga nangutaquèxegūxū namaā ga to ga nachīñānegūçūāx rü totanūxū ga Yudiūgū, na chixexū naxūgūxūcèx namaā ya curū ngūxèèruñ ya ūñecū ya Ngechuchu ya Cristuxū nūxū cuxunetacū. ²⁸ —Rū yemaācū ga nūmagū rü nayanguxèè ga guxūma ga yema cuma nuxcūmama nagu curūxīnūxū rü nūxū cuxunetaxū rü tá na yanguxū. ²⁹ —¡Rū dūcax, Pa Corix, cuma nūxū cucuèx na ñuxācū toxū naxāxūnegūxū! Toma nixī i curū ngūxèèruñgū rü tanaxwèxe na toxū cuporaexèèxū na tama tamuñèācūma nūxū tixuxūcèx i curū ore. ³⁰ —¡Rū curū poramaā namexèè i duũxūgū i idaaweexū! ¡Rū duũxūgūxū nawèx i cuèxruñgū i curū poramaā cuxūxū i naegagu ya curū ngūxèèruñ ya ūñecū ya Ngechuchu! —ñanagürügü. ³¹ Rū yexguma yumūxèwa nūxū nachauegu, rü guma ipata ga nawa nangutaquèxegūne rü naxīāxāchi. Rū Tupanaāè i

Üünexü rü nüxna nangu ga guxüma. Rü tama namuñëäcüma nüxü nixugüe ga Tupanaärü ore.

Yema yaxöögüxlärü yemaxüğü rü guxülarü nixü

³² Rü namu ga yema yaxöögüxü. Rü guxüma rü wüxigu narüxñnë. Rü taxuüma nagu narüxñnë ga noxrüxicatama na yixü ga norü yemaxüğü, natürü guxüma ga namücügümaã nangau. ³³ Rü yema ngüexüğü ga Ngechuchu imugüxü na Tupa-naärü puracü naxüğüxücëx, rü Tupanaärü poramaã nüxü nixugüe ga ñuxäcü wena na namaxüxü ga Cori ga Ngechuchu. Rü Tupana rü poraäcü nüxü narüngüxëë ga guxüma ga yema yaxöögüxü. ³⁴⁻³⁵ Rü natanüwa rü nataxuma ga wüxi ga nüxü nataxuxü, yerü guxüma ga yema nüxü yemaxü ga naänegü rü êxna İpatagü, rü namaã nataxegü. Rü yema dïeru ga ngixü nayauxgücü rü yéma ngixü nangegü, rü yema ngüexüğü ga Ngechuchu imugüxüna ngixü nayaxägü. Rü ñuxüchi nüğü ngixü ninuüxü ga ñuxrechigü nüxü nataxuxü ga wüxichigü. ³⁶ Rü nayexma ga wüxi ga yatü ga Lebítanüxü ga Chiprecüäx ga Yúchegu äegacü. Rü yema ngüexüğü ga Ngechuchu imugüxü na Tupanaärü puracü naxüğüxücëx rü Bernabémaã nanaxugü. Rü ngëma naega, rü: “Taäëxëeruü”, ñaxüchiga nixü. ³⁷ Rü nüma ga Bernabé rü nüxü nayexma ga wüxi ga naäne, rü namaã nataxe. Rü yema ngüexüğü ga Ngechuchu imugüxüxütawa ngixü nana ga yema dïeru.

5

Ananiã rü Chacuíraarü pecaduchiga

¹ Rü nayexma ga wüxi ga yatü ga Ananiãgu äegaxü rü Chacuíra ga namëx. Rü nümagü rü namaã nataxegü ga wüxi ga norü naäne. ² Natürü nüma ga Ananiã rü namëxmaã wüxigu nagu narüxñnë na nüğüxü ngixne nayauxgüxü ga ñuxre ga yema naänetanü. Rü ñuxüchi yema ngüexüğü ga Ngechuchu imugüxüxütawa ngixü nangegü ga yema nüxü iyaxücü. ³ Rü yexguma ga Pedru rü ñanagürü nüxü: —Pa Ananiãx, çtüxcüü ngoxo i Chatanága cuxñnë rü Tupanaãe i Üünexümaã quidora, rü cügüxü ngixne cuyaxu i ñuxre i ngëma curü naänetanü? ⁴ —¿Êxna yexguma tauta namaã cutaxegu, rü tama êxna cuxrü yixü ga yema naäne? ¿Rü yexguma namaã cutaxegu, tama êxna cuxrü yixü ga yema dïeru na ngixü cugüxëëxücëx i ngëma cuma cunaxwëxëüäcüma? ¿Tüxcüü i cunaxüxü i ñaã? Tama yatügümaãixca quidora, natürü Tupanamaã rü ta nixü i quidoraxü —ñanagürü ga Pedru. ⁵ Rü yexguma yema orexü naxñnëgu ga Ananiã, rü yuxüma inayangu. Rü poraäcüxüchima namuñë ga guxüma ga yema duüxüğü ga yexguma yemaxü nacuächigagüğü. ⁶ Rü ñuxre ga yéma yexmagüxü ga ngextüxüxüğü rü nanayauxgü ga naxüne, rü nananuquegü, rü inayatëxgü. ⁷ Rü tomaëxpüx ga ora ngupetüxgu rü İngu ga namëx. Rü yexma ixücu natürü tama nüxü icüex ga řacü na ngupetüxü. ⁸ Rü Pedru ngixna naca, rü ñanagürü: —¿Yema natanü ga ipexunetaxüğü yixü ga namaã petaxegüxü ga perü naäne? —ñanagürü. Rü ngüma rü: —Ngü, ngëxgumaëxpüxgu nixü —ngigürüğü. ⁹ Rü Pedru rü ñanagürü ngixü: —¿Tüxcüü pegümaã ngëmaäcü wüxigu perüxñnë na namaã pidoraëxücëx i Tupanaãe i Üünexü? İDücëx, ngëma cutexü iyatëxgüxü rü marü İnangugü, rü ñuxma rü cuxü rü tá ta ngema nangegü! —ñanagürü. ¹⁰ Rü yexgumatama yuxcüma Pedrupëxegu iyangu. Rü yexguma nachocüxgu ga yema ngextüxüxüğü, rü yuxcüma ngixü inayangaugü. Rü ngixü nayauxgü, rü ngitëxütatagutama ngixü nayatëxgü. ¹¹ Rü yexguma nüxü nacüexgüğü ga

yema ngupetūxū, rü guxūma ga yema yaxōgūxū rü yema togū ga duūxūgū rü ta poraācūxūchima namuūē.

Tupanaārū poramaā nanaxūgū ga muxūma ga mexūgū

¹² Rū yema ngúexūgū ga Ngechuchu imugūxū, rü duūxūgūpēxewa nanaxūgū ga muxūma ga mexūgū ga Tupanaārū poramaā naxūgūxū. Rū inanawēxgū ga muxūma ga cuēxruūgū. Rū guxūma ga yema yaxōgūxū rü guxūguma naxītaquēxegūxū nagu ga yema tupauca ga taxūnewa yexmaxū ga chopetūchica ga Charomóūārū Ūpetūchicagu āegaxū. ¹³ Rū yema togū ga duūxūgū ga tama yaxōgūxū rü namuūē na yema yaxōgūxūtanūgu naxāgūxū, natūrū poraācū yema yaxōgūxūxū nangechaūgū. ¹⁴ Rū nimuētānūāma ga yema yaxōgūxū yerū muxūma ga duūxūgū ga yatūxūgū rü ngexūgū rü Coriaxū nayaxōgūetanū. ¹⁵ Rū nūma ga duūxūgū rü itamūgūgu nayamugūxū ga idaaweexū naxchāpenūūmaā rü norū caruūgūmaā na yexguma Pedru yēma ūpetūxgu, rü naxchipetamare nūxū na nachixūcēx. ¹⁶ Rū yexgumarūū ta rü yēma naxītaquēxegūxū ga muxūma ga duūxūgū ga Yerucharēūārū ngaicamana imugūne ga iānewa ne īxū. Rū yēma naxcēx nanagagūxū ga yema idaaweexū rü yema ngoxoāxgūxū. Rū guxūma naxcēx nitaanegū.

Pedru rü Cuāūwe ningēxūtanū ga paigū

¹⁷ Rū yexguma ga guma paigūeru rü guxūma ga yema natanūxūgū ga Chaduchēugū rü poraācū nixāūxāchigū naxcēx ga yema mexūgū ga naxūgūxū ga yema ngúexūgū ga Ngechuchu imugūxū. ¹⁸ Rū yemacēx norū purichiaūgūxū namu na īnayauxūāxūcēx ga yema ngúexūgū. Rū iāneārū poxcupataūgu nanapoxcue. ¹⁹ Natūrū Coriarū oreatū ngerūū ga daxūcūāx naxcēx nayawāxna ga yema poxcupataūārū iāxgū ga chūtacū. Rū īnanamuxū, rü űnanagūrū nūxū: ²⁰ —ĭNgema tupauca ya taxūnewa pexī, rü guxū i duūxūgūmaā nūxū pixu na űuxācū Tupana inaxāxū i ngexwacaxūxū i maxū! —ñnanagūrū. ²¹ Rū yexguma ga yema ngúexūgū ga Ngechuchu imugūxū rü naga naxīnūē ga yema ore. Rū moxūācū ga pēxmamaxūchi rü tupauca ga taxūnewa naxī, rü duūxūgūxū nangúexēē. Rū yoxni ga guma paigūeru rü natanūxūgū, rü nanangutaquēxexēē ga guxūma ga yema togū ga āēxgacūgū ga āēxgacūgūtūcumūwa ūgūxū. Rū poxcupataūwa nanamugū ga purichiaūgu na yagagūāxūcēx ga yema ngúexūgū ga Ngechuchu imugūxū. ²²⁻²³ Rū yexguma poxcupataūwa nangugūga ga yema purichiaūgu, rü taxuxūxūma inayangaugū. Rū nayawoegu, rü nūxū nayarūxugūē, rü űnanagūrūgū: —Yima poxcupataū rü narūwāxta, rü meāma nataichirēx, rü purichiaūgu nūxna nadaugū i naāxwa. Natūrū ngēxguma tayawāxnagu, rü taxuxūxūma itayangaugū i aixepewa —ñnanagūrūgū. ²⁴ Rū yexguma yema orexū naxīnūēgu ga yema paigūeru rü yema togū ga paigū ga āēxgacūgū ixīgūxū rü yema tupauca ga taxūneārū purichiaūgarū āēxgacū rü guxūma nabaixāchiāēgū yerū tama nūxū nacuēxgū ga ngextā tá na nanguxū ga guxūma ga yema rü űuxācū tá na iyanaxoxēēgūāxū. ²⁵ Rū yexguma yemagu īnaxīnūēyane rü yēma nangu ga wūxi ga yatū, rü namaā nūxū nixu, rü űnanagūrū: —Ngēma yatūgū i pepoxcuechirēxū, rü tupauca ya taxūnewa nangēxmagū, rü īnanangúexēē i duūxūgū —ñnanagūrū. ²⁶ Rū yēma naxī ga tupauca ga taxūneārū purichiaūgarū āēxgacū wūxigu namaā ga norū purichiaūgu na yagagūāxūcēx. Natūrū namuūē na duūxūgū nutamaā yamuxūtanūxū, rü yemacēx meāmare yema ngúexūgūxū nigagū. ²⁷ Rū yexguma namaā inangugūgu, rü yema āēxgacūgūpēxewa nanagagū. Rū yema paigūeru rü

namaã nidexa rü ñanagürü nüxŭ: ²⁸ —Marü poraãcü pexna tanachuxu na tama ngëma Ngechuchuégamaã penangúexëëxúcëx. Natürü i pema rü guxŭne ya Yerucharëüwa penangúexëë i duŭxŭgü, rü ñuxŭchi toxna penaxuxchaŭ ga na togagu nayuxŭ ga yema Ngechuchu —ñanagürü. ²⁹ Rŭ Pedru rü namücügümaã nanangãxŭgü, rü ñanagürügü: —Narümemaë nixŭ na Tupana ga taxŭnëxŭ rü tama i yatügüga. ³⁰ —Guma Tupana ga nuxcümaŭgŭxŭ ga törü oxigü nüxŭ yaxögücü, rü guma nixŭ ga wena namaxëëcü ga Ngechuchu ga pema peyamácü ga yexguma curuchawa peyapotagügu. ³¹ —Natürü Tupana rü nanataxëëãma, rü nügüarü tügüncëwawa nanatoxëë. Rŭ törü cuëxruŭ rü maxëxëeruŭ nayangucuchixëë na tatanüxŭgü i Yudiügŭxŭ nangŭxëëxúcëx na nüxŭ naxoexúcëx i norü chixëxŭgü, rü Tupana nüxŭ nüxŭ nangechaŭxúcëx i norü pecadugü. ³² —Rŭ toma nüxŭ tacuë na aixcüma yŭxŭ i guxŭma i ngëma pemaã nüxŭ tixuxŭ erü tomatama nüxŭ tadaugü. Rŭ ngëxgumarüŭ ta i Tupanaãë i Üünexŭ i Tupana tŭxna ãxŭ ya yŭxema naga ñnëxë, rü nüxŭ nacuëx na aixcüma yŭxŭ —ñanagürügü. ³³ Rŭ yexguma yemaxŭ naxŭnëgü ga yema ãëxgacügü, rü poraãcüxŭchima nanuë, rü nanadaixchaŭ. ³⁴ Natürü yema ãëxgacügütanüwa nayexma ga wüxi ga Parichéu ga Gamarié ga naega. Rŭ nüma rü meãma nanangúexëë ga Tupanaãrü mugü. Rŭ guxŭma ga duŭxŭgü rü nüxŭ nangechaŭgü. Rŭ nüma ga Gamarié inachi rü nanamu na paxaãchi Ínamuxŭãxŭcëx ga yema ngúexŭgü ga Ngechuchu imugŭxŭ. ³⁵ Rŭ ñuxŭchi namücügü ga ãëxgacügümaã nüxŭ nixu rü ñanagürü: —Pa Chautanŭxŭx, ¡pexuãëgü na tacü tá namaã pexüexŭ i ñaã yatügü! ³⁶ —Rŭ nüxna pecuëxãchie ga ũpa ga ñuxãcü ãëxgacŭxŭ nügü ningucuchixëëchaŭ ga Teudá. Rŭ nügütama nixu na wüxi ga tacü na yŭxŭ. Rŭ maneca 400 naguxŭ ga yatügü nawe narŭxŭ. Natürü churaragü nayamëxgü, rü nayu. Rŭ guxŭma ga yema nawe rŭxŭxŭ rü nangŭãchi, rü yexma nayarŭxo ga guxŭma. ³⁷ —Rŭ yixcüra Ínangu ga to ga yexguma tachiŭãneãrŭ ãëxgacü duŭxŭgŭxŭ ixugügu, rü yema nixŭ ga Yuda ga Gariréaanecŭãx ga ãëxgacŭxŭ nügü ingucuchixëëchaŭxŭ. Rŭ nayaxucuxëgü ga duŭxŭgü rü nawe narŭxŭ ga ñuxre. Natürü yemaxŭ rü ta nimëxgü rü nayu. Rŭ guxŭma ga yema nawe rŭxŭxŭ rü nangŭãchi. ³⁸ —Rŭ ngëmacëx i ñuxma rü pexŭ chaxucuxë na peyangëxgŭxŭ i ñaã yatügü, rü tama penapoxcuxŭ. Erü ngëxguma nagagutama yixŭgu i ngëma nüma naxŭgŭxŭ, rü tá inayarŭxo. ³⁹ —Natürü ngëxguma Tupanaãrü yixŭgu i ñaã naxŭgŭxŭ, rü taxuacüma ipeyanaxoxëë. ¡Rŭ pexuãëgü na tama ngürüãchi Tupanamaã yŭxŭ i penuëxŭ! —ñanagürü. Rŭ guxŭma ga yema ãëxgacügü rü naga naxŭnëë ga yema norü ucuxë. ⁴⁰ Rŭ ñuxŭchi nanachocuxëë ga yema ngúexŭgü ga Ngechuchu imugŭxŭ. Rŭ nayacuaixgü. Rŭ nüxna naxãga na tama Ngechuchhiga yadexagŭxŭcëx. Rŭ yemawena rü nayangëxgü. ⁴¹ Rŭ yema ãëxgacügüna Ínixŭ ga yema ngúexŭgü. Rŭ nataãëgü yerü woetama Tupana nanaxwëxe ga yemaãcü Ngechuchucëx ngŭxŭ na yangegŭxŭ. ⁴² Rŭ guxŭ ga ngunëxŭgu tupauca ga taxŭnëwa rü Ípatagüwa, rü nanangúexëëãma, rü nüxŭ nixugüetanü ga ore ga mexŭ ga Ngechuchu ya Cristuchiga.

6

Yema ngúexŭgü ga Ngechuchu imugŭxŭ rü nüxŭ naxuneta ga 7 ga yatügü na nüxŭ nangŭxëëgŭxŭcëx ga Tupanaãrü puracüwa

¹ Rŭ yexgumaãcü rü yexeraãcü nimuchigü ga yema duŭxŭgü ga yaxögŭxŭ. Rŭ natanüwa nayexmagü ga Yudiügŭchirëx ga Griëguanewa ne

ix̄l rü Griégugawa idexagüx̄l. Rü nayexma ta ga yaxögüx̄l ga Yudiügü ga Yerucharéuc̄üâx̄ ga woetama nagawa idexagüx̄l. Rü yema yaxögüx̄l ga Griégugawa idexagüx̄l rü nidexagüecha nachigagu ga yema yaxögüx̄l ga Yerucharéuc̄üâx̄gü ix̄igüx̄l, rü ñanagürügü: —Totanüwa yutegüxe rü tama meã òna tüxna naxägüx̄l i ngëxguma òna inaxägüx̄l xgu i wüxichigü i ngunexügu —ñanagürügü. ² Rü yexguma ga yema 12 ga ngüex̄tügü ga Ngechuchu imugüx̄l rü gux̄üma ga yema yaxögüx̄l nangutaquëxëxëgü, rü ñanagürügü nüx̄l: —Tama name na ítanangéx̄l i Tupanaärü orearü uchiga i tomax na ònamaã itacuáx̄cëx. ³—Rü ngëmacëx, Pa Tomücügüx, rü ¡Naxcëx pedëux i petanüwa ya 7 ya yatügü ya gux̄üma nüx̄l ngechaücü, rü meã naãëx̄l cuácü, rü aixcüma Tupanaãë i Üünex̄l nawa ngëxmacü! Rü toma tá nüxna tanax̄l i ngëma puracü na nümagü ònamaã inacuëxgüx̄cëx. ⁴—Rü ngëxguma i toma rü yumüxëwa rü Tupanaärü orearü uchigawaxicatama tá tapuracüë —ñanagürügü. ⁵ Rü yexguma ga gux̄üma ga yema duüxügü rü: —Ngü —ñanagürügü naxcëx ga yema ore. Rü nüx̄l naxunetagü ga Etébaü ga meã yaxöcü rü aixcüma Tupanaãë i Üünex̄l nawa yexmacü, rü Piripi, rü Pócoro, rü Nicanúru, rü Timú rü Parumënu, rü Nicuráchi ga Aütioquiácüâx̄ ga tauta Ngechuchuax̄l yaxöögü Yudiügücüma yaxucü. ⁶ Rü yema ngüex̄tügü ga Ngechuchu imugüx̄lütawa nanagagü. Rü nümagü naxmëxmaã nüx̄l yangögüäcüma naxcëx nayümüxëgü. ⁷ Rü yema Tupanaärü ore rü yexeraäcü nix̄ichigü. Rü poraäcü nimuëtanü ga yema yaxögüx̄l ga Yerucharéüwa. Rü woo mux̄chix̄üma ga Yudiügüarü paigü rü ta Ngechuchuax̄l nayaxögü.

Etébaüx̄l niyauxgü

⁸ Rü Etébaü nix̄l ga wüxi ga yatü ga Tupana poraäcü nüx̄l rüngüx̄ëëcü rü naporaxëëcü na duüxügütanüwa naxüäx̄cëx ga mexügü ga taxügü rü cuëxrüügü ga Tupanaärü poramaã naxüx̄l. ⁹ Rü nayexma ga wüxi ga ngutaquëxepataü ga Yudiügüarü ga Ingux̄üx̄lärü Ngutaquëxepataügu äegane. Rü gumawa nangutaquëxegü ga duüxügü ga üpaacü corigümëxëwa yexmagüx̄l. Rü ñuxre ga guma ngutaquëxepataücüâx̄ rü wüxigu namaã ga ñuxre ga Chireneäneçüâx̄, rü Aleyädriaaneçüâx̄, rü Chirichigataneçüâx̄, rü Áchiaarü naãneçüâx̄, rü inanaxügüe ga Etébaümaã na iyaporagatanücüüx̄l. ¹⁰ Natürü taxuacüma Etébaüx̄l narüyexeragü, yerü nüma ga Etébaü rü nidexa namaã ga yema cuëx ga Tupanaãë i Üünex̄l nüxna äx̄l. ¹¹ Rü yexguma ga yema duüxügü rü togüax̄l nanaxütanügü na Etébaüchiga dorax̄l yaxugüx̄cëx. Rü ñanagürügü ga yema idoraegüx̄l: —Toma nüx̄l tax̄inüëgu, rü Moïchéchiga rü Tupanachigamaã chixex̄l ga ore nixugü ga Etébaü —ñanagürügü. ¹² Rü yemaäcü nananuëxë ga duüxügü rü Yudiügüarü äëxgacügüerugü rü ngüexëerüügü ga ore ga mugüwa ngüxëëtaegüx̄l. Rü yemacëx Etébaücëx nibuxmü, rü nayayauxgü, rü äëxgacügüerugü ingutaquëxegüx̄lwa nanagagü. ¹³ Rü naxcëx nadaugü ta ga yatügü ga dorax̄l ixugüemarex̄l rü yema rü ñanagürügü: —Ñã yatü rü gux̄üguma chixex̄lmaã nidexa i nachigagu ya daa tupaüca ya tax̄üne, rü nachigagu i Tupanaärü mugü. ¹⁴—Rü toma rü nüx̄l tax̄inüë rü:

“Yima Ngechuchu ya Nacharéuc̄üâx̄ rü tá nanangutaüxëë ya daa tupaüca, rü tá inayanaxoxëë i nacümagü ga Moïché tüx̄l ngüexëëx̄l”, —ñanagürügü. ¹⁵ Rü yexguma Etébaüx̄l nadaunügu ga gux̄üma ga yema äëxgacügü ga yéma rütogüx̄l, rü nüx̄l nadaugü ga nachametü rü wüxi ga dax̄ü-cüâx̄ ga orearü ngeruüchametürüü na yiix̄l.

7

Etébaŭrū ore

¹ Rū nūma ga paigüeru, rū Etébaŭna naca rū űanagürü: —¿Aixcūma yīxŭ i űaā ore i nūxŭ yaxugüexŭ? —űanagürü. ² Rū Etébaŭ nanangāxŭ, rū űanagürü: —Pa Chautanūxŭ Pa Āēxgacügŭx, ¡Choxŭ iperüxīnŭē! Guma Tupana ya mexēchicŭ, rū nuxcūmaŭcŭ ga tórŭ oxŭ ga Abráŭcēx nangox ga yexguma Mechopotámīāārŭ naānegu naxāchiŭgu ga yexguma tauta Aráŭārŭ naānewa naxūxgu na yexma yaxāchiŭxŭcēx. ³—Rū Tupana rū űanagürŭ nūxŭ:

“¡Nŭxna ixŭ i cuchīŭāne rū cutanūxŭ, rū ngēma choma tá cuxŭ nūxŭ chadauxēēxŭ i naānewa naxŭ!”

űanagürŭ. ⁴—Rū yexguma inaxūxŭ ga Abráŭ nawa ga yema Cadéucŭāxārŭ naāne ga ngextá noxri inaxāchiŭxŭwa, rū Aráŭārŭ naānegu nayaxāchiŭ. Rū yexguma nanatŭ yuxguwena, rū űoma ga naāne i űuxma nagu pexāchiŭxŭwa naxŭ, yerŭ yemaācŭ Tupana nūma nanaga. ⁵—Natürŭ yexguma rū ta taxūma ga noxrŭxŭchi ga naāne nŭxna naxā ga Tupana i űoma i naānewa, rū bai ga iraxŭ ga noxrŭxŭchi ga naāne. Natürŭ Abráŭmaā inaxuneta ga yixcama tá nŭxna na naxāxŭ ga űoma i naāne na noxrŭxŭchi yīxŭcēx, rū yixcama marŭ nayuxguwena rū nanegŭarŭ na yīxŭcēx. Rū yemaācŭ Abráŭmaā inaxuneta ga woo na nangexacŭxŭ ga yexguma. ⁶—Rū űanagürŭ Abráŭxŭ ga Tupana:

“Rū yixcama i cutaagŭ rū tá to i nachīŭāne i tama noxrŭ ixŭxŭwa nangēxmagŭ. Rū ngēma nachīŭānecŭāx i duŭxŭgŭ rū norŭ duŭxŭgŭxŭ tá nayaxŭgŭxēē. Rū 400 ya taunecŭ rū ngēma duŭxŭgŭ rū tá chixri namaā nachopetŭ i cutaagŭ. ⁷ Natürŭ choma tá chanapoxcue i ngēma nachīŭānecŭāx i norŭ duŭxŭgŭxŭ yaxŭgŭxēēxŭ. Rū ngēmawena i cutaagŭ rū tá inachoxŭ nawa i ngēma naāne, rū nuā űaā i naānewa tá choxŭ nicuēxŭgŭ”,

űanagürŭ ga Tupana. ⁸—Rū yexguma Tupana rū Abráŭ rū nŭgŭmaā nanamexēē, rū űanagürŭ ga Tupana:

“Choma rū tá cuxŭ charŭngŭxēē ega cuma rū guxŭma i cutanūxŭgŭ ipewiŭchēxmŭpēxechiraŭgu. Rū ngēma tá nixŭ i cuēxrui i yigŭmaā imexēēxŭ”,

űanagürŭ ga Tupana. Rū nabu ga wŭxi ga nane ga Abráŭ, rū Ichaágu nanaxŭéga. Rū yexguma 8 ga norŭ ngunexŭwa nanguxgu ga Ichaá, rū nŭmatama ga Abráŭ rū inanawiechēxmŭpēxechiraŭ. Rū yexguma marŭ nayēxgu ga Ichaá rū nabu ga nane ga Acobu, rū nŭmatama ga Ichaá rū inanawiechēxmŭpēxechiraŭ. Rū yixcama marŭ nayēxgu ga Acobu rū nūxŭ nayexma ga 12 ga nanegŭ. Rū nŭmatama ga Acobu rū inanawiechēxmŭpēxechiraŭ ga guxŭma ga yema 12 ga nanegŭ. Rū yema 12 ga nanegŭ nixŭ ga yema 12 ga nuxcūmaŭgŭxŭ ga tórŭ oxigŭ. ⁹⁻¹⁰—Rū yema 12 ga Acobu nanegŭ ga tórŭ oxigŭ ixŭgŭxŭtanŭwa rū wŭxi rū Yúche nixŭ ga naega. Natürŭ naēneēgŭ ga guma Yúche rū nixāxāchie, rū yemacēx Equituarŭ naānewa ixŭ ga taxetanūxŭxŭ Yúchemaā nataxegŭ na Equituarŭ naānewa nagagŭāxŭcēx. Natürŭ Tupana rū Yúchemaā nayexma, rū nūxŭ narŭngŭxēē na tama pecadu naxŭxŭcēx ga yexguma guxchaxŭwa nayexmagu. Rū nŭxna nanaxā ga cuēx, rū Yúchexŭ narŭngŭxēē ga meā na nayaxāxŭcēx ga Equituaneārŭ āēxgacŭ ga Faraŭ. Rū yemacēx ga Faraŭ rū āēxgacŭxŭ nayangucuchixēē. Rū nūma ga Yúche nixŭ ga āēxgacŭ ga Faraŭpatawa rū guxŭma ga yema nachīŭānewa. Rū Faraŭxŭcatama nixŭ ga Yúchearŭ yexera

na ãëxgacü yïxŭ ga yema naãnewa. ¹¹—Rü yexgumaŭcüü nayexma ga taiya ga guxŭ ga Equituarü naãnewa rü Canaãrŭ naãnewa. Rü poraãcü taiya nüxŭ nangux ga duŭxŭgü. Rü yemacèx ga yema nuxcŭmaŭgŭxŭ ga tóru oxigü rü düxwa taxuacŭma nüxŭ inayangaugü ga nabü ga Canaãrŭ naãnewa. ¹²—Natürü yexguma nüxŭ nacuáchigaxgu ga Acobu ga na nayexmaxŭ ga nabü ga Equituanewa, rü yéma nanamugü ga nanegü ga guma tóru oxigü ixigücü. Rü yema nixŭ ga nawa inaxŭgŭxŭ ga noxrima nabüçèx Equituanewa na naxŭxŭ. ¹³—Rü yixcama marü naguxgu ga yema nabü rü wenaxärü Equituanewa naxŭ nawa ga nabü. Rü yexguma wenaxärü yéma naxŭxgu ga naëneëgü, rü nügü nixu ga Yúche namaã. Rü yexguma nüxŭ nacuèx ga Faraŭ ga ngextáçŭãx na yïxŭ ga Yúche. ¹⁴—Rü yixcamaxŭra ga Yúche rü tümacèx nangema ga nanatü rü guxŭma ga natanŭxŭ. Rü maneca 75wa nangu ga yema duŭxŭgü ga Yúchetanŭxŭ. ¹⁵—Rü yemaãcü Equituanewa naxŭ ga Acobu na yexma yaxächiŭxŭcèx. Rü yexma nayu ga nümax. Rü yexma nayue ta ga nanegü ga tóru oxigü. ¹⁶—Rü yexguma nayuxgu ga Acobu, rü Chiquéŭwa nanangegü ga naxŭne na yexma yatèxgŭãxŭcèx nagu ga yema naxmaxŭ ga Abráŭ díerumaã naxcèx taxexŭ ga Amú nanegŭxŭtawá ga Chiquéŭwa. ¹⁷—Rü düxwa nawa nangu na Equituanewa inanguxŭxŭcèx ga tatanŭxŭ ga yexgumarŭŭ ga Tupana Abráŭmaã ixu-netaxŭ. Rü yexguma rü marü poraãcü nimu ga tatanŭxŭ ga Equituanewa. ¹⁸—Rü yexguma ningucuchi ga to ga Equituanearü ãëxgacü ga tama Yúchechigaxŭ cuáxŭ. ¹⁹—Rü yema ãëxgacü rü tatanŭxŭxŭ nawomŭxëë rü chixri tümamaã naxŭpetü ga guxema nuxcŭmaŭgŭxe ga tóru oxigü. Rü tüxŭ namu na yexwaca buexe ga tümamaxŭgŭxŭ ítawogŭxŭ na tayuxŭcèx. ²⁰—Rü yexgumaãcüü nabu ga Moíché, rü Tupanaãxŭ nangúchaŭ. Rü tomaëxpŭx ga tauemacü nüxna tadaugü ga tümapatawa ga naë rü nanatü. ²¹—Rü yexguma düxwa ítanatèxgŭgu, rü Faraŭxácü inayaxu, rü ngŭnexŭ inayaxëë. ²²—Rü yemaãcü Moíchéxŭ nanguxëëgü ga guxŭma ga Equituanecŭãxärü cuèx. Rü nüma ga Moíché rü wŭxi ga ãëxgacü ga poracü nixŭ, rü norü dexawa rü ta napora. ²³—Rü yexguma 40 ga norü taunecüwa nanguxgu ga Moíché rü nagu narŭxŭnŭ ga natanŭxŭgü ga Yudiŭgŭtanŭgu na naxŭãneãxŭ. ²⁴—Rü nüxŭ nadau ga wŭxi ga Equituanecŭãx ga wŭxi ga Yudiŭxŭ na naçuaxixŭ. Rü yemacèx ga Moíché rü yema Yudiŭéçŭwa ínayuxu, rü yema Equituanecŭãxŭ nimèx rü nanayuxëë. ²⁵—Rü nüma ga Moíché nagu rŭxŭnŭgu rü chi natanŭxŭgü ga Yudiŭgŭ rü chi nüxŭ nacuèxgü na Tupana yéma namuxŭ na inanguxŭxŭëãxŭcèx. Natürü tama nüxŭ nacuèxgŭëga ga yema natanŭxŭgü. ²⁶—Rü moxŭãcü ga Moíché rü nüxŭ nadau ga to ga taxre ga Yudiŭgü ga nügü yexma dèixŭ, rü nüxna nachogúchaŭ. Rü ñanagŭrŭ nüxŭ:

“Pema rü pegŭtanŭxŭgü pixŭgü. ¿Rü tüxcüŭ pegü pedai i pemax?” ñanagŭrŭ. ²⁷—Rü yexguma ga yema namüçŭxŭ íçuaxixŭ rü Moíchéxŭ natèxneta, rü ñanagŭrŭ nüxŭ:

“¿Texé cuxŭ tamu na toeru quíxŭcèx rü tomaã icucuáxŭcèx? ²⁸—¿Éxna choxŭ quimáxchaŭ ta, ga íne quimáxŭ ga Equituanecŭãxŭrŭ?” ñanagŭrŭ. ²⁹—Rü yexguma yemaxŭ naxŭnŭgu ga Moíché, rü niña ga yema naãnewa. Rü Madiáŭnewa naxŭ. Rü yema nachiŭãne ga tama noxru íxŭxŭgu nayaxächiŭ. Rü yexma naxãmèx rü nabu ga taxre ga nanegü. ³⁰—Rü 40 ga taunecŭguwena ga dauxchitawa ga Chinaŭ ga mëxpŭneärü ngaicamana, rü wŭxi ga naixètaxacü ga yéma iyauraxŭwa Moíchéçèx nangox ga wŭxi ga

Tupanaārū orearū ngeruū ga daxūcūāx. ³¹—Rū naḥaixāchiāē ga Moīché ga yexguma nūxū nadēuxgu. Rū naxcēx nixū rū nūxna nangaicama na meā nūxū nadauxūcēx. Rū yexguma Moīchémaā nidxa ga Cori ga Tupana, rū ḥanagūrū nūxū:

³²“Choma nixī i curū oxiguarū Tupana chiixū rū Abráū rū Ichaá rū Acobuarū Tupana chiixū”,

ḥanagūrū. Rū yexguma ga Moīché rū inanaxūgū ga norū muūmaā na yaduruxū. Rū namuū ga yexma na nadawenūxū. ³³—Rū yexguma ga Cori ga Tupana rū ḥanagūrū nūxū:

“¡Inacuaixū i curū chapatu erū ḥaā naāne i nagu cuchixū rū naxūūne, erū chanuxma! ³⁴ Choma rū ngóxūwama nūxū chadau i ḥuxācū poraācū ngūxū na yangegūxū i chorū duūxūgū i Equituanewa. Rū nūxū chaxīnū i na naxauxēxū. Rū ngēmacēx nūma chaxū i ichananguxūxēēxūcēx. ¡Nuā naxū na Equituanewa cuxū chamuxūcēx!”, ḥanagūrū. ³⁵—Rū woo ga noxri ga nūmagū ga natanūxūgū rū guma Moīchéxū naxoe ga yexguma ḥagūgu:

“¿Rū texē cuxū tamu na toeru quiixūcēx rū tomaā icucuáxūcēx?” ḥagūgu, natūrū ga Tupana rū yēma nanamuāma na yema duūxūgūxū ínganguxūxēēxūcēx rū norū āēxgacū na yīixūcēx. Rū yemaācū Moīchéxū namu ga Tupana ga yexguma naxūtawa namuāxgu ga yema norū orearū ngeruū ga yema naixētaxacū ga iyauraxūwa naxcēx ngóxū. ³⁶—Rū Moīché nixī ga Equituarū naānewa íngaxūxū ga nuxcūmaūgūxū ga tórū oxigū. Rū Equituanewa, rū Dauchiūxū ga Taxtūwa, rū dauxchitawa ga ngextá taxúema íxāpataxūwa inanawēx ga cuēxruūgū, rū nanaxū ga mexū ga taxūgū ga Tupanaārū poramaā naxūxū. Rū yemaācū 40 ga taunecū nūxū na rū-ngūxēē ga yema duūxūgū. ³⁷—Rū nūmatama ga Moīché nixī ga tatanūxūgū ga Yudíugūmaā ḥaxū:

“Tupana rū yixcūra tá pexcēx nūxū naxuneta i petanūwa i wūxi i norū orearū uruū ga yexgumarūū ga choxū na naxunetaxūrūū”,

ḥanagūrū. ³⁸—Rū nūmatama ga Moīché nixī ga nuxcūmaūgūxū ga tórū oxigūmaā nangutaquēxēxū ga yema naāne ga ngextá taxúema íxāpataxūwa. Rū tórū oxigūmaā nayexma ga Chinaī ga mēxpūnewa ga yexguma namaā yadeaxgu ga Tupanaārū orearū ngeruū ga daxūcūāx. Rū nūmatama ga Moīché nixī ga nayauxāxū ga Tupanaārū ore i maxēxēēruū na nūxī tūxna naxāāxūcēx. ³⁹—Natūrū ga tórū oxigū rū tama naga naxīnūēchaū ga guma Moīché. Rū ínatēxūchigūama, rū Equituaneguama narūxīnūāēgū. ⁴⁰—Rū tórū oxigū rū Moīchéeneē ga Arāūxū ḥanagūrūgū: “¡Rū toxcēx naxū i tupanachicūnēxāgū na nawe tarūxūcēx! Erū tama nūxū tacuēxgū i tacū nūxū na ūpetūxū i ngēma Moīché ga Equituanewa tūxū yagagūxū”, ḥanagūrūgū. ⁴¹—Rū yexguma nanaxūgū ga wūxi ga wocaxacūchicūnēxā norū tupanaxū. Rū ḥuxūchi naxcēx nanadai ga ḥuxre ga carnerugū na yemamaā nūxū yacuēxūgūxūcēx. Rū wūxi ga peta naxcēx naxūgū ga yema wocaxacūchicūnēxā ga nūmatama naxūgūxū. ⁴²—Rū yemacēx ga Tupana rū nūxna nixūgachi ga yema duūxūgū. Rū ínanawogū na woramacuri rū ūēxcū rū taugemacūmaā natupanaāxēēāxūcēx. Yerū yemaācū Tupanaārū orearū uruūgārū poperagu naxūmatū, rū ḥanagūrū:

“Pema, Pa Yudíugūx, ¿Chauxcēx yīixū ga penadēixū ga carnerugū ga yexguma 40 ga taunecū dauxchitawa ga ngextá taxúema íxāpataxūwa peyexmagūgu? ⁴³ Tama aixcūma chauxcēx nixī yerū ga pema rū ngextá

İpexİxŭwa rŭ İpenangeexŭ ga napata ga perŭ tupananeta ga Moro rŭ İpenangeexŭ ga perŭ tupananeta ga Refããrŭ woramacurichicŭnèxã. Rŭ yemaãcŭ pegŭmaã İpenangeexŭ ga yema tupananetachicŭnèxãgŭ ga pematama pexŭgŭxŭ na nŭxŭ picuèxŭŭgŭxŭcèx. Rŭ ngēmacèx i ñuxma rŭ perŭ naãnewa tá pexŭ İchawoxŭ rŭ yaxŭwa i Babiró-niããrŭ yexerawa tá pexŭ chamugŭ”,

ñanagŭrŭ ga Tupana ga yema orewa. ⁴⁴—Rŭ yema naãne ga ngextã taxúema İxãpataxŭwa rŭ tórŭ oxigŭ nŭxŭ nayexma ga wŭxi ga İpata ga naxchirunaxcèx ga nagu namaã nanguxŭgŭne ga Tupanaãrŭ mugŭ ga nŭtagu ũmatŭxŭ. Rŭ guma İpata ga naxchirunaxcèx nixŭ ga nŭxŭ naweãcŭma Tupana Moİchéxŭ naxŭxèxene. ⁴⁵—Rŭ yexguma nayuxguwena ga Moİché, rŭ Yochué ningucuchi ga ãëxgacŭ na yİxŭ. Rŭ tórŭ oxigŭ rŭ nuã tórŭ naãnewa nanangegŭ ga guma İpata ga naxchirunaxcèx ga yexguma Yochuémaã napugŭãgu ga ñã naãne nŭxna ga yema duŭxŭgŭ ga Tupana İwoxŭxŭ napèxewa ga tórŭ oxigŭ. Rŭ nŭma nayexma ga guma İpata rŭ ñuxmata Dabí İngucuchigu ga ãëxgacŭ na yİxŭ. ⁴⁶—Rŭ guma ãëxgacŭ ga Dabí rŭ Tupana rŭ poraãcŭ namaã nataãe, rŭ nŭxŭ narŭngŭxèe. Rŭ nŭma ga Dabí rŭ Tupana naxcèx naca na naxŭãxŭcèx ga wŭxi ga tupauca ga taxŭne ga nawa Tupanaxŭ na yacuèxŭŭgŭxŭcèx ga tatanŭxŭgŭ ga Acobutaagŭ. ⁴⁷—Natŭrŭ Dabí nane ga Charumóu nixŭ ga naxŭcŭ ga guma tupauca ga Tupanacèx ixİxŭne. ⁴⁸—Natŭrŭ ya Tupana ya tacŭxŭchima rŭ tama duŭxŭgŭ ũxŭne ya tupaucagŭmaã naxãpata. Rŭ yemacèx ga Tupana rŭ nuxcŭmaŭcŭ ga norŭ orearŭ uruŭwa rŭ ñanagŭrŭ:

⁴⁹⁻⁵⁰ “Choma nixŭ ya ãëxgacŭ ya tacŭxŭchima, rŭ daxŭguxŭ i naãne nixŭ i chorŭ toxmaxwèxeruŭ ixİxŭ rŭ ñoma i naãne nixŭ i chorŭ chicutŭruŭ ixİxŭ. ¿Rŭ ñuxŭcŭrŭwa i nagu perŭxŭnŭèxŭ tá na penaxŭxŭ ya wŭxi ya tupauca ya chaugu mexŭne?”

ñanagŭrŭ ga Cori ya Tupana. Rŭ ñanagŭrŭ ta ga Tupana:

“¿Tama èxna choma yİxŭ ichanaxŭxŭ ga guxŭma i tacŭ i ngèxmaxŭ? ¿Rŭ ñuxãcŭ chi penaxŭxŭ i wŭxi i nachica i nagu charŭngŭxŭ?”

ñanagŭrŭ ga norŭ orewa. ⁵¹ Rŭ ñanagŭrŭ ga Etébaŭ: —Dŭcèx Pa ãëxgacŭgŭx, pema rŭ guxŭguma nŭxŭ pexoe i Tupanaãrŭ ore, rŭ tama İperŭxŭnŭèchaŭ. Rŭ peãewa rŭ tama peyaxögŭchaŭ. Rŭ pema rŭ guxŭguma Tupanaãe i ũnèxŭmaã penuèècha. Yema nuxcŭmaŭgŭxŭ ga perŭ oxigŭrŭŭtama pixŭgŭ i pemax. ⁵²—Rŭ perŭ oxigŭ rŭ chixeãcŭma namaã nachopetŭ ga guxŭma ga Tupanaãrŭ orearŭ uruŭgŭ. Rŭ nanadai ga yema orearŭ uruŭgŭ ga nŭxŭ İxuchigagŭxŭ ga na nŭma naxŭxŭ tá ga guma mecŭ ya Ngechuchu. Rŭ yexguma İnanguxgu ga guma Ngechuchu rŭ pema Piratuna penamu rŭ penayuxèe. ⁵³—Rŭ woo pema rŭ Tupanaãrŭ orearŭ ngeruŭgŭ ga daxŭcŭãxŭtawa penayaxu ga Tupanaãrŭ ore, natŭrŭ tama naga pexŭnŭe —ñanagŭrŭ ga Etébaŭ.

Nayu ga Etébaŭ

⁵⁴ Rŭ yexguma nŭxŭ naxŭnŭègu ga yema ore, rŭ nanuèxŭchiama ga yema duŭxŭgŭ. Rŭ norŭ nŭmaã Etébaŭcèx nixŭxchapŭtagŭ. ⁵⁵ Natŭrŭ ga Etébaŭ rŭ aixcŭma Tupanaãe i ũnèxŭ nawa nayexma. Rŭ daxŭ nadawenŭ, rŭ nŭxŭ nadau na ñuxãcŭ namexèchixŭ ga Tupana. Rŭ nŭxŭ nadau ga Ngechuchu ga Tupanaãrŭ tŭgŭneguama chicŭ. ⁵⁶ Rŭ yexguma rŭ ñanagŭrŭ: —Nŭxŭ chadau i na yangoxnaãchixŭ i naãnetŭwe, rŭ nŭxŭ chadau ya Cristu

ya Tupana Nane ya duũxũxũ ixĩcũ ya Tupanaãrũ tũgũneguama chicũ — ñanagũrũ ga Etẽbaũ. ⁵⁷ Natũrũ nũmagũ rũ nũgũ narũtũtamachĩxẽgũ, rũ tagaãcũ aixta naxũeãcũma nũxna nayuxgũ. ⁵⁸ Rũ ñanagaxũchigũ ga ñanewa, rũ nutagũmaã ñanamuxũchigũ. Rũ yẽma nayexma ga wũxi ga ngextũxũxũ ga Chaurugu ãegaxũ. Rũ yemaxũ nanawotanũ ga norũ gãuxũchirugũ ga ñacuxuchigũxũ ga yema duũxũgũ ga Etẽbaũxũ imẽxgũxũ. ⁵⁹ Rũ yexguma nutamaã ñamuxũchigũãguyane, rũ nayumũxẽ ga Etẽbaũ rũ ñanagũrũ: —Pa Cori Pa Ngechuchux, ¡Nayaxu i chauãẽ! —ñanagũrũ. ⁶⁰ Rũ yemawena rũ ñacaxãpũxũ, rũ tagaãcũ aixta naxũ, rũ ñanagũrũ: —Pa Cori Pa Tupanax, ¡Tãxũ i ñãã pecaducẽx cunapoxcuxẽx i ñãã duũxũgũ! —ñanagũrũ. Rũ yexguma yema ñaxguwena rũ nayu.

8

Chauru rũ guxema yaxõgũxewe ningẽchigũ na tũxũ napoxcuxẽx

¹ Rũ Chauru rũ norũ me nixĩ ga Etẽbaũxũ na yamẽxgũxũ. Rũ yematama ngunexũgu rũ norũ uwanũgũ rũ ñanaxũgũe ga na poraãcũ nawe yangẽxũtanũxũ ga yema yaxõgũxũ ga Yerucherũwa yexmagũxũ. Rũ dũxwa ga guxũma rũ Yudeãanegu rũ Chamãriaanegu nũgũ nawoone. Rũ yema ngũexũgũ ga Ngechuchu imugũxũxĩcatama ñayaxũgũ ga Yerucharẽũwa. ² Rũ ñuxre ga yatũgũ ga meãma Tupanaãxũ yaxõgũxũ rũ nanayauxgũ ga Etẽbaũxũne, rũ ñanatẽxgũ rũ poraãcũ naxcẽx naxauxe. ³ R yexguma ga Chauru rũ chixri tũmamaã naxũpetũ ga guxema yaxõgũxe. Rũ tũmapatagu nixũcuchigũ na tũxũ ñayauxũxũcẽx. Rũ yẽma tũxũ ñatũxũ ga yatũgũ rũ ngexegũ, rũ ñuxũchi poxcupataũgu tũxũ nawocu.

Chamãriawa nũxũ nixuchiga ga Tupanaãrũ ore i mexũ

⁴ Rũ yema yaxõgũxũ ga Chauruchaxwa ibuxmũxũ ga Yerucharẽũwa, rũ guxũwama ga ngextã ñaxĩxũwa rũ nũxũ nixuchigagũ ga ñuxãcũ Ngechuchu tũxũ na maxẽxẽẽxũ. ⁵ Rũ Piripi nixĩ ga wũxi ga yema orexũ ixuchigacũ. Rũ nũma rũ ñãne ga Chamãriawa naxũ, rũ yẽma ñanaxũgũ ga Cristuchigaxũ na yaxuxũ. ⁶ Rũ yema duũxũgũ ga Chamãriacũãx, rũ Piripicẽx nangutaquẽxegũ. Rũ guxũma meãma ñarũxĩnũẽ ga yema ore ga namaã nũxũ yaxuxũ, yerũ nũxũ nadaugũ ga yema mexũgũ ga taxũgũ ga Tupanaãrũ poramaã naxũxũ ga Piripi. ⁷ Rũ muxẽma ga duũxẽgũ ga ngoxogũ tũmawa yexmaxẽ rũ tũmacẽx nitaanegũ. Rũ yema ngoxogũ rũ tagaãcũ aita naxũeãcũma tũmawa ñachoxũ. Rũ yexgumarũũ ta rũ muxẽma ga nawãixãchigũxe rũ chixeparagũxe rũ tũmacẽx nitaanegũ. ⁸ Rũ yemacẽx poraãcũ nataãẽgũ ga guxũma ga duũxũgũ ga guma ñãne ga Chamãriawa. ⁹ Natũrũ guma ñanewa nayexma ga wũxi ga yatũ ga Chimãũgu ãegaxũ ga ñuxre ga taunecũ norũ yuũmaã duũxũgũxũ womũxẽẽxũ ga guma ñanewa. Rũ nũgũ nixu ga na wũxi ga tacũxũ cuãxũ na yĩĩxũ. ¹⁰ Rũ guxũma meãma nũxũ ñarũxĩnũẽ woo ga buxũgũ rũ yaxũgũ. Rũ ñanagũrũgũ: —Ñãã yatũ rũ aixcũma nũxũ nangẽxma i Tupanaãrũ pora i taxũ —ñanagũrũgũ. ¹¹ Rũ naga naxĩnũẽ ga duũxũgũ, yerũ mucũma ga taunecũ rũ norũ yuũmaã nanawomũxẽẽ. ¹² Rũ Piripi rũ yema duũxũgũmaã nũxũ nixu ga ore ga mexũ ga Ngechuchu ga Cristuchiga, rũ ñuxãcũ na ãẽxgacũ yĩĩxũ ya Tupana. Rũ yexguma yema ore yaxõgũga ga duũxũgũ, rũ Piripi ñanabaiũxẽẽ ga yatũxũ rũ ngexũgũ. ¹³ Rũ nũmatama ga Chimãũ rũ ta nayaxõ, rũ ñabaie. Rũ ñanaxũgũ ga Piripixũ na naxũmũcũxũ. Rũ yexguma nũxũ nadẽuxgu ga yema cuẽxruũgũ rũ mexũgũ ga taxũ ga Tupanaãrũ poramaã naxũxũ

ga Piripi, rü poraãcü nabaixãchiãe ga Chimáũ. ¹⁴ Rü yema Ngechucharü ngüexũgü ga Yerucharéüwa yexmagüxũ rü nüxũ naxĩnüëchiga ga meã na nayauxgüãxũ ga Tupanaãrü ore ga Chamáriawa. Rü yemacèx yéma nana-mugü ga Pedru rü Cuáũ. ¹⁵ Rü yexguma Chamáriawa nangugügu ga Pedru rü Cuáũ, rü naxcèx nayumüxègü ga yema yexwaca yaxögüxũ ga duũxũgü, na nayauxgüãxècèx ga Tupanaãe i Üünexũ. ¹⁶ Yerü yexguma noxri yaxögüãgu ga yema duũxũgü rü Piripi marü ìnanabaiũxèëmære naegagu ga Cori ga Ngechuchu, natürü taxuxũnata nangu ga Tupanaãe i Üünexũ. ¹⁷ Rü yemacèx ga Pedru rü Cuáũ naxmèxmaã nüxũ ningögügü ga yema yaxögüxũ, rü yexguma nanayauxgü ga Tupanaãe i Üünexũ. ¹⁸⁻¹⁹ Rü nüxũ nadau ga Chimáũ ga na duũxũgüna nanguxũ ga Tupanaãe i Üünexũ ga yexguma Pedru rü Cuáũ naxmèxmaã yema duũxũgüxũ yangögügügu. Rü yemacèx diëru Pedru rü Cuáũna ngĩxũ naxãxchaũ ga Chimáũ rü ñanagürü nüxũ: —jChoxna rü ta penaxã i ngëma pora, na yíxema tüxũ chingögüxe rü ta tüxna nanguxũcèx i Tupanaãe i Üünexũ! —ñanagürü. ²⁰ Rü yexguma ga Pedru rü ñanagürü nüxũ: —jCuxrüũtama iyanataxux i curü diëru, erü ngĩmaã naxcèx cutaxechaũ i Naãe i Üünexũ i Tupana tüxna mumarexũ! ²¹ Cuma rü taxucürüwama cunayaxu i ngëma pora, erü curü maxũ rü tama name i Tupanapèxewa. ²² jNüxũ rüxo i ngëma curü chixexũ, rü Tupanana naxcèx naca na cuxũ nüxũ nangechaũxècèx! Rü bexmana tá cuxũ nüxũ nangechaũ i ngëma chixexũ i cuãëwa nagu curüxĩnũxũ. ²³ Erü nüxũ chacuèx rü poraãcü cunuãëwèxe, rü ngëma curü chixexũ rü cumaã inacuèx rü ñoma cupoxcuxürüxũ cuxũ nixĩxèe —ñanagürü. ²⁴ Rü Chimáũ nanangãxũ, rü ñanagürü: —jPema Tupanana chauxcèx peça na tama choxũ nangupetüxècèx i ngëma nüxũ pixuxũ! —ñanagürü. ²⁵ Rü Pedru rü Cuáũ rü yema Chamárianecũãx ga duũxũgümaã nüxũ nixugüe ga Cori ga Ngechuchuchiga, rü namaã nüxũ nixugüe ga Tupanaãrü ore. Rü yemawena rü Yerucharéücèx nawoegu. Rü namawa rü muxüne ga Chamárianewa yexmane ga ìñanexãcügüwa rü nüxũ nixuetanü ga Tupanaãrü ore i mexũ.

Piripi rü namagu nüxũ nangau ga wüxi ga ãëxgacü ga Etiópiianecũãx

²⁶ Rü yemawena, rü Tupanaãrü orearü ngeruũ ga daxũcũãx rü Piripimaã nüxũ nixu, rü ñanagürü: —jRü paxa inaxũãchi rü ìãne ya Gachawaama naxũ nawa i ngëma nama i Yerucharéüwa ne daxũ rü Gachawa iyarügoxũ! —ñanagürü. Rü ngëma nixĩ i nama i dauxchitawa i ngextá taxüema ìxãpataxũtwa dapetüxũ. ²⁷ Rü inaxũãchi ga Piripi rü yema namawa naxũ. Rü yexma nügü nangau namaã ga wüxi ga yatü ga Etiópiianenanguxũ ga guxcüma ga yema ãëxgacüaru diëru. Rü ìneãcü Yerucharéüwa naxũ na Tupanaxũ yanacuèxüxècèx. ²⁸ Rü nachiũñanecèx nataegu, rü norü autu ga cowaru itúchigünewa narüto. Rü nawa ningúchigü ga yema ore ga Tupanaãrü orearü uruũ ga Ichaxía ümatüxũ. ²⁹ Rü Tupanaãe i Üünexũ rü Piripixũ ñanagürü: —jPaxa naxcèx ixũ i ngëma autu! —ñanagürü. ³⁰ Rü paxa yema autcèx niña ga Piripi. Rü yexguma naxütawa nanguxgu rü nüxũ naxĩnü ga na Tupanaãrü orearü uruũ ga Ichaxía ümatüxũ ga orewa nangüxũ ga yema ãëxgacü. Rü yexguma ga Piripi rü nüxna naca rü ñanagürü nüxũ: —jNüxũ cucuáxũ i ñacüchiga na yĩxũ i ngëma nawa cungúxũ? —ñanagürü. ³¹ Rü nüma ga ãëxgacü ga Etiópiianecũãx rü nanangãxũ, rü ñanagürü: —jNüxucürüwa i nüxũ chacuáxũ ega taxüema chomaã inanguxũxèëgux? —ñanagürü. Rü

Piripicèx naca na naxīnagūxūcèx, rü naxūtawa na natoxūcèx. ³² Rü yema nawa yangúchigūxū ga Tupanaārū ore ga ūmatūxū, rü ñanagürü:

“Rü ñoma wūxi i carneru i norü mèxwa nagagūxūrūñacū nayagagū. Rü wūxi i carneruxacū i ngēma yayoxtèxagūxūpèxewa tama aita ūxūrūñ nachianemare, rü taxu ñanagürü. ³³ Rü yexguma duūxūgū poraācū chixri namaā chopetūgu rü taxúema naētüwa tachogū. ¿Rü texé tá meā nachiga tidexa ga yema duūxūgū ga yemaācū poraācūxūchima chixexū ūgūxū? Yerü nayamèxgū na nataxuxūcèx i norü maxū i ñoma i naānewa”,

ñanagürü ga yema ore ga nawa nangúxū. ³⁴ Rü Piripina naca ga yema āèxgacū ga Etiópiaanecūāx, rü ñanagürü: —¡Chomaā nūxū ixu! ¿Rü texéchigagu nixi ga yadexaxū ga yema Tupanaārū orearū uruū? ¿Nügūchigagutama Rü éxna toguechigagu? —ñanagürü. ³⁵ Rü yexguma nanangāxū ga Piripi. Rü yematama ore ga ūmatūxūmaā inanaxūgū na namaā nūxū yaxuxū ga ore i mexū ga Ngechuchuchiga. ³⁶ Rü yixcamaxūra ga yexguma inaxīyane, rü dexá íyexmaxūwa nangugū. Rü ñanagürü ga yema āèxgacū: —Nuā nangèxma i dexá. ¿Rü tama éxna inamexū na nuā choxū ícubaixēèxū? —ñanagürü.

³⁷ Rü ñanagürü ga Piripi: —Ngèxguma aixcūma meāma cuyaxōxgux, rü marū name i na cuxū íchabaixēèxū —ñanagürü. Rü nanangāxū ga yema āèxgacū, rü ñanagürü: —Ngēmāācū chayaxō na Ngechuchu ya Cristu yīixū ya Tupana Nane —ñanagürü. ³⁸ Rü yexguma ínayachaxāchixēè ga norü autu, rü wūxigu dexāchiūwa nachoū. Rü Piripi ínanabaixēè ga yema āèxgacū. ³⁹ Rü yexguma dexáwa ínachoōchigu, rü Tupanaāè i Üünexū rü Piripixū niga. Rü yema āèxgacū rü marū tama wena Piripixū nadau. Natürü taāèācū namagu nixū. ⁴⁰ Natürü Achotowa nayangox ga Piripi. Rü yema ñānewa inaxūāchi, rü nūxū nixuchigū ga ore i mexū ga guxūma ga ñānewa ñuxmata Checharéaarū naānewa nangu.

9

Ngechuchuaxū nayaxō ga Chauru

¹⁻² Rü yoxni ga Chauru rü daimaā nayaxāxūnechigūama ga yema duūxūgū ga Cori ga Ngechuchuaxū yaxōgūxū. Rü yemacèx paigüeruxūtawa naxū, rü naxcèx nūxna naca ga popera ga nūxna āgaxū na Yudínguarū ngutaquèxepataūgū ga Damacuwa yexmagūnegu yaxūcuchigūxūcèx rü yexma tūmacèx nadauxūcèx ga guxema yaxōgūxe ga yatūxe rü ngexegū na Yerucharéūwa tūxū nagagūxūcèx rü yexma tūxū yapoxcuxūcèx. ³ Natürü yexguma marū Damacuxū yangaicagu, rü ngürüāchi meāma nūxū nabáxi ga wūxi ga omū ga poraxū ga daxūwa íbáxixū. ⁴ Rü ñaxtūanegu nayangu ga Chauru, rü nūxū naxīni ga wūxi ga naga ga nūxna çagūxū ga ñaxū: —Pa Chauru Pa Chaurux, ¿tūxcūi i chowe quingèchigūxū? —ñaxū. ⁵ Rü Chauru nanangāxū, rü ñanagürü: —¿Rü texé quixī, Pa Corix? —ñanagürü. Rü nūma ga Cori rü nanangāxū rü ñanagürü: —Choma nixī i Ngechuchu, rü chorū duūxūgū nixī i ngēma nawe quingèchigūxū. ⁶ ¡Rü inachi, rü ngēma Damacuarū ñānewa naxū! Rü ngēma rü wūxi ya yatū tá cumaā nūxū nixu na tacū tá cuxūxū —ñanagürü. ⁷ Rü yema yatūgū ga Chauruxū íxūmücūgūxū, rü inayanguāgū, yerü nūxū naxīnūè ga yema ore natürü taxúexūma nadaugū. ⁸ Rü ñuxūchi inachi ga Chauru ga ñaxtūanewa ga íyanguxūwa, rü nidauchixetū, natürü taxuūma nadau yerü nixoxetū. Rü yemacèx ga namücūgū, rü nachacūgu nayayauxāchi, rü yemaācū

Damacuwa nanagagū. ⁹ Rū tomaēxpūx ga ngunexūgu, rū nangexetū, rū tama nachibū, rū tama naxaxe. ¹⁰ Rū Damacuwa nayexma ga wūxi ga yatū ga Ngechuchuaxū yaxōxū ga Ananīā ga naega. Rū Cori ya Ngechuchu naxcēx nangox, rū űanagūrū nūxū: —Pa Ananīāx —űanagūrū. Rū nūma ga Ananīā nanangāxū, rū űanagūrū: —¿Tacū? Pa Corix —űanagūrū. ¹¹⁻¹² Rū nūma ga Cori nanangāxū, rū űanagūrū: —¿Dūcēx, ngēma itamū i Meā i Wēxūgu āegaxūwa naxū! ¿Rū ngema Yudapatawa naxcēx Inaca i wūxi i yatū i Tarsucūāx i Chaurugu āegaxū! Rū nūma rū ngema Inayumūxē rū nangoxetū rū marū cuxū nadau, Pa Ananīāx, na ngēxma cuxūcuxū rū naxētūgu quingōgūxū na wena yadauchixūcēx —űanagūrū ga Cori ga Tupana. ¹³ Rū yexguma yemaxū naxīnūgu ga Ananīā, rū űanagūrū: —Pa Corix, muxūma i duūxūgū chomaā nūxū nixu i ngēma yatūchiga na űuxre i chixexū naxūxū namaā i curū duūxūgū i Yerucharēūwa. ¹⁴ Rū űuxma rū paigūarū āēxgacūgūarū mumaā nūma naxū na Inayauxūāxūcēx i guxūma i duūxūgū i cuēgagu yumūxēgūxū —űanagūrū. ¹⁵ Natūrū nūma ga Cori rū űanagūrū nūxū: —¿Ngema naxū! Erū choma chanayaxu i ngēma yatū na choxū yaxuchigaxūcēx namaā i togū i nachiūānecūāxgū i duūxūgū rū norū āēxgacūgū, rū ngema Iraēcūāxgū. ¹⁶ Rū choma tā nūxū nūxū chadauxēē i űuxre i ngūxū i tá yangexū i chauxcēx —űanagūrū ga Cori. ¹⁷ Rū guma Ipata ga Chauru nawa yexmanewa naxū ga Ananīā. Rū nagu naxūcu, rū nūxū ningōgū, rū űanagūrū nūxū: —Pa Chaueneē Pa Chaurux, nūma ya Cori ya Ngechuchu ga guma namawa cuxcēx ngōcū ga yexguma nūma cuxūxgu, rū nūma choxū namu na wenaxārū quidauchixūcēx, rū cuxna nanguxūcēx i Naāē i Ūūnexū —űanagūrū. ¹⁸ Rū yexgumatama rū űoma tacūchicutēxerū naxētūwa Inayi, rū yexguma wenaxārū meā nidauchixetū. Rū yexguma inachi ga Chauru, rū Ananīā Inanabaixēē. ¹⁹ Rū yemawena nachibū, rū wenaxārū napora. Rū űuxre ga ngunexūgu yexma Damacugu narūāxūx namaā ga yema yaxōgūxū ga yexma āchiūgūxū.

Chauru rū Damacuwa nūxū nixu ga Ngechuchuchiga

²⁰ Rū yexguma inanaxūgū ga Chauru ga ngutaquēxepataūgūwa nūxū na yaxuchigaxū na Ngechuchu yīxū ya Tupana Nane. ²¹ Rū guxūma ga yema nūxū inūexū rū poraācū nabaixāchiāēgū, rū űanagūrūgū: —¿Tama ēxna űāā yatū yīxū ga Yerucharēūwa İyayauxūgūxū ga guxūma ga duūxūgū ga Ngechuchuaxū yaxōgūxū? ¿Rū tama ēxna űāātama yīxū ga yema nūma ūxū na Inayauxūāxūcēx rū űuxūchi paigūarū āēxgacūxūttawa nagagūāxūcēx i duūxūgū i yaxōgūxū? —űanagūrūgū. ²² Natūrū ga Chauru rū guxū ga ngunexūgu yexeraācū tama namuācūma nūxū nixuchigaama ga ore ga Ngechuchuchiga. Rū Inayanangeēxgūxēē ga Yudiūgū ga Damacuwa yexmagūxū, yerū meāma nanangoxēē na Cristu yīxū ga Ngechuchu.

Chauru rū Yudiūgū- chaxwa niña

²³ Rū marū muxūma ga ngunexūgū ngupetūguwena rū yema Yudiūgū rū wūxigu nūgūmaā nagu narūxīnūē na Chauruxū yamēxgūxūcēx. ²⁴ Natūrū nūma ga Chauru rū nūxū nacuāchiga ga na yamēxgūchāūāxū. Rū yema Yudiūgū rū ngunecū rū chūtacū rū guma İāneārū poxeguxūārū İāxgūgu Chauruxū nanēīxgūxū na yamēxgūāxūcēx. ²⁵ Natūrū ga Chauruarū ngūexūgū rū chūtacū rū wūxi ga pexchi ga tacūgu guma İāneārū poxeguxūtapūxētūwa İnanachūxūetaūgūama, rū yemaācū niña ga Chauru.

Yerucharéŭwa nayexma ga Chauru

26 Rŭ yexguma Yerucharéŭwa nanguxgu ga Chauru, rŭ yema yaxōgŭxŭmaā nangutaquēxechaŭ. Natŭrŭ yema yaxōgŭxŭ rŭ nŭxŭ namuē, yerŭ nŭma nŭxŭ nacuēxgŭgu rŭ tama aixcŭma Ngechuchuaxŭ nayaxō. 27 Natŭrŭ Bernabé rŭ yema ngŭexŭgŭ ga Ngechuchu imugŭxŭtanŭwa nanagaama. Rŭ yema ngŭexŭgŭmaā nŭxŭ nixu ga űuxācŭ Cori ya Ngechuchuxŭ na nadauxŭ ga Chauru ga namawa, rŭ űuxācŭ Cori namaā na idexaxŭ. Rŭ nŭxŭ nixu ta ga űuxācŭ Damacuwa rŭ tama namuēācŭma nŭxŭ na yaxuxŭ ga Ngechuchuchiga. 28 Rŭ yemaācŭ ga Chauru rŭ Yerucharéŭgu narŭxŭ. Rŭ yema ngŭexŭgŭ ga Tupana imugŭxŭtanŭgu naxā. Rŭ tama namuēācŭma Cori ya Ngechuchuchigaxŭ nixuchigŭ. 29 Rŭ yema Yudŭgŭ ga Griégugawa idexaxŭmaā nidexaxŭ ga Chauru, rŭ Ngechuchuchigagu nŭgŭmaā nayaporagaexŭ. Natŭrŭ ga nŭmagŭ rŭ naxcēx nadaugŭama ga űuxācŭ tá na yamēxgŭāxŭ. 30 Rŭ yexguma nŭxŭ yacuēxāchitanŭgu ga yema togŭ ga yaxōgŭxŭ, rŭ Checharéawa Chauruxŭ nagagŭ. Rŭ yexguma yéma nangugŭgu rŭ wŭxi ga wapurugu nayamuēgŭ rŭ Tarsuwa naxŭ. 31 Rŭ yexguma rŭ meāma nŭxŭ naxŭpetŭ ga yema yaxōgŭxŭ ga guxŭma ga Yudéaanewa, rŭ Gariréaanewa rŭ Chamáriaanewa. Rŭ yexeraācŭ meā nayaxōgŭetanŭ rŭ aixcŭma Tupana naxwēxexŭācŭma meā namaxē. Rŭ Tupanaāē i Ŭŭnexŭārŭ ngŭxēēmaā nimuētanŭāma ga yema yaxōgŭxŭ.

Eneā rŭ narŭme

32 Rŭ yexguma Pedru yema yaxōgŭxŭtanŭgu ixŭāgŭchigŭxgu, rŭ yema Didágu āchiŭgŭxŭ ga yaxōgŭxŭtanŭwa rŭ ta nangu. 33 Rŭ yexma nŭxŭ nayan-gau ga wŭxi ga yatŭ ga Eneā ga naega ga 8 ga taunecŭ norŭ pechicagu cacŭ, yerŭ nanawāixāchi. 34 Rŭ Pedru űanagŭrŭ nŭxŭ: —Pa Eneāx, Ngechuchu ya Cristu cuxŭ narŭmexē. ¡Inachi rŭ namexēē i cuxchapenŭxŭ! — űanagŭrŭ. Rŭ yexgumatama inachi. 35 Rŭ guxŭma ga yema Didáŭāxgŭ rŭ Charunacŭāxgŭ rŭ nŭxŭ nadaugŭ ga na inachixŭ ga guma yatŭ, rŭ nŭxŭ narŭxoe ga nacŭmagŭ ga chixexŭ, rŭ Cori ya Ngechuchuwe narŭxŭ.

Wena imaxŭ ga Dorca

36 Rŭ yexgumaācŭu ga Iāne ga Yopewa rŭ iyexma ga wŭxi ga Tupanaāxŭ yaxōxcŭ ga ngecŭ ga Tabita ga ngŭega. Rŭ ngēma naega i Griégugawa rŭ Dorca űaxŭchiga nixŭ. Rŭ ngŭma rŭ wŭxi ga mecŭ iyixŭ ga ngŭrŭ ŭwa, rŭ guxŭguma nŭxŭ irŭngŭxēē ga yema duŭxŭgŭ ga tacŭ nŭxŭ taxuxŭ. 37 Rŭ yexgumaācŭu iyaāawe ga Dorca, rŭ iyu, rŭ ngŭmŭcŭgŭ nanamexēē ga ngŭxŭne. Rŭ ĩpataarŭ daxŭchiŭwa yexmaxŭ ga ucapugu nanaxŭgŭ ga ngŭxŭne. 38 Rŭ Yopearŭ ngaicamana nayexma ga guma Iāne ga Didá ga Pedru nawa yexmane. Rŭ yema yaxōgŭxŭ ga Yopecŭāx rŭ nŭxŭ nacuēxgŭ ga Didáwa na nayexmaxŭ ga Pedru. Rŭ naxcēx yéma nanamugŭ ga taxre ga yatŭ űaxŭmaā: —¡Rŭ paxa toxcēx nuā naxŭ! —űaxŭmaā. 39 Rŭ yexguma ga Pedru rŭ nawe narŭxŭ. Rŭ yexguma inanguxgu, rŭ yema ucapu ga yema yueta nawa yexmaxŭwa nanagagŭ. Rŭ guxŭma ga yutegŭxŭ rŭ Pedruxŭ inachomaēguāchi, rŭ naxauxe, rŭ nŭxŭ nayawégŭ ga yema naxchirugŭ ga Tabita nŭxŭ ixŭxŭxŭ ga yexguma namaŭxgu. 40 Rŭ Pedru rŭ dŭxētŭwa nanamugŭ ga guxŭma. Rŭ inacaxāpŭxŭ, rŭ nayumŭxē. Rŭ űuxŭchi ngŭxcēx nadauegu ga yema yŭxcŭ, rŭ űanagŭrŭ: —Pa Tabitax, ¡Írŭda! —űanagŭrŭ. Rŭ yexguma rŭ iyadauchixetŭ, rŭ Pedruxŭ idau, rŭ ĩrŭto. 41 Rŭ yexguma ngŭxmēxgu nayayauxāchi, rŭ ngŭxŭ inachixēē. Rŭ űuxŭchi naxcēx naca ga

yema yaxōgūxū rū yema yutegūxū, rū maxūxcū nūxū ngīxū nawēx. ⁴² Rū guxūma ga yema duūxūgū ga Yopewa yexmagūxū rū nūxū nacuáchigagū ga yema. Rū Cori ga Ngechuchuaxū nayaxōgū ga muxūma. ⁴³ Rū muxūma ga ngunexū Yopegu narūxāūx ga Pedru napatagu ga Chimáū ga naxchēxmūārū paxēewa puracūxū.

10

Pedru rū Cornériuchiga

¹ Rū ĩāne ga Checharéawa nayexma ga wūxi ga yatū ga Cornériugu āegacū. Rū 100 ga Itária necūāx ga churaragūarū capitāū nixī. ² Rū nūma nixī ga wūxi ga yatū ga meāma Tupanaāxū yaxōcū. Rū wūxigu namēxmaā rū naxācūgūmaā Tupanaxū nangechaūgū. Rū mucūma ga norū dīērumaā nūxū narūngūxēē ga duūxūgū ga Yudiugū ga tacū nūxū taxuxū. Rū guxūguma nayumūxē rū Tupanamaā nidexa. ³ Rū wūxi ga ngunexū ga yexguma tomaēxpūxarū orawa nanguxchaūgu ga yáuanecū, rū nangoxetū. Rū meāma nūxū nadau ga wūxi ga Tupanaārū orearū ngeruū ga daxūcūāx ga yema ucapu ga nawa nayexmaxūgu ūcuxū. Rū űanagūrū nūxū: —Pa Cornériux —űanagūrū. ⁴ Natūrū nūma ga Cornériu rū meāma nūxū nadawenū, rū poraācū namuūācūma nūxna naca, rū űanagūrū: —Ĵacū cunaxwēxe, Pa Corix? —űanagūrū. Rū nanangāxū ga yema orearū ngeruū ga daxūcūāx, rū űanagūrū: —Curū yumūxēgū rū Tupana marū cuxū nūxū naxīnū, rū cumaā nataāē na űuxācū nūxū curūngūxēēxū i duūxūgū i tacū nūxū taxuxū. ⁵ —ĴRū chanaxwēxe i Yopewa cunamugū i űuxre i yatūgū na naxcēx yacagūxūcēx i wūxi i yatū i Chimáū i Pedrugu āegaxū! ⁶ —Rū to i Chimáū i naxchēxmūārū paxēewa puracūxūpatawa nangēxma rū ngēxma nape. Rū yima napata rū taxtū i taxūcutūwa nangēxma —űanagūrū. ⁷ Rū yexguma nūxna iyanatauxgu ga yema orearū ngeruū ga namaā yēma idexaxū, rū Cornériu rū naxcēx naca ga taxre ga norū puracūtanūxū rū wūxi ga churara ga meā naga ĩnūxū ga meā Tupanaāxū yaxōxū. ⁸ Rū namaā nūxū nixu ga guxūma ga yema nūxū nadauxū, rū űuxūchi Yopewa nanamugū. ⁹ Rū moxūācū ga yexguma namagu naxīyane rū marū Yopexū yangaicagūgu ga yema duūxūgū ga Cornériu yēma mugūxū, rū Pedru rū daxū naxī ga ĩpataētūwa na yēma nayumūxēxūcēx. Rū tocuchiari oragu nixī ga yexguma. ¹⁰ Rū nataiya, rū nūxū nachīxéga ga na nachibūxū. Rū yexguma norū ōna ĩnaxūgūyane, rū nangoxetū ga Pedru. ¹¹ Rū nūxū nadau ga na yangoxnaxū ga naānetūwe, rū yēma ĩnarūxī ga wūxi ga naxchiru ga űoma wūxi ga taxū ga naxchāpenūārū ĩxīxū. Rū norū āgūmūcūpēxewa naxātūxū rū yemaācū ĩnarūchūxūē űuxmata űaxtūanewa nangu. ¹² Rū yemagu ĩnarūchūxūewetaxū ga nagūxūraūxū ga naēxūgū, rū āxtapegū, rū werīgū. Rū yema naxchāpenūūwa nayexma ta ga tacū ga tama nangōxgūxū ga Yudiugū. ¹³ Rū Pedru nūxū naxīnū ga Tupanaga ga nūxū űaxū: —Pa Pedrux ĩlnachi, rū ta ĩmēx, rū nangōx! —űaxū. ¹⁴ Rū Pedru nanangāxū rū űanagūrū: —Taxucūrūwa nixī, Pa Corix, erū taguma chanangōx i tacū i toxcēx āūāchixū —űanagūrū. ¹⁵ Rū yexguma ga yema Tupanaga, rū wenaxārū űanagūrū: —Ngēma choma chamexēēxū rū tama name i āūāchi nūxū cuwogū —űanagūrū. ¹⁶ Rū tomaēxpūxcūna yemaācū nangupetū. Rū yexguma wenaxārū daxū nachūxnagū ga yema naxchāpenūū namaā ga guxūma ga nawa yexmagūxū. ¹⁷ Rū poraācū nagu narūxīnū ga Pedru ga tacūchiga na yīxū ga yema nūxū nadauxū ga yexguma nangoxetūgu. Rū yemagu ĩnaxīnūyane, rū guma ĩpataēxwa nangugū ga yema

yatügü ga Cornériu yéma mugüxü ga naxcèx lícaetanüxü ga Chimáupata. ¹⁸ Rü yéma naxcèx ínacagü rü aixcúma yexma nape ga wüxi ga yatü ga Chimáü ga Pedrugu äegaxü. ¹⁹ Rü Pedru nagu írúxínüyane ga yema nüxü nadauxü ga yexguma nangoxetügu, rü Tupanaäe i Üünexü rü ñanagürü nüxü: —Ngëägü nixí i tomaëxpüx i yatügu i cuxcèx daugüxü. ²⁰ —¡Inachi, rü írúxí, rü tama cux-oegaäëcúma nawe rüxü! Erü choma nixí i núma chanamugüxü —ñanagürü. ²¹ Rü yexguma naxcèx ínarüxí ga Pedru, rü ñanagürü nüxü ga yema yatügu: —Choma nixí i chauxcèx pedaugüxü. ¿Rü tacüwa nuã pexí? —ñanagürü. ²² Rü nümagü nanangäxügu, rü ñanagürügu: —Capitáü ya Cornériuxütawa ne taxí rü núma nixí i nuã toxü namugüxü. Rü wüxi ya yatü ya mecü nixí, rü Tupanaxü nangechaü. Rü guxüma i Yudiügu nüxü nangechaü i nümax. Rü wüxi ga Tupanaärü orearü ngeruü ga daxüçüäx nanamu na cuxcèx toxü yacaxëxüçèx ga Cornériu rü napatawa cuxüçèx rü nüxü na naxínüxüçèx i curü ore —ñanagürügu. ²³ Rü yexguma nanachocuxëë ga Pedru, rü yexma nanapegüxëë ga yema chütaxügu. Rü moxüäcü inaxíächi rü nawe narüxü ga Pedru. Rü ínaxümücügü ga ñuxre ga Yopecüäx ga yaxögüxü. ²⁴ Rü moxüäcü Checharéawa nangugü ga ngextá Cornériu ínanguxëëxüwa namaä ga guxüma ga natanüxügu rü namücügü ga nüxü nangechaügüxü ga nüxna naxuxü. ²⁵ Rü yexguma Cornériupatawa nanguxgu ga Pedru, rü íäxtüwa naxcèx naxü ga Cornériu, rü Pedrupëxegu nayacaxäpüxü, rü nüxü nicuëxüü. ²⁶ Natürü ga Pedru rü inanachixëë rü ñanagürü: —¡Inachi! Rü choma rü ta cuxrüü duüxümare chixí rü tama Tupana chixí —ñanagürü. ²⁷ Rü nügümaä yadexagüäcúma wüxigu nichocu. Rü Pedru yéma namaä inayarüxü ga muxüma ga duüxügu ga yexma ngutaquëxegüxü. ²⁸ Rü yexguma ga Pedru rü ñanagürü nüxü ga yema duüxügu ga yexma ngutaquëxegüxü: —Pema nüxü pecuë i toma i Yudiüçèx rü nangëxma i torü mugü i toxna nachuxuxü na pemaä tangutaquëxegüxü, rü pepatagu na tachocuxü. Natürü Tupana choxü nangoxetüxëë rü choxü nüxü nadauxëë na tama namexü na ngëmaäcü nagu na charüxínüxü pemaä. ²⁹ Rü ngëmacèx tama chaxoöcúma núma chaxü i ngëxguma chauxcèx pengemagu. Rü ñuxma rü chanaxwëxe i chomaä nüxü pixu na tacüçèx chauxcèx pengemaxü —ñanagürü. ³⁰ Rü Cornériu nanangäxü, rü ñanagürü: —Marü ägümücü i ngunexü nangupetü ga ñuxgumaäcü ga tomaëxpüxaru oragu ga yáuanecü, rü nuã chopatawa chayumüxë erü guxüdguma ngëmaäcü chanaxü. Rü yexguma chayumüxëgu rü changoxetü, rü chauxcèx nangox ga wüxi ga yatü ga iyaurachirucüxü. ³¹ —Rü ñanagürü choxü:

“Pa Cornériux, Tupana marü nüxü naxínü i curü yumüxë rü cumaä nataäë na ñuxäcü nüxü curüngüxëxü i duüxügu i tacü nüxü taxuxü. ³² —¡Rü Yopewa namugü i ñuxre i yatügu na naxcèx yacagüxüçèx i Chimáü i Pedrugu äegaxü! Rü to i Chimáü i naxchëxmüärü paxëëwa puracüxüpatagu pexü. Rü yima napata rü taxtü i taxücutüwa nangëxma”, ñanagürü choxü. ³³ Rü yemacèx rü yexgumatama paxa cuxcèx yéma chanamugü, rü cuma rü mexü toxçèx cuxü erü núma cuxü. Rü ñuxma i guxäma i toma rü Tupanapëxewa tangëxmagü. Rü nüxü taxínüëchaü i gux-üma i ngëma ore i Cori namaä núma cuxü muxü na tomaä nüxü quixuxüçèx —ñanagürü ga Cornériu.

Pedru rü Cornériupatawa nüxü nixu ga Ngechuchuchiga

³⁴ Rü yexguma inanaxügü ga Pedru ga na yadexaxü, rü ñanagürü: —Ñuxma waxi nixí i nüxü chacuäxü na Tupanacèx nawüxigüxü i guxüma i duüxügu

erū nūma rū aixcūma guxāxūma nangechaū. ³⁵—Rū nūma rū wūxichigū i nachiuānēwa nanade i ngēma duūxūgū i nūxū ngechaūgūxū rū mexū ūgūxū. ³⁶—Rū nūma ga Tupana rū Yudiūgūtānūwaxīra nanamu ga norū ore rū marū nūxū nixu na tūxū nūxū nangechaūxū i tōrū pecadugū i ngēxguma Cristu ya guxāārū Cori ixīcūaxū yaxōgūgu. ³⁷—Pema rū meāma nūxū pecuēx na tacū ngupetūxū ga guxūwama ga Yudiūgūarū naānēwa. Rū noxri ga Cuāū rū nūxū nixu na Tupana naxwēxexū na inabaiūxū ga duūxūgū. Rū yemawena ga Ngechuchu rū Garirēaanēwa inanaxūgū ga duūxūgūmaā nūxū na yaxuxū ga ore i mexū. ³⁸—Rū pema nūxū pecuēx ga űuxācū Tupana na naporaxēēxū ga Ngechuchu ya Nacharētucūāx yerū nūxna nanaxā ga Naāē i Ūūnexū. Rū nūma ga Ngechuchu rū mexū naxū ga yema iyaxūgūxūwa, rū nanameēxēē ga guxūma ga yema duūxūgū ga ngoxoāxūxū. Rū yemaācū nanaxū yerū Tupana nūxū narūngūxēē. ³⁹—Rū toma nixī ga nūxū tadaugūxū rū nūxū tixuchigaxū i guxūma ga naxūxū ga Ngechuchu ga Yudēaanēwa rū Yerucharēūārū iānēwa. Rū yemawena rū nayamēxgū rū curuchawa nayapotagū. ⁴⁰—Natūrū ga Tupana rū tomaēxpūx ga ngunexū ngupetūgu rū wena nanamaxēē rū toxcēx nanangoxēē. ⁴¹—Natūrū tama guxū ga duūxūgūcēx nangox. Rū toxcēxīcatama nangox ga toma ga ūpamama Tupana toxū dexē na nūxū tixuxcēx i Ngechuchuchiga. Rū yexguma marū yuwa inadxguwena rū namaā tachibūe rū namaā taxaxegū. ⁴²—Rū nūmatama ga Ngechuchu toxū nimugū na duūxūgūmaā nūxū tixuxcēx na Tupana marū āēxgacūxū yangucuchixēēxū na guxū i duūxūgūarū ngugūruū na yīxūcēx. Rū nūma ya Ngechuchu nixī i tōrū maxūxū nangugūxū, rū nūma tā nixī i guxū i duūxūgū i maxēxū rū yuēxūxū yacagūxū naxcēx i norū maxūchiga. ⁴³—Rū ūpamamatama guxūma ga Tupanaārū orearū uruūgū rū Ngechuchuchiga nidexagū, rū űanagūrūgū:
 “Rū nūma tā nūxū nūxū nangechaū i norū pecadugū i guxūma i duūxūgū i nūxū yaxōgūxū”,
 űanagūrūgū.

Tupanaāē i Ūūnexū rū yema duūxūgū ga tama Yudiūgū ixīgūxūtanūwa nangu

⁴⁴ Rū yexguma iyadexayane ga Pedru, rū Tupanaāē i Ūūnexū nūxna nangu ga guxūma ga yema yēma irūxīnūēxū ga yema ore. ⁴⁵ Rū yema yaxōgūxū ga Yudiūgū ga Pedrumaā yēma īxū, rū poraācū nabaixāchiāēgū yerū Tupanaāē i Ūūnexū rū nūxna rū ta nangu ga yema duūxūgū ga tama Yudiūgū ixīgūxū. ⁴⁶ Rū nūxū naxīnūē ga to ga nagawachigū na yadexagūxū, rū Tupanaxū na yacuēxūgūxū. ⁴⁷ Rū yexguma ga Pedru rū űanagūrū: —Īēxna nangēxmaxū i texē na nūxna nachuxuxū i na inabaiūxū i űaā duūxūgū i marū taxrūū Tupanaāē i Ūūnexū nūxna ngxūxū? —űanagūrū. ⁴⁸ Rū nanamu na Ngechuchu ya Cristuégagu na inabaiūxū ga yema duūxūgū ga yexwaca yaxōgūxū. Rū yexguma Pedruxū nacēēxūgū na yexma naxāūxūcēx ga űuxre ga ngunexū.

11

Pedru rū Yerucharēūwa yexmagūxū ga yaxōgūxūmaā nūxū nixu ga tacū na ngupetūxū ga Checharēawa

¹ Rū yema ngūēxūgū ga Ngechuchu imugūxū rū yema yaxōgūxū ga Yudēagūgūxū, rū nūxū nacuāchigagū na yema tama Yudiūgū ixīgūxū rū ta nayauxgūāxū ga Tupanaārū ore. ² Natūrū yexguma Yerucharēūwa nanguxu ga Pedru, rū űuxre ga Yudiūgū ga yaxōgūxū rū Pedruxū nixugūe.

³ Rū ñanagürügü: —¿Rü tüxcüü natanüwa cuxü i ngēma tama Yudíugü ixígüxü, rü namaã cuchibü? —ñanagürügü. ⁴ Rū Pedru meãma namaã nüxü nixu ga guxüma ga tacü na ngupetüxü, rü ñanagürü nüxü: ⁵ —Choma rü Yopearü ñanewa chayexma, rü yexguma íchayumüxēyane, rü changoxetü. Rü nüxü chadau ga wüxi ga naxchápenüürüü íxíxü ga norü ägümücüpēxewa ätüxüxü ga írúçhüxüxü ñüxmata chauxütawa nguxü. ⁶ —Rü meãma nüxü chadawenü na nüxü chadauxücex na tacü yexmaxü ga aixepewa. Rü nüxü chadau ga naxünagü ga ixägümücüparaxü rü naëxügü ga idüraexü, rü äxtapegü rü werigü. Rü yema naxchápenüüwa nayexma ta ga tacü ga tama ingöxü, erü taxcex i yixema i Yudíugü rü naxäüächi. ⁷ —Rü nüxü chaxínü ta ga Tupanaga ga choxü ñaxü:

“¡Inachi! Pa Pedrux. ¡Rü ta imèx, rü nangöx!” ñaxü. ⁸ —Natürü choma chanangäxü, rü ñacharügü:

“Taxucürüwa nixí, Pa Corix, erü taguma chanangöx i tacü i toxcèx äüächixü”, ñacharügü. ⁹ —Rü yexguma wenaxärü ñanagürü choxü ga yema Tupanaga ga daxüwa inaxüxü:

“Ngēma choma i Tupana chamexēxü, rü tama name i äüächi nüxü cuwogü”, ñanagürü. ¹⁰ —Rü tomaëxpüxcüna yemaäcü nangupetü, rü yexguma wenaxärü daxü nachünagü ga yema naxchápenüü namaã ga guxüma ga nawa yexmagüxü. ¹¹ —Rü yexgumatama guma i ga nawa chayexmanewa nangugü ga tomaëxpüx ga yatügü ga Checharéawa ne mugüxü ga chauxcèx daugüxü. ¹² —Rü Tupanaäe i Üünexü choxü namu na nawe charüxüxücèx woo tama Yudíugü na yixígüxü ga yema duüxügü. Rü chomaã ta yéma naxí ga ñaã 6 ga yaxögüxü. Rü napatawa tangugü ga guma yatü ga Cornériu, rü yexma tachocu. ¹³ —Rü tomaã nüxü nixu ga ñuxäcü na napatawa nüxü nadauxü ga Tupanaärü orearü ngerüü ga daxüçüäx ga yexma chixü ga ñaxü nüxü:

“¡Yopewa namugü i yatügü na naxcèx yacagüxücèx i Chimáü i Pedrugu äegaxü! ¹⁴ —Rü nüma tá cumaã nüxü nixu na ñuxäcü tá cuma rü guxü i cupatagugüxümaã penayaxuxü i perü maxü i taguma gúxü”, ñanagürü nüxü. ¹⁵ —Rü yexguma ichanaxügüga ga na chidexaxü, rü nüxna nangu ga Tupanaäe i Üünexü, yexgumarüü ga noxri tüxna nanguxgurüü. ¹⁶ —Rü yexguma ga choma rü nüxna chacuèxächi ga Cori ya Ngechucharü ore ga yexguma ñaxgu:

“Rü aixcüma nixí ga Cuáü ga dexáwamare ínabaiüxēäxü, natürü i pema rü Tupanaäe i Üünexü tá pexna nangu”, ñaxgu. ¹⁷ —Rü pema nüxü pecuèx na ñuxäcü Tupana tüxna nanguxēxü ga Naäe i Üünexü i yixema na Cori ya Ngechuchu ya Cristuaxü yaxögüxü. Rü ñuxma na taxrüü Tupana yema duüxügüna nanguxēxü ga Naäe i Üünexü, ¿rü ñuxücürüwa i choma i nüxü chaxoxü na naga chaxínüxü ya Tupana? —ñanagürü ga Pedru. ¹⁸ Rü yexguma yema orexü naxínüëgu ga yema yaxögüxü ga Yerucharéçüäx, rü nachianegümare. Rü Tupanaxü nicuèxüüü. Rü ñanagürügü: —Rü ngēmawa nüxü tacuèx na Tupana tüxü dexü ya yixema woo tama Yudíugü ixígüxe. Rü ngëxguma nüxü tarüxoegu i túmaärü chixexü rü Tupanacèx tadaugügu, rü nüma tüxna nanaxä i maxü i taguma gúxü —ñanagürügü.

Yaxögüxü ga Äütioquíawa yexmagüxüchiga

¹⁹ Rü yexguma Etébaüxü yamèxgüguwena, rü norü uwanügü poraäcü nawe ningëxütanü ga yema yaxögüxü. Rü yemacèx nügü nawoone. Rü Peníchiawa,

rū Chiprewa rū Aŭtioquíawa nabuxmū. Rū yéma nūxŭ nixugūe ga ore ga mexŭ ga Ngechuchuchiga. Natŭrŭ Yudiŭgŭmaāxīcatama nūxŭ nixugūe ga yema ore rū tama ga togŭmaā. ²⁰ Natŭrŭ yéma Aŭtioquíawa nangugŭ ta ga űuxre ga togŭ ga yaxŭgŭxŭ ga Chŭperecŭāx, rū Chire necŭāx. Rū nŭmagŭ rū yema tama Yudiŭgŭ ixŭgŭxŭmaā rū ta nūxŭ nixugūe ga ore i mexŭ i Cori ya Ngechuchuchiga. ²¹ Rŭ Tupana nūxŭ narŭngŭxēē, rū nanaporaexēē. Rū yemacēx muxŭma ga yema duŭxŭgŭ rū nūxŭ narŭxoe ga nuxcŭmaŭxŭ ga nacŭmagŭ, rū Cori ya Ngechuchua xŭ nayaxŭgŭ. ²² Rŭ yexguma yemaxŭ nacuāchigagŭga ga yema yaxŭgŭxŭ ga Yerucharēŭwa yexmagŭxŭ, rū Aŭtioquíawa nanamugŭ ga Bernabé. ²³ Rŭ yexguma yéma nanguxgu ga Bernabé, rū nūxŭ nadau ga űuxācŭ Tupana nūxŭ na rŭngŭxēēxŭ ga yema yaxŭgŭxŭ ga Aŭtioquíacŭāx, rū poraācŭ namaē nataāē. Rŭ nayaxucŭxēgŭ ga guxŭma na meāma Cori ya Ngechuchuwe naxŭmaxŭcēx, rū taguma nūxŭ naxoexŭcēx. ²⁴ Yerŭ nŭma ga Bernabé rū wŭxi ga yatŭ ga mecŭ nixŭ. Rŭ aixcŭma Tupanaāē i Ŭŭnexŭ rū nawa nayexma, rū napora ga norŭ ōwa. Rŭ yemacēx muxŭchixŭma ga duŭxŭgŭ rū Cori ya Ngechuchucēx naxŭ rū nūxŭ nayaxŭgŭ. ²⁵ Rŭ yemawena ga Bernabé rū Tarsuwa naxŭ na Chaurucēx yadauxŭcēx. ²⁶ Rŭ yexguma nūxŭ iyangauxgu, rū Aŭtioquíawa nanaga. Rŭ wŭxi ga taunecŭ wŭxiwa yéma nayexmagŭ namaā ga yema yaxŭgŭxŭ. Rŭ nanangŭxēē ga muxŭchixŭma ga duŭxŭgŭ. Rŭ Aŭtioquíawa nixŭ ga inaxŭgŭxŭ ga duŭxŭgŭ na Cristutanŭxŭmaā na naxugŭāxŭ ga yema yaxŭgŭxŭ. ²⁷ Rŭ yexgumaŭcŭŭ Yerucharēŭwa ne naxŭ ga űuxre ga Tupanaārŭ orearŭ uruŭgŭ rū Aŭtioquíawa naxŭ. ²⁸ Rŭ natanŭwa nayexma ga wŭxi ga orearŭ uruŭ ga Agabu ga naega. Rŭ nanangutaquēxexēē ga yema yaxŭgŭxŭ ga Aŭtioquíawa yexmagŭxŭ. Rŭ yema ngutaquēxewa rū inachi ga Agabu rū Tupanaāē i Ŭŭnexŭ nanamu ga na yadexaxŭ, rū űanagŭrŭ: —Wŭxi i taiya i taxŭ tá űnangu i guxŭ i űaā nachŭŭānewa —űanagŭrŭ. Rŭ aixcŭma űnangu ga yema taiya ga yexguma Cādiu āēxgacŭ ixŭxgu. ²⁹ Rŭ yexguma ga yema yaxŭgŭxŭ ga Aŭtioquíawa yexmagŭxŭ, rū marŭ wŭxigu nagu narŭxŭnŭē na yéma ngŭxŭ namugŭxŭcēx ga dŭeru na nūxŭ nangŭxēēgŭxŭcēx ga yema yaxŭgŭxŭ ga Yudeaanegu āchiŭgŭxŭ. Rŭ wŭxichigŭ ngŭxŭ inaxā ga dŭeru yexgumarŭŭ ga űuxre ga nūxŭ yexmacŭ. ³⁰ Rŭ yemaācŭ nanaxŭgŭ, rū Bernabé rū Chaurumaā yéma ngŭxŭ namugŭ ga yema dŭeru naxcēx ga yema yaxŭgŭxŭārŭ āēxgacŭgŭ ga Yudeaanewa yexmagŭxŭ.

12

Āēxgacŭ ga Erode rū Chaŭtiāguxŭ nimēx rū Pedruxŭ napoxcu

¹ Rŭ yexgumaŭcŭŭ inanaxŭgŭ ga āēxgacŭ ga Erode ga na űnayauxŭāxŭ ga űuxre ga yaxŭgŭxŭ ga Yerucharēŭcŭāx na napoxcuexŭcēx. ² Rŭ norŭ churaragŭxŭ namu na taramaā Chaŭtiāgu ga Cuāŭŭēnēxŭ yamēxgŭxŭcēx. ³ Rŭ yexguma nūxŭ nadēuxgu ga Erode ga norŭ me na yŭxŭ ga Yudiŭgŭ ga yema na naxŭxŭ, rū norŭ churaragŭxŭ namu na Pedruxŭ rū ta yayauxgŭxŭcēx. Rŭ yema nangupetŭ ga Yudiŭgŭarŭ peta ga Ŭpetŭchigagu ga yexguma pāu ga ngearŭ puxēeruŭāxŭ nangŭxgŭgu. ⁴ Rŭ yexguma Pedruxŭ yayauxgŭgu, rū poxcupataŭgu nayatēxcuchi. Rŭ űuxŭchi ga Erode rū nanamu ga āgŭmŭcŭtŭcumŭ ga norŭ churaragŭ na nŭxna nadaugŭxŭcēx. Rŭ wŭxitŭcumŭwachigŭ rū nayexma ga āgŭmŭcŭ ga churaragŭ. Rŭ yemaācŭ nanaxŭ ga Erode, yerŭ nagu narŭxŭnŭ ga yema petawena guxŭ ga

duūxūgūpēxewa na nagaāxūcēx na yamēxgūāxūcēx. ⁵ Rū yemaācū ga Pedru rū poxcupataūwa nayexma rū churaragū rū meāma nūxna nadaugū. Natūrū ga yema yaxōgūxū ga Yerucharéūcūāx rū poraācū nayumūxēgū, rū Tupanana naxcēx nacagū.

Tupana rū Pedruxū īnanguxuchixēē ga poxcupataūwa

⁶ Rū yematama ga chūtaxūgu naxūpa ga yema ngunexū ga Erode duūxūgūpēxewa nagaxchaūxū, rū taxre ga churaragūarū ngāxūwa nape ga Pedru. Rū taxre ga cadenamaā ninēixgūchacū. Rū togū ga churaragū ga dauxūtaexū nūxna nadaugū ga poxcupataūārū īāx. ⁷ Rū ngūrūāchi yema poxcupataūwa nangox ga wūxi ga orearū ngeruū ga daxūcūāx ga Coriarū. Rū poraācū nangōone ga guma poxcupataūwa. Rū yema orearū ngeruū Pedruxū nacūxagū, rū nanabaixāchixēē. Rū űanagūrū: —¡Paxama íruda! — űanagūrū. Rū yexgumatama īniwēgū ga guma cadena ga Pedru namaā īnēixgūchacūcū. ⁸ Rū Pedruxū űanagūrū ga yema orearū ngeruū: —¡Rū icūxcuchichiru rū nacuaixcu i curū chapatu! — űanagūrū. Rū yemaācū nanaxū ga Pedru. Rū űanagūrū ta: —¡Rū icūxcuchi i curū gāuxūchiru, rū chowe rūxū! — űanagūrū. ⁹ Rū nawe narūxū ga Pedru. Rū tama nūxū nacūxē ga aixcūma na yīxū ga yema orearū ngeruū namaā ūxū. Rū naxcēx rū nangoxetūmare. ¹⁰ Rū nūxū nachopetū ga nūxīraūxū ga dauxūtaexū, rū űūxūchi ga yema to ga dauxūtaexū. Rū yexguma nawa nangugū ga yema īāx ga áchumenēānaxcēx ga ítamūwaama ūxū, rū nūēchama niwāxna. Rū ínachoxū. Rū yexguma marū wūxi ga ítamū inaxīxgu, rū nūxna inayarūtaxu ga yema orearū ngeruū. ¹¹ Rū yexguma nūxū nicūxēāchi ga Pedru, rū nūgūmaā űanagūrū: —űūxma waxi i nūxū chacuāxū na aixcūma Cori ya Tupana nūma namuxū i norū orearū ngeruū na Erodemēxēwa choxū napuxū, rū nawa choxū īnanguxuchixēēxū i guxūma i ngēma chomaā naxūgūchaūxū i ngēma Yudiugū i tama yaxōgūxū — űanagūrū. ¹² Rū yexguma yemaācū yacūxēāchigu ga Pedru, rū ngīpatawa naxū ga wūxi ga ngecū ga Mariagu āegacū. Rū ngīma iyixī ga Cuāū Marcu naē. Rū yēma nangutaquēxegū ga muxūma ga duūxūgū ga yēma yumūxēgūxū. ¹³ Rū īāxtūarū poxeguxūārū īāxwa, rū: —Tu tu tu — űanagūrū ga Pedru. Rū wūxi ga pacū ga Rode ga ngīega īiyadau. ¹⁴ Rū yexguma nagawa nūxū nacūxēgu ga na Pedru yīxū, rū ngūrū taāēmaā rū īiyañamare na nūxū yanaxūxū ga na Pedru yīxū ga īāxtūarū īāxgu chicū. Rū tama iyawāxna ga īāx. ¹⁵ Rū yema yexmagūxū rū: —Cungēāēmare — űanagūrūgū ngīxū. Natūrū ngīma rū: —Aixcūma nixī — ngīgūrūgū. Rū yexguma űanagūrūgū: —Maneca tama nūma nixī. Rū norū dauruū i daxūcūāxmare nixī — űanagūrūgū. ¹⁶ Natūrū ga Pedru rū yoxni īāxwa: —Tu tu tu — űanagūrūama. Rū yexguma naxcē x yawāxnaāgu rū nūxū nadaugūga ga Pedru na yīxū, rū nabaixāchiāēgū. ¹⁷ Natūrū nūma naxunagūmēxē, rū naxmēxmaā nayanachianexēēgū. Rū namaā nūxū nixu na űūxācū Cori īnanguxuchixēēxū ga poxcupataūwa. Rū űanagūrū ta: — ¡Chaūtiāgumaā rū ngēma togū i yaxōgūxūmaā nūxū pixu i ngēma ore! — űanagūrū. Rū yexguma inaxūāchi, rū toxnamana naxū. ¹⁸ Rū yexguma yangunegu, rū yema churaragū ga poxcupataūwa dauxūtaegūxū rū poraācū nanaxīxāchiāēgū yerū tama nūxū nacūxēgu ga űacu na ngupetūxū namaā ga Pedru. ¹⁹ Rū yemacēx ga Erode rū yema churaragūxū namu na Pedrucēx yadaugūxūcēx. Rū yexguma taxuxūma iyangaugūgu, rū Erode rū yema churaragūgutama nananguxēē na nayuxūcēx. Rū yemawena ga Erode rū inaxūxū ga Yudeaanewa, rū Checharēagu nayaxāchiū.

Nayu ga Erode

²⁰ Rū Erode rū namaã nanu ga Tirucŭãxgŭ rū Chi-dãũcŭãxgŭ. Natürŭ ga yema Tirucŭãxgŭ rū Chidãũcŭãxgŭ rū naxcèx nadaugŭ na ñuxãcŭ Erodexŭ nangŭxmŭxèègŭxŭ, yerŭ Erodechŭñãnewa nixŭ ga nayauxgŭãxŭ ga nabŭ. Rū yemacèx wŭxi ga Erodearŭ duŭxŭ ga àèxgacŭ ga Batumaã naxãmŭcŭgŭ na nŭxŭ nangŭxèèxŭcèx na Erodemaã yadexagŭxŭcèx. ²¹ Rū Erode rū namaã inaxuneta ga wŭxi ga ngunexŭ na namaã yadexaxŭcèx. Rū yexguma yema ngunexŭ ga nagu inaxunetaxŭwa nanguxgu, rū yema Tirucŭãx rū Chidãũcŭãx rū Erodexŭtawa nangugŭ. Rū nicŭxcuchi ga Erode ga norŭ àèxgacŭchiru, rū norŭ tochicaxŭwa narŭto, rū duŭxŭgŭmaã nŭxŭ nixu ga norŭ ore. ²² Rū yexguma ga guxŭma ga yema duŭxŭgŭ rū tagaãcŭ ñanagŭrŭgŭ: —Ñãã àèxgacŭ rū tama duŭxŭãrŭ dexarŭñ nixŭ i norŭ dexa, natürŭ ñoma Tupanaãrŭ dexarŭñ nixŭ —ñanagŭrŭgŭ. ²³ Rū Erode rū yema duŭxŭgŭarŭ oremaã nataãè, rū tama Tupanaxŭ nicuèxŭñchaŭ ga ñuxãcŭ Tupana nŭxŭ narŭngŭxèèxŭ. Rū yemacèx wŭxi ga Tupanaãrŭ orearŭ ngeruŭ ga daxŭcŭãx rū yexgumatama Erodexŭ niqaaawexèè. Rū õxmigŭ nanangŭx, rū yemamaã nayu. ²⁴ Natürŭ yema yaxŭgŭxŭ rū yexeraãcŭ guxŭwama nŭxŭ nixugŭe ga Cori ga Tupanaãrŭ ore. Rū muxŭchixŭ ga duŭxŭgŭ nŭxŭ nayaxŭgŭ. ²⁵ Rū yexguma marŭ yanguxèèãgu ga norŭ puracŭ ga Chauru rū Bernabé, rū Ínachoxŭ ga Yerucharéŭwa, rū wenaxãrŭ Aũtioquĩacèx nawoegu. Rū nayagagŭ ga Cuãŭ Marcu.

13*Bernabé rū Chauru rū inanaxŭgŭe ga to ga nachŭñãnewa na nangegŭãxŭ ga Tupanaãrŭ ore*

¹ Rū yema yaxŭgŭxŭ ga Aũtioquĩawa yexmagŭxŭtanŭwa rū nayexma ga ñuxre ga yatŭgŭ ga Tupanaãrŭ orearŭ uruŭgŭ, rū ñuxre ga yatŭgŭ ga Tupanaãrŭ orewa nguxèètaegŭxŭ. Rū yematanŭwa nayexma ga Bernabé, rū Chimáũ ga Waxwegu àegaxŭ, rū Dúchiu ga Chirenecŭãx, rū Manaè ga wŭxigu àèxgacŭ ga Erodemaã yaexŭ, rū Chauru. ² Rū wŭxi ga ngunexŭ ga yexguma Coricèx ínangutaquèxegŭgu rū tama nachibŭeãcŭma ínayumŭxègŭguyane, rū Tupanaãè i Ũñexŭ rū ñanagŭrŭ nŭxŭ: —¡Choxna penamugŭ i Chauru rū Bernabé na naxŭgŭãxŭcèx i ngèma puracŭ i choma nawa chanamugŭchaŭxŭ! —ñanagŭrŭ. ³ Rū yexguma nŭxŭ nachauegu ga tama nachibŭeãcŭma na nayumŭxègŭxŭ, rū Chauru rū Bernabééŭgu naxŭmèxgŭ ga yema yaxŭgŭxŭ, rū ñuxŭchi inanamuãchitanŭ na naxŭgŭãxŭcèx ga Tupanaãrŭ puracŭ.

Chiprewa naxŭ ga Bernabé rū Chauru

⁴⁻⁵ Rū Tupanaãè i Ũñexŭ rū inanamuãchitanŭ ga Bernabé rū Chauru. Rū ñãne ga Cheúchiawa naxŭ, rū gumaãrŭ türewa inaxŭãchi, rū capaxŭ ga Chiprewa naxŭ. Rū Cuãŭ Marcu nawe narŭxŭ na nŭxŭ nangŭxèèxŭcèx. Rū yexguma Charamína ga ñãneãrŭ türewa nangugŭgu, rū inanaxŭgŭe ga nŭxŭ na yaxugŭxŭ ga Tupanaãrŭ ore ga Yudiŭgŭarŭ ngutaquèxepataŭgŭwa. ⁶ Rū guxŭgu nixŭãgŭtanŭ ga yema capaxŭwa ñuxmata Papu ga ñãnewa nangugŭ. Rū yema namaã inayarŭxŭ ga wŭxi ga Yudiŭ ga yuŭxŭ ga Barechúgu àegaxŭ. Rū nŭma rū wŭxi ga idoratèxãxŭ nixŭ yerŭ nügŭ yaxuxgu rū aixcŭma Tupanaãrŭ orearŭ uruŭ nixŭ. ⁷ Rū nayexma ga yema capaxŭãrŭ àèxgacŭ ga Chérquiu Paurugu àegaxŭ. Rū nŭma nixŭ ga wŭxi ga yatŭ ga meã naãèxŭ cuãcŭ. Rū yema yuŭxŭ rū guma àèxgacŭarŭ ngŭxèèruŭ nixŭ.

Rü nüma ga ãëxgacü rü norü duüxügüxü namu na Chauru rü Bernabécëx yacagüxücëx, yerü nüxü naxinüchaü ga Tupanaärü ore. ⁸ Natürü yema yuüxü ga Griëgugawa Erimínugu ägaxü, rü Chauru rü Bernabéna nayanuxü na Tupanaärü orexü yaxugüxü. Yerü tama nanaxwëxe na yaxõõxü ga guma ãëxgacü. ⁹⁻¹⁰ Natürü ga Chauru ga Paurugu ta ägaxü, rü aixcüma Tupanaäë i Üünexü nawa nayexma. Rü nüma ga Pauru rü meäma nüxü nadawenü ga yema yuüxü, rü ñanagürü nüxü: —Pa Idoratëxaxü Pa ngoxo Nanex, cuma rü chixexüxicatama cuxüxchaü, rü naxchi cuxai i guxüma i mexü. ¿Ñuxgura tá ta i nüxü curüxoxü na ícuyatóxëxü i Cori ya Tupanaärü ore i aixcüma ixíxü? ¹¹ —Ñuxmatátama cuxü napoxcu ya Cori ya Tupana. Rü tá cungexetü, rü ñuxre i ngunexügu rü táütáma nüxü cudau ya üëxcü —ñanagürü. Rü yexgumatama naxcëx naxëänexüchi ga yema yuüxü, rü naxmëxmaã nadaugü na texë naxmëxgu yayauxächixücëx rü namaã ítixüxücëx. ¹² Rü yexguma yemaxü nadëuxgu ga yema capaxüärü ãëxgacü rü nayaxõ ga Tupanaärü ore, yerü namaã nabaixächiaë ga yema Pauru rü Bernabé nüxü nguxëëxü ga Cori ya Tupanachiga.

Pauru rü Bernabé rü Pichídiaanewa yexmane ga ñäne ga Aütioquíawa nangugü

¹³ Rü Papuwa inaxíachi ga Pauru namücügümaã rü nixäü ga taxtü ga taxüwa. Rü Pérupe ga ñänewa nangugü ga Paüpiriaanewa. Natürü yéma nüxna naxo ga Cuáü Marcu, rü Yerucharéücëx nataegu. ¹⁴ Rü Pérupewa inaxíachi ga Pauru rü Bernabé rü ñäne ga Aütioquíawa nangugü ga Pichídiaanewa. Rü yéma rü ngüxchigaarü ngunexügu rü Yudíugüarü ngutaquëxepataügu nachocu, rü yéma narütogü natanüwa ga yema íngutaquëxegüxü. ¹⁵ Rü yema ngutaquëxewa rü nüxü nadaumatügu ga Tupanaärü mugü ga Moíché umatüxü rü yema ore ga Tupanaärü orearü uruügu umatüxü. Rü yemawena, rü guma ngutaquëxepataüärü ãëxgacügü, rü Bernabé rü Pauruna nacagü, rü ñanagürügü: —Pa Toeneëgüx, ngëxguma pexü nangëxmagu i perü ore i taãëxëëruü i toxcëx rü marü name i ñuxma tomaã nüxü pixu —ñanagürügü. ¹⁶ Rü yexguma inachi ga Pauru, rü naxunagümëxë na iyanachianexücëx ga duüxügü. Rü yexguma duüxügümaã nidexa, rü ñanagürü: —Pa Duüxügü Pa Chautanüxügüx rü Guxäma i Pema i To i Nachiüä necüäx Ixígüxex ya Tupanaxü Ngechaügüxe, rü jiperüxíñüë! ¹⁷ —Yima törü Tupana i yixema i Yudíugü, rü tüxü nade ga nuxcümatügüxe ga törü oxigü na tüxü nangüxëëxücëx. Rü poraäcü tüxü nimuxëë ga yexguma woo to ga nachiüäne ga Equituanewa tayexmagügu. Rü yemaäcü wüxi ga taxü ga nachiüäne tüxü nixígüxëë. Rü ñuxüchi yemawena, rü norü poramaã tüxü ínagaxü ga yema naänewa. ¹⁸ —Rü dauxchitawa ga ngextá taxüema íxápataxüwa tüxü nagagü. Rü yéma 40 ga taunecü Tupana yaxna tûmama naxínü ga guxema törü oxigü. ¹⁹ —Rü Tupana nanadai ga yema 7 ga ãëxgacügü ga Canaãä necüäxgü guxüma ga norü duüxügümaächigü. Rü yemaäcü nanaxü na törü oxigüna naxáaxücëx ga yema naäne na tûmaärügüxüchi yíixücëx. ²⁰ —Rü 450 ga taunecü rü yemaäcü tüxü narüngüxëë. Rü yemawena rü tüxna nanamu ga togü ga ãëxgacügü ga dauruügu ñuxmata Tupanaärü orearü uruü ga Chamue ingucuchix. ²¹ —Rü yexguma ga duüxügü rü Tupanana naxcëx nacagü ga wüxi ga ãëxgacü ga rei na namaã inacüaxücëx. Rü Tupana rü nüxna nanamu ga Chau ga Chiche nane ga Beyamítaa ixícü. Rü nüma nüxna nadau ga duüxügü ga 40 ga taunecügu. ²² Rü yemawena ga Tupana rü

inanatèxüchi ga Chaú, rü Dabíxü naxuneta na guma norü ãëxgacü yíxüçèx. Rü Dabíxü nixuchiga ga Tupana, rü ñanagürü:

“Nüxü chadau rü Dabí ya Ichaí nane rü wüxi ya yatü ya poraãcü choxü ngüchaücü nixí. Rü nüma tá nanaxü i guxüma i ngëma choma chanaxwèxexü”,

ñanagürü ga Tupana. ²³ Rü nuxcüma ga Tupana rü marü inaxuneta rü wüxi i Dabítaa tá nixí i Cristu ixíxü, rü tá nanamaxèxèë i Yudiügü. Rü Ngechuchu nixí ga guma maxèxèëruü ga tórü oxigümaã nüxü yaxucü ga Tupana. ²⁴ Natürü naxüpa ga Ngechuchu na ínguxü, rü Cuáü ga baiüxèëruü rü guxüma ga Yudiügümaã nüxü nixuchiga ga ore i mexü rü ñanagürü:

“Rü name nixí i nüxü perüxoe i pecüma i chixexü, rü Tupanacèx pedaugü, rü ípebaiü”, ñanagürü. ²⁵ Rü yexguma marü yangaicaxgu ga tá na nayuxü ga Cuáü, rü ñanagürü:

“Rü tama choma nixí i ngëma pema nagu perüxíñüëxü i Cristu chíxü. Natürü chowema ne naxü i nüma ya aixcüma Cristu ixícü. Rü choma rü napèxewa taxuwama chame, rü bai i norü chapatucunüärü wëgüwaxüra chame erü nüma rü wüxi i ãëxgacü i tacüxüchima nixí”, ñanagürü ga Cuáü.

²⁶ Rü ñanagürü ga Pauru, —Pa Chautanüxügü i Abráütaagüx, rü Guxāma i Pema i To i Nachiüñecüãx i Tupanaxü Ngechaügüxex, rü pexcèx nixí i ñaa ore i tüxü maxèxèëxü. ²⁷ —Rü aixcüma yema Yerucharéüçüãxgü ga duüxügü rü yema norü ãëxgacügü rü tama nüxü nacüëxgü ga Tupana Nane na yíxü ga Ngechuchu. Rü tama meã nüxü nacüëxgü ga tacüchiga na yíxü ga yema ore ga nuxcümaügüxü ga Tupanaärü orearü uruügü ümatüxü i ñuxma perü ngutaquëxepataüwa nüxü pedamatügüxü i wüxichigü i ngüxchigaarü ngunexügu. Rü yemaãcü nümagütama ga yema duüxügü ga Ngechuchxü imëxgüxü rü yexguma yamëxgüägu rü nayanguxèë ga yema ore ga nuxcüma ümatüxü. ²⁸ —Rü woo taxuüma ga tacü ga chixexü nawa inayangaugü na nayuxèëãxüçèx, natürü Piratuna naxcèx nacagü na yamáãxüçèx. ²⁹ —Rü níngu ga guxüma ga yema ore ga Tupanaärü orearü uruügü ümatüxü ga Ngechuchuchiga ga ñuxäcü tá na nayuxü. Rü yemawena rü nanayaugü ga naxüne ga curuchawa, rü wüxi ga naxmaxügu nayanaxüçuchigü. ³⁰ —Natürü ga Tupana rü wena nanamaxèë ga woo marü na nayuxü. ³¹ —Rü nüma ga Ngechuchu rü muxüma ga ngunexü naxcèx nangox ga yema duüxügü ga nawe rüxíxü ga yexguma Gariréaanewa ne naxüxgu rü Yerucharéüwa naxüxgu. Rü ngëma duüxügü nixí i ñuxma i guxü i duüxügümaã nüxü ixügüxü i nachiga. ³²⁻³³ Rü ngëmaãcü i toma rü nüma tangugü na pemaã nüxü tixuxüçèx i ngëma ore i aixcüma mexü. Rü dücax, rü yema uneta ga nuxcümaügüxü ga tórü oxigümaã nüxü yaxuxü ga Tupana, rü taxcèx nayan-guxèë ga yexguma Ngechuchuxü wena namaxèëgu. Rü wiyaegüpanewa i norü taxre i capíturuwa rü ngëmachiga nüxü nixü i ngëxguma:

“Cuma nixí i Chaune, rü choma nixí i Cunatü chíxü”, ñaxgu. ³⁴ —Rü Tupana rü nuxcüma rü marü nüxü nixü ga wena tá na namaxèëãxü ga Ngechuchu na tama yayixixüçèx ga naxüne. Rü norü orewa rü ñanagürü:

“Rü choma tá pexcèx chayangxèë ga yema unetagü i üünegüxü i aixcüma ixígüxü ga nuxcüma Dabímaã nüxü chixuxü”,

ñanagürü. ³⁵ —Rü ngëmacèx toxmanana i Tupanaärü orewa rü ñanagürü ta: “Tama cunaxwèxe na yayixixü i naxüne ya Cune ya üüneçü,”

ñanagürü. ³⁶ —Rü yexguma namaüxgu ga Dabí, rü nüxü narüngüxèë ga norü duüxügü, yexgumarüü ga ñuxäcü Tupana namuxü. Natürü ñuxüchi

nayu, rü nanatü rü naëxüttagu natèx ga naxüne, rü niyixi. ³⁷ —Natürü guma Tupana wena namaxëëcü ga Ngechuchu rü tama niyixi ga naxüne. ³⁸ —Rü ñuxmax, Pa Chaueneëgüx, rü chanaxwëxe i nüxü pecuèx rü yimatama Ngechuchugagu Tupana tüxü nüxü nangechaü i törü pecadügü ngëxgumarüü i pemaä nüxü tixuxürüü. ³⁹ —Rü ñuxma ya guxäma ya yixema nüxü yaxögüxe, rü Ngechuchugagu Tupana tüxü nüxü nangechaü i guxüma ga yema pecadügü ga noxri taxucürüwa tüxü nüxü nangechaüxü ga yexguma nagu taxixgu ga yema mugü ga Moiché ümatüxü. ⁴⁰ —Rü pexuäëgü na tama pegu nanguxücëx i ngëma poxcu i Tupanaärü orearü uruügü nüxü ixuchigaxü ga yexguma ñagügu:

⁴¹ “Rü dücax, Pa Duüxgü i Tupanaärü Orexü Cugüexüx, rü tá peñaixächie rü tá peyue erü pema pemaxëyane rü tá chanaxü i tacü i taxü. Rü pema rü täütäma peyaxögü i woo texé pemaä nüxü ixuxgu”, ñanagürü. Rü yexma nayacuèxëë ga Pauru ga norü ore. ⁴² Rü yexguma guma ngutaquëxepataüwa ínachoxügu ga Pauru rü namücügü, rü yema duüxügü ga tama Yudiügü ixigüxü rü nüxü nacëèxügü na to ga ngüxchigaarü ngunexügu rü wenaxärü yematama orexü namaä yaxuxücëx. ⁴³ Rü yexguma marü nüxü nachauegu ga na nangutaquëxegüxü, rü Pauru rü Bernabéwe narüxi ga muxüma ga Yudiügü rü müxüma ga togü ga duüxügü ga tama Yudiügü ixigüxü natürü Yudiügürüü yaxögüxü. Rü Pauru rü Bernabé rü namaä nidexagü rü nayaxucuxëgü na guxüguma nagu naxinüëëchaxücëx ga ñuxäcü Tupana nüxü ngechaüäcüma na nadexü. ⁴⁴ Rü yema to ga ngüxchigaarü ngunexügu, rü wixgutaèx guxüma ga yema ñäneçüäx nangutaquëxegü na inaxinüëxücëx ga Tupanaärü ore. ⁴⁵ Natürü nayexma ga ñuxre ga Yudiügü ga tama ngutaquëxegu chocuxü. Rü yexguma nüxü nadaugügu ga na namuxüchixü ga duüxügü ga Paurucëx ngutaquëxegüxü rü poraäcü nixäüxächie. Rü inanaxügüe ga na Pauruxü nachoxügagüxü rü namaä naguxchigagüxü. ⁴⁶ Natürü ga Pauru rü Bernabé rü tama namuëëäcüma yema Yudiügüxü nangäxügü, rü ñanagürügü: —Tupana nanaxwëxe na pemaäxira nüxü tixuxü i norü ore. Natürü ñuxma na nüxü pexoexü i ngëma ore rü tama na penayauxgüchaüxü i maxü i taguma güxü, rü ngëmacëx i ñuxmax i toma rü tá ngëma tama Yudiügü ixigüxütanüwa taxü. ⁴⁷ —Yerü yemaäcü toxü namu ga Cori, rü ñanagürü:

“Duüxügü i tama Yudiügü ixigüxüärü ngóonexëëruü marü cuxü chixixëë, na guxüwama i ñoma i naänewa cunangexücëx i chorü ore i maxëxëëruü”, ñanagürü. ⁴⁸ Rü yexguma yema orexü naxinüëgu ga yema duüxügü ga tama Yudiügü ixigüxü, rü nataäëgü rü ñanagürügü: —Rü namexëchi nixü i ñaä Cori ya Tupanaärü ore —ñanagürügü. Rü nayaxögü ga guxüma ga yema duüxügü ga Tupana marü nüxü unetaxü na nayauxgüäxücëx i maxü i taguma güxü. ⁴⁹ Rü yemaäcü guxüwama ga yema naänewa nanguchigü ga Cori ya Tupanaärü ore. ⁵⁰ Natürü yema Yudiügü ga tama Ngechuchuauxü yaxögüchaüxü, rü chixexümaä nayaxucuxëgü ga ñuxre ga ngexügü ga mexügü ga Tupanaxü ngechaügüxü rü guma ñäneärü äëxgacügü na Pauru rü Bernabéxü inawoxüxücëx. Rü yemacëx inanawoxü ga yema naänewa. ⁵¹ Rü yexguma ga Pauru rü Bernabé rü inapagücutü ga norü üxaxücutü na yemawa nüxü yacuèxächitanüxücëx ga norü chixexü ga yema ñäneçüäxgü ga duüxügü. Rü ñuxüchi ga Pauru rü Bernabé rü ñäne ga Içünüwa naxü. ⁵² Natürü yema yaxögüxü ga guma ñäne ga nawa ínachoxünewa yexmagüxü rü poraäcü Tupanamaä nataäëgü, rü Naäe i Üünexü rü aixcüma nawa nayexma.

14

Pauru rŭ Bernabé rŭ ĩāne ga Ićúniŭwa nayexmagŭ

¹ Rŭ Ićúniŭwa rŭ wŭxigu Yudiŭgŭarŭ ngutaquĕxepataŭgu nachocu ga Pauru rŭ Bernabé. Rŭ meāma nŭxŭ nixuchiga ga Tupanaārŭ ore rŭ yemaācŭ nayaxōgŭ ga muxŭma ga duŭxŭgŭ ga Yudiŭgŭ rŭ yema tama Yudiŭgŭ ixīgŭxŭ rŭ ta. ² Natŭrŭ yema Yudiŭgŭ ga tama Ngechuchuaxŭ yaxōgŭxŭ, rŭ chixexŭmaā nayaxucxĕgŭ ga yema tama Yudiŭgŭ ixīgŭxŭ na yema yaxōgŭxŭchi naxaieŭcĕx. ³ Rŭ yemacĕx muxŭma ga ngunexŭ yexma narŭcho ga Pauru rŭ Bernabé, rŭ tama namuĕĕcŭma nŭxŭ nixuchiga ga Cori ya Tupanaārŭ ore. Rŭ yema duŭxŭgŭmaā nŭxŭ nixu na űuxācŭ Tupana poraācŭ tŭxŭ nangechaŭxŭ. Rŭ nŭma ga Cori rŭ yema duŭxŭgŭxŭ nŭxŭ nadauxĕĕ na namaā nataāĕxŭ ga yema ore. Rŭ yemacĕx Pauru rŭ Bernabéxŭ narŭngŭtŭxĕĕ na inawĕxgŭāxŭcĕx ga cuĕxruŭgŭ rŭ na naxŭgŭāxŭcĕx ga mexŭgŭ ga Tupanaārŭ poramaā naxŭgŭxŭ. ⁴ Natŭrŭ ga guma ĩāneĕŭāx ga duŭxŭgŭ rŭ nitoye. Rŭ nŭmaxŭ rŭ yema Yudiŭgŭwaama naxŭgŭ rŭ togŭ rŭ Pauru rŭ Bernabéwaama naxŭgŭ. ⁵ Rŭ yexguma ga yema Yudiŭgŭ, rŭ yema duŭxŭgŭ ga tama Yudiŭgŭ ixīgŭxŭ, rŭ guma ĩāneārŭ āĕxgacŭgŭmaā wŭxigu nagu narŭxŭnŭĕ na Pauruxŭ rŭ Bernabéxŭ yayauxgŭxŭ na nutamaā ĩnamuxŭchigŭāxŭcĕx. ⁶⁻⁷ Natŭrŭ yexguma nŭxŭ nacuāchigagŭgu ga Pauru rŭ Bernabé, rŭ nibuxmŭ. Rŭ Dicóniŭānewa yexmane ga ĩānegŭ ga Listra rŭ Derbewa naxŭ. Rŭ guma ĩānegŭwa rŭ guxŭma ga yema naānewa ipeagŭxŭ ga duŭxŭgŭmaā rŭ ta nŭxŭ nixuchigagŭ ga ore i mexŭ.

Nutagŭmaā Pauruxŭ ĩnamuxŭchigŭ ga Listrawa

⁸⁻⁹ Rŭ yema Listrawa nayexma ga wŭxi ga yatŭ ga ĩnapogŭcutŭxŭ norŭ bucŭmatama. Rŭ yema narŭto rŭ inarŭxŭnŭ ga yema Pauru nŭxŭ ixuxŭ ga ore. Rŭ Pauru rŭ meāma nŭxŭ nadawenŭ, rŭ nŭxŭ nadau ga na nŭxŭ nayexmaxŭ ga norŭ ō na naxcĕx yataanexŭcĕx. ¹⁰ Rŭ yexguma ga Pauru rŭ tagaācŭ űanagŭrŭ nŭxŭ: —ĭInachi, rŭ meāma ĩnangacutŭ! —űanagŭrŭ. Rŭ yexguma ĩnayuxnagŭ ga guma yatŭ, rŭ ĩanaxŭgŭ ga na iyaxŭxŭ. ¹¹ Rŭ yexguma yema muxŭma ga duŭxŭgŭ nŭxŭ daugŭgu ga yema na naxŭxŭ ga Pauru, rŭ tagaācŭ yema Dicóniŭgawa nidexagŭ, rŭ űanagŭrŭgŭ: —Tupanagŭ i naduŭxŭgŭraŭxŭ ĩnarŭxŭgŭ, rŭ tatanŭwa nangugŭ —űanagŭrŭgŭ. ¹² Rŭ Bernabé rŭ tupana ga Chéumaā nanaxŭĕgagŭ. Rŭ Pauru rŭ Ērememaā nanaxŭĕgagŭ yerŭ nŭma nixŭ ga yadexaxŭ. ¹³ Rŭ guma ĩāne ĩxŭcuxŭwa nayexma ga tupana ga Chéuarŭ tupauca ga taxŭne. Rŭ guma tupaucaarŭ pai rŭ yema nanagagŭ ga wocagŭ ga iyatŭxŭ ga putŭramaā ngĕxāĕgŭxŭ. Rŭ nŭma ga pai rŭ ga duŭxŭgŭ rŭ nanadaixchaŭ ga yema wocagŭ naxcĕx ga Pauru rŭ Bernabé na yemamaā nŭxŭ yacuĕxŭgŭxŭcĕx. ¹⁴ Natŭrŭ yexguma nŭxŭ yacuĕxāchitanŭgu ga Bernabé rŭ Pauru, rŭ norŭ gāuxŭchirigu nagāgŭĕ na yema duŭxŭgŭ nŭxŭ cuĕxgŭxŭcĕx na tama namexŭ ga yema naxcĕx naxŭĕchaŭxŭ. Rŭ yema muxŭma ga duŭxŭgŭtanŭwa nabuxmŭ, rŭ űaxŭmaā aita naxŭe: ¹⁵ —Pa Yatŭgŭx, ŭtŭxcŭŭ toxcĕx penaxŭ i ngĕma? Toma rŭ pexrŭŭ duŭxŭgŭmare tixŭgŭ. Rŭ nuā taxŭ na pemaā nŭxŭ tayarŭxŭxŭcĕx na nŭxŭ perŭxoĕxĕx i ngĕma chixexŭgŭ i taxuwama mexŭ rŭ naxcĕx pedaugŭxĕx ya Tupana ya maxŭcŭ ga naxŭcŭ ga daxŭgŭxŭ i naāne, rŭ űoma i naāne, rŭ taxtŭ i taxŭ, rŭ guxŭma i nawa ngĕmaxŭ. ¹⁶ —Rŭ nuxcŭmayerŭ nixŭ ga Tupana ga yaxna namaā naxŭnŭxŭ ga duŭxŭgŭ ga woo nŭmagŭ nanaxwĕxegŭxŭ naxŭgŭgu. ¹⁷ —Natŭrŭ nŭma ga Tupana rŭ taguma nŭxŭ

narūchau na duūxūgūxū nangūxēēxū. Rū yemaācū tūxū nūxū nacuēxēē na Tupana yīxū i nūmax. Rū nūmatama nixī i nūma namuāxū ya pucū rū meā pexū nayaexēxēāxū i penetūgū. Rū nūma nixī i pexna naxāāxū i pewemū na ngēmaācū petaāēgūxūcēx —ñanagūrūgū ga Pauru rū Bernabé.¹⁸ Natūrū woo yema orexū namaā na yaxugūxū rū poraācū nūxū naguxcha ga Pauru rū Bernabé ga nūxna na nachogūxū ga duūxūgū ga tama naxcēx na nadaīāxūcēx ga yema wocagū na yemamaā nūxū yacuēxūūgūxūcēx. Rū dūxwa yemacēx tama naxcēx nanadai.¹⁹ Natūrū yexgumayane rū ínangugū ga ñuxre ga Yudiūgū ga Aūtioquíawa rū Icūniūwa ne Īxū. Rū chixexūmaā nayaxucuxēgū ga yema muxūma ga duūxūgū na tama Pauru rū Bernabéga naxīnūēxūcēx, rū namaā nanuēxūcēx. Rū yemacēx ga yema duūxūgū rū nutamaā Pauruxū ínamuxūchigū, rū íāneārū Īxpemawa nanatūchigūgū, yerū nūma nūxū nacuēxūgū rū marū nayu.²⁰ Natūrū yexguma yema yaxōgūxū naxūtawa ngutaquēxegu, rū inachi ga Pauru, rū wenaxārū nagu naxūcu ga guma íāne. Rū moxūācū inaxūāchi ga yēma, rū Bernabémaā Derbewa naxū.²¹ Rū guma íānewa nūxū nixugūe ga ore ga mexū. Rū nanangūxēē ga duūxūgū, rū muxūma Tupanaāxū nayaxōgū. Rū yemawena rū wenaxārū naxcēx nawoegu ga Listra, rū Icūniū, rū Aūtioquía.²² Rū guma íānegūwa rū yema yaxōgūxūxū nixucuxēgū, rū nūxū nanangūchaūxēēgū na guxūguma meā na yaxōgūāxūcēx. Rū namaā nūxū nixugūe, rū ñanagūrūgū: —Ngēma Tupana āēxgacū íxīxūwa na íxūcuxūcēx, rū tanaxwēxe na muēxpūxcūna guxchaxūgūmaā yaxna íxīnūēxū i ñoma i naānewa —ñanagūrūgū.²³ Rū Pauru rū Bernabé rū wūxichigū ga íānewa rū nūxū nixunetatanū ga ñuxre ga yatūgū na yaxōgūxūārū āēxgacūgū yixīgūxūcēx. Rū tama nachibūeācūma naxcēx nayumūxēgū. Rū yemawena rū yima Cori ya Tupana ga nūxū yaxōgūācūna nanaxuaxūgū na guxūguma namaā inaxāūxūcēx rū meā nūxna nadauxūcēx ga yema yaxōgūxūārū āēxgacūgū.

Pauru rū Bernabé rū naxcēx nawoegu ga Aūtioquía ga Chíríaanewa yexmane

²⁴ Rū Pichídiaanewa nichopetū, rū Paūpíríaanewa nangugū.²⁵ Rū Pérupe ga íānewa nūxū nixugūe ga Tupanaārū ore, rū ñuxūchi Atária ga íānewa naxī.²⁶ Rū yēma rū wūxi ga wapurugu nichoū na Aūtioquíacēx nawoeguxūcēx. Rū guma íāne ga Aūtioquíawa nixī ga noxri duūxūgū Tupanana namugūxū ga Pauru rū Bernabé na naxūgūāxūcēx ga yema puracū ga ñuxma marū yanguxēēgūxū.²⁷ Rū yexguma ínangugūga ga Pauru rū Bernabé, rū nanangutaquēxēē ga guxūma ga yema duūxūgū ga yaxōgūxū. Rū namaā nūxū nixugūgū ga guxūma ga ñuxācū Tupana poraācū nūxū na rūngūxēēxū. Rū yexgumarū ta rū namaā nūxū nixugūgū ga ñuxācū na yaxōgūāxū ga yema duūxūgū ga tama Yudiūgū íxīgūxū, yerū Tupana nūxū nanatauxchaxēē na yaxōgūāxūcēx.²⁸ Rū muxūma ga ngunexūgu yema yaxōgūxūtanūwa nayexmagū ga Pauru rū Bernabé.

15

Yerucharéúwa nangutaquēxegū

¹ Rū yexgumaācū rū nayexma ga ñuxre ga duūxūgū ga Yudéaanewa ne Īxū ga Aūtioquíawa ngugūxū. Rū nūmagū ínanaxūgūe ga tūxū na nangūxēēxū ga guxema yaxōgūe ga Aūtioquíacūāx, rū ñanagūrūgū: —Ngēxguma tama pegū ípewiūchēxmūpēxechiraūgu yema Moiché tūxū muxūrūū rū taxuacūma pexū nangēxma i maxū i taguma gūxū —ñanagūrūgū.² Natūrū ga Pauru rū

Bernabé rü tama norü me nixī ga yema, rü yemacèx poraãcū nügü namaã nachoxūgagü ga yema duūxūgü ga Yudeaanewa ne İxū. Rū dūxwa Pauru rü Bernabé rü ñuxre ga togü ga Aūtioquiacūāx ga yaxōgūxūxū naxunetagü na Yerucharéūwa naxīxūcèx na yema ngūexūgü ga Ngechuchu imugūxū rü yema yaxōgūxūārū āēxgacūgūmaã yamexēēgūāxūcèx ga yemachiga. ³ Rū yemaãcū ga yema yaxōgūxū ga Aūtioquiacūāx rü Yerucharéūwa nanamugü ga yema yatügu na naxcèx íyacagūxūcèx rü yamexēēgūāxūcèx ga yema ore. Rū Peníchiaanewa rü Chamáriaanewa nachopetü ga Pauru rü Bernabé. Rū yéma rü duūxūgūmaã nūxū nixugüe ga ñuxácü yema tama Yudiügü ixīgūxū rü nūxū na naxoexū ga nuxcūmaūxū ga nacūmagü na Tupanawe naxīxūcèx. Rū yema oremaã poraãcū nanataãēxēēgü ga guxūma ga yema yaxōgūxū. ⁴ Rū Yerucharéūwa nangugü ga Pauru rü Bernabé. Rū guxūma ga yema yaxōgūxū rü yema ngūexūgü ga Ngechuchu imugūxū rü yema yaxōgūxūārū āēxgacūgü rü meãma nanayauxgü. Rū Pauru rü Bernabé namaã nūxū nixugügu ga guxūma ga ñuxácü Tupana poraãcū nūxū na rüngūxēēxū na duūxūgūmaã nūxū yaxugūxūcèx ga ore i mexū. ⁵ Natürü ñuxre ga Parichéugü ga Ngechuchuaxū yaxōgūxū, rü inachigü, rü ñanagürügü: —Name nixī na nügü ínawīūchēmüpēxechiraūgūxū i ngēma tama Yudiügü ixīgūxū i ngexwaca yaxōgūxū. Rū name nixī na naga naxīnūēxū i ngēma mugü ga Moíché ūmatūxū —ñanagürügü. ⁶ Rū yexguma nangutaquexegü ga yema ngūexūgü ga Ngechuchu imugūxū rü yema yaxōgūxūārū āēxgacūgü na namexēēgūāxūcèx ga yema ore. ⁷ Rū yixcama marü ñuxgumama nügūmaã yéma yaporagatanūciūgu, rü inachi ga Pedru, rü ñanagürü nūxū: —Pa Chaueneēgūx, pema nūxū pecuèx ga na ūpamama Tupana choxū yaxuxū ga petanūwa na yema duūxūgü i tama Yudiügü ixīgūxūmaã nūxū chixuxūcèx i norü ore i mexū i maxēxēēruū, na nūmagü rü ta Ngechuchuaxū yaxōgūāxūcèx. ⁸ —Rū yima Tupana ya guxāāēxū cuácü rü tūxū nūxū nadauxēē na nadeāxū i ngēma duūxūgü i tama Yudiügü ixīgūxū, yerü nūxna nanamu ga Naãe i Ūñexū yema tūxna namuāxūrū. ⁹ —Rū Tupanapēxewa rü yixema i Yudiügü rü namaã tawūxigu i ngēma duūxūgü i tama Yudiügü ixīgūxū. Yerü nūmagü rü ta Tupana nūxū nūxū nangechaū ga norü pecadugü ga yexguma nūxū yaxōgūāgu. ¹⁰ —¿Rū tūxcūū tama namaã petaãe i ñuxma i ngēma Tupana ūxū? ¿Rū tūxcūū ngēma ngezwacèx yaxōgūxūxū penaxūxēēchaū i ngēma Moíchéarü mugü i guxchaxū ga tórü oxigü rü taxuacūma naga taxīnūēxū rü woo yixemagü rü ta taxuacūma inguxēēxū? ¹¹ —Rū tama ngēma mugü nixī i tūxū maxēxēēxū. Natürü yixema rü tayaxōgü na tórü Cori ya Ngechuchu tamaã mecūmaxūgagu yīxū na tūxna naxāmareāxū i maxū i taguma gūxū. Rū ngēxgumarūū ta nixī i naxcèx i nūmagü i tama Yudiügü ixīgūxū —ñanagürü ga Pedru. ¹² Rū inanaxūgü ga Bernabé rü Pauru na yadexagūxū. Rū guxūma ga yema duūxūgü rü inarūchianegü rü inarūxīnūēmare. Rū Bernabé rü Pauru rü namaã nūxū nixugüe ga ñuxácü Tupana na nūxū rüngūxēēgūxū na naxūgūāxūcèx ga mexū ga taxūgü ga Tupanaārū poramaã naxūgūxū natanūwa ga yema duūxūgü ga tama Yudiügü ixīgūxū. ¹³ Rū yexguma Bernabé rü Pauru igūegagūgu, rü nūxīxārū nidexa ga Chaūtiágu, rü ñanagürü: —Pa Chaueneēgūx, ¡choxū íperūxīnūē! ¹⁴ —Pedru i Chimáru rü tamaã nūxū nixu na ñuxácü Tupana inaxūgūxū ga nūxū na nangūxēēxū ga yema duūxūgü i tama Yudiügü ixīgūxū. Rū tamaã nūxū nixu ta na ñuxácü Tupana yema duūxūgūtanūwa nadeāxū ga ñuxre ga duūxūgü na noxrü yixīgūxūcèx. ¹⁵ —Rū ngēma Pedru nūxū ixuxū rü nawūxigu namaã ga

yema ore ga nuxcūmaũgũxũ ga orearũ uruũgũ ūmatũxũ ga ñaxũ:

¹⁶ “Rũ ngēmawena rũ tá chataegu, rũ tá nũxũ charũngũxēē i Dabítaagũ i Yudiũgũ. Rũ woo nawoonemare i ñuxmax, natũrũ wena táxarũ wũxiwa chanaxixēē, rũ tá íchanadagũxēē na noxrirũ naporaexũcèx. ¹⁷ Rũ ngēmaãcũ tá nũxũ charũngũxēē na ngēma duũxũgũ i tama Yudiũgũ ixĩgũxũ rũ chauxcèx nadaugũxũcèx, wũxigu namaã i guxũma i chorũ duũxũgũ i Yudiũgũ i choma chadexũ. ¹⁸ Rũ yemaãcũ nũxũ nixu ga nũma ga Cori ya Tupana ga nuxcũmama tũxũ nũxũ cuèxēēcũ ga yema”, ñanagũrũ ga yema ore ga nuxcũma ūmatũxũ. ¹⁹ Rũ ñanagũrũ ga Chaũtiágu: — Rũ ngēmamacèx, Pa Chaueneēgũx, rũ chauxcèx rũ tama name na guxũ i Moíché ūmatũxũ i mugũmaã nũxũ ichixewexũ i ngēma duũxũgũ i tama Yudiũgũ ixĩgũxũ i nũxũ rũxoexũ i nuxcũmaũxũ i nacũmagũ na Tupanawe naxĩxũcèx. ²⁰ —Rũ narũmemaē nixĩ i naxcèx tanaxũmatũ i popera, rũ ngēmawa namaã nũxũ tixu:

- (1) Rũ tama name na nangõxgũãxũ i ngēma naxũnagũmachi i togũ norũ tupananetachicũnèxãgũcèx dèjxũ.
- (2) Rũ tama name na naĩ i ngemaã rũ èxna naĩ ya yatũmaã inapexũ.
- (3) Rũ tama name na nangõxgũãxũ i namachi i ngēma naèxũ rũ èxna naxũna i wèxnaãxũ rũ èxna natũgu nguxũ.
- (4) Rũ tama name na nangõxgũãxũ ya nagũ.

Rũ ngèxĩcatama nixĩ i inaxwèxexũ na naxcèx naxũmatũxũ. ²¹ —Erũ guxũne ya ñãnewa nangèxma ya Yudiũgũarũ ngutaquèxepataũ i ngextá nuxcũmama guxũ i ngũxchigaarũ ngunexũgu nawa ínangúe rũ nũxũ nixuchigagũ i guxũma i ngēma mugũ ga Moíché ūmatũxũ —ñanagũrũ ga Chaũtiágu.

Popera ga yema duũxũgũ ga tama Yudiũgũ ixĩgũxũcèx ūmatũxũ

²² Rũ yema ore rũ norũ me nixĩ ga yema ngũexũgũ ga Ngechuchu imugũxũ, rũ yema yaxõgũxũarũ àèxgacũgũ, rũ guxũma ga yema yaxõgũxũ. Rũ nũgũmaã ñanagũrũgũ: —¡Ngĩxã tatanũwa tanade ya taxre ya yatũgũ na Aũtioquíawa namugũxũcèx namaã ya Pauru rũ Bernabé! —ñanagũrũgũ. Rũ nũxũ naxunetagũ ga Yuda ga Barsabágu àegaxũ rũ Chira. Rũ nũmagũ ga Yuda rũ Chira rũ àèxgacũgũ nixĩ ga natanũwa ga yema yaxõgũxũ ga Yerucharéũwa yexmagũxũ. ²³ Rũ namaã yéma nanamugũ ga popera, rũ ñaã nixĩ ga yema ore ga nagu naxũmatũgũxũ:

“Pa Toeneēgũ i Tama Yudiũgũ Ixĩgũxe i Aũtioquíagu rũ Chírĩaanegu rũ Chiríchiaanegu Áchiũgũxe, rũ toma i peeneēgũ i Ngechuchu toxũ imugũxe rũ toma i yaxõgũxũarũ àèxgacũgũ ixĩgũxex, rũ pexũ tarũmoxègũ. ²⁴ Rũ nũxũ tacuáchigagũ rũ ñuxre ga duũxũgũ ga nũma ne íxũ rũ woo tama toma yéma tanamugũ natũrũ nũmagũ rũ yéma naxĩ rũ Moíchearũ mugũmaã pexũ nachixewegũ rũ yemaãcũ pexũ ínatũxèē. ²⁵ Rũ yemacèx guxũma ga toma rũ wũxigu nagu tarũxĩnũe na totanũwa nũxũ taxunetaxũ ga taxre ga taeneēgũ na pexcèx ngema tanamugũxũcèx namaã i taeneēgũ i nũxũ ingechaũgũxũ i Bernabé rũ Pauru. ²⁶ Rũ nũmagũ i Bernabé rũ Pauru nixĩ ga poraãcũ àncũmaxũwa nayexmagũxũ naxcèx ga tórũ Cori ya Ngechuchu ya Cristu. ²⁷ Rũ ñuxma rũ pexcèx ngema tanamugũ i Yuda rũ Chira na nũmagũxũchi pemaã nũxũ yaxugũxũcèx rũ pemaã nangõxègũãxũcèx i guxũma i torũ ore. ²⁸⁻²⁹ Erũ Tupanaãe i Ūnèxũcèx name, rũ toxècũ rũ ta name na tama muxũma i mugũ pexna taxãgũxũ. Rũ ñaã àgũmũcũ i mugũxicatama nixĩ i pexũ tamuxũ:

- (1) Rũ tama name na penangõxũ i naxũnagũmachi i togũ norũ tupananetachicũnèxãgũcèx dèjxũ.

(2) Rū tama name na penangōxū i namachi i ngēma naxūnagū i wēxnaāxū.

(3) Rū tama name na penangōxū ya nagū.

(4) Rū tama name na naī i ngemaā rū ēxna naī ya yatūmaā ipepexū.

Rū mexū tā pexūgū ega penaxauregu i ngēma mugū. Rū nuāma pexna”, űanagūrū ga yema ore ga naxūmatūgūxū. ³⁰ Rū natanūxūxū namoxēgūguwena, rū inaxīāchi ga yema yēma mugūxū, rū Aūtioquīawa naxī. Rū yexguma yēma nangugūgu rū nanangutaquēxexēē ga guxūma ga yema yaxōgūxū ga duūxūgū, rū nūxna nanaxāgū ga yema popera. ³¹ Rū yexguma nūxū nadaumatūgūgu, rū poraācū nataāēgū namaā ga yema ucūxēgū ga nūxna naxāgūxū. ³² Rū Yuda rū Chira rū Tupanaārū orearū uruūgū na yixīgūxū, rū muxūma ga oremaā nayaxucūxēgū ga yema yaxōgūxū, rū nūxū narūngūxēē na yexeraācū yaxōgūāxūcēx. ³³ Rū marū űuxre ga ngunexū yēma nayexmagūguwena, rū inixī. Rū yema yaxōgūxū ga Aūtioquīacūāx, rū taāēācūma Yuda rū Chiraxū narūmoxēgū rū meāma inayamugū na naxcēx nawoeguxūcēx ga yema Yerucharēūcūāx ga noxri natanūwa namugūxū. ³⁴ Natūrū ga Chira rū naga narūxīnū na yexma Aūtioquīagu naxāxū, rū yemacēx Yudaxicatama Yerucharēūcēx nataegu. ³⁵ Rū Pauru rū Bernabé rū ta yexma narūcho. Rū wūxigu namaā ga muxūma ga togū, rū nanangūexēē ga duūxūgū, rū namaā nūxū nixugūgū ga Cori ya Tupanaārū ore i mexū.

Pauru rū wenaxārū inaxūāchi ga to ga nachīūānegūwa na nangeaxū ga Tupanaārū ore

³⁶ Rū yexguma marū űuxre ga ngunexū ngupetūgu, rū űanagūrū ga Pauru Bernabéxū: —iNgīxā wenaxārū natanūgu tanaxīāne i ngēma yaxōgūxū i guxūne ya īāne ga ngextā nūxū īixuchigaxūwa ga Cori ya Tupanaārū ore na nūxū idauxūcēx na űuxācū nūxū īnangupetūgūxū! —űanagūrū. ³⁷ Rū Bernabé rū nayagaxchaū ta ga Cuāū Marcu. ³⁸ Natūrū ga Pauru rū tama nanaxwēxe ga na yagaāxū, yerū Paūpīriawa nūxna naxo ga noxri, rū tama īnayaxūmūcū ga yema puracūwa. ³⁹ Rū poraācū nūgūmaā niporagatanūcūū naxcēx ga yema, rū dūxwa nūgūna nixīgū. Rū Bernabé nayaga ga Marcu, rū Chiprearū capaxūwa naxū. ⁴⁰ Rū yoxni ga Pauru rū Chiraxū niga. Rū yema Aūtioquīacūāx ga yaxōgūxū rū naxcēx nayumūxēgū na Tupana nūxū rūngūxēēgūxūcēx. Rū yexguma inaxīāchi. ⁴¹ Rū Chīriaanewa rū Chīrīchiaanewa nachopetū, rū yēma Tupanaārū oremaā nanataāēxēēgū ga yema yaxōgūxū.

16

Pauru rū Chirawe narūxū ga Timutéu

¹ Rū Derbewa rū Listrawa nangugū ga Pauru rū Chira. Rū yēma nayexma ga wūxi ga yaxōcū ga Timutéugu āegacū. Rū naē rū wūxi ga Yudiū ga yaxōxcū iyixī. Rū nanatū rū wūxi ga Griégu tixī. ² Rū guxūma ga yema yaxōgūxū ga Listracūāxgū rū Icūniūcūāxgū rū nūxū nixugūe na mea maxūcū yixīxū ga nūma ga Timutéu. ³ Rū Pauru rū nanaxwēxe na Timutéu īyaxūmūcūxū. Natūrū naxūpa ga na yagaāxū rū īnanawiechēxmūpēxechiraū, yerū yemaācū nanaxwēxegū ga yema Yudiūgu ga yema naānewa yexmagūxū. Yerū guxūma nūxū nacūēxgū ga na Griégu tīxū ga nanatū. ⁴ Rū guxūnema ga guma īānegū ga nawa nachopetūnewa, rū duūxūgūmaā nūxū nixugūetanū ga yema ucūxē ga yema Yerucharēūcūāx ga ngūexūgū ga Ngechuchu imugūxū rū yema yaxōgūxūārū āēxgacūgū nūxū ixugūxū. ⁵ Rū yemaācū yexeraācū meā

nayaxōgū ga guxūma ga yema yaxōgūxū, rü guxū ga ngunexū rü yexeraācū nimuētānū ga yema yexwacēx yaxōgūxū.

Pauru nangoxetū rü wūxi ga yatū ga Machedóniācūāxū nadau

⁶ Rū Áchiaanewa naxīxchaū na yéma nūxū yaxugūxūcēx ga ore i mexū. Natürū Tupanaāē i Ūünexū rü nūxna nanachuxu ga yema. Rū yemacēx Píríquiaanewa rü Gárataanewaama nachopetū. ⁷ Rū Míchiaarū naānewa nangugū, rü yéma nagu narūxīnūē ga na Bitíniāārū naānewa naxīxū. Natürū yéma rü ta Tupanaāē i Ūünexū nūxna nanachuxu ga na yéma naxīxū. ⁸ Rū yemacēx Míchiaanewa nachopetūmare rü īāne ga Tróawa nangugū. ⁹ Rū yema chūtaxūgu rü Pauru nangoxetū rü nūxū nadau ga wūxi ga yatū ga Machedóniācūāx ga napēxegu chicū. Rū nūxū nacēēxū, ñaxūmaā: —jMachedóniāwa naxū, rü toxū rüngūxēē! —ñaxūmaā. ¹⁰ Rū yexguma yemaxū nadēuxgu ga Pauru, rü yexgumatama togū tamexēēgū na Machedóniāwa taxīxūcēx. Yerū nūxū tacuēxgū rü aixcūmaxūchi nixī ga Tupana toxcēx çaxū na yema duūxūgūmaā nūxū tixuxūcēx ga ore i mexū.

Piripuwa nayexmagū ga Pauru ru Chira

¹¹ Rū Tróaarū türewa itaxīāchi, rü capaxū ga Chamotáchiucēx wēxgu taxī. Rū moxūācū Neāporiwa tangugū. ¹² Rū yéma rü dauxchitagu taxī rü Piripuwa tangugū. Rū guma nixī ya Dumacūāxgūarū īāne ga Machedóniāānegu naxūgūne. Rū guma nixī ya guxūne ya īāneārū tamaēne ga yéma. Rū yéma tayexmagū ga ñuxre ga ngunexūgū. ¹³ Rū ngūxchigaarū ngunexūgu, rü guma īāne iyacuāxūwa taxī ga natūpechinūwa, yerū nagu tarūxīnūēgu rü yéma nayexma ga Yudīgūarū yumūxēchica. Rū yéma tarūtogū, rü namaā tidexagū ga ñuxre ga ngexūgū ga yéma ngutaquēxegūxū, rü namaā nūxū tixugū ga Tupanaārū ore. ¹⁴ Rū yéma iyexma ga wūxi ga ngecū ga Díría ga ngīega ga Tupanaxū icuēxūūxcū. Rū Tiatíra ga īāneçūāx iyixī. Rū dauxracharaxū ga naxchirumaā itaxe yerū yema nixī ga ngírū puracū. Rū ngīma rü meāma yéma irūxīnū, yerū nūma ga Cori ya Tupana rü ngīxū nanangūchaūxēē na meā inaxīnūxūcēx ga yema ore ga Pauru nūxū ixuxū. ¹⁵ Rū yemawena rü ñuxūchi líbaie wūxigu namaā ga guxūma ga ngītanūxūgū. Rū yixcama rü toxū icēēxū ñaxūmaā: —Ngēxguma pema choxū pedēuxgu na aixcūma nūxū chayaxōxū ya Cori ya Tupana, rü marū name ega chopatagu peyapegūgu —ngīgūrūgū. Rū yéma toxū ixīxēē. ¹⁶ Rū wūxi ga ngunexūgu ga yexguma yumūxēwa taxīxgu ga tomax, rü yexma ngīxū tayangau ga wūxi ga pacū ga corigūxūtaxū ixīcū ga ngoxoāxcū. Rū yema pacū rü wūxi ga tacūxū cuēxcū iyixī, rü duūxūgūmaā nūxū iyaxu ga tacū tá yixcūra na ngupetūxū. Rū yemacēx ga duūxūgū rü dīerumaā ngīxū nanaxūtanū na nūxū yaxuxūcēx na tacū tá na ngupetūxū. Rū yemaācū poraācū dīeruxū itū naxcēx ga ngírū corigū. ¹⁷ Rū ngīma towe ingē ga toma rü Pauru, rü tagaācū ngīgūrūgū: —Ñāā yatūgū rü Tupana ya tacūxūchimaārū duūxūgū nixī, rü pemaā nūxū nixu na ñuxācū tá penayaxuxū i maxū i taguma gūxū —ngīgūrūgū. ¹⁸ Rū yemaācū iyixī ga muxūma ga ngunexūgu. Rū dūxwa nūxū nawēxtūmūxū ga Pauru, rü ngīxcēx nadauegu, rü ñanagūrū nūxū ga yema ngoxo ga ngīwa yexmaxū: —Ngechuchu ya Cristuēgagu cuxū chamu, na ngīwa icuxūxūcēx —ñanagūrū. Rū yexgumatama ngīwa ínaxūxū ga yema ngoxo. ¹⁹ Rū yexguma nūxū nadaugūgu ga ngírū corigū ga marū tama ngīgagu dīeru ngīxū na nayauxgūxū, rü Pauru rü Chiraxū ínayauxū, rü āēxgacūgūarū ngutaquēxechicawa nanagagū.

20 Rū āḅxgacūgūna nanaxuaxū ga yema ngīrū corigū, rū ḅnanagūrūgū: —Ņāā Yudiūgū rū tōrū īānewa nanachixeāḅxēḅgū i duūxūgū. 21 —Rū tūxū nangūexēē na naxaurexūcēx i nacūmagū i tūxna chūxuxū i yixema i Dumacūāxgū —ḅnanagūrūgū. 22 Rū yexguma ga guxūma ga yema īānecūāx, rū Pauru rū Chirana nayuxgū. Rū yema āḅxgacūgū nanamu na īnacūxūāxūcēx rū ngexchiruxūma naīxmenēxāmaā yaḅuaixgūāxūcēx. 23 Rū yexguma marū porāācū yaḅuaixgūāguwena, rū poxcupataūgu nanawocu. Rū nūxna naxāga ga yema poxcupataūārū dauruū na meāma nūxna nadauxūcēx. 24 Rū yexguma yemaxū naxīnūgu ga yema dauruū, rū poxcupataūārū aixepexgūxūchixū ga ucapugu nanawocu, rū meāma nayachotaparagū. 25 Natūrū ngāxūcūūgu rū nayumūxēgū ga Pauru rū Chira, rū nawiyaegū, rū Tupanaxū nicuēxūūgū. Rū yema togū ga poxcuexū rū nūxū naxīnūē. 26 Rū ngūrūāchi porāācū naxīāxāchiane, rū īnyangogūtānūāchi ga guma poxcupataūārū caxtagū. Rū yexgumatama niwāxnagū ga guxūma ga īāxgū ga guma poxcupataū. Rū guxūma ga yema poxcuexūārū cadenaparagū rū niwēgū. 27 Rū pewa nabaixāchi ga yema poxcupataūārū dauruū. Rū yexguma nūxū nadēuxgu ga na yawāxnagūxū ga īāxgū ga guma poxcupataū rū nanayaxu ga norū tara na nūgū yamāxūcēx, yerū nūma nūxū nacūexgu rū marū nibuxmū ga yema poxcuexū. 28 Natūrū tagaācū aixta naxū ga Pauru, rū ḅnanagūrū nūxū: —īTāxū i cugū quimāxū! Rū guxāma i toma rū tanuxmagū —ḅnanagūrū. 29 Rū yexguma ga yema poxcupataūārū dauruū rū naxcēx īnaca ga wūxi ga omū, rū inaāāchiācūma yema duūxūgū īpoxcuexūgu nayangaxi, rū yadurūxācūma Pauru rū Chirapēxegu nayacaxāpūxū. 30 Rū yexguma īāxtūwa Pauru rū Chiraxū nagagū, rū ḅnanagūrū nūxū: —Pa Corigūx, īTācū tā chaxūxū i choma na choxū nangēxmaxūcēx i maxū i taguma gūxū? —ḅnanagūrū. 31 Rū nūmagū rū nanangāxūgū rū ḅnanagūrūgū nūxū: —īNūxū yaxō ya Cori ya Ngechuchu, rū tā cuxū nangēxma i maxū i taguma gūxū i cuma rū guxū i cupatacūāx! —ḅnanagūrūgū. 32 Rū namaā rū guxūma ga yema napatacūāxgūmaā rū ta nūxū nixugūe ga Cori ya Tupanaārū ore. 33 Rū yematama oragu ga chūtacū, rū nūma ga yema poxcupataūārū dauruū nayayauxgū ga norū oxrigū ga Pauru rū Chira. Rū yemawena rū ḅnūxūchi īnabaie ga nūma wūxigu tūmamaā ga naxmēx rū naxacūgū. 34 Rū ḅnūxūchi ga nūma ga poxcupataūārū dauruū rū napatawa Pauruxū rū Chiraxū nagagū. Rū ōna nūxna naxā rū nataāē ga nūma rū guxūma ga napatacūāxgū ta, yerū Tupanaāxū nayaxōgū. 35 Rū moxūācū pēxmama rū yema īānēārū āḅxgacūgū rū yema poxcupataūārū dauruūxūtawa nanamugū ga purichīagū na namaā nūxū yanaxugūxūcēx na Pauru rū Chiraxū īnamuxūxū. 36 Rū yexguma ga yema poxcupataūārū dauruū rū ḅnanagūrū Pauruxū: —Rū ngēma āḅxgacūgū rū nuā nanamugū i ore na pexū īchamuxūxūcēx. īRū ēcū īpechoxū, rū meā īpixī! —ḅnanagūrū. 37 Natūrū ga Pauru rū ḅnanagūrū nūxū ga yema purichīagū: —Marū chixri tomaā nachopetū i toma i Dumacūāxūchigū na tixīgūxū, rū tama toxna nacaxiraācūma toxū niḅuaixgū ga napēxewa ga guxūma ga duūxūgū, rū ḅnūxūchi poxcupataūārū toxū nawocu. Rū ḅnūxma rū cūācūma toxū īnamuxūchāx. Rū tāitāma ngēmaācū nixī. īRū ēcū nūmatama nūma naxī i āḅxgacūgū na nūmatama toxū īyamuxūxūcēx! —ḅnanagūrū ga Pauru. 38 Rū yexguma ga yema purichīagū rū āḅxgacūgūmaā nūxū nayarūxugūe ga yema ore. Rū porāācū nabaixāchiāḅgū ga yema āḅxgacūgū ga yexguma nūxū naxīnūēgu ga na Dumacūāxūchi yixīgūxū. 39 Rū yēma naxī, rū Pauru rū Chirana nayacagū na nūxū nūxū nangechaūgūxūcēx naxcēx ga yema namaā naxūgūxū. Rū

ínanamuxŭ, rŭ nŭxŭ nacèèxŭgŭ na nawa ínachoxŭxŭcèx ga guma ìāne. ⁴⁰ Rŭ yexguma poxcupataŭwa ínachoxŭgu ga Pauru rŭ Chira, rŭ Díriapatawa naxŭ. Rŭ yema yaxŭgŭxŭmaā nangutaquèxegŭ, rŭ nayaxucŭxègŭ, rŭ Tupanaārŭ oremaā nanataāèxègŭ. Rŭ ñŭxŭchi yemawena rŭ inaxŭīchi.

17

Pauru rŭ Chiramaā nanuē ga duŭxŭgŭ ga Techarónicawa

¹ Rŭ ìānegŭ ga Aŭfŭpori rŭ Aporóniāwa nachopetŭ ga Pauru rŭ Chira, rŭ ìāne ga Techarónicawa nangugŭ. Rŭ yéma nayexma ga wŭxi ga ngutaquèxepataŭ ga Yudiŭgŭarŭ. ² Rŭ guma ngutaquèxepataŭwa naxŭxŭ ga Pauru, yerŭ woetama yema nixŭ ga nacŭma. Rŭ tomaèxpŭx ga ngŭxchigaarŭ ngunexŭgu rŭ Tupanaārŭ ore ga ũmatŭxŭchiga yema Yudiŭgŭmaā yéma nidexa. ³ Rŭ meāma naxcèx nanangoxèè ga yema ore, rŭ namaā nŭxŭ nixu ga tacŭcèx na nayuxŭ ga Cristu rŭ tŭxcŭŭ wena na namaxŭxŭ. Rŭ ñanagŭrŭ: —Rŭ yima Cristu rŭ Ngechuchu nixŭ, rŭ nachiga nixŭ i pemaā nŭxŭ chixuxŭ —ñanagŭrŭ ga Pauru. ⁴ Rŭ ñuxre ga yéma yexmagŭxŭ ga Yudiŭgŭ rŭ nayaxŭgŭ, rŭ Pauru rŭ Chiratanŭgu naxāgŭ. Rŭ yexgumarŭŭ ta Ngechuchuaxŭ nayaxŭgŭ ga muxŭma ga Griégugŭ ga noxri Yudiŭgŭrŭŭ yaxŭgŭxŭ. Rŭ muxŭma ga ngexŭgŭ ga dŭerŭaxgŭxŭ rŭ ta nayaxŭgŭ. ⁵ Rŭ yemacèx ga yema Yudiŭgŭ ga tama yaxŭgŭxŭ, rŭ nanuē rŭ nixāŭxāchigŭ yerŭ muxŭma ga duŭxŭgŭ nŭxŭ nayaxŭgŭ ga Pauru rŭ Chiraarŭ ore. Rŭ norŭ numaā nanaxŭtaquèxèè ga ñuxre ga yatŭgŭ ga chixexŭgŭ ga taxuwama mexŭ. Rŭ yemaxŭ namugŭ na nanuèxèèaxŭ ga yema ìānecŭŭax ga duŭxŭgŭ. Rŭ Yachāŭpatawa nabuxmŭ ga yema chixexŭ ga duŭxŭgŭ na Pauru rŭ Chiracèx nadaugŭxŭcèx, yerŭ yema muxŭma ga duŭxŭgŭpèxewa nanagagŭchaŭ. ⁶ Natŭrŭ yexguma tama yexma nŭxŭ yangaugŭgu, rŭ Yachāŭxŭ niyauxgŭ, rŭ ñuxre ga yaxŭgŭxŭxŭ rŭ ta ìnayauxŭ. Rŭ nayagauxŭtanŭ, rŭ guma ìānèarŭ àèxgacŭgŭpèxewa nanagagŭ. Rŭ tagaācŭ ñanagŭrŭgŭ: —Ngēma Pauru rŭ Chira i guxŭ i naānewa duŭxŭgŭxŭ chixexèègŭxŭ, rŭ nŭma rŭ ta nangugŭ. ⁷ —Rŭ Yachāŭ nixŭ ga nayaxuxŭ ga napatawa. Rŭ guxŭma i nŭmagŭ i ngēma yatŭgŭ rŭ tama naga naxŭnŭèchaŭ i tŭrŭ àèxgacŭ ya Dumacŭŭxārŭ mugŭ, erŭ nŭxŭ nixugŭe rŭ nangèxma i to i àèxgacŭ i Ngechuchu —ñanagŭrŭgŭ ga yema chixexŭ ga duŭxŭgŭ. ⁸ Rŭ yexguma nŭxŭ naxŭnŭègu ga yema oregŭ, rŭ poraācŭ nanuē ga yema muxŭma ga duŭxŭgŭ rŭ yema ìānèarŭ àèxgacŭgu ta. ⁹ Natŭrŭ ga Yachāŭ rŭ namŭcŭgŭ rŭ dŭerŭmaā nŭgŭ naxŭtanŭgŭ, rŭ yemacèx nayangèxgŭ.

Pauru rŭ Chira rŭ Beréawa nayexmagŭ

¹⁰ Rŭ yematama ga chŭtaxŭgu rŭ yema yaxŭgŭxŭ ga Techarónicacŭŭax rŭ ìāne ga Beréawa nanamugŭ ga Pauru rŭ Chira. Rŭ yexguma yéma nangugŭgu, rŭ Yudiŭgŭarŭ ngutaquèxepataŭwa naxŭ. ¹¹ Rŭ yema Yudiŭgŭ ga Beréacŭŭax, rŭ yema togŭ ga Yudiŭgŭ ga Techarónicawa yexmagŭxŭārŭ yexera narŭmemaègŭ. Rŭ norŭ ngŭchaŭmaā meāma nanayauxgŭ ga yema ore. Rŭ guxŭ ga ngunexŭgu rŭ Tupanaārŭ ore ga ũmatŭxŭwa nangŭe na meā nŭxŭ nacŭèxgŭxŭcèx ngoxi aixcŭma yŭxŭ ga yema ore ga Pauru rŭ Chira namaā nŭxŭ ixuxŭ. ¹² Rŭ muxŭma ga yema Beréacŭŭax ga Yudiŭgŭ rŭ Ngechuchuaxŭ nayaxŭgŭ. Rŭ yexgumarŭŭ ta ga muxŭma ga Griégugŭ ga Yatŭxŭgŭ rŭ ngexŭgŭ ga àèxgacŭgŭ namèx ixŭgŭxŭ, rŭ nayaxŭgŭ. ¹³ Natŭrŭ yexguma yema Yudiŭgŭ ga Techarónicacŭŭax nŭxŭ cuāchigagŭgu ga na Beréawa rŭ ta nŭxŭ na yaxuxŭ ga Tupanaārŭ ore ga Pauru, rŭ yéma naxŭ, rŭ nananuèxèè ga

yema iānecūāx ga duūxūgū na Paurumaā chixri nachopetūxūcēx. ¹⁴ Natūrū yexguma yemaxū nacuāchigagūga ga yema yaxōgūxū, rū paxama Pauruxū inaxūxūcēgū ga guma iānewa. Rū űuxre ga yema yaxōgūxū rū Pauruxū inixūmūcūgū. Rū dauxchitagu naxī rū űuxmata taxtūpechinūwa nangugū. Natūrū ga Chira rū Timutéu rū Beréagu narūchooma. ¹⁵ Rū yema duūxūgū ga Pauruxū iixūmūcūgūxū, rū wapurugu inayaxūmūcūgū űuxmata iāne ga Atenawa nangugū, rū űuxūchi Beréacēx nawoegu. Rū Pauru rū yema duūxūgūxū yēma namuga na paxa naxūtawa naxīxūcēx ga Chira rū Timutéu.

Atenawa nayexma ga Pauru

¹⁶ Rū yexguma Pauru rū Atenawa Chira rū Timutéuxū nanguxēēgu, rū tama nataāēcūraxū yerū nūxū nadau ga guma iānewa ga na poraācū naxchicūnēxāmaāmare na natupanaāxgūxū. ¹⁷ Rū yemacēx ga Pauru rū Yudiūgūarū ngutaquēxepataūwa Cristuchigaxū nixu namaā ga yema Yudiūgū rū yema togū ga tama Yudiūgū ixīgūxū ga Tupanaxū icuēxūūgūxū. Rū guxū ga ngunexūgu ga iāneārū plaza ga taxūwa rū ta Cristuchigaxū nixu namaā ga yema duūxūgū ga yēma āmūcūwa ixd.. ¹⁸ Rū nayexmagū ta ga űuxre ga yatūgū ga Epicūriūgūarū nguxēētaewa ngūexū, rū togū ga Etóicugūarū nguxēētaewa ngūexū. Rū nūmagū rū inanaxūgūe ga Paurumaā na yapora-gatanūcūūxū. Rū űuxre ga nūmagū rū űanagūrūgū: —¿Rū tacū nixī i nūxū yaxuxū i űāa yatū i idexaechamarexū? —űanagūrūgū. Rū togū nanangāxūgū, rū űanagūrūgū: —Maneca wūxi i to i nachīiānecūāxārū tupanagūarū orearū uruū nixī —űanagūrūgū. Rū yemaācū nidexagū ga yema duūxūgū, yerū Pauru rū nūxū nixu ga ore ga mexū ga Ngechuchuchiga ga nuxācū wena na namaxūxū. ¹⁹ Rū dūxwa norū āēxgacūgūarū ngutaquēxechica ga Areópagu āegaxūwa nanagagū. Rū yēma nūxna nacagū, rū űanagūrūgū nūxū: —Toma nūxū tacuāxchaū na tacū rū nguxēētae i ngexwacaxūxū yīixū i ngēma namaā cunguxēētaexū. ²⁰ Erū toxcēx rū wūxi i taguma nūxū taxīnūēxū nixī i ngēma ore, rū nūxū tacuāxchaū na tacūchiga yīixū i ngēma nūxū quixuxū —űanagūrūgū. ²¹ Rū yemaācū nidexagū, yerū guxūma ga Atenacūāxgū rū yema to ga nachīiānecūāxgū ga yexma āchiūgūxū, rū woetama yexicagu narūxīnūē ga na nūxū yaxuxūcēx rū nūxū naxīnūēxūcēx ga yexwacaxūxū ga oregū. ²² Rū yemacēx ga Pauru rū inachi norū ngāxūtanūwa ga yema duūxūgū ga yema Areópaguwa ngutaquēxegūxū, rū űanagūrū: —Pa Atenacūāxgūxū, nūxū chadau na poraācū perū tupanagūgu perūxīnūēxū. ²³ —Erū ngēxguma perū ngutaquēxechicagūwa chixūpetūchigūgu, rū nūxū chadau i naxchicūnēxāgū i nūxū picuēxūūgūxū. Rū wūxi i nachicawa namaā charūxū i wūxi i yumūxēchica, rū ngēxma naxūmatū i naega i űaxū: “Tupana ya tama nūxū icuācū”, űaxū. Rū yima Tupana ya tama nūxū pecuāācūma nūxū picuēxūūgūcū nixī ya choma pemaā nūxū chixuchigacū. ²⁴ —Rū guma Tupana ga naxūcū ga guxūma ga naānegū rū guxūma i nawa ngēxmaxū, rū nūma nixī i norū yora yīixū i daxūgūxū i naāne rū űoma i naāne. Rū ngēmācēx nūma rū tama duūxūgū űūxne ya tupaucagūga naxāchiū. ²⁵ —Rū nūmatama ya Tupana rū taxucēxma nanaxwēxe i duūxūgūarū ngūxēē na namaxūxūcēx i nūmax, erū taxūma nūxū nataxu. Rū nūmatama guxāna nanaxā i maxū, rū tūxna nanaxā ya buanecū ya namaā ingūātanūcūūcū. Rū nūmatama tūxna nanaxā i guxūma. ²⁶ —Nūma rū wūxi ga duūxūwatama nanaxū ga guxūma ga duūxūgū na guxū i naānewa nangēxmagūxūcēx. Rū nūma inaxuneta i űuxgu tá na nabuxū i duūxūgū rū ngexta tá naxāchiūxū i wūxichigū. ²⁷⁻²⁸ —Rū yemaācū nanaxū na naxcēx nadaugūxūcēx ga duūxūgū rū űoma ēānexūwa

tacūcèx idaugūxūrūū nūxū iyangaugūxūcèx. Natūrū nūma ya Tupana rū woetama guxūguma tūxna nangaicamachirèx, erū nagagu nixī i imaxèxū rū ixīāxtanūcūūxū rū ingèxmaxū, ngèxgumarūū i ñuxre i perū poperaarū ūmatūxūgū naxūmatūxūrūū, rū ñanagūrūgū:

“Rū Tupanaxācū tixīgū”, ñanagūrūgū. ²⁹ —Rū ñuxma na Tupanaxācūgū ixīgūxū, rū tama name i nagu tarūxīnūē rū Tupana rū wūxi i naxchicūnèxā i uirumūwa rū ēxna dīērumūwa rū ēxna nutawa ixūxūrūū nixī. Erū guxūma i ngēma naxchicūnèxāgū rū nūmatama i duūxūgū nagu naxīnūēxūācūma nanaxūgū. ³⁰ —Rū nuxcūma ga duūxūgū rū naēchitamare inatūē, natūrū nūma ga Tupana rū namaā yaxna naxīnū. Natūrū i ñuxma ya Tupana rū nanamu i duūxūgū i guxūwama na naxcèx nadaugūxū rū nūxū naxoexū i nacūma i chixexūgū. ³¹ Yerū nūma ga Tupana rū marū nūxū naxuneta i wūxi i ngunexū i nagu tá aixcūma guxū i ñoma i naānecūāx i duūxūgūna naçaxū i norū maxūchiga. Rū marū nūxū naxuneta ya wūxi ya yatū ya Ngechuchu, rū yima tá nixī ya duūxūgūna çacū. Rū Tupana rū guxāxūma nūxū nacūxèē ga yema ga yexguma Ngechuchuxū wena namaxèēgu —ñanagūrū ga Pauru. ³² Rū yexguma yema wena na namaxèxūchigaxū naxīnūēgu ga duūxūgū, rū ñuxre ga nūmagū rū Pauruxū nacugūē. Natūrū ga togū rū ñanagūrūgū: —Rū wenagu táxarū cuxū itarūxīnūē i ngēmachiga —ñanagūrūgū. ³³ Rū yexguma ga Pauru rū inaxūxū ga natanūwa. ³⁴ Natūrū ñuxre ga duūxūgū rū Pauruwe narūxī, rū Ngechuchuxū nayaxōgū. Rū natanūwa nayexma ga Diunīchiu ga wūxi ga Areópagutanūxū, rū wūxi ga ngecū ga Dāmari ga ngēga. Rū ñuxre ga togū rū ta nayaxōgū.

18

Corñtiuwa nayexma ga Pauru

¹ Rū yemawena rū inaxūāchi ga Pauru ga Atenawa, rū iāne ga Corñtiuwa naxū. ² Rū yéma namaā inayarūxū ga wūxi ga yatū ga Aqūru ga Pōtuanecūāx ga yexwacèx Dumawa ga Itāriaanewa ne ūxū namèx ga Prisilamaāx. Rū yéma Corñtiuwa nayexma yerū Dumacūāxgūarū āēxgacū ga Cāudiū nanamu ga na inachoxūxūcèx ga guxūma ga Yudiūgū ga Dumawa. Rū Pauru rū naxūtagu nanaxūāne. ³ Rū yexma nape rū naxchirunaxcèx ga dūxenūārū ūwa nūgūmaā napuracūē yerū woetama yema nixī ga norū puracū ga Pauru rū Aqūru rū Prisila. ⁴ Rū guxū ga ngūxchigaarū ngunexūgu rū Yudiūgūarū ngutaquèxepataūwa naxūūxū ga Pauru, rū duūxūgūmaā nidexaxū, rū nayaxucūxègūxū. Rū yexgumarūū ta nayaxucūxègūxū ga yema duūxūgū ga tama Yudiūgū ixīgūxū. ⁵ Rū yixcamaxūra inangugū ga Chira rū Timutēu ga Machedoniāwa ne īxū. Rū yexguma inanaxūgū ga Pauru ga aixcūma poraācū nūxū na yaxuxū ga Tupanaārū ore. Rū meāma Yudiūgūxū nangūxèē na Ngechuchu rū Tupana Nane ya Cristu na yīxū. ⁶ Natūrū nūmagū ga yema Yudiūgū rū inanaxūgūē ga Paurumaā na nanuēxū, rū namaā naguxchigagūxū. Rū yexguma inapamūchiru ga Pauru, yerū yema nixī ga wūxi ga cuèxruū naxcèx ga yema duūxūgū na yemawa nūxū yacūxèxāchitanūxūcèx ga norū chixexū. Rū ñanagūrū nūxū: —Pegagu tátama nixī i na ipeyarūtauxexū, rū marū tama chaugagu tá nixī. Rū ñomaūcūū i choma rū tá ngēma tama Yudiūgū ixīgūxūtanūwa chaxū —ñanagūrū ga Pauru. ⁷ Rū inaxūxū ga guma ngutaquèxepataūwa. Rū yéma nayexma ga wūxi ga yatū ga Tīchiu ga Yuchugu āegaxū. Rū nūma rū Tupanaxū nangechaū rū yexma ngutaquèxepataūcūwagu naxāpata. Rū yemaxūtawa

naxū ga Pauru, rü yexma nape. ⁸ Rü Cripu ga ngutaquēxepataūārū āēxgacū rü namēx rü guxūma ga naxācūgū rü Cori ya Ngechuchuaxū nayaxōgū. Rü yexgumarū ta rü muxūma ga Corītiucūāxgū rü nayaxōgū ga yexguma nūxū naxīnūēgu ga yema ore, rü űuxūchi Pauru ínanabaiūxēē. ⁹ Rü wūxi ga chūtaxū rü nangoxetū ga Pauru. Rü Cori ya Tupana namaā nidexa, rü űanagūrū: —¡Rū tāxū i cumuūxū! ¡Rū nūxū íxuama i chorū ore! ¡Rū tāxū i curūchianexū! ¹⁰ —Erū choma rü chacuxūtagu, rü taxūetáma chixexū cumaā taxū. Erū daa íānewa rü choxū nangēxma i muxūma i chorū duūxūgū —űanagūrū ga Tupana. ¹¹ Rü wūxi ga taunecūiarū ngāxū Corītiuwa nayexma ga Pauru. Rü yéma yema duūxūgūtanūwa namaā nangūxēētae ga Tupanaārū ore. ¹² Natūrū yexguma Acayaaneārū āēxgacū yixīgu ga Gariōū, rü yema Yudiūgū rü wūxigu Pauruxū niyauxgū, rü āēxgacūpēxewa nana-gagū. ¹³ Rü űanagūrūgū nūxū ga guma āēxgacū: —űāā yatū rü duūxūgūxū naxucuxē na Tupanaxū yacuēxūūgūxūcēx rü tama naga na naxīnūēxūcēx i tachiūāneārū mugū —űanagūrūgū. ¹⁴ Rü Pauru marū nachonagūchaū, natūrū nūma ga āēxgacū ga Gariōū rü yema Yudiūgūxū nangāxū, rü űanagūrū: —Rü ngēxguma chi wūxi i taxū i chixexū naxūxgu, rü ēxna namāetagu, rü ngēxguma chi nixī i choma i pexū ichaxīnūxū, Pa Yudiūgūx. ¹⁵ —Natūrū ngēma pecūmachiga rü perū mugūchiga rü perū nguxēētaechiga na yixū, rü choma rü tama nūxū chacuáxchaū i ngēma. ¡Rū pematama penamexēēx! Rü choma rü tama ngēmachigaarū āēxgacū chixīxchaū —űanagūrū. ¹⁶ Rü yexguma ínanawoxū ga yéma. ¹⁷ Rü yexguma guxūma ga yema duūxūgū rü Yudiūgūarū ngutaquēxepataūārū āēxgacū ga Chótenegu āegaxūxū yexma niyauxgū. Rü yexmatama āēxgacū ga Gariōūpēxegu nanaçuaixgū. Natūrū nūma ga Gariōū rü taxu űanagūrūama.

Pauru rü Aūtioquiacēx nataegu, rü űuxūchi wenaxārū inaxūāchi na norū tomaēxpūxcūna to ga nachiiānegūwa nangeaxū ga Tupanaārū ore

¹⁸ Rü yemawena rü muxūma ga ngunexū yéma Corītiuwa nayexma ga Pauru. Rü yixcama nūxū narūmoxē ga yema yaxōgūxū rü nūxna inaxūāchi. Rü íāne ga Chēcreawa naxū namaā ga Prisila rü Aquiru. Rü Chēcreawa nūgū nidūpūxūeru ga Pauru yerū marū nayanguxēē ga wūxi ga uneta ga Tupanamaā nūxū yaxuxū. [Rū woetama yema nixī ga nacūmagū ga Yudiūgū ga yexguma yanguxēēgūāxgu ga wūxi ga uneta ga Tupanamaā nūxū yaxuxū.] Rü űuxūchi Chēcreaarū türewa rü wūxi ga wapu-rugu nichoū na Chíríaanewa naxīxūcēx. ¹⁹ Rü yexguma Epéchiuwa nangugūgu, rü Pauru nūxna nixūgachi ga Prisila rü Aquiru, rü Yudiūgūarū ngutaquēxepataūwa naxū. Rü yéma namaā nidexa ga yema Yudiūgū ga guma ngutaquēxepataūwa ngutaquēxegūxūxū. ²⁰ Rü yema Yudiūgū, rü muxūma ga ngunexūgū nūxū nacēēxūgū ga yexma na naxāūxūcēx, natūrū ga nūma rü tama nanaxwēxe. ²¹ Rü yemacēx nūxū narūmoxēāma, rü űanagūrū nūxū: —Rü ngēxguma Tupana naxwēxegu, rü wena táxarū pexcēx chataegu —űanagūrū. Rü yemawena rü Epéchiuarū türewa nayarūxūe, rü inaxūāchi. ²² Rü Checharéaarū türewa nangu, rü yéma ínaxūe. Rü űuxūchi Yerucharéūwa naxū na nūxū yanamoxēxūcēx ga guxūma ga yema yaxōgūxū. Rü űuxūchi Aūtioquíawa naxū. ²³ Rü yexguma marū űuxre ga ngunexū yéma Aūtioquíawa nayexmagū, rü wenaxārū inaxūāchi ga Pauru na wūxichigū ga íāne ga Gárataanewa rü Fríyíaanewa yexmagūnewa íyadauxūcēx rü yataāēxēēgūāxūcēx ga guxūma ga yema yaxōgūxū ga guma íānegūwa yexmagūxū.

Aporu rü Epéchiuwa nüxü nixu ga Tupanaärü ore

²⁴ Rü yexgumañcüü rü Epéchiuwa nangu ga wüxi ga Yudiú ga Aporugu äegaxü. Rü nüma rü ñäne ga Aleyädriacüñax nixi, rü nüxü natauxcha ga duñxügüpéxewa na yadexaxü. Rü meäma nüxü nacuèx ga Tupanaärü ore i ümatüxü. ²⁵ Rü nüma meä nüxü nacuèx ga Cuáü ga baiñxëëruñärü nguxëëtae ga Cori ga Ngechuchuchiga, rü nüxü nacuèx na ñuxäcü Cuáü duñxügüxü ñbaiñxëëxü. Natürü yexicaxütama nacuèx ga Ngechuchuchiga. Natürü poraäcü nataäëäcüma nidexa rü aixcüma nanangüexëë ga duñxügü. ²⁶ Rü nüma ga Aporu rü tama namuñäcüma inanaxügü ga na yadexaxü ga Yudiügüarü ngutaquëxepatañwa. Natürü yexguma Aporuxü naxñnüegu ga Prisila rü Aquiru, rü napatawa nanagäü na yexeraäcü namaä inanguxüxëëäxüçèx ga Ngechuchuchiga. ²⁷ Rü yexguma Acayaanewa naxüxchaügu ga Aporu, rü yema yaxögüxü ga Epéchiucüñax nüxü narüngüxëëgü. Rü opera yéma namugü naxçèx ga yema yaxögüxü ga Acayacüñax na meä Aporuxü nayauxgüxüçèx. Rü yexguma Acayawa nanguxgu ga Aporu rü poraäcü nüxü narüngüxëë ga yema duñxügü ga Tupanaärü ngechaügagu Ngechuchuxaxü yaxögüxü. ²⁸ Rü guxü ga duñxügüpéxewa nüxü nüxü nacuèxëë ga poraäcü na inatüexü ga yema Yudiügü ga tama Ngechuchuxü cuaxchaügüxü. Rü nümagü ga Yudiügü rü taxucürüwama ñuxü ñnanagürügü, yerü ga Aporu rü Tupanaärü ore ga ümatüxüwama meäma nüxü nanawëx ga na Ngechuchu rü aixcüma Tupana Nane ya Cristu na yixü.

19

Epéchiuwa nayexma ga Pauru

¹ Rü yexguma Corñtiuwa nayexmayane ga Aporu, rü Pauru rü naxpüxanegu idaxü ga namawa nixüpetü, rü Epéchiuwa nangu. Rü yexma nüxü nayangau ga ñuxre ga yaxögüxü. ² Rü nüxna naca, rü ñnanagürü nüxü: —¿Marü penayaxuxü i Tupanaäë i Üünexü ga yexguma peyaxögügu? —ñnanagürü. Rü nümagü nanangäxü, rü ñnanagürügü: —Tama. Taguma nüxü taxñnüëchiga na ñacü yixü i Tupanaäë i Üünexü —ñnanagürügü. ³ Rü yexguma ga Pauru rü nüxna naca rü ñnanagürü nüxü: —¿Texëaxü peyaxögüxü ga yexguma ípebaiügu? —ñnanagürü. Rü nümagü nanangäxü, rü ñnanagürügü: —Toma nüxü tayaxô ga yema Cuáü ga baiñxëëruñärü nguxëëtae —ñnanagürügü. ⁴ Rü yexguma ga Pauru rü ñnanagürü nüxü: —Cuáü ñnabaiñxëë ga yema duñxügü ga nüxü rüxoexü ga nacüma ga chixexü rü Tupanacèx daugüxü. Natürü yema duñxügümaä nüxü nixu ta na nüxü yaxögüäxüçèx ga Ngechuchu ga naweama äcü —ñnanagürü ga Pauru. ⁵ Rü yexguma yemaxü naxñnüegu ga yema duñxügü rü ñnabaiñxëë ngaxü ga Cori ya Ngechuchu. ⁶ Rü yexguma Pauru rü yema yaxögüxüçëtügu naxümëxgu, rü nüxna nangu ga Tupanaäë i Üünexü, rü to ga nagawachigü nidexagü, rü nüxü nixugüe ga Tupanaärü ore. ⁷ Rü maneca 12 ga yatü nixigü ga yema duñxügü. ⁸ Rü tomaëxpüx ga tauemacü yéma nayexma ga Pauru. Rü Yudiügüarü ngutaquëxepatañwa naxüñxü rü tama namuñäcüma nüxü nixuuxü ga Tupanaärü ore. Rü nanangüexëë na ñuxäcü äëxgacü na yixü ya Tupana, rü nüxü nanangüchañxëë na Ngechuchuxaxü yaxögüäxüçèx. ⁹ Natürü nayexma ga ñuxre ga duñxügü ga tama nüxü cuëxgüchañxü rü tama yaxögüchañxü. Rü nümagü inanaxügüe ga na yema muxüma ga duñxügüpéxewa chixexü yaxugüexü nachigagu ga Cori ga Ngechuchu.

Rū yemacèx nūxna nixūgachi ga Pauru, rū toxnamana nanagagū ga yema yaxōgūxū. Rū guxū ga ngunexūgu namaā nūxū nixuchiga ga ore nawa ga wūxi ga ngutaquēxepataū ga Tiranuārū ngūepataū ga naega. ¹⁰ Rū yemaācū nanaxū ga taxre ga tauncē, rū yemaācū guxūma ga Áchiacūāxgū ga Yudiūgū rū Griégugū rū nūxū naxīnūē ga Cori ya Tupanaārū ore. ¹¹ Rū Tupana Pauruxū narūngūxēē ga na naxūāxū ga taxūgū ga mexūgū ga Tupanaārū poramaā naxūxū. ¹² Rū èixrūxū ga norū dechugū ga Pauru rū naxchirugū rū duūxūgū rū yema idaaweexūxūtawa nanangegū. Rū yexguma yema idaaweexū nūxū ingōgūgūgu ga yema naxchiru rū ēxna dechu, rū naxcèx nitaanegū. Rū yema duūxūgū ga ngoxoāxgūxū rū ta naxcèx nitaanegū. ¹³ Natūrū nayexma ga ñuxre ga Yudiūgū ga īānegūwachigū ixiētānūxū rū ngoxogūarū woxūwa puracūexū. Rū nūxū naxūgū na Cori ya Ngechuchuégagu na Ínawoxūāxū ga ngoxogū nawa ga yema duūxūgū ga ngoxoāxgūxū. Rū ñanagūrūgū: —Ngechuchu ya Pauru nūxū ixuchigacūégagu pexū tamu na Ípechoxūxūcèx —ñanagūrūgū ga yema Yudiūgū. ¹⁴ Rū yema 7 ga yema ūgūxū, rū wūxi ga Yudiūgūarū paigūarū āēxgacū ga Echebagu āegaxū nanegū nixīgū. ¹⁵ Natūrū wūxi ga ngunexūgu ga yexguma wūxi ga ngoxoxū ínātēxūchigūchaūgu, rū yema ngoxo nanangāxū, rū ñanagūrū: —Nūxū chacuèx ya Ngechuchu, rū nūxū chacuèx ya Pauru na texé yīxū. ¿Natūrū i pema rū texégū pixīgū? —ñanagūrū. ¹⁶ Rū yexguma ga yema yatū ga ngoxoāxū rū yema duūxūgū ga ínātēxūchigūchaūxūna nayuxu, rū nūxū narūporamaē ga guxūma, rū Ínanagāuūxūne. Rū yemaācū ngexchiruxūma rū napīexūma nibuxmū ga guma īwa. ¹⁷ Rū guxūma ga Yudiūgū rū Griégugū ga Epéchiuwa yexmagūxū rū nūxū nacuáchiga ga yema. Rū poraācū namuūē ga guxūma. Rū yemaācū yexeraācū natchiga ga Cori ga Ngechuchu ga yéma. ¹⁸ Rū muxūma ga yema yaxōgūxū rū yéma ningugūetanū, rū guxū ga duūxūgūpēxewa nūxū nixugūechigū ga nūma rū ta na nayuūechiréxū, natūrū tá nūxū na naxoexū ga yema. ¹⁹ Rū muxūma ga yema iyuūechiréxū, rū yéma nanana ga norū poperagū ga yuūpane ga nawa nangūexū, rū guxāpēxewa ínanagu. Rū yexguma nangugūgūāgu ga natanū ga yema poperagū, rū maneca 50,000 tachinū ga dīeru ga tatanūxūwa nangu. ²⁰ Rū yemaācū ga Cori ya Tupanaārū ore, rū yexeraācū nixūchigū, rū yexeraācū duūxūgū nūxū nadau na ñuxācū naporaxū ga yema ore. ²¹ Rū yemawena ga Pauru, rū nagu narūxīnū ga Machedóniāānewa rū Acayaanewaxīra na naxūxū, rū yéma ñuxūchi Yerucharéūwa na naxūxū. Yerū yema ñanagūrū: —Rū ngema Yerucharéūwa tá chaxū, rū yixcama rū Dumawa rū tá ta chaxū —ñanagūrū. ²² Rū yemacèx nūgūpēxegu Machedóniāānewa nanamugū ga taxre ga norū ngūxēerū ga Timutéu rū Eratu. Natūrū nūma ga Pauru rū ñuxre ga ngunexū Áchiagar narūxāūx.

Nanuē ga duūxūgū ga Epéchiuwa

²³ Rū yexgumaūcūū rū Epéchiuwa rū nanaxīxāchitanūāē ga duūxūgū, rū poraācū nanuē nachigagu ga Cori ya Tupanaārū ore. ²⁴ Rū yemaācū naxūpetū nagagu ga wūxi ga yatū ga dīerumūwa puracūxū ga Demétriu gu āegaxū. Rū nūma rū Ínanaxūxū ga norū tupana ga Atemíchaarū tupaucachicūnēxāgū ga dīerumūnaxcèx. Rū nayexma ga muxūma ga norū puracūtanūxū ga yemawa puracūexū. Rū guxūma poraācū meā nūxū naxātanū ga yema puracū. ²⁵ Rū nūma ga Demétriu rū nanangutaquēxēē ga

guxūma ga puracūtanūxū ga yemawa puracūexū, rü ñanagūrū nūxū: — Pa Chomūcūgūx, meā nūxū pecuēxgū na ñaā tórū dīerumūārū puracūga na ngīxū iyaxuxū i tórū dīeru. ²⁶ Rū marū nūxū pedaugū i ngēma Pauru rü nūxū pexīnūē na ñuxācū yaxucūxēgūāxū i duūxūgū, rü ñuxācū namaā nūxū yaxuxū na tama aixcūma tupanagū yīxū i ngēma tupanagū i yixema ixūgūxū. Rū ngēmaācū muxūma i duūxūgūxū nūxū narūxoexēē na tama tórū tupanagūaxū yaxōgūāxūcēx. Rū tama nūma Epéchiuwaxicatama ngēxū nawagū natūrū wixguxūchi taēx guxū i Áchiaanewa ngēmaācū chixri nayaxucūxēgū i duūxūgū. ²⁷ Rū pema nūxū pecuēx rü tórū puracūcēx rü naxāūcūma i ngēma. Rū wūxi i chixexū ta nixī i naxcēx i tórū tupana i Atemíchaarū tupauca ya taxūne. Rū ñuxma rü muxūma i duūxūgū rü ngīxū nangechaū i Atemícha i guxū i Áchiaanewa rü guxū i naānewa. Natūrū ngēma Pauruarū ucūxēgagu rü dūxwa taxuxūtāma ngīxū nangechaū i duūxūgū, rü ngēmaācū dūxwa inaārūxo tá ta i tórū puracū —ñanagūrū ga Demétriu. ²⁸ Rū yexguma yemaxū naxīnūēgu, rü poraācū nanuē, rü tagaācū ñanagūrūgū: —¡Namaxū i Epéchiucūāxgūarū tupana i Atemícha! —ñanagūrūgū. ²⁹ Rū guxūma ga yema iānecūāxgū rü poraācū yexma ínatūēāē. Rū ínanayauxū ga Gayu rü Aritárcu ga Machedóniānecūāxgū ga Paurumūcūgū, rü guma i ga iānēārū ngutaquēxepataūwa nanagaxūtānū. ³⁰ Rū Pauru rü ta yexma naxūcuchaū na yema duūxūgūmaā yadexaxūcēx, natūrū yema yaxōgūxū nūxna nanachuxu ga yexma na naxūcuxū. ³¹ Rū yema Áchiaaneārū āēxgacūgūtanūwa rü nayexma ga ñuxre ga Paurumūcūgū ixīgūxū. Rū nūmagū rü ta Pauruxūtawa namugagū na tama yema ngutaquēxechicagu naxūcuxūcēx. ³² Rū yoxni ga duūxūgū ga yema íngutaquēxegūxūwa, rü nūmaxū rü wūxi ga oremaā aita naxūe, rü togū ga to ga oremaā aita naxūe. Yerū poraācū nanaxīxāchiāēgū ga guxūma ga yema duūxūgū ga yéma ngutaquēxegūxū. Rū muxūma rü tama nūxū nacuēxgū ga ſacūcēx na nangutaquēxegūxū. ³³ Natūrū yéma nayexma ga wūxi ga Yudíu ga Areyáūdrugu āegaxū. Rū yema togū ga Yudíugū rü namaā nūxū nixu ga ſacūcēx na nangutaquēxexū. Rū duūxūgūpēxewa nanamugū na yadexaxūcēx rü naētūwa nachogūxūcēx ga yema Yudíugū ga yéma yexmagūxū. Rū nūma ga Areyáūdru rü naxunagūmēxē na iyanachianegūxūcēx ga duūxūgū, na namaā yadexaxūcēx. ³⁴ Natūrū yexguma nūxū yacuēxāchitanūgu ga Aré rü Yudíu na yīxū, rü guxūma ga yema duūxūgū rü wūxigu tagaācū aita naxūe. Rū taxre ga ora ninge ga na tagaācū ñagūxū: —¡Namaxū i Epéchiucūāxgūarū tupana i Atemícha! —ñagūxū. ³⁵ Rū dūxwa yema iānēārū āēxgacū nanachiāchixēē ga yema muxūma ga duūxūgū, rü ñanagūrū nūxū: —Pa Epéchiucūāxgūx, guxūma i duūxūgū nūxū nacuēx na Atemíchaarū tupauca ya taxūnēārū daurrū na ixīgūxū. Rū guxūma nūxū nacuēx na nūma tūxū nangēxmaxū i Atemíchachicūnēxā i daxūwa rūnguxū. ³⁶ —Rū ñuxma na guxūma nūxū na cuāxū na aixcūma yīxū i ngēma, rü name nixī na pechiāchixū, rü taxūma i chixexū pexūexū. ³⁷ —Erū ñaā yatūgū i nuā pegagūxū, rü taxūma i chixexū ngīmaā naxūgū i tórū tupana, rü tama chixexū nixugūe ngīchigagu. ³⁸ —Rū ngēxguma chi Demétriu rü ngēma namūcūgū i namaā napuracūexū rü nūxū nangēxmagu i ſacū i tama norū me ixīxū, rü nangēxma i ngutaquēxechicagū i ngextā āēxgacūgū duūxūgūxū ſicagūxūwa. Rū name nixī na ngēma āēxgacūgūpēxewa namexēēāxū i ſacū i tama norū me ixīxū. ³⁹ —Rū ngēxguma nangēxmagu i ſacū i to i perū guxchaxūgū, rü name nixī i iānēārū āēxgacūgūarū ngutaquēxewa penamexēē i

ngēma. ⁴⁰ —Erū ñuxma rü taxãücümãxũgugü rü ngürüãchi ãëxgacü ya tacü ya Dumawa ngëxmacü rü tüxna tá naxcëx naca i ngēma ñuxma ngupetüxü. Erü aixcüma taxumaãma tanangãxũlega i ãëxgacü, ega tüxna nacaxgu naxcëx i ñãã ngutaquëxe i nawa pexãügatanüxü —ñanagürü. ⁴¹ Rü yexguma marü yema ñaxguwena, rü ñayamugü ga yema duüxügü.

20

Machedóniãñewa rü Griégugüchiüñewa naxü ga Pauru

¹ Rü yexguma marü nangupetügu ga yema na íyacuxcuxü ga duüxügü, rü Pauru naxcëx nangema ga yema yaxögüxü na yaxucuxëgüãxücëx. Rü yexguma marü namaã nüxü nachaugu, rü nüxü narümoxë, rü inaxüãchi ga Machedóniãñewa na naxüxü. ² Rü yexguma yema nañewa yaxüpetügu, rü taãëxü ga oremaã nayaxucuxëgü ga yema yaxögüxü ga wüxichigü ga ñanewa yexmagüxü. Rü yemaãcü Griégugüchiüñewa nangu. ³ Rü yema nayexma ga tomaëxpüx ga tauemacü. Rü yexguma marü inaxüãchichaügu ga Chíríaanewa na naxüxü, rü tama wapurugu nixü yerü nüxü nacuáchiga ga na ñuxre ga Yudiügü yamëxgüchaüxü. Rü yemacëx nagu narüxínü ga dauxchitagu na nataeguxü, rü wenaxârü Machedóniãñewa na naxüpetüxü. ⁴ Rü ñayaxümcügü ga Chópate ga Beréacüãx ga Píru nane, rü Aritárcu rü Següdu ga Techarónicacüãxgü, rü Gayu ga Derbecüãx, rü Timutéu, rü Tíquicu, rü Turuquínu ga Áchiaanecüãxgü. ⁵ Rü yema yatügü rü nüxíra topëxegu naxãgü, rü Tróawa toxü nayarünguxëëgü. ⁶ Rü nawena ga yema Yudiügüarü peta ga üpetüchiga ga pãu ga ngearü puxëëruüãxü nagu nangögüxü, rü wapurugu Piripuwa itaxíãchi. Rü wüximëëxpüx ga ngunexü ngupetügu, rü Tróagu nüxü tayangaugü ga yema topëxegu ägüxü. Rü yexma tarücho ga 7 ga ngunexü.

Tróagu nanaxüãne ga Pauru

⁷ Rü yema yüxüarü ngunexügu rü tangutaquëxegü namaã ga yema yaxögüxü na tanangöxücëx ga pãu ga bücuxü yema Ngechuchu toxü ngüexëëxürüü. Rü yema yaxögüxümaã nidexa ga Pauru. Rü nanamëëë ga norü dexa ñuxmata ngãxücüwa nangu, yerü moxüãcü inaxüãchichaü. ⁸⁻⁹ Rü daxüwa ga guma Ípataarü tomaëxpüxchiüwa yexmaxü ga ucapuwa tangutaquëxegü. Rü namu ga omü ga yema naigüxü. Rü nayexma ga wüxi ga ngextüxücü ga Eutícugu ägegacü. Rü yema wüxi ga yema ucaputapüxarü ñaxwa narüto. Natürü ga Pauruarü dexa, rü poraãcü namëx. Rü yemacëx ga guma ngextüxücü rü poraãcü nayaxta, rü düxwa nipeãchi rü yema ñaxwa narüngu, rü ñaxtüanegu nangu. Rü yema yücüma nanayauxgü. ¹⁰ Rü ñarüxü ga Pauru, rü nayanawüxüchi ga guma ngextüxücü, rü duüxügüxü ñanagürü: —¡Tãxü i pebaixächixü, erü namaxü nixí! —ñanagürü. ¹¹ Rü yexguma wenaxârü daxü naxí, rü inanabücu ga yema pãu, rü nanangöx. Rü wenaxârü nidexa ñuxmata yangune, rü yexguma inaxüãchi. ¹² Rü guma ngextüxücü rü maxücü napatawa nanagagü. Rü yemacëx poraãcü nataãëgü ga guxüma ga nümagü.

Tróawa inaxüãchi ga Pauru rü Miretuwa naxü

¹³ Rü yexguma ga Pauru rü ñanagürü: —Dauxchitagu tá chixü ñuxmatáta ñãne ya Achuwa changu na ngema pexü chixüexücëx —ñanagürü. Rü yemacëx ga toma rü wapurugu tichoü rü yoxni napëxegu taxí ñuxmata Achuwa tangugü. ¹⁴ Rü yexguma Achugu Paurumaã togü tayangauxgu,

rū yéma toxū nixūe. Rū tachopetū ga yéma űuxmata Miterénewa tangugū.
 15 Rū yéma itaxīāchi rū moxūācū Quīuarū toxmēxtawa tachopetū. Rū yemaārū moxūācū Chamowa tangugū. Rū yemaārū moxūācūama Miretuwa tangugū.
 16 Rū yemaācū itīxī yerū ga Pauru rū tama Áchiaanegu nanuxcūchaū. Yerū nanaxwēxe ga paxa Yerucharēūwa na nanguxū naxcēx ga Pētecōstearū ngunexū. Rū yemacēx naga narūxīnū na tama Epéchiugu íyadauxū.

Yaxōgūxūārū āēxgacūgū ga Epéchiucūāxmaā nidexa ga Pauru

17 Natūrū yexguma Miretuwa tangugūgu rū Epéchiuwa naxcēx namuga ga Pauru na naxūtawa naxīxūcēx ga yema yaxōgūxūārū āēxgacūgū ga Epéchiucūāx. 18 Rū yexguma Pauruxūtawa nangugūgu, rū űanagūrū nūxū: — Pema meā nūxū pecuēxgū ga űuxācū pepēxewa na chamaxūxū ga guxūgu ga yexguma noxritama nuā Áchiaanewa chaxūxgu. 19 Rū guxūguma ga yexguma petanūwa chayexmagu, rū meāma chanaxū ga Cori ya Tupanaārū puracū, taguma chaugū chīcūxūācūma. Rū woo muēxpūxcūna porācū changechaūgu, nagagu ga yema chīxexū ga chomaā naxūgūchaūxū ga Yudīugū, natūrū naētūwa chanaxūama ga yema puracū. 20 Rū taguma íchayachaxāchi ga pemaā nūxū na chīxuxū ga guxūma ga yema ore ga perū mexūcēx íxīxū. Rū guxū ga duūxūgūpēxewa, rū pepatagūwa rū ta pexū changūxēē ga yema ore. 21 Rū Yudīugūmaā rū yema tama Yudīugū íxīgūxūmaā nūxū chīxu na namexū ga na nūxū naxoexūcēx ga norū chīxexūgū rū Tupanaga naxīnūēxūcēx, rū nūxū na yaxōgūāxūcēx ga tōrū Cori ya Ngechuchu. 22 Rū űuxma rū Yerucharēūwa chaxū erū Tupanaāē i Ūūnexū rū ngēma choxū namu. Natūrū tama nūxū chacuēx na űacū tá choxū ūpetūxū i ngēma. 23 Rū ngēma nūxū chacuāxū nīxī i duūxūgū tá choxū napoxcu rū guxchaxūgū tá choxū naxūpetū i Yerucharēūwa. Rū ngēxīcatama nīxī i chomaā nūxū yaxuxū i Tupanaāē i Ūūnexū i guxūne ya űāne i ngextā íchīxūgūxūwa. 24 Natūrū tama ngēma āūcūmaxūgu charūxīnū erū nūētama nīxī ega woo chayuxgu. Natūrū ngēma chanaxwēxexū nīxī na taāēācūma chapuracūmaxū na meā chayanguxēēxūcēx i ngēma puracū ga tōrū Cori ya Ngechuchu choxna āxū rū nūxū chīxuxūcēx i norū ore i mexū na űuxācū Tupana tūxū ngechaūxū. 25 Rū űuxma rū marū nūxū chacuēx rū tagutāma wena choxū pedaugū i pema ga marū pemaā nūxū chīxuxe na űuxācū āēxgacū na yīxū ya Tupana. 26 Rū ngēmacēx i űōma i ngunexūgu rū pemaā nūxū chīxu rū marū tama chaugagu nīxī ega texē petanūwa iyarūtauxgu. 27 Erū marū meāma pemaā nūxū chīxu i guxūma i ngēma Tupana pexū naxwēxexū, rū taxūma ichīcūx. 28 Rū ngēmacēx i űuxma rū penaxwēxe na pexūāēgūxū rū meā nūxna pedaugūxū i guxūma i yaxōgūxū i petanūwa ngēxmagūxū. Erū ngēma nīxī i Tupanaāē i Ūūnexū naga pexū mugūxū na nūxna pedaugūxūcēx i ngēma Tupanaārū duūxūgū i yaxōgūxū i Ngechuchu nagūmaātama naxcēx taxexū. 29 Choma nūxū chacuēx rū ngēxguma íchīxūxgu, rū chowena tá pexcēx nuā naxī i togū i duūxūgū. Rū tá nanachīxexēēchaū i ngēma yaxōgūxū űōma airugū i idūraexū i carnerugūxū ngīāchīxēēxūrū. 30 Rū woo petanūwatātama nangēxmagū i nūmaxū i tá doramaremaā nangūxēēxū i ngēma yaxōgūxū na nūgūwe naxīxēēāxūcēx. 31 űPegūna pedaugū, rū nūxna pecuēāchīna na űuxācū tomaēxpūxū ga taunecūgu rū ngunecū rū chūtacū rū taguma íchayachaxāchīxū ga pexcēx chaxauxācūma na pexū chīxucūxēgūxū ga wūxīchīgū! 32 Rū űuxmax, Pa Chaueneēgūx, rū Tupanana pexū chamugū. Rū chanaxwēxe i naga pexīnūē i norū ore i tūxū nūxū cuēxēēxū na űuxācū porācū tūxū

nangechaũxũ. Erũ ngẽma norũ ore tá pexũ naporaexẽẽ na tórũ Coricèx pemaxẽxũcèx rũ pexũ nangẽxmaxũcèx i pechica namaã i guxũma i duũxũgũ i Tupana dexũ. ³³ Choma rũ taxuguma chaugũcèx chanaxwèxe ga texéarũ díeru rũ texéchiru. ³⁴ Rũ pematama rũ meã nüxũ pecuèx ga ñuxãcũ daa choxmèxmaã na chapuracũxũ naxcèx ga yema choxũ rũ chomũcũgũaxũ taxuxũ. ³⁵ Rũ guxũguma meã pexũ changũexẽẽ na ngẽmaãcũ pepuracũexũ na nüxũ perũngũxèxũcèx i ngẽma duũxũgũ i nüxũ nataxuxũ. Rũ name nixĩ na nüxna pecuèxãchiexũ i Cori ya Ngechucharũ ore ga nümatama ñaxũ:

“Rũ narũmemaẽ nixĩ i pema na toguena penaxãxũ rũ tama i tũma pexna tanaxãxũ”, ñaxũ. ³⁶ Rũ yexguma yema ñaxguwena ga Pauru, rũ inacaxãpũxũ namaã ga guxũma, rũ nayumũxẽ. ³⁷ Rũ guxũma poraãcũ naxauxe, rũ Pauruna nanẽxãchigũ, rũ nüxũ nachũxgũ. ³⁸ Yerũ poraãcũ nangechaũẽ naxcèx ga yema ore ga namaã nüxũ yaxuxũ ga:

“Marũ tagutãma wena choxũ pedaugũ” ñaxũ. Rũ nümagũ ínayaxũmũcũgũ ñuxmata wapuruwa nangu.

21

Yerucharéũwa naxũ ga Pauru

¹ Rũ yexguma nüxna itaxĩãchi ga yema yaxõgũxũ, rũ wapuru gu tichoũ. Rũ capaxũ ga Coscèx noxtacũma tixaũ. Rũ moxũãcũ rũ Rodawa taxĩ. Rũ yéma itaxĩãchi, rũ Pátarawa tangugũ. ² Rũ yexma nüxũ tayangau ga wũxi ga wapuru ga Penĩchiawa ũxũne. Rũ nagu tichoũ, rũ itaxĩãchi. ³ Rũ yixcamaxũra nüxũ tadaugũ ga Chipre. Rũ torũ toxwecũwawaama naxũ, rũ nüxũ tachopetũ. Rũ itiñaxwetaxũ ñuxmata Chĩriaanewa tangugũ. Rũ Tiruwa ítachoũ, yerũ yéma nixĩ ga ínanuũãcũxũ ga guma wapuru. ⁴ Rũ yexma nüxũ tayangau ga yemacũãx ga yaxõgũxũ, rũ 7 ga ngunexũ yéma natanũwa tayexmagũ. Rũ Tupanaãe i Ũñexũ nayadexagũxèẽ ga yema yaxõgũxũ, rũ Pauruxũ ñanagũrũgũ: —ĩTãxũ i Yerucharéũwa cuxũxũ! —ñanagũrũgũ. ⁵ Natũrũ yexguma nangupetũgu ga yema 7 ga ngunexũgũ, rũ itaxĩãchi. Rũ yema yaxõgũxũ rũ towe narũxĩ. Rũ naxmèxmaãchigũ rũ naxãcũgũmaãchigũ toxũ inixũmũcũgũ ga guxũma ñuxmata guma ñanechipenũwa tangugũ. Rũ yexma naxnũcũgu tacaxgũãpũxũ, rũ tayumũxègũ. ⁶ Rũ yexguma ga toma rũ nüxũ tarũmoxègũ, rũ tichoũ ga wapuruwa. Rũ nümagũ rũ napatacèx nawoegu. ⁷ Rũ toma rũ Tiruwa itaxĩãchi rũ Turemãídawa tangugũ. Rũ yéma ítachoũ, yerũ yexma nayacuèx ga wapuru gu na taxĩxũ. Rũ nüxũ tarũmoxègũ ga yema yaxõgũxũ ga yéma yexmagũxũ, rũ wũxi ga ngunexũ natanũgu tarũcho. ⁸ Rũ moxũãcũ itaxĩãchi ga yéma, rũ Checharéawa tangugũ. Rũ Piripi ga Tupanaãrũ orearũ uruũpatawa taxĩ. Rũ nüma rũ yema 7 ga ngũxèeruũgũ ga tupaucana daugũxũtanũxũ nixĩ. Rũ yexma naxũtagu tapegũ. ⁹ Rũ nüma nüxũ iyexma ga agũmũcũ ga naxãcũgũ ga taguma ixãtecũ ga Tupanaãrũ orexũ ixugũecũ. ¹⁰ Rũ yexguma marũ ñuxre ga ngunexũ yéma tayexmagũgu, rũ Yudéaanewa ne naxũ ga wũxi ga Tupanaãrũ orearũ uruũ ga Agabugu ãegaxũ. ¹¹ Rũ yexguma toxũtawa nanguxgũ ga Agabu, rũ nanayaxu ga Pauruarũ goyexũ. Rũ namaã nügũ ninèxgũcutũ, rũ nügũ nináimèx, rũ ñanagũrũ: —Tupanaãe i Ũñexũ marũ chomaã nidexa rũ ñanagũrũ:

“Rũ ñaãcũ tá nayanèxgũ i Yudũgũ i Yerucharéũwa i ñaã goyexũãrũ yora. Rũ ngẽma duũxũgũ i tama Yudũgũ ixĩgũxũna tá nanamugũ”, ñanagũrũ. ¹² Rũ yexguma yema orexũ taxĩnũègu, rũ toma rũ yema Checharéacũãxgũmaã Pauruxũ tacèxũgũ ga tama Yerucharéũwa na naxũxũcèx. ¹³ Natũrũ nüma

ga Pauru rü toxŭ nangāxŭ rü űanagŭrŭ: —¿Tŭxcŭŭ pexauxe rŭ choxŭ pengechaŭxēē? Choma rŭ űchamemare na chināixŭ. Rŭ ngēxgumarŭŭ ta rŭ marŭ űchame na Yerucharēŭgu chayuxŭŭ naxcēx ya Cori ya Ngechuchu — űanagŭrŭ. ¹⁴ Rŭ yexguma marŭ taxuacŭma tanachŭxugu, rŭ tachianemare, rŭ űatarŭgŭ: —¡Ēcŭ yangu i Cori ya Tupanaārŭ ngŭchaŭ! —űatarŭgŭgŭ. ¹⁵ Rŭ yemawena rŭ togŭ tamexēēgŭ, rŭ Yerucharēŭwa taxŭ. ¹⁶ Rŭ towe narŭxŭŭ ga űuxre ga yaxōgŭxŭ ga Checharéacŭŭxŭgŭ, rŭ Machōŭpatawa toxŭŭ nagagŭ. Rŭ nŭma nixŭŭ ga wŭxi ga Chŭperecŭŭxŭŭ ga űpamama woetama yaxōxŭ. Rŭ naxŭtagu tapegŭxŭ.

Chaŭtiáguxŭtagu nanaxŭāne ga Pauru

¹⁷ Rŭ yexguma Yerucharēŭwa tangugŭgu, rŭ yema yaxōgŭxŭŭ rŭ taāēacŭma toxŭŭ nayauxgŭ. ¹⁸ Rŭ moxŭŭacŭŭ ga Pauru rŭ tomaā Chaŭtiáguxŭtagu nanaxŭāne. Rŭ yēma nangutaquēxegŭ ga guxŭma ga yaxōgŭxŭŭārŭ āēxgacŭgŭ. ¹⁹ Rŭ nŭxŭŭ narŭmoxē ga Pauru, rŭ űŭxŭchi meāma namaā nŭxŭŭ nixu ga guxŭma ga yema Tupana ŭxŭŭ ga yexguma yema tama Yudŭgŭŭ ixŭgŭxŭmaā nŭxŭŭ yaxuxgu ga Tupanaārŭŭ ore. ²⁰ Rŭ yexguma Paurarŭŭ orexŭŭ naxŭnŭēgu ga nŭmagŭ, rŭ Tupanaxŭŭ nicuēxŭŭgŭ. Rŭ űanagŭrŭgŭ Pauruxŭ: —Dŭcēx, Pa Toeneēx, cuma nŭxŭŭ cucuēx rŭ nangēxma i muxŭŭchixŭŭ i Yudŭgŭŭ i yaxōgŭxŭŭ. Rŭ guxŭma i nŭmagŭ rŭ nanaxwēxegŭ na nagu naxŭxŭŭ i ngēma mugŭ ga Moŭché űmatŭxŭŭ. ²¹ Natŭrŭŭ ga togŭŭ ga tama yaxōgŭxŭŭ rŭ marŭŭ namaā nŭxŭŭ nixugŭgŭŭ na cuma rŭ cunangŭxēēxŭŭ i guxŭma i Yudŭgŭŭ i togŭŭ i nachŭŭānewa ngēxmagŭxŭŭ, na tama naga naxŭnŭēxŭcēx i ngēma mugŭ ga Moŭché űmatŭxŭŭ. Rŭ marŭŭ namaā nŭxŭŭ nixugŭgŭŭ na cunangŭxēēxŭŭ na tama tŭxŭŭ űnawŭŭchēxmŭpēxechiraŭxŭcēx ya nanegŭ, rŭ na tama naga naxŭnŭēxŭcēx i tacŭmagŭ ga Moŭché tŭxŭŭ muxŭ. ²² ¿Tacŭŭ tá ixŭēxŭŭ i űŭxmax? Erŭ ngēma Yudŭgŭŭ i yaxōgŭxŭŭ rŭ aixcŭma tá nŭxŭŭ nacuēxgŭŭ na marŭŭ nuā cunguxŭ. ²³ ¡Rŭ ngēmacēx name nixŭŭ na cunaxŭxŭŭ i ngēma tá cumaā nŭxŭŭ tixuxŭŭ! Nuā totanŭwa nangēxma i āgŭmŭcŭŭ i yatŭgŭŭ i yanguxēēchaŭxŭŭ i wŭxi i uneta i Tupanamaā nŭxŭŭ yaxuxŭ. ²⁴ ¡Ngema tupauca ya taxŭnewa nagagŭ, rŭ wŭxigu namaā yanguxēē i ngēma tacŭma ga Moŭché tŭxna āxŭ, rŭ Tupanapēxewa pegŭ peyamexēēgŭ! ¡Rŭ nŭxŭŭ naxŭtanŭŭ i űŭxregu nŭxŭŭ naxātanŭŭ na yadŭpŭxŭerugŭxŭcēx i ngēma yatŭgŭŭ na ngēmaacŭŭ yanguxēēgŭāxŭcēx i norŭŭ unetagŭ! Rŭ ngēmawa rŭ guxŭma i ngēma Yudŭgŭŭ rŭ tá nŭxŭŭ nacuēxgŭŭ na aixcŭma cuma rŭ ta naga cuxŭnŭxŭxŭŭ i ngēma mugŭ ga Moŭché űmatŭxŭŭ rŭ tama aixcŭma na yŭŭxŭŭ ga yema ore ga cuchiga ga nŭxŭŭ yaxugŭēxŭ. ²⁵ Rŭ űŭxŭchi ngēma yaxōgŭxŭŭ i tama Yudŭgŭŭ ixŭgŭxŭŭ, rŭ marŭŭ naxcēx tanaxŭmatŭŭ ga torŭŭ ore na tama nangōxgŭāxŭcēx i tacŭŭ i namachi i marŭŭ togŭŭ norŭŭ tupananetachicŭnēxāgŭxŭŭ namaā icuēxŭŭgŭxŭŭ, rŭ tama na nangōxgŭāxŭcēx ya nagŭ, rŭ tama nangōxgŭāxŭcēx i naēxŭŭgŭŭ rŭ ēxna naxŭnagŭŭ i wēxnaāxŭŭ, rŭ tama naŭŭ i ngemaā rŭ ēxna naŭŭ ya yatŭmaā inapexŭcēx —űanagŭrŭgŭ.

Tupauca ga taxŭnewa Pauruxŭŭ niyauxgŭŭ

²⁶ Rŭ yexguma ga Pauru rŭ yēma tupauca ga taxŭnewa nanagagŭŭ ga yema āgŭmŭcŭŭ ga yatŭgŭŭ. Rŭ moxŭŭacŭŭ rŭ Tupanapēxewa nŭgŭŭ namexēē ga Pauru wŭxigu namaā ga yema yatŭgŭŭ. Rŭ űŭxŭchi guma tupauca ga taxŭnewa namaā naxŭcŭŭ na paimaā nŭxŭŭ yaxuxŭcēx na 7 ga ngunexŭŭgu tá yŭŭxŭŭ na yanguxēēgŭāxŭŭ ga yema norŭŭ uneta ga Tupanamaā nŭxŭŭ yaxugŭxŭŭ, rŭ yemawena rŭ tá na inaxāmaregŭāxŭŭ ga norŭŭ āmaregŭŭ ga Tupanaxŭŭ

namaã yacuèxüüügüxü ga wüxichigü. ²⁷ Rû yexguma marü nagüxchaügu ga yema 7 ga ngunexü, rû ñuxre ga Yudiügu ga Áchiaanecüãxgü rû Pauruxü nadaugü ga tupauca ga taxünewa. Rû yema Yudiügu rû duüxügüxü nanuèxèè na Pauruxü yayauxgüxcèx. Rû yemacèx Pauruna nayuxgü. ²⁸ Rû tagaãcü aita naxüe ñaxümaã: —Pa Tomücügu Pa Yudiügu, ¡Paxa toxü perüngüxèè! Ñaã nixi i ngèma yatü i guxüwama yangüxèèchigüxü i duüxügu na taxchi naxaieüxcèx i yixema i Yudiügu, rû naxchi na naxaieüxcèx i ngèma mugü ga Moïché ümatüxü rû daa tupauca ya taxüne. Rû naetüwa i ñuxmax rû nuxa daa tupauca ya taxünegu nanamucu i ñuxre i duüxügu i tama tacümagu íxü, rû ngèmaãcü nanaxüxaxèè i ñaã nachica i üünexü —ñanagürügu. ²⁹ Rû yema ñanagürügu yerü üpaacu Yerucharéüwa Paurumaã nüxü nadaugü ga Turuquínu ga wüxi ga Epéchiucüãx ga tama Yudiü íxixü. Rû nüxü nacüèxgügu rû Pauru marü yexma nanaxücxèè ga tupauca ga taxünegu. ³⁰ Rû guxüma ga yema ñanecüãxgü rû poraãcü nanuè. Rû tupauca ga taxüncèx nibuxmü, rû Pauruxü niyaxgü, rû tupaucaarü ñaxtüwa nanatüchigügu. Rû yexguma paxa nanawãxtagü ga guma tupauca ga taxüneärü ñaxgü. ³¹ Rû yexguma Pauruxü yamèxgüchaügu ga duüxügu, rû Dumacüãx ga churaragüarü äèxgacüxütawa nanguchiga ga ore na guxüwama ga Yerucharéüwa rû na nanuèxü ga duüxügu. ³² Rû yexgumatama ga guma churaragüarü äèxgacü rû nanangutaquèxèè ga yema norü capitáügu namaã ga norü churaragü, rû paxa yema duüxügu iyexmagüxüwa naxi. Rû yexguma guma äèxgacüxü rû yema churaragüxü nadaugügu ga duüxügu, rû ñayachaxächigü ga na Pauruxü yamèxgüxü. ³³ Rû yexguma ga guma äèxgacü rû Paurucèx nixü rû nayayaxu. Rû nanamu na taxre ga cadenamaã na yanèixgüãxcèx. Rû nüxna naca na texé yixü, rû tacü naxüxü. ³⁴ Natürü yema muxüma ga duüxügu rû toxica ga oremaã aita naxüe ga wüxichigü. Rû yexguma taxuacüma meã nüxü nacüèxgu ga tacüxcèx na nanuèxü, rû guma äèxgacü rû nanamu na churaragüpatawa Pauruxü nagagüxü. ³⁵⁻³⁶ Rû yexguma churaragüpataarü toxönewa nanguxgu ga Pauru, rû churaragü nayangetaügu naxchaxwa ga yema muxüma ga duüxügu, yerü nanuèxüchi rû nawe nicaetanü rû ñanagürügu: —¡Yamèxüchi! —ñanagürügu.

Pauru rû duüxügüpèxewa nügüétüwa nidexa

³⁷ Rû yexguma marü churaragüpatagu yamucuchigüchaüãgu rû Pauru rû Griégugawa guma äèxgacüna naca rû ñanagürü: —¿Cuxü namexü na cumaã nüxü chixuxü i wüxi i ore? —ñanagürü. Rû nüma ga äèxgacü nanangãxü rû ñanagürü: —Èxna nüxü cucüèx na Griégugawa quidexaxü. ³⁸ ¿Tama èxna cuma yixü i Equitucüãx ga üpaxüra rû duüxügüxü cunuèxèèxü na äèxgacümaã nügü nadèixüxcèx rû dauxchitawa ga taxüema íxãpataxüwa cunagagüxü ga 4000 ga yatügu ga máetaxügu? —ñanagürü. ³⁹ Rû yexguma ga Pauru rû nanangãxü, rû ñanagürü: —Choma rû Yudiü chixi, rû Tarsucüãx chixi. Rû Chirichiaanewa rû yima nixi ya wüxi ya ñane ya taxüchine. Rû ngèxguma curü me yixügu, rû cuxna chaca na duüxügümaã chidexaxüxcèx —ñanagürü. ⁴⁰ Rû yexguma ga guma äèxgacü rû: —Ngü —ñanagürü. Rû nüma ga Pauru, rû churaragüpataarü toxönewa nachinagü, rû naxunagümèxè na nachiaçhixüxcèx ga duüxügu. Rû yexguma nachiaçchiegu, rû Yudiügawa nidexa, rû ñanagürü nüxü:

22

1—Pa Chautanūxūgūx, jrū choxū iperūxīnūē i ngēma űuxma tá pemaā nūxū chixuxū na chaugētūwa chidexaxūcē! —ñanagūrū. ² Rū yexguma nūxū naxīnūēgu ga na Yudiūgawa namaā yadexaxū, rū yexeraācū inayarūchianegū. Rū yexguma namaā yadexagu ga Pauru, rū ñanagūrū: ³—Choma rū Yudiū chixī, rū Chirīchiaaneārū īāne ga Tarsugu chabu. Natūrū doma īāne ya Yerucharētūwa chaya, rū Gamaniēu nixī ga chorū nguxēerū. Rū meāma nawa changux ga guxūma ga mugū ga nuxcūmaūgūxū ga tórū oxigū nagu īxū. Rū guxūguma naxcēx chadau na guxūma i chorū ngūchaūmaā Tupanaāxū chapuracūxū, ngēxgumarūū i guxāma i pema i űuxmax. ⁴ —Rū choma ga űpa rū poraācū nawe chingēchigū ga yema Ngechuchuaxū yaxōgūxū na chanadēixūcēx. Rū īchanayauxū, rū chanapoxcue ga muxūma ga yema yaxōgūxū ga yatūxūgū rū ngexūgū. ⁵—Rū nūma ya paigūeru rū guxūma i tupauca ya taxūneārū āēxgacūgūerugū rū nūxū nacuēxgū na aixcūma yīxū i ñāā chorū ore. Yerū nūmagū rū choxna nanaxāgū ga popera na choxū nangūxēēgūxūcēx ga tatanūxūgū ga Yudiūgū ga Damacuwa yexmagūxū. Rū yēma Damacuwa chaxū na naxcēx chayadauxū-cēx ga yema Ngechuchuaxū yaxōgūxū, rū nuā Yerucharētūwa na chanagagūxūcēx rū nuxā chayapox-cuēxūcēx.

Pauru nūxū nixu na űuxācū Ngechuchuaxū yaxōōxū

⁶ —Natūrū yexguma namagu chixūyane rū marū chingaicaxgu ga Damacuwa na changuxū, rū meāma tocuchigu nixī ga yexguma. Rū ngūrūāchi wūxi ga omū ga poraxū ga daxūwa ne baxixū rū choxū nabaxī. ⁷—Rū ñaxtūānegu chayangu, rū nūxū chaxīnū ga wūxi ga naga ga ñaxū choxū: “Pa Chaurux, ¿tūxūcū i chowe quingēchigūxū?” ñaxū. ⁸—Rū yexguma ga choma rū chanangāxū, rū ñacharūgū: “¿Rū texé quixī Pa Corix?” ñacharūgū. Rū nūma ga yema naga rū choxū nangāxū, rū ñanagūrū:

“Choma nixī i Ngechuchu ya Nacharētucūāx, rū chorū duūxūgū nixī i ngēma nawe quingēchigūxū”, ñanagūrū choxū. ⁹—Rū yema chomūcūgū rū nūxū nadaugū ga yema omū, rū nabaixāchiāēgū, natūrū tama nūxū naxīnūē ga yema naga ga chomaā idexaxū. ¹⁰—Rū nūxna chaca, rū ñacharūgū ga chomax:

“¿Rū tacū tá chaxūxū, Pa Corix?” ñacharūgū. Rū yexguma ñanagūrū choxū ga Cori:

“¿Jrūda, rū inachi, rū Damacuwa naxū, rū ngema tá cumaā nūxū nixu ya wūxi ya yatū na tacū tá cuxūxū!” ñanagūrū ga nūma ga Cori. ¹¹—Rū yexguma ga choma rū chixoxetū yema omūēmamaā, rū yemacēx ga yema chomūcūgū rū choxmēxgu yangīgūācūma choxū nigagū, rū yemaācū Damacuwa changu. ¹²—Rū yēma nayexma ga wūxi ga yatū ga Ananiāgu āēgacū. Rū nūma nixī ga wūxi ga yatū ga aixcūma Tupanaga īnūcū, rū nūma rū meāma nayanguxēē ga yema mugū ga Moīché űmatūxū. Rū guxūma ga Yudiūgū ga Damacuwa yexmagūxū, rū meā nachiga nidexagū. ¹³—Rū nūma ga Ananiā rū choxū īnayadau. Rū yexguma chauxūtawa nanguxgu rū ñanagūrū choxū:

“Pa Chaueneē Pa Chaurux, ¿wenaxārū ingoxnaxētū!” ñanagūrū. Rū yexgumatama wēnaxārū chingoxnaxētū rū meāma nūxū chadau. ¹⁴—Rū yexguma ñanagūrū ta:

“Yima Tupana ya nuxcūmaūgūxū ga tórū oxigūarū Tupana cuxū naxuneta na nūxū cucuāxūcēx i norū ngūchaū, rū na nūxū cudauxūcēx ya yima Cristu

ya mecū, rū naāxwatama nūxū cuxīnūxūcēx i naga. ¹⁵—Erū cuma tá nixī i guxū i duūxūgūmaā nūxū quixuchigaxū ga űuxācū na Tupanaxū cudauxū rū cumaā yadexaxū. ¹⁶—¡Rū űuxma rū marū taxuūma ícunanguxēē! ¡Rū írūda rū ínabaie! ¡Rū Cori ya Ngechuchuégagu naxcēx ínaca na cuxū nūxū nangechaūxūcēx i curū pecadugū!” űanagūrū choxū.

Pauru nūxū nixu na űuxācū Tupana namuxū na yema tama Yudíugū ixīgūxūtanūwa naxūxūcēx

¹⁷⁻¹⁸—Rū yexguma Yerucharéūcēx chataeguxgu, rū tupauca ga taxūnewa chaxū na yéma chayumūxēxūcēx. Rū changoxetū, rū nūxū chadau ga Cori ya Tupana. Rū űanagūrū choxū:

“¡Napaxaāē, rū inaxūāchi i nuā Yerucharéūwa, erū duūxūgū rū tāūtáma naga naxīnūē i ngēma ore i chauchiga nūxū quixuxū!” űanagūrū. ¹⁹—Rū choma chanangāxū, rū űacharūgū:

“Pa Corix, nūma i duūxūgū rū nūxū nacuēxgū ga choma na yīxū ga guxūne ga ngutaquēxepataūgūwa chaxūxū rū íchanayauxūxū rū chanapoxcuexū rū chayacuaixgūxū ga yema cuxū yaxōgūxū. ²⁰—Rū yexguma yamēxgūāgu ga guma curū duūcū ga Etébaū ga curū orearū uruū, rū chomatama yéma chayexma, rū chorū me nixī ga na yamēxgūāxū. Rū choma nixī ga nūxna chadauxū ga naxchiru ga yema yamēxgūxū”, űacharūgū nūxū. ²¹—Natūrū nūma ga Cori rū űanagūrū choxū:

“¡Rū paxa cugū namexēē rū inaxūāchi! Erū yaxūguxū i nachīūānegūwa i ngēma duūxūgū i tama Yudíugū ixīgūxūtanūwa tá cuxū chamu” —űanagūrū.

Churaragūarū āēxgacūmēxēwa nayexma ga Pauru

²² Rū yexguma Pauru yema űaxgu rū yexma nayacuēxēēgū ga na meā nūxū inaxīnūēxū ga yema duūxūgū. Rū yexguma aita naxūēācūma űanagūrūgū: —¡Noxtacūma peyamá! Rū name nixī i na nayuxū rū ngēxma na yanaxoxū —űanagūrūgū. ²³ Rū yexguma aita naxūegu, rū norū gāuxūchirumaā nibu-atanūcūū, rū ātēxanexū daxū niwogūtanūcūū. ²⁴ Rū yexguma yemaxū nadēuxgu ga churaragūarū āēxgacū, rū nanamu ga churaragūpatagu na yamucuchigūāxūcēx ga Pauru. Rū nanamu na poraācū naçuaixgūāxūcēx na yadexaxūcēx na nūxū nacuāxūcēx ga tūxcūū yīxū na yemaācū nachigamaā aita naxūexū ga duūxūgū. ²⁵ Rū yexguma marū yanēixgūāgu na naçuaixgūāxūcēx, rū Pauru nūxna naca ga yema capitāū ga yéma yexmaxū, rū űanagūrū: —¿Éxna pexmēxwa nangēxma na penaçuaixū i wūxi i Dumacūāx ega tama nūxna pecaxiragu? —űanagūrū. ²⁶ Rū yexguma yemaxū naxīnūgu ga capitāū, rū guma churaragūarū āēxgacūxūtawa naxū, rū namaā nūxū nixu, rū űanagūrū: —¿Tacū tá cuxū? Erū űaā yatū rū Dumacūāx nixī —űanagūrū. ²⁷ Rū yexguma ga guma churaragūarū āēxgacū, rū Paurucēx nixū, rū nūxna naca rū űanagūrū nūxū: —¿Aixcūma yīxū na Dumacūāx quiūxū i cumax? —űanagūrū. Rū nūma ga Pauru nanangāxū, rū: —Ngū —űanagūrū. ²⁸ Rū yexguma ga guma churaragūarū āēxgacū rū nanangāxū, rū űanagūrū: —Choma rū poraācū choxū naxātanū na Dumacūāx chaugū chixīxēēx —űanagūrū. Rū yexguma nachonagū ga Pauru, rū űanagūrū: —Natūrū i choma rū woetama chorū bucūma Dumacūāx chixī —űanagūrū. ²⁹ Rū yexgumatama nūxna nixīgachi ga yema Pauruxū çuaixgūchaūxū. Rū nūmatama ga yema churaragūarū āēxgacū rū ta namuū ga yexguma nūxū nacuēxgu ga Dumacūāx na yīxū ga Pauru, yerū marū cadenamaā nayanēixchirēx.

Yudíugūarū āēxgacūgūtūcumūpēxewa nayexma ga Pauru

³⁰ Rū yema churaraguarū āēxgacū meāma nūxū nacuāxchaū ga tūxcūū na ínaxuaxūgūāxū ga yema Yudiūgū. Rū yemacèx ga moxūācū rū nanamu na nangutaquēxegūxūcèx ga paigūarū āēxgacūgū rū guxūma ga yema āēxgacūgūtūcumū ga Yudiūgūarū. Rū nayawēgū ga Pauruarū cadena rū yēma āēxgacūgūpēxewa nanagagū.

23

¹ Rū Pauru meāma nūxū nadawenū ga yema āēxgacūgū, rū űanagūrū nūxū: —Pa Chautanūxūgūx, chomatama nūxū chachuèx rū guxūguma meā chamaxū ga Tupanapēxewa űuxmata űoma i ngunexūwa nangu —űanagūrū. ² Rū yexguma ga yema paigūeru ga Ananiā rū nanamu ga yema Pauruarū ngaicamana yexmagūxū na naāxwa tayamēxgūxūcèx. ³ Rū yexguma ga Pauru rū űanagūrū nūxū: —Tupana tá cuxū napéax, Pa Āēxgacūx. Cuma rū dūxētūwaxica come natūrū aixepena rū nachixe i curū maxū. Rū űuxma rū ngema curūto na Moīché űmatūxū i mugū nūxū ixuxūācūma choxna cuçaxūcèx. Natūrū wūxi i chixexū cuxū erū cumatama rū tama naga cuxīnū i ngēma Tupana tūxū muxū erū cunamu na choxū napéaxūcèx —űanagūrū ga Pauru. ⁴ Rū yexguma ga yema yexmagūxū rū űanagūrūgū: —ĴTūxcūū i ngēmaācū űacu namaā quixugūxū i paigūeru ya Tupana nūxū unetacū? —űanagūrūgū. ⁵ Rū Pauru nanangāxū, rū űanagūrū: —Tama nūxū chachuèx, Pa Chautanūxūgūx, na paigūeru yīixū. Erū Tupanaārū ore i űmatūxūwa nūxū tadau rū űanagūrū:

“ĴTama curū āēxgacūmaā chixexū quixugū!”

űanagūrū. ⁶ Rū yexguma nūxū nacuèxgu ga Pauru ga na Chaduchéugū yīixū ga togū, rū na Parichéugū yīixū ga togū, rū yema āēxgacūgūpēxewa tagaācūma űanagūrū: —Pa Chautanūxūgūx, choma rū Parichéu chixī, rū Parichéu nane chixī. Rū ngēmacèx choxna pecagū i űuxmax, erū chayaxō i wena tá na namaxēxū i yuexū —űanagūrū. ⁷ Rū yexguma yema űaxgu ga Pauru, rū yema Parichéugū rū Chaduchéugū rū inanaxūgūe ga nūgūmaā na iyaporagaexū, rū yexma nūgū nitoye ga yema ngutaquēxewa. ⁸ Erū ngēma Chaduchéugū naga rūxīnūēgu rū tama wena namaxē i ngēma yuexū, rū nataxuma i orearū ngeruūgū i daxūcūāx, rū nataxuma i naāēgū —űanagūrūgū. Natūrū ngēma Parichéugū rū nayaxōgū na nangēmaxū i guxūma i ngēma. ⁹ Rū yemacèx guxūma aita naxūe. Rū űuxūchi űuxre ga ngūxēēruūgū ga Moīchéarū mugūwa nguxēētaegūxū ga Parichéugūtūcumūwa űgūxū rū inachigū, rū űanagūrūgū: —Toxcèx rū taxūma i chixexū naxū i űaā yatū. Bexmana wūxi i űacu rū naāē namaā nīdexa rū ēxna wūxi i orearū ngeruū i daxūcūāx —űanagūrūgū. ¹⁰ Rū yexeraācū norū numaā nanaxīxāchīāēgū ga yema duūxūgū. Rū yemacèx naxoegaāē ga guma churaraguarū āēxgacū ga na Paurugu nagaugūgūchaūxū. Rū norū churaragurūxū namu na yēma duūxūgūtanūwa Pauruxū napugūxūcèx rū wena churaragūpatawa na nagagūāxūcèx. ¹¹ Rū moxūācūarū chūtaxūgu Paurucèx nangox ga Cori ga Tupana, rū űanagūrū nūxū: —ĴRū nataāē! Rū ngēxgumarūl i nūma Yerucharéūwa choxū na quixuchigaxū, rū ngēxgumarūl tá ta nixī i Dumawa na choxū quixuchigaxū —űanagūrū ga Tupana.

Yudiūgū naxcèx nadaugū na űuxācū Pauruxū yamēxgūchaūxū

¹² Rū moxūācū, rū űuxre ga Yudiūgū rū nūgūmaā inaxunetagū ga tāūtāma na nachībūexū rū naxaxegūxū űuxmatāta Pauruxū yamēxgū. Rū űanagūrūgū:

—Tachixexūgugū tá ega tacū ingōxgūgu naxūpa na yamáxū i Pauru —ñanagūrūgū. ¹³ Rū 40 arū yexera ga yatūgū nixī ga yema nūgūmaā ixunetagūxū. ¹⁴ Rū paigūarū āēxgacūgūtanūwa rū Yudiūgūarū āēxgacūgūgūtanūwa naxī, rū ñanagūrūgū nūxū: —Marū togūmaā itaxuneta rū tachixexūgugū tá ega tacū tangōxgūgu naxūpa na tayamáxū i Pauru. ¹⁵ Rū name nixī i pema rū ngēma togū i pexrūū āēxgacūgūtūcumūwa ūgūxū, rū churaragūarū āēxgacūna naxcēx peyacagū i ñuxma na moxū wena pepēxewa nagagūāxcēx i Pauru. ¡Rū namaā nūxū pixu na penaxwēxegūnetaxū na meā nūxū pecuáxchaūxū i nachiga! Rū toma rū tá marū ítamemare na namagu tayamáxūcēx naxūpa na ínanguxū —ñanagūrūgū. ¹⁶ Natūrū ngīne ga Paurueyēx rū nūxū nacuáchiga ga Pauruxū na yamēxgūchaūxū, rū yemacēx churaragūpatawa naxū na Paurumaā nūxū yanaxūcēx. ¹⁷ Rū Pauru naxcēx naca ga wūxi ga capitáū, rū ñanagūrū nūxū: —¡Curū āēxgacūxūtawa naga i ñaā ngextūxūxū, erū nūxū nangēxma i ore i namaā nūxū yaxuxchaūxū! —ñanagūrū. ¹⁸ Rū yema capitáū rū āēxgacūxūtawa nanaga ga yema ngextūxūxū. Rū ñanagūrū nūxū: —Ngēma poxcuxū i Pauru rū chauxcēx naca, rū choxna naca na nuā cuxūtawa chanagaxūcēx i ñaā ngextūxūxū, erū nūxū nangēxma i ore i cumaā nūxū yaxuxchaūxū —ñanagūrū. ¹⁹ Rū naxmēxgu yayauxāchiācūma toxnamana nanaga ga āēxgacū, rū yēma nūxna naca rū ñanagūrū: —¿Tacū yīxū i ngēma chomaā nūxū quixuxchaūxū? —ñanagūrū. ²⁰ Rū nūma ga ngextūxūxū nanangāxū, rū ñanagūrū: —Ngēma Yudiūgū, rū nūgūmaā inaxunetagū na cuxna naxcēx nacagūxūcēx na moxū Yudiūgūarū āēxgacūgūtūcumūpēxewa na cunagaxūcēx i Pauru. Rū tá cumaā nūxū nixugū na meā nūxū nacuēxgūchaūxū i nachiga. ²¹ —¡Natūrū tāūtāma nūxū cuyaxō! Erū 40 arū yexera i yatūgū rū marū nūgūmaā inaxunetagū, rū ñanagūrūgū:

“Tachixexūgugū tá ega tacū ingōxgūgu rū ēxna ixaxegūgu naxūpa na yamáxū i Pauru”, ñanagūrūgū. Rū ñuxma rū marū ínamemare, rū namagu nananēixgū, rū curū orexicatama nixī i ñuxma ínanguxēēgūxū —ñanagūrū. ²² Rū yexguma ga āēxgacū rū ínayamu ga yema ngextūxūxū, rū nūxna naxāga na taxūemaā nūxū yaxuxūcēx ga na namaā nūxū yaxuxū ga yemachiga.

Āēxgacū ga Perixūtawa Pauruxū namu

²³ Rū yexguma ga guma āēxgacū rū taxre ga norū capitáūcēx naca, rū ñanagūrū nūxū: —¡Penamexēē i 200 i churaragū i nacutūmaāmare ixīxū, rū 70 i churaragū i cowarutagu íxū, rū 200 i churaragū i wocaxemaā ixāxnexū na 9 arū oragu i chūtacū Checharéawa naxīxūcēx! ²⁴ —¡Rū ngēxgumarūū ta penamexēē i ñuxre i cowarugū i Paurucēx na tórū āēxgacū i Perixūtawa naxūxūcēx rū na taxūma nūxū ūpetūxūcēx i namawa! —ñanagūrū. ²⁵ Rū yema capitáūgūmaā yēma nanamu ga wūxi ga popera ga ñaxū:

²⁶ “Choma i Cláudiu Díchiu, rū cuxū charūmoxē Pa Āēxgacū ya Mecūxūchi Pa Perix. ²⁷ Rū yima yatū ya cuxcēx ngēma chanamucū, rū Yudiūgū nayayauxgū rū wixguxūchi taēx nayamēxgū. Natūrū yexguma nūxū chacuáchigagu na Dumacūāx na yīxū, rū yēma chaxū chorū churaragūmaā, rū nūxna chanapu. ²⁸ Rū nūxū chacuáxchaū ga tacū ga chixexūmaā na ínaxuaxūgūāxū, rū yemacēx Yudiūgūarū āēxgacūgūtūcumūpēxewa chanaga. ²⁹ Rū yexguma nūxū chacuēx ga na Yudiūgūarū muchigacēxmare na ínaxuaxūgūāxū. Natūrū taxūma ga chixexū naxū na tūxcūū yamáxūcēx rū napoxcuxūcēx. ³⁰ Natūrū yexguma nūxū chacuáchigagu ga na nūgūmaā inaxunetaxū ga Yudiūgū

ga na yamèxgüãxüçèx, rü yexgumatama nagu charüxîñü na cuxütawa chanamuxü. Rü yema ínaxuaxüğüxü, rü namaã tá nüxü chixu na cuxütawa naxîxü rü cumaã nüxü na yanaxugüxüçèx na ðacüçèx ínaxuaxüğüãxü,

ñanagürü. ³¹ Rü yema chütaxügu inaxîãchi ga yema churaragü, yexgumarüü ga norü ãëxgacü na namuxürüü. Rü Pauruxü nigagü ñuxmata Aütípatiwa nangugü. ³² Rü moxüãcü rü nawoegu ga yema churaragü ga nacutümaãmare íxîxü rü naxpataüwa naxî. Rü yema churaragü ga cowarutagu íxü, rü Paurumaã inaxîãma. ³³ Rü yexguma Checharéawa nangugügu, rü ãëxgacü ga Perina nanaxã ga yema popera, rü Pauruxü rü ta inamugü. ³⁴ Rü yexguma nüxü nadaumatügu ga popera ga ãëxgacü ga Peri, rü Pauruna naca ga ngextãüãx na yîxü. Rü yexguma nüxü nacüexgu ga na Chirichiaaneçüãx yîxü, rü ñanagürü nüxü: ³⁵ —Cuxü tá icharüxîñü i ngëxguma ínangugügu i ngëma cuxü íxuaxüğüxü —ñanagürü. Rü yexguma nanamu ga churaragü na wüxi ga ucapu ga ãëxgacü ga Erodepatawa yexmaxüwa nüxna na nadaugüxüçèx.

24

Pauru rü ãëxgacü ga Peripëxewa nügüétüwa nidexa

¹ Rü wüximéëxpüx ga ngunexü ngupetügu, rü Yerucharéüwa ne naxü ga paigüeru ga Ananiã, namaã ga ñuxre ga Yudiügarü ãëxgacügüerugü rü wüxi ga yatü ga meãma dexaxü cuãxü ga Téturu ga naega. Rü nümagü rü ãëxgacü ga Perixütawa naxî na namaã nüxü yanaxugüxüçèx ga tüxcüü Pauruxü na ínaxuaxüğüxü. ² Rü yexguma Pauruxü yéma nagagügu, rü inanaxügu ga Téturu ga nüxü na yaxuxü, rü ñanagürü:

—Moxëxüchima i cuma Pa ãëxgacü Pa Perix, erü cugagu nixî i meãma toxü naxüpetüxü i nuã. Rü cugagu nixî i nuã i ñoma i nachiüãnewa na toxü nangëxmaxü i muxüma i mexügu. ³ Rü moxë cuxna taxã erü guxüwama rü guxüguma cuxütawa tanayauxgü i guxüma i ngëma mexügu Pa ãëxgacüxüchima, Pa Perix. ⁴ Natürü tama yexeraãcü cuxü chachixeweçaü. Rü ngëmacèx cuxna chaca na paxaãchi meã toxü icurüxîñüxü. ⁵ Rü ñuxma rü wüxi i orexü cumaã chixuxçaü. Rü marü nüxü tadau i ñaã yatü rü wüxi i ðaaweanerüü na yîxü, erü chixexümaã nayauxcuxëgü i Yudiügu i guxü i naãnewa na nügü yatoyexüçèx. Rü nüma nixî i norü ãëxgacü i ngëma duüxügu i nüxü yaxöğüxü i Ngechuchu i Nacharétucüãx. ⁶ Rü toma tayauxgü i ñaã yatü ga yexguma tupauca ga taxüne naxüxaxëëçaügu. Rü torü mugü tomaã nüxü íxuxüãcüma nüxna tacagüçaü. ⁷ Natürü ínangu ga churaragüarü ãëxgacü ga Díchiu, rü muxüma ga norü churaragümaã toxna nanapu. Rü toma i ínaxuaxüğüxe, rü toxü namu na cuxütawa taxüxüçèx. ⁸ Rü ñuxma rü marü name i cumatama nüxna cuca i ngëma Pauru na nüxü cucuãxüçèx na aixcüma yîxü i guxüma i ngëma naxcèx ítanaxuaxüğüxü i tomax —ñanagürü. ⁹ Rü yema togü ga Yudiügu rü ta, rü ñanagürügü: —Rü aixcüma nixî i ngëma ore —ñanagürügü. ¹⁰ Rü yexguma ga guma ãëxgacü ga Peri rü naxmëxmaã Pauruxü naxuneta na yadexaxüçèx. Rü yexguma ga Pauru, rü ñanagürü: —Chorü taãëmaã cupëxewa chaugüçèx chidexa, erü nüxü chacuëx na mucüma ga taunecü ñoma i nachiüãneärü ãëxgacü quiixü. ¹¹ Marü name i cumatama naxcèx ícuca, erü 12 i ngunexüxícátama nangupetü ga na Yerucharéüwa changuxü na Tupanaxü chayarücuëxüüxüçèx. ¹² Rü bai ga tupauca ga taxünewa, rü bai ga ngutaquëxepataügüwa, rü bai ga ngürüanewamare ga íãnewa choxü nadaugü ga Yudiügu ga na texémaã

íchíporagacūūxū, rŭ na chananuēxēēxū ga duūxūgŭ. ¹³ Rŭ űuxma i űaā duūxūgŭ i choxū íxuaxūgūxū, rŭ bai i wŭxiwaxŭra cuxcēx nanangoxēēgŭ na aixcūma yīxū i ngēma naxcēx choxū ínaxuaxūgūxū. ¹⁴ Natŭrŭ cumaā nŭxū chixu, rŭ nuxcūmaūgūxū ga chorŭ oxigŭarŭ Tupanaāxū nixī i chapuracūxū ngēxgumarū i choxū na nanaxwēxexū ya Ngechuchu ya Cristu ya nŭxū chayaxōcū. Rŭ ngēma nixī i nŭmagŭ i Yudiŭgŭ naxugŭāgu rŭ na:

“Tomare i ore”, űagūxū. Rŭ aixcūma nŭxū chayaxō i guxūma i Tupanaārŭ mugŭ ga Moīché űmatūxū rŭ guxūma i Tupanaārŭ ore ga nuxcūmaūgūxū ga norŭ orearŭ uruūgŭ űmatūgūxū. ¹⁵ Rŭ choma rŭ ta yema nuxcūmaūgūxūrŭ Tupanaāxū chayaxō. Rŭ naxrŭū chayaxō rŭ tá wena na namaxēxū i ngēma yuexū i mexūgŭ rŭ chixexūgŭ. ¹⁶ Rŭ ngēmacēx nixī i guxūguma meā chaugūna chadaaxŭ na chauāēwatama nŭxū chacuāxūcēx na chamexū i Tupanapēxewa rŭ duūxūgŭpēxewa. ¹⁷ Rŭ dŭcax, Pa Āēxgacūx, rŭ űuxre ga taunecŭ togŭ ga nachīűānegu chixūgŭ, rŭ dŭxwaxarŭ chauchiűānecēx wena chataegu na nuā chanangexūcēx ga dīeru ga namaā nŭxū charŭngŭxēēchaūxū i chautanūxūgŭ i Yudiŭgŭ i nŭxū nataxuxū, rŭ nuā Tupanana chanaxāxūcēx i chorŭ āmaregŭ. ¹⁸⁻¹⁹ Rŭ yema ngunexūgu rŭ tupauca ya taxūnewa Tupanana íchanaxā ga chorŭ āmaregŭ, nawena na chaugŭ chamexēēxŭ ga Tupanapēxewa. Rŭ tama muxŭ ga duūxūgŭmaā chayexma, rŭ tama chananuēxēē ga duūxūgŭ ga yexguma űuxre ga Yudiŭgŭ ga Áchianecŭűāx choxū daugŭgu ga yēma tupauca ya taxūnewa. Rŭ ngēmagŭ chí nixī i űuxma nuā íxū na choxū ínaxuaxūgūxūcēx ega űacŭ nŭxū ngēxmagu i chauchiga. ²⁰ Rŭ ngēxguma tama űacŭ nŭxū ngēxmagu ga yema tupauca ya taxūnewa choxū daugūxū, űrŭ ēcŭ űaā űuxma nuxmagūxū cumaā nŭxū ixugŭ na űacŭ ga chixexūxū chowa nadaugūxū ga yexguma Yudiŭgŭarŭ āēxgacŭgŭtŭcumŭpēxewa chayexmagu! ²¹ Rŭ űaxŭxīcatama nixī ga chorŭ ore ga tagaācŭ namaā chachonagūxū ga yexguma yema āēxgacŭgŭpēxewa chayexmagu:

“Rŭ űuxma rŭ choxna pecagŭ erŭ choma chayaxō i wena tá na namaxēxū i yuexū”, űacharŭgŭ ga yexguma —űanagŭrŭ ga Pauru. ²² Natŭrŭ ga Peri rŭ meā nŭxū nacuēx ga yema Cristuaxŭ yaxōchiga. Rŭ yemacēx ga yexguma Pauruaru orexŭ naxīnŭgu, rŭ ínayachaxāchi ga na nŭxna naçaxŭ, rŭ űanagŭrŭ Yudiŭgŭxū: —Ngēxguma churaragŭarŭ āēxgacŭ ya Díchi nŭma űxgu, rŭ tá meāma nŭxū chacuēx i ngēma naxcēx ípenaxuaxūxū — űanagŭrŭ. ²³ Rŭ yexguma ga Peri rŭ norŭ capitāŭxū namu ga na Pauruna nadauxūcēx. Natŭrŭ tama nanapoxcuxūchi, rŭ tama nanachuxu ga na naxūtagu naxīāneāxū ga namŭcŭgŭ, rŭ nŭxū na nangŭxēēgūxū. ²⁴ Rŭ űuxre ga ngunexū marŭ ngupetŭgu rŭ wena yēma naxū ga Peri ngŭmaā ga naxmēx ga Drusíla ga Yudiŭ íxīcŭ. Rŭ Paurucēx nayacaxēē, rŭ nŭxū naxīnŭ ga yema ore ga Pauru namaā nŭxū ixuxŭ ga Cristuaxŭ na yaxōxŭchiga. ²⁵ Natŭrŭ yexguma Pauru meāma namaā nŭxū ixuxgu na űuxācŭ Tupana naxwēxexū na meā imaxūxū rŭ űuxācŭ nanaxwēxexū na tŭrŭ maxŭmaā meā icuāxū rŭ űuxācŭ tá tŭxna naçaxŭ i tŭrŭ maxŭchiga, rŭ poraācŭ nabaixāchiāē ga Peri. Rŭ dŭxwa űanagŭrŭ nŭxū: —ĵĒcŭ íxŭ i űuxmax! Rŭ ngēxguma űuxguacŭ icharŭāŭxmaregu, rŭ wena táxarŭ cuxcēx changema —űanagŭrŭ. ²⁶ Yerŭ Peri ínananguxēē na Pauru chí dīeru nŭxna íxāxŭ na yangēāxūcēx, rŭ yemacēx muēxpŭxcŭna naxcēx nangemaxŭ, rŭ namaā nidexaxŭ. ²⁷ Rŭ taxre ga taunecŭ yemaācŭ nixīgŭ. Rŭ ínanguxuchi ga Peri ga na āēxgacŭ yīxū, rŭ nachicŭū ningucuchi ga Pŭrchiu ga Festu. Natŭrŭ nŭma ga Peri, rŭ

Yudíugümaã nügü namecümamaxëëchañ, rü yemacèx tama ínananguxuchixëë ga Pauru.

25

Äëxgacü ga Festupëxewa nayexma ga Pauru

¹ Rü Checharéawa nangu ga Festu na yéma äëxgacüxü yaxücuxütcèx. Rü marü tomaëxpüx ga ngunexü yéma nayexmagu, rü wenaxârü ínaxüãchi, rü Yerucharéüwa naxü. ² Rü yéma Yerucharéüwa rü yema paigüarü äëxgacügü rü Yudíugüarü äëxgacügü rü Pauruxü ínaxuaxüügü Festupëxewa. ³ Rü naxcèx ínacagü ga Yerucharéüwa Pauruxü na namuxütcèx. Yerü númagü rü nagu narüíntüë na namagu yacuxëügüãxü na yexma yamëxgüãxütcèx. ⁴ Natürü ga Festu rü nanangãxü, rü ñanagürü: —Checharéagu napoxcu i Pauru, rü choma rü tá paxa ngema Checharéawa chaxü. ⁵ Rü ngëmacèx name nixí i perü äëxgacügü rü chowe narüxí i Checharéawa, rü ngëxguma tacü rü chixexü naxüxgu i ngëma yatü, rü ngema tá nixí i chomaã nüxü pixugüxü —ñanagürü. ⁶ Rü maneca 8 rü éxna 10 ga ngunexü Yerucharéüwa nayexma ga Festu, rü ñuxüchi Checharéacèx nataegu. Rü yexguma ínanguxguarü moxüãcü rü yema nachica ga ngextá duüxüügüna ínaçaxüwa naxü, rü yéma nayarüto norü tochicaxüwa. Rü Paurucèx nangema na yéma napëxewa nagagüãxütcèx. ⁷ Rü yexguma yexma yaxücuxgu ga Pauru, rü yema Yudíugü ga Yerucharéüwa ne íxü, rü naxcèx naxí. Rü muxüma ga chixexügümaã ínanaxuaxüügü. Natürü taxuwama nüxü nüxü nadauxëë na aixcüma yíxü ga yema naxcèx ínaxuaxüügüãxü. ⁸ Rü yexguma ga Pauru rü nanangãxü, rü ñanagürü: —Pa Äëxgacüx, taxuüma ga chixexü namaã chixugü ga yema muügü ga Moiché ümatüxü, rü bai ga tupauca ya taxünemaã, rü bai ga äëxgacü ga Chécharumaã —ñanagürü. ⁹ Natürü núma ga Festu rü Yudíugümaã nügü namecümamaxëëchañ, rü yemacèx Pauruna naca, rü ñanagürü nüxü: —¿Cunaxwëxexü na Yerucharéüwa cuxüxü na ngema cuxna chaçaxütcèx naxcèx i guxüma i ngëma naxcèx cuxü ínaxuaxüügüxü? —ñanagürü. ¹⁰ Rü yexguma ga Pauru rü nanangãxü, rü ñanagürü: —Choma rü cupëxewa changëxma na choxna cuçaxütcèx, erü cuma nixí i cuxü naxunetaxü i äëxgacü ya tacü ya Chécharu na äëxgacü quiíxü i núma. Rü ngëmacèx chanaxwëxe i nuã choxna cuca. Erü taxuüma i chixexü chaxü i Yudíugümaã, ngëxgumarüü i cuma meãma nüxü cucuèx. ¹¹ Ngëxguma chi tacü i chixexü chaxüxgu rü marü name na naxcèx choxü yamëxgüxü, rü marü name i na chayuxü. Natürü ngëxguma nataxuxguma i tacü i aixcüma ixíxü i ngëma naxcèx choxü ínaxuaxüügüxü, rü taxuacüma texé Yudíugüna choxü tamu. Rü naxcèx íchaca na númatama ya äëxgacü ya tacü ya Chécharu choxna naçaxütcèx —ñanagürü ga Pauru. ¹² Rü yexguma ga Festu rü norü ucuxëruüügü ga äëxgacügümaã nidexa, rü ñuxüchi ñanagürü Pauruxü: —Marü naxcèx ícuca na äëxgacü ya tacü ya Chécharu cuxna çaxütcèx. Êcü, ñuxma rü naxütawa tá cuxü chamu —ñanagürü.

Äëxgacü ga Agripapëxewa nayexma ga Pauru

¹³ Rü ñuxre ga ngunexü ngupetügu, rü Checharéawa nangugü ga Yudíugüarü äëxgacü ga Agripa rü naëyèx ga Bereniche, na Festuxü yanamoxëgüxütcèx. ¹⁴ Rü marü ñuxre ga ngunexü yéma nayexmagügu, rü Agripamaã nüxü nixu ga Festu ga Pauruchiga, rü ñanagürü: —Nuã nangëxma i wüxi i yatü i poxcuxü ga Peri tama ínguxuchixëëxü. ¹⁵ —Rü yexguma choma Yerucharéüwa chayexmagu, rü paigüarü äëxgacügü rü

Yudiūgŭarŭ āēxgacŭgŭerugŭ rŭ ĩnanaxuaxŭgŭ, rŭ naxcēx ĩnacagŭ na namaā chanaxueguxŭcēx rŭ na yamēxgŭāxŭcēx. ¹⁶—Rŭ choma chanangāxŭ, rŭ tama tocŭma nixŭ i toma i Dumacŭāxgŭ i na tayamāxŭ i wŭxi i duŭxŭ ega tama nŭgŭētŭwa yadexaxŭragu napēxewa i ngēma ĩnaxuaxŭgŭxŭ. ¹⁷—Rŭ yemacēx ga yexguma nŭma nangugŭga ga yema Yudiūgŭ, rŭ yexgumaārŭ moxŭācŭ rŭ chorŭ tochicaxŭwa chitocuchi na nŭxna chaçaxŭcēx nachiga ga yema, rŭ yēma naxcēx changema ga yema yatŭ. ¹⁸—Natŭrŭ ga yema Yudiūgŭ ga ĩnaxuaxŭgŭxŭ, rŭ taxuŭma ga ŭacŭ ga chixexŭ ga choma ĩchananguxēēxŭxŭ nixugŭ. ¹⁹—Natŭrŭ norŭ Tupanachiga rŭ wŭxi ga yatŭ ga Ngechuchuchiga nixŭ ga yema nagu yadexagŭxŭ. Rŭ nŭma ga Yudiūgŭ nŭxŭ nixugŭ ga na nayuxŭ ga yema Ngechuchu, natŭrŭ Pauru nŭxŭ ixuxgu rŭ marŭ wena namaxŭ. ²⁰—Rŭ yexguma ga choma ga tama na nŭxŭ chacuāxŭ ga űuxācŭ tā chanamexēēxŭ ga yema guxchaxŭ, rŭ yemacēx nŭxna chaca ga Pauru ngoxi nanaxwēxe ga Yerucharēŭwa na naxŭxŭ, na yēma nŭxna chaçaxŭcēx. ²¹—Natŭrŭ nŭma ga Pauru naxcēx ĩnaca ga na āēxgacŭ ya tacŭ ya Chēcharupēxewa naxŭxŭ na nŭmatama ya Chēcharu nŭxna çaxŭcēx. Rŭ yemacēx chanamu na meā nŭxna nadaugŭxŭcēx űuxmata choma āēxgacŭ ya Chēcharuxŭtawa chanamux —ñanagŭrŭ. ²² Rŭ yexguma ga Agripa rŭ ñanagŭrŭ Festuxŭ: —Choma rŭ ta nŭxŭ chaxŭnŭchaŭ i norŭ ore i ngēma yatŭ —ñanagŭrŭ. Rŭ Festu nanangāxŭ rŭ ñanagŭrŭ: —Moxŭ tātama nŭxŭ cuxŭnŭ —ñanagŭrŭ. ²³ Rŭ moxŭācŭ yema ucapu ga āēxgacŭgŭ ĩngutaquēxegŭxŭwa nangugŭ ga Agripa rŭ Bereniche rŭ poraācŭ nangēxāēgŭ. Rŭ namaā ĩnangugŭ ta ga churaragŭarŭ āēxgacŭgŭ rŭ yema ĩānecŭāxgŭ ga corigŭxŭchi ĩxŭgŭxŭ. Rŭ űuxŭchi Paurucēx nangema ga Festu na yema āēxgacŭgŭpēxewa nagagŭāxŭcēx. ²⁴ Rŭ ñanagŭrŭ ga Festu: —Pa Āēxgacŭ Pa Agripax, rŭ Pa Guxāma i Pema ya Nuxmagŭxe, ñāā nixŭ i ngēma yatŭ i nachigamaā yadexagŭxŭ i guxŭma i Yudiūgŭ. Rŭ chopēxewa ĩnanaxuaxŭgŭ ga Yerucharēŭwa rŭ nŭma rŭ ta. Rŭ guxŭguma tagaācŭma choxna naxcēx nacagŭ na nayuxŭ. ²⁵—Natŭrŭ i choma rŭ taxuŭma i ŭacŭ i chixexŭ i naxŭxŭ nawa chadau na naxcēx yamāxŭ. Natŭrŭ nŭma ga Pauru rŭ naxcēx ĩnaca na āēxgacŭ ya tacŭ ya Chēcharu nŭxna çaxŭ, rŭ ngēmacēx nagu charŭxŭnŭ na ngema chanamuxŭ. ²⁶—Natŭrŭ taxuŭma i ore i aixcŭma ĩxŭxŭ i nachiga choxŭ nangēxma na chorŭ āēxgacŭ ya Chēcharucēx chanaxŭmatŭxŭcēx. Rŭ ngēmacēx chanamu na nuā pepēxewa nagagŭāxŭcēx, rŭ cuxcēx tŭrŭ nixŭ, Pa Āēxgacŭ Pa Agripax, na nŭxna cuçaxŭcēx, na nŭxŭ chacuāxŭcēx i ŭacŭ tā na chaxŭmatŭxŭ naxcēx ya āēxgacŭ ya Chēcharu. ²⁷—Erŭ chauxcēx rŭ tama name na ngextā namuxŭ i wŭxi i poxcuxŭ ega tama naxŭmatŭxŭragu nachiga na ŭacŭcēx ĩnaxuaxŭgŭāxŭ.

26

Pauru rŭ āēxgacŭ ga Agripapēxewa nŭgŭētŭwa nidexa

¹ Rŭ yexguma ga Agripa rŭ ñanagŭrŭ Pauruxŭ: —Marŭ name i űuxma i cugŭētŭwa quidexa —ñanagŭrŭ. Rŭ yexguma naxunagŭmēxē ga Pauru, rŭ ĩnanaxŭgŭ ga nŭgŭētŭwa na yadexaxŭ, rŭ ñanagŭrŭ: ²—Chataāē, Pa Āēxgacŭ Pa Agripax, erŭ cupēxewa chidexa i űuxma na chaugŭētŭwa chachogŭxŭcēx i guxŭma i ngēma choxŭ na ĩnaxuaxŭgŭxŭ i ngēma chautanŭxŭ i Yudiūgŭ. ³—Rŭ yexeraācŭ chataāē erŭ cuma nŭxŭ cucuēx i guxŭma i tocŭma i toma i Yudiūgŭ, rŭ guxŭma i Moīché ŭmatŭxŭ i mugŭ i naxcēx yadexagŭxŭ i chautanŭxŭgŭ. Rŭ ngēmacēx cuxna chaca na meā choxŭ icurŭxŭnŭxŭcēx.

Pauruarū maxū naxūpa ga Ngechuchuaxūl na yaxōōxūl

4 —Rū guxūma i ngēma chautanūxūgū i Yudīugū rū nūxūl nacuēxgū ga űuxācū na chamaxūxūl ga natanūwa ga chauchiūānewa rū Yerucharēūwa ga yexguma changextūxūuragu. 5 —Rū ngēxguma chauchigaxū yaxugūechaūgu, rū nūma nūxūl nacuēxgū ga choma rū woetama Parichēu na chīixūl. Rū toma i Yudīugū i Parichēugū na tixīgūxūl, rū toma nixī i guxūma i totanūxūl i Yudīugūarū yexera na poraācū tanaxaurexūl i ngēma tocūma. 6 —Rū űuxma i ngēma chautanūxūgū i Yudīugū rū nuā pepēxewa choxū nagagū erū chayaxō na Cristugagu nangēxmaxūl i maxūl i taguma gūxūl, yema Tupana nuxcūmaūgūxūl ga torū oxīgūmaā inaxunetaxūrūl. 7 —Rū guxūma i totanūxūgū i Yudīugū rū Inananguxēēgū na nūxūl nadaugūxūl rū tá na yanguxūl i ngēma uneta. Rū ngēmacēx Tupanaxūl nicuēxūgū rū guxūguma i ngunecū rū chūtacūl rū Tupanaāxūl napuracūe. Rū choma rū ta Íchananguxēē na nūxūl chadauxūl rū tá na yanguxūl i ngēma uneta, rū ngēmacēx nixī, Pa Āēxgacūx, i űuxma i choxūl Inaxuaxūgūxūl i ngēma chautanūxūgū i Yudīugū. 8 —¿Rū tūxcūl tama peyaxōgū na Tupana wena namaxēxēxūl i ngēma yuexūl?

Pauru rū nūxūl nixu ga űuxācū yema yaxōgūxūlwe na yangēchīgūxūl

9 —Rū choma nagu charūxīnūgu ga noxri rū name ga muxūma ga chixexūl namaā na chaxūxūl ga yema Ngechuchu ya Nacharētucūāxāxūl yaxōgūxūl. 10 —Rū yemacēx nawe chingēchīgū ga Yerucharēūwa. Rū paigūarū āēxgacūgūxūltawa naxcēx Íchaca ga popera na chanapoxcuexūcēx ga yema yaxōgūxūl. Rū yexma chanapoxcue ga muxūma. Rū yexguma chautanūxūl ga Yudīugū nadaixgu ga yema yaxōgūxūl, rū choma rū chorū me nixī. 11 —Rū muēxpūxcūna rū chanapoxcuexūl na nūxūl naxoexūcēx ga yema na yaxōgūāxūl. Rū yemaācū chanaxūl ga guxūnema ga ngutaquēxepataūgūwa. Rū poraācū naxchī chaxaxichī ga yema yaxōgūxūl, rū yemacēx nawe chingēchīgū űuxmata to ga nachīūānegune ga Iānegūwa.

Pauru rū wenaxārū nūxūl nixu ga űuxācū na yaxōōxūl ga noxrix

12 Rū űanagūrū ga Pauru: —Rū yema yaxōgūxūxūl na chapoxcuexūcēx nixī ga Damacuwa chaxūxūl. Rū yemacēx ga paigūarū āēxgacūgū rū choxūl namagū rū choxna nanaxāgū ga popera ga nawa choxna naxāgagūxūl na chanapoxcuexūcēx ga yema yaxōgūxūl. 13 —Rū yexguma namagu taxīyane, Pa Āēxgacūx, rū yexguma meāma tocuchiwa nanguxgu, rū nūxūl chadau ga wūxi ga omū ga daxūwa ne űxūl ga űēxcūarū yexera ixīxūl ga choxūl baxixūl rū yema chomūcūgūxūl rū ta baxixūl. 14 —Rū guxāma ga toma rū űaxtūanegu tayayi. Rū choma rū nūxūl chaxīnū ga wūxi ga naga ga Yudīugawa choxūl űaxūl: “Pa Chauru Pa Chaurux, ¿tūxcūl i chowe quingēchīgūxūl? Poraācū cugūtama cuchixexēē űoma wūxi i űacūl i āmagūxūgu cucuxgūxūrūl”, űanagūrū choxūl. 15 —Rū choma chanangāxūl, rū űacharūgū:

“¿Texé quixī, Pa Corix?” űacharūgū. Rū nūma ga Cori rū űanagūrū choxūl:

“Choma nixī i Ngechuchu rū chorū duūxūgū nixī i ngēma nawe quingēchīgūxūl. 16 —¡Natūrūl írūda rū inachi! Rū marū cucxēx changox i űuxmax, erū cuxūl chamuxchaūl na choxūl cupuracūxūcēx rū nūxūl quixuchigaxūcēx i ngēma űuxma na choxūl cudauxūl rū ngēma yixcūra tá chauxūtawa nūxūl cudauxūl. 17 —Rū cuxna tá chadau i natanūwa i cutanūxūgū i Yudīugū rū ngēma tama Yudīugū ixīgūxūl i űuxma tá natanūwa cuxūl chamuxūl. 18 —Rū ngema cuxūl chamu na ngēma duūxūgūxūl choxūl cucuēxēxūcēx rū nūxūl naxoexūcēx i nacūma i chixexūgū rū chauga

naxīnūēxūcēx. Rū ngema tá cuxū na Chatanámēxēwa ícunanguxūdxēxūcēx i ngēma duūxūgū na chowe naxīxūcēx rū choxū yaxōgūāxūcēx na choma rū nūxū nūxū changechaūxūcēx i norū pecadugū, rū nūxū nangēxmaxūcēx i nachica namaā i guxūma i chorū duūxūgū i ūnēgūxū”, ñanagūrū choxū ga Cori.

Pauru rū naga naxīnū ga yema Ngechuchu namaā nūxū ixuxū

19 —Rū yemacēx ga chomax, Pa Āēxgacū Pa Agripax, rū naga chaxīnū ga yema ore ga Ngechuchu chomaā nūxū ixuxū ga yexguma choxū nabaxixgu ga yema omū ga daxūwa ne ūxū. 20 —Natūrū noxri rū Damacucūāxgūmaā nūxū chixuchiga ga Tupanaārū ore. Rū yixcama ga Yerucharēucūāxgūmaā, rū yemawena rū guxū ga Yudéaanewa, rū ñuxūchi yema tama Yudiugū ixīgūxūmaā nūxū chixu. Rū ñacharūgū:

“¡Nūxū perūxoe i pecūma i chixexūgū, rū Tupanacēx pedaugū, rū meā pemaxē na duūxūgū nūxū daugūxūcēx na aixcūma peyaxōgūxū!” ñacharūgū.

21 —Rū yemacēxtama nixī ga tupauca ya taxūnegu choxū yayauxgūxū rū choxū yamēxgūchaūxū ga chautanūxūgū i Yudiugū. 22-23 —Natūrū Tupana choxū narūngūxēē rū ngēmacēx taguma íchayachaxāchi na guxūma i duūxūgūmaā nūxū chixuxū rū woo buxū rū yaxū. Rū namaā nūxū chixu ga yema ore ga nuxcūmaūgūxū ga Tupanaārū orearū uruūgū rū Moíché nūxū ixugūxū na ñuxācū tá nūxū nangupetūxū ga Cristu rū ñuxācū tá na nayuxū, natūrū yemawena rū nūma tá yīxū ga nūxīra yuwa ínadaxū. Rū namaā nūxū chixu ta ga yema nuxcūmaūgūxūārū ore ga ñaxū:

“Rū Cristu rū tatanūxū i Yudiugūmaā rū ngēma to i duūxūgū i tama Yudiugū ixīgūxūmaā tá naxunagūāxū i ore i tūxū maxēxēxū”, ñaxū. Rū yemachigaxūxīcatama nixī ga namaā chixuxū —ñanagūrū ga Pauru.

Pauru rū Agripaxū nanangúchaūxēē na yaxōōxūcēx

24 Rū yexguma yemaācū nūgūētūwa yadeaxgu ga Pauru, rū ñanagūrū ga Festu tagaācūma: —Cungēāēmare Pa Paurux. Rū ngēma na yeūcūrū cungūechaū, rū dūxwa nawa cungēāē —ñanagūrū. 25 Natūrū ga Pauru rū nanangāxū, rū ñanagūrū: —Tama changēāē Pa Āēxgacūxūchi, Pa Festux. Erū ñāā ore i nūxū chixuxū, rū aixcūmaxūchima nixī. 26 —Rū daa āēxgacū ya Agripa rū meāma nūxū nacuēx i guxūma i ngēma pemaā nūxū chixuxū. Rū ngēmacēx tama chamuūācūma chorū taāēmaā napēxewa nūxū chixu, erū nūxū chacuēx na nūma rū ta nūxū nacuáxū i űacūchiga na yīxū i guxūma i ñāā ore. Erū tama ngextāmare cūācū naxūpetū i ngēma. 27 —¿Cuyaxōxū, Pa Agripax, i ngēma Tupanaārū orearū uruūgū nūxū ixuxū? Choma nūxū chacuēx rū cuyaxō —ñanagūrū ga Pauru. 28 Rū Pauruxū nangāxū ga Agripa, rū ñanagūrū: —¿Ēxna cuma nagu curūxīnūgu rū ngēmaācū noxre i curū oremaā na choxū cuyaxōxēxū? —ñanagūrū. 29 Rū ñanagūrū ga Pauru: —Woo noxre i oremaā rū woo muxū i oremaā rū Tupana nanaxwēxe na cuyaxōxū. Rū tama i cuxicatama, natūrū guxūma i ñāā nuā choxū ínūēxū rū ta, rū Tupana nanaxwēxe na chauxrūū yixīgūxū, natūrū tama chauxrūū daa cadenagūmaā na yanēixgūxū —ñanagūrū ga Pauru. 30 Rū yexguma inachigū ga Agripa, rū Festu, rū Bereniche, rū guxūma ga yema namaā yēma rūtogūxū. 31 Rū yexguma ga nūmagū rū noxrwama naxī na yēma nūgūmaā Pauruchiga yadexagūxūcēx. Rū ñanagūrūgū: —Rū ngēma yatū, rū taxuūma i chixexū naxū na naxcēx yamáxū rū ēxna naxcēx napoxcuxū —ñanagūrūgū. 32 Rū

Festuxū ñanagürü ga Agripa: —Ngëxguma chi tama nümatama naxcèx ínacaxgu na Chécharu nüxna çaxüçèx, rü chi ítananguxuchixëë —ñanagürü.

27

Pauruxü Dumawa namugü

¹ Rü yema äëxgacügü rü düxwa nagu narüxinüë na norü äëxgacü ga Chécharu ga Itáriaanewa yexmacüxütawa na toxü namugüxü. Rü norü churaragüarü capitáüna nanamu ga Pauru namaã ga ñuxre ga togü ga poxcuexü na Chécharuxütawa nagagüäxüçèx. Rü guma capitáü rü Yúriu nixí ga naega, rü norü churaragütücumü rü Chécharuarü Dauruüügü nixí ga naega. ² Rü nagu tichoü ga wüxi ga wapuru ga buanecümaã ixüxüne ga Adamíchiuwa ne üxüne ga Áchiaarü íänegüwa üxchaxüne. Rü towe ta nixüe ga Aritárcu ga Machedóniãanecüäx ga Techarónicawa ne üxü. ³ Rü moxüäcü rü Chidäüärü türewa tangugü. Rü Paurumaã namecüma ga capitáü ga Yúriu. Rü ínanaxüexëë na yémacüäx ga namücügüxütagu naxüãneäxüçèx ga Pauru, na nümagü nüxü nangüxëëgüxüçèx. ⁴ Rü yéma itaxiãchi. Rü Chiprearü capaxüärü tocüwaguama taxí, naxchaxwa ga buanecü, yerü towaama nabu. ⁵ Rü yéma Chiprewa tixäü ga taxtü rü Chiríchiaanecutüwa tarüyicu. Rü yemacutügu taxí, rü Paüpíriaanewa tachopetü rü ñuxmata Díchiaanewa yexmane ga íãne ga Mirawa tangugü. ⁶ Rü yema capitáü yexma nüxü nayangau ga wüxi ga wapuru ga Aleyádríawa ne üxüne ga Itáriaanewa üxüne. Rü gumagu toxü nichoüxëë, rü tomaã inaxüãchi. ⁷ Natürü írarüwatama itífaxwetaxü ga muxüma ga ngunexügu, rü guxchaäcüma Guíduarü toxmëxtawa tangugü. Natürü towaama nabuema ga buanecü, rü yemacèx capaxü ga Chamonaärü toxmëxtawa tachopetü rü capaxü ga Crétaxü ítachoeguãchi. ⁸ Rü guxchaäcüma nacutügu taxí ga yema capaxü, rü wüxi ga nachica ga Mexü ga Türegu äegaxüwa tangugü. Rü íãne ga Dácheaarü ngaicamana nayexma. ⁹ Natürü marü poraäcü namagu tanuxcü ga na itaxixü, rü marü naxäücüma ga na itaxiãmaxü yerü marü nawa nangu ga guma tauemacügü ga nagu nagáuanecü. Rü yemacèx ga Pauru rü nayaxucüxë ga duüxügü, rü ñanagürü: ¹⁰—Pa Chomücügüx, nüxü chacuèx i ngëxguma chi íxiãmagu, rü tá naxäücüma. Rü daa wapuru rü tá inayarütaxu namaã i guxüma i naäcu. Rü ngürüãchi i yixema rü tá ta tayue —ñanagürü. ¹¹ Natürü yema churaragüarü capitáü rü yexeraäcü guma wapuruü yoragaama naxínü, rü marinerugüarü capitáügaama naxínü, rü tama aixcüma Pauruga naxínü. ¹² Natürü yema türe rü tama name ga yéma na tanangupetüxëëxü ga gáuanexü. Rü yemacèx wixguxüchi guxüma ga duüxügü nagu narüxinüë rü narümemae nixí ga na itaxiãchixü ga yéma. Rü nanaxwëxegü ga chi Cueníchewa na tangugüxü na yéma tanangupetüxëëxü ga gáuanexü, yerü yema nixí ga wüxi ga Crétaarü türe ga mexü ga tama poraäcü buanecü ga taxü nawa nguxü.

Taxtüarü ngäxütügu nüxü naxü ga buanecü ga tacü

¹³ Rü inanaxügü ga na meãma topëxewaama nabuxü ga buanecü, rü yemacèx ga nümagü ga marinerugü rü nüxü nacüxügü rü chi meã ítangugü ga yema itaxixüwa. Rü yemacèx itaxiãchi, rü nacutüarü ngaicamagu taxí ga yema Crétaarü capaxü. ¹⁴⁻¹⁵ Rü natürü ngürüãchi yixcamaxüra rü wüxi ga buanecü ga taxüchicü ga capaxüärü tocüwawa ne üxcü ngäxütüwaama nanacue ga guma wapuru. Rü taxuacüma itixütaü nawaama ga buanecü. Rü yemacèx düxwa ítayachaxächi ga na tanatochinüxü, rü toxü ínicuetaü. ¹⁶ Rü wüxi ga capaxüxäcü ga Caudagu äegaxüärü tocüwawaama tachopetü

ga ngextá tama poraācū íyabuaxūwa. Rū yéma poraācū tapuracūe na guma wapurugu tanatúnagūxū ga norū ngue ga yatúchigūne. ¹⁷ Rū yexguma marū natúnagūgūāgu ga guma ngue, rū napanaxāgū ga tanūtāxūmaā nayanēixgūtūwe ga guma wapuru. Rū űuxūchi nayawēgū ga yema naxchirū-tachinūgū ga namaā yacuetaūxū ga noxrix, yerū namuūē ga na Chírutearū-naxnūcūwa yanangaixtaūgūxū. Rū yema buanecū toxū nicuetaūmre. ¹⁸ Rū moxūācū ga buanecū rū tama nangupetūēga, rū yemacēx inanaxūgū ga na ínawoūācuāxū. ¹⁹ Rū norū tomaēxpūx ga ngunexūgu, rū naxmēxmaātama ínanawoū ga yema natūxūgū ga guma wapuru, rū guxūma ga to ga norū yemaxūgū. ²⁰ Rū muxūma ga ngunexūgu, rū tama nangox ga űēxcū rū ēxtagū, rū tama nangupetūēga ga guma buanecū ga taxūchicū. Rū dūxwa nagu tarūxīnūē ga marū tāūtāma na tamaxēxū. ²¹ Rū yexguma marū muxūma ga ngunexū tingegūgu ga tama na tachibūexū, rū yexguma guxūma ga yema duūxūgūtānūwa inachi ga Pauru, rū űanagūrū: —Narūmemaē chi nixī, Pa Chomūcūgūx, ga chauga na pexīnūēxū, rū tāū chima na ixīāchixū ga Crétawa, rū tāū chima űuxmarūū tūxū naxūpetū i űāā āucūmaxū rū taxuxū chima i chixexū tūxū nangupetū. ²² —Natūrū ¡petaāēgū! erū wapuruxica tá inayarūtaxu, natūrū i yixema rū taxúetāma tayue. ²³ —Erū ngewēxarū chūtāxūga ya Tupana ya nūxū chapuracūy ya chorū cori ixicū rū nūma nanamu i wūxi i norū orearū uruū i daxūcūāx i chauxcēx ngóxū. ²⁴ —Rū űanagūrū choxū:

“¡Tāxū i cumuūxū, Pa Paurux! Erū āēxgacū ya Chécharupēxewa tá cingu, rū cugagu tá Tupana nanamaxēxēē i guxūma i ngēma cumūcūgū i cumaā ngēxma wapurugu íxū”, űanagūrū choxū. ²⁵ —Rū ngēmacēx, Pa Chomūcūgūx, ¡rū petaāēgū! erū choma rū aixcūma Tupanaāxū chayaxō, rū aixcūma tá nixī i ngēmaācū tá nangupetūxū ngēxgumarūū i ngēma chomaā nūxū yaxuxū. ²⁶ —Natūrū wūxi i capaxūwa tá tayarūcūxcuchitaūgū —űanagūrū ga Pauru. ²⁷ Rū yexguma taxre ga yūxū tingexgu ga na itaxīxū, rū taxū ga taxtū ga Ariaticuwa tayexmagū, yerū ga buanecū rū nūxīca toxū nacuetaū. Rū ngāxūcūūgu nūxū nicuēxāchitanū ga yema marinerugū ga na dauxchita-cutūwa tangugūchaūxū. ²⁸ Rū ínanataēgū ga norū ngugūtamaxū rū 36 ga metru nixī ga norū mátama. Rū yexguma marū írarūwa yaxūguxūra itaxīxgu rū wē-naxārū nanangugūtamagū, rū 27 ga metru nixī ga norū mátama ga yexgumax. ²⁹ Rū namuūē ga na nutamaā yanañataūgūxū ga naxānacūwa, rū yemacēx guma wapuruchinūwa ínanawoū ga āgūmūcū ga aūclagū ga achugūnaxcēx ga napanaxāmaā ixātūxūxū na yemaācū íyachaxāchigūxēēāxūcēx ga guma wapuru. Rū nayumūxēgū ga paxa na yangunexūcēx. ³⁰ Natūrū ga yema marinerugū rū nibuxmūchaū ga guma wapuruwa, rū yemacēx nanawāixēgū ga guma wapuruarū ngue, rū űanagūrūgū: —Ngēma wapurupēxearū aūclagū tá ítawoū na nataixūcēx ya wapuru —űanagūrūgūneta. ³¹ Natūrū ga Pauru rū churaragūarū capitāūmaā rū norū churaragūmaā nūxū nixu rū űanagūrū: —Ngēxguma űāā marinerugū rū tāūtāma nuxā wapurugu nachoxgu, rū guxāma i pema rū tá peyue —űanagūrū. ³² Rū yexguma ga yema churaragū rū nayadaeconūgū ga guma ngue, rū inananguxēēgū. ³³ Rū yexguma marū yangunechaūgu, rū Pauru nayaxucūxēgū ga guxūma na nachibūexūcēx, rū űanagūrū: —Taxre i yūxū nixī i űuxma na taguma aixrūgumarūū pechibūexū, rū bai i űacū na pengōxū yerū poraācū pexoegaāēgū. ³⁴ Rū űuxma rū pemaā nūxū chixu na pechibūexū na peporaexūcēx, rū taxuūma pexū űpetūxūcēx. Erū taxúetāma ítayarūtaxu rū bai i wūxi i peyaexūra inayarūtaxu —űanagūrū.

³⁵ Rū yexguma marū yema ñaxgu, rū nanayaxu ga wūxi ga pāū, rū Tupanana moxē naxā napēxewa ga guxūma. Rū inanabūcu ga yema pāū, rū inanaxūgū ga na nangōōxū. ³⁶ Rū yexguma nataāēgū ga guxūma, rū nūmagū rū ta nachibūe. ³⁷ Rū 276 tixīgū ga guxāma ga toma ga guma wapurugu iḫē. ³⁸ Rū yexguma marū nangāxēgu, rū ínanawoū ga yema trigu ga wapuru namaā āācuxū na nangūnagūāchixūraxūcēx ga guma wapuru.

Inangu ga guma wapuru

³⁹ Rū yexguma yangunegu, rū yema marinerugū tama nūxū nacuāane ga yéma. Natürü nūxū nadaugū ga wūxi ga axcuchixū ga naxnūcūpechinūāxū, rū nagu narūxīnūē ga yéma na yanangaixēēgūāxū ga wapuru. ⁴⁰ Rū yexguma nanadaū ga norū ngaxūxū ga aūclagū, rū yéma nanawogū. Rū nayawēgū ga norū toxchinūxūārū nējrxuūgū, rū inananga ga yema napēxewa ūxū ga naxchirutachinū ga namaā iticuetaūxū. Rū itanaxūgū ga nūxū na tingaicaxū ga yema naxnūcūpechinū. ⁴¹ Natürü wūxi ga naxnūcūarū nuxtamaxūwa tayarūngaixtaū. Rū yéma naxnūcūwa nayarūwápēxe ga guma wapuru rū marū tama yéma itaxīāchi. Rū yoxni ga nacinūwa, rū yuape nayapuxēē. ⁴² Rū yema churaragū rū nagu narūxīnūē ga na nadaīāxū ga yema poxcuexū na taxuūma íñaxūcēx ga yexguma naxānacūwa nangugūgu. ⁴³⁻⁴⁴ Natürü yema norū capitāū ga churaragū, rū Pauruxū namaxēēchaū, rū yemacēx tama nanaxwēxe ga na nadaīāxū ga yema poxcuexū. Natürü nanamu na yema ixānūxū rū nūxīra ínayuxgūxū na naxānacūwa nawēxgūxūcēx, rū yema togū rū mūrapewagūgu rū ēxna yema wapurutūchigūgu meā na ínachoūxūcēx. Rū yemaācū guxāma meāma naxānacūwa tangugū.

28

Capaxū ga Märtawa nayexma ga Pauru

¹ Rū yexguma meāma naxānacūwa tangugūgu ga guxāma rū yexguma nūxū tacuēxgū na Márta na yīixū ga naega ga yema capaxū. ² Rū yema yémacūāxgū ga duūxūgū rū meāma toxū nayauxgū ga guxāma. Rū nanangixtagū ga wūxi ga ūxū ga taxūne. Rū toxcēx nacagū ga guxāma na yéma togū tanaixūgūxūcēx, yerū napu rū nagāuane. ³ Rū Pauru nanadetaquēxe ga ñuxre ga naīchacūgū, rū ūxūxetūwa nayawocu. Natürü yexguma yéma yawocuāgu, rū ūxūarū naīēmaxūchaxwa inayago ga wūxi ga āxtape. Rū Paurumēxēwa nayuxu, rū yéma nayarūtuāchi. ⁴ Rū yexguma yema yémacūāxgū nūxū daugūgu ga yema āxtape ga Paurumēxēwa na natuxū, rū nūgūmaā ñanagūrūgū: —Ñāā yatū rū maneca wūxi i máētaxū nixī. Rū woo taxtūwa yuwa na yañaxū, natürü Tupana tama nanamaxēēchaū —ñanagūrūgū. ⁵ Natürü guma ūxūxetūgu nanamaxū ga yema āxtape, rū taxuūma nūxū naxūpetū ga Pauru. ⁶ Natürü guxūma ga yema duūxūgū rū ínananguxēēgū rū ngoxi tá nachamé rū ēxna nayux. Rū marū nuxcūxūrama ga yema nūxū na nadaunūxū rū taxuūma nūxū na ūpetūxū, rū dūxwa togu narūxīnūē rū inanaxūgūe ga na ñagūxū: —Maneca wūxi ya tupana nixī —ñagūxū. ⁷ Rū yema nachicaarū ngaicamana nayexma ga norū naāne ga yema capaxūārū āēxgacū ga Púbiru ga naega. Rū nūma meāma toxū nayaxu, rū yexma toxū napegūxēē ga tomaēxpūx ga ngunexū. Rū tomaā namecūmaxūchi. ⁸ Rū guxema Púbiru nanatū rū ngūrūcarewa tayexma, yerū tixaxūne rū taduū. Rū yéma tūmaxūtawa nangu ga Pauru, rū tūmamaā nayumūxē, rū tūmaētūgu naxūxmēx, rū tūxū narūmexēē. ⁹ Rū yexguma yemaxū nadaugūgu, rū Paurucēx yéma naxī ta

ga guxūma ga togū ga idaaweexū ga yema capaxūcūāx, rū narūmeē. ¹⁰ Rū nūmagū rū muxūma toxna naxāmaregū. Rū yexguma itaxīāchigu, rū toxna nananagū ga guxūma ga tanaxwēxexū ga torū namawaū ga ōna.

Dumawa nangu ga Pauru

¹¹ Rū tomaēxpūx ga tauemacū yéma capaxūwa tayexmagū. Rū űuxūchi nagu tichoū ga wūxi ga wapuru ga yema capaxūwa gáuanexū ngupetūxēxene. Rū Aleyādrīacūāx nixī ga guma wapuru. Rū napēxeraūwa nayexmagū ga taxre ga norū tupanachicūnēxāgū ga Catu rū Porugu āegagūxū. ¹² Rū Chiracūchaarū tūrewa tangugū, rū tomaēxpūx ga ngunexū yéma tayexmagū. ¹³ Rū yéma itaxīāchi, rū nacutūarū ngaicamagu taxī űuxmata Dequūwa tangugū. Rū moxūācū inangu ga wūxi ga buanecū ga itaxīxūwaama bucū rū toxū inicuetaū. Rū yemaārū moxūācūama rū Puteriwa tangugū. ¹⁴⁻¹⁵ Rū yexma nūxū tayangau ga űuxre ga duūxūgū ga yaxōgūxū. Rū toxna naxu na wūxi ga yūxū yexma naxūtagu tarūchoxūcēx. Rū marū wūxi ga yūxū ngupetūgu rū itaxīāchi na namagu Dumawa taxīxūcēx. Rū marū toxū nacuāchigagū ga yema yaxōgūxū ga Dumagugūxū. Rū yema nama ga Ápiugu āegaxūgu naxī na yexma toxū yangaugūxūcēx. Rū űuxre rū yema nachica ga Tomaēxpūx ga Taxepataūgu āegaxūwa toxū nayarūnguxēēgū Rū togū rū nachopetū űuxmata yema nachica ga Ápiuarū Ngūēchicagu āegaxūwa nangugū. Rū yexguma Pauru nūxū dēuxgu ga yema yaxōgūxū, rū Tupanana moxē naxā rū porāacū nataāē. Rū yemaācū Dumawa tangugū. ¹⁶ Rū yexguma Dumawa tangugūgu rū wūxi ga ĩpatawa nananguxēēgū ga Pauru nūxīca namaā ga wūxi ga churara ga nūxna dauxū.

Dumawa nayexma ga Pauru

¹⁷ Rū tomaēxpūx ga ngunexū marū yéma nayexmagu, rū Pauru naxcēx nangema ga yema Yudiūgarū āēxgacūgū ga Dumawa yexmagūxū. Rū yexguma nangutaquēxegūgu, rū űanagūrū ga Pauru nūxū: —Choma, Pa Chaueneēgūx, rū taxuūma i chixexū chaxū namaā i tatanūxūgū, rū bai i nuxcūmaūgūxū i tórū oxigūcūmagūmaā. Natūrū Yerucharēūgu choxū niyauxgū ga tatanūxūgū, rū Dumacūāx ga churaragūna choxū namugū. ¹⁸ Rū yexguma marū choxna nacagūegu ga Dumacūāxgū, rū choxū ningēxgūchaū, yerū taxuūma ga űacū ga chixexū chowa nadaugū na choxū yamēxgūxūcēx. ¹⁹ Natūrū yema tatanūxūgū ga Yudiūgū rū nayamuētanū na tama choxū yangēxgūxūcēx, rū yemacēx dūxwa naxcēx íchaca na nūmatama ya āēxgacū ya Chécharu choxna çaxūcēx. Natūrū tama tatanūxūgūxū na íchaxuaxūxūcēx nixī ga yemacēx íchaçaxū. ²⁰ Rū ngēmacēx nixī i pexcēx nuā changemaxū na pexū chadauxūcēx rū pemaā chidexaxūcēx. Pema nūxū pecuēx rū yixema i Yudiūgū rū ĩtananguxēē i na ĩnanguxū ya Cristu. Rū yima Cristucēx nixī i choma i űuxma i daa cadenamaā chináixū —ñanagūrū. ²¹ Rū nūmagū nanangāxūgū, rū űanagūrūgū: —Toma rū taxuūma i popera i Yudéawa ne muxū i cuchigagu ũmatūxū tayauxgū. Rū ngēma taeneēgū i ngēma ne ĩxū rū nūma ngugūxū rū bai i wūxi i nūxū ĩxuxū i űacū rū ore i chixexū i cuchiga. ²² Rū cuxūtawa nūxū taxīnūēchaū rū űuxū űacuxū i cumax? Erū nūxū tacuēxgū rū guxūwama i Yudiūgū rū chixri nachiga nidexagū i ngēma ore i ngexwacaxūxū i Ngechuchuchiga —ñanagūrūgū. ²³ Rū yexguma Pauru-maā ĩnaxunetagu ga wūxi ga ngunexū, rū napatawa naxī ga muxūma ga duūxūgū. Rū Pauru namaā nūxū nixu ga Tupanaārū ore ga űuxācū āēxgacū na yīixū ya Tupana. Rū pēxmama ĩnanaxūgū, rū űuxmata nachūtaxū rū nūxū nanangūchaūxēē ga yema duūxūgū na Ngechuchuauxū yaxōgūāxūcēx.

Rū yemacèx Moĩché ūmatūxŭ ga mugūwa rū nuxcūmaŭgūxŭ ga Tupanaārū orearū uruŭgū ūmatūxŭ ga orewa namaā nūxŭ nixu ga Ngechuchuchiga.

²⁴ Rū nūmaxŭ rū nayaxōgū ga yema Pauru namaā nūxŭ ixuxŭ natūrū ga togū rū tama nayaxōgū. ²⁵ Rū yexguma tama wūxigu naxīnūēgu ga yema duŭxŭgū, rū inanaxūgū ga na íyaxīxŭ. Rū yemacèx ga Pauru rū ñanagūrū nūxŭ: — Meā perū oxigūmaā nidexa ga Tupanaāē i Ūūnexŭ ga yexguma Ichaxíaxŭ yadexaxēēgu rū ñaxgu:

²⁶ “¡Rū ngema naxŭ, rū ngēma duŭxŭgūmaā nūxŭ yarūxu rū ñacurūgū tá nūxŭ: ‘Rū woo nūxŭ pexīnūēgu rū tāūtāma aixcūma nūxŭ pecuèxgū. Rū woo nūxŭ perūdaunūgu rū tāūtāma aixcūma peyaxōgū. ²⁷ Rū ngēmaācū pixīgū i ñuxmax, erū tama choxŭ pecuáxchaŭ i pemax. Rū tama nūxŭ pexīnūē i chorū ore erū tama nūxŭ pexīnūēchaŭ. Rū tama nūxŭ peyaxōgū i ngēma choma pexŭ nūxŭ chadauxēēxŭ erū tama nūxŭ peyaxōgūchaŭ. Rū tama peāēwa chaugu perūxīnūē erū tama nūxŭ perūxoechaŭ i pecūma i chixexŭgū rū tama chauxcèx pedaugūchaŭ na choma pexŭ chamaxēxēēxŭcèx!’ ”

ñanagūrū ga Tupanaāē i Ūūnexŭ. ²⁸ Rū ñanagūrū ta ga Pauru: —Rū name nixī i pema rū ta nūxŭ pecuèx rū ñuxma rū marū inaxūgū na ngēma tama Yudíugū ixīgūxŭtanūwa naxunagūxŭ i ñāā Tupanaārū ore i tūxŭ maxēxēēxŭ. Rū nūmagū tá nixī i aixcūma inaxīnūēxŭ —ñanagūrū. ²⁹ Rū yexguma Pauru yema ñaxgu, rū ínixī ga yema Yudíugū, rū poraācū nūgūmaā ínīporagatanūcūū.

³⁰ Rū taxre ga taunecū ga mecū yēma nayexma ga Pauru nawa ga guma ī ga naxūtānūne ga nāgu na napexŭcèx. Rū yēma meāma nanayaxuxŭ ga guxŭma ga duŭxŭgū ga naxŭtāwa íyadaugūxŭxŭ. ³¹ Rū nūxŭ nixuchiga ga ñuxācū āēxgacū na yīxŭ ga Tupana. Rū taxŭema nūxna tanachuxu na nangŭexēēāxŭ ga Cori ya Ngechuchu ya Cristuchiga. Rū taxŭema naxcèx tanachixewe.

POPERA GA DUMAWA YEXMAGŪXŪ GA YAXŌGŪXŪTANŪWA NAMUXŪ GA PAURU

Pauru rü nüxŭ narümoxë ga yema yaxŏgŭxŭ ga Dumaärü ïänewa yexmagŭxŭ

¹ Pa Chaueneëgŭx, choma i Pauru nixŭ i pexcëx chanaxŭmatŭxŭ i ñaã popera. Rü choma nixŭ i Ngechuchu ya Cristuarŭ duŭxŭ chiŭxŭ. Rü choma nixŭ ga Tupana choxŭ yaxuxŭ na choxŭ yamuxŭcëx na duŭxŭgŭmaã nüxŭ chixuxŭcëx i norŭ ore i mexŭ i tüxŭ maxëxëëxŭ. ² Rü nuxcŭmaxŭchima Tupana nanamu ga norŭ orearŭ uruŭgŭ na naxŭmatŭgŭäxŭcëx ga norŭ ore i mexŭ. Rü yemaäcü tüxŭ nüxŭ nacuëxëë ga ñaã ore i mexŭ. ³ Rü ñaã ore i mexŭ rü törŭ Cori ya Ngechuchu ya Cristuchiga nixŭ. Rü nüma rü woo Tupana Nane na yŭxŭ, natŭrü duŭxŭgŭrüŭ nabu ga yexguma ñoma ga naänewa nanguxgu. Rü nuxcŭmaŭcü ga äëxgacŭ ga Dabitaã nixŭ. ⁴ Natŭrü nümatama ya Ngechuchu rü üü necŭ nixŭ. Rü yexguma yuwa ïnadaxgu rü Tupana tüxŭ nüxŭ nadauxëë na aixcŭma Nanexŭchi na yŭxŭ. Rü nüxna nanaxã ga guxŭma ga pora. ⁵ Rü Ngechuchu ga Cristugagu nixŭ ga chomaã namecŭmaxŭ rü choxŭ naxunetaxŭ ga Tupana na norŭ puracŭ chaxŭxŭcëx. Rü yemacëx Ngechuchuëgagu choxŭ namu na guxŭ i nachïŭänewa nüxŭ chixuxŭcëx i norŭ ore na yaxŏgŭäxŭcëx i duŭxŭgŭ rü Tupanaga naxŭnëxŭcëx. ⁶⁻⁷ Rü pema rü ta, Pa Dumacŭäxgŭx, rü ngëma duŭxŭgŭtanŭwa pengëxmagŭ yerŭ Tupanaãxŭ peyaxŏgŭ rü naga pexŭnŭë. Rü nüma rü pexŭ nangechaŭ rü marŭ pexŭ naxuneta na Ngechuchu ya Cristuarŭ duŭxŭgŭ pixŭgŭxŭcëx rü ngëma norŭ duŭxŭgŭtanŭxŭ na pexŭgŭxŭcëx. Rü ñuxmax, Pa Chaueneëgŭ i Dumacŭäxgŭx, rü chanaxwëxe i nüma ya Tanatŭ ya Tupana rü törŭ Cori ya Ngechuchu ya Cristu pemaã namecŭmagŭ rü pexŭ narŭngŭxëëgŭ na meã pexŭ naxŭpetŭxŭcëx rü aixcŭma petaãëgŭxŭcëx.

Pauru rü nüxŭ nangŭchaŭ na ïyadauãxŭ ga yema yaxŏgŭxŭ ga Dumawa yexmagŭxŭ

⁸ Rü ñuxma rü Ngechuchu ya Cristuëgagu Tupanama moxë chaxã pexcëx, erŭ guxŭwama i guxŭ i naänewa rü duŭxŭgŭ nüxŭ nixugŭgŭ na aixcŭma Cristuaxŭ peyaxŏgŭxŭ rü Tupanacëx pemaxëxŭ. ⁹ Rü nüma ya Tupana choxŭ nadau rü nüxŭ nacuëx na aixcŭma guxŭguma pexcëx chayumŭxëxŭ. Rü yimaãxŭ nixŭ i guxŭma i chorŭ ngŭchaŭmaã chapuracŭxŭ rü nüxŭ chixuxŭ i norŭ ore i mexŭ i Nanechiga. ¹⁰ Rü guxŭguma nüxna chaca na choxŭ ngëma namuxŭcëx rü ngëmaäcü düxwa pexŭ ïchayadauxŭcëx ega norŭ ngŭchaŭ yixŭgu. ¹¹ Erŭ aixcŭma choxŭ nangŭchaŭ na pexŭ chadauxŭ na pemaã nüxŭ chixuxŭcëx i Tupanaärŭ ore na aixcŭma meã peyaxŏgŭxŭcëx rü yexeraäcü peporaexŭcëx. ¹² Rü ngëxguma ngëmaäcü wŭxiwa ïngëxmagŭgu, rü tá wŭxichigŭ yigŭ tataãëgŭxëë rü yigŭxŭ tanangŭchaŭxëë. Erŭ choma rü tá nüxŭ chadau na ñuxäcü törŭ Coriaxŭ peyaxŏgŭxŭ rü pema rü tá ta nüxŭ pedau na ñuxäcü chayaxŏxŭ. ¹³ Pa Chaueneëgŭx, chanaxwëxe i nüxŭ pecuëx na muëxpŭxcŭna pexŭ ïchayadauxchaŭxŭ, natŭrü ñuxmarŭta rü choxŭ naguxcha. Natŭrü ngëma petanŭwa chaxŭxchaŭ, erŭ chanaxwëxe na pemaã nüxŭ chixuxŭ i Tupanaärŭ ore yema toxnamana yexmagŭxŭ ga duŭxŭgŭmaã nüxŭ chixuxŭrüŭ. Erŭ chanaxwëxe i ngëma duŭxŭgŭrüŭ meã peyaxŏgŭ na ngëmaäcü Cristuwe naxŭxŭcëx i ngëma petanŭxŭgŭ i ñuxma

tama yaxōgūxū. ¹⁴ Rū aixcūma ngēma changuxchaū erū nūmatama ya Tupana choxū namu na guxū i duūxūgūmaā nūxū na chixuxūcēx i norū ore. Rū nanaxwēxe i duūxūgū i meā poperaxū icuáxūmaā nūxū na chixuxū rū duūxūgū i tama poperaxū icuáxūmaā ta nūxū chixuxū i ngēma norū ore. Rū ngēxumarūū ta nanaxwēxe na ngēma duūxūgū i cuēx nūxū ngēmaxūmaā nūxū na chixuxū rū ngēma duūxūgū i taxuguma rūxīnūxūmaā nūxū na chixuxū. ¹⁵ Rū ngēmacēx, Pa Chaueneēgū i Dumagu Āchiūgūxū, rū choma rū marū íchamemare na petanūwa na chaxūxū, na pemaā rū ta nūxū chixuxūcēx i Tupanaārū ore i mexū.

Tupanaārū ore rū napora

¹⁶ Rū taxucēma naxcēx chaxāne i ngēma ore i mexū. Erū ngēma ore rū napora, rū ngēmamaā nixī i napuracūxū ya Tupana na guxāma ya yixema Cristuaxū yaxōgūxe rū tūxū nangēmaxūcēx i maxū i taguma gūxū. Rū ngēma maxū, rū Yudiūgūcēxirachirēx nixī, natūrū i űuxma rū guxūma i ngēma tama Yudiūgū ixīgūxūcēx rū ta nixī. ¹⁷ Rū ngēma norū orewa nixī i tamaā nūxū yaxuxū ya Tupana na tōrū ōgaguxicatama yīxū na napēxewa imexū. Erū norū ore i űmatūxūwa rū űnanagūrū:

“Rū yīxema tūmaārū ōgagu Tupanapēxewa mexē, rū tá tūxū nangēxma i maxū i taguma gūxū”,
 űnanagūrū.

Nagagutama nixī i duūxūgū inapoxcuexū

¹⁸ Rū nūxū tadaugū na Tupana daxūgūxū i naānewa ne namuxū i norū poxcu i ācūmaxū naxcēx i guxūma i ngēma duūxūgū i tama naga īnūēxū rū chixexū űgūxū rū ngēma norū chixexūmaā togūaxū naguxchaxēēgūxū na tama nūxū nacūēgūxūcēx i ngēma ore i aixcūma ixīxū. ¹⁹ Rū ngēma duūxūgū i chixexū űgūxū rū meā nūxū nacūēgūchirēx na űuxācū yīxū ya Tupana yerū nūmatama ga Tupana rū marū nūxū nūxū nadauxēē ga yema. ²⁰ Rū woo tama nūxū idaugūga ya Tupana, natūrū guxūma i űacū i naxūxūwa nixī i nūxū idaugūxū. Rū yexguma noxri naāne naxūxgumama nixī ga meāma duūxūgūxū nūxū nadauxēēxū na aixcūma Tupana na yīxū rū guxūguma na naporaxū. Rū ngēmacēx i ngēma duūxūgū i chixexū űgūxū, rū taxucūrūwama űacūmaā nūgū inapoxūgū i Tupanapēxewa. ²¹ Yerū woo nūxū nacūēgūchirēx na űuxācū yīxū ga Tupana, natūrū tama nanayauxgūchaū na norū Tupana yīxūcēx, rū bai na moxē nūxna naxāgūxū. Natūrū yema ore ga taxuwama mexūguama narūxīnūē, rū yemaācū naēchitamare namaxē rū yexeraācū chixexūgu narūxīnūē. ²²⁻²³ Rū nūgū yaxugūegu rū duūxūgū i nūxū icuáxū nixīgū natūrū taxuguma narūxīnūē. Yerū nūxna nixīgachitanū ga Tanatū ya Tupana ya mexēchicū ya taguma yucū, na nawe naxīxūcēx ga norū naxchicūnēxāgūmare ga duūxūgū i yuxwēxēxūchicūnēxāmare ixīgūxū rū werīgūchicūnēxāmare ixīgūxū rū naēxūgūchicūnēxāmare ixīgūxū rū āxtapegūchicūnēxāmare ixīgūxū. ²⁴ Rū yemacēx ga Tupana rū dūxwa yemawa nanawogū ga yema duūxūgū na naxūgūāxūcēx ga guxūma ga yema chixexū ga nūxū ngūchaūgūxū rū nūgūmaā na naxūgūāxūcēx ga naxūneārū ngūchaūgū i āne tūxna āxū. ²⁵ Rū yemaācū nūxna nixīgachi ga guma aixcūmaxūchi Tupana ixīcū na nawe naxīxūcēx ga norū tupanagū ga tama aixcūma ixīgūxū. Rū yema Tupana űxūpēxewa nayumūēgū rū yemaxū nicūēxūūgū, natūrū tama nūxū nicūēxūūgū ga Tanatū ya Tupana ga naxūcū rū inaxwēxecū na guxūguma nūxū icūēxūūgūxū. Rū ngēmaācū yixī. ²⁶ Rū yemacēx ga Tupana rū dūxwa

yemawa nanawogü ga yema duüxügü na naxügüäxücèx ga naxüñeärü ngüchaü i äne tuxna äxü. Rü èixrüü ga ngexügü rü naxrüü ngexügümaätama nangëäëgü rü tama yatügümaä. ²⁷ Rü yexgumarüü ta ga yatügü rü naxrüü yatüxümaätama nangëäëgü, rü tama ngexügümaä. Rü yema naxüñeärü ngüchaü ga chixexügü rü nüxü napora na naxrüü yatüxümaä namaxëxü. Rü yemaäcü ga yema yatügü rü nügümaä nanaxügü ga yema naxüñeärü ngüchaü i äne tuxna äxü, rü düxwa yemagagu nidaawee rü naturaxünegü. ²⁸ Rü yema na tama Tupanaxü nacüëxgüchaüxü, rü yemacèx ga nüma ga Tupana rü düxwa yemawa nanawogü ga yema duüxügü na norü chixexügü na naxüñeächaxücèx rü na naxügüäxücèx ga yema chixexü. ²⁹ Rü düxwa ga yema duüxügü rü guxüraüxü ga chixexü naxügü ga Tupanapëxewa. Rü tama aixcüma meä naxmëxmaä rü natemaä namaxë. Rü naxaü rü nügünaxücatama nananugüchaü i guxüma i tacü. Rü toguäxü nachixexëëgüchaü. Rü nixäüxächiwëxegü, rü namáëtagü, rü nanuwëxë, rü nawomüxëëwëxegü, rü naxüñeärü ngüchaü nüxü napora, rü naxoregütëëxgü. ³⁰ Rü chixexümaä toguäxü nixugüe, rü Tupanachi naxaie, rü toguäxmaä naguxchigagü. Rü nügüga naxüñeëgu rü togüarü yexera nixügü, rü nügü nicuëxüügü. Rü naxcèx nadaugü na yexera chixexü naxügüxü. Rü tama nanatüga rü naëga naxüñeächaü. ³¹ Rü tama inarüxüñeächaü. Rü tama aixcüma nayanguxëë i ngëma nüxü yaxugüxü. Rü taxüxüma nangechaügü. Rü tama togüaxü nüxü nangechaü i tacü rü guxchaxü. Rü tama toguäx nüxü tangechaütümügü. ³² Rü nümagü i ngëma duüxügü rü meäma nüxü nacüëxgüchirëx rü Tupana rü marü namaä nanaxuegu na noxtacüma nayuxü i ngëma duüx-ügü i ngëmaäcü maxëxü. Natürü woo meäma nüxü nacüëxgüchirëx i guxüma i ngëma, natürü nanaxügüama i ngëma chixexü, rü nataäëgu ega togü naxüxgu.

2

Ngëxguma Tupana duüxügüxü poxcugu, rü tama chixexü naxü, erü ngëma duüxügü rü norü chixexügagutama nanapoxcue

¹ Rü ngëmacèx, Pa Duüxüx, rü woo texé quixügu rü taxuacüma Tupanapëxewa cugëtüwa cuchogü, ega togüxü quixuechagu. Erü ngëxguma togüxü quixuechagu na nachixexü rü cugütama cupoxcu, erü cuma na cumücüxü quixuechaxü rü cuma rü ta cunaxü i ngëma chixexü i cumücüxü naxcèx quixuechaxü. ² Rü nüxü tacuèx rü Tupana tá nanapoxcue i ngëma duüxügü i namücügüxü ixugüechaxü. Rü ngëxguma napoxcueägu, rü tama chixexü naxü ya Tupana, erü ngëma duüxügü rü norü chixexügagutama nixü i napoxcueäxü. ³ Rü dücax, Pa Duüxüx, rü ngëxguma togüxü quixuechagu, natürü cuma rü ta cunaxüxgu i ngëmatama chixexü i nüma naxüxü, ¿rü ñuxücürüwa tá i nagu curüxüñüxü na Tupanachaxwa iquicüxü na tama cuxü napoxcuxücèx? ⁴ ¿Rü tüxcüü tama nagu curüxüñü i ngëma mexü i Tupana cuxcèx üxü? Nüma rü poraäcüxüchi cumaä namecüma rü yaxna cumaä naxüñü rü tama paxa curü chixexücèx cuxü napoxcuchaü. ¿Rü ñuxma rü tüxcüü nüxü cuxo? ¿Tama ëxna nüxü cucuèx na Tupana ngëmaäcü cumaä mecümaxü na nüxü curüxoxücèx i curü chixexü rü naxcèx na cumaxüxücèx ya Tupana? ⁵ Natürü cuma rü tama Tupanaxü cucuäxchaü rü tama nüxü curüxoxchaü i curü chixexü. Rü ngëmaäcü cugüçextama cunayexeraxëë i curü poxcu i tá cuyaxuxü i ngëma ngunexü i nagu Tupana napoxcuexü i ngëma chixexü ügüxü. Rü ngëma ngunexügu rü Tupana tá aixcüma ngëma

duŭxŭgŭmaā nanaxuegu na űuxācŭ tá na napoxcueāxŭ. ⁶ Rŭ ngēxguma tá nixŭ i Tupana nŭxŭ yaxŭgŭtanŭxŭ i wŭxichigŭ i duŭxŭ naxcēx i ngēma naxŭgŭxŭ. ⁷ Rŭ maxŭ i taguma gŭxŭmaā Tupana tá tŭxŭ nanaxŭtanŭ ya yŭxema guxŭguma mexŭ taxŭgŭācŭma naxcēx daugŭxe na Tupana tŭmamaā taāēxŭ rŭ naxcēx daugŭxe na aixcŭma Tupanaxŭtawa tangugŭxŭ. ⁸ Natŭrŭ Tupana tá tŭmamaā nanu rŭ tá tŭxŭ napoxcu ya yŭxema tŭgŭgŭxicatama rŭxŭnŭēxē rŭ tama naga űnŭēchaŭxē i ore i aixcŭma ixŭxŭ rŭ naxcēx daugŭxe na ngēma chixexŭ taxŭgŭxŭ. ⁹ Rŭ guxŭma i ngēma duŭxŭgŭ i chixexŭ ŭgŭxŭ rŭ tá ngŭxŭ ningegŭ rŭ poraācŭ tá chixexŭ nŭxŭ naxŭpetŭ. Rŭ ngēma Yudiŭgŭ i chixexŭ ŭgŭxŭxŭira tá nixŭ i Tupana inapoxcuexŭ. Rŭ ngēmawena rŭ tá nanapoxcue i guxŭma i ngēma togŭ i duŭxŭgŭ i chixexŭ ŭgŭxŭ. ¹⁰ Natŭrŭ ngēma duŭxŭgŭ i mexŭ ŭgŭxŭ, rŭ Tupana tá namaā nataāē, rŭ tá nanatachigaxēē, rŭ tá nanataāēxēē. Rŭ ngēma Yudiŭgŭ i mexŭ ŭgŭxŭcēxira tá nixŭ i ngēma. Rŭ ngēxgumarŭŭ i guxŭma i togŭ i duŭxŭgŭ i mexŭ ŭgŭxŭcēx rŭ tá ta nixŭ. ¹¹ Erŭ Tupanapēxewa rŭ nawŭxigu i ngēma duŭxŭgŭ i Yudiŭgŭ ixŭgŭxŭ rŭ ngēma togŭ i duŭxŭgŭ i tama Yudiŭgŭ ixŭgŭxŭ. Rŭ guxŭma ya texē ya chixexŭ ŭgŭxe rŭ tá tanayaxu i tŭmaārŭ poxcu, natŭrŭ guxŭma ya texē ya mexŭ ŭgŭxe rŭ tá Tupana tŭmamaā nataāē. ¹² Rŭ guxŭma i duŭxŭgŭ i pecadu ŭgŭxŭ i tama nŭxŭ cuēxŭgŭxŭ i ngēma mugŭ ga Moŭché ŭmatŭxŭ, rŭ tá inayarŭtauxe. Rŭ ngēxgumarŭŭ ta i guxŭma i ngēma pecaduāxgŭxŭ i nŭxŭ cuēxŭgŭxŭ i ngēma mugŭ ga Moŭché ŭmatŭxŭ, rŭ ngēma mugŭ nŭxŭ ixuxŭācŭma Tupana tá nanapoxcue. ¹³ Erŭ Tupanapēxewa rŭ taxuwama name i ngēma duŭxŭgŭ i nŭxŭ űnŭēmarexŭ natŭrŭ tama nagu maxēxŭ i norŭ mugŭ. Natŭrŭ ngēma duŭxŭgŭ i Tupanaārŭ mugŭga űnŭēxŭ nixŭ i aixcŭma Tupanapēxewa imexŭ. ¹⁴ Dŭcēx, i ngēma duŭxŭgŭ i tama Yudiŭgŭ ixŭgŭxŭ. Nŭmagŭ rŭ tama nŭxŭ nacuēxŭ i Tupanaārŭ mugŭ. Natŭrŭ ngēxguma nŭēchamatama naxŭgŭmareāgu i ngēma Tupana tŭxŭ muxŭ, rŭ tŭxŭ nŭxŭ nadauxēē na nŭxŭ nacuēxŭgŭxŭ i űacŭ na yŭxŭ i mexŭ rŭ űacŭ na yŭxŭ i chixexŭ, woo tama nŭxŭ na nacuēxŭchirēxŭ i Tupanaārŭ mugŭ. ¹⁵ Erŭ nacŭmagŭwatama nixŭ i tŭxŭ nŭxŭ nadauxēēxŭ na nŭxŭ nacuēxŭgŭxŭ na űacŭ yŭxŭ i mexŭ rŭ űacŭ na yŭxŭ i chixexŭ. Rŭ ngēma duŭxŭgŭ rŭ ngēxguma chixexŭ naxŭgŭgu, rŭ naāēwatama nixŭ i nŭxŭ nacuēxŭgŭxŭ na nachixexŭ i ngēma naxŭgŭxŭ. Rŭ ngēxgumarŭŭ ta i ngēxguma mexŭ naxŭgŭgu, rŭ naāēwatama nixŭ i nŭxŭ nacuēxŭgŭxŭ na namexŭ i ngēma naxŭgŭxŭ. ¹⁶ Rŭ ngēma ngunexŭ i nagu Tupana Cristuxŭ namuxŭ na guxŭ i duŭxŭgŭxŭ yacagŭxŭcēx i norŭ maxŭchiga, rŭ ngēma duŭxŭgŭ i tama Tupanaārŭ mugŭxŭ cuēxŭgŭxŭ rŭ naāēwa tátama nixŭ i nŭxŭ nacuēxŭgŭxŭ na chixexŭ naxŭgŭxŭ rŭ ēxna mexŭ naxŭgŭxŭ. Rŭ ngēxguma tá nixŭ i nangōxŭ i guxŭma i ngēma chixexŭ i cŭācŭma naxŭgŭxŭ i duŭxŭgŭ, rŭ ngēma chixexŭ i nŭxŭcatama nagu naxŭnŭēxŭ. Rŭ Tupanaārŭ ore i pemaā nŭxŭ chixuxŭ nixŭ i tŭxŭ nŭxŭ cuēxēēxŭ i ngēma.

Yudiŭgŭchiga rŭ mugŭ ga Moŭché ŭmatŭxŭchiga

¹⁷ Natŭrŭ pema Pa Chaueneēgŭ i Yudiŭgŭ, rŭ űaperŭgŭgŭ:

“Toma rŭ Yudiŭgŭ tixŭgŭ rŭ meāma nŭxŭ tacuēx i Tupanaārŭ mugŭ ga Moŭché ŭmatŭxŭ”, űaperŭgŭgŭ. Rŭ ngēmaācŭ nagu perŭxŭnŭē na Tupanapēxewa pimexŭ erŭ meāma nŭxŭ pecuēx i ngēma Tupanaārŭ mugŭ ga Moŭché ŭmatŭxŭ. Rŭ ngēmaācŭ Tupanamaā pegŭ picuēxŭŭgŭ erŭ nagu perŭxŭnŭē na Tupana pexŭ nangechaŭxŭ erŭ Yudiŭgŭ pixŭgŭ. ¹⁸ Rŭ nŭxŭ pixu na meāma nŭxŭ pecuāxŭ i űacŭ nixŭ i Tupanaārŭ ngŭchaŭ rŭ űacŭ nixŭ

i mexŭ rŭ Ƨacŭ nixŭ i chixexŭ. Rŭ Tupanaārŭ mugŭwa naxcèx pengŭe na naxcèx pedauxŭ i ngēma aixcŭma mexŭ ixŭxŭ. ¹⁹ Rŭ pema rŭ ñaperŭgŭgŭ:

“Toma rŭ meāma nŭxŭ tacuèx na tanaxucuxèxŭ i ngēma togŭ i duŭxŭgŭ i tama Tupanaxŭ cuèxgŭxŭ. Rŭ meāma nŭxŭ tacuèx na itayanawèxächixèèxŭ i ngēma togŭ i chixexŭwa ngēxmagŭxŭ”, ñaperŭgŭgŭ. ²⁰ Rŭ pema nagu perŭxŭnŭègu rŭ nŭxŭ pecuèx na ñuxácŭ penaxucuxèxŭ i ngēma togŭ i duŭxŭgŭ i tama Tupanaxŭ cuèxgŭxŭ rŭ ñuxácŭ penangŭexèèxŭ i ngēma duŭxŭgŭ i ngexwacèx yaxògŭxŭ. Rŭ ngēmaācŭ nagu perŭxŭnŭè na togŭarŭ ucuxèruŭgŭ pixŭgŭxŭ, erŭ Tupanaārŭ mugŭwa pengŭe rŭ ngēmacèx meāma nŭxŭ pecuèx i Ƨacŭ nixŭ i mexŭ rŭ Ƨacŭ nixŭ i ore i aixcŭma ixŭxŭ. ²¹ Rŭ dŭcax, Pa Chaueneègŭ i Yudŭgŭx, pema na togŭxŭ pengŭexèèxŭ, Ƨrŭ tŭxcŭtŭ tama pegŭtama pengŭexèè? Pema nŭxŭ pixu na tama namexŭ na ingŭxŭ, Ƨrŭ tŭxcŭtŭ i pema ipengŭèxŭ? ²² Rŭ pema nŭxŭ pixu na tama namexŭ na naŭ i ngēmaā ipexŭ, Ƨrŭ tŭxcŭtŭ i pema i ngēmaācŭ pemaxèxŭ? Rŭ pema na naxchi pexaixŭ i togŭarŭ tupanagŭnetachicŭnèxāgŭ, Ƨrŭ tŭxcŭtŭ i naxcèx pengŭèxŭ i norŭ tupaucagŭarŭ ngēmaxŭgŭ? ²³ Pema nŭxŭ pixu na namexŭ i Tupanaārŭ mugŭ i ũmatŭxŭ, rŭ petaāè erŭ meā nŭxŭ pecuèxgŭ i ngēma mugŭ. Natŭrŭ Tupanamaā chixexŭ pexŭe, erŭ tama naga pexŭnŭè i ngēma pexŭ namuxŭ i norŭ mugŭwa. ²⁴ Rŭ ngēmacèx i Tupanaārŭ ore i ũmatŭxŭwa rŭ ñanagŭrŭ: “Rŭ pegagu nixŭ na chixri Tupanachiga yadexagŭxŭ i ngēma duŭxŭgŭ i tama Yudŭgŭ ixŭgŭxŭ”,

ñanagŭrŭ. ²⁵ Pema rŭ pegŭ ipewiechèxmŭpèxechiraŭgŭ na Tupanaārŭ duŭxŭgŭ pixŭgŭxŭcèx. Rŭ name nixŭ na penaxŭxŭ i ngēma, ega aixcŭma naga pexŭnŭègu i Tupanaārŭ mugŭ. Natŭrŭ ngèxguma chi tama naga pexŭnŭègu i Tupanaārŭ mugŭ, rŭ woo Yudŭgŭ pixŭgŭgŭ, natŭrŭ Tupanapèxewa rŭ taxuwama pexŭ name i ngēma na pegŭ ipewiechèxmŭpèxechiraŭgŭxŭ. ²⁶ Rŭ ngēma togŭ i duŭxŭgŭ i tama nŭgŭ iwiechèxmŭpèxechiraŭgŭxŭ, rŭ woo tama ngēma naxŭgŭgu, natŭrŭ Tupanaārŭ duŭxŭgŭ tá nixŭgŭ ega naga naxŭnŭègu i norŭ mugŭ. ²⁷ Rŭ dŭcax, Pa Chaueneègŭ i Yudŭgŭx, rŭ ngēma duŭxŭgŭ i tama iwiechèxmŭpèxechiraŭgŭxŭ natŭrŭ naga inŭèxŭ i Tupanaārŭ mugŭ, rŭ ngēma duŭxŭ rŭ tá Tupana-pèxewa pexŭ nixu na ñuxácŭ pechixexŭ. Rŭ ngēmaācŭ tá pexŭ naxŭpetŭ erŭ tama naga pexŭnŭè i Tupanaārŭ mugŭ i woohirèx na nŭxŭ pecuáxŭ i ngēma mugŭ, rŭ woohirèx na ipewiechèxmŭpèxechiraŭgŭxŭ. ²⁸ Rŭ dŭcax, rŭ tama ngēma na Yudŭxacŭgŭ pixŭgŭxŭcèx nixŭ na aixcŭma Tupanaxácŭgŭ pixŭgŭxŭ. Rŭ tama ngēma na ipewiechèxmŭpèxechiraŭgŭxŭcèx nixŭ na Tupanaārŭ duŭxŭgŭ pixŭgŭxŭ. ²⁹ Erŭ yixema aixcŭma tŭmaārŭ maxŭnewa Tupanaga inŭxè tixŭ ya aixcŭma Tupanaxácŭ ixŭxè. Rŭ ngèxguma aixcŭma taāèwa yaxòxgu nixŭ i aixcŭma Tupanaārŭ ixŭxŭ. Rŭ Tupanaāè i ũnèxŭ nixŭ i tŭxŭ rŭngŭxèèxŭ na yaxòxŭcèx, rŭ tama ngēma mugŭ ga Moiché ũmatŭxŭgŭgu nixŭ. Rŭ yixema aixcŭma Tupanaārŭ ixŭxè, rŭ Tupana rŭ tŭmamaā nataāè woo duŭxŭgŭ tama tŭmamaā taāègŭgu.

3

¹ ƧRŭ ñuxma rŭ Ƨacŭwa tŭxŭ namexŭ na Yudŭgŭ ixŭgŭxŭ? ƧRŭ Ƨacŭwa namexŭ na iwiechèxmŭpèxechiraŭgŭxŭ? ² Rŭ poraācŭxŭchima tŭxŭ name na Yudŭgŭ ixŭgŭxŭ. Yerŭ nŭma ga Tupana rŭ tŭxnaxŭchi nixŭ ega naxāāxŭ ga norŭ mugŭ i ũmatŭxŭ. ³ ƧRŭ Ƨacŭ tá ngupetŭxŭ i ñuxma ega ñuxre i tatanŭxŭ i Yudŭgŭ rŭ tama meā yanguxèègŭāgu i ngēma Tupana tŭxŭ muxŭ? ƧRŭ pexcèx rŭ ngēmacèx tātŭtama yanguxèèāxŭ ya Tupana i ngēma tamaā

inaxunetaxū? ⁴ Rū tama ngēmaācū nixī. Erū woo guxū i duūxūgū rū yado-ratēəxgūgu, natūrū Tupana rū taguma nidora rū guxūguma nayanguxēē i ngēma nūma tamaā inaxunetaxū. Rū yemacəx norū ore ga Dabī ūmatūxūwa rū űanagūrū:

“Cumax, Pa Tupanax, rū aixcūma nixī i curū ore i nūxū quixuxū. Rū ngēxguma cuxū tangugūgūgu rū nūxū tadaugū na aixcūma cumexū”, űanagūrū. ⁵ Natūrū duūxūgū rū ínatūe erū űanagūrūgū:

“Rū nūetama nixī na chixexū íxūgūxū erū ngēmaācū yexeraācū nangox na namecūmaxū ya Tupana”, űanagūrūgū. Rū űanagūrūgū ta:

“Rū ngēxguma chi tórū chixexūgagu yexeraācū nangoxgu na aixcūma namecūmaxū ya Tupana, rū maneca tama name ega tórū chixexūcəx tūxū napoxcuegu”, űanagūrūgū. ⁶ Natūrū ngēma űaxūgu na naxínūəxū i duūxūgū rū poraācū ínatūe, erū tama ngēmaācū nixī. Erū ngēxguma chi tama namexgu ya Tupana, ¿rū űuxācū chi i meā duūxūgūxū yacagūxū i naāneārū guxgu? ⁷ Natūrū i duūxūgū rū űanagūrūgū:

“Rū ngēxguma chi chorū chixexūgagu yexeraācū nangoxgu na űuxācū aixcūma namexū ya Tupana, ¿rū tūxcūū yīxū i choxna naçaxū naxcəx i chorū chixexū rū choxū napoxcuxū naxcəx i ngēma?” űanagūrūgū. ⁸ Natūrū ngēma űaxūgu na naxínūəxū i duūxūgū rū poraācū ínatūe. Erū ngēxguma chi aixcūma yixūgu i ngēma nagu naxínūəxū i duūxūgū, rū chi narūmemaē nixī na yexeraācū chixexū naxūgūxū na yexeraācū mexū na ínguxuchixūcəx. Rū dūcax, Pa Chaueneəgūx, nangəxma i chixexū i duūxūgū i choxū ūgagūmarexū i nūxū íxugūəxū na ngēma yīxū i chorū nguxēētae i duūxūgūxū namaā changūexēəxū. Natūrū ngēma duūxūgū i ngēma űagūxū rū nagagu tátama napoxcue.

Guxāma i yixema rū taxūetūxūgū

⁹ ¿Rū űuxācū nixī i űuxmax? ¿Pəxcəx rū yixema i Yudíugū rū togū i duūxūgūarū yexera Tupanapəxewa imexū? Pemaā nūxū chixu rū tama ngēmaācū nixī. Erū guxūma i duūxūgū i Yudíugū íxūgūxū rū guxūma i duūxūgū i tama Yudíugū íxūgūxū, rū naxūetūxūgū. ¹⁰ Erū Tupanaārū ore i ūmatūxūwa rū űanagūrū:

“Rū tataxuma ya texé ya aixcūma Tupanapəxewa mexē, rū bai ya wūxie. ¹¹ Rū tataxuma ya texé ya aixcūma nūxū cuāxe i Tupanaārū ore na űuxācū nanaxwəxəxū na naxcəx imaxəxū. Rū tataxuma ya texé ya aixcūma Tupanacəx dauxe. ¹² Rū guxāma ítatūe, rū guxāma itayarūtauxe rū chixexū taxūgū i Tupanapəxewa. Rū tataxuma ya texé ya aixcūma mexū ūeçhaxe, rū bai ya wūxie. ¹³ Rū tūmaāx rū wūxi i yuetamaxū i ingenaxūrūū nixī erū ngema ítanaxūxūxēē i nagūxūraūxū i dexa i chixexū. Rū tūmaārū conūmaā rū poraācū tidora. Rū ngēma tūmaārū dexa rū űoma āxtapeguchatarūū nixī erū togūxū naxchixexē. ¹⁴ Rū chixexū i ore i duūxūgūāēwa ngūxūmaāxīcatama tidexagū. ¹⁵ Rū ítamemare na duūxəxū timáxū. ¹⁶ Rū ngextá ítaxūxūwa rū togūxū tachixexēē rū tanangeçhaūxēē rū chixexūgu tanayixēē. ¹⁷ Rū tama nūxū tacuəx na űuxācū togū i duūxūgūxū tangeçhaūgūxū rū meā natanūwa tamaxəxū. ¹⁸ Rū tama nūxū tacuāxçhaū na Tupanaxū tamuūəxū”,

űanagūrū i ngēma ore i ūmatūxūwa. ¹⁹ Rū nūxū tacuəx rū ngema poxcu i Tupanaārū mugūwa nūxū yaxuxū rū naxcəx nixī i ngema Yudíugū ga natanūwa nanguxū ga yema mugū. Rū woo ngema tama Yudíugū íxūgūxū i duūxūgūcəx rū ta nixī i ngema poxcu. Erū taxūema aixcūma naga taxīnū

i ngēma mugū. Rū ngēmacèx taxucūrūwa texé Tupanapewa tūgū ítapoxū i ngēxguma Tupana tūxū icagūgu i tūmaārū pecaduchiga. ²⁰ Rū űuxma na taxúema aixcūma naga ĩnūèxū i ngēma mugū, rū ngēmacèx taxucūrūwama texé tūgū tixu na ngēma mugū taxaurexūgagu Tupanapēxewa tamexū. Erū ngēma mugū tūxū nūxū cuèxēèxū nixī na poraācū ipecaduāxgūxū.

Tórū ōgagu nixī i Tupana tūxna naxāxū i maxū

²¹⁻²² Rū űuxma na taxucūrūwama Tupanapēxewa tūxū yamexēèxū i ngēma mugū, rū ngēmacèx ya Tupana rū tūxū nūxū nacuèxēè na űuxācū yīxū i tūxū yamexēèxū na napēxewa imexūcèx. Rū pemaā nūxū chixu rū Ngechuchu ya Cristuaxū na yaxōgūxūgagu nixī i tūxū yamexēèxū ya Tupana na aixcūma napēxewa imexūcèx. Rū yema mugū ga Moiché ūmatūxū rū yema ore ga nūxcūmaūgūxū ga orearū uruūgū ūmatūxū rū tūxū nūxū nacuèxēè i ngēma. Rū yema mexū ga Tupana taxcèx ūxū ga yexguma nūma namuāgu ga Nane na tórū pecadu naxūtanūxūcèx, rū guxū i duūxūgū i yaxōgūxūcèx nixī, erū Tupanapēxewa rū nawūxigu i guxūma i ngēma duūxūgū. ²³ Rū guxāma tīpecaduāxgū rū nūxna tayaxūgūgu ya Tupana ya tūxū maxēxēècū. ²⁴ Natūrū ga Tupana rū poraācū tamaā namecūma rū yemacèx tūxū nangetanūācūma tūxū nimexēègū na napēxewa imexūcèx. Rū űuxma rū tūxū nangēxma i maxū i taguma gūxū, yerū Ngechuchu ya Cristu rū marū tūxū nanaxūtanū ga tórū pecadugū. ²⁵⁻²⁶ Rū Tupana rū aixcūma nūma nanamu ga Cristu na nayuxūcèx rū yemaācū tórū pecadu naxūtanūxūcèx na Tupana tūxū nūxū rūngūmaxūcèx i ngēxguma aixcūma Cristuaxū yaxōgūgu. Rū yemaācū nanaxū ga Tupana na tūxū nūxū nadauxēèxūcèx na űuxācū nūma nūgūcèx tūxū yamexēèxū na aixcūma napēxewa imexūcèx. Rū nūxcūma ga Tupana rū yaxna namaā naxīnū ga duūxūgū ga yexguma chixexū naxūegu, rū tama paxa nanapoxcue. Rū űuxma rū ta tūxū nanawēx na űuxācū aixcūma namexū i ngēma nūma naxūxū erū tūxū ĩnanapi i tórū pecadugū. Rū ngēmaācū tūxū nūxū nadauxēè na űuxma rū ta aixcūmacū yīxū i ngēxguma tūxū yaxuxgu na napēxewa marū timexū ya guxāma ya yīxema Ngechuchuaxū yaxōgūxe. ²⁷ Rū ngēmacèx i űuxma rū taxucūrūwama yīgū ticuèxūgū rū nūxū tixu na yixematama yīgū imexēègūxū i napēxewa. Erū taxucūrūwama texé tūgū tamexēè i Tupanapēxewa. Rū tama ngēma na naxaurexūcèx i ngēma mugū nixī i imexū, rū tama ngēma na mexū ixūgūxūcèx nixī i imexū. Natūrū Tupanapēxewa time i űuxma, erū Cristuaxū tayaxōgū. ²⁸ Rū yixema nūxū tacuèx rū ngēxguma Cristuaxū yaxōgūgu nixī i Tupanapēxewa imexū, rū tama ngēma mugū na ixaregūxūcèx nixī i napēxewa imexū. ²⁹ ¿Ēxna pexcèx rū Tupana rū Yudīgūarū Tupanaxīcatama yīxū? ¿Rū tama ēxna i ngēma togū i duūxūgūarū Tupana rū ta yīxū? Ngēmaācūx, ngēma togū i duūxūgū i tama Yudīgū ixīgūxūārū Tupana ta nixī. ³⁰ Rū nūxū tacuèxgū na nangēxmaxū ya wūxitama ya Tanatū ya Tupana. Rū guxūma i duūxūgū i Cristuaxū yaxōgūxū, rū nūma ya Tupana rū nayamexēè na napēxewa yamexūcèx. Rū ngēmaācū i nūma ya Tupana rū Yudīgūxū nimexēè i ngēxguma yaxōgūāgu. Rū ngēxgumarū ta nayamexēè i guxūma i togū i duūxūgū i ngēxguma Cristuaxū yaxōgūāgu. ³¹ Rū űuxma na Cristuaxū yaxōgūxū, rū bexmana nagu perūxīnūè na ngēmaācū iyanaxoxēèxū i ngēma mugū. Natūrū tama ngēmaācū nixī. Erū űuxma na Cristuaxū yaxōgūxū rū aixcūma tayanguxēè i ngēma Tupana tūxū muxū.

4

Abrául rü Tupanaãxıl nayaxō rü yemacèx Tupana nüxıl nixu na namexıl

¹ ¿Rü ñuxma rü ñuxıl ñagıxıl tá i nachiga ga nuxcúmaılcü ga tórü oxı ga Abrául? ¿Rü ñuxácü nixı ga nüxıl naxıpetüxıl ga Tupanapèxewa? ¿Rü tüxcüıl yııxıl ga Tupana nüxıl ixuxıl ga Abrául rü mecü na yııxıl? ²⁻³ Rü dücax, yexguma chi wüxi ga norü puracü ga mexúcèx Tupanapèxewa namexgu ga Abrául, rü yexguma chi waxı nixı ga nüxıl nayexmaxıl ga tacücèx nügü na yacuèxüxıl. Natürü taxucèxma Tupanapèxewa nügü nicuèxüıl ga Abrául, erü Tupanaärü ore i ümatüxıtwa rü ñanagürü:

“Abrául rü Tupanaãxıl nayaxō, rü yemacèx Tupana nanayaxu rü nüxıl nixu na namexıl”,

ñanagürü i ngèma ore. ⁴ Rü ngèxguma texé wüxi i puracü üxgu rü tüxıl naxıtanügu rü woetama tümaärü natanü nixı rü tama ãmare nixı i ngèma.

⁵ Natürü tama ngèmaäcü nixı i ngèxguma Tupanaãxıl yaxōxgu. Erü ngèxguma yaxōxgu, rü tama tacü rü puracü i mexúcèx nixı i Tupanapèxewa imexıl, natürü Tupanapèxewa time erü tayaxō. Rü ngèmaäcü Tupana tüxıl nayaxu ya yıxema yaxōxè woo taxuıma i tacü rü puracü i mexıl taxıxgu na ngèmacèx Tupana tüxıl rüngılxèxıl. ⁶ Rü nuxcúmaılcü ga äëxgacü ga Dabı rü ta tümachiga nidexa ga guxema duıxè ga yaxōxè. Rü nüxıl nixu ga na tataäèxıl ga guxema duıxè yerü Tupanapèxewa tame, woo tama tacü rü mexıl taxıxgu na yemaäcü Tupanapèxewa tamexúcèx. ⁷ Rü nüma ga Dabı rü ñanagürü:

“Rü tataäègü ya yıxema duıxègü ya Tupana tümaärü chixexügüxıl ngechaıxè rü tümaärü pecadugüxıl iyanangümaxè. ⁸ Rü tataäè ya yıxema duıxè ya Tupana tama tüxıl nagu naxınüxè i tümaärü pecadu”,

ñanagürü ga Dabı. ⁹ Rü dücax, ¿pexcèx rü ngèma taäè rü ngèma duıxügü i Yudıügü ixıgüxcıcatama yııxıl, rü èxna ngèma togü i duıxügücèx ta yııxıl? Dücèx, rü marü pemaã nüxıl tixu rü Tupanapèxewa name ga Abrául yerü nayaxō. Rü yemacèx Tupana nanayaxu. ¹⁰ ¿Natürü ñuxgu nixı ga

nayauxãxıl? ¿Èxna marü ínawiechèxmüpèxechıraıguwena, rü èxna naxıpa ga na ínawiechèxmüpèxechıraıxıl? Rü pemaã nüxıl chixu rü naxıpa nixı ga na Tupana nayaxuxıl ga Abrául. ¹¹ Rü Tupana nayaxuxguwena nixı ga ínawiechèxmüpèxechıraıxıl ga Abrául. Rü yema nixı ga norü cuèxruıl ga nawa nüxıl nacuáxıl na aixcúma Tupana marü nayaxuxıl rü nüxıl nadauxıl na namexıl yerü nüxıl nayaxō. Rü ngèmacèx i ñuxma ya Abrául rü tümanatü yııxıl ya guxãma ya yıxema yaxōgüxe woo tama ítawiechèxmüpèxechıraıgügu. Rü ngèmaäcü ya Tupana rü tüxıl nayaxu ya guxãma ya yıxema yaxōgüxe, rü tüxıl nadau na timexıl erü tayaxōgü. ¹² Rü ngèxgumarüıl ta ya Abrául rü tümanatü nixı ya guxãma ya yıxema ítawiechèxmüpèxechıraıgüxe rü Abráulrüıl yaxōgüxe.

Natürü tama ngèma na tügü ítawiechèxmüpèxechıraıgüxcèx nixı i tümanatü yııxıl. Natürü tümanatü nixı erü tayaxōgü yexgumarüıl ga na yaxōxıl ga nüma ga tanatü ga Abrául naxıpa ga na ínawiechèxmüpèxechıraıxıl.

Abrául rü Tupanaãxıl nayaxō rü yemacèx Tupana nayanguxèè ga norü uneta ga Abráulmaã nüxıl yaxuxıl

¹³ Rü Tupana rü Abráulmaã inaxuneta na nüma ya Abrául rü guxıma i naxrııl yaxōgüxıl rü tá na nayauxgüãxıl i ñoma i naãne na noxrü yııxcèx. Natürü tama yema na mugü naxaurexúcèx nixı ga Tupana yemaäcü Abráulmaã ixunetaxıl. Natürü yemaäcü namaã inaxuneta yerü Abrául

nayaxō, rü yemacèx Tupanapèxewa name. ¹⁴ Natürü ngēxguma chi ngēma duñxūgü i mugü auregüxcèxicatama yixīgu i ngēma Tupanaärü uneta, rü natücèxmamare chi nixī i ngēma na yaxōgüxū, rü chi ngēma Tupanaärü uneta rü taxuwama name. ¹⁵ Nüxū tacuèx rü ngēma mugü ga Moïché ümatüxū rü poxwama tüxū naga erü taxüema aixcüma meã tayanguxēē. Natürü yexguma chi natauxguma ga yema mugü rü tataxu chima na texé chixri yanguxēxū. ¹⁶ Rü yexguma Tupana Abráümaã ixunetagu na nüxū tá nangüxēēxū, rü Abráüärü ògagu nixī ga namaã inaxunetaxū. Rü ngēmacèx i guxāma i yixema na Abráürüü yaxōgüxū rü taxcèx ta nixī ga yema Tupanaärü uneta ga Abráümaã nüxū yaxuxū. Rü ngēmawa nüxū tacuèx rü tama yixema mugü auregüxcèxicatama nixī i ngēma Tupanaärü uneta, natürü guxāma ya yixema Abráürüü Tupanaäxū yaxōgüxcèx ta nixī. Rü ñuxma rü guxāma i yixema na Abráürüü meã yaxōgüxū rü Abráüxácügu tixīgu rü nüma rü tanatü nixī i Tupanapèxewa yerü nüxīra nayaxō. ¹⁷ Rü Tupanaärü ore i ümatüxūwa rü Abráüchigaxū nixu rü ñanagürü:

“Rü muxūma i duñxūgünatü tá cuxū chixīxēē”,
ñanagürü. Rü Abráü rü Tupanaäxū nayaxō, rü yemacèx Tupana nayanguxēē ga norü uneta ga namaã nüxū yaxuxū. Rü yima Tupana nixī ya wena namaxēxēēcü i yuexū. Rü yimafama nixī ya naxücü i ngēma woo ñuxma taxuxū. ¹⁸ Rü nüma ga Abráü rü aixcüma nayaxō ga yexguma Tupana nüxū ñaxgu:

“Rü tá namuxūchi i cutaagü”,
ñaxgu. Rü woo ga Abráü ga marü yaguãxūchichirèx na yīxū rü na nangex-acüxū, natürü nayaxōōma ga yema Tupanaärü uneta rü meã ñnananguxēē na wüxi ga nane tá nüxū yexmaxū. Rü yemaäcü ningu na muxūma i duñxūgünatü yīxū, yema Tupana namaã nüxū ixuxürüü. ¹⁹ Rü Abráü rü wixguxuchi 100 ga taunecü nüxū nayexma ga yexguma. Natürü tama inayarümaächi ga na yaxōōxū woo nüxū na nacuáxū ga paxa tá na nayuexū ga nüma rü namèx ga Chara rü marü poraäcü nangupetüarü taunecüãxgüxū ga na naxãxácügüxcèx. ²⁰ Rü yemaäcü ga Abráü rü nayaxōōma na nüxū tá nayexmaxū ga wüxi ga nane yema Tupana namaã ixunetaxürüü. Rü tama nagu narüxīnū na Tupana ngürüächi nawomüxēēxū. Natürü yexeraäcü Tupanaäxū nayaxōōma, rü nüxū nicuèxüü. ²¹ Rü aixcümaxūchi nayaxō na naporaxū ya Tupana na yanguxēēãxūcèx i guxūma i ngēma norü uneta. ²² Rü yemacèx ga Tupana rü nüxū nixu na napèxewa namexū ga Abráü. Yerü Tupana nüxū nadau ga ñuxäcü aixcüma nüxū na yaxōōxū. ²³ Rü tama Abráüchigaxicatama nixī ga naxümatüxū ga Tupanaärü ore ga ñaxū:

“Rü Tupana rü nüxū nixu na napèxewa namexū ga Abráü, yerü nüxū nadau ga ñuxäcü aixcüma nüxū na yaxōōxū”,

ñaxū. ²⁴ Natürü guxāma i yixema na yaxōgüxūchiga ta nixī i ngēma ore. Erü Tupana rü tórü ògagu tüxū nade na napèxewa imexü i yixema i nüxū na yaxōgüxū ya yima yuwa tórü Cori ya Ngechuchuxū írüdaxēēcü. ²⁵ Rü Ngechuchuxū nixī ga namuxū ga Tupana na tórü pecaducèx nayuxütcèx. Rü ñuxūchi nüma ga Tupana rü wenaxärü Ngechuchuxū ñarüdaxēē na nagagu imexütcèx i Tupanapèxewa.

5

¹ Rū ñuxma rū Tupanapēxewa time erū tayaxōgū. Rū ngēmacèx marū tama Tupanamaā taxuwanūāxgū i ñuxmax, erū tórū Cori ya Ngechuchu ya Cristu rū marū tamaā nanangūxmūxēē ya Tupana. ² Rū Cristugagu nixī na tamaā namecūmaxū ya Tupana i ñuxmax erū tayaxōgū. Rū nūxū tacuèx rū guxūgutāma tamaā namecūma. Rū tataāēgū erū nūxū tacuèx na tūxū tá nangēxmaxū i tachica i mexū i Tupanaxūtawa. ³ Rū ngēxgumarūū ta tataāēgū i woo ngūxū ingegūgu. Erū nūxū tacuèx rū ngēma ngūxū rū tūxū narūngūxēē na yexeraācū iporaexū rū yaxna namaā ixīnūēxūcèx. ⁴ Rū ngēxguma yaxna namaā ixīnūēgu rū Tupana rū tamaā nataāē. Rū ngēma na tamaā nataāēxū rū ngēmacèx meā itananguxēē na tūxū tá nangēxmaxū i tachica i mexū i Tupanaxūtawa. ⁵ Rū ñuxma na ínanguxēēxū na tūxū tá nangēxmaxū i tachica i Tupanaxūtawa, rū ngēmacèx taxucēxma tangechaūgū. Erū Tupana rū poraācū tūxū nangechaū. Rū ngēma Naāē i Ūñexū i tūxna namuxū nixī i tūxū nūxū cuèxēēxū i ngēma. ⁶ Rū yexguma taxucūrwama yigūtama imaxēxēēgu, rū nawa nangu na Tupana yanguxēēxū ga yema norū uneta. Rū yexguma nixī ga ñoma ga naānēwa namūāxū ga Cristu na pecaduāxgūxūcèx nayuxūcèx. ⁷ Rū tama natauxcha na wūxie rū to i duūxūcèx tayuxū, woo wūxi i duūxū i mexūcèx yixīgu. Rū woo tangēxmagu ya texé ya naxcèx yuchaūchirēxe i wūxi i duūxū i aixcūma mexēchixū, natūrū tama tūxū natauxcha i ngēma. ⁸ Natūrū Tupana tūxū nūxū nadauxēē na ñuxācū tūxū nangechaūxū yerū yexguma ipecaduāxgūgu nixī ga taxcèx nayuxū ga Cristu. ⁹ Rū ñuxma rū Tupanapewa time yerū taxcèx nayu ga Cristu. Rū ngēmacèx meāma nūxū tacuèx rū nūma rū aixcūma tá tūxū ínanguxūxēē na tama tūxū napoxcuexūcèx ya Tupana. ¹⁰ Rū yexguma norū uwanūgū ixīgūgu, rū nūmatama ga Tupana rū nūgūmaā tūxū narūngūxmūxēē ga yexguma nayuxgu ga Nane. Rū ñuxma na marū namaā irūngūxmūxēē, rū yexeraācū nūxū tacuèx na tūxū nangēxmaxū i maxū i taguma gūxū nagagu na namaxūxū i nūmax. ¹¹ Rū tama ngēxīcatama nixī. Natūrū i ñuxma rū tórū Cori ya Ngechuchu ya Cristugagu rū Tupanamaā tataāēgū, yerū Cristugagu nixī ga Tupana ga tamaā nangūxmūxū.

Adáūchiga rū Cristuchiga

¹² Rū nūxiraxūcū ga yatū ga Adáūgagu nixī ga guxūma ga duūxūgūwa nanguxū ga pecadu. Rū pecadugagu ínangu i yu. Rū yemaācū guxūma ga duūxūgūwa naxūe na nayuxū, yerū guxūma nipecauāx. ¹³ Rū naxūpa na Tupana Moīchéna naxāxū ga yema mugū ga naxūmatūxū, rū duūxūgū rū chixexū naxūgūeche, rū yemacèx nayue. Natūrū yema mugū rū tauta nayexma ga yexguma, rū yemacèx taxucūrwama texé nūxū tixu ga yema duūxūgū ga na chixri naga naxīnūēxū ga yema mugū. ¹⁴ Rū yema duūxūgū ga Adáūwena buexū rū tama Adáūrūū nanangōx ga yema orīx ga Tupana nūxna chuxuxū. Natūrū chixexū naxūgū, rū yemacèx nayue. Rū yemaācū nixī ñuxmata Tupana Moīchéna naxā ga yema mugū ga naxūmatūxū. Rū Adáūwa inaxūgū na nayuxū ga duūxūgū, natūrū Cristuwa inaxūgū na nayuxū i maxū i taguma gūxū. ¹⁵ Natūrū yema chixexū ga Adáū ūxū rū taxuacū nagu tanangu i ngēma āmare ga Tupana tūxna āxū, erū tama namaā nawūxigu. Rū aixcūma nixī ga wūxi ga yatūarū chixexūgagu na nayuxū i guxūma i duūxūgū. Natūrū tama yemaācū tamaā nanaxū ga Tupana. Yerū nūma rū tūxū nangetanūācūma nūma nanamu ga Nane ya Ngechuchu ya Cristu na tórū pecaducèx nayuxūcèx. Rū yemaācū guma Cristugagu Tupana nanamaxēxēē i muxūma i duūxūgū. ¹⁶ Rū yema pecadu ga Adáū ūxū rū taxuacūma nagu tanangu ga yema āmare ga Tupana tūxna āxū. Yerū wūxitama

ga Adáũrũ pecadugagu, rũ Tupana nũxũ nixu rũ tá nayu naxcèx ga yema. Natürũ Ngechuchu ya Cristugagu rũ Tupana nũxũ nixu na napèxewa imexũ rũ nüxna ìnguxũxũ i guxũma i tórũ pecadugũ. ¹⁷ Rũ guxũma i duũxũgũ nayue yerũ wũxitama ga yatũ ga Adáũ rũ pecadu naxũ. Natürũ tama yemaãcũ tamaã nanaxũ ga Tupana, yerũ ga nüma rũ poraãcũ tamaã namecũma rũ tũxũ nangetanũãcũma tũxũ narũngũxèẽ. Rũ ngẽmacèx i ñuxma rũ guxũma i ngẽma duũxũgũ i Tupana nũxũ ixuxũ na napèxewa yamexũ, rũ nümatama ya Tupana rũ Nane ya Ngechuchu ya Cristugagu nanamaxèxèẽ na namaã wũxigu ãẽxgacũgũ yixĩgũxũcèx. ¹⁸ Rũ yema Adáũrũ chixexũ rũ poxcuwa nanagagũ ga guxũma ga duũxũgũ. Natürũ yema mexũ ga Ngechuchu ya Cristu ùxũ rũ pecaduwa ìnananguxũxèẽ i guxũma i duũxũgũ i yaxõgũxũ, rũ nüxna nanaxã i maxũ i taguma gũxũ. ¹⁹ Rũ guma nüxĩraũcũ ga yatũ ga Adáũ rũ tama Tupanaga naxĩnũ. Rũ yemaãcũ wũxitama ga yatũgagu rũ muxũma ga duũxũgũ rũ nipecaduãx. Natürũ ìnangu ga guma yatũ ga Ngechuchu, rũ meã Tupanaga naxĩnũ. Rũ gumagagu rũ muxũma i duũxũgũ rũ tá nime i Tupanapèxewa. ²⁰ Rũ Tupana rũ Moĩchéna nanaxã ga norũ mugũ na duũxũgũxũ nũxũ nacuèxèxũcèx na ñuxãcũ poraãcũ pecadu naxũgũxũ. Natürũ yexguma yexeraãcũ pecadu naxũgũga duũxũgũ, rũ yexeraãcũ Tupanaãxũ nangechaũtũmũũgũ. ²¹ Rũ ñuxma woo pecadugagu na iyuexũ, natürũ Tupanaãxũ tangechaũtũmũũgũ i guxũguma. Rũ ngẽmaãcũ pecaduwa tũxũ ìnanguxũxèẽ na napèxewa imexũcèx rũ tórũ Cori ya Ngechuchu ya Cristugagu tũxũ nangèxmaxũcèx i maxũ i taguma gũxũ.

6

Ñuxma rũ tama pecadu ixũgũxũcèx nixĩ i imaxèxũ, natürũ Cristucèx nixĩ i imaxèxũ

¹ Rũ ñuxma na Tupanaãxũ ingechaũtũmũũgũxũ, ¿rũ ñuxãcũ tá imaxèxũ i ñuxmax? ¿Rũ pexcèx rũ namexũ na pecadu ixũgũechaxũ na yexeraãcũ Tupanaãxũ ingechaũtũmũũgũxũcèx? ² Rũ dũcax, tama ngẽmaãcũ nixĩ. Erũ ñuxma pecaduchaxwa rũ ñoma iyuexũrũ tixĩgũ, erũ marũ tama naga taxĩnũẽ. Rũ ngẽmacèx tama name i yeũcürũ pecadu taxũgũecha. ³ ¿Tama èxna nũxũ pecuèx na ñacũcèx yĩxũ na ìbaiũxũ? Rũ ìtabaiũ na ngẽmaãcũ duũxũgũxũ nawèxũcèx na aixcũma Ngechuchu ya Cristuarũ duũxũgũ na ixĩgũxũ. Rũ yexguma ìbaiũgu, rũ nüma nayuxũrũ yexma nayu ga tacũma ga nuxcũmaũxũ. ⁴ Rũ yexguma ìbaiũgu, rũ Cristu yuxũrũ yexma nayu ga tacũma ga nuxcũmaũxũ, rũ Cristu ìtaxũrũ inatèx ga yema tacũma ga nuxcũmaũxũ. Rũ yemaãcũ naxũpetũ na wena imaxèxũcèx rũ tũxũ nangèxmaxũcèx i maxũ i ngexwacaxũxũ, yexgumarũgũ ga Ngechuchu na yuwa ìrdaxũ rũ wena namaxũxũ ga yexguma Nanatũ ga Tupana norũ poramaã ìnadaxèẽgu. ⁵ Rũ ñuxma na Cristumaã wũxigu nayuxũ ga tacũma ga nuxcũmaũxũ, rũ nüxũ tacuèx na aixcũma Cristumaã tũxũ nangèxmaxũ i maxũ i ngexwacaxũxũ. ⁶ Rũ nüxũ tacuèx rũ yema tórũ maxũ ga nuxcũmaũxũ rũ Cristumaã wũxigu curuchagu nayu na yexma yanaxoxũcèx ga yema tacũma ga chixexũ. Rũ ñuxma rũ tama pecadutũwa tangèxmagũ, rũ ngẽmacèx marũ tama naga taxĩnũẽ. ⁷ Erũ yĩxema yũxe rũ marũ tama pecadutũwa tangèxma na yeũcürũ pecadu taxũechaxũcèx. ⁸ Rũ ñuxma na Cristumaã nayuxũ ga tórũ maxũ ga nuxcũmaũxũ, rũ nüxũ tacuèx na Cristurũ tũxũ nangèxmaxũ i maxũ i ngexwacaxũxũ. ⁹ Rũ nüxũ tacuèx rũ ñuxma na yuwa ìnadaxũ ya Cristu, rũ tagutãma wena nayu. Yerũ nüma rũ marũ yuxũ narũyexera. ¹⁰ Rũ

yexguma nayuxgu ga Cristu rü pecaducèx nixī ga nayuxū, rü noxtacūma yexma wūxicana ningutanū ga guxūma ga duūxūgūarū pecadugū. Natürū ñuxma na namaxūxū, rü Tupanacèx nixī i namaxūxū na Tupanaārū ngúchaū naxūxūcèx. ¹¹ Rū ngēxgumarūū ta i pema rü name nixī i pegūgu perūxīnūē na marū peyuexū pecaduchaxwa rü Tupanacèx pemaxèxū, erū Ngechuchu ya Cristuarū duūxūgū pixīgū. ¹² Rū ngēmacèx rü tama name i pecadutūwa pegū pengēxmagūxèē na pemaā inacuáxūcèx. Rū tama name i penaxūchica i pecadu na pexeneārū ngúchaūgū i chixexū pexū naxūxèxūcèx. ¹³ Rū tama name i pecaduna penaxāgū i pexene na ngēmamaā chixexū pexūgūxūcèx. Rū name nixī i Tupanana pegū pexāgū, erū ñoma duūxūgū i yuexū rü wena maxèxūrūū pixīgū. Rū ngēmacèx name nixī i Tupanana penaxāgū i pexene na ngēmamaā mexū pexūgūxūcèx. ¹⁴ Rū ñuxma rü tāūtāma pecadutūwa pengēxmagū na pemaā inacuáxūcèx. Rū yexguma yema mugū ga Moiché ūmatūxūwe perūxīxgu, rü pemaā inacuèx ga pecadu. Natürū i ñuxma rü Cristugagu Tupana pemaā namecūma, rü nūma nixī i pemaā inacuáxū i ñuxmax.

Ngēxguma wūxi i corimèxewa yigū ingēxmagūxèēgu, rü ngēmaga nixī i ixīnūēxū

¹⁵ Rū ñuxma na tama yema Moiché ūmatūxū ga mugūtūūwa ingēxmagūxū, rü ñuxma na Tupana rü Cristugagu tamaā mecūmaxū, ¿rū ñuxācū tá imaxèxū? ¿Rū pexcèx namexū na yeūcūrū pecadu ixūgūechaxū? Rū dūcax, tama name na ngēmaācū imaxèxū. ¹⁶ Rū pema nūxū pecuèx rü ngēxguma wūxi i corimèxewa pegū pengēxmagūxèēgu na naga pexīnūēxūcèx rü ngēma tá nixī i perū cori ixīxū, rü pema rü norū duūxūgū tá pixīgū i ngēma cori i naga pexīnūēxū. Rū ñuxma rü pema tá nūxū pedaugū ngoxī ngēxūrūūxū perū me yixī na ngēmaga pexīnūēxūcèx. Rū ngēxguma pecadu i yuwa tūxū gagūxū perū me yixīgu, rü ngēma tá nixī i pemaā icuáxū. Rū ngēxguma perū me yixīgu na Tupanaga na pexīnūēxū, rü yimaga tá pexīnūē na napèxewa pimecxūcèx. ¹⁷ Natürū Tupanana moxè chaxā, yerū woo pecaduga na pexīnūēchirèxū, natürū i ñuxma rü aixcūma naga pexīnūē i ngēma nguxèētae i marū peyaxuxū i Cristuchiga. ¹⁸ Rū ñuxma rü Tupanaārū duūxūgū pixīgū erū nūma rü chixexūna pexū ínanguxūxèē na tama pecadu pexūgūechaxūcèx. Rū ngēmaācū pexū narūngūxèē na napèxewa pimecxūcèx rü meā naxcèx pemaxèxūcèx. ¹⁹ Rū ñoma i naānecūāx i duūxūgūmaā chidexarūū nixī i tauxchaxū i oremaā pemaā chidexaxū i ñuxmax, erū pema rü woetama taguma nūxū pexīnūē i ñaā ore, rü ngūrūāchi tāūtāma nūxū pecuèx i tacūchiga na yīxū i ngēma pemaā nūxū chixuxū. Rū dūcax, rü nuxcūma rü ipenaxā ga pexene na namaā penaxūgūxūcèx ga nagūxūraūxū ga chixexū. Natürū i ñuxma rü name nixī i Tupanana pegū pexā na aixcūma napèxewa pexūūnegūxūcèx rü naxcèxicatama pemaxèxūcèx. ²⁰ Rū yexguma pecadutūwa peyexmagūgu, rü taxucūrūwama Tupanapèxewa mexū pexūgū ga yexguma. ²¹ ¿Natürū tacūwa pexū namexū ga yema chixexū i ñuxma rü wūxi i āne pexna āxū? Yerū yema chixexū rü yuwamare pexū nagagū, rü tama i maxūwa. ²² Natürū marū tama pecadutūūwa pengēxmagū i ñuxmax, erū marū nūxna ípengūū rü marū Tupanaārū duūxūgū pixīgū. Rū ngēma waxi nixī i poraācū pexū mexū erū ngēmagagu penayaxu i maxū i Tupanapèxewa ūūnèx rü ngēmawena tá penayaxu i maxū i taguma gūxū. ²³ Rū ngēma natanū na pecadu ixūxū, rü yu nixī. Natürū yīxema tórū Cori ya Ngechuchuaxū yaxōgūxe, rü Tupana tūxna nanaxāmare i maxū i taguma gūxū.

7

Wūxi i ngecū rū ngēxguma nayutegu rū marū tama ngītemēxēwa ingēxma. Rū ñuxma na taxcēx nayuxū ya Cristu, rū marū tama yema Moiché ūmatūxū ga mugūtūūwa tangēxmagū

¹ Pa Chaueneēgūx, rū pema na nagu pexīxū i ngēma mugū, rū nūxū pecuēx rū ngēxguma tamaūxguxicatama nixī na ngēma mugūtūūwa tangēxmaxū ya wūxichigū ya duūxē. ² Rū dūcax, rū wūxi i ngecū i ātecū rū ngītemēxēwa ingēxma ega namaxyane ya ngīte, erū ngēma ñanagūrū i ore i mugū. Natūrū ngēxguma nayuxgu ya ngīte, rū marū tama ngītemēxēwa ingēxma. Rū yema mugū ga ngītemēxēwa ngīxū yexmaxēēxū ga noxri rū marū tama ngīmaā inacuēx. ³ Rū ngēmaācū i ngēxguma namaxyane ya ngīte rū to i yatūmaā inapexgu, rū pecadu ixū. Natūrū ngēxguma marū nayuxgu ya ngīte, rū marū nūxna ūnguxuchi i ngēma mugū ga ngītemēxēwa ngīxū yexmaxēēxū ga noxrix. Rū ngēxguma wenaxārū naxātegu rū taxuūma i chixexū ixū. ⁴ Rū ngēxgumarūū ta i pemax, Pa Chaueneēgūx, rū marū tama yema Moiché ūmatūxū ga mugūtūūwa pengēxmagū yerū nūma ga Cristu rū pexcēx nayu. Rū ngēmacēx i ñuxma rū Cristu ga yuwa írūdacuārū pixīgū. Rū ngēmaācū nanaxū ya Tupana na naxcēx imaxēxūcēx, rū norū ngūchaū ixūgūxūcēx. ⁵ Rū yexguma nuxcūmaūxū ga tacūmawe rūxīxgu rū poraācū tanaxū ga taxūneārū ngūchaūgū woo yema mugū tūxna na nachūxuxū ga yema. Natūrū yexguma nūxū icuēxgu na nachūxuxū ga yema pecadu ga ixūxū, rū yexeraācū tanaxūxchaū. Rū yemaācū ga yema tōrū pecadugū rū yuwa tūxū nagagū. ⁶ Natūrū i ñuxma rū marū tama ngēma mugūtūūwa tangēxmagū, erū Tupana rū marū nūxna tūxū ūnanguxūxēē. Rū ngēmacēx i ñuxma rū ñoma duūxūgū i iyuxūrūū tixīgū i napēxewa i ngēma mugū, erū marū tama tamaā inacuēx. Rū ngēmacēx tama nagu taxī i ngēma nuxcūma ūmatūxū ga mugū, erū marū nūxna itanguxū na Tupanaārū ngūchaū ixūgūxūcēx rū naxcēx na imaxēxūcēx namaā i tōrū maxū i ngexwacaxūxū i Naāē i Ūūnexū tūxna āxū.

Ngēma pecadu i chowa ngēxmaxū rū chomaā inacuēx

⁷ ¿Rū ñuxū ñagūxū tá i ñuxmax? ¿Rū pexcēx rū yema mugū yīxū ga tūxū pecaduāxēēxū? ¿Rū dūcax, tama name i ngēmaācū nagu tarūxīnūē! Natūrū yexguma chi yema mugū rū tama choxū nūxū nacuēxēēgu, rū tāū chima nūxū chacuēx na pecadutūūwa chayexmaxū. Rū dūcax, rū yexguma chi yema mugū rū tāū chima choxū nūxū cuēxēēgu na wūxi i pecadu yīxū na toguāxārū ngēmaxūcēx chixauxāchixū, rū tāū chima nūxū chacuēx na pecadu yīxū i ngēma. ⁸ Natūrū yexguma yema mugū choxū nguxēēgu na nachixexū na toguāxārū ngēmaxū choxū ngūchaūxū, rū yexguma ga pecadu rū nayoxniē na yexeraācū choxū na nangūchaūxēēāxū. Rū ngēmaācū nūxū tadau rū ngēxguma chi natauxgu i ngēma mugū, rū tāū chima nūxū tacuēxgū na ñuxācū wūxi i chixexūchixū na yīxū i ngēma pecadu. ⁹⁻¹⁰ Rū noxri tauta yema mugūxū chacuēxgu, rū choma nagu charūxīnūgu rū chame. Natūrū yexguma yema mugūxū chacuēxgu, rū nūxū chicuēxāchi na chixexū chaxūxū rū ngēma chixexūcēx rū tá na chayuxū. Rū yemaācū ga yema mugū ga Tupana Moichéna āxū na duūxūgūxū namaxēēēxūcēx, rū choxū nayuxēēāma. ¹¹ Rū nūma ga pecadu rū nayoxniē namaā ga yema mugū. Yerū yexguma yema mugū choxū nguxēēgu na ñuxācū nachixexū ga yema pecadu, rū yexeraācū choxū nangūchaū ga yema pecadu. Rū yemaācū ga yema pecadu rū choxū nawomūxēē rū nayoxniē namaā ga yema mugū rū yuwa choxū

naga. ¹² Natürü yema mugü rü aixcüma naxüüne i Tupanapëxewa. Rü guxüma i ngëma Tupana tamaã nüxü ixuxü rü naxüüne rü aixcüma name rü tüxü narüngüxëe. ¹³ ¿Natürü ñuxäcü nixi i ngëma i ñuxmax? ¿Éxna pexcèx rü yema mugü yixü ga yuwa choxü gaxü? Rü dücax, rü tama ngëmaäcü nixi. Erü ngëma pecadu nixi i Tupanaärü mugümaã yoxniëxü na yuwa choxü nagaxüçex. Rü ngëmaäcü nüxü tacuëx na ñuxäcü poraäcü nachixexü i pecadu. Rü yexguma yema mugü choxü nguxëëgu na ñuxäcü poraäcü nachixexü ga yema pecadu, rü yexeraäcü choxü nangüchaü ga yema chixexü rü yexeraäcü chanaxüama ga pecadu. ¹⁴ Nüxü tacuëx i ngëma mugü rü Tupanaäe i Üünexüwa ne naxü. Natürü choma rü duüxümare chixi, rü ngëmacèx nixi i chomaã inacuáxü i ngëma pecadu i chaxüxü. ¹⁵ Rü tama nüxü chacuëx na tacü choxü üpetüxü erü tama chanaxü i ngëma mexü i chanaxwëxexü na chaxüxü, natürü ngëma chixexü i tama chanaxwëxexü na chaxüxü rü ngëmaãma nixi i chaxüxü. ¹⁶ Natürü i ñuxma na chanaxüxü i ngëma tama chanaxwëxechirëxü na chaxüxü, rü ngëmawa nüxü chicuëxächi na namexü i ngëma mugü. ¹⁷ Rü ngëmacèx i ñuxma rü tama chauechama nixi i chanaxüxü i ngëma chixexü. Natürü ngëma pecadu i chowa ngëxmaxü nixi i chomaã icuáxü, rü ngëma nixi i chixexü choxü üxëëxü. ¹⁸ Rü choma nüxü chacuëx rü wüxi i pecaduäxü i duüxümare chixi, rü ngëmacèx chowa rü nataxuma i tacü i mexü. Erü woo chanaxwëxe na mexü chaxüxü, natürü tama chomaã nanguxü na chanaxüxü. ¹⁹ Erü ngëma mexü i chanaxwëxexü na chaxüxü, rü tama chanaxü. Natürü chanaxüama i ngëma chixexü i tama chanaxwëxexü na chanaxüxü. ²⁰ Rü ngëxguma chi chanaxüamagu i ngëma chixexü i tama chanaxwëxexü na chaxüxü, rü meãma nangox na tama chauechama chanaxüxü. Natürü ngëma pecadu i chowa ngëxmaxü nixi i chomaã icuáxü rü chixexü choxü üxëëxü. ²¹ Rü ngëmaäcü nüxü chadau i ñuxäcü na chiüxü. Rü ngëxguma mexü chaxüxchaügu rü choxü natauxcha na chixexüãma chaxüxü. ²² Choma rü chauäëwa rü chorü me nixi i Tupanaärü mugü, rü naga chaxiñchaü. ²³ Natürü ñaã chaxune i ñoma i naãnecüäx ixixüwa, rü nangëxma i tacü i tama naxüxchaüxü i ngëma chauäë naxwëxexü. Rü ngëma pecadu i chowa ngëxmaxü nixi i chomaã icuáxü rü chixexü choxü üxëëxü. ²⁴⁻²⁵ Rü ngëmaäcü i choma rü chauäëwa chayanguxëëchaü i Tupanaärü mugü, natürü ñoma i naãnecüäx i chaxune rü nanaxüxchaü i ngëma nanaxwëxexü i pecadu. Rü taxucèxma chataäe i chomax. ¿Rü texe tá nüxna choxü itanguxuchixëe i ñaã pecadu i chowa ngëxmaxü rü yuwa choxü gaxchaüxü? Rü Tupanana moxë chaxä erü törü Cori ya Ngechuchu ya Cristu rü tá choxü nüxna Inanguxuchixëe.

8

Tupanaäe i Üünexü naxwëxexüäcüma tamaxë

¹ Rü ñuxma ya Tupana rü marü taxucèxma nanapoxcue i ngëma duüxügu i Ngechuchu ya Cristuarü duüxügu ixigüxü. ² Erü Tupanaäe i Üünexü i Ngechuchu ya Cristugagu tüxü maxëxëëxü, rü nüxna tüxü inanguxüxëe i pecadu na tama yuwa tüxü nagagüxüçex. ³ Rü yema taxüneaärü ngüchaügu rü marü nüxü narüyexera ga yema mugü ga Moiché umatüxü. Rü yemacèx ga yema mugü rü taxucürüwa mexü tüxü naxüxëe. Natürü nüma ga Tupana rü marü nanaxü ga yema taxucürüwa naxüxü ga yema mugü. Yerü ga Tupana rü ñoma ga naãnewa nanamu ga Nanexüchi. Rü woo taxüne i pecaduäxürü nixi ga naxüne, natürü nüma ga Nane rü taguma napecaduäx.

Rū nūma ga Nane rū tórū pecaducèx nayu, rū yemaáčü inayanaxoxèë ga norū pora ga yema pecadu ga taxūnewa yexmaxū. ⁴ Rū yemaáčü nanaxū ga Tupana na tūxū na natauxchaxūcèx na yanguxèëxū i ngēma tūxū namuxū i ngēma mugū. Erū ñuxma rū tama ñoma i taxūne naxwèxexūācūma tamaxè, natürū Tupanaāë i Üünexū naxwèxexūācūma nixī i imaxèxū. ⁵ Rū yixema tūmaxūne naxwèxexūācūma maxèxè, rū naxcèx tadaugū i ngēma ñoma i naānecūāx naxwèxexū. Natürū yixema Tupanaāë i Üünexū naxwèxexūācūma maxèxè, rū ngēma Tupanaāë i Üünexū naxwèxexū nixī i naxcèx tadaugūxū. ⁶ Rū yixema Tupanaāë i Üünexū naxwèxexūcèx daugūxe rū tataāëgū, rū tá tūxū nangèxma i tūmaārū maxū i taguma gūxū. Natürū yixema tūmaxūne naxwèxexūcèx daugūxe rū ngēma rū tá yuwa tūxū nagagū. ⁷ Rū yixema tūmaxūne naxwèxexūcèx daugūxe rū Tupanamaā tarūxuwānūgū. Rū tama Tupanaga taxīnūēchaū erū taxucūrūwama naga taxīnūë. ⁸ Rū ngēmācèx ya yixema tūmaxūneārū ngūchaūwe rūxīxè, rū taxucūrūwa Tupanaārū ngūchaū taxūgū. ⁹ Natürū ngèxguma aixcūma pewa nangèxmagu i Tupanaāë i Üünexū rū tama pexeneārū ngūchaū pexū, natürū Naāë i Üünexūārū ngūchaū nixī i pexūxū. Rū yixema tama tūxū nangèxmaxè i Tupanaāë i Üünexū i Cristu tūxna āxū, rū tama Cristuarū duūxū tixī. ¹⁰ Natürū ngèxguma pewa namaxūxgu ya Cristu, rū peāxè rū namaxū erū Cristugagu Tupana pexū nūxū inayarūngūma i perū pecadugu. Rū woo i pexene rū pecadugagu tá nayuama, natürū peāxè rū Cristugagu tá namaxū, erū Tupana pexū nadau na pimexū. ¹¹ Rū ngèxguma pewa namaūxgu i Naāë ya yima Tupana ga Ngechuchu ya Cristuxū írūdaxèëcū, rū nūmatātama ya yima Cristuxū írūdaxèëcū tá wena namamaxèë i pexene i yuxwèxexū, rū Naāë i Üünexū i pewa maxūxū tá nixī i naxūxū i ngēma. ¹² Rū ngēmācèx, Pa Chaueneëgūx, rū tanaxwèxe i Tupanaārū ngūchaū taxū, rū tama tanaxwèxe i taxūne i pecaduāxūārū ngūchaū taxū. ¹³ Erū ngèxguma chi pexeneārū ngūchaū pexūxgu rū tá ipeyarūtauxe. Natürū ngèxguma Tupanaāë i Üünexūārū ngūxèēmaā ipeyanaxoxèëgu i ngēma pexene ūxchaūxū, rū aixcūma tá pexū nangèxma i maxū i taguma gūxū. ¹⁴ Erū guxāma ya yixema Tupanaāë i Üünexū tūmamaā icuāxe, rū aixcūma Tupanaxācūgū tixīgū. ¹⁵ Yerū tama penayauxgū ga wūxi ga naāxè ga pecaduwa pexū gagūxū rū ngemagagu wenaxarū Tupanaarū poxcèx pemuē. Natürū yema Naāxè ga peyauxgūxū rū Tupanaāxè i Üünexū i naxacūgū pexū ixīgūxèëxū nixī. Rū ngēmatama Naāë i Üünexū nixī i tūxū rūngūxèëxū na tama imuēxūcèx na Tupanana ingaicamagūxū rū:

“Pa Chaunatūx”, ñagūxū nūxū. ¹⁶ Rū ngēmatama Naāë i Üünexū nixī i aixcūma tūxū nūxū cuèxèëxū na Tupanaxācūgū na ixīgūxū. ¹⁷ Rū ñuxma na Tupanaxācūgū ixīgūxū i yixema, rū nūxū tacuèx rū daxūguxū i naānewa tá tanayaxu i ngēma mexūgū i Tupana tūxna āxchaūxū. Rū ngēmaáčü Cristumaā tá tūxū nangèxma i tachica i mexū i Tupanaxūtawa, erū Cristurū ngūxū tingegū na yixcūra wūxigu namaā mexūwa ingèxmagūxūcèx.

Ngēma mexū i yixcūra tá nūxū idauxūchiga

¹⁸ Rū dūcax, choma nagu charūxīnū rū ngēma ngūxū i ñuxma ñoma i naānewa ingegūxū, rū taxūma nixī i ngèxguma nagu nanguxgu i ngēma mexū i yixcūra tá nūxū idauxū i ngèxguma Cristumaā ingèxmagūgu i daxūguxū i naānewa. ¹⁹ Rū ñuxma rū guxūma i tacū i Tupana ūxū rū taxū i norū ngūchaūmaā inananguxèëgū i ngēma ngunexū i nagu tá nataeguxū ya Cristu

na Tupana guxūpēxewa naxācūgūxū iwéxū. ²⁰ Rū nūxū tacuèxgū rū yexguma pecadu naxūxgu ga guma nūxīraūcū ga yatū rū yexguma nixī ga nachixexū ga guxūma ga yema Tupana ūxū. Rū tama yema Tupana ūxūārū ngúchaū nixī ga yema, natūrū yemaācū nūxū naxūpetū yerū ga Tupana rū yemaācū inaxuneta ga yexguma pecadu naxūxgu ga guma yatū. Natūrū i űuxma rū guxūma ga yema Tupana ūxū rū ínananguxēē na ngēma chixexūwa ínanguxūxūcēx. ²¹ Erū ngēma ngunexū i Tupana tá nāgu nadexū i naxācūgū na naxūtawā nangēxmagūxūcēx, rū ngēxguma tá ta nixī i chixexūwa ínanguxūxēēāxū i guxūma ga yema nūmatama naxūxū. Rū ngēmaācū wenaxārū noxrirūū tá name i guxūma. ²² Rū nūxū tacuèx rū űaa naane rū guxūma i nawa ngexmaxū rū űoma wūxi i nge i íxracūchaxūcūrūxū poraācū ngūxū ninge űuxmatáta nawa nāgu i ngema ngunexū i nāgu Tupana wena nangexwacaxūxēēxū i guxūma. ²³ Rū tama űaa naanexīcatama nixī i ngūxū íngexū i űuxma, natūrū yixema i tūxū ngexmaxū i Tupanaāxē i Ūñexū rū ta ngūxū íngegū űxmatáta nawa nāgu na Tanatū tūxū dexū rū ngexwacaūxū i taxūnegū tūxna āxū. Rū woo tūxū nangexma i Naāxē i Ūñexū ya Tupana tūxna muxū na norū ūgū yixīxūcēx i ngema mexūgū i Tupana tá tūxna naxāxū i dauxūguxū i naanewa, natūrū tanaxwēxe na ngemaxūchi íngugūxū. ²⁴ Cristu tūxna nanaxā i maxū i taguma gūxū, natūrū ítananguxēēgūmare na naxū-tawā íngugūxū na nayauxgūxūcēx i ngēma maxū. Natūrū nūxū tacuèx rū ngēxguma chi marū nūxū ídaugūgu i ngēma írūnguxēēgūxū, rū taxucēxma tūxūcū ítananguxēēgū. Erū ngēma marū nūxū ídauxū, rū taxucēxma ítananguxēē. ²⁵ Natūrū ngēxguma tauta nūxū ídaugūgu i ngēma írūnguxēēgūxū, rū tanaxwēxe i meā ítananguxēēgūēcha űuxmatáta nūxū ídaugū. Rū ngēmaācū nixī i Cristuxū írūnguxēēgūxū. ²⁶ Rū Tupanaāē rū tūxū narūngūxēē ta na íporaexūcēx i ngēxguma ituraegu i tórū ōwa. Rū yixema rū tama nūxū tacuèx na űuxācū Tupanamaā ídexagūxū rū űacūcēx íyumūxēgūxū. Natūrū Naāē i Ūñexū rū naxauxācūma ore i tama nūxū ícuáxūmaā Tupanamaā nídexa rū taxcēx nayumūxē. ²⁷ Rū Tupana ya meā tūxū cuácū rū nūxū nacuèx na űuxū űaxūchiga yīxū i ngēma Naāē i Ūñexū nūxū íxuxū. Erū ngēma Naāē i Ūñexū rū Tupana naxwēxexūācūma Tupanaxū nacēxū tūmacēx ya yixema Tupanaārū duūxūgū íxīgūxe.

Cristu rū tūxū naporaexēēāma na taxūma i guxchaxūgū tūxū narū- yexer-axūcēx

²⁸ Rū nūxū tacuèx rū tūmaārū mexūcēx nixī i Tupana ínanguxēēxū i guxūma i ngēma tūxū ūpetūxū ya yixema nūxū ngechaūgūxe ga nūma nanaxwēxexūācūma tūxū nadexe. ²⁹ Rū woetama nuxcūmama ga Tupana rū marū tūxū nacuèx na tēxēgū tá tixīgūxū ya yixema noxrū íxīgūxe. Rū noxrítama naāne íxūgūgumama tūxū nade na Nanerūū timexū i napēxewa, rū yima Nane rū tūmamaā nayaxūcēx rū tūmamaā ínacúáxūcēx ya guxāma ya yixema naēneēgū íxīgūxe. ³⁰ Rū guxema noxri naāne íxūgūgumama Tupana tūxū dexe, rū tūmacēx naca na noxrū tixīgūxūcēx. Rū guxema tūmacēx naçaxe, rū nūgūcēx tūxū nímexēēgū. Rū guxema nūgūcēx tūxū yamexēēgūxe, rū daxūwa tá tūxū nagagū na guxūgutāma naxūtawā tangēxmagūxūcēx. ³¹ ;Rū űuxū űagūxū tá i űuxma i ngēmachiga? Rū ngēxguma Tupana taētūwa chogūgu, ;rū tēxē tá tūxū rüyexeraxū? ³² Yerū nūma ga Tupana rū tama tūxna nayanuxū ga Nanexūchi. Natūrū taxcēx ínanamu ga Nane na taxcēx nayuxūcēx i guxāma i yixema. Rū űuxma na yemaācū taxcēx ínamuāxū ga Nane, ;rū taux ēxna

tūxna naxāāxū i guxūma i tacū i inaxwēxexū na naxcēx imaxēxūlcēx? ³³ Rū Tupana tūxū nade rū tūxū nixu na napēxewa imexū. Rū ngēmacēx ĵrū texé tá napēxewa tūxū tixugū na ichixexū? Erū Tupanatama nixī ya tūxū ixucū na tūxū nataxūma i chixexū. ³⁴ ĴRū texé tá poxcuwa tūxū tamugū i űuxma? ĴPexcēx rū Cristu tá yīxū? Dūcēx, taxucūrūwama ngēmaācū nixī yerū Cristu nixī ga taxcēx yucū na tūxū namaxēxēxūlcēx. Rū tama ngēxīcatama taxcēx naxū, natūrū wenaxārū inarūda. Rū űuxma rū Tupanaxūtawa nangēxma rū ngema āēxgacū nixī. Rū ngema taétūwa nachogū rū Tupanaxū taxcēx nacēxū. ³⁵ ĴRū űuxma rū tacū tá Cristuna tūxū ixīgachixēēxū na tama tūxū nangechaūxūlcēx? Rū woo ngūxū ingegūgu, rū ēxna guxchaxūgū tūxū ngēxmagu, rū ēxna duūxūgū Cristugagu taxchi aiegu, rū ēxna itaiyaegu, rū ēxna ingexchirugūgu, rū ēxna āūcūmaxūwa ingēxmagūgu, rū ēxna duūxūgū tūxū daxchaūgu, natūrū woo guxūma i ngēma tūxū űepetūgu, natūrū ya Cristu rū tāūtāma nūxū narūchau na tūxū nangechaūxū. ³⁶ Natūrū guxūguma āūcūmaxūwa tangēxmagū, ngēma Tupanaārū ore i űmatūxū nūxū ixuxūrū. Erū ngēma ore rū űnanagūrū:

“Rū cugagu duūxūgū toxū nadaixchaū rū duūxūgūpēxewa rū űnoma carnerugū i daiwa ixūrū tixīgū”,

űnanagūrū i ngēma ore. ³⁷ Natūrū woo guxūma i ngēma tūxū na ngupetūxū, rū Ngechuchu ya Cristu ya tūxū ngechaūcū, rū tūxū naporaexēēāma na taxūma i guxchaxūgū tūxū narūyexeraxūlcēx, rū bai i tacū. ³⁸⁻³⁹ Rū ngēmacēx aixcūma chayaxō na taxucūrūwama tacū Tupanana tūxū ixīgachixēēxū na ngēmaācū tama tūxū nangechaūxūlcēx. Rū woo iyuxgu rū woo imaxēgu, natūrū Tupana tá tūxū nangechaūēcha. Rū taxucūrūwama Tupanana tūxū nixīgachixēē i tacū i norū norearū ngeruūgū, rū ēxna tacū rū ngoxogū rū ēxna tacū i to i poraxū. Rū bai i tacū i űuxma tūxū űepetūxū, rū bai i tacū i yixcūra tá ngēxmaxū, rū bai i tacū i daxūwa ngēxmaxū, rū bai i tacū i naānetūūwa ngēxmaxū, rū bai i tacū i to i Tupana űxū, rū taxucūrūwama Tupanana tūxū nixīgachixēē na tama tūxū nangechaūxūlcēx. Rū ngēmaācū nixī i tūxū nangechaūxū ya Tupana nagagu ya tōrū Cori ya Ngechuchu ya Cristu.

9

Tupana rū nanade i Yudiūgū na norū duūxūgū na yixīgūxūlcēx

¹ Dūcēx, Pa Chaueneēgūx, rū pemaā tá nūxū chixu i wūxi i ore. Rū ngēma ore i pemaā tá nūxū chixuxū rū aixcūma nixī erū Cristuarū duūxū chixī. Rū tama chidora. Rū chauāēwatama nūxū chacuēx na aixcūma na yīxū i ngēma ore erū Tupanaāē i űūnēxū nixī i chauāēmaā icuāxū. ² Rū poraācū changechaū, rū choxū nangūēcha i chauāēwa, erū tama nayaxōgū i chautanūxūgū i Yudiūgū. ³ Rū aixcūma pemaā nūxū chixu rū guxūguma ngēma chautanūxūgu charūxīnū, rū poraācū chanaxwēxe na Cristuaxū yaxōgūāxū. Rū choma rū aixcūma íchamemare na poxcuwa choxū namuxū ya Tupana rū Cristuna choxū yaxūgachixēēxū ega ngēmaācū chi nūxū chayaxōgūxēēgu rū chanamaxēxēēgu i ngēma chautanūxūgū i Yudiūgū. ⁴ Rū nūmagū rū chauxrū Yudiūgū nixīgū. Rū Tupana rū nuxcūmaxūchima namaā inaxuneta na naxācūgū yixīgūxūlcēx. Rū norū oxīgū rū nūxū nadaugu na űuxācū namexēchixū ga Tupana ga yexguma naxcēx nangoxgux. Rū Tupana rū norū oxīgūmaā inaxuneta rū űnanagūrū nūxū:

“Rū ngēxguma chauga pexīnūēgu rū tá pexū charūngūxēē”,

ñanagürü nüxü. Rū Tupana rū nüxna nanaxã ga yema mugü ga Moïché ümatüxü. Rū nanangüexëë na ñuxácü nüxü yacuëxüügüxcëx. Rū meãma namaã inaxuneta na Cristu rū naxcëx núma tá namuãxü na namaxëxëëãxüxcëx rū nüxna na naxããxüxcëx i maxü i taguma gúxü. ⁵ Rū yema nuxcümaügüxü ga tóru oxigütaa nixígü i ngëma Yudiügü, rū ngëmacëx naxcëx ta nixí ga yema uneta ga tóru oxigümaã nüxü yaxuxü ga Tupana. Rū ngëma Yudiügütanüxüwatama nixí ga nabuxü ga Cristu na Tupanaxüchi ixícü ya guxüetüwa ngëxmacü. Rū tanaxwëxe i guxüguma nüxü ticuëxüügü. Rū ngëmaãcü yí. ⁶ Rū ñuxma rū woo tama guxü i Yudiügü na yaxögüxü, natürü taxucürüwama texë nüxü tixu na Tupana rū tama yanguxëëãxü i ngëma norü uneta. Erü ngëma Yudiügü rū tama aixcüma guxüma Tupanaärü duüxügü nixígü. ⁷ Rū tama guxüma i duüxügü i Abráütaagü ixígüxü, rū aixcüma Abráütanüxü nixígü i Tupanapëxewa. Yerü ga Tupana rū Abráümaã nüxü nixu, rū ñanagürü:

“Rü cune ya Ichaátanüxügü tá nixí i aixcüma cutanüxügü ixígüxü i chopëxewa”,

ñanagürü. Rū yemaãcü namaã inaxuneta woo na nayexmaxü ga togü ga Abráüxãcügü. ⁸ Rū ngëmawa meãma nüxü tacuëx rū tama ngëma na Abráütaa tixígüxüxcëx nixí i Tupanaxãcügü tixígüxü. Natürü yíxema aixcüma Tupanaärü uneta nüxü ixuxürüüãcüma yaxögüxe waxi tixí ya aixcüma Abráütaa ixígüxe i Tupanapëxewa. ⁹ Yerü naxüpa ga na nabuxü ga Abráü nane, rū yema Tupanaärü uneta ga Abráümaã nüxü yaxuxü, rū ñanagürü:

“Rü naí ya taunecüarü ñuxgumaãcü tá wena nuã chaxü, rū cuxmëx i Chara rū tá ixãxãcü i ngëxguma”,

ñanagürü. ¹⁰ Natürü tama Abráümaãxícatama nixí ga yemaãcü yadexaxü ga Tupana. Yerü tóru oxí ga Ichaá namëx ga Rebecamaã rū ta nidexa ga Tupana. Rū ngëma rū ngíteaxü ixãxãcü rū nataxreëxpüx ga ngëne. ¹¹⁻¹³ Natürü yëxguma tautá nabuegu rū taxuüma ga mexü rū ëxna chixexü naxüegu ga yema ngënegü, rū Rebecamaã nidexa ga Tupana, rū ñanagürü:

“Rü ngëma nüxíra buxü i cune, rū ngëma wixweama buxüärü duüxü tá nixí”, ñanagürü ngíxü. Rū yema dexa rū namaã nawüxigu i Tupanaärü ore i ümatüxü i ñaxü:

“Marü chanayaxu ya Acobu, natürü nüxü chaxo ya Echaú”, ñaxü. Rū yemaãcü ga Tupana rū ngëmaã nanangoxëë na namëxwa nangëxmaxü na tüxü nayaxuxü ya yíxema woetama nüxü ngúchaüxë na tümacëx naçaxü tama nagu naxíñüãcüma i tacü rū mexü rū ëxna tacü rū chixexü na taxüxü. ¹⁴ ¿Rü ñuxü ñagüxü i ñuxmax? ¿Pëxcëx rū Tupana rū chixexü naxüxü ga yëxguma tama Acobuxü nangechaüxürüü nüxü na nangechaügu ga Echaú? Rū dücax, tama chixexü naxü. ¹⁵ Yerü norü orewa rū Tupana rū Moïchéxü ñanagürü:

“Rü ngëxguma chi texëmaã chamecümachaügu, rū tümamaã tá chamecüma. Rū choxü tá tangechaütümüü ya yíxema choxü ngechaütümüüchaüxë”, ñanagürü. ¹⁶ Rū ngëmaãcü tama ngëma tümatama tanaxwëxëxügüga rū ëxna ngëma taxüxügüga nixí i Tupana tüxü yaxuxü ya texë. Natürü tüxü nayaxu erü nüxü tangechaütümüü. ¹⁷ Rū yëxgumarüü ta ga Tupana rū norü ore i ümatüxüwa rū ñanagürü nüxü ga Equituaneärü ãëxgacü:

“Rü ãëxgacüxü cuxü chingucuchixëë na cuwa duüxügüxü nüxü chadauxëëxüxcëx i ñuxácü na chaporaxü. Rū ngëmaãcü chanaxü

na guxū i duūxūgū i guxū i naānewa ngēxmagūxū, nūxū na cuáxūcèx i chauchiga”,

ñanagürü. ¹⁸ Rū ngēmaācū ya Tupana rü nūxū tangechaütümū ya yixema nūxū ngechaütümūtchaūxē. Rū ngēxguma tūxū nataiāchiarū maxūāxēēchaūgu rü tūxū nanataiāchiarū maxūāxēē ya yixema tama nūxū cuáxchaūxē. ¹⁹ Natürü bexmana tá ñacurügü choxū:

“Rū ngēxguma chi ngēmaācū yixīgu ya Tupana, ¿rū tūxcūū nūxū nixu na tagagu yīxū na chixexū ixīgūxū rü tama naga ixīnūēxū? ¿Rū texé tapora na itayanaxoxēēxūcèx i Tupanaārü ngūchaū? ” ñacurügü tá. ²⁰ Natürü Pa Duūxūx, ¿texé quixī i cuma rü ngēmacèx ngēmaācū Tupanaxū cuyaxūgaxū? ¿Cuxcèx rü ēxna wūxi i tūxū i waixūmūwa ūxū rü namexū i ngēma norū ūruūmaā na ñaxū?

“¿Rū tūxcūū ngēmaācū choxū cuxū na ngēmaācū chixīxūcèx i ñuxmax?” ñaxū. ²¹ Rū ngēma tūxūārū ūruū rü waixūmūwa nanaxū i tacū i nūma naxūxchaūxū. Rū ngēxguma nanaxwēxegu, rü ngēma waixūmūwa nanaxū i wūxi i tūxū na norū meruū yīxūcèx. Rū ngēxguma nanaxwēxegu, rü ngēmatama waixūmūwa nanaxū i wūxi i tūxū na norū guxchirechixū yīxūcèx. ²² Rū ngēxgumarūūtama nixī i naxūāxū ya Tupana. Erū tūxū nanawéxchaū na ñuxācū naporaxū i nūma rü ñuxācū napoxcueāxū i ngēma duūxūgū i chixexū ūgūxū, natürü poraācū yaxna namaā naxīnū i ngēma duūxūgū, rü tama paxa nanapoxce i ngēma ímemaregūxū na napoxcuxū. ²³ Natürü ga Tupana rü inanawéxchaū na ñuxācū poraācū tamaā namecūmaxū i yixema na yaxōgūxū. Rū ngēmacèx nixī i nūxū ingechaütümūgūxū, rü nuxcūmamatama tūxū nadexū na naxūtawa ingēxmagūxūcèx i daxūgūxū i naānewa i ngextá ínamexēchixūwa. ²⁴ Rū ngēmaācū i yixema na Yudíugū ixīgūxū, rü tatanūwa Tupana tūxū nidexechi ya ñuxre na norū duūxūgū tixīgūxūcèx. Rū ngēxgumarūū ta i ngēma tama Yudíugū ixīgūxūtanūwa rü nayadexechi i togū. ²⁵ Rū ngēmacèx rü Tupanaārü ore ga Ochéa ūmatūxūwa rü ñanagürü:

“Rū ngēma duūxūgū i tama chorū duūxūgūchirēx ixīgūxū, rü: ‘Pema rü chorū duūxūgū pixīgū i ñuxmax’, ñacharügü tá nūxū. Rū ngēma duūxūgū i tama Yudíugürū nūxū changechaūchirēxū, rü: ‘Pexū changechaū i ñuxmax’, ñacharügü tá nūxū. ²⁶ Rū noxri ga Tupana rü yema duūxūgū ga tama Yudíugū ixīgūxūmaā nūxū nixu, rü ñanagürü nūxū: ‘Pema rü tama chorū duūxūgū pixīgū’, ñanagürü nūxū. Natürü yematama nachica ga ngextá nūxū iyemañaxūwa, rü wenaxarū yema duūxūgū ga tama Yudíugū ixīgūxūmaā nidexa ga Tupana ya Maxēxēruū, rü ñanagürü nūxū: ‘Pema rü chaucacügü tá pixīgū’, ñanagürü nūxū”.

Rü yema nixī ga Tupanaārü ore ga Ochéa ūmatūxū. ²⁷⁻²⁸ Rū Yudíugūchiga rü ta nidexa i Tupanaārü ore, yerū nuxcūmaācū ga norū orearū uruū ga Ichaxía rü ñanagürü:

“Rū woo namuxūchichirēx i Yudíugū yima naxnūcū ya taxtūpechinūwa yimacürūū, natürü noxre tátama nixī i aixcūma nayauxgūxū i maxū i taguma gūxū. Rū paxa tá ínangu ya tórü Cori na napoxcueāxūcèx i guxūma i ngēma tama noxrū ixīgūxū”,

ñanagürü ga Ichaxía. ²⁹ Rū nūmatama ga Ichaxía, rü ñanagürü ga ūpa:

“Rū ngēxguma chi nūma ya tórü Cori ya guxū i naāneārū yora rü tāū chima iyaxūgūxēēagu i ñuxre i tatanūxūgū i Yudíugū, rü chi itayarūxoxochi,

yexgumarūl ga na iyanaxogūxl ga guma ĩānegū ga Chodoma rū Gomora namaā ga guxūma ga yema duūxūgū ga yēma yexmagūxl”, ñanagūrū ga Ichaxía.

Yudíugū rū tama nayaxōgūchaū i ore i mexū i Cristuchiga

³⁰ ¿Rū ñuxū ñagūxl i ñuxmax? Rū pemaā nūxl chixu rū ngēma duūxūgū i tama Yudíugū ixíguxl ga tama Tupanacēx daugūxl ga noxrix, rū ngēmatama duūxūgū nixī i ñuxma Tupanapēxewa imexū yerū nayaxōgū. ³¹ Natūrū yema Yudíugū ga nagu ĩxchaūxl ga yema Moíchéarū mugū na Tupanapēxewa yamexūcēx, rū inatūe. ³² ¿Rū ñuxācū inatūe? Dūcēx, inatūe yerū yema mugūguama naxī na Tupanapēxewa yamexūcēx, rū tama Ngechuchuaxl nayaxōgūchaū. Rū yemaācū ga Ngechuchu rū yema duūxūgūcēx rū wūxi ga guxchaxū nixī. ³³ Rū ngēmachiga nixī i Tupanaārū ore i ūmatūxl i ñaxū: “Choma rū Yudíugūtānūwa chanamu ya Cristu. Rū nūma rū ngēma Yudíugūcēx rū wūxi i guxchaxū tá nixī erū ngēxguma tama nūxl yaxōgūāgu rū tá inayarūtauxe. Natūrū ngēma duūxūgū i nūxl yaxōgūxl, rū aixcūma tá namaxē”, ñanagūrū.

10

¹ Pa Chaueneēgūx, rū ngēma poraācū chanaxwēxexūl rū chorū yumūxēwa Tupanana naxcēx chaçaxūl, rū ngēma nixī na guxūma i chautanūxūgū i Yudíugū na yaxōgūxl rū ngēmaācū aixcūma Tupanaārū na yixíguxlēcēx. ² Rū aixcūma pemaā nūxl chixu, rū nūmagū i Yudíugū rū aixcūma poraācū Tupanagu narūxīnūē rū nanaxūgūchaū i Tupanaārū ngūchaū. Natūrū inatūe erū tama Cristuaxūl nayaxōgūchaū na ngēmaācū Tupanapēxewa yamexūcēx. ³ Rū woo Tupana ñoma ga naānewa nanamu ga Cristu na gumagagu Tupanapēxewa yamexūcēx i duūxūgū, natūrū nūmagū i Yudíugū rū tama nūxl nacūxgūchaū i ngēma. Rū nūgūtama nimeēgūchaū, rū ngēmacēx nagu naxīāma i ngēma mugū ga Moíché ūmatūxl rū tama Cristuaxūl nayaxōgūchaū na nagagu Tupanapēxewa yamexūcēx. ⁴ Natūrū nūma ga Cristu rū nayan-guxēē ga yema mugū rū yemaācū inayanaxoxēē na tama tamaā inacūāxlēcēx i ngēma mugū. Rū yemaācū nanaxū ga Cristu na guxūma i duūxūgū i nūxl yaxōgūxl rū aixcūma Tupanapēxewa yamexūcēx. ⁵ Rū Moíché nanaxūmatū nachiga na ñuxācū Tupanapēxewa tamexū ya wūxie ega naga taxīnūgu i ngēma mugū, rū ñanagūrū: “Tupana pexū namu na guxūgutāma meā peyanguxēēxl i guxūma i ngēma mugū erū ngēxguma naga pexīnūēgu i guxūma i ngēma mugū rū tá pemaxē. Natūrū ngēxguma tama naga pexīnūēgu i wūxitama i ngēma mugū, rū tāūtāma pemaxē”, ñanagūrū. ⁶ Natūrū ñuxma rū Tupanapēxewa time ega Cristuaxūl yaxōgūgu. Rū ngēmacēx taxucēxma i cuāēwa rū ñacurūgū: “¿Texē tá daxūguxl i naānewa taxū na Cristucēx tayaçaxūl na nuā naxūxlēcēx rū tūxl yanangūxēēxlēcēx na imexūcēx i Tupanapēxewa?” ñacurūgū. ⁷ Rū taxucēxma cuāēwa ñacurūgū: “¿Rū texē tá yuexūtānūwa taxū na ngēxma Cristucēx tayadauxūcēx na nuā tanagaxūcēx?” ñacurūgū. ⁸ Erū tama ngēmaācū nixī i Cristucēx idaaxūl, yerū yema ore ga Moíché ūmatūxl rū ñanagūrū: “Rū marū cuxūtawa nangēxma i Tupanaārū ore. Rū cuēxwa nangēxma na nūxl quixuxūcēx. Rū cuāēwa nangēxma na nagu curūxīnūxlēcēx”,

ñanagürü. Rū ñuxma Pa Chaueneēgūx, rū pemaã nūxū chixu rū ngēmatama ore nixī i guxūwama duūxūgūmaã nūxū tixuxū. Rū ngēma ore nixī i pexū nūxū cuèxēēxū na ñuxācū pexū nangēxmaxū i maxū ega aixcūma peyaxōgūgu. ⁹ Erū ngēxguma cuèxmaã nūxū quixuxgu na curū Cori yīixū ya Ngechuchu, rū ngēxguma cuāēwa cuyaxōxgu na yuwa Tupana ínadxēēxū, rū tá cuxū nangēxma i maxū i taguma gūxū. ¹⁰ Erū taāēwa tayaxōgū na ngēmaācū Tupanapēxewa imexū. Rū taēxmaã nūxū tixu na Ngechuchu rū tōrū Cori yīixū, rū ngēmaācū tanayaxu i maxū i taguma gūxū. ¹¹ Rū Tupanaārū ore i ūmatūxūwa rū ñanagürü:

“Rū guxāma ya yīxema ya Ngechuchuxū yaxōxē, rū nūma ya Ngechuchu rū taxūtāma tūxū narūmaāchiixēē erū tá nayanguxēē i guxūma i ngema tūmamaã inaxunetaxū”,

ñanagürü. ¹² Rū Tupanapēxewa rū guxūma i duūxūgū rū nawūxigu. Rū woo Yudiūgū yixīgu rū ēxna woo tama Yudiūgū yixīgu, natūrū Tupanapēxewa rū nawūxigu i guxūma i duūxūgū. Erū nūma ya tōrū Cori, rū guxāārū Cori nixī. Rū nūma rū aixcūma tūxū namaxēxēē ya guxāma ya texé ya nūxna çaxe na tūxū namaxēxēēxūcèx. ¹³ Erū Tupanaārū ore i ūmatūxūwa rū ñanagürü:

“Rū guxāma ya texé ya tōrū Corina çaxe na tūxna naxāāxūcèx i maxū, rū tá tanayaxu i tūmaārū maxū i taguma gūxū”,

ñanagürü. ¹⁴ ¿Natūrū ñuxācū tá tōrū Corina naxcèx tacagū, ega tama nūxū tayaxōgūgu? ¿Rū ñuxācū tá nūxū tayaxōgū, ega taguma nūxū taxīnūēgu i nachiga? ¿Rū ñuxācū tá nūxū taxīnūē i norū ore, ega taguma texé tūmamaã nūxū ixuxgu? ¹⁵ ¿Rū ñuxācū tá texé nūxū tixu i Cristuchiga ega taxūema tūxū nūxū yarūxuxēēgu? Rū ngēmacèx nixī i Tupanaārū ore i ūmatūxū i ñaxū:

“Rū wūxi i taāē nixī na ínangugūxū i Tupanaārū orearū uruūgū na duūxūgūmaã nūxū yaxugūxūcèx i Tanatūarū ore i mexū i Cristuchiga”, ñaxū. ¹⁶ Natūrū tama guxūma i duūxūgū naga naxīnūē i ngēma ore i mexū. Rū Ichaxía nūxū ixuxūrūñ nixī. Yerū ga nūma rū ñanagürü:

“Pa Corix, noxretama nixī i ngēma duūxūgū i toxū yaxōgūxū i ngēma ore i nūxū tixuxū”,

ñanagürü. ¹⁷ Rū dūcax, rū ngēma na Cristuchigaxū naxīnūēxūwa nixī i ne naxūxū na yaxōgūāxū i duūxūgū. Rū ngēma nūxū naxīnūēxū, rū ore i mexū i Cristuchiga nixī. ¹⁸ Natūrū i ñuxma rū pexna chaca, ¿ēxna pexcèx rū ngēma Yudiūgū rū taguma nūxū naxīnūē i ngēma ore i mexū i Cristuchiga? Dūcèx, ngēmaācū marū nūxū naxīnūē. Erū Tupanaārū ore i ūmatūxūwa rū ñanagürü:

“Rū ngēma Tupanaārū orearū uruūgū, rū guxūwama i ñoma i naānewa rū nūxū nixugūē i norū ore. Rū ngextá ínangēxmagūxūwa i Yudiūgū, rū ngema rū ta nūxū nixugūgū”,

ñanagürü i ngēma ore. ¹⁹ Natūrū wena pexna chaca, ¿rū ngēma Yudiūgū rū tama ēxna nūxū nicuèxāchitanū na Cristugagu yīixū na Tupana nadexū i duūxūgū i ñuxmax? Rū ngēmaācū nūxū nacuēxgū. Yerū Tupanaārū ore ga Moīché ūmatūxūwa rū ñanagürü:

“Dūcèx, Pa Yudiūgūx, choma rū tá chanamaxēxēē i ngēma duūxūgū i tama Yudiūgū ixīgūxū, rū ngēmacèx i pema rū tá pixāūxāchigū. Rū ngēxguma chanamaxēxēēgu i ngēma togū i duūxūgū i tama choxū cuèxgūchiréxū, rū pema i Yudiūgū rū tá penuē erū nūxū charūngūxēē i ngēma togū”, ñanagürü. ²⁰ Rū yemawena ga Ichaxía, rū tama namuū ga yema Yudiūgūmaã nūxū na yaxuxū ga yema Tupanaārū ore ga ñaxū:

“Rü ngēma duūxūgū i tama Yudiūgū ixīgūxū i tama chauxcēx daugūxū, rü choxū tá inayangaugū. Rü choma rü tá chaugū changoxēē naxcēx i ngēma duūxūgū i tama chauxcēx icagūchiréxū”,
ñaxū. ²¹ Rü Tupana rü Ichaxíawa Yudiūgūchiga nidexa rü ñanagürü:
“Rü guxū i ngunexūgu rü nüxna chaxuecha i ngēma duūxūgū i tama chauga inūēchaūxū rü chomañ nuēxū. Natürü tama choxū inarūxinūēchaū”,
ñanagürü.

11

Nangēxma i ñuxre i Yudiūgū i Tupana dexū na aixcūma noxrü yixīgūxūlcēx

¹ Ñuxma pexna chaca rü, ¿pexcēx ēxna ya Tupana rü marü nüxū naxo i norü duūxūgū i Yudiūgū? Tama nixī i nüxū naxoxū. Erü choma i Pauru rü Yudiū chixī. Rü Abráütanūxū chixī, rü Abráütaa ya Beyamitanūxū chixī. ² Rü nuxcūmamata Tupana Yudiūgūmañ inaxuneta na norü duūxūgū yixīgūxūlcēx, rü ñuxma rü tama Yudiūgūxū naxo. ¿Tama ēxna nüxū pecuēx na ñuxū ñaxū ga Tupanañrū orearü uruū ga Ería? Rü Tupanañrū orewa nüxū tadaugū rü Ería rü Tupanapēxewa poraācü yema Yudiūgūxū nixugū. ³ Rü ñanagürü ga Ería:

“Pa Corix, ngēma Yudiūgū rü marü nanadai i curü orearü uruūgū. Rü nagu napogūe i ngēma nachicagū i ngextá duūxūgū cuxū ícuēxūūgūxūwa. Rü chaxicata ma íchayaxūāchi. Rü choxū rü ta nimēxgūchaū”,

ñanagürü ga Ería. ⁴ Natürü Tupana nanangāxū, rü ñanagürü:

“Dücēx, choma rü marü choxū nangēxma i 7000 i yatūgū i chaugūxū chidexechixū. Rü nūmagū rü taguma nüxū nicuēxūūgū i ngēma tupanane-tachicūnēxā i Baá”,

ñanagürü. ⁵ Rü ngēxgumarūū ta nixī i ñuxmax. Rü woo muxūma i Yudiūgū tama nayaxōgū, natürü nangēxma i ñuxre i Tupana namañ mecūmaxūgagu dexū. ⁶ Rü ñuxma na Tupana tūxū ngechaūxūgagu tūxū nadexū, rü taxucūrūwama texé nüxū tixu na řacū rü mexū na ixūgūxūgagu na yixīxū. Erü ngēxguma chi řacū rü mexū ixūgūxūgagu yixgu na tūxū nadexū, rü natūcēxmamare chi nixī na nüxū ingechaūtūmūxūgūxū. ⁷ ¿Rü ñuxācü yīxū i ñuxmax? Rü ngēma rümumaēxū i Yudiūgū rü tama nüxū inayangaugū i ngēma maxū i naxcēx nadaugūxū. Natürü ngēma noxretama i Yudiūgū i Tupana dexū, rü ngemagū nixī i nüxū iyangaugūxū. Rü guxūma ga yema togū ga Yudiūgū rü Tupana ínanawogū yerü tama naga naxīnūe. ⁸ Rü ngēmachiga nixī i Tupanañrū ore i ūmatūxū i ñaxū:

“Tupanatama ngēma duūxūgūaxū nanaguxchaxēē. Rü ngēmacēx woo nüxū nadaugūgu i ngēma ore i aixcūma ixīxū, rü tama nüxū nacuēxgūēga. Rü woo nüxū naxīnūēgu i ngēma ore, rü tama nayaxōgū. Rü ñuxma rü ta ngēmaācü nixī”,

ñanagürü. ⁹ Rü Dabí rü ta rü ñanagürü:

“Rü ngēma duūxūgū rü norü petacēx naxūgūxū i ōnagūgagu rü norü muxūma i ngēmāxūgūgagu rü chixexūgu tá nayi rü ngēmacēx tá napoxcue. ¹⁰ Rü naāēwa rü tāūtāma nüxū nacuēxgū, rü guxchaxūgū tá nüxū nangēxma. Rü ñoma wūxi i duūxū i řacū i yaxū ípaxixūrūū tá nixīgū namañ i norü guxchaxūgū”,

ñanagürü.

Tupana nanamaxēxēē i ngēma tama Yudiūgū ixīgūxū

11 Rū pexna chaca, rū űuxma na Cristuxŭ naxoexŭ i ngēma Yudiŭgŭ, űrŭ pexcēx ēxna rū ngēmacēx ya Tupana rū tá nŭxŭ naxoxochixŭ? Tama nŭxŭ naxo. Natŭrŭ űuxma na tama Cristuaxŭ yaxōgŭāxŭ i ngēma Yudiŭgŭ, rū ngēmacēx ya Tupana rū nŭxŭ narŭngŭxēē rū nanamaxēxēē i ngēma tama Yudiŭgŭ ixŭgŭxŭ. Rū ngēmaācŭ nanaxŭ ya Tupana na yaxāŭxāchiexŭcēx i ngēma Yudiŭgŭ, rū Cristuaxŭ na yaxōgŭāxŭcēx. 12 Rū yema na inatŭexŭ ga yema Yudiŭgŭ, rū yemagagu muxŭma ga togŭ ga duŭxŭgŭ nanayauxgŭ ga Tupanaārŭ ngŭxēē i taxŭ. Rū yema na noxretama ga Yudiŭgŭ nayaxōgŭxŭ, rū yemagagu Tupana nanamaxēxēē ga yema tama Yudiŭgŭ ixŭgŭxŭ. Natŭrŭ ngēxguma tá Tupanacēx nawoeguxgŭ i guxŭma i Yudiŭgŭ, rū Tupana rū tá yexeraācŭ nŭxŭ narŭngŭxēē i guxŭma i ngēma duŭxŭgŭ i tama Yudiŭgŭ ixŭgŭxŭ. 13-14 Rū űuxma Pa Duŭxŭgŭ i Tama Yudiŭgŭ Ixŭgŭxŭ, rū choxŭ nangēxma i wŭxi i ore i pemaā nŭxŭ chixuxchaŭxŭ. Rū dŭcax, petanŭwa nixŭ i choxŭ namuxŭ ya Tupana na pemaā nŭxŭ chixuxŭcēx i norŭ ore. Rū űuxma rū aixcŭma meā chayanguxēē i ngēma puracŭ, erŭ chanaxwēxe na pexŭ nadaugŭxŭ i ngēma chautanŭxŭ i Yudiŭgŭ na űuxācŭ Tupana pexŭ na rŭngŭxēēxŭ. Rū ngēmaācŭ tá nixāŭxāchie i űuxre i nŭmagŭ, rū tá Cristuaxŭ nayaxōgŭ, rū ngēmaācŭ tá nanayauxgŭ i maxŭ i taguma gŭxŭ. 15 Nŭxŭ tacuēx rū ngēma Yudiŭgŭ rū tama Cristuaxŭ nayaxōgŭchaŭ i űuxmax. Rū ngēmacēx ya Tupana rū nanade i ngēma togŭ i duŭxŭgŭ i tama Yudiŭgŭ ixŭgŭxŭ. Natŭrŭ űuxma na ngēmaācŭ yŭxŭ, űrŭ űuxācŭ tá nixŭ i ngēxguma Cristuaxŭ yaxōgŭāgu i ngēma Yudiŭgŭ, rū wena Tupana nadexgŭ? Rū wŭxi i mexēchixŭ tá nixŭ naxcēx i ngēma Yudiŭgŭ. Erŭ űoma wŭxi i duŭxŭ i yuxŭ rū wenaxārŭ maxŭxŭrŭŭ tá nixŭgŭ. 16 Rū Tupana rū wena tá nanade i ngēma Yudiŭgŭ i ngēxguma yaxōgŭāgu. Rū ngē-maācŭ tá nixŭ, yerŭ nuxcŭmaŭcŭ ga nanatŭ ga Abraŭ rū Tupanaārŭ duŭxŭ nixŭ. Rū ngēmacēx i nataagŭ i Yudiŭgŭ rū Tupanaārŭ duŭxŭgŭ ta nixŭgŭ. Rū űoma wŭxi i pāŭ i Tupanana ixāxŭrŭŭ tá nixŭ. Erŭ ngēxguma ngēma pāŭwa íraxŭ Tupanaārŭ yixŭgu, rū ngēmawa nŭxŭ tacuēx na guxŭma i ngēma pāŭ rū noxrŭ na yŭxŭ. Rū ngēma wŭxi i nanetŭ i Tupanana ixāxŭrŭŭ tá nixŭ. Rū ngēxguma ngēma nanetŭchumēxā rū Tupanaārŭ yixŭgu, rū ngēmawa nŭxŭ tacuēx na guxŭma i ngēma nanetŭ rū noxrŭ na yŭxŭ. Rū ngēmaācŭ tá nixŭ i ngēma Yudiŭgŭmaā nangupetŭxŭ, erŭ wŭxi i ngunexŭtgu rū guxŭma i nŭmagŭ rū Tupanacēx tá nawoegu. 17 Tupana nŭxŭ naxo ga yema Yudiŭgŭ ga tama yaxōgŭchaŭxŭ. Rū űoma wŭxi i orŭxchacŭŭ i idaexŭrŭŭ nixŭ ga yema Yudiŭgŭxŭ naxoxŭ. Natŭrŭ nachicŭŭ Tupana pexŭ nade woo tama Yudiŭgŭ na pixŭgŭxŭ. Rū wŭxi i naŭxnecŭcŭāx i orŭxchacŭŭ rū orŭx i toxŭwa yarŭűaxcuchixŭrŭŭ pixŭgŭ. Rū űuxma i pema rū ta pexŭ nangēxma i pechica i natanŭwa i ngēma duŭxŭgŭ i Tupanaārŭ ixŭgŭxŭ. Rū Tupana rū pexŭ narŭngŭxēē rū pexŭ rū ta namaxēxēē. 18 Natŭrŭ pema i tama Yudiŭgŭ na pixŭgŭxŭ, rū tama name i pegŭ picuēxŭŭ rū nŭxŭ pixu na ngēma Yudiŭgŭarŭ yexera pixŭgŭxŭ. Rū ngēxguma chi ngēmaācŭ pegŭ picuēxŭŭgŭchaŭgu, rū name nixŭ i nŭxna pecuēxāchie na tama petanŭwa ne naxŭxŭ ga Cristu ya pexŭ maxēxēēcŭ, natŭrŭ Yudiŭgŭtanŭwa nixŭ ga ne naxŭxŭ. Rū ngēma Yudiŭgŭgagu nixŭ i Tupana pexŭ dexŭ rū pexŭ namaxēxēēxŭ i űuxmax. 19 Natŭrŭ bexmana tá űaperŭgŭgŭ:

“Tupana rū marŭ nŭxŭ naxo ga yema Yudiŭgŭ rū yemacēx nachicŭŭ tŭxŭ nade”, űaperŭgŭgŭ tá. 20 Ngēmaācŭ aixcŭma nixŭ ga Tupana nŭxŭ oxŭ ga yema Yudiŭgŭ yerŭ tama nayaxōgŭ. Rū ngēma na peyaxōgŭxŭcēxicatama nixŭ i nachicŭŭ Tupana pexŭ dexŭ i űuxmax. Rū ngēmacēx tama name i

pegü picuèxüügü. ¡Natürü pexuãëgü na tama yema Yudíugüxü üpetüxürüü pexü üpetüxücèx! ²¹ Yerü yema Yudíugü ga noxri Tupanaärü ixíügüxü, rü Tupana nüxü naxo yerü tama nayaxögü. Rü yexguma yemaãcü Tupana nüxü oxgu ga yema duüxügü rü pexü rü tá ta naxo ega tãütáma peyaxögüechagu. ²² Dücèx, na ñuxãcü namecümãxü ya Tupana. Natürü tüxü napoxcu ta ega tama aixcüma yaxögügu. Rü nanapoxcue ga yema duüxügü ga chixexügu yixü, natürü pemaã rü namecüma. Natürü penaxwèxe i guxüguma nüma nanaxwèxexüãcüma pemaxè rü peyaxögü na guxüguma pemaã namecümaèchaxücèx. Erü ngèxguma tama nüma nanaxwèxexüãcüma pemaxègu rü tama peyaxögüechagu, rü tãütáma pemaã namecüma. Rü pexü rü tá ta naxo, rü tá pexü inawogü. ²³ Natürü ngèxguma yaxögüãgu i ngèma Yudíugü i ñuxma maxèxü, rü woo Tupana na nüxü oxü ga noxri, natürü wena táxarü nanade erü nüxü nangèxma i pora na wenaxärü nadeãxücèx ega aixcüma yaxögüãgu. ²⁴ Rü pema na tama Yudíugü na pixíügüxü, rü tama Tupanaärü duüxügü pixígu ga noxrix. Natürü Tupana pexü nade na noxrü pixíügüxücèx. Rü ñuxma na yemaãcü Tupana pexü dexü, rü ngèxguma yaxögüãgu i ngèma Yudíugü, rü Tupana rü pexü nadexüärü yexera tá nüxü natauxcha na nadeãxü i ngèma Yudíugü, yerü woetama norü duüxügüchirèx nixígu ga noxrix.

Wüxi i ngunexü rü guxüma i Yudíugü tá nanayauxgü i maxü i taguma gúxü

²⁵ Pa Chaueneëgü i Yaxögüxüx, nangèxma i wüxi i ore ga noxri tama duüxügüxü nüxü nacuèxèèxü ga Tupana. Natürü chanaxwèxe i nüxü pecuèx i ngèma ore na tama nagu perüxñüèxücèx na duüxügü i nüxü cuèxüchixü pixíügüxü, rü pexicatama Tupana pexü dexü. Rü dücax, noxretama nixí i ngèma Yudíugü i aixcüma yaxögüxü. Rü ngèmaãcü tá nixí ñuxmatáta yaxögüã i guxüma i ngèma togü i duüxügü i Tupana dexü. ²⁶ Natürü ngèmawena rü guxütáma i Yudíugü rü tá ta nayaxögü, rü tá nanayauxgü i maxü i taguma gúxü. Erü Tupanaärü ore i ümatüxüwa rü ñanagürü:

“Yíma Cristu ya ínanguxüxèècü, rü Yudíugütanüwatama ne naxü. Rü nüma rü tá Yudíugüxü chixexüwa ínanguxüxèè. ²⁷ Rü aixcüma norü pecaduwa tá íchananguxüxèè i ngèma Yudíugü. Rü ngèxguma tá nixí na aixcüma chayanguxèèxü i ngèma chorü uneta ga üpaxüchima Abráümaã nüxü chixuxü”,

ñanagürü ga Tupana. ²⁸ Natürü i ñuxma ya Tupana rü Yudíugüxü nadau na norü uwanügü yíxü erü tama nayaxögü i ngèma ore i mexü. Natürü ngèmaãcü naxüpetü na pexü natauxchaxücèx na peyaxögüxü i pema i tama Yudíugü na pixíügüxü. Natürü nüma ya Tupana rü ñuxma rü ta ngèma Yudíugüxü nangechaü yerü nuxcümaügüxü ga norü oxigümaã inaxuneta na nüxü tá nangüxèèxü. ²⁹ Rü ngèxguma Tupana rü tacü i mexümaã inaxunetagu, rü aixcüma nayanguxèè i ngèma, rü taguma nüxü inayarüngüma. Rü ngèxgumarüü ta i ngèxguma texècèx nacaxgu, rü taguma nüxü inayarüngüma i ngèma. ³⁰ Rü pema na tama Yudíugü pixíügüxü, rü üpa rü tama Tupanaga pexñüè. Natürü ñuxma na tama naga naxñüèxü i Yudíugü, rü ngèmacèx Tupanaãxü pengechaütümüügü erü peyaxögü i pemax. ³¹ Rü ngèma pexü ngupetüxürüü nixí i ngèma Yudíugüxü nangupetüxü. Nümagü rü tama Tupanaga naxñüè i ñuxmax, natürü ngèmaãcü nüxü nangupetü na Tupanaãxü pengechaütümüügüxücèx, rü nümagü rü ta Tupanaãxü nangechaütümüügüxücèx i ñuxmax. ³² Yerü nüma ga Tupana rü guxüma ga duüxügümaã nanaxuegu na chixexüwa nangèxmagüxü nagagu

ga norū pecadugū. Natürü yemaäcü namaã nanaxuegu ga Tupana na nüxŭ nangechaŭtümüügüxŭcëx i guxŭma i duŭxŭgü. ³³ Rŭ namexëchi ya tórü Tupana, rŭ poraäcüxŭchima tŭxŭ narüngŭxëë. Rŭ nüma rŭ nüxŭ nacuëxŭchi erŭ guxŭxŭma nacuëx. Rŭ yixema rŭ taxucürŭwama nüxŭ tacuëx i tŭxcüü yŭxŭ i tŭxŭ nadexŭ, rŭ taxucürŭwama nüxŭ tacuëx i guxŭma i ngëma naxŭxŭ i nümax. ³⁴ ¿Erŭ texé i tatanüwa nüxŭ tacuëx i guxŭma i ngëma tórü Cori nagu rŭxŭnŭxŭ? ¿Rŭ texé nüxŭ tacuëx na tórü Corixŭ taxucŭxëxŭ? ³⁵ ¿Rŭ texé tŭxira ŭacŭ rŭ ämare tórü Corina taxã, na yixcama nüxŭ ŭacŭmaã tŭxŭ nataeguxëëäxŭcëx? ³⁶ Erŭ guxŭma i ŭacŭ ingëxmaxŭ rŭ Tupanaxŭtawa ne naxŭ. Rŭ nüma nixŭ ga naxŭäxŭ ga guxŭma na noxrŭ yŭxŭcëx. Rŭ name nixŭ i guxŭguma nüxŭ ticuëxŭgŭ rŭ tanataxëë. Rŭ ngëmaäcü yŭ.

12

Pexŭ chacëëxŭ na pegŭtama Tupanana pexägŭxŭ na wŭxi i ämare i maxŭxŭ na pixŭgŭxŭcëx

¹ Rŭ dücax, Pa Chaueneëgŭx, ñuxäcü Tupana poraäcüxŭchima tamaã namecüma. Rŭ ngëmacëx pexŭ chacëëxŭ na pegŭtama Tupanana pexägŭxŭ na wŭxi i ämare i maxŭxŭ na pixŭgŭxŭcëx. Rŭ ngëma ämare nixŭ i aixcüma napëxewa üunexŭ rŭ namaã nataäëxŭ. Rŭ ngëmaäcü nixŭ ya Tupana i nanaxwëxexŭ na nüxŭ picuëxŭgŭxŭ. ² Rŭ tama name i ñoma i naäncëŭäx i duŭxŭgŭcŭmagu pexŭ. Natürü name nixŭ i Tupanana pegŭ pexägŭ na nüma pexŭ naxŭchicüüxŭcëx rŭ ngëxwacaxŭxŭ i peäë pexŭ ngëxmaxŭcëx rŭ ngëmaäcü naxcëxicatama pemaxëxŭcëx. Rŭ ngëmaäcü tá nüxŭ pecuëx i ŭacŭ nixŭ i Tupana pexŭ naxwëxexŭ na penaxŭxŭ, rŭ ŭacŭ nixŭ i aixcüma mexŭ i napëxewa, rŭ ŭacŭ nixŭ i namaã nataäëxŭ. ³ Rŭ Tupana ya chomaã mecümacü, rŭ choxŭ namu na pemaã nüxŭ chixuxŭcëx i guxäma i pema na tama namexŭ na texé i petanüwa tŭgŭ írŭtaxŭ rŭ tŭgŭgu tarŭxŭnŭxŭ na togŭarŭ yexera tŭxŭ. Natürü name nixŭ na wŭxichigŭ meã tŭgŭ ngugŭarŭ maxŭäxŭ rŭ tŭgŭgu rŭxŭnŭxŭ na ñuxäcü Tupana tŭxna naxäxŭ i tŭmaärŭ cuëx wŭxigu namaã i tŭmaärŭ ö. ⁴ Rŭ dücax, rŭ taxŭnewa nangëxma i taeru rŭ tachacüügŭ rŭ taparagŭ rŭ muxŭma i to i taxŭneärŭ ngëmaxŭgŭ. Rŭ wŭxichigŭ i ngëma taxŭneärŭ ngëmaxŭgŭ rŭ nüxŭ nangëxma i noxrŭtama puracü. ⁵ Rŭ ngëxgumarŭŭ ta i yixema na yaxögŭxŭ, rŭ woo na imuxŭ natürŭ wŭxitama i duŭxŭgŭ tixŭgŭ, erŭ Cristuarŭ duŭxŭgŭ tixŭgŭ. Rŭ ngëmacëx i guxäma i yixema rŭ yigŭmücügŭ tixŭgŭ, erŭ woetama wŭxitama i duŭxŭgŭ tixŭgŭ. ⁶ Rŭ wŭxichigŭ i yixema, rŭ Tupana tŭxna nanaxã i tórü cuëx i nüma nanaxwëxexŭ na tŭxŭ nangëxmaxŭ. Rŭ tanaxwëxe i meãma nagu taxŭ i ngëma cuëx i Tupana tŭxna äxŭ. Rŭ ngëxguma tŭxna naxãägu i tórü cuëx na norŭ orearŭ uruŭ ixŭgŭxŭcëx, rŭ name nixŭ i ngëma ö i tŭxŭ ngëxmaxŭmaã tanaxŭ i ngëma puracü. ⁷ Rŭ ngëxguma tŭxna naxãägu i tórü cuëx na togŭxŭ rŭngŭxëëgŭxŭcëx, rŭ name nixŭ i meãma tanaxŭ i ngëma. Rŭ ngëxguma texëna naxãägu i tŭmaärŭ cuëx na togŭxŭ tangŭxëëxŭcëx, rŭ name nixŭ i meãma tanaxŭ i ngëma. ⁸ Rŭ yixema nüxŭ cuäxe na Tupanaärŭ oremaã togŭxŭ tataäëxëëxŭ, rŭ name nixŭ i meãma tanaxŭ i ngëma. Rŭ yixema nüxŭ cuäxe na togŭmaã tangauxŭ i tŭmaärŭ ngëmaxŭ, rŭ name nixŭ i tŭmaärŭ ngŭchämaã tanaxŭ i ngëma. Rŭ yixema ängacŭ ixŭë rŭ name nixŭ i meãma tayanxëë i ngëma puracü. Rŭ yixema nüxŭ cuäxe na togŭ tŭxŭ ngechaŭtümüügŭxŭ, rŭ name nixŭ i taäëcüma tanaxŭ i ngëma.

Ñuxăcū nanaxwêxe na namaxêxū i duixūgū i Cristuaxū yaxōgūxū

⁹ Rū name nixī i aixcūma meāma pegū pengechaūgū i wūxichigū. ;Rū nūxū pexo i guxūma i tacū i chixexū ixīxū! ;Rū nagu pexī i ngēma aixcūma mexū ixīxū! ¹⁰ Rū name nixī i wūxichigū pegū pengechaūgū, ñoma pegūeneēxūchixū pengechaūxūrū. Rū name nixī i naxcêx pedaugū na ñuxăcū peeneēgūxū petaxêxū rū ñuxăcū pegū perūngūxêxū. ¹¹ Rū tama name i cuxo ega tacū rū puracū cuxū namuxgu ya tōrū Cori. Natūrū name nixī i curū ngūchaūmā cunaxū i norū puracū. ¹² Rū name nixī i petaāgū erū ipenanguxêē na Tupanaxūtawa pengugūxū. Rū ngēxguma tacū rū ngūxū pexū ngupetūgu, rū name nixī i yaxna namaā pexīnūē. ;Rū tama name i nūxū perūchaue na peyumūxēgūxū! ¹³ Rū ngēxguma nūxū pedēuxgu na tacū nūxū taxuxū i ngēma togū i yaxōgūxū, rū name nixī i nūxū perūngūxêē. ;Rū meā penayaxu i ngēma duixūgū i pexūtagu naxīnēxū! ¹⁴ Rū ngēxguma chi texē chixri pemaā ūpetūgu, rū name nixī i tūmacêx peyumūxēgū na meā tūxū naxūpetūxūcêx. Rū ngēmaācū name nixī i Tupanana tūmacêx peca na tūxū nangūxêēxūcêx rū tama tūxū napoxcuxūcêx. ¹⁵ ;Rū wūxigu tūmamaā petaāgū ya yīxema taāgūxē! ;Rū wūxigu tūmamaā pexauxe ya yīxema ngechaūgūxe rū auxexe! ¹⁶ ;Rū meā pegū pengechaūgū i wūxichigū! ;Rū tama pegū picuēxūgū! ;Rū namaā pegū pewūxiguxêē i ngēma tama nūgū icuēxūgūxū! ;Rū tama pegūgu perūxīnūē na togārū yexera nūxū cuēxūchigūxū na pixīgūxū! ¹⁷ Rū ngēxguma texē chixexū pemaā ūxgux, ;rū tāūtama chixexūmā pexūtānū! Natūrū name nixī i naxcêx pedau na mexū pexūxū i guxū i duixūgūpēxewa. ¹⁸ ;Rū naxcêx pedau na guxūma i duixūgūmā meā pemaxêxū rū namaā na iperūngūxmūxūcêx i guxūguma! ¹⁹ Pa Chaueneēgū ya Pexū Changechaūgūxe, tama name i pegūtama pexūtānū ega texē tacū rū chixexū pemaā ūxgu. Natūrū name nixī i Tupanamēxēgu penaxū i ngēma na nūma napoxcūxūcêx. Erū Tupanaārū ore i ūmatūxūwa rū ñanagūrū:

“Rū choxmēxwa nangēxma na duixūgūxū chapoxcuxū i norū chixexūcêx.

Rū choma tá nūxū chanaxūtānū i ngēma duixū i chixexū ūxū”,
ñanagūrū ya tōrū Cori. ²⁰ Rū ngēxguma tacū rū chixexū cumaā naxūxgu i togū,
rū tama name i chixexūmā cunataeguxêē. Natūrū name nixī i nagu quixū i
Tupanaārū ore i ñaxū,

“Rū ngēxguma curū uwanū taiyēxgu, ;rū nachibūxêē! Rū ngēxguma
yaṭawaxgu, ;rū naxaxexêē! Erū ngēxguma ngēmaācū cunaxūxgu, rū
poraācū tá cunaxānēxêē”,

ñaxū. ²¹ Rū ngēxguma togū chixexū cumaā ūxgux, rū name nixī i cuxūāē na
tama chixexūgu cunguxūcêx. Rū name nixī na mexū cuxūxū namaā i ngēma
duixū. Rū ngēmaācū tá icuyanaxoxêē i ngēma chixexū i cumaā naxūxchaūxū.

13

¹ Rū name nixī i guxūma i duixūgū rū meā nōrū āēxgacūga naxīnūē.
Erū Tupana nixī ya nūxū unetacū i guxūma i āēxgacūgū. Erū nataxuma
i āēxgacū i tama Tupana ingucuchixēxū. ² Rū ngēmacêx, texē ya tama
tūmaārū āēxgacūga ñnūchaūxē, rū Tupanaga nixī i tama taxīnūxū. Rū yīxema
tama naga ñnūēchaūxē, rū tá tapoxcūe. ³ Erū ngēma āēxgacūgū rū tama ngēma
mexū ūgūxūārū poxcuruū nixī, natūrū ngēma chixexū ūgūxūārū poxcuruū
nixī. Rū ngēxguma cunaxwēxegu na tama nūxū cumuūxū i wūxi i āēxgacū,
rū name nixī i meā cumaxū. Rū nūma i āēxgacū rū tá cumaā nataāē.
⁴ Erū nūma i āēxgacū rū Tupanaārū ngūxêēruū nixī rū ngēmacêx nanamu

na cuxū nangūxēxūcēx. Natürü ngēxguma chixri cumaūxgu, rü ngēxguma tá waxi nixī i nüxū cumuūxū. Erü nüma i āēxgacū rü tama natüçēxma nixī na nüxū nangēxmaxū i pora na cuxū napoxcuxū. Erü woetama Tupana nanamu na napoxcuāxūcēx i ngēma duūxū i chixri maxūxū. ⁵ Rü ngēmacēx name nixī i naga cuxīnū i curū āēxgacūgū. Rü tama ngēma poxcuxū na cumuūxūcēxicatama nixī i namexū na naga cuxīnūxū, natürü name nixī i naga cuxīnū erü marū nüxū cucuēx na namexū i ngēma. ⁶ Rü ngēmacēx name nixī i meā nüxū penaxūtanū i ngēma dīeru i perū āēxgacūgūcēx ixīxū i ngēma nūmagū naga naxunetaxūēxpūx na nüxū penaxūtanūxūcēx. Erü ngēma āēxgacūgū rü Tupanaāxū nixī i napuracūxū i ngēxguma naxūāgu i ngēma puracū na pemaā inacuāxū. ⁷ Rü wūxichigū i ngēma āēxgacūgū, rü name nixī i nüxna penaxā i ngēma nüxna ūxū. ¡Rü nüxū penaxūtanū i ngēma dīeru i perū āēxgacūgū naga unetaxūēxpūx na nüxū penaxūtanūxū! ¡Rü penaxūx i ngēma ĩāneārū puracū i perū āēxgacūgū pexū muxū na penaxūxūcēx! ¡Rü nüxū pengechaūgū rü naga pexīnūē i ngēma perū āēxgacūgū! Erü ngēmaācū nixī i namexū na penaxūxū. ⁸ Rü tama name i texēaxū ꜥacū pengetanū. Natürü nangēxma i wūxitama i ngetanū i taguma tūxū ingutanūxū. Rü ngēma nixī na yigū ingechaūgūxū. Rü ngēmacēx ya yīxema aixcūma tūmamūcūxū ngechaūxē rü marū tayanguxēē i guxūma i ngēma Tupana tūxū muxū. ⁹ Rü ñanagürü i Tupanaārū mugū:

“¡Rü tāūtáma nai i ngemaā icupe! ¡Rü tāūtáma cumáēta! ¡Rü tāūtáma cunggīx!

¡Rü tāūtáma toguāxārū ngēmaxū cuxū nangūchaū!”

ñanagürü. Natürü ngēma mugū rü guxūma i togū i Tupanaārū mugūmaā rü wūxigu nanu naga i norū ore i ñaxū:

“¡Rü nüxū nangechaū i cumūcū na cugūtama cungechaūxürü!”

ñaxū. ¹⁰ Rü yīxema tūmamūcūxū ngechaūxē, rü taxuūma i chixexū namaā taxū. Rü ngēmacēx i ngēxguma tamūcūxū ingechaūgu, rü aixcūma tayanguxēē i Tupanaārū mugū. ¹¹ Rü name nixī i tanaxū i guxūma i ngēma, erü ñomaūcū rü nangēxma i muxūma i guxchaxūgū. Rü name nixī i pegū ĩpemexēē rü paxa penaxū i tōrū Coriarū puracū. Erü ñuxma rü noxri yaxōgūguarū yexera ningaicamachigū i ngēma ngunexū i naga tá taxcē nataeguxū ya tōrū Cori. ¹² Rü woo na naporaxū i Chataná i ñoma i naānewa i ñuxmax, natürü paxa tá nagux i ngēma, rü paxa tá ĩnangu ya Cristu na nügūxūtawa tūxū nagagūxūcēx. Rü ngēmacēx name nixī i nüxū tarūxoe i guxūma i chixexū ixūgūxū. Rü ñuxma na nüxū icuāxū i Tupanaārū ore, ¡rū ngīxā yigūna tadaugū na tama naga iyixūcēx i ꜥacū rü chixexūgū! ¡Rü ngīxā meā tamaxē na ngēmaācū nüxū rüyexeragūxūcēx i guxūma i chixexū! ¹³ ¡Rü ngīxā mexū taxūgū rü meā tamaxē! Erü aixcūma Cristuarū duūxūgū tixīgū, rü tanaxwēxe i nüma nanaxwēxexūācūma tamaxē. Rü tama name na ingāxēxū rü na naxūgūxū i petagū i chixexū i duūxūgū nawa āūgatanūxū. Rü tama name i tingēāēmare rü ēxna to i chixexū taxūgū, rü bai na yigū ichoxūgagūxū, rü bai i togūchi ixaie xū naxcēx i norū ngēmaxūgū. ¹⁴ Natürü name nixī i nacūmagu pexī ya tōrū Cori ya Ngechuchu ya Cristu, rü nüxna naxcēx peca na pexū nangūxēxūcēx na meā naxcēx pemaxēxūcēx. Rü tama name i naxcēx pedaugū na ñuxācū pexeneārū ngūchaū na pexūgūxū.

14

Tama name i nüxū quixu i cueneē i yaxōxū

¹ Rū ngēxguma petanūgu naxāxchaŭgu i wūxi i peeneē i tama perūū meā Tupanaārū orexū cuāxū, rū name nixī i meā penayaxu. Natūrū tama name i namaā pegū pechoxūga naxcēx i nacūmagū i nagu yaxūxū i Tupanapēxewa. ² Rū dūcax, nangēxma i űuxre i taeneēgū i nagu rūxīnūēxū na namexū na guxūraūxū i ōna nangōxgūxū. Natūrū nangēxma i togū i taeneēgū i tama aixcūma meā Tupanaārū orexū cuēxgūxū i tama namachi ngōxgūchaūxū. Rū nūmagū nūxū nacuēxgūgu rū Tupanapēxewa nachuxu na űacu rū namachi nangōxgūxū, rū ngēmacēx nixī i nabū rū orīxgūxicatama nangōxgūxū. ³ Rū ngēxguma tangēxmagu ya texé ya namachi ngōxē, rū tama name i nūxū taxoox i ngēma togū i duūxūgū i tama namachi ngōxgūxū. Rū ngēxgumarūū ta ya yīxema tama namachi ngōxē, rū tama name na nūxū tixuxū i ngēma duūxūgū i namachi ngōxgūxū, erū nūmagū rū ta Tupanaārū duūxūgū nixīgū. ⁴ ¿Rū texé quixī i cuma rū ngēmacēx nūxū quixu i to i coriarū duūxūgū? Rū dūcax, pemaā nūxū chixu rū ngēma norū cori tá nixī i nangugūxū rū ngoxi mexū naxūx i ngēma norū duūxū, rū ēxna tama. Rū ngēma duūxū rū Tupanapēxewa rū tá name, erū nūma ya tōrū Cori ya Cristu rū nūxū nangēxma i pora na nūgūcēx namexēēāxū i ngēma duūxū. ⁵ Rū dūcax, nangēxma i űuxre i duūxūgū i nagu rūxīnūēxū na ngūxchigaarū ngunexū rū togū i ngunexūārū yexera namexū na nagu Tupanaxū yacuēxūūgūxū. Rū nangēxma i togū i duūxūgū i nagu rūxīnūēxū na guxūma i ngunexūgū rū nawūxiguxū i Tupanapēxewa. Natūrū wūxichigū i yixema rū tanaxwēxe i meā taāēwa nūxū tacuēx na aixcūma Tupanapēxewa namexū i ngēma taxūxū rū tixōxū. ⁶ Rū yīxema duūxē ya űacu rū ngunexū Tupanacēx īxūxūchixe, rū ngēmaācū tanaxū na ngēma ngunexūgū tōrū Corixū ticuēxūūxūcēx. Rū yīxema namachi ngōxē, rū ngēmaācū tanangōx na tōrū Corixū ticuēxūūxūcēx, rū Tupanana moxē taxā naxcēx i ngēma tangōxū. Rū yīxema tama namachi ngōxē, rū ngēmaācū tanaxū na tōrū Corixū ticuēxūūxūcēx, rū tūma rū ta Tupanana moxē taxā naxcēx i ngēma nabū i tangōxū. ⁷ Rū űuxma na űoma i naānema imaxēxū, rū taxūema tūgūcēxtama tamaxū rū ēxna tūgūcēxtama tayu. ⁸ Erū űuxma na imaxēxū, rū tōrū Coriarū ngūchaū na ixūgūūcēx nixī i imaxēxū. Rū ngēxguma iyuegu, rū ngēma rū ta tōrū Corimēxēwa nangēxma. Rū ngēmaācū nūxū tadau rū woo imaxēgu rū ēxna woo iyuegu, rū tōrū Coriarū duūxūgū tixīgū, rū namēxwa tangēxmagū. ⁹ Rū yemacēx nixī ga nayuxū ga Cristu rū wenaxārū namaxūxū na tūmaārū Cori yīūxūcēx ga guxāma ga guxema yaxōgūxe ga marū yuexe rū guxāma ya yīxema yaxōgūxe ya űuxma rū ta maxēxē. ¹⁰ Rū ngēmacēx Pa Chaueneēx, ¿rū tūxcūū i nūxū quixuxū i cueneē i yaxōxū? Rū cumax, Pa To i Chaueneēx, ¿rū tūxcūū i nūxū cuxoxū i cueneē? Erū guxātāma i yixema rū Tupanapēxewa tá tangugū na nūma tūxū nangugūxūcēx rū ngoxi ime rū ēxna tama. ¹¹ Erū Tupanaārū ore i űumatūxūwa rū űanagūrū ya tōrū Cori:

“Ngēma aixcūma na chamaxūxūrūū tá ta nixī i aixcūma guxūtāma i duūxūgū chopēxegu caxāpūxūgūxū, rū guxūtāma choxū icuēxūūgūxū”, űanagūrū. ¹² Rū ngēmaācū nūxū tacuēx na wūxichigū i yixema rū aixcūma tá Tupanapēxewa na ingugūxū na namaā nūxū ixuxūcēx na űuxācū imaxēxū rū űacu na ixūxū.

Tama name i chixexūgu cunanguxēē i cueneē i yaxōxū

¹³ Rū ngēmacēx nixī, Pa Chaueneēgūx, i tama namexū na tamūcūgūxū ix-uechaū. Natūrū narūmemaē nixī i nūxū perūxoe i guxūma i űacu i peeneēgūxū pecadugu yixēēxū rū ēxna norū ōxū chixexēēxū. ¹⁴ Choma nūxū chacuēx rū

nataxuma i ðna i Tupanapēxewa chixexū. Rū aixcūmaxūchi nūxū chacuèx i ngēma erū tórū Cori ya Ngechuchu ya Cristuarū duūxū chixī, rū nūma choxū nūxū nacuèxēē i ngēma. Natūrū ngēxguma chi texé nagu rūxīnūgu na tama Tupanapēxewa namexū i ñacū rū ðna na tangōxū, rū name nixī i noxtacūma tama na tanangōxū ega nagu tarūxīnūgu na tama namexū i ngēma. ¹⁵ Rū ngēxguma ngēma cungōxūcēx tūmaāēwa cunanguxēēgu ya cueneē, rū cumaā nūxū chixu rū tama aixcūma tūxū cungechaū. Rū tama name i ngēma cungōxūgagu chixexūgu tūxū cunguxēē rū tūxū icuyarūtauxēē ya yīxema cueneē ya Cristu tūmacēx yuxe. ¹⁶ Rū ngēmacēx, woo cuxcēx namexgu i ngēma cuxūxū, natūrū tama name na cunaxūamaxū ega ngēmacēx togū tá cuxū ixuxgu na pecadu yīxū i ngēma cuxūxū. ¹⁷ Rū ngēma Tupanapēxewa na imexūcēx rū tama ñacū rū ðna na ingōxū rū ēxna ñacū rū axexū na ixaxūgagu nixī. Natūrū napēxewa na imexūcēx rū tanaxwēxe i Naāē i Üñexūārū ngūxēēmaā meā tayanguxēē i ngēma Tupana naxwēxexū rū yigūmaā itarūngūxmūē rū aixcūma tataāēgū napēxewa ya Tupana. ¹⁸ Rū yīxema ngēmaācū Cristucēx maxūxē, rū Tupana rū tūmamaā nataāē, rū guxūma i duūxūgū rū ta tūmamaā nataāēgū. ¹⁹ Rū ngēmacēx, jngīxā naxcēx tadaugū i guxūma i nacūma i mexū i yigūmaā tūxū rūngūxmūēxēēxū! jRū ngīxā yigū tarūngūxēē na yexeraācū iyaexūcēx i tórū ðwa rū Tupanaārū orewa! ²⁰ Rū tama name i ñacū rū ðna na cungōxūgagu icuyanax-oxēē i Tupanaārū puracū i cueneēārū maxūwa. Rū aixcūma nixī i guxūma i ðnagū i namexū i Tupanapēxewa. Natūrū wūxi i chixexū nixī ega ngēma ðna i ingōxūgagu chixexūgu nayixēēgu i taeneēgū. ²¹ Rū ngēmacēx tama name i cunangōx i namachi, rū ēxna cuyaxaxū ya binu, rū ēxna cunaxū i ñacū i to, ega ngēmagagu chixexūgu cunanguxēēgu i cueneē i yaxōxū. ²² Rū ngēxguma cuma nagu curūxīnūgu na namexū na cunangōxū i ngēxūrūxūmare i ðna, rū Tupanapēxewa rū name nixī i cuxicatama nūxū cucuèx i ngēma. Rū tataāē ya yīxema tūmaāēwa nūxū cuāxe na Tupanapēxewa namexū i ngēma taxūxū. ²³ Natūrū ngēxguma wūxie nagu rūxīnūgu na tama namexū i Tupanapēxewa na ñacū rū ðna na tangōxū, rū pemaā nūxū chixu rū chixexū taxū ega tanangōxomagū, erū tūmaāēwa nagu tarūxīnū na tama aixcūma namexū i ngēma taxūxū. Rū guxūma i ngēma tūmaāēwa nagu tarūxīnūxū na nachixexū rū aixcūma pecadu taxū ega tanaxūmagu.

15

Name nixī i cumūcūxū cutaāxēxēē

¹ Rū yixema na iporaexū i tórū ðwa, rū name nixī i nūxū tarūngūxēē i ngēma tamūcūgū i turaexū i norū ðwa. Rū tama name i yigūguxicatama tarūxīnūē rū tóxrūcēxicatama tadaugū. ² Natūrū wūxichigū i yixema rū name nixī i taeneēāxū tanangūchaūxēē na ngēmaācū nūxū rūngūxēēxūcēx na yexeraācū yaxōxūcēx. ³ Yerū woo ga Cristu rū tama noxrūtama ngūchaū naxū. Natūrū nayanguxēē ga yema Tupanaārū ore ga ñaxū:

“Pa Chaunatūx, rū ngēma duūxūgū i cumaā guxchigagūxū, rū chomaā nixī i naguxchigagūxū”,

ñaxū. ⁴ Rū guxūma ga yema nuxcūma ūmatūxū ga Tupanaārū orewa, rū naxūmatū na tūxū nanguxēēxūcēx na taguma nūxū rūxoexū ega woo ñacū rū guxchaxū tūxū ūpetūgu. Rū yema Tupanaārū ore rū naxūmatū na tūxū nataāēxēēxūcēx rū tūxū nūxū nacuèxēēxūcēx na aixcūma Tupanaārū ixīgūxū.

⁵ Rū Tupana nixī ya tūxū rūngūxēēcū na yaxna namaā ixīnūxūcēx i guxūma

i guxchaxūgū. Rū nūma nixī i tūxū nataāēxēēxū. Rū chanaxwae i nūma ya Tupana pexū narūngūxēē na aixcūma ngēma Cristu pexū naxwaxēūācūma pemaxēxū. ⁶ Rū chanaxwēxe na ngēmaācū pemaxēxū na guxāma i pema rū wūxigu nūxū picuēxūūgūxūcēx ya Tupana ya Nanatū ya tōrū Cori ya Ngechuchu ya Cristu.

Duūxūgū i tama Yudiūgū ixīgūxūmaā nūxū nixu i ore i mexū

⁷ Rū ngēmacēx, yema Cristu pexū na dexūrūū rū name nixī i wūxichigū meā pegū peyaxu na ngēmaācū Tupanaxū yacuēxūūgūxūcēx i duūxūgū. ⁸ Rū pemaā nūxū chixu rū Cristu nūma naxū na Yudiūgūxū yanangūxēēxūcēx, na yemaācū yanguxēēāxūcēx ga yema uneta ga nuxcūmaūgūxū ga tōrū oxigūmaā nūxū yaxuxū ga Tupana. Rū yemaācū ga Cristu rū tūxū nūxū nadauxēē na aixcūmacū na yīxū ya Tupana rū aixcūma yanguxēēāxū i ngēma norū uneta. ⁹ Rū yexgumarūū ta ga Cristu rū nūma naxū naxcēx i ngēma duūxūgū i tama Yudiūgū ixīgūxū na nūmagū rū ta Tupanaxū yacuēxūūgūxūcēx naxcēx na poraācū Tupanaāxū nangechaūtūmūgūxū. Rū yemachiga nixī ga yema Tupanaārū ore ga Dabī ūmatūxū ga űaxū:

“Rū ngēmacēx guxū i nachīūānecūāx i duūxūgūpēxewa tá cuxū chicuēxūū.

Rū tá chorū wiyaewa cuxū chataxēē”,

űaxū. ¹⁰ Rū toxnamana i Tupanaārū ore i ūmatūxūwa rū űanagūrū:

“Pa Duūxūgū i Tama Yudiūgū Ixīgūxū, rū name nixī i pema rū wūxigu chorū duūxūgū i Yudiūgūmaā petaāēgū”,

űanagūrū. ¹¹ Rū toxnamana, rū űanagūrū ta:

“Pa Duūxūgū i Tama Yudiūgū Ixīgūxū, rū name nixī i nūxū picuēxūūgū ya tōrū Cori. Rū Pa Guxūma i Nachīūānecūāx i Duūxūgūx, rū name nixī i penataxēē”,

űanagūrū. ¹² Rū Ichaxīa rū ta nanaxūmatū rū űanagūrū:

“Rū Dabī nanatū ya Ichaīwa tá ne naxū i wūxi i nataa i tá Cristu ixīxū. Rū nūma tá nixī i norū āēxgacū yīxū i guxūma i ngēma duūxūgū i tama Yudiūgū ixīgūxū. Rū ngēma duūxūgū rū tá aixcūma nūxū nayaxōgū rū tá ínananguxēēgū na yimagagu Tupana nūxū rūngūxēēgūxū”,

űanagūrū. ¹³ Rū űuxma i pema na nūxū peyaxōgūxū rū chanaxwēxe i poraācū pexū nataāēxēē ya yima Tupana ya pexū rūngūxēēcū na meā Cristuxū ípenanguxēēgūxūcēx. Rū ngēmaācū i Tupanaāē i Ūūnexū rū tá pexū naporaexēē na yexeraācū Cristuxū ípenanguxēēgūxūcēx. ¹⁴ Pa Chaueneēgūx, meāma nūxū chacuēx na guxū i duūxūgūmaā pemecūmaxū, rū aixcūma Tupanaxū na pecuāxū, rū aixcūma meāma pegū pixucuxēgūxū. ¹⁵ Natūrū űaā poperawa rū meāma pexcēx chanaxūmatū i űuxre i Tupanaārū ucuxēgū, erū tama chanaxwēxe i nūxū ipeyarūngūmaē. Rū tama chamuū na pexcēx chanaxūmatūxū i ngēmachiga yerū Tupana nixī ga choxū mucū na pemaā nūxū chixuxūcēx. ¹⁶ Rū nūma nixī ga choxū namuxū na Ngechuchu ya Cristuarū puracū chaxūxūcēx i natanūwa i ngēma duūxūgū i tama Yudiūgū ixīgūxū. Rū ngēma puracū ga nawa choxū namuxū nixī na ngēma duūxūgūmaā nūxū chixuxū i ore i mexū na Tupanaxūtawa chanagagūxūcēx, na wūxi i āmare i Tupana namaā taāēxū i ngēma duūxūgū i Naāē i Ūūnexū imexēēgūxū.

¹⁷ Rū űuxma na Ngechuchu ya Cristuarū duūxū na chīxū, rū ngēmacēx chataāē namaā i ngēma puracū i Tupanaāxū chaxūxū. ¹⁸⁻¹⁹ Rū űuxma rū yema Cristu chorū maxūwa ūxūchigaxūxīcatama nixī i chixuxū. Rū nūma nixī ga choxū nangūxēēxū na Tupanaxūtawa chanagagūxūcēx ga yema duūxūgū i tama Yudiūgū ixīgūxū, na nūmagū rū ta Tupanaga naxīnūxūcēx.

Rü yemaãcü chorü oremaã, rü chorü puracümaã, rü cuèxruũgü ga taxü ga Tupana üxümaã, rü Naãe i Üünexüãrü poramaã Tupanaxütawa chanagagü ga yema duũxügü. Rü yemaãcü Yerucharéüwa rü guxüwama ñuxmata lliricuarü naãnewa meãma chayanguxëë na nüxü chixuxü ga yema ore i tüxü maxëxëxü i Cristuchiga. ²⁰ Rü yemaãcü chapuracü na nüxü chixuxütcëx ga Tupanaãrü ore i mexü ga ngextä taguma ñuxgu Cristuchigaxü ínaxínüëxüwa ga duũxügü. Yerü tama chanaxwëxe ga marü togü nüxü íxuxüwa rü duũxügü marü nüxü ícuáxüwa nüxü na chixuxü ga yema ore. ²¹ Rü yemachiga nixü ga Tupanaãrü ore ga Ichaxía ümatüxü ga ñaxü:

“Rü yíxema taguma Cristuchigaxü cuèxgüxe, rü taguma nachigaxü ínüëxë, rü tá nüxü tacuëxgü i nachiga”,
ñaxü.

Pauru rü Dumawa naxüxchaü

²² Rü yema toxnamana na chapuracüxütcëx nixü ga taxucürüwa petanüwa chaxüxü woo muëxpüxcünachirëx yëma chaxüxchaü. ²³ Natürü ñuxma na marü chanaguxëëxü i ngëma puracü i toxnamana, rü nagu charüxínü na petanüwa chaxüxü. Yerü ñuxgumamatama nixü ga nagu charüxínüëchaxü na petanüwa chaxüxchaü. ²⁴ Rü ngëxguma Española chaxüxgu, rü nagu charüxínü na woe pexütagu íchidaxü. Rü nagu charüxínü na ñuxre i ngunexü ngëxma petanügu charüxüxü. Rü wüxi i chorü taãe tá nixü i ngëma. Rü ngëmawena rü chanaxwëxe i choxü perüngüxëë na Española chaxüxütcëx. ²⁵ Natürü i ñuxma rü Yerucharéüwa tá chaxü, na ngëma chanangexütcëx i ñuxre i diëru naxcëx i taeneëgü i ngëma ngëxmagüxü. ²⁶ Erü ngëma taeneëgü i yaxögüxü i Machedóniãanewa rü Acayaanewa ngëxmagüxü, rü norü ngüchataãä nagu narüxínüë na ngüxü nanutaquëxëgüxü i ñuxre i diëru na ngëmaãcü nüxü nangüxëëgüxütcëx i taeneëgü i nüxü nataxuxü i Yerucharéüwa ngëxmagüxü. ²⁷ Rü ngëma taeneëgü i Machedóniãcūāx rü Acayacūāx rü norü me nixü na ngëmaãcü naxügüaxü. Rü ngëma duũxügü rü aixcüma nüxü nangëxma i norü ngetanü i taeneëgü i Yudiügütanüwa. Erü ngëma taeneëgü i Yudiügügagu nixü i ngëma togü i duũxügütanüwa nanguxü i Tupanaãrü ore. Rü ñuxma rü name nixü i ngëma togü i duũxügü rü norü ngëmaxümaã taeneëgü i Yudiügü i yaxögüxüxü narüngüxëëgü. ²⁸ Rü ngëxguma chanaguxëëgu i ngëma puracü, rü ngëxguma taeneëgü i Yudiügüna marü ngüxü chaxäxgu i ngëma diëru, rü Española tá chaxü. Rü ngëxguma ngëma chaxüxgu, rü tá woe pexütagu íchidau. ²⁹ Rü nüxü chacuëx rü ngëxguma petanüwa changuxgu, rü wüxigu tá tataãëgü, erü nüma ya Cristu tá tüxü nanaãëxëë i ngëxguma ngëmaãcü wüxiwa ingëxmagügu. ³⁰ Pa Chaueneëgüx, tórü Cori ya Ngechuchu ya Cristuégagu, rü ngëma na Naãëãrü ngüxëëmaã choxü pengechaüxügagu pexü chacëëxü na Tupanana chauxcëx peçaxü i perü yumüxëwa. Rü ngëmaãcü tá choxü perüngüxëë nawa i ñaã puracü i Tupana choxna äxü. ³¹ ¡Rü Tupanana peça na choxü ínapoxüxütcëx nüxna i ngëma Yudiügü i Yudeãanewa ngëxmagüxü i tama yaxögüxü! ¡Rü nüxna peça naxcëx i ngëma taeneëgü i yaxögüxü i Yerucharéüwa ngëxmagüxü, na taãëãcüna nayaxgüãxütcëx i ngëma diëru i ngëma naxcëx changëxü! ³² Rü ngëmaãcü ngëxguma Tupana naxwëxegu, rü taãëãcüma petanüwa tá changu, na wüxigu pemaã chataãëxütcëx. ³³ Rü chanaxwëxe na pemaã inaxüxü ya Tupana ya tüxü taãëxëëcü. Rü ngëmaãcü yíi.

16

Pauru rü nüxü narümoxë ga yema duüxügu ga yaxöguüxü ga Dumawa yexmagüxü

1 Rü ñuxma na petanüwa naxüxchaüxü i taeyëx i Febe, rü pemaã ngüxü chixu rü wüxi i taeyëx i mecü iyixü. Erü ngüma rü nüxü irüngüxëë i ngëma yaxöguüxü i Chëcréaarü ñänewa ngëxmagüxü. 2 Rü chanaxwëxe i meã ngüxü peyaxu, naegagu ya törü Cori ya Ngechuchu, erü ngëma nixü i mexü na penaxüxü namaã i guxüma i yaxöguüxü. Rü chanaxwëxe i guxüma i tacü i ngüxü taxuxüwa rü ngüxü perüngüxëë, erü ngüma rü poraãcü togüxü irüngüxëë, rü choxü rü ta irüngüxëë. 3 Rü nüxü perümoxëgü i Prisila rü Aquiru! Rü nümagü rü chomücgü nixü i Ngechuchu ya Cristuarü puracüwa. 4 Rü nümagü rü äücumaxüwa nichocu na chauëtüwa nachogüexüxcëx, na tama chayuxüxcëx ga chomax. Rü ngëmacëx moxë nüxna chaxã. Rü tama chaxicatama moxë naxcëx nüxna chaxã, natürü moxë nüxna naxägü ta i guxüma i taeneëgü i yaxöguüxü i tama Yudiügü ixüguüxü. 5 Rü nüxü perümoxëgü ta i guxüma i taeneëgü i Aquirupatawa ngutaquëxegüüxü! Rü ngëxgumarüü ta nüxü perümoxëgü ya chomücü ya nüxü changechaücü ya Epenëtu! Rü nüma nixü ga nüxüra Cristuaxü yaxödxü ga Ächiaanewa. 6 Rü ngüxü perümoxëgü i María ga poraãcü petanüwa Tupanaãxü puracü! 7 Rü nüxü perümoxëgü i chautanüxügü i Äüdrünicu rü Yüniã ga wüxigu chomaã poxcuexü! Rü nümagü nixü i yatügü i aixcüma Tupana imugüxü i guxüma i yaxöguüxü nüxü ngechaügüxü. Rü nümagü rü nüxüra chauxüpa Cristuaxü nayaxögu. 8 Rü nüxü perümoxëgü ya Äüpriätu ya chomücü ya nüxü changechaücü ya chauxrüü törü Coriaxü yaxöcü! 9 Rü nüxü perümoxëgü ya Urubãnu ya tomücü ixücü i Cristuarü puracüwa! Rü ngëxgumarüü ta nüxü perümoxëgü ya Estaqui ya nüxü changechaücü! 10 Rü nüxü perümoxëgü ya Apere ya aixcüma tüxü nüxü dauxëëcü na ñuxäcü Cristuaxü yaxödxü! Rü ngëxgumarüü ta nüxü perümoxëgü i Aritüburutanüxügü! 11 Rü nüxü perümoxëgü i chautanüxü i Erudiü! Rü ngëxgumarüü ta nüxü perümoxëgü i Narsichutanüxü i törü Coriaxü yaxöguüxü! 12 Rü ngüxü perümoxëgü i Trifena rü Trifocha! Rü ngümagü rü törü Coriaxü ipuracü. Rü ngëxgumarüü ta ngüxü perümoxëgü i taeyëx i Péchida i ngüxü ingechaügücü! Rü ngüma rü marü poraãcü törü Coriaxü ipuracü. 13 Rü nüxü perümoxëgü ya Rufu ya aixcüma meã törü Coriaxü yaxöcü! Rü ngëxgumarüü ta ngüxü perümoxëgü i naë ga chauerüü chomaã ixücü! 14 Rü nüxü perümoxëgü i Achücritu, rü Peregüte, rü Erme, rü Patroba, rü Erma, rü guxüma i togü i taeneëgü i natanüwa ngëxmagüxü! 15 Rü nüxü perümoxëgü ta i Firöru, rü Yüria, rü Neréu, rü naeyëx, rü Oripa, rü guxüma i togü i taeneëgü i yaxöguüxü i natanüwa ngëxmagüxü! 16 Rü chanaxwëxe i pegü pengechaügüäcüma pegü perümoxëgü i wüxichigü. Rü guxüma i ngëma yaxöguüxü i toxnamana ngëxmagüxü, rü pexü narümoxëgü. 17 Pa Chaueneëgüx, pexü chacëëxü na pegüna pedaugüxüxcëx nüxna i ngëma duüxügü i pexü itoyechaüxü rü chixexügu pexü yixëëgüchaüxü. Erü ngëma duüxügüarü ngüxëëtae rü tama namaã nawüxigu i ngëma ngüxëëtae ga noxri peyaxügüxü ga yexguma noxri peyaxöguü. Rü name nixü i noxtacüma nüxna pixügachi i ngëma duüxügü rü tama natanügu pexägü. 18 Erü ngëma duüxügü rü tama törü Cori ya Ngechuchu ya Cristuarü ngüchaü naxügü, natürü noxrütama ngüchaü nixü i naxügüxü. Rü ore i tauxchaxügümaã nayaxucüxëgü i duüxügü, rü ngëmaäcü nanawomüxëëgü i ngëma duüxügü i tama

meã nüxŭ cuèxgüxŭ. ¹⁹ Rŭ guxŭma i duŭxŭgŭ nüxŭ nacuèxgŭ na aixcŭma meã Tupanaga pexĩnüèxŭ i pemax. Rŭ ngēmacèx pemaã chataãe i chomax. Rŭ chanaxwèxe na meã nüxŭ pecuáxŭ i ŭacŭ nixĩ i mexŭ i Tupanapèxewa na penaxŭxcèx i ngēma. Natŭrŭ ngēma Tupanapèxewa chixexŭ, rŭ jñuxna pixĩgachi na tama nagu peyixŭcèx! ²⁰ Rŭ ngēxguma ngēmaãcŭ meã pemaxègu rŭ nŭma ya Tanatŭ ya Tupana ya tŭxŭ taãèxèècŭ rŭ tá pexŭ naporaexèe na aixcŭma nüxŭ perŭyexeraxŭcèx i Chataná. Rŭ chanaxwèxe i tórŭ Cori ya Ngechuchu ya Cristu pemaã inarŭxãŭx rŭ pexŭ narŭngŭxèe. ²¹ Rŭ pexŭ narŭmoxè ya Timutèu ya chomŭcŭ ixĩcŭ i Tupanaarŭ puracŭwa. Rŭ ngēxgumarŭŭ ta pexŭ narŭmoxègŭ i chautanŭxŭgŭ i Dúchiu, rŭ Yachóŭŭ rŭ Sochĩpatru. ²² Rŭ choma i Téchiu na chanaxŭmatŭxŭ i ñaã popera, rŭ choma rŭ ta pexŭ charŭmoxè naegagu ya tórŭ Cori. ²³ Rŭ pexŭ narŭmoxè ta ya Gayu ya napatawa changèxmacŭ. Rŭ nŭma rŭ inanaxã ya daa napata na nawa nangutaquèxegŭxŭcèx i guxŭma i yaxŭgŭxŭ. Rŭ ngēxgumarŭŭ ta pexŭ narŭmoxègŭ i Eratu i daa ñãnearŭ dīeruarŭ dauruŭ ixĩxŭ, rŭ taeneè i Cuartu. ²⁴ Rŭ chanaxwèxe i tórŭ Cori ya Ngechuchu ya Cristu pexŭ narŭngŭxèe i guxãma i pemax. Rŭ ngēmaãcŭ yĩ.

Pauru rŭ Tupanaxŭ yacuèxŭŭãcŭma nanaguxèe i norŭ popera

²⁵⁻²⁶ jRŭ ñŭxmax, rŭ ngĩxã nüxŭ ticuèxŭŭgŭ ya Tanatŭ ya Tupana! Rŭ nŭma nüxŭ nangèxma i pora na pexŭ naporaexèèxŭcèx na meã peyaxŭgŭamaxŭcèx i ngēma norŭ ore i tŭxŭ maxèxèèxŭ tamaã nüxŭ ixuxŭrŭŭŭ. Rŭ ngēma nixĩ i ore i guxŭwama nüxŭ chixuxŭ rŭ namaã changŭexèètaexŭ i Ngechuchu ya Cristuchiga. Rŭ ngēmatama ore i Cristuchiga rŭ taxchaxwa naxèxŭgu ga noxrix, natŭrŭ i ñŭxma ya Tupana rŭ marŭ tŭxŭ nüxŭ nacuèxèe i ngēma. Rŭ nuxcŭma tauta naãne ŭxgu rŭ Tupanaxĩcatama nüxŭ nacuèx ga yema, natŭrŭ i ñŭxma rŭ norŭ orearŭ uruŭgŭ ŭmatŭxŭ ga orewa taxcèx nanangoxèe. Rŭ ngēma ore rŭ namaã nawŭxigu ga yema ore ga nuxcŭma nüxŭ yaxuxŭ ga Tupana ya guxŭguma maxèchacŭ. Rŭ ñŭxma ya Tupana rŭ guxŭwama nanamugŭ i norŭ orearŭ uruŭgŭ na guxŭ i duŭxŭgŭmaã nüxŭ na yaxugŭexŭcèx i ngēma ore i Cristuchiga na nüxŭ yaxŭgŭãxŭcèx rŭ naga na naxĩnüèxŭcèx. ²⁷ Rŭ nŭma ya Tupana rŭ nüxĩcatama nixĩ i Tupana yĩxŭ, rŭ nüxĩcatama nixĩ i guxŭxŭ nacuáxŭ. jRŭ ñŭxmax, rŭ ngĩxã guxŭguma nüxŭ ticuèxŭŭgŭ, erŭ Nane ya Ngechuchu ya Cristu rŭ poraãcŭ tŭxŭ narŭngŭxèe! Rŭ ngēmaãcŭ yĩ.
Rŭ nuãma pexna,
Pauru

NŪXĪRAŪXŪ GA POPERA GA CORÍTIUCŪĀX GA YAXŌGŪXŪTANŪWA NAMUXŪ GA PAURU

Pauru rŭ nŭxŭ narŭmoxē ga yema yaxŏgŭxŭ ga Corŭtiuarŭ ŭnēwa yex-magŭxŭ

¹⁻² Pa Chaueneēgŭ i CorŭtiucŭĀxgŭx, choma i Pauru nixŭ i Tupana yax-uxŭ norŭ ngŭchaxŭmaā na Ngechuchu ya Cristu norŭ puracŭwa choxŭ namuxŭcēx. Rŭ choma rŭ namaā i taeneē i Chŏtene nixŭ i pexŭ tarŭmŏxēgŭxŭ rŭ pexcēx tanaxŭmatŭxŭ i űaā popera. Pa Chaueneēgŭ ya Tupanaārŭ Ixŭgŭxex, pema rŭ marŭ Tupanapēxewa pixŭŭne yerŭ Ngechuchu ya Cristu marŭ pexŭ nixŭŭnēxēē. Rŭ Tupana rŭ marŭ pexŭ nade na norŭ duŭxŭgŭ pixŭgŭxŭcēx wŭxigu namaā i guxŭma i ngēma duŭxŭgŭ i guxŭwama tŏrŭ Cori ya Ngechuchu ya Cristuxŭ icuēxŭŭgŭxŭ. Rŭ nŭma ya Ngechuchu ya tŏrŭ Cori ixŭcŭ, rŭ ngēma duŭxŭgŭarŭ Cori ta nixŭ. ³ Rŭ chanaxwēxe ya Tanatŭ ya Tupana rŭ tŏrŭ Cori ya Ngechuchu ya Cristu norŭ ngechaxŭgagu poraācŭ pexŭ narŭngŭxēē rŭ pexŭ nataāēxēē.

Tupana tŭxŭ narŭngŭxēē erŭ Cristuarŭ duŭxŭgŭ tixŭgŭ

⁴ Rŭ taguma nŭxŭ charŭchau na Tupanana moxē pexcēx chaxāxŭ. Rŭ moxē nŭxna chaxā naxcēx i ngema ngŭxēē i Ngechuchu ya Cristugagu Tupana pexna āmarexŭ. ⁵ Yerŭ Cristugagu Tupana pexna nanamu ga Naāxē i Ūŭnexŭ na pemaxā inaxāŭxŭcēx. Rŭ pexna nanaxā ga norŭ ore, rŭ naētŭ pexŭ nanatauxchaxēē na nŭxŭ pecuāxŭcēx na űuxŭ űaxŭchiga yixŭxŭ. ⁶ Rŭ yemaācŭ yexguma nŭxŭ pexŭnēgŭ ga yema ore ga Cristuchiga rŭ aixcŭma peyaxŏgŭ. ⁷ Rŭ ngēmacēx i űuxma na űpenanguxēēxŭ na wena tāxarŭ nŭma naxŭxŭ ya tŏrŭ Cori ya Ngechuchu ya Cristu, rŭ Tupana pexna nanaxā i taxŭ i cuēx na taxuŭma pexŭ taxuxŭcēx na naxcēx pemaxēxŭ. ⁸ Rŭ ngēmaācŭ tá pexna nadau ya Tupana űuxmatáta nagŭ i naāne, rŭ guxŭgutáma pexŭ naporaexēē na aixcŭma peyaxŏgŭamaxŭcēx rŭ naxcēx pemaxēxŭcēx, na taxŭema chixexŭmaā pexŭ ixugŭxŭcēx i ngēxguma wenaxārŭ nŭma naxŭxgu ya tŏrŭ Cori ya Ngechuchu ya Cristu. ⁹ Rŭ Tupana rŭ guxŭguma nayanguxēē i norŭ uneta. Rŭ nŭma nixŭ ga pexŭ nadexŭ na aixcŭma Nane ya tŏrŭ Cori ya Ngechuchu ya Cristumŭcŭgŭ pixŭgŭxŭcēx.

Nŭgŭ nitoye ga yema yaxŏgŭxŭ

¹⁰ Pa Chaueneēgŭx, tŏrŭ Cori ya Ngechuchu ya Cristuégagu pexŭ chacēxŭ na wŭxigu pegŭmaā perŭxŭnŭēxŭ rŭ tama pegŭ pitoyexŭcēx. Rŭ name nixŭ i aixcŭma pegŭ pengechaŭgŭ rŭ aixcŭma wŭxigutama perŭxŭnŭē i peāēwa. ¹¹ Pa Chaueneēgŭx, pemaā nŭxŭ chixu i ngēma ore, yerŭ Croetanŭxŭtanŭwa nŭxŭ chacuāchiga ga pegŭmaā na penuēxŭ, rŭ tama aixcŭma wŭxigu na perŭxŭnŭēxŭ. ¹² Rŭ pemaā nŭxŭ chixu i ngēma erŭ űuxre i pema rŭ űaperŭgŭgŭ:

“Choma rŭ Pauruwe charŭxŭ”, űaperŭgŭgŭ. Rŭ togue rŭ:

“Choma rŭ Aporuwe charŭxŭ”, űaperŭgŭgŭ. Rŭ togue rŭ:

“Choma rŭ Pedruwe charŭxŭ”, űaperŭgŭgŭ. Rŭ togue rŭ:

“Choma rŭ Cristuwe charŭxŭ”, űaperŭgŭgŭ. ¹³ ¿Rŭ űuxācŭ nixŭ i ngēma?

¿Pexcēx rŭ Cristu rŭ marŭ niyauxye? ¿Ēxna pema nŭxŭ pecuēxgu rŭ choma

i Pauru chiixũ ga curuchawa pexcèx chipotaxũ rü chayuxũ? ¿Rü êxna pema nũxũ pecuèxgu rü chauégagu yiixũ ga ípebaiũxũ? ¹⁴ Rũ Tupanana moxè chaxã, yerũ taxúema pexũ íchabaiũxèè ga pemax. Rũ Crispu rü Gayuxicatama nixĩ ga íchabaiũxèèxũ. ¹⁵ Rũ ngẽmacèx taxucũrũwa texé tũgũ tixu na chauégagu itabaixũ. ¹⁶ Rũ yemããcũ aixcũma íchanabaiũxèè ga Estéfanatanũxũgũ ta, natũrũ chauxcèx rü taxúema ga togue tũxũ íchabaiũxèè. ¹⁷ Yerũ nũma ga Cristu rü tama choxũ namu ga duũxũgũxũ na íchabaiũxèèxũcèx, natũrũ choxũ namu na duũxũgũmaã nũxũ chixuxũcèx i norũ ore i mexũ i tũxũ maxèxèèxũ. Rũ nanaxwèxe i tauxchaxũ i oremaã nũxũ chixu i ngẽma ore. Erũ ngẽxguma chi ñoma nũxũ cuèxũchixũrũ nũxũ chixuxgu i ngẽma ore, rü ngũrũachi i duũxũgũ rü tá chauguama narũxĩnũè rü tá nũxũ inayarũngũmaè na Cristu yiixũ ga tũxũ maxèxèècũ ga yexguma curuchagu nayuxgux.

Cristuwa nixĩ ga Tupana inawéxũ ga norũ pora rü norũ cuèx

¹⁸ Rũ ngẽma ore na ñuxãcũ tórũ pecaducèx curuchagu nayuxũ ga Cristu, rü wũxi i natũcèxmamare nixĩ naxcèx i ngẽma duũxũgũ i poxcuwa íxũ. Natũrũ yixema na Tupana tũxũ maxèxèèxũ, rü nũxũ tacuèx na ngẽma ore rü Tupanaãrũ pora yiixũ. ¹⁹ Erũ norũ ore i umatũxũwa rü ñanagũrũ ga Tupana: “Rũ tá ichayanaxoxèè i guxũma i norũ cuèx i ngẽma duũxũgũ i nũxũ cuèxũchigũxũ. Rũ tá nũxũ chaxo i ngẽma duũxũgũarũ cuèx”, ñanagũrũ. ²⁰ Rũ ñuxmax, Pa Chaueneègũx, ¿Tupanapèxewa rü tacũwa namexũ i ngẽma duũxũgũ i poraãcũ nũxũ cuèxũchixũ? ¿Rũ tacũwa namexũ i ngẽma duũxũgũ i Moíchè umatũxũ i mugũwa ngxèètaegũxũ? ¿Rũ tacũwa namexũ i ngẽma duũxũgũ i meã nũxũ cuèxgũxũ i ñoma i naãneãrũ cuáchigagu na yadexagũxũ? Erũ guxũma i ngẽma cuèx i duũxũgũ nagu rũxĩnũèxũ rü Tupanacèx rü taxuwama name. ²¹ Natũrũ nũma ya Tupana ya guxũxũma cuãcũ, rü tama nanaxwèxe na ñoma i naãnecũãx i duũxũgũarũ cuãgagu na yiixũ i naxũtawa nangugũxũ i nũmagũ. Natũrũ nanaxwèxe na ngẽma norũ ore i mexũgagu na yiixũ i namaxèxèèãxũ i ngẽma duũxũgũ i yaxõgũxũ woo togũcèx rü natũcèxmamare yixĩgu i ngẽma ore. ²² Ngẽma Yudiũgũ rü nũxũ nadaugũchaũ i cuèxruũgũ i Tupanaãrũ poramaã úxũ. Rũ ngẽma Griégugũ rü naxcèx nadaugũ i ñoma i naãneãrũ cuèx. ²³ Natũrũ ngẽma ore i toma nũxũ tixuxũ, rü Cristu ga curuchawa ipotacũchiga nixĩ. Rũ ngẽma ore rü naãèwa nangux i ngẽma Yudiũgũ. Rũ ngẽma duũxũgũ i tama Yudiũgũ ixĩgũxũcèx rü wũxi i natũcèxmamare nixĩ. ²⁴ Natũrũ ngẽma duũxũgũ i Tupana dexũ i Yudiũgũ rü êxna tama Yudiũgũ ixĩgũxũ rü ngẽma duũxũgũcèx Tupana inanawéx i norũ pora rü norũ cuèx ga yexguma pecaducèx nayuxgu ga Cristu. ²⁵ Rũ yema Tupana úxũ ga yexguma nayuxgu ga Cristu rü muxũma i duũxũgũcèx rü wũxi i ngẽãemare nixĩ. Natũrũ ngẽma Tupana nagu rũxĩnũxũ rü guxũma i ñoma i naãnecũãx i duũxũgũarũ cuèxarũ yexera nixĩ. Rũ yexguma curuchagu nayuxgu ga Cristu rü muxũma ga duũxũgũcèx rü natura ga Tupana ga yexguma. Natũrũ yexguma nixĩ ga inawéãxũ ga ñuxãcũ guxũ i duũxũgũarũ yexera na naporaxũchixũ. ²⁶ Pa Chaueneègũx, name nixĩ i nagu perũxĩnũè na ñuxãcũ Tupana pexũ dexũ na norũ duũxũgũ pixĩgũxũcèx. Rũ noxretama pixĩgũ na nũxũ pecuèxũchixũ ega duũxũgũ pexũ ngugũgu, rü noxretama pixĩgũ na ãèxgacũgũ pixĩgũxũ, rü noxretama pixĩgũ i ngẽma itaarũ dĩeruãxũtanũxũ pixĩgũxũ. Natũrũ woo ngẽma na pixĩgũgu rü Tupana rü pexũ nade na norũ duũxũgũ pixĩgũxũcèx. ²⁷ Rũ Tupana nanade ga yema duũxũgũ ga togũ ga duũxũgũ nũxũ ixuxgu rü taxuũma icuãxũ.

Rū yemaācū nanaxū ga Tupana na naxāneēxēēāxūcēx i ngēma duūxūgū i nūxū icuēxūchixū. Rū Tupana nanade ga yema duūxūgū ga togū nūxū ixuxgu rū turaexū. Rū yemaācū nanaxū ga Tupana na naxāneēxēēāxūcēx i ngēma duūxūgū i poraexū. ²⁸ Rū Tupana nanade ga yema duūxūgū ga togū nūxū oexū, rū ņoma i naānēwa taxuūma ixīgūxū. Rū yemaācū Tupana nanaxāneēxēē i ngēma duūxūgū i ņoma i naanēwa norū ngemaxūgūmaā nūgū icuēxūūgūxū. ²⁹ Rū ngēmacēx taxucūrūwama texé tūgū ticuēxūū i Tupanapēxewa. ³⁰ Rū nūmatama ga Tupana nixī ga Ngechuchu ya Cristuarū duūxūgūxū pexū yaxīgūxēēxū. Rū tatanūwa nanamu ga Cristu na nūma tūxna naxāāxūcēx i cuēx i aixcūma ixīxū, rū pecaduwa tūxū ņanguxūxēēxūcēx. Rū nūma ya Cristu nixī i tūxū namaxēxēēxū rū tūxū yamexēēgūxū na aixcūma ixūūnexūcēx napēxewa ya Tupana. ³¹ Rū ngēmacēx i Tupanaārū ore i ūmatūxūwa rū ņanagūrū:
 “Rū ngēxguma texé tūgū icuēxūūchaūgu rū name nixī i tōrū Corixū ticuēxūū”,
 ņanagūrū.

2

Cristu ga curuchawa ipotacūchiga

¹ Pa Chaueneēgūx, yexguma noxri petanūwa chaxūxgu na pemaā nūxū chixuxūcēx ga Tupanaārū ore i aixcūma ixīxū i Cristuchiga, rū tama ņoma nūxū cuēxūchixūrūūācūma pemaā chidexa, rū tama ore ga guxchaxūmaā nixī ga pemaā nūxū chixuxū. ² Yerū yexguma petanūwa chayexmagu, rū Cristuchigaxūxīcatama nixī ga pemaā chixuxū. Rū taxuūma ga tačū ga togu charūxīnū. Rū yemaācū Ngechuchu ya Cristu ga curuchawa ipotacūgucicatama nixī ga charūxīnūxū. ³ Rū yexguma petanūwa changuxgu rū nūxū chadau ga taxū ga guxchaxūgū ga petanūwa, rū yemacēx poraācū chaxoegaāē rū Tupanapewa chorū muūmaā chidurux. ⁴ Rū yexguma pemaā chideaxgu rū pemaā nūxū chixuxgu ga Tupanaārū ore, rū tama ņoma nūxū cuēxūchixūrūūācūma pemaā nūxū chixu na yemaācū pexū chanangūchaūxēēxū na peyaxōgūxūcēx. Natūrū Tupanaāē i Ūūnexūārū ngūxēēmaā rū Tupanaārū poramaā nixī ga pexū chanangūchaūxēēxū. ⁵ Rū yemaācū Tupanaārū poramaā pemaā nūxū chixu ga yema ore na Tupana-gagu yīxū na nūxū peyaxōgūxū, rū tama ņoma i naānecūāx i duūxūgūarū cuāgaga na yīxū.

Tupana rū Naāē i Ūūnexūwa nūgū tūxū nacuēxēē

⁶ Natūrū pemaā nūxū chixu, rū ngēxguma natanūwa changēxmagu i ngēma duūxūgū i marū meāma yaxōgūxū, rū ngēxguma nixī i chanangūxēēxū i ngēma aixcūma Tupanaārū cuēx i ūūnexū. Natūrū ngēma cuēx rū tama ņoma i naānēwa ne naxū, rū bai i ņoma i naānēārū āēxgacūgū i paxa tá iyarūxoxūwa ne naxū. ⁷ Natūrū ngēma cuēx rū Tupanawa nixī i ne naxūxū. Rū ngēma cuēx nixī ga noxri tauta naāne ūxgu Tupanaxīcatama nūxū cuāxū ga na ņuxācū tá tūxna naxāāxū i maxū i taguma gūxū. ⁸ Natūrū yema Tupana nagu rūxīnūxū, rū taxuūma ga ņoma ga naānecūāx ga āēxgacū nūxū nacuēx. Yerū yexguma chi aixcūma nūxū nacuēxgūgu ga yema Tupana nagu rūxīnūxū rū tāū chima curuchawa nayapotagū ga guma mecū ya tōrū Cori. ⁹ Rū ngemachiga nixī i Tupanaārū ore i ūmatūxūwa i ņaxū:

“Rū ngēma duūxūgū i Tupanaxū ngechaūgūxūcēx, rū nūma nanamexēē i tačū i taxūema nūxū dauxū, rū taguma texé nūxū ņūxū, rū bai i texé nagu rūxīnūxū”,

ñaxũ. ¹⁰ Rũ ngẽma Tupana mexẽxũ naxcèx i ngẽma duũxũgũ i nũxũ ngechaũgũxũ, rũ ñuxma rũ tũxũ nũxũ nacuèxèe i ngẽma, yerũ núma nanamu ga Naãe i Ûünexũ na taxcèx nangoxèèãxũcèx. Rũ ngẽma Naãe i Ûünexũ rũ guxũxũma nacuèx, rũ èjrxũxũ i ngẽma Tupanaxĩcatama nũxũ cuáxũ rũ ta nũxũ nacuèx. ¹¹ Rũ duũxũgũtanũwa rũ çtexé nũxũ tacuèx na çacũgu naxĩnũxũ i wũxi ya yatũ? Rũ naãèxĩcatama nixĩ i nũxũ cuáxũ i ngẽma nagu naxĩnũxũ i ngẽma yatũ. Rũ ngẽxgumarũĩ ta Tupanaãe i Ûünexũxĩcatama nixĩ i nũxũ cuáxũ na çacũgu naxĩnũxũ ya Tupana. ¹² Rũ yixema rũ tama ñoma i naãnecũãx i naãe nixĩ ga iyauxgũxũ. Natürũ tanayauxgũ i ngema Naãe i Ûünexũ ga Tupana taxcèx núma muxũ na aixcũma nũxũ icuáxũcèx i guxũma i ngẽma mexũgũ ga Tupana norũ ngechaũmaã tũxna ãmarexũ. ¹³ Rũ ñuxma na pemaã nũxũ tixuxũ i ngẽmachiga, rũ Tupanaãe i Ûünexũ toxna ãxũ i oremaã nixĩ i pemaã nũxũ tixuxũ. Rũ tama ore i torũ cuèxwa tayaxuxũmaã nixĩ i pemaã nũxũ tixuxũ. Rũ ngẽmaãcũ nũxũ tixu i Tupanaãe i Ûünexũãrũ ore namaã i ngẽma duũxũgũ i aixcũma Tupanaãe nawa ngẽxmagũxũ. ¹⁴ Rũ texé ya tama Tupanaãe i Ûünexũ tũmawa ngẽxmaxè, rũ taxucürũwa tanayaxu i ngẽma Tupanaãe i Ûünexũ tũxũ nguxèèxũ, erũ tũmacèx ya yixema duũxè rũ natũcèxmamare nixĩ. Rũ tama nũxũ tacuèxèga erũ yixema Tupanaãe i Ûünexũ tũmawa ngẽxmaxèxĩcatama tixĩ ya nũxũ cuáxe na tanangugũxũ na ñuxũ ñaxũchiga yĩxũ i ngẽma Tupanaãe i Ûünexũ tũxũ nguxèèxũ. ¹⁵ Rũ yixema duũxè ya Tupanaãe i Ûünexũ tũmawa ngẽxmaxè, rũ meã tanangugũ i guxũma. Natürũ ngẽma togũ i duũxũgũ i tama Tupanaxũ cuèxgũxũ, rũ taxucürũwama tũmaãrũ maxũxũ nangugũ ya yixema duũxè ya aixcũma Tupanaãe tũmawa ngẽxmaxè. ¹⁶ Erũ Tupanaãrũ ore i umatũxũwa rũ ñanagürũ:

“ÇTexé nũxũ tacuèx na çacũgu naxĩnũxũ ya tórũ Cori? ÇRũ texé nũxũ tacuèx na Tupanaxũ taxucũxèxũ?”

ñanagürũ. Natürũ yixema nixĩ i aixcũma nũxũ icuáxũ i ngẽma Cristu nagu rũxĩnũxũ.

3

Pauru rũ Aporu rũ wũxigu Tupanaãxĩ napuraciè

¹ Pa Chaueneègũx, yexguma noxri petanũwa changuxgu, rũ taxucürũwa ngẽma duũxũgũ i Tupanaãe nawa ngẽxmaxũmaã chidexaxũrũũãcũ pemaã chidexa. Natürũ ñoma i naãnecũãx i tama Tupanaxũ cuèxgũxũmaã chideaxgurũĩ nixĩ ga pemaã chidexaxũ. Yerũ pema rũ yexwacèx, peyaxõgũ ga yexguma, rũ yemacèx yexwacèx yaxõgũxũmaã chideaxũrũũãcũ pemaã nũxũ chixu ga Cristuchiga. ²⁻³ Rũ taxchaxũ ga oremaã pexũ changũxèè, ngẽxgumarũĩ i wũxi i õxchana ega noxri nabuxgu rũ naègũnenixũ ya taxchããcũ yaxaxũne nũxna taxã. Rũ yemaãcũ taxchaxũ ga oremaã pemaã nũxũ chixu ga Tupanaãrũ ore ga noxrix, yerũ taxucürũwa nũxũ pecuèxèga ga Tupanaãrũ ore ga guxchaxũ. Rũ ñuxma rũ ta tama nũxũ pecuèxèga i Tupanaãrũ ore i guxchaxũ, erũ ñoma tama yaxõgũxũ i duũxũgürũũtama pemaã. Rũ dũcax, ngẽxguma ñuxma rũ ta pixãũxãchiwèxegu rũ pegũmaã penuègu, rũ ngẽmawa nangox na ngẽma tama yaxõgũxũrũũacũtama nagu perũxĩnũèxũ rũ ñoma i naãnecũãx rũũacũtama na pemaãxèxũ. ⁴ Rũ ngẽxguma petanũwa wũxie ñãgũgu rũ:

“Choma rũ Pauruwe charũxũ”, ñãgũgu, rũ toge rũ:

“Choma rū Aporuwe charūxū”, ñágūgu, rū ngēmawa nūxū tacuèx na ngēma duūxūgū i tama yaxōgūxūrūūācūma na pemaxēxū. ⁵ Rū ngēxguma meā nagu rūxīnūēgu, ¿rū tacū chixī i choma i Paurux? rū ¿tacū nixī i nūma i Aporux? Toma rū Tupanaārū duūxūgūmare tixīgū, rū togagu nixī ga nūxū peyaxōgūxū ga tórū Cori ya Ngechuchu. Rū wūxichigū ga toma rū tanaxū ga yema puracū ga tórū Cori toxna āxū. ⁶ Rū chauxūtawa nixī ga nūxū pexīnūēxū rū peyaxōgūxū ga Tupanaārū ore ga noxrix. Rū Aporu nixī ga pexū rūngūxēēcū na yexeraācū meā peyaxōgūxū ga yema ore. Natūrū Tupana nixī ga pexū maxēxēēcū. ⁷ Rū ngēmacēx woo yīxema tūxira duūxūgūmaā nūxū ixuxe i Tupanaārū ore rū woo yīxema wixwena yexeraācū duūxūgūxū ngúexēxē, rū taxuūma tixīgū. Natūrū Tupana nixī ya guxūma ūcū, erū nūma nixī i duūxūgūxū namaxēxēēxū. ⁸ Rū ngēmaācū ya yīxema tūxira duūxūgūmaā nūxū ixuxe i Tupanaārū ore, rū yīxema wixwena yexeraācū duūxūgūxū ngúexēxē rū tawūxigumare i ngēma puracūwa. Natūrū Tupana rū tá tūxū nanaxūtanū i tūmaārū puracū ya wūxichigū ngēxgumarūū na ñuxācū tanaxūxū i ngema puracū. ⁹ Rū ngēmaācū i toma rū wūxigu Tupanaāxū tapuracūe. Rū ngēmaācū nixī i perū maxūwa napuracūxū ya Tupana na nūma nanaxwēxēxūācūma pixīgūxūcēx. ¹⁰ Rū choma nixī ga Tupana choxū muxū na chaxira pemaā nūxū chixuxūcēx ga Cristuchiga. Rū togū nixī ga chowena yexeraācū pexū ngúexēēxū. Natūrū guxāma ya texé ya naxūxe i ñāā puracū rū name nixī i taxuāē na meā tanaxūxūcēx. ¹¹ Rū ñāā puracū rū Ngechuchu ya Cristuwa nixī ga inaxūgūxū, rū ngēmacēx taxucūrūwama texé tayangucuchixēē i to i tūxū maxēxēēxū. ¹² Rū ñuxma na norū puracū ixūxū i wūxichigū i yīxema, rū tanaxwēxe i taxuāē na aixcūma meā naxūxū i ngēma. Erū yīxema aixcūma meā naxūxe i norū puracū, rū ñoma wūxi i ĩpataarū ūruū i uirumū rū dīerumū rū nuta i mexēchixūmaā ūpataxūrūū tixī. Natūrū yīxema tama aixcūma meā naxūxe i ngēma Cristuarū puracū rū ñoma ĩpataarū ūruū i chixēxū i naī rū naīxātū rū dexnemenēxāmaremaā ūpataxūrūū tixī. ¹³ Natūrū ngēxguma naguxgu i naāne, rū tá nangox na ñuxācū naxūāxū i Tupanaārū puracū i wūxichigū i duūxū. Erū ngēma ngunexūgu rū tá nangēxma ya ūxū ya taxūchine. Rū ñoma tacū ūxūwa iguxūrūū tá nixī i Tupana nūxū na ūxū i wūxichigū i duūxūārū puracū na nūxū nacuāxūcēx ngoxi aixcūma name rū ēxna tama. ¹⁴ Rū yīxema aixcūma meā naxūxe i Cristuarū puracū, rū yima ĩpata ya taixūne ya tama ūxūmaā ixaxūnerūū tá nixī i ngēma tūmaārū puracū. Rū tá Tupanaxūtawa tanayaxu i tūmaārū natanū naxcēx i ngēma taxūxū. ¹⁵ Natūrū yīxema tama aixcūma meā naxūxe i ngēma puracū, rū yima ĩpata ya tama taixūne ya ūxūmaā ixaxūnerūū tá nixī i ngēma tūmaārū puracū. Rū tá ngēxma inayarūxomare i guxūma i ngēma taxūxū. Rū tūxicatama tāūtama tixa ñoma wūxi i duūxū i ūxūemawa iyagoxūrūū. ¹⁶ ¿Tama ēxna nūxū pecuèx i pema rū Tupanapata na pixīgūxū, rū ngema Naāe ya Tupana rū pewa na namaxūxū? ¹⁷ Rū ngēxguma texé pexū chixetanūxēēgu, rū Tupana tá tūxū napoxcu, erū Tupanapata ya nawa namaxūne rū naxūūne. Rū pematama nixī ya yima Tupanapata na pixīgūxū. ¹⁸ Tama name i texé tūgūtama tawomūxēē. Rū ngēxguma petanūwa texé tūgūgu rūxīnūgu na wūxi i duūxū i nūxū cuāxe na tīxū i ñoma i naānēwa, rū name nixī i ñoma taxuūma tacuāxūrūū tūgū tixīxēē. Rū ngēxguma tá nixī i wūxi i duūxū i aixcūma nūxū cuāxe tá tīxū. ¹⁹ Erū ñoma i naānēārū cuèx rū wūxi i ngēāēmare nixī i Tupanacēx. Erū Tupanaārū ore i ūmatūxūwa rū ñanagūrū: “Rū ngēma duūxūgū i nūgūgu rūxīnūēxū na nūxū cuèxūchigūxū yīxū, rū norū

cuèxgutama ínanatüexēē ya Tupana”,
 ñanagürü. ²⁰ Rū toxnamana i Tupanaarü orewa rü ñanagürü ta:
 “Tórü Cori ya Tupana rü nüxü nacuèx na taxuwama namexü i ngēma norü
 ínú i ngēma duüxügü i ñoma i naanewa cuèxwa ngugüxü”,
 ñanagürü. ²¹ Rū ngēmacèx tama name i texé tügü ticuèxüxü ega duüxügüarü
 cuèxwamare tarüxüxgu.. Erü Tupana rü marü pexna nanaxā i guxüma na
 pexrü yixüçèx. ²² Rū ngēmacèx i choma i Pauru, rü taeneē ya Aporu, rü
 taeneē ya Pedru, rü ñoma i naāne, rü torü maxü, rü torü yu, rü ñomatama
 i ngunexü, rü moxüärü ngunexü, rü guxüma i ngēma rü pexrü nixi. ²³ Rū
 pematama rü Cristuarü pixigü. Rū Cristu rü Tupanaärü nixi.

4

Yema ngüexügü ga Ngechuchu imugüxüärü puracüchiga

¹ Rū ngēmacèx tanaxwèxe i tomaā nāgu perüxínüē na Cristuarü pu-
 racütanüxümare na tixigüxü. Rū nūma nixi i toxü namuxü na pexü
 tangüexèxüçèx ga yema ore ga noxri Tupanaxicatama nüxü cuāxü. ² Rū
 ngēxguma texé ñacü rü puracü tüxna āxgu, rü name nixi i aixcüma tayanguxēē
 i ngēma puracü i tüxna taxāxü na ngēmaācü itanawèxüçèx na aixcüma wüxi
 i duüxü i mexü tixixü. ³ Rū ngēmacèx i ñuxma na meā chayanguxēēchaüxü
 i ngēma puracü i Tupana choxna āxü, rü taxucèxma chaugüçèx chaxoegaāē
 ega woo choxna pecagu rü éxna ñacü rü āēxgacügü choxna caxgu naxcèx i
 ngēma puracü i chaxüxü. Rū woo i chomatama rü taxuxüçèxma íchicuēē na
 ngextā chixri chanaxüxü i ngēma puracü. ⁴ Natürü ñuxma na chomatama
 nāgu charüxínüxü na nataxüma i chorü chixexü i Tupanapèxewa, rü tama
 ngēmacèx Tupana choxü nadau na changearü pecaduāxü. Erü nūmatama ya
 tórü Cori ya Tupana nixi i aixcüma choxü nacüaarü maxüāxü. ⁵ Rū ngēmacèx
 tama name na toxü pengugüarü maxüāxü naxüpa na nūma naxüxü ya tórü
 Cori. Natürü name nixi i nüxü ípenanguxēē, erü nūma tá nixi i nangoxēēāxü
 i guxüma i ngēma ñuxma icüxü rü guxüma i ngēma duüxügü naāēwa nāgu
 rüxínüèxü. Rū ngēxguma tá nixi ya Tupana i tümamaā nataāèxü ya wüxichigü
 ya yixema aixcüma mexü ügüxe. ⁶ Pa Chaueneégüx, perü mexüçèx nixi i pe-
 maā nüxü tixuxü i ngēma ore na ngema Tupana naxwèxexüācüma pemaxèxü.
 Rū choma rü Aporu nixi i perü cuèxruügü tixigüxü na towa pengüexü na Tu-
 panaärü ore pemaā nüxü ixuxürüüäcü penaxüxü. Rū ngēmacèx tama name
 na wüxi i perü nguxēētaexümaā petaāégüxü rü to rü nüxü pexoexü. ⁷ Rū
 ñuxma rü pexna chaca, ¿rü texé tixi ya yixema pemaā nüxü ixuxe na togüarü
 yexera pexü ixixèxè? ¿Erü guxüma i ngema cuèx i pexü ngēxmaxü rü Tupana
 pexna nanaxā? Rū ñuxma na nūma pexna naxāāxü i ngēma cuèx ¿rü tüxcüü
 pegü picuèxüügü ñoma pematama perü poramaā penayaxuxürüü? ⁸ Rū
 pegügu perüxínüègu rü aixcüma marü meāma Tupanaxü picuèxüchi rü marü
 pexü nangèxma i guxüma i ñacü i penaxwèxexü na naxütawa pengugüxüçèx.
 Rū pegügu perüxínüègu rü ñoma āēxgacügü i taxürüü pixigü rü taxüma
 toxütawa penaxwèxe i ñuxmax. ¡Chierü aixcüma Tupanapèxewa āēxgacügü
 pixigügu na toma rü ta wüxigu pemaā āēxgacügü na tixigüxüçèx! ⁹ Rū toma na
 Ngechuchu toxü imugüxü, rü chauxcèx rü wixwe toxü nawogü ya Tupana.
 Rū ñoma poxcuexü i yuewa íxürüü tixigü. Rū ñoma wüxi i ñacü i nüxü
 nacugüexürüü tixigü i napèxewa i Tupanaärü orearü ngeruügü i daxüçüüāx,
 rü napèxewa i ñoma i naāneçüāx i duüxügü, rü napèxewa i guxüma i ñacü
 i Tupana üxü. ¹⁰ Rū ñuxma na Cristuwe tarüxixü, rü ngēmacèx taxüma

icuáxū toxū nawogū i duūxūgū, natūrū i pema rū pegūgu perūxīnūēgu rū guxūxūma pecuēx i Cristuchiga. Toma nūxū tacuēx na duūxūgūpēxewa taturaexū, natūrū i pema rū pegūgu perūxīnūē na aixcūma peporaexū. Rū duūxūgū toxū naxo, natūrū pexū nangechaūgū. ¹¹ Rū űuxma rū ta tama inayacuēx na ngxūl tingegūxū, erū űuxma rū ta taiya toxū nangux, rū tītawae, rū tangexchiru. Rū duūxūgū rū chixri tomaā nachopetū, rū tangepata. ¹² Rū tipae na yeūcūrū toxmēxmaā tapuracūeechaxū. Rū duūxūgū rū űacū tomaā nixugūe, natūrū i toma rū mexū i oremaā tanangāxūgū. Rū towe ningēxūtanū, natūrū yaxna namaā taxīnūē. ¹³ Rū chixri tochiga nidezagū, natūrū i toma rū meā nachiga tidexagū. Rū űoma guxchirexū nadaugūxūrūl tomaā nixīgū, rū űoma duūxūgū i taxuwama mexūācū toxū nixīxēē. Rū űuxma rū ta ngemagutama tomaā naarūxīnūe. ¹⁴ Tama pexcēx chanaxūmatū i űaā popera na pexū chaxāneēxēxūcēx. Natūrū pexcēx chanaxūmatū na pexū chixucūxēgūxūcēx chauxacūgūxūchirūl, erū pexū changechaū. ¹⁵ Erū woo nangēxmagu i muxūma i perū nguxēerūgū i Cristuchiga pexū ngūexēxūl, natūrū chaxicatama nixī i penatū chīxū ga Cristuxū na peyaxuxūwa. Yerū chauxūtawa nixī ga noxri ga penayaxuxū ga Ngechuchu ya Cristuarū ore i tūxū maxēxēxū. Rū ngēmacēx chaxicatama nixī i penatū chīxū i perū ōwa. ¹⁶ Rū ngēmacēx pexū chacēēxū na chauxrūxū meā pemaxēxū. ¹⁷ Rū ngēmacēx pexūtawa chanamu ya Timutéu ya poraācū nūxū changechaūcū ya chaune ixīcū i tōrū Coriarū orewa. Rū nūma rū aixcūma meā nayanguxēē i guxūma i ngēma nagu chanamuxū. Rū nūma tá pexna nūxū nacuēxāchixēē na űuxācū Ngechuchu ya Cristu naxwēxexūācūma meā chamaxūxū rū chanangūexēxū ga yema yaxōgūxū ga natanūgu chixūgūxū. ¹⁸ Rū űuxre i pemagū rū pegū picuēxūgū, erū nagu perūxīnūē na tagutāma pexūtawa íchayadauxū. ¹⁹ Natūrū ngēxguma nanaxwēxegu ya tōrū Cori, rū paxa tá ngema chaxū na pexū íchayadauxūcēx. Rū ngēxguma rū tá chomaxūchi nūxū chadau ngoxi ngēma duūxūgū i nūgū icuēxūgūxū nūxū nangēxma i Tupanaarū pora rū ēxna yadoragūmare. ²⁰ Erū Tupanaarū pora rū tama nūxū tixumare, natūrū nagu ítamaxē i ngema pora. ²¹ ¿Rū űuxma rū űacū ēxna nixī i penaxwēxexū i pema? ¿Penaxwēxe na pexū chingagūxū i ngēxguma ngēma changuxgu, rū ēxna penaxwēxe na pexū changechaūācūma rū pemaā chamecūmaācūma pexū na íchayadauxū?

5

Duūxūgū i chixri maxēxūchiga

¹ Rū duūxūgū nūxū nixugūgū rū wūxi i yatū i petanūwa rū naērūcūmaātama naxāmēx. Rū ngēma nixī i pecadu i poraācū chixexūchixūl, erū woo ngēma duūxūgū i tama yaxōgūxūtanūwa rū tama ngēmaācū naxūpetū. ² ¿Rū űuxācū i pema i ngēxguma i pegū picuēxūgūamaxū? Rū narūmemaē chi nixī na poraācū pengechaūgūxū. Rū ngēma yatū i ngēma chixexū xūl rū name nixī na ípenamuxūchixūl i petanūwa. ³ Rū woo tama petanūwa changēxmagu i chomax, natūrū guxūguma pegu charūxīnū. Rū űoma pexūtawa changēxmaxūrūl rū tōrū Cori ya Ngechuchu ya Cristuégagu pemaā nūxū chixu na űacū tá namaā pexūxūl i ngēma duūxū. ⁴ Rū name nixī i tōrū Cori ya Ngechuchu ya Cristuégagu pengutaquēxegū. Rū nūma ya tōrū Cori ya Ngechuchu rū tá napetanūga na pexū naporaxēēxūcēx. Rū choma rū tá pexna chacuēxāchi i chorū yumūxēwa. ⁵ Rū ngēma norū poxcu i tá nūxna pexāxūl i ngēma yatū, rū ngēma tá nixī na ípenamuxūchixūl i petanūwa na Chataná ngxūl nūxū

ingexēēxūcēx. Rū ngēmaācū tá inayarūxo i naxūneārū ngúchaū i chixexū, natūrū naāē rū tá namaxū i ngēxguma wena nūma naxūxgu ya tórū Cori ya Ngechuchu. ⁶ ĴRū tama name i pema rū pegū picuēxūū naxcēx i ngēma pexūxū! ĴTama ēxna nūxū pecuēx i ngēma ore i ñaxū:

“Wūxi i Íraxū i pāūārū puxēēruū rū taxūma i pāūchara nipuxēē”, ñaxū?
⁷ Rū ngēmacēx name nixī i nūxū perūxoe i guxūma i nuxcūmaūxū i pecūma i pexū chixexēēxū. Rū ngēxguma ngēmaācū penaxūxgu, rū ñoma ngexwacaxūxū i pāū i ngearū puxēēruūāxū i Ūpetūchigaarū petawa ingōxūrūū tá pime. Rū ñuxma i pema rū aixcūma ngexwacaxūxū i duūxūgū pixīgū, yerū Cristu rū ñoma wūxi i carnerurūū marū tachicūū tórū pecaducēx nayu. ⁸ Rū ngēmacēx name nixī i nūxū tarūxoe i nuxcūmaūxū i tacūma i chixexūgū rū aixcūma Tupanagu tarūxīnūē rū meā naxcēx tamaxē, erū ngexwacaxūxū i norū duūxūgū tixīgū. ⁹ Nūxīraūxū ga chorū poperawa rū pemaā nūxū chixu na tama natanūgu pexāgūxū i ngēma duūxūgū i naī i ngemaā naxūneārū ngúchaū ūgūxū. ¹⁰ Natūrū yexguma yema ñachagu pexū, rū tama pemaā nūxū chixu na nūxna pixīgachitanūxūchixū i ngēma duūxūgū i tama yaxōgūxū i naī i ngemaā maxēmarexū, rū ēxna ngēma duūxūgū i guxūma i tacū nūgūna nugūchaūgūxū, rū ēxna ngītēēxgūxū, rū ēxna ngēma duūxūgū i tupananetachicūnēxāxū icuēxūgūxū. Erū ngēxguma chí naxchaxwa ípechoūxgu i ngēma duūxūgū, rū chí taxucūrūwa i ñoma i naānewa pengēxmagū. ¹¹ Natūrū yexguma pemaā nūxū chixuxgu na tama natanūgu pexāgūxū i ngēma duūxūgū i chixri maxēxū, rū nachiga chidexa i ngēma duūxūgū i nūgū ixugūxū na peeneēgū i yaxōgūxū na yixīgūxū natūrū naī i ngemaā maxēxū, rū ēxna aūexū, rū ēxna tupananetachicūnēxāxū icuēxūgūxū, rū ēxna oregūtēēxgūxū, rū ēxna ngāxēwēxegūxū, rū ēxna ngītēēxgūxū. Rū ngēma duūxūgū nixī i pemaā nūxū chixuxū na tama namexū na natanūgu pexāgūxū rū bai i namaā na pechibūexū. ¹²⁻¹³ Erū tama choxmēxwa nangēxma na nūxna chaçaxū i ngēma duūxūgū i tama Tupanaāxū yaxōgūxū. Rū Tupana tá nixī ya nūxna çacū i ngēma duūxūgū. Natūrū i pema rū pemēxwa nangēxma na nūxna peçaxū i ngēma peeneēgū i yaxōgūxū i tama meā maxēxū. Rū name nixī i petanūwa ípenamuxūchi i ngēma duūxū i chixri maxūxū.

6

Ngēxguma tacū rū guxchaxū tūxū ngēxmagu taeneēmaā, rū tama name i āēxgacūgū i tama yaxōgūxūpēxewa tayamexēē i ngēma

¹ Rū ngēxguma wūxie i pema pexū nangēxmagu i tacū rū guxchaxū i wūxi i peeneē i yaxōxūmaā, Ĵrū tūxcūū wūxi i āēxgacū i tama yaxōxūārū ngūxēēcēx ípeyaca na nūma pexū namexēēāxūcēx i ngēma perū guxchaxūgū? ĴRū tama ēxna inamexū i ngēma peeneēgū i yaxōgūxū na namexēēgūxū i ngēma perū guxchaxūgū? ² ĴTama ēxna nūxū pecuēx na yixima na yaxōgūxū tá yīixū i naāneārū guxgu nūxna icagūxū i guxūma i ñoma i naānecūāx i duūxūgū? Rū ñuxma na pema tá yīixū i ñoma i naānecūāx i duūxūgūxū picagūxū, Ĵrū tūxcūū taxucūrūwa i pematama penamexēē i ngēma perū guxchaxūgū i Írachiréxū? ³ ĴTama ēxna nūxū pecuēx rū woo ngēma daxūcūāx i Tupanaārū orearū ngeruūgū, rū yixima tá yīixū i nūxū icagūxū? Rū ngēmacēx nixī i yexeraācū pemēxwa nangēxmaxū na ñuxācū penamexēēxū i ngēma guxchaxūgū i ñoma i naānewa pexū ngēxmagūxū. ⁴ Rū ngēmacēx, ngēxguma tacū rū guxchaxū pexū ngēxmagu i ñoma i naānewa, Ĵrū tūxcūū i ngēma āēxgacūgū

i tama yaxōgūxūxtawa pegū ípeyaxuaxūgūxū na pexū namexēēgūāxūcèx i ngēma? ⁵ Rū pemaā nūxū chixu i ngēma ore na pexāneēxūcèx. ¿Ēxna tataxuma i petanūwa ya wūxie ya nūxū cuáxe na tanamexēēxū i ngēma guxchaxūgū i petanūwa ngēmaxū? ⁶ Rū tama pegūmaā penuēxīcatama, natūrū naētū rū āēxgacūgū i tama yaxōgūxūxtawa pexī na penamexēēxūcèx i ngēma perū guxchaxūgū. ⁷ Rū ngēma na pegūmaā penuēxū, rū ngēma rū poraācū chixexū nixī. ¿Rū tūxcūū tama yaxna namaā pexīnūē i ngēma guxchaxūgū i peeneē pemaā ūxū? ¿Rū tūxcūū tama namaā peporae ega texē perū tacūcèx ngīxgux? ⁸ Natūrū i pema rū poraācū chixexū pexūe, erū woo peeneēgū i yaxōgūxūāxū rū ta pengix. ⁹⁻¹⁰ ¿Tama ēxna nūxū pecuèx na ngēma duūxūgū i chixexū ūgūxū rū nataxuxūtāma i nachica i ngextá Tupana āēxgacū íyīxūwa? ¿Rū tama name i pegūtama pewomūxēēgū! Erū ngextá Tupana āēxgacū íyīxūwa rū nataxūtāma i nachica i ngēma duūxūgū i naī i ngēmaā ípexū, rū ngēma duūxūgū i tupananchicūnēxāxū icuèxūūgūxū, rū ngēma duūxūgū i naxmēxēchita rū ēxna natechita ngēāēxū, rū ngēma yatūgū i naxrūū yatūxūmaā ngēāēxū, rū ngēma ngītēēxgūxū, rū ngēma duūxūgū i nūgūnaxica nanuxūchixū i norū ngēmaxūgū, rū ngēma duūxūgū i ngāxewēxegūxū, rū ngēma duūxūgū i oregūtēēxgūxū, rū ngēma duūxūgū i womūxēēwēxegūxū. Rū guxūma i ngēmagū rū nataxūtāma i nachica i ngextá Tupana āēxgacū íyīxūwa. ¹¹ Rū yexgumarūtāma pixīgū ga űuxre ga pema ga űpax. Natūrū i űuxma ya Tupana rū marū pexū ínanapi i perū chixexū na noxrūxīcatama pixīgūxūcèx. Rū űuxma rū aixcūma napēxewa pime yerū Naāē i Ūūnexū rū tórū Cori ya Ngechuchu ya Cristuégagu marū perū pecaduna pexū inanguxūxēē.

Ñuxācū naxūine i taxūne

¹² Rū űuxre i pema rū űaperūgūgū:

“Rū marū name na chanaxūxū i ngēma chanaxwēxexū”, űaperūgūgū. Rū aixcūma nixī i ngēma, natūrū tama guxū i ngēma ixūgūxū rū tūxū name. Rū aixcūma nixī i Tupana choxū ínguxuchixēēxū na chanaxūxūcèx i ngēma chanaxwēxexū, natūrū tama name na tacū rū chixexūgu chaugū changuxēēxū na chomaā inacuáxūcèx. ¹³ Rū ngēxgumarūū ta rū űuxre i duūxūgū rū űanagūrūgū:

“Rū ōna rū taxūnecèx nixī, rū taxūne rū ōnacèx nixī”, űanagūrūgū. Rū aixcūma ngēmaācū nixī, natūrū ya Tupana rū tá inayanaxoxēē i guxūma i ngēma. Rū taxūne rū tama naī i ngēmaā namaā na ingēāmarexūcèx nixī. Erū taxūnemaā nixī i naxūxū i tórū Coriarū ngúchaū. Rū tórū Cori nixī ya taxūnexū maxēēcū. ¹⁴ Rū yema Tupana wena namaxēēxūrūū ga tórū Cori ya Ngechuchu, rū ngēxgumarūū tá ta norū poramaā wena tūxū namaxēēē. ¹⁵ ¿Rū tama ēxna nūxū pecuèx na ngēma pexene rū Cristuarū na yīxū? ¿Rū űuxācū i ngēma chaxune i Cristuarū íxīxū rū ngexū i ngēāēxūmaā inapexū? Taxucūrūwama ngēmaācū nixī. ¹⁶ ¿Rū ēxna tama nūxū pecuèx ega wūxi i ngexū i ngēāēxūmaā inapexgu ya wūxi ya yatū rū ngēma taxre i naxūne rū wūxitama i naxūne yīxū? Erū Tupanaārū ore i ūmatūxūwa rū űanagūrū: “Ngēma taxre i naxūne rū wūxitama i naxūne tá nixī”,

űanagūrū. ¹⁷ Natūrū ngēxguma wūxi i duūxū rū tórū Cori ya Cristuaxū yaxōxgu, rū ngēma naāē i ngēma duūxū rū Cristuāēmaā wūxigutama narūxīnūē. ¹⁸ Rū ngēmacèx name nixī na nūxū perūxoxēxū i pexeneārū ngúchaū na pexūxū. Rū guxūma i togū i pecadu i wūxi i duūxū ūxū rū tama naxūnexū nachixexēē. Natūrū ngēma na naī i ngēmaā nangēāēxū

rū ngēma waxi nixī i naxūnexū chixexēēxū. ¹⁹ ȷTama ēxna nūxū pecuèx i pexene rū Tupanaāē i Ūūnexūpata na yīxū? Rū pegu nixī i naxāchiūxū i ngēma Naāē i Ūūnexū i Tupana pexna muxū. Rū ngēmacèx i pema rū tama pegūarū yoratama pixīgū. ²⁰ Erū Tupana rū marū pexcèx nataxe rū poraācū nūxū petatanū. Rū ngēmacèx penaxwēxe i ngēma pexenemaā meā Tupanacèx pemaxē na ngēmaācū namaā penataxēēxū ya Tupana.

7

Ucuxēgū i āmèxchiga

¹ Rū űuxma rū tá pexū changāxū ga yema āmèxchiga ga choxna naxcèx pecaxū ga perū poperawa. Rū narūmemaē chi nixī i noxtacūma tama naxāmax ya yatū. ² Natūrū ngēma na naxūneārū ngūchaū na naxūgūmarexū i duūxūgū, rū narūmemaē nixī i wūxichigū ya yatū rū na naxāmaxū, rū wūxichigū i nge rū na naxātexū. ³ Rū yima yatū ya āmacū rū taxucūrūwama naxmèxna nūgū ninuxū. Rū ngēma nge i ātecū rū taxucūrūwama ngītena ngīgū iyanuxū. ⁴ Erū ngēma nge i ātecū rū tama ngīgūxūneārū yoratama iyixī, erū ngīte nixī ya ngīxīneārū yora ixīcū. Rū ngēxumarūū ya ngīte rū tama nūgūxūneārū yora nixī, erū naxmèx iyixī i naxūneārū yora ixīcū. ⁵ Rū tama name i wūxi ya yatū rū namèxna nūgū ninuxū, rū ēxna wūxi i ngecū rū ngītena ngīgū iyanuxū, ega tama nūgūmaā namexēēāgu na űuxre i ngunexū tama nūgūmaā namaxēxū naxcèx na nayumūxēgūxū. Rū ngēmawena rū name nixī na wenaxārū noxrirūū nūgūmaā namaxēxū na tama Chatanā nūxna űnūxūcèx na chixexūgu nayixēēāxūcèx. ⁶ Rū guxūma i űnā ore i pemaā nūxū chixuxū i āmèxchiga rū ātechiga rū tama wūxi i mu nixī i ngēma. Natūrū pemaā nūxū chixumare na nūxū pecuāxūcèx na namexū i ngēmaācū na penaxūxū. ⁷ Rū chomatama nagu charūxīnū rū chierū name nixī ega choma chamaxūxūū namaxēgu i guxūma i duūxūgū. Natūrū Tupana rū wūxichigū i duūxūna nanaxā i nacūma na űuxācū namaxēxūcèx rū űuxācū nagu naxīnūxūcèx. Rū ngēmacèx tama guxāma tawūxigu. ⁸ Rū ngēma ngemèxgūxū rū ngetegūxū rū yutegūxū rū namaā nūxū chixu rū narūmemaē nixī i chauxrūū tama naxāmèx rū tama naxāte. ⁹ Natūrū ngēxguma wūxi i duūxū taxucūrūwa naxūneārū ngūchaūmaā naporagu, rū name nixī na naxāmaxū rū ēxna naxātexū. Erū narūmemaē nixī i noxtacūma naxāmèx rū ēxna naxāte na tama ngema norū ngūchaūgagu dūxwa chixexūgu nangūxūcèx. ¹⁰ Natūrū yīxema marū āmaxē rū ātexe, rū tūmamaā nūxū chixu na tama namexū na tūmatexū na itatāxū. Rū ngēma mu rū tōrū Coriarū mu nixī, rū tama choxrū nixī. ¹¹ Natūrū ngēxguma chi ngūrūāchi wūxi i ngexū natexū itēxgu, rū name nixī i noxtacūma nangete rū ēxna wena natecèx nataegu. Rū ngēxumarūū ta ya yatū rū tama name i namèxū inatèx. ¹² Rū űuxma rū choxū nangēxma i wūxi i ore i tūmacèx ya yīxema āmaxē ngīmaā i wūxi i nge i tama yaxōxcū. Rū ngēma ore rū choxrūtama nixī rū tama tōrū Coriarū nixī. Rū ngēxguma wūxi ya yatū ya ōcū ngīmaā āmaxgu i wūxi i nge i tama yaxōxcū, rū tama name i ngīxū inatèx, ega ngīma rū aixcūma namaā naxātechaūgu. ¹³ Rū ngēxguma wūxi i nge i yaxōxcū ātegu namaā ya wūxi ya yatū ya tama yaxōcū, rū tama name i inatèx ya yima ngīte ega nūma ya yima yatū rū aixcūma ngīmaā naxāmèxchaūgu. ¹⁴ Rū yima yatū ya tama yaxōcū, rū namèx i yaxōxcūgagu Tupana nūxū nacuèx. Rū ngēma ngecū i tama yaxōxcū, rū ngīte ya yaxōcūgagu Tupana ngīxū nacuèx. Erū ngēxguma chi tama ngēmaācū yixīgu, rū chi ngēma naxācūgū rū duūxūgū i

tama yaxōgūxūācūgūrūū tā nixīgū. Natūrū i űuxma ya naxācūgū rū marū Tupana tūxū nacuēx. ¹⁵ Natūrū ngēxguma yima yatū ya tama yaxōcū rū namēxū īnatāxchaūgu rū jnoxtacūma ngīxū īnatā! Rū ngēxgumarūū ega ngēma ngecū i tama yaxōcū rū ngītexū īnatāxchaūgu, rū jnoxtacūma ngītexū īnatā! Rū ngēxguma ya yima yatū ya yaxōcū rū marū name ega wena naxāmēxgu. Rū ngēma ngecū i yaxōcū rū marū name ega wena naxātegu. Erū Tupana pexū nade na pegū pengechaūgūxūcēx. ¹⁶ Rū ngēmacēx, Pa Ngecū i Tupanaāxū Yaxōxcūx, rū ngēxguma cute i tama yaxōxū cuxū ītāxchaūgu, namē nixī i tama cunachūxu, erū tama nūxū cucuēx ngoxi tā nūxū cuyaxōxēē i ngēma cute rū ēxna tama. Rū cumax, Pa Yatū ya Yaxōxcūx, rū ngēxguma cuxmēx i tama yaxōxū cuxū ītāxchaūgu, rū name nixī i tama cunachūxu, erū tama nūxū cucuēx ngoxi tā ngīxū cuyaxōxēē i ngēma cuxmēx rū ēxna tama. ¹⁷ Rū űuxma rū pemaā nūxū chixu rū nūma ga Tupana rū wūxichigū ga duūxēna nanaxā ga tūmaārū cuēx na tūmaārū maxūmaā itacuāxūcēx rū meā tanaxūxūcēx i ngēma puracū ga noxri tūxū yexmaxū ga tauta Tupana tūmacēx caxgu. Rū ngēma ngūxēētae nixī i namaā chanangūexēēxū i guxūma i yaxōgūxū i wūxichigū ya tupaucawa ngēxmagūxū. ¹⁸ Rū ngēxguma Tupana naxcēx caxgu i wūxi i duūxū i marū Yudiugūrūū īwiechēxmūpēxechiraūxū, rū nūētama nixī ega ngēmaācūtama yixīgu. Rū ngēxguma Tupana nayaxūgu i wūxi i duūxū i tama īwiechēxmūpēxechiraūxū, rū nūētama nixī ega ngēmaācūtama yixīgu. ¹⁹ Erū Tupanapēxewa rū nūētama nixī ega wūxi i duūxū rū īnawiechēxmūpēxechiraūgu rū ēxna tama. Erū ngēma Tupana aixcūma naxwēxexū nixī na naga naxīnūxū i wūxichigū i duūxū. ²⁰ Rū wūxichigū i duūxū rū name nixī i nawatama napuracū ga yema puracū ga nūxū yexmaxū ga yexguma Tupana noxri naxcēx caxgu. ²¹ Rū yexguma wūxi ga coriarū duūxū quixiyane Tupana cuxcēx caxgu, rū tama name i ngēmacēx cuxoegaāē. Natūrū ngēxguma cuxū natauxchagu na nūxna īcunguxuchixū i ngēma cori, rū marū name na īcunguxuchixū. ²² Rū cuma ga na cucoriāxyane cuxcēx naçaxū ga Tupana, rū name nixī i nūxna cucuēxāchi na Cori ya Cristu pecaduwa cuxū īnguxuchixēēxū. Rū cuma ga na cungearū coriāxyane cuxcēx naçaxū ga Tupana, rū name nixī i nūxna cucuēxāchi na tōrū Cori ya Cristuarū duūxū quīxū i űuxma na nūxū cupuracūxūcēx. ²³ Tupana rū marū pexcēx nataxe rū poraācū nūxū petatanū. jRū ngēmacēx i űuxma rū tāūtāma naga pexīnūē i ngēma duūxūgū i wenaxārū űoma i naāneārū chixexūwa pexū gagūchaūxū! ²⁴ Rū name nixī, Pa Chaueneēgūx, i wūxichigū i pema rū meā Tupanapēxewa penaxūama ga yema puracū ga noxri pexū yexmaxū ga yexguma Tupana pexcēx caxgu. ²⁵ Rū űuxma rū tā pemaā nūxū chixu i nachiga i ngēma duūxūgū i ngemēxgūxū rū ngetegūxū. Rū tōrū Cori ya Ngechuchu rū taxuūma i mu choxna naxā i ngēmachiga. Natūrū tā pemaā nūxū chixu i űuxācū nagu charūxīnū i ngēmachiga. Rū ngēma chorū ore rū aixcūma nixī erū choma nixī i wūxi i duūxū ga nūxū changechaūtūmūūācūma choxū nayaxuxū ga tōrū Cori. ²⁶ Natūrū ngēma űuxma nūxū idauxū i guxchaxūgūgagu rū chauxcēx rū chi name i tama nixāmēx i ngēma yatūgū i ngemēxgūxū. ²⁷ Rū ngēxguma marū cuxāmēxgu rū tama name i ngīxū īcutēx. Natūrū ngēxguma cungeēmēxgu rū name i tama cuxāmēx. ²⁸ Natūrū ngēxguma cuxāmēxgu rū tama pecadu nixī i ngēma. Rū ngēxguma wūxi i paxū ātegu rū tama pecadu nixī i ngēma. Natūrū ngēma ixāmēxgūxū rū ixātegūxū rū tā nayexera i norū guxchaxūgū i űoma i naānewa, rū ngēma nixī i tama chanaxwēxexū na nūxū nangupetūxū. ²⁹ Pa Chaueneēgūx, pemaā nūxū chixu

rū tama muxū i ngunexū tūxū nangēxma na naxūxūcēx i Tupanaārū puracū. Rū ngēmacēx ya yīxema ixāmēxgūxe rū name nixī i meā tanaxūgū i Tupanaārū puracū ñoma tangemēxgūxūrū. ³⁰ Rū yīxema ngexwaca yutanūgūxe rū yīxema peta ūgūxe rū yīxema itaxegūxe, rū tama name i ngēmacēx Tupanaārū puracū na itangēxgūxū. ³¹ Rū yīxema tūxū nangēxmaxē i tūmaārū ngēmaxūgū i ñoma i naānewa, rū tama name i ngēmacēx Tupanaārū puracū na itangēxgūxū. Erū ñoma i naāne i ñuxma nūxū idauxū rū paxa tā nagux. ³² Rū tama chanaxwēxe na ſacūcēx pexoegaāēgūxū. Rū ngēxguma wūxi i yatū ngemēxgu, rū Tupanaārū puracūgu narūxīnū rū nagu narūxīnū na ñuxācū Tupanaārū ngūchaū naxūxū. ³³⁻³⁴ Natūrū ngēxguma naxāmēxgu ya wūxi ya yatū, rū ñoma i naāneārū ngēmāxūgu narūxīnū rū nagu narūxīnū na ñuxācū namēxū nataāxēxū. Rū ngēmaācū muxūgū narūxīnū. Rū ngēxgumarūū ta nixī i ngexūgū. Rū ngēma ngexū i ngetexū rū Tupanaārū puracūgu narūxīnū, erū marū Tupanana nūgū naxā rū guxū i naxūnemaā rū naāēmaā naxcēx namaxū. Natūrū ngēma ngexū i ātexū rū ñoma i naāneārū ngēmāxūgu narūxīnū, rū nagu narūxīnū na ñuxācū natexū nataāxēxū. ³⁵ Rū perū mexūcēx nixī i pemaā nūxū chixuxū i ngēma, rū tama pexna na chanachuxuxūcēx nixī. Natūrū ngēma ñacharūgū na meā pemaxēxūcēx rū aīxcūma penaxūxūcēx i tōrū Coriārū puracū. ³⁶ Rū ngēxguma texē nagu rūxīnūgu na tūmaxācū rū marū na napaxū, rū tūmacēx namexgu na naxātexū, rū marū name i ngīxū taxūte ega aīxcūma tūmacēx namexgu. Rū ngēma na naxātexū i tūmaxācū rū tama pecadu nixī. ³⁷ Natūrū ngēxguma wūxi i yatū nūxū nangēxmagu i norū pacū rū tama nanaxwēxegu na ngīxū naxūtexū, rū ngēma rū ta marū name. Erū naxmēxwa ingēxma rū taxucēxma texē tanachixewe na ngīxū naxūtexūcēx. ³⁸ Rū ngēmawa nūxū tadau rū ngēma yatū i naxācū ngīxū ūtexū rū mexū naxū. Rū ngēma yatū i tama naxācū ngīxū ūtexū rū yexeraxū i mexū naxū. ³⁹ Rū wūxi i nge i ātecū rū ngītemēxēwa ingēxma i ngēxguma namaūxgu ya ngīte. Natūrū ngēxguma nayuxgu ya ngīte, rū marū name ega to i yatū i ngīma ngīxū ngūchaūxūmaā naxātegu. Natūrū inaxwēxe na wūxi ya yatū ya yaxōcūmaā naxātexū. ⁴⁰ Natūrū chauxcēx rū yexeraācū chi itaāē i ngēxguma chi tāū chima wena naxātegu. Rū ngēma ore rū choxrūtama nixī, natūrū nagu charūxīnū rū Tupanaāē i Ūīnexūārū īnū ta nixī.

8

Tupananetachicūnēxāgūna naxuaxūgūxū ga ōnachiga

¹ Ñuxma rū tā pemaā nūxū chixu i nachiga i ngēma ōnagū i ngēma duūxūgū i tama Ngechuchuauxū yaxōgūxū norū tupananetachicūnēxāgūna uaxūgūxū. Rū aīxcūma nixī i wūxichigū i yīxema i meāma nūxū icuāxū i ngēmachiga. Natūrū ngēma nūxū na icuāxūgagu rū ñuxguacū rū yigū namaā ticuēxūxū. Natūrū ngēma na yigū ingechaūxū rū tūxū narūngūxēē na yexeraācū meā yaxōgūchigūxū. ² Rū ngēxguma chi texē nagu rūxīnūgu na ſacūxū tacuāxū, rū name nixī i nūxna tacuēxāchi na ngēxguma rū ta tama aīxcūma nūxū tacuāxū i guxūma i ngēma cuēx i aīxcūma ixīxū. ³ Natūrū ngēxguma texē aīxcūma Tupanaxū ngechaūgu, rū Tupana rū tūxū nacuēx ya yīxema. ⁴ Rū ngēma na nangōxū i ngēma ōnagū i tupananetachicūnēxāgūna naxuaxūgūxū i duūxūgū, rū meāma nūxū tacuēx na taxuwama namēxū i ngēma tupananetachicūnēxāgū erū tama aīxcūma Tupanaxūchi nixīgū. Erū wūxixicatama nixī ya aīxcūma Tupana ixīcū, rū nataxuma ya naī. ⁵ Rū woo duūxūgū nagu narūxīnūe rū nangexma i muxūma i tupanagū i ñoma i naanewa

rū dauxūguxū i naanewa, natūrū taxcèx rū tama ngemaācū nixī. ⁶ Erū yixema nūxū tacuèx na wūxitama yixīxū ya Tupana ya Tanatū ixīcū. Rū nūma ya Tanatū nixī i naxūāxū i guxūma i tacū i ngèxmaxū, rū naxcèx nixī i imaxèxū i yixemax. Rū ngèxgumarūū ta nangèxma i wūxitama ya tórū Cori ya Ngechuchu ya Cristu. Rū yimagagu nixī na nangèxmaxū i guxūma, rū yimagagu nixī i tūxū nangèxmaxū i maxū. ⁷ Natūrū tama guxūma i yaxōgūxū nūxū nacuèx na nangèxmaxū ya wūxitama ya Tupana rū wūxitama ya tórū Cori. Rū űuxre i nūmagū ga űpa rū nūxū nayapue na nūxū yaxōgūāxū i ngēma tupanenetachicūnèxāgū, rū űuxma rū ta tama aixcūma nūxū nacuèxgū i ngēma mexū i Tupana nūxū naxwèxexū. Rū ngēmacèx nixī i űuxma i nagu naxīnūèxū na chixexū naxūgūxū i ngèxguma nangōxgūāgu i ngēma naxūnamachi i togū i duūxūgū norū tupanenetachicūnèxāgūma uaxūgūxū na nūxū namaā yacuèxūūgūxūcèx. ⁸ Rū yixema nūxū tacuèx na tama tacū rū namachi na ingōxūgagu yīxū na Tupana tūxū dexū. Rū tāūtāma yexera time i napèxewa ega nangōxgūgu i ngēma namachi. Rū tāūtāma yexera tichixe i napèxewa ega tama nangōxgūgu. ⁹ Natūrū i pema i nūxū na pecuāxū na tama pecadu yīxū na nangōxū i ngēma namachi, jrū pexuāègū erū ngūrūāchi ngēma na pengōxūgagu chixexūgu tá penayixēē i ngēma peeneègū i tauta aixcūma meā nūxū cuèxgūxū na tacū yīxū i Tupana nūxū naxwèxexū! ¹⁰ Erū cuma na meā Tupanaxū cucuāxū, rū ngèxguma chi cunangōxgu i ngēma namachi i ngextā tupanenetachicūnèxāgūxū iyacuèxūūgūxūtwa, rū ngūrūāchi wūxi i cueneē i tauta meā Tupanaxū cuāxū tá cuxū nadau. Rū ngūrūāchi nūma rū tá ta nanangōx i ngēma namachi woo naāèwa nagu naxīnūgu na wūxi i chixexū yīxū na nangōxū i ngēma namachi. ¹¹ Rū ngēmaācū i cuma na meā Tupanaxū cucuāxū, rū tá icuyanatauxēē i ngēma cueneē i Cristu naxcèx yuxū i tauta meā Tupanaxū cuāxū. ¹² Rū ngēmacèx i ngèxguma chixexūgu cunanguxēèxgu i ngēma cueneē i tauta meā Tupanaxū cuāxū, rū Cristumaā rū ta chixexū cuxū. ¹³ Rū ngēmacèx i ngèxguma ngēma namachi i changōxūgagu chixexūgu chananguxēèxgu i chaueneē, rū narūmemaē nixī i noxtacūma taguma namachi changōx na tama pecadugu chananguxēèxūcèx i ngēma chaueneē.

9

Yixema Cristu tūxū muxē na nūxū tapuracixūcèx, rū tūxna naxū i tūmaārū natanū

¹ Rū pemaā nūxū chixu rū tórū Coritama nixī ya choxū yaxucū rū choxū mucū na norū puracū chaxūxūcèx, rū ngēmacèx taxuūma i duūxūgūmèxèwa changèxma i űuxmax. Rū chomatama chauxetūmaā tórū Cori ya Ngechuchuxū chadau, rū ngēma puracū i nūxū chaxūxūgagu nixī i peyaxōgūxū i pemax. ² Rū woo togū i duūxūgū tama choxū cuèxgūchaūgu na tórū Cori choxū muxū, natūrū i pema rū meāma nūxū pecuèx na nūma yīxū ga choxū namuxū. Yerū chauxūtawa nixī ga tórū Coriaxū peyaxōgūxū, rū ngēmawa nūxū pecuèx na aixcūma yīxū na nūma choxū namuxū. ³⁻⁴ Rū űaā nixī i chorū dexa i namaā chanangāxūxū i ngēma duūxūgū i chauchiga idexagūxū:

“ĴĒxna tama name na duūxūgū choxna naxāxū i chorū ðna rū chorū axexū naxcèx i chorū puracū? ⁵ ĴĒxna tama inamexū ta na wūxi i ngexū i yaxōxūmaā na chaxāmaxū na chayagaxūcèx ngèxgumarūū na naxāmaxū i Pedru, rū naēneègū ya tórū Cori, rū ngēma togū i yatūgū i Tupana

imugūxū? ⁶ ĶRū ěxna pema nagu perūxīnūēgu rū choma rū Bernabéxicatama i tama namexū na toxū perūngūxēēgūxū ngēma togū i orearū uruūgūxū na perūngūxēēgūxūrū? ⁷ ĶTacū rū duūxū i churarawa ūxū i nūgūxūltama naxūtanūxū i norū ōna? ĶRū tacū rū duūxū i orix itoxū i tama namūxū i norū o? ĶRū tacū rū duūxū i carnerugūna dauxū i tama nagūnenixū ne ixaxūxū? Ngēma űacharūgū nūxū i ngēma duūxūgū i chauchiga idexagūxū. ⁸ ĶRū űuxma rū tāūtāma nagu perūxīnūē na chorū orexicatama yīxū i űāā nūxū chixuxū! Erū Tupanaārū ore ga Moīché ūmatūxūwa rū ta ngēma űanagūrū. ⁹ Erū ngēma ore rū űanagūrū:

“ĶRū ngēma woca i aruchuarū putēxewa puracūxū, rū tāūtāma cunawēxnagu na tama yima aruchua naxibūxūcēx!”

űanagūrū i ngēma ore. Rū nūxū tacuēx na tama wocagūgu naxīnūxū ga Tupana ga yexguma yema űaxgu. ¹⁰ Natūrū pemaā nūxū chixu rū tagu nixī ga naxīnūxū ga yexguma yema űaxgu ga Tupana. Rū tachiga nixī ga naxūmatūxū ga yema ore. Erū yīxema aruchunecū ūxe rū yīxema norū oarū puxwa puracūxe, rū ngēxguma tapuracūeyane rū tanaxwēxegū na itananguxēēgūxū i ngēma norū o i tūxna ūxū. ¹¹ Rū toma rū wūxi ya nanetūchire ya itatoxūnerū tixīgū ga yexguma pemaā nūxū tixuxgu ga Tupanaārū ore. ĶRū űuxma rū tama ěxna i pexcēx namexū na toxna penaxāxū i tacū i toxū taxuxū? ¹² Rū ngēxguma ngēma togū i orearū uruūgū petanūwa nayauxgūgu i ngēma nūxū taxuxū, rū maneca toma rū yexera name nixī i petanūwa tanayaxu i ngēma toxū taxuxū. Natūrū i toma rū tama ngēmaācū tanaxū. Erū toma rū guxū i guxchaxūmaā taporae na tama pexū tanaguxchaxēēxūcēx na Cristuaxū peyaxōgūxū. ¹³ Pema nūxū pecuēx rū guxūma i duūxūgū i tupauca ya taxūnewa puracūexū, rū ngēma ōna ya yima tupaucawa ngēxmaxūltama nangōxgū. Rū ngēma duūxūgū i tupaucagu Tupanacēx naxūnagū dējxū, rū nanade i űuxre i ngēma namachi norū ngōxruū. ¹⁴ Rū ngēxgumarū ta ya yīxema nūxū ixugūxe i ore i tūxū maxēxēēxū, rū tōrū Cori nūxū nixu rū name nixī i tanayauxtanū i ngema tūmaarū puracū. ¹⁵ Natūrū i choma rū taguma ngēmaācū chanaxū. Rū űuxma na pexcēx chanaxūmatūxū i űāā popera, rū tama tacū choxna pexāxūcēx nixī. Erū ngēma na taguma texēxūtawa tacūcēx íchaxaxū, rū wūxi i chorū taāē nixī. Rū narūmemaē chierū nixī na chayuxū naxūpa na texē choxna nayaxuxū i űāā taāē i choxū ngēxmaxū. ¹⁶ Rū űuxma na nūxū chixuxū i ngēma ore i tūxū maxēxēēxū, rū taguma ngēmacēx chaugū chicuēxū. Erū woetama ngēma nixī i chorū puracū ga Tupana choxna āxū, rū ngēmacēx taxacūrūwama chanangexrū. Erū poraācū chi chachixēxūgu i ngēxguma tāū chima nūxū chixuxgu. ¹⁷ Rū ngēxguma chi chaugagu chitama chanaxūxgu i ngēma puracū, rū nagu chi charūxīnū na choxū naxātanūxū. Natūrū ngēxguma Tupana choxū muxūācūma chanaxūxgu, rū chanaxūama erū woetama ngēma nixī i chorū puracū ga Tupana choxna āxū. ¹⁸ ĶRū űuxma rū tacū tā nixī i chorū natanū naxcēx i ngēma puracū i chaxūxū? Rū dūcax, rū chorū natanū nixī i ngēma taāē i chayaxuxū i ngēxguma ngetanūācūma nūxū chixuxgu i ngēma ore i tūxū maxēxēēxū. Rū ngēmaācū woo Tupanapēxewa name na petanūwa chanayaxuxū i chorū natanū na ngēmamaā chamaxūxūcēx, natūrū taguma texena naxcēx chaca. ¹⁹ Rū woo taxūxēmēxēwa changēxma i chomax, natūrū guxāmēxēwa chaugū changēxmaxēē, na ngēmaācū yexeraācū muxūma i duūxūgū xū charūngūxēēxūcēx na Cristuaxū yaxōgūāxūcēx. ²⁰ Rū ngēxguma chautanūxū i Yudīgūtanūwa changēxmagu, rū namaā chaugū chawūxiguēē na ngēmaācū nūxū charūngūxēēxūcēx na Cristuaxū yaxōgūāxūcēx. Rū woo tama yema

Moīché ūmatūxū ga mugūtūūwa changēxmagu, natūrū chayanguxēēāma i ngēma mugū na ngēmaācū Cristuxūtawa chanagagūxū i ngēma duūxūgū i űuxma rū ta nagu īxū i ngēma mugū ga Moīché ūmatūxū. ²¹ Rū ngēxguma natanūwa changēxmagu i ngēma duūxūgū i tama Yudiūgū īxīgūxū, rū ngēma duūxūgūmaā chaugū chawūxīguxēē na ngēmaācū nūxū charūngūxēēxūcēx na Cristuaxū yaxōgūāxūcēx. Natūrū taguma īchanangēx i Tupanaārū mugū erū guxūguma Cristuarū mugūtūūwa changēxma. ²² Rū ngēxguma natanūwa changēxmagu i ngēma duūxūgū i tama poraācū Cristuchigaxū cuēxgūxū, rū choma rū ta ngēma duūxūgūmaā chaugū chawūxīguxēē, na ngēmaācū nūxū charūngūxēēxūcēx na Cristuaxū yaxōgūāxūcēx. Rū ngēmaācū guxūma i duūxūgūrūū chaugū chixīxēē, rū nagūxūraūācūma naxcēx chadau na ngēmaācū dūxwa Tupanaxūtawa chanagagūxūcēx i űuxre i nūmagū. ²³ Rū ngēmaācū nixī i chapuracūxū na guxūwama nanguxūcēx i ngēma ore i tūxū maxēxēēxū. Erū chanaxwēxe na choma rū ta choxū nangēxmaxū i ngēma maxū i taguma gūxū, naxrūū i guxūma i ngēma duūxūgū i nūxū yaxōgūxū. ²⁴ Pema rū meāma nūxū pecuēx i wūxi i inūca i nawa īñaāchixū rū muxūma īnaxūāchi, natūrū wūxīxīcatama nixī i ngēma nūxīra īnguxū rū nayaxuxū i norū āmare. Rū name nixī i pegūna pedau na Tupana pexna naxāxūcēx i ngēma perū āmare. ²⁵ Guxūma i ngēma duūxūgū i nūgū ngūxēēxū naxcēx i wūxi i inūca na togegūxū naporamaexūcēx, rū meā nūgūna nadaugū na ngēmaācū nayauxgūāxūcēx i norū āmare i paxaāchirūū īxīxū. Natūrū yixema na yaxōgūxū rū yigūna tadaugū na meā naxūgūxūcēx rū meā īmaxēxūcēx na nayauxgūxūcēx i tōrū āmare i taguma gūxū. ²⁶ Rū ngēmacēx i choma rū tama űoma chauēchitamare chīñaxūrūū chixī, rū tama űoma űacū i nūgū dēixū i ngūrūanegumare īdagūxūrūū chixī. ²⁷ Rū ngēmacēx meā chaugūmaā īchacuēx na taxūma i chaxoneārū ngūchaū chaxūxūcēx. Erū tama chanaxwēxe i mexūmaā togūxū changuxēēchirēxācūma chixexū chaxū rū ngemagagu tama chanayaxu i chorū āmare.

10

Nayaxucūxēgū na tama nūxū yacuēxūūgūxūcēx i tupananetachicūnēāgū

¹ Pa Chaueneēgūx, chanaxwēxe i nūxna pecuēxāchie ga űacū nūxū na ngu-petūxū ga yema nuxcūmaūgūxū ga tōrū oxīgū ga Moīchéwe rūxīxū. Rū pema nūxū pecuēx rū yexguma nawe naxīxgu rū wūxi ga caixanexū napēxegu nixū rū nayadūxū. Rū guxūma ga yema duūxūgū rū wūxīgu Moīchémaā natūūgu nixīxūtanū. Rū yexgumarūū ta Moīchémaā nawa nichoū ga yema Taxtū ga Dauchiūxū. ² Rū guxūma ga yema duūxūgū rū yexguma wūxīgu Moīchémaā yema caixanexūpechitatūūgu yaxīxūtanūgu rū yema Taxtū ga Dauchiūxūwa yachoūgu, rū yemaācū nūgū nangoxēēgū na Moīchéweama naxīxū. ³ Rū yexgumarūū ta ga guxūma ga yema duūxūgū nanangōxgū ga yema pāu ga daxūwa rūyīxū. ⁴ Rū guxūma ga yema duūxūgū nayax-xgū ga yema dexá ga Cristu nūxna āxū. Yerū Cristu rū yema duūxūgūxū īnixūmūcū ga yema īnaxīūwa, rū nūxna nanaxā ga yema dexá ga yax-xgūxū. ⁵ Natūrū narūmumaē ga yema duūxūgū ga tama Tupanaārū ngūchaū ūgūxū. Rū yemacēx ga yema duūxūgū rū yexma nayue rū yēma nawogū ga naxūnegū ga dauxchitawa ga taxūema īxāpataxūwa. ⁶ Rū guxūma ga yema nangupetū na tōrū cuēxruū yīxūcē rū tama tōrū oxīgūrūxū chixexūcēxama

idaugūxcēx. ⁷ Rū ngēmācēx tama name i nūxū picuēxūūgū i tacū rū tupanetachicūnēxāgū, yexgumarūū ga űuxre ga nūmagū naxūgūxūrūū. Erū Tupanaārū ore i űmatūxūwa rū tōrū oxīgūchigaxū nixu rū űanagūrū:

“Rū duūxūgū űnarūtogū na nachibūexūcēx rū na naxaxegūxcēx, rū ngēmawena rū inachigū na űyayūxexūcēx”,

űanagūrū i ngēma ore. ⁸ Rū tama name i yixema rū naī i ngemaā itape yexgumarūū ga űuxre ga nūmagū naxūgūxūrūū. Rū yemācēx wūxitama ga ngunexūgu rū nayue ga 23,000. ⁹ Rū tama name i nūxū taxū ya tōrū Cori na űuxācū yaxna tamaā naxīnūxū yexgumarūū ga űuxre ga nūmagū naxūgūxūrūū. Rū yemācēx nixī ga yema duūxūgūxū nangōxcuxū ga āxtapegū rū nayuexū.

¹⁰ Rū tama name i chixexū Tupanamaā pixugū yema űuxre ga nuxcūmaūgūxū ga tōrū oxīgūrūū. Rū yemācēx ga Tupanaārū orearū ngerūū ga daxūcūāx rū nanadai. ¹¹ Rū guxūma ga yema nuxcūmaxūgūxū ga duūxūgūxū ngupetūxū, rū űomāxūcūū rū tōrū cuēxruū nixī. Rū naxūmatū na ngēmawa nūxū icuāxūcēx na űuxācū Tupana naxwēxexū na imaxēxū i yixema i űomaūcūū. ¹² Rū ngēmācēx ya yixema tūgūgu rūxīnūxē na taporaxū i Tupanapēxewa, rū name nixī na meā tūgūna tadauxū na tama chixexūgu tanguxūcēx.

¹³ Rū űuxma rū ta taguma pexcēx űnangu i ngūchaxū i chixexū i taxucūrūwama namaā yaxna pexīnūxū. Rū name nixī i Tupanana perūyoū erū nūma rū aixcūma nayanguxēē i ngema tamaā inaxunetaxū rū taxūtāma nawa pexū nawogū i ngūchaxūgū i taxucūrūwama yaxna namaā pexīnūxū. Natūrū ngexguma tā ngūchaxūgū i chixexū pexcēx űnguxgu rū nūma rū tā pexū űnapoxū na tama nagu peyixūcēx. ¹⁴ Rū ngēmācēx, Pa Chauenēgū ya Pexū Changechaūgūxex, űrū nūxū perūxoe i ngema nacūmagū i tupanetachicūnēxāgūcēx naxūgūxū i ngema duūxūgū i tama yaxōgūxū!

¹⁵ Pemaā nūxū chixu i ngēma ore, erū chauxcēx rū duūxūgū i nūxū cuāxū pixīgū. Rū pema tātama nagu perūxīnūē i ngēma pemaā nūxū chixuxū. ¹⁶ Rū ngēxguma űna i űūnēxcēx űngutaquēxegūgu, rū yaxaxgūgu ya yima binu ya űūnecū rū moxē naxcēx ixāgūgu, rū ngēmaācū yīgū tangoxēē na Cristu ya taxcēx nagū ibacūwe rūxīxū. Rū ngēxguma nangōxgūgu i ngēma pāū i űbūcuxū, rū ngēmaācū yīgū tangoxēē na Cristu ya taxcēx naxūne ixācūwe rūxīxū. ¹⁷ Rū woo na imuxū i yixema, natūrū wūxitama i pāū tangōxgū. Rū ngēmaācū nixī i wūxitama ixīgūxū erū wūxiwetama tarūxī. ¹⁸ űRū dūcax i ngēma Yudiūgū i nangōxgūxū i ngēma naxūnamachi i Tupanacēx nadējūxū!

Rū ngēxguma wūxigu nūgūmaā nangōxgūāgu, rū guxūma i ngēma nangōxgūxū rū ngēmaācū nūgū nangoxēē na wūxigu Tupanawe naxīxū. ¹⁹ Rū űuxma na ngēma űnaxaxū, rū tama chanaxwēxe i nagu perūxīnūē na naxūūnēxū i ngēma namachi i ngēma duūxūgū i tama yaxōgūxū norū tupanetachicūnēxācēx dējūxū. Rū tama chanaxwēxe i nagu perūxīnūē na tacūwa namexū i ngēma norū tupanetachicūnēxāgū, erū nangearū maxūāx. ²⁰ Natūrū pemaā nūxū chixu rū ngēxguma ngēma duūxūgū i tama Tupanaxū cuēxgūxū, norū tupanetachicūnēxācēx nadaiāgu i tacū rū naxūna, rū tama Tupanacēx nixī i nadaiāxū, natūrū ngoxogūcēx nixī i nadaiāxū. Rū tama chanaxwēxe i ngoxogūtanūxūxū pegū pixīgūxēē. ²¹ Rū pema na peyaxaxgūxū ya yima binu ya tōrū Corixū namaā picuēxūūgūcū rū taxucūrūwama namaā pexāmūcū i ngēma duūxūgū i Chatanāwe rūxīxū. Rū pema na tōrū Coriarū mechawa penangōxū i ngēma űna i nūxū namaā picuēxūūgūxū rū taxucūrūwama ngēma duūxūgū i Chatanāwe rūxīxūārū mechawa peyachibūe. ²² űRū űuxū űnapegūxū i űuxmax?

űĒxna penanuxēēchaū ya tōrū Cori? űĒxna pexcēx rū nūxū

tarūporamaēgū i yixemax?

Name nixī i taeneēarū mexūc èx tadaugū rū tama i tóxrūtama

²³ Pema rū ñaperūgūgū:

“Marū name na tanaxūxū i ñacū i tanaxwèxegūxū”, ñaperūgūgū. Rū aixcūma nixī i ngēma, natūrū tama tūxū name i guxūma i ngēma ixūxchaūxū. Rū ngēmaācū Cristu tūxū ñanguxūxēē na naxūxūcèx i ngēma inaxwèxexū, natūrū tama guxūma i ngēma ixūxū tūxū narūngūxēē na yexeraācū meā yaxōgūamachigūxūcèx. ²⁴ Rū tama name nixī i tóxrūtama mexūcèx tadaugū, natūrū name nixī i togūarū mexūcèx tadaugū. ²⁵ Rū marū name i penangōx i nagūxūraūxū i namachi i namaā nataxegūxū, natūrū taxucèxma tūxcūū naxcèx ípeca ngoxi marū tupananetagūxū namaā yacuèxūxūgūxū i namachi yixī. ²⁶ Erū ñoma i naāne rū guxūma i nawa ngēxmaxū, rū tórū Cori ya Tupanaarū nixī. ²⁷ Rū ngēxguma chi wūxi i duūxū i tama yaxōxū pexna uxgu na naxūtawa peyachibūexūcèx, rū chi ngēma pexīxgu, rū marū name i penangōx i guxūma i ñna i pepēxegu yaxūxūchixū. Rū taxucèxma tūxcūū naxcèx pexoegaāē rū nūxna peca na ngextā ne naxūxū i ngēma namachi i pemaā nangōxū. ²⁸ Natūrū ngūrūāchi wūxie tá pemaā nūxū tixu rū ñatarūgū:

“Ñāā namachi rū tupananetachicūnèxācèx yamēxgūxū i naxūnawa ne ūxū nixī”, ñatarūgū. Rū ngēxguma i pema rū tama name na penangōxū i ngēma namachi na tama chixexūgu tūxū penguxēēxūcèx ya yixema pemaā nūxū ixuxe, rū tama ngēmacèx taxoegaāēxūcèx i tūmax. ²⁹ Rū tama pechiga nixī i chidexaxū i ngēxguma:

“Na tama taxoegaāēxūcèx”, ñachagu. Natūrū yixema pemaā nūxū ixuxechiga nixī i chidexaxū. Natūrū bexmana ngūrūāchi wūxi i yaxōxū tá cuxna naca rū ñanagūrū tá cuxū:

“¿Tūxcūū i togū naxcèx oegaāēxūgagu choxna cunachuxu na tama chanaxūxū i ñacū i chanaxwèxexū? ³⁰ Rū ngēxguma chi Tupanana moxē chaxāxgu naxcèx i ngēma ñna i changōxū, ¿rū tūxcūū i ngēma ñnacèx choxū quixu?” ñanagūrū. ³¹ Dūcèx, pemaā nūxū chixu rū name nixī i guxūma i ngēma pexūxūmaā Tupanaxū picuèxūxūgū. Rū ngexguma ñacū pengoxgūgu rū exna ñacū pixaxgūgu rū ēxna ñacū i to pexūgūgu, rū name nixī i ngēmamaā Tupanaxū picuèxūxūgū. ³² Rū tama name i penaxū i ñacū i togūxū chixexūgu yixēēxū, rū woo Yudiugū yixīgūgu rū ēxna tama Yudiugū yixīgūgu, rū ēxna yaxōgūxū yixīgūgu. ³³ Rū choma rū guxūwama guxūxūma chataāēxēēchaxū. Rū ngemacèx tama chanaxū i ngema chomatama namaā chataāēxēxū, natūrū chanaxū i ngema togū namaā taāxēxū na ngemaācū nūmagū rū ta nuxū nangūchaxū na yaxōgūāxū rū nayauxgūāxū i maxū i taguma gūxū.

11

¹ Rū name nixī i nagu pexī i chaucūma ngēxgumarūū i choma na Cristucūmagu chixūxūrūū.

Name nixī i ngexūgū rū mexū i nacūmagu naxī

² Pa Chaueneēgūx, pemaā chataāē erū guxūguma chaugu perūxīnūē rū nagu pexī ga yema nguxēētae ga pexū changūexēēxū. ³ Natūrū chanaxwèxe i nūxū pecuèx na Cristu rū wūxichigū i yatūeru na yīxū. Rū yatūxūgū rū naxmèxēru nixīgū ngēxgumarūū ya Tupana rū Cristueru na yīxū. ⁴ Rū ngēmacèx i ngēxguma wūxi ya yatū ngutaquēxewa yumūxēgu rū ēxna Tupanaarū orexū yaxuxgu, rū tama ñangēxūchipatēxegu, rū ngēma rū wūxi

i chixexū nixī i Cristupēxewa naxūxū. ⁵ Natūrū ngēxguma chi wūxi i ngecū ngutaquēxewa yumūxēgu rū ēxna Tupanaārū orexū yaxuxgu, rū chi tama ngīgū natūerugu, rū ngēma rū wūxi i chixexū nixī i ngītepēxewa naxūxū. Rū űoma ngīgū yadūeruxūrū iyixī. ⁶ Erū ngēxguma chi tama ngīgū natūeruchaūgu, rū narūmemaē nixī i noxtacūma ngīgū ibēixeru. Natūrū ngēxguma chi wūxi i ngīrū āne yixīgu i ngēma na ngīgū nabēixeruxū rū ēxna ngīgū yadūeruxū, rū narūmemaē nixī i ngīgū itūeru. ⁷ Natūrū yatūgū rū tama name na nūgū natūerugūxū. Yerū ga Tupana rū nūgūraūācū nanaxū ga yatū rū Tupanachipeta nixī. Rū yima yatūwa nixī i nangóxū na űuxācū namexēchixū ya Tupana. Rū ngēma ngecūwa nixī i nangóxū na űuxācū namexū ya yatū. ⁸ Yerū yexguma noxri Tupana naxūxgu ga yatū, rū tama ngecūwa nixī ga naxūāxū. Rū ngīma waxi nixī ga yatūwa ngīxū naxūxū. ⁹ Rū yatūcēx nixī ga Tupana ngīxū ūxū ga ngecū, rū tama ngecūcēx nixī ga Tupana naxūxū ga yatū. ¹⁰ Rū ngēmācēx name nixī i ngīgū itūeru na duūxūgūpēxewa rū Tupanaārū orearū ngeruūgū i daxūcūāxgūpēxewa nangóxūcēx na ngītemēxēwa nangēxmaxū. ¹¹ Natūrū Tupanapēxewa rū taxuūma nixī ya yatū ega natauxgu i ngecū. Rū ngēxgumarūū ta i ngecū rū taxuūma iyixī ega natauxguma ya yatū. ¹² Yerū yexguma noxri Tupana ngīxū ūxgu ga ngecū, rū yatūwa nixī ga ngīxū naxūxū. Rū ngēxgumarūū ta ya yatū rū ngecūwa nixī i nabuxū. Natūrū Tupana nixī ya naxūcū i guxūma i duūxūgū. ¹³ Rū pematama tá penangugū rū ngoxi name na wūxi i ngecū rū tama ngīgū natūeruācūma nayumūxēxū. ¹⁴ Rū woetama tórū bucūma nixī i nūxū na icuāxū na wūxi i āne yīixū na nūgū namēxyaexēxū i wūxi i yatūxū. ¹⁵ Natūrū ngecūcēx rū wūxi i mexēchixū nixī na namēxyaexū. Erū Tupana rū ngīxna nanaxā i ngīyae na ngēmamaā ngīgū natūeruxūcēx. ¹⁶ Natūrū ngēxguma chi texē ngēmāchiga tūgū choxūgagūgu, rū name nixī i nūxū tacuēx na ngēmatama yīixū i tacūma rū nacūma i guxūma i yaxōgūxū i guxūnema ya tupaucagūwa.

Duūxūgū rū chixri namaā inacuēxgū ga Coriarū ōna i ūūnexū

¹⁷ Rū űuxma i űāā popera i pexcēx chaxūmatūxūwa rū pemaā nūxū chixu rū nangēxma i wūxi i pecūma i chixexū i tama namaā chataāēxū. Erū chauxcēx i ngēma perū ngutaquēxegū rū pexū nachixexēē, rū tama aixcūma perū meruūgū nixī. ¹⁸ Erū duūxūgū chomaā nūxū nixugūgū rū ngēxguma tórū Coricēx pengutaquēxegūūxgu rū pegū pitoye. Rū ngāxūgu chayaxō na aixcūma yīixū i ngēma nūxū yaxugūgūxū. ¹⁹ Choma rū nūxū chacuēx na aixcūma woe tátama yīixū i pegū pitoyexū na ngēmawa nūxū icuāxūcēx na texégū tīixū ya yixema aixcūma Cristuarū duūxūgū ixīgūxe. ²⁰ Rū ngēma pegū na pitoyexūgagu nixī na tama aixcūma tórū Corixū picuēxūūgūācūma yīixū i penangōxū i tórū Coriarū ōna i ūūnexū i ngēxguma pengutaquēxegūūxgu. ²¹ Erū ngēxguma penangōxgu i ngēma ōna i ūūnexū rū wūxichigū rū peñuxāēgū na pexira na penayaxuxūcēx i ngēma ōna. Rū yoxni i ngēma togū rū ngēxma nataiyae, rū togū rū nayaxgū ya binu űuxmata nangāxē. ²² ¿Ēxna pengēchūgū ecēx tama ngēma pechibūexū rū pexaxegūxū? ¿Tūxcūū nūxū pexoe i ngēma togū i yaxōgūxū rū penaxāneēxēē i ngēma yaxōgūxū i ngearū ngēmāxūāxgūxū? ¿Rū űacūxū tá pemaā chixu i űuxmax? ¿Pexcēx rū tá pemaā chataāēxū? Dūcēx, pemaā nūxū chixu rū tama pemaā chataāē naxcēx i ngēma pexūgūxū.

Tórū Coriarū ōna i ūūnexūchiga

²³ Rū ngema nguxēētae i pemaã nüxū chixuxū rū tórū Corixūtawatama chanayaxu. Rū yexguma tórū Cori ga Ngechuchuxū ínaxuaxūgu, rū yematama chūtaxūgu rū nūma rū nanayaxu ga wūxi ga pāu. ²⁴ Rū Tupanana moxē naxā, rū yemawena rū inanabūcu, rū ñanagūrū:

“Ñāã nixī i chaxune i pexcèx ichaxāxūchiga. ¡Rū penangō i ñāã pāu na ngēmaācū peāēwa choxna pecuèxāchiexūcèx!” ñanagūrū. ²⁵ Rū yexgumarūū ta ga chibūwena rū Ngechuchu nanayaxu ga wūxi ga pochuyu ga binuchiūmaā āācuxū, rū ñanagūrū:

“Rū daa binu rū wūxi i cuèxruū nixī na ngexwacèx Tupana duūxūgūmaā ixunetaxū i maxū i taguma gūxūchiga. Rū chaugū ya pexcèx ibacūmaā nixī i Tupana pexū nüxū cuèxēēxū i ngēmachiga. Rū ngēxguma ñuxguacū daa binu pixaxgūgu rū ñuxma choma na chanaxūxūrūū tá penaxū na peāēwa choxna pecuèxāchiexūcèx”, ñanagūrū ga Ngechuchu. ²⁶ Rū guxūguma i ngēxguma penangōxgu i ñāã pāu rū peyaxaxgūgu ya daa binu rū ngēmawa tá duūxūgūxū nüxū picuèxēē na ñuxācū tórū pecaducèx nayuxū ga tórū Cori. Rū ngēmaācū tá penaxū ñuxmatáta wena nataegu i nūmax.

Texegūcèx nixī i tórū Coriarū òna i ūūnexū

²⁷ Natūrū ngēxguma chi texe tama tūgū tamexēēarū maxūxācūma nangōxgu i Coriarū pāu i ūūnexū rū tayaxaxūxgu ya yima binu ya ūūnecū, rū pecadu taxū napewa ya tórū Cori ya taxcèx yucū rū nagū ibacū. ²⁸ Rū ngēmacèx naxūpa na tanangōxū i ngēma pāu rū na tayaxaxūxū ya yima binu, rū name nixī i wūxichigū meā tūmaarū maxūgu tarūxīnū ngoxi nataxuma i țacū rū chixexū i tūmaārū maxūwa. ²⁹ Erū ngēxguma tama tūgū tamaxēēarū maxūācūma tanangōxgu rū tayaxaxūxgu, rū tūgūtama poxcuwa taga. Erū tama aixcūma tayaxō na tórū Corichiga yixīxū i ngema pāu rū yima binu.. ³⁰ Rū ngēmacèx nixī i muxūchixe i petanūwa rū pīdaaweexū rū peturaexū, rū ñuxre i togū rū marū nayuxū. ³¹ Natūrū ngēxguma chi tórūtama maxūgu rūñīnēgu naxūpa na nangōxū i ngēma Coriarū òna, rū nūma rū taxucèx tūxū napoxcue. ³² Natūrū ngēxguma tórū Cori ñoma i tórū maxūwa tūxū poxcugu, rū ngēmaācū tūxū inayarūwēxāchixēē na tama yixcūra naāneārū guxgu tūxū napoxcuxūcèx wūxigu namaā i ngēma duūxūgū i tama yaxōgūxū. ³³ Rū ngēmacèx, Pa Chaueneēgūx, ngēxguma pengutaquēxegūgu na penangōxūcèx i ngēma òna i ūūnexū, name nixī i pegū ípenanguxēē na guxāma wūxigu meā penangōxūcèx. ³⁴ Rū ngēxguma chi texē taiyèxgu, rū name nixī i tūmapatawatama tachibū na tama Tupana pexū poxcuexūcèx naxcèx na chixexū pexūexū i perū ngutaquēxegūwa. Rū ngēma to i guxchaxūgū i pexū ngēxmaxū, rū choma tá chanamexēē i ngēxguma petanūwa chaxūxgu.

12

Ngēma cuèx i Tupanaāē i Ūūnexū tūxna āxūchiga

¹ Pa Chaueneēgūx, chanaxwèxe i nüxū pecuèx na ñuxācū yīxū i ngēma cuèx rū ñuxācū na yixīxū i ngema tauxcha i Tupanaāē i Ūūnexū tūxna āxū. Rū ngēmachiga nixī i pemaã nüxū chixuxchaūxū i ñuxmax. ² Rū pema meāma nüxū pecuèx ga yexguma tauta Cristuaxū peyaxōgūgu, rū pegū nūxna pexāgū ga tupanetachicūnèxāgū ga tama idexaxū. ³ Rū ngēmacèx i ñuxma rū chanaxwèxe i meā nüxū pecuèx rū taxucūrūwama texe ya Tupanaāē i Ūūnexū tūmawa ngexmaxe rū chixri Ngechuchugua tidexa. Rū ngexgumarūxū ta rū taxucūrūwama texe ngūrūmare tūechama rū:

“Ngechuchu rŭ tŏrŭ Cori nixŭ”, ņatarŭgŭ ega tama Tupanaãe i Ūñexŭ tŭxŭ muxgu na ngemaãcŭ tidexaxŭcex. ⁴ Rŭ nŭma ya Tupana rŭ duŭxŭgŭna nanaxã i naguxŭraŭ i tauchagŭ. Natŭrŭ ngema Naãe i Ūñexŭ i nawa ne naxŭxŭ i ngema tauchagŭ rŭ wŭxitama nixŭ. ⁵ Nangexma i nagŭxŭraŭxŭ i Tupanaarŭ puracŭ, natŭrŭ yima tŏrŭ Cori ya tŭxna naxãcŭ i ngema puracŭgŭ rŭ wŭxitama nixŭ. ⁶ Rŭ Tupanaarŭ pora rŭ nagŭxŭraŭãcŭ nangox. Natŭrŭ wŭxitama nixŭ ya yima Tanatŭ ya tawa gŭxŭraŭãcŭ nangoxeãcŭ i ngema norŭ puracŭ. ⁷ Rŭ ngema Naãe i Ūñexŭ wŭxixewachigŭ nanangoxeãe i Tupanaarŭ pora i norŭ duŭxŭgŭtanŭwa na ngemaãcŭ guxãarŭ ngŭxŭeãerŭ yixŭxŭcex. ⁸ Rŭ Naãe i Ūñexŭ rŭ tŭmãxena rŭ nanaxã i tauxcha na ucŭexŭ tacuãxŭcex. Rŭ ngematama Naãe i Ūñexŭ rŭ togeãxŭ rŭ nanatauxchaxeãe na nŭxŭ tacuãxŭ na mea tangŭexŭeãtaexŭ i Tupanaarŭ ore. ⁹ Rŭ toge rŭ ngematama Naãe i Ūñexŭ tŭxŭ nanatauxchaxeãe na Tupanana tarŭyoexŭcex. Rŭ toge rŭ tŭxna nanaxã i pora na ngemamaã naxcex tayataanegŭxŭeãxŭcex i ngema idaaweexŭ. ¹⁰ Rŭ toge rŭ tŭxna nanaxã i pora na tanaxŭxŭcex i mexŭgŭ i Tupanaarŭ poramaã ŭxŭ. Rŭ toge rŭ tŭxŭ nanatauxchaxeãe na nŭxŭ tixuxŭcex i Tupanaarŭ ore. Rŭ toge rŭ tŭxna nanaxã i cuex na nŭxŭ tacuãxŭcex i ŭacŭ yŭxŭ i ngoxogŭarŭ ixŭxŭ rŭ ŭacŭ yŭxŭ i Tupanaãe i Ūñexŭarŭ ixŭxŭ. Rŭ toge rŭ tŭxna nanaxã i tauxcha na ngema tama nŭxŭ tacuãxŭ i nagawa tidexaxŭcex. Rŭ toge rŭ tŭxna nanaxã i cuex na tanangoxeãexŭcex na ŭacŭchiga yŭxŭ na tidexaxŭ ya yŭxema to i nagawa idexãxe. ¹¹ Rŭ guxŭma i ngema rŭ Tupanaãe i Ūñexŭtama nixŭ i naxŭxŭ. Rŭ nŭma nixŭ i wŭxichigŭ i duŭxŭna naxããxŭ i ngema cuex i nŭma nanaxwexŭxŭ na nŭxna naxããxŭ.

Guxãma i yaxŏgŭxŭ rŭ wŭxitama i naxŭnewa naxŭgŭ

¹² Rŭ duŭxŭxŭne rŭ woo muxŭgu nixŭye, natŭrŭ wŭxitama i naxŭne nixŭ. Rŭ ngexgumarŭxŭ ta i ngema Cristuãxŭ yaxŏgŭxŭ rŭ woo namu, natŭrŭ wŭxitama i naxŭnewa naxŭgŭ. ¹³ Rŭ yexguma ŭbaiŭgu rŭ Tupanaãe i Ūñexŭ rŭ wŭxitama i naxŭne tŭxŭ nixŭgŭxŭeãe. Rŭ woo Yudiŭgŭ na ixŭgŭxŭ, rŭ exna tama Yudiŭgŭ na ixŭgŭxŭ, rŭ woo togŭmexŭwa ingexmagŭxŭ rŭ exna taxŭxemexŭwa ingexmagŭxŭ, natŭrŭ wŭxitama i naxŭne tŭxŭ nixŭgŭxŭeãe i nŭma i Naãe i Ūñexŭ i nŭxicatama ixŭxŭ. Rŭ guxãma i yixema rŭ marŭ tŭxna nangu i ngema Naãe i Ūñexŭ. ¹⁴ Wŭxi i naxŭne rŭ tama naxãmenãxamare, natŭrŭ muxŭgu nixŭye. ¹⁵ Rŭ ngexguma chi yima nacutŭ ņaxgu:

“Rŭ ņuxma na tama naxmex chiŭxŭ, rŭ ngemacex tama ngema naxŭnewa changexma”, ņaxgu, rŭ tama ngemacex nŭxŭ narŭxo na ngema naxŭnewa nangexmaxŭ. ¹⁶ Rŭ ngexguma chi yima naxpaxchinŭ ņaxgu:

“Rŭ ņuxma na tama naxetŭ chiŭxŭ, rŭ ngemacex tama naxŭnewa changexma”, ņaxgu, rŭ tama ngemacex nŭxŭ narŭxo na ngema naxŭnewa nangexmaxŭ. ¹⁷ Rŭ ngexguma chi guxŭma i naxŭne rŭ naxetŭ yixŭgu, ¿rŭ ŭacŭmaã chi i nŭxŭ naxŭnŭxŭ i ngema naxŭne? Rŭ ngexguma chi guxŭma i naxŭne rŭ naxmachixŭ yixŭgu, ¿rŭ ŭacŭmaã chi i nŭxŭ nawãxŭxŭ? ¹⁸ Natŭrŭ Tupana ga naxŭcŭ ga taxŭne, rŭ ngexta nŭma ŭnanaxwexŭxŭwa nanangexmaxeãe i taeru rŭ tachacŭgŭ rŭ taparagŭ. ¹⁹ Rŭ ngexguma chi nataxŭxgu i norŭ ŭyechigŭ i taxŭne rŭ chi naxãmenexãmare. ²⁰ Rŭ ngema naxŭne rŭ woo muxŭgu nixŭye, natŭrŭ wŭxitama i naxŭne nixŭ. ²¹ Rŭ taxetŭ rŭ taxucŭrŭwa taxmexŭ ņanagŭrŭ:

“Choma rū tama chacuxwēxe”, ñanagürü. Rū ngēxgumarüŭ ta i taeru rū taxucürüwa tacutügüxŭ ñanagürü:

“Choma rū tama chapexwēxe”, ñanagürü. ²² Natürü ngēma yexeraäcü äücümäxŭ i taxünewa, rū ngēma nixŭ i yexera nanaxwēxexŭ i taxüne. ²³ Rū ngēma taxünewa yexeraäcü naxcēx ixānexŭ, rū ngēma nixŭ i yexera meā ixŭchiruxŭ. Rū ngēma taxünewa ngēxmaxŭ i tama inaxwēxexŭ na nangóxŭ, rū ngēma nixŭ i yexera meā idüxüxŭ. ²⁴ Natürü tama ngēmaäcü tanaxü namaã i ngēma taxünewa ngēxmaxŭ i guxāxŭma iwéxŭ. Rū ngēmaäcü Tupana nanaxü i taxüne, na yexeraäcü nüxna idauxücēx i ngēma yexera naxcēx ixānexŭ. ²⁵ Rū ngēmaäcü Tupana nanaxü i taxüne na wüxichigü i norü üye nügügu naxŭnūxŭcēx rū nügü nangüxēēgüxŭcēx. ²⁶ Rū ngēxguma chi wüxi i ngēma taxünearü üye nüxŭŭ nguxgux, rū guxŭma i ngēma togü i natanüxŭgü rū ta nüxŭŭ nangux. Rū ngēxguma chi wüxi i ngēma taxünearü üye taāēxgu, rū guxŭma i ngēma togü i natanüxŭgü rū ta nataāēgü. ²⁷ Rū ñuxma i wüxichigü i pema rū Cristuxünearü üye pixŭgü, rū ngēma naxŭnewa pexügü. ²⁸ Rū ngēmacēx ya Tupana rū nanaxwae na ñaacü nügü inanuxŭ i norü duŭxŭgü: Rū yŭxema tŭxira tŭxŭ naxunetaxŭgŭxē tixŭ ya norü puracüwa tŭxŭ namugŭxē. Rū tŭxŭŭ naxuneta ya toguegü na nüxŭŭ tixugüxŭcēx i norü ore. Rū tŭxŭŭ naxuneta ya toguegü na duŭxŭgüxŭŭ tangüxēēxŭcēx i norü ore, rū toguegü na tanaxŭgüxŭcēx i mexŭgü i Tupanaärü poramaã taxŭgüxŭ. Rū toguegü rū tŭxŭŭ nanatauxchaxēē na tanameexēēxŭcēx i idaaweexŭ, rū toguegü na nüxŭŭ tarüngŭxēēgüxŭcēx i ngēma taçü nüxŭŭ taxuxŭ, rū toguegü yaxögüxŭärü āēxgacügü na tixŭgüxŭcēx. Rū tŭxŭŭŭ nanatauxchaxēē ya toguegü na ngēma naga i tama nüxŭŭ tacuáxŭwa tidexagüxŭcēx. ²⁹ Rū tama guxāma Tupana tŭxŭŭ imugŭxē tixŭgü, rū tama guxāma Tupanaärü orearü uruŭ tixŭgü. Rū tama guxāma norü orewa nguxēētaegŭxē tixŭgü, rū tama guxāma nüxŭŭ tacuēx na tanaxüxŭ i mexŭgü i taxŭgü i Tupanaärü poramaã üxŭ. ³⁰ Rū tama guxāma nüxŭŭ tacuēx na tanameēxēēxŭ i duŭxŭgü i idaaweexŭ. Rū tama guxāma nüxŭŭ tacuēx na nawa tidexagüxŭŭ i wüxi i naga i tama nüxŭŭ tacuáxŭ. Rū tama guxāma nüxŭŭ tacuēx na tanangoxēēxŭ na taçüchiga yadexaxŭ i ngēma duŭxŭgü i tama nüxŭŭ nacuáxŭ i nagawa idexaxŭ. ³¹ Rū name nixŭŭ inaxcēx pedēux na Tupana pexna naxāxŭcēx i ngēma cuēx rū taxuchagü i rümemaegüxŭ.

Yigü na ingechaŭgüxŭchiga

Natürü i ñuxma rū tá pexŭ changüexēē i taçü nixŭ i guxŭma i ngēma pemaã nüxŭŭ chixuxŭärü yexera rümemaēxŭ.

13

¹ Rū woo togü i nagawa chideaxgu, rū woo Tupanaärü orearü ngeruŭgü i daxüçŭāxgawa chideaxgu, natürü ñoma wüxi i taçü i āgaxŭrŭmāre chixŭŭ ega tama guxāxŭ changechaŭgü. ² Rū woo nüxŭŭ chacuēxgu na meā duŭxŭgümaã nüxŭŭ chixuxŭŭ i Tupanaärü ore, rū woo nüxŭŭ chacuēxgu i guxŭma i taçü i ēxŭguxŭŭ i Tupanachiga, rū woo choxŭŭ natauxchagu na chorü ōmaã chayaxŭgachixēēxŭŭ ya mēxpŭnegü, natürü taxuwama chame ega tama guxāxŭŭ changechaŭgü. ³ Rū woo ngēma duŭxŭgüŭ i ngearü dŭeruāxgüxŭxŭŭ chayanuxgu i guxŭma i taçü i choxŭŭ ngēxmaxŭŭ, rū woo Tupanaärü oreçēx chaugü ichaxāxgu na üxüwa choxŭŭ yagugüxŭcēx, rū taxuwama choxŭŭ name i ngēma ega tama guxāxŭŭ changechaŭgü. ⁴ Rū yŭxema guxāxŭŭ ngechaŭxē, rū yaxna namaã taxŭnŭ, rū namaã tameçüma. Rū tama tixāxŭchixwēxe, rū tama

togūxū tūgū tarūyexera rū tama tūgū ticuèxūū. ⁵ Rū yíxema aixcūma guxāxū ngechaūxē, rū tama taguxchigawēxe, rū tama tūgūguxicatama tarūxīnū, rū tama tanuxwēxe, rū tama nagu tarūxīnūēcha ega texé chixexū tūmamaā ūxgu. ⁶ Rū tama namaā tataāē i chixexūgū, natūrū namaā tataāē i ngēma ore i aixcūma ixīxū. ⁷ Rū yíxema aixcūma guxāxū ngechaūxē, rū yaxna namaā taxīnū, rū guxūguma nūxū tayaxō, rū guxūguma mexūgu namaā tarūxīnū, rū taguma naxchi taxai woo ſacū tūmamaā naxūxgu i togū. ⁸ Rū ngēma yigū na ingechaūxū rū tagutāma inayacuèx. Natūrū ngēma na nūxū ixuxū i Tupanaārū ore rū wūxi i ngunexūgu tá inayacuèx. Rū ngēma tama nūxū icuáxū i nagawa na idexaxū, rū tá ta inayacuèx. Rū ngēma űuxma nūxū icuáxū rū wūxi i ngunexūgu rū marū taxuwatāma tūxū name. ⁹ Erū ngēma tórū cuèx i űuxma tūxū ngēxmaxū, rū Tupanapēxewa rū naxíra. Rū ngēxgumarūū ta i ngēma norū orexū na ixuxū, rū wūxi i íramarexūtama nixī. ¹⁰ Rū guxūma i ngēma rū tá inayarūxo i ngēxguma Tupanapēxewa ingugūgu rū nūma tá guxūxūma tūxū nacuèxēēgu. ¹¹ Yexguma chabuxgu ga chomax, rū wūxi ga buxūrūū chidexa, rū buxū nagu rūxīnūxūgu charūxīnū, rū tama meā chauāēxū chacuèx. Natūrū yexguma marū chayēxgu, rū nūxū charūxo ga guxūma ga yema chorū bucūma. ¹² Rū ngēma űuxma nūxū idauxū i Tupanachiga, rū űoma wūxi i worua ya ūxachametūxewa yigū idauxūrūū nixī na taxcèx naxēxū. Natūrū yixcūra rū tá aixcūma meā nūxūxūchi tadau ya Tupana. Rū űuxma rū írarūwatama nūxū chacuèx i Tupanachiga. Natūrū wūxi i ngunexūgu rū tá meā nūxū chacuèx i guxūma i nachiga, ngēma na Tupana meāma choxū cuáxūrūū. ¹³ Rū űuxma rū nangēxma i tomaēxpūx i nacūmagū i guxūgutāma ngexmaxū. Rū űaāgū nixī:

1 Rū Tupanaāxū tayaxōgū

2 Rū nūxū ítananguxēē na nataeguxū ya Cristu

3 Rū nūxū tacuèx na tamūcūxū ingechaūxū.

Natūrū ngēma tomaēxpūxtanūwa rū ngēma rūmemaexū nixī na guxāxū ingechaūxū.

14

Ngēma tama nūxū icuáxū i nagawa na idexaxūchiga

¹ Rū naxcèx pedēux na guxāxū pengechaūxū! Rū ngēxgumarūū ta name nixī i naxcèx pedau i ngema tauxchagū rū ngema cuèx i Naāē i Ūūnexūtwa ne íxū. Rū ngēma cuèx i yexeraācū penaxwaexū nixī na pexū natauxchaxū na nūxū pixuxū i Tupanaārū ore. ² Yíxema duūxē ya tama nūxū tacuáxū i nagawa idexaxe, rū Tupanamaā nixī i tidexaxū rū tama i duūxūgūmaā, erū taxūema nūxū tacuèx na űuxū űaxūchiga yīxū. Rū Tupanaāē i Ūūnexū nixī i tūxū idexaxēēxū, natūrū ngēma ore i nūxū tixuxū rū ēxūguxū nixī. ³ Naturū yíxema nūxū ixuxe i Tupanaārū ore rū ngema yaxōgūxūārū ngūxēeruxū tixī, erū yexeraācū cuèxa tanangugūxēē rū nūxū tanangūchaxūxēē i ngema ore rū tanataāēxēē i ngema yaxōgūxū i ngexguma guxchaxū nūxū ūpetūgu. ⁴ Rū yíxema duūxē ya tama nūxū tacuáxū i nagawa idexaxe, rū tūmacèxtama nixī i ngema na yexeraācū mea Tupanaāxū tayaxōxūcèx. Natūrū yíxema nūxū ixuxe i Tupanaārū ore rū nūxū tixu na yexeraācū Tupanaāxū yaxōgūāxūcèx i guxūma i yaxōgūxū. ⁵ Choma chierū chanaxwēxe na guxāma i pema rū ngēma tama nūxū pecuáxū i nagawa na pidexagūxū. Natūrū yexeraācū chanaxwēxe na duūxūgūmaā nūxū pixuxū i Tupanaārū ore. Erū ngēma to i nagawa na pidexagūxūārū yexera narūmemaē na togūmaā nūxū pixuxū i Tupanaārū ore.

Natürü ngēma to i nagawa na idexaxū, rü name ega ngēma yaxōgūxūmaā nūxū ixuxgu na ſacūchiga yīixū i ngēma dexa, na nūmagū rü ta yexeraācū meā Tupanaāxū yaxōgūāxūcēx. ⁶Rü ngēmacēx, Pa Chaueneēgūx, rü ngēxguma chi pexūtawa chaxūxgu, rü chi to i nagawa chideaxgu, ſrū ſacūwa chi pexū namexū i ngēma? Natürü ngēxguma chi pemaā nūxū chixuxgu i ngēma Tupana tūxū nūxū cuēxēēxū, rü ēxna ngēma chomatama nūxū chacuāxū na aixcūma yīixū, rü ēxna ngēma ēxūguxū i űuxma Tupana tūxū nūxū cuēxēēxū, rü ēxna ſacū rü to i nguxēētae i Tupanachiga, rü ngēma waxi nixī i pexū mexū. ⁷ſRü dūcax ngēma paxetarū i quena rü ēxna arpa! Rü ngēxguma tāu chima texé meā napaūxgu, rü tāu chima nūxū tacuēx na ſacūgu tanapaxūxū. ⁸Rü ngēma churaragū, rü ngēxguma norū uwanūgūmaā nūgū nadaixchaūgu, ſrū űuxācū tā nūgū namexēē na nūgū nadēixūcēx ega tama meā nangōfagu ya yima corneta ya dēixcēx naxcēx çaxūne? ⁹Rü ngēxgumarū i ta pexū nangupetū. Rü ngēxguma chi perū conūmaā nūxū pixuxgu i dexa i taxúema nūxū cuāxū, ſrū űuxācū tā nūxū tacuēx na űuxū űaxūchiga yīixū i ngēma nūxū pixuxū? Rü űoma ngūrūanewa pidexagūxūrū tā pixīgū. ¹⁰Rü aixcūma nixī i namuxū i nagagū i űoma i naānewa. Rü guxūma i ngēma nagagū rü name naxcēx i ngēma duūxūgū i nawa idexagūxū. ¹¹Natürü ngēxguma chi tama nūxū chacuēxgu i ngēma naga i to i duūxū chomaā nawa idexaxū, rü ngēma duūxūcēx rü űoma to i nachiūānecūāxūrū chixī, rü chauxcēx rü űoma to i nachiūānecūāx i duūxūrū nixī i nūmax. ¹²Choma nūxū chacuēx rü pema rü pexū nangūchaū na pexū nangēxmaxū i ngēma nacūmagū i Tupanaāē i Ūūnexū tūxna āxū. Natürü name nixī i naxcēx pedau na guxūārū yexera pexna naxāāxū i ngēma nacūmagū i namaā nūxū perūngūxēēx i guxūma i yaxōgūxū na yexeraācū meā Tupanaāxū yaxōgūāxūcēx. ¹³Rü ngēmacēx yīxema duūxē ya taxúema nūxū cuāxū i nagawa idexaxe, rü name nixī i Tupanana naxcēx taca na tūxna naxāāxūcēx i cuēx na togūmaā nūxū tixuxūcēx na űuxū űaxūchiga yīixū i ngēma nūxū tixuxū. ¹⁴Rü ngēxguma chi taxúema nūxū cuāxū i nagawa chayumūxēgu, rü chauāē nixī i ngēma yumūxēxū. Natürü chomatama rü taxuūma chacuēx na ſacūchiga yīixū i ngēma. ¹⁵ſRü űuxācū tā chayumūxēxū i űuxmax? Rü marū name nixī ega taxúema nūxū cuāxū i nagawa chayumūxēgu, natürü chanaxwēxe i guxāma nūxū cuāxū i nagawa rü ta chayumūxē. Rü marū name nixī ega taxúema nūxū cuāxū i nagawa chawiyae. ¹⁶Erū ngēxguma chi taxúema nūxū cuāxū i nagawa Tupanaxū quicuēxūūgu, rü yīxema duūxēgū ya ngema irūxīnūēxē, rü taxucūrūwa cumaā wūxigu Tupanaxū ticuēxūūgu, erū tama nūxū tacuēx na űuxū űaxūchiga yīixū i ngēma nūxū quixuxū. ¹⁷Rü woo ngēma curū yumūxē rü namexēchixgu, natürü yīxema duūxēgū ya ngema irūxīnūēxē rü taxuūma i mexū nawa tayaxu ega to i nagawa quideaxgu. ¹⁸Tupanana moxē chaxā, erū perū yexera taxúema nūxū cuāxū i nagawa chidexa. ¹⁹Natürü woo muxūma i ore i taxúema nūxū cuāxū i nagawa na chidexaxū, natürü ngēma yaxōgūxūārū ngutaquēxegūwa rü chauxcēx rü narūmemaē chi nixī ega woo noxre i ore i meāma nūxū icuāxūwa namaā nūxū chixuxgu i Tupanaārū ore na ngēmaācū ngēmamaā meā chanangūexēxūcēx. ²⁰Pa Chaueneēgūx, tama name i űoma buxūgūrū chixri nagu perūxīnūe i ngema ore i pemaā nūxū chixuxū. Rü narūmemaē nixī i űoma buxūgūrūxū pegū pixīgūxēē naxchēxwa i ngema chixexū, natürü ngema peru űnūwa rü penaxwēxe i duūxūgū i marū yaxūrūū meā nagu perūxīnūe rü nagu pexī i ngema ore i pemaā nūxū

chixuxū. ²¹ Tupanaārū ore ga nuxcūmaūxū ga norū orearū uruū ūmatūxū rū űanagūrū:

“Rū nuā tá chanamugū i to i nachiūānecūāx i duūxūgū na to i nagawa yadexagūxūcēx namaā i űaā Yudiūgū i tama yaxōgūxū. Natūrū woo ngēmaācū chanaxūxgu, rū tāūtāma chauga naxīnūē i ngēma Yudiūgū i tama irūxīnūēchaūxū”.

űanagūrū ga Tupana. ²² Rū ngēmacēx ngēma na taxūema nūxū cuāxū i nagawa idexaxū, rū wūxi i cuēxruū nixī naxcēx i ngēma duūxūgū i tama irūxīnūēchaūxū. Rū tama duūxūgū i marū yaxōgūxūcēx nixī i ngēma. Natūrū ngēma Tupanaārū orexū na ixuxū, rū duūxūgū i marū yaxōgūxūcēx nixī na yexeraācū meā Tupanaāxū yaxōgūāxūcēx. Rū tama duūxūgū i tama irūxīnūēchaūxūcēx nixī i ngēma. ²³ Rū ngēxguma chi pema i yaxōgūxe pengutaquēxegūgu, rū guxā chima to i nagawa pidexagūgu, űrū űuxū űaxū tá ega petanūgu naxūcuxgu i wūxi i duūxū i ngēma iyarūxīnūxū rū ēxna wūxi i duūxū i tauta yaxōxū? űTaux ēxna i nagu tá naxīnūxū na pexāūāēgūxū i pemax? ²⁴ Natūrū ngēxguma chi guxāma i pema nūxū pixuxgu i Tupanaārū ore, rū chi petanūgu naxūcuxgu i wūxi i duūxū i tama yaxōxū rū ēxna wūxi i duūxū i ngēma iyarūxīnūxū, rū tá nūxū naxīnū i ngēma Tupanaārū ore i nūxū pixuxū. Rū ngēmaācū tá nūxū nacuēx na nūma rū wūxi i pecaduāxū na yīxū. Rū nūgūgu tátama ínarūxīnū i ngēxguma nūxū naxīnūgu i ngēma nūxū pixugūxū. ²⁵ Rū ngēma chixexū i nūxīcatama nūxū nacuāxū rū tá naxcēx ínicuēx. Rū nūma rū ngēxma tá nacaxāpūxū, rū tá Tupanaxū nicuēxū. Rū tá nūxū nixu na aixcūma Tupana petanūwa nangēxmaxū.

Tama name i penaxīxāchiāxēgū i perū ngutaquewa, rū name i meamare penaxī

²⁶ Dūcēx, Pa Chaueneēgūx, űuxma tá pemaā nūxū chixu na űuxācū tá penaxūxū ega ngēxguma pengutaquēxegūgu. Rū űuxre i pema rū marū name na Tupanaārū wiyaegu pewiyaegūxū, rū toge rū tanguxētaegūxū, rū toge rū nūxū tixuxū i ngēma ore i Tupana tūxū nūxū cuēxēxū, rū toge rū nawa tidexagūxū i naga i tama nūxū tacuēxgūxū, rū toge rū tanangoxēēgūxū i ngēma dexa i to i nagawa nūxū yaxugūxū. Natūrū guxūma i ngēma rū tanaxwēxe i yaxōgūxūārū ngūxēēcēx na yīxū, na yexeraācū yaxōgūāxūcēx rū meā Tupanaxū namaxēxūcēx. ²⁷ Rū ngēxguma to i naga i pema tama nūxū pecuāxūwa pidexagūgu, rū name nixī i taxre rū ēxna tomaēxpūxicatama tidexagū. Rū tanaxwēxe i wūxiexira tidexa i noxri rū yixcama ya toge. Rū ngēxguma chi texē to i nagawa ideaxgu, rū name nixī na tangēxmaxū ya wūxie ya nūxū ixuchigūxe na űacūchiga yīxū i ngēma ore i to i nagawa nūxū yaxuxū. ²⁸ Natūrū ngēxguma chi tatauxgu na texē nūxū ixuchigūxū na űacūchiga yīxū i ngēma ore i to i nagawa nūxū yaxuxū, rū narūmemaē nixī na noxtacūma tama to i nagawa pidexagū i perū ngutaquēxewa. Rū narūmemaē i wūxichigū tūxica Tupanamaāxīcatama bexma tidexa. ²⁹ Rū ngēxgumarūū ta ngēxguma pengutaquēxegūgu, rū name nixī i taxre rū ēxna tomaēxpūxicatama nūxū tixu i Tupanaārū ore. Rū ngēma togū i ngutaquēxetanūxū rū name nixī na meā nangugūāxū i ngēma ore. ³⁰ Natūrū ngēxguma chi íyadexayane i wūxi i duūxū, rū Tupana tūmamaā ideaxgu ya toge ya ngēma rūtoxe, rū name nixī na iyanachianexū i ngēma nūxīra idexaxū na tidexaxūcēx ya yīxema duūxē ya Tupana tūmamaā idexaxe. ³¹ Rū ngēmaācū guxāma i pema na Tupana pemaā idexaxū, rū name nixī i wūxichigū ípenanguxēē na pewa nanguxū na pidexagūxū i Tupanaārū ore. Rū ngēmaācū i ngēma togū i

ngutaquēxetanūxūgū rü tá Tupanachiga meã nangúe rü tá nataãēgū. ³² Rū ngēmaācū tanaxwēxe i meãma tūmaãēmaã itacuēx ya wūxichigū ya yixema Tupanaārū orexū ixuxe. ³³⁻³⁴ Erū perū ngutaquēxegūwa rü Tupana nanaxwēxe na meã penaxūxū i guxūma, rü tama nanaxwēxe na ngema pexãūgatanūxū rü pegū ípetūexēxū. Rū guxūma i togū i yaxōgūxūārū ngutaquēxegūwa rü marū nūxū nayapue na tama yadexagūxū i ngexūgū. Rū name nixī i pema rü ta ngēmaācū penaxū, erū nachuxu na yadexagūxū i ngexūgū i ngutaquēxegūwa. Rū name nixī na yatūgūga naxīnūxū i ngexūgū, ngēma Tupanaārū ore tūxū muxrūū. ³⁵ Rū ngēxguma chi tacūxū nacuáxchaūgu i wūxi i ngexū, rü name nixī i nachīūwatama natena naca i nachiga i ngēma. Erū wūxi i āne nixī ega ngutaquēxewa yadeaxgu i wūxi i ngexū. ³⁶ Pa Corītiucūāxgūx, name nixī na nūxna pecuēxāchiexū na tama pewaxira ne naxūxū i Tupanaārū ore. Rū tama pexicatama nixī i penayauxgūxū i ngēma. ³⁷ Rū ngēxguma chi texé tūgūgu rūxīnūgu na Tupanaārū orearū uruū tīxū rü ēxna tūgūgu tarūxīnūgu na Tupanaāē i Ūūnēxū tūxna naxāxū i tacū rü cuēx, rü name nixī i nūxna tacuēxāchi na tōrū Coriarū ore yīixū i ñaã ore i pexcèx chaxūmatūxū. ³⁸ Natūrū ngēxguma chi texé tama nūxū cuáxchaūgu i ngēma pemaã nūxū chixuxū, rü name nixī i tama tūxū pecuáxchaū. ³⁹ Rū ngēmacèx, Pa Chaueneēgūx, rü Tupanana naxcèx peca i cuēx na meãma nūxū pixuxūcèx i norū ore! Rū tama penachuxu na to i nagawa yadexagūxū i duūxūgū! ⁴⁰ Rū perū ngutaquēxegūwa, rü name nixī na meã penaxūxū i guxūma. Rū tama name i ngēma pexãūgatanū rü pegū ípetūexēx.

15

Cristu na yuwa írudaxūchiga

¹ Rū ñuxmax, Pa Chaueneēgūx, rü chanaxwēxe i nūxna pecuēxāchie i ngēma Tupanaārū ore i tūxū maxēxēēxū ga pemaã nūxū chixuxū. Rū yematama ore nixī ga pema peyauxgūxū. Rū ñuxma rü ngēmatama oregagu nixī i meã peyaxōgūxū. ² Rū ngēma oregagu nixī i pexū nangēxmaxū i maxū i taguma gūxū, ega aixcūma guxūguma peyaxōgūmagu. Natūrū ngēxguma tama guxūguma peyaxōgūgu, rü natūcèxmamare nixī i ngēma perū ō. ³ Rū yexguma noxri petanūwa changuxgu, rü yema nūxira pexū changuxēēxū nixī ga yema chaxira togū choxū nguxēēxū na Cristu rü tōrū pecaducèx nayuxū, ngēma Tupanaārū ore i ūmatūxūwa nūxū yaxuxrūū. ⁴ Rū yexgumarūū ta pexū changūexēē na ñuxācū inatēxgūāxū, rü ñuxācū norū tomaēxpūx ga ngunexūgu rü wena na namaxūxū, ngēma Tupanaārū ore i ūmatūxūwa nūxū yaxuxrūū. ⁵ Rū yexgumarūū ta pexū changūexēē ga ñuxācū Pedrucèx na nangóxū ga Cristu, rü ñuxācū yixcūra rü norū ngūexūgū ga yamugūxūcèx na nangóxū. ⁶ Rū yemawena ga Cristu rü noxtacūma 500 arū yexera ga yaxōgūxūcèx nangox. Rū muxūma i ngēma duūxūgū rü ñuxma rü ta namaxē, natūrū nūmaxū rü marū nayue. ⁷ Rū yemawena rü Chaūtiāgucèx nangox, rü yixcama guxūma ga yema togū ga ngūexūgūcèx nangox. ⁸ Rū dūxwa chowa inayacuēx ga chauxcèx rü ta na nangóxū, woo ngūrūāchimare nixī ga yema, ngēxgumarūū i wūxi i buxū i tautama norū ngunexūwa nanguyane buxūrūū. ⁹ Rū choma rü guxūma i ngēma togū i Tupana imugūxūttūūwa chaxū. Rū ngemacèx tama name i Tupana imuxūmaã choxū naxugūxū i duūxūgū, yerū nawe chingēchigū ga Tupanaārū duūxūgū rü poračū chixexū chaxū. ¹⁰ Natūrū ga Tupana rü chomaã namecūma, rü ngēmacèx i ñuxma rü choxū pedau na tacū chīixū rü ñuxācū na chīixū. Rū yema chomaã na namecūmaxū

rū tama natūcēxma nixī. Yerū choma rū guxū ga togū ga yamugūxūārū yexera chanaxū ga Tupanaārū puracū. Natūrū tama chauuchama chanaxū ga yema puracū, natūrū Tupana ga chomaā mecūmacū rū chomaā puracūcū nixī ga naxūcū ga yema puracū na nūxū chixuxūcēx ga norū ore. ¹¹ Natūrū i űuxma rū nūētama nixī ega woo choma chixīgu rū ēxna togū yixīgu ga pemaā nūxū ixuxū ga yema ore. Yerū yema ore ga pemaā nūxū tixuxū, rū Tupanaārū ore i tūxū maxēēxū nixī, rū yema nixī ga pixōgūxū.

űuxācū wena tá namaxē i duūxūgū i yuexū

¹² Marū pemaā nūxū tixu na Cristu rū yuwa ínadxū. ¿Rū tūxcūū űuxre i pema rū űaperūgūgū:

“Yuexū rū tagutāma wena namaxē”, űaperūgūgū? ¹³ Rū ngēxguma chi ngēma yuexū rū tagu chima wena namaxēgu rū yima Cristu rū tāū chima wena namaxū. ¹⁴ Rū yexguma chi Cristu tama wena maūxgu, rū ngēma ore i nūxū tixuxū i nachiga rū taxuwa chima name, rū natūcēxmamare chi nixī i perū ō. ¹⁵ Rū ngēxguma chi ngēmaācū yixīgu, rū toma i Tupanaārū orearū uruūgū rū doratēēxgūxū tixīgū. Erū nūxū tixu na Tupana Cristuxū wena maxēēxū. Rū ngēxguma chi tama aixcūma yixīgu na wena namaxēxū i yuexū, rū chi wūxi i doramare nixī na Tupana Cristuxū wena maxēēxū. ¹⁶ Rū ngēxguma chi ngēma yuexū rū tagu chima wena namaxēgu, rū ga Cristu rū chi ta tāū chima wena namaxū. ¹⁷ Rū yexguma chi Cristu tama wena maūxgu, rū natūcēxmamare chi nixī i peyaxōgūxū, rū űuxma rū chi ta perū pecadugagu ipeyarūtauxe. ¹⁸ Rū chi ngēmaācū yixīgu rū ngēma duūxūgū i Cristuaxū yaxōgūxū i marū yuexū, rū chi ta tāū chima nūxū nangēxma i maxū i taguma gūxū. ¹⁹ Rū ngēxguma chi űoma i maxūcēxicatama yixīgu na Cristuaxū yaxōgūxū, rū chi guxū i togū i duūxūgūarū yexera tangechaūtūmūgū. ²⁰ Natūrū aixcūmaxūchi nixī ga Cristu ga yuwa na ínadxū. Natanūwa i guxūma i ngēma yuexū i yixcūra tá írūdagūxū, rū Cristu nixī ga namaā inaxūgūcū na ínadxū, yerū nūma nixī ga nūxīra wena namaxūxū. ²¹ Rū yexgumarū wūxi ga yatūgagu na nayuexū ga duūxūgū, rū ngēxgumarū tā ta nixī na wūxi i yatūgagu wena namaxēxū i ngēma marū yuexū. ²² Rū ngema na Adāūgagu guxāma na yuexū, rū ngēxgumarū ta Cristugagu tá namaxēxū i guxūma i duūxūgū i nūxū yaxōgūxū. ²³ Natūrū wūxichigū tá tūmawa nangu na wena tamaxūxū. Rū Cristu nixī ga nūxīra maxūcū. Rū ngēxguma wena nūma naxūxgu i nūmax, rū ngēxguma tá nixī i wena namaxēxū i ngēma duūxūgū i noxrū ixīgūxū. ²⁴ Rū ngēmawena tá nixī i nagūxū i naāne. Rū ngēxguma tá nixī ya Cristu i nūxū naporamaēxū i guxūma i norū uwanūgū. Rū ngēxguma tá nixī i Nanatū ya Tupanana naxāāxū i guxūma na nūma namaā inacuāxūcēx. ²⁵ Erū nūma ya Cristu rū āēxgacū tá nixī űuxmatāta nūxū naporamaē i guxūma i norū uwanūgū. ²⁶ Rū ngēma nawa iyacuāxū i norū uwanū i tá nūxū naporamaēxū, rū yu nixī. ²⁷ Yerū Tupana rū marū Cristumēxēwa nanayexmagūxēē ga guxūma. Natūrū woo Tupanaārū ore nūxū ixuxgu na Cristumēxēwa nangēxmagūxū i guxūma, natūrū nūmatama ya Tupana rū tama Cristumēxēwa nangēxma. Yerū nūma ga Tupana nixī ga Cristumēxēwa nayexmagūxēēāxū ga guxūma. ²⁸ Rū ngēxguma guxūma Cristumēxēwa ngēxmagūgū, rū űuxūchi nūmatama ya Cristu ya Tupana Nane rū tá Nanatūmēxēwa nūgū nangēxmaxēē. Yerū nūma ga Tupana nixī ga Cristumēxēwa nayexmagūxēēāxū ga guxūma. Rū ngēmaācū ya Tupana rū guxūmaā tá inacuēx. ²⁹ Rū nangēxma i űuxre i duūxūgū i petanūwa i Tupanaegagu yuexūchicūū íbaiūxū. ¿Rū tūxcūū ngēma

naxūgū? Rū ngēxguma chi tama wena namaxēgu i duūxūgū i yuexū, ħrū tūxcūū ngēma yuexūchicūū inabaiū? ³⁰ ħRū tūxcūū i toma rū guxūdguma āūcūmaxūwa tangēxmagū? ³¹ Pemaā nūxū chixu, Pa Chaueneēgūx, rū guxū i ngunexūgu rū āūcūmaxūwa changēxma, rū tama nūxū chacuēx i ŧacū rū ngunexūgu Tupanaārū oregagu tá na chayuxū. Rū ngēma rū aixcūmaxūchi nixī, ngēxgumarūū na aixcūma yīxū na choxū nangēxmaxū i wūxi i taāē i taxū i űuxma na tōrū Cori ya Ngechuchu ya Cristuaxū peyaxōgūxū. ³² Choma rū nuā Epēchiuwa rū Tupanaārū orechigagu chorū uwanūmaā poraācū togū tachoxūgagū. Rū űoma naēxū i idūraexūmaā togū tadēxūrūū tixīgū. ħNatūrū ŧacūwa choxū namexū ga yema ega chorū maxū i űoma i naānewa choxū ngēxmaxūcēxicatama yixīgu? Rū ngēxguma chi aixcūma yixīgu na tama wena namaxēxū i yuexū, rū marū name i űatarūgūgū:

“ĵNgīxā tachibūē rū taxaxegū, erū paxa tá tayue!” űatarūgūgū. ³³ ĵNatūrū tāūtāma nawe perūxī i ngēma duūxūgū i ngēmaācū chixri idexagūxū! Erū aixcūma nixī i ngēma ore i űaxū:

“Rū texē ya chixexū i duūxūmaā āmūcūxe, rū tūxū inayanaxoxēē i tūmacūmagū i mexū”, űaxū. ³⁴ Rū name nixī i meā pegūāēgu perūxīnūē rū nūxū perūxoe i ngēma perū chixexūgū. Rū wūxi i perū āne nixī na pemaā nūxū chixuxū rū űuxre i pema rū tama aixcūma Cristuarū duūxūgū pixīgūxū rū tama aixcūma Tupanaxū pecuēxgūxū.

űuxācū wena namaxē i yuexūgū

³⁵ Natūrū ngūrūāchi tá texe pexna taca rū űatarūgū pexū:

“ĵűuxācū tá wena namaxēxū i yuexū? ħRū naűuxraūxū i naxūnemaā tá inadagūxū?” űatarūgū tá pexū. ³⁶ Pa Duūxū i Ngēāemarexūx ĵrū dūcax! Rū ngēxguma wūxi ya nanetūchire itoxgu, rū nūma ya yima naxchire rū nayu na ngemaācū naxūxūcēx i ngēma nanetū. ³⁷ Rū ngēma waixūmūgu itoxū, rū tama marū nanetū ixīxū nixī, natūrū naxchire nixī ya yima itoxūne woo triguchire rū ēxna ngexūrūūxūmare i to i nanetūchire yixīgu. ³⁸ Rū ngēxguma marū inatoxguwena, rū Tupana nixī i yanaxūxēēcū ya yima nachire na nūma nanaxwēxēūācūma yīxūcēx i ngēma nanetū. ³⁹ Rū tama guxū i naxūnegū nawūxigu. Rū duūxēxūne rū nanatoraxū, rū naēxūgūxūne rū to nixī, rū werīgūxūne rū to nixī, rū choxnīgūxūne rū to nixī. ⁴⁰ Rū ngēxgumarūū ta nangēxma i naxūnegū i daxūgūxū i naānecūāx, rū nangēxma i naxūnegū i űoma i naānecūāx. Rū ngēma daxūgūxū i naānecūāx i naxūnegū rū nūxū nangēxma i noxrūtama mexū, rū ngēma űoma i naānecūāx i naxūnegū rū ta nūxū nangēxma i noxrūtama mexū. Natūrū tama nawūxigu i ngēma norū mewa. ⁴¹ Rū űēxcūarū yauracūū rū tama namaā nawūxigu i tauemacūarū yauracūū. Rū woramacurīgūarū yauracūū rū to nixī. Rū nūgūtanūwa ya woramacurīgū, rū tama nawūxigu i norū yauracūūwa. ⁴² Rū ngēxgumarūū tá ta naxūpetū namaā i naxūnegū i ngēma duūxūgū i yuexū. Erū ngēma naxūne i noxri nūxū ngēxmaxū rū iyarūxoxwēxexū nixī. Natūrū ngēma naxūne i tá nūxū ngēxmaxū i ngēxguma wena namaxēgu, rū ngēma rū tagūtāma inayarūxo. ⁴³ Rū ngēma naxūne i yuxū rū taxuwama name i ngēxguma inatēxgux. Natūrū ngēxguma wena namaūxgu rū tá namexēchi. Rū ngēma naxūne i űuxma turaxū rū ngēxguma wena namaūxgu rū tá napora. ⁴⁴ Rū itanatēx i ngēma naxūne i űoma i naānecūāx ixīxū. Natūrū ngēxguma inadaxgu, rū daxūcūāx i naxūne tá nixī. Rū űuxma na nangēxmaxū i naxūne i űoma i

naānecūāx rū ngēmawa nūxū tacuēx na nangēxmaxū ta i naxūne i daxūcūāx.

⁴⁵ Tupanaārū ore i ūmatūxūwa rū űanagūrū:

“Guma nūxīraūcū ga yatū ga Adāū rū nūxū nayexma ga űoma ga naānecūāx ga naxūne ga paxaāchi maxūxū”,

űanagūrū. Natūrū ya Cristu rū daxūcūāx nixī. Rū nūma nixī i tūxna naxāāxū

i maxū i taguma gūxū. ⁴⁶ Noxri rū tūxū nangēxma i űoma i naānecūāx i

taxūne. Natūrū yixcama rū Tupana tá tūxna nanaxā i to i taxūne i daxūcūāx

ixīxū. ⁴⁷ Guma nūxīraūcū ga yatū ga waixūmūwa ūcū, rū űoma ga naānecūāx

nixī. Natūrū tōrū Cori ya Cristu rū daxūgūxū i naānecūāx nixī. ⁴⁸ Rū ngēma

taxūnegū i űoma i naānewa tūxū ngēxmaxū, rū guma Adāūxūne ga waixūmūwa

ūcūrū nixīgū. Natūrū ngēma naxūnegū i daxūwa nūxū ngēxmaxū i duūxūgū,

rū Cristuxūnerū nixīgū. ⁴⁹ Rū űgēxgumarūū na Adāū ga waixūmūwa ūcūrū

na yīxū i taxūne, rū ngēxgumarūū tá ta Cristu ya daxūwa ngēxmacūrūū

nixī i taxūne i yixcūra. ⁵⁰ Rū dūcax, Pa Chaueneēgūx, pemaā nūxū chixu

rū űaā taxūne i namachinaxcēx rū naxchinēxānaxcēx, rū taxucūrūwa Tu-

panaxūtawa i ngextā taxūma iyarūxoxūwa nixūcu. ⁵¹ Natūrū chanaxwēxe

na nūxū pecuāxū i wūxi i ore i ēxūgūxū ga noxri Tupanaxīcatama nūxū cuāxū.

Rū dūcax, tāūtāma gūxā tayue, natūrū gūxāxūne rū tá naxūchicūū. ⁵² Rū

ngūrūāchimare wūxi i peāxētūgu tá nixī i ngēma na naxūchicūūxū i taxūne

i ngēxguma naāneārū gūxgūx naxāgagu ya corneta. Rū tá naxāga ya yima

corneta, rū ngēxguma i ngēma duūxūgū i yuexū rū tá inarūdagū na tagutāma

wena nayuexūcēx. Rū yixema na imaxēxū rū tá naxūchicūū i taxūnegū. ⁵³ Erū

ngēma taxūne i yuxwēxexū rū woetama tama taixū rū tá naxūchicūū. Rū wūxi

i ngexwacaxūxū i naxūne i aixcūma taixū rū tagutāma yuxū tá nixī. ⁵⁴ Rū

ngēxguma ngēmaācū naxūchicūūgu i taxūne i yuxwēxexū, rū tūxū nangēxmagu

i taxūne i ngexwacaxūxū i taguma yuxū, rū ngēxguma tá nixī i yangūxū i

Tupanaārū ore i ūmatūxū i űaxū:

“Marū inayarūxo na nayuexū i duūxūgū. Rū Tupana rū marū yuxū

narūyexera. ⁵⁵ Rū dūcax, Pa Yux, űngēxū i curū pora i namaā toxū

curūyexeraxū? űRū ngēxū i ngēma cuxne i namaā toxū cudējxū?”

űanagūrū i ngēma Tupanaārū ore. ⁵⁶ Rū ngēma naxne i yu, rū pecadu nixī.

Erū ngēma pecadu nixī i naporaxēēxū i ngēma yu na tūxū nadējxūcēx. Rū

ngēma mugū ga Moīché ūmatūxū nixī i naporaxēēxū i pecadu, erū woo

namexgu i ngēma mugū, natūrū taxucūrūwama texē aixcūma tayangūxēē.

⁵⁷ Natūrū name nixī i Tupanana moxē taxā yerū nūma nanamu ga tōrū Cori

ya Ngechuchu ya Cristu na ngēma yuxū tūxū naporamaēxēēxūcēx. ⁵⁸ Rū

ngēmacēx, Pa Chaueneēgū ya Pexū Changechaūgūxex, rū name nixī i meā

peyaxōgūama rū taguma ipenatēx i Tupanaārū ore. Rū name nixī i gūxūguma

meā penaxū i tōrū Coriarū puracū, erū pema nūxū pecuēx rū ngēma puracū

i nūxū pexūxū, rū tama natūcēxma nixī.

16

Togū i yaxōgūxūcēx inanutaque ga dīeru

¹ Rū űuxma tá pemaā nūxū chixu i nachiga i ngēma dīeru i penutaquēxexū na namaā nūxū perūngūxēēgūxūcēx i taeneēgū i yaxōgūxū i Yudēaanewa ngēxmagūxū. Rū ngēma yaxōgūxū i Gárataanewa ngēxmagūxū rū marū namaā nūxū chixu na ngīxū nanutaquēxegūxū i ngēma dīeru. Rū chanaxwēxe i pema rū ta ngēxgumarūū penaxū. ² Rū ngēma dīeru i perū puracūwa

ngixū peyaxucūwa rū guxcū i yūxūarū ngunexūgu rū tá ngixū pexā i ngēma dīeru i Tupanaarū ixīcū. Rū ngīmaā tá penguxū na tama ngēxguma ngēma changuxguama ngīxū na pedexūcēx. ³ Rū ngēxguma petanūwa changuxgu, rū tá chanaxūmatū i űuxre i poperagū naxcēx i taeneēgū i Yerucharēūwa ngēxmagūxū. Rū űuxūchi ngēma poperamaā tá Yerucharēūwa chanamagū i ngēma duūxūgū i pema nūxū pexunetaxū na ngēma ngixū nangegūxūcēx i ngēma dīeru i taeneēgūcēx ngīxū penetaquēxecū. ⁴ Rū ngēxguma chi choxū natauxchagu na ngēma Yerucharēūwa chaxūxū, rū nūmagū rū tá wūxigu chomaā ngēma naxī.

Pauru nagu narūxīnū na Corŷtiuwa naxūxū

⁵ Choma rū Machedóniānēwa tá chaxūpetū na íchayadauxūcēx i taeneēgū i ngēma ngēxmagūxū. Rū ngēmawena rū tá petanūwa changu na pexū íchayadauxūcēx. ⁶ Rū ngūrūāchi tá űuxre i ngunexūgū ngēxma petanūgu charūxāūx, rū bexmana ngūrūāchi ngēma petanūwa tá chanangupetūxēē ya mucū. Rū ngēxguma rū tá pexū natauxcha na choxū perūngūxēēgūxū na ngēma íchaxūxchaūxūwa chaxūxūcēx. ⁷ Erū tama chanaxwēxe i paxaāchimare pexū chadau. Natūrū petanūgu charūxāūxchaū i űuxre i ngunexū ega chi norū ngūchaxū yixīxgu ya tórū Cori. ⁸ Natūrū nuā Epēchiuarū iānēwa tá changēxma űuxmatáta Pētecōstearū ngunexūwa nangu. ⁹ Erū nuā rū tórū Cori poraācū choxū nanatauxchaxēē na nūxū chapuracūxūcēx rū nūxū yaxōgūāxūcēx i muxūma i duūxūgū woo namu i ngēma tama naxwēxegūxū na nuā chapuracūxū. ¹⁰ Rū ngēxguma chi Timutéu petanūwa nguxgu, rū chanaxwēxe i meāma penayaxu na petanūwa nataāēxūcēx. Erū nūma rū ta chauxrūū tórū Coriarū puracūwa napuracū. ¹¹ Rū ngēmācēx tama chanaxwēxe i texē petanūwa nūxū taxoe. Natūrū chanaxwēxe i nūxū perūngūxēē na taāēācūma nuā naxūxū na choxū íyadauxūcēx. Erū poraācū íchananguxēē na nuā nanguxūcēx namaā i ngēma togū i taeneēgū. ¹² Rū ngēma taeneē i Aporu rū poraācū nūxū chacēēxū na petanūwa íyadauxūcēx namaā i ngēma togū i taeneēgū. Natūrū tama ngēma naxūxchaū i űuxmax. Natūrū ngēxguma naxāchicagu rū tá ngēma naxū.

Pauru nūxū narūmoxē ga yema yaxōgūxū

¹³ ¡Rū pexuāēgū na taxūma i chixexūgu peyixūcēx! ¡Rū meāma peyaxōgūama woo űacū pexū űpetūgu! Rū name nixī i peporaeama rū taxucēxma pemuūē. ¹⁴ Rū guxūma i ngēma pexūxū, rū name nixī i pegū pengechaūgūācūma penaxū. ¹⁵ Rū dūcax, Pa Chaueneēgūx, pema nūxū pecuēx na Estēfanatanūxūgū yīxū ga nūxīra yaxōgūxū ga Acayaanēwa. Rū meāma nūxū pecuēxgū na űuxācū poraācū taeneēgū i yaxōgūxūxū na nangūxēēgūxū. ¹⁶ Rū chanaxwēxe i naga pexīnūē i ngēma duūxūgū i Estēfanatanūxūgūrūū ixīgūxū. Rū ngēxgumarūū ta chanaxwēxe i naga pexīnūē i guxūma i ngēma duūxūgū i űāā Tanatūarū puracūwa puracūexū rū ngūxēētaegūxū. ¹⁷⁻¹⁸ Rū űuxma na taxucūrūwama chauxūtawa pengēxmagūxū, rū wūxi ga chorū taāē nixī na nūma naxīxū ga taeneēgū ga Estēfana rū Fortunátu rū Acáicu. Rū yema taeneēgū ga nūma íxū rū pexū nixuchigagū rū yemaācū choxū nataāēxēēgū ga yema pexū na nataāēxēēgūxūrūū. Rū tanaxwēxe i naga pexīnūē rū nūxū pengechaū i ngēma duūxūgū i ngēmāgūrūū ixīgūxū. ¹⁹ Rū guxūma i taeneēgū i yaxōgūxū i Áchiaaneārū iānegūwa ngēxmagūxū, rū moxē pexcēx ngēma namugū. Rū Aquiru rū Prisila rū guxūma i ngēma yaxōgūxū i Aquirupatawa

ngutaquēxegūxū, rü moxē pexcèx ngema namugū naegagu ya tórü Cori.
²⁰ Rü guxūma i taeneēgū i núma ngēxmagūxū rü moxē pexcèx ngema namu. Rü chanaxwèxe i wüxichigū i pema rü pegū pengechaŭgūācūma pegū perūmoxēgū. ²¹ Choma i Pauru rü choxmēxmaātama pexcèx chanaxūmatū i ñāā chorū moxē. ²² Rü ngēxguma chi texé tama tórü Cori ya Ngechuchu ya Cristuxū ngechaŭgu, rü Tupana tá tūxū napoxcu. Rü paxa tá ínangu ya tórü Cori. ²³ Rü chanaxwèxe i tórü Cori ya Ngechuchu ya Cristu poraācū pexū narūngūxēē.. ²⁴ Rü guxāma i pema, rü poraācū pexū changechaŭācūma pexū charūmoxē naegagu ya tórü Cori ya Ngechuchu ya Cristu.

Rü nuāma pexna,
 Pauru

NORŪ TAXRE GA POPERA GA CORĪTIUCŪĀX GA YAXŌGŪXŪTANŪWA NAMUXŪ GA PAURU

Pauru rü nüxü narümoxë ga yema yaxōgüxü ga Corĭtiuwa yexmagüxü

¹ Pa Chaueneëgü i Corĭtiucüāxgü i Tupanaāxü yaxōgüxü, rü Pa Chaueneëgü i Guxūma i Acayaanewa Ngëxmagüxü, choma i Pauru nixi i pexcëx chanaxūmatüxü i ñaā popera wūxigu namaā i taeneë i Timutéu. Rü choma nixi i Tupana choxü yaxuxü na Ngechuchu ya Cristu choxü muxü na nüxü chixuxüçëx i norü ore. ² Rü tanaxwëxe na Tanatü ya Tupana rü törü Cori ya Ngechuchu ya Cristu pexna nanaxä i norü ngechaxü rü norü taäëxü.

Pauru rü ngüxü ninge

³ Rü toma rü nüxü ticuëxüügü ya Tupana ya Nanatü ya törü Cori ya Ngechuchu ya Cristu. Erü nüma nixi ya Tanatü ya nüxü ingechaütümüügüçü rü törü Tupana ya guxūguma tüxü taäëxëëcü. ⁴ Rü nüma ya Tupana rü toxü nataäëxëë i ngëxguma ngüxü tingexgu, na toma rü ta tanataäëxëëgüxüçëx i ngëma togü i duüxügü i ngüxü ingegüxü. Rü ngëmaäcü ngëma Tupana toxü na taäëxëëxürüü toma rü ta tanataäëxëëgü i ngëma togü i duüxügü. ⁵ Rü ñuxma na Cristurüü poraäcü ngüxü tingegüxü, rü ngëxgumarüü nūmatama poraäcü toxü nataäëxëë. ⁶ Rü ngëmacëx, ngëxguma toma ngüxü tingegüxü, rü ngëmaäcü toxü nangupetü na pema rü pexü nangëxmaxüçëx i perü taäë rü perü maxü i taguma güxü. Rü ngëxguma Tupana toxü taäëxëëgu, rü ngëmaäcü tomaä nanaxü na pema rü ta pexü nangëxmaxüçëx i perü taäë rü yaxna namaä pexinüëxüçëx i ngëxguma ngëmatama ngüxü i toma tingegüxü pexü ngëxmagu. ⁷ Toma rü aixcüma tayaxōgü na pema rü tagutāma ipenatāxü i Tupanaärü ore. Erü nüxü tacuëx rü ngëma na toxrüü ngüxü pingegüxü, rü ngëxgumarüü tá ta toxrüü pexü nangëxma i ngëma taäë i Tupanawa ne üxü. ⁸ Pa Chaueneëgüx, tanaxwëxe i nüxü pecuëx na ñuxre ga guxchaxügü toxü ngupetüxü ga Áchiaanewa. Rü yema na poraäcü toxü naguxchaxü, rü düxwa marü tama namaä taporae, rü nagu tarüxñüë na marü täütāma tamaxëxü. ⁹ Rü nagu tarüxñüë rü ñoma yuwa taxixürüü tixigü. Natürü yemaäcü toxü naxüpetü, erü Tupana ya yuëxüxü írudagüxëëcü toxü nangüxëëchañ na nüxicatama nüxü nangëxmaxü i pora na yuwa toxü ínanguxüxëëxüçëx, rü taxucürüwama togütama na ítanguxüxëëxü. ¹⁰ Rü Tupana rü toxü ínanguxüxëë nawa ga yema guxchaxü ga yuwa toxü gagüchaüxü. Rü ngëxgumarüü tá ta toxü ínanguxüxëë nawa i ñaā taxü i guxchaxü i ñuxma toxü ngëxmaxü. Rü aixcüma tayaxōgü na nüma rü guxügutāma ngëmaäcü toxü nangüxëëxü. ¹¹ Natürü tanaxwëxe i pema rü perü yumüxëmaä toxü perüngüxëë. Rü ngëxguma chi ngëmaäcü penaxüxgux, rü muxūma i duüxügü rü tá Tupanana moxë naxägü naxcëx i ngëma na ñuxäcü toxü nangüxëëxü.

Tüxcüü tama Corĭtiuwa naxü ga Pauru

¹² Nangëxma i tacü i toxü taäëxëëxü. Rü ngëma nixi na toðëwa nüxü tacuáxü na ñoma i naānewa rü aixcüma Tupana naxwëxexüäcüma meä tamaxëxü. Rü pepëxewa nixi ga guxüärü yexera yemaäcü tamaxëxü. Natürü tama togagu nixi ga yema, yerü Tupana ya tomaä mecümacü nixi ga toxü rüngüxëëcü na yemaäcü pepëxewa tamaxëxüçëx. ¹³⁻¹⁴ Rü yema

poperagū ga pexcèx taxūmatūxūwa, rū nataxuma ga tacū ga icūxū. Natūrū yema toma tamaxēxūācūma nixī ga pexcèx tanaxūmatūxū na yemawa meā nūxū pecuāxūcèx na űuxācū tixīgūxū. Rū woo i űuxma rū tama aixcūma meā toxū na pecuāxū, natūrū chanaxwèxe i wūxi i ngunexūgu rū aixcūma meā toxū pecuèx. Rū ngēxguma meā toxū pecuèxgu rū pema rū tá tomaā petaāēgū i ngēxguma inanguxgu ya tōrū Cori ya Ngechuchu, rū ngēxgumarūū i toma rū tá ta pemaā tataāēgū. ¹⁵⁻¹⁶ Rū yemagu charūxīnūxūcèx nixī ga noxri ga pexūtawa na chaxūchaūxū na pexū íchayadauxūcèx rū yemaācū pexū na charūngūxēēxūcèx. Rū nagu charūxīnū ga Machedóniāānewa chaxūxgu na pexūtagu íchidauxū, rū yexguma Machedóniāānewa ne chaxūxgu rū wenaxārū pexūtagu íchidauxū. Rū yemaācū chanaxūxchaū, yerū nagu charūxīnū na yemawena choxū perūngūxēēxū na Yudeāanewa chaxūxūcèx. ¹⁷ Bexmana pema nagu perūxīnūēgu rū tama aixcūma chayanguxēēgaācūma nagu charūxīnū ga yema pexūtawa na chaxūegaxū. ¹⁸ Éxna pema nagu perūxīnūēgu rū űoma wūxi i duūxū i tama Tupanaāxū yaxōxūrūūācūma chamaxū, rū “Ngū” űacharūgūchirēx woo tama chayanguxēēgagu i ngēma nūxū chixuxū? ¹⁸ Natūrū Tupana toxū nacuèx na aixcūma yīxū i ngēma torū ore ega pemaā itaxunetagu. ¹⁹ Erū yima Ngechuchu ya Cristu ya Tupana Nane ga guma Chiribānu rū Timutéu rū choma pemaā nūxū tixuchigacū, rū ore i aixcūma ixīxūxūxicatama nixu. Rū nūma rū aixcūma nayangūxēē i ngēma nūxū yaxuxū. ²⁰ Rū Cristu nixī ya yima yanguxēēcū ga guxūma ga yema unetagu ga Tupana nuxcūmaxūchi nūxū ixuxū. Rū ngēmacèx ngēxguma Ngechuchuēgagu Tupanaxū icuèxūūgūgu, rū űatarūgūgū:

“Rū aixcūma nixī i ngēma”, űatarūgūgū. ²¹ Rū űuxma na Cristuarū duūxūgū ixīgūxū, rū Tupana nixī ya toxū poraexēēcū rū pexū poraexēēcū na taguma Cristuna ixīgachixūcèx. Rū nūmatama nixī ga tūxū nadexū na noxri ixīgūxūcèx. ²² Rū nūma ya Tupana rū naega tagu naxū erū tōrū yora nixī. Rū nūma rū tūxna nanamu i Naāē i Ūūnexū na wūxi i tōrū cuèxruū yīxūcèx, rū ngēmawa nūxū icuāxūcèx na yixcūra tá tūxna naxāāxū i muxūma i to i mexūgū. ²³ Pema nūxū pecuèx ga noxri rū Corītiuwa chaxūxchaū, natūrū tama yēma petanūwa chaxū yerū tama chanaxwèxe na pexū changechaūgūxēēxū. Rū yemacèx tama pexūtawa íchayadau, yerū tama pexū chingagūchaū. Rū Tupana nūxū nacuèx na aixcūma na yīxū ga yema. ²⁴ Rū tama tanaxwèxe na pexū tamuxū na űuxācū tá Tupanaāxū peyaxōgūxū. Erū pema rū marū aixcūma meāma peyaxōgū. Natūrū ngēma tanaxwèxexū nixī na pexū tarūngūxēēgūxū na yexeraācū petaāēgūxūcèx.

2

¹ Rū yemacèx nixī ga tama wena pexūtawa chaxūxū, yerū tama chanaxwèxe ga pexū na changechaūxēēxū. ² Erū ngēxguma chi pexū changechaūxēēgu, ¿rū texé tá choxū tataāēxēē? ¿Rū űuxācū tá choxū petaāēxēē, ega pexū changechaūxēēgu? ³ Rū yemacèx nixī ga yemaācū pexcèx popera chaxūmatūxū na penamexēēgūxūcèx i perū guxchaxūgū naxūpa na pexūtawa chaxūxū. Yerū tama chanaxwèxe ga yexguma chi yēma chaxūxgu na choxū pengechaūxēēxū. Erū pema nixī i chanaxwèxexū na choxū petaāēxēēgūxū. Rū aixcūma nagu charūxīnū rū ngēxguma choma chataāēxgu rū pema rū tá ta petaāēgū. ⁴ Rū yexguma pexcèx chanaxūmatūgu ga yema popera, rū poraācū chanaxīxāchiāē, rū dūxwa yema chorū ngechaūmaā chaxaxu. Natūrū tama pexcèx chanaxūmatū na pexū

changechaũxēēxũcēx, natūrū pexcēx chanaxūmatū na nūxū pecuáxũcēx na ñuxácū poraácū pexū changechaũxū.

Pauru rū nūxū nūxū nangechaũ ga yema duũxū ga chixexū namaã iũxū

⁵ Rū yema yatū ga choxū ngechaũxēēxū, rū tama choxūĩcatama nixī ga nangechaũxēēxū, natūrū pexū rū ta nangechaũxēē. Natūrū tama chanangu-petūxēēchaxū na pexna chacaxū i ngemachiga.. ⁶ Rū yema poxcu ga nūxna pexāxū ga yema duũxū ga yexguma pengutaquēxegūgu, rū chauxcēx rū marū name na ngēĩcatama na yīĩxū. ⁷ Rū ngēmacēx i ñuxma rū chanaxwēxe i nūxū nūxū pengechaũ i norū chixexū rū nūxū perūngūxēē na tama yexeraxū i chixexūwa nagaāxũcēx i ngēma norū ngechaũ. ⁸ Rū ngēmacēx chanaxwēxe i wenaxārū noxrirū nūxū nūxū pedauxēē na aixcūma nūxū pengechaũxū. ⁹ Rū yemacēx nixī ga yemachiga marū pexcēx chanaxūmatūxū, yerū pexū chaxūxchaũ, rū nūxū chacuáxchaũ ngoxi marū aixcūma chauga pexĩnūē. ¹⁰ Rū ñuxma pemaã nūxū chixu rū yīxema pema tūxū nūxū pengechaũxē i tūmaārū chixexū, rū choma rū tá ta tūxū nūxū changechaũ. Rū ngēxguma chi tacū rū chixexūxū tūxū changechaũgu, rū pegagu nixī i Cristupēxewa tūxū nūxū changechaũxū i ngēma. ¹¹ Rū ngēmaācū chanaxū na tama nayoxniēxũcēx i Chataná na chixexūgu tūxū nayixēēxũcēx. Erū yixema rū meãma nūxū tacuēx i nacūma i Chataná na ñuxácū chixexūgu tūxū nayixēēchaũxū.

Tróaarū iãnewa rū nanaxĩxāchiãē ga Pauru

¹² Rū yexguma Tróaarū iãnewa changuxgu na nūxū chixuxũcēx ga Cristuarū ore, rū poraácū choxū natauxcha na yēma tórū Coriaxū chapuracūxū. ¹³ Natūrū tama aixcūma chataãē ga yēma, yerū tama yexma nūxū chayangu ga taeneē ga Titu. Rū yemacēx nūxū charūmoxē ga yēmacūāx ga duũxūgū, rū ichaxūāchi, rū Machedóniãnewa chaxū.

Cristu rū Paurumaã napora

¹⁴ Rū Tupanana moxē taxāgū erū norū duũxūgūxū toxū nixĩgūxēē. Rū ñuxma na Cristuarū duũxūgū tixĩgūxū, rū nūma ya Tupana rū guxūguma tomaã nanaxūpēxe. Rū nūma nixī i toxū namuxū na duũxūgūxū nūxū tacuēxēēxũcēx i norū ore. Rū ngēma norū ore rū guxūwama nangu rū guxūguma nipuema ñoma wūxi i pumara i yixichixūrū. ¹⁵ Rū ñuxma i toma i Cristugagu Tupanapēxewa na timexū, rū guxūwama tanguchigagū natanūwa i ngema yaxōgūxū rū ngema tama yaxōgūxū.. ¹⁶ Rū ngēma duũxūgū i tama yaxōgūxū rū nūxū nawēxtūmūxū i tohiga, erū ngema ore i nūxū tixuxū rū norū poxcuchigaxū namaã nixu. Natūrū ngēma yaxōgūxū rū namaã nataxēgū i tohiga erū ngema ore i nūxū tixuxū rū ore i namaxēēxū nixī. Rū ngēmacēx çtexēāxū natauxcha i ñaã puracū na nūxū tixuxū i ngēma ore? ¹⁷ Rū yīxema toxrū i xĩgūxexicatama tixī ya tūxū natauxchaxe. Rū toma rū tama Tupanaārū oregu dīēru ngĩxū tayaxu ngēma togū naxūgūxūrū. Natūrū Tupanapēxewa rū aixcūma meã nūxū tixu i ngēma norū ore, erū nūma toxū nimugū rū Cristuarū tixĩgū.

3

Tupanaārū uneta i ngexwacaxūxūchiga

¹ Rū ñuxma na pemaã nūxū tixuxū na aixcūma Tupana yīĩxū ga toxū mucū, rū bexmana tá nagu perūxĩnūē na wenaxārū togūētūwa tidexagūxū. Ķēxna penaxwēxe na wūxi i carta i cuēxruū pexū tawéxū na nawa nūxū pecuáxũcēx na aixcūma Tupanaārū orearū uruūgū tixĩgūxū, rū ēxna penaxwēxe na

pexūtawa naxcèx itaçaxū i cartagū na ngēmawa duūxūgū toxū cuáxūcèx naxrūxū i ngema togū? ² Rū pemaā nūxū tixu rū tama tanaxwèxe i ÷acū rū carta na duūxūgū toxū cuáxūcèx, erū pematama nixī i ngēma cartarūū pixīgūxū, rū pewa nixī i nangóxū na aixcūma Tupana yīixū ga toxū mucū. Rū meāma toōēwa nūxū tacuèx i ngēma. Rū yema na naxūchicūūxū ga perū maxū, rū ngēmawa guxūma i duūxūgū nūxū nadau na aixcūma wūxi ga mexū ga puracū taxūxū ga petanūwa. ³ Rū ñuxma rū meāma nangox na pema rū ñoma wūxi i carta i Cristutama ūmatūxūrūū na pixīgūxū. Rū torū puracūgagu nixī i ngēma. Natūrū tama wūxi i carta i ÷acū rū ūmatūxūmaā ūmatūxū pixīgū, natūrū pema nixī i carta i Tupana ya Maxūcūāē i Ūūnexū ūmatūxū. Rū ngēma carta rū tama popera rū ēxna nutawa iwūcuchiūū nixī, natūrū perū maxūwa nixī i nangóxū i ngēma. ⁴ Rū ngēmācèx tama tamuixū na ngēmaācū togūcèxtama tidexagūxū, erū tayaxōgū na Cristugagu Tupana toxū dauxū na timexū. ⁵ Rū tama toxrūtama cuèxmaā nixī i tanaxūxū i ÷acū rū mexū. Natūrū guxūma i ngēma taxūxū rū Tupanaārū ngūxēēmaā nixī i tanaxūxū. ⁶ Rū Tupana rū toxū narūngūxēē na duūxūgūmaā nūxū tixuxū i ngēma ngexwacaxūxū i norū uneta na ñuxācū Cristugagu tá tūxna naxāāxū i maxū i taguma gūxū. Rū ngēma maxū rū tama yema mugū ga Moīché ūmatūxūgagu tanayaxu, natūrū tanayaxu erū Tupanaāē i Ūūnexū tūxna nanaxā. Rū yema mugū ga Moīché ūmatūxū rū yuwa tūxū nagagū, natūrū Tupanaāē i Ūūnexū rū tūxna nanaxā i maxū i taguma gūxū. ⁷ Rū yema mugū ga Moīchéna naxāxū ga Tupana, rū nutagu nixī ga naxūmatūxū. Rū yexguma Moīché nayauxgu ga yema mugū, rū porācū niyaurachiwecūxū. Rū yemacèx ga duūxūgū rū taxucūrūwama Moīchéchiwega narūdaunū. Natūrū yema norū yaurachiwecūū rū nixochigū. Natūrū ga yema mugū ga Moīché tūxna āxū i yuwa tūxū gagūxū, rū taxū ga yauracūūxūmaā ínangu. Rū yemaācū namexēchi ga yexguma ínanguxgu. ⁸ Natūrū yexeraācū namexēchi nixī i ngēma uneta i ngexwacaxūxū i Tupanaāē i Ūūnexū taxcèx ngoxēēxū. ⁹ Rū yemaācū woo namexēchi ga yema mugū ga yuwa tūxū gagūxū, natūrū yexeraācū namexēchi i ngēma uneta i ngexwacaxūxū i Tupanapēxewa tūxū mexēēxū. ¹⁰ Rū yema mugū ga noxri mexēchixū, rū ñuxma rū taxuwama name, ega namaā nūgū nangugūgu i ngēma Tupanaārū uneta i ngexwacaxūxū i yexeraācū mexēchixū. ¹¹ Rū yemaācū woo namexēchi ga yema mugū ga paxaāchi íxīxū, natūrū yexeraācū namexēchi i ngēma uneta i ngexwacaxūxū i guxūgutāma íxīxū. ¹² Rū toma aixcūma nūxū tacuèx na guxūgutāma yīixū i ngēma Tupanaārū uneta i ngexwacaxūxū i mexēchixū, rū ngēmācèx tama cuācūma duūxūgūmaā nūxū tixu. ¹³ Rū ngēmācèx tama duūxūgūchaxwa iticuxgū yema Moīché ūxūrūū. Yerū ga Moīché rū nūgū nidūxchiwe na tama nūxū nadaugūxūcèx ga yema Yudiūgū ga ñuxācū na yaxochigūxū ga norū yaurachiwecūū. ¹⁴ Natūrū ga yema duūxūgū ga Moīchéxū íxūmūcūgūxū rū ñoma yadūxgūchiwexūrūū nixīgū yerū tama nūxū nacuèxgūéga ga ÷acūchiga na yīixū ga yema mugū. Rū ñuxma rū ta i ngēma Yudiūgū rū tama nūxū nacuèxgūéga i ngēxguma nawa nangúegu i ngēma mugū. Erū nangēxma i ÷acū i ñoma yadūxgūchiwexūrūū nūxū naguxchaxēēxū na tama nūxū nacuèxgūxūcèx. Rū ñuxma rū ta tama nūxna ínanguéga i ngēma nacūma erū Cristuxicatama nixī ya yima nūxna ínanguxēēcū. ¹⁵ Rū ñuxma rū ta i ngēma Yudiūgū, rū ngēxguma nawa nangúegu i ngēma ore ga Moīché tūxna āxū, rū nangēxma i ÷acū i ñoma yadūxgūchiwexūrūū nūxū naguxchaxēēxū na tama nūxū nacuèxgūégaxūcèx na ÷acūchiga yīixū i ngēma ore. ¹⁶ Natūrū ngēxguma wūxi i duūxū nūxū

rūxoxgu i nacūma i chixexū, rū tōrū Coriaxū yaxōōgu, rū ngēxguma nixī i nūxna ínanguxū i ngēma nūxū naguxchaxēēxū. ¹⁷ Erū nūma ya tōrū Cori rū Naāē i Ūūnexū rū wūxitama nixī rū ngextá ínangēxmaxūwa i tōrū Coriāē i Ūūnexū, rū tūxū nanatauxchaxēē na Tupanana ingaicamagūxū. ¹⁸ Rū ngēmacēx guxāma i yixema na Cristuaxū yaxōgūxū rū ñoma wūxi i woruarū tawa nangóchipeta na ñuxácū namexēchixū ya tōrū Cori erū nataxuma i ñacū i tūxū idūxūxū naxchaxwa. Rū nūma ya tōrū Cori i Naāē i Ūūnexū íxīcū, rū guxūguma yexeraácū tūxū nimexēēchigū na naxrūí aixcūma ímexūcēx.

4

¹ Rū ngēmacēx taguma nūxū tarūchau i ñāā puracū, erū Tupana ya nūxū tangechaūtūmūcū nixī ga toxū mucū na tanaxūcēx i ñāā puracū na duūxūgūmaā nūxū tixuxūcēx i norū ore. ² Rū yemacēx nūxū tarūxoe ga guxūma ga ñacū ga chixexū i āne tūxna āxū i cuácū úxū. Rū tama tanawomūxēēácūma nixī i namaā nūxū tixuxū i ore rū tama tanaxūchicū i ngēma ore. Natūrū ngēma ore i aixcūma íxīxūcatama nixī i nūxū tixuxū. Rū ngēmaācū Tupanapēxewa tamaxē rū duūxūgūpēxewa togū itawēx na nūxū nacūēxgūcēx na ñuxácū tixīgūxū i tomax. ³ Rū ngēxguma chitexécēx naguxchagu i ngēma ore i mexū i nūxū tixuxū, rū ngēma duūxūgū i iyarūtauxexūcēxicatama nixī i naguxchaxū. ⁴ Erū nūmagū rū tama nayaxōgū. Rū ngēmacēx i ñoma i naāneārū āēxgacū i Chataná rū nūxū nanaguxchaxēē na tama nūxū nacūēxgūcēx na ñuxácū namexēchixū i norū ore ya Cristu ya Ūūnecū. Rū Cristuwa nixī i nangóxū na ñuxácū na yīxū ya Tupana. ⁵ Rū ngēxguma duūxūgūmaā nūxū tixuxgu i ngēma ore, rū tama tochigaxūtama tixugū. Natūrū nūxū tixu na Ngechuchu ya Cristu rū tōrū Cori yīxū, rū nūma tūxū na nangechaūxūgagu perū ngūxēēruūgū na tixīgūxū. ⁶ Erū nūmatama ya Tupana ga noxri naāne naxūxgux rū ēānexūwa nangoxēēcū ga ngóonexū, rū nūmatama nixī i ñuxma i tūxū yangoxnaāēxēēgūxū na ngēmawa nūxū ícuáxūcēx na ñuxácū namexēchixū i nūmax. Rū ngēma norū mexū rū Ngechuchu ya Cristuchiwewa nixī i nūxū idauxū.

Tayaxōgūama ega woo ngūxū ingegūgu

⁷ Rū ngēma nūxū na ícuáxū na ñuxácū namexēchixū ya Tupana, rū ngēma cuēx rū wūxi i mexēchixū nixī. Natūrū ngēma cuēx i mexēchixū rū taxūne i maíraxūnaxcēxwa nangēxma, na nangóxūcēx na Tupanawa ne naxūxū i guxūma i pora rū tama i tawatama. ⁸ Rū guxūwama toxū nangēxma i guxchaxūgū, natūrū taguma nūxū tarūchau i ñāā puracū. Rū woo poraácū taxoegaāēgūgu, natūrū taguma ítanangēx. ⁹ Rū woo togū towe ingēxūtanūgu, natūrū ya Tupana rū taguma toxū ínawogū. Rū woo duūxūgū toxū napíexēēgu, natūrū tama ngēxma tayacuēxēē i ñāā puracū. ¹⁰ Rū guxūwama i ngextá ítaxīūwa rū ācūmaxūwa tangēxmagū, yexgumarū tū ga Ngechuchu na ācūmaxūwa nayexmaxūrū. Natūrū ngēmaācū toxū naxūpetū na duūxūgū nūxū daugūxūcēx na ñuxácū towa namaxūxū ya Ngechuchu. ¹¹ Rū ñuxma na tamaxēxū, rū guxū i ngunexūgu rū Ngechuchugagu ācūmaxūwa tangēxmagū. Natūrū ngēmaācū toxū naxūpetū na Ngechuchu inawéxūcēx i norū pora nawa i ñāā toxone i yuxwēxexū. ¹² Rū ngēmaācū Tupanaārū ore cēx ācūmaxūwa tangēxmagū, natūrū ngēmaācū toxū naxūpetū na pema rū pexū nangēxmaxūcēx i maxū i taguma gūxū.

¹³ Tupanaārū ore i ūmatūxūwa rū ñanagūrū:

“Nūxū chayaxō rū yemacēx Tupanachíga chidexa”,

ñanagürü. Rū ngëxgumarüütama tixīgü i toma na tayaxōgūxū rü Tupanachiga tidexagūxū. ¹⁴ Erü nüxū tacuèxgü rü Tupana ga yuwa ínadxēécü ga Ngechuchu ya tōrū Cori, rü yimatama Tupana tá nixī ya toxū Írüdagūxēécü, erü Ngechucharü duūxūgü tixīgü. Rū ngēmaācü wūxigu pemaā nügūxūtawa tá toxū nagagü. ¹⁵ Rū guxūma ga yema toxū ngupetūxū rü perü mexūcèx nixī na yexeraācü yamuētanūxūcèx i ngēma duūxūgü i Tupana nüxū rüngūxēégūxū. Rū ngēmaācü tá düxwa namuxūchi i ngēma duūxūgü i moxē Tupanana āgūxū rü nüxū icuèxūūgūxū. ¹⁶ Rū ngēmacèx taguma nüxū tarūxoe na nüxū tixuxū i ngēma ore. Rū woo yayachigūgu rü yaturachigūgu i toxone, natürü toōewa rü guxū i ngunexūgu rü yexeraācü tiporaetanü. ¹⁷ Erü ngēma ngūxū i toxū ūpetūxū i ñaā torū maxūwa, rü ngēma rü wūxi i paxaāchimarē nixī rü paxa tá nangupetü. Natürü ngēmaācü tá tanayaxu i wūxi i maxū i mexēchixū i tagutāma gūxū i ñoma i naānecūāx i maxūārü yexeraxūchi ixīxū. ¹⁸ Rū tama ngēma ñuxma nüxū idauxūgu nixī itarūxīnūèxū, natürü nagu tarūxīnūè i ngēma ñuxma tama nüxū idauxū. Erü ngēma ñuxma nüxū idauxū rü tama natai, natürü ngēma ñuxma tama nüxū idauxū, rü guxūgutāma nangēxmaēcha.

5

¹ Rū nüxū tacuèxgü ega ngëxguma iyanaxoxgu i ñaā toxone i paxaāchi ñuxma toxū ngēxmaxū, rü daxūguxū i naānewa tá tanayaxu i wūxi i toxone i tagutāma iyarūxoxū i Tupanatama toxçèx mexēèxū rü tama i duūxūgü. ² Rū ngēmacèx i ñuxma i ñaā toxonewa tamaxēyane, rü tama aixcūma tataāégü. Erü tanaxwèxe na paxa toxū nangēxmaxū i ngēma toxone i daxūguxū i naānewa ngēxmaxū. ³ Rū ngēma toxone i daxūguxū i naānewa tá toxū ngēxmaxū rü ñoma wūxi i naxchirurūū tá toxū nidūxū, na ngēmaācü naxāxūnèxūcèx i toōè. ⁴ Rū ñaā toxone i ñuxma toxū ngēxmaxūwa tamaxēyane, rü tanaxjāchiāégü rü tama aixcūma tataāégü. Rū tama aixcūma ítanatāxchaū i toxone i ñoma i naānewa toxū ngēxmaxū, natürü tanaxwèxegü na tanayaxuxū i toxone i ngexwacaxūxū na ngēmaācü ngēma maxū i ngexwacaxūxū iyanaxoxēèxūcèx i toxone i ñuxma toxū ngēxmaxū. ⁵ Rū Tupana nixī ya toxū imexēécü naxçèx i ngēma ngexwacaxūxū i maxū rü ngēma ngexwacaxūxū i toxone. Rū toxna nanamu ga Naāè i Ūñèxū na ngēmawa nüxū tacuáxūcèx na aixcūma tá tanayaxuxū i ngēma. ⁶ Rū ngēmacèx taxucèxma taxoegaāégü. Erü nüxū tacuèx rü ñuxma ñaā toxonewa tamaxēyane, rü taxucürūwama tōrū Corixūtawa tangēxmagū i daxūguxū i naānewa. ⁷ Rū woo tama nüxū tadaugūgu ya yima tōrū Cori i ñuxmax, natürü tayaxōgü na wūxi i ngunexū rü tá nüxū tadaugūxū. Rū ngēma nixī i toxū poraxēèxū i ñaā torū maxūwa. ⁸ Rū ngēmacèx taxucèxma taxoegaāégü ega tayuegu. Erü toxçèx rü narūmemaē nixī na nüxna ítachoxūxū i ñaā toxone, na tōrū Corixūtawa tayangēxmagūxūcèx. ⁹ Rū ngēmacèx, woo ñoma i toxonewa tangēxmagūgu rü éxna tama nawa tangēxmagūgu, rü tanaxwèxe na guxūguma tōrū Coriarü ngūchaū na taxūxū. Rū ngēmacèx naxçèx tadaugū na tanaxūxū i ngēma nanaxwèxexū i nūmax. ¹⁰ Erü guxātama i yixema rü Cristupèxewa tá tangūgu na wūxichigü nayaxuxūcèx i ngēma tūxna ūxū. Rū nūma tá wūxichigūxū nangugūarū maxūāx. Rū ngëxgumarūū na ñuxācü meā imaxèxū rü éxna chixri imaxèxū ga yexguma ñoma ga taxūnewa iyexmagūgu, rü ngēmaācü tá tūxna nanaxā ya wūxichigü.

Cristu rü taxçèx Tupanaxū narüngūxmūxēè

11 Rū ngēmacēx Tupanaārū orearū uwa tapuracūe rū tayaxucuxēgū i duūxūgū na yaxōgūāxūcēx. Erū toma rū aixcūma torū Corixū tamuūē. Rū Tupana toxū nacuēx na űuxācū yīixū i tōrū maxū, rū chierūna pema rū chi ta toxū pecuēxgux. 12 Rū tama tanaxwēxe i wenaxārū togūētūwa tidexagū, natūrū pexū tarūngūxēchaū na pexū nangēxmaxūcēx na tacūcēx tomaā petaāēgūxū na nūxū pecuāxūcēx na űuxācū penangāxūxū i ngēma duūxūgū i pepēxewa nūgū írūmegūnetaxū natūrū norū maxūwa rū tama ixaixcūmagūxū. 13 Rū woo duūxūgū toxū daugūgu na Tupanagu taxāūāēgūxū, rū nūētama nixī i ngēma erū nūmatama ya Tupana rū meāma toxū nacuēx. Natūrū i pema rū meāma toxū pecuēx na meāma toōēxū tacuāācūma pemaā nūxū tixuxū ga norū ore. 14 Rū Cristu ya poraācū toxū ngechaūcū nixī ya űuxma tomaā icuācū, erū tayaxō na nūma rū guxāārū pecaducēx nayuxū na yexma yanaxoxūcēx ga guxāārū chixexūgū. 15 Rū yemaācū guxūma ga duūxūgūcēx nayu ga Cristu, na ngēma duūxūgū i űuxma maxēxū, rū tama nūmatama nagu naxīnūēxūgu namaxēxūcēx, natūrū naxcēx na namaxēxūcēx ya yima naxcēx yucū rū wena írūdacū. 16 Rū ngēmacēx i toma rū tama űoma i naāncēūāx i duūxūgū nagu rūxīnūēxūrūū texēxū tangūgūarū maxūāx. Rū woo ga űpa rū űoma ga naāncēūāx ga duūxūgū nagu rūxīnūēxūrūū Cristuxū tangūgu, natūrū i űuxma rū tama ngēmaācū namaā nagu tarūxīnūē. 17 Rū ngēxguma texē Cristuaxū yaxōxgu, rū ngexwacaxūxū i duūxū tixī. Rū nuxcūmaūxū ga tūmacūma rū marū tūxna inayarūxo, rū ngexwacaxūxū i maxū tūxū nangēxma. 18 Rū guxūma i ngēma rū Tupana nixī ya naxūcū. Rū nūma nixī ga Cristugagu tamaā inangūxmūxū. Rū űuxma rū toxū namu na duūxūgūmaā nūxū tixuxū na namaā inangūxmūēxūcēx. 19 Yerū Tupana rū Cristugagu duūxūgūmaā nūgū narūngūxmūxēē. Rū tama duūxūgūarū pecadugu naxīnūācūma nanaxū ga yema. Rū űuxma rū toxū namu na ngēmachigaxū duūxūgūmaā tixuxū. 20 Rū ngēmaācū Cristuarū orearū ngeruūgū tixīgū, rū towa nixī i Tupana pexū cēēxūxū na namaā iperūngūxmūēxūcēx. Rū ngēmacēx Cristuégagu pexū tacēēxūgū na Tupana-maā iperūngūxmūēxūcēx. 21 Cristu rū taguma pecadu naxū. Natūrū tagagu nixī ga Tupana ga űoma pecaduāxūrūūācūma namaā naxūāxū na yemaācū nagagu tūxū inangūxūxēēxūcēx nawa i tōrū chixexū na aixcūma napēxewa imexūcēx.

6

1 Rū űuxma na Tupanaārū ngūxēēruū tixīgūxū, rū pexū tacēēxū na tama nūxū pexoexūcēx ga yema pemaā na namecūmaxū ga yexguma nayuxgu ga Nane. 2 Erū Tupana rū norū ore i űmatūxūwa, rū űnanagūrū: “Rū yema ngunexū ga nagu namexūgu na choxū peyaxuxū, rū yexguma nixī ga pexū chaxīnūxū. Rū yexguma pexna chanaxūāxūgu ga maxū i taguma gūxū, rū yexguma nixī ga pexū charūngūxēēxū”, űnanagūrū. Rū űuxma nixī i ngēma ngunexū i nagu namexū na Tupanaxū peyaxuxū, rū űuxma nixī i ngēma ngunexū i pexna naxuaxūāxū i maxū i taguma gūxū. 3 Rū toma rū guxūguma naxcēx tadau na guxāpēxewa meā tamaxēxū na taxucēxma texē chixri torū puracūchiga idexaxūcēx. 4-5 Rū guxūwama duūxūgūxū nūxū tadauxēēchaū na aixcūma Tupanaārū duūxūgū tixīgūxū. Rū ngēmacēx yaxna namaā taxīnūē i ngēxguma woo ngūxū toxū ngupetūgu, rū ēxna facū toxū taxugu, rū ēxna tacū rū guxchaxū toxū ngēxmagu, rū ēxna toxū yaçuaixgūgu, rū ēxna toxū napoxcuegu, rū ēxna naxīxāchiāetanūgu rū tomaā nanuēgu. Rū poraācūxūchima tapuracūe, rū

ñuxguacū rū tama tapee, rū ñuxguacū rū taiya toxū nangux. Natūrū yaxna namaā taxīnūē i guxūma i ngēma. ⁶ Rū ngexgumarūxū ta duūxūgūxū nūxū tadauxēē na aixcūma namexū i torū maxū, erū aixcūma Tupanapēxewa meā tamaxē, rū meā Tupanaxū tacuèx, rū yaxna duūxūgūmaā taxīnūē, rū namaā tamēcūma. Rū nūxū nūxū tadauxēē na towa nangēxmaxū i Tupanaāē i Ūñexū rū aixcūma guxū i duūxūgūxū tangechaūxū. ⁷ Rū duūxūgūxū nūxū tadauxēē na aixcūma namexū i torū maxū, erū namaā nūxū tixu i ngēma ore i aixcūma ixīxū, rū itanawēx i Tupanaārū pora i towa ngēxmaxū. Rū ngēma toxne ixīxū rū ngēma nixī i torū maxū i aixcūma mexū i Tupanapēxewa. Rū ngēmamaā nixī i togū itapoxūxū i torū uwanūgūpēxewa. ⁸ Rū ñuxguacū i duūxūgū rū toxū nicuèxūūgū, rū ñuxguacū rū facū tomaā nixugūē. Rū ñuxguacū rū meā tochiga nidexagū, rū ñuxguacū rū chixri tochiga nidexagū. Rū woo aixcūmachirēx yixīgu i ngēma ore i nūxū tixuxū, natūrū doratēēx toxū nawogūē. ⁹ Rū woo meā toxū nacuèxgūchirēxgu, natūrū ñoma tama toxū nacuāxūrūū tomaā nixīgū i duūxūgū. Rū ñuxguacū rū wixgutaèx tayue, natūrū naetūwa tamaxēāma. Rū toxū napoxcue, natūrū tama toxū nadaixichi. ¹⁰ Rū woo tangechaūgūgu, natūrū guxūguma tataēgūama. Rū woo ñoma i naānewa tama tamuārū ngēmaxūāxgūgu, natūrū muxūma i duūxūna tanaxā i taxū i mexū erū togagu nanayaxu i maxū i taguma gūxū. Rū woo taxūma toxū ngēxmēxgu i ñoma i naānewa, natūrū daxū-guxū i naānewa rū toxū nangēxma i guxūma. ¹¹ Pa Chaueneēgū i Corŷtiucūāx, dūcax aixcūma pemaā nūxū tixu rū guxū i torū maxūnemaā pexū tangechaūgūxūchi. ¹² Rū toma rū tama pexū taxoe, natūrū pema waxi nixī i tama petoxwēxexū. ¹³ Rū dūcax, Pa Chaueneēgū, rū ñoma wūxi i papā naxācūgūxū cēxūxūrūū pexū chacēxū na choxū pengechaūgūxūcēx ngēma choma pexū changechaūxūrūū.

Tupana ya maxūcūpata tixīgū

¹⁴ Rū tāūtāma namaā pexāmūcū i ngēma duūxūgū i tama yaxōgūxū! Erū ngēxguma chi ngēmaācū penaxūxgu rū tāūtāma guxū wūxigu perūxīnūē. ¿Rū ñuxācū nawūxiguxū i ngēma mexū namaā i ngēma chixexū? ¿Rū ñuxācū nawūxigu i ngōonexū namaā i ēānexū? ¹⁵ ¿Rū ñuxācū nawūxiguxū ya Cristu namaā i Chataná? ¿Rū ñuxācū nawūxiguxū i wūxi i duūxū i yaxōxū namaā i wūxi i duūxū i tama yaxōxū? ¹⁶ ¿Rū ñuxācū Tupanapatawa nangēxmaxū i tupanetachicūnēxāgū? Erū yixema rū Tupana ya maxūcūpata tixīgū, rū tawa namaxū i nūmax. Rū Tupana rū pechiga nidexa ga yexguma ñaxgu: “Rū ngēma duūxūgūwa tá chamaxū, rū natanūgu tá chayarūxūxū. Rū norū Tupana tá chixī, rū nūmagū rū tá chorū duūxūgū nixīgū”, ñaxgu. ¹⁷ Rū yemacēx ñanagūrū ta ga tōrū Cori: “rū ŷpechoxū i natanūwa i ngēma duūxūgū i tama chorū duūxūgū ixīgūxū! rū tāxū i nūxū pingōgūxū i ngēma chopēxewa chixexū! Rū choma rū tá pexū chayaxu. ¹⁸ Rū choma rū Penatū tá chixī, rū pemagū rū tá chaūnegū rū chauxacūgū pixīgū”, ñanagūrū ya tōrū Cori ya Tupana ya guxūārū yexera poraxūchicū.

7

¹ Rū dūcax, Pa Chaueneēgū ya Pexū Changechaūgūxex, rū ngēma Tupanaārū unetagū i pemaā nūxū chixuxū, rū taxcēx nixīgū. Rū ngēmacēx tanaxwēxe na yigūna idaugūxū na tama taxūnemaā rū ēxna taāēmaā naxūxūcēx i ngēma Tupanapēxewa tama mexū. Rū tanaxwēxe i aixcūma Tupanaxū imuūēācūma nūxna yigū taxāgū rū naxcēxicatama tamaxē.

Pauru rū ngema Corŷtiucŷġxgŷmaā nataāxē

² Rū tanaxwēxe i toxŷ pengechaŷgŷ. Rū dŷcax ga toma rū taxŷxemaāma chixexŷ taxŷgŷ. Rū taxŷxexŷma chixexŷgu tanguxēē. Rū taxŷxexŷma tawomŷxēēgŷ. ³ Rū tama pexŷ chixuxŷcēx nixŷ i pemaā nŷxŷ chixuxŷ i ngēma. Yerŷ marŷ pemaā nŷxŷ chixu na ŷŷuxācŷ guxŷ ga chorŷ maxŷmaā pexŷ changechaŷŷ. Rū ngema pexŷ na changechaŷŷŷgagu rū ŷchamemare na petanŷwa chamaxŷŷŷ rū ēxna wŷxigu pemaā chayuxŷ. ⁴ Rū ŷŷxma rū taxucēxma pexŷ chaxāneācŷma pemaā chidexa erŷ poraācŷ pemaā chataāē. Rū woo ngŷxŷ na tingegŷxŷ, natŷrŷ aixcŷma choxŷ penangŷchaŷŷxēē rū choxŷ petaāēxēē. ⁵ Rū yexguma Machedŷniāānewa tangugŷgucŷrŷwa rū taguma itarŷngŷgŷ. Yerŷ guxŷwama ga ngexta itaxŷŷwa rū nŷxŷ itayangau ga guxchaxŷgŷ. Rū duŷxŷgŷ rū toxŷ nanaguxchaxēē na tanaxŷxŷ i Tupanaarŷ puracŷ rū yemacēx poraācŷ taxoegaāxēgŷ. ⁶ Natŷrŷ ya Tupana ya tŷxŷ taāēxēēcŷ ya yŷxema ngechaŷgŷxe, rū toxŷ rū ta nataāēxēē ga yexguma toxŷtawa nanguxgu ga taeneē ga Titu. ⁷ Rū tama yema toxŷtawa na nanguxŷcēxicatama tataāēgŷ, natŷrŷ tataāēgŷ ta yerŷ ga pema rū poraācŷ nŷxŷ penangŷchaŷŷxēē rū penataāēxēē ga guma taeneē ga Titu. Rū nŷma ga Titu rū tomaā nŷxŷ nixu na ŷŷuxācŷ poraācŷ penaxwēxexŷ na toxŷ pedauxŷ. Rū tomaā nŷxŷ nixu na ŷŷuxācŷ naxcēx pengechaŷgŷxŷ ga yema chomaā pexŷŷ, rū na ŷŷuxācŷ chauxcēx pexoegaāēgŷxŷ. Rū gŷŷma ga yema oremaā rū yexeraācŷ chataāē. ⁸ Choma nŷxŷ chacuēx rū yema popera ga pexcēx chaxŷmatŷxŷ rū pexŷ nangechaŷgŷxēē, natŷrŷ ŷŷxma rū marŷ tama naxcēx changechaŷ na chanaxŷmatŷxŷ ga yema popera. Rū noxri rū yemaācŷ naxcēx changechaŷ ga yexguma nŷxŷ chacuēxgu ga na pexŷ nangechaŷgŷxēēxŷ ga yema popera ga yexguma penayauxgu. ⁹ Natŷrŷ i ŷŷxma rū chataāē na pexcēx chanaxŷmatŷxŷ ga yema popera. Rū tama yema na pengechaŷgŷxŷcēx chataāē, natŷrŷ chataāē yerŷ yema perŷ ngechaŷgagu Tupanana pecuēxāchie rū penaxŷchicŷŷ ga perŷ maxŷ. Rū pema rū aixcŷma Tupanana pecuēxāchieācŷma namaā peporae ga yema ngechaŷ, rū yemaācŷ taxŷŷma ga chixexŷ pemaā taxŷ ga yexguma pexcēx tanaxŷmatŷgu ga yema popera. ¹⁰ Rū ngēma ngechaŷ i Tupana naxwēxexŷācŷma namaā iporaexŷ, rū name nixŷ, erŷ ngēma ngechaŷgagu naxŷchicŷŷ i torŷ maxŷ rū ngēmagagu tanayaxu i maxŷ i taguma gŷxŷ. Rū ngēmacēx taxucēxma naxcēx pixāŷxāchie i ngēma ngechaŷ. Natŷrŷ ngēma ngechaŷ i ŷŷoma i naānecŷġx i duŷxŷgŷ nŷxŷ ngēxmaxŷ rū taxuwama name erŷ yuwa nanaga. ¹¹ Rū yexguma yema poperamaā pexŷ changechaŷŷxēēgŷ, rū Tupana naxwēxexŷācŷma nixŷ ga namaā peporaexŷ ga yema ngechaŷ. jRū dŷcax i ŷŷxma i taēcŷ Tupana pemaā ŷxŷ i ngēma perŷ ngechaŷgagu! Yerŷ yema perŷ ngechaŷgagu rū aixcŷma nagu perŷxŷnŷē ga yema chixexŷ ga petanŷwa ŷpetŷxŷ, rū meāma chomaā nŷxŷ pixu ga yema. Rū yema perŷ ngechaŷgagu rū peāēwa nangux ga yema chixexŷ, rū poraācŷ Tupanaxŷ pemuēē. Rū yemacēx penaxwēxe na yēma chaxŷxŷ na pexŷ chayarŷngŷxēēxŷcēx yerŷ penamexēēgŷchaŷ ga yema chixexŷ. Rū yema perŷ ngechaŷgagu rū aixcŷma penaxucŷxē ga yema duŷxŷ ga chixexŷ ŷxŷ. Rū guxŷ ga yemawa rū ipenawēx na tama pegagu yŷŷxŷ ga yema chixexŷ ga ngu-petŷxŷ. ¹² Rū yemacēx, yexguma pexcēx chanaxŷmatŷgu ga yema popera, rū tama yema duŷxŷ ga chixexŷ ŷxŷgu charŷxŷnŷācŷma chanaxŷmatŷ, rū tama yema duŷxŷ ga namaā chixexŷ naxŷŷgu charŷxŷnŷācŷma chanaxŷmatŷ. Natŷrŷ chanaxŷmatŷ ga yema popera na yemawa Tupanapēxewa nŷxna pecuēxāchixŷcēx na ŷŷuxācŷ aixcŷma toxŷ pengechaŷgŷxŷ. ¹³ Rū yema na

toxū pengechaūgūxū, rū wūxi ga taāē nixī ga toxcèx. Natūrū yema taāēārū yexera nixī ga yema taāē ga toxū yexmaxū ga yexguma nūxū tadēuxgu ga Titu ga űuxācū taxū ga taāē petanūwa na nayaxuxū. Rū aixcūma guxāma ga pema nixī ga wenaxārū poraācū nūxū penangūchaūxēēxū. ¹⁴ Rū noxri tauta yēma naxūxgu ga Titu, rū namaā nūxū chixu na mexū i duūxūgū na pixīgūxū. Rū űuxma rū taxucēxma chaxāne, erū guxūma ga yema Titumaā nūxū chixuxū ga pechiga rū aixcūma ngēmaācū nixī, yexgumarūū na aixcūma yīxū ga guxūma ga yema Tupanaārū ore ga pemaā nūxū tixuxū. ¹⁵ Rū űuxma i Titu rū yexeraācū pexū nangechaū i ngēxguma nūxna nacuēxāchigu na űuxācū meā naga pexīnūēxū rū űuxācū nūxū pengechaūācūma meā penayaxuxū. ¹⁶ Rū choma rū ta poraācū pemaā chataāēxūchi, erū nūxū chacuēx na aixcūma peyanguxēēxū ga guxūma ga yema pemaā nūxū chixuxū.

8

Yema yaxōgūxū rū woo tama na namuārū dīeruāxgūxū, natūrū yema nūxū yexmacū ga dīerumaā meā togūxū narūngūxūxēēgū

¹ Rū űuxmax, Pa Chaueneēgūx, rū pemaā nūxū tixuxchaū na űuxācū Tupana namaā mecūmaxū i ngēma yaxōgūxū i Machedōniāāneārū iānegūwa ngēxmagūxū. ² Rū woo taxū ga guxchaxūgū nūxū na űpetūgūxū, natūrū nataāēgūama. Rū woo tama na namuārū dīeruāxgūxū, natūrū yema nūxū yexmacū ga dīerumaā meā togūxū narūngūxūxēēgū. ³ Rū choma nūxū chadau rū pemaā nūxū chixu rū nūmagū rū taāēācūma ngīxū inaxāgū ga guxcūma ga dīeru ga nūxū tauxchacū na ngīxū inaxāgūxū. Rū ngīetū yemaārū yexera taāēācūma ngīxū inaxāgū. ⁴ Rū poraācū toxū nacēxūgū na tama nūxna tanachūxuxūcèx na yemaācū yema togū ga taeneēgūxū nangūxēēgūxūcèx. ⁵ Rū yema nagu tarūxīnūēxūārū yexera ngīxū inaxāgū ga yema yaxōgūxū ga Machedōniāānecūāx. Yerū Tupananaxīra nūgū naxāgū rū yemawena toxna nūgū naxuaxūgū na toga naxīnūēxūcèx, yema Tupana naxwēxērūū. ⁶ Rū yemacèx Tituxū tacēēxū na wena petanūwa naxūxūcèx na ngīxū pinguxēēxūcèx ga yema dīeru ga marū pemaā ngīxū inaxūgūcū na ngīxū penutaquēxexū naxcèx i ngēma togū i taeneēgū i nūxū nataxuxū. ⁷ Pema rū guxūwama meā ipexī erū meā peyaxōgū, rū pexū natauxcha na meā nūxū pixuxū i Tupanaārū ore erū meā nūxū pecuēx na űacūchiga yīxū. Rū aixcūma togūxū perūngūxēēchaū, rū yema pexū tangūxēēxūācūma pegū pengechaūgū. Rū űuxma rū ngēxgumarūū ta penaxwēx na aixcūma meā ipexīxū nawa i ngēma mexū i nacūma na dīeru ngīxū ipexāxū naxcèx i ngēma taeneēgū i nūxū nataxuxū. ⁸ Tama wūxi i mu nixī i ngēma pemaā nūxū chixuxū. Natūrū chanaxwēxemare na nūxū pecuāxū na űuxācū taāēācūma ngīxū inaxāgūxū ga togū ga yaxōgūxū. Rū pemaā nūxū chixu i ngēma na pema rū ta ngīxū ipexāgūxūcèx i ngēma dīeru i togū i taeneēgūārū ngūxēēcèx ixīcū, na ngēmaācū ipenawēxūcèx na aixcūma nūxū pengechaūgūxū. ⁹ Erū pema rū marū nūxū pecuēx na űuxācū tamaā namecūmaxū ga tōrū Cori ya Ngechuchu ya Cristu. Rū woo nūxū nayexma ga guxūma, natūrū űoma wūxi ga ngearū yemaxūāxūrūū pexcèx nūgū nixīxēē na ngēmaācū pexū nangēxmaxūcèx i muxūma i mexūgū. ¹⁰ Rū űuxma rū perū mexūcèx nixī i pemaā nūxū chixuxū i ngēma dīeruārū nutaquēxechiga. Rū taunecū ga ngupetūcūgutama nixī ga ipenaxūgūxū ga ngīxū na penutaquēxexū. Rū yema rū aixcūma perū ngūchaūmaā nixī ga penaxūxū. ¹¹ Rū űuxma rū yema noxri na meā ipenaxūgūxūrūū, rū name nixī i taāēācūma rū perū ngūchaūmaā

peyanguxēē rü ngēma dīeru i pexū ngēxmacūwa ngīxū ipexā naxcèx i ngēma peeneēgū i nūxū nataxuxū. ¹² Erū ngēxguma aixcūma wūxi ya duūxē tūmaārū ngūchaūmaā ngēma dīeru i tūxū ngēxmèxcūwa tūmaēneēcèx ngīxū itaxāxgu, rü Tupana rü taāēācūma ngīxū nayaxu. Erū nūma ya Tupana rü taguma tūxna ngīxcèx naca i ngēma tūxū taūxcū. ¹³ Rū ngēmacèx tama chanaxwèxe i ngēma togūxū na perūngūxēēxūgagu pexū nataxu i pemax. ¹⁴ Natūrū chanaxwèxe i guxāma tūxū nangēxma i tacū i tanaxwèxexū, erū tama name na texéaxū nataxuxū i tacū. Rū űuxma na pexū nangēxmaxū i perū dīeru, rü name nixī i nūxū perūngūxēēgū i ngēma taeneēgū i nūxū nataxuxū. Rū ngūrūāchi to i ngunexūgu i pema pexū nataxūgu, rü nūmagū rü tá nūxū nūxū nangēxma na pexū nangūxēēgūxcèx. Rū ngēmaācū tá guxātama tawūxigu.

¹⁵ Rū Tupanaārū ore i űmatūxūwa rü űnanagūrū:

“Guxema muxūma tūxū yexmaxē rü taxūma tūxū ínayaxū. Rū guxema noxretama tūxū yexmaxē rü tama tūxū inayataxu”,
 űnanagūrū.

Titu rü namücūgūchiga

¹⁶ Natūrū Tupanana moxē chaxā, erū nūma rü Tituxū nagu narūxīnūxēē na aixcūma pexū nangūxēēxūxcèx, ngēma choma pegu charūxīnūxūrū. ¹⁷ Rū nūma ga Titu rü: “Ngū” űnanagūrū na wena petanūwa chanamuxū. Yerū nūma rü woetama porāācū pegu narūxīnū. Rū ngēmacèx i űuxma rü wena petanūwa naxū, erū nūxū nangūchaū. ¹⁸ Rū Titumaā ngema tanamu i wūxi i taeneē i guxūma i yaxōgūxū nūxū ngechaūgūxū erū nūma rü aixcūma meā nūxū nixu i Tupanaārū ore i tūxū maxēxēxū. ¹⁹ Rū tama ngēmacèxicatama nixī. Erū guxūma i ngēma yaxōgūxū rü ngēma taeneēxū naxunetagu na toxū íyaxūmūcūxūxcèx rü toxū nangūxēēxūxcèx i ngēxguma Yerucharēuwa ngīxū tangexgu i ngēma dīeru, na ngēmaācū nūxū ticuēxūūgūxūxcèx ya tórū Cori, rü na guxāma nūxū dauxūxcèx na űuxācū taāēācūma yigū rūngūxēēgūxū. ²⁰ Rū ítayaga i ngēma taeneē, erū tama tanaxwèxe i texé toxū tixu i yixcama ngīxcèx i ngēma tacū i dīeru i taeneēgūxcèx ngīxū inutaquēxegūcū. ²¹ Erū tama Tupanapēxewaxicatama tanaxwèxe na meā tanaxūxū, natūrū guxū i duūxūgūpēxewa rü ta tanaxwèxe na meā tanaxūxū. ²² Rū Titumaā rü ngēma to i taeneēmaā petanūwa tanamu i wūxi i to i taeneē i toxū nūxū dauxēēxū na aixcūma nūxū nangūchaū na naxūāxū i Tupanaārū puracū. Rū űuxma rü yexeraācū petanūwa naxūchaū i nūmax, erū nūxū nacuèx na űuxācū pema rü taāēācūma togūxū na perūngūxēēgūchaūxū. ²³ Rū ngēxguma texé pexna caxgu na texe yīxū ya Titu, jrū tūmamaā nūxū pixu na nūma rü chomūcū ya wūxiwa chomaā pexcèx puracūcū na yīxū! Rū ngēma taxre i togū i namücūgū, rü ngēma nixī i yatūgū i guxūma i yaxōgūxū nūxū unetagūxū na Cristuarū puracū naxūgūxūxcèx. Rū nūmagū rü aixcūma norū maxūmaā Cristuxū nicuēxūūgū. ²⁴ Rū ngēmacèx chanaxwèxe i ngēma taeneēgūxū nūxū pedauxēē na aixcūma nūxū pengechaūgūxū, na guxūma i yaxōgūxū nūxū cuēxgūxūxcèx i ngēmachiga. Rū ngēmaācū guxūma i ngēma yaxōgūxū tá nūxū nacuēxgū na aixcūma yīxū i ngēma mexū i ore i pechiga namaā nūxū tixuxū.

9

Yema dīeru ga yema togū ga yaxōgūxūxcèx ngīxū inutaquēxegūchiga

¹ Rū taxucèxma tūxcūū pexcèx chanaxūmatū ngīchiga i ngēma dīeru i ngīxū penutaquēxegūcū naxcèx i ngēma taeneēgū i yaxōgūxū i Yudéanewa ngēxmagūxū. ² Erū marū nūxū chacuèx rü perū ngūchaūmaā ipenaxā i

ngēma dīēru. Rū guxūguma taāēācūma ngēma yaxōgūxū i Machedóniāānewa ngēmagūxūmaā nūxū chixu na űuxācū i pema i Acayaanewa ngēmagūxe rū naī ya taunecūgutama marū ípememarexū na ngīxū ípexāgūxū i ngēma dīēru. Rū yema rūmumaēxū ga yaxōgūxū ga Machedóniāānecūāx, rū yexguma nūxū naxīnūēgu na űuxācū taāēācūma togūcēx ngīxū na ípexāgūxū i perū dīēru, rū nūmagū rū tā inanaxūgū na ngīxū inaxāgūxū. ³ Natūrū i űuxma rū ngema petanūwa chanamugū i ngēma taeneēgū na nūxū nadaugūxūcēx, na aixcūma yīxū i ngēma nūxū chixuxū i pechiga. Rū chanaxwēxe na aixcūma ípememarexū na ngīxū ípexāxū i ngēma dīēru, ngēma taeneēgūmaā nūxū chixuxūrū. ⁴ Erū ngēxguma chi űuxre i taeneēgū i Machedóniāānecūāx rū ngūrūāchi chomaā petanūwa naxīxgu, rū tama chanaxwēxe na pexū na iyangauxū na tama aixcūma ípememarexū na ngīxū ípexāxū i ngēma dīēru. Rū toxū rū chi wūxi i ānexūchi nixī, erū marūchirēx namaā nūxū tixu na űuxācū aixcūma ípememarexū na ngīxū ípexāxū i ngēma dīēru. Rū maneca pexū rū chi ta wūxi i ānexūchi nixī. ⁵ Rū ngēmacēx nixī i chauxcēx namexū na naxcēx íchaçaxū i ngēma taeneēgū na nūxīra petanūwa naxīxūcēx rū nūmatama pexū yanangūxēēgūxūcēx na ngīxū penutaquēxegūxūcēx i ngēma dīēru ga űpamama ngīxū pixucū. Rū ngēmaācū aixcūma tā ímemeare i ngēma dīēru i ngēxguma ngema changuxgu. Rū togū tá nūxū nadaugū na aixcūma perū ngūchaūmaā yīxū na ngīxū ípexāgūxū rū tama aūācūma na yīxū. ⁶ Rū nūxna pecuēxāchie i ngema dexa i űaxū:

“Rū yīxema noxretama i nanetūchire itoxe, rū noxretama i norū o tayaxu.

Natūrū yīxema muxū i nanetūchire itoxe, rū muxūma i norū o tayaxu”, űaxū! ⁷ Rū wūxichigū tanaxwēxe na ngīxū itaxāxū i ngēma ngīgu tarūxīnūcū na űuxre ngīxū itaxāxchaūxū. Rū tama name i aūācūma ngīxū itaxā rū ēxna texē tūxū muācūma ngīxū itaxā. Erū Tupana rū nūxū nangeçau i ngēma duūxū i taāēācūma ngīxū ixāxū. ⁸ Rū Tupanamēxēwa nangēxma na poraācū pexna naxāāxūcēx i guxūma i mexū i pexū taxuxū, na guxūguma pexū nangēxmaxūcēx i ngēma penaxwēxexū rū naetū na pexū íyaxūxūcēx na togūxū namaā perūngūxēēgūxūcēx. ⁹ Tupanaārū ore i űmatūxūwa rū űanagūrū:

“Yīma yatū ya mecū rū norū ngūchaūmaā meā inanaxā nūxna i ngēma duūxūgū i taxuūma nūxū ngēxmaxū. Rū Tupana rū tá guxūgu nūxna nacuēxāchi na űuxācū namecūmaxū i nūmax”,

űanagūrū. ¹⁰ Tupana nixī ya tūxna naxācū ya nanetūchire na inatoxūcēx, rū tūxna naxācū i ōna na nangōxūcēx. Rū nūma tá nixī i pexna naxāāxū ya guxūnema ya nanetūchire ya penaxwēxene na ipenatoxūcēx. Rū nūma tá nanaxūxēē rū nanayaxēē ya yīma nanetūchire. Rū tá nanamuxēē i norū o, na muxūchixū nawa peyaxuxūcēx na ngēmamaā togūxū perūngūxēēgūxūcēx.

¹¹ Rū ngēmaācū i pema rū tá pexū nangēxma i guxūma i mexū na taxūchaācūma nūxū perūngūxēēgūxūcēx i togū. Rū ngēxguma ngēma togū i taeneēgūxūtawa ngīxū tangegūgu i ngēma dīēru i naxcēx ngīxū ípexācū, rū nūmagū rū tá poraācū Tupanana moxē naxāgū ngīxcēx. ¹² Erū ngēxguma nūxna ngīxū taxāxgu i ngēma dīēru i nūxū ngīmaā perūngūxēēgūcū i ngēma taeneēgū, rū tama űacu i nūxū taxuxūcēxicatama ta nixī, natūrū naetū i nūmagū i taeneēgū rū perū āmaregagu tá poraācū Tupanana moxē naxāgū.

¹³ Rū nūmagū i ngēma taeneēgū rū tá Tupanaxū nicuēxūūgū, erū ngēma perū āmaremaā tá nūxū nūxū pedauxēē na aixcūma naga pexīnūēxū i Cristuarū ore i mexū. Rū nūmagū rū tá Tupanana moxē naxāgū naxcēx i ngēma perū

āmare i perū ngúchaŭmaā nūxna rü guxŭma i yaxōgūxŭna pexāgūxŭ. ¹⁴ Rū ngēxumarūi i ngēma taeneēgū rü tá poraācū pexcēx nayumūxēgū, erū pexŭ nangechaŭgū. Rū tá Tupanana moxē naxāgū naxcēx na űuxācū nūma ya Tupana poraācū pexŭ nangūxēēxŭ na yemaācū pexŭ natauxchaxŭcēx na nūxŭ perūngŭxēēgūxŭ. ¹⁵ Rū ngēmacēx i űuxma rü Tupanana moxē taxā, yerū tūxna nanamu ga Nane na tōrū āmare yīxŭcēx. Rū nataxuma i ore i nagu mexŭ na nūxŭ ixuxŭcēx na űuxācū namaā itaāēgūxŭchixŭ i ngēma āmare.

10

Pauruarū ore rü aixcūma nixī yerū Tupana nixī ga nūxna āgacī

¹ Rū űuxma rü yema Cristu yaxna tamaā naxīnūxŭrūi rü tamaā namecūmaxŭrūi, rü choma rü ta pemaā yaxna chaxīnūācūma rü pemaā chamecūmaācūma pexŭ chacēxŭ na chauga pexīnūēxŭcēx. Erū nūmaxŭ i duŭxŭgū rü nūxŭ nixugū na pexŭ chamuŭxŭ ega pexŭtawa changēxmagu natŭrū ngēxguma pexna chaxaxŭgu rü tama pexŭ chamuŭ. ² Natŭrū ngēxguma ngema petanūwa chaxŭxgu, rü chierŭ natauxguma na űacŭcēx namaā chaporagaxŭ rü na chanaxucuxēxŭ i ngēma duŭxŭgū i petanūwa toxŭ ixuxŭ na űoma tama yaxōgūxŭrūi na tamaxēxŭ. Erū choma rü íchamemare na namaāxŭchi na chidexaxŭ. ³ Rū aixcūma woo duŭxŭgū tixīgū natŭrū tama űoma i naanecūāxŭrūxŭ togū tadai i ngēxguma ítanapoxŭgu i Tupanaarū ore. ⁴⁻⁵ Erū ngēma toxne i namaā ítanapoxŭxŭ i Tupanaarū ore rü tama űoma i naānecŭāx namaā āxnexŭ nixī. Erū toma rü toxŭ nangēxma i Tupanaarū pora na ngēmamaā itayanaxoxēēxŭcēx i Chatanāarū pora. Rū ngēmaācū itayanaxoxēē i guxŭma i chixexŭ i ore i Tupanaxŭ namaā yaxugūgūxŭ i duŭxŭgū. Rū ngēmaācū itayanaxoxēē i guxŭma i Tupanaarū uwanūgŭarū ore i nūgū namaā yacuēxŭgūācūma duŭxŭgūmaā nūxŭ yaxugūgūxŭ na tama Tupanaāxŭ yaxōgūāxŭcēx. Rū guxŭma i űacū i nagu naxīnūēxŭ i ngēma duŭxŭgū i chixexŭ, rü Cristuna tanaxuaxŭ na nūma namaā inacuaŭcēx. ⁶ Rū wūxicana marū meā Cristuga pexīnūēgu, rü toma rü ítamemare na tūxŭ tapoxcuexŭ ya guxāma ya texé ya tama naga īnūēxē i Cristuarū ore. ⁷ Pema rü norū dūxētŭxŭnewaxicatama nixī i penangugūxŭ i wūxi i duŭxŭ. Natŭrū ngēxguma texé tūgū cuēxgu na Cristuarū duŭxŭ tixŭ, rü name nixī i nūxŭ tacuēx na toma rü ta tūmarūi Cristuarū duŭxŭgū tixīgūxŭ. ⁸ Rū woo írarŭwa chanangupetixēē na chaugū chicuēxŭxŭ namaā i ngēma na Tupana toxŭ muxŭ, natŭrū taxucēxma naxcēx chaxāne. Erū aixcūma Cori nixī ya toxŭ mucū na pexŭ tarūngŭxēēgūxŭcēx na yexeraācū meā peyaxōgūxŭcēx. Rū tama űacū rü chixexŭgu pexŭ na tayixēēxŭcēx nixī i toxŭ namuxŭ. ⁹ Rū tama chanaxwēxe i nagu perūxīnūē na pexŭ íchabaixgūchaŭxŭ namaā i ngēma poperagū i pexcēx chaxūmatŭxŭ. ¹⁰ Erū nūmaxŭ i duŭxŭgū rü nūxŭ nixugū na chorŭ poperawaxicatama pexŭ íchabaixgūxŭ, natŭrū chomaxŭchi pexŭtawa changexmagu rü tama aixcūma nūxŭ chacuēx na űuācū mea chidexaxŭ na ngemaācū chauga pexŭ chaxīnūēxēēxŭcēx, űaxŭmaā choxŭ nixugūe. ¹¹ Natŭrū texe ya ngemaācū idexāxe rü tanaxwēxe i nagu tarūxīnū rü ngēma pexna tayaxŭguācūma torū poperawa pemaā nūxŭ tixuxŭrūi tátama tixīgū i ngēxguma petanūwa tangēxmagūgu. ¹² Toma rü tama tanaxwēxe i namaā togū tawūxiguxēē rü ēxna nagu togu tangugū i ngēma duŭxŭgū i nūgūtama icuēxŭgūxŭ. Nūmagū rü nūgūtama nawomūxēēgū, erū nūgūmaā nūgū nawūxiguxēē rü nūgūtama nūgū nangugū. ¹³ Natŭrū toma rü tama togū namaā ticuēxŭgū i ngēma yaxōgūxŭ i tama Tupana

toxmēxwa ngēxmagūxēēxū. Yerū Tupana nixī ga tomaā nūxū ixucū na ngextá nanaxwēxexū na tapuracūexū. Rū nūma nixī ga noxri Corītiuwa ga petanūwa toxū nangugūxēēxū na pemaā nūxū tixuxūcēx ga norū ore. ¹⁴ Rū yemaācū toxira nixī ga noxri petanūwa tangugūxū na pemaā nūxū tixuxūcēx ga yema Cristuarū ore. Rū ngēmacēx i űuxma na petanūwa taxīxū, rū tama tanangupetūxēē ga yema Tupana tomaā nūxū ixuxū, yerū nūma nixī ga toxū namuxū na pexū tarūngūxēēgūxūcēx. ¹⁵ Rū ngemacēx tama togūarū puracūmaāmare nixī i togū ticuēxūūgūxū. Rū tama nūxū tachopetūchaū i ngēma Tupana tomaā nūxū ixuxū na pexū tangūxēēxū. Natūrū ngema pexū tanaxwaexū nixī na yexeraācū nūxū pecuáxū i Tupanaarū ore na ngemaācū yexera peyaxōgūxūcēx. ¹⁶ Rū ngēxguma marū petanūwa tangugūguwena rū tanaxwēxe i ngēma duūxūgū i perū yéamaxūra ngēxmagūxū i ngextá taguma texē nūxū íixuxūwa taxī na ngēmamaā rū ta nūxū tixuxūcēx i ore i mexū. Erū tama tanaxwēxe i togūarū puracūmaā togū ticuēxūūgū. ¹⁷ Erū Tupanaarū ore i űmatūxūwa rū űnanagūrū:

“Rū ngēxguma texē tūgū icuēxūūchaūgu, rū name nixī i tōrū Corixū ticuēxūū, erū nūma nixī i tūxū nangūxēēxū”,
 űnanagūrū i ngēma ore. ¹⁸ Erū ngēma yatū i aixcūma Tupanapēxewa mexū rū tama nūgūtama nicuēxūū. Natūrū ngēma yatū i tōrū Cori nūxū icuēxūūxū nixī i aixcūma Tupanapēxewa mexū.

11

Pauru rū nūxū nixuchiga ga yema orearū uruūgūneta ga tama Tupana imugūxū

¹ Rū űuxma i ngēma tá pemaā nūxū chixuxū, rū hexmana pexcēx rū wūxi i ngēāēmare nixī, natūrū chanaxwēxe i choxū iperūxīnūēmare rū yaxna chomaā pexīnūē. ² Erū Tupana pexū inuxūxūrūū pexū chinuxū. Erū chaugagū nixī i Cristuaxū peyaxōgūxū, rū marū Cristuna pexū chaxuaxū na noxrūxicatama pixīgūxūcēx. Rū ngēmacēx chanaxwēxe i ngearū chixexūāē Cristuxū pexū chawēx űoma wūxi i pacū i taguma yatūxū cuēxcūrūū. ³ Natūrū chaxoegaāē rū yema āxtape norū doramaā Ebaxū na womūxēēxūrūū, ngūrūāchi tā ta texē pexū tawomūxēē, na nūxū perūxoēxūcēx na Cristugu perūxīnūēxū rū naxcēxicatama na pemaxēxū. ⁴ Erū pema rū tauxchaācū nixī na pexū nawomūxēēgūxū. Rū ngēxguma ínangugūgu i duūxūgū i pemaā nūxū ixuxū i to i Ngechuchuchiga ya tama yima toma nūxū tixuchigacū, rū pema rū nūxū peyaxōgū i ngēma duūxūgū. Rū pema rū taēēacūma penayaxu i to i naāē i tama Tupanaāē i űūnēxū ga marū peyaxuxū íxīxū. Rū peyaxōgū i to i ore i tama Tupanaarū ore i mexū ga noxri peyaxuxū íxīxū. ⁵ Dūcēx, rū woo nawe perūxīxgu i ngēma togū i orearū uruūgūneta, natūrū chauxcēx rū taxuwama choxū narūyexeragū. ⁶ Rū woo tama choxū nangēxmagu i tauxcha na duūxūgūpēxewa chidexaxū, natūrū aixcūma meā nūxū chacuēx i ngēma nachiga chidexaxū. Rū ngēma rū guxūma i torū puracūwa marū pexū nūxū tadauxēē i guxūguma. ⁷ ¿Pexcēx rū chixexū pemaā chaxū ga yexguma chaugū ícharūxīragu na pexū chataxēēxūcēx rū choxmēxmaā chapuracūgu na ngetanūācūma pemaā nūxū chixuxū ga Tupanaarū ore i tūxū maxēxēēxū? ⁸ Rū aixcūma yema togū ga yaxōgūxū choxna ngīxū āgūcū ga dīeru ngīxū chayaxu na yemamaā petanūwa chapuracūxūcēx rū pexū charūngūxēēxūcēx. ⁹ Rū yexguma petanūwa chayexmagu rū aixcūma choxū itaxu ga dīeru, natūrū taguma texēna ngīxcēx chaca. Rū taeneēgū ga

Machedóniãñewa ne ĩxŭ rŭ choxna ngŭxŭ naxãgŭ ga yema choxŭ tauxcŭ. Rŭ yemaãcŭ tama pexŭtawa ngŭxcŭx ĩchaca ga yexguma. Rŭ ñuxma rŭ ta tagutãma tacŭcŭx pexna chaca. ¹⁰ Rŭ Cristu ya chowa ngexmacuëgagu pemaã nŭxŭ chixu i ngema na aixcŭma ngetanũãcŭma petanũwa chapuracŭxŭ. Rŭ ngema rŭ chorŭ taãxŭ nixŭ. Rŭ taxucŭrŭwa texe i guxŭ i Acãyaanewa choxna tanayaxu i ngema taãxŭ. ¹¹ ¿Rŭ tacŭcŭx yŭixŭ i ngẽmaãcŭ chidexaxŭ? ¿Ēxna pexcŭ rŭ tama pexŭ changechaŭxcŭx yŭixŭ i ngẽmaãcŭ chidexaxŭ? Dŭcŭx, pemaã nŭxŭ chixu rŭ Tupana nŭxŭ nacuëx na ñuxãcŭ aixcŭma pexŭ changechaŭxŭ. ¹² Natŭrŭ ngẽma na ngetanũãcŭma pemaã nŭxŭ chixuxŭ i ngẽma ore, rŭ ngẽmaãcŭ tá chanaxũecha na taxucŭrŭwa chixri chauchiga yadexagŭxcŭx i ngẽma togŭ i orearŭ uruũgŭneta i nŭgŭ ixuxŭ na toxrŭŭ naxũgŭãxŭ i Tupanaãrŭ puracŭ. ¹³ Nũmagŭ rŭ aixcŭma orearŭ uruũgŭneta nixŭgŭ, rŭ duŭxŭgŭxŭ nawomũxëëgŭ. Rŭ nũmagŭ rŭ togu nŭgŭ nicuxgŭ, rŭ nŭgŭ nixugŭ na Cristu yamugŭxŭ. ¹⁴ Rŭ ngẽma rŭ taxucŭxma namaã pebaĩachĩãëgŭ. Erŭ woo i Chataná rŭ ta rŭ Tupanaãrŭ orearŭ ngeruũgŭ i daxŭcŭãx i yauracŭxŭrŭũãcŭ nŭgŭ nangoxëë. ¹⁵ Rŭ ngẽmacŭx woetama ngẽmaãcŭ nixŭgŭ i ngẽma duŭxŭgŭ i Chatanáãxŭ puracŭexŭ. Rŭ nũmagŭ rŭ duŭxŭgŭ i mexŭ ŭgŭxŭgŭ nŭgŭ nicuxgŭ. Natŭrŭ ngẽma ngẽmaãcŭ ixŭgŭxŭ, rŭ Tupana tá nanapoxcue naxcŭx i ngẽma chixexŭ i naxŭgŭxŭ.

Pauru rŭ yema puracŭ ga Ngechuchu nawa namuxŭwa ngŭxŭ ninge

¹⁶ Rŭ wena pemaã nŭxŭ chixu rŭ tama chanaxwëxe i nagu perũxñũë na wŭxi i ãũãëxŭ chĩxŭ. Natŭrŭ ngëxguma chi ngẽmaãcŭ chomaã nagu perũxñũëgŭ, rŭ tama chanaxwëxe i choxna penachuxu na ñoma wŭxi i ãũãëxŭrŭŭ chaugŭëtũwa chidexaxŭ, na ngẽmaãcŭ choma rŭ ta ĩrarũwa chaugŭtama chicuëxũxŭcŭx. ¹⁷ Rŭ ñuxma na chaugŭëtũwa chidexaxŭ rŭ ngẽma rŭ tama tórŭ Coriarŭ mu nixŭ. Natŭrŭ ñoma wŭxi i ãũãëxŭ nŭgŭ icuëxũxŭrŭŭ nixŭ i chidexaxŭ. ¹⁸ Rŭ ñuxma na nangëxmaxŭ i muxŭchixŭ i duŭxŭgŭ i ñoma i naãnewa nŭgŭ icuëxũgŭxŭ, rŭ choma rŭ tá ta ĩrarũwa chaugŭ chicuëxŭ. ¹⁹ Pema rŭ nagu perũxñũë rŭ nŭxŭ cuëxũchigŭxŭ pixŭgŭ. Natŭrŭ taãëãcŭma yaxna namaã pexñũë i ngẽma duŭxŭgŭ i tama naãëxŭ icuáxŭ. ²⁰ Rŭ yaxna namaã pexñũë i ngẽma duŭxŭgŭ i nŭgŭxŭ pexŭ puracŭexëëxŭ, rŭ ngẽma ngetanũãcŭma pexŭ puracŭexëëmarexŭ, rŭ ngẽma pexŭ womũxëëgŭxŭ, rŭ ngẽma chixri pexŭ yaxgŭxŭ, rŭ ngẽma pemaã guxchigagŭxŭ. ²¹ Rŭ woo wŭxi i ãnëxŭchi nixŭ na pemaã nŭxŭ chixuxŭ, natŭrŭ chauxcŭx rŭ tama aixcŭma pexŭ nŭxŭ tadauxëë ga torŭ pora ga yexguma petanũwa tayexmagŭgu. Natŭrŭ ñuxma na tama namũëxŭ na nŭgŭ yacuëxũgŭxŭ i ngẽma togŭ i duŭxŭgŭ, rŭ choma rŭ ta taxucŭxma chamuŭ na chaugŭëtũwa chidexaxŭ woo pexcŭx rŭ taxuwama namexgu i ngẽma nŭxŭ chixuxŭ. ²² Nũmagŭ rŭ nŭgŭ yaxugŭgu rŭ Yudŭgŭ nixŭgŭ. Natŭrŭ choma rŭ ta Yudŭu chixŭ. Rŭ nũmagŭ nŭgŭ yaxugŭgu rŭ Iraëtanũxŭgŭ nixŭgŭ. Natŭrŭ choma rŭ ta rŭ Iraëtanũxŭ chixŭ. Rŭ nũmagŭ rŭ nŭgŭ yaxugŭgu rŭ Abrãŭtanũxŭ nixŭgŭ. Natŭrŭ choma rŭ ta Abrãŭtanũxŭ chixŭ. ²³ Nũmagŭ rŭ nŭgŭ yaxugŭgu rŭ Cristuaxŭ napuracŭë. Natŭrŭ choma rŭ norŭ yexera Cristuaxŭ chapuracŭ. Rŭ ngẽma ñachagŭrŭ pexŭ woo pema nagu perũxñũëgu na ñoma wŭxi i ãũãëxŭrŭŭ chidexaxŭ. Rŭ ngẽma duŭxŭgŭarŭ yexera poraãcŭ Tupanaãxŭ chapuracŭ. Rŭ norŭ yexera chapoxcu, rŭ norŭ yexera choxŭ naçuaixgŭ ga duŭxŭgŭ. Rŭ muëxpŭxcŭma rŭ ãũcŭmaxŭchixŭwa chayexma rŭ wixgŭxŭchi taëx choxŭ

nimèxgū. ²⁴ Rū 5 ĕxpūxcūna nixī ga 39 ga ɕuaximaā choxū napoxcugūxū ga chautanūxūgū ga Yudiūgū. ²⁵ Rū tomaĕxpūxcūna nixī ga naīmaā choxū naɕuaixgūxū, rū wūxicana ga nutamaā choxū inamuxūchigūxū. Rū tomaĕxpūxcūna nixī ga guma wapuru ga nagu chixūxūne rū chomaā inan-guxū. Rū wūxicana ga yexguma chomaā inanguxgu ga wapuru rū wūxi ga chūtaxū rū wūxi ga ngunexū chinge na taxū ga taxtūarū ngāxūttūgu mūrapewaētūgu chatunagūācūma chiwēxēxū. ²⁶ Rū poraācū nu ne chanaxū, rū poraācū ācūmaxūwa chayexma yerū natūgū ga ācūmaxūgu chixūgū, rū ngītēēxgūxū rū chixexū chomaā naxūgūchaū. Rū woo chautanūxūgū ga Yudiūgūtanūwa, rū woo yema duūxūgū ga tama Yudiūgū ixīgūxūtanūwa, rū woo īānegūwa, rū woo namagūwa, rū woo taxtū i taxūwa rū ācūmaxūwa chayexma. Rū yema duūxūgū ga chomūcūgūneta ixīgūxūtanūwa rū ta ācūmaxūwa chayexma. ²⁷ Rū poraācū chataarū puracūāx, rū muxūchixū ga guxchaxūgū choxū nangupetū. Rū muĕxpūxcūna rū tama chape, rū chataiya, rū chītawa. Rū muĕxpūxcūna rū tama chachibū, rū choxū nanadeyu, rū choxū nataxu ga chauxchiru. ²⁸ Rū naetūwa i guxūma i ngēma, rū guxū i ngunexūgu rū chaxoegaāē naxcēx i guxūma i ngēma yaxōgūxū i guxū i īānewa ngēmagūxū. ²⁹ Rū ngēxguma chi texé tama poragu, rū choxū rū ta nangux. Rū ngēxguma chi wūxie texéxū pecadugu nguxēēgu, rū chauāēwa nangux i ngēma. ³⁰ Natūrū ngēxguma chi chaugū chicuēxūūchaūgu, rū tá chaugū chicuēxūū naxcēx na duūxūgū choxū dauxū na taxuwama chamexū. ³¹ Rū Tupana ya tórū Cori ya Ngechuchu ya Cristunatū ya mecū na guxūguma nūxū icuēxūūgūxū, rū nūxū nacuēx na aixcūma yīixū i ngēma nūxū chixuxū. ³² Rū yexguma Damacuwa chayexmagu, rū guma īāneārū āēxgacū ga Are-taarū ngūxēēruū, rū norū churaragūxū namu na nūxna nadaugūxūcēx ga guma īāneārū poxeguxūārū īāxgū na choxū yayauxgūxūcēx ga yexguma chi yēma ichaxūūxgu. ³³ Natūrū yema īāneārū poxeguxūārū īāxācūwa rū wūxi ga pexchigu choxū īnarūchūxūetaūgū ga chomūcūgū. Rū yemaācū chiña naxchaxwa ga yema āēxgacū.

12

Tórū Cori rū Pauruxū nangoxetūxēē rū nūxū nūxū nacuēxēē ga tacū ga ĕxūguxū

¹ Taxuwama name na texé tūgū icuēxūūxū. Natūrū tá pemaā nūxū chixuama na űuxācū tórū Cori choxū nangoxetūxēēxū rū űuxācū choxū nūxū na nacuēxēēxū ga tacū ga ĕxūguxū. ² Rū 14 ga taunecū marū nangupetū ga na Tupana daxūguxū ga naānewa ga nūma īnayexmaxūwa choxū nagaxū. Natūrū tama nūxū chacuēx rū chauāēwaxicatama nixī ga yēma choxū nagaxū, rū ĕxna guxū ga chaxunemaā yīixū ga yēma choxū nagaxū. Rū Tupanaxīcatama nūxū nacuēx i ngēma. ³⁻⁴ Rū aixcūma meāma nūxū chacuēx na daxūguxū ga naānewa choxū nagaxū ga Tupana, natūrū tama nūxū chacuēx rū guxū ga chaxunemaā yēma choxū naga rū ĕxna tama. Rū Tupanaxīcatama nixī ya nūxū cuácū i ngēma. Rū yēma nūxū chaxīnū ga ore ga ĕxūguxū i guxūma i duūxūgūna chūxuxū na nūxū yaxūgūxū. ⁵ Rū choma rū chi name na chaugū naxcēx chicuēxūūxū i ngēma, natūrū tāūtāma ngēmaācū chanaxū. Erū ngēma ngūxū na chingexūmaāxīcatama tá nixī i chaugū chicuēxūūxū. ⁶ Natūrū ngēxguma chi chaugū chicuēxūūchaūgu, rū tāū chima wūxi i ngēāēmare nixī i ngēma, erū aixcūma nixī i ngēma ore i nūxū chixuxū i chauchiga. Natūrū tama chaugū chicuēxūū na taxūema ngu rūxīnūxūcēx na ngēma chowa nūxū naxīnūēxū rū

nūxū nadaugūxūārū yexera chiīxū. ⁷ Natūrū tōrū Cori rū tama nanaxwēxe i poraācūxūchima chaugū namaā chicuēxūūxū ga yema ēxūguxū ga mexēchixū ga choxū nūxū nacuēxēēxū. Rū yemacēx chaxunewa nananguxēē ga wūxi ga choxū ngūxū űoma wūxi ya tuxu chaxunewa ingaxixūrū. Rū yema rū űoma wūxi ga Chatanāārū orearū ngeruūrū chauxūtawa nangu na choxū nachixewēxcēx na tama chaugū chicuēxūūxūcēx. ⁸ Rū tomaēxpūxcūna tōrū Corina chaca na choxū iyanaxoxēēāxūcēx ga yema choxū ngūxū. ⁹ Natūrū nūma ya tōrū Cori rū űanagūrū choxū:

“Rū cuma nūxū cucuēx na guxūguma cuxū changechaū, rū ngēxīcatama nixī i cunaxwēxexū. Rū ngēma duūxūgū i tama poraexūwa nixī i aixcūma chanangoxēēxū i űuxācū na chaporaxū”, űanagūrū choxū. Rū ngēmacēx chataāē ega tama chaporagu. Erū ngēxguma tama chaporagu rū ngēxguma nixī i chowa inawēāxū i norū pora ya Cristu. ¹⁰ Rū ngēma na Cristuxū na changechaūxūgagu nixī i yaxna namaā chaxīnūxū ega woo chaturagu rū woo űacu chomaā yaxugūegu i duūxūgū. Rū woo choxū natauxgu i chorū ngēmaxūgū, rū woo duūxūgū rū chowe yangēxūtanūgu, rū woo guxchaxūgū choxū ngēxmagu rū Cristucēx rū yaxna namaā chaxīnū i guxūma i ngēma. Erū ngēxguma chaturagu, rū ngēxguma nixī i yexeraācū Cristu choxū poraxēēxū.

Pauru rū naxcēx naxoegaāē ga yema yaxōgūxū ga Corűtiuwa yexmagūxū

¹¹ Maneca űoma wūxi i āūāēxūrū chidexa, erū ngēmaācū chaugū chicuēxū. Natūrū pegagutama nixī i dūxwa ngēmaācū chaugūētūwa chidexaxū, yerū pema chi nixī ga choxū picuēxūūgūxū, rū tama i chomax. Rū woo taxuwama chame i chomax, natūrū taxuwama choxū narūyexeragū i ngēma orearū uruūgūneta i nawe perūxīxū. ¹² Rū yexguma petanūwa chayexmagu, rū yaxna pemaā chaxīnūācūma pexū nūxū chadauxēē na aixcūma Cristu choxū muxū na nūxū chixuxūcēx ga norū ore. Rū cuēxruūgūmaā pexū nūxū chacuēxēē ga yema. Rū pexū nūxū chadauxēē ga taxū ga mexūgū ga Tupanaārū poramaā űxū. ¹³ Rū yexguma petanūwa chayexmagu rū pemaā chamecūma yema guxūma ga togū ga yaxōgūxūmaā na chamecūmaxūrūttama. Natūrū wūxiwaxicatama nixī ga íchatūxū yerū ga petanūwa rū tama ngīxū chayaxu ga dīeru yema togū ga yaxōgūxūtanūwa ngīxū chayaxuxūrū. Rū chanaxwēxe i choxū nūxū pengechaū i ngēma. ¹⁴ Rū űuxma rū marū íchamemare na norū tomaēxpūxcūna pexū íchayadauxū. Rū tāūtāma űacuēx pexna chayaca. Erū tama perū ngēmaxūgūcēx petanūwa chaxū, natūrū pexcēxūchi nixī i ngēma chaxūxū. Pema rū chauxacūgū pixīgū i Tupanaārū orewa. Rū ngēma papā rū mamaārū puracū nixī na naxācūgūna naxāāxū i ngēma nūxū taxuxū. Rū tama naxācūgūarū puracū nixī na nanatūna rū naēna naxāgūāxū. ¹⁵ Rū choma rū íchamemare na chorū ngūchaūmaā pexcēx ichanaxāxū i guxūma i űacu i choxū ngēxmaxū rū woo chaugūtama rū ta na ichaxāxū na aixcūma meā peyaxōgūxūcēx. Natūrū chauxcēx rū ngēxguma yexeraācū pexū changechaūgu, rū pema rū yexeraācū nūxū perūxoetanū na choxū pengechaūxū. ¹⁶ Rū nūmaxū i duūxūgū i petanūwa, rū woo nūxū nacuēxgū na taguma űacuēx pexūtawa íchaxaxū, natūrū nūmagū rū nūxū nixugūama na pexū chawomūxēēācūma perū dīeru ngīxū chayaxuxū. ¹⁷ ¿Éxna pema nagu perūxīnūēgu rū yema duūxūgū ga petanūwa chamugūxūwa pexū chawomūxēē? ¹⁸ Rū Titumaā nūxū chixu na petanūwa íyadauxūcēx. Rū namaā yēma chanamu ga yema to ga taeneē. ¿Éxna pema nagu perūxīnūēgu ga Titu rū pexū yēma nayawomūxēē? ¿Tama

ēxna aixcūma yīxūl na chauxrūl meā na namaxūxūl rū chauxrūl mexūgu naxīnūxūl ga Titux? ¹⁹ Bexmana pema tá nagu perūxīnūē rū ngēmaācū tidexagū, erū togūētūwatama tachogūchaūl. Natūrū, Pa Chaueneēgū ya Pexū Tangechaūgūex, rū Tupanapēxewa rū Cristuégagu nixī i tidexagūxūl na yexeraācū meā Tupanaāxūl peyaxōgūxūcēx rū yexeraācū meā na pemaxēxūcēx. ²⁰ Erū chaxoegaāē rū ngēxguma wena pexū ichayadēuxgu, rū ngūrūāchi tama choma chanaxwēxexūācūma īpemaxē, rū ngēmacēx i pema rū tāūtāma chomaā petaāēgū. Rū chaxoegaāē erū ngūrūāchi tá pexū ichayangau na pegūchi īpeaxiexūl, rū pegūarū ngēmāxūcēx pixāūxāchigūxūl, rū pegūmaā penuēxūl, rū pegūguxicatama īperūxīnūēxūl, rū pexoregūtēēxgūxūl, rū toguāxūl pixuxūl, rū pegū picuēxūūgūxūl, rū chixexūl īpexūēxūl rū ngēmaācū chixri īpemaxēxūl. ²¹ Rū chaxoegaāē rū ngēxguma wena petanūwa chaxūxgu, rū ngūrūāchi Tupana rū pegagu tá choxūl naxānēxēē. Rū ngūrūāchi ngechaūl tá choxna pexā, erū muxēma i petanūwa rū marū űuxgumama pecadu taxūgūēcha, rū tama nūxūl tarūxoechaūl na Tupanapēxewa chixexūl taxūgūxūl rū naī i ngēmaāmare na tamaxēxūl rū guxūma i togū i chixexūl na taxūgūxūl.

13

Pauru nayaxucuxē ga yema yaxōgūxūl ga Corŷtiucūāx rū űuxūchi nūxūl narūmoxē

¹ űuxma rū norū tomaēxpūxcūna tá nixī na petanūwa chaxūxūl. Rū Tupanaārū ore rū tamaā nūxūl nixu rū ngēxguma texē chixexūl űuxgu rū taxre rū ēxna tomaēxpūx i duūxūgū nūxūl daugūgu rū nūxūl yaxugūgu na aixcūma yīxūl, rū aixcūma tá poxcu tūmamaā taxuegu ya yīxema chixexūl űxe. ² Rū ngēmacēx i pema i űpamamatama pecadu űgūēchaxe rū guxāma i pema ya chixri maxēxē, rū űuxma na woo pexna chayaxūgūxūl rū wēnaxārū pexna nūxūl chacuēxāchixēē rū ngēxguma tá ngēma chaxūxgu rū aixcūma tá chanamēxēē i guxūma i ngēma chixexūl i petanūwa ngēxmaxūl, rū tāūtāma chanangupetūxēēmare i ngēma. ³ Rū pema na naxcēx iperūdaunūxūl na Cristu chowa idexaxūl, rū ngēxguma ngēma chaxūxgu, rū ngēxguma tá nixī i nūxūl pedaxūl na aixcūma chowa na yadexaxūl ya Cristu. Rū nūma ya Cristu rū chowa tá pexū nūxūl nadauxēē na tama naturaxūl natūrū aixcūma yanguxēēāxūl i norū ore rū tūxūl napoxcūexūl ya yīxema chixexūl űgūxe. ⁴ Rū aixcūma nixī ga Cristu ga űoma wūxi ga duūxūl i turaxūrūl nūgū yaxīxēēxūl ga yexguma curuchawa yapotagu. Natūrū i űuxma rū Tupanaārū poragagu namaxūl. Rū ngēxgumarūl i toma na norū duūxūgū tixīgūxūl, rū taturae i toxonewa. Natūrū ngēma na norū duūxūgū tixīgūxūl, rū Tupanaārū poragagu tá tamaxē na pexū tarūngūxēēgūxūcēx. ⁵ Rū name nixī i pegūtama pengugū na nūxūl pecuāxūcēx ngoxi aixcūma meā peyaxōgū. Rū name nixī i pegū pengugūarū maxūāx rū ngoxi Tupanapēxewa pime. ¿Tama ēxna nūxna pecuēxāchie na Ngechuchu ya Cristu rū pewa nangēxmaxūl ega aixcūma peyaxōgūgu? ⁶ Rū chierūna nūxūl pecuēxgu na toma rū tama orearū uruūgūnetamare na tixīgūxūl. ⁷ Rū Tupanana naxcēx taca na taxuūma i chixexūl na pexūgūxūcēx. Rū tama duūxūgūpēxewa togū itarūtagūxūcēx nixī na ngēmaācū tayumūxēgūxūl. Natūrū Tupanana naxcēx taca i ngēma na aixcūma meā naxcēx pemaxēxūcēx woo duūxūgū nagu rūxīnūēgu na toma rū itatūemarexūl. ⁸ Toma rū taxucūrūwama chixri nachiga tidexagū i Tupanaārū ore i aixcūma ixīxūl, erū toma rū naētūwa tachogū i ngēma ore. ⁹ Rū tá tataāēgū ega aixcūma peporaegu i perū maxūwa rū ngēmacēx

natauxgu i tacucèx pemaã na taporagaexũ. Rũ Tupanana tá naxcèx tacaama na pexũ naporaexèèxũcèx i perũ maxũwa na dũxwa aixcũma mexũ i norũ duũxũgũ na pixĩgũxũcèx. ¹⁰ Rũ naxũpa na pexũ na ichayadauxũ nixĩ i pexcèx chanaxũmatũxũ i ñãã popera, na ngẽxguma ngema changuxgu rũ nataxuxũcèx i tacucèx pemaã na chaporagaxũ. Erũ tórũ Cori choxũ namu na pexũ charũngũxèèxũcèx na yexeraãcũ meã peyaxõgũxũcèx, rũ tama chixexũ pemaã na chaxũxũcèx nixĩ i choxũ namuxũ. ¹¹ Rũ ñuxma na ichayacuèxèèxũ i ñãã popera, Pa Chaueneẽgũx, rũ chanaxwèxe i meã pexũ naxũpetũ rũ naxcèx pedau na ñuxãcũ aixcũma meã Tupanacèx pemaxèxũ. Rũ name nixĩ i pegũ petaãèxèègũ rũ wũxigu perũxĩnũè rũ meã yaxna pegũmaã pexĩnũè rũ aixcũma pegũ pengechaũgũ. Rũ nũma ya Tupana ya tũxũ ngechaũcũ rũ tũxũ rũngũxmũèècũ, rũ guxũgutãma pemaã inarũxãũx. ¹² Rũ chanaxwèxe i wũxichigũ i pema rũ pegũ pengechaũgũãcũma pegũ perũmoxègũ. ¹³ Rũ guxũma i togũ i taeneẽgũ i yaxõgũxũ rũ pexũ narũmoxègũ. ¹⁴ Rũ ñuxma rũ chanaxwèxe i tórũ Cori ya Ngechuchu ya Cristu pexũ narũngũxèè, rũ Tanatũ ya Tupana rũ pexũ nangechaũ, rũ Naãe i Üünexũ rũ guxũguma pemaã inarũxãũx.

Rũ nuãma pexna,
Pauru

POPERA GA GÁRATAANEWA YEXMAGÜXÜ GA YAXÖGÜXÜTANÜWA NAMUXÜ GA PAURU

Pauru rü nüxü narümoxë ga yema yaxögüxü ga Gárataaneärü Ìanegüwa yexmagüxü

¹⁻² Pa Toeneëgü i Yaxögüxü i Gárataaneärü Ìanegüwa Ngëxmagüxüx, choma i Pauru rü namaã i guxüma i taeneëgü i nuã chauxütawa ngëxmagüxü nixi i pexcëx tanaxümatüxü i ñaã popera. Rü choxü nixi ga namugüxü ga Ngechuchu ya Cristu rü Tanatü ya Tupana. Rü aixcüma tama duüxügü nixi ga choxü unetagüxü na chanaxüxcëx i ñaã Tupanaärü puracü. Natürü Tanatü ya Tupana ga Ngechuchuxü írüdaxëecü rü nümatam ya Ngechuchu ya Cristu nixi ga choxü naxunetagüxü. ³Rü chanaxwëxe i Tanatü ya Tupana rü tóru Cori ya Ngechuchu ya Cristu poraäcü pexü narüngüxëë rü pexü nataäxëë. ⁴Rü nüma ga tóru Cori ya Ngechuchu rü nügü inaxã na tóru pecaducëx nayuxücëx na nüxna tüxü Ínanguxüxcëx i guxüma i ñoma i naãneärü chixexü. Rü yemaäcü nanaxü, yerü yema nixi ga Tanatü ya Tupanaärü ngüchaü. ⁵¡Namexëchi ya Tupana i guxüguma! Rü ngëmaäcü yíí.

Nataxuma i to i ore i tüxü maxëxëxü

⁶ Rü yema na Cristuaxü pengechaütümüügüxcëx nixi ga pexna naxuxü ya Tupana na penayaxuxücëx i maxü i taguma güxü. Rü ñuxma rü poraäcü chabaixächiaë, erü paxaxüchi ipenaxügü na Tupana pixigachixü, na nawe perüxüxcëx i to i nguxëetae i nagu perüxnüëgu rü pexü maxëxëxü. ⁷Natürü tama aixcüma nangëxma i to i nguxëetae i nawa nayaxuxü i maxü i taguma güxü. Natürü nangëxma i ñuxre i duüxügü i pexü naguxchaxëëchaüxü, rü nanaxüchicüügüchaü i ngëma nguxëetae i mexü ga pemaã nüxü chixuxü ga Cristuchiga. ⁸ Rü toma rü marü pexna tanaxã ga yema nguxëetae i aixcüma ixixü i Ngechuchichiga. Rü ngëxguma chi texë pexü ngüxëëgu i to i nguxëetae, rü name nixi i noxtacüma Tupana tüxü napoxcu. Rü woo choma chixigu, rü éxna tacü rü Tupanaärü orearü ngeruü i daxücdäx yixigu i pexü nguxëxü i to i nguxëetae, rü name nixi i noxtacüma Tupana tüxü napoxcu. ⁹ Rü ñuxma rü wena pemaã nüxü chixu ga yema noxri pemaã nüxü chixuxü. Rü ngëxguma chi texë pexü ngüxëëgu i wüxi i to i nguxëetae i tama yema noxri peyaxürüü ixixü, rü name nixi i noxtacüma Tupana tüxü napoxcu. ¹⁰ Rü tama chomaã na petaäëgüxcëx nixi i ngëma ñachaxü. Erü tama naxcëx chadau na duüxügü chomaã taäëgüxü, natürü Tupana chomaã taäëxücëx nixi i chadauxü. Erü ngëxguma chi duüxügüxüicatama chataäëxëëchaügu, rü täu chima Cristuarü puracütanüxü chixi.

Ñuxäcü Pauruxü nayaxu ga Tupana na norü puracüwa namuäxücëx

¹¹ Natürü, Pa Chaueneëgüx, chanaxwëxe i nüxü pecuëx na ñaã ore i mexü i nüxü chixuxü, rü tama duüxügüäëwa yíixü na ne naxüxü. ¹² Yerü tama wüxi ga duüxüxütawa naxcëx changux. Natürü Ngechuchu ya Cristutama nixi ga choxü nüxü cuëxëecü. ¹³ Pema rü marü nüxü pexinüëchiga na ñuxäcü chamaxüxü ga üpa ga yexguma Yudiugücümagu chixüxgu. Rü nüxü pexinüëchiga na ñuxäcü poraäcü nawe chingëchigüxü ga guxüma ga Tupanaärü duüxügü ga yaxögüxü rü ñuxäcü chixri namaã na chaxüpetüxü na yemaäcü nüxü nüxü charüxoxëëxücëx ga yema na

Ngechuchuaxū yaxōgūāxū. ¹⁴ Rū muxūma ga chautanūxūgū ga Yudíugū ga chorū nayaāxgūraūxūārū yexera nagu chixū ga yema Yudíugūcūma. Yerū norū yexera meāma chayanguxēē ga nacūmagū ga nuxcūmaūgūxū ga chorū oxigū nagu íxū. ¹⁵⁻¹⁶ Natūrū yexguma tautama chabuxgu, rū woetama Tupana choxū naxuneta na choxū namuxūcēx na chanaxūxūcēx i norū puracū. Rū nūma rū chauxcēx naca na noxrū chixíxūcēx yerū poraācū choxū nangechaū. Rū yexguma Tupana naxwēxegu, rū choxū nūxū nacuēxēē ga Nane ya Cristu. Rū yemaācū nanaxū na ngēma duūxūgū i tama Yudíugū ixīgūxūmaā nūxū chixuxūcēx na űuxācū Ngechuchugagu tūxū nangēxmaxū i maxū i taguma gūxū. Rū yexguma yemaācū Tupana choxū nūxū cuēxēēgu ga Nane, rū taxūenama chayaca. ¹⁷ Rū bai ga Yerucharēūwa na chaxūxū na nūxna chayaçaxūcēx ga yema togū ga ngūexūgū ga nūxíra Tupana imugūxū. Natūrū ga choma rū yexgomatama Arábiaanewa chaxū. Rū yemawena, rū Damacuarū űānecēx chataegu. ¹⁸ Rū tomaēxpūx ga taunecūguwena rū dūxwa Yerucharēūwa chaxū na Pedruxū chacuáxūcēx. Rū 15 ga ngunexūtama naxūtawa chayexma. ¹⁹ Rū yēma nūxū chadau ta ga Chaūtiāgu ga tórū Cori naēneē. Natūrū taxuūma ga togū ga ngūexūgū ga tórū Cori imugūxūxū chadau. ²⁰ Rū Tupana choxū nadau na aixcūma yīxū i ngēma ore i űuxma pexcē chaxūmatūxū. ²¹ Rū yemawena, rū Chíríiaanewa rū Chíríchíiaanewa chaxū. ²² Natūrū yema taeneēgū ga Cristuaxū yaxōgūxū ga Yudeaanewa yexmagūxū, rū taguma choxūxūchi nadaugū. ²³ Rū yema nūxū naxīnūēxū ga chauchiga rū űāāxīcatama nixī:

“Rū ngēma Pauru ga űpa tawe ingēchigūxū, rū űuxma rū duūxūgūmaā nūxū nixu i Tupanaārū ore i mexū, rū namaā nayaxucuxē na Cristuaxū yaxōgūāxūcēx. Rū ngēmaācū nanaxū i űuxma rū woo ga noxri rū inayanax-oxēēchaū ga yema ore”, űaxū. Rū yexicatama nixī ga chauchiga ga nūxū naxīnūēxū. ²⁴ Rū yexguma ga yema duūxūgū rū Tupanaxū nicuēxūūgū nagagu ga yema Tupana chomaā űxū.

2

Yema togū ga ngūexūgū ga Tupana imugūxū rū meā Pauruxū nayauxgū

¹ Rū 14 ga taunecūwena rū wenaxārū Yerucharēūwa chaxū namaā ga Bernabé. Rū Titu rū ta íchayaga. ² Rū yēma chaxū yerū Tupana choxū nūxū nacuēxēē ga na nanaxwēxexū na yēma chaxūxū. Rū yēma Yerucharēūwa, rū yema yaxōgūxūārū āēxgacūgūmaāxīcatama changutaquēxe. Rū meāma namaā nūxū chixu ga nachiga ga yema Tupanaārū ore i mexū ga nūxna chaxāxū ga yema duūxūgū i tama Yudiugū ixīgūxū. Rū yemaācū meāma namaā nūxū chixu na űuxācū na yīxū ga chorū nguxēētae, yerū tama chanaxwēxe na yixcūra rū choxū nūxū naxoexū rū ngēmaācū natūcēxmamare na yīxū i ngēma puracū i chaxūxū. ³ Rū yema yaxōgūxū, rū nūmagū rū ta norū me nixī ga yema chorū nguxēētae. Rū yemacēx rū woo tama Yudíu na yīxū ga Titu rū taguma na ínawiechēxmūpēxechiraūxū, natūrū yema āēxgacūgū rū tama nanamu na ínawiechēxmūpēxechiraūxūcēx. ⁴ Natūrū aixcūma nixī ga űuxre ga taeneēgūneta ixīgūxū ga bexmamare tatanūgu nachocuxū. Rū yemagū nixī ga naxwēxegūxū na inawiūchēxmūpēxechiraūxū i ngēma yaxōgūxū i tama Yudíugū ixīgūxū. Rū űuxma na Ngechuchu ya Cristuarū duūxūgū ixīgūxū, rū yema taeneēgūneta rū bexma tatanūgu nachocu na tūxū nangugūgūxūcēx na űuxācū Cristu nūxna tūxū ínguxūxēēxū ga yema mugū ga Moíché űmatūxū. Yerū nūmagū nanaxwēxegū na wenaxārū nagu ixīxū ga

yema mugū ga guxchaxū ga Moīché ūmatūxū. ⁵ Natūrū bai ga irarūwa naga na taxīnūxū ga yema duūxūgū. Yerū tama tanaxwēxegū na texē pexū naxūchicūxū i ngēma ore i mexū i aixcūma ixīxū i tamaā nūxū ixuxū i űuxācū tūxū na nangēxmaxū i maxū i taguma gūxū ega Cristuaxū yaxōgūgu. ⁶ Natūrū yexguma yema yaxōgūxūārū āēxgacūgū ga Yerucherūwa yexmagūxū nūxū ĩnūegu ga űuxācū na yīxū ga chorū nguxēētae, rū namaā nataāēgū rū taxūma ga facū ga togū ga mugū choxna naxāgū na namaā changūxēētaexūcēx. Natūrū tama yema na āēxgacūgū yixīgūxūgu charūxīnū, erū nūxū chacuēx na Tupanapēxewa rū guxāma na wūxīgūxū. ⁷ Natūrū nūmagū ga yema āēxgacūgū, rū nūxū nicuēxāchīgū na choxū yīxū ga namuxū ga Tupana na yema duūxūgū ga tama Yudīgū ixīgūxūmaā nūxū chixuxūcēx ga norū ore i mexū, yexgumarūū ga Pedruxū na namuxūrūū ga Tupana na Yudīgūmaā nūxū yaxuxūcēx ga yema ore. ⁸ Rū gumatama Tupana ga Pedruxū mucū na Yudīgūmaā nūxū na yaxuxū ga ore i mexū, rū gumatama Tupana nixī ga choxū mucū na yema duūxūgū ga tama Yudīgū ixīgūxūmaā nūxū chixuxūcēx ga yema ore. ⁹ Rū yemacēx ga Chaūtiāgu rū Pedru rū Cuāū ga yaxōgūxūārū āēxgacūgū, rū nūxū nicuēxāchīgū na choxū naxunetaxū ga Tupana na chanaxūxūcēx i ngēma puracū. Rū yemacēx ga yema āēxgacūgū, rū tomēx niyaxūāchīgū ga choma rū Bernabē na toxū nūxū nadauxēgūxūcēx na aixcūma namūcūgū tixīgūxū i ngēma puracūwa. Rū nūmagū rū ta norū me nixī na ngēma duūxūgū i tama Yudīgū ixīgūxūtanūwa na tanaxūxū i Tupanaārū puracū rū nūmagū i Yudīgūtanūwa. ¹⁰ Rū toxna naxcēx naca na nūxū tarūngūxēēgūxūcēx ga yema yaxōgūxū ga ngearū dīēruāxgūxū. Rū yexicatama nixī ga toxna nūxū nacuēxāchixēēxū. Rū choma rū ta ngēmatama nixī i guxūguma woetama meāma chaxūxū.

Paurū rū Aūtioquīawa Pedruxū naxucūxē

¹¹ Natūrū yixcūra ga yexguma Aūtioquīawa naxūxgu ga Pedru, rū noxtacūma nūxū nūxū chaxīnūxēē, yerū tama aixcūma name ga yema naxūxū namaā ga yema yaxōgūxū ga tama Yudīgū ixīgūxū. ¹² Yerū noxri rū yema duūxūgū ga tama Yudīgū ixīgūxūmaā nachibū ga Pedru. Natūrū yexguma yēma nangugūgu ga űuxre ga Yudīgū ga yaxōgūxū ga Chaūtiāgu yēma mugūxū, rū Pedru rū marū tama yema duūxūgū ga tama Yudīgū ga yēma ngugūxū ga nagu ĩxū ga yema nacūma na Tupanacēx ĩnawiechēxmūpēxehiraūgūxū. ¹³ Rū yema togū ga Yudīgū ga yaxōgūxū, rū yexguma nūxū nadaugūgu ga yema Pedru ūxū, rū nūmagū rū ta nanaxūgū ga yema chixexū rū naxcēx nawoeguchaū ga yema nuxcūmaūgūxū ga nacūmagū. Rū dūxwa ga Bernabē rū ta natanūgu naxā ga yema chixexū ūgūxū. ¹⁴ Natūrū yexguma nūxū chadēuxgu na tama Tupanaārū ore i mexū tūxū nguxēēxūācūma na namaxēxū ga yema yatūgū, rū guxū ga yaxōgūxūpēxewa Pedruxū nūxū chaxīnūxēē. Rū űacharūgū nūxū:

“Rū dūcax i cuma na Yudīchirēx quīxū, cuma rū tama aixcūma Yudīgūcūmagu quixū. ¿Rū űuxācū i űuxma i cunamuxū na Yudīgūcūmagu naxīxū i ngēma duūxūgū i tama Yudīgū ixīgūxū?” űacharūgū nūxū.

Yudīgū rū woo ngēma duūxūgū i tama Yudīgū ixīgūxū rū norū ōgagu nixī i nayauxgūāxū i maxū i taguma gūxū

¹⁵ Rū pemaā nūxū chixū rū toma rū aixcūma torū bucūmatama Yudīgū tixīgū rū Tupanaxū tacuēxgū. Rū ngēmaācū tama duūxūgū i tama Tupanaxū cuēxgūxū tixīgū. ¹⁶ Rū nūxū tacuēxgū rū yema nuxcūmaūgūxū ga mugū ga

Moíché ūmatūxū rū tama tūxū nimexēē i Tupanapēxewa, erū taxucūrūwama texé aixcūma naga taxīnūē i ngēma mugū. Natūrū i űuxma rū Tupana tūxū nadau na imexū ega Ngechuchu ya Cristuaxū yaxōgūgu. Rū yemacèx ga toma rū ta Ngechuchu ya Cristuaxū tayaxōgū na torū ōgagu Tupana toxū nadauxū na timexū. Erū nūxū tacuēxgū rū tama ngēma mugūgagu nixī na Tupanapēxewa tamexū ya wūxie, erū taxucūrūwama texé aixcūma naga taxīnū i ngēma mugū na ngēmaācū Tupanapēxewa tamexūcèx. ¹⁷ Rū űuxma i yixema rū Cristuaxū tayaxōgū, rū ngēmacèx nixī i Tupanapēxewa imexū. Natūrū ngēxguma chi wūxi i ngunexūgu rū yixema nagu rūxīnūēgu rū mugūgu na ixīxūgagu yixīgu na Tupanapēxewa imexū, rū maneca tá nagu tarūxīnūē na Cristu tūxū pecaduāxēēxū. Natūrū dūcax, rū tama ngēmaācū nixī erū Cristu rū tagutāma texēxū napecaduāxēē. ¹⁸ Choma rū marū nūxū charūxo na nagu charūxīnūxū na mugūgu chixūxūgagu Tupanapēxewa chamexū. Natūrū ngēxguma chi wenaxārū naxcèx chataegugu i ngēma nuxcūmaūgūxū i mugū rū chi nūxū charūxoxgu na Cristuaxū chayaxōxū, rū chi aixcūma wūxi i pecaduāxū chixī. ¹⁹ Yerū yexguma yema mugūwa changuxgu, rū dūxwa nūxū chicuēxāchi na tama yanguxū ga yema mugū na choxū namexēēxū Tupanapēxewa. Yerū taxucūrūwama aixcūma naga chaxīnū ga guxūma ga yema mugū. Rū ngēmacèx i űuxma rū Cristuaxū chayaxō na Tupanapēxewa chamexūcèx rū naxcèxicatama chamaxūxūcèx. Rū Cristu rū curuchagu nayu na iyanaxoxūcèx ga nuxcūmaūxū ga chorū maxū ga choxū yexmaxū ga yexguma yema mugūgu chixūxgu. ²⁰ Rū űuxma rū marū tama chaugūmaātama ichacuēx, natūrū Cristu nixī ya chomaā icuācū erū chowa namaxū. Rū űuxma rū Tupana Nane ya Cristuaxū chayaxōcūma nixī i chamaxūxū i űoma i naānewa. Rū nūma nixī ga choxū nangechaūxū, rū nūgū inaxāxū na chauxcèx nayuxūcèx. ²¹ Rū tama nūxū chaxoxchaū i ngēma mexū ga Tupana taxcèx ūxū ga yexguma nayuxgu ga Cristu. Yerū yexguma chi yema mugūgu ixīxūgagu Tupanapēxewa imexgu, rū natūcèxmamare chi nixī ga na nayuxū ga Cristu.

3

űuxma rū tama ngēma mugūgu taxī erū marū Cristuaxū tayaxōgū

¹ Pa Chaueneēgū i Gárataanecūāx, pema rū pengēāēgūmare. Rū yexguma petanūwa tayexmagūgu rū meāma guxāpēxewa pemaā nūxū tixu rū pexcèx tanangoxēē na űuxācū curuchagu taxcèx nayuxū ga Ngechuchu ya Cristu. ¿Rū texé pexū tawomūxēē i űuxma na tama naga pexīnūēxūcèx i ngēma ore i aixcūma ixīxū ga pemaā nūxū tixuxū? ² Rū wūxi i orecèx pexna chaca, rū ¿űuxācū yīxū ga penayaxuxū ga Tupanaāē i Ūūnexū? ¿Éxna pexcèx rū yema mugū na pinguxēēgūxūgagu yīxū ga penayaxuxū, rū éxna ngēma ore i mexū ga nūxū pexīnūēxū rū pixōgūxūgagu yīxū? ³ Pema rū pengēāēgūmare rū poraācū ípetūe. Noxri rū Cristuaxū peyaxōgū yerū Tupanaāē i Ūūnexū pewa napuracū. ¿Rū űuxācū i űuxma i nagu perūxīnūēxū na wenaxarū naxcèx pewoeguxū i ngema nuxcūmaxūxū i mugū i taguma maxū pexna āxū? ⁴ Pema rū poraācū Tupana pexū narūngūxēē. Rū chierū tama natūcèxmamare yixīgu ga yema, erū taxucūrūwa natūcèxmamare nixī. ⁵ Rū yexguma Tupana pexna namuxgu ga Naāē i Ūūnexū rū petanūwa naxūāgu ga taxū ga mexūgū ga norū poramaā naxūxū, rū ¿tacūgagu nixī ga naxūāxū ga yema? ¿Pexcèx rū mugū na pinguxēēxūgagu yīxū ga Tupana naxūxū ga yema? Tama yemagagu nixī. Tupana rū petanūwa nanaxū ga yema taxū ga mexūgū yerū nūxū peyaxōgū

ga norū ore ga nūxū pexīnūēxū. ⁶ Rū dūcax, pemaā nūxū chixu rū name nixī i nuxcūmaūcū ga torū oxī ga Abráūrū pīxīgū. Yerū Abráū rū Tupanaāxū nayaxō, rū yemacēx Tupana nūxū nadau ga na namexū. ⁷ Rū ngēmawa nūxū pedau rū ngēma duūxūgū i Tupanaāxū yaxōgūxū nixī i aixcūma Abráūtanūxū ixīgūxū i Tupanapēxewa. ⁸ Rū Tupanaārū ore i ūmatūxūwa rū nūxū nixu na űuxācū Tupanapēxewa tá na yamexū i ngēma duūxūgū i yaxōgūxū i woo tama Yudiūgū ixīgūxū. Rū yemaācū nūxū nixu naxūpa ga na nangupetūxū. Yerū Tupana rū nuxcūmamataama Abráūmaā nūxū nixu ga űaā ore i mexū i űaxū:

“Rū cugagu tá nūxū charūngūxēē i guxūma i nachīūānecūāx i duūxūgū”, űaxū. Rū yemaācū nūxū tacuēx rū Cristu rū Abráūtaa na yīxū. ⁹ Rū ngēmacēx i űuxma rū Tupana nanayaxu i guxūma i duūxūgū i yaxōgūxū, yexgumarūū ga Abráū ga yaxōcūxū na nayaxuxūrū. ¹⁰ Natūrū chixexūwa nangēxmagū i guxūma i ngēma duūxūgū i nagu rūxīnūēxū na mugū yanguxēēgūxūgagu Tupanapēxewa yamexū. Erū Tupanaārū ore i ūmatūxūwa rū űanagūrū:

“Rū guxūma i duūxūgū i tama aixcūma yanguxēēgūxū i guxūma i ngēma mugū i ūmatūxū, rū chixexūwa nangēxmagū”, űanagūrū. Erū nūxū tacuēxgū na taxucūrūwama aixcūma texé yanguxēēxū i guxūma i ngēma mugū. ¹¹ Rū ngēmaācū meāma nangox na tama ngēma mugū tinguxēēxūcēx yīxū na texé Tupanapēxewa mexū. Erū Tupanaārū ore i ūmatūxūwa rū űanagūrū:

“Rū yīxema tūmaārū ōgagu Tupanapēxewa mexē, rū yīxema tá tixī ya aixcūma tūxū nangēxmaxē i maxū i taguma gūxū”, űanagūrū. ¹² Natūrū ngēxguma nagu rūxīnūēgu na mugū inguxēēxūcēx yīxū na Tupanapēxewa imexū, rū taxucēx chima tūxūcūū tayaxōgū. Erū Tupanaārū orewa rū ngēmachiga naxūmatū, rū űanagūrū:

“Rū yīxema aixcūma meāma yanguxēēxē i guxūma i mugū, rū ngēmagagu tá tūxū nangēxma i tūmaārū maxū”, űanagūrū. Natūrū ngēma mugū rū dūxwa chixexūwa tūxū naga erū taxucūrūwama texé aixcūma meā tayanguxēē. ¹³ Natūrū ga Cristu rū nawa tūxū inanguxūxēē ga yema mugū ga chixexūwa tūxū yexmagūxēēxū. Rū taxcēx nixī ga chixexūwa nayexmaxū ga yexguma curuchagu nayuxgu. Erū Tupanaārū ore i ūmatūxūwa, rū űanagūrū:

“Rū guxāma ya yīxema wūxi i naīwa tūxū natuxēēgūācūma yūxe, rū chixexūwa tangēxma”, űanagūrū. ¹⁴ Rū yemaācū curuchagu nayu ga Ngechuchu ya Cristu na nūxū nangūxēēxūcēx i guxūma i ngēma duūxūgū i tama Yudiūgū ixīgūxū, yema Tupana Abráūmaā ixunetaxūrū. Rū taxcēx rū ta nayu ga Cristu na yīxema rū ta nūxū yaxōgūxūcēx rū nayauxgūxūcēx i Tupanaāē i Ūūnēxū i tamaā inaxunetaxū.

Tupanaārū uneta rū ngēma mugūarū yexera name

¹⁵ Pa Chaueneēgūx, űuxma rū tá pemaā nūxū chixu i wūxi i cuēxruū na űuxācū duūxūgū tacū nūgūmaā mexēēxū. Rū dūcax, ngēxguma chi wūxi ya yatū rū texēmaā tacūcēx inaxunetagu rū chi wūxi i poperagu meā naxūmatūāgu i ngēma, rū taxucūrūwa texé itayanaxoxēē rū ēxna tanaxūchicūū i ngēma norū uneta. ¹⁶ Rū dūcax, rū yexgumarūūtama nixī ga nangupetūxū ga yexguma Tupana rū Abráūmaā rū Abráūtaamaā inaxunetagu. Rū Tupanaārū ore i ūmatūxūwa rū tama “Abráūtaagū” űanagūrū, yerū tama muxūma ga duūxūgūchiga nidexa. Natūrū yema ore rū “Abráūtaa”

ñanagürümare, yerü wüxitama ga duñxüchiga nixĩ ga yadexaxũ. Rũ yema rü Cristuchiga nixĩ. ¹⁷ Rũ ngẽmaãcü pemaã chanangoxẽẽ na Tupana rü Abráũmaã namexẽẽãxũ rü namaã inaxunetaxũ na Cristugagu tá yixũ i duñxügũxũ nangüxẽẽxũ. Rũ ngẽmacèx i ñuxma rü yema Moiché ümatüxũ ga mugü ga 430 ga taunecü yema unetawena ínguxũ, rü taxucürüwama inayanaxoxẽẽ ga yema Tupanaãrũ uneta ga nüxĩra Abráũmaã nüxũ yaxuxũ. Rũ ngẽmacèx i ñuxma rü ta napora i ngẽma uneta. ¹⁸ Rũ ngẽxguma chi mugü inguxẽẽgũxũgagu yixĩgu na Tupana tüxũ rüngüxẽẽxũ, rü natücèxmamare chi nixĩ ga yema Tupanaãrũ uneta ga nüxĩra Abráũmaã nüxũ yaxuxũ. Natürü aixcũma nixĩ na ngetanüácũma Abráũxũ nangüxẽẽxũ ga Tupana, yerü yemaãcü marü namaã inaxuneta. ¹⁹ Rũ ñuxma rü ꞗtacüwa namexũ ga yema mugü ga Moiché ümatüxũ? Rũ dücax, Tupana rü marü Abráũmaã inaxunetaguwena nixĩ ga duñxügũna naxããxũ ga yema mugü, na yemaãcü duñxügũxũ nüxũ nadauxẽẽxütcèx na ñuxãcü poraãcü pecadu naxüexũ. Rũ yemaãcü nixĩ ñuxmata ínangu ga guma Abráũtaa ya Cristu. Rũ gumachiga nixĩ ga Abráũmaã inaxunetaxũ ga Tupana ga noxrix. Rũ yexguma ínanguxgu ga yema mugü, rü Tupana rü daxüçũãx ga norü orearü ngeruügũmaãxĩra nüxũ nixu. Rũ yemagü nixĩ ga nüxĩ Moichémaã nüxũ ixugüxũ, rü nũma ga Moiché rü duñxügũmaã nüxũ nixu. ²⁰ Natürü yexguma Tupana Abráũmaã ixunetagu, rü nũmaxüchima ga Tupana nixĩ ga Abráũmaã nüxũ yaxuxũ ga yema norü uneta. Rũ tama togũmaãxĩra nüxũ nixu na yemagü nüxĩ Abráũmaã nüxũ ixugüexütcèx.

Tacücèx duñxügũna nanaxã ga Tupana ga yema mugü

²¹ ¿Rũ ñuxü ñapegüxũ i ñuxmax? ¿Pexcèx èxna rü yema Moiché ümatüxũ ga mugü rü inayanaxoxẽẽ i Tupanaãrũ unetagu? Rũ dücax, tama ngẽmaãcü nixĩ. Yerü yexguma chi naporagu ga yema mugü na tüxna naxããxũ i maxũ i taguma güxũ, rü chi Tupanapèxewa time i ngẽxguma meãma yanguxẽẽgu. ²² Natürü tama ngẽmaãcü nixĩ. Erü Tupanaãrũ ore i ümatüxüwa nüxũ tadau na güxũma i duñxügü rü pecadutüüwa nangèxmagüxũ. Rũ ngẽmacèx i ñuxma rü yíxema Ngechuchu ya Cristuaxũ yaxögüxexicatama tixĩ ya nayauxgüxe i ngẽma maxũ i aixcũma mexũ i Tupana tamaã ixunetaxũ. ²³ Rũ yexguma tauta ínanguxgu ga Cristu na nüxũ yaxögüxütcèx, rü mugütüüwa tayexmagü rü tamaã inacuèx. Rũ yemaãcü tixĩgü rü ñuxmata Tupana taxcèx nangoxẽẽ ga Ngechuchu ya Cristu na nüxũ yaxögüxütcèx. ²⁴ Rũ yemaãcü ga yema mugü rü tamaã inacuèx ñuxmata Cristuxütawa tüxũ nagagü na nüxũ yaxögüxütcèx rü ngẽmaãcü Tupanapèxewa imexütcèx. ²⁵ Natürü i ñuxma na marü núma nanguxũ ya Cristu na nüxũ yaxögüxütcèx, rü marü tama ngẽma mugütüüwa tangèxmagü. Rũ ñuxma rü marü taxucèxma tüxcüü tamaã inacuèx i ngẽma mugü. ²⁶ Rũ ñuxma na Ngechuchu ya Cristuaxũ peyaxögüxũ, rü Tupanaxãcügü pixĩgü i güxãma i pemax. ²⁷ Rũ ñuxma na Cristuégagu ípebaiüxũ, rü Cristuarü pixĩgü rü núma rü pemaã inacuèx na naxrüü pixĩgüxütcèx. ²⁸ Rũ ñuxma rü Tupanapèxewa rü nüetama nixĩ ega woo Yudiügü pixĩgügu rü èxna tama. Rũ nüetama ega woo wüxi i coriarü duñxügü pixĩgügu rü èxna taxúxearü duñxügü pixĩgügu. Rũ nüetama ega woo piyatügu rü èxna pingexgu. Erü ñuxma na Ngechuchu ya Cristuarü duñxügü na pixĩgüxũ, rü wüxitama i duñxü pixĩgü i güxãma i pemax. ²⁹ Rũ ñuxma na Cristuarü pixĩgüxũ, rü ngẽmacèx waxi nixĩ na aixcũma Abráũtaagü pixĩgüxũ. Rũ ngẽmacèx i pema rü tá ta penayaxu i güxũma ga yema Abráũmaã inaxunetaxũ ga Tupana.

4

1 Rū dücax, ngêxguma wüxi i buxü yunatügu, rü ngêma buxü rü tama ngêxgumatama nanayaxu i nanatüarü ngêmaxügu. Rū woo guxüma i nanatüarü ngêmaxüârü yora yixügu, natürü ngêxürüüxü i nanatüarü puracütanüxürüümare nixi ñuxmata nayèx. 2 Rū ngêmacèx nangêxma i ngêma buxüârü daurü i namaâ icuáxü rü nüxü nüxna dauxü i ngêma nanatüarü ngêmaxügu ñuxmata nawa nangu ya yima taunecü ya noxri nanatü nagu unetacü na ngêma buxü rü nügümaâ inacuáxücèx. 3 Rū yexgumarüü nixi ga tamaâ nangupetüxü ga noxrix. Yerü yexguma tauta Cristuxü icuèxgu, rü natüüwa tayexmagü ga yema naâégü i chixexügu i ñoma i naânemaâ icuèxgüxü. 4 Natürü yexguma nawa nanguxgu ga yema ngunexü ga inaxunetaxü ga Tupana, rü nûma nanamu ga Nane. Rü duüxügürüü wüxi ga ngewa naba ga guma Nane. Rü yema Moïché ümatüxü ga mugütüüwa nayexma ga yexguma nabuxgu. 5 Rü yemaâcü nûma nangu ga Tupana Nane na tüxü inanguxüxêèxücèx i guxâma i yixema ga noxri mugütüüwa na iyexmagüxü. Rü yemaâcü tüxü narüngüxêè ga nûma ga Tupana Nane na Nanatü ya Tupanamaâ tüxü yaxuxücèx na aixcûma naxâcügüxüchi ixigüxü. 6 Rü Tupana pexna nanamu ga Naâe i Üünexü na pexü nüxü nadauxêèxücèx na aixcûma naxâcügüxüchi pixigüxü. Rü ngêmacèx i ñuxma rü marü name i "Pa Chaunatüx", ñaperügü nüxü ya Tupana. 7 Rü ngêmacèx i ñuxma rü Tupanaxâcüxüchi quixi, rü tama wüxi i norü duüxümare quixi. Rü ñuxma na naxâcüxüchi quixü, rü norü ngüchaü nixi na cuxna naxâxü i guxüma i tacü i noxrü ixixü.

Paurü rü yema yaxögüxücèx naxoegaâe

8 Rü üpa ga yexguma tauta Tupanaxü pecuèxgu, rü perü tupanane-tagütüüwa peyexmagü rü nüxü picuèxüügu ga yema tama aixcûma Tupana ixigüxü. 9 Natürü i ñuxma na Tupanaxü pecuáxü rü nûma rü na pexü nacuáxü, rü ztüxcüü wena naxcèx pewoeguchaü i ngêma naâégü i chixexügu i ñoma i naânemaâ icuèxgüxü? ¿Rü tüxcüü penaxwèxe na wena natüüwa pegü pengêxmagüxêèxü i ngêma naâégü i tama aixcûma poraxü i natücèxmare ixigüxü? 10 Rü dücax i pemax, rü ñuxma rü ta ngêma nuxcûmaügüxü i Yudiügücûmagu pexiâma woo Cristuaxü na peyaxögüxü. Erü penaxaure i ñuxre i ngunexügu rü ñuxre ya tauemacügü rü ñuxre ya taunecügü rü ñuxre i petagü, erü nagu perüxînüè na ngêmaâcü Tupanapêxewa tá pimexü. 11 Rü ngêmacèx poraâcü chaxoegaâe, erü ngürüâchi natücèxmare ta nixi ga yema puracü ga petanüwa chaxüxü. 12 Pa Chaueneügü, pexü chacèxü na chauxrüü nüxü perüxoexü na nagu pexixü i ngêma Yudiügüarü mugü. Erü ñuxma na Cristuwe charüxüxü rü marü nüxü charüxo na nagu chixüxü ga yema mugü ga üpa tama nagu pexixü. Rü dücax, yexguma noxri petanüwa chayexmagu rü tama choxü pexo, rü ngêmacèx chanaxwèxe i ñuxma rü ta chauga pexînüè. 13 Rü pema rü marü nüxü pecuèx rü yexguma noxri pemaâ nüxü chixuxgu ga Tupanaârü ore i mexü, rü yema na chidaawexügagu nixi ga petanügu charüxüxü rü pemaâ nüxü chixuxü ga Tupanaârü ore. 14 Rü yema daawe ga choxü yexmaxü, rü woo pexcèx rü wüxi ga wèxtümüü nixi, natürü tama choxü pexo rü tama choxü ipetèxüchi. Natürü meâma choxü peyaxügü ñoma wüxi ga Tupanaârü orearü ngerüü i daxücüâx chixüxü. Rü ñoma Ngechuchu ya Cristu chixüxü, meâma choxü peyaxügü. 15 ¿Natürü tacü êxna nangupetü namaâ ga yema perü taâe ga noxri pexü yexmaxü? Erü pemaâ nüxü chixu rü noxri petanüwa chayexmagu rü poraâcü chomaâ

petaãëgü. Rü yexguma chi pexü natauxchagu, rü pemaã nanguxügu, rü chi pexetü peyaxu na choxna penaxãxücèx, yerü yemaãcü poraãcü chomaã petaãëgü ga yexguma. ¹⁶ ¿Natürü tacü pexü naxüpetü i ñuxmax? ¿Pexcèx rü êxna perü uwanü chixi yerü pemaã nüxü chixu ga Tupanaãrü ore i aixcüma ixixü? ¹⁷ Rü ngëma duüxügu i pexü ngüexëëxü na Yudiugücümagu na pexiüxcèx, rü pegu narüñnënetá, tama aixcüma tacü rü mexüxcèx nadaugü. Erü nümagü rü toxna pexü nixiğachixiëëchaü na ngëmaãcü naga pexinüëxücèx. ¹⁸ Rü ngëma togü rü marü name na pegu naxinüëxü, natürü nanaxwëxe na perü mexüxcèx nadaugüxü i guxüguma. Rü tama name na petanüwa changëxmaguxicatama perü mexüxcèx na nadaugüxü i ngëma togü. ¹⁹ Pa Chauacügüx, wenaxãrü ñoma wüxi i mama ngixãcümaã nguxnecacürüü poraãcü pexcèx ngüxü chinge na aixcüma meã Cristuaxü peyaxögüxücèx rü aixcüma naxcèx na pemaxëxücèx. Rü ngëmaãcü tá chixi ñuxmatáta Cristu naxwëxexürüü pixigü i perü maxüwa. ²⁰ Rü chierü ñuxmatama pexütawa changëxmagu na pemaã chidexaxüchixüxcèx, rü tama ñuxmarüü pexcèx chanaxümatümarexüxcèx. Erü ñuxma rü tama nüxü chacuèx na tacügu pemaã charüxinüxü.

Ore i cuèxruü i Abráüxütaxü ga Agáchiga rü namëxüchi ga Charachiga

²¹ Rü pema na ngëma Moiché ümatüxü i mugütüüwa pegü pengëxmagüxëëchaüxü, rü chanaxwëxe i chomaã nüxü pixu ngoxi aixcüma nüxü pecuá na ñuxü ñaxü i ngëma mugü. ²² Erü ngëma mugüwa nüxü tadau rü Abráü rü nüxü nayexma ga taxre ga nane. Rü wüxi ga nane rü naxütaxü ga Agáwa nüxü nayexma, rü naí ga nane rü namëxüchi ga Charawa nüxü nayexma. ²³ Rü guma nane ga naxütaxüwa nüxü yexmacü, rü nabu yerü yema nixi ga norü ngüchaü ga Abráü. Natürü guma nane ga namëxüchiwa nüxü yexmacü, rü nabu yerü yemaãcü inaxuneta ga Tupana. ²⁴⁻²⁵ Rü pemaã nüxü chixu i ngëma ore erü ngëmawa nangëxma i tacü i aixcüma ixixü i pexcèx changoxëëchaüxü. Rü yema taxre ga ngexügu rü taxre i cuèxruügu nixigü na ngëmawa nüxü icuáxücèx na ñuxãcü Tupana duüxügüxü rüngüxëëxü na naxütawa nangugüxücèx. Rü yema nüxüraüxü ga norü ngüxëë nixi ga yexguma Chinaíarü mëxpúnewa Moichéna naxãagu ga norü mugü na naga naxinüëxücèx ga duüxügü. Rü yema mugü ga Moichéna naxãxü ga Chinaíwa rü Agá iyixi ga norü cuèxruü. Rü yema nge ga Agá rü naxütaxü iyixi ga Abráü rü yemacèx ga ngixãcügu rü ngixrüütama togütüüwa nayexmagü rü tama ínanguxü. Rü yemaãcü ga yema nge rü wüxi i cuèxruü iyixi nachiga i ngëma Yudiugü i ñuxma maxëxü rü ngëma mugüwe rüxixü. Erü nümagü rü ñuxma rü ta natüüwa nangëxmagü i ngëma mugü ga Moiché yaxuxü ga mëxpúne ga Chinaí ga Arabiaanewa ngëxmanewa. Rü ñuxma rü ta ngëma mugügu naxi rü tama nüxü narüxoe. ²⁶⁻²⁸ Natürü yema nge ga Abráü namëxüchi rü tama Agárüü iyixi. Rü ngíne ga Ichaá rü nabu yerü Tupanaãxü nayaxö ga Abráü ga yexguma Tupana namaã nüxü ixuxgu rü tá na nüxü nayexmaxü ga wüxi ga nane. Rü ñuxma Pa Chaueneëgüx, yixema rü ta tayaxó i ngëma Tupana tamaã ixunetaxü. Rü ngëmacèx i ñuxma rü tama ngëma nuxcümaügüxü i mugütüüwa tangëxmagü. Rü ngëmaãcü Abráü namëxüchixacügürüü tixigü. Rü ngëmaãcü nüxü tadau na aixcüma Tupana yanguxëëxü i norü ore ga Abráü namëxüchichiga ümatüxü i ñaxü:

“¡Nataãë, Pa Ngecü i Ngexacücü! ¡Rü curü taãëmaã rüxáixnaxü woo tagu-machirëx na cuxãxácüxü! Erü tá cuxãxácü, rü ngëma ngexü i cuxütaxü

i cuteaxū āxācūxūārū yexera tá cuxū nangēxma i cuxacūgū”,
 ñaxū. ²⁹ Natürü guma Abráū nane ga naxūtaxūwa nūxū yexmacū, rü
 chixri namaxū namaā ga guma Abráū nane ga Tupanaārū unetagagu bucū.
 Rü ngēxgumarūū ta i ñuxma rü yixema i Tupanaāē i Üünexūgagu tūxū
 na nangēxmaxū i maxū, rü chixri tamaā nachopetū i ngēma Yudiūgū i
 naxwēxegūxū na nagu ixīxū i ngēma mugū ga Moīché ūmatūxū. ³⁰ ¿Natürü
 ñuxū ñaxū i Tupanaārū ore i ūmatūxūwa? Rü dūcax, ngēmawa Abráūmaā
 nūxū nixu ga na ngīxū ínatāxūcēx ga naxūtaxū ngīnemaā, yerū taxucūrūwama
 yema ngīnemaā nayayauxye ga norū yemaxū ga namēxwaxūchixūcū ga
 naneārū tá ixīxū. ³¹ Rü ngēmaācū, Pa Chaueneēgūx, rü nūxū tadau rü tama
 Abráū naxūtaxūxācūgūrūū tixīgū, erū tama ngēma mugūtūūwa tangēxmagū.
 Natürü Abráū namēxūchixacūgūrūū tixīgū, erū Tupanaārū unetagagu tūxū
 nangēxma i tórū maxū.

5

Meā pegūna pedaugū na tama wena ngēma mugūtūūwa pengēxmagūxūcēx

¹ Rü ñuxma ya Cristu rü marū tūxū ínanguxūxēē na tama ngēma
 mugūtūūwa ingēxmagūxūcēx. Rü ngēmacēx name nixī i pegūna pedaugū na
 tama wena natūūwa pegū pengēxmagūxēēxūcēx i ngēma mugū. ² ¡Rü choxū
 iperūxīnūē! Rü choma i Pauru rü pemaā nūxū chixu, rü ngēxguma chi nagu
 pexīxgu na pegū ípewiechēxmūpēxechiraūxū na ngēmaācū penayaxuxūcēx i
 perū maxū, rü ngēxguma ya Cristu rü chi taxuwama pexū name. ³ Rü wena
 pemaā nūxū chixu rü ngēxūrūū i yatū i nūgū íwiechēxmūpēxechiraūchaūxū
 na ngēmaācū Tupanapēxewa namexūcēx, rü name nixī i nūxna nacūēxāchi
 na taxucūrūwa ngēmaācū na nayauxāxū i norū maxū ega tama aixcūma naga
 naxīnūgū i guxūma i togū i mugū. ⁴ Rü guxāma i pema i nagu rūxīnūēxē na
 Tupanapēxewa pimexū ega nagu pexīxgu i ngēma mugū, rü pemaā nūxū
 chixu rü marū Cristuna pixīgachi i ngēxgumax. Rü ngēxgumarūū ta pegū
 nūxna peyaxūxēē i ngēma ngechaū ga noxri Tupana namaā pexū ngechaūxū.
⁵ Natürü Tupanaāē i Üünexū nixī i tūxū rüngūxēēxū na yaxōgūxūcēx. Rü
 ngēmacēx nixī i ínanguxēēxū na Cristugagu Tupanapēxewa imexū. ⁶ Rü
 ngēmacēx i ñuxma na Ngechuchu ya Cristuarū duūxūgū ixīgūxū, rü nūētama
 nixī ega woo íwiechēxmūpēxechiraūgu rü ēxna tama, erū naga ngēma nixī
 i Tupanapēxewa tūxū mexēēxū. Rü ngēma Tupana naxwēxexū i ñuxma
 nixī na aixcūma yaxōgūxū rü ngēmaācū yigū na ingechaūgūxū. ⁷ Pema
 rü meāma ipenaxūgū na Cristuwe perūixīxū. ¿Rü texē ēxna pexū nūxū
 taxoox na tama naga pexīnūēxūcēx i norū ore i aixcūma ixīxū? ⁸ Rü pemaā
 nūxū chixu, rü tama Tupana ga noxri pexcēx cacū nixī ya yima pexū
 nūxū oócū. ⁹ Rü name nixī i nūxna pecūēxāchie rü wūxitama i duūxū i
 chixexū ūxū, rü nanachixexēē i guxūma i togū i natanūxūgū, ñoma wūxi
 i íraxū i pāūārū puxēerūū rü wūxi i taxū i pāūchara ipuxēēxūrūū nixī.
¹⁰ Choma rü chayaxō na tórū Cori tá pexū rüngūxēēxū na choma nagu
 charūxīnūxūrūū nagu perūxīnūēxūcēx. Natürü Tupana tá nanapoxcu i
 ngēma duūxū i pexū chixēāxēēxū, rü nūētama nixī ega woo texē tixīgū. ¹¹ Rü
 nūmaxū i duūxūgū rü chauchiga nidexagū, rü nūxū nixugūe na choma rü
 duūxūgūxū changūxēēxū na nūgū ínawiūchēxmūpēxechiraūxūcēx rü mugū
 na yanguxēēgūxūcēx na ngēmaācū nūxū nangēxmaxūcēx i maxū i taguma
 gūxū. Natürü, Pa Chaueneēgūx, rü ngēxguma chi ngēmaācū duūxūgūxū

changúexēēgu, rü tãu chima chowe ningēxūtanū i Yudiūgu, erü tãu chima naãēwa nangux i ngēma ore i nüxū chixuxū nachiga ya Cristu ga curuchagu taxcēx yucū. ¹² Natürü ngēma duūxūgū i pexū chixeāēgūxū rü pexū ucuxēgūxū na pegū ípewiūchēxmüpēxechiraūxūcēx, rü ŷtūxcūū ēxna i nümagū i tãu noxtacūma nügū yacaugüpūxūcharexegūxū ta? ¹³ Natürü pemax, Pa Chaueneēgūx, rü Tupana pexcēx naca na ngēma mugūna ípenguxūxūcēx. Natürü ñuxma na nüxna ípenguxūxū, rü tama name i ngēmacēx pexeneärü ngúchaū pexügū. Natürü name nixī na pegū pengechaūgūxū rü ngēmaācū pegū perūngūxēēgūxū i wūxichigū. ¹⁴ Erü guxūma i Tupanaärü mugū rü wūxi i muwatama nangox rü ñanagürü:

“¡Rü nüxū nangechaū i cumūcū na cugūtama cungechaūxūrū!”
ñanagürü. ¹⁵ Natürü name nixī i pexuāēgū erü ngēxguma chi pegūmaā penuēgu rü pegūchi pexaiegu, rü ngürüāchi tá pegū pewoone rü tá ipeyanaxoxēē i Tupanaärü ore i pewa ngēxmaxū.

Ngēma taxūneärü ngúchaū rü tama Tupanaāē i Üünexūārü ngúchaūmaā nawūxigu

¹⁶ Pemaā nüxū chixu, rü name nixī i Tupanaāē i Üünexū naxwēxexūācūma pemaxē. Rü ngēxguma ngēmaācū pemaxēgu, rü tãutāma pexeneärü ngúchaū pexügū. ¹⁷ Erü ngēma taxūneärü ngúchaū rü tama Tupanaāē i Üünexūārü ngúchaūmaā nawūxigu. Rü ngēma Tupanaāxē i Üünexūārü ngúchaū rü tama taxūneärü ngúchaūmaā nawūxigu. Erü ngēma taxre i ngúchaūgū, rü nügūchi naxaie erü wūxichigū i ngēma rü tamaā inacuáxchaū. Rü ngēmacēx i pema rü taxucürüwa penaxū i ngēma pematama penaxwēxexū. ¹⁸ Natürü ngēxguma Tupanaāē i Üünexū pemaā icuēxgux, rü marü tama ngēma nuxcūmaūgūxū i mugütūūwa pengēxmagū. ¹⁹ Rü meāma nangox na ñuxācū namaxēxū i ngēma duūxūgū i naxūneärü ngúchaū ügūxū, rü naī i ngemaā maxēxū, rü airugürūtmare ixīgūxū. Rü tama naxāneē na ŷacū rü chixexū naxügūxū. ²⁰ Rü tupananetachicūnēxāgūxū nicuēxūūgū, rü togūchi naxaie norü ngēmaxūgūcēx, rü nanuxwēxegū, rü duūxūgūxū naxucuxēgū na to i nguxēētaegu naxīxūcēx, rü ngēmaācū nayatoye i duūxūgū na tama wūxigu naxīnūēxūcēx. ²¹ Rü togūarū ngēmaxūgūcēx nixāūxāchigū, rü nangāxēwēxegū, rü peta naxūgūecha, rü nanaxūgū i muxūma i togū i chixexūgū i ngēxgumarūū ixīxū. Rü ngēmacēx, wena pemaā nüxū chixu rü guxūma i ngēma duūxūgū i ngēmaācū maxēxū, rü nataxūtāma i nachica i ngextā Tupana āēxgacū íyīxūūwa. ²² Natürü ngēxguma Tupanaāē i Üünexū tamaā icuēxgu, rü nūma nixī i tūxū nangūxēēxū na yigū ingechaūgūxūcēx, rü itaāēgūxūcēx, rü meā yigūmaā imaxēxūcēx, rü yaxna namaā ixīnūēxūcēx i togū, rü togūmaā imecūmagūxūcēx, rü togūxū rüngūxēēgūxūcēx, rü aixcūma yanguxēēxūcēx i ngēma nüxū ixuxū. ²³ Rü ngēxgumarūū ta Naāē i Üünexū tūxū narūngūxēē na tama chixexūmaā nataeguxēēxūcēx ega togū chixexū tamaā ŷxgux. Rü tūxū narūngūxēē na meāma yigūnatama idauxūcēx na tama chixexūgu iyixūcēx. Rü nataxuma i mugū i nachuxuxū na naxūxū i ngēma mexūgū. ²⁴ Rü ngēma duūxūgū i aixcūma Ngechuchu ya Cristuarū duūxūgū ixīgūxū, rü marü nüxū narūxoe ga yema nuxcūmaūxū ga norū maxū ga chixexū, rü yema naxūneärü ngúchaūgū ga chixexū, rü guxūma ga ŷacū ga to ga ngúchaū ga tama mexū. ²⁵ Rü ñuxma na Tupanaāē i Üünexū tūxna naxāxū

i tórü maxü, rü name nixi i nüma tórü maxümaã na inacuáxü. ²⁶ Rü tama name i yigü Ítarüta rü togümaã tanuãe, rü bai na ñacücèx ixãüxachixü.

6

Name nixi i guxãma i pema rü pegü perüngüxëëgü i wüxichigü

¹ Pa Chaueneëgüx, ngëxguma chi texéxü pedëuxgu na ñacü rü chixexügu tanguxü, rü pema na Tupanaãe i Üünexü naxwëxexüãcüma na pemaxëxü, rü name nixi i tüxü pengechaüãcüma tüxü perüngüxëe na itayarüwëxãchixüçèx. ¡Natürü pexuãëgü i wüxichigü, na tama pema rü ta nagu peyixüçèx i ngëma chixexü! ² ¡Rü pegü perüngüxëëgü i ngëxguma texé petanüwa guxchaxügu tüxü ngëxmagu! Erü ngëxguma ngëmaãcü pegü perüngüxëëgu, rü ngëmaãcü tá peyanguxëe i ngëma Cristu pexü muxü. ³ Rü ngëxguma texé nagu rüxñügu na wüxi i ñacü tixixü, rü tügütama tawomüxëe, erü Tupanapëxewa rü taxuümachirëx tixi. ⁴ Rü ngëmacèx i wüxichigü, rü name nixi i tügüarü maxütama tangugü. Rü ngëxguma namexgu i tümaärü maxü, rü tügümaã tátama tataãe, rü taxucëxma tüxcüü togüarü maxüwa tügü tangugüarü maxüãx. ⁵ Erü tanaxwëxe ya wüxichigü na tümaärü maxünatama tadauxü i Tupanapëxewa. ⁶ Rü yixema nayaxuxe i nguxëëtae i Tupanaärü orewa rü name nixi na tümaärü nguxëëruümaã tangauxü i gúxü i tümaärü ngëmaxügu. ⁷ ¡Rü pexuãëgü na tama ípetüexüçèx i perü maxüwa! Erü taxucürüwa texé Tupanaxü tawomüxëe. Rü yixema chixexü üxe, rü chixexü tá tayaxu. Rü yixema mexü üxe, rü mexü tá nixi i tayaxuxü. ⁸ Rü yixema tümaxüneärü ngüchaü üxe, rü ngëma tümaxüneärü ngüchaü rü tá yuwa tüxü naga. Natürü yixema Tupanaãe i Üünexüärü ngüchaü üxe, rü ngëma Tupanaãe i Üünexüwa tá tanayaxu i maxü i taguma gúxü. ⁹ Rü ngëmacèx tama name na nüxü rüchaxuxü na mexü ixüexü. Erü ngëxguma chi tama nüxü rüchaxuegu, rü düxwa mexü tá tayaxu i Tupanaxütawa. ¹⁰ Rü ngëmacèx ngëxguma tüxü nangëxmagu na ñacümaã togüxü rüngüxëëxü, rü name nixi i guxãxüma tarüngüxëe. Natürü yexera tanaxwëxegü na nüxü rüngüxëëgüxü i ngëma taeneëgü rü taeyëxgü i yaxögüxü.

Pauru rü nüxü narümoxë ga yema yaxögüxü, rü nayaxucüxëgü

¹¹ Rü nuã tá ichanaxügu na chomaxüchima choxmëxmaã pexçèx chanaxümatüxü i ñãã popera. ¡Rü dücax, nüxü pedëux i ngëma choma chaxümatüxü na nüxãcü natamatüxü! ¹² Rü ngëma Yudiugü i pexü ngüexëëxü na pegü ípewiechëxmüpëxechiraügüxüçèx, rü ngëmaãcü pexü namu erü nanataãëxëëgüchaü i ngëma togü i Yudiugü na tama naxchi naxaixüçèx nagagu na Ngechuchu ya Cristu ga curuchagu yucüaxü na yaxögüãxü. ¹³ Erü woo i nümagü na ínawiüchëxmüpëxechiraüxü, rü tama nayanguxëe i guxüma i mugü. Natürü nümagü rü nanaxwëxegü na pegü ípewiüchëxmüpëxechiraüxü, na yixcama nügü yacüxüügüxüçèx rü togü i Yudiugümaã nüxü na yaxuxüçèx na pema rü ta naxrüü nagu pexixü i ngëma nuxcümaügüxü i mugü. ¹⁴ Natürü i choma rü chaugü chixüxüü erü nüxü chayaxö ya tórü Cori ya Ngechuchu ya Cristu ga curuchagu yucü. Rü ngëmacëxicatama nixi i chaugü chixüxüüxü. Rü ñuxma na Cristu ga curuchagu yucüaxü chayaxöxü, rü marü tama nagu charüxñü i ñoma i naãne rü norü ngëmaxügu. Rü ngëxgumarüü ta i ñoma i naãne rü marü tama choxü nacuáxchaü. ¹⁵ Erü ngëxguma Ngechuchu ya Cristuarü düxügü ixigügu, rü Tupanapëxewa rü taxuüma nixi i ngëma na íwiewchëxmüpëxechiraüxü rü

ēxna tama. Natürü ngēma aixcūma napēxewa mexŭ nixī na naxüchicüüxŭ i tórü maxŭ na ngexwacaxŭxŭ i duŭxŭgü ixīgüxcèx. ¹⁶ Rŭ Tupanana naxcèx chaca na pexŭ nataāēxēēgŭxcèx rŭ nüxŭ pengechaŭtümŭgŭxcèx i guxāma i pema i aixcūma yanguxēēgŭxe i ngēma pemañ nüxŭ chixuxŭ, rŭ guxāma ya yíxema aixcūma Tupanaārŭ duŭxŭgü ixīgŭxe. ¹⁷ Rŭ ñuxmawena rŭ tama chanaxwèxe na texé tacü rŭ guxchaxŭgü choxna āxŭ. Erŭ choma rŭ aixcūma tórü Cori ya Ngechucharŭ duŭxŭ chixī. Rŭ ngēma chorŭ oxrigüchica i chowa ngēmagŭxŭwa nüxŭ pecuèx na aixcūma yīxŭ i ngēma. ¹⁸ Pa Chaueneēgŭx, chanaxwèxe i tórü Cori ya Ngechuchu ya Cristu pexŭ narüngŭxēē i guxāma i pemax. Rŭ ngēmaäcü yīi.

Rŭ nuāma pexna,
Pauru

POPERA GA EPÉCHIUWA YEXMAGÜXÜ GA YAXÖGÜXÜTANÜWA NAMUXÜ GA PAURU

Pauru rü nüxü narümoxë ga yema yaxögüxü ga Epéchiuarü iānewa yexmagüxü

¹ Pa Chaueneëgü ya Epéchiuwa Ngëxmagüxe, choma i Pauru nixi i pexcëx chanaxümatüxü i ñaā popera. Rü choma i Pauru chixi i Tupana choxü yaxuxü na Ngechuchu ya Cristu choxü muxüxcëx na duüxügümaā nüxü chixuxüxcëx i norü ore. Rü pexcëx chanaxümatü i guxāma i pema ya Epéchiuarü iānewa ngëxmagüxe rü Tupanaärü duüxügü ixigüxe rü Ngechuchu ya Cristuaxü yaxögüxe. ² Rü chanaxwëxe i pexü narüngüxë rü pexü nataäexë rü Tanatü ya Tupana rü törü Cori ya Ngechuchu ya Cristu.

Tupana rü poraäcü tüxü narüngüxë erü Cristuarü duüxügü tixigü

³ Rü name nixi i nüxü ticuëxüügü ya Tanatü ya Tupana ya törü Cori ya Ngechuchu ya Cristunatü ixicü. Erü nüma ya Tupana rü Cristugagu tüxna nanaxā i naguxüraüxü i ngüxëëgü i üünexü i dauxüguxü i naanewa taxcëx ne namugüxü. ⁴⁻⁵ Rü tautama naāne üxgu, rü Cristugagu Tupana tüxü nade na napëxewa ixüünegüxcëx rü na nataxuxüxcëx i törü chixexü i napëxewa. Rü Tupana rü poraäcü tüxü nangechaü. Rü yemacëx nuxcümamatama tüxü naxuneta na naxäcügüxü tüxü nadexüxcëx Ngechuchugagu. Rü yemaäcü nanaxü yerü yema nixi ga norü ngüchaü. ⁶ Rü ngëmacëx name nixi i guxüguma nüxü ticuëxüügü ya Tupana. Erü nüma rü poraäcüxüchima tamaā namecüma rü poraäcü tüxü narüngüxë ga yexguma taxcëx nüma namuāxgu ga Nane ya nüxü nangechaüxüchicü. ⁷ Rü Tupana rü poraäcü tüxü nangechaü, rü yemacëx nanamu ga Nane na taxcëx nayuxü rü nagü inabaxü na yemaäcü tüxü ínanguxüxëëxcëx rü tüxü nüxü nangechaüxüxcëx ga törü pecadugü. ⁸ Rü Tupana tüxü nüxü nadauxëë na ñuxäcü poraäcü tüxü nangechaüxü ga yexguma tüxna naxāāxgu ga guxüma ga törü cuëx na taāëxü icuáxüxcëx rü tüxü natauxchaxüxcëx i norü ore. ⁹ Rü tüxü nüxü nacuëxëë ga norü ngüchaü ga noxri nüxicatama nüxü nacuáxü. Rü yema norü ngüchaü ga nuxcümáxüchima Cristumaā nagu naxinüxü ga Tupana, rü yema nixi ga ñoma ga naānewa na namuāxü na tüxü yamaxëxëxüxcëx. ¹⁰ Rü yema nagu naxinüxü nixi na Cristumëxëwa nangëxmaxëëxü i guxüma i daxüguxü i naānewa ngëxmaxü rü guxüma i ñoma i naānewa ngëxmaxü. Rü ngëmaäcü tá nanaxü ya Tupana i ngëxguma nawa nanguxgu na yanguxëëxü. ¹¹ Yerü naxüpa ga ñoma ga naane naxüxü ga Tupana, rü woetama tomaā nanaxuegu na Cristugagu tanayauxgüxcëx i ngëma maxü i taguma güxü i nüma toxna naxāxchaüxü na aixcüma naxcëx tamaxëxüxcëx. Rü aixcüma yemaäcü nanaxü yerü yema nixi ga norü ngüchaü ga Tupana ya guxüma ücü, ngëma nüma nagu naxinüxüäcüma. ¹² Rü yemaäcü Tupana tomaā nanaxuegu na toma i toxira Cristuaxü yaxögüxe naxcëx tamaxëxüxcëx rü nüxü ticuëxüügüxcëx naxcëx i norü pora i üünexü. ¹³ Rü yexgumarü ta ga pema i EpéchiuüĀxgü, rü yexguma nüxü pexinüëgu ga yema ore i aixcüma ixixü i tüxü maxëxëëxü, rü yexguma Cristuaxü peyaxögügu, rü namücügü pixigü. Rü Tupana ga tamaā ixunetacü na tüxna namuāxüxcëx i Naāë i Üünexü, rü marü pexna nanamu i ngëma Naāë na nüxü pecuáxüxcëx na aixcüma norü duüxügü pixigüxü. ¹⁴ Rü ngema Naāë i Üünexü ga Tupana tüxna muxü, rü

ngemaawa nixī i nūxū icuáxū na aixcūma Tupana tá tūxna naxāxū i guxūma i ngema tamaā inaxunetaxū. Rū ngēxguma wena nūma naxūxgu ya Cristu na nūgūxūttawa tūxū nagagūxūcēx rū aixcūma tá tanayaxu i guxūma i ngema Tupana tomaā nūxū ixuxū. Rū ngēmacēx name nixī na nūxū icuēxūūgūxū ya Tanatū ya Tupana ya ūxūnecū.

Pauru rū yaxōgūxūcēx nayumūxē.

¹⁵⁻¹⁶ Rū ngēmacēx, űuxma na nūxū chacuáxū na aixcūma tórū Cori ya Ngechuchuaxū peyaxōgūxū rū na aixcūma nūxū pengechaūgūxū i guxūma i ngēma togū i Tupanaārū ixīgūxū, rū ngēmacēx taguma nūxū charūchau na pexcēx moxē nūxna chaxāxū rū pexna chacuēxāchixū i chorū yumūxēwa. ¹⁷ Rū ngēxguma namaā chideaxgu ya Tanatū ya Tupana ya mexēchicū ya Nanatū ya tórū Cori ya Ngechuchu ya Cristu, rū naxcēx nūxna chaca na pexna naxāāxūcēx i ngēma cuēx i Naāē i Ūūnexūtwa ne ūxū. Rū ngēma Naāē i Ūūnexū tá nixī i pexcēx nangōxēēxū i Tupanaārū ore i mexū na yexeraācū nūxū pecuáxūcēx ya Tupana. ¹⁸ Rū Tupanana naxcēx chaca na nūmatama pexū yangōxnaāēxēēxūcēx, na nūxū pecuáxūcēx na űacū yīīxū i ngēma īpenangūxēēxū i naxcēx pexū nadexū. Rū nūxna naxcēx chaca na pexū nūxū nacuēxēēxūcēx na űuxācū namexēchixū i ngēma maxū i taguma gūxū i nūma norū duūxūgūcēx namexēēxū i daxūguxū i naānewa. ¹⁹⁻²⁰ Rū ngēxgumarūū ta rū nūxna naxcēx chaca na pexū nūxū nacuēxēēxūcēx na űuxācū nataxūchixū i norū pora i tawa ngēxmaxū rū namaā tūxū nangūxēēxū i yixema na yaxōgūxū. Rū ngēmatama pora i taxūmaā nixī ga napuracūxū ga Tupana ya yexguma yuwa Cristuxū īnadaxēēgu rū daxūguxū ga naānewa nagaāxgu rū nūgūarū tūgūnecūwawa yanatōxēēāgu na guxāārū āēxgacū yīīxūcēx. ²¹ Rū yemaācū guxūētūwa nanayexmaxēē. Rū ngēmacēx i űuxma rū Cristumēxēwa nangēxmagū i guxūma i daxūguxū i naānecūāx i āēxgacūgū rū guxūma i űoma i naānecūāx i āēxgacūgū. Rū ngēmaācū naxmēxwa nangēxmagū i guxūma i pora i űuxma ngēxmagūxū rū guxūma i pora i tá ngēxmagūxū. Rū ngēmaācū i nūma rū guxū i āēxgacūgūarū āēxgacū tá nixī i guxūguma. ²² Rū yemaācū ga Tupana rū marū Cristumēxēwa nanayexmagūxēē ga guxūma. Rū yexgumarūū ta Cristuxū ningucuchixēē na guxūma i yaxōgūxūērū na yīīxūcēx. ²³ Rū űuxma rū guxūma i yaxōgūxū rū wūxigu Cristuarū nixīgū. Rū nūma nixī i tawa nangēxmaxū i guxāma i yixema i nūxū na yaxōgūxū. Rū ngēxgumarūū ta nūma nixī i nangēxmaxēēāxū i guxūma i űacū i ngēxmaxū i guxūwama.

2

Tamaxē erū Tupana tūxū nangechaū

¹ Rū űpa ga pema rū perū pecadugagu rū perū chixexūgagu űoma peyuexūrūū pixīgū. ² Yerū ga pema rū nagu pexī ga yema chixexū i űoma i naānecūāx i duūxūgū nagu īxū. Rū pema rū naga pexīnūē ga Chataná i ngoxogūarū āēxgacū ixīxū. Rū nūma nixī i nūxū nangūchaūxēēāxū na chixexū naxūgūxūcēx i guxūma i ngēma duūxūgū i tama Tupanaga īnūēxū. ³ Rū guxāma ga yixema rū yemaācū chixri tamaxē ga űpa. Rū tanaxū ga tōxrūtama ngūchaū, rū nagu taxī ga yema taxūne naxwēxexū rū yema taāē naxwēxexū. Rū yemagayu yema togū ga duūxūgū ga chixexū ūgūxūrūū nawa taxūgū i ngēma poxcu i āūcūmaxūchixū i Tupana mexēēxū. ⁴ Natūrū ga Tupana rū poraācū nūxū tangechaūttūmūūgū rū poraācū tūxū nangechaū.

5 Rū yemacèx, woo tórū pecadugagu ñoma iyuexürüü tixīgü, natürü ga Tupana rü tüxna nanaxā ga maxū ga yexguma Cristuxū ínadaxēēgu. Rū ñuxma rü pexū nangēxma i maxū i taguma gúxū, erü Tupana pemaā namecūma. 6 Rū yema na Ngechuchu ya Cristuxū wena namaxēēxürüü rü tüxū rü ta namaxēēxē ga Tupana. Rū yemaācū nanaxū na yixema rü ta Cristumücügü ixīgüxcèx, rü namaā āēxgacügü ixīgüxcèx i daxüguxū i naānewa. 7 Rū yemaācū nanaxū ga Tupana na guxūgutāma duūxügüxū nawéaxūcèx na ñuxācū Cristugagu poraācū tüxū nangechaūxū rü tamaā namecūmaxū. 8 Rū yemaācū pemaā namecūma ga Tupana. Rū yemacèx penayaxu ga maxū i taguma gúxū yerü peyaxōgü. Rū ngēma maxū rü taxucürüwama pegūnatama penaxā, natürü Tupana nixī ga pexna naxāmarecū ga yema. 9 Rū tama facū i mexū i pexūxügagu nixī i pexū nangēxmaxū i ngēma maxū, natürü Tupana nixī ya pexna naxāmarecū na ngēmaācū taxūema tügü icuèxūxūcèx. 10 Rū Tupana nixī ga tüxū maxēxēcū. Rū ñuxma rü tüxū nangēxma i ngēma maxū yerü Ngechuchu ya Cristu tórū pecaducèx nayu. Rū Tupana tüxna nanaxā i ngēma maxū na meā imaxēxūcèx rü mexū ixügüxcèx. Rū yemaācū tüxū narüngüxēē ga Tupana yerü woetama nuxcūmaxūchima marü yemagu narüxīnū.

Cristu nixī ya yigūmaā tüxū rüngüxmüxēēcū

11-12 Rū ngēmacèx i pema na tama Yudiügü pixīgüxū, rü name nixī i nüxna pecuèxāchie na tama toxrüü na pixīgüxū ga noxri rü tama Tupanaxū na pecuèxgüxū. Rū yema na tama toxrüü pixīgüxū rü yemacèx ga toma ga Yudiügü i togü na ítawiechēxmüpēxechiraügüxū, rü nüxū tixugüe na pema rü tama Tupanapēxewa na pimexū yerü tama toxrüü pegü ípewiechēxmüpēxechiraügü. Rū yexguma ga pema rü tama Cristuxū pecuèxgü, yerü tama Tupanaārü duūxügü i Yudiügütanūxū pixīgü. Rū tama nüxū pecuèxgü ga Tupana núma na namuxū ga Nane na duūxügüarü pecaducèx nayuxūcèx na nüxna naxāāxūcèx i maxū i taguma gúxū. Rū woo ga yema mexügü ga Yudiügūmaā inaxunetaxū ga Tupana, rü taxucürüwa penayaxu. Yerü ñoma ga naānewa rü pemaxēmare, rü tama nüxū pecuèx ga facū chi pexū na úpetūxū ga yexguma chi peyuegu yerü tama Tupanaxū pecuèx. 13 Natürü woo ga noxri rü tama Tupanaxū na pecuáxū, natürü i ñuxma rü nügüxūtawa pexū nagagü. Rū Ngechuchu ya Cristuarü duūxügü pixīgü yerü pexcèx nayu rü nagü inanaba. 14-15 Rū ñuxma rü Cristu nixī ya tüxū rüngüxmüxēēcū. Rū noxri ga toma ga Yudiügü rü pexchi taxaie yerü tama toxrüü Yudiügü pixīgü. Natürü i ñuxma rü Cristu marü yigūmaā tüxū narüngüxmüxēē. Rū yemaācū wūxitama i duūxügüxū tüxū nixīgüxēē rü inyanaxoxēē na yigüarü uwanü ixīgüxū. Rū yexguma nayuxgu ga Cristu rü tüxū ínanguxūcèx na tama natüüwa iyexmagüxcèx ga yema nuxcūmaügüxū ga mugü ga toma ga Yudiügü nagu taxīxū. Rū wūxitama i duūxügü i ngexwacaxūxū tüxū nixīgüxēē i toma i Yudiügü na tixīgüxū rü pema i tama Yudiügü na pixīgüxū. Rū yemaācū nanaxū na guxāma i yixema rü norü duūxügü na ixīgüxcèx. Rū yemaācū yigūmaā tüxū inarüngüxmüxēē. 16 Rū yexguma curuchagu nayuxgu ga Cristu, rü inyanaxoxēē ga yigüchi na ixaixū. Rū yemaācū ga Cristu rü Tupanamaā tüxū inarüngüx-müxēē, rü wūxitama i duūxügüxū tüxū nixīgüxēē. 17 Rū yexguma Cristu núma ũxgu, rü taxcèx núma nanange ga ore ga mexū ga marü yigūmaā rü Tupanamaā na rüngüxmüxū. Rū yema ore rü toxcèx nixī i toma i Yudiügü ga toxira Tupanaxū na tacuáxū. Rū yema ore rü pexcèx rü ta nixī ga woo tama Tupanaxū na pecuèxgüxū

ga noxrix. ¹⁸ Rū ñuxma rü guxāma i yixema rü Cristugagu tüxđ natauxcha na Tanatü ya Tupanana ingaicamagüxđ. Rū ngēmatama Naāē i Üünexđ nixđ i tüxđ rüngüxēēxđ na nüxna ingaicamagüxđcēx ya Tanatü ya Tupana. ¹⁹ Rū ngēmacēx i pema rü woo tama Tupanaxđ pecuēxgü ga noxrix, rü woo tama norü duüxđgü pixđgü ga yexguma, natürü tama ngēmaācü pixđgü i ñuxmax. Erü ñuxma rü natanüxđ pixđgü i guxđma i ngēma duüxđgü i Tupanaärü ixđgüxđ. Rū aixcūma Tupanaxācügüxüchi pixđgü i ñuxmax. ²⁰⁻²² Guxāma i pema rü wüxi ya İpata ya mexüne ya Tupana nawa maxüne pixđgü. Rū ngēma cementu i ladriyu naētügu nugüxđ, rü ngēma rü Tupanaärü ngüexđgü ga imugüxđ rü norü orearü uruđgü nixđ. Rū yima ladriyu ya nüxirama cementuētüwa ixücuchicü rü Cristu nixđ. Rū ngēma inanaxüğü na naxüāxđ ya guxünema ya yima İ. Rū düxwa ningu na wüxi ya tupauca ya taxüne ya Cristugagu üünene na yixđ. Rū ngēmaācü i pema na Cristuarü pixđgüxđ rü wüxigu tomaā peyanguxēē ya wüxi ya tupauca ya taxüne i ngextā Tupanaāē i Üünexđ İmaxüxđwa.

3

Tupana rü Pauruxđ namu na ore i mexüxđ yaxuxđ namaā ga yema duüxđgü ga tama Yudügu ixđgüxđ

¹ Rū ñuxma na yemaācü Tupana pexđ rüngüxēēxđ, rü choma i Pauru rü pexcēx chayumüxē. Rū pemaā nüxđ chixu rü nūma poxcupatađwa changēxma erü Ngechuchu ya Cristuarü duüxđ chixđ. Rū nüxma chapoxcu erü guxđwama nüxđ chixuchiga na pema rü ta pexđ nangēxmaxđ i pechica i Tupanaxđtawa woo na tama Yudügu pixđgüxđ. ² Rū maneca marü nüxđ pecuāchiga na ñuxācü Tupana choxđ nangechađācūma choxđ muxđ na pexđ charüngüxēēxđcēx rü pemaā nüxđ chixuxđcēx i norü ore i mexđ. ³ Rū Tupana chomaā nanangoxēē rü choxđ nüxđ nacuēxēē ga yema ore ga pechiga ga noxri nüxcatama nüxđ nacuāxđ. Rū yemachiga nixđ ga İrarüwa marü pexcēx chanaxümatüxđ ga noxrix. ⁴ Rū yexguma pexcēx chanaxümatügu rü pemaā nüxđ chixu ga yema noxri ēxüguxđ ga ore i ñuxācü Tupana rü Cristugagu duüxđgüxđ namaxēxēēxđ. Rū ngēxguma meā nawa pengüegu i ngēma popera rü tá nüxđ pecuēx na aixcūma yixđ ga yema ore ga noxri ēxüguxđ ga nachiga pexcēx chaxümatüxđ. ⁵ Rū yema nixđ ga ore ga ēxüguxđ ga Tupana taxüexđma meā nüxđ nacuēxēēxđ ga noxrix. Natürü i ñuxma rü ngēma Naāē i Üünexđ rü marü nanangoxēē i ngēma ore naxcēx i Tupanaärü duüxđgü i üünexđ i yamugüxđ rü norü orearü uruđgü. ⁶ Rū ñuxma rü tá pemaā nüxđ chixu i ñuxācü na yixđ i ngēma ore ga noxri ēxüguxđ. Rū dücax, woo tama Yudügu pixđgü natürü i ñuxma rü pexcēx rü ta nixđ i ngēma maxđ i taguma güxđ ga noxri Tupana tomaā İxunetaxđ. Rū ñuxma i pema rü ta norü duüxđgü pixđgü. Rū pexcēx nixđ i guxđma i ngēma Tupanaärü unetagü ga noxri tomaā nüxđ yaxuxđ. Rū ngēmaācü i ñuxma rü Ngechuchu ya Cristugagu pexđ nangēxma i guxđma i ngēma mexđgü erü peyaxögü i norü ore i tüxđ maxēxēēxđ. ⁷ Rū woo taxuwama chame na chanaxüxđcēx i norü puracü, natürü ya Tupana rü choxđ namuāma rü choxđ naporaxēē na nüxđ chixuxđcēx i ngēma norü ore i mexđ. ⁸ Rū chaugücēx i Tupanapēxewa rü choma nixđ i guxđ i norü duüxđgüarü ñaxtüwaama chaxüxđ. Rü woo ngēmaācü chixđ, natürü Tupana choxđ nangechađ rü choxna nanaxā i ngēma puracü i mexđ na ngēma tama Yudügu ixđgüxđmaā nüxđ na chixuxđcēx i norü ore i mexđ na ñuxācü namexēchixđ rü taguma iyagüxđ ga yema

taxcèx naxùxū ga Cristu. ⁹ Rū nūma ga Tupana ya guxūārū ūruū ixīcū, rū choxū namu na guxū i duūxūgūxū nūxū chacuèxēēxūcèx na ñuxācū yīixū i ngēma norū ngūchaū ga nuxcūma èxūguxū ga noxri nūxīcatama nūxū nacuáxū. Rū ngēma norū ngūchaū nixī i Cristugagu tūxū na namaxēxēēxū. ¹⁰ Rū yemaācū choxū namu ga Tupana na ngēma duūxūgū i tama Yudīgū ixīgūmaā nūxū chixuxūcèx i ore i mexū na yaxōgūāxūcèx. Rū nūma ya Tupana nanaxwēxe na yaxōgūāxū na ngēmaācū guxūma i āēxgacūgū i daxūcūāx nūxū nadaugūxūcèx na ñuxācū nūxū nacuèxūchixū ga Tupana ga yexguma duūxūgūaxū natauxchaxēēāgu na naxūtawa nangugūxūcèx. ¹¹ Rū yemaācū nūxū nanatauxchaxēē ga Tupana yerū woetama nuxcūmaxūchima guxūguma nagu narūxīnū na tōrū Cori ya Ngechuchu ya Cristugagu tā na namaxēxēēāxū i duūxūgū. Rū yemaācū nayanguxēē. ¹² Rū ñuxma na Cristuarū duūxūgū ixīgūxū rū nūxū na yaxōgūxū, rū tūxū natauxcha na Tupanana ingaicamagūxū rū taxucèxma nūxū na imuūēxū. ¹³ Rū ngēmacèx i ñuxma na pexcèx ngūxū chingexū rū pexū chacèèxū na tama chauxcèx pexoegaāēgūxūcèx. Erū ngēma ngūxū na chingexū i ñuxma rū perū meruū nixī i ngēma.

Cristu rū poraācū tūxū nangechaū

¹⁴ Rū ngēmacèx, ngēxguma nagu charūxīnūgu na ñuxācū Tanatū ya Tupana taxcèx namexēēxū na naxācūgū ixīgūxūcèx, rū napēxegu chacaxāpūxū na nūxū chicuèxūxūcèx. ¹⁵ Rū nūma nixī i Nanatū yīixū i guxūma i norū duūxūgū i ñoma i naānewa rū daxūguxū i naānewa ngēxmagūxū. ¹⁶ Rū Tanatū ya guxūguma poraācū tamaā mecūmacūna chaca na Naāē i Ūnēxūārū ngūxēēmaā pexū naporaexēēxūcèx na aixcūma peporaexūcèx i perū maxūwa. ¹⁷⁻¹⁸ Rū ngēxgumarūū ta nūxna naxcèx chaca na perū ōgagu pewa namaxūxūcèx ya Cristu. Rū ngēxguma ngēmaācū perū maxūwa peporaegu rū pexū nangēxmagu i ngēma ngechaū i aixcūma ixīxū, rū tā wūxigu guxūma i yaxōgūxūmaā nūxū pecuèx na ñuxācū nataxūchixū i norū ngechaū i namaā ticūxū nangechaūxū ya Cristu. ¹⁹ Rū woo tama yanguxgu i tōrū cuèx na nūxū icuáxūcèx na nañuxraūxū i ngēma ngechaū i namaā Cristu tūxū ngechaūxū, natūrū Tupanana naxcèx chaca na pexcèx nangoxēēāxūcèx na ñuxācū na yīixū i ngēma ngechaū na aixcūma pewa nangēxmaxū i guxūma i Tupanacūmagū. ²⁰ Rū ñuxma rū name nixī i guxāma i yixema rū nūxū ticuèxūgū ya Tupana. Erū nūma rū nūxū nangēxma i pora na naxūāxū i guxūma i ngēma naxcèx ícaxū rū èxna nagu rūxīnūēxūārū yexeraxūchi. Rū ngēma norū pora i tawa ngēxmaxūmaā nixī i naxūāxū i guxūma i ngēma. ²¹ Rū ñuxma rū name nixī i guxūma i norū duūxūgū i yaxōgūxū rū guxūgutāma Tupanaxū nicuèxūgū naxcèx i ngēma Ngechuchu ya Cristu ūxū. Rū ngēmaācū yīi.

4

Tupanaāē i Ūnēxū rū wūxigutama tūxū narūxīnūēxēē

¹ Rū ñuxma na ngēmaācū Tupana tūxū rūngūxēēxū, rū choma i Cristugagu na chapoxcuxū, rū pexū chacèèxū na Tupana naxwèxexūācūma meā pemaxèxū. Rū name nixī i ngēmaācū pemaxē erū pexū nixī ga nadexū ga Tupana, rū norū duūxūgū pixīgū i ñuxmax. ² Rū tama name i pegū picuèxūxūgū. Rū name nixī i guxūguma pemecūmagū rū yaxna namaā pexīnūē i togū rū nūxū pengechaūgū. ³ Rū chanaxwae i wūxigu perūxīnūē

rū ñoma wūxitama i duūxūrūū pixīgū erū pewa nangēxma i Tupanaāē i Ūūnexū. Rū name nixī i naxcèx pedau na guxūlguma pegū pengechaūgūxū rū ngēmaācū taguma ſacūcèx pegū pitoyexū. ⁴ Erū yixema na Cristuarū duūxūgū ixīgūxū, rū ñoma wūxitama i duūxūrūū tixīgū. Rū ngēxgumarūū ta wūxitama nixī i Naāē i Ūūnexū i guxāwama maxūxū. Rū ngēxgumarūū ta Tupana pexū nade na guxāma ípenanguxēēgūxūcèx i wūxitama i maxū i taguma gūxū. ⁵ Rū wūxitama nixī ya tórū Cori, rū wūxiaxūtamama nixī i yaxōgūxū rū wūxicèxicatama nixī ga íbaiūxū ga guxāma. ⁶ Rū wūxitama nixī ya Tupana ya guxānatū ixīcū. Rū nūma rū guxāētūwama nangēxma rū guxāwama namaxū. Rū nūma rū guxāxū narūngūxēē na tanaxūxūcèx i norū puracū. ⁷ Natūrū wūxichigū i yixema rū tanayaxu i ngēma nacūma rū ngēma cuèx i Cristu tūxna āmarechaūxū na naxūgūxūcèx i norū puracū. ⁸ Rū ngēmacèx i Tupanaārū ore i ūmatūxūwa rū ñanagūrū:

“Rū yexguma daxūgūxū ga naānema naxūxgu, rū yéma tūxū nagagū ga guxema marū tūxū ínangūxūxēē nawa ga tūmaarū chixexū. Rū norū duūxūgūna nanaxā ga cuèx na ngemamaā Tupanaarū puracū naxūgūxūcèx”,

ñanagūrū i ngēma ore. ⁹ Rū ñuxma Pa Chaueneēgūx, rū pexna chaca, rū ſtacūchiga nixī i ngēma ore i ñaxū, “Daxūwa naxū”, ñaxū? Rū dūcax, ngēmawa nūxū tacuèx ga noxri rū ñoma ga naānegu na ínaxīxū ga nūmax. ¹⁰ Rū gumatama Cristu ga ñoma ga naānegu írūxīcū, rū gumatama nixī ga daxūgūxū i naāne i Tupana íngēxmaxūwa ūxcū na guxāētūwa nangēxmaxūcèx rū guxūwama nangēxmaxūcèx. ¹¹ Rū nūmatama nixī ga guxema norū duūxūgūna naxāāxū ga tūmaarū cuèx rū tūmaarū puracū. Rū tūxū naxuneta ga ñuxre na toxnamana norū orexū tayarūxugūxūcèx. Rū toguēgū rū tūxna nanaxā ga cuèx na duūxūgūmaā nūxū tixūxūcèx i ngema norū ore i tūxū nūxū nacuèxēēxū. Rū toguēgū rū tūxna nanaxā ga cuèx na duūxūgūaxū tanangūchaūxēēxū i Tupanaarū ore na yaxōgūāxūcèx. Rū toguēgū rū tūxna nanaxā ga cuèx na ngema yaxōgūxūarū dauruxūgū tixīgūxūcèx. Rū toguēgū rū tūxna nanaxā ga cuèx na norū oremaā tangūxēētaēgūxūcèx. ¹² Rū yemaācū norū duūxūgūna nanaxā ga tūmaarū puracū rū tūmamaā inanan-gūxūxēē na ngēma yaxōgūxūxū tarūngūxēēgūxūcèx na ngēmaācū guxūma i ngēma yaxōgūxū rū yexeraācū nūxū yacuāetanūxūcèx i norū ore. ¹³ Rū Cristu nanaxwēxe na ngēma norū orewa íyaetanūxū i guxāma i yixema ñuxmatáta wūxigu aixcūma meā yaxōgū rū meā nūxū icuèxgū ya Tupana Nane. Rū ngēmaācū tá dūxwa nawa tangugū na aixcūma Tupana naxwēxexūācūma ixīgūxū, rū tá tīyaetanū i norū orewa ñuxmatáta ñoma Cristu ya aixcūma mexēchicūrūū ixīgū. ¹⁴ Rū tāūtáma ñoma buxūgūrūū tixīgū i tórū maxūwa. Erū ngēma buxūgū rū tauxchaācū toguama narūxīnūē. Rū ngēxguma ſacū rū to i ngūxēētaexū naxīnūēgu rū ngēmawe narūxī ñuxmata naga naxīnūē i ngēma duūxūgū i chixexū i norū doramaā nawomūxēēgūxū rū nachix-exēēgūchaūxū. Natūrū i yixema rū tama name na ngēxgumarūū ixīgūxū. ¹⁵ Rū name nixī i yigū ingechaūgūācūma nagu taxī i ngēma ore i aixcūma íxīxū, na ngēmaācū yexeraācū naxrūū íxīgūxūcèx ya Cristu ya guxūma i yaxōgūxūārū āēxgacū íxīcū. ¹⁶ Rū taeru ya Cristuwa nixī i ne naxūxū i tórū pora na naxcèx ímaxūxūcèx. Rū guxāma i yixema rū wūxigu naxmēxwa tangēxmagū. Rū ngēxguma Cristugagu meā wūxigu ípuracūegu rū yigū rūngūxēēgu rū guxūma meāma inixū. Rū ngēmaācū yigū ingechaūgūācūma norū orewa tīyaetanū na dūxwa nūma nanaxwēxexūācūma íxīgūxūcèx.

Maxū i ngexwacaxūxū i Cristugagu tūxū ngēxmaxū

¹⁷ Rū űuxma rū Cristuégagu pexū chaxucuxē na tama nagu pexīxū i ngēma chixexū ga noxri nagu pexīxū ga yexguma tauta Cristuaxū peyaxōgūgu. Rū tama name i nagu pexī i nacūmagū i ngēma duūxūgū i tama Tupanaxū cuēxgūxū i naēchitamare maxēxū. ¹⁸ Erū Chatana rū nanatoōēgū i ngēma duūxūgū, rū ngēmacēx chixexūguxicatama narāxīnūē. Rū nagagugūtama nīxī nataxuma i maxū i taguma gūxū i Tupanawa ne űxū, erū tama nūxū nacuēxgūchaū. ¹⁹ Rū tama naxāneē na űacū rū chixexū na naxūgūxū, rū ngēmacēx nagu naxī rū nūxū namepua i guxūraūxū i chixexūgū na naxūgūxū. ²⁰ Natūrū i pema rū tama ngēmaācū na pemaxēxūcēx nīxī i Cristuaxū peyaxōgūxū. ²¹ Yerū pema rū marū meā nūxū pexīnūē ga Cristuchiga. Rū toxūtawa naxcēx pengūe, rū nūxū pecuēx i norū ore i aixcūma ixīxū na űuxācū Ngechuchu naxwēxexūācūma na pemaxēxū. ²² Rū ngēmacēx name nīxī i nūxū perūxoe i ngēma nuxcūmaūxū i pecūmagū ga űpa nagu pexīxū. Yerū yema nuxcūmaūxū ga perū maxū rū nachixexūchi. Rū pexū napora rū pexū nawomūxēēgū na nagu pexīxūcēx ga yema pexeneārū ngūchaūgū i tama mexū. Natūrū i űuxma rū name nīxī i nūxū perūxoe i guxūma i ngēma. ²³ Rū ngēmacēx i űuxma na Cristuarū duūxūgū pixīgūxū rū name nīxī na Tupanaguxicatama perūxīnūēxū. Rū name nīxī i Tupanana pegū pexāgū na Naāē i űūnexū pewa puracūxūcēx rū na nangexwacaxūxēēāxūcēx i peāē. ²⁴ Rū name nīxī i penayaxu i ngexwacaxūxū i pecūma i Tupana norū ngūchaūmaā pexcēx mexēēxū. Rū ngēma nacūma i ngexwacaxūxū rū perū maxū i mexūwa tá nangox i ngēxguma nagu pexīxgu i ngēma ore i aixcūma ixīxū rū tama nawe perūxīxgu i pexeneārū ngūchaū. ²⁵ Rū ngēmacēx i űuxma na Cristuarū pixīgūxū rū tama name na pidoratēēxgūxū. Natūrū name nīxī i wūxichigū rū tūmamūcūmaā aixcūmaxū tixu. Erū guxāma i yixema rū yigūtanūxū i yaxōgūxū tixīgū. ²⁶ Rū ngēxguma texē űacū peāēwa nguxēēgu rū ipegūna pedaugū na tama pecadu pexūxūcēx! Rū tama name i nagu perūxīnūēēcha natūrū name nīxī i paxa ngēmatama i ngunexūgu nūxū ipeyarūngūma i ngēma naxūpa na yanaxūcuxū ya űēxcū. ²⁷ Rū pegūna pedaugū na tama penaxūchicaxūcēx i Chataná na ngēmaācū nayoxnīēxūcēx rū pemaā inacuāxūcēx. ²⁸ Rū ngēxguma texē petanūwa ngītēxgu ga űpa, rū name nīxī i nūxū tarūxo i ngēma. Rū name nīxī i tūmamēxēmaā meā tapuracū na ngēmaācū tūxū nangēxmaxūcēx i tūmaārū ngēmaxū na űoguāx ya tūxū nataxūémaā tangauxūcēx. ²⁹ Rū tama name i chixexū i oremaā pidexagū. Rū name nīxī i ore i mexūmaā pidexagū na ngēmaācū ngēma duūxūgū i pexū inūēxūxū perūngūxēēgūxūcēx na yexeraācū Tupanaga naxīnūēxūcēx rū nataāēgūxūcēx. ³⁰ Rū pexuāēgū na tama penangechaūxēēxūcēx i Tupanaāē i űūnexū! Erū ngēma Naāē i űūnexū nīxī i Tupana pexna muxū na nūxū pecuāxūcēx na aixcūma norū duūxūgū pixīgūxū űuxmatāta ngēma ngunexū i nagu pexcēx nūma naxūxū ya Cristu. ³¹ Rū nūxū perūxoe na nagu perūxīnūēēchaxū ega texē űacū rū chixexū pemaā űxgux! Rū ngēxgumarūū ta name nīxī na nūxū perūxoexū na aigu perūxīnūēxū, rū ēxna penuēxū, rū ēxna pegū na pengaexū, rū ēxna peguxchigawēxegūxū. Rū ngēmaācū name nīxī na nūxū perūxoexū i guxūma i ngēma chixexū i dexagū. ³² Rū name nīxī i pegū perūngūxēēgū rū pegūmaā pemecūmagū, rū pegūxūl pengechaūtūmūgū i wūxichigū. Rū ngēxguma petanūwa texē űacū rū chixexū pemaā űxgux, rū name nīxī i pegūxū nūxū pengechaūgū i wūxichigū yema na Cristugagu Tupana pexū nūxū nangechaūxūrūū.

5

Name nixī i meā namaxē i Tupanaxācūgū

¹ Rū űuxma rū Tupanaxācūgū ya pexŭ nangechaŭgūxe pixīgū. Rū ngēmācèx name nixī i naxcèx pedau na naxrūŭ meā pemaxèxŭl rū naxrūŭ pimexŭl.

² Rū name nixī i pegū pengechaŭgū yema Cristu tūxŭ na ngechaŭxŭrūŭl. Rū nūma rū taxcèx nūgū inaxā rū taxcèx nayu. Rū yemaācū Tupanaxŭ nataāēxēē yerū yemaācū tūxŭ namaxèxēē.

³ Rū űuxma rū Tupanaārū duŭxŭgū pixīgū. Rū ngēmācèx tama name i naī i ngemaā rū ēxna naī ya yatūmaā na ipexŭŭ. Rū tama name na pexeneārū ngūchaŭwe perūxīxŭ rū ēxna pegūna penanugūchaŭxŭl i űacū i ngēmāxŭgū. Rū ngēmācèx name nixī i nūxŭl perūxoe i guxŭma i ngēma chixexŭgū, rū bai i nachiga na pidexagūmarexŭl.

⁴ Rū tama name i űacū rū ore i āūāchixŭxŭl pixu, rū bai i űacū rū ngeāēxŭmare pixu, rū bai i texèxŭ pecugūcūraxŭl. Erū ngēma ore i chixexŭgū rū taxuwama name. Rū narūmemaē nixī i Tupanana moxē pexāgū.

⁵ Rū aixcūma pemaā nūxŭl chixu rū ngēxguma texē naī i ngemaā rū ēxna naī ya yatūmaā ipexgu, rū ēxna tūmaxŭneārū ngūchaŭ taxŭxgu, rū taxucūrūwama taxāchica i ngextā tōrū Cori ya Cristu rū Tanatŭ ya Tupana āēxgacū űixŭxŭwa. Rū ngēxgumarūŭl ta taxucūrūwama texē ngēma taxāchica ega tūgūna tananugūchaŭxgu i űacū rū ngēmāxŭgū. Erū yīxema ngēma nacūma tūxŭl ngēxmaxē rū dūxwa namaā tatupanaāx i ngēma nacūma i chixexŭl.

⁶ Rū tama naga pexīnūē ega texē űacū rū ore i ngēāēmarexŭmaā pexŭ womūxēēchaŭgu na penaxŭxŭcèx i ngēma chixexŭgū! Erū ngēma chixexŭgūgagu nixī i Tupana tá poraācū napoxcuexŭl i ngēma duŭxŭgū i tama naga űnūxŭl.

⁷ Rū ngēmācèx tama name i ngēma duŭxŭgūmaā pexāmūcūgū na pema rū ta tama penaxŭxŭcèx i ngēma chixexŭgū.

⁸ Rū űpa ga pema rū ēānexŭwa peyexmagū, yerū tama Tupanaxŭ pecuèx rū chixri pemaxē. Natūrū i űuxma na Tupanaxŭ pecuāxŭl rū tōrū Coriarū duŭxŭgū na pixīgūxŭl, rū ngōonexŭwa pengēxmagū. Rū ngēmācèx name nixī i duŭxŭgū i ngōonexŭwa ngēxmagūxŭrūŭl meā na pemaxèxŭl.

⁹ Erū ngēxguma ngōonexŭwa ingēxmagu, rū mexŭ taxŭgū, rū nagu taxī i ore i aixcūma ixīxŭl, rū meā tamaxē.

¹⁰ Rū ngēmācèx name nixī i naxcèx pedau na nagu pexīxŭl i ngēma maxŭl i tōrū Cori namaā taāēxŭl.

¹¹ Rū tama name i pema rū ta penaxŭl i ngēma chixexŭgū i taxuwama mexŭl i ngēma togū i duŭxŭgū i ēānexŭwa ngēxmagūxŭl ŭgūxŭl. Natūrū narūmemaē nixī i penangoxēē na nachixexŭl i ngēma naxŭgūxŭl.

¹² Erū ngēma chixexŭl i cuācūma naxŭgūxŭl i ngēma yatŭgū rū ngexŭgū, rū woo nachiga idexagūmaregu rū wūxi i ānexŭchi nixī.

¹³ Natūrū ngēxguma ngōonexŭl nagu baxigu i űacū rū chixexŭgū rū meā tá nangox na űuxācū nachixexŭl.

¹⁴ Erū guxŭma i űacū i ngēxmaxŭl, rū ngēxguma ngōonexŭwa nangēxmagu, rū meāma nangox na űuxācū yīixŭl. Rū ngēmācèx i Tupanaārū orewa rū űnanagŭrū:

“űNabaixāchi i cuma na cupexŭl! űRū írūda i cuma na icuyarŭtaxuxŭl! űRū nagu rūxīnŭ na űuxācū nachixexŭl i ngēma curū pecadugū! Rū Cristu tá cuxcèx nanangōonexēē rū tá cuxŭ narŭngŭxēē na Tupanaxŭ cu-cuāxŭcèx”,

űnanagŭrū i ngēma ore.

¹⁵ Rū ngēmācèx name nixī i pexuāēgū rū meā pemaxē. Rū tama name i ngēma duŭxŭgū i tama Tupanaārū orexŭl cuèxgūxŭrūŭlācūma na pemaxèxŭl, natūrū name na duŭxŭgū i meā Tupanaga űnūxŭrūŭl meā na pemaxèxŭl.

¹⁶ Rū űuxma na Tupana pexŭl yatauxchaāchixēēxŭl rū űpexaxāēgū na nūxŭl pepuracūexŭl rū penaxŭxŭl i ngēma nūma nanaxwèxexŭl! Erū űnomaŭcūū i duŭxŭgū rū poraācū chixexŭl naxŭgū.

¹⁷ Rū űuxma na ngēmaācū

namaxēxū i togū i duūxūgū, rū tama name na naxrūū pixīgūxū. Rū tama name i duūxūgū i ngēāēmarexūrūū pixīgū. Natūrū name nixī i Tupanaārū orewa pengūe na nūxū pecuáxūcēx i tacū na yīīxū i tōrū Cori pexū naxwēxexū na penaxūxū. ¹⁸ Rū tama name i tacū rū axexū i ngūchixáxūmaā pengāxē, erū ngēma rū chixexū tūxū naxūxēē i ngēxguma ngēmaācū imaxēgu. Natūrū name nixī i Tupanaāē i Ūnēxūna pegū pexāgū na pewa nangēxmaxūcēx rū pemaā inacuáxūcēx. ¹⁹ Rū name nixī i Tupanaārū orechigagu rū norū wiyægūgu pegūmaā pidexagū rū pegūmaā nūxū pixu. Rū name nixī i nagūxūraūxū i norū wiyægūgu pewiyægū, na ngēmaācū guxūne ya perū maxūnemaā tōrū Corixū picuēxūūgūxūcēx. ²⁰ Rū name nixī i guxūguma tōrū Cori ya Ngechuchu ya Cristuégagu moxē nūxna pexāgū ya Tanatū ya Tupana naxcēx i guxūma.

Ñūxācū meā nūgūmaā namaxē i wūxi ya ĩpatacūāx i Cristuaxūl yaxōgūxūl

²¹ Rū ñūxma na Cristumēxēwa pengēxmagūxūl, rū name nixī i pegūga pexīnūē i wūxichigū, erū Cristuxū pengechaūgū rū naga pexīnūē. ²² Rū pemax, Pa Ngexūgūx, rū ngēma tōrū Cori naxwēxexūrūū rū name nixī na petega pexīnūēxū. ²³ Erū nūma ya yatū rū namēxēru nixī, ngēxgumarūū ya Cristu na guxūma i yaxōgūxūru na yīīxū. Rū nūmagū i yaxōgūxū rū Cristuxūne nixīgū rū nūma ya Cristu nixī i norū maxēxēēruū yīīxū. ²⁴ Rū ngēxgumarūū na Cristuga naxīnūēxū i ngēma yaxōgūxūl, rū ngēxgumarūū ta i ngexūgū rū name nixī na guxūguma natega naxīnūēxū. ²⁵ Rū name nixī i namēxū nangechaū ya yatū, yema Cristu guxāma ga yaxōgūxexū na nangechaūxūrūū. Rū yema na tūxū nangechaūxūcēx nixī ga nayuxū ga Cristu. ²⁶ Rū yemaācū nanaxū ga Cristu na nūgūxū tūxū nadexūcēx rū tūxū yaxūūnēxēxūcēx i guxāma i yixema na yaxōgūxūl. Rū norū oremaā rū ngēma dexá i nawa ĩbaiūxūmaā tūxū nimexēē na aixcūma napēxewa imexūcēx. ²⁷ Rū yemaācū tūxū nimexēē na nūgūtama tūxū nawēxūcēx na aixcūma guxūwama imexū rū na nataxuxūma i tacū i tōrū chixexū rū bai i ĩrarūwa i ngēxguma napēxewa ingugūgu. Erū tūxū nade na ixūūnegūxūcēx rū guxūwama imexūcēx i napēxewa. ²⁸ Rū yema Cristu tūxū na ngechaūxūrūū, rū wūxichigū ya yatū rū nanaxwēxe na namēxū nangechaūxū ñoma nūgūxūnēxū na nangechaūxūrūūtama. Rū yixema tūmamēxū ngechaūxē rū tūgūtama nixī i tangechaūxū. ²⁹ Erū tataxuma ya texē ya tūmaxūnechitama aixe, natūrū tanaxūwemū rū meāma nūxna tadau ngēma Cristu guxūma i yaxōgūxūna dauxūrūū. ³⁰ Rū guxāma i yixema na yaxōgūxūl rū Cristutanūxū tixīgū rū ngēmaācū wūxigu namūcūgū tixīgū. Rū nūma nixī i tūxna nadauxū. ³¹ Rū ngēmacēx i Tupanaārū ore i ūmatūxūwa rū ñanagūrū:

“Rū wūxichigū ya yatū rū nanatūna rū naēna tá nixūgachi na namēxmaā inaxūxūcēx. Rū ngēma taxre rū wūxi tátama nixīgū”,

ñanagūrū i ngēma ore. ³² Rū ngēma ore i yatūchiga rū namēxchiga rū wūxi i ore i aixcūma mexū nixī. Natūrū ñūxma na pemaā nūxū chixuxū i ngēma rū Cristuchiga rū yaxōgūxūchiga nixī i chidexaxū. ³³ Natūrū ngēma ore rū pechiga ta nixī. Rū ngēmacēx i wūxichigū i pema i yatūgū rū name nixī i pemēxū na pengechaūxū ngēma pegūtama na pengechaūxūrūū. Rū ngēxgumarūū ta i pema i ngexūgū rū penaxwēxe i petega pexīnūē.

6

¹ Pa Buxūgūx, ñūxma na Cristuarū pixīgūxūl, rū name nixī i penatūga

rü peega pexĩnũe, erũ ngẽma nixĩ i aixcũma mexũ. ²⁻³ Yerũ yema mugũ ga Tupana Moĩchẽna ãxũtanũwa rũ yema mu ga nũxĩra wũxi ga unetamaã Tupana nũxũ ixuxũ, rũ ñanagũrũ:

“¡Rũ tũxũ nangechaũ rũ tũxũ rũngũxẽe ya cunatũ rũ cue na aixcũma cutaãexũcẽx rũ namãxũcẽx i curũ maxũ i ñoma i naãnewa!” ñanagũrũ. ⁴ Rũ pemax, Pa Papãgũ rũ Pa Mamãgũx, rũ tama name i penangamare rũ penanuẽxẽe i pexacũgũ. Rũ name nixĩ i meã penayaexẽe, rũ peyaxucũxẽgũ rũ penangũexẽe na meã tũrũ Coriaxũ yaxũgũãxũcẽx. ⁵ Rũ pemagũ, Pa Duũxũgũ ya Ixããrũ Coriãxgũe, rũ name nixĩ i meã naga pexĩnũe i perũ corigũ i ñoma i naãnewa. Rũ penaxwẽxe i nũxũ pengechaũgũãcũma rũ nũxũ pemuẽãcũma meã naga pexĩnũe ñoma Cristuaxũ pepuracũexũrũ. ⁶ Rũ tama name ega perũ corigũ pexũ dawenũguxicatama meã nũxũ pepuracũe na ngẽmaãcũ pemaã nataãexũcẽx. Natũrũ ñũxma na Cristuarũ duũxũgũ pixĩgũxũ, rũ name nixĩ i guxũma i perũ ngũchaũmaã penaxũ i ngẽma Tupana pexũ naxwẽxexũ. ⁷ Rũ ngẽma puracũ i perũ cori pexna ãxũ, rũ name nixĩ i petaãẽãcũma penaxũ, ñoma tũrũ Cori ya Ngechuchuaxũ pepuracũexũrũ. Erũ aixcũma nũxũ nixĩ i pepuracũexũ rũ tama i duũxũgũxũ. ⁸ Rũ name nixĩ i ngẽmaãcũ meã pepuracũe, erũ nũxũ pecuẽx rũ wũxichigũ i duũxũ rũ woo wũxi i coriarũ duũxũ yixĩgu rũ ẽxna taxũxearũ yixĩgu, natũrũ tũrũ Cori ya Ngechuchu tá nũxũ nanaxũtanũ naxcẽx i ngẽma mexũ i naxũxũ. ⁹ Rũ pemax, Pa Corigũx, rũ name nixĩ i ngẽxgumarũ ta meã namaã pemaxẽ i perũ duũxũgũ. Rũ tama name i tacũ rũ chixexũmaã penaxãũxũne. Rũ nũxna pecuẽxãchie na pema rũ ta perũ duũxũgũrũ tũrũ Cori ya daxũgucũmẽxewa na pengẽxmagũxũ. Rũ aixcũma guxãma i yixema rũ tawũxigu i napẽxewa ya tũrũ Cori ya Cristu.

Cristuarũ duũxũgiarũ poxũrũ i Tupana nũxna ãxũ na nũgũ namaã ñapoxũgũxũcẽx naxchaxwa i Chataná

¹⁰ Rũ ñũxma na tũrũ Corimũcũgũ pixĩgũxũ, Pa Chaueneẽgũx, rũ name nixĩ i pegũ peporaexẽe na penayaxuxũcẽx i ngema pora i nawa ne ũxũ. Erũ nũma rũ naporaxũchi. ¹¹ ¡Rũ pegũ panaxũ i guxũma i ngema poxũrũgũ i Tupana pexna ãxũ na ngẽmamaã pegũ ñepoxũxũcẽx i ngẽxguma Chataná pexũ womũxẽechaũgu! ¹² Erũ tama duũxũgũ i taxrũ ãmachixũ rũ ãchinaxãxũmaã nixĩ i yigũ idaixũ. Natũrũ ngẽma namaã yigũ idaixũ nixĩ i Chatanáãrũ duũxũgũ i ngoxogũ i chixexũgũ i poraxũ. Rũ nũmagũ rũ namuxũchi rũ tũxũ narũporamaẽgũchaũ. Rũ tama nũxũ tadaugũ erũ naãẽgũ nixĩ, natũrũ guxũwama nangẽxmagũ i ñoma i naãnewa. Rũ namaã inacuẽx i ñoma i naãne i chixexũ. ¹³ Rũ ngẽmacẽx name nixĩ i penayauxgũ i guxũma i ngẽma poxũrũgũ i Tupana pexna ãxũ, na ngẽmaãcũ pegũ ñepoxũxũcẽx i ngẽxguma ngẽma naãẽgũ pexũ nachixexẽechaũgu. Rũ ngẽmaãcũ tãũtãma nũxũ penguxũ i ngẽma naãẽgũ i chixexũ rũ tá nũxũ perũporamaẽgũ. ¹⁴ Rũ ngẽmacẽx name nixĩ i mea pegũna pedaugũ na tama perũ uwanũmẽxẽgu peyixũcẽx. Rũ penaxwãe na pixaixcũmagũxũ na taxuwama nachixexũcẽx i perũ maxũ. ¹⁵ Rũ name nixĩ i guxũguma ñpememaregũ na nũxũ peyarũxugũexũcẽx i ngema ore i ngũxmũxẽeruxũ. ¹⁶ Rũ ngema guxũarũ yexera ixĩxũ nixĩ na aixcũma Cristuaxũ peyaxũgũxũ na ngẽmaãcũ pegũ ñepoxũxũcẽx nũxna i Chataná i ãcũmaxũ i namaã tũxũ nachixexẽechaũxũ. ¹⁷ Rũ name nixĩ i penayaxu i ngema maxũ i taguma gũxũ na ngemamaã pegũ ñepoxũxũcẽx ñoma wũxi i churara i napatẽxemaã nũgũ ñpoxũxũrũxũ. Rũ ngema Tupanaarũ Ore i Naãe i Üunexũ pexna ãxũ, rũ ngema nixĩ i pexne ixĩxũ. ¹⁸ Rũ tama name i

nūxū perūchaue na peyumūxēgūxū. Natūrū name nixī i guxūguma Tupanaāē i Ūünexūārū ngūxēēmaā Tupanaxū pecèxū. Rū penaxwae i pexuāē na taguma nūxū perūxoexūcèx. Rū ngemaācū name nixī i naxcèx peyumūxēgū i guxūma i Tupanaarū duūxūgū. ¹⁹Rū ngēxgumarū ta chanaxwèxe i chauxcèx peyumūxēgū na Tupana choxū rüngūxēēxūcèx rü choxna naxāāxūcèx i ngēma ore i nūma nanaxwèxexū na nūxū chixuxū. Rū chanaxwèxe i Tupanana naxcèx peca na choxū naporaxēēxūcèx na tama chamuūācūma nūxū chixuxūcèx rü mea chanangoxēēxūcèx i ngema norū ore i Cristuchiga ga noxri exūguxū i ñuxma maxū tūxna āxū. ²⁰Rū ngēma orexū na chixuxūcèx nixī ga Tupana nūgūchicū choxū inamuxū. Rū ngēmagagu nixī i chapoxcuxū i ñuxmax. Rū chanaxwèxe i chauxcèx peyumūxēgū na tama chamuūācūma meāma nūma nanaxwèxexūācūma nūxū chixuxūcèx i ngēma norū ore.

Pauru nanaguxēē ga norū popera rü wenaxārū yema duūxūgūxū narūmoxē

²¹Rū taeneē ya nūxū ingechaūcū ya Tiquicu, rü chauxrū aixcūma meāma napuracū i tórū Coriarū puracūwa. Rū nūma tá pemaā nūxū nixu i guxūma i chauchiga na ñuxācū choxū naxūpetūxū i nuā. ²²Rū ngēmacèx nixī i pexūtawa chanamuxū, na pemaā nūxū yaxuxūcèx na ñuxācū toxū naxūpetūxū, na ngēmaācū pexū nataāēxēēxūcèx. ²³Pa Toeneēgū i Yaxōgūxūx, chanaxwèxe i Tanatū ya Tupana rü tórū Cori ya Ngechuchu ya Cristu pexū narū-ngūxēēgū i guxāma i pema na meā pegūmaā pemaxēxūcèx, rü aixcūma petaāēgūxūcèx, rü pegū pengechaūgūxūcèx rü meā peyaxōgūxūcèx. ²⁴Rū chanaxwèxe i Tanatū ya Tupana nūxū narūngūxēē i guxūma i ngēma duūxūgū i aixcūmaxūchi tórū Cori ya Ngechuchu ya Cristuxū ngechaūgūxū. Rū ngēmaācū yīi.

Rü nuāma pexna,
Pauru

POPERA GA PIRIPUWA YEXMAGŪXŪ GA YAXŌGŪXŪTANŪWA NAMUXŪ GA PAURU

Pauru rü nüxŭ narümoxē ga yema yaxŏgŭxŭ ga Piripuwa yexmagŭxŭ

¹ Pa Toeneēgŭ ya Piripuwa Ngēxmagŭxex, choma i Pauru rü namaā i taeneē i Timutéu nixŭ i pexcēx tanaxŭmatŭxŭ i űaā popera. Rü toma rü Ngechuchu ya Cristuarŭ puracŭtanŭxŭ tixŭgŭ. Rü pexcēx tanaxŭmatŭ i pema i yaxŏgŭxŭārŭ āēxgacŭgŭ na pixŭgŭxŭ, rü pema i tupaucawa ngŭxēētaeruŭgŭ na pixŭgŭxŭ, rü guxāma i pema i Ngechuchu ya Cristuaxŭ yaxŏgŭxe. ² Rü chanaxwēxe i Tanatŭ ya Tupana rü tŏrŭ Cori ya Ngechuchu ya Cristu poraācŭ pexŭ narŭngŭxēē rü pexŭ nataāēxē.

Pauru rü yema yaxŏgŭxŭcēx nayumŭxē

³ Rü guxŭguma i ngēxguma pexna chacuēxāchigu rü Tupanana moxē chaxā i pexcēx. ⁴ Rü ngēxguma chayumŭxēgux, rü guxŭguma chataāēācŭma pexcēx chayumŭxē i guxāma i pemax. ⁵ Erŭ pema rü noxritama Tupanaārŭ orexŭ pexŭnŭēgumama rü poraācŭ choxŭ perŭngŭxēē na nüxŭ chixuxŭcēx i norŭ ore i mexŭ. Rü űuxma rü ta choxŭ perŭngŭxēēgŭecha. ⁶ Rü Tupana rü marŭ inanaxŭgŭ i wŭxi i mexŭ i puracŭ i perŭ maxŭwa. Rü nüxŭ chacuēx rü nŭma rü guxŭgutāma nanaxŭecha i ngēma puracŭ űuxmatāta yanguxēēā i ngēxguma űnanguxgu ya Ngechuchu ya Cristu. ⁷ Rü aixcŭma name na ngēmaācŭ pemaā nagu charŭxŭnŭxŭ, erŭ poraācŭ pexŭ changechaŭ rü aixcŭma Tupana wāixgu tŭxŭ narŭngŭxēē i guxāma i yixema. Rü woo űuxma na chapoxcuxŭ rü ēxna ega āēxgacŭgŭpēxewa choxŭ nagagŭgu, rü Tupana choxŭ narŭngŭxēē i ngēxguma norŭ ore i mexŭtŭwa chideaxgu rü namaā nüxŭ chixuxgu i āēxgacŭgŭ na aixcŭma yŭxŭ i ngēma orewa nüxŭ iyarŭngauxŭ i tŏrŭ maxŭ i taguma gŭxŭ. Rü nüxŭ chacuēx rü ngēma choxŭ nangŭxēēxŭācŭma, rü pexŭ rü ta narŭngŭxēē. ⁸ Rü Tupana nüxŭ nacuēx na űuxācŭ poraācŭ pexŭ chadauxchaŭxŭ rü pexŭ na changechaŭxŭ i guxāma i pemax, ngēma Ngechuchu ya Cristu pexŭ na ngechaŭxŭrŭ. ⁹ Rü chorŭ yumŭxēwa naxcēx űchaca na yexeraācŭ pegŭ pengechaŭgŭxŭcēx rü Tupanaxŭ pengechaŭgŭxŭcēx. Rü naxcēx űchaca na yexeraācŭ nüxŭ pecuāxŭcēx i guxŭma i Tupanachiga rü yexeraācŭ nüxŭ pecuāxŭcēx na űuxācŭ nanaxwēxexŭ na naxcēx pemaxēxŭ. ¹⁰ Rü ngēmaācŭ pexcēx chayumŭxē erŭ chanaxwēxe na meā penangugŭxŭ i űacŭ nixŭ i aixcŭma mexŭ i Tupanapēxewa na penaxŭxŭcēx i ngēma. Rü chanaxwēxe na aixcŭma namexŭ i perŭ maxŭ na taxucēxma űacŭcēx Tupana pexna çaxŭcēx i ngēxguma űnanguxgu ya Cristu. ¹¹ Rü naxcēx űchaca na Ngechuchu ya Cristu pexŭ narŭngŭxēēxŭ na aixcŭma namexŭcēx i perŭ maxŭ rü aixcŭma penaxŭxŭcēx i ngēma Tupanapēxewa mexŭ na ngēmaācŭ meā pemaxēācŭma Tupanaxŭ picuēxŭgŭxŭcēx.

Chauxcēx rü Cristuarŭ ngŭchaŭ na chaxŭxŭcēx nixŭ i chamaxŭxŭ

¹² Pa Chaueneēgŭx, rü chanaxwēxe i nüxŭ pecuēx rü guxŭma i ngēma choxŭ űpetŭxŭ, rü aixcŭma ngēmaācŭ choxŭ naxŭpetŭ na yexeraācŭ nat-achixagŭxŭcēx i Tupanaārŭ ore i mexŭ. ¹³ Rü űuxma i nŭma rü guxŭma i churaragŭ i āēxgacŭpataarŭ dauruŭgŭ rü guxŭma i togŭ rü ta nüxŭ nacuēxgu na chapoxcuxŭ naxcēx na Cristuarŭ duŭxŭ chiŭxŭ. ¹⁴ Rü űuxma

na chapoxcuxū rū muxūma i taeneēgū i yaxōgūxū rū tama namuūēācūma nūxū nangūchaū na nūxū yaxugūexū i Tupanaārū ore i mexū. Rū yexeraācū tōrū Coriaxū nayaxōgū. ¹⁵ Rū aixcūma nixī i űuxre i duūxūgū rū togūxū na yaxāūxāchixēēxūcēxmāre nūxū nixugūexū i Cristuchiga, erū togūxū narūyexerachaū. Natūrū nangēxma i togū i duūxūgū i aixcūma mexūgu naxīnūēācūma meā nūxū ixugūexū i ngēma ore. ¹⁶ Rū űuxre i duūxūgū rū Cristuchigaxū nixugūe erū choxū nangechaūgū rū nūxū nacuēxgū na Tupana nuxma choxū muxū na íchanapoxūxūcēx i norū ore i mexū. ¹⁷ Natūrū nangēxma i togū i noxrūtama ngūchaūcēx daugūxū rū ngēmacēx nūxū ixugūexū i ngēma ore. Rū nūmagū rū tama mexūgu narūxīnūē, natūrū naxcēx nadaugū na yexeraācū choxū naguxchaxēēgūāxū i űuxma na chapoxcuxū. ¹⁸⁻¹⁹ Natūrū nūetama nixī ega woo ngēmaācū yixīgu. Erū woo mexū i norū ngūchaūmaā yixīgu rū ēxna tama, natūrū Cristuchigaxū nixugūe. Rū ngēma rū wūxi i taēē nixī i chauxcēx. Rū guxūgutāma chataāēēcha erū nūxū chacuēx rū guxūma i ngēma rū chorū mexūcēx tá nixī erū chauxcēx peyumūxēgū rū choxū narūngūxēē i Tupanaāē i Ūūnexū i Ngechuchu ya Cristuxū rūngūxēēxū. ²⁰ Rū ngēma poraācū chanaxwēxexū nixī na taguma űacū rū chixexū chaxūxū na taxucēxma chaugūcēx chaxānēxūcēx. Rū chanaxwēxe i guxūguma íchamemare na guxāpēxewa tama chamuūācūma Cristuchigaxū chixuxū. Rū űuxma na chamaxūxū rū woo chayūxgu rū chanaxwāe i guxūguma aixrūgumarūūtama chaugagu Cristuxū nicuēxūūgū i duūxūgū. ²¹ Erū chauxcēx rū Cristuarū ngūchaū na chaxūxūcēx nixī i na chamaxūxū. Natūrū ngēxguma chayūxgux rū ngēma rū ta name, erū Cristuxūtawa tá changēxma i ngēxguma. ²² Natūrū tama nūxū chacuēx i űacū nixī i rūmemaēxū i chauxcēx, ngēma na chayūxū rū ēxna na chamaxūxū.. Erū űuxma na chamaxūxū rū choxū natauxcha na chanaxūxū i tōrū Coriarū puracū. ²³ Rū ngēmacēx tama nūxū chacuēx na űacū yīxū i chauxcēx rūmemaēxū i ngēma taxrewa. Erū űuxguacū rū chanaxwēxe na chayuxū na Cristuxūtawa changēxmaxūcēx. Rū ngēma nixī i aixcūma yexera rūmemaēxū i chauxcēx. ²⁴ Natūrū i pexcēx rū nāgu charūxīnū rū narūmemaē nixī na űoma i chaxunemaātama na chamaxūxū na ngēmaācū pexū charūngūxēēxūcēx. ²⁵ Rū űuxma na aixcūma meā nūxū chacuēx na pechoxwēxexū, rū ngēmawa nūxū chacuēx na tāūtāma paxa chayuxū. Rū ngēmaācū tá chamaxāma na pexū charūngūxēēxūcēx na yexeraācū Cristucēx pemaxēxūcēx rū yexeraācū taāēācūma nūxū peyaxōgūxūcēx. ²⁶ Rū ngēmaācū wena táxarū petanūwa changēxma. Rū ngēxguma wena choxū pedaugūgu rū aixcūma tá petaāēgū erū tá pexū nangēxma na űacūcēx Ngechuchu ya Cristuxū picuēxūūgūxū. ²⁷ Rū ngēma guxūārū yexera rūmemaēxū nixī na naxcēx pedauxū na meā pemaxēxū, ngēma Cristuarū ore pemaā nūxū ixuxūrū. Rū ngēxguma petanūwa chaxūxgu rū ēxna woo tama ngēma chaxūxgu, natūrū nūxū chaxīnūchaū na guxāma wūxigu pegū peporaexēēxū na taguma nūxū perūchaxūcēx na aixcūma peyaxōgūxū, rū ngēmaācū Tupanaāxū pepuracūexū na yexeraācū yaxūchigūxūcēx i norū ore i mexū. ²⁸ Rū ngēmacēx penaxwēxe i tama taxēxū pemuūēācūma nūxū pixugūama i ngēma ore. Rū ngēma na tama nūxū pemuūēxū rū ngēma rū wūxi i cuēxruū tá nixī nūxū i perū uwanūgū. Rū ngēmawa tá nūxū nacuēxgū na poxcuwa tá naxīxū i nūmagū natūrū pema rū tá maxūwa na pexīxū. Rū Tupana tá nixī ya pexū rūngūxēēcū na tama nūxū pemuūēxūcēx i ngēma perū uwanūgū. ²⁹ Rū Tupanaga nixī na Cristuaxū peyaxōgūxū. Rū ngēxgumarūūt ta naga nixī na Cristucēx ngūxū pingēgūxū. Rū

ngēma rū wūxi i ngūxēē nixī i pexna naxāxū ya Tupana. ³⁰ Pema rū choma rū wūxigu Tupanaārū puracūwa tangēxmagū, rū tanaxūama i ngēma puracū ega woo texé tūxū naguxchaxēēgux. Rū ūpa rū marū choxū pedau na űuxācū meā chanaxūxū i ngēma puracū, rū űuxma rū ta nūxū picuāchiga na űuxācū chanaxūamaxū woo namu i chorū guxchaxūgū.

2

Cristu rū űoma taxuūma yīxūrūū nūgū nixīxēē rū yemacēx ga Tupana rū guxūārū āēxgacūxū nayaxīxēē

¹ Rū dūcax, Pa Chaueneēgūx, rū űuxma na Cristuarū duūxūgū pixīgūxū, ĵrū aixcūma yīxū i nūma pexū nataāēxēēxū? ĵRū aixcūma yīxū i petaāēgūxū erū nūma pexū nangechaū? ĵRū aixcūma yīxū i Tupanaāē i Ūūnexū pexūtawa ngēxmaxū? ĵRū aixcūma yīxū i pegū pengechaūgūxū rū pegūxū pengechaūtūmūūgūxū? ² Rū ngēxguma chi ngēmaācū yixīgu, rū chanaxwēxe i guxāma wūxigu perūxīnūē, rū aixcūma guxāma pegū pengechaūgū, rū aixcūma guxāma űoma wūxitama piūxūrūū na yīxū i peāē, rū guxāma wūxitama i ngūchaūcēx pedau. Rū ngēxguma ngēmaācū pemaxēgu rū wūxi i chorū taāē tá nixī. ³ Rū tama name na togūarū yexera pegū pixīgūxēēxū rū pegū picuēxūūgūxū. Natūrū narūmemae nixī i nagu perūxīnūēxū na ngema togū rū perū yexera nūxū nacuēgūxū. ⁴ ĵRū tama pegūguxicatama perūxīnūē, natūrū pegū peporaexēē na togūxū perūngūxēēgūxūcēx! ⁵ Rū name nixī ga yema Ngechuchu ya Cristu nagu rūxīnūxūgu na perūxīnūēxū i pemax. ⁶ Yerū nūma rū woo ga Tupanaxūchi na yīxū, natūrū tama nūgū nicuēxūxū na Tupana yixīxū. ⁷⁻⁸ Rū yemacēx yēma nanatēx ga norū mexūgū ga daxūgūxū ga naānewa. Rū wūxi i duūxū i togūaxū puracūxūrūū nūgū nixīxēē. Rū űoma wūxi i duūxūrūū űoma ga naānegu nabu. Rū yexguma marū duūxū yixīgu ga nūmax, rū űoma taxuūma yīxūrūū nūgū nixīxēē. Rū Tupanaga naxīnū, rū yemaācū curuchagu nayu woo wūxi ga ānexūchi na yīxū ga yema. ⁹ Rū yemacēx ga Tupana rū guxūētūwa nanangexmaxēē rū nayangucuchixēē na guxūma i āēxgacūgūētūwa nangēxmaxūcēx. ¹⁰ Rū yemaācū nanaxū ga Tupana na Ngechuchupēxegu tacaxāpūxūgūxūcēx rū nūxū ticuēxūūgūxūcēx ya guxāma ya texé ya daxūgūxū i naānewa ngēxmagūxe, rū guxāma i űoma i naānewa ngēxmagūxe, rū guxāma ya texé ya marū yuexe. ¹¹ Rū yemaācū Tupana āēxgacūxū nayaxīxēē na guxāma nūxū ixuxūcēx na tōrū Cori yīxū ya Ngechuchu ya Cristu rū ngēmaācū nūxū icuēxūūgūxūcēx ya Tanatū ya Tupana.

Cristuarū duūxūgū rū űoma omūgūrūū nixīgū i natanūwa i ngēma duūxūgū i tama yaxōgūxū

¹² Rū űuxma na nūxū pecuāxū na űuxācū Nanatūga naxīnūxū ga Cristu, rū chanaxwēxe i chauga pexīnūē, Pa Chaueneēgū ya Pexū Changechaūgūxe. Rū yēma petanūwa chayexmagu chauga na pexīnūēxūārū yexera chanaxwēxe i chauga pexīnūē i űuxma na tama petanūwa changēxmaxū. Rū chanaxwēxe i Tupanaxū pemuētēācūma naxcēx pedaugūama i perū maxū i taguma gūxū. ¹³ Erū Tupana nixī ya perū maxūwa puracūcū na mexūgu perūxīnūēxūcēx. Rū nūma nixī i pexū nangūxēēxū na naga pexīnūēxūcēx rū peyanguxēēxūcēx i ngema norū ngūchaxū. ¹⁴ ĵRū guxūma i ngema Tupanacēx pexūxūwa rū tama name i oōcū penaxū rū pegū naxcēx pechoxūgagū! ¹⁵⁻¹⁶ Rū name i ngēmaācū meā pemaxē na taxūema tacū rū chixexūxū pewa iyangauxūcēx.

Rū penaxwèxe i mexŭ i Tupanaxācūgū pixīgū i natanūwa i ngēma duŭxūgū i chixexŭ rū chixēāēgūmarexŭ. Rū ngēxguma ngēma duŭxūgūmaā nūxŭ pixugūyane i ngēma ore i mexŭ i tūxŭ maxēxēēxŭ, rū yoxni natanūwa rū ņōma woramacurīgū ya ēānēxŭwa ibāixgūcūrūŭ tā pixīgū. Rū ngēmaācū i ngēxguma wena nūma naxūxgu ya Cristu rū poraācū tā pemaā chataāē erū tā nūxŭ chadāu na tama natūcēxmamare yīxŭ ga yema puracū ga petanūwa chaxūxŭ. ¹⁷ Rū ngēma ņuxma na meā peyaxōgūxŭ, rū ngēma nixī i perū āmare i Tupanana pexāxŭ. Rū ngēma na meā yanguxūcēx i ngēma perū āmare i Tupanapēxewa, rū choma rū ichamemare na Tupanacēx ichanaxāxŭ i chorū maxŭ rū chayuxŭ. Rū ngēmacēx woo chayuxgu rū wūxi i taāē tā nixī i chauxcēx. Rū chanaxwèxe i pemagū rū ta ngēmacēx wūxigu chomaā petaāēgū. ¹⁸ Rū ngēmacēx ega ngēma ore i mexūcēx chayuxgux, rū tama name na pengechaŭgūxŭ natūrū chanaxwèxe na wūxigu chomaā petaāēgūxŭ.

Timutéu rū Epaporu- dītuchiga

¹⁹ Rū ngēxguma tōrū Cori ya Ngechuchu naxwèxegu rū paxa petanūwa chanamuega ya taeneē ya Timutéu na pexŭ na iyadauxūcēx rū chataāēxūcēx i ngēxguma nūma nangeāgu i pechiga. ²⁰ Rū aixcūma nataxuma i to i chorū ngūxēēruŭ i choma nagu charūxīnūxŭgū rūxīnūxŭ, rū Timutéuxicatama nixī. Rū nataxuma i to i naxrūŭ aixcūma pegu rūxīnūxŭ rū pexŭ rūngūxēēchaŭxŭ. ²¹ Erū guxūma i togū rū naxcēx nadaugū i noxrūtama ngūchaŭgū, rū tama aixcūma nagu narūxīnūē i ngēma Ngechuchu ya Cristuarū ngūchaŭ. ²² Natūrū i pema rū marū nūxŭ pecuē na ņūxācū meā namaxūxŭ i Timutéu, rū ņūxācū choxŭ nangūxēēxŭ i Tupanaārū orearū uchigawa, ņōma wūxi i buxŭ i nanatūxŭ rūngūxēēxŭrūŭ. ²³ Rū ngēmacēx i ngēxguma nūxŭ chacuēxgu na ņūxācū tā choxŭ na naxūpetūxŭ i nūma, rū ņūxūchi ngēma petanūwa chanamuxchaŭ i Timutéu na pexŭ iyadauxūcēx. ²⁴ Rū ngēxgumarūŭ ta nagu charūxīnū rū tōrū Cori rū aixcūma tā choxŭ narūngūxēē na chomatama ngēma petanūwa ichayadauxūcēx. ²⁵ Rū ngēxgumarūŭ ta chauxcēx name nixī i ngēma petanūwa chanamuxŭ i taeneē i Epaporudītu. Rū nūma nixī ga pematama chauxcēx nūma penamuxŭ na choxŭ nangūxēēxūcēx. Rū nūma rū chomūcū nixī i Tupanaārū puracūwa, rū poraācū choxŭ narūngūxēē i Tupanaārū orearū uwa. ²⁶ Rū poraācū nūxŭ nangūchaŭ na pexŭ iyadauxŭ i guxāma i pemax. Rū poraācū naxoegaāē, yerū pema rū nūxŭ pecuāchiga ga na yadaawexŭ ga nūmax. ²⁷ Rū aixcūma nixī ga na yadaawexŭ, rū wixguxūchi taēx nayu. Natūrū Tupanaāxŭ nangechaŭtūmūŭ rū choma rū ta nūxŭ changechaŭtūmūŭ, rū yemacēx naxcēx nayataanēxēē na tama yexeraācū changechaŭxūcēx. ²⁸ Rū ngēmacēx rū yexeraācū chanaxwèxe na paxa petanūwa chanamuxŭ i Epaporudītu, na pema rū petaāēgūxūcēx i ngēxguma wena nūxŭ pedaugūgu. Rū ngēxguma i choma rū tā ta chataāē i ngēxguma nūxŭ chacuēxgu na petanūwa nangēxmaxŭ na pexŭ nangūxēēxūcēx. ²⁹ Rū chanaxwèxe i tōrū Coriēgagu petaāēgūācūma meā penayaxu erū peeneē nixī. Rū name nixī i nūxŭ pengechaŭgū i guxūma i ngēma duŭxūgū i Epaporudīturūŭ ixīgūxŭ. ³⁰ Yerū nūma ga Epaporudītu rū yema na poraācū nawa napuracūxŭ ga Cristuarū puracū, rū yemacēx wixguxūchi taēx nayu. Rū āucūmaxŭta nūgū nayexmaxēē na pechicūŭ choxŭ nangūxēēxūcēx.

3

Ngēma na Cristuxŭ icuāxŭ rū ngēma nixī i guxŭārū yexera rūmemaēxŭ

1 Rū ñuxma Pa Chaueneëgüx, rü chanaxwëxe i petaãëgü erü tórü Coriarü duüxügü pixigü. Rü yema ore ga noxri pexcëx chaxümatüxü rü tama choxü nawëxtümüü na wena pexcëx chanaxümatüxü erü aixcüma pexü name i ngëma ore. 2 jRü pegüna pedëux nüxna i ngëma duüxügü i chixiri maxëxü rü chixexümaã pexü ixucuxëgüxü! Rü nümagü nixi i nüxü yaxugüexü rü ngëxguma tama yigü iwiechëxmüpëxechiraügu, rü taxucürüwama Tupanapëxewa time. 3 Natürü yixema aixcüma Tupanapëxewa imexë, rü yixema tixigü. Rü Tupanaxü ticuëxüügü i Naãë i Üünexüärü ngüxëemaã. Rü tataãëgü erü Ngechuchu ya Cristuarü duüxügü tixigü. Rü tama tayaxögü na ngëma yigü iwiechëxmüpëxechiraüxüxcëx Tupanapëxewa imexü. 4 Rü choma chi waxi nixi i guxü i togüarü yexera chayaxöxü i ngëma wiechëxmüpëxechiraüchiga. Rü tataxu chima ya togue ya texë chauxrüü yaxöxë i ngëmachiga. 5 Yerü yexguma 8 ga ngunexü chauëtü yixigü ga na chabuxü, rü choxü ínawiechëxmüpëxechiraügü, erü Yudíu chixi. Rü Beyamítanüxü chixi. Rü chaunatü rü chaué rü Yudíugü tixigü, rü ngëmacëx i choma rü Yudíuxüchi chixi. Rü choma rü Parichéuchirëx chixi, rü pema nüxü pecuëx rü ngëma Parichëgü rü meãma nanaxaure i Tupanaãrü mugü ga Moíché ümatüxü. 6 Rü yema na meã chayanguxëëchaüxüxcëx ga yema mugü ga Moíché ümatüxü, rü yemacëx nawe chingëchigü ga yema duüxügü ga Ngechuchuaxü yaxögüxü. Rü yema na aixcüma meã chanaxaurexüxcëx ga yema mugü ga Moíché ümatüxü, rü yemacëx taxucürüwama texë chauchi-gaxü tixu ga tama na chaxaurexü. 7 Natürü guxüma ga yema üpa chauxcëx mexü, rü ñuxma rü taxuwama choxü name erü marü íchanatëx na Cristu-axüxícatama chayaxöxüxcëx. 8 Rü ñuxma na Ngechuchu ya Cristu ya chorü Corixü na chacuáxü, rü chauxcëx rü guxüma ga yema üpa nagu chixüxü rü taxuwama name, erü ngëma na Cristuxü na chacuáxü rü guxüärü yexera narümemaë. Rü guxüma ga yema mugü ga noxri nagu chixüxü rü marü nüxü charüxo na Cristuwe charüxüxüxcëx. Rü chauxcëx rü ñoma guxchirerüü nixi ga yema üpa nagu chixüxü ega Cristumaã nügü chananguxgü. 9 Rü yemaãcü nüxü charüxo ga guxüma nagagu ga yema na Cristuarü duüxü na chiixüxcëx. Rü ñuxma rü Tupanapëxewa chame erü Cristuaxü chayaxö. Rü tama ngëma na chamecümaxüxcëx rü ëxna mugü chaxaurexüxcëx nixi na chamexü i napëxewa. Natürü ngëma na Cristuaxü chayaxöxüxcëx nixi i nügüxcëx choxü namexëëxü ya Tupana. 10-11 Rü ngëma ñuxma chanaxwëxexü nixi na aixcüma Cristuxü chacuáxü rü chowa na nangëxmaxü i ngëma pora ga wena Cristuxü írüdaxëëxü i ñuxma nüxü ngëxmaxü. Rü yema ngüxü na yangexü ga nüma rü na nayuxü rü ngëxgumarüütama chanaxwëxe i íchamemare na naxcëx ngüxü chingexü rü naxcëx chayuxü na yixcama choma rü ta yuwa ícharüdaxüxcëx.

Pauru naxcëx nadau na Cristucëx namaxüxü ñuxmatáta Tupanax-ütawa nangu

12 Rü ñuxma na ngëma ñachaxü pemaã rü tama chanaxwëxe i nagu perüxñüë na guxüxü chacuáxü i Cristuchiga, rü ëxna guxüwama na chamexü. Natürü guxü i ngunexügu rü naxcëx chadauama na Ngechuchu ya Cristuarü ngüchaü na chaxüxüxcëx, yerü yemacëx nixi ga nüma ga chauxcëx nadauxü ga noxrix. 13 Pa Chaueneëgüx, pemaã nüxü chixu rü chomatama meãma nüxü chacuëx rü ñuxma rü ta tautama nawa changu i ngëma naxcëx chadauxü. Natürü i ñuxma rü marü nüxü icharüngüma i guxüma ga yema noxri nagu chixüxü. Rü ñuxma rü chaugü chaporaxëë na aixcüma Cristucëx na chamaxüxü na nawa changuxüxcëx i ngëma maxü i chopëxewaama

ngēxmaxŭ. ¹⁴ Rŭ ngēmacèx i ñuxma rŭ naxcèx chadau na aixcŭma Cristucèx chamaxŭxŭ ñuxmatáta Tupanaxŭtawa changu. Erŭ chanayauxchaŭ i ngēma āmare i nŭma daxŭguxŭ i naānewa naxcèx taxcèx nangemaxŭ i yixema na Ngechuchu ya Cristuarŭ duŭxŭgŭ ixŭgŭxŭ. ¹⁵ Rŭ guxāma i yixema na aixcŭma Cristuaxŭ yaxŭgŭxŭ, rŭ name nixŭ i ngēmaācŭ nagu tarŭxŭnŭē. Natŭrŭ ngēxguma chi texē i petanŭwa toguama tarŭxŭnŭgu, rŭ Tupana tá tŭxŭ nŭxŭ nacuèxēē i ngēma nŭma nanaxwèxexŭ na nŭxŭ tacuáxŭ. ¹⁶ Rŭ ngēma inaxwèxexŭ nixŭ na aixcŭma naga ixŭnŭēēchaxŭ rŭ meāma nagu ixŭxŭ i ngēma ore i marŭ nŭxŭ icuáxŭ. ¹⁷ Pa Chaueneēgŭx, chanaxwèxe i chauxrŭŭ nagu pexŭ i ngēma pexŭ nŭxŭ chadauxēēxŭ na namexŭ. ¡Rŭ penangugŭ na ñuxācŭ meā namaxēxŭ i ngēma togŭ i duŭxŭgŭ i toma tamaxēxŭācŭma maxēxŭ! ¹⁸ Rŭ marŭ muēxpŭxcŭna pemaā nŭxŭ chixu, rŭ ñuxma rŭ changechaŭācŭma rŭ chaxauxācŭma wena pemaā nŭxŭ chixu rŭ nangēxma i muxŭma i duŭxŭgŭ i Cristuarŭ uwanŭrŭūācŭma maxēxŭ. Rŭ nŭmagŭ rŭ tama nŭxŭ nacuèxgŭchaŭ na Cristu curuchagu naxcèx yuxŭ. ¹⁹ Natŭrŭ ngēma duŭxŭgŭ rŭ tá dŭxwa Tupana nanapoxcue. Rŭ ngēma naxŭneārŭ ngŭchaŭ nixŭ i namaā natupanaāxŭ. Rŭ woo nŭxŭ nacuèxchirēx na wŭxi i āne na yŭxŭ i ngēma chixexŭ natŭrŭ namaā nataēgŭama. Rŭ ñoma i naāneārŭ ngēmaxŭguxicatama narŭxŭnŭē. ²⁰ Natŭrŭ i yixema rŭ daxŭguxŭ i naānewa tŭxŭ nangēxma i tachica. Rŭ itananguxēē na daxŭguxŭ i naānewa taxcèx ne naxŭxŭ ya tŭrŭ Cori ya Ngechuchu ya Cristu ya tŭrŭ Maxēxēerŭŭ. ²¹ Rŭ ñaā taxŭne i yuxwèxexŭ rŭ nŭma ya Cristu tá nanaxŭchicŭŭ na naxŭne i mexēchixŭrŭŭ yŭxŭcèx. Rŭ ngēma norŭ pora i namaā guxŭtŭwa nangēxmaxŭ, rŭ ngēmamaātama tá nanaxŭchicŭŭ i taxŭne na noxrŭrŭŭ yŭxŭcèx.

4

Ñuxma na tŭrŭ Coriarŭ ixŭgŭxŭ rŭ name nixŭ na guxŭguma namaā itaēgŭxŭ

¹ Pa Chaueneēgŭx, rŭ pexŭ changechaxŭ rŭ poraācŭ pexŭ íchayadauxchaxŭ. Rŭ ngēma pemaā nŭxŭ chixuxŭrŭŭ chanaxwèxe i meā tŭrŭ Coricèx pemaxē erŭ pema nixŭ i chorŭ taāē rŭ chorŭ āmare i Tupana choxna āxŭ pixŭgŭxŭ. ² Rŭ nŭxŭ chacèxŭ i taeyèxgŭ i Ebódia rŭ Chitique na nŭgŭmaā nangŭxmŭēxŭcèx, erŭ nŭmagŭ rŭ tŭrŭ Corixacŭgŭ nixŭgŭ. ³ Rŭ cumax, Pa Chomŭcŭ ya Mecŭ i Wŭxigu Tupanaārŭ Puracŭwa Chomaā Puracŭcŭx, rŭ cuxna naxcèx chaca na nŭxŭ curŭngŭxēēxŭcèx i ngēma taxre i taeyèxgŭ, erŭ nŭmagŭ rŭ wŭxigu chomaā rŭ Cremetemaā rŭ ngēma togŭ i chomŭcŭgŭ i Tupanaārŭ poperawa marŭ ngoxégagŭxŭmaā napuracŭe i Tupanaārŭ orearŭ uwa. ⁴ Rŭ ñuxma na tŭrŭ Coriarŭ pixŭgŭxŭ, Pa Chaueneēgŭx, rŭ name nixŭ i guxŭguma namaā petaāēgŭ. Rŭ wena pemaā nŭxŭ chixu, rŭ ¡petaāēgŭ! ⁵ Rŭ chanaxwèxe i meā pemaxē na guxŭma i duŭxŭgŭ pexŭ nacuèxgŭxŭcèx na aixcŭma mexŭ i duŭxŭgŭ na pixŭgŭxŭ. ¡Rŭ nŭxna pecuēxāchie na tŭrŭ Cori rŭ paxa tá nataeguxŭ na nŭma naxŭxŭ! ⁶ ¡Rŭ taxucèxma penaxŭxāchiāēgŭ! ¡Rŭ Tupana-maā nŭxŭ pixu i perŭ yumŭxēwa i guxŭma i tacŭ i pexŭ ngupetŭxŭ! ¡Rŭ naxcèx ípeca rŭ moxē nŭxna pexā! ⁷ Rŭ ngēmaācŭ i nŭma ya Tupana rŭ tá pexŭ nataāēxēē namaā i wŭxi i taāē i mexēchixŭ i guxŭma i taāē i nŭxŭ icuáxŭārŭ yexera mexēchixŭ. Rŭ ñuxma na Ngechuchu ya Cristuarŭ duŭxŭgŭ pixŭgŭxŭ, rŭ ngēma taāē i Tupana pexna āxŭ rŭ tá nŭxna pexŭ ínapoxŭ i ngēma chixexŭ i nagu perŭxŭnŭēchaxŭ.

Name nixŭ i nagu tarŭxŭnŭē i guxŭma i tacŭ i aixcŭma mexŭ ixŭxŭ

⁸ Rū űuxma Pa Chaueneġgux, rū name nixġ i nagu peruxġnġē i guxġma i ngġma ore i aixcġma ixġxġ, rū guxġma i ngġma nacġma i taxucġrġwama texġ chixri nachiga idexaxġ. Rū name nixġ i nagu peruxġnġē i guxġma i ngġma ore i aixcġma meā iwġxġ rū guxġma i ngġma Tupanapġxewa mexġ, rū guxġma i ngġma mexġ i duġxġgġ namaā taāġxġ, rū guxġma i ngġma mexġ i Tupanaxġ naxcġx icuġxġūxġgġxġ. Rū name nixġ i ngġmagu peruxġnġē. ⁹ Rū chanaxwġxe i aixcġma penaxġ i ngġma pexġ changġxġġxġ, rū ngġma pexġ namaā chixucġġġxġ, rū ngġma chauxġtawa nġxġ pexġnġxġ, rū ngġma chauxġtawa nġxġ pedauxġ na chanaxġxġ. Rū ngġxguma ngġmaācġ pemaxġġ rū pemaā tā inarġxġūx ya Tupana ya tamaā irġngġxmġcġ rū tġxġ taāġxġġcġ.

Yema Piripucġġax ga yaxġgġxġ rū dġerumaā Pauruxġ narġngġxġġġ

¹⁰ Rū űuxma na chorġ Coriarġ chiġxġ, rū poraācġ chataāġ erġ wenaxġrġ choxna pecuġxġāchie rū choxġ perġngġxġġē. Rū choma nġxġ chacuġx rū pema rū guxġguma choxġ perġngġxġġchaġ, natġrġ taguma pexġ natauxcha ga na penaxġxġ ga yema. ¹¹ Rū tama ngġma na ġacġ choxġ taxuxġcġx nixġ i pemaā nġxġ chixuxġ i ngġmachiga. Erġ choma rū marġ chomaā nixġ na namaā chataāġxġ i ngġma choxġ ngġxmaxġ. ¹² Rū nġxġ chacuġx na űuxācġ na yġxġ ega guxġ choxġ tauxgux, rū nġxġ chacuġx na űuxācġ na yġxġ ega choxġ namuxġchixgu. Rū marġ chomaā nixġ na namaā chataāġxġ i ngġma choxġ ngġxmaxġ woo changaxpġtġwegu, rū ġxna woo chataiyaxgu, rū ġxna woo choxġ namuxġchixgu rū ġxna woo choxġ natauxguma. ¹³ Rū Cristu nixġ ya choxġ poraxġġcġ, rū ngġmacġx chomaā nanguxġ na chanaxġxġ i guxġma i ngġma Tupana naxwġxġxġ na chanaxġxġ. ¹⁴ Natġrġ ga pema rū wġxi ga mexġ choxġ pexġgġ ga yexguma guxchaxġwa chayexmagu rū choxġ perġngġxġġē. ¹⁵ Rū pema, Pa Yaxġgġxġ i Piripucġġax, rū meāma nġxġ pecuġx rū yexguma noxri Machedġniāānewa nġxġ chixuxgu ga Tupanaārġ ore, rū yexguma yġma ġchaxġxġgu, rū pexicātama nixġ ga āmare choxna pexāxġ naxcġx ga yema ngġxġġ ga chauxġtawa peyaxuxġ. ¹⁶ Rū yexguma Techarġnicaarġ ġānewa chayexmayane, rū pema rū yġma chauxcġx penamugġ ga perġ āmare na choxġ perġngġxġġġxġcġx. Rū tama nixġ ga yexgumarġca choxġ perġngġxġġēxġ. ¹⁷ Rū woo perġ āmaremaā chataāġ, natġrġ yexeraācġ chataāġ erġ ngġma choxġ na perġngġxġġġxġcġx rū Tupana tā āmare pexna naxā. ¹⁸ Rū űuxma rū marġ choxġ nangġxma i guxġma i ġacġ i chanaxwġxġxġ, rū aixcġma ngġmaārġ yexera choxġ nangġxma. Rū űuxma na Eporudġtu nġma nangexġ i perġ āmare, rū taxuġma choxġ nataxu. Rū ngġma perġ āmare i chauxcġx nġma pemuxġ, rū Tupanapġxewa rū űoma wġxi i pumara i yixixġrġxġ nixġ, rū nġma rū poraācġ namaā nataāġ. ¹⁹ Rū ngġmacġx ya chorġ Tupana rū norġ ngġmaxġgġ i mexġchixġwa tā pexna nanaxā i guxġma i ġacġ i pexġ taxuxġ. Rū ngġmaācġ tā nanaxġ erġ Ngechuchu ya Cristuarġ duġxġgġ pixġgġ. ²⁰ Rū name nixġ i guxġguma nġxġ ticuġxġgġ ya Tanatġ ya Tupana. Rū ngġmaācġ yġ.

Pauru nanaguxġġ ga norġ popera rū wenaxġrġ yema duġxġgġxġ narġmoxġ

²¹ Rū chanaxwġxe i chauġġagu nġxġ perġmoxġġġ i guxġma i taeneġġ i Ngechuchu ya Cristuaxġ yaxġgġxġ. Rū ngġxgumarġrġ ta pexġ narġmoxġġġ i ngġma taeneġġ i chauxġtawa ngġxmagġxġ. ²² Rū ngġxgumarġrġ ta pexġ narġmoxġġġ i guxġma i taeneġġ i nġma Dumawa ngġxmagġxġ. Rū ngġma yexera pexġ rġmoxġġxġ rū ngġma nixġ i taeneġġ i Dumaārġ āġxgacġ ya

tacūxŭ-tawa puracüexŭ. ²³ Rŭ chanaxwèxe i tórü Cori ya Ngechuchu ya Cristu pexŭ narüngŭxēē i guxāma i pemax. Rŭ ngēmaācŭ yīi.

Rŭ nuāma pexna,
Pauru

POPERA GA COROCHAWA YEXMAGŪXŪ GA YAXŌGŪXŪTANŪWA NAMUXŪ GA PAURU

Pauru rü nüxŭ narümoxē ga yema yaxōgŭxŭ ga Corochawa yexmagŭxŭ

1-2 Pa Chaueneēgŭ ya Corochaarŭ Īnewa Ngēxmagŭxex, choma i Pauru rü wŭxigu namaā i taeneē i Timutéu nixŭ i pexcēx tanaxŭmatŭxŭ i űnaā popera. Rü choxŭ nixŭ ga Tupana ga inamuāchixŭ na guxŭwama nüxŭ chixuchigŭxŭcēx i Ngechuchu ya Cristuarŭ ore. Rü pexcēx chanaxŭmatŭ i guxāma i pema ya chaueneēgŭ ya aixcŭma Tupanaarŭ duŭxŭgŭ ixŭgŭxe ya Cristuaxŭ yaxōgŭxe. Rü chanaxwēxe i Tanatŭ ya Tupana pexŭ narŭngŭxēē na meā pegŭmaā pemaxēxŭcēx rü petaāēgŭxŭcēx.

Pauru rü yema yaxōgŭxŭcēx nayumŭxē

3 Rü guxŭguma i ngēxguma pexcēx tayumŭxēgŭgu, rü moxē nüxna taxā ya Tupana ya Nanatŭ ya tŕrŭ Cori ya Ngechuchu ya Cristu. 4 Rü ngēmaācŭ tanaxŭ erŭ marŭ nüxŭ tacuāchiga na űuxācŭ aixcŭma meā Ngechuchu ya Cristuaxŭ peyaxōgŭxŭ, rü aixcŭma nüxŭ pengechaŭgŭxŭ i guxŭma i ngēma duŭxŭgŭ i Tupanaarŭ ixŭgŭxŭ. 5 Rü nüxŭ tacuēxgŭ na ngēmaācŭ meā Tupanapēxewa pemaxēxŭ erŭ penayauxgŭchaŭ i ngēma mexŭgŭ i Tupana pexŭ namaā nguxŭxŭ i daxŭguxŭ i naānewa. Rü űuxma rü meā ĩpenanguxēē na penayauxgŭxŭcēx i ngēma mexŭgŭ yerŭ marŭ nüxŭ pexŭnŭē ga Tupanaarŭ ore i mexŭ i aixcŭma ixŭxŭ. 6 Rü ngēmatama ore i mexŭ ga pexŭtawa nguxŭ, rü guxŭwama nangu i űuxmax. Rü guxŭwama ningŭchigŭ rü duŭxŭgŭarŭ maxŭxŭ naxŭchicŭŭ, yema perŭ maxŭxŭ na naxŭchicŭŭxŭrŭŭ ga yexguma nüxŭ pexŭnŭēgu rü nüxŭ pecuēxgŭgu na űuxācŭ Tupana aixcŭma pexŭ na ngechaŭxŭ rü pexŭ rŭngŭxēēchaŭxŭ. 7 Rü ngēma ore i mexŭ nixŭ ga pexŭ nangŭxēēxŭ ga Epāparu ya tomŭcŭ ya nüxŭ tangechaŭgŭcŭ ya wŭxigu tomaā Tupanaarŭ orewa puracŭcŭ. Nŭma rü Cristuarŭ puracŭtanŭxŭ ya mecŭ nixŭ, rü nŭma nixŭ i tochicŭŭ pexŭ nangŭxēēxŭ. 8 Rü nŭma ya Epāparu nixŭ i tomaā nüxŭ yaxuxŭ i pechiga na űuxācŭ Tupanaāē i Ūnŭxŭarŭ ngŭxēēmaā choxŭ pengechaŭgŭxŭ. 9 Rü ngēmacēx i toma ga noxritama pexŭ tacuāchigagu, rü taguma nüxŭ itayarŭngŭmaē na pexcēx tayumŭxēgŭxŭ. Rü guxŭguma Tupanana naxcēx tacagŭ na meā pexŭ nüxŭ nacuēxēēxŭcēx i ngēma nŭma nanaxwēxexŭ na penaxŭxŭ. Rü nüxna naxcēx tacagŭ na pexna naxāāxŭcēx i nagŭxŭraŭxŭ i cuēx i Naāē i Ūnŭxŭwa ne ŭxŭ. 10 Rü nüxna naxcēx tacagŭ na meā tŕrŭ Cori naxwēxexŭācŭma na pemaxēxŭcēx rü guxŭguma penaxŭxŭcēx i ngēma nŭma nanaxwēxexŭ. Rü nüxna naxcēx tacagŭ na pexŭ natauxchaxēēāxŭcēx na togŭxŭ perŭngŭxēēgŭxŭcēx rŭ guxŭ i ngunexŭgu yexeraācŭ Tupanaxŭ pecuāxŭcēx. 11 Rü nüxna naxcēx tacagŭ na norŭ pora i mexēchixŭmaā pexŭ naporaexēēxŭcēx, na namaā peporaexŭcēx i guxŭma i guxchaxŭgŭ rü yaxna namaā pexŭnŭēxŭcēx. 12 Rü űuxŭchi tanaxwēxe i taāēācŭma Tanatŭ ya Tupanana moxē pexā, erŭ nŭma pexŭ nimexēēgŭ na pema rŭ ta penayauxgŭxŭcēx i ngēma mexŭgŭ i naxŭtawa ngēxmagŭxŭ i nŭma tā nüxna naxāxŭ i ngēma duŭxŭgŭ i noxrrŭ ixŭgŭxŭ. 13 Yerŭ nŭma ga Tupana rŭ marŭ Chatanāmēxēwa tŭxŭ ĩnanguxŭxēē rŭ Nane ya nüxŭ nangechaŭcŭmēxēwa tŭxŭ nangēxmagŭxēē. 14 Rü guma Nanegagu nixŭ ga tŭxŭ namaxēēxŭ rŭ tŭxŭ nüxŭ nangechaŭxŭ ga tŕrŭ pecadugŭ.

Rü yexguma pecaducèx nayuxgu ga Cristu rü Tupana nügümaã nanangüxmüëxëë ga duïxügü

¹⁵ Taguma texé Tupanaxü tadau, natürü nüma rü núma nanamu ga Nane na duïxügü nüxü daugüxücèx rü nüxü nacuèxgüxücèx na ñuxácü na yïixü i nüma ya Tupana. Rü naxüpa ga guxüma ga tacü i ñuxma ngëxmaxü, rü nüxïra marü nayexma ga Tupana Nane. ¹⁶ Rü Nanexü nixï ga namuxü ga Tupana na naxüäxücèx ga guxüma i tacü i ñuxma ngëxmaxü i daxüguxü i naãnewa rü ñoma i naãnewa, rü guxüma i ngëma nüxü idauxü rü ngëma tama nüxü idauxü. Rü yemaäcü nanaxü ga guxüma ga norü orearü ngeruügü i daxücüñaxârü äëxgacügü rü guxüma ga ngoxogüarü äëxgacügü. Rü yemaäcü nanaxü ga guxüma na nüxü yacuèxüñgüxücèx. ¹⁷ Rü naxüpa i guxüma i tacü i ñuxma ngëxmaxü, rü Cristu rü marü nüxïra nayexma. Rü nagagu nixï i meã inanuxü i guxüma erü nüma nixï i namaã inacuáxü. ¹⁸ Rü nüma ya Cristu rü naëru nixï i guxüma i ngëma yaxögüxü. Rü nüma nixï ga naxüäxü rü nüxna naxäaxü ga maxü. Rü nüma nixï ga nüxïra yuwa inadaxü na guxütärü äëxgacü yïixücèx. ¹⁹ Rü Cristu rü Tupanaxüchi nixï, yerü yemaäcü nanaxwëxe ga Tupana. ²⁰ Rü Tupana rü ñoma ga naãnewa nanamu ga Cristu na curuchagu pecaducèx nayuxücèx. Rü yemaäcü nixï ga Tupana nügümaã nangüxmüëxëëxü ga guxüma i ñoma i naãnewa ngëxmaxü rü guxüma i daxüguxü i naãnewa ngëxmaxü. Rü yemaäcü nanaxü ga Tupana yerü yemaäcü nanaxwëxe. ²¹ Rü pema ga üpa rü tama Tupanamücügü pixigü yerü naxchi pexaie nagagu ga perü chixexü ga nagu perüxïñüexü rü pexüxü. ²² Natürü i ñuxma ya Tupana rü nügümaã pexü narüngüxmüëxëë na namücügü i mexü pixigüxücèx. Rü yemaäcü nanaxü ga Tupana ga yexguma Cristu duïxüxü ixïxgu rü curuchawa ngüxü yangexgu rü yexma nayuxgu. Rü yemaäcü nayu ga Cristu na nügüxütawa pexü nagagüxücèx rü napëxewa pimexücèx rü nataxuxücèx i perü chixexü. ²³ Natürü ngema na pengugüxücèx, rü penaxwëxe na guxüguma mea peyaxögüxü rü meã naga pexïñüexü rü taguma nüxü perüxoexü i ngëma norü ore i mexü ga marü nüxü pexïñüexü. Rü ngematama ore nixï i ñuxma nüxü yaxugüexü i güxü i naanewa.

Tupana rü Pauruxü namu na guxüma ga yaxögüxüxü nangüxëëxücèx

²⁴ Rü ñuxma na woo pexcèx ngüxü chingexü rü chataãë erü nüxü chacuèx rü ñaã chaxunemaã choma rü ta chayanguxëë ga yema ngüxü ga Cristu ingexü naxcèx i norü duïxügü i yaxögüxü. ²⁵ Rü ñuxma ya Tupana rü choxü namu na nüxü charüngüxëëxücèx i guxüma i ngëma norü duïxügü i yaxögüxü. Rü perü mexücèx nixï i choxü namuxü na guxüwama meã nüxü chixuxücèx i norü ore. ²⁶⁻²⁷ Rü ngëma Tupanaärü ore rü ñanagürü:

“Rü Cristu rü pewa nangëxma i ñuxmax, rü nagagüxïtama nixï i pexü nangëxmaxü i pechica i daxüguxü i naãnewa i ngextá inamexëchixüwa”, ñanagürü. Rü yema nuxcümañgüxü ga duïxügü rü tama nüxü nacuèxgü ga yemachiga, natürü ñuxma ya Tupana rü norü duïxügüxü nüxü nacuèxëë. Erü nüma ya Tupana rü norü duïxügüxü nüxü nadauxëëchañ na ñuxácü poraäcü pexü nangechañ rü pexü nangüxëëxü i guxäma i pema i pema i tama Yüdüügü ixigüxe. Rü ñuxma i pema na woo tama Yüdüügü pixigüxü, natürü pema rü ta pexü nangëxma i pechica i daxüguxü i naãnewa erü Cristuaxü peyaxögü. ²⁸ Rü ñuxma i toma rü Cristuchigaxü nixï i tixuxü. Rü ngema ore i Tupanaärü cuèx nawa ngexmaxümaã nixï i guxüma i

duŭxŭgŭxŭ tixucuxĕgŭxŭ rŭ tanangŭexĕĕxŭ na ngemaăcŭ ngearŭ chix-exŭăxŭ Cristuxŭtawa tagagŭxŭ. ²⁹ Rŭ ngĕmatama puracŭ nixŭ i nawa poraăcŭxŭchima chapuracŭamaxŭ woo ŭacŭ rŭ guxchaxŭ chauxcĕx ĩnguxgu. Rŭ guxŭma i ngĕma pora i Cristu choxna Ăxŭ i chowa ngĕxmaxŭ nixŭ i choxŭ poraxĕĕxŭ na chanaxŭamaxŭcĕx i ngĕma puracŭ.

2

¹ Pa Chaueneĕgŭx, chanaxwĕxe i nŭxŭ pecuĕx na űuxăcŭ poraăcŭ pexcĕx chapuracŭxŭ. Rŭ ngĕxgumarŭŭ ta chanaxwĕxe i nŭxŭ pecuĕx na űuxăcŭ poraăcŭ chapuracŭxŭ naxcĕx i ngĕma taeneĕgŭ i Laodichĕaarŭ ĩnĕwa ngĕxmagŭxŭ rŭ guxŭma i petanŭxŭgŭ i taguma choxŭ daugŭxŭ. ² Rŭ ngĕmaăcŭ poraăcŭxŭchima chapuracŭ na nŭxŭ rŭ ta chanangŭchaŭxĕĕxŭcĕx. Erŭ chanaxwĕxe i guxŭma aixcŭma nŭgŭ nangechaŭgŭ rŭ nŭxŭ nangĕĕma i ngĕma mexŭ i cuĕx i aixcŭma ĩxŭxŭ. Rŭ ngĕmaăcŭ tĂ meăma nŭxŭ nacuĕxgŭ ga yema noxri Tupanaxŭcatama nŭxŭ cuĂxŭ. Rŭ yima rŭ Cristutama nixŭ. ³ Rŭ nŭma nixŭ i nŭxŭ nangĕĕmaxŭ i guxŭma i cuĕx i aixcŭma mexŭ. Rŭ nŭma nixŭ i taxcĕx nangoxĕĕĂxŭ i Tupanachiga. ⁴ Rŭ pemaă nŭxŭ chixu i ngĕma ore erŭ tama chanaxwĕxe na texĕ pexŭ womŭxĕĕgŭxŭ namaă i ŭacŭ rŭ ore i chixexŭwa pexŭ gagŭxŭ. ⁵ Rŭ woo na tama ngema petanŭwa changĕĕmaxŭ, natŭrŭ chauăĕwa rŭ poraăcŭ pegu charŭĭnŭ. Rŭ wŭxi i chorŭ taăĕ nixŭ na nŭxŭ chacuĂxŭ na űuxăcŭ meă pegŭ ipinuxŭ na meă pegŭmaă ipecuĂxŭcĕx rŭ űuxăcŭ tama nŭxŭ perŭxoexŭ na Cristuaxŭ peyaxŭgŭxŭ.

űuxma na Cristuarŭ ĩxŭgŭxŭ rŭ ngexwacaxŭxŭ i maxŭ tŭxŭ nangĕĕma

⁶ Rŭ pema ga noxri rŭ meăma tŏrŭ Cori ya Ngechuchu ya Cristuxŭ peyaxŭgŭ. Rŭ űuxma rŭ yema noxri meăma na penayauxgŭxŭrŭŭ rŭ name nixŭ i guxŭguma nŭxna penaxĂ i perŭ maxŭ na nŭma pexŭ namaă ĩnacuĂxŭcĕx. ⁷ Rŭ wŭxi i nanetŭ nanaxwĕxe i naxchŭmĕĂ na nataixŭcĕx rŭ na namaxŭcĕx. Rŭ ngĕxgumarŭŭ ta i pema rŭ penaxwĕxe na meă Cristuna peyaxŭgŭxŭ na meă nawa piyaetanŭxŭcĕx rŭ meă naxcĕx pemaxĕĕcĕx rŭ meă nŭxŭ peyaxŭgŭamaxŭcĕx yema noxri EpĂparu pexŭ ngŭexĕĕgurŭŭ. Rŭ name nixŭ i guxŭguma Tupanana moxĕ pexĂ. ⁸⁻⁹ Rŭ naxcĕx pexuăĕgŭ i ngĕma duŭxŭgŭ i pexŭ womŭxĕĕgŭchaŭxŭ! Rŭ tama name i nŭxŭ ĩperŭxŭnŭĕ i ngĕma norŭ ore i tama aixcŭma ĩxŭxŭ rŭ taxuwama mexŭ. Erŭ ngĕma duŭxŭgŭ rŭ pexŭ nangŭexĕĕchaŭ na nagu pexŭxŭcĕx i ngĕma nacŭmagŭ ga nŭcŭmaŭgŭxŭ ga duŭxŭgŭ nagu ĩxŭ. Rŭ űoma i naăneărŭ ngŭxĕĕtaegŭ nixŭ i ĩnaxŭnŭĕxŭ. Rŭ tama aixcŭma Cristuchiga nixŭ i ngĕma pexŭ nangŭexĕĕxŭ. Rŭ name nixŭ i nŭxna pixŭgachi i guxŭma i ngĕma ngŭxĕĕtaeruŭgŭ i chixexŭgŭ rŭ Cristuwe perŭxŭ. Erŭ Cristu rŭ Tupanaxŭchi nixŭ rŭ guxŭma i Tupanaărŭ pora rŭ Cristuwa nangĕĕma. ¹⁰ Rŭ űuxmax, rŭ Tupanaărŭ maxŭ rŭ norŭ pora rŭ aixcŭma pewa nangĕĕma erŭ namĕxwa pengĕxmagŭ ya Cristu ya namaă ĩcuĂcŭ i guxŭma i daxŭcŭĂĂxărŭ Ăĕxgacŭgŭ rŭ guxŭma i ngoxogŭarŭ Ăĕxgacŭgŭ. ¹¹ Rŭ ngĕma Yudŭgŭ rŭ nŭgŭ ĩnawiechĕxmŭpĕxechiraŭgŭ na Tupanapĕxewa yamexŭcĕx. Natŭrŭ ngĕxguma Cristuaxŭ yaxŭgŭgu rŭ tama ngĕmaăcŭ tamaă nanaxŭ ya Cristu na ĩmexŭcĕx. Erŭ nŭma ya Cristu rŭ tŏrŭ maxŭwa napuracŭ rŭ tŭxŭ ĩnangŭxŭxĕĕ nawa i taxŭneărŭ ngŭchaŭgŭ. Rŭ ngĕmaăcŭ nixŭ i tŭxŭ yamexĕĕxŭ na Tupanapĕxewa ĩmexŭcĕx. ¹² Rŭ yexguma ĩpebaiŭgu, rŭ Cristu na ĩtĂxŭrŭŭ yexma natĕx ga yema nŭcŭmaŭxŭ ga perŭ maxŭ. Rŭ yema Cristu na ĩrŭdaxŭrŭŭ rŭ pema rŭ ta penayaxu i maxŭ i ngexwacaxŭxŭ, yerŭ peyaxŭgŭ na Tupana norŭ poramaă Cristuxŭ

írudaxēēxū. ¹³ Rū ūpa ga pema rū tama aixcūma pexū nayexma ga maxū i taguma gūxū yerū pepecaduāxgū rū pexeneārū ngúchaū pexūgū. Natūrū i űuxma rū Cristuxū namaxēēxūrūū pexū namaxēēē ya Tupana erū Cristuarū duūxūgū pixīgū. Rū Tupana rū marū Cristugagu tūxū nūxū nangechaū ga guxūma ga tórū pecadugū. ¹⁴ Rū noxri rū tachixe yerū tama aixcūma naga taxīnūē ga yema mugū ga Moiché tūxna āxū, rū tórū pecadugū rū yuwa tūxū nagagū. Natūrū ga Cristu rū curuchagu tórū pecaducèx nayu, rū yemaācū Tupana tūxū nayangutanūxēē ga yema tórū pecadugū. ¹⁵ Rū yexguma curuchagu nayuxgu ga Cristu, rū yexguma nixī ga Chatanáxū naporamaēxū ga Tupana. Rū yexguma nixī ga guxū ga duūxūgūpēxewa Chatanáxū naxānexēēxū űoma wūxi i churagarūārū āēxgacū i norū uwanū i nūxū naporamaēxūxū naxānexēēxūrūū.

Name nixī i naxcèx tadaugū i ngēma mexūgū i daxūguxū i naānewa ngēxmagūxū

¹⁶ Rū űuxma rū taxucèxma tūxcūū pexū nixu i ngēma Yudiūgū ega woo tama naxrūū penaxūxgux. Nūmagū rū űuxre i ōnagūxicatama nangōxgū, rū űuxre i axeūxīcatama nixaxgū, rū űuxre i petaarū ngunexūgū naxauregū na ngēmaācū Tupanaxū yacuèxūūgūxūcèx. Rū nangēxma i norū peta i gucū ya taunecūgu Tupanacèx naxauregūxū rū togū i petagū i gucū ya tauemacūgu naxauregūxū. Rū nūxū nangēxma i nacūmagū na űuxācū ngūxchigarū ngunexūgū naxauregūxū. ¹⁷ Rū aixcūma yema nuxcūmaūgūxū ga Yudiūgū rū nanaxauregū ga yema nacūmagū yerū ga Cristu rū tauta űnangu ga yexguma. Natūrū i űuxma rū marū űnangu ya Cristu rū tórū pecaducèx nayu. Rū űuxma rū name nixī na naga ixīnūēxū rū tama nagu ixīxū i ngēma nuxcūmaūgūxū i nacūmagū. ¹⁸ Rū tāūtāma naga pexīnūē i ngēma duūxūgū i nūxū ixūgūxū na ipeyarūtauxexū ega tama daxūcūāx i orearū ngerūūgūxū picuèxūūgūgu! Nūmagū rū tama nūgū nicuèxūūgūneta rū nūgū nixugū na yangoxetūgūxū. Rū noxrūtama cuèxmaāmare nūgū nicuèxūūgū. ¹⁹ Natūrū i nūmagū rū tama aixcūma naga naxīnūē ya yima taeru ixīcū ya Cristu ya tūxū poraexēēcū rū tūxū űyaetanūxēēcū i tórū ōwa i guxāma i yixema i norū duūxūgū ixīgūxe. Rū nūma ya Cristu nixī i wūxigu tūxū naxīnūēxēēxū i wūxichigū i yixema ngēma Tupana naxwèxexūrūū. ²⁰ Rū yexguma nayuxgu ga Cristu rū yexma nayu ga nuxcūmaūxū ga perū maxū, rū yexma nayarūxo ga guxūma ga nuxcūmaūgūxū ga pecūmagū i űoma i naānecūāx i duūxūgū nagu rūxīnūēxū. Rū ngēmacèx i űuxmax ű rū tūxcūū nixī i űoma i naānecūāx maxēxūrūū nagu pemaxēxū i pemax, rū tūxcūū nixī i ngēma Yudiūgūcūmagu pexīxū? ²¹ Rū nūmagū i Yudiūgū rū nūxū nixugūe rū űnanagūrūgū:

“Tama name i nūxū quingōgū i ngēā, rū tama name i cunangōx i yea, rū tama name i cunayaxu i ngēma”, űnanagūrūgū. ²² Natūrū guxūma i ngēma nacūmagū rū paxa tā inayarūxo erū duūxūgūārū nixīgū. Rū ngēma pexū namuxū rū duūxūgūārū mugūmare nixī. Rū ngēma pexū nangūexēēxū rū duūxūgūārū ngūxēētaemare nixī. ²³ Rū guxūma i ngēma pexū namuxū rū pexcèx namexcūraxū erū pexū naxucuxēgū na űacū pexauregūxūcèx, rū tama pegū picuèxūūgūxūcèx, rū meā pexenemaā ipecuèxgūxūcèx. Natūrū guxūma i ngēma mugū rū tama aixcūma pexū narūngūxēē na nūxū perūxoexūcèx i pexeneārū ngúchaūgū.

3

¹ Rū űuxma i pemax, rū Cristu wena maxūxūrūū rū pexū nangēxma i maxū

i ngexwacaxūxū. Rū ngēmacēx name nixī i naxcēx pedau i ngēma mexūgū i daxūguxū i naānewa ngēxmaxū i ngextá Cristu rū Tupanaārū tūgūnecūwawa írūtoxūwa rū namaā āēxgacū iyīxūwa. ² Rū name nixī i guxūguma nagu perūxīnūē i ngēma daxūguxū i naānewa ngēxmaxū i ngemaxūgū rū tama i ngēma űoma i naānewa ngēxmaxū. ³ Yerū yexguma nayuxgu ga Cristu rū yexma nayu ta ga nuxcūmaūxū ga perū maxū. Rū űuxma rū pexū nangēxma i perū maxū i ngexwacaxūxū erū Cristutanūxū pixīgū rū Tupanamēxēwa pengēxmagū. ⁴ Rū nūmatama ya Cristu nixī i pexū namaxēxēxū. Rū ngēxguma wena nūma nangoxgu, rū namaā tá pengōe, rū naxrūū tá pimexēchi.

Marū nūxū tarūxo i nuxcūmaūxū i tacūma i chixexūgū rū tanayaxu i ngexwacaxūxū i tōrū maxū

⁵ Rū űuxma rū name nixī i nūxū perūxoe i guxūma i űoma i naāneārū chixexū i pewa ngēxmaxū. Rū tama name i pemēxna naī i ngemaā pemaxē, rū tama name i petena naī ya yatūmaā pemaxē. Rū tama name i penaxū i pexeneārū ngūchaū rū bai i nagu perūxīnūēmare. Rū tama name i pexū nangūchaū i tacū rū to i chixexūgū. Rū tama name i pegūnaxīcatama penanuxchīgūchaū i guxūma i ngēmaxūgū, erū yīxema ngēma nacūma tūxū ngēxmaxē rū dūxwa namaā tatupanaāx. ⁶ Rū guxūma i ngēma chixexūgūcēx tá nixī i Tupana napoxcuexū i ngēma duūxūgū i ngēmaācū maxēxū rū tama naga Inūēchaūxū. ⁷ Rū pema ga űpa rū penaxū ga yema chixexūgū, rū yemaācū pemaxē. ⁸ Natūrū i űuxma rū name nixī i nūxū perūxoe i guxūma i ngēma na pegūchi pexaīexū, rū pegūmaā penuēxū, rū chixri pemaxēxū, rū pegūmaā peguxchīgagūxū, rū guxūma i ngēma chixexū i dexa i nūxū pixuxū. ⁹ Rū tama name i pegūmaā pidorae, erū marū īpenatēx ga nuxcūmaūxū ga pecūma rū guxūma ga yema chixexūgū ga űpa pexūgūxū. ¹⁰ Rū űuxma rū marū penayaxu i ngexwacaxūxū i perū maxū rū ngexwacaxūxū i duūxūgū pixīgū. Rū guxū i ngunexūgu rū Tupana pexū ningexwacaxūxēchīgū na yexeraācū pimexūcēx naxrūū rū yexeraācū nūxū na pecuēxgūxūcēx ya Tanatū ya Tupana ya maxū tūxna ācū. ¹¹ Rū űuxma rū Tupanacēx rū nūetama nixī ega Yudū quixīgu rū ēxna tama. Rū nūetama nixī ega ícuwiechēxmūpēxechiraūgu rū ēxna tama. Rū nūetama nixī ega tacū rū nachīūānecūāx i duūxū quixīgu, rū ēxna tacū rū duūxū quixīgu. Rū nūetama nixī ega wūxi i coriarū duūxū quixīgu, rū ēxna taxūxearūma duūxū quixīgu. Erū űuxma rū ngēma guxūārū yexera aīxcūma tūxū mexū nixī na Cristu rū guxūārū āēxgacū yīxū rū guxāwama nangēxmaxū. ¹² Rū űuxma ya Tupana rū pexū nangechaū i pema rū pexū nadei na noxrū pixīgūxūcēx. Rū ngēmacēx name nixī i guxūguma pexū nangechaūtūmūūgū i togū, rū namaā pemecūmagū, rū tauxchaācūma nūxna penaxā, rū taguma napēxewa pegū picuēxūxūgū. Rū ngēxguma woo tacū pemaā naxūxgux rū name nixī i yaxna namaā pexīnūē. ¹³ Rū name nixī i wūxichīgū i pema na pegūmaā yaxna pexīnūēxū. Rū ngēxguma chi texē tacū pemaā űxgux, rū name nixī i pegūxū nūxū pengechaūgū i ngēma. Rū yexgumarūū ga tōrū Cori na pexū nūxū ngechaūxūrūū, rū name nixī i togūaxū nūxū pengechaūgū. ¹⁴ Rū guxūārū yexera mexū nixī na pegū pengechaūgūxū. Erū ngēxguma aīxcūma pegū pengechaūgūgu rū aīxcūma wūxigu tá perūxīnūē, rū meā pegūmaā tá pemaxē. ¹⁵ Rū name nixī na pemaā inacūāxū i ngēma taāē i Cristu pexna āxū na ngēmaācū aīxcūma pegū pengechaūgūxūcēx. Yerū yemacēx nixī ga Tupana pexū dexū na wūxitama i duūxūgū pixīgūxūcēx rū meā wūxigu perūxīnūēxūcēx. Rū name nixī i moxē nūxna pexāgū ya Tupana. ¹⁶ Rū

name nixī i guxūguma peāēwa nangēxma i Cristuarū ore rū taāēācūma naga pexīnūē. Rū name nixī i meā peāēxū pecuāācūma namaā pegū pengúexēē rū pegū pixucuxēgū na ngēmaācū pegūaxū penangúchaūxēēxūcēx. Rū name nixī i aixcūma Tupanana moxē pexāgūācūma nagu pewiyaegū i nagúxūraūxū i norū wiyaeğū. ¹⁷ Rū guxūma i ngēma pexūxū rū nūxū pixuxū rū name nixī i tórū Cori ya Ngechuchuégagu penaxū. Rū name nixī i ngēmaācū Ngechuchuégagu Tanatū ya Tupanana moxē pexāgū.

Tupana nanaxwēxe na meā namaxēxū i duūxūgū i Cristuaxū yaxōgūxū

¹⁸ Pa Ngexūgū i Ātegūxūx, rū name nixī i petega pexīnūē. Erū woetama ngēma nixī i mexū na penaxūxū erū tórū Cori ya Cristuarū duūxūgū pixīgū. ¹⁹ Pa Yatūgū i Āmaxgūxūx, rū name nixī i ngīxū pengechaūgū i pemēxgū. Rū tama name na ngīmaā pechixecūmagūxū. ²⁰ Pa Buxūgūx, rū name nixī i guxūwama penatū rū peega pexīnūē, erū ngēma nixī i namaā nataāēxū ya tórū Cori. ²¹ Pa Papāgūx, rū tama name i penanuēxēē i pexacūgū. Erū ngēxguma ngēmaācū penaxūxgux rū ngūrūāchi tá nūxū nawēxtūmū i ngēma namaā nūxū pixuxū. ²² Pa Duūxūgūx i Ixāārū Coriāxgūxūx, rū name nixī i guxūwama naga pexīnūē i perū corīgū i űoma i naānewa pemaā icuēxgūxū. Rū tama name i pexū nadaugūguxicatama meā pepuracūe na ngēmaācū penataāēxēēxūcēx. Natūrū name nixī i mexū i perū ngūchaūmaā guxūguma meā pepuracūe erū tórū Corixū pemuūē. ²³ Rū guxūma i ngēma perū puracū i pexūxūwa rū name nixī i perū ngūchaūmaā penaxū űoma tórū Cori ya Cristuaxū pepuracūexūrū rū tama i duūxūgūaxū. ²⁴ Rū marū nūxū pecuēx rū daxūgūxū i naānewa rū tórū Cori ya Cristu tá pexna nanaxā i perū āmare i maxū i taguma gūxū. Erū yima Cristu ya aixcūma perū Cori ixīcūaxū nixī i pepuracūexū. ²⁵ Natūrū yīxema chixexū űxe rū tá ta tanayaxu i tūmaārū natanū naxcēx i ngēma chixexū i taxūxū, rū aixcūma Tupana tá tūxū napoxcu. Erū Tupanapēxewa rū guxūma i duūxūgū rū nawūxīgu, rū taxucūrūwama texē Tupanachēxwa tiña ega chixexū taxūxgux.

4

¹ Rū pemax, Pa Corīgūx, rū name nixī i perū duūxūgūmaā pemecūmagūxū, rū tama penawomūxēēxū. ¡Rū nūxna pecuēxāchie na pema rū ta pexū nangēxmaxū ya perū Cori ya daxūgucū! ² ¡Rū guxūguma peyumūxēgū, rū pexuāēgū na tama chixexūgu peyixūcēx! ¡Rū Tupanana moxē pexāgū! ³ ¡Rū toxcēx rū ta peyumūxēgū na Tupana toxū natauxchaxēēxūcēx na nūxū tixūxūcēx i norū ore i mexū, rū meāma duūxūgūmaā nūxū tixūxūcēx i ngēma ore ga noxri tama nūxū nacuēxgūxū i Cristuchiga! Rū ngēma orecēx nixī i űuxma ichapoxcuxū. ⁴ Rū chanaxwēxe i chauxcēx peyumūxēgū na meā duūxūgūcēx chanangoxēēxū i ngēma ore, erū ngēma nixī i mexū na chanaxūxū. ⁵ ¡Rū meā pemaxē napēxewa i ngēma duūxūgū i tama yaxōgūxū! ¡Rū űuxma na pexū natauxchaxū, rū yoxni paxa penaxūx i Tupanaārū puracū! ¡Rū taxū i perūchomarexū! ⁶ Rū ngexguma togū i duūxūgūmaā pidexagūgu, rū name nixī i penataāēxēē namaā i ngema dexa i namaā nūxū pixuxū. ¡Rū ngemaācū meā penangaxū i ngema pexna cēxū nachiga i perū ōl.

Pauru nanaguxēē ga norū popera rū wenaxārū yema duūxūgūxū narūmoxē

⁷ Rū nūma ya taeneē ya Tíquicu ya nūxū ingechaūgūcū rū aixcūma choxū narūngūxēē rū wūxīgu chomaā Cori ya Tupanacēx napuracū. Rū nūma tá pemaā nūxū nixu i chauchiga. ⁸ Rū űuxma rū petanūwa chanamu na pexū

nataãẽxẽxũcèx rü pemaã nüxũ yaxuxũcèx na ñuxãcü toxũ nangupetũxũ i tomãx. ⁹ Rũ Tíquicumaã petanũwa chanamu i Onéchimũ ya taeneẽ ya nüxũ ingechaũgücũ ya aixcũma meã Tupanaãrũ puracũ ücü. Rũ nüma rũ petanũxũ nixĩ. Rũ nümagũ tá nixĩ i pemaã nüxũ yaxugũxũ na ñacũ ngupetũxũ i núma. ¹⁰ Rũ pexũ narũmoxẽ i Aritácu i wũxigu chomaã poxcuxũ. Rũ ngẽxgumarũũ ta pexũ narũmoxẽ i Marcu i Bernabéeneẽ ixixũ. Rũ marũ pemaã nüxũ chixu i Marcuchiga na meã penayauxgũxũcèx i ngẽxguma petanũwa nanguxgu. ¹¹ Rũ ngẽxgumarũũ ta pexũ narũmoxẽ ya taeneẽ ya Ngechuchu ya Ixaixcũmacũgu ãegacũ. Rũ ngẽma tomaẽxpũx i yatũgũ rũ ngẽxĩcatama nixĩ i Yudĩgũ i yaxõgũxũ i wũxigu chomaã puracũxũ i Tupanaãrũ puracũwa. Rũ nümagũ rũ poraãcü choxũ nataãẽxẽgũ. ¹² Rũ ngẽxgumarũũ ta pexũ narũmoxẽ i Epáparu. Rũ nüma rũ petanũxũ nixĩ, rũ aixcũma nanaxũ i Cristuarũ puracũ. Rũ nüma rũ norũ yumũxẽwa rũ guxũguma Tupanaxũ nacèxũ pexcèx na aixcũma meã pemaxẽxũcèx rũ peyaxõgũamaxũcèx rũ aixcũma penaxũxũcèx i ngẽma Tupana nawwèxexũ. ¹³ Rũ choma rũ marũ nüxũ chadau rũ pemaã nüxũ chixu i ñuxãcü Epáparu poraãcü pexcèx napuracũ rũ naxcèx napuracũ i ngẽma taeneẽgũ i Laodichéaarũ ñãnewa rũ Iráporiarũ ñãnewa ngẽxmagũxũ. ¹⁴ Rũ Luca ya duturu ixĩcü ya nüxũ ingechaũgücũ, rũ pexũ narũmoxẽ. Rũ ngẽxgumarũũ ta pexũ narũmoxẽ i Dema. ¹⁵ ¡Rũ chauégagu nüxũ perũmoxẽgũ i taeneẽgũ i Laodichéawa ngẽxmagũxũ! ¡Rũ ngẽxgumarũũ ta nüxũ perũmoxẽgũ i Nifa rũ guxũma i taeneẽgũ i yaxõgũxũ i napatawa ngutaquẽxegũxũ! ¹⁶ Rũ ngẽxguma marũ nüxũ pedaumatũguwena i ñãã popera, rũ chanaxwèxe i Laodichéawa penamu na ngemacũĀx i taeneẽgũ rũ ta nüxũ nadaumatũgũxũcèx. Rũ ngẽxgumarũũ ta i ngẽma popera i Laodichéawa chamuxũ, rũ ngẽxguma pexũtawa nanguxgu rũ chanaxwèxe i nüxũ pedaumatũgũ. ¹⁷ Rũ chanaxwèxe i Ariqueípumaã nüxũ pixu, rũ ñapegũgũ nüxũ:

“¡Rũ meã napuracũ rũ yanguxẽẽ i ngẽma puracũ i tórũ Cori cuxna ãxũ!” ñapegũgũ nüxũ. ¹⁸ Choma i Pauru rũ choxmẽxmaãtama pexcèx chanaxũmatũ i ñãã chorũ moxẽ. ¡Rũ nüxna pecuèxãchie na chapoxcuxũ! Rũ chanaxwèxe i Tupana pexũ narũngũxẽẽ.

Rũ nuãma pexna,
Pauru

NŪXĪRAŪXŪ GA POPERA GA TECHARÓNICAWA YEXMAGŪXŪ GA YAXŌGŪXŪTANŪWA NAMUXŪ GA PAURU

Pauru rü nüxŭ narümoxē ga yema yaxōgŭxŭ ga Techarónicawa yexmagŭxŭ

¹ Pa Toeneēgŭ i Techarónicawa Ngēxmagŭxŭ i Tanatŭ ya Tupana rŭ Tórŭ Cori ya Ngechuchu ya Cristuarŭ Duŭxŭgŭ Ixŭgŭxŭx, choma i Pauru rŭ namaā i taeneē i Chiribānu rŭ Timutéu nixŭ i pexcēx tanaxŭmatŭxŭ i ñaā popera. Rŭ tanaxwēxe i Tanatŭ ya Tupana rŭ tórŭ Cori ya Ngechuchu ya Cristu pexŭ narŭngŭxēē rŭ pexŭ nataāēxēē.

Meāma nayaxōgŭ ga yema Techarónicawa yexmagŭxŭ rŭ yemaācŭ wŭxi ga cuēxruŭl ga mexŭ nixŭgŭ

² Rŭ torŭ yumŭxēwa rŭ guxŭguma pexna tacuēxāchigŭ, rŭ pexcēx Tupanana moxē taxā. ³ Rŭ guxŭguma i ngēxguma Tanatŭ ya Tupanaāā tidexagŭgu, rŭ taguma nüxŭ itayarŭngŭmaē na ñuxācŭ meā peyaxōgŭācŭma penaxŭxŭ i Tupanaārŭ puracŭ, rŭ ñuxācŭ nüxŭ pengechaŭgŭācŭma togŭxŭ perŭngŭxēēxŭ. Rŭ taguma nüxŭ itayarŭngŭmaē na ñuxācŭ aixcŭma meā ipenangŭxēēxŭ ya tórŭ Cori ya Ngechuchu ya Cristu rŭ ngēmacēx yaxna namaā pexŭnŭē i ngēma ngŭxŭ i ñuxma pingexŭ. ⁴ Pa Chaueneēgŭx, Tupana pexŭ nangechaŭ, rŭ nüxŭ tacuēx rŭ nŭmatama nixŭ ga pexŭ nadexŭ. ⁵ Rŭ yexguma pemaā nüxŭ tixuxgu ga Tupanaārŭ ore i tŭxŭ maxēxēēxŭ, rŭ tama toechama tidexagŭmare, yerŭ Tupanaāē i Ūñexŭ toxŭ narŭngŭxēē na norŭ poramaā pemaā nüxŭ tixuxŭ. Rŭ meā nüxŭ tacuāācŭma pemaā nüxŭ tixu ga yema ore yerŭ toēwatama nüxŭ tacuēx na aixcŭma yŭxŭ. Rŭ pematama nüxŭ pecuēx ga ñuxācŭ meā pepēxewa na tamaxēxŭ ga yexguma na yemaācŭ pexŭ tarŭngŭxēēgŭxŭcēx. ⁶ Rŭ pema rŭ meāma penaxŭgŭ ga yema pexŭ tangŭxēēxŭ rŭ yema tŭxŭ nangŭxēēxŭ ga tórŭ Cori ya Ngechuchu. Rŭ Tupanaāē i Ūñexŭ pexŭ taāxēēācŭma penayauxgŭ ga yema ore ga woo yemacēx poraācŭ ngŭxŭ na pingegŭxŭ. ⁷ Rŭ yemaācŭ ga pema rŭ wŭxi ga cuēxruŭl ga mexŭ pixŭgŭ naxcēx ga guxŭma ga yema yaxōgŭxŭ ga Machedóniāānewa rŭ Acayaanewa yexmagŭxŭ. ⁸ Rŭ yema na peyaxōgŭxŭgagu rŭ tórŭ Cori ya Ngechuchuarŭ ore rŭ guxŭwama ninguchigŭ. Rŭ ngēmacēx i ñuxma rŭ Machedóniāānewa rŭ Acayaanewa rŭ guxŭwama nüxŭ nacuēxgŭ na ñuxācŭ meā Tupanaāxŭ peyaxōgŭxŭ. Rŭ ngēmacēx marŭ taxucēxma tŭxcŭi i toma rŭ namaā nüxŭ tixu i ngēma ore i mexŭ i pechiga. ⁹ Erŭ nŭmagŭtama i ngēma duŭxŭgŭ rŭ marŭ nüxŭ nixugŭgŭ ga ñuxācŭ ga pema rŭ meā toxŭ na peyauxgŭxŭ ga yexguma petanŭwa taxŭxgu. Rŭ nüxŭ nixugŭgŭ ta ga ñuxācŭ nüxŭ na perŭxoexŭ ga perŭ tupananetachicŭnēxāgŭ na Tupanaxŭchi ya maxŭcŭ rŭ ixaixcŭmacŭwe perŭxŭcēx rŭ nüxŭ pepuracŭxŭcēx. ¹⁰ Rŭ nüxŭ nixugŭgŭ ta na ñuxācŭ aixcŭma ipenangŭxēēxŭ na wenaxārŭ daxŭwa ne naxŭxŭ ya Ngechuchu ya Tupana Nane ga yuwa ínadaxēēācŭ. Rŭ yima Ngechuchu nixŭ ya tŭxŭ íngŭxŭxēēcŭ nüxna i ngēma poxcu i āucŭmaxŭ tá íngŭxŭ.

2

Pauruarü puracü ga Techarónicawa

¹ Pa Chaueneëgüx, rü pematama nüxü pecuèx rü tama natüçèxmare nixi na pexütawa taxixü. ² Rü pema nüxü pecuèx rü naxüpa ga pexütawa na tangugüxü rü chixri tomaã nachopetü ga Pirípucüãxgü rü tomaã naguxchigagü. Natürü Tupana toxü narüngüxëë na pemaã nüxü tixuxüçèx ga norü ore i tüxü maxëxëxü. Rü yemacèx tama tamuüëãcuma pemaã nüxü tixu ga yema ore woo ga torü uwanügü rü poraãcü toxü na naguxchaxëëgüãxü. ³ Rü yexguma pemaã nüxü tixuxgu ga yema ore, rü tama itatüëãcuma pemaã nüxü tixu. Rü tama chixexü pemaã taxügüchaüãcuma rü tama pexü tawomüxëëgüchaüãcuma pemaã nüxü tixu ga yema ore. ⁴ Yerü Tupana nixi ga toxü unetacü rü toxü mucü na pemaã nüxü tixuxüçèx ga norü ore i mexü i tüxü maxëxëxü. Rü yemacèx Tupana naxwëxexüãcuma pemaã nüxü tixu ga yema ore. Rü tama duüxügüxumare na tataãëxëëgüxüçèx pemaã nüxü tixu, natürü nüxü tixu na Tupanaxü tataãëxëëgüxüçèx. Rü nüma ya Tupana nixi i tüxü nacuáxü rü tüxü nadauxü rü nangugüãxü i ngëma nagu rüxinüxü. ⁵ Rü pema nüxü pecuèx rü taguma pepëxewa pexü ticuèxüügü na toga pexinüëxüçèx, rü taguma pexü tawomüxëëgü na ngixü tayauxgüxüçèx ga perü diëru. Rü Tupana nixi ya toxü daucü na taguma yemaãcü na tanaxüxü. ⁶ Rü taguma naxcèx tadaugü na duüxügü toxü icuèxüügüxüçèx, rü woo i pema rü bai i togü i duüxügü. ⁷ Rü woo Cristutama toxü namu na yaxögüxüãrü ãëxgacügü na tixigüxü natürü tama ñoma wüxi ga ãëxgacürüü pepewa tixigü. Natürü meãmare pemaã itacuèx, ñoma wüxi i mamá i ngixãcügüna meã dëuxcürüü pemaã tixigü. ⁸ Rü poraãcü pexü tangechaü, rü yemacèx pemaã nüxü tixu ga Tupanaãrü ore. Rü tama yemaxicatama pexna taxãxchaü ga yexguma. Natürü marü itamemare ta ga pexcèx na tayuexü, yerü poraãcü pexü tangechaü. ⁹ Pa Chaueneëgüx, pema nüxü pecuèx ga ñuxãcü poraãcü na tapuracüexü na torü ñnacèx tataxegüxüçèx. Rü ngunecü rü woo chütacü tapuracüe na taxúeaxüma wüxi ga guxchaxü tixigüxüçèx ga yexguma petanüwa tayexmagügu rü pemaã nüxü tixuxgu ga Tupanaãrü ore. ¹⁰ Pa Duüxügü i Tupanaãxü Yaxögüxü, pema nixi ga toxü pedaugüxü rü Tupana rü ta toxü nadau ga ñuxãcü meã na tamaxëxü ga petanüwa, rü ñuxãcü taxüma ga chixexü na taxüxü ga yexguma. ¹¹ Rü pema nüxü pecuèx ta ga ñuxãcü pexü na tanangüchaüxëxü. Rü yexguma pengexhaügügu, rü pexü tataãëxëëgü ñoma wüxi i papá i naxãcügüxü taãëxëëgüxüãrü. ¹² Rü ñuxma na Tupanaãrü pixigüxü, rü pexü taxucüxëgü na meã naxcèx pemaxëxü. Rü nüma nixi i pexcèx nangemaxü na ngextá ãëxgacü iyixüwa pengugüxüçèx na ngema mexüwa pengëxmagüxüçèx. ¹³ Rü ngëmacèx guxüguma pexcèx Tupanaana moxë taxá, yerü yexguma noxri nüxü pexinüëgu ga yema norü ore ga pemaã nüxü tixuxü, rü meã penayauxgü, yerü nüxü pecuèxgü rü aixcuma Tupanaãrü ore nixi rü tama duüxügüãrü oremare nixi. Rü yema ore nixi ga naxüchicüüxü ga perü maxü ga yexguma peyaxögügu. ¹⁴ Pa Chaueneëgüx, nüxü tacuèx na ñuxãcü ngüxü pingegüxü yerü petanüxügütama pexchi naxaie rü chixri pemaã nachopetü. Natürü yemaãcütama nüxü nangupetü ga Tupanaãrü duüxügü ga Ngechuchu ya Cristuaxü yaxögüxü ga Yudeaanewa yexmagüxü. Yerü natanüxügütama ga Yudiügu rü chixri namaã nachopetü. ¹⁵ Rü yema Yudiügu nixi ga tóru Cori ga Ngechuchuxü imëxgüxü, yexgumarüü ga norü oxigü rü nuxcumaügüxü ga Tupanaãrü orearü uruügüxü na nadëixürü. Rü yema Yudiügu nixi ga towe ingëxütanüxü. Rü Tupanamaã

rū guxū i duūxūgūmaā narūxuwānūgū. ¹⁶ Rū ngēxguma ngēma duūxūgū i tama Yudiūgū ixīgūxūmaā nūxū tixuxchaūgu i Tupanaārū ore na nūmagū rū ta nūxū nangēxmagūxūcēx i maxū, rū ngēma Yudiūgū rū toxna nanachūxu. Rū ngēmaācū i ngēma Yudiūgū rū poraācūxūchima chixexū naxūgū. Rū ngēmācēx i űuxma rū dūxwa marū nūxna nangu i ngēma Tupanaārū poxcu i āucūmaxūchixū.

Pauru rū nūxū nangūchaū na wenaxārū natanūwa naxūxū ga yema yaxōgūxū ga Techarónicawa

yexmagūxū

¹⁷ Pa Chaueneēgūx, yexguma pexna ítxīxguwena, rū woo tama pexūtawa na tayexmagūechaxū, natūrū guxūguma pegu tarūxīnūē, rū poraācū toxū nangūchaū na pexūtawa taxīxū na wenaxārū pexū ítayadaugūxūcēx. ¹⁸ Rū aixcūma ngēma taxīxchaū. Rū chomatama i muēxpūxcūna rū chanaxwēxe na ngēma pexūtawa taēx chaxūūxūdegaxū natūrū ngoxo i Chataná rū guxūguma toxū nanaguxchaxēē na tama ngēma taxīxūcēx. ¹⁹ Natūrū pexū ítayadaugūchaūāma erū ngēxguma wenaxārū nūma naxūxgu ya tórū Cori ya Ngechuchu ya Cristu rū ¿tēcūcēx tá nixī i Tupanapēxewa tataāēgūxū i tomāx? Rū aixcūma pewa tá nixī i ítananguxēēxū na tomaā nataāēxū ya Tupana. Rū pema tá nixī i torū taāē pixīgūxū. Rū pegagu tá nixī i aixcūma togūmaātama tataāēgūxū i napēxewa. ²⁰ Rū ngēmāācū pegagu nixī i togūmaātama tataāēgūxū, rū pema nixī i torū taāē pixīgūxū.

3

¹ Rū yema na taxuacūma űuxācū wenaxārū petanūwa na chaxūxū, rū dūxwa nāgu charūxīnū na Atenagutama na charīxāxūxū. ²⁻³ Rū pexūtawa chanamu ga taeneē ga Timutéu na pexū íyadauxūcēx. Erū nūma nixī i Tupanaārū puracūtanūxū i wūxigu namaā tapuracūexū na tanaxunagūxūcēx i ngēma ore i mexū i Cristuchiga. Rū ngēma petanūwa chanamu na pexū nangūxēēxūcēx na yexeraācū peyaxōgūxūcēx rū aixcūma petaāēgūxūcēx rū ngēmaācū taguma texē i petanūwa nūxū rūxoxūcēx ega űacū rū guxchaxū pexū ngēxmagu. Erū pematama marū nūxū pecuēx na guxāma i yixema na yaxōgūxū rū ngūxū tá tingegū. ⁴ Rū yexguma petanūwa tayexmagūgu rū marū pemaā nūxū tixu na ngūxū tá pexū űpetūxū. Rū pema marū nūxū pecuēx na aixcūma yemaācū pexū nangupetūxū. ⁵ Rū yemācēx ga yexguma marū tama namaā chaporagu ga yema tama paxa pechigaxū na chacuáxū, rū yemācēx dūxwa Timutéuxū yēma petanūwa chamu na pexna yaçaxūcēx ngoxi meā ípeyaxōgūama i Tupanaārū ore. Yerū chaxoegaāē rū bexmana ngoxo i Chataná rū chixexūgu pexū nayixēē, rū chi ngēmaācū yixīgu, rū natūcēxmamare chi nixī ga pemaā nūxū tixuxū ga Tupanaārū ore. ⁶ Natūrū űuxma na ínanguxū i Timutéu na petanūwa ne naxūxū, rū mexū i ore i pechiga ngēma ne nange. Rū tomaā nūxū nixu na űuxācū meā peyaxōgūxū, rū űuxācū guxāma meā pegū pengechaūgūxū. Rū tomaā nūxū nixu ta na űuxācū guxūguma toxū pengechaūgūācūma togu perūxīnūēxū, rū űuxācū poraācū wena toxū pedaugūchaūxū rū ngexgumarūxū ta i toma rū toxū nangūchaū na wena pexū tadaugūchaūxū. ⁷ Rū ngēmācēx, Pa Chaueneēgūx, rū woo guxchaxū toxū na ngēxmaxū rū ngūxū na tingegūxū, rū poraācū toxū nataāēxēē i ngēma pexū na tacuāchigaxū na meā ípemaxēxū rū meā peyaxōgūamaxū. ⁸ Rū űuxma na nūxū tacuāchigaxū na aixcūma meā tórū Coriaxū peyaxōgūamaxū, rū poraācū tataāēgū. ⁹ ¿Rū űuxācū tá Tupanana

moxē taxā naxcēx i ngēma taāē i taxū i toxna pexāxū? Erū aixcūma pegagu nixī i toxū nangēxmaxū i wūxi i taāē i taxū i napēxewa. ¹⁰ Rū ngunecū rū chūtacū rū tayumūxēgū, rū Tupanana naxcēx tacagū na petanūwa toxū nawoeguxēēxūcēx na wena pexū tadaugūxūcēx rū pexū tarūngūxēēgūxūcēx na yexeraācū nūxū peyaxōgūxūcēx. ¹¹ Rū poraācū tanaxwēxegū na Tanatū ya Tupana rū tōrū Cori ya Ngechuchu ya Cristu toxū natauxchaxēēxū na wena petanūwa itayadaugūxūcēx. ¹² Rū tanaxwēxegū na tōrū Cori ya Ngechuchu pexū rūngūxēēxū na yexeraācū pegū pengechaūgūxūcēx rū guxū i duūxūgūxū na pengechaūgūxūcēx, ngēxgumarūū i toma rū poraācū pexū na tangechaūgūxūrūū. ¹³ Rū tanaxwēxegū na tōrū Cori ya Ngechuchu pexū rūngūxēēxū na peāēwa rū aixcūma meā peyaxōgūxūcēx rū norū duūxūgū i aixcūma mexūgū na pixīgūxūcēx rū na nataxuxūcēx i perū pecadugū i napēxewa ya Tanatū ya Tupana i ngēxguma wena nūma naxūxgu ya tōrū Cori ya Ngechuchu ya Cristu yamaā i guxūma i norū duūxūgū. Rū tanaxwēxe na ngēmaācū yīxū.

4

Maxū i Tupanaxū taāēxēēxūchiga

¹ Rū űuxma Pa Chaueneēgūx, rū tōrū Cori ya Ngechuchuēgagu pexū tacēēxū rū pexū tamu na guxūguma Tupanacēx meā pemaxēxū yema pexū tangūxēēxūrūū rū űuxma marū penaxūxūrūū. ² Pema rū marū nūxū pecuēx ga yema torū ucuxēgū ga tōrū Cori ya Ngechuchu toxū muxū na pexū tangūxēēxūcēx. ³ Rū Tupana nanaxwēxe na aixcūma namexū i perū maxū rū naxcēxicatama na pemaxēxū. Rū tama name i chixri pemaxē i napēxewa rū to i ngexūgūmaā pengēāēgūmare. ⁴ Rū wūxichigū tanaxwēxe na aixcūma tūmamēxū tangechaūxū, rū ngīmaāxīcatama na tamaxūxū. ⁵ Rū tama name i ngīxū na pecuāxchaūmarexūcēx ngīmaā pexāmēx i wūxi i nge erū ngēmaācū namaxē i ngēma duūxūgū i tama Tupanaāxū yaxōgūxū. ⁶ Rū tama name i texē ngīmaā tamaxū i naxmēx ya tūmaēneē. Erū yexgumarūū ga marū pemaā nūxū tixuxūrūū, rū Tupana tá poraācū tūxū napoxcu ya guxāma ya yīxema ngēmaācū maxēxē. ⁷ Erū Tupana tūxū nade na meā imaxēxūcēx rū tama chixexū ixūgūxūcēx. ⁸ Rū ngēmacēx ega texē tama naga űnūgu i űāā nguxēētaegū, rū pemaā nūxū chixu rū tama wūxi i duūxūga nixī i ngēma nūxū taxoxū, natūrū Tupanagatama nixī i nūxū taxoxū. Rū guma nixī ga pexna namucū ga Naāē i Ūūnexū. ⁹ Rū ngēma na pegū pengechaūgūxūchiga, rū taxucēxma pexcēx chanaxūmatū i poperawa. Yerū Tupanatama marū pexū nangūxēē i ngēma na űuxācū aixcūma pegū pengechaūgūxū. ¹⁰ Rū aixcūma nixī i guxūguma meā nūxū pengechaūgūxū i guxūma i taeneēgū i Machedóniānēwa ngēxmagūxū. Natūrū, Pa Toeneēgūx, pexū tacēēxūgū na yexeraācū meā nūxū pengechaūgūxūcēx. ¹¹ ¡Rū meā pegū pengechaūgū, rū pexrūtama maxūgu perūxūnūē, rū tama i togārū maxūgu! ¡Rū pematama naxcēx pepuracū i perū ngēmaxūgū yema marū pemaā nūxū tixuxūrūū! ¹² Rū ngēxguma ngēmaācū pemaxēgu, rū ngēma duūxūgū i tama yaxōgūxū rū tá pexū nangechaūgū, rū taxuūtāma pexū nataxu.

űuxācū tá nixī i ngēxguma nataegugu ya tōrū Cori

¹³ Pa Chaueneēgūx, rū űuxma rū tá pexū nūxū chacuēxēē i ngexta tá naxīxū i ngema yaxōgūxū i yuexū na ngemaācū tama pengechaūgūxūcēx naxrūxū i ngema tama nūxū cuēxgūxū na wena tá namaxēxū i ngema yuexū.

14 Erü yixema na yaxōgūxū na nayuxū rü wena namaxūxū ga Ngechuchu, rü ngēxgumarūū ta tayaxōgū na Tupana tá ínadagūxēēxū i guxūma i ngēma Ngechuchuxū yaxōgūācūma yuexū. 15 Rū ngēmacēx pemaā nūxū tixu i ngēma ore ga tōrū Cori ya Ngechuchu namaā nguxēētaexū. Rū ngēxguma wena nūma naxūxgu ya tōrū Cori ya Ngechuchu rü yixema na imaxēxū i ñoma i naānewa rü tāūtama yixira napēxe taxī i ngēma yuexū. 16 Erü nūmatama ya Cori ya Ngechuchu rü daxūwa tá inarūxī, rü tá nangēxma i wūxi i naga i taxū i daxūwa inaxūxū i tūxū muxū, rü tá nūxū taxīnūē i Tupanaārū orearū ngeruūgūarū āēxgacū i tagaācū daxūwa icagūxū, rü tá yacuegūxū ya Tupanaārū corneta. Rū ngēxguma i ngēma yuexū i Cristuaxū yaxōgūxū rü tá ínarūdagū. 17 Rū ngēmawena i yixema na imaxēxū rü Tupana tá wūxigu caixanexūgu tūxū nigagū namaā i ngēma duūxūgū i yuwa írūdagūxū. Rū ngēmaācū tá daxūgu tōrū Cori ya Ngechuchuxū tayangaugū na guxūgutáma naxūtawa ingēxmagūxūcēx. 18 Rū ngēmacēx chanaxwēxe i ñāā oremaā pegū petaāēxēēgū.

5

1 Natūrū, Pa Chaueneēgūx, rü ngēma norū ngunexū rü tauncē i tá nagu nangupetūxū i ngēma pemaā nūxū chixuxū, rü taxucēxma pexcēx chanaxūmatū i ngēmachiga. 2 Erü pematama meā nūxū pecuēx rü ngēma ngunexū i taxūema nagu ínanguxēēxūgu tá nixī i ínanguxū ya tōrū Cori ya Ngechuchu. Rū ñoma wūxi i ngītēxáxū i ngūrūāchi chūtacū ínguxūrūū tá nixī. 3 Rū ngēxguma duūxūgū nagu írūxīnūēgu na guxūma na mexū rü taxūma na nūxū ūpetūxū, rü ngēma ngunexūgūgu rü tá ngūrūāchi nagux i guxūma. Rū ñoma wūxi i ngecū i āxācūcū rü ngūrūāchi ngīxācūmaā ngūxnecacūrūū tá nixī na taxūema naxchaxwa íñaxū i ngēma. 4 Natūrū pemax, Pa Chaueneēgūx, rü marū meāma nūxū pecuēx i Cristuarū nguchiga. Rū ngēmacēx taxucēxma ngūrūāchi pexū ínayabaixgū ya Cori ya Ngechuchu ñoma wūxi i ngītēxáxū tūxū íbaixgūxūrūū. 5 Erü guxāma i pema rü Tupanaārū duūxūgū pixīgū, rü ngēmacēx ngóonexūwa pengēxmagū rü meāma nūxū pecuēx na ñuxācū meā pemaxēxū. Rū yixema rü tama Chatanáārū duūxūgū tixīgū, rü ngēmacēx tama ēānexūwa tangēxmagū rü tama tanaxū i ngēma chixexū i ēānexūwa ūxū. 6 Rū ngēmacēx tama name i taechita tamaxēmare naxrūū i ngēma duūxūgū i tama yaxōgūxū. Rū name nixī i taxuāēgū, rü meā taāēgu tarūxīnūē. 7 Erü ngēma duūxūgū i naēchitamare maxēxū rü ñoma duūxūgū i chūtacū peexūrūū nixīgū. Rū ngēma duūxūgū i axegūxū rü chūtacū nixī i nūgū nangāxēēēxū. 8 Natūrū i yixema rü ngóonexūwa tangēxmagū, rü ngēmacēx tanaxwēxe i guxūguma taxuāēgū. Rū name nixī i aixcūma meā Tupanaāxū tayaxōgū, rü yigū tangechaūgū, rü meā ítananguxēē na Tupana tūxna naxāxūcēx i ngēma maxū i taguma gūxū. Rū ngēxguma ngēmaācū imaxēgu, rü ngēmaācū tá yigū ítapoxū i ngēxguma Chataná chixexūgu tūxū yixēēchaūgu. 9 Erü Tupana rü tama tūxū nade na tūxū napoxcuxūcēx, natūrū tūxū nade na tōrū Cori ya Ngechuchu ya Cristugagu nayauxgūxūcēx i maxū i taguma gūxū. 10 Rū Ngechuchu ya Cristu rü taxcēx nayu na wūxigu namaā imaxēxūcēx i daxūgūxū i naānewa. Rū nūetama ega woo marū iyuyane ínanguxgu rü ēxna imaxēyane ínanguxgu, erū daxūgūxū i naānewa rü wūxiwa tá namaā tamaxē. 11 Rū ngēmacēx, Pa Chaueneēgūx, rü name nixī i wūxichīgū pegū petaāēxēēgū rü pegū peporaexēē i perū ōwa ngēxgumarūū i ñuxma na marū ípenaxūgūxū.

Pauru rü nayaxucūxēgū ga yema yaxōgūxū

12 Pa Chaueneēgūx, pexū tacèxūgū na nūxū pengechaūgūxūcèx i ngēma taeneēgū i petanūwa puracūexū rū pemaā icuèxgūxū rū pexū ngúexēēxū i Cori ya Ngechucharū ore. 13 Rū name nixī i namaā petaāēgū rū aixcūma meā nūxū pengechaūgū i ngēma taeneēgū, erū nūmagū nixī i pexū nangūxēēgūxū. Rū name nixī i pegū pengechaūgūācūma pemaxē. 14 Rū pemaā nūxū tixu ta na penaxucūxēgūxū i ngēma duūxūgū i oexū i tama pura-cūechaūxū. ¡Rū nūxū penangūchaūxēēgū i ngēma duūxūgū i marū nūxū rūxoechaūxū na yaxōgūāxū! ¡Rū nūxū perūngūxēēgū i ngēma duūxūgū i turaexū i norū ōwa! ¡Rū name nixī i yaxna namaā pexīnūē i guxūma i ngēma taeneēgū! 15 Rū ngēxguma texé chixexū pemaā ūxgu, rū tama name i chixexūmaā penataeguxēē. ¡Natūrū name nixī i naxcèx pedau na guxūguma mexū pexūgūxū i pegūtanūwa rū ngema togūtanūwa rū ta! 16 Rū name nixī i guxūguma petaāēgū. 17 ¡Rū guxūguma peyumūxēgū! 18 ¡Rū woo tacū pexū ngupetūgu, rū Tupanana moxē pexāgū! Erū ngēmaācū nanaxwèxe ya Tupana na pemaxēxū i pema i Ngechuchu ya Cristuarū duūxūgū na pixīgūxū. 19 Rū tama name i nūxū pexoe i Tupanaāē i Ūūnexū. 20 Rū tama name i nūxū pexoe i Tupanaārū ore ega texéwa pemaā yadeaxgu ya Tupana. 21 Natūrū name nixī i meāma penangugū i guxūma i oregū na nūxū pecuáxūcèx rū ngoxi aixcūma yīīxū i ngēma ore rū ēxna tama. ¡Rū ngēma ore i aixcūma mexūxīcatama pixōgū! 22 ¡Rū nūxna pixīgachi i nagūxūraūxū i chixexūgū! 23 Rū chanaxwèxe i nūmatama ya Tupana ya tūxū taāēxēēcū pexū imexēē na aixcūma napēxewa pimexūcèx. Rū chanaxwèxe i guxūwama pexna nadau i peāēwa rū pexenewa na nataxūcèx i tacū i perū chixexū i ngēxguma wenaxārū nūma naxūxgu ya tórū Cori ya Ngechuchu ya Cristu. 24 Rū nūma ya Tupana ya pexū decū rū nixaixcūma na yanguxēēāxū i guxūma i ngēma tamaā inaxunetaxū.

Pauru rū wenaxāri yema duūxūgūxū narūmoxē rū naxcēx ínaca na Cori ya Ngechuchu ya Cristu meā nūxū rūngūxēēxū ga

yema yaxōgūxū

25 Pa Chaueneēgūx, ¡Toxcèx peyumūxēgū! 26 Rū chanaxwèxe i chauégagu nūxū perūmoxēgū i guxūma i taeneēgū. 27 Rū Cori ya Ngechuchuégagu pexū chamu na guxū i taeneēgūpēxewa na nūxū pedaumatūxū i ñāā popera i pexcèx ngema chamuxū. 28 Rū chanaxwèxe i tórū Cori ya Ngechuchu ya Cristu pexū narūngūxēē i guxūma i pemax.

Rū nuāma pexna,
Pauru

NORÜ TAXRE GA POPERA GA TECHARÓNICAWA YEXMAGÜXÜ GA YAXÖGÜXÜTANÜWA NAMUXÜ GA PAURU

Pauru rü nüxü narümoxë ga yema yaxögüxü ga Techarónicawa yexmagüxü

¹ Pa Techarónicawa Ngëxmagüxü i Toeneëgü i Yaxögüxü i Tanatü ya Tupana rü törü Cori ya Ngechuchu ya Cristuarü Duüxügü Ixigüxüx, choma i Pauru rü taeneë i Chiribánu rü Timutéu nixi i pexcëx tanaxumatüxü i ñaã popera. ² Rü tanaxwëxe i Tanatü ya Tupana rü törü Cori ya Ngechuchu ya Cristu pexü narüngüxëë rü pexü nataäxëë.

Ngëma chixexü ügüxü rü Tupana tá nanapoxcue i ngëxguma wenaxärü núma naxüxgu ya Cristu

³ Pa Toeneëgüx, rü guxüguma pexcëx Tupanana moxë taxã, erü name nixi na ngëmaäcü tanaxüxü. Erü guxüguma yexeraäcü peyaxögüetanü rü yexeraäcü pegü pingechaügüetanü. ⁴ Rü ngëmacëx tomatama taäëäcüma pechigaxü tixu natanüwachigü i ngëma duüxügü i Tupanaäxü yaxögüxü. Rü namaä nüxü tixu na ñuxäcü meä peyaxögüxü, rü ñuxäcü namaä peporaexü i guxüma i ngëma guxchaxügü rü ngüxügü i pexü ngupetüxü. ⁵ Rü ngëma guxchaxügü i pexü ngupetüxüwa nüxü tacuëx na aixcümacü yüxü ya Tupana, erü pexü nangugü na aixcüma pimexü na pichocuxücëx i ngextá núma äëxgacü iyüxüwa. Rü ngëma na pichocuxücëx nixi i ngüxü pingegüxü i ñuxmax. ⁶ Rü aixcüma name nixi na Tupana napoxcuexü i ngëma duüxügü i ngüxü pexü ingegüxëëxü. ⁷ Natürü i pema i ñuxma ngüxü ingegüxë rü name nixi i wüxigu tomaä pexü inarüngüxëë ya Tupana. Rü ngëma rü tá nanaxü ya Tupana i ngëxguma üxüemagu daxüwa ne naxüxgu ya törü Cori ya Ngechuchu ya Cristu wüxigu namaä i norü orearü ngeruügü i poraexü. ⁸ Rü aixcüma núma tá naxü i núma ya törü Cori ya Ngechuchu na napoxcueäxücëx i ngëma duüxügü i tama Tupanaxü cuáxchaügüxü rü tama naga ñnüëxü i ngëma ore i mexü i törü Cori ya Ngechuchu ya Cristuchiga. ⁹ Rü ngëma duüxügü rü wüxi i poxcu i taguma güxügu tá napoxcue erü törü Cori ya Ngechuchuarü yaxüwa tá nawogü. Rü ngëma rü tagutäma nüxü nadaugü na ñuxäcü namexëchixü rü naporaxü ya törü Cori ya Ngechuchu. ¹⁰ Rü ngëmaäcü tá ngëma duüxügümaä nangupetü i ngëxguma törü Cori ya Ngechuchu núma üxgu. Rü núma tá nangu na norü duüxügü nüxü icuëxüügüxücëx, rü tá nahäixächiaëgü rü nataäëgü erü tá nüxü nadaugü na ñuxäcü namexëchixü i nümax. Rü pema rü tá ta wüxigu namaä pengëxmagü, yerü peyaxögü ga yema Tupanaärü ore ga pemaä nüxü tixuxü. ¹¹ Rü ngëmacëx guxüguma pexcëx tayumüxëgü. Rü Tupanana taca na núma pexü nadauxü na aixcüma mexü i norü duüxügü pixigüxü i ñuxma na pexü nadexü. Rü ngëxgumarüü ta nüxna taca na nümatama norü poramaä yanguxëäxücëx i guxüma i ngëma mexü i peäëwa nagu perüxüñüëxü rü guxüma i ngëma puracügü i mexü i perü ögagu pexüxü. ¹² Rü ngëxguma Tupana ngëmaäcü pexü rüngüxëëgü, rü perü maxü i mexügagu rü guxüma i duüxügü tá nüxü nicuëxüügü ya törü Cori ya Ngechuchu ya Cristu. Rü nümatama ya törü Cori rü tá pemaä nataäë erü núma rü wüxigu Tanatü ya Tupanamaä pexü nangechaügü.

2

Pauru rū nanangoxēē i ñuxācū tá na yīxū i ngēxguma ínanguxgu ya Cori ya Ngechuchu

¹⁻² Rū ñuxma Pa Chaueneēgūx, rū pemaā nūxū chixuxchaū i nachiga na ñuxācū tá na yīxū i ngēxguma tórū Cori ya Ngechuchu ya Cristu wena núma ūxgu rū tūxū nangutaquēxexēēgūgu na wūxiwa namaā ingēxmagūxūcēx. Rū pemaā nūxū tixu na tama ngūrūāchi togumare perūxīnūēxū rū paxa peyaxōgūxū i ꜥacū rū ore i tama toma pemaā nūxū tixuxū. Erū tama tanaxwēxe na pebaixāchiāēgūxū ega texē pemaā idoraegu rū pemaā nūxū ixuxgu na marū ínanguxū ya tórū Cori ya Ngechuchu. Rū ngēxguma texē pemaā nūxū ixuxgu na nagu taxānegūxū na Cristu rū marū ínanguxū, rū tama name i tūmaga pexīnūē. Rū woo pemaā nūxū tixugūgūgu na tanayauxgūxū i wūxi i torū popera i nūxū ixuxū na marū ínanguxū ya tórū Cori ya Ngechuchu, ꜥrū tāūtāma tūxū peyaxōgū! ³ ꜥrū tāūtāma naga pexīnūē i ngēma duūxūgū i ngēmaācū pexū womūxēēgūchaūxū! Erū naxūpa na Ngechuchu núma ūxū rū tá ínangu i ngēma yatū i Tupanaārū uwanū ixīxū, rū tá nananuxēē i muxūma i duūxūgū i yaxōgūchiréxū. Natūrū ngēma yatū rū Tupana marū namaā nanaxuegu rū tá napoxcu. ⁴ Rū ngēma Tupanaārū uwanū rū tá Tupanamaā rū guxūma i ngēma Tupanaārū ixīxūmaā narūxuwānū. Rū tá naxchi naxai i guxūma i ꜥacū i mexū i duūxūgū Tupanaxū namaā icuēxūūgūxū. Rū Tupanaārū tupaucu ya taxūnewa tá nayarūto ñoma Tupana yīxūrūū. Rū tá nūgū nixu na Tupana yīxū. ⁵ ꜥTama ēxna nūxna pecuēxāchie ga yexguma petanūwa chayexmagu rū marū meāma pemaā nūxū chixu nachiga ga yema? ⁶ Rū pema marū nūxū pecuēx na tūxcūū yīxū i tauta núma naxūxū i ngēma Tupanaārū uwanū. Tauta núma naxū, erū tauta nawa nangu i ngema ngunexū i nagu nua naxūxū. ⁷ Rū ngēma chixexū i Tupanaārū uwanū ūxū, rū marū cūācū inaxūgū. Natūrū nūmatama i Tupanaārū uwanū rū tāūtāma nangox ñuxmatáta ngēma norū chogūruū nūxū ingē. ⁸ Rū ngēxguma tá nixī i ínanguxū i ngēma Tupanaārū uwanū. Natūrū nūma ya tórū Cori ya Ngechuchu rū wūxi i “cue” ñaxūmaā tá nayamēx. Rū ngēxguma ínanguxgu ya tórū Cori ya Ngechuchu rū ngēma norū yaxracūūxūmaā tá inayanaxoxēē i ngēma norū uwanū. ⁹ Rū ngēma Tupanamaā rūxuwānūāxū, rū ngēxguma ínanguxgu rū tá nūxū nangēxma i Chatanáārū pora rū ngēmacēx tá naporaxūchi. Rū tá nanaxū i nagūxūraūxū i cuēxruūgū i Chatanáārū poramaā naxūxū i namaā duūxūgūxū nawomūxēēxū. ¹⁰ Rū nagūxūraūxū i chixexū tá naxū na nawomūxēēāxūcēx i ngēma duūxūgū i Tupana tá poxcuexū. Rū ngēmaācū tá nūxū naxūpetū i ngēma duūxūgū, yerū tama nanayauxgūchaū rū tama nūxū nangechaū i ngēma Tupanaārū ore i aixcūma ixīxū i tūxū maxēxēēxū. ¹¹ Rū ngēmacēx ya Tupana rū nanangexrū i ngēma duūxūgū na poraācū ínatūxūcēx rū yaxōgūāxūcēx i ngēma ore i doramare ixīxū. ¹² Rū ngēmacēx dūxwa Tupana tá namaā nanaxuegu na napoxcuexū i guxūma i ngema duūxūgū i tama yaxōgūchaūxū i norū ore rū namaā taāēgūxū i ngēma chixexū na naxūgūxū.

Tupana tūxū nade na tūxū nangēxmaxūcēx i maxū i taguma gūxū

¹³ Natūrū, Pa Chaueneēgūx i Tórū Cori ya Ngechuchu Pexū Ngechaūgūxex, rū guxūguma Tupanana moxē pexcēx taxā yerū nūma ga Tupana rū noxri-tama naāne ixūgūgumama pexū nade na pexira penayauxgūxūcēx i maxū i taguma gūxū ga yexguma pexū nangūxēēgu ga Naāē i pexū ūnēxēēxū rū

peyaōgūgu ga yema ore i aixcūma ixīxū. ¹⁴ Rū yemacèx Tupana pexcèx naca ga yexguma pemaā nūxū tixuxgu ga norū ore i mexū i tūxū maxēxēxū. Erū nūma nanaxwèxe na pexū nangēxmaxūcèx i pechica i tórū Cori ya Ngechuchu ya Cristuxūtawa i ngextá inamexēchixūwa. ¹⁵ Rū ngēmacèx, Pa Chaueneēgūx, rū chanaxwèxe i meā peyaōgūama rū tama nūxū ipeyarūngūmaē ga yema ore ga tomatama pexū tangūxēxū rū yema ore ga poperagu pexcèx taxūmatūxū. ¹⁶⁻¹⁷ Rū chanaxwèxe i tórū Cori ya Ngechuchu ya Cristu rū Tanatū ya Tupana pexū nataāēxēgū rū pexū narūngūxēē na guxūguma mexū i oremaā pidexagūxūcèx rū mexū pexūgūxūcèx. Rū yima Tanatū ya Tupana nixī ya tamaā namecūmaācūma tūxū ngechaūcū rū guxūguma tūxū taāēxēcū rū tamaā ixunetacū na wūxi i ngunexū tá naxūtawa ingēxmagūxū.

3

Pauru naxcèx ínaca na naxcèx nayumūxēgūxū

¹ Rū űuxma Pa Chaueneēgūx, rū chanaxwèxe na toxcèx peyumūxēgūxū na paxa guxūwama nanguxūcèx i tórū Cori ya Ngechuchuarū ore i mexū, rū duūxūgū norū ngūchaūmaā na nayauxgūxūcèx ga yema pema na pe-nayauxgūxūrū. ² Rū toxcèx peyumūxēgū ta na tama űacū rū chixexū tomaā naxūgūxūcèx i ngēma duūxūgū i chixexūgū! Erū tama guxūma i duūxūgū nayaxōgū. ³ Natūrū tórū Cori ya Ngechuchu rū aixcūma nayanguxēē i ngēma tamaā inaxunetaxū. Rū nūma tá pexū naporaexēē rū pexna nadau na tama chixexūgu peyixūcèx. ⁴ Rū tórū Cori ya Ngechuchu toxū nūxū nacūxēē na aixcūma penaxūxū i ngēma pexū tamuxū rū tagutáma nūxū perūxoexū na ngēmaācū penaxūxū. ⁵ Rū tanaxwèxe i tórū Cori ya Ngechuchu pexū narūngūxēē na aixcūma pegū pengechaūgūxūcèx, ngēma Tupana tūxū ngechaūxūrū. Rū naxcèx itaca na pexū naporaexēxūcèx na Cristurūt namaā peporaexūcèx i ngēma ngūxūgū i ngēxguma pexcèx ínguxgu.

Name nixī na ipuracūexū i wūxichigū

⁶ Pa Chaueneēgūx, tórū Cori ya Ngechuchu ya Cristuégagu pexū tamu na tama namaā pixāmūcūgūxūcèx i űacū i taeneē i tama puracūchaūxū rū tama ngēma pexū tangūxēēācūma maxūxū. ⁷ Erū pema rū marū nūxū pecuèx na űuxācū tá pemaxēxū na toxrūl penaxūxūcèx. Yerū toma ga yexguma petanūwa tayexmagūgu rū torū ōnacèx tapuracūe, rū tama yexma tarūchomare. ⁸ Rū toma rū taguma texéarū ōna ngetanūācūma tangōx. Natūrū ngunecū rū chūtacū rū torū ōnacèx tapuracūe na tama wūxi ga guxchaxū pexū tixīgūxūcèx. ⁹ Rū woochirēx Tupanapēxewa rū name nixī ga perū ngūxēcèx na itaçaxū, natūrū tama yemaācū tanaxū. Rū torū ōnacèx tapuracūe yerū pexū nūxū tadauxēēchaū na űuxācū meā imaxūxū. ¹⁰ Yerū yexguma petanūwa tayexmagūgu, rū pemaā nūxū tixu rū yīxema tama puracūchaūxē, rū noxtacūma ngexrūma nixī na tachibūxū. ¹¹ Rū pexcèx tanaxūmatū i ngēmachiga, erū marū nūxū taxīnūē na petanūwa nangēxmaxū i űuxre i duūxūgū i oexū rū tama puracūechaūxū rū toguechigagumare rīxīnūēxū. ¹² Rū tórū Cori ya Ngechuchu ya Cristuégagu tanamu na meāmare ínapuracūexūcèx i ngēma duūxūgū na nūmatama norū ōnacèx nataxegūxūcèx. ¹³ Pa Chaueneēgūx, űtama nūxū perūchau na mexū pexūexū! ¹⁴ Rū ngēxguma texé tama naga ínūgu i űāā ore i poperawa pemaā nūxū tixuxū űrū marū tūxū pecuèx na texé tīxū! Rū tama name i tūmamaā pexāmūcū na taxānexūcèx i

tūmax. ¹⁵ Natürü tãütáma namaã perüxuanü! Rū name nixĩ i ñoma peeneëxũ pexucuxëxũácüma meã tũxũ pexucuxëmare.

Pauru rü naxcèx ínaca na Cori ya Ngechuchu nüxũ rüngũxëëxũ ga yema yaxõgũxũ

¹⁶ Rū chanaxwèxe i nümatama ya tórü Cori ya taãearü yora pexũ narüngũxëë na guxũguma i guxũwama petaãëgũxũcèx. Rū chanaxwèxe na nüma rü petanüwa na nangëxmaxũ i guxãama i pemax. ¹⁷ Choma i Pauru rü choxmëxmaãtama pexcèx chanaxümatü i ñaã chorü moxë. Rū ngëmaãcü nixĩ i chaugü nagu chawüégaxũ i guxũma i chorü popera. Rū ngëmaãcü nixĩ i chanaxümatüxũ. ¹⁸ Rū nüma ya tórü Cori ya Ngechuchu ya Cristu rü pexna naxãã i ngema norü ngechaxũ i guxãama i pemax!

Rü nuãma pexna,
Pauru

NÜXĪRAÜXÜ GA POPERA GA TIMUTÉUCAḶ NAXÜMATÜXÜ GA PAURU

Timutéuxü narümoxë ga Pauru

1-2 Pa Timutéux, choma i Pauru nixi i cuxcëx chanaxümatüxü i ñaã popera. Rü choxü nixi ga yamuxü ga Ngechuchu ya Cristu na norü puracü chaxüxcëx, yerü yemaäcü nanaxwëxe ga Tupana ya tüxü maxëxëcü rü törü Cori ya Ngechuchu ya Cristu ya ínangüxëgücü. Rü cuma Pa Timutéux, rü chaune quixi i Tupanaârü orewa yerü chauxütawa nixi ga cunayaxuxü ga Tupanaârü ore ga noxrix. Rü chanaxwëxe ya Tanatü ya Tupana rü törü Cori ya Ngechuchu ya Cristu rü cuxna nanaxä i norü ngechaxü rü norü mecüma rü norü taãe.

Timutéuxü naxucüxë ga Pauru nachiga ga yema ngüxëetaegü ga tama aixcüma ixüü

³ Yexguma cuxna ichaxüächigu na Machedóniãñewa na chaxüxcëx rü cumaã nüxü chixu na Epéchiuarü íãnegu na curüxãüxü na ícuyachaxächigüxëxëcëx i ngema duüxügü i doramaãmare ngëma ngüxëetaegüxü. ⁴ Rü chanaxwëxe i ngëma duüxügümaã nüxü quixu na nüxü naxoexüçëx na namaã nangüxëëãxü i ngëma nacümagü ga nuxcümaügüxü ga duüxügü nagu íxü. Erü guxüma i ngëma oregü rü doramare nixi, rü ngëmagagu düxwa nügümaã nanuë i duüxügü. Rü ngëma oregü rü tama aixcüma nüxü narüngüxëë i duüxügü na meã Tupanaãxü yaxögüãxüçëx. ⁵ Natürü Tupana nanaxwëxe i törü maxüñewa na ingearü pecaduãxgüxü, rü na mexügu rüxüñüxü, rü aixcüma meã na yaxögüxü. Rü nüma tüxü namu na ngëmaäcü imaxëäcüma yigü na ingechaügüxü. ⁶ Natürü ñuxre i duüxügü rü marü nüxna nixigachi i Tupanaârü ore na nawe naxüxcëx i ngëma ore i taxuwama mexü i nuëwa nagagümarexü. ⁷ Erü nümagü tüxü nangüxëëchaü i ngëma mugü ga Moiché tüxna äxü, natürü tama nüxü nacüxgü i tacüchiga na yüxü i ngëma tamaã nüxü yaxugüxü rü tüxü nangüxëëxü woo nüma nagu naxüñüëgu rü meãma nüxü nacüxgü. ⁸ Rü nüxü tacüx rü ngëma mugü ga Moiché tüxna äxü rü tüxü name ega Tupana naxwëxexüãcüma naga ixüñüëgu. ⁹⁻¹⁰ Natürü nüxü tacüxgü rü guxüma i ngema mugü rü duüxügü i chixexü ügüxüçëx nixi. Rü ngëma nixi i ngëma duüxügü i tama irüxüñüëchaüxü, rü ngëma tama norü äëxgacüga ñüxüxü, rü ngëma chixexü ügüxü, rü ngëma pecaduãxgüxü, rü ngëma tama Tupanaga ñüxüxü, rü ngëma nanatüxü rü naëxü imëxgüxü, rü guxüma i ngëma máëtagüxü, rü ngëma naxüñëârü ngüchaüwe rüxüxü, rü ngëma yatügü rü ngëxügü i naxrüü yatüxü rü ngëxümaã ngëäëgüxü, rü ngëma duüxëgümaã taxëgüxü, rü ngëma idoratëxgüxü, rü ngëma äëxgacügümaã idoragüxü, rü guxüma i ngëma naxügüxü i tacü rü chixexü i yatöxyepexü i ngema ngüxëëtae i mexü. ¹¹ Rü ngëma ngüxëëtae i mexü rü Tupanaârü orewa nangexma, rü ngemagu nixi i nüxü iyarüñgaxü i ngema maxü i taguma güxü. Rü ngemaarü uruxü nixi ya Tupana ya mecümaxüchicü i choxü namuxü.

Pauru rü Tupanana moxë naxä yerü nüxü nüxü nangechaü ga norü chixexügü

12 Rû moxê nüxna chaxâ ya Ngechuchu ya Cristu ya tórü Cori erü nüma choxü naporaxêê rû choxü nangugü na wüxi i mexü i norü duüxü chixixü. Rû ngêmacêx choxü naxuneta na nüxü chapuracüxü. 13 Üpa ga choma rû chixri nachiga chidexa ga Cristu, rû naxchi chaxai ga yema duüxügü ga nüxü yaxögüxü. Rû nawe chingechigü rû namaâ chixexü chixugü. Natürü woo yemaâcü na chamaxüxü, rû Tupanaâxü changechaütümüxü yerü tama aixcüma nüxü chacuêx ga tacü na chaxüxü, yerü tauta Cristuaxü chayaxô. 14 Rû yemaâcü ga tórü Cori ya Ngechuchu rû poraâcüxüchima chomaâ namecüma yerü choxü narüngüxêê na nüxü chayaxôxücêx rû nagagu nüxü changechaüxücêx i guxüma i duüxügü. 15 Rû pemaâ nüxü chixuxchaü i wüxi i ore i aixcümaxüchi ixixü i inaxwêxegüxü na guxâma nüxü cuáxü. Rû Ngechuchu ya Cristu rû ñoma ga naânewa nangu na namaxêxêêxücêx i pecaduâxgüxü. Rû natanüwa rû choma nixi ga guxüârü yexera na chixexü chaxüxü. 16 Natürü Tupana choxü nüxü nangechaü ga yema chorü chixexü na chowa duüxügüxü nüxü nadauxêêxücêx ga ñuxâcü nüma ga Ngechuchu ya Cristu yaxna chomaâ na naxinüxü ga woo guxü ga pecaduâxgüxüârü yexera chixecü na chiixü. Rû ngêmaâcü wüxi i cuêxruü chixi naxcêx i guxüma i duüxügü na nümagü rû ta nüxü nangêxmaxücêx i maxü i taguma gúxü. 17 Rû ñuxma tanaxwêxe i guxügutâma nüxü ticuêxüügü rû tanataxêêgü ya yima nüxicatama Tupana ixicü. Rû woo tama nüxü tadaugü i ñuxma natürü guxüguma tórü Âêxgacü nixi rû tagutâma nayu. Rû ngêmaâcü yîi. 18-19 Pa Chaune, Pa Timutéux, ñaa nixi i chorü ore i cumaâ nüxü chixuxü. Rû üpa ga yexguma Tupana yadexaxêegu ga ñuxre ga taeneêgü, rû nüxü nixugü na cuma rû tá mexü i Tupanaârü orearü uruü quiixü. Rû ñuxma chanaxwêxe i yemagü nüxü ixuxürüü meâ cuyanguxêê i ngêma puracü i mexü i Tupana nawa cuxü muxü. Rû chanaxwêxe na aixcüma cuyaxôxü rû cuâêwa cumatama nüxü cucuáxü na aixcüma namexü i ngêma puracü i ícuxüxü. Ñuxre i duüxügü rû nüxü nacuêxgüchirêx i tacü nixi i mexü na naxügüâxü, natürü chixexüâma naxügü. Rû ngêmacêx düxwa nüxü narüxoe na Cristuaxü yaxögüâxü. 20 Rû yemaâcü nüxü naxüpetü ga Imenêü rü Areyâüdrü. Rû düxwa choma Chatanána chanawogü ga yema taxre na Chataná ngüxü nüxü ingexêêgüxücêx na ngêmawa nüxü nacuêxgüxücêx na tama namexü na chixri Tupanachiga yadexagüxü.

2

Name nixi i guxüma i duüxügüçêx tayumüxêgü

1 Rû ñuxma rû tá pemaâ nüxü chixu na ñuxâcü namexü na peyumüxêgüxü. Rû pexü chamu na guxüma i duüxügüçêxira peyumüxêgüxü. ¡Rû Tupanana naxcêx peca na nüxü nangüxêêxücêx rû nüxü nüxü nangechaüxücêx i norü pecadugü! ¡Rû moxê nüxna pexâ ya Tupana naxcêx i guxüma i norü ngüxêê i guxü i duüxügüna naxâxü! 2 Rû ngêxgumarüü ta name nixi i naxcêx peyumüxê i guxüma i nachiüânegüarü âêxgacügü i tacügü rû guxüma i ngêmatüüwa ngêxmagüxü i âêxgacügü na ngêmaâcü itaâêgüxücêx rû tüxü nangêxmaxücêx i wüxi i maxü i mexü i Tupanapêxewa rû guxü i duüxügüpêxewa. 3 Rû ngêma nixi i namaâ nataâêxü ya yima Tupana ya tüxü maxêxêêcü. 4 Erü nüma nanaxwêxe na guxâma tüxü nangêxmaxü i maxü i taguma gúxü rû guxâma nüxü cuáxü i ngêma ore i aixcüma ixixü. 5 Rû nüma ya Tupana rû wüxitama nixi. Rû ngêxgumarüü ta wüxitama nixi i taétüwa chogüxü na Tupanaxütawa tüxü nangugüxücêx.

Rü nüma nixī ya Ngechuchu ya Cristu ya Tupana Nane ga duūxūxū ixīcū.
⁶ Rü nüma ga Ngechuchu rü nügū inaxā rü nayu na guxū i duūxūgūaxū
 naxūtanūāxūcēx na Tupanaxūtawa nangugūxūcēx. Rü yexguma Ngechuchu
 yuxgu nixī ga Tupana yanguxēēxū ga yema ūpaacū duūxūgūmaā nüxū
 yaxuxū na űuxācū tā namaxēēēāxū. ⁷ Rü Tupana choxū naxuneta na
 norū orearū ngeruū chīxūcēx. Rü choxū namu na chanangūexēēxūcēx i
 ngēma duūxūgū i tama Yudūgū ixīgūxū na nümagū rü ta yaxōgūāxūcēx rü
 nüxū nacuēxgūxūcēx i ngēma ore i aixcūma ixīxū. Rü ngēma pemaā nüxū
 chixuxū, rü aixcūma nixī, rü tama chidora. ⁸ Rü űuxma chanaxwēxe i
 guxūdwama nayumūxēgū i yatūgū. Rü chanaxwēxe i ngearū pecaduāxācūma
 naxugūmēxē rü ngēmaācū tama texēmaā nanuēācūma rü tama űacūchiga
 nügū nachoxūgagūācūma nayumūxēgū. ⁹ Rü chanaxwēxe i ngexūgū rü
 meamare ūxū i naxchirugu nicuxgū, rü meamare nügū namexēēyaegū, rü
 tama poraācū nügū nangēxāēgū uirumaā rü meruxūgūmaā rü naxchiru i
 tatanūxūmaā. ¹⁰ Natūrū narūmemaē nixī i meāmare Tupanacēx namaxē, rü
 mexū i puracū naxūgū, erū ngēmaācū nanaxwēxegū na namaxēxū i ngēma
 ngexūgū i aixcūma Tupanaaxū yaxōgūxū. ¹¹ Rü chanaxwēxe i ngexūgū rü
 meā inaxīnūē i ucuxēgū. Rü tama name na nachoxūgawēxegūxū. ¹² Erū
 ngexūgūna rü chanachuxu na yatūgūxū nangūexēēxū, rü yatūarū āēxgacū na
 yīxū. Rü name nixī i inarūxīnūēmare i perū ngutaquēxegūwa. ¹³ Yerū Tupana
 rü Adāūxūxīra naxū rü yixcama ga Ebaxū. ¹⁴ Rü Chataná rü tama Adāūxū
 nawomūxēē, natūrū yema ngecūxū nixī ga nawomūxēēxū. Rü yemaācū
 pecadugu ingu ga yema ngecū. ¹⁵ Rü yemacēx Tupana nüxū nixu rü tā
 poraācū nüxū nangux i ngēma ngexūgū i ngēxguma naxīraxacūgū. Natūrū
 nixi i ngecū rü tā inayaxu i maxū i taguma gūxū ega meā ngīxācūgūmaā
 inacuēxgu, rü mexūgu naxīnūācūma yaxōōgu, rü guxūguma duūxūgūxū
 nangechaūgu rü meā Tupanapēxewa namaxēgu.

3

Yaxōgūxūārū āēxgacūgūchiga

¹ Rü pemaā nüxū chixuxchaū i wūxi i ore i aixcūma ixīxū. Rü ngēxguma
 chi texē naxwēxegu na yaxōgūxūārū āēxgacū tīxū, rü mexū i puracū nixī
 i naxcēx tadauxū. ² Rü yīxema yaxōgūxūārū āēxgacū rü tanaxwēxe na
 aixcūma mecū tīxū na taxūema tūmachiga chixri idexaxūcēx. Rü tanaxwēxe i
 wūxixicatama tixī ya tūmamēx, rü aixcūma meā tamaxū rü mexūguxicatama
 tarūxīnū na guxū i duūxūgū tūxū ngechaūgūxūcēx. Rü tanaxwēxe i
 guxūguma meā duūxūgūxū tayaxu i tūmapatawa, rü mexū i ngūexēēruū tixī.
³ Rü tama name i wūxi i ngāxwēxexū rü nuwēxexū tīxū, rü tama name i
 tūmaārū dīerugama rūxīnūxē tīxū. Natūrū name nixī i guxū i duūxūgūmaā
 yaxna taxīnū rü namaā tamecūma. ⁴ Rü tanaxwēxe i meāma tūmachiūmaā
 itacuēx, rü tūmaxācūgū rü meā tūmaga naxīnūē, rü tūxū nangechaūgū. ⁵ Erū
 ngēxguma chi tama tūmachiūmaā meā itacuēxgu rü űūxācū i guxūma i
 Tupanaāxū yaxōgūxūmaā meā itacuāxū? ⁶ Rü yīxema ngema yaxōgūxūmaā
 icuāixē rü tama name na ngexwacēx yaxōxē tīxū, erū ngūrūāchi tā tūgū
 ticuēxū. Rü ngēmagagu dūxwa nagu tangu i ngēma poxcu i Chatanáxū namaā
 napoxcuxū ya Tupana. ⁷ Rü tanaxwēxe i woo i ngēma duūxūgū i tama
 yaxōgūxū rü tūxū nangechaūgū na taxūema chixri tūmachiga idexagūxūcēx
 rü tama Chataná chixexūgu tūxū na nguxēēxūcēx.

Yatügü i diácunügü i tupaucawa ngüxêetaegüxüchiga

⁸ Rü ngëxgumarüü ta i ngëma yatügü i tupaucawa ngüxêetaegüxü ixigüxü rü nanaxwëxe i mexüguxicatama rüxinüëxü nixigü. Rü nanaxwëxe i aixcüma nayanguxêëgü i ngëma nüxü yaxugüexü. Rü tama nanaxwëxe i ngäxêechagüxü nixigü rü êxna norü dîerugama rüxinüëxü nixigü. ⁹ Rü name nixi i meäma nüxü nacuëxgü i guxüma i Tupanaârü ore, na nüxü nacuëxgüxcëx na facüxcëx na yaxögüäxü. Rü nanaxwëxe i nügüäewatama nüxü nacuëxgü na norü maxü rü aixcüma yamexü i Tupanapëxewa. ¹⁰ Rü tanaxwëxe i to i puracüwa nüxü taxügüxira i noxrix. Rü ngëxguma marü taguma chixexü naxügügu, rü marü name i tupaucawaarü ngüxêëruü tayaxigüxêë. ¹¹ Rü ngëma yatügü i tupaucawa ngüxêetaegüxü ixigüxü rü tanaxwëxe i namxëxgü rü ta mexüguxicatama narüxinüë. Rü tama name i oregütëëxgüxü nixigü, natürü tanaxwëxe i meä namaxë rü aixcüma nayanguxêëgü i ngëma nüxü yaxugüxü. ¹² Rü ngëma yatügü i tupaucawa ngüxêetaegüxü ixigüxü rü tanaxwëxe i wüxixicatama tixi ya namxë. Rü tanaxwëxe i meäma napatacüäxgümaä inacuëx, rü naxäcügü rü meä naga naxinüë. ¹³ Rü ngëma yatügü i tupaucawa ngüxêetaegüxü, rü ngëxguma meäma naxügüägu i norü puracü i tupaucawa rü guxüma i duüxügü tá nüxü nangechaügü. Rü nüxüchi i nümagütama i ngëma yatügü rü tá yexeraäcü nüxü natauxcha na nüxü yaxugüexü i nüxäcü Tupana nanaxwëxexü i Ngechuchu ya Cristuaxü na yaxögüäxü i duüxügü.

Aixcüma nixi i ngëma ore i Tupana tüxü nüxü cuëxêëxü i Cristuchiga

¹⁴⁻¹⁵ Rü choma chanaxwëxe i paxa ngëma chaxü na cuxü ichayadauxüxcëx. Natürü ngürüächi tama paxa ngëma chaxü, rü ngëmacëx cuxcëx chanaxümatü i ñaä popera na nüxü cucuáxüxcëx i nüxäcü tá cugümaä icucuáxü napewa i ngëma duüxgü i Tupanaxü yaxögüxü. Erü nümagü nixi i Tupana ya maxücüarü duüxügü yixigüxü rü nüxü yaxugügüxü rü inapoxügüaxü i norü ore i aixcüma ixixü. ¹⁶ Rü yixema nüxü tacuëx rü aixcüma namexëchi i ngëma ore ga noxri êxüguxü i nüxma Tupana tüxü nüxü cuëxêëxü i Cristuchiga. Rü nüma ga Cristu rü duüxügüxü nügü nawëx ga yexguma ñoma ga naänewa nayexmagu. Rü Naäë i Üünexü nüxü nixu na mecü yixü. Rü Tupanaârü orearü ngeruügü i daxücüäx nüxü nadaugü. Rü guxü i nachiüänegüwa rü duüxügü nüxü nixugüë i nachiga, rü guxüwama duüxügü nüxü nayaxögü. Rü Nanatü rü wenaxärü daxüguxü i naänewa nanaga i ngextä inamexëchixüwa.

4

Duüxügü i nüxü rüxoexü na yaxögüäxüchiga

¹ Tupanaäë i Üünexü rü nüxü nixu rü ngëxguma yangaicagu na nagüxchaüxü i naäne rü nümaxü i duüxügü rü tá nüxü narüxoe na yaxögüäxü i Tupanaârü ore i mexü. Rü tá nawe narüxi i duüxügü i doramare i orexü ixügüxü i Chatanáârü nguxêetae nangüxêëxü. ² Rü ngëma yaxögüxü rü tá nüxü inarüxinüë i ngëma duüxügü i meä maxënetaxü rü idoratëëxgüxü. Rü ngëma duüxügü rü yeücürü nanaxügü i ngëma chixexü rü düxwa namaä nixü na chixexüguxicatama naxinüëxü. ³ Rü ngëma duüxügü rü nanachüxu na iyangigüxü i duüxügü. Rü nanachüxu na duüxügü nangögüxü i nüxre i ðnagü rü woochirëx Tupana nanaxü i guxüma i ðnagü na moxë naxcëx inaxägüäcüma nangögüäxüxcëx i norü duüxügü i yaxögüxü rü nüxü

cuèxgùxü i norü ore i aixcüma ixixü. ⁴⁻⁵ Natürü guxüma i Tupana üxü rü name. Rü taxuacüma nüxü taxo ega Tupanana moxë naxcëx ixäxiraäcüma nayauxgu. Erü Tupanaärü ore rü ngëma yumüxë rü nanaxüünexëë i ngëma òna i Tupanapëxewa, rü ngëmacëx name nixi na nangöxü.

Wüxi i mexü i Ngechuchuya Cristuarü ngüxëëruü rü mexümaã nanguxëëtae

⁶ Rü ngëxguma ngëma cumaã nüxü chixuxü i oremaã cunangüexëëgu i taeneë i yaxögüxü, rü ngëxguma nawa cüngüechagu i ngëma ore i marü quixöxü, rü ngëxguma nagu quixüechagu i ngëma mexü i nguxëëtae i marü nagu quixüxü, rü ngëxguma tá nixi i wüxi i mexü i Ngechuchuya Cristuarü ngüxëëruü quixü. ⁷ Rü tama name na naga cuxinüxü i ñoma i naänecüäxärü dexagümare i tama aixcüma ixixü. Natürü name nixi i guxüguma cugü cuporaxëë na yexeraäcü Tupanaxü cungechaüxüçëx rü nawe curüxüxüçëx rü naxcëx cumaxüxüçëx. ⁸ Rü wüxi i mexü nixi na naporaxëëxü rü yaxiäxcüxëëxü i taxüna na aixcüma naporaxüçëx. Natürü ngëmaärü yexera narümemae nixi na yigü iporaxëëxü na Tupanaxü ingechaüxüçëx erü ngëma rü guxüwama tüxü name i ñoma i naänewa rü daxüguxü i naänewa rü ta. ⁹ Rü aixcüma nixi i ngëma ore i cumaã nüxü chixuxü, rü name nixi i guxäma tayaxögü. ¹⁰ Rü ngëmacëx nixi i ipuracüexü rü yigü iporaexëëxü na nüxü ixuxüçëx i ngëma ore i mexü, erü nüxü tayaxögü ya törü Tupana ya maxücü ya guxäärü maxëxëëruü ixicü. Erü nüma nixi i namaxëxëäxü i ngëma duüxügü i nüxü yaxögüxü. ¹¹ Rü chanaxwëxe i cunangüexëë i ngëma ore rü duüxügüxü cumu na naga naxinüexüçëx. ¹² ¡Meã cugüna nadau na taxüema cuxü naxoxüçëx naxcëx i ngëma na cüngextüxüxü! Rü name nixi i wüxi i mexü i cuëxruü quixi naxcëx i guxüma i ngëma yaxögüxü. Rü ngëmacëx cunaxwëxe i mexü i oremaã quidexa, rü meã duüxügüpëxewa cumaxü, rü aixcüma nüxü cungechaü i guxüma i duüxügü, rü meã Tupanaäxü cuyaxö, rü napëxewa meã cumaxü. ¹³ Rü chanaxwëxe i ngutaquëxewa rü guxü i duüxügüpëxewa nüxü cudaumatü i Tupanaärü ore, rü duüxügümaã nüxü quixu na ñuxü ñaxüchiga yixü. Rü chanaxwëxe i ngëmaäcü cunangüexëë rü nüxü cunangüchaüxëë i ngëma taeneëgü ñuxmatáta ngema changu i chomax. ¹⁴ Rü ngëmacëx name nixi i aixcüma namaã cupuracü i ngëma cuëx ga Tupana cuxna äxü ga yexguma norü puracüçëx cuxü naxunetagu rü yema yaxögüxüärü äëxgacügü cuxü yangögüäcüma cumaã nüxü yaxuxgu na cuxna naxäaxü ga yema cuëx. ¹⁵ ¡Meã naxü i guxüma i ngëma cumaã nüxü chixuxü, na ngëmaäcü guxü i duüxügü nüxü daugüxüçëx na ñuxäcü guxü i ngunexügu yexeraäcü meã Tupanacëx na cumaxüxü! ¹⁶ ¡Inaxüäë na ñuxäcü meã cugüna cudauxü rü ñuxäcü meã cunangüexëëxü i ngëma togü! Erü ngëxguma meã cunaxüxgu i guxüma, rü tá cunayaxu i maxü i taguma gúxü rü ngëma togü i cuxü irüxinüexü rü tá ta nüxü curüngüxëë na nümagü rü ta nayauxgüäxüçëx i ngëma maxü.

5

Ñuxäcü nixi i namexü na nüxü ingechaüxü i ngëma yaxögüxü

¹ Taguma name i cunanga i wüxi i yatü i cuxü rüyamaëxü. Rü narümemae nixi i meãma cunaxucüxë ñoma cunatürü. Rü ngëma cüngextüxüçügü rü name nixi i meãma namaã quidexa ñoma cueneëgüxüchirü. ² Rü yixema yaguäxgü ya ngexegü rü name nixi i meãma tümamaã quidexa cuexüchirü. Rü ngëxgumarü ta i paxügü rü name nixi i meãma namaã quidexamare wüxi i cueyëxüchirü, rü tama name i chixexügu namaã

curüxñü. ³ ¶Tüxü rüngüxêê ya yíxema yutegüxe ega aixcüma tacü tüxü tauxgu! ⁴ Natürü ngëxguma chi wüxi i yutecü ngixü nangëxmagu i ngixácügü rü êxna ngítaagü, rü name nixi i nümagü ngixü narüngüxêêgü rü ngixna nanaxã i tacü i ngixü taxuxü. Erü Tupana nanaxwëxe na ngítanüxüüira ngixna daugüxü na ngëmaácü yangutanüxêêgüaxüxcëx ga yema naë na nayaexêêxü. ⁵ Natürü yíxema yutexe ya tüxica irüxáüxê rü tüxü nataxüxe i tümatanüxü, rü Tupanaxütawaxicatama ítananguxêê i tümaärü ngüxêê rü guxüguma woo chütacü rü ngunecü rü tayumüxê na tüxü nangüxêêxüxcëx ya Tupana. ⁶ Natürü yíxema yutexe ya tümaärü ngúchaüguxicatama rüxñüxê, rü Tupanapëxewa rü ñoma tayuxürüü tixi. ⁷ Rü ngëma nixi i ore i tá cunangüxêêxü i ngëma yaxögüxü na nügüna nadaugüxüxcëx na taxuüma i chixexü naxügüxüxcëx rü taxüema nachiga chixri idexagüxüxcëx. ⁸ Erü ngëxguma chi wüxie rü tama meã nüxna tadëuxgu i tümapatacüãxgü rü tümaë rü tümanatü, rü maneca tama aixcüma meã Tupanaãxü tayaxö. Rü wüxi i tama yaxöxüärü yexera chixecü tixi. ⁹ Rü ngëxguma chi wüxi i ngexü i yutexü naxcëx ícaxgu na ngëma yaxögüxü ngixü rüngüxêêgüxüxcëx rü tanaxwëxe i 60 ya taunecüarü yexera ngixü nangëxma rü wüxitama nixi ga ngíte ga ngixü yexmacü ga noxrix. ¹⁰ Rü tanaxwëxe i guxüma i duüxügü ngixü nacüexgü na wüxi i mexü üxcü na yixü. Rü name i meã ngixácüxü yaexêêcü iyixi, rü meã ngípatawa duüxügüxü yaxucü iyixi, rü yaxögüxüärü ngüxêêruü iyixi, rü daaweexüärü ngüxêêruü iyixi. Rü ngëmaácü tanaxwëxe i guxüraüxü i mexü na naxüxü. ¹¹ Natürü tama tanaxwëxe i yaxögüxüärü puracü nixi i ngixna na nadaugüxü i wüxi i yutecü ega tama 60 wa nanguxgu ya ngürü taunecü. Erü wüxi i yutecü i pacü, rü ngëxguma ngürü ngúchaü Cristuna ngixü ixügachixêêgu, rü tá inaxwëxe na wena naxätexü. ¹² Rü duüxügü tá chixri ngíchiga nidexagü, erü tama aixcüma iyanguxêê ga yema Cristumaã inaxunetaxü ga noxrix. ¹³ Rü ngíma rü düxwa ngextá iyaxáuchigümare, rü náí ya í rü nagu iyarüxáüx, rü düxwa tama ipuracüchaü. Rü tama ngëmaxícatama ixü, natürü düxwa ixoregütèèx, rü iyangëxmachigü nawa i ngëma dexa i tama mexü i togüchiga, rü guxüwama nüxü iyaxu i ngëma ore i tama mexü. ¹⁴ Rü ngëmacëx chanaxwëxe i ngëma yutegüxü i pacügü na wenaxärü naxätëgüxü, rü naxáxácügüxü, rü mexü i napataarü dauruügü na yixigüxü. Rü ngëmaácü i ngëma duüxügü i ngixchi aiexü, rü taxucürüwa chixri ngíchiga nidexagü. ¹⁵ Cumaã nüxü chixu i ñaã ore, erü ñuxre i yutecü rü marü nüxü irüxoe i ore i mexü rü Chatanáwe irüxi. ¹⁶ Rü ngëxguma chi wüxi i ngecü i yaxöxcü rü ngixü nangëxmagu i ngítanüxü i yutecü, rü name nixi i ngixü irüngüxêê. Rü ngëmaácü táütama togü i yaxögüxüärü puracü tá nixi na ngixna na nadaugüxü. Rü ngëxguma tá nüxü natauxcha i ngëma togü i yaxögüxü na ngixü nangüxêêgüxü i ngëma yutecü i aixcüma ngixü natauxcüma i ngítanüxügü i ngixü rüngüxêêgüxü. ¹⁷ Rü ngëma yaxögüxüärü äëxgacügü i aixcüma meãma ngëma yaxögüxümaã icuáxü, rü name nixi i ngëma yaxögüxü aixcüma nüxü nangechaügü rü namaã nataãëgü. Rü guxüärü yexera tanaxwëxe i nüxü nangechaügü rü nüxü narüngüxêêgü i ngëma Tupanaarü orexü ixugüxü rü nangüxêêxü. ¹⁸ Erü Tupanaärü orewa rü ñanagürü:

“Tama name i nüxna taxaü i ngëma taxüna i puracüxü”,
ñanagürü. Rü ñanagürü ta:

“Wüxi i puracütanüxü rü tanaxwëxe i nüxü na naxütanüxü i norü puracü”,
ñanagürü i ngëma Tupanaärü orewa. ¹⁹ Rü ngëxguma chi texé nüxü ixuxgu na

chixexü naxüxü i wüxi i yaxögüxüärü äëxgacü, rü täütáma tüxü icuxínü ega natauxguma i taxre rü éxna tomaëxpüx i togü i duüxügü i nüxü daugüxü na aixcüma chixexü naxüxü. ²⁰ Natürü ngëma yaxögüxüärü äëxgacügü i aixcüma pecadugu maxëxü, rü name nixí i guxü i yaxögüxüäpëxewa cunaxucuxë, na guxüma i ngëma togü i yaxögüxüärü äëxgacügü rü ta namuüëxüçèx na naxügüäxü i tacü rü chixexü. ²¹ Rü ñuxma Tupanapëxewa rü tóru Cori ya Ngechuchu ya Cristupëxewa rü ngëma daxüçüäx i orearü ngeruügü i Tupana nüxü ngechaügüäpëxewa, rü cuxü chamu na naga cuxínüxü i ñaã ore i cumaã nüxü chixuxü. Rü chanaxwëxe i ngëma cumaã nüxü chixuxürüü meã cunaxucuxë i guxüma i ngëma yaxögüxü rü nüëtamá ega woo texë tixígu. ²² Rü ngëxuma texexü quingucuchixëëchaügu na ngema yaxögüxüärü äëxgacü tixíxüçèx, jrü taxü i cuñuxäëxü na namaã cuyumüëxü i wüxi i duüxü i tama nüxü cucuáxü i norü maxü! Natürü name nixí i noxri rü meã nagu curüxínü i ngëma erü ngürüächí tá wüxi i duüxü i pecadu üechaxü quingucuchixëë, rü cugagu tá nixí erü tama icuxuäë. jrü meã cügüna nadau na tama pecadugu cinguxüçèx! ²³ Rü ngëma na cinguxnecaüxü i ñuxguacü, rü name nixí i írarüwa binune cuyaxaxü, rü tama i dexáxícatama. ²⁴ Rü nangëxma i duüxügüarü pecadugü i noxtacüma ngóxü naxüpa na Tupana nüxna çaxü. Natürü nangëxma i to i pecadugü i duüxügüarü rü täütáma nangox ñuxmatáta naãneärü guxwa nanguxgu rü Tupana tüxna icagügu. ²⁵ Rü ngëxgumarüü ta nangëxma i duüxügüarü puracügü i mexü i Tupanacëx naxügüxü i ñuxma marü nüxü idauxü. Rü nangëxma ta i puracügü i mexü i ñuxma tama nüxü idauxü natürü yixçüra tá nüxü idaugüamaxü.

6

¹ Guxáma ya yíxema yaxögüxe rü ixäärü coriäxë, rü tanaxwëxe i tümaärü corixü tangechaü na ngëmaäcü taxucürüwa texë Tupanachiga rü tóru nguxëëtaechiga chixri idexaxüçèx. ² Rü ngëxguma chi wüxi ya duüxë ya Tupanaäxü yaxöxë rü wüxi i cori i tümarüü yaxöxümaã tacoriäxgu, rü tama tanaxwëxe i ngëma na tümaëneë yíxüçèx nüxü tarüxo na nüxü tangechaüxü i tümaärü cori. Natürü tanaxwëxe i yexeraäcü meã nüxü tapuracü erü tümaärü cori i nüxü tarüngüxëëxü i tümarüü yaxöxü nixí rü tümaëneë i Tupana nüxü ngechaüxü nixí. Pa Timutéux, chanaxwëxe i meãma cunangüexëë i ngëma ore i cumaã nüxü chixuxü, rü guxüma i yaxögüxüäpëxewa nüxü quixu.

Tupanaärü ore rü aixcüma tüxü name

³ Rü cumaã nüxü chixu rü nangëxma i duüxügü i namaã nguxëëtaegüxü i ngëma nguxëëtae i tama namaã wüxiguxü i tóru nguxëëtae, rü tama namaã wüxiguxü i tóru Cori ya Ngechuchu ya Cristuarü nguxëëtae i mexü, rü tama namaã wüxiguxü i ngëma nguxëëtae i Tupanaärü orewa ngóxü. ⁴ Rü cumaã nüxü chixu rü yíxema ngëmaäcü nguxëëtaexe rü tügü ticuëxüü rü taxuüma tacuëx. Rü ngëmacëx ngëxürüüxümare i dexa rü naxçèx tachoxügwëxe, rü tama texéga taxínüchaü, rü düxwa ñoma tídaawexürüü tixí namaã i ngëma tümacüma. Rü ngëmagagu rü taxäüxächiwëxe, rü tanuxwëxe, rü togümaã taguxchiga, rü taxúxeaxüma tayaxö. ⁵ Rü ngëmaäcü i ngëma duüxügü i chixëäëgüxü, rü nügümaã nanuëëcha, rü tama nüxü nacuëxgü i ngëma ore i aixcüma ixíxü, rü nagu narüxínüë rü Tupanaärü orewa nixí i diëru ngíxü nayauxgüxü. ⁶ Rü aixcüma nixí i Tupanaärü orewa nüxü iyarüngauxü i taxüma i mexü, natürü ngëma mexü rü tümacëxícatama nixí ya yíxema namaã taäëgüxe i ngëma marü tüxü ngëxmaxü. ⁷ Rü yixema rü yëxguma noxri

ixíraegu, rü ngearü yemaxüãxëmaã tabue i ñoma i naãnewa. Rü ngëxguma iyuxgu rü taxucürüwa tayange i tórü ngëmaxügü. ⁸ Natürü ngëxguma tüxü nangëxmagu i taxchiru rü tórü òna rü name nixí i ngëmamaátama tataãëgü. ⁹ Natürü ngëma duüxügü i dïëruãxgüchaüxü, rü tama yaxna namaã naxínüë i ngëxguma ngëma dïëruarü ngüchaü nüxü poragu. Rü ngëmacëx nagu nayí i muxüma i ngüchaügü i taxuwama mexü i chixexüwa nagagüxü, rü ngëmacëx düxwa i ngëma duüxügü rü poraãcü nachixe rü norü guxümaãma inayarütauxe. ¹⁰ Erü ngëma na dïëruaguama rüxínüxü rü ngëma nixí i guxüma i chixexügüarü ügü. Rü nangëxma i ñuxre i duüxügü i dïëruaguama rüxínüëxü rü ngëmacëx Tupanana nixígachi. Rü ngëmaãcü nügünatama guxchaxü naxägü rü nügüxütama ngechaü nanguxëëgü..

Tupanaãxü yaxögüamaxüchiga

¹¹ Natürü cumax, Pa Timutéux, rü wüxi ya yatü ya Tupanaxü yaxöcü quixí. ¡Rü ngëmacëx nüxna ixügachi i guxüma i ngëma chixexü! ¡Rü meã Tupanapëxewa namaxü, rü norü ngüchaü naxü, rü meã nüxü yaxö, rü nüxü nangechaü i duüxügü, rü yaxna namaã naxínü! Rü tama name i cügü quicuëxüxü. ¹² ¡Cügü naporaxëë na meã cuyaxöðmaxüçëx rü cunaxüamaxüçëx i Tupanaärü puracü ega wooñacü rü guxchaxü cuxü üpetügux! ¡Rü cügüna nadau na ngëmaãcü taguma cuxna iyanaxoxüçëx i ngëma maxü i taguma gúxü! Yerü yema maxüçëx nixí ga noxri Tupana cuxü yaxuxü ga yexguma muxüma ga duüxügüpëxewa nüxü quixuxgu na ñuxäcü Ngechuchu ya Cristuaxü na cuyaxöxü. ¹³⁻¹⁴ Rü ñuxma Pa Timutéux, rü napëxewa ya Tupana ya guxäxüma maxëxëëcü, rü napëxewa ya Ngechuchu ya Cristu ga äëxgacü ga Piratumaã nüxü ixücü ga ñuxäcü Nanatü ya Tupanaãxü na yaxöðxü, rü cuxü chamu na naga cuxínüxü i ngëma ore i cumaã nüxü chixuxü. Rü tama chanaxwëxe i cunaxüchicüü i ngëma ore, na taxüema texéñacüçëx cuxü oregüxüçëx rü chixri cuchiga idexaxüçëx. Rü chanaxwëxe i ngëmaãcü meã cunaxü ñuxmatáta ínangu ya tórü Cori ya Ngechuchu ya Cristu. ¹⁵ Erü ngëma ngunexü i Tupana nagu naxwëxexügu rü tá Cristuxü nangoxëë. Erü nüxícatama Tupana nixí, rü nüma nixí i aixcüma mecü yíixü rü guxüetüwama nangëxmaxü. Rü guxü i äëxgacügüarü Äëxgacü yíixü, rü guxü i corigüarü Cori yíixü. ¹⁶ Rü nüxícatama nixí na taguma nayuxü. Erü nüma rü poraãcü ínangónexüwa namaxü, rü taxucürüwa texé ngëma ngónonexüna tangaicama. Taguma wüxi i duüxü nüxü nadau, rü taxuacüma texé nüxü tadau. Nüma rü guxügüma naporaxüchi rü taguma inayarüxo na Äëxgacü yíixü. Rü ngëmacëx tanaxwëxe i guxäma nüxü ticuëxüñgüëcha. Rü ngëmaãcü yíi. ¹⁷ Rü yixema muarü dïëruáxe i ñoma i naãnewa, ¡rü tùmamaã nüxü pixu na tama ngëmamaã tügü ticuëxüñgüxüçëx rü tama nagu tarüxínüëxüçëx na ngëma tumaärü dïëruwa nüxü itayangaugüxü i tumaärü maxü! Erü ngëma dïëru rü paxa tá nagux. Natürü narümemae nixí i Tupanaga taxínü, erü yimawa nixí i nüxü itayangaugüxü i tumaärü maxü. Rü nüma nixí i poraãcü tüxna naxäãxü i guxüma iñacü i inaxwëxexü na itaãëgüxüçëx. ¹⁸ ¡rü namaã nüxü ixu i ngëma muarü dïëruãxgüxü, rü name na ngëmamaã mexü naxügüxü rü togü i duüxügüxü nangüxëëgüxü! Rü ngëmaãcü tá namu i ngëma mexügü i naxügüxü i Tupanapëxewa. Rü tanaxwëxe i númagü i muarü dïëruãxgüxü rü na inamemaregüxü na togüna naxäãxü rü namaã nangauxü i ngëma norü ngëmaxügü. ¹⁹ Rü ngëmaãcü tá nüxü nangëxma i norü mexügü i daxüguxü i naãnewa, rü tá nanayauxgü i ngëma maxü i aixcüma ixíxü.

Pauru rü Timutéuxü namu, rü yemaãcü inayacuèxëẽ ga norü popera

²⁰ Pa Timutéux, jmeã namaã nangúexëêtae i guxũma i ngẽma ore i cuxũ chamuxũ! Rü tama name na icurũxĩnũxũ i ñoma i naãnecũãxãrũ dex-agũmare i taxuwama mexũ rü ngẽma ore i doramare ixĩxũ i duũxũgũ nüxũ ixugũgũnetaxũ na ore i nawa nüxũ icuáxũ yĩxũ. ²¹ Erũ ñuxre i nũmagũ i ngẽma noxrõtama cuèxgu ìxũ, rü düxwa ngẽmagagu Tupanana nixĩgachi. Rü chanaxwèxe i Tupana meã pexũ narũngũxëẽ.

Rü nuãma pexna,
Pauru

NORÜ TAXRE GA POPERA GA TIMUTÉUCA_X NAXÜMATÜXÜ GA PAURU

Timutéuxü narümoxë ga Pauru

¹ Pa Timutéux, choma i Pauru nixi i cuxcëx chanaxümatüxü i ñaã popera. Rü choxü nixi ga namuxü ga Ngechuchu ya Cristu, yerü yemaäcü nanaxwëxe ga Tupana. Rü nüma choxü namu na nüxü chixuxüçëx na ñuxäcü tüxü nangëxmaxü i maxü i taguma gúxü, ega aixcüma Ngechuchu ya Cristuaxü yaxögügu. ² Cuxü changechaü, Pa Chaune, Pa Timutéux. Rü chanaxwëxe ya Tanatü ya Tupana rü Ngechuchu ya Cristu ya tórü Cori na cuxü nangüxëëgüxü rü nüxü cungechaütümüügüxü rü cuxü nataäxëëgüxü.

Tama name i taxäne na Cristuchigaxü ixixü

³ Guxüguma i chütacü rü nguncü rü cuxna chacuëxächixü i chorü yumüxëwa, rü poraäcü cuxcëx moxë Tupanana chaxã. Rü nüxü nixi i chapuracüxü i mexü i chauäëmaã, yexgumarüü ga nuxcümaügüxü ga chorü oxigü naxügüürüü. ⁴ Choma rü nüxna chacuëxächi na ñuxäcü poraäcü chauxcëx cungechaüxü rü chauxcëx cuxaxuxü ga yexguma cuxna íchixüxgu. Rü wenaxäru cuxü chadauxchaü na aixcüma chataäxüçëx. ⁵ Erü nüxna chacuëxächi na ñuxäcü aixcüma Tupanaäxü cuyaxöxü. Rü curü noxë ga Loída rü cue ga Euníchia rü tüma rü woetama tüxira Tupanaäxü tayaxögü rü nüxü chacuëx i ñuxma rü cuma rü ta aixcüma cuyaxöxü. ⁶ Rü ngëmacëx cumaã nüxü chixu na cugü cuporaxëëxü na yexeraäcü cunaxüamaxüçëx i ngëma Tupanaärü puracü ga naxcëx cuxna naxãäxü ga cuëx ga yexguma noxri cuxü chingögüäcüma cumaã chayumüxëgu. ⁷ Yerü Tupana rü tama tüxna nanamu ga naãe i tüxü muëëxü. Natürü tüxna nanamu ga Naãe i Üünexü na tüxü naporaxëëxüçëx na aixcüma duüxügüxü ingechaüügüçëx rü meã yigümaã icuáüçëx. ⁸ Rü tama chanaxwëxe na cuxänexü na nüxü quixuxü i nachiga ya tórü Cori. Rü ngëxgumarüü ta tama chanaxwëxe i chauxcëx cuxäne i ngëma na chapoxcuxü naxcëx i Tupanaärü ore. Rü name nixi i yaxna namaã cuxinü i ngëma ngüxü i cuxcëx ínguxü nagagu i ngëma ore i mexü i nüxü quixuxü. Rü Tupana tá cuxü naporaxëë. ⁹⁻¹⁰ Rü Tupana tüxü namaxëë rü tüxü nade na naxcëxícata ma imaxëüçëx. Natürü tama tacü rü mexü na ixixüügagu nixi ga yemaäcü tamaã namecümaxü ga Tupana. Natürü yemaäcü tüxü narüngüxëë yerü woetama yema nixi ga nanaxwëxexü yerü Ngechuchu ya Cristugagu tüxü nangechaü. Rü nüma ya Tupana ga tautama naãne üxgumama tüxü ngechaücü, rü yexguma ínanguxgu ga tórü maxëëëruü ga Ngechuchu ya Cristu, rü yexguma nixi ga Tupana tüxü nüxü dauxëëxü na ñuxäcü poraäcü tüxü nangechaüxü. Rü nüma ga Cristu nixi ga iyanaxoxëëäxü na iyuxuchixü yerü nüma rü yuwa ínarüda rü wena namaxü. Rü norü orewa tüxü nüxü nacuëxëë na yixema rü ta tüxü nangëxmaxü i ngëma maxü i taguma gúxü ega nüxü yaxöxgu. ¹¹ Rü Tupana choxü ningucuchixëë na nüxü chixuxüçëx i ngëma norü ore i mexü. Rü choxü namu na ngëma oremaã chanangüxëëxüçëx i duüxügü i guxüwama. ¹² Rü ngëmacëx nixi i poraäcü ngüxü chingexü rü chapoxcuxü i ñuxmax. Natürü tama naxcëx chaxäne i ngëma, erü choma nüxü chacuëx na texëaxü chayaxöxü. Rü nüxü chacuëx na naporaxü i nüma na nüxna nadauxüçëx i ngëma puracü i choxna naxäxü

rü namaã inacuáxcèx i chauãe i guxũgutáma ñuxmatáta ngẽma ngunexũ i nagu wena núma naxũxũ. ¹³ Rü chanaxwẽxe i meãma nagu quixũ i ngẽma nguxẽetae i mexũ ga chauxũtawá naxcèx cungũxũ. Rü name nixĩ i meã nüxũ cuyaxõõma ya Ngechuchu ya Cristu rü meã nüxũ cungechaũ i guxũma i duũxũgũ, erũ Cristuarũ duũxũ quixĩ. ¹⁴ Rü name nixĩ i Tupanaãe i Üünexũ i tawá maxũũãrũ ngũxẽemaã ícunapoxũ i ngẽma nguxẽetae i mexũ i Tupana cuxna ãxũ. ¹⁵ Cuma marũ nüxũ cucuẽe rü guxũma ga yema yaxõgũxũ ga Áchiaarũ naãnewa ne íxũ rü marũ choxna naxĩgũ. Rü yematanũwa nayexma ga Figueru rü Ermóquene. ¹⁶ Onesíferu rü muẽxpũxcũna choxũ nataãexẽe, rü tama chauxcèx naxãne i ngẽma na chapoxcuxũ. Rü ngẽmacèx chanaxwẽxe i tórũ Coriaxũ nangechaũtũmũũgũ i guxũma i natanũxũgũ. ¹⁷ Rü yexguma noxritama Dumawa nanguxgu ga nümax, rü chauxcèx nadauecha rü ñuxmata choxũ iyangu. ¹⁸ Cuma meãma nüxũ cucuẽe ga ñuxãcũ tũxũ na nangũxẽexũ ga Onesíferu ga Epẽchiuarũ íãnewa. Rü ngẽmacèx chorũ yumũxẽwa naxcèx íchaca na Tupanaãxũ nangechaũtũmũũxũcèx i ngẽxguma wena ñoma i naãnewa naxũxgu ya tórũ Cori ya Ngechuchu.

2

Ngechuchu ya Cristuarũ puracũtanũxũ i mexũchiga

¹ Rü ñuxma, Pa Chaune, Pa Timutéux, ¡rũ cugũ naporaxẽe namaã i ngẽma pora i Ngechuchu ya Cristu cuxna ãxũ! ² Yema ore ga chauxũtawá nüxũ cuxĩnũxũ ga yexguma muxũma ga duũxũgũpẽxewa nüxũ chixuxgu, rü chanaxwẽxe i ñuxma cuxi ngẽma oremaã cunangũxẽe i togũ i yatũgũ i meã naãexũ cuẽxgũxũ na nüxĩ togũxũ nangũxẽexũcèx namaã i ngẽma ore. ³ Rü tama name i naxcèx cumuũ na Ngechuchu ya Cristuarũ ore-gagu ngũxũ quingexũ. Natürũ name i namaã cupora ñoma wũxi i mexũ i norũ churararũ. ⁴ Rü wũxi i duũxũ i churarawa ngẽxmaxũ, rü taxucürũwama to i puracũ i tama churaraarũ ixĩũgu narũxĩnũ. Natürũ ngẽma norũ ãẽxgacũ nagu namuxũ i puracũgu nixĩ i naxĩnũxũ na ngẽmaãcũ norũ ãẽxgacũxũ nataãexẽexũcèx. ⁵ Rü ngẽxgumarũũ ta wũxi i duũxũ i wũxi i ínũcawa nügũ ingucuchixẽexũ, rü taxuacũma nanayaxu i norũ ãmare ega chixri naxĩnũcèxwẽxegu rü tama ngẽma ínũcaarũ ãẽxgacũga naxĩnũgu. ⁶ Rü texé ya naãnewa puracũe rü name nixĩ i tũxira tanayaxu i tũmanetũarũ o. ⁷ ¡Rũ guxũguma nagu rũxĩnũ i ñãã ore i cumaã nüxũ chixuxũ! Rü nüma ya Cori ya Ngechuchu tá cumaã inanangũxũxẽe i guxũma na nüma nanaxwẽxexũãcũma cunaxũxũcèx i ngẽma puracũ. ⁸ ¡Rũ nüxna nacuẽxãchi ya Ngechuchu ya Cristu ya Dabítanũxũ ga guma yuwa írudacũ! Rü yimachiga nixĩ i ngẽma ore i mexũ i duũxũgũmaã nüxũ chixuxũ. ⁹ Rü ngẽma oregagu nixĩ i ngũxũ na chingexũ rü ñoma wũxi i máetaxũrũũ nüma poxcupataũwa cadenamaã chichotaxũ. Natürũ Tupanaãrũ ore i mexũ, rü guxũwama nanguama rü taxucürũwama texé tayachota. ¹⁰ Rü ngẽmacèx yaxna namaã chaxĩnũ i ngẽma ngũxũ i chingexũ naxcèx i ngẽma duũxũgũ i Tupana dexũ. Erũ chanaxwẽxe i nümagũ rü ta Ngechuchu ya Cristuaxũ nayaxõgũ, rü ngẽmaãcũ na nayauxgũãxũcèx i maxũ i mexũ i taguma gũxũ. ¹¹ Rü pemaã nüxũ chixuxchaũ i wũxi i ore i aixcũma ixĩxũ. Rü ngẽxguma Cristu yuxũrũũ norũ orexè yuegu, rü naxrũũ tá ta wena tamaxè na nüma ínangẽxmaxũwa íngẽxmagũxũcèx. ¹² Rü ngẽxguma ñoma i naãnewa yaxna namaã íxĩnũegu ega ngũxũ íngexgu, rü daxũguxũ i naãnewa rü wũxigu namaã ãẽxgacũ tá tixĩgũ. Rü ngẽxguma tama Cristuxũ icuáxchaũgu i ñoma i naãnewa, rü nüma

rü täütáma tüxü nacuáxchaü i daxüguxü i nañnewa. ¹³ Natürü woo ñuxguacü i yixema rü tama aixcüma naxüxgu i ngéma Tupanamaã ixunetaxü, natürü nüma ya Tupana rü guxüguma nayanguxéë i ngéma tamaã inaxunetaxü, erü taxuacüma nügütama nawomüxéë.

Wüxi i mexü i puracütanüxü i Tupana namaã taãxüchiga

¹⁴ Rü ngéma yaxögüxü i cuxütawa ngëxmagüxü, rü name nixi i Tupanaegagu nüxna nüxü cucuêxächixéë na tama nuxcümaügüxü i ore i taxuwama mexüçex nügümaã na yaporagatanücüxüçex. Erü ngéma rü wüxi i chixexü nixi, rü nanachixéãëxéë i ngéma duüxügü i nüxü ñnüëxü. ¹⁵ ¡Rü cugü naporaxéë na meã cunaxüxü i Tupanaärü puracü na tamaã nataãxüçex i ngëxguma napëxewa cunguxgux rü ngemaãcü taxucëxma cuxãnexüçex i ngëxguma nüma cuxna nacaxgu naxcëx i curü puracüchiga! ¡Rü ngëmacëx name i aixcüma meã namaã cüngüxéëtae i ngéma ore i mexü i aixcüma ixixü! ¹⁶ ¡Rü nüxü rüxo i ñoma i naãneçüãxârü dexagümare i taxuwama mexü! Erü ngéma duüxügü i ngéma dexagümaregu ñxü, rü guxüguma yexeraãcü chixëngu nayi. ¹⁷ Rü ngéma norü ngxéëtae i ngéma duüxügü, rü ñoma wüxi i ñaaweane i tüxü íyimachixéëxürüü nixi. Rü yema nixi ga nüxü ngupetüxü ga Imenéu rü Firetu. ¹⁸ Yerü nidoragümare ga nüxü na yaxugüexü rü marü na nangupetüxü i yuetaarü dachiga. Rü yemaãcü nanawomüxéëgü ga ñuxre ga duüxügü na tama noxrürüü yaxögüãxüçex i Tupanaärü ore. ¹⁹ Natürü Tupanaärü ore rü taguma inayarüxo rü taguma naxüchicüü. Rü ngéma norü orewa rü ñanagürü:

“Törü Cori ya Tupana nüxü nacüex i texé tixi ya norü duüxügü ixigüxe. Rü guxâma ya yixema nüxü ixuxe na Ngechuchu ya Cristu rü tümaärü Cori yixü, rü name nixi i nüxna tixigachi i guxüma i chixexü”,

ñanagürü i ngéma norü orewa. ²⁰ Wüxi i duüxü i diëruãxüchixü rü napatawa nangëxma i poratu i uirunaxcëx rü diërumünaxcëx. Rü nangëxma ta i poratu i nañnaxcëx rü waixümunaxcëx. Rü ngéma poratu i uirunaxcëx rü diërumünaxcëx rü mexü i norü ñnacëx nixi. Natürü ngéma poratu i nañnaxcëx rü waixümunaxcëx rü guxchirechixü nixi. ²¹ Rü ngëxguma wüxi i yaxöxü naxwëxegu na aixcüma mexü i Tupanaärü puracütanüxü na yixü, rü name nixi i nüxna nixügachi i guxüma i chixexü. Rü ngëxguma tá nixi i Tupanapëxewa aixcüma naxüünexü na naxüãxüçex i nagüxüraüxü i puracü i Tupana namaã nüxü ixuxü. ²² ¡Nüxü rüxo i guxüma i ngéma chixexü i ngextüxüçügü nagu rüñnüëxü! ¡Rü meã Tupanapëxewa namaxü rü aixcüma nüxü yaxö! ¡Rü nüxü nangechaü i guxüma i duüxügü, rü täxü i namaã cunuxü! ¡Rü ngémaãcü namaxü wüxigu namaã i guxüma i ngéma duüxügü i aixcüma Tupanacëx maxëxü rü ngemaãcü yumüxëgüxü! ²³ Rü tama name i naxcëx icurüxñnü i ngéma dexagü i taxuwama mexü. Erü ngéma dexagügagu rü düxwa nügüchi naxaie i duüxügü. ²⁴ Rü wüxi i Tupanaärü puracütanüxü rü tama name na texemaã nüçex nadauxü. Rü narümemae nixi na guxâma namecümáxü. Rü nanaxwëxe i yaxna namaã naxñnüãcüma meã duüxügüxü nangüxéë i Tupanaärü ore. ²⁵⁻²⁶ Rü wüxi i Tupanaärü puracütanüxü rü name na yaxna namaã naxñnüãcüma meã nayaxucüxëgüãxü i ngéma duüxügü i tama irüñnüëchaüxü. Rü name i ngémaãcü inanguxéë na Tupana nüxü rüngüxéëxü i ngéma duüxügü na nüxü naxoëxüçex i norü chixexü rü nüxü nacüëxgüxüçex i ngéma ore i aixcüma ixixü. Erü Tupana nanaxwëxe na naxuãëgüxü i ngéma duüxügü rü nawa inanguxüxü i ngéma chixexü i ngoxo i Chataná nagu nayixéëxü na noxrütama ngüchaü namaã naxüxüçex.

3

Nuxácü tá nixí i duñxügücüma i ngëxguma nagúxchaũgu i naãne

1 Rû chanaxwëxe i nûxü cucuëx rû ngëxguma nagúxchaũgu i naãne rû tá nangëxma i ãucümaxũgü rû guxchaxũgü naxcëx i duñxügü. 2 Rû duñxügü rû tá nügüguxicatama narüxinüë, rû norü dïëruyama tá narüxinüë. Rû tá nügü nicuëxüxũgü, rû ngëmaãcü tãütáma nûxü nacuëxgüchaũ i togü i duñxügü i tama naxrüü taarü dïëruãxgüxü. Rû chixri Tupanachiga tá nidexagü, rû tãütáma nanatüga rû naëga naxïñüëchaũ. Rû tãütáma moxë inaxã i ngëxguma Tupana nûxü rüngüxëëgu, rû ngëmaãcü tãütáma nûxü nacuëxgüchaũ i Tupanaãrü ore. 3 Rû tãütáma nagu narüxinüë i togü i duñxügüxü na nangechaũgüxü, rû tãütáma nûxü nangechaũtümüũgü. Rû tá naxoregütëëxgü, rû tãütáma nügü naporaëxë na yaxna namaã naxïñüëxüçëx i naxüñëarü ngüchaũgü. Rû tá nichixecüma, rû tá naxchi naxaie i guxüma i ngëma mexü. 4 Rû duñxügüëchitawëxëgüxü tá nixĩgü, rû nuëwëxëxü tá nixĩgü, rû nügü icuëxüũgüxü tá nixĩgü. Rû tá norü ngüchaũçëxama nadaagü, rû tãütáma Tupanaxü nacuëxgüchaũ. 5 Rû tá nügü nayaxögüxüchinëtaxëë natürü ngëma norü chixëxü i naxügüxüwa tá nangoxoma na tama aixcüma yaxögüãxü i ngëma ore i mexü. Rû ngëma duñxügü i ngëmaãcü maxëxü, rû tama name na namaã cuxãmüçüxü rû natanügu cuxãxü. 6-7 Erü ngëma duñxügütanüwa nangëxmagü i nûmaxü i ïpatagu ichocuetanüxü. Rû norü ngüxëëtaemaã nayawomüxëëgü i ngëma ngëxgü i ngëma ngëxmagüxü i tama naãëxü icuãxü rû chixri maxëxü. Rû ngëma ngëxgü, rû norü ngüchaũgütama chixëxüwa nanagagü, rû ngëmacëx woo guxüguma nangúë natürü taguma aixcüma nûxü nacuëxgü i ngëma ore i aixcüma ixĩxü. 8 Rû ngëma duñxügü i chixëxümaã ngüxëëtaëgüxü, rû chixëxüguxicatama narüxinüë, rû tama aixcüma nayaxögü i Tupanaãrü ore. Rû naxchi naxaie i ngëma ore i aixcüma ixĩxü, naxrüü ga yema yuüxügü ga Yane rû Yáubre ga tama Moïchéga ïñüëchaũxü. 9 Natürü tãütáma muxü i duñxügü nûxü nayaxögü. Erü guxüwama i duñxügü rû tá nûxü nicuëxächitanü na wüxi i duñxügü i chixëxügu rüxinüëxü rû ngeãëmarexü yixĩgüxü naxrüxü ga yema taxre ga tama Moïchéga ïñüëchaũxü.

Ucuxëmaã inyacuëxëë ga Pauru na Timutéumaã yadexaxü

10-11 Natürü cumax, Pa Timutéux, marü nûxü cucuëx ga ñuxácü meã na chanangüexëëxü ga duñxügü, rû ñuxácü meã chamaxüxü, rû ñuxácü nagu charüxinüxü rû meã chayaxöxü, rû ñuxácü yaxna namaã chaxïñüxü ga duñxügü rû nûxü changechaũxü. Rû cuma nûxü cucuëx ga ñuxácü na chaugü chaporaxëëxü na yaxna namaã chaxïñüxü i guxchaxügü. Yerü ga duñxügü rû chowe ningëxütanü na choxü yamëxgüxüçëx. Rû cuma rû nûxü cucuëx ga ñacü choxü na ïpetüxü ga Aũtioquiawa rû Içünüwa rû Listrawa, rû ñuxácü chowe na yangëxütanüxü rû poraãcü ngüxü chingëxü. Natürü törü Cori ya Tupana choxü ïnapoxü na tama choxü yamëxgüxüçëx. 12 Rû aixcüma cumaã nûxü chixü rû guxãma ya yïxëma naxwëxëgü na Ngechuchu ya Cristucëx tamaxëxü, rû togü tá tûmachi naxaie rû chixri tá tûmamaã nachopetü. 13 Natürü ngëma duñxügü i chixëcümagüxü rû ngëma duñxügü i idoratëëxgüxü rû yexeraxü i chixëxüga tá nayi. Erü Chatanaãrü nayawomüxëëgü, rû ngëmacëx nûxü togüxü nawomüxëëgü. 14 Natürü i cuma rû name nixí i guxüguma meã nagu quixü i guxüma i ngëma ore i marü cungüxü. Erü cumatama rû nûxü cucuëx na aixcüma yïñü i ngëma ore, rû

nüxü cucuèx na texégü tixīgüxü ga guxema namaã cuxü nguxëëgüxe. ¹⁵ Rü cuma nüxü cucuèx rü cubuxgumamatama nawa cungux i ngëma Tupanaärü ore i iünexü. Rü ngëmawa cunayaxu i cuèx na nüxü cucuáxüçèx i ñuxäcü tüxü na nangëxmaxü i maxü i taguma güxü ega Ngechuchu ya Cristuaxü yaxögügu. ¹⁶ Rü guxüma i Tupanaärü ore i umatüxü rü nügüäëwatama nanayaxu ya Tupana. Rü ngëma ore rü name na duüxügüxü namaã ingüxëëxü, rü namaã yaxucuxëgüxü rü namaã iyanawëxächixëëgüxü, rü namaã nangüxëëxü na meã Tupanapëxewa namaxëxüçèx. ¹⁷ Rü ngëmaäcü i ngëma ore rü tüxü narüngüxëë ya yixema Tupanaärü ixixë, na meã nüxü tacuáxüçèx i ngëma Tupana naxwëxexü rü itamemarexü na tanaxüxü i nagüxüraüxü i puracü i Tupana tümamaã nüxü ixuxü.

4

¹⁻² Rü nüma ya Ngechuchu ya Cristu ya núma tá ücü na nüxü yacagüxüçèx i ngëma duüxügü i maxëxü rü ngëma marü yuechirëxü, rü yimapëxewa rü Tupanapëxewa cuxü chamu na nüxü quixuxüçèx i ngëma ore i mexü. Rü ngëxguma cuxü yatauxchaächigu rü woo cuxü naguxchagu, rü chanaxwëxe i nüxü quixuama i ngëma ore. Rü ngëmaäcü chanaxwëxe na icuyanawëxächixëëgüxü rü meã cuyaxucuxëgüxü rü nüxü cunangücháxëëxü i duüxügü. Rü name nixi i yaxna namaã cuxinüäcüma meã cunangüxëë. ³ Erü yixcüra i duüxügü rü täütáma nüxü naxinüëchaü i ngëma nguxëëtae i mexü. Erü ngëma duüxügü rü nichixecüma. Rü ngëmacèx naxcèx nadaugü i norü ngüxëëruügü i nüma nanaxwëxëgüxüäcüma nangüxëëxü. ⁴ Rü täütáma nüxü naxinüëchaü i Tupanaärü ore i aixcüma ixixü. Erü ngëma ore i doramare ixixüguama tá narüxinüë. ⁵ ¡Natürü cuma rü meã cügüna nadau, rü ínaxuäë, rü namaã napora ega ngüxü cuxü üpetügü! ¡Rü nüxü ixuama i ore i mexü i tüxü maxëxëëxü, rü meã yanguxëë i ngëma puracü i Tupana cuxna äxü! ⁶ Täütáma muxü i ngunexü ñoma i naänewa changëxma erü marü choxü ningaica na Tupanaärü puracü chaxüxügagu chayuxü rü choxü na yamëxgüxü i duüxügü. ⁷ Rü choma rü marü chayanguxëë i ngëma puracü i Tupana choxna äxü. Rü ñuxma na nagüxü i ngëma puracü rü taguma nüxü charüxo na chayaxöxü. ⁸ Rü ñuxma rü marü Tupana choxü namaã nanguxü i ngëma ämare i mexëchixü ya törü Cori ya Ngechuchu ya äëxgacü ya mecü tá choxna äxü i ngëxguma wenaxärü ñoma i naänewa naxüxgu. Rü täütáma chaxica choxna nanaxä i ngëma ämare, natürü tá tüxna nanaxä ya guxäma ya yixema tümäärü ngücháümaã ínanguxëëgüxe na wenaxärü núma naxüxü.

Timutéuxü naxucuxë ga Pauru

⁹ Cumaã nüxü chixu rü chanaxwëxe i paxa nuã cuxü, rü choxü ícuyadau. ¹⁰ Dema rü ñoma i naänëärü ngëmaxügu naxinüxügagu choxna nixü rü ñane ga Techarónicawa naxü. Rü Crechéüte rü Gáraaanewa naxü, rü Titu i Darumáchiaanewa. ¹¹ Rü Lucaxicatama nixi i ñuxma chauxütawa ngëxmaxü. Rü chanaxwëxe i naxcèx cudau i Marcu na nuã cunagaxüçèx. Erü nüma rü chauxcèx name na choxü na nangüxëëxü i ñaã puracüwa. ¹² Rü Tíquicu rü ñane ya Epéchiuwa chanamu. ¹³ ¡Ngëxguma nuã cuxüxgu rü nuã nange i chorü gáxüxchiru ga ñane i Tróawa ngëxmaxü ga Carpupatawa chatáxü! Rü chanaxwëxe i nuã cunana i chorü poperagü. Rü guxüärü yexera chanaxwëxe na nua cunanaxü i chorü poperagü i idixgüpütaxü. ¹⁴ Areyáüdrü i cobrenaxcèx i buetarearü üwa puracüxü rü poraäcü chixri chomaã naxüpetü.

Natürü Tupana nüxü nacuèx i ñuxãcü tá na napoxcuãxü naxcèx ga yema chixexü ga chomaã naxüxü. ¹⁵ ¡Meã cugüna nadau na tama chixexü cumaã naxüxüçèx! Erü poraãcüxüchima naxchi naxai i Tupanaärü ore i mexü. ¹⁶ Yexguma noxrixüchima ãëxgacügüpëxewa chaugütüwa chideaxgu rü taxüema choxü tarüngüxëë. Guxüma choxna nibuxmü. Natürü tama chanaxwèxe ya Tupana rü nagu narüxînü i ngëma. ¹⁷ Natürü tórü Cori choxü naporaxëë rü choxü narüngüxëë na choxü natauxchaxüçèx na nüxü chixuxüçèx ga norü ore i mexü i tüxü maxëxëëxü. Rü yemaãcü guxüma ga yema duüxügü ga tama yaxögüxü ga yéma yexmagüxü rü nüxü naxînüë ga yema ore. Rü yemaãcü tórü Cori ya Ngechuchu choxü inanguxuchixëë ga yexguma taxü ga ãücümaxüwa chayexmagu. ¹⁸ Rü nüma ya tórü Cori tá choxü inanguxuchixëë nawa i guxüma i chixexügü. Rü tá choxna nadau na ngextá ãëxgacü iyîxüwa choxü nagaxüçèx. Rü name i guxüguma nüxü ticuëxüügü. Rü ngëmaãcü yîi.

Pauru rü wenaxârü Timutéuxü narümoxë rü naxcèx ínaca na Cori ya Ngechuchu ya Cristu nüxü rüngüxëëxü

¹⁹ Chanaxwèxe i chauégagu nüxü curümoxë i Prisila, rü Aquiru, rü Onechéperutanüxügü. ²⁰ Eratu rü îâne i Corîtiugu narüxãüx. Rü Turuquínu rü idaaawexüma îâne i Miretuwa chanatëx. ²¹ Rü naxüpa i gáuanexü rü chanaxwèxe i nuã cuxü. Rü cuxü narümoxëgü i Eubúru, rü Prudëte, rü Linu, rü Cúdia, rü guxüma i taeneëgü i yaxögüxü. ²² Rü chanaxwèxe i tórü Cori ya Ngechuchu ya Cristu cumaã nangëxma, rü Tupana pexü narüngüxëë ya guxâma i pemax.

Rü nuãma pexna,
Pauru

POPERA GA TITUCAX NAXÜMATÜXÜ GA PAURU

Tituxü narümoxe ga Pauru

¹⁻² Pa Titux, choma i Pauru i Tupanaärü puracütanüxü nixi i cuxcèx chanaxümatüxü i ñaã popera. Rü Ngechuchu ya Cristu nixi ga choxü mucü na ngëma duüxügü i Tupana dexümaã nüxü chixuxücèx i norü ore na Tupanaãxü yaxögüãxücèx rü nüxü nacüëxgüxücèx i ngëma norü ore i aixcüma ixixü i tüxü rüngüxëèxü na naxcèx imaxëxücèx. Rü ngëmaãcü Tupanaãxü tayaxögü rü naxcèx tamaxëchaü erü tanayauxgüchaü i ngëma maxü i taguma güxü. Rü ngëma maxü i taguma güxü nixi ga nuxcümaxüchima ga yexguma tauta naãne üxgu Tupana ya taguma idoracü nüxü ixuxü. ³ Rü ñuxma rü marü nawa nangu na Tupana tüxü nüxü cuèxëèxü i ngëma norü ore i mexü i tüxü maxëxëèxü. Rü ngëmacèx nümatama ya Tupana ya törü maxëxëèruü choxü namu na nüxü chixuxücèx i ngëma norü ore. ⁴ Pa Titux, cuma rü chaune quixi i Tupanaärü orewa yerü chauxütawa cunayaxu ga Tupanaärü ore ga noxri rü ñuxma rü chauxrüü cuyaxö. Rü chanaxwëxe i cuxü narüngüxëègü rü cuxü nataëxëègü ya Tanatü ya Tupana rü Ngechuchu ya Cristu ya törü maxëxëèruü.

Tituarü puracü ga yexguma Crétawa nayexmagu

⁵ Rü yexguma Crétaarü capaxügu cuxü chamüxgux, rü cumaã nüxü chixu na yema yaxögüxütanüwa cunaxüxü ga yema puracü ga tama chinguxëèxü ga yexguma cuxna yéma chataegugu. Rü yemacèx cumaã nüxü chixu na wüxichigü ya ñanewa rü nüxü cuxunetaxü i tupaucaarü äëxgacügü na ngema yaxögüxümaã inacuëxgüxücèx, yema cuxü chamuxüruü. ⁶ Rü wüxi i äëxgacü i yaxögüxüärü, rü name i meã namaxü na taxüema chixri nachiga idexagüxücèx. Rü name i wüxitama tixi ya namèx. Rü naxäcügü rü name na yaxögüãxü rü meã namaxëxü na taxüema nüxü ixuxücèx na chixri namaxëxü rü tama nanatüga naxinüèxü. ⁷ Erü yixema yaxögüxüärü äëxgacü ixixë, rü Tupanaärü puracü nixi i taxüxü. Rü ngëmacèx tanaxwëxe i aixcüma meã tamaxü. Rü tama name i wüxi i yatü i chixecümaxü tixi rü chixexügu rüxinüxü tixi. Rü tama name na tangäxüxü, rü nuxèx tadauxü, rü togü i duüxügüxü tawomüxëèxü norü diërucèx. ⁸ Natürü narümemae na guxügüma meã duüxügüxü tayaxuxü i tümapatawa, rü aixcüma nüxü tangechaü i ngëma duüxügü i meã maxëxü. Rü tanaxwëxe i wüxi i yatü i aixcüma tümäèxü cuáxe tixi, rü guxügüma duüxügümaä mecümaxë tixi, rü aixcüma Tupanacèx maxüxë tixi, rü guxügüma meã tümämaä icuáxe tixi. ⁹ Rü yixema yaxögüxüärü äëxgacü ixixë rü name i nagu tixü i ngëma ore i aixcüma ixixü ga tümamaã nüxü ixuxü na tümä rü ta togüxü tangüexëèxücèx i ngëma ore i mexü, na ngëmaãcü nüxü tanangüchaüxëèxücèx rü nüxü tayaxögüxëèxücèx i ngëma duüxügü i noxri tama yaxögüchaüxü. ¹⁰ Erü nangëxma i muxüma i yaxögüchirëxü i tama aixcüma irüxinüèchaüxü. Rü ngëma guxüärü yexera tama irüxinüèchaüxü nixi i ngëma Yudiügu i yaxögüchirëxü i ñuxma naxwëxegüxü na nuxcümaügüxü i nacümaawe naxixü i ngëma yaxögüxü. Rü nümagü rü ore i taxuwama mexüxü nixugügü, rü ngëmaãcü duüxügüxü nawomüxëègü. ¹¹ Natürü ngëma duüxügü i ngëmaãcü chixri nguxëëtaegüxü, rü chanaxwëxe i noxtacüma icuyanangeëxgüxëè. Erü muxüma i duüxügüxü

nachixexëëgü rü ñuxmata ñuxre ya İpatawachigü rü nanachixexëë i guxüma i duüxügü na tama aixcüma Tupanaaxü yaxögüaxüxcëx. Rü ngëma ore i taxuwama mexümaã duüxügüxü nangüexëë na ngëmaacü tüxü nawomüxëëgüacüma ngixü nayauxgüxcëx i dïeru. ¹² Rü wüxi ga yematama capaxüçüax ga norü tupanaarü orearü uruü nixi ga natanüxügüxütama ixuxü rü ñaxü:

“Rü ñaã Cretacüax i duüxügü rü guxüguma doratëxgüxü nixigü, rü ñoma naëxügürüü nidürae, rü nitaanü, rü nixoxochi”, ñaxü. ¹³⁻¹⁴ Rü aixcüma nixi ga yema ore ga nüxü yaxuxü ga yema yatü. Rü ngëmacëx chanaxwëxe i poraacü cuyaxucuxëgü i ngëma yaxögüxü na aixcüma meã yaxögüaxüxcëx, rü tama nagu naxiüxcëx i ngëma Yudiügücüma. Rü chanaxwëxe i namaã nüxü quixu na tama naga naxiüxcëx ega tacü namuaxgu i ngëma duüxügü i tama nüxü cuëxgüchaüxü i ore i aixcüma ixixü. ¹⁵ Rü yixema aixcüma Tupanapëxewa mexë rü guxüwama tame. Natürü yixema tama aixcüma Tupanapëxewa mexë, rü taxucürüwa tacü rü nacüma i nagu tixüxümaã tügü tamexëë. Rü woo tümaãewa nagu tarüxünuüwa rü tachixe erü ngëma nacüma i nagu tixüxümaã Tupanapëxewa tügü tamexëëchaü. ¹⁶ Rü ngëma duüxügü i ngëmagu rüxünuëxü rü nügü yaxugügügu rü Tupanaxü nacüex, natürü ngëma nümagü naxügüxüwa nüxü tacüex na tama aixcüma yixü na Tupanaxü nacüexgüxü. Rü nümagü rü Tupanapëxewa nichixe, rü tama naga naxiü, rü taxuwama nime na tacü rü mexü naxügüxü.

2

Nguxëëtae i aixcüma mexü

¹ Natürü i cuma, Pa Titux, rü name i guxügütama ngëma mexü i nguxëëtaemaã cunangüexëë rü taguma nüxna quixügachi. ² ;Rü meã yaxucuxëgü i ngëma yatügü i yaguaxgü na aixcüma meã naãexü nacuaacüma namaxëxcëx, rü taguma nadauxcüraxüwëxegüxcëx, rü guxüguma meã nagu na naxiüxcëx! ;Rü nangüexëë na aixcüma meã Tupanaaxü yaxögüaxüxcëx, rü guxü i duüxügüxü nangechaügüxcëx, rü yaxna namaã naxiüxcëx ega woo tacü rü guxchaxü nüxü üpetügux! ³ Rü ngëxgumarüü ta chanaxwëxe i meã cuyaxucuxëgü i ngëma ngexügü i yaguaxgü na meã Tupanapëxewa namaxëxcëx. Rü tama name na yaxoregütëxgüxü, rü nangaxëwëxegüxü. Rü name nixi i guxü i duüxügüpëxewa rü meã namaxë. ⁴⁻⁵ Rü ngëma ngexügü i yaguaxgü rü name nixi i meã na nangüexëëaxü i ngëma ngexügü i paxügü na aixcüma natexü rü naxäcügüxü nangechaügüxcëx, rü meã naãexü nacüexgüxcëx, rü mexügüxicatama na naxiüxcëx, rü meã napatana nadaugüxcëx, rü guxü i duüxügümaã namecümagüxcëx, rü aixcüma natega naxiüxcëx na taxüma chixri Tupanaarü orechiga idexagüxcëx. ⁶ ;Rü ngëxgumarüü ta meãma yaxucuxëgü i ngëma ngexügüxcügu na aixcüma meã naãexü nacuaacüma namaxëxcëx rü tama nadauxcüraxüwëxegüxcëx! ⁷ ;Rü cumatama rü name nixi i meã napëxewa cumaxü i guxüwama na ngëmaacü wüxi i norü cuëxruü i mexü quixüxcëx! Rü ngëxguma cunangüexëëgu, rü cunaxwëxe i mexügu curüxünuëcüma cunangüexëë rü tama ünücaacüma namaã nüxü quixu i ngëma ore. ⁸ Rü ngëxguma ngëmaacü meã cunangüexëëgu i ngëma ore i mexü, rü taxüetama texë chixri nachiga tidexa. Rü ngëmaacü ya yixema chixri tachiga idexagüchaüxë rü tá taxäneë erü taxucürüwa tacü rü chixexüxü tixugü i tachiga. ⁹ ;Rü meãma yaxucuxëgü i ngëma duüxügü i coriäxgüxü! ;Rü namaã nüxü ixu na guxüguma meã

norü coriga naxĩnũexũcèx, rü norü corimaã namecũmagũxũcèx, rü taguma norü corixũ nachoxũgagũxũcèx! ¹⁰ Rü tama name i norü coriaxũ nangĩxgũ, natürü nanaxwèxe i aixcũma meãma norü corimaã namaxè rü taguma nanawomũxèègũ. Rü ngèxguma ngèmaãcũ namaxègu, rü guxũma i togü i duũxũgũ tá nüxũ nadaugü na ñuxãcũ aixcũma namexèchixũ i ngèma ore i duũxũgũxũ namaã ingüexèèxũ nachiga ya Tupana ya tórü maxèxèèruũ. ¹¹ Tupana rü poraãcũxũchima tamaã namecũma, rü yemacèx núma nanamu ga Nane na guxũma i duũxũgũaxũ nangèxmaxũcèx i maxũ i taguma gũxũ ega nüxũ yaxõgũãgu. ¹² Rü ngèma na Tupana tamaã mecũmaxũwa nüxũ tacuèx na namexũ na nüxũ rüxoexũ i ñoma i naãneçũãxãrũ ngũchaũgũ rü guxũma i to i chixexũgũ i napèxewa ixũxũ. Rü ngèma Tupana taxcèx üxũ tüxũ nanguxèè na meã yigũmaã icuèxgũãcũma togü i duũxũgũpèxewa rü Tupanapèxewa meã imaxèxũ i ñoma i naãnewa. ¹³ Rü tüxũ nanguxèè ta na guxũguma meã ínanguxèègũxũcèx na nataeguxũ ya Ngechuchu ya Cristu ya tórü maxèxèèruũ ya tórü Tupana ya tacü ixĩcũ. Erü Tanatü ya Tupana rü tamaã inaxuneta na wena tá nataeguxũ ya Ngechuchu, rü wüxi i taãè tá nixĩ i ngèxguma ínanguxgu. ¹⁴ Rü núma ga Ngechuchu rü taxcèx nayu na tüxũ ínanguxũxèèxũcèx nawa i guxũma i chixexũ, rü tüxũ yamexèègũxũcèx na aixcũma norü duũxũgũ i mexũ ixĩgũxũcèx rü aixcũma naxcèx idaugũxũcèx na guxũguma mexũ ixũgũxũcèx. ¹⁵ Rü ngèma ore tá nixĩ i duũxũgũxũ namaã cungüexèèxũ rü nüxũ cunangũchaũxèèxũ na Tupanacèx namaxèxũcèx. Rü ngèma oremaã tá aixcũma cuyaxucuxègũ i duũxũgũ erü Tupanatama nixĩ ya cuxũ mucü na ngèmaãcũ cunaxũxũ. Rü tama name na texè cuxũ oxũ.

3

Ñuxãcũ name na namaxèxũ i ngèma yaxõgũxũ

¹ Rü ngèma yaxõgũxũ i duũxũgũ, ¡rü namaã nüxũ ixu na nachixũdanearuã ãèxgacũgũga naxĩnũexũ rü guxũma i ngema togü i ãèxgacũgũga naxĩnũexũcèx! ¡Rü yaxucuxègũ na ínamemaregũxũcèx na naxũgũãxũcèx i guxũma i mexũ i puracũgũ i ãèxgacũgũ unagũxũ! ² Rü tama name i texèchiga chixri nidexagü rü texèmaã nanuè. Natürü name nixĩ i guxũ i duũxũgũmaã namecũmagü rü aixcũma guxũ i duũxũgũxũ nangechaũgü rü tama nügü nicuèxũxũgü. ³ Rü name nixĩ i yaxna namaã taxĩnũè i ngèma tama yaxõgũxũ, yerü yixema rü ta ga ùpa rü chixri tamaxè, rü tama Tupanaga taxĩnũè. Rü itayarũtauxe rü tórü ngũchaũ tüxũ napora. Rü chixexũgu rüxĩnũèãcũma tamaxè rü taxãũxãchiwèxègü. Rü naxchi taxaie ga togü, rü núma rü ta taxchi naxaie. ⁴ Natürü yexguma Tupana ya tórü maxèxèèruũ tüxũ nüxũ dauxèègu i norü ngechaxũ naxcèx i guxũma i duũxũgü, rü núma rü tüxũ namaxèxèè. ⁵ Rü yema na tüxũ namaxèxèèxũ rü tama tacü rü mexũ na ixũgũxũgagu nixĩ, natürü tüxũ namaxèxèè yerü nüxũ tangechaũtũmũgü. Rü Naãè i Üünexũ i tüxũ ngexwacaxũxèèxũãrũ poramaã Tupana tüxũ inayanaxoxèè ga tórü pecadu na ngexwacaxũxũ i duũxũgü ixĩgũxũcèx. ⁶ Rü Ngechuchu ya Cristu ya tórü Maxèxèèruũgagu nixĩ ga Tupana ga guxũma ga norü ngũchaũmaã tüxna namuãxũ ga Naãè i Üünexũ. ⁷ Rü yemaãcũ tamaã namecũma rü tüxũ narũngũxèè ga Tupana na aixcũma imexũcèx i napèxewa, rü na nayauxgũxũcèx i ngèma írnguxèègũxũ i maxũ i taguma gũxũ. ⁸ Rü guxũma i ngèma marü cumaã nüxũ chixuxũ rü aixcũma nixĩ. Rü ngèmacèx chanaxwèxe i guxũguma nüxũ quixu i ngèma ore na aixcũma mexũ naxũgũxũcèx i ngèma duũxũgü i Tupanaãxũ yaxõgũxũ. Erü ngèma

ore rü guxŭwama name i guxăcèx. ⁹ ¡Natürü nüxna ixŭgachi i ngēma dexagü i taxuwama mexŭ i duŭxŭgü nawa nügü choxŭgagüxŭ rü ngēma oregü i nuxcūmaŭgüxŭ i duŭxŭgüchigamare ixŭgüxŭ! ¡Rü nüxna ixŭgachi i ngēma nügü ngaexŭ! ¡Rü tama name na natanügu cuxăxŭ i ngēma duŭxŭgü i nügümaă nüxŭ rünuētanücüxŭ nachiga i ngēma mugü ga Moïché ũmatüxŭ! Erü guxŭma i ngēma na nüxŭ rünuētanücüxŭ rü taxuwama name, rü natüçèxmamare nixŭ. ¹⁰ Rü ngēxguma chi wüxie i petanüwa rü chixexŭ i ngxŭētaemaă ngēma yaxŭgüxŭxŭ titoyegu, rü name nixŭ i tŭmamaă nüxŭ quixu na tama ngexŭ tawagüxŭcèx. Rü ngēxguma tanaxŭamagu, rü name nixŭ na wena tŭmamaă nüxŭ quixuxŭ. Rü ngēxguma tama cuga taxŭnŭchaŭgu rü tanaxŭamagu i ngēma chixexŭ rü name nixŭ i noxtacūma tŭxŭ ícumuxŭchi natanüwa i ngēma yaxŭgüxŭ. ¹¹ Erü ngēma chixri na tamaxŭxŭwa rü tá nangox na tachixŭeăxŭ ya yixema duŭxŭ rü tŭmaărü pecadugagu tá nixŭ na tapoxcuxŭ.

Tituxŭ naxucuxŭ ga Pauru

¹² Rü ngēxguma cuxŭtawa chanamuxgu i Artema rü ěxna Tíquicu, rü chanaxwèxe i paxa Nicaporíchiuwa cuxŭ na choxŭ ícuyadauxŭcèx. Erü ngema tá nixŭ i chanangupetüxŭxŭ ya yima tauemacügü ya nagu nagáuanecü. ¹³ Rü guxŭma i cuxŭ taxchaxŭmaă chanaxwèxe i nüxŭ curŭngŭxŭxŭ i äëxgacü i Chena i Dumacŭăxgüarü mugüxŭ cuăxŭ rü Aporu na paxa núma naxŭxŭcèx. Rü chanaxwèxe i nüxna cunaxă i ngēma nanaxwèxexŭ i norü namawaŭ na taxuŭma nüxŭ taxuxŭcèx. ¹⁴ Rü ngēma taeneëgü i yaxŭgüxŭ, rü name nixŭ i naxcèx nangúe na mexŭ naxŭgüxŭ rü togüxŭ nangŭxŭëgüxŭ ega ŭacü nüxŭ taxŭgux. Rü ngēmaăcü i ngēma togü rü tá nayaxŭgü.

Pauru rü wenaxărü Tituxŭ narümoxŭ rü naxcèx ínaca na Tupana nüxŭ rŭngŭxŭxŭcèx

¹⁵ Rü guxŭma i taeneëgü i nuă chauxŭtawa ngēxmagüxŭ rü cuxŭ narümoxëgü. Rü ngēxgumarüŭ ta i choma rü chanaxwèxe i nüxŭ curümoxŭ i taeneëgü i yaxŭgüxŭ i cuxŭtawa ngēxmagüxŭ. Rü chanaxwèxe i Tupana pexŭ narŭngŭxŭxŭ i guxăma i pemax.

Rü nuăma cuxna,
Pauru

POPERA GA FILEMÚŦCAX NAXŦMATŦXŦ GA PAURŦ

Pauru rŦ nŦxŦ narŦmoxŦ ga FilemŦ

¹ Pa ToeneŦ i FilemŦ i ToxrŦxŦ TupanaarŦ PuracŦwa PuracŦxex, choma i Pauru rŦ taeneŦ i TimutŦumaŦ cuxcŦx tanaxŦmatŦ i ŦaŦ popera. RŦ choma rŦ nuxa chapoxcu nagagu na nŦxŦ chixuxŦ i Ngechuchu ya CristuarŦ ore.

² RŦ ŦaŦ popera i cuxcŦx taxŦmatŦxŦ, rŦ naxcŦx ta nixŦ i ngŦma taeneŦgŦ i cupatawa ngutaquŦxegŦxŦ rŦ ngxŦcŦx ta nixŦ i taeyŦx i Ápia rŦ naxcŦx ta nixŦ i taeneŦ i Ariquepu i taxrŦxŦ TupanaarŦ puracŦwa puracŦxŦ. ³ RŦ chanaxwŦxe i TanatŦ ya Tupana rŦ tŦrŦ Cori ya Ngechuchu ya Cristu pexŦ narŦngŦxŦŦ rŦ pexŦ nataŦŦxŦŦ.

FilemŦ rŦ aixcŦma NgechuchuaxŦ nayaxŦ rŦ yema yaxŦgŦxŦxŦ nangechŦ

⁴ RŦ guxŦguma i ngŦxguma cuxna chacuŦxŦchigu i chorŦ yumŦxŦwa, rŦ Tupanana moxŦ chaxŦ cuxcŦx. ⁵ ErŦ nŦxŦ chacuŦchiga na ŦuxŦcŦ nŦxŦ cuyaxŦxŦ ya tŦrŦ Cori ya Ngechuchu rŦ ŦuxŦcŦ nŦxŦ na cungechaxŦxŦ i guxŦma i duŦxŦgŦ i TupanaarŦ ixŦgŦxŦ. ⁶ RŦ Tupanana naxcŦx chaca na cuxŦ nangŦxŦŦxŦcŦx na duŦxŦgŦmaŦ nŦxŦ quixuxŦcŦx na ŦuxŦcŦ CristuaxŦ yaxŦgŦxŦxŦ i yixemax, erŦ chanaxwŦxe na meŦ nŦxŦ cucuŦxŦ na ŦuxŦcŦ Ngechuchu ya Cristugagu poraŦcŦ tŦxŦ nangŦxŦŦxŦxŦ ya Tupana. ⁷ RŦ choma rŦ poraŦcŦ chataŦŦxŦchi na ŦuxŦcŦ nŦxŦ cungechaxŦxŦ i ngŦma yaxŦgŦxŦxŦ. ErŦ cugagu nixŦ, Pa ChaueneŦx, na nataŦŦgŦxŦ i ngŦma togŦ i yaxŦgŦxŦxŦ.

Pauru rŦ FilemŦnaca na mea OnŦchimuxŦ nayaxuxŦcŦx

⁸⁻⁹ RŦ ngŦmacŦx nangŦxma i wŦxi i ngŦxŦŦ i cuxŦtawaw naxcŦx ŦchacaxchaxŦxŦ. RŦ dŦcax, Cristu nixŦ ya choxŦ mucŦ rŦ ngŦmacŦx choxŦ nangŦxma i pora na cuxŦ chamuxŦ na cunaxŦxŦcŦx i ngŦma ngŦxŦŦ i mexŦ i tŦ cumaŦ nŦxŦ chixuxŦ. NatŦrŦ tama ngŦmaŦcŦ cuxŦ chamuxchaxŦ erŦ cuxŦ changechaxŦ, rŦ ngŦmacŦx chauxcŦx narŦmemaŦ nixŦ na cuxŦ chacŦŦxŦmarexŦ naxcŦx i ngŦma. RŦ choma i Pauru rŦ marŦ chaya rŦ Ŧuxma rŦ chapoxcu Ngechuchu ya CristucŦx. ¹⁰ RŦ ngŦmacŦx cuxna naxcŦx chacaxchaxŦ i wŦxi i ngŦxŦŦ naxcŦx i OnŦchimu i nuŦ poxcupataŦwa chauxŦtawaw CristuxŦ yaxuxŦ. RŦ ngŦmacŦx i Ŧuxma rŦ TupanaarŦ orewa rŦ chaune nixŦ. ¹¹ RŦ Ŧpa ga OnŦchimu rŦ wŦxi ga curŦ duŦxŦ ga taxuwama cuxŦ mexŦ nixŦ. NatŦrŦ i Ŧuxma rŦ cuxŦ rŦ choxŦ rŦ ta name. ¹² RŦ Ŧuxma rŦ cuxcŦx chanataeguxŦŦ i nŦma i OnŦchimu. RŦ chanaxwŦxe i meŦ canayaxu, Ŧoma choxŦ cuyaxuxŦrŦŦ. ¹³ ChierŦ chanaxwŦxe na nuxma chauxŦtagu naxŦxŦxŦ, rŦ na cuchicŦŦ choxŦ nangŦxŦŦxŦcŦx i Ŧuxma na chapoxcuxŦ naxcŦx i TupanaarŦ ore i mexŦ. ¹⁴ NatŦrŦ tama chanaxŦxchaxŦ i tacŦ i tauta “NgŦ” ŦacuxŦ choxŦ. ErŦ ngŦma ngŦxŦŦ i cuxna naxcŦx chaxaxŦ, rŦ chanaxwŦxe na curŦ ngŦchaxŦtama yŦixŦ i ngŦma rŦ tama i chorŦ mugagu na yŦixŦ. ¹⁵ RŦ bexmana Tupana nanaxwŦxe na paxaŦchi cuxna yaxŦxŦ ga OnŦchimu na yixcama rŦ wenaxarŦ cuxcŦx nataeguxŦcŦx rŦ ngŦmaŦcŦ guxŦgutama cuxŦtawaw nangŦxmaxŦcŦx. ¹⁶ NatŦrŦ i Ŧuxma rŦ tama ngŦxŦrŦŦxŦmare i curŦ duŦxŦrŦŦ nixŦ, erŦ wŦxi i curŦ duŦxŦarŦ yexera nixŦ i Ŧuxmax, erŦ taeneŦ i nŦxŦ ingechaxŦxŦ nixŦ. RŦ aixcŦma poraŦcŦ

nũxũ changechaũ i chomax, natũrũ chanawae i cuma rũ yexeraãcũ nũxũ cungechaũ. Erũ ñuxma rũ tama wũxi i curũ dũũxũmare nixĩ, natũrũ wũxi i cueneẽ i tórũ Coriaxũ yaxõxũ nixĩ i ñuxmax. ¹⁷ Rũ ngẽmacẽx, rũ ngẽxguma choxũ cudẽuxgu na aixcũma cueneẽ chiĩxũ, rũ chanaxwẽxe i meã cunayaxu i Onẽchimu, ñoma choxũ cuyaxuxũrũ. ¹⁸ Rũ ngẽxguma ãacũ rũ chixexũ cumaã naxũxgu rũ ẽxna ãacũ cuxũ nangetanũgu, rũ chanaxwẽxe i chomaã nũxũ quixu na ñuxre yiĩxũ, na cuxũ chanaxũtanũxcẽx. ¹⁹ Rũ chomatama i Pauru rũ choxmẽxmaãxũchi chanaxũmatũ i ñãã popera. Rũ aixcũma chomatama tá cuxũ chanaxũtanũ. Rũ tãũtãma cuxna nũxũ chacuẽxãchixẽẽ na ñuxãcũ choxũ cunangetanũxũ i curũ maxũ i taguma gũxũ i chaugagu Tupanaxũtawa cuyaxuxũ. ²⁰ Rũ ngẽmaãcũ, Pa Chaueneẽx, rũ chanaxwẽxe i tórũ Corigagu chaucẽx cunaxũ i ngẽma ngũxẽẽ. Rũ chanaxwẽxe i choxũ cutaãẽxẽẽ, erũ chaueneẽ i Cristuaxũ yaxõxũ quixĩ. ²¹ Rũ cuxcẽx chanaxũmatũ i ñãã popera erũ nũxũ chacuẽx na aixcũma chauga cuxĩnũxũ rũ tá cunaxũxũ i ngẽma cuxna naxcẽx chaçaxũãrũ yexera. ²² Rũ ngẽxgumarũũ ta chanaxwẽxe na chaucẽx cunamexẽẽxũ i wũxi i nachica i ngextã tá nawa changuxũ. Erũ íchananguxẽẽ na Tupana tá nangãxũxũ i perũ yumũxẽgũ, rũ tá choxũ nangũxẽẽxũ na pexũ íchayadauxũcẽx.

Pauru rũ wenaxãrũ Filemũũxũ narũmoxẽ rũ naxcẽx ínaca na Cori ya Ngechuchu ya Cristu nũxũ rũngũxẽẽxũ

²³ Rũ moxẽ cuxcẽx ngema namu i Epáparu. Rũ nũma rũ wũxigu chomaã napoxcu naxcẽx ya Ngechuchu ya Cristu. ²⁴ Rũ ngẽxgumarũũ ta moxẽ cuxcẽx ngema namugũ i Marcu, rũ Aritárcu, rũ Dema rũ Luca. Rũ nũmagũ rũ chomũcũgũ nixĩgũ i Tupanaãrũ puracũwa. ²⁵ Rũ chanaxwẽxe i tórũ Cori ya Ngechuchu ya Cristu pexũ narũngũxẽẽ i guxãma i pemax.

Rũ nuãma cuxna,
Pauru

POPERA GA YUDÍUGÜ GA YAXŌGÜXÜCA_X ÜMATÜXÜ

Tupana rü Nanewa tamaã nidexa

¹ Nuxcüma ga Tupana rü muëxpüxcüna rü nagüxüraüxüãcüma norü orearü uruüğüwa tórü oxigümaã nidexa, rü namaã nüxü nixu ga tacü nüxü na nanaxwëxexü. ² Natürü i ñomaücüü ya Tupana rü Nanewatama nixi i tamaã yadexaxü rü tüxü nüxü nacuëxëëxü na ñuxäcü tüxü nangüxëëchaüxü. Rü gumaxü nixi ga namuxü na naxüãxüçex ga ñoma ga naãne rü daxüguxü ga naãne rü üëxcü rü tauemacü rü woramacurigü rü ëxtagü. Rü ñuxüchi guma Nanena nanana ga guxüma ga yema na noxrü yixüçex. ³ Rü Nanewa nixi i nüxü idauxü na ñuxäcü namexëchixü i nüma ya Tupana. Rü nüma ya Nane rü Nanatü ya Tupanarütama nixi. Rü ñuxma na guxüärü äëxgacü yixü ya Nane, rü guxümaãma inacuëx rü norü ore i poraxümaã nanamu i guxüma na nüma nanaxwëxexüãcüma na yixüçex. Rü nüma ya Nane nixi ga taxcëx nayuxü na nüxü rüxoëxüçex ga tórü pecadugü. Rü yemawena rü Nanatüxütawa naxü i daxüguxü i naãnewa. Rü yéma Nanatüarü tügü necüwawa nayarüto erü guxüärü äëxgacü nixi i ñuxmax.

Tupana Nane rü guxüma i orearü ngeruüğü i daxü- cüãxëtüwa nangëxma

⁴ Rü ñuxma i nüma ya Nane rü guxüma i Tupanaärü orearü ngeruüğü i daxüçüãxärü yexera nixi rü naëtüwa nangëxma yerü yemaãcü nanaxuegu ga Nanatü. ⁵ Rü ngëmaãcü nixi i ñuxma yerü ga Tupana rü taguma wüxi ga norü orearü ngeruüxü ñanagürü:

“Cuma nixi i Chaune. Rü ñuxma chanangoxëë na aixcüma Chaune quiixü”, ñanagürü. Rü taguma wüxi ga norü orearü ngeruüchiga ñanagürü:

“Choma nixi i Nanatü chiixü rü nüma rü Chaune nixi”,

ñanagürü. ⁶ Natürü yexguma ñoma ga naãnewa namuãgu ga Nane ya guxüëtüwa ngëxmacü, rü ñanagürü ga Tupana:

“Chanaxwëxe i guxüma i chorü orearü ngeruüğü i daxüçüãx rü nüxü nicuëxüüğü ya Chaune”,

ñanagürü. ⁷ Rü yexguma norü orearü ngeruüğü ga daxüçüãxchiga yadeaxgu ga Tupana, rü ñanagürü:

“Choma chanaxwëxexüãcüma chanamu i ngëma chorü orearü ngeruüğü i chorü ngüxëëruüğü ixigüxü. Rü ngëxguma chanaxwëxegu rü ñoma buanecü rü ñoma üxüemarüü chayaxigüxëë, rü chanaporaexëë na naxügüãxüçex i chorü ngüchaü”,

ñanagürü. ⁸ Natürü yexguma Nanechiga yadeaxgu ga Tupana rü ñanagürü:

“Cuma rü chauxrüü Tupana quixi. Rü guxügutäma äëxgacü quixi. Rü aixcüma meã guxümaã icucuëx erü aixcümacü quixi. ⁹ Rü nüxü cungechaü i guxüma i ngëma nacüma i mexü natürü naxchi cuxai i guxüma i ngëma nacüma i chixexü. Rü ngëmacëx i choma na Cumatü ya Tupana chiixü rü guxüëtüwa cuxü changëxmaxëë rü guxüärü yexera cuxü chataãëxëë”,

ñanagürü. ¹⁰ Rü yexgumarüü ta Nanexü ñanagürü ga Tupana:

“Cuma rü guxüärü Cori quixi. Rü noxriarü ügügumama ga yexguma natauxgutama ga ñoma ga naãne, rü cuma nixi ga cunaxüxü. Rü cumatama nixi ga cunaxüxü ga üëxcü rü tauemacü rü guxüma

ga ětagü. ¹¹ Rū guxūma i ngēma rü tá nagux, natürü i cuma rü guxūgutáma cungēxmaēcha. Rū guxūma i ngēma rü ñoma naxchirurūü tá nangaue. ¹² Rū ñoma wūxi i naxchiru i ngauxü i ngema itēxmarexūrūü tá ícunawogü i ñoma i naāne rü guxūma i daxūwa nüxü idauxü. Rū to i ngexwacaxūxūmaā tá cunaxūchicüü, ñoma wūxi i naxchiru i ngauxü i ngexwacaxūxūmaā ixūchicüüxūrūü. Natürü i cuma rü tá cunaxējrxūgumaraxūēcha rü tagutáma cuyu”,

ñanagürü ga Tupana. ¹³ Rū Tupana rü ñanagürü nüxü:

“¡Nuā chauxūtawa rüto ñuxmatáta nüxü cuxü charüporamaēxēē i guxūma i curü uwanügü!”

ñanagürü. Natürü ga Tupana rü taguma yema ñanagürü nüxü ga ngēxūrūüxü ga norü orearü ngeruügü ga daxūcūāx. ¹⁴ Rū guxūma i Tupanaārü orearü ngeruügü i daxūcūāx rü naāēgü i Tupanaāxü puracüexü nixigü. Rū nūma ya Tupana rü nūma nanamugü na nüxü yanangūxēēgūxúcex i guxūma i ngēma duūxgü i Tupana naxwēxexü na nayauxgüāxü i maxü i taguma gūxü.

2

Tama name i nüxü taxoe i ngēma maxü i Tupana tüxna uaxüxü

¹ Rū ñuxma na nüxü icuáxü na guxūma i Tupanaārü orearü ngeruügü i daxūcūāxārü yexera yīxü ya Nane, rü ngēmacēx name na yexeraācü meā naga ixīnūēxü i ngēma ore i nachiga ixīxü. Erü tama tanaxwēxe na nüxü rüxoexü na yaxōgūxü. ² Rū yexguma tauta Nane ya Cristuxü nūma namuxgu ga Tupana, rü norü orearü ngeruügü ga daxūcūāxgūwa duūxgūmaā nüxü nixu ga norü mugü na naga naxīnūēxúcex. Rū yema mugü rü aixcūma napora yerü guxūma ga yema duūxgü ga tama naga īnūēxü, rü yema mugü nüxü ixuxūācūma Tupana nanapoxcue. ³ Rū yexguma yemaācü napoxcueāgu ga yema duūxgü ga tama naga īnūēxü, ¿rū ñuxúcürüwa i yixema i naxchaxwa ibuxmüxü na tama tüxü napoxcuexúcex ega nüxü ixoegu i ngēma maxü i mexēchixü i ñuxma Cristugagu tüxna naxuaxūxü? Rū dūcax, nūmatama ya tórü Cori nixī ga nüxīra naxunagūāxü ga yema maxü, rü ñuxūchi yixcama nixī ga yema nüxü īnūēxü ga nüxī meā tüxü nüxü nacuēxēēxü na aixcūma yīxü i tüxü nangēxmaxü i ngēma maxü ega nüxü yaxōgūgu ya Cristu. ⁴ Rū nūmatama ga Tupana rü ta taxcex nanangoxēē na aixcūma yīxü i Cristugagu tüxü nangēxmaxü i ngēma maxü. Yerü nūma ga Tupana rü Naāe i Üünexūwa tüxü nanawēx ga naguxūraxūxü ga taxü ga mexügü rü cuēxruxügü ga norü poramaā naxūxü yema nūma nanaxwēxexūācūma. Rū yemaācü nixī ga wenaxārü tüxü nüxü nadauxēēxü na aixcūma yīxü na Cristugagu tüxü nangēxmaxü i ngēma maxü.

Tupana rü ñoma ga naānewa nanamu ga Ngechuchu ya Cristu na taxrüü duūxüxü yīxúcex

⁵ Rū ñuxma rü guxūma i ngēma mexügü i Cristugagu tüxü ngēxmaxü i pemaā nüxü tixuchigaxü, rü Tupana rü taguma daxūcūāx ga norü orearü ngeruügüna naxāga na namaā inacuēxgūxúcex. Natürü duūxgūxü nixī ga namuxü na namaā inacuēxgūxúcex ga guxūma ga yema mexügü. ⁶ Erü Tupanaārü ore i ūmatūxūwa rü ñanagürü:

“Pa Tupanax, ¿rū tacü nixī i duūxgü rü ngēmacēx nagu curüxīnūxü? ¿Rū tacüwa name rü ngēmacēx nüxü cungechaūxü? ⁷ Rū paxaāchi curü orearü ngeruü ga daxūcūāxgütüüwa cunayexmagūxēē ga duūxgü,

natürü i ñuxma rü aixcüma namaã cutaãe rü nüxü quicuèxüxü. ⁸ Rü naxmèxwa cunangèxmaxèe i guxüma ga yema cuxüxü”, ñanagürü i ngèma orewa. Rü yemaãcü nixi ga Tupana ga duüxügümèxèwa nayexmagüxèèxü i guxüma i ñoma i naãnewa ngèxmaxü. Rü nataxuma i tacü i ñoma i naãnewa i tama naxmèxwa nangèxmaxèèxü. Natürü woo na ngèmaãcü yixü, rü ñuxma rü ta tauta nüxü tadau na duüxügümèxèwa nangèxmaxü i guxüma i ñoma i naãnewa ngèxmaxü. ⁹ Natürü nüxü tadau ya Ngechuchu ya aixcüma guxümaãma icuãcü. Rü yexguma Tupana ñoma ga naãnewa namuxgu rü paxaãchi norü orearü ngeruü ga daxüçüãxgüarü ñaxtüwaama nanaxüxèe. Natürü i ñuxma ya Tupana rü poraãcü Ngechuchuxü nataxèe rü ãëxgacü ya tacü nayaxixèe yerü ngüxü ninge rü guxüma ga duüxügücèx nayu yerü yemaãcü nanaxwèxe ga Tupana yerü tüxü nangechaü rü tüxü narüngüxèèchaü. ¹⁰ Yerü ga Tupana rü nanaxwèxe na guxüma i naxãcügü nüxü nangèxmaxüçèx i nachica i mexü i naxütawa. Rü yemacèx ñoma ga naãnewa nanamu ga Ngechuchu ya Cristu na ngüxü yangexüçèx rü taxcèx nayuxüçèx na aixcümexüchi tüxü nangèxmaxüçèx i maxü i taguma gúxü. Rü name nixi na yemaãcü naxüãxü ga Tupana yerü nümatama nixi ga naxüãxü ga guxüma rü namèxwa nangèxma na nüma nanaxwèxexüãcüma namaã inacuãxüçèx. ¹¹ Rü Ngechuchu nixi ya tüxü imexèègücü na Tupanapèxewa ixüünegüxüçèx. Rü ñuxma i nüma ya Ngechuchu ya tüxü imexèègücü rü guxãma i yixema na tüxü yaxüünexèègüxü rü wüxitama nixi ya Tanatü. Rü ngèmacèx nixi i nüma ya Ngechuchu ya Tupana Nane, rü tama taxcèx naxãnexü na naëneëgümaã tüxü naxuxü. ¹² Erü Tupanaärü ore i ümatüxüwa rü ñanagürü ga Nane:

“Rü chaueneëgüxü tá nüxü chacuèxèe i cuchiga, Pa Chaunatüx. Rü norü ngutaquèxegüwa rü tá cuxcèx chawiyae na ngèmaãcü cuxü chicuèxüxüçèx”,

ñanagürü. ¹³ Rü toxnamana i Tupanaärü ore i ümatüxüwa rü ñanagürü ta ga Nane:

“Cuxü chayaxö, Pa Chaunatüx, erü nüxü chacuèx rü tá choxü curüngüxèe”, ñanagürü. Rü ñanagürü ta:

“Rü daxe chixi, Pa Chaunatüx, namaã i cuxacügü i chaueneëgü i choxna cumugüxü”,

ñanagürü. ¹⁴ Rü nüma ga Ngechuchu rü woo Tupana na yixixü natürü duüxürüxüãcü ñoma ga naanewa naxü na taxrüxü naxãmachixüçèx rü naxãgüxüçèx na tachicüü nayuxüçèx rü yemaãcü yanaxoxèèãxüçèx ga Chatanáarü pora ga namaã tüxü iyanatauxèèxchaüxü. ¹⁵ Rü yemaãcü nanaxü ga Ngechuchu na Chatanámxèwa tüxü ínangüxüxèèxüçèx ya guxãma ya yixema noxri naxcèx muüxèe ga na tayuxü. ¹⁶ Rü yemacèx ñoma ga naãnewa nangu ga Ngechuchu na taxcèx nayuxüçèx i guxãma i yixema na Abráürüü yaxögüxü. Rü tama daxüçüãx i orearü ngeruügücèx nayu, natürü taxcèx nixi ga numa naxüxü rü nayuxü. ¹⁷ Rü nüma ga Ngechuchu rü nanaxwèxe na yixema i naëneëgü ixigüxürüütama nügü na yaxixèèxü na yemaãcü aixcüma mecümacü ya nüxü ingechaütümüügücü ya tóru chogürüü yixüçèx i Tupanapèxewa. Rü yemacèx nixi ga nügü inaxãxü rü nayuxü na yemaãcü Tupana duüxügüaxü nüxü ngechaüxüçèx i norü pecadugü. ¹⁸ Rü yema nümatama ngüxü na yangexü ga yexguma Chataná nüxna ñnügu, rü ngèmacèx i ñuxma rü nüxü natauxcha na tüxü nangüxèèxü ya yixema Chataná tüxna ñnüxè.

3

Ngechuchu rü Moïchéxü narüyexera

¹ Rü ñuxma Pa Chaueneëgü ya Tupanapëxewa Üünegüxe, rü pexü nixi ya Tupana inadexü na norü duüxügü pixigüxcëx. Rü ngëmacëx name nixi i aixcüma meã nagu perüxñüë ya Ngechuchu ya Cristu ya Tupana núma namucü. Rü núma ya Ngechuchu nixi i tóru chogüruü i Tupanapëxewa tüxü ixüünexëcëcü. Rü yimaãxü nixi i yaxögüxü. ² Rü Tupana rü marü Ngechuchuxü naxuneta na naxüãxcëcëx ga yema puracü ga Tupana nüxna äxü. Rü núma ga Ngechuchu rü aixcüma Nanatüga naxñü rü nayanguxëë ga yema puracü yexgumarüü ga Moïché meãma na naxüxü ga yema puracü ga Tupana nüxna äxü na nüxna nadauxcëcëx ga Tupanaärü duüxügü ga Yudiügü. ³ Rü woo ga noxri rü Moïchéxü nitaëgacüüxëë ga Tupana, natürü i ñuxma rü Moïchéarü yexera Ngechuchuxü nixi i yataëgacüüxëëxü. Rü wüxi ya İpata ya ngexwacëx ixüxünerüü nixi, erü woo ngëma İpatamaã tataãë, natürü ngëma yexeraäcü nüxü icuëxüüxü nixi i ngëma İpataarü üruü. ⁴ Rü guxüñema ya İ rü nüxü nangëxma i norü üruü. Natürü guxüma i tacü i ngëxmaxü, rü Tupana nixi ya naxücü. ⁵ Rü Moïché rü wüxi ga Tupanaärü duüxü ga aixcüma mexü nixi yerü meã nüxna nadau ga Tupanaärü duüxügü ga Yudiügü, yema Tupana namaã nüxü ixuxürüü. Rü núma ga Moïché nixi ga yema duüxügümaã nüxü yaxuxü ga ñuxäcü Tupana tá yixcüra nüxü na rüngüxëëxü. ⁶ Natürü nüma ya Ngechuchu rü Moïchéarü yexera nixi erü Tupana Nanexüchi nixi. Rü núma nixi i nüxna nadauxü i guxüma i ngëma Tupanaärü duüxügü ixigüxü. Rü yixema rü ta Tupanaärü duüxügü üxigü ega aixcüma Ngechuchuaxü yaxögügu rü taguma nüxü rüxoegu. Rü Tupana nanaxwëxe na guxügüma Ngechuchumaã itaëëgüxü erü nüxü tacuëx na wüxi i ngunexü rü tá taxcëx nataeguxü na wüxiwa namaã ingëxmagüxcëx.

Tupanaärü duüxügü rü tá inarüngüë

⁷⁻⁸ Rü ngëmacëx i Tupanaärü ore i ümatüxüwa rü ñanagürü i Naãë i Üünexü: “Rü ñuxma na nüxü pexññüëxü i ngëma Tupana pemaã nüxü ixuxü, rü tama name na nüxü pexoexü, yexgumarüü ga na naxügüãxü ga yema duüxügü ga Tupanaxü ügüxü rü tama naga İñüëxü ga yexguma Moïchéwe naxixgu ga yema naãne ga ngextá taxüema İxäpataxüwa”.

⁹ Rü yemacëx ga Tupana rü ñanagürü:

“Rü yéma nixi ga chixexü naxügüxü ga nuxcümaügüxü ga perü oxigü yerü choxü naxügü yerü tama choxü nayaxögüchaü. Rü yemaäcü nanaxügü woo 40 ga tauncëgu nüxü na nadaugüxü ga yema mexügü ga üünexü ga napëxewa chaxüxü. ¹⁰ Rü yemacëx namaã chanu ga yema duüxügü, rü ñacharügü nüxü: ‘Pema rü guxügüma chixexügüxicatama perüxñüëëcha, rü taguma penaxüxchaü i ngëma chanaxwëxexü na penaxüxü’, ñacharügü nüxü. ¹¹ Rü yemacëx nixi ga namaã chanuxü ga yema duüxügü, rü aixcümaxüchi namaã nüxü chixu na täütáma yema naãne ga noxri namaã ichaxunetaxüwa nangügüxü na ngëxma nangüëxüxcëx”,

ñanagürü ga Tupana. ¹² Rü ñuxma Pa Chaueneëgüx, rü name nixi i pegüna pedaugü na tama ngürüächi pechixearü maxüãxcëcëx, rü ngëmagagu na nüxü perüxoexü na Tupana ya maxücüaxü na peyaxögüxü. ¹³ Natürü ñuxma pexü natauxchagu, rü name nixi na wüxichigü pegüaxü penangüchaüxëëxü i guxü i ngunexügu na taxüema i petanüwa Tupanaxü taxoxcëcëx nagagu

i ngēma pecadu i pexū womūxēēchaūxū. ¹⁴ Rū ngema na Cristuxūtawa nayauxgūxūcēx i maxū i taguma gūxū, rū tanaxwae na guxūguma aixcūma yaxōgūechaxū. Rū ngēxguma noxrirūūtama guxūguma meā nūxū yaxōgūechagu rū tama nūxū rūxoegu, rū tá namaā tūxū nangēxma i tachica i daxūguxū i naānewa. ¹⁵ Natūrū űuxma nixī i namexū na meāma yaxōgūxū. Rū ngēmacēx i Tupanaārū ore i űmatūxūwa rū űanagūrū:

“Rū űuxma na nūxū pexīnūēxū i ngēma Tupana pemaā nūxū ixuxū, rū tama name na nūxū pexoexū, yexgumarūū ga yema duūxūgū ga tama Tupanaga űnūēxū ga yexguma Moīchéwe naxīxgu ga yema naāne ga ngextá taxūema íxāpataxūwa”,

űanagūrū. ¹⁶ ¿Rū texégū tixī ga guxema nūxū űnūēxē ga yema Tupana tūmamaā nūxū ixuxū, rū űuxūchi tama Tupanaga űnūēxē? Rū pemaā nūxū chixu rū yemagū nixī ga yema duūxūgū ga Moīché Equituanewa ínguxūxēēxū. ¹⁷ ¿Rū texēmaā nixī ga nanuxū ga Tupana ga 40 ga taunecūgu? Rū pemaā nūxū chixu rū namaā nanu ga yema duūxūgū ga chixexū űgūxū. Rū yemacēx yema nachica ga ngextá taxūema íxāpataxūgu nayue. ¹⁸ ¿Rū texégūmaā nixī ga aixcūmaxūchi inaxunetaxū ga Tupana na tāūtama yema naānewa nangugūxū na yexma nangūēxūcēx? Rū pemaā nūxū chixu, rū yemagū nixī ga yema duūxūgū ga tama naga űnūēxū. ¹⁹ Rū ngēmawa nūxū tacuēx na taxucūrūwama yema naāne ga noxri Tupana namaā ixunetaxūwa nangugūxū ga yema duūxūgū, yerū tama nūxū nayaxōgū.

4

¹ Rū ngēmacēx i űuxma na Tupana tamaā ixunetaxū na nūgūxūtawa tá tūxū yachocuxēēxū na ngēxma rūngūēxūcēx, rū tanaxwēxe i taxuāēgū, na tama ngūrūāchi wūxie i tatanūwa tama ngēxma taxūcuxū. ² Erū űuxma i yixema rū marū nūxū taxīnūē i Tupanaārū ore i mexū, yexgumarūū ga yema nuxcūmaūgūxū ga duūxūgū nūxū na naxīnūēxū. Natūrū nūmagū ga yema duūxūgū rū taxuwama nūxū name ga nūxū na naxīnūēxū ga yema ore yerū tama yema naga űnūēxūrūū aixcūma nūxū nayaxōgū. ³⁻⁴ Natūrū i yixema na yaxōgūxū, rū tá aixcūma Tupanaxūtawa tichocu na ngēxma rūngūēxūcēx. Rū wūxiwa i Tupanaārū ore i űmatūxūwa rū ngūxchigaarū ngunexūchigaxū nixu, rū űanagūrū:

“Rū 6 ga ngunexūgu nixī ga naguxēēāxū ga norū puracū ga Tupana. Rū yexguma norū 7 ga ngunexūwa nanguxgu rū guxūma ga norū puracūna narūngū”,

űanagūrū. Rū nuxcūma ga Tupana rū nanaxwēxe na nangūēxū ta ga yema nuxcūmaūgūxū ga tōrū oxigū ga Moīchéwe rūxīxū. Natūrū ga nūmagū rū tama nūxū nayaxōgūchaū rū tama naga naxīnūē. Rū yemacēx ga Tupana rū norū ore i űmatūxūwa rū űanagūrū:

“Yema duūxūgū rū tama choxū nayaxōgū rū yemacēx namaā chanu rū aixcūmaxūchi namaā nūxū chixu na tāūtama yema naāne ga namaā ichaxunetaxūwa nangugūxū na ngēxma nangūēxūcēx”,

űanagūrū. ⁵⁻⁶ Rū yemaācū ga yema duūxūgū ga nūxīra nūxū űnūēxū ga Tupanaārū ore i mexū, rū tama nawa nichocu ga yema nachica ga Tupana namaā nūxū ixuxū, yerū tama naga naxīnūē. Rū ngēmacēx nixī i Tupanaārū ore i űmatūxūwa i űaxū:

“Ngēma duūxūgū i tama chauga űnūēxū rū tāūtama ngēma nachica i namaā ichaxunetaxūwa nichocu na ngēxma nangūēxūcēx”,

ñaxũ. Natürũ ñuxma rü ta nangëxma i nachica i tümacèx ya yíxema ngëxma Tupanaxütagu chocuchaũxë na ngëxma tarüngüëxüxcëx. ⁷⁻⁸Rü ngëma nachica i ngextá nagu nangüëxü i duũxügu rü tama yema naãne ga nuxcúmaügüxü ga tórü oxigüxácügü tümaãrũ äëxgacü ga Yochuémaã tayauxgüxü nixĩ. Yerü yexguma chi yema naãne yixügu, rü Tupana rü tãu chima wenaxãrũ nüxü naxuneta ga to ga ngunexü na nagu naxütawa yachocuxüxcëx na ngëxma nangüëxüxcëx i duũxügu. Rü yemacèx ga Tupana rü wenaxãrũ nüxü naxuneta i wüxi i to i ngunexü na naxütawa yachocuxüxcëx i duũxügu na ngëxma nangüëxüxcëx. Rü ngëma ngunexü rü ñuxma nixĩ. Rü yemacèx ga Tupana rü mucüma ga taunecü ga Moïchéwena rü Dabímaã nüxü nixu ga yema norü ore ga úmatüxü i ñaxũ:

“Rü ñuxma na nüxü pexĩnüëxü i ngëma Tupana pemaã nüxü ixüxü, rü tama name na nüxü pexoëxü”,

ñaxũ. Rü yematama nixĩ ga ore ga marüchirëx pemaã nüxü chixuxü. ⁹Rü ngëmacèx i ñuxma rü ta nangëxma i wüxi i nachica i üünexü i nagu tá aixcüma nangüëxü i ngëma Tupanaãrũ duũxügu ixügüxü. ¹⁰Rü yíxema Tupanaxütawa ichocuxe na ngëxma tarüngüëxüxcëx, rü nüxna tarüngüë i guxüma i tümaãrũ puracügü yexgumarüü ga Tupana rü nüxna na nangüxü ga norü puracügü ga yexguma naãne naxüxguwena. ¹¹Rü ngëmacèx name na meã yaxöögüxü rü naga ixĩnüëxü na ichocuxüxcëx i ngextá Tupana tüxü írüngüëxëëxüwa. Erü tama tanaxwëxe na texé ngürüãchi yema nuxcúmaügüxü ga duũxügu ga tama Tupanaãrũ ñnüëxürüü norü orexü na taxoxü. ¹²Erü Tupanaãrũ ore rü namaxü rü naporaxüchi. Rü wüxi i tara i guxücüwawa meã waixmaguxüãrũ yexera nixĩ na natéxü. Erü ngëma ore rü tawa nixücu ñuxmata taãëwa nangu, rü ñuxmata nawa nangu i ngëma wüxichigü nagu rüxĩnüxü. Rü ngëmaãcü meãma nanangoxëëãma i guxüma i ngëma yixicatama nagu rüxĩnüxü rü tüxü ngüchaũxü. ¹³Rü nataxütãma i ñacü i Tupana üxü i tá naxchaxwa nügü icüxü erü napëxewa rü guxüma meã nangox. Rü guxüxü nadau rü guxüxü nacüëx ya yima tá tüxna çacü na namaã nüxü ixüxüxcëx i tórü maxüchiga.

Ngechuchu rü mecüxüchi ya tórü ngüxëëruü nixĩ i Tupanapëxewa

¹⁴Ngechuchu ya Tupana Nane rü mecüxüchi ya tórü ngüxëëruü nixĩ i Nanatüpëxewa. Rü ñuxma rü daxüguxü i naãnewa i Nanatüxütawa nangëxma na ngema taëtüwa nachogüxüxcëx. Rü ngëmacèx tanaxwëxe i guxüxüga nüxü tayaxöögüecha rü taguma nüxü tarüxoe. ¹⁵Rü nüma ya Ngechuchu rü aixcüma nüxü nacüëx na tüxü nangüxëëxü erü nüxü nacüëx na ñuxãcü tüxü naguxchaxü i ngëxguma Chataná tüxna ñnügu rü pecadugu tüxü nanguxëëchaügu, yerü nüxna rü ta naxĩnü ga Chataná, ngëma tüxna na naxĩnüxürüü. Natürü nüma ga Ngechuchu rü taguma chixexü naxü. ¹⁶Rü ñuxma na tüxü nangëxmaxü ya tórü ngüxëëruü ya Ngechuchu, rü name nixĩ i tama imuëãcüma nüxna tangaicamagü ya tórü äëxgacü ya Tupana ya tüxü ngechaücü. Rü tanaxwëxe na ngëmaãcü nüxna ingaicamagüxü na nüxü ingechaütümüügüxüxcëx rü tüxü nangechaüãcüma tüxü nangüxëëxüxcëx i ngëxguma guxchaxügu tüxna ngaicamagu.

5

¹Nuxcüma ga Tupana rü Moïchémaã nüxü nixu na Arãü yixüxcëx ga Yudiügüarü paigüeru ixicü na guma duũxüguëtüwa chogüxüxcëx ga Tupanapëxewa. Rü guxüma ga yema Arãüwena ügüxü ga paigüeru rü duũxügütanüwa nüxü naxunetagu na yema duũxügüarü ngüxëëruü yixüxcëx

ga Tupanapēxewa rü Tupanana naxāāxūcēx ga āmaregū rü Tupanacēx nadaiāxūcēx ga naxūnagū na yemaācū nūxū nūxū nangechaūxūcēx ga norū pecadugū. ² Natürü ngēma paigūeru rü guxūma i duūxūgūrūttama nixī na pecadugu nanguxū. Rū ngēmacēx nūxū nacuēx na űuxācū yaxna namaā naxīnūxū i duūxūgū i ngēxguma naēchitamare pecadu naxūegu rü tama aixcūma Tupanawe naxīxgu. ³ Rū ngēma paigūeru rü tama ngēma duūxūgūarū pecaducēxicatama nixī i nadaiāxū i naxūnagū, natürü nanaxwēxe i noxrūtama pecaducēx rü ta na nadaiāxū i naxūnagū na ngēmaācū Tupana nūxū nūxū nangechaūxūcēx i ngēma pecadugū. ⁴ Rū taxūema tūgūtama tingucuchixēē na paigūeru tiīxūcēx. Natürü Tupana nixī ya tūxū unetacū rü tūxna naxācū i ngēma puracū na paigūarū āēxgacū tiīxūcēx, yexgumarūū ga Tupana rü Arāxū na yangucuchixēēxūrūū na paigūeru yiīxūcēx. ⁵ Rū yexgumarūū ga Ngechuchu rü tama nūgūtama ningucuchixēē na Tupanapēxewa tōrū ngūxēēruū i paigūeru yiīxūcēx. Natürü Tupana nixī ga yangucuchixēēcū. Yerū Tupanatama nixī ga nūxū űacū:

“Cuma nixī i Chaune. Rū űuxma chanangoxēē na Chaune quiīxū”,
 űacū. ⁶ Rū toxnamana i Tupanaārū ore i űmatūxūwa rü űanagūrū ta:

“Cuma nixī i guxūgutāma duūxūgūarū ngūxēēruū i paigūeru quiīxū, guma pai
 ga Melquisedērūū”,

űanagūrū. ⁷ Rū yexguma Cristu űoma ga naānewa maūxgu, rü porācū nayumūxē rü tagaācū rü naxauxācū Tupanana naca na nūxū nangūxēēxūcēx na naga naxīnūxūcēx. Rū yemaācū nanaxū ga Cristu, yerū Tupana rü napora na nūxū nangūxēēxūcēx na tama yuxū namūxūcēx. Rū Tupana rü Cristuxū naxīnū yerū nūma ga Cristu rü aixcūma Tupanaga naxīnū. ⁸ Rū nūma ga Cristu rü woo Tupana Nane na yiīxū, natürü ngūxū ninge naxcēx na Tupanaga naxīnūxū. ⁹ Rū yemaācū nūgū inaxā rü curuchagu nayu na tūmaārū maxēxēēruū yiīxūcēx ya guxāma ya yīxema naga űnūēxē. ¹⁰ Rū Nanexū nixī ga naxunetaxū ga Tupana na guxūgutāma nūgūpēxewa tōrū ngūxēēruū i paigūeru yiīxūcēx yexgumarūū ga pai ga Melquisedē ga norū yumūxēwa nuxcūmaūcū ga tōrū oxī ga Abrāūcēx Tupanana cacū na guma Abrāūxū nangūxēēxūcēx ga Tupana.

Wūxi i āucūmaxūlchixū nixī na nūxū rūxoexū na yaxōgūxū

¹¹ Rū űuxma rü toxū nangēxma i muxūchixūma i ore i Cristuchiga ixīxū i pemaā nūxū tixuxchaūxū. Natürü naguxchaxūchi na meāma pemaā tanangoxēēxū i ngēma, erū pema rü tama pexū natauxcha na nūxū pecuāxū.

¹² Rū marū űuxgumama nūxū na pecuāxū i Tupanaārū orechiga, rü pema rü chi marū namaā pengūxēētae. Natürü i pema rü űuxma rü ta penaxwēxe na wena pemaā tanangoxēēxū i ngēma Tupanaārū ore i tauxchaxū i nawa inaxūgūxū na Tupanachigaxū icuāxū. Rū ngēmaācū i pema, rü űoma űxchana i naēgūnenixūwa maīxūrūttama pixīgū. Erū tama nūxū pecuēxgūēga i guxūma i ngēma Tupanaārū ore i yexeraācū tamaā nūxū ixuxū i Cristuchiga na űuxācū Tupana naxwēxexū na naga pexīnūēxū. ¹³ Rū yīxema yaxōxē ya tama nūxū cuēxégaxe na űuxācū Tupanacēx tamaxūxū, rü wūxi i űxchana i maīxūrūū tixī. Rū ngēmaācū pixīgū i pemax. ¹⁴ Natürü yīxema yaxōxē ya tūmamaā yaxūxe na tanangugūxū na tacū yiīxū i nguxēētae i mexū rü ēxna chixexū, rü aixcūma nūxū tacuēx na űuxācū Tupanacēx tamaxūxū. Rū yīxema rü űoma wūxi i duūxū i yaxū i namachimaā āwemūxūrūū tixī. Natürü i pema rü tama ngēmaācū pixīgū.

6

¹ Rû ngêmacêx name nixî i yexeraâcü tingúeetanü na aixcüma meã nüxü icuáxüçêx i Cristuchiga. Rû tanaxwêxe na nüxü ichopetüxü ga yema ore ga nawa inaxügüxü na Cristuchigaxü icuáxü. Rû täütäma yeüçürü yema ore ga nawa inaxügüxüçhiga tidexagüecha. Rû taxucêxma tüxcüü wena pemaã nüxü tixu na nüxü perüxoexüçêx na nagu pexîxü i ngêma mugü ga Moiché ümatüxü i tama tüxü maxêxêxü. Rû ngêxgumarüü ta taxucêxma tüxcüü wena pemaã nüxü tixu i nachiga na ñuxâcü Tupanaãxü yaxôgüxü.

² Rû ngêxgumarüü ta taxucêxma tüxcüü wena pexü tangüexêê na ñuxâcü Tupanacêx íbaiüxü rû ñuxâcü duüxügüxü ingôgüâcüma namaã iyumüxêxü. Rû ngêxgumarüü ta taxucêxma tüxcüü wena pexü tangüexêê na ñuxâcü tá wena namaxêxü i duüxügü i yuexü rû ñuxâcü naãneârü guxgu rû Tupana tá wüxichigü i duüxügüna çaxü na ñuxâcü namaxêxü i ñoma i naãnewa.

³ Rû ngêmacêx i ñuxma rû ngêxguma Tupana tama tüxna nachuxgu rû tanaxwêxe i yexeraâcü tingúeetanü na aixcüma guxüma i Cristuchigaxü icuáxüçêx rû nüxü na icuáxüçêx na aixcüma ngêma nüma nanaxwêxexüâcüma meã naxcêx na imaxêxü.

⁴⁻⁵ Natürü ngêxguma chi wüxie Cristuxü yauxgu, rû chi meãma Tupanaxü tacuêxgu, rû chi Naãê i Üünexüxü tayauxgu, rû chi nüxü tacuêxgu na ñuxâcü namexü i Tupanaârü ore rû ñuxâcü na namexü i daxügüxü i naãne, rû name nixî i taxuãê.

⁶ Erü ngêxguma chi ngêmaâcü meã tayaxôxgu i noxrix rû ñuxüchi Cristuxü ítatêxüçhixgu, rû marü taxucürüwama texê wemaxârü Tupanacêx tüxü tataeguxêê. Erü ngêxguma ngêmaâcü ítanatêxüçhixgu ya Tupana Nane, rû ñoma wena curuchawa tayapotaxürüü tayaxîxêê, erü guxü i duüxügüpêxewa ãne nüxü tingexêê.

⁷ Rû dücax, wüxi i naãne i pucü nagu ngxüxü rû meãma nanetü nawa nayae tümacêx ya yíxema nagu üanexê, rû Tupanaarü ngüxêêgagu nixî i ngema.

⁸ Natürü ngêxguma ngêma naãne rû tuxu rû natüanegü i chixexü nawa yaegu, rû Tupana rû tá chixexü namaã naxuegu rû üxüwa tá nigu i guxüma i nawa yaexü. Rû ngêxgumarüü tá tixî ya yíxema Cristuxü ítáxe.

Ítananguxêê na nayauxgüxü i maxü i taguma güxü rû ngêmacêx tama nüxü tarüxo na yaxôgüxü

⁹ Natürü, Pa Chaueneêgü ya Pexü Tangechaügüxe, rû woo ngêmaâcü pemaã tidexagügu, natürü aixcüma nüxü tacuêx na tama ngêma duüxügü i nüxü rüxoexürüü pixîgüxü. Erü pema rû pexü nangêxma i maxü i taguma güxü, rû Tupana rû tá aixcüma poraâcü pexü narüngüxêê na naxcêx pemaxêxüçêx.

¹⁰ Erü nüma ya Tupana rû aixcümacü nixî. Rû nüma rû täütäma nüxü inayarüngüma ga yema mexü ga pexüxü rû ñuxâcü taeneêgü i yaxôgüxüxü na pengechaügüxü ga yexguma nüxü perüngüxêêgügu, ngêma ñuxma ípenaxüxürüütama.

¹¹ Rû ñuxma rû tanaxwêxe i wüxichigü i pema rû ngêmaâcü noxrirüü mexü i perü ngüchaümaã nüxü perüngüxêêgüecha i taeneêgü ñuxmatáta wena nüma naxü ya Cristu. Rû tanaxwêxe na ngêmaâcü pemaxêxü na düxwa aixcüma Cristuxütawa pengügüxü ngêma ípenanguxêêxürüü.

¹² Rû tama tanaxwêxe na nüxü perüxoetanüçüxü na Cristuwe perüxîxü. Natürü tanaxwêxe i naxrüü pixîgü i ngêma duüxügü i guxüguma meã yaxôgüâcüma Cristuwe rüxîamaxü rû nayauxgüxü i guxüma i ngêma mexügü ga Tupana namaã ixunetaxü.

¹³ Rû dücax, yexguma tórü oxî ga Abráümaã inaxunetagu ga Tupana rû nügüêgagutama inaxuneta, yerü

tataxuma ga texé ga norū yexera ixīxē na tūmaegagu inaxunetaxūcēx. ¹⁴ Rū yemacēx ga Tupana rū Abráūxū űnanagūrū: “Rū aixcūmaxūchi tá poraācū cuxū charūngūxēē. Rū tá cuxū nangēxma i muxūchixūtama i cutaagū”, űnanagūrū. ¹⁵ Rū Abráū rū meāma ínananguxēē ga guma nane ga Tupana namaā ixunetacū. Rū yemacēx nabu ga guma nane ga Ichaā ga Tupana namaā nūxū ixucū. ¹⁶ Rū ngēxguma duūxūgū tacūcēx ixunetagu, rū to i norū yexera ixīxūdegagu inaxunetagu. Rū wūxicana tacūcēx ngēmaācū inaxunetagu, rū nūxū tacuēx rū aixcūma tá nanaxūgū i ngēma naxcēx inaxunetagūxū, rū marū taxucūrūwama yeūcūrū nachiga nidexagūecha. ¹⁷ Rū yemacēx ga Tupana rū yexguma inaxunetagu namaā ga yema duūxūgū ga nayauxgūxū tá ga yema ngūxēē ga Tupana nūxna āxchaūxū, rū nūgūégagutama inaxuneta, yerū nanaxwēxe na meāma nūxū nacuēxgūxū na aixcūma tá yanguxēēxū rū tagutāma naxūchicūūāxū ga yema namaā inaxunetaxū. ¹⁸ Rū nūxū tacuēx rū ngēxguma tacūcēx nūgūégagu inaxunetagu ya Tupana, rū taxucūrūwama tūxū nawomūxēē rū nanaxūchicūū i ngēma. Rū űuxma i guxāma i yixema na Tupanacēx ibuxmūxū na tūxū nangūxēēxūcēx rū tūxū namaxēxēxūcēx, rū nūma ya Tupana rū nūgūégagu tamaā inaxuneta na ngēmaācū tá tūxū nangūxēēxū. Rū ngēmaācū tūxū nananguchaūxēē rū tūxū narūngūxēē na nūxū icuāxūcēx na aixcūma tá nayauxgūxū i ngēma maxū i taguma gūxū i tamaā inaxunetaxū. ¹⁹ Rū űuxma na ínanguxēēxū na aixcūma tá nayauxū i ngēma maxū i taguma gūxū, rū taxucēxma taxoegaāēgū, erū nūxū tacuēx na aixcūma daxūgūxū i naānewa i Tupana íngēxmaxūwa tá ingūxūxū. ²⁰ Rū ngēma nangēxma ya Ngechuchu i űuxma yerū nūxīra yexma naxūcu na Tupanapēxewa taētūwa nachogūxūcēx. Rū ngēmaācū guxūguma tōrū ngūxēēruū i paigūeru nixī, guma Melquisedé ga Tupanapēxewa Abráūētūwa chogūcūrū.

7

Ngechuchu rū guma nuxcūmaīlcū ga pai ga Melquisedérūītama nixī

¹ Rū guma Melquisedé rū íāne ga Charéūārū āēxgacū nixī ga yexguma namaūxgu ga Abráū. Rū nūma ga Melquisedé, rū duūxūgūarū pai nixī ga Tupanapēxewa. Rū yexguma Abráū rū to ga nachīīāneārū āēxgacūgūmaā nūgū nadaixgu rū nūxū nayexeragu, rū Melquisedé rū namawa Abráūpēxegu nayangu ga yexguma Abráū napatacēx taegugu. Rū nūma ga Melquisedé rū Tupanaégagu Abráūmaā mexū naxuegu. ² Rū Abráū rū nūxū nayexma ga guxūma ga yemaxūgū ga yema āēxgacūgū ga namaā nūgū nadēxūna napuxūxū. Rū yemawa ínanaxūxūchi ga yema Tupanana űxū, rū Melquisedéna nanaxā. Rū ngēma naega i Melquisedé rū Āēxgacū ya Ixaixcūmacū űnaxūchiga nixī. Rū norū íāne ga Charéū rū Taāxēēruū űnaxūchiga nixī. Rū ngēmacēx i naega i Melquisedé rū Āēxgacū ya Taāxēēruū űnaxūchiga ta nixī. ³ Rū Tupanaārū ore ga nuxcūma űmatūxūwa rū tama nūxū nixu na texé tīxū ga nanatū rū naē rū norū oxigū ga Melquisedé. Rū ngēxgumarūū ta tama nūxū nixu i norū buxchiga rū norū yuxchiga. Rū ngēmacēx Tupana Nanerūū guxūguma duūxūgūarū ngūxēēruū ya pai nixī i Tupanapēxewa. ⁴ Rū űuxma rū name nixī i nagu perūxīnūē na űuxācū aixcūma āēxgacū ya tacū yīxū ga Melquisedé. Yerū nuxcūmaīlcū ga tōrū oxi ga Abráū rū Melquisedéna nanaxā ga yema Tupanana űxū ga natanūwa ga yema yemaxūgū ga togū ga āēxgacūgūna napuxūxū. Rū ngēmawa nūxū tacuēx na Tupanapēxewa

tórū ɔxi ga Abráũārū yexeracū yĩxũ ga Melquisedé. ⁵ Rū ñuxma i Yudiugũ, rū guxũma i norū ngẽmaxũwa ínanaxũxũchigũ i ngẽma Tupanana ùxũ, rū ñuxũchi norū paigũna nanaxã yerũ yemaãcũ nixĩ ga namuãxũ ga yema mugũ ga Moĩché ùmatũxũ. Natũrũ guxũma i ngẽma paigũ rū Lebítaagũ nixĩgũ. Rū nũma ga Lebĩ rū guxũma i Yudiugũrũ Abráũtaa nixĩ. Rū ngẽmaãcũ i ngẽma Yudiugũ rū norũ paigũna nanaxã i ngẽma Tupanana ùxũ, woo natanũxũgũ i Yudiugũ na yĩxũ i ngẽma paigũ. ⁶ Natũrũ ga Melquisedé rū woo tama Lebítaa nixĩ, natũrũ Abráũmẽxẽwa nanayaxu ga yema Tupanana ùxũ. Rū nũxũ tacuèx na Abráũ yĩxũ ga noxri nayaxucũ ga Tupanaārũ uneta. Rū Melquisedé rū Tupanana naca na Abráũmaã mexũ naxueguxũcèx. ⁷ Rū guxãma meãma nũxũ tacuèx rū ngẽxguma texé toguècèx Tupanana caxgu na tũxũ nangũxẽxũcèx, rū Tupanapẽxewa rū yĩxema nũxna çaxe rū ngẽma togũ i naxcèx ítaçaxũārũ yexera tixĩ. Rū ngẽmaãcũ nũxũ tacuèx na Abráũārũ yexera yĩxũ ga Melquisedé i Tupanapẽxewa. ⁸ Rū ñuxma i nuã tatanũwa rū ngẽma paigũ i ngĩxũ yauxgũxũ i ngẽma dĩeru i Tupanana ùcũ, rū duũxũgũmare nixĩgũ rū tá nayue. Natũrũ ngẽxguma Melquisedéchiga yadexagu i Tupanaārũ ore, rū ñoma namaxũxũrũ nixĩ i nachiga yadexaxũ. Rū ngẽmawa nũxũ tacuèx na Cristu ya guxũguma maxũcũrũ na yĩxũ ga Melquisedé. ⁹⁻¹⁰ Rū Abráũtaa ga Lebĩ, rū guxũma i paigũ i Lebítaagũ ixĩgũxũ i ñuxma ngĩxũ yauxgũxũ i ngẽma dĩeru i Tupanana ùcũ, rū nũmagũ rū ta Abráũmaã Melquisedéna nanaxãgũ ga yema Tupanana ùxũ. Yerũ nũma ga Lebĩ rū guxũma ga nataagũ i ñuxma Yudiugũarũ paigũ ixĩgũxũ, rū woo ga na tauta nabuexũ ga yexguma, natũrũ marũ Abráũxũnewa nayexmagũ ga yexguma Melquisedé namawa Abráũpẽxegu yanguxgu. Rū ngẽmawa nũxũ tacuèx na guxũma i ngẽma paigũarũ yexera yĩxũ ya Melquisedé. ¹¹ Rū nuxcũmaũgũxũ ga tórũ ɔxigũ ga Yudiugũ, rū Lebítaagũ ga paigũmẽxẽwa nixĩ ga nayauxgũãxũ ga Tupanaārũ mugũ. Natũrũ pemaã nũxũ chixu rū yexguma chi yema paigũ aixcũma yema Yudiugũxũ imexẽẽgũgu ga Tupanapẽxewa, rū taxucèx chima Tupana nũxũ naxuneta ga naĩ ga pai ga Melquisedérũ ixĩcũ ga tama Lebítaa ga Arãũrũ ixĩcũ. Rū yemacèx ga Tupana rū nũxũ naxuneta ga Nane ga Ngechuchu na tórũ chogũrũ ya pai yĩxũcèx. ¹² Rū yemacèx ga Tupana rū yema Yudiugũarũ paigũchicũxũ nayangucuchixẽẽ ga Cristu. Rū nũma nixĩ i ñuxma i aixcũma Tupanapẽxewa tũxũ yamexẽẽgũxũ. Rū guxũma ga Lebítaa rū paigũ nixĩgũ yerũ yemaãcũ nixĩ ga naxueguxũ nawa ga yema mugũ ga Moĩché ùmatũxũ. Natũrũ nũma ga Cristu rū marũ nanaxũchicũũ ga guxũma ga yema. ¹³⁻¹⁴ Erũ meãma nũxũ tacuèx rū nũma ya tórũ Cori ya Ngechuchu ya yima nachiga idexagũcũ rū tama Lebítaa nixĩ erũ nũma rū Yudátaa nixĩ. Rū nũxũ tacuèx rū taxuũma ga Yudátaa rū pai nixĩ, yerũ ga Moĩché rū yexguma yema paigũchiga yadeaxgu rū taxuũma ga Yudátaaxũ naxuneta na pai yĩxũcèx. ¹⁵ Rū ngẽmaãcũ meã nangox na Tupana iyanaxoxẽẽxũ ga guxũma ga yema mugũ ga Moĩché ùmatũxũ ga paigũchiga. Yerũ nũma ga Tupana rū nũxũ naxuneta ga wũxi ga pai ga yexwacaxũcũ ga tama Lebítaa ixĩcũ. Rū nũma nixĩ i tórũ Cori yĩxũ ya Melquisedérũ ixĩcũ, erũ guxũma i ngẽma togũ i paigũarũ yexera nixĩ. ¹⁶ Rū guxũma ga yema togũ ga paigũ rū nangucu yerũ Lebítaa nixĩgũ. Natũrũ nũma ga Cristu rū paixũ ningucuchi yerũ poramaã yuwa ínarũda rū guxũguma namaxẽcha na tũxũ nangũxẽxũcèx. ¹⁷ Rū ngẽmacèx i Tupanaārũ ore i ùmatũxũwa rū tórũ Corichiga ñanagũrũ:

“Cuma rū guxũgutãma duũxũgũarũ ngũxẽẽruũ ya pai quixĩ Melquisedérũ”,

ñanagürü. ¹⁸⁻¹⁹ Rū yemacèx ga Tupana rü ñoma ga nañewa nanamu ga Nane, yerü yema mugü ga paigüchiga naxümatüxü ga Moiché rü tama poraäcü tüxü narüngüxëe yerü tama aixcüma tüxü nimexëëgü ga Tupanapëxewa. Rū yemacèx Nanexü namu ga Tupana na törü pecaducèx nayuxüçèx na ngëmaäcü tüxü nangëxmaxüçèx i maxü i taguma güxü rü aixcüma Tupanamüçëgü ixigüxüçèx. ²⁰⁻²¹ Rū yexguma Tupana yema togü ga paigüxü ngucuxëëgu, rü nanangucuxëëmare. Natürü yexguma Cristuxü yangucuchixëëgu na törü ngüxëëruü ya pai yïxüçèx, rü nügüéagutama inaxuneta. Rū yemacèx ga yexguma Cristuxü yangucuchixëëgu rü ñanagürü:

“Choma i Cori ya Tupana rü marü cuxü chaxuneta na guxügutáma duüxügüarü ngüxëëruü ya pai quiüxüçèx. Rū ngëma rü tagutáma chanaxüchicüü erü chaugüéagagu ichaxuneta”,

ñanagürü. ²² Rū ñuxma na yemaäcü nügüéagutama inaxunetaxü ga Tupana, rü nüxü tacuèx na aixcümaxüchima yema paigüarü yexera na yïxü ya Cristu erü guxügutáma Tupanapëxewa tüxü narüngüxëe. ²³ Rū yema togü ga paigü rü namuxüchi, yerü niyuetanü. Rū yemacèx taxucürüwama guxüguma paigü nixigü. ²⁴ Natürü ñuxma na törü ngüxëëruü ya paixü yangucuchixü ya Ngechuchu, rü ngëmacèx marü taxucèxma texé ya togue tingucuchi, erü nüma ya Ngechuchu rü tagutáma nayu. ²⁵ Rū ngëmacèx nixi i ñuxma i nüxü natauxchaxü na aixcüma tüxü namaxëxëxü ya guxáma ya yixema norü ngüxëemaä Tupanaxütawa ngugüxe. Erü nüma ya Ngechuchu rü guxüguma namaxëcha na tümaëtüwa nachogüxüçèx. ²⁶ Rū ngëmaäcü ya Ngechuchu, rü nüxücatama nixi i pai ya törü ngüxëëruü yïxü i Tupanapëxewa. Erü nüma rü aixcüma naxüüne, rü nataxuma i chixexü i nawa, rü nangearü pecaduäx yerü taguma taxrüü pecadu naxü. Rū ñuxma rü guxüëtüwa nangëxma i daxügüxü i nañewa i Tupana íngëxmaxüwa. ²⁷ Rū Ngechuchu rü tama ngëma togü i paigüerurüü nixi. Erü nümagü rü nanaxwëxe na guxü i ngunexügu Tupanacèx naxüñagü nadëixü na ngëmaäcü Tupana nüxü nüxü ngechaüxüçèx i noxrütama pecadugü rü guxü i duüxügüarü pecadugü ta. Natürü nüma ga Ngechuchu rü yexguma nügü inaxäxgu, rü wüxicanatama pecaducèx nayu. Rū ngëma rü guxügutama name i Tupanapëxewa. ²⁸ Rū yema mugü ga Moiché ümatüxü, rü duüxügümarexü naxuneta na paigüerugü yixigüxüçèx. Natürü nümagü rü ta nipecaduäxgü. Natürü yemawena ga Tupana rü nügüéagagu Nanexü naxuneta na törü ngüxëëruü yïxüçèx. Rū yima Nane rü guxüguma mecüxüchi ya törü Maxëxëëruü nixi. Rū nüma rü guxüguma tüxü narüngüxëe i Tupanapëxewa.

8

Ngechuchu nixi ya törü ngüxëëruü i Tupanapëxewa

¹ Rū ngëma pemaä nüxü tixuxchaüxü i ñuxma nixi na tüxü nangëxmaxü ya törü ngüxëëruü ya mexëchicü i Tupanaxütawa. Rū nüma rü Tupana Nane ya Cristu nixi. Rū daxügüxü i nañewa i Tupanaärü tügü necüwawa narüto erü guxüärü äëxgacü nixi. ² Rū ngëma daxügüxü i nañewa i ngëma nachica i üünexü ga Tupana üxüwa nixi i taxcèx inaçaxü. Rū tama ngëma Yudiügarü paigürü wüxi ya ípata ya duüxügü üxünewa Tupanana taxcèx ínaç. ³ Rū guxüma i ngëma Yudiügarü paigüerü rü nangucu na Tupanana naxägüäxüçèx i ämaregü rü naxcèx nadaiäxüçèx i naxüñagü na Tupana nüxü nüxü ngechaüxüçèx i duüxügüarü pecadugü. Rū yemacèx ga Ngechuchu rü Tupanana nügü naxámare na duüxügüarü pecaducèx nayuxüçèx. ⁴ Rū

ñuxma i nūma ya Ngechuchu rŭ daxŭguxŭ i naānewa nangēxma na ngema tórŭ ngŭxēeruŭ ya pai yīxŭcèx i Tupanapēxewa. Rŭ ngēmacèx tama ñoma i naānewa nixī i pai yīxŭ. Natŭrŭ ngēxguma chi ñoma i naānewa nangēxmagu rŭ tãu chima pai nixī erŭ ñoma i naānewa nangēxmagŭ i ngēma Yudiŭgŭarŭ paigŭ i Tupanana āmare āgŭxŭ yema Moichéarŭ mugŭ nŭxŭ ixuxŭrŭŭ. ⁵ Natŭrŭ ngēma puracŭ i ñoma i naānewa naxŭgŭxŭ i ngēma Yudiŭgŭarŭ paigŭ, rŭ naxcèx nadauxŭtaegŭmare i ngēma Ngechuchu daxŭguxŭ i naānewa ŭxŭ. Rŭ ngēma nachica i nawa Tupanacèx napuracŭexŭ i ngēma paigŭ, rŭ nanaxŭchicŭnēxgŭmare i ngēma nachica i Ngechuchu nawa ngēxmaxŭ. Rŭ meāma nŭxŭ tacuèx i ngēma, yerŭ yexguma Moiché naxŭxchaŭgu ga Tupanapata, rŭ Tupana rŭ ñanagŭrŭ nŭxŭ:

“jDŭcèx, meā nangugŭ i ngēma cuèxruŭ ga cuxŭ chawéxŭ ga mèxpŭne ga Chinaŭwa! Rŭ chanaxwèxe i ngēmaacŭ na cunaxŭxŭ”,

ñanagŭrŭ. ⁶ Natŭrŭ nūma ya tórŭ ngŭxēeruŭ ya Cristu rŭ daxŭguxŭ i naānewa nangēxma, rŭ ngema aixcŭmaxŭchi Tupanapēxewa taétŭwa nachogŭ. Rŭ ngēma Yudiŭgŭarŭ paigŭ rŭ nagu naxīāma ga yema nuxcŭmaŭxŭ ga uneta ga Moiché ūmatŭxŭ. Natŭrŭ nūma ya Tupana rŭ marŭ tŭxna nanaxā i wŭxi i ngexwacaxŭxŭ i uneta erŭ tamaā nŭxŭ nixu na Cristu yīxŭ ya aixcŭma tórŭ ngŭxēeruŭ ixīcŭ. Rŭ nūma rŭ nayu na Tupanapēxewa tŭxŭ yamexēexŭcèx, rŭ ngema Tupanaxŭtawa nangēxma i ñuxma na taétŭwa nachogŭxŭcèx. Rŭ ngēmaacŭ nŭxŭ tatau na Tupanaarŭ uneta i ngexwacaxŭxŭ rŭ yema nuxcŭmaŭxŭ ga unetaarŭ yexera yīxŭ na namexŭ. ⁷ Yerŭ yexguma chi yema nŭxŭraŭxŭ ga uneta ga Moiché ūmatŭxŭ rŭ aixcŭma namexgu na duŭxŭgŭxŭ namaxēexŭcèx, rŭ marŭ taxucèx chima tanaxwèxe i to i ngexwacaxŭxŭ i Tupanaarŭ uneta. ⁸ Natŭrŭ nūma ga Tupana rŭ nŭxŭ nadau na tama aixcŭma napēxewa duŭxŭgŭxŭ yamexēexŭ ga yema nŭxŭraŭxŭ ga uneta ga Moichéna naxāxŭ. Rŭ yemacèx ga Tupana rŭ ñanagŭrŭ:

“Wŭxi i ngunexŭ rŭ wena táxarŭ guxŭma i chorŭ duŭxŭgŭmaā ichaxuneta.

⁹ Natŭrŭ ngēma chorŭ uneta i ngexwacaxŭxŭ, rŭ tãutāma namaā nawŭxigu ga yema nŭxŭraŭxŭ ga chorŭ uneta ga nuxcŭmaŭgŭxŭ ga perŭ oxigŭmaā nŭxŭ chixuxŭ ga yexguma nŭxŭ charŭngŭxŭxēgu na ínaxoxŭxŭcèx ga Equitarŭ naānewa. Yerŭ nŭmagŭ ga yema duŭxŭgŭ rŭ tama chauga naxīnŭe rŭ tama nayangŭxēe ga yema nŭxŭraŭxŭ ga chorŭ uneta, rŭ yemacèx íchanawogŭ. ¹⁰ Natŭrŭ ngēxguma nawa nanguxgu na wena namaā ichaxunetaxŭ, rŭ ñaācŭ tá nixī i guxŭma i Yudiŭgŭmaā ichaxunetaxŭ: ‘Rŭ tá meāma ngēma duŭxŭgŭxŭ nŭxŭ chacuèxēe i chorŭ mugŭ na aixcŭma naāewa nangēxmagŭxŭcèx. Rŭ choma rŭ tá norŭ Tupana chixī, rŭ nŭmagŭ rŭ tá chorŭ duŭxŭgŭ nixīgŭ’. ¹¹ Rŭ guxŭma i ngēma duŭxŭgŭ i choxŭ yaxŭgŭxŭ, rŭ aixcŭma tá choxŭ nacuèxgŭ. Rŭ ngēmacèx taxucèxama tŭxcŭŭ nŭgŭmaā nŭxŭ nixugŭgŭ i chauchiga na ngēmaacŭ choxŭ nacuèxgŭxŭcèx. Erŭ guxŭma i chorŭ duŭxŭgŭ rŭ aixcŭma tá meā choxŭ nacuèxgŭ woo buxŭ rŭ ēxna yaxŭ. ¹² Rŭ tá nŭxŭ nŭxŭ changechaŭ i norŭ chixexŭgŭ, rŭ tá nŭxŭ ichayarŭngŭmaxŭchi i norŭ pecadugŭ”,

ñanagŭrŭ ga Tupana. ¹³ Rŭ dŭcax, ñuxma na Tupana ngexwacaxŭxŭ i unetachiga idexaxŭ, rŭ ngēmawa nŭxŭ tacuèx na yema nŭxŭraŭxŭ ga uneta rŭ marŭ nangupetŭchaŭxŭ. Rŭ nŭxŭ tacuèx rŭ guxŭma i ngēma marŭ ngupetŭchaŭxŭ, rŭ paxa tá inayarŭxo. Rŭ ngēmaacŭ i ngēma Yudiŭgŭarŭ paigŭ, rŭ marŭ inayarŭxoxchaŭ na Tupanapēxewa duŭxŭgŭxŭ nangŭxēexŭ.

Erū nūma ya Tupana rū marū Cristuxū ningucuchixēē na tórū ngūxēēruū yīxūcēx i napēxewa.

9

Tupanapata ga duūlxūgū ūxūnechiga rū Tupanapata ya daxūguxūl i naānewa ngēxmanechiga

¹ Rū yexguma nuxcūma Moīchémaā yadeaxgu rū nūxna naxāāgu ga yema nūxīraūxū ga uneta, rū Tupana namaā nūxū nixu na űuxācū nanaxwēxexū na nūxū yacuēxūūgūxū. Rū yexgumarūū ta namaā nūxū nixu na űuxācū nanaxwēxexū na naxcēx naxūāxū ga wūxi ga ĩpata ga naxchirunaxcēx na yéma nūxū yacuēxūūgūxūcēx ga paigū. ² Rū guma ĩpata ga naxchirunaxcēx rū nitūyemachiā. Rū yema naxmachiā ga nūxīra nawa ixūcuxū, rū “Nachica i Ūūnexū” nixī ga naega. Rū yéma nayexma ga werachica rū mecha ga pāu ga ūūnexū nagu nuxū. ³ Rū yema to ga naxmachiā ga yema tūyemachiāxūcēxwena ūxū rū “Nachica i Ūūnexūchixū” nixī ga naega. ⁴ Rū yéma nayexma ga yema mecha ga uirunaxcēx ga ngextá nawa yagugūāxū ga pumara ga yixixū ga yexguma yaguxgu. Rū yéma nayexma ta ga yema baú ga Tupanaārū mugū nagu namaā nanguxūgūxū. Rū yema baú rū guxūwama uirumaā natūxūne. Rū yematama baúarū aixepewa nayexma ga wūxi ga tūxūxācū ga uirunaxcēx ga yema pāu ga daxūwa rūyixūmaā āācuxū. Rū yexgumarūū ta yema baúarū aixepewa nayexma ga Arāūārū cāxūruū ga rūxūxūne, rū guma nutagū ga Tupanaārū mugū nagu ūmatūgūcū. ⁵ Rū yema baúétūwa nayexmagū ga yema taxre ga daxūcūāxchicūnēxāgū ga ixāxpēxatūxū. Rū naxpēxatūgūmaā nayadūxētūgū ga yema baúātaū. Rū yema daxūcūāxchicūnēxāgūarū ngāxūwa nixī ga nūgū nangoxēēxūxū ga Tupana. Natūrū taxucēxma tūxcūū yexeraācū nūxū tixu i ngēmachiga. ⁶ Rū wūxicana yemaācū na namexēēgūāxū ga guxūma ga yema, rū űuxūchi ga paigū rū guxūguma yema nūxīraūxū ga naxmachiāgu nachocuxū na yéma Tupana namaā nūxū ixuxūācūma nūxū yacuēxūūgūxūcēx. ⁷ Natūrū yema to ga naxmachiāwa rū yema paigūarū āēxgacūxicatama nixī ga yexma ūcuxū. Rū tama guxūguma yexma naxūcu, natūrū wūxicanatama yexma naxūcu ga wūxichigū ga tauncēgu. Rū yexguma yexma naxūcuxgu rū yéma nanange ga naxūnagū rū guma nagūmaā yema baūxū namaxcūétū. Rū yemaācū ga yema paigūarū āēxgacū rū inanaxā ga guma nagū na noxrūtama pecadu rū guxūma ga duūxūgūarū pecaduxū iyanangūmaxūcēx ga Tupana. ⁸ Natūrū yema paigūarū āēxgacūxicatama nixī ga yema Nachica ga Ūūnexūchixūgu ūcuxū ga Tupana ĩyexmaxūwa. Rū ngēmaācū Tupanaāē i Ūūnexū tūxū nūxū nacuēxēē na taxucūrūwama yexma Tupana ĩyexmaxūgu nachocuxū ga guxūma ga duūxūgū yerū yexguma nagu naxīxgu ga yema mugū ga Moīché ūmatūxū rū nachuxu ga yema. ⁹ Rū guxūma i ngēma pemaā nūxū chixuchigaxū, rū wūxi i cuēxruū nixī i taxcēx i yixema na űuxma imaxēxū. Rū ngēmawa nūxū tadau rū yema āmaregū ga Tupanana naxāgūxū rū yema naxūnagū ga Tupanacēx nadēixū rū taxucūrūwama yema duūxūgūxū nimexēē na aixcūma Tupanapēxewa yamexūcēx. ¹⁰ Rū yema nuxcūmaūgūxū ga mugū ga dōnagūchiga rū axeūgūchiga rū nacūmagūchiga ixīxū, rū yema duūxūgūarū dūētūxūnecēxicatama nixīgū. Rū yemacēx tama yema duūxūgūxū nimexēē na aixcūma Tupanapēxewa yamexūcēx. Rū woo napora ga yema mugū ga noxrix, natūrū yexguma ĩnanguxgu ga Cristu rū marū yexma nayacuēx na duūxūgūmaā naporaxū. ¹¹ Natūrū i űuxma rū marū ĩnangu ya Cristu. Rū

nūma nixī i aixcūma tórū ngūxēeruū yīixū i Tupanapēxewa, rū nagagu nixī i nangēxmaxū i maxū i taguma gūxū. Rū ngēma nachica i ngextā taétūwa ínachogūxūwa rū aixcūma naxūūne erū tama guma ípata ga naxchirunaxcēx ga duūxūgūmare ūxūnerūū nixī erū daxūguxū i naānewa nangēxma. ¹² Rū Cristu rū marū daxūguxū i naānegu naxūcu i ngextā Tupana íngēxmaxūwa. Rū taxucēxma tūxcūū wūxichigū ya taunecūgu ngēxma naxūcu, erū marū guxūguma ngema nangēxmaēcha. Rū yexguma yexma naxūcuxgu, rū tama yēma nanange ga chibugūgū rū wocaxacūgūgū na Tupanana naxāāxūcēx. Natūrū nūma ga Cristu rū nagūtama inaxā na yemaācū naxūtanūāxūcēx ga tórū pecadugū rū tūxū nangēxmaxūcēx i maxū i taguma gūxū. ¹³ Rū yema mugū ga Moīché ūmatūxū rū ñanagūrū:

“Ngēxguma texé yuetaxū íngōgūgu, rū taxucūrūwama Tupanapata ya naxchirunaxcēxgu taxūcu”,

ñanagūrū. Rū yemacēx ga yema Yudíugū, rū yexguma wūxi ga yuetaxū yangōgūgūgu rū nanaxwēxegū ga na norū paixūtawa nagaāxū ga wūxi ga woca na yema pai Tupanacēx yamáxūcēx rū na yaguāxūcēx na yemaācū ga guma tanimaca rū dexágu nagūāxūcēx na yema duūxūgūxū namaā namaxcuxūcēx na yemaācū nūxna ínayixūcēx ga norū chixexū. Natūrū yema rū duūxūgūarū dūxētūxūnewaxicatama nanamexēē rū tama norū maxūxū namexēē. ¹⁴ Natūrū nagū ya Cristu rū yema naxūnagūgūarū yexera name erū tórū maxū namexēē na aixcūma Tupanapēxewa ímexūcēx. Rū Cristu rū woo Tupana Nane na yīixū rū na nataxūyū erū norū chixexū, natūrū Tupanana nūgū naxā rū tórū pecaducēx nayu yerū Naāē i Ūūnexū nanaporaxēē. Rū yemaācū curuchagu nanabaxēē ga nagū. Rū ñuxma ya yima nagū rū ningu na tūxū namexēēxūcēx i Tupanapēxewa. Rū ngēmacēx taxucēxma tanaxwēxe na nagu íxīxū ga yema mugū ga Moīché ūmatūxū ga tama tūxna naxāxū i maxū i taguma gūxū. Rū ñuxma na Cristugagu Tupanapēxewa ímexū, rū nūma ya Cristu rū tūxū narūngūxēē na naxūxūcēx i ngēma Tupana ya maxūcū tūxū naxwēxexū. ¹⁵ Rū ñuxma na tórū pecaducēx nayuxū ga Ngechuchu ya Cristu, rū nūma nixī i tórū ngūxēeruū i Tupanapēxewa, ngēma Tupanaārū uneta i ngexwacaxūxū nūxū íxuxūrūū. Rū ñuxma i yixema na Tupana tūxū dexū, rū tūxū nangēxma i maxū i taguma gūxū ega yima Naneāxū yaxōgūgu. Rū ngēxgumarūū ta i guxūma i Tupanaārū duūxūgū ga nuxcūma yaxōgūxū, rū nūxū nangēxma i maxū i taguma gūxū yerū Cristu nayu na norū pecaduna ínanguxūxēēāxūcēx. ¹⁶ Rū ngēxguma nayuxchaūgu i wūxi i duūxū, rū wūxi i poperagu nanaxūmatū na texé tá nayaxuxū i norū ngēmaxūgū. Natūrū ngēxguma namaūxgu i ngēma duūxū, rū taxucūrūwama texé tanayaxu i norū ngēmaxūgū. ¹⁷ Rū ngēmacēx i ngēma popera rū tama napora i ngēxguma namaūxgu i ngēma duūxū. Rū ngēxguma nayuxguxicatama nixī i naporaxū. ¹⁸ Rū nūma ga Cristu rū norū yumaā nixī ga Tupanapēxewa tūxū yamexēēgūxū. Yerū ga Moīché rū nūxū nixu rū yexguma texé pecaduāxgu rū tanaxwēxe na tūmaārū paixūtawa tanagaxū ga wūxi ga naxūna na tūmaegagu nayuxēēāxūcēx rū inabaāxūcēx ga nagū na Tupana tūxū nūxū ngechaūxūcēx ga tūmaārū pecadu. ¹⁹ Rū Moīché rū guxūma ga duūxūgūpēxewa nūxū nixu ga guxūma ga Tupanaārū mugū. Rū yemawena nanayaxu ga wocaxacūgūgū rū chibuxacūgūgū, rū dexāmaā nanaxūēū. Rū ñuxūchi nanayaxu ga wūxi ga naīxchacūūxacū rū ñuxre ga tūēxmū ga dauxūne, rū yema naīxchacūūgu nanabagūmū. Rū yemamaā guma nagūwa nanacūe rū ñuxūchi nanamaxcūetū ga yema popera

ga Tupanaārū mugū nawa yexmaxū. Rū yexgumarūū ta nayamaxcutanū ga guxūma ga duūxūgū. ²⁰ Rū űuxūchi ga Moīché rū űanagūrū nūxū ga duūxūgū: “Tupana rū marū inaxuneta na pexū tá nangūxēēxū. Rū daa nagūmaā pexū chimaxcutanū i űuxma erū ngēmaācū nixī i choxū namuxū na ngēmawa nūxū pecuāxūcēx na aixcūma tá pexū nangūxēēxū”, űanagūrū. ²¹ Rū űuxūchi ga Moīché rū guma nagūmaā nanamaxcutū ga guma űpata ga naxchirunaxcēx ga nawa Tupanaxū yacuēxūūgūne. Rū yexgumarūū ta nayamaxcutanū ga guxūma ga yemaxūgū ga namaā Tupanaxū yacuēxūūgūū ga guma űpataarū aixepewa yexmagūxū. ²² Rū nūxū tacuēx rū yema duūxūgū ga yexguma pecadu naxūgūgu rū Tupanapēxewa nūgū yamexēēgūchaūgu, rū norū paigūxūltawa nanaga ga wūxi ga naxūna na nūxū yamaāxūcēx rū inabagūxēēxūcēx na Tupana tama napoxcuexūcēx. Natūrū űuxma ya Tupana rū tūxū nūxū nangechaū i tōrū chixexū yerū tōrū pecaducēx nayu ga Ngechuchu rū nagū inanaba. Rū yexguma chi tāū chima nayuxgu rū nagū inabaāgu, rū taxucūrūwa chima Tupana tūxū nūxū nangechaū i tōrū pecadugū.

Cristu rū nayu na iyanaxoxēēxūcēx i pecadu

²³ Rū yemacēx ga Tupana rū nuxcūmaxūchima Moīchémaā nūxū nixu na paigū duūxūgūarū pecaducēx nadēixū ga naxūnagū rū inabaāxū ga nagū na yemaācū Tupana tama napoxcuexūcēx ga duūxūgū. Natūrū i űuxma i yixema na Tupana tūxū dexū, rū tūxū nangēxma i tachica i daxūguxū i naānewa yerū Nane ya Cristutama tōrū pecaducēx nayu rū inanaba ga nagū. Rū yima nagū rū Tupanapēxewa rū poraācū ngēma naxūnagūgūarū yexera narūporamaē. ²⁴ Rū ngēmacēx i űuxma rū taxucēxma tūxcūū guma űpata ga naxchirunaxcēx ga duūxūgū űūūnegu naxūcu ya Cristu na ngema taētūwa nachogūxūcēx. Erū nūma ya Cristu rū marū Tupanaxūtawaxūchi nangu i daxūguxū i naānewa. Rū ngema Nanatūpēxewa nangēxma i űuxma na ngēma taētūwa nachogūxūcēx. ²⁵ Rū ngēmacēx i űuxma rū taxucēxma tūxcūū guxūguma Nanatūna nūgū naxāēcha na ngēmaācū taxcēx nayuuuxūcēx. Rū yema Yudiūgūarū paigūarū āēxgacūgū rū gūcū ga taunecūgūgu guma űpata ga űūnenegu nachocuxū na yēma Tupanana naxāgūāxūcēx ga guma naxūnagūgū. ²⁶ Natūrū ya Cristu, rū taxucēxma tūxcūū gūcū ya taunecūgūgu Tupanana nūgū naxāēcha, erū ngēxguma chi ngēmaācū yixūgu rū chi noxri naāne ixūgūgumama rū chi marū muēxpūxcūna taxcēx nayu. Natūrū űomaūcūū ga Cristu rū marū űoma ga naānewa nangu na wūxicanatama nūgū inaxāxūcēx rū pecaducēx nayuxūcēx. ²⁷⁻²⁸ Rū ngēma na wūxicanatama nayuxū i duūxūgū naxūpa na Tupanapēxewa nangugūxū, rū yexgumarūūtama ga Cristu rū wūxicanatama nūgū inaxā rū nayu na iyanaxoxēēxūcēx i muxūma i duūxūgūarū pecadugū. Natūrū wena taxarū nūma naxū. Rū ngēxguma wena nūma naxūxgu rū tama pecaduarū oxēēwa tá nūma naxū. Natūrū tá nūma naxū na namaxēēxūcēx i guxūma i ngēma duūxūgū i aixcūma űnanguxēēgūxū.

10

¹ Rū yema mugū ga Moīché űmatūxū rū űrarūwatama yema duūxūgūcēx nanangoxēē ga űacū tá na naxūxū ga Cristu. Natūrū ga yema mugū rū tama aixcūma Cristurūū napora, yerū taxucūrūwama Tupanapēxewa nayamexēē ga yema duūxūgū woo gūcū ga taunecūgūgu Tupanapēxewa nanadaiixū ga naxūnagū na yemaācū Tupanana nangaicmagūxūcēx. Rū yemaācū ga yema mugū rū taxucūrūwama Cristurūū nanamaxēēxē ga yema duūxūgū.

2 Rū yexguma chi yema mugū aixcūma yema duūxūgūxū imexēēgu ga Tupanapēxewa, rū tāū chima nagu narūxīnūēēcha na yapedaduāxū, rū chi nūxū narūxoe na naxūnagū Tupanacēx nadēixū. 3 Natūrū woo gūcū ga taunecūgūgu Tupanacēx naxūnagū nadēixū ga duūxūgū, rū tama norū pecadu inayarūxoxēē. Rū yema rū norū pecaduarū cuēxāchixēēruūmare nixī. 4 Yerū guma nagū ga yema wocagū rū chibugū rū tama napora na iyanaxoxēēāxūcēx ga pecadugū. 5 Rū yemacēx ga Cristu ga yexguma űoma ga naānewa naxūchaūgu, rū Nanatūxū űanagūrū:

“Tama cunaxwēxe na naxūnagū cuxcēx nadēixū i duūxūgū na naxūtanūgūāxūcēx i norū pecadugū. Natūrū cunamexēē i űaā chaxune na ngēmamaā chanaxūtanūxūcēx i pecadu. 6 Rū tama namaā cutaāē i ngēma naxūnagū i cuxna naxāmaregūxū rū cuxcēx nadēixū rū yagugūxū na naxūtanūgūāxūcēx i norū pecadugū. 7 Rū yemacēx rū űacharūgū: ‘Dūcēx, Pa Chaunatūx, daxe chixī, rū nuā cupēxewa changēxma na chanaxūxūcēx i curū ngūchaū rū na chayuxūcēx, ngēma curū űrewa chauchiga naxūmatūxūrū’, űacharūgū”.

8 Rū yemaācū ga Cristu rū nūxū nixu na Tupana rū tama aixcūma namaā nataāēxū ga yema na naxcēx nadaiāxū ga naxūnagū rū naxcēx yagugūāxū na naxūtanūgūāxūcēx ga norū pecadugū woo yema mugū ga Moīché űmatūxūwa rū duūxūgūxū namu na naxūgūāxū ga guxūma ga yema. 9 Rū yemawena ga Cristu, rū űanagūrū ta:

“Dūcēx, Pa Chaunatūx, daxe chixī, rū nuā cupēxewa changēxma na chanaxūxūcēx i curū ngūchaū rū duūxūgūarū pecaducēx na chayuxūcēx”,

űanagūrū. Rū yemawa nūxū tacuēx na Tupana rū marū iyanaxoxēēāxū na naxūnagū naxcēx nadēixū, yerū Nanexū ningucuchixēē na pecaducēx nayuxū. 10 Rū űuxma na Ngechuchu ya Cristu naxūxū ga yema Tupanaārū ngūchaū, rū ngēmacēx nixī i űuxma i Tupanapēxewa ixūūnexū i yixema. Yerū nūma ga Cristu rū Tupanana nūgū naxā na wūxicanatama guxāārū pecaducēx nayuxū. 11 Rū guxūma i Yudiūgūarū paigū rū wūxichigū i ngunexūgu rū tupaucawa nangēxmagūxū na Tupanana naxāgūāxūcēx i naxūnagū i naxcēx nadaiixū. Rū guxūguma yemaācū nanaxūgūxū natūrū taguma aixcūma inayarūxo ga norū pecadugū woo yemaācū na naxūgūxūāxū. 12 Natūrū nūma ga Ngechuchu ya Cristu rū wūxicanatama Tupanana nūgū naxā na guxāārū pecaducēx nayuxūcēx. Rū yemawena rū űuxūchi daxūwa naxū rū Tupanaārū tūgūnecūwawa nayarūto, erū guxāārū āēxgacū nixī i űuxmax. 13 Rū ngēma nixī i nangēxmaxū űuxmatāta ya Tupana rū guxūma i norū uwanūgūxū nūxū nayexeraxēē. 14 Rū nūma ga Ngechuchu ya Cristu rū wūxicanatama Tupanana nūgū naxā rū nayu na guxūguma Tupanapēxewa timexcēx ya yixema Tupanacēx tūxū yaxūūnexēēgūxe. Rū ngēmacēx i űuxma rū taxucēxma tūxcūwēna nūgū inaxā rū nayu, yerū wūxicanatama guxūma ningutanūxēē. 15-16 Rū Tupanaāē i Ūūnexū rū tūxū nūxū nacuēxēē na aixcūma yīxū i ngēma, yerū nūma ga Tupana rū űanagūrū:

“Ngēxguma nawa nanguxgu na wena ngēma Yudiūgūmaā ichaxunetaxū, rū wūxi i ngexwacaxūxū i uneta tá nūxna chaxā. Rū tá meā ngēma duūxūgūxū nūxū chacuēxēē i chorū mugū na aixcūma naāēwa nangēxmagūxūcēx rū guxūguma naga naxīnūēxūcēx. 17 Rū tá nūxū ichayarūngūmaxūchi i ngēma duūxūgūarū pecadugū rū ngēma chixexū i naxūgūxū. Rū tagutāma wena nūxna chacuēxāchi”,

ñanagürü. ¹⁸ Rū ngēmaācū nūxū tacuèx rū ngēxguma Tupana duūxūgūaxū nūxū ngechaūgu i norū pecadugū, rū marū taxucèxma tūxcūū nanaxwèxe na wena tacū i naxūnagū nūxna naxāgūxū naxcèx i pecadu.

Name nixī i Tupanana tangaicamagū

¹⁹⁻²⁰ Rū ngēmacèx i ñuxma, Pa Chaueneēgū, rū taxucèxma tūxcūū tamuūē na Tupana ingēxmaxūwa ichocuxū na namaāxūchi idexagūxūcèx. Rū nuxcūmaxūchima rū paigūarū āēxgacūxicatama yexma naxūcu nagu ga guma ĩpata ga naxchirunaxcèx ga Tupana nawa yexmane. Rū taxucūrwama ngexerūxūxemare yexma taxūcu. Natürū nūma ga Ngechuchu ya Cristu rū marū inayanaxoxēē ga guxūma ga yema ga yexguma curuchagu nayuxgu rū nagū inabaāgu na Tupana ingēxmaxūwa tūxū yachocuxēēxūcèx rū namaāxūchi idexagūxūcèx. Rū woo taxucūrwama Tupanana tangaicamagū ga noxrix, natürū nūma ga Cristu rū nayu na tūxū namaxēxēxūcèx. Rū nagagu nixī i ñuxma i Tupanaxūtawa ingugūxū. ²¹ Rū nūma nixī i Tupanapēxewa tūxū nangūxēēxū i guxāma i yixema i Tupanaārū duūxūgū ixīgūxe. ²² Rū ñuxma na tūxū nangēxmaxū ya tórū ngūxēēruū i Tupanapēxewa, rū tanaxwèxe i ngearū chixexūācūma Tupanana tangaicamagū na namaāxūchi idexagūxūcèx. Rū tanaxwèxe i aixcūma tayaxōgū na nūma rū tá meā tūxū nayaxuxū yerū Cristu rū taxcèx nayu na tūxū iyanaxoxēēāxūcèx i tórū chixexū rū yemacèx marū naegagu ĩtabaiū. ²³ Rū tanaxwèxe i aixcūma meā Cristuaxū tayaxōgūecha yerū nagūmaā tūxū inayanaxoxēē ga tórū chixexū. Rū ngēmacèx ĩtananguxēē na wena taxarū nūma naxūxū na Nanatūxtawa tūxū nagagūxū. Rū taguma tanaxwèxe na nūxū rūxoexū na yaxōgūxū, rū bai i ĩrarūwa. Erū Tupana ga tamaā ixunetacū na tūxū nangūxēēxū, rū aixcūmaxūchi tá nayanguxēē i guxūma ga yema tamaā nūxū yaxuxū. ²⁴ Rū ñuxma na ngēmaācū tūxū nangūxēēxū ya Tupana, rū name nixī i guxūguma naxcèx tadaugū na ñuxācū wūxichigū yigū rūngūxēēgūxū na yexeraācū yigū ingechaūgūxūcèx rū mexū ixūgūxūcèx. ²⁵ Rū name nixī i guxūguma tórū ngutaquēxegūwa na ĩngugūxū. Erū nūmaxū rū marū nūxū narūxoe na ngutaquēxewa naxīxū, rū tama tanaxwèxe na ngēxgumarūū ixīgūxū. Rū ngēmacèx name nixī i yigūaxū tanagūchaūxēē na ingutaquēxegūxū. Rū ñuxma na nūxū icuāxū na marū yangaicaxū ya tórū Cori, rū yexeraācū tanaxwèxe na yigūaxū nangūchaūxēēxū. ²⁶ Natürū ngēxguma chi texé Cristuaxū yaxōchirēxgu ga noxrix rū ñuxūchi noxtacūma nūxū tarūxoxgu, rū marū nataxuma na ñuxācū namexēēxū i ngēma tūmaārū pecadu i Tupanapēxewa. ²⁷ Erū ngēxguma chi ngēmaācū noxtacūma Cristuxū tarūxoxgu, rū aixcūmaxūchi tá tanayaxu i ngēma poxcu i āūcūmaxū i Tupana tá tūxū namaā poxcuxū rū yima ūxū ya ĩyaurane ya nawa tá ĩnaguxūne i ngēma Tupanamaā rūxuwantūgūxū. Rū ngēxīcatama nixī i tūxū ĩnanguxēēxū ya yixema Cristuxū rūxoxe. ²⁸ Rū nūxū tacuèx rū yexguma texé tama Moīchéarū mugūga ĩnūgu rū nayexmagu ga taxre rū ēxna tomaēxpūx ga duūxūgū ga tūxū daugūxū rū tūxū ixugūexū na aixcūma tama naga taxīnūxū, rū āēxgacūgū rū noxtacūma tūxū nimèxgū rū tama nūxū tangechaūtūmūgū. ²⁹ Natürū Tupana rū aixcūma yexeraācū tá nanapoxcue i ngēma duūxūgū i tama Nanega ĩnūexū rū yima nagū ya pecaduarū piruūxū oexū rū Naāē i Ūūnexū i nūxū ngechaūxūmaā guxchigagūxū.

³⁰ Rū meāma nūxū tacuèx rū Tupana rū tama natūcèxma ñanagürü:

“Choma tá nixī i namaā nūxū chacuāxū na tacū tá namaā chaxūxū i guxūma i ngēma chixexū ūgūxū. Rū aixcūma tá chanapoxcu”,

ñanagürü. Rū yexgumarüü ta ñanagürü:

“Choma tátama nixí i nüxna chaçaxü i wüxichigü i chorü duüxügü i norü maxüchiga”,

ñanagürü. ³¹ Rū dücax, rü aixcüma namaxü ya Tupana, rü ngëmacëx ega tama naga ixĩnüëgu rü wüxi i äücümaxüchixü nixí na namëxgu inguxü na tüxü napoxcuxüçëx. ³² Rū dücax, name nixí i nüxna pecuëxächie ga ñuxäcü na yixü ga yexguma noxri Cristuxü peyaxügu. Rū yexguma ga pema rü yema na peyaxögüxügagu rü poraäcü guxchaxügü pexü nangupetü, natürü tama Cristuxü perüxoe rü bai ga irarüwa. ³³ Rū ñuxre ga pema rü duüxügü pemaä naguxchigagü rü guxäpëxewa pexü niçuaixgü. Rū toguäx ga pema rü pegü ipeyaxägu na yema pemüçügürüü ngüxü pingegüxüçëx. ³⁴ Rū pema rü pexü nangechaütümüügü ga yema petanüxügü ga yaxögüxü ga poxcupataüwa yexmagüxü. Rū taäëäcüma yaxna namaä pexĩnüë ga yema tama yaxögüxü ga pexna napuxüxü ga perü yemaxügü. Rū tama naxcëx pexoegaäë, yerü meäma nüxü pecuëx rü daxüguxü i naänewa pexü nangëxma i ngëma perü ngëmaxügüarü yexera ixixü, erü tagutáma nagux. ³⁵ Rū ngëmacëx i ñuxmax, rü tama name na nüxü perüxoexü na Cristuaxü peyaxögüxü woo tacü pexü üpetügu. Erü marü nüxü pecuëx rü Tupana rü aixcümaxüchi tá pexna nanaxä i perü ämare i maxü i taguma güxü, erü Cristuaxü peyaxögü. ³⁶ Rū ngëma guxchaxügü i pexü ngupetüxü, rü name nixí i yaxna namaä pexĩnüë na penaxüxüçëx i Tupanaärü ngüchaü rü penayaxuxüçëx i ngëma ämare i pemaä inaxunetaxü. ³⁷ Erü Tupanaärü ore i ümatüxüwa rü ñanagürü:

“Paxaxüchi tá wenaxärü numa naxü ya Cristu. Rū aixcüma täütáma nuxcü íngau. ³⁸ Natürü yixema tümaärü ögagu chopëxewa mexë, rü name nixí i guxüguma tayaxöðcüma chauxcëx tamaxü. Natürü ngëxguma nüxü tarüxoxgu na tayaxöxü, rü choma rü täütáma tümamaä chataäë”,

ñanagürü. ³⁹ Natürü i yixema rü tama ngëma duüxügü i nüxü rüxoexü i Tupana tá poxcuexürüü tixigü. Erü yixema rü ngëma yaxögüxütanüxü tixigü, rü ngëmacëx tüxü nangëxma i maxü i taguma güxü.

11

Tóru öchiga

¹ Rū ñuxma rü tóru ögagu nixí i nüxü icuáxü na aixcüma tá nayauxgüxü i guxüma i ngëma irünguxëëgüxü ga Tupana tamaä ixunetaxü. Rū ngëma tóru ögagu nixí i nüxü icuáxü na aixcüma Tupana tá yanguxëëxü i ngëma norü uneta i ñuxma tauta nüxü idauxü. ² Rū ñuxre ga nuxcümaügüxü ga tóru oxigü rü Tupanaäxü nayaxögü, rü yemacëx ga Tupana rü namaä nataäë. ³ Rū ngëma tóru ögagu nixí i nüxü icuáxü na aixcüma yixü na Tupana rü norü oremaämare nangoxëëäxü ga ñoma ga naäne rü üëxcü rü tauemacü rü woramacurigü rü äxtagü. Rū yemaäcü ga Tupana, rü ngürüwa nanangoxëëmare ga guxüma i ngëma ñuxma nüxü idauxü. ⁴ Rū guma nuxcümaücü ga Abé rü Tupanaäxü nayaxö. Rū yemacëx Tupanaga naxĩnü rü nüxna nanaxä ga wüxi ga naxüna ga Tupanacëx yamáxü. Natürü ga naëneë ga Caí rü tama Tupanaga naxĩnü rü tama nüxna nanaxä ga yema ämare ga Tupana nüxü naxwëxexü. Rū yemacëx ga Tupana rü woo tama Caímaä nataäë, natürü Abémaä nataäë rü nüxü nixu na mecü yixü yerü nayaxö rü naga naxĩnü. Rū ngëmacëx i ñuxmax na woo nayuxü ga Abé, natürü wüxi i tóru cuëxruü nixí. Erü nawa nixí i nüxü icuáxü na Tupana naxwëxexü na yaxögüxü rü naga ixĩnüëxü. ⁵ Rū Enó rü ta Tupanaäxü nayaxö rü naga naxĩnü. Rū

yemacèx nixī ga namaxācūtama yagaāxū na tama nayuxūcèx. Rū namūcūgū rū taguma nūxū inayangaugū, yerū Tupana nayaga. Rū Tupanaārū ore i ūmatūxūwa nūxū nixu rū yexguma tauta yagaāgu, ga Enó rū nanaxū ga yema Tupana naxwèxexū. ⁶ Natūrū taxuacūma Tupana tamaā nataāe ega tama nūxū yaxōgūgu. Rū yīxema namaā āmūcūchaūxē, rū tanaxwèxe na tayaxōxū na aixcūmaxūchi nangēxmaxū i nūma rū aixcūma tūxū nangūxēēxū ya yīxema naxcèx daugūxe rū naga īnūēxē. ⁷ Rū yexguma Noemaā yadeaxgu ga Tupana, rū nūma ga Noē rū nayaxō rū naga naxīnū. Rū Tupana rū namaā nūxū nixu rū tá na īnanguxēēāxū ga mucū ga taxūchicū ga taguma duūxūgū nūxū daucū rū tá guxūwama inanguanexēēcū. Rū namaā nūxū nixu ga na naxūāxūcèx ga wūxi ga wapuru ga taxūne na tama nayuxūcèx ga nūma rū namèx rū nanegū rū naneāxgū. Rū Tupanaga naxīnū ga Noē, rū nanaxū ga guma wapuru, rū yemaācū tama nayue ga nūma rū napatacūāx. Rū yemaācū Tupanaāxū nayaxō. Natūrū yema togū ga duūxūgū rū tama nayaxōgū, rū yemacèx Tupana nanapoxcūe. Natūrū nūma ga Tupana rū Noexū nixu na napēxewa namexū, yerū nūxū nayaxō. ⁸ Rū guma tórū oxī ga Abrátū, rū Tupanaāxū nayaxō. Rū yemacèx nixī ga naga naxīnūxū rū nūxna yaxūxū ga nanatūchiūāne na nawa naxūxūcèx ga yema naāne ga Tupana tá nūxna āxū na noxrūxūchi yīxūcèx. Rū yemaācū nanaxū ga yexguma Tupana namuxgu. Rū nanatūchiūānēwa inaxūāchi ga Abrátū woo tama nūxū na nacūāxū ga ngextá tá na naxūxū. ⁹ Rū yexguma nawa nanguxgu ga yema naāne ga Tupana namaā ixunetaxū, rū űoma yexma naxūāneāxūrūūmare īpata ga naxchirunaxcèxmaāmare naxāchiū. Rū yexgumarūūtama nixīgū ga nane ga Ichaá rū nataa ga Acobu, yerū yexguma nayaegu rū Abrátūrū űoma yexma naxīāneāxūrūūmare nixīgū ga yema naānēwa. Rū yemaācū nixīgū ga guxūma ga nūmagū ga na woo Tupana rū namaā inaxunetaxū ga na noxrūxūchi yīxūcèx ga yema naāne. ¹⁰ Rū yemaācū ga Abrátū, rū woo űoma yexma naxūāneāxūrūūmare yēma nayexma, natūrū Tupanaāxū nayaxōchigūama, yerū nūxū nacūex na Tupana tá daxūguxū i naānēwa na nagaxū nawa ya yima īāne ya nūmatama naxūxūne ya tagutāma iyarūxoxūne. ¹¹ Rū yexgumarūūtama iyixī ga Abrátū namèx ga Chara. Rū woo ga na taguma naxāxācūchiréxū yerū marū iyaxūchi, natūrū ixāxācū yerū iyaxōōma na Tupana rū aixcūma tá yanguxēēāxū ga yema norū uneta ga tá na naxāxācūxū. ¹² Rū yemaācū ga Abrátū rū woo marū yaguāxūchi na yīxū, natūrū dūxwa nūxū nayexma ga wūxi ga nane, rū gumāwa ne naxī ga muxūma ga nataagū. Rū űuxma rū űoma ēhtagūrū namuxūchi, rū űoma naxnūcū ya taxuacūma yaxugūcūrū nixīgū, yerū yemaācū Abrátūmaā inaxuneta ga Tupana. ¹³ Natūrū nūmagū ga Abrátū rū Ichaá rū Acobu rū nayue, rū yemacèx tama nūxū nadaugū ga guxūma ga nataagū i űuxma ngēxmagūxū, rū tama namaā inacuēxgū ga yema naāne ga noxri Abrátūmaā nūxū yaxuxū ga Tupana. Natūrū Tupanaāxū nayaxōgūama, rū yemacèx nūxū nacūēxgū rū Tupana rū tá aixcūma na yanguxēēāxū ga yema norū uneta ga namaā nūxū yaxuxū. Rū nataāēgū yerū nūxū nacūēxgū na tāūtāma guxūguma űoma ga naānēwa na nayexmagūechaxū, rū yemacèx nūxū nixugūe na to i nachīūānecūāxūrūūmare yixīgūxū ga űoma ga naānēwa. ¹⁴ Rū nūmagū rū yema oremaā meāma tūxū nūxū nacūēxē na tama űoma ga naāneguxicatama naxīnūēxū natūrū īnanguxēēgūāxū i to i nachica i daxūguxū i naānēwa ngēxmaxū. ¹⁵ Rū nūmagū rū yexguma chi nanaxwèxegūgu ga naxcèx na nawoeguxū ga yema naāne ga noxri nawa ne naxīxū, rū tāū chima nūxū naguxcha rū chi naxcèx nawoegu.

¹⁶ Natürü ga nūmagü rü nüxŭl nangúchaŭgü i ngēma naāne i mexēchixŭl i daxūwa ngēxmaxŭl i Tupanaxŭtawa. Rŭ yemacēx nixŭl ga Tupana ga tama naxānexŭl na nŭgŭ yaxuxŭl na norŭ Tupana yŭixŭl. Yerŭ nūma ga Tupana rŭ naxcēx nanamexēē ga wŭxi ga ŭāne ya daxŭguxŭl i naānewa ngēxmane. ¹⁷⁻¹⁸ Rŭ Tupana ga noxri rŭ Abráŭmaā nüxŭl nixu rŭ űanagŭrŭ:

“Cune ya Ichaáwa tá cuxŭl nangēxma i muxŭchixŭtama i cutaagŭ”, űanagŭrŭ. Rŭ Abráŭl rŭ nayaxŭl na Tupana rŭ aixcŭmaxŭchi tá na yan-guxēēaxŭl ga yema namaā inaxunetaxŭl. Rŭ yemacēx ga yexguma Tupana nüxŭl ŭxgu rŭ Ichaácēx nüxna nacaxgu na naxcēx yamaāxŭcēx, rŭ nūma ga Abráŭl rŭ tama nanachuxu. Rŭ inamemare na Tupanacēx yamaāxŭl ga guma nane ga nŭgŭmaā wŭxicacŭ. ¹⁹ Yerŭ nūma ga Abráŭl rŭ nayaxŭl na Tupanaāxŭl natauxchaxŭl na wena namaxēxēēaxŭl i yuexŭl. Rŭ yemacēx ga Abráŭl rŭ inamemare na Tupanacēx nanexŭl yamáxŭl yerŭ nayaxŭl na Tupana rŭ wena tá namaxēēaxŭl. Rŭ aixcŭmaxŭchi yemaācŭ Abráŭcēx nanaxŭl ga Tupana, yerŭ woo űoma marŭ nayuxŭrŭŭl nixŭl ga nane, natŭrŭ ga Tupana rŭ maxŭcŭ nüxna nanamu. Rŭ yema rŭ wŭxi ga tŭrŭ cuēxruŭl nixŭl na űuxācŭ aixcŭma yaxŭŭxŭl ga Abráŭl. ²⁰ Rŭ guma Ichaá rŭ ta Tupanaāxŭl nayaxŭl. Rŭ yemacēx ga yexguma marŭ nayēxgu, rŭ nayumŭxē rŭ Tupanana naca na nane gŭ ga Acobu rŭ Echaŭxŭl nangŭxēēxŭcēx. Rŭ yemaācŭ nayumŭxē yerŭ aixcŭma nayaxŭl na Tupana tá yanguxēēxŭl ga yema nüxna naxcēx naçaxŭl. ²¹ Rŭ guma Acobu rŭ ta Tupanaāxŭl nayaxŭl. Rŭ yemacēx ga yexguma marŭ nayēxgu rŭ nayuxchaŭgu, rŭ norŭ caxŭxŭmaā nŭgŭ inachixēē rŭ Tupanaxŭl nicŭxŭŭl. Rŭ nayumŭxē rŭ Tupanana naca na nataagŭl ga Yŭche nanegŭxŭl nangŭxēēxŭcēx. Rŭ yemaācŭ nayumŭxē yerŭ aixcŭma nayaxŭl na Tupana tá yanguxēēxŭl ga yema Abráŭmaā inaxunetaxŭl. ²² Rŭ guma Yŭche rŭ ta Tupanaāxŭl nayaxŭl. Rŭ yemacēx ga yexguma nayuxchaŭgu, rŭ natanŭxŭgŭmaā nüxŭl nixu rŭ űanagŭrŭ:

“Tataagŭ rŭ yixcŭra rŭ tá inachoxŭl i nuā Equituanewa na nawa naxŭxŭcēx i ngēma naāne ga Tupana tŭrŭ ŭxi ga Abráŭmaā nüxŭl ixuxŭl. Rŭ ngēxguma ngēma naxŭxgu, rŭ chanaxwēxe ya chauxchinēxāgŭ rŭ ta ngema nanana na ngēxma yatēxgŭāxŭcēx”,

űanagŭrŭ. ²³ Rŭ yemawena rŭ mucŭma ga taunecŭgŭ rŭ nimu ga yema duŭxŭgŭ ga Equituanewa. Rŭ yema nachŭŭāneārŭ āēxgacŭ, rŭ tama nanaxwēxe na yexeraācŭ yamuētanŭxŭl, rŭ yemacēx nanamu na tŭxŭl nadēixŭcēx ga guxāma ga buxe ga iyatŭxe ga yexwacēx ibuetanŭxē. Natŭrŭ nanatŭ rŭ naē ga guma tŭrŭ ŭxi ga Moŭché, rŭ aixcŭma Tupanaāxŭl tayaxŭgŭ. Rŭ yemacēx ga yexguma noxri nabuxgu ga Moŭché, rŭ tomaēxpŭx ga tauemacŭgu itayacuxgu, yerŭ nüxŭl tadaugŭ na namexēchixŭl rŭ tama naxcēx tamuŭē ga yema Equituanearŭ āēxgacŭarŭ ore ga woo na naxunagŭāxŭl ga na buxe tŭxŭl nadēixŭl. ²⁴⁻²⁵ Rŭ Moŭché rŭ ta Tupanaāxŭl nayaxŭl. Rŭ yemacēx ga yexguma marŭ nayēxgu rŭ tama nanaxwēxe na nŭgŭ yaxuxŭl na Equituanearŭ āēxgacŭxacŭl ngŭne na yŭixŭl, yerŭ naxcēx rŭ narŭmemaē na natanŭxŭgŭ ga Yudiŭgŭmaā wŭxigu ngŭxŭl yangexŭl. Rŭ tama nanaxwēxe na űacŭ ga űoma ga naāneārŭ chixexŭmaā nŭgŭ na nataāēxēēxŭl, yerŭ nüxŭl nacuēx rŭ yema taāē rŭ paxaāchiruŭmare nixŭl. ²⁶ Rŭ yexgumarŭŭl na daxŭguxŭl ga naānena na yaxŭxŭl ga Cristu na ngŭxŭl yangexŭl cēx, rŭ yexgumarŭŭl ta nixŭl ga Moŭché ga āēxgacŭpatana na yaxŭxŭl, yerŭ naxcēx rŭ narŭmemaē na natanŭxŭgŭ ga Yudiŭgŭmaā wŭxigu ngŭxŭl yangexŭl. Natŭrŭ taxucēxma yema ngŭxŭgu narŭxŭnŭ, yerŭ nüxŭl nacuēx rŭ tá wŭxi

i ngunexūgu Tupanaxūtawa na nayauxāxū i norū natanū. ²⁷⁻²⁸ Rū yema na yaxōōxūcēx nixī ga Tupanaga naxīnūxū ga Moīché. Rū yemacēx ga yexguma Tupana namuxgu ga na naxūāxū ga ūpetūchiga, rū nayanguxēē ga yema Tupana namuxū. Rū nūma ga Moīché rū guxūma ga natanūxūgū ga Yudiūgūxū namu na wūxichigū ga Īpatawa yamāāxūcēx ga wūxi ga carnerux-acū na yemagūmaā namaxcūāxūcēx ga naāxpatagū. Rū űnanagūrū nūxū:

“űNoma i chūtaxūgu rū tā Tupana nūma Equituanewa nanamu i wūxi i norū orearū ngeruū i daxūcūāx rū tā nanadai ya yima nūxira bucū ya Equituanecūāxgū nane i wūxichigū ya Īpatawa. Natūrū ngēxguma yima nagūmaā penamaxcuxgu i perū ĩāxpata, rū tāūtāma pechiūgu naxūcu”, űnanagūrū. Rū yemaācū ga Moīché rū Tupanaga naxīnū yerū nūxū nayaxō. Rū yemacēx ga yema orearū ngeruū ga daxūcūāx rū taxuūma ga Yudiūgūnēxū nimēx. Rū yema na yaxōōxūcēx nixī ga ĩnaxūxūxū ga Equituarū naānēwa, rū tama naxcēx namuūxū na guma Equituanēārū āēxgacū tā namaā nanuxū. Rū taguma nūxū narūxo ga Tupanawe na naxūxū, yerū Tupana ya ēxūgucūarū ngūchaū naxū. ²⁹ Rū yema duūxūgū ga Moīchéwe rūxīxū rū ta nayaxōgū. Rū yemacēx ga yexguma yema Taxtū ga Dauchiūxūwa nangugūgu, rū yema dexā rū nūgūna nixīgachi, rū nipaaneāchi, rū yēma nichoū. Natūrū yexguma yema Equituanecūāx ga churragū ga nawe ngēgūxū nawe ichoūgu, rū yexma nayiama, yerū wenaxārū nūgūna naxī ga yema dexā. ³⁰ Rū yexguma guma ĩāne ga Yericūwa nangugūgu ga yema duūxūgū, rū taxucūrūwama nichocu, yerū guxūwama naxāxtapūx. Natūrū Tupanaāxū nayaxōgū, rū yemacēx Tupanaga naxīnūē rū 7 ga ngunexū nūxū ĩnichoeguāchitanūcūū, yema Tupana namaā nūxū ĩxuxūrū. Natūrū yexguma norū 7 ga ngunexūwa nanguxgu, rū nūēchama niwēxgūtapūx, rū yemaācū nichocu. ³¹ Natūrū yema nge ga Yericūcūāx ga Raā, rū woo chixri imaxū ga noxrix, natūrū yexguma yēma nangugūgu ga yema taxre ga Yudiūgū ga hexma ngugūtaewa yēma ĩxū, rū ngūma iyixī ga nūxū nangūxēēxū. Rū yemacēx tama yema togū ga Yericūcūāx ga tama Tupanaga ĩnūēxūrūē iyu, yerū Tupanaāxū iyaxō. ³² Rū űnuxma rū tacū i togū i duūxūgūchigaxū tā pemaā chixuxū? Rū changechica na pemaā nūxū chixuxūcēx i nachiga ga yema nuxcūmaūgūxū ga āēxgacūgū ga Yedeū rū Barā rū Chaūchoū rū Yetē rū Dabī rū Chamue, rū guxūma ga nuxcūmaūgūxū ga Tupanaārū orearū uruūgū. ³³ Rū yema na yaxōōgūāxūcēx nixī ga Tupana nūxū rūngūxēēxū. Rū yemaācū to ga nachīūānēgūarū āēxgacūgūxū narūporamaēgū, rū meāma norū duūxūgūmaā ĩnacuēxgū rū aixcūma nanayauxgū ga yema Tupana namaā ĩxunetaxū. Rū yemacēx ga yexguma woo aitanūgu yatēxcuchigūāgu, rū taxuūma namaā naxū ga aigū yerū Tupana nūxna nadau. ³⁴ Rū yexguma norū uwanūgū ūxūxetūwa yawocuxgu, rū taxuūma nūxū naxūpetū rū tama nixae, yerū Tupanaāxū nayaxōgū rū nūma rū nūxna nadau. Rū yexguma togū taramaā nadaixchaūgu, rū Tupana nūxū narūngūxēē na taxuūma nūxū ūpetūxūcēx. Rū yexguma naturaegu rū norū uwanūgū nadaixchaūgu, rū Tupana nanaporaēē. Rū yexguma to ga nachīūānēārū churragūmaā nūgū nadaixgu, rū yema togū ga churragūxū narūyexeragū. ³⁵ Rū nayexma ga ngēxūgū ga yuexacūxū, natūrū yema naxācūgū rū wenaxārū ĩnarūdagū yerū Tupanaāxū nayaxōgū. Natūrū nayexma ga togū ga poraācū ngūxū ĩngēgūxū yerū norū uwanūgū yemaācū namaā nachopetū na Tupanaxū ĩnatēxgūxūcēx. Natūrū ga nūmagū rū tama Tupanaxū ĩnatēxgū rū yemacēx nayue, yerū naxcēx rū narūmemaē nixī na wena namaxēxū rū nayauxgūāxū

i ngēma maxū i taguma gúxū. ³⁶ Rū nayexma ta ga ñuxre ga togū ga yaxōgūxū ga duūxūgū nūxū cugūxū, rū yaçuaixgūxū, rū cadenamaā yanēixgūxū, rū poxcupataūgu nawocuxū. ³⁷ Rū ñuxre ga nūmagū rū nutamaā inanamuxūchigū rū yemaācū nanadaí. Rū togū rū nayawāixyegū rū nayue. Rū ñuxre ga togū rū ngūxū nūxū ningexēēgū na Tupanaxū inatēxgūxūcēx. Rū carerū rū taramaā nanadaí. Rū ñuxre ga nūmagū rū nu ne nanaxīmare rū carneruchēxmūđ rū chibuchēxmūđmaāmare nixāxchiru. Rū taxuūma nūxū nayexma, rū nanaxīxāchiāēgū yerū norū uwanūgū rū chixri namaā nachopetū. ³⁸ Rū ñoma ga naānecūāx rū naxchi naxaie, natūrū Tupana rū nūxū nangechaū. Rū ñoma ga naānewa rū norū uwanūgūchaxwa nu ne nanaxīmare ga taxūema íxāpataxūwa. Rū nūrūānegu nipexūtanūmare yerū nangepatagū. ³⁹ Rū guxūma ga yema nuxcūmaūgūxū ga duūxūgū woo norū ōgagu Tupana namaā na taāēxū, natūrū taxuūma ga yema duūxūgū rū nūxū nadau ga yema mexūgū ga Tupana namaā nūxū ixuxū. ⁴⁰ Rū yemaācū namaā nangupetū ga yema duūxūgū, yerū ga Tupana rū tagu narūxīnū rū tama nanaxwēxe na nūxīra nūxīca yamexēēgūāxū, natūrū nanaxwēxe na tamaā wūxigu yamexēēgūāxū. Rū ñuxma i yixema na yaxōgūxū, rū yema nuxcūmaūgūxū ga duūxūgūrūđ Tupanaārū duūxūgū tixīgū, yerū Nane ya Ngechuchu rū guxācēxma nayu. Rū wūxi i ngunexū rū tá taxcēx nūma naxū na nūgūxūtawa tūxū nagagūxūcēx na ngēma ingēxmagūechaxūcēx.

12

Name nixī i Ngechuchucūmagu taxī

¹ Rū ñuxma na nūxū icuáxū na ñuxācū aixcūma Tupanaāxū yaxōgūāxū ga guxūma ga yema nuxcūmaūgūxū ga duūxūgū, rū ngēma rū wūxi i tōrū cuēxruū nixī na ñuxācū Tupana naxwēxexū na naxcēx imaxēxū. Rū ngēmacēx i ñuxmax, jrū ngīxā nūxū tarūxoe i guxūma i ngēma pecadu i tūxū ítūexēēxū rū tūxū naguchaxēēxū na meā yaxōgūxū! jrū ngīxā paxa naxcēx tadaugū na meā Tupanacēx imaxēxū rū guxūguma aixcūma naxūxū i ngēma tūxū nanaxwēxexū! ² Rū name nixī i tanangugū na ñuxācū namaxūxū ga Ngechuchu rū nagu taxī i nacūma. Yerū nūma nixī ga nuxcūma nagu naxīnūxū na ñuxācū tōrū ōgagu tá tūxū namaxēxēēxū rū nūma nixī i tūxū nangūxēēxū na aixcūma meā yaxōgūechaxūcēx na ngēmaācū naxūtawa ingūgūxūcēx. Rū nūma rū tama nūgū nachuxu na curuchawa ngūxū yangexū, rū tama nagu narūxīnū ga yema āne na yangexū, natūrū nataāēxūchi yerū nūxū nacūx na yemawena rū tá muxūma i duūxūgū nayauxgūxū i maxū i taguma gúxū. Rū ñuxma rū Tupanaārū tūgūnecūwawa narūto na ngēma guxāārū āēxgacū yīxūcēx. ³ Rū name nixī i penangugū rū nagu perūxīnūē na ñuxācū ga Ngechuchu rū yaxna namaā naxīnūxū ga yema ngūxū ga nūxū yangexēēgūxū ga yema duūxūgū ga pecaduāxgūxū. Rū nūma ga Ngechuchu rū yemaācū yema ngūxūmaā yaxna naxīnū na pema rū tama nūxū perūçhaxūcēx rū tama nūxū perūxoexūcēx na nūxū peyaxōgūxū. ⁴ Rū ñuxma i pema na peyaxōgūxū, rū ngūxū pingegū erū pecaduxū perūxoe. Natūrū taxūema ga petanūwa rū yemacēx Cristurūđ yuwa tangu. ⁵ Rū name nixī i nūxna pecuēxāchē i norū ore ya Tupana i namaā pexū yaxucūxēgūxū i ñuxma na naxācūgū pixīgūxū. Erū ngēma norū ore i ūmatūxūwa rū ñanagūrū: “Pa Chaunex, jtāxū i nūxū cuxoxū i ngēxguma cuxū icharūwēxāchixēēgū! jrū tāxū i cuyarūmaxāchixū i ngēxguma cuxū chaxucūxēgū! ⁶ Erū nūma ya Cori ya Tupana rū tūxū inayarūwēxāchixēē ya yixema tūxū

nangechaũxê. Rũ tüxna nanaçuaixca ya yíxema naxãcüxũ tüxũ nayaxúxe, na ngêmaãcü tüxũ nanguxêẽxũcêx na ñuxãcü nanaxwêxexũ na naxcêx tamaxũxũ”, ñanagürü. ⁷ Rũ ngêmacêx i pemax, rũ name nixĩ na yaxna namaã pexĩnũẽxũ i ngêxguma Tupana pexna naçuaixcagu. Erũ ngêxguma ngêmaãcü pe-maã yixĩgu, rũ pexũ nüxũ nacuêxêẽ na aixcüma naxãcügũ pixĩgũxũ. Erũ guxũma i papá rũ inayanawêxãchixêẽ i ngêma aixcüma naxãcügũ ixĩgũxũ. ⁸ Natürü ngêxguma chi Tupana tama pexũ iyarüwêxãchixêẽgu, naxãcügũxũ iyanawêxãchixêẽxũrũ, rũ ngêmawa tá nüxũ pecuêx na tama aixcüma naxãcügũ pixĩgũxũ, rũ ngenatũxũ pixĩgũxũ. ⁹ Rũ wüxichigü i yixema ga yexguma ibuegu, rũ tanatügü rũ tüxũ taxucuxêgü, rũ yixema rũ tũmaga taxĩnũ rũ tüxũ tangechaügü. Rũ ngêmacêx i ñuxma rũ yexeraãcü tanaxwêxe na naga ixĩnũẽxũ ya Tanatü ya daxügucü na ngêmaãcü nayauxũcêx i maxũ i taguma gúxũ. ¹⁰ Rũ tanatügü rũ wüxi i paxaãchicêxmare tüxũ taxucuxêgü na tũma tanaxwêxegũxũãcüma imaxêxũcêx. Natürü ya Tupana rũ aixcüma tórü mexũcêx nixĩ i tüxũ iyanawêxãchixêẽxũ na naxrũũ ixũunegũxũcêx. ¹¹ Rũ aixcüma tama tataãêgü i ngêxguma Tupana tüxũ iyarüwêxãchixêẽgu, erũ tüxũ nangux. Natürü ngêmawena i ngêxguma naga ixĩnũẽgu rũ yanguxêẽgu i ngêma tamaã nüxũ yaxuxũ, rũ aixcüma tataãêgü.

Naxãcüma na tama Tupanaga ixĩnũẽxũ

¹² Rũ ngêmacêx i ñuxma na ngũxũ pingegũxũ rũ pipaexũ na Tupanawe perũixũ, rũ name nixĩ i pegü peporaexêẽãma na noxrürũtama meã peyaxõgũxũcêx. ¹³ Rũ name nixĩ i naxcêx pedaugü na Tupana pexũ naxwêxexũãcüma aixcüma meã pemaxêxũ, na yíxema ñuxma tama meã yaxõgũxe rũ meã tayaxõgũxũcêx. ¹⁴ ¡Rũ naxcêx pedêux na guxũ i duũxũgũmaã pemecũmaxũ! Rũ ngêxgumarũ ta name nixĩ i naxcêx pedau na Tupanapêxewa naxũunexũ i perũ maxũ. Erũ yíxema tama Tupanapêxewa üunexê rũ tãütãma tórü Corixũ tadau. ¹⁵ ¡Rũ pegüna pedaugü na taxúema nüxũ oxũcêx i ngêma ngũxêẽ i Tupana tüxũ nangechaũãcüma tüxna ãxũ! Erũ tama tanaxwêxe na texê petanüwa Cristuchi aixũ rũ ngêmaãcü togũxũ chixexũmaã taxucuxêxũ na Cristuna tixũgachixũcêx. ¹⁶ Rũ tama name i texê i petanüwa rũ naĩ i ngemaã na itapexũ. Rũ tama name na texê tũmaãrũ ngêmaxũcêx Tupanaxũ na oxũ. Rũ yemaãcü nanaxũ ga guma nuxcümaũcü ga Acobueneê ga Echaũ. Yerũ yexguma nataiyagu rũ wüxi ga õnacêx nüxũ naxo ga guxũma ga yema nüxna üxũ ga nanatü chi nüxna ãxũ. ¹⁷ Rũ pema nüxũ pecuêx rũ yemawena ga yexguma nayauxchaũãgu ga yema noxri nüxna üxũ, rũ marũ taxucürüwama nanayaxu, yerũ marũ naêneê ga rübumaêcüna tanaxã ga nanatü. Rũ nüma ga Echaũ rũ woo poraãcü naxaxu, natürü marũ taxucürüwama ñuxãcü nanayaxu. Rũ ngêmawa nüxũ tacuêx na ñuxãcü naxãcümaxũ na tórü ngêmaxũcêx Tupanaxũ ixoxũ. ¹⁸⁻²¹ Rũ nuxcüma ga tórü oxigü ga Moichêwe rüxixũ, rũ nüxũ naxĩnũẽ ga Tupanaga ga yexguma nüxũ yangaicagügu ga guma mèxpũne ga Chinaĩgu ãegane. Rũ nüxũ nadaugü ga na yayauraxũ ga guma mèxpũne rũ poraãcü naxêanexũ rũ poraãcü buanecü ixũxũ rũ yabêjbxêxanexũ rũ yaduruanexũ. Rũ poraãcü namuũẽ ga yema duũxũgü, yerũ nüxũ naxĩnũẽ ga wüxi ga corneta ga tagane rũ Tupana ga tagaãcü yéma ñacü:

“Ngêxguma chi wüxie i petanüwa daa mèxpũnewa üxgu ¡rũ noxtacũma nutamaã tüxũ ípemuxũchiãcüma tüxũ pimã! Rũ woo wüxi i pexũna yixĩgu

jrū ngēxgumarūū ta ūpenamuxūchiācūma peyamá!”
 űanagūrū. Rū yexguma yadeaxgu ga Tupana, rū poraācū namuūē ga yema duūxūgū. Rū norū muūmaā Tupanaxū nacēxūgū na ūyachaxāchixūcēx ga namaā na yadexaxū. Rū yema na poraācū naxāūcūmaxūchixū ga yema nūxū nadaugūxū, rū yemacēx nixī ga nūmatama ga Moīché ga űaxū:
 “Chorū muūmaā chidurūx i űuxmax”,
 űaxū. Rū yemaācū nixī ga namaā nangupetūxū ga yema duūxūgū ga Moīchémaā nayauxgūxū ga yema nūxīraūxū ga Tupanaārū mugū. Natūrū i pemax, Pa Chaueneēgūx, rū tama yemaācū pexū naxūpetū ga yexguma penayauxgūga ga Tupanaārū ore i ngexwacaxūxū i Cristuchiga ixīxū. ²² Rū űuxma i pema rū taxucēxma pemuūē, yerū ga Cristu rū taxcēx nayu na Tupana ya guxūguma maxūcūxūxtawa tūxū nagagūxūcēx, na guxūguma norū űāne ya daxūgune ya Yerucharēūga āeganewa ingēxmagūxūcēx. Rū ngema tá tangutaquēxegū namaā i ngēma muxūchixūma i norū orearū ngeruūgū i daxūcūāx na wūxigu namaā Tupanaxū icuēxūgūxūcēx. ²³ Rū űuxma i pemax, rū marū natanūxūgū pixīgū i guxūma i ngēma togū i duūxūgū i Tupanaārū poperawa ngoxēgagūxū. Rū marū naxcēx pexī ya Tupana ya yima guxānatāma cacū. Rū marū natanūwaama pexūgū i guxūma ga yema duūxūgū ga mecūmagūxū ga yuexū ga Tupana imexēēgūxū. ²⁴ Rū marū naxcēx pexī ya Ngechuchu ga taxcēx yucū na tūxū namaxēxēēxūcēx, ngēma Tupanaārū uneta i ngexwacaxūxū tamaā nūxū ixuxūrūū. Rū nagūmaā pexū iyanaxoxēē ga perū chixexūgū na aixcūma Tupanapēxewa pimexūcēx. Rū yexguma nūxcūmaxūcū ga Abēgū inabaxēē ga naeneē rū Tupana rū poxcu naxuegu. Natūrū yexguma Cristugū ibaxgu rū Tupana rū duūxūgūmaā nanaxuegu i maxū i taguma gūxū. ²⁵ Rū ngēmacēx name nixī i pexuāēgū na tama nūxū pexoexūcēx ya yima Tupana ya űuxma tamaā idexacū. Rū dūcax yema nuxcūmaūgūxū ga tōrū oxigū ga Moīchéwe rūxixū rū taxucūrūwa Tupanachaxwa nibuxmū na tama napoxcūeāxūcēx ga yexguma Tupanaxū naxoegu rū tama naga naxīnūēgu ga yexguma Moīchéwa Tupana yaxucūxēgūga. Rū yema na taxucūrūwa Tupanachaxwa yabuxmūxū ga nūmagū, rū yexeraācū tūxū naguxcha i yixema na naxchaxwa ibuxmūxū ega tama naga ixīnūēgu i űuxma na Cristuwa tūxū yaxucūxēgūxū i nūma ya Tupana i daxūgūxū i naānewa ngēxmacū. ²⁶ Rū yexguma Moīchéwe naxīxgu ga tōrū oxigū, rū Tupana rū nagamaā nayadurūxanexēē. Natūrū i űuxma rū űanagūrū:

“Wena táxarū chayadurūxanexēē. Natūrū ngēxguma ngēmaācū chanaxūxgu rū tāūtāma űoma i naānexīca chidurūxēē, natūrū ūēxcū rū woramacurīgū rū ēxtagū rū tá ta chayadurūxgūxēē”,

űanagūrū. ²⁷ Rū yema na:

“Wena táxarū chayadurūxanexēē”, űaxū, rū ngēmawa nūxū tacuēx rū guxūma ga yema naxūxū i tama guxūgucēx ixīxū, rū Tupana tá inayanaxoxēē na ngēma guxūgucēx ixīxūxīcatama na ūyaxūgūxūcēx. ²⁸ Rū ngēma na tōrū āēxgacū na yīxū ya Tupana, rū guxūgucēx nixī, rū tagutāma inayarūxo na noxrū ixīgūxū. Rū ngēmacēx name nixī na Tupanana moxē ixāgūxū, rū nūxū ingechaūgūācūma rū nūxū imuūēācūma nūxū icuēxūgūxū, ngēma nūma nanaxwēxūrūū. ²⁹ Erū tōrū Tupana, rū űoma wūxi ya ūxūrūū aixcūma inayanaxoxēē i guxūma i tōrū chixexū.

Ñuxăcŭ Tupanaxŭ tataăxêxê

¹ Rŭ ñuxma rŭ tama name na nŭxŭ perŭchăuxêxŭ na wŭxichigŭ pegŭ pengechăŭgŭxŭ ñoma peeneêxŭ pengechăŭxŭrŭrŭ. ² Tama name na nŭxŭ ipayarŭngŭmaêxŭ na meăma penayaxuxŭ i ngêma duŭxŭgŭ i pepatawa ngugŭxŭ. Erŭ nŭxŭ tacuêx rŭ nŭmaxŭ ga yemaăcŭ naxŭgŭxŭ rŭ ñuxguacŭ rŭ tama nŭxŭ nacuaăcŭma bexma Tupanaărŭ orearŭ ngeruŭgŭ i daxŭcŭăxŭ meă nayauxgŭ. ³ Rŭ name nixŭ i nŭxna pecuêxăchie i ngêma duŭxŭgŭ i poxcuexŭ, ñoma pema rŭ ta naxrŭrŭ pepoxcuexŭrŭrŭ. Rŭ ngêxgumarŭrŭ ta name nixŭ nŭxna pecuêxăchie i ngêma duŭxŭgŭ i togŭ ngŭxŭ nŭxŭ ingexêêgŭxŭ, erŭ ngŭrŭăchi tá ta ngêmaăcŭ pexŭ nangupetŭ. ⁴ Rŭ ngêma yatŭgŭ i amaxŭ rŭ name nixŭ i meă naxmêxmaă namaxê rŭ tŭxŭ nangechăŭgŭ. Rŭ ngêxgumarŭrŭ ta i ngexŭgŭ, rŭ name nixŭ i meă natemaă namaxê rŭ nŭxŭ nangechăŭgŭ. Erŭ Tupana rŭ aixcŭma tá nŭxna naca rŭ tá nanapoxcue i ngêma duŭxŭgŭ i naŭ i ngemaă rŭ êxna naŭ ya yatŭmaă ipexŭ. Rŭ ngêxgumarŭrŭ tá ta tŭxŭ napoxcue ya guxăma ya yixema ngemêxăcŭma rŭ ngeteăcŭma tŭgŭmaă maxêmarexe. ⁵ Rŭ tama name na dŭêruguama perŭxŭnŭêxŭ. Rŭ name nixŭ i namaă petaăêgŭ i ngêma marŭ pexŭ ngêxmaxŭ. Yerŭ Tupana rŭ ñanagŭrŭ:

“Tagutăma cuxna chixŭ, rŭ tagutăma cuxŭ ŭchatêx”,

ñanagŭrŭ. ⁶ Rŭ ñuxma na nŭxŭ icuăxŭ na ngêmaăcŭ tamaă inaxăŭxŭ, rŭ ngêmacêx tama taxăne na ñagŭxŭ:

“Nŭma ya Cori nixŭ i choxŭ rŭngŭxêêcŭ. Rŭ ngêmacêx taxucêxma chamuŭ.

Erŭ taxucŭrŭwama texê tacŭ rŭ chixexŭ chomaă taxŭ”,

ñagŭxŭ. ⁷ Rŭ name nixŭ i nŭxna pecuêxăchie ga yema perŭ dauruŭgŭ ga noxri pemaă icuăxŭ rŭ pemaă nŭxŭ ixugŭxŭ ga Tupanaărŭ ore. Rŭ name nixŭ i năgu perŭxŭnŭê ga na ñuxăcŭ meă namaxêxŭ pepêxewa rŭ ñuxăcŭ meă yaxôgŭăcŭma nayuxêxŭ. Rŭ name nixŭ ga nŭma yaxôgŭăxŭrŭrŭ meă peyaxôgŭ i pemax. ⁸ Rŭ nŭma ya Ngechuchu ya Cristu rŭ guxŭdŭguma nayanguxêê i ngêma tamaă nŭxŭ yaxuxŭ. Rŭ nuxcŭma rŭ nayanguxêê ga norŭ ore, rŭ ñuxma rŭ ta nayanguxêê. Rŭ guxŭgutăma ngêmaăcŭ nixŭ. Rŭ ngêmacêx tanaxwêxe na aixcŭma nŭxŭ yaxôgŭxŭ. ⁹ Rŭ tama name i peyaxôgŭ i ngêma nguxêêtaegŭ i tama toma pexŭ namaă tangŭexêêxŭ i tama Tupanaărŭ ixŭgŭxŭ. Rŭ nuxcŭma rŭ năgu taxŭ ga yema mugŭ ga Moŭché ŭmatŭxŭ ga tŭxna nachuxuxŭ na tacŭ ixŭxŭ rŭ tacŭ ingôxŭ. Natŭrŭ yema mugŭ rŭ taguma tŭxŭ naporaexêê ga na Tupanacêx imaxêxŭ. Rŭ ngêmacêx tanaxwêxe na Tupana ya tŭxŭ ngechăŭcŭwa nayaxuxŭ i tŭrŭ pora na aixcŭma naxcêx imaxêxŭcêx.

¹⁰ Rŭ ngêma duŭxŭgŭ i Moŭchéarŭ mugŭgu ŭxŭ, rŭ Tupanacêx naxŭna nadai na tama napoxcueăxŭcêx naxcêx i norŭ pecadu. Natŭrŭ tama nŭxŭ nayaxôgŭ ya Cristu ga tŭrŭ pecaducêx yucŭ. Rŭ ngêmacêx taxucŭrŭwama taxrŭrŭ nanayauxgŭ i ngêma ngŭxêê i Cristu nŭxna uaxŭxŭ.

¹¹ Rŭ ngêma duŭxŭgŭarŭ paigŭarŭ âêxgacŭ, rŭ tupaucawa nanange ya nagŭ i naxŭnagŭ na Tupanana naxăaxŭcêx na tama Tupana napoxcuexŭcêx i ngêma duŭxŭgŭ. Natŭrŭ naxŭnegŭ i ngêma naxŭnagŭ, rŭ ŭăneărŭ ŭpemawa nayanagugŭ. ¹² Rŭ yexgumarŭrŭ ta ga Ngechuchu rŭ ŭăneărŭ ŭpemawa ngŭxŭ ninge rŭ năyu na nagŭmaătama Tupanacêx yaxŭnŭngŭxêêăxŭcêx i duŭxŭgŭ.

¹³ Rŭ ngêmacêx i yixema, rŭ name nixŭ i nŭxna tixŭgachi i ngêma mugŭ ga Moŭché ŭmatŭxŭ, rŭ name nixŭ i Ngechuchucêx taxŭ. Rŭ woo duŭxŭgŭ tŭxŭ cugŭegu, yema Ngechuchuxŭ na nacugŭexŭrŭrŭ, rŭ name nixŭ i naxrŭrŭ yaxna namaă taxŭnŭê. ¹⁴ Erŭ yixema na yaxôgŭxŭ, rŭ tăŭtăma ñoma i naăne i paxa tá gŭxŭwa tangêxmagŭêcha. Erŭ daxŭguxŭ i naănewa

tūxū nangēxma i tachica. Rū ngema tá nixī i ingugūxū na guxūgutáma Tupanamaā ingēxmagūechaxūcēx. ¹⁵ Rū ngēmacēx tanaxwēxe i Ngechuchu ya Cristuégagu guxūguma Tupanaxū ticuēxūūgū. Rū ngēma na taēxmaā nūxū icuēxūūgūxū, rū ngēma nixī i āmare i mexū i nūxna ixāxū. ¹⁶ ¡Rū tāxū i nūxū ipeyarūngūmaēxū na togūxū perūngūxēēxū rū namaā pengaxū i perū ngēmaxūgū! Erū ngēma nixī i āmare i Tupanana pexāxū i aixcūma namaā nataāēxū. ¹⁷ ¡Rū naga pexīnūē i ngēma perū dauruūgū i pemaā icuēxgūxū, rū penaxūx i ngēma pemaā nūxū yaxuxū! Erū nūmagū rū Tupanapēxewa pexna nadaugū na meā pemaxēxūcēx erū nūxū nacuēxgū na Tupana tá nūxna çaxū i nachiga na ñuxācū pexna nadaugūxū. Rū name nixī i meā namaā pemaxē i ngēma perū dauruūgū na wūxi i taāē na yīxūcēx i ngēma norū puracū rū tama wūxi i norū guxchaxū na yīxūcēx. Erū ngēxguma chi wūxi i norū guxchaxū yixīgu i ngēma norū puracū na pexna nadauxū, rū pema rū chi taxuūma i mexū nawa peyaxu i ngēma norū puracū. ¹⁸ Rū name i toxcēx peyumūxēgū. Erū toōēwa nūxū tacuēx na aixcūma meā tayanguxēēxū i ngēma puracū i Tupana toxna āxū rū tanaxwēxe na guxūguma ngēmaācū tanaxūxū. ¹⁹ Rū ngēma guxūārū yexera pexna naxcēx chaçaxū nixī na peyumūxēgūxū na Tupana paxa pexcēx choxū taeguxēēxūcēx.

Yema duūxūgūxū narūmoxē rū naxcēx ínaca na Tupana nūxū rūngūxēēxū

²⁰⁻²¹ Rū ñuxma chanaxwēxe i poraācū pexū narūngūxēē ya Tupana ya tórū taāēxēēruū rū tórū ngūxmūēxēēruū ixīcū. Rū nūma nixī ga yuwa ínadaēēāxū ga tórū Cori ya Ngechuchu ya Cristu ya guxūma i yaxōgūxūārū dauruū ya guxāārū yexera ixīcū. Rū ñuxma na curuchagu taxcēx nabaāxū ga guma nagū ga tūxū nūxū cuēxēēcū na ñuxācū guxūguma tūxū nangechaūxū ya Tupana, rū chanaxwēxe na nūma ya Tupana pexū yamexēēgūxū rū pexū nangūxēēxū na aixcūma guxūma i perū maxūwa pimexūcēx. Rū ngēxgumarūū ta chanaxwēxe na Ngechuchu ya Cristuwa tūxū nangūxēēxūcēx ya Tupana na nūma nanaxwēxexūācūma ixīgūxūcēx. Rū ñuxma tanaxwēxe i guxūguma yima Cristuxū ticuēxūūgū. Rū ngēmaācū yī. ²² Pa Chaueneēgūx, pexū chacēēxū na yaxna namaā pexīnūēxū i ñaā noxretama i ore i pexū namaā chataāēxēēxū rū pexū namaā chaxucūxēxū. ²³ Rū chanaxwēxe na nūxū pecuāxū rū taeneē ya Timutéu rū marū ínanguxuchi ga na napoxcuxū. Rū ngēxguma paxa nuā chauxūtawa nanguxgu, rū tá ngema petanūwa chanaga i ngēxguma pexū íchayadēuxgu. ²⁴ ¡Rū nūxū perūmoxēgū i guxūma i ngēma perū dauruūgū i pemaā icuāxū! ¡Rū ngēxgumarūū ta nūxū perūmoxēgū i guxūma i togū i taeneēgū i yaxōgūxū! Rū taeneēgū i Itárianewa ngēxmagūxū rū ta pexū narūmoxēgū. ²⁵ ¡Rū Tupana poraācū pexū rūngūxēēxū i guxāma i pemax! Rū ngēmaācū yī.

Rū nuāma pexna.

TUPANAARŪ ORE GA CHAŪTIÁGU ŪMATŪXŪ

Chaŭtiágu nüxŭ narŭmoxê ga natanŭxŭlgü ga Yudiugü ga yaxôgŭxŭ

¹ Pa Chautanŭxŭgü i Yudiugü i Ngechuchuaxŭ Yaxôgŭxŭ i Guxŭ i Nañnewa Ngêxmagŭxŭx, choma i Chaŭtiágu pexŭ charŭmoxê. Rŭ choma nixŭ i Tanatŭ ya Tupana rŭ tórŭ Cori ya Ngechuchu ya Cristuaxŭ chapuracŭxŭ.

Ngêma cuèx i aixcŭma Tupanawa ne ŭxŭchiga

² Pa Chaueneègü i Yaxôgŭxŭx, name nixŭ na petaãègŭxŭ i ngêxguma nagŭxŭraŭxŭ i guxchaxŭgü pexcèx ínguxgu. ³ Erŭ pema nüxŭ pecuèx rŭ ngêxguma meã peyaxôgŭamagu ega woo tacŭ rŭ guxchaxŭ pexŭ ŭpetŭgu rŭ wŭxi i mexŭ nixŭ i ngêma. Erŭ ngêmaãcŭ nixŭ ya Tupana i pexŭ naporaexêèxŭ na yexeraãcŭ meã nüxŭ peyaxôgŭxŭcèx. ⁴ Rŭ name nixŭ na peporaexŭ na aixcŭma Tupanapêxewa pimexŭcèx, rŭ naxcèxicatama pemaxèxŭcèx, rŭ taxuwama nachixexŭcèx i perŭ maxŭ. ⁵ Ngêxguma chi wŭxie i petanŭwa tama meã nüxŭ cuèxgu na tacŭ tŭxŭ nanaxwèxexŭ ya Tupana, rŭ name nixŭ i nüxna naxcèx taca i cuèx, rŭ nüma tá guxŭma i norŭ ngŭchaŭmaã tŭxna nanaxã. Erŭ Tupana meãma guxŭ i duŭxŭgŭna nanaxã i cuèx, rŭ tama nayanuxŭ, rŭ taxŭexŭma nanga. ⁶ Natŭrŭ ngêxguma naxcèx ítacaxgu rŭ tanaxwèxe na aixcŭma tayaxôxŭ rŭ tá na tanayaxuxŭ i ngêma naxcèx ítacaxŭ. Rŭ tama name na nagu tarŭxŭnŭxŭ rŭ tãtŭtama tanayaxuxŭ. Erŭ yŭxema tama meã yaxôxê, rŭ ñoma taxtŭarŭ yuape i buanecŭmaã guxŭwama cuexŭrŭi tixŭ i tŭmaãrŭ maxŭwa. ⁷⁻⁸ Rŭ yŭxema duŭxê ya ñuxma meã yaxôxê rŭ moxŭ rŭ tama meã yaxôxê, rŭ taxucŭrŭwama nagu tarŭxŭnŭ na tacŭ Tupanaxŭtawa tayaxuxŭ. Erŭ yŭxema duŭxê ya ngêmaãcŭ yaxôxê, rŭ tŭmaãrŭ maxŭwa rŭ tama aixcŭma wŭxigutama tarŭxŭnŭ. ⁹ Rŭ yŭxema yaxôxê ya tama muãrŭ dŭŭruãxê, rŭ name nixŭ i tataãè erŭ Tupanaxãcŭ tixŭ rŭ tŭmamaã nataãè. ¹⁰ Rŭ yŭxema yaxôxê ya muãrŭ dŭŭruãxê rŭ name nixŭ i tataãèãma ega woo wŭxi i ngunexŭ tŭxŭ natauxgu i tŭmaãrŭ dŭŭru. Erŭ ngêma dŭŭruãxŭ i duŭxŭgŭ, rŭ ñoma putŭrachacurŭŭ tama natai. ¹¹ Rŭ ngêxguma nangunagŭgu ya ŭèxcŭ rŭ poraãcŭ nanguxetŭgu, rŭ narŭñexê i ngêma putŭra rŭ narŭngu i nachacu, rŭ ngêxma nagux na namexŭ. Rŭ ngêxgumarŭŭ tá ta nayu i ngêma dŭŭruãxŭchixŭ rŭ ngêxma tá nayarŭxo i norŭ guxŭma.

Tupana tŭxŭ naxŭ, natŭrŭ tama chixexŭgu tŭxŭ nanguxêèxŭcèx

¹² Rŭ nataãè ya yima yatŭ ya meãma yaxôõmacŭ i ngêxguma Tupana nüxŭ ŭxgu. Erŭ ngêxguma ngêmaãcŭ yaxna namaã naxŭnŭãmagu, rŭ Tupana tá namaã nataãè rŭ tá nüxna nanaxã i norŭ ãmare i mexŭ i taguma gŭxŭ. Rŭ ngêma nixŭ i ãmare i Tupana tŭmamaã ixunetaxŭ ya yŭxema nüxŭ ngechaŭgŭxe. ¹³ Natŭrŭ ngêxguma texe ñnŭ i chixexŭ tŭmacèx ínguxgu na chixexŭ taxŭxŭcèx rŭ tama name i nagu narŭxŭnŭ na Tupana tŭmaãewa ínanguxêèxŭ i ngema ñnŭ i chixexŭ. Erŭ ya Tupana rŭ taguma naãewa nangu na chixexŭ naxŭxŭ, rŭ ngexgumarŭxŭ ta taguma chixexŭ i ñnŭ texeãewa nanguxêè na chixexŭ taxŭxŭcèx. ¹⁴ Natŭrŭ ngêma chixexŭ i tŭmatama nagu tarŭxŭnŭxŭ nixŭ i chixexŭgu tŭxŭ nguxêèxŭ. ¹⁵ Rŭ ngêma chixexŭ i tŭmatama nagu tarŭxŭnŭxŭ nixŭ i tŭxŭ pecaduãxêèxŭ. Rŭ ngêma pecadugagu tá nixŭ i dŭxwa itayarŭtaxuxŭ. ¹⁶ Pa Chaueneègü ya Pexŭ Changechaŭgŭxex, tama name i pegŭtama pe-womŭxêègü. ¹⁷ Erŭ guxŭma i ngêma aixcŭma mexŭ i tŭxŭ ngêxmaxŭ, rŭ

naxūtawa ne naxū ya Tupana ya daxūgucū ga naxūcū ga üèxcū rü tauemacū rü woramacurigū rü èxtagū. Rū nūma rü guxūguma nanaxèixrūgumaraxū rü taguma naxūchicū. ¹⁸ Rū nūma nixī ga tūxna naxāāxū ga norū ore i aixcūma ixixū na ngēmaācū tūxū nangēxmaxūcèx i maxū i taguma gūxū. Rū yemaācū nanaxū yerū nanaxwèxe na yixira nūxū na yaxōgūxū, rü yixcama i togū.

Nūxācū aixcūma Tupanaāxū tayaxō

¹⁹ Pa Chaueneēgū ya Pexū Changechaūgūxex, rü ngēxguma texé pemaā nūxū ixuxgu i Tupanaārū ore, rü name nixī i meā iperūxīnūē. Rū tama name i tūxū pechoxūgagū. ²⁰ Erū ngēxguma nanuxgu i wūxi i duūxū, rü tama Tupanaārū ngūchaū naxū. ²¹ Rū ngēmacèx name nixī i nūxū perūxoe i guxūma i ngēma chixexūgū i guxūwama ngēxmagūxū. ¡Rū meā penayaxu i ngēma ore i Tupana pexna āxū! Erū ngēmawa pexū nangēxma i maxū i taguma gūxū. ²² Rū tama name i iperūxīnūēmare i ngēma ore, natūrū name nixī i penaxū i ngēma pemaā nūxū yaxuxū. Erū ngēxguma iperūxīnūēmaregu rü tama penaxūxgu, rü pegūtama pewomūxēēgūmare. ²³ Erū yīxema irūxīnūmarexe i Tupanaārū ore natūrū tama naxūxe i ngēma nūxū yaxuxū, rü wūxi i yatū i daucūwa nūgū dauchametūxūrū tixī. ²⁴ Erū nūgū nadauchametū, natūrū ngēxguma yaxūgachigu rü marū nūxū inayarūngūma na nañuxchametūraūxū i noxrix. ²⁵ Natūrū yīxema guxūguma meā nūxū daumatūxe rü naga īnūxē i ngēma ore i aixcūma ixixū i pecaduwa tūxū īnguxuchixēēxū, rü Tupana rü tá aixcūma guxūwama tūxū narūngūxēē. Erū tama ngēma orexū taxīnūmare, natūrū tanaxū i ngēma tūmamaā nūxū yaxuxū. ²⁶ Rū ngēxguma chi wūxie nagu rūxīnūgu na meāma Tupanaxū tacuáxū natūrū tama nūxna tadēuxgu ya tūmaārū conū i tūmaārū orewa, rü tūgūtama tawomūxēē, rü tama aixcūma Tupanaāxū tayaxō. ²⁷ Natūrū ngēma nacūma i Tanatū ya Tupanapēxewa aixcūma ūūnexū, rü ngēma nixī na nūxū tarūngūxēēxū i tacutagū rü yutegūxū rü tūgūna tadauxū na tama ñoma i naāneārū chixexūgu taxūcuxū.

2

Name nixī i guxū i duūxūgūxū tangechaū

¹ Pa Chaueneēgūx, pema rü nūxū peyaxōgū ya tórū Cori ya Ngechuchu ya Cristu ya mexēchicū. Rū ngēmacèx tama name na chixriācū penayaxuxū i ñuxre i duūxūgū rü meā penayaxuxū i togū. ² Rū ngēxguma chi perū ngutaquēxegu naxūcuxgu i wūxi i yatū i uirumaā aneraāxū rü mexchiruxū, rü ngēxgumarū chi ta ngēxma naxūcuxgu i wūxi i yatū i ngearū dīeruāxū rü wexachiruxū, rü name nixī i guxūxūma wūxigu meā peyaxu. ³ Natūrū tama name ega meā penayauxgu i ngēma mexchiruxū rü:

“¡Nuā mexū i naxmèwxēxewa rüto!” ñapegūxū nūxū, natūrū ngēma wexachiruxū rü:

“¡Cuma rü ngēxmatama nachi, rü ēxna yea ñatūanewa rüto!” ñapegūxū nūxū. ⁴ Rū ngēxguma tama wūxigu meā penayauxgu i ngēma taxre, rü pewatama nangox na tama aixcūma guxāxū pengechaūgūxū rü chixexū i duūxūgū pixīgūxū ega ngēmaācū chixri penayauxgu i duūxūgū. ⁵ Pa Chaueneēgū ya Pexū Changechaūgūxex, ¡Iperūxīnūē i ñāā ore! Tupana tūxū nade ya yīxema ngearū dīeruāxgūxe i ñoma i naānewa na meā nūxū tayaxōgūxūcèx. Erū nanaxwèxe i tanayauxgu i ngēma maxū i taguma gūxū i tūmamaā inaxunetaxū ya yīxema nūxū ngechaūgūxe. ⁶ Natūrū pema rü chixri penayaxu i ngēma duūxūgū i ngearū dīeruāxgūxū rü meā penayaxu

i ngēma duūxūgū i dīeruāxgūxū. ¿Taux ēxna ngēma dīeruāxgūxū yīxū i ngēma chixri pemaā maxēxū rü āēxgacūgūxūtawa pexū íyaxuaxūgūxū? ⁷ Rū ngēma dīeruāxgūxū nixī i chixexū namaā ixugūexū ya Cristu ya perū Cori ya mexēchicū. ⁸ Tupanaārū orewa nangēxma i norū mu i guxū i mugūarū yexeraxū i ñaxū:

“¡Nūxū nangechaū i cumūcū ngēma na cugūtama cungechaūxūrū!” ñaxū. Rū ngēxguma aixcūma naga pexīnūēgu i ngēma mu, rü mexū nixī i pexūxū. ⁹ Natūrū ngēxguma meā penayauxgu i wūxi i yatū i mexchiruxū rü chixri penayauxgu i ngēma wēxachiruxū, rü pecadu pexū. Rū Tupanapēxewa pechixexūgu erū tama naga pexīnūē i ngēma pexū namuxū. ¹⁰ Erū ngēxguma chi texē naga ĩnūgu i guxūma i Tupanaārū mugū natūrū chi wūxiwatama ítatūxgu na tama naga taxīnūxū, rü chi ñoma guxūma i Tupanaārū mugūga tama taxīnūxūrū tachixexūgu. ¹¹ Erū nūmatama ya Tupana ga ñacū:

“¡Tāūtama naī i nge i ātecūmaā cungeāē!” ñacū, rü ñanagūrū ta:

“¡Tāūtama cumāēta!”

ñanagūrū. Rū ngēxguma chi tama naī i nge i ātecūmaā cungeāēxgu, natūrū cumāētagu, rü tama aixcūma meā naga cuxīnū i ngēma Tupana tūxū muxū. ¹² Rū ngēmacēx name nixī na meā pidexagūxū rü meā pemaxēxū. Erū Tupana tá pexna naca i perū maxūchiga ngoxi Cristu pexū muxūācūma pemaxē rü ēxna tama. Rū ngēma Cristu tūxū muxū nixī na yigū ingechaūgūxū. ¹³ Erū guxāma ya yīxema tama tūmamūcūgū tūxū ngechaūtūmūūgūxe, rü Tupana rü tāūtama nūxū tangechaūtūmūūgūācūma tūxna naca i tūmaārū maxūchiga. Natūrū yīxema tūmamūcūgū tūxū ngechaūtūmūūgūxe, rü tāūtama tamuūē i ngēxguma Tupana tūxna caxgu, erū nūxū tangechaūtūmūūgūācūma tá tūxna naca.

Ega aixcūma yaxōgūgu, rü tanaxwēxe i mexū taxūgū rü nūxū tarūngūxēē i togū

¹⁴ Pa Chaueneēgūx, ¿Tacūwa namexū ega wūxie:

“Choma rü Tupanaāxū chayaxō”, ñagūgu, natūrū tama mexū taxūxgu? ¿Pexcēx rü Tupana tá tūxū maxēēxū ega ngēmaācū tayaxōxgu? ¹⁵⁻¹⁶ Rū ngēxguma chi wūxi i taeneē rü ēxna taeyēx i yaxōxū rü nangexchirugu rü nangewemūgu, rü chi wūxie i pema rü ñapegūgu:

“¡Mexū cuxū ūpetū, rü icūxcuchi na tama cuxū nadeyuxūcēx, rü meā nachībū!” ñapegūgu, rü ¿tacūwa name i ngēma ega tama nūxna penaxāxgu i ngēma nūxū taxuxū? ¹⁷ Rū ngēxguma yaxōmaregu natūrū tama mexū ixūxgu, rü tama togūxū rūngūxēēgu, rü ¿tacūwa namexū i ngēmaācū na yaxōxū? ¹⁸ Erū ngēxguma cuyaxōmaregu natūrū tama mexū cuxūxgu, rü ngūrūachi tá wūxie ñatarūgū cuxū:

“Cuma rü cuyaxōmare natūrū taxuxūma i mexū cuxū Natūrū choma rü chayōx rü naētū mexū chaxū. ¿Rū ñuxācū tá nūxū chacuāxū na cuyaxōxū ega tama mexū cuxūxgu? Natūrū choma rü chorū ū i mexūmaā tá cuxū chanawē na aixcūma chayaxōxū”, ñatarūgū tá cuxū. ¹⁹ Cuma cuyaxō na nangēmaxū ya wūxitama ya Tupana. Marū name. Natūrū ngoxogū rü ta ngēmaācū nayaxōgū, rü poraācū niduxruxe erū Tupanaxū namuūē. ²⁰ Pa Yatū ya tama Meā Nagu Rūxīnūcūx, cuma rü tama nūxū cucuēx i ngēxguma cuyaxōmaregu rü tama mexū cuxūxgu, rü taxuwama name i ngēmaācū na cuyaxōxū. ²¹ Tupana nūxū ixuxgu rü nuxcūmaūcū ga tōrū oxī ga Abrāū rü wūxi ga yatū ga mecū nixī. Yerū mexū naxū rü Tupanaga naxīnū ga

yexguma namaã nüxü yaxuxgu na naxcèx yamáãxücèx ga nane ga Ichaá.
²² Rü ngēmawa nüxü tacuèx rü tama nayaxōmare ga Abráü, natürü mexü naxü ta. Rü yema naxüxüwa tüxü nüxü nacuèxëë na aixcüma Tupanaãxü yaxōōxü.

²³ Rü yemaãcü ningu ga yema ore ga ümatüxü ga ñaxü:

“Abráü rü Tupanaãxü nayaxō rü yemacèx Tupana nüxü nixu na mecü yïixü yerü nüxü nayaxō. Rü nüxü nixu ta na namücü yïixü ga Abráü”.

²⁴ Rü ngēmawa nüxü tadau na Tupana namaã taãëxü ya yima yatü ya mexü ücü rü tama yaxōmarecü. ²⁵ Rü yemaãcü ta ngīmaã nangupetü ga nuxcüma ga Raá. Rü Tupana ngīmaã nataãë yerü mexü ixü ga yexguma meã nayauxāgu ga ngīpatawa ga yema orearü ngeruügu ga Yudügu. Rü ngīgagu namaxë ga yema orearü ngeruügu yerü to ga namagu iyamugü ga yexguma norü uwanügu nadaixchaügu. Rü woo ga ngīma rü chixri na namaxüxü ga noxrix, natürü mexü ixü yerü iyaxō, rü yemacèx Tupana ngīmaã nataãë. ²⁶ Rü wüxi i naxüne rü taxuwama name rü nayumare ega natauxguma i naãë. Rü ngëxgumarüü ta nixü na taxuwama namexü na yaxōmarexü ega taxuüma i mexü ixüxgux.

3

Törü conüchiga

¹ Pa Chaueneëgüx, tama name i muxëma i pema rü nguxëëtaexügu pegü pixüguëechaü. Erü pema nüxü pecuèx na yixema i nguxëëtaexügu na ixüguü, rü guxü i duüxüguarü yexera tá tüxna naca ya Tupana törü maxüchiga rü törü puracüchiga. ² Guxāma i yixema rü muëxpüxcüna chixexü taxüe. Yima yatü ya taguma chixexüxü ixücü rü aixcüma mecü nixü, erü nüxü nacuèx na ñuxäcü guxüwama nügüna nadauxü na tama chixexü naxüxücèx. ³ Rü ngëma na taga naxüxücèx i wüxi i cowaru, rü tanaxwëxe na naxütüxünäguxü na ngëmaãcü yixema inaxwëxexüläcüma meã iyaxüxücèx. ⁴ ¡Dücèx nagu perüxinüë ya wapurugü ya buanecüarü poramaã ixüxüne! Rü woo nitaxüchi rü buanecü ya taxüchicümaã inicuegü, natürü iracü ya quiyamaã nanatoxchinü i norü toxpëxerü, rü ngextá numa ínanaxwëxexüwa nanaxüxëë. ⁵⁻⁶ Rü ngëxgumarüü ta nixü ya törü conü rü woo na naxirachirëxü, natürü namuxüchi i norü ore. Rü wüxitama i üxüarü yauraxü i iraxüwa inaxügu na yaxaxü i taxüma i naãë. Rü törü conü rü ñoma wüxi ya üxürü nixü. Rü taxünewa rü wüxi i taxü i chixexü nixü ya yima törü conü erü nanachixexëë i guxüma i törü maxü. Rü ngëma Tupana ngoxogüxü ípoxcuexüguene ya üxüemawa ne naxü i ngëma chixexü i namaã yadexaxü ya törü conü. Rü ngëma chixexümaã nanachixexëë i guxüma i törü maxü. ⁷ Duüxügu rü nüxü nacuèx na íyapuxëëaxü rü nüxna nachogüxü i nagüxüraüxü i naëxügu i idüraexü, rü werigü, rü äxtapegü, rü choxnigü. ⁸ Natürü taxüema nüxü tacuèx na nüxna tachogüxü ya tümaärü conü. Erü wüxi i chixexü i taxü i taxucürüwama texë iyarüxoxëëxü nixü. Rü ngëma norü dexa rü üürüü tüxü nayuxëë. ⁹ Rü yima törü conümaã nüxü ticuèxüü ya Tanatü ya Tupana, rü yimamaãtama chixexü namaã tixugüe ta i duüxügu i Tupana nügüäcü üxü. ¹⁰ Rü ngëma taëxmaã, rü meã duüxügüchiga tidexagü, natürü ngëmatama taëxmaã rü namaã taguxchigagü ta. Pa Chaueneëgüx, tama name na ngëmaãcü yïixü. ¹¹ Wüxi i dexáarü chuxchuxüwatama rü taxuacüma inaxüxü i dexá i mexü rü dexá i chixexü. ¹² Pa Chaueneëgüx, wüxi i iguera rü taxuacüma orübuarü omaã naxo, rü wüxi i uba rü taxuacüma

igueraarü omaã naxo. Rü ngëxgumarüü ta wüxi i dexáarü chuchxuxü i yucürachiüxüwa, rü taxuacüma ínaxüxü i dexá i mexü.

Ngëma cuèx i aixcüma íxüü

¹³ Ngëxguma chi petanüwa nangëxmagu i wüxi i duüxü i nüxü cuáxü rü meã naãëxü cuáxü, rü name nixí na meã namaxüxü rü mexü na naxüxü rü tama nügü yacuëxüüxü na ngëmaãcü pexü nüxü nadauxëëxüçëx na aixcüma wüxi i duüxü i nüxü cuáxü yíüxü. ¹⁴ Natürü ngëxguma chi pixáüxãchiwëxëgü rü togüchi pexaiegu rü norü yexera pegü pixíxëëchaüü, rü taxuacüma pegügu perüxíñüë na mexügü rü nüxü cuëxgüxü pixíxüxü. Rü wüxi i dora i taxü nixí i ngëma ega ngëmaãcü pixíxügü. ¹⁵ Erü ngëma na íxáüxãchiwëxëgüxü rü duüxügüchi na íxaixü rü norü yexera yigü na íxíxüxëëchaüü, rü tama Tupanawa ne naxü, natürü ñoma i naãnecüãxwa rü ngoxo i Chatanáwa nixí i ne naxüxü. ¹⁶ Erü ngextá äüxãchi ítaxüwa rü duüxügü nügü írüyexeraxëëchaüxüwa, rü ngema rü taxuüma meã inixü rü nagüxüraüxü i chixexü nangëxma. ¹⁷ Natürü guxáma ya yíxema aixcüma tüxü nangëxmaxë i ngëma cuèx i Tupanawa ne üxü, rü aixcüma meã tamaxë rü guxámaã tamecümagü, rü meã duüxëxü tayauxgü i tümapatawa, rü meã itarüxíñüë i tümamücüarü ucuxë, rü guxü i duüxügü tüxü nangechaütümüügü, rü guxámaãma tügü tawüxiguxëëgü, rü tixaixcümagü, rü mexü taxügü. ¹⁸ Rü yíxema naxcëx daugüxe na duüxügü nügümaã írüngüxmüëxü, rü wüxi i mexü taxügü. Erü ngëmawa tá nüxü tadaugü na aixcüma meã Tupanacëx namaxëxü i ngëma duüxügü.

4

Duüxügü i ñoma i naãneärü ngúchaüçëx daugüxüchiga

¹ ¿Tüxcüü pegümaã penuë rü pegü pedai? Pegümaã penuë erü pexü nangëxma i ngëma perü ngúchaügü i chixexügü. ² Pema pexü nangúchaü i ngëma pexü taxuxü natürü taxuacüma pexü nanguxü, rü ngëmacëx peyamëx i togü. Rü norü ngëmaxüçëx pixáüxãchie natürü taxuacüma pexü nanguxüega, rü ngëmacëx pegümaã penuë, rü pegü pedai. Rü tama penayauxgü i ngëma penaxwëxëxü erü tama Tupanana naxcëx peca. ³ Rü ngëxguma naxcëx ípecaxgu, rü tama penayaxu, erü naxcëx ípeca i ngëma tama Tupana pexü naxwëxëxü. Rü ngëma pematama penaxwëxëxü nixí i naxcëx ípeçaxü na namaã pegütama petaãëxëëmarexüçëx. ⁴ Pa Duüxügü i Chixri Maxëxüx, ¿Tama ëxna nüxü pecuëx rü ngëxguma ñoma i naãnexü pengechaügu rü Tupanamaã perüxuwánüxü? Erü texë ya ñoma i naãnexü ngechaüxë rü Tupanamaã tarüxuwánü. ⁵ Rü tama natüçëxma nixí i ngëma Tupanaärü ore i ñaxü: “Ngëma Naãë i Üünëxü i Tupana tüxna muxü rü tüxü ninuxü erü noxrü tixí rü tüxü nangechaü”, ñaxü. ⁶ Natürü Tupana rü tüxü narüngüxëë na namaã iporaexüçëx i guxüma i ñoma i naãneärü ngúchaü i chixexü. Rü ngëmacëx norü orewa rü ñanagürü: “Tupana rü tümamaã nanu ya yíxema tügü icuëxüxügüxe, natürü tüxü narüngüxëë ya yíxema tama tügü icuëxüxügüxe”, ñanagürü. ⁷ Pa Chaueneëgüx, ¡Meã Tupanaga pexíñüë! ¡Rü nüxü pexoó i ngoxo i Chataná! Rü nüma rü tá pexna niña. ⁸ ¡Tupanana pengaicamagü! Rü nüma rü tá ta pexna nangaicama. Rü pemax, Pa Pecaduãxgüxüx, ¡nüxü perüxoe i pecüma i chixexü! Rü pemax, i Tupanawe rüxíxchaüxë natürü ñoma i naãnewe rü ta rüxíxchaüxë, ¡penamexëëx i perü maxü na Tupanacëxicatama

pemaxëxücèx! ⁹ ¡Pegümaã pengechaũgü rü pexauxe erü pipecaduãx! Rü texé ya ñoma i naãneãrü taãëwa cugüxe, rü name nixĩ i tügümaã taxauxe. Rü texé ya tümacüma i chixexümaã taãxexë, rü name nixĩ i Tupanapëxewa tügümaã tangechaũ. ¹⁰ Rü name nixĩ i Cori ya Tupanapëxegu pecaxãpüpügü rü namaã nüxü pixu na taxuwama pimexü. Rü ngëxguma i nüma rü tá pexü nicuèxüü rü pexü nataxëë.

Tama name i chixexügu cueneëmaã curüxĩnü

¹¹ Pa Chaueneëgüx, ¡Tãxü i chixexümaã pegü pixugüxü! Erü yíxema chixexümaã tümãneëchigagu idexãxe rü ëxna chixexümaã nüxü dawenüxë, rü chixe nüxü tawogü ta i Tupanaãrü ore. Rü ngëxguma chixexügu Tupanaãrü oremaã curüxĩnügu, rü Tupanaãrü orearü yexera cugü quixĩxëëchaũ erü tama aixcüma naga cuxĩnü. ¹² Tupanaxĩcatama nixĩ ya tũxna naxãcü i norü mugü rü ñuxüchi tá tũxna çacü rü ngoxi naga ixĩnüë i ngëma norü ore. Rü nümatama nixĩ i nüxü nangëxmaxü i pora na tũxü namaxëxëëxü rü ëxna tũxü nayuxëëxü. ¿Natürü texé quixü i cumax rü ngëmacëx cunangugüxü na ñuxãcü namaxüxü i cumücü?

Taxüema nüxü tacuèx na ñacü tá tũxü ngupetüxü i moxüãrü ngunexügu

¹³ ¡Choxü iperüxĩnüë i pema na ñapegügüxü:

“Ñuxma rü ëxna moxü tá ná i ñãnewa taxĩ, rü wüxi ya taunecü tá ngëxma tayayaxu, rü tá ngëma tataxegü na mucü i diëru ngĩxü iyaxuxücèx”, ñaperügügü! ¹⁴ Pema rü tama nüxü pecuèx na ñacü tá pexü üpetüxü i moxü. ¿Ñacü nixĩ i perü maxü? Perü maxü rü ñoma wüxi i cherena i paxaãchi nüxü idaaxü rü ngëxgumatama ngupetüxürüü tá inayarüxo. ¹⁵ Rü narümemaë nixĩ na ñapegügüxü:

“Ngëxguma chi nanaxwëxegu ya Cori ya Tupana na imaxëxü, rü chi tanaxü i ñãa puracü i nagu rüxĩnüëxü”, ñapegügüxü. ¹⁶ Natürü i pema rü pegü picuèxüügüchaũ. Rü guxüma i ngëma rü tama name. ¹⁷ Yíxema nüxü cuãxe na ñuxãcü Tupanapëxewa meã tamaxüxü, natürü tama naxüxe, rü pecadu taxü.

5

Ucuxë i diëruãxgüxüçëx

¹ Pa Duüxügü i Diëruãxgüxüx, ¡perüxĩnüë i ñãa ore! ¡Pexauxe rü aita pexüë erü chixexü tá pexü naxüpetü! ² Perü ngëmaxüügü rü marü nangaue, rü ngëma pexchiru i mexëchixü rü nawe nanangöümü. ³ Perü uiru rü perü diëru rü ngëxma naxãütanü rü ngëxma nangaue. Rü ngëma norü aütanü rü wüxi i perü cuëxruü tá nixĩ na pema rü tá ta ipeyarütauxexü ñoma ñacü üxüwa ixaxürüü. Tupana ngĩxü nadau i perü diëru i ngĩmaã penguüxcü, rü ngëmacëx tá pexü napoxcu i naãneãrü guxgu. ⁴ Rü yema perü puracütanüxü ga tama meã nüxü penaxütanüxü, rü ñuxma rü ngĩxcëx nidexagü ga yema diëru ga tama nüxna ngĩxü pexãcü. Rü Tupana ya guxããrü Cori rü ngëma duüxügüxü naxĩnü na ngĩxcëx yadexagüxü ga yema diëru ga nüxü ngĩxü pengetanücü ga peanewa na napuracüxëxëx. ⁵ Rü ñoma i naãnewa rü pegü pengëxãëgü rü pemepata rü pemuãrü ngëmaxüãxgü rü petaãëgü rü meã pechibüë. Natürü nawa tá nangu na ngëmacëx Tupana tá pexü poxcuëxü. ⁶ Rü pema penapoxcure rü penadai i ngëma duüxügü i taxüüma i chixexü pemaã üchirëxü. Rü nümagü rü pexü narüturamaëgü, rü taxuacüma nügü inapoxügü.

Tanaxwèxe i tayumüxê rü meã ítananguxêẽ ya Cori ya Tupana

⁷ Rû ñuxma Pa Chaueneëgüx, rü name nixí i meã ípenanguxêẽ ñuxmatata ínangu ya Cori ya Tupana. Rû ðucax, yixema naãnewa puracüxe rü meã ítananguxêẽ ya pucü na naxügüxcèx i túmanetü. Rû ñuxüchi ñuxre ya tauemacü ítananguxêẽ na nayaxü i túmanetüarü o, rü ngëxguma rü tá tayabuxgü. ⁸ Rû pema rü ta penaxwèxe na meã ípenanguxêẽxü na ínanguxü ya Cori ya Tupana. ¡Rü petaãëgü, rü táxü i nüxü perüçhauexü na ípenanguxêẽxü! Erü marü ningaica na ínanguxü ya tóru Cori. ⁹ Pa Chaueneëgüx, name nixí i nüxü perüxoe na pegüchigaxü pixuechaü na tama ngëmacèx pexna naçaxüxcèx ya Tupana. Erü marü ningaica na ínanguxü na duüxügüxü yacagüxüxcèx i norü maxüchiga. ¹⁰ Pa Chaueneëgüx, name nixí i nüxna pecuëxãchie ga yema nuxcümaügüxü ga Tupanaarü orearü uruügü ga na ñuxäcü yaxna namaã naxinüëxü ga yexguma ngüxü yangegügu. Rü name nixí i pema rü ta ngëxgumarüü yaxna namaã pexinüëãma rü Tupanacèx pemaxëãma ega ngüxü pingegügu. ¹¹ Rû yixema nüxü tacuèx na nataãëgüxü ga yema duüxügü ga meã Tupanacèx maxëãmaxü ga yexguma ngüxü nüxü üpetügu. Rû pema nüxü pecuèx ga ñuxäcü meã namaxama ga guma Yox ga yexguma ngüxü nüxü üpetügu. Rû nüxü pecuèx ga yixcama ga na ñuxäcü tóru Cori ya Tupana poraãcü nüxü rüngüxëëxü. Erü nüma ya tóru Cori ya Tupana rü namecümaxüchi rü poraãcü nüxü tangechaütümüügü. ¹² Rû guxüãrü yexera, Pa Chaueneëgüx, rü ngëxguma ðacücèx ipexunetagu, rü tama name i Tupanaegagu ipexuneta, rü ëxna ñoma i naãnegagu ipexuneta, rü ëxna ðacü i to i naegagu ipexuneta. Natürü ngëxguma aixcüma yixígu i wüxi i ore ¡rü noxtacüma: “Ngü” ñapegü! Rû ngëxguma tama aixcüma yixígu i wüxi i ore ¡rü noxtacüma: “Tama” ñapegü! Rû ngëxguma ya Tupana rü täütáma pexü napoxcue naxcèx i ngëma perü uneta. ¹³ Rû ngëxguma wüxie i petanüwa naxixãchiãëgu, rü name nixí na tayumüxëxü. Rû ngëxguma wüxie taãëgu, rü name nixí na tawiyaexü rü Tupanaxü ticuëxüxü. ¹⁴ Rû ngëxguma wüxie i petanüwa idaawexgu, rü name nixí i naxcèx peyaca i yaxögüxüãrü äëxgacügü na túmacèx nayumüxëgüxüxcèx rü Cori ya Tupanaegagu chixümaã tüxü yangögügüxüxcèx. ¹⁵ Rû ngëxguma aixcüma Tupanaãxü yaxögüãcüma nayumüxëgügu, rü tá túmacèx nitaane, rü nüma ya Cori ya Tupana tá tüxü ínarüdxëë nawa i túmaãrü daawe. Rû ngëxguma chi ðacü rü pecadu taxüxgu, rü Tupana tá tüxü nüxü nangechaü. ¹⁶ Rû ngëmacèx name nixí i pegümaã nüxü pixu i perü pecadugü rü pegücèx peyumüxëgü i wüxiechigü na pexcèx yataanegüxüxcèx. Rû yima mecü ya yatüarü yumüxë rü aixcüma napora erü Tupana nanangãxü. ¹⁷ Tupanaarü orearü uruü ga Eria nixí ga wüxi ga yatü ga taxrüü ixícü. Natürü yexguma nüma guxü ga norü ngüchãmaã nayumüxëgu na tama napuxüxcèx, rü tomaëxpüx ga taunecüarü ngãxügu rü tama napu ga yema naãnewa. ¹⁸ Natürü yemawena rü wenaxãrü nayumüxë ga Eria rü pucücèx ínaca. Rû wenaxãrü napu. Rû narüxü ga guxüma ga nanetügü. ¹⁹ Pa Chaueneëgüx, ngëxguma chi texé petanüwa Tupanana ixügachigu, rü tangëxmagu ya wüxie ya tüxü taeguxëëxë na wenaxãrü Tupanawe tarüxüxcèx, rü mexü taxü. ²⁰ Erü ngëxguma texé Tupanacèx nataeguxëëgu i wüxi i duüxü nüxna i norü chixexü, rü túmagagu Tupana tá nanamaxëë i ngëma duüxü, rü tá nüxü nüxü nangechaü i norü pecadugü.

Rü nüãma pexna,
Chaütiágu

NÜXĪRAÜXÜ GA POPERA GA PEDRU ÜMATÜXÜ

Pedru nüxü narümoxë ga yema yaxôgüxü ga to ga nachiiänegu woonexü

¹ Pa Chaueneëgüx, choma i Pedru nixi i pexcëx chanaxümatüxü i ñaã popera. Rü choma nixi i Ngechuchu ya Cristu choxü muxü na duüxügümaã nüxü chixuxüçëx i norü ore. Rü pexcëx chanaxümatü i pema na perü naãnena to i nachiiänegü penawoonexü i Pötuanewa rü Gárataanewa rü Capadochiaanewa rü Áchiaanewa rü Bitíniãanewa ngëxmagüxe. ² Rü pexü nixi ga nadexü ga Tanatü ya Tupana, yerü woetama yema nixi ga nuxcümaxüchima nagu naxinüxü. Rü nanamu ga Naãë i Üünexü na pexü yamexëëgüxüçëx na aixcüma napëxewa pixüünegüxüçëx rü Ngechuchu ya Cristuga na pexinüëxüçëx rü nagümaã na piyaxgüxüçëx na nataxuxüçëx i perü chixexügü. Rü chanaxwëxe i Tanatü ya Tupana poraäcü pexü narüngüxëë rü pexü nataãëxëë.

Ítananguxëë na wena tá imaxëxü

³ Rü ngixã nüxü ticuëxüüügü ya Tupana ya tóru Cori ya Ngechuchu ya Cristu Nanatü! Yerü yexguma Ngechuchu ya Cristuxü wena namaxëëgu, rü tuxna nanaxã ga maxü ga yexwacaxüxü, yerü poraäcü nüxü tangechaütümüügü. Rü ngëmacëx i ñuxma i yixema rü ta ítananguxëë na wena tá imaxëxü. ⁴ Rü pema rü wüxi i ngunexügu rü aixcüma tá penayauxgü i guxüma i ngëma mexügü i Tupana tá pexna äxü i ñuxma daxüguxü i naãnegu pexü namaã nanguxüxü. Rü ngëma tá pexna naxãxü rü tagutãma inayarüxo, rü tagutãma naxãüãchi, rü tagutãma nangau. ⁵ Rü ñuxma na Tupanaãxü peyaxôgüxü rü nüma rü norü poramaã tá pexna nadau ñuxmatáta aixcüma penayauxgü i ngëma maxü i taguma gúxü i tá pexna naxãxü i ngëxguma naguxgu i naãne. ⁶ Rü ngëmacëx name nixi i poraäcü petaãëgü, rü nüetama nixi ega woo ñuxma ñaã perü maxüwa rü paxaxãchi muxüma i guxchaxügü pexü üpetügu. ⁷ Erü ngëmaäcü nixi i pexü naxüxü ya Tupana na nüxü nacuáxüçëx rü ngoxi aixcüma peyaxôgü rü ëxna tama. Rü ngëxguma peyaxôgüamagu ega woo guxchaxügü pexcëx ínguxgu, rü ngëma perü ô rü wüxi i uiruarü yexera nixi na namexü erü ngëma uiru rü woo namexëchi natürü düxwa nangau. Rü ngëma uiru rü üxümaã nüxü taxü na nüxü icuáxüçëx rü ngoxi aixcüma uiruxüchi yiixü. Rü ngëxgumarüü ta nixi i perü ô na guxchaxügümaã Tupana nüxü üxü na nüxü nacuáxüçëx rü ngoxi aixcüma nüxü peyaxôgü na yixcama pexü yacuëxüxüçëx rü mexü i pechica pexna naxãxüçëx rü pemaã nataãëxüçëx i ngëxguma wena nüma naxüxgu ya Ngechuchu ya Cristu. ⁸⁻⁹ Pema rü Ngechuchu ya Cristuxü pengechaügü woo taguma nüxü na pedaugüxü. Rü ñuxma rü ta woo tama nüxü pedaugü, natürü nüxü peyaxôgü, rü poraäcü petaãëgü. Rü ngëma perü taãëmaã rü taxuacüma nüxü pixuéga na ñuxäcü petaãëgüxüchixü, erü marü penayauxgü i perü maxü i taguma gúxü. Rü ngëmacëx nixi i nüxü peyaxôgüxü. ¹⁰ Rü nuxcümaxüchima ga Tupanaärü orearü uruügü, rü nüxü nixugüe ga na ñuxäcü tá Tupana pexü narüngüxëëxü. Rü nümagü rü poraäcü nangüe rü naxcëx nadaugü i ngëma maxü i taguma gúxü. ¹¹ Rü nümagü ga yema orearü uruügü rü Tupanaärü poperawa nangüe na nüxü nacuëxgüxüçëx na ñuxäcü tá na yiixü rü ñuxguacü tá na nangôxü ga guma Maxëxëëruü ga Cristu. Rü Cristuãë i

Üünexũ ga yema orearũ uruũgũwa yexmaxũ, rũ nüxũ nüxũ nacuèxèẽ ga na Cristu rũ tá ngúxũ yangexũ rũ tá nayuxũ rũ yixcama rũ wena tá na namaxũxũ rũ ñuxũchi daxũguxũ i naãnewa tá na naxũxũ na guxũãrũ ãëxgacũ yĩxũcèx. ¹² Natürũ Tupana rũ yema nuxcũmaũgũxũ ga orearũ uruũgũxũ nüxũ nacuèxèẽ na tãũtama nũmagũ nüxũ nadaugũxũ ga guma Maxèxèẽruũ ga naxcèx nadaugũcũ, natürũ pema tá yĩxũ na nüxũ pedaugũxũ. Rũ dücax, Pa Chaueneëgũx, gumatama Maxèxèẽruũchiga nixĩ ga perũ orearũ uruũgũ pemaã nüxũ ixugũgũxũ ga yexguma Tupanaãẽ i Üünexũ ga daxũwa ne muxũ yadexagũxèëgu. Rũ guxũma i ngẽma ore i yima Maxèxèẽruũchiga, rũ woo Tupanaãrũ orearũ ngeruũgũ i daxũcũãx rũ nüxũ nangũchaũgũ na yexeraãcũ nüxũ nacuèxgũxũ.

Tupana rũ taxcèx naca na napèxewa naxüünexũcèx i tóru maxũ

¹³ Rũ ñuxma na Cristuarũ duũxũgũ pixĩgũxũ, rũ penaxwèxe na pexuãëgũxũ rũ ípememarexũ na penaxũxũ i norũ ngúchaũ. Rũ name nixĩ i aixcũma meã ípenanguxèẽ i guxũma i ngẽma mexũgũ i Tupana tá pexna ãxũ i ngèxguma Ngechuchu ya Cristu núma ũxgu. ¹⁴ Rũ ñuxma na Tupanaxãcũgũ pixĩgũxũ, rũ penaxwèxe na aixcũma naga pexĩnũèxũ. Rũ tama name i nagu pexĩ ga yema nuxcũmaũxũ ga perũ ngúchaũ ga ũpa nagu pexĩxũ ga yexguma tauta Tupanaxũ pecuèxgu. ¹⁵ Natürũ penaxwèxe i aixcũma meã pemaxè na Tupanapèxewa naxüünexũcèx i perũ maxũ. Erũ nüma ya Tupana ya pexũ decũ, rũ naxüüne. ¹⁶ Rũ norũ ore i ũmatũxũwa rũ ñanagürũ:

“Chanaxwèxe i chaurũũ pixüüne, erũ choma rũ chaxüüne”, ñanagürũ. ¹⁷ Rũ pema na “Pa Tonatũx” ñapegũxũ nüxũ ya Tupana, rũ ñuxma na ñoma i naãnewa pemaxèxũ rũ name nixĩ i guxũguma nüxũ pemuũë. Erũ nüma rũ aixcũmaxũchi nanangugũ i wũxichigũ i duũxũgũarũ maxũ na ñuxãcũ yĩxũ. Rũ tüxũ napoxcu ya guxãma ya texé ya chixexũ ũgũxe, rũ nüetama nixĩ erũ woo texé tixĩgu, erũ napèxewa rũ nawũxigumare i guxũma i duũxũgũ. ¹⁸⁻¹⁹ Rũ Tupana rũ marũ pexũ ínanguxũxèẽ nawa ga yema nuxcũmaũxũ ga perũ maxũ ga taxuwama mexũ ga perũ oxigũxũtawapexayuxũ. Rũ yema na nawa pexũ ínanguxũxèèxũcèx rũ pexna naxããxũcèx i maxũ i ngexwacaxũxũ, rũ poraãcũ nüxũ naxãtanũ. Yerũ tama uiru rũ èxna dñeru i ngauxwèxexũmaã nanaxũtanũ, natürũ Cristugũ ya mexèchicũmaã nixĩ ga naxũtanũãxũ. Yerũ nüma ga Cristu rũ ñoma wũxi i carneru i taxuwama nañuxraũxũ i Tupanacèx imãxũrũ pexcèx nayu na pexũ naxũtanũxũcèx. ²⁰ Rũ nüma ga Tupana rũ woetama nuxcũmaxũchima tauta naãne ixũgũgu, rũ marũ Cristuxũ naxuneta na pexcèx nayuxũcèx. Natürũ ñomaũcũũ nixĩ ga nangóxũ ga guma Cristu na pexũ nangũxèèxũcèx. ²¹ Rũ ñuxma rũ Cristugagu nixĩ i nüxũ peyaxõgũxũ ya Tupana ga yuwa Cristuxũ írudaxèècũ rũ daxũwa nagacũ. Rũ ngẽmacèx nixĩ i ñuxma i Tupanaãxũ peyaxõgũxũ rũ ípenanguxèëgũxũ na daxũwa pexũ nagagũxũcèx. ²² Rũ ñuxma na naga pexĩnũèxũ i Tupanaãrũ ore i aixcũma ixĩxũ rũ pexũ natauxcha na pegũ pengechaũgũxũ erũ Tupana rũ marũ pexũ inayanaxoxèẽ i perũ chixexũgũ. Rũ ngẽmacèx penaxwèxe i aixcũma guxũ i perũ ngúchaũmaã pegũ pengechaũgũ. ²³ Rũ ñuxma i pema rũ marũ penayauxgũ i ngexwacaxũxũ i perũ maxũ. Rũ ngẽmacèx ñoma ngexwacèx pebuxũrũxũ pixĩgũ. Natürũ ngẽma maxũ rũ tama penatũ rũ pee ya yewèxèxewa nixĩ i penayauxũ. Natürũ Tupanaãrũ ore i maxũxũ i taguma iyarũxoxũwa nixĩ i penayauxũ. ²⁴ Erũ Tupanaãrũ ore i ũmatũxũwa rũ ñanagürũ:

“Guxǔma i duǔxǔgǔ rǔ ñoma wǔxi i natüanerüǔmare nixǐ. Rǔ guǔma i norǔ mexǔ, rǔ wǔxi i nanetüchacurüǔmare nixǐ. Rǔ ngēma natüane rǔ nayu, rǔ nachacu rǔ narǔngu. Rǔ ngēxgumarǔ ta nixǐ i duǔxǔgǔ na tama nataixǔ i norǔ maxǔ i ñoma i nañewa. ²⁵ Natürü tǔrǔ Coriarǔ ore rǔ tagama inayarǔxo”,

ñanagǔrǔ i Tupanaärǔ orewa. Rǔ ngēma Tupanaärǔ ore i mexǔ nixǐ ga pemañ nǔxǔ yaxugǔxǔ.

2

¹ Rǔ ngēmacèx name nixǐ i nǔxǔ perǔxoe i guǔma i chixexǔgǔ, rǔ ngēma na pidoratèexǔgǔxǔ, rǔ ngēma na togǔpèxewa meañ na pemaxēnetaxǔ rǔ ngēma na pixǔñāxǔchiwèxegǔxǔ, rǔ ngēma na pexoregütèexǔgǔxǔ. ²⁻³ Rǔ ngēxguma chi aixcǔma nǔxǔ picuèxǔchitanǔgu na ñuxǔcǔ namecǔmaxǔchixǔ ya tǔrǔ Cori, rǔ ñoma wǔxi i ðxchana i ngexwacèx buxǔ i naègǔnenixǔ nǔxǔ ngǔchaǔxǔrǔrǔ penaxwèxe i poraǔcǔ pexǔ nangǔchaǔ i norǔ ore na ngēmawa peporaexǔcèx rǔ meañ peyaexǔcèx i perǔ ðwa na ngēmaǔcǔ guǔwama namexǔcèx i perǔ maxǔ i taguma gǔxǔ.

Cristu nixǐ ya nuta ya maxǔcǔ

⁴ Rǔ ñuxma rǔ name nixǐ i tǔrǔ Corina pengaicamagǔ. Erǔ nǔma ya tǔrǔ Cori nixǐ ya yima nuta ya maxǔcǔ ya Tupana nayaxucǔ na namañ inaxǔgǔǔāxǔcèx ya napata. Rǔ woo duǔxǔgǔ nǔxǔ oexǔ, natürü yima nixǐ ya Tupana nayaxucǔ erǔ naxcèx rǔ namexèchi. ⁵ Rǔ ngēxgumarǔ ta i pemax, rǔ Tupana pexǔ nade na napataarǔ nutagǔ ya maxècǔ pixǔgǔxǔcèx. Rǔ pema nixǐ i Tupanaärǔ ngǔxèèruǔgǔ i üünexǔ i Ngechuchu ya Cristuégagu Tupanaña ãmare pexǔgǔxǔ. Rǔ ngēma ãmare i nǔxna pexǔgǔxǔ i namañ nataèxǔ rǔ ngema nixǐ i perǔ maxǔ i mexǔ i napèxewa. ⁶ Rǔ Tupana rǔ norǔ ore i ümatǔxǔwa rǔ Cristuchigaxǔ nixu rǔ ñanagǔrǔ:

“Ñuxma na ichanaxǔgǔxǔ ya chopata, rǔ yima nuta ya nǔxǔra chayaxǔcuchicǔ, rǔ yima nixǐ ya nuta ya mexèchicǔ ya chomatama chanayaxucǔ na chopata namañ ichaxǔgǔxǔcèx. Rǔ yima nuta rǔ chaunchiga nixǐ. Rǔ yǔxema nǔxǔ yaxǔxè, rǔ aixcǔma tá tanayaxu i ngēma maxǔ i taguma gǔxǔ i tǔmamañ ichaxunetaxǔ”,

ñanagǔrǔ. ⁷ Rǔ pema na nǔxǔ peyaxǔgǔxǔ, rǔ Cristu rǔ pexcèx rǔ guǔwama name rǔ naporaxǔchi. Natürü ngēma tama yaxǔgǔxǔcèx, rǔ taxuwama name. Rǔ ngēmacèx ya Tupana rǔ norǔ ore i ümatǔxǔwa rǔ ñanagǔrǔ:

“Yima nuta ya ñpataarǔ üruǔgǔ nǔxǔ ocǔ, rǔ chauxcèx rǔ gucǔ ya nutaarǔ yexera namexèchi. Rǔ ngēmacèx yimaǔtǔwa nixǐ ichanaxǔgǔxǔ ya chopata”,

ñanagǔrǔ. ⁸ Rǔ Tupanaärǔ ore rǔ ñanagǔrǔ ta:

“Guxǔma i ngēma tama yaxǔgǔxǔ rǔ tama irǔññüèchaǔxǔ rǔ yima nutagu tá nayarǔpucutǔgǔ”,

ñanagǔrǔ. Rǔ ngēmaǔcǔ i guǔma i ngēma tama yaxǔgǔxǔ rǔ tá chixexǔgu nayǐ erǔ tama Tupanaga naxǔññüèchaǔ rǔ tama Cristuaxǔ nayaxǔgǔchaǔ. Rǔ ngēmacèx Tupana tá nanapoxcúe yema nǔma nǔxǔ yaxuxǔrǔrǔ. ⁹ Natürü pema nixǐ i duǔxǔgǔ i tǔrǔ àèxgacǔ ya Tupana pexǔ dexǔ na norǔ ngǔxèèruǔgǔ pixǔgǔxǔcèx. Rǔ pema nixǐ i duǔxǔgǔ i napèxewa ixüünexǔ erǔ nǔmatama ya Tupana rǔ norǔ duǔxǔgǔxǔ pexǔ nixǔgǔxèè na nǔxǔ pixuxǔcèx i norǔ ore i aixcǔma mexèchixǔ. Rǔ nǔmatama ya Tupana nixǐ ga chixexǔwa pexǔ inanguxǔxèèxǔ na norǔ ngóonexǔ i mexèchixǔgu pechocuxǔcèx. ¹⁰ Rǔ

ŭpa ga pema rŭ tama Tupanaärŭ duŭxŭgŭ pixŭgŭ, natŭrŭ i ñuxma rŭ aixcŭma norŭ duŭxŭgŭ pixŭgŭ. Rŭ ŭpa rŭ taxúeaxŭma pengechaŭtŭmŭgŭ, natŭrŭ i ñuxma rŭ Tupanaäxŭ pengechaŭtŭmŭgŭ.

Ñuxma na Tupanaärŭ duŭxŭgŭ pixŭgŭxŭ, rŭ name nixŭ i meã naxcèx pemaxè

11 Pa Chaueneëgŭ ya Pexŭ Changechaŭgŭxex, rŭ ñuxma na Tupanaärŭ duŭxŭgŭ pixŭgŭxŭ, rŭ tama ñoma i naänecŭäx pixŭgŭ. Rŭ ngèmacèx pexŭ chacèèxŭ na nüxŭ perŭxoexŭcèx i guxŭma i ngèma ngúchaŭgŭ i chixexŭ i ñoma i naänecŭäx nagu ŭxŭ. Erŭ ngèma ngúchaŭgŭ i chixexŭ rŭ taäèxŭ chixexŭgŭ nanguxèèchaŭ. 12 Rŭ name nixŭ i meã pemaxè napèxewa i ngèma duŭxŭgŭ i tama Tupanaxŭ cuèxgŭxŭ. Rŭ ngèxguma woo poraäcŭ chixri pechiga yadexagŭgŭ i nŭmagŭ, rŭ tá nüxŭ nadaugŭ na ñuxäcŭ mexŭ pexŭgŭxŭ, rŭ tá Tupanaxŭ nicuèxŭgŭgŭ i ngèxguma Cristu wena núma ŭxgu. 13 Rŭ name nixŭ na tórŭ Cori ya Ngechuchugagu tŭmaga pexŭnŭèxŭ ya guxäma ya yŭxema perŭ äèxgacŭgŭ ixŭgŭxè. Rŭ ngèmaäcŭ name nixŭ i meã naga pexŭnŭè ya äèxgacŭ ya tacŭ ya Dumawa ngèxmacŭ, erŭ núma nixŭ i guxŭ i togŭ i äèxgacŭgŭétŭwa nangèxmaxŭ. 14 Rŭ ngèxgumarŭŭ ta name nixŭ i naga pexŭnŭè i ngèma togŭ i äèxgacŭgŭ i petanŭwa namugŭxŭ ya yima äèxgacŭ ya tacŭ na napoxcueäxŭcèx i ngèma chixexŭ ŭgŭxŭ rŭ namaã nataäègŭxŭcèx i ngèma mexŭ ŭgŭxŭ. 15 Erŭ Tupana nanaxwèxe na mexŭ pexŭgŭxŭ na ngèmaäcŭ ipeyanangeèxgŭxèèxŭcèx i ngèma duŭxŭgŭ i tama Tupanaärŭ orexŭ cuáxchaŭgŭxŭ rŭ chixri ngèma orchiga idexagŭxŭ. 16 Rŭ ñuxma na Cristu pexŭ ŭnguxŭxèèxŭ, rŭ name nixŭ i duŭxŭgŭ i aixcŭma ŭnguxŭxŭrŭäcŭ meã pemaxè. Natŭrŭ ñuxma na ŭpenguxŭxŭ rŭ tama name na ngèmamaã pegŭ ŭpepoxŭxŭ na tacŭ rŭ chixexŭ pexŭgŭxŭcèx. Erŭ ñuxma na Tupanaärŭ duŭxŭgŭ pixŭgŭxŭ, rŭ name nixŭ i norŭ ngúchaŭxŭcatama pexŭgŭ. 17 Rŭ name nixŭ i meã penayauxgŭ i guxŭma i duŭxŭgŭ. ¡Rŭ nüxŭ pengechaŭ i taeneëgŭ i yaxŭgŭxŭ! ¡Rŭ nüxŭ pemuŭè ya Tupana! ¡Rŭ naga pexŭnŭè ya äèxgacŭ ya tacŭ ya Dumacŭäx!

Tanaxwèxe i Cristurŭŭ yaxna namaã taxŭnŭè i ngèxguma ngŭxŭ ingegŭgu

18 Pa Duŭxŭgŭ i Coriäxgŭxŭx, ¡rŭ nüxŭ pengechaŭgŭ rŭ naga pexŭnŭè i perŭ corigŭ! Rŭ tama name i ngèma perŭ corigŭ i pemaã mecŭmaxŭxŭcatama pengechaŭgŭ, natŭrŭ name nixŭ i nüxŭ pengechaŭgŭ ta i ngèma perŭ corigŭ i chixecŭmaxŭ. 19 Erŭ Tupana rŭ pemaã nataäè ega nüxŭ na pengechaŭgŭxŭcèx yaxna namaã pexŭnŭègu i ngèxguma texè natŭcèxmamare chixexŭ pemaã ŭxgu rŭ ngŭxŭ pexŭ tingexèègu. 20 Natŭrŭ ¿tacŭwa pexŭ namexŭ ega yaxna namaã pexŭnŭègu i ngèxguma wŭxi i perŭ chixexŭcèx pepoxcuegu? Natŭrŭ ngèxguma tacŭ rŭ mexŭ i pexŭxŭgagu ngŭxŭ pingegŭgu rŭ yaxna namaã pexŭnŭègu, rŭ ngèma waxi nixŭ i Tupanapèxewa mexŭ. 21 Rŭ ngèma na mexŭ pexŭxŭgagu ngŭxŭ pingegŭxŭcèx nixŭ i Tupana pexŭ dexŭ. Yerŭ ga Cristu rŭ ta pexcèx ngŭxŭ ninge. Rŭ yemaäcŭ pexŭ nüxŭ nadauxèè na ñuxäcŭ núma nanaxwèxexŭ na naxrŭŭ yaxna namaã pexŭnŭèxŭ i ngèma ngŭxŭ. 22 Núma ga Cristu rŭ taguma pecadu naxŭ, rŭ taguma texèxŭ nawomŭxèè. 23 Rŭ yexguma duŭxŭgŭ chixexŭ namaã ixugŭegu, rŭ núma rŭ taxuŭma ga chixexŭmaã nanangäxŭ. Rŭ yexguma ngŭxŭ nüxŭ yangexèègŭgu, rŭ núma rŭ tama tacŭ rŭ chixexŭmaã nanaxäxŭne. Natŭrŭ Tupanamaã nüxŭ nixu na núma namaã namexèèäxŭcèx ga yema duŭxŭgŭ ga chixri namaã chopetŭxŭ. Yerŭ nüxŭ nacuèx rŭ Tupana rŭ aixcŭma meã nanangugŭ i guxŭma i duŭxŭgŭarŭ

maxü. ²⁴ Rü nümatama ga Cristu rü nügüxüñegu nayange ga tórü pecadugü ga yexguma curuchagu nayuxgu. Rü yemaäcü nanaxü na nüxü rüxoexüćex i tórü chixexü na naxćexicatama imaxexüćex. Nüma rü pexćex nanapix na yemaäcü pexü nameexexüćex. ²⁵ Rü pema ga üpa rü ñoma carnerugü i nu ne naximarexürüü pixigü. Natürü i ñuxma rü marü Cristucex pewoegu. Rü nüma nixi i perü dauruü yixü, rü nüma nixi i pexna nadauxü.

3

Ñuxäcü Tupana nanaxwexe na namaxexü i ngëma ixämaxü rü ixätexü

¹⁻² Rü pemax, Pa Ngexügüx, rü name nixi i petega pexinüe na ngëma pete i tama yaxöxü nüxü dauxüćex i perü maxü i mexü i Tupanapëxewa rü duüxüğüpëxewa rü ngëmacex na yaxöxüćex woo taxuüma i Tupanaärü orexü namaä pixugu. ³ Rü ngëma na aixcüma pimexüćex, rü tama name i nagu perüxinüe na ñuxäcü pegü pemexëyæxüchixü, rü ãxna uirunaxćex i ngëxæruümaä pengëxæägüxü, rü ãxna tatanüxüchixü i naxchirugu na picuxgüxü. ⁴ Natürü name nixi i perü maxüwa pegü pimexëägü rü guxüma i duüxüğümaä pimecümagü rü taguma texémaä penuäägü, erü ngëma nixi i perü mexü i taguma iyarüxoxü i aixcüma mexü i Tupanapëxewa. ⁵ Rü yemaäcü norü maxü i mexümaä nixi ga nügü yangëxæägüxü ga yema nüxcümaügüxü ga ngexügü ga Tupanapëxewa ixüünexü. Rü nümagü rü Tupanaäxü nayaxögü rü natega naxinüe. ⁶ Rü yemaäcü ta iyixi ga Chara ga ngite ga Abräüga na naxinüxü, rü ngirü corimaä naxuaxü. Rü pemagü rü tá ta ngirüü pixigü ega mexü pexügügu. Rü ñuxüchi taxucëxtáma tüxcüü petecex pemuüe. ⁷ Rü ngëxgumarüü ta i pemax, Pa Yatügüx, rü name nixi i meä pemexü pengechaügü rü aixcüma yaxna ngïmaä pexinüe, erü ngïma rü irüturamae. Rü name nixi i ngïmaä petaäägü erü Tupana rü pexna naxäxürüü ngïxna nanaxä i ngëma maxü i taguma güxü. Rü name nixi i ngëmaäcü meä ngïmaä pemaxë na Tupana nüxü ñnuxüćex i perü yumüxëgü.

Yixema mexü ügüxe ya ngüxü ingegüxechiga

⁸ Rü ngëmaäcü chanaxwexe i guxäma i pema rü pegüxü pengechaütümüügü rü wüxigu perüxinüe, rü aixcüma nüxü pengechaügü i guxüma i taeneägü i yaxögüxü. Rü chanaxwexe i aixcüma pemecümagü rü guxämaä pegü pewüxigüxëe. ⁹ Rü ngëxguma texé chixexü pemaä üxgu, rü tama name i pema rü ta chixexü tümamaä pexü. Rü ngëxguma texé pemaä guxchigagu, rü tama name i pema rü ta tümamaä peguchiga. Natürü narümemaë nixi i mexü i oremaä tüxü pengäxüga rü tüxü perüngüxëe, erü Tupana pexü nadei na pexü nangüxëexüćex. ¹⁰ Erü Tupanaärü ore i ümatüxüwa rü ñnagürü:

“Ngëxguma texé taäeäcüma maxchaügu, rü name nixi i nüxna tadau ya tümäärü conü na tama chixexü i oremaä yadeaxüćex. Rü ngëxgumarüü ta name nixi i nüxna tadau i tümäx na tama doraxü yaxuxüćex. ¹¹ Rü name nixi i nüxna tayaxü i guxüma i chixexügü, rü mexü taxü. Rü ngëxgumarüü ta name nixi i guxüguma naxćex tadau na togümaä tataäexü. ¹² Erü tórü Cori rü tüxna nadau ya yixema aixcüma imexë, rü nüxü naxinüe i tümäärü yumüxë. Natürü tümamaä nanu ya yixema chixexü ügüxe”,

ñnagürü i ngëma Tupanaärü ore. ¹³ ¿Rü texé tá chixexü pemaä üxü ega pema rü aixcüma guxüguma mexü pexügügu? ¹⁴ Natürü ngëxguma chi ngëma mexü na pexügüxüćex ngüxü pingegügu, rü name nixi i petaäägü.

¡Rü taxucèxma texéxü pemuðê, rü taxucèxma tacücèx pexoegaãêgü! ¹⁵ Rü name nixî i perü Corixü peyaxîxêê ya Cristu rü aixcüma naga pexînüê, rü guxülguma ípememare na meã penangãxüxcèx i guxüma i duüxügü i pexna çaxü na tüxcüü Cristuaxü peyaxôgüxü. ¹⁶ Natürü name nixî i nüxü pengechaüácüma penangãxü rü tama pegügu perüxînüêácüma na norü yexera pixîgüxü. Rü name nixî i meã pemaxê na taxucèxma pexoegaãêxüxcèx. Rü ngêxguma ngêmaãcü pemaxêgu rü tá naxãneê i ngêma duüxügü i chixri pechiga idexagüxü na ñuxãcü Cristucèx pemaxêxü. ¹⁷ Yixema rü ngüxü tingegü ega chixexü ixügügu. Natürü narümemaê nixî na mexü ixügüxcèx ngüxü na ingegüxü, ega ngêmaãcü Tupana naxwêxegu. ¹⁸ Yerü nümatama ga Cristu rü ngüxü ninge, rü wüxicanatama guxãârü pecaducèx nayu. Rü woo na mecü yîixü rü taxcèx nayu i yixema i chixexü i duüxügü ixîgüxü. Rü yemaãcü nanaxü na Tupanaxütawa tüxü nagagüxcèx. Rü woo nayu ga naxüne, natürü ga naãê rü tama nayu. ¹⁹ Rü yexguma naxüne yuxgu rü naãê rü natanüwa naxü ga yema naãêgü ga Tupana poxcuexü, rü orexü namaã nayarüxu. ²⁰ Rü yema naãêgü ga yexma poxcuexü, rü yema nixî ga naãêgü ga yema duüxügü ga Noë maxütu tama ixînüêchaüxü woo Tupana yaxna namaã naxînü ga yexguma Noë naxüyane ga guma wapuru. Rü 8 ga duüxügüxícatama nixî ga guma wapurugu ichoüxü, rü yema nixî ga guma mucü ga taxüchicüarü dexáétüwa maxêxü. ²¹ Rü yema dexá rü wüxi ga cuèxruü nixî. Erü ngêxguma dexáwa íbaiegu, rü duüxügüxü nüxü tacuèxêê na Ngechuchu ya Cristu wena maxüxügagu yîixü i tüxü nangêxmaxü i maxü i taguma gúxü. Rü tama taxüneârü düxétüwa na imexüxcèx nixî i íbaixêxü, natürü ítabaie yerü marü Tupana naxcèx taca na tüxü iyanaxoxêêaxüxcèx ga tóru pecadugü na aixcüma napêxewa imexüxcèx rü aixcüma mexügu rüxînüêxüxcèx. ²² Rü nüma ga Ngechuchu ya Cristu, rü daxüguxü i naãnewa naxü, rü ñuxma rü Tupanaârü tügünecüwawa nangêxma. Rü ñuxma rü namêxwa nangêxmagü i guxüma i Tupanaârü orearü ngeruügü i daxücüãx rü guxüma i ãêxgacügu i daxücüãx.

4

Tanaxwêxe i ngêma cuèx i Tupana tüxna äxümaã nüxü tarüngüxêê i taeneêgü

¹⁻² Rü ngêmacèx name nixî na ípememarexü na ngüxü pingegüxü yexgumarüü ga Cristu na ngüxü yangexü. Erü yixema ngüxü ingexe rü marü nüxü tarüxo i tümaârü pecadu na guxülguma meã Tupana naxwêxexüácüma tamaxüxcèx, rü tama i tümaxüne naxwêxexüácüma na tamaxüxcèx. ³ Üpa ga pemax, rü mucüma ga tauncü penaxüecha i ngêma chixexü i ñuxma i ngêma duüxügü i tama Tupanaxü cuèxgüxü ügüxü. Rü yexguma ga pema rü pecadu pexügüácüma pemaxê, rü penaxü ga pexeneârü ngüchaü, rü pengãxê, rü peta ga nawa pexãügatanüxü pexügü, rü tacü i nguchièxgüxü poraãcü pixaxcugü, rü tupananetachicünèxãgüxü picuèxüügü i woo Tupana na pexna nachuxuxü i ngêma. ⁴ Rü yema duüxügü ga namaã pexãmücügüxü ga yexguma chixri pemaxêgu, rü ñuxma rü poraãcü nagu narüxînüê na tacücèx tama natanügu pexãgüxü rü tama nawe perüxîxü i ngêxguma norü chixexü naxügügu. Rü ngêmacèx nixî i ñuxma i chixri pechiga yadexagüxü. ⁵ Natürü nümagü rü tá ta Cristupêxewa nangugü na namaã nüxü yaxugüxcèx na ñuxãcü namaxêxü. Rü nüma ya Cristu rü ínamemare na nüxna yacachigüxcèx i guxüma i duüxügü i maxêxü rü yuexü. ⁶ Rü ngêmacèx ya Tupana rü naxüpa na nayuexü i duüxügü rü marü nüxna nanaxuaxü i maxü i taguma gúxü. Erü

nanaxwêxe na naxrûl guxûguma mexûwa namaxêêchaxûl ega woo ñoma i naânewa nayuegu i naxûnegû. ⁷ Rû marû ningaica na nagûxûl i ñoma i naâne rû guxûma i ñacû i nawa ngêxmaxûl. Rû ngêmacêx name nixî na îpexuâêxûl rû meâ peâe ta îpexûgûxûl rû guxûguma peyumûxêgûxûl. ⁸ Rû guxûârû yexera i ngêma pexû chanaxwêxexûl nixî na aixcûma pegû pengechaûgûxûl i wûxichigû. Erû ngêxguma aixcûma yigû ingechaûgûgu rû ngêmaâcû inayarûxo i muxûma i pecadugû. ⁹ ¶Rû meâ pegû peyaxugû i wûxichigû i pechiûwa! Rû tama name i tûmamaâ penuâêâcûma tûxûl peyaxu. ¹⁰ Rû wûxichigû i pemax, rû Tupana pexna nanaxâ i perû cuêx. Rû ngêma perû cuêxmaâ rû name nixî i wûxichigû pegû perûngûxêêgû, na aixcûma Tupanaârû ngûxêêruûl i mexû na pixîgûxûcêx rû meâ namaâ pepuracûexûcêx i guxûma i ngêma cuêx i Tupana pexna âxûl. ¹¹ Rû ngêxguma texê nûxûl îuxugu i ore, rû name nixî i aixcûma Tupanaârû orexûl tixu. Rû ngêxguma texê togûxûl rûngûxêêgu, rû name nixî i Tupana tûxna âxûl i poramaâ tanaxû. Rû guxûma i ngêma pexûxûl rû name nixî i meâma penaxû na ngêmaâcû Ngechuchu ya Cristugagu Tupanaxû picuêxûûgûxûcêx. Erû nûma ya Tupana rû guxûguma namexêchi rû naporaxûchi. Rû ngêmaâcû yîl.

Ngêxguma Cristuaxûl yaxôxgu rû ngûxûl tinge

¹² Pa Chaueneêgû ya Pexû Changechaûgûxex, ñuxma na taxûl i guxchaxûgû i perû nguxêêruûl pexcêx ínguxûl, ¶rû tâxûl i pebaixâchiâêgûxûl, ñoma ñacû i taguma nûxûl pedaxûl ngupetûxûrûl! ¹³ Natûrû narûmemaê nixî na petaâêgûamaxûl, yerû yema Cristu ngûxûl na ingexûrûl nixî i ngûxûl na pingegûxûl i ñuxmax na petaâêgûxûcêx i ngêxguma wena nûma naxûxgu i nûmax. ¹⁴ Rû ngêxguma Cristuaxûl na peyaxôgûxûgagu texê pemaâ guxchigagu, rû wûxi i perû taâe nixî i ngêma. Erû ngêmaâcû nûxûl pecuêx na Tupanaâe i Úûnexû rû pewa na nangêxmaxûl. ¹⁵ Rû ngêxguma chi ngûxûl pingegûgu, rû name nixî na wûxi i mexû na pexûgûxûgagu na yîxûl rû tama wûxi i chixexûgagu na yîxûl, ngêxgumarûl i mâeta rû êxna ngîtêèx rû êxna togûarû guxchaxûwa na pegû pengêxmagûxêêxûl. ¹⁶ Natûrû ngêxguma texê Cristuaxûl tayaxôxûgagu ngûxûl tingexgu, rû taxucêxma tûxcûl ngêmacêx taxâne. Rû name i ngêmacêx Tupanaxû ticuêxûl. ¹⁷ Rû ñuxma rû marû nawa nangu na Tupana ngûxûl tûxûl ingexêêxûl na ngêmaâcû tûxûl îyanawêxâchixêêxûcêx i yixema na naxâcûgû îxîgûxûl. Rû ngêxguma ngêmaâcû tamaâ inaxûgûâgu, rû ¿ñuxâcû tá nûxûl naxûpetû i ngêma duûxûgû i tama Tupanaârû ore i mexûga înuêchaxûl? ¹⁸ Erû Tupanaârû ore i ûmatûxûlwa rû ñanagûrû:

“Ngêma duûxûgû i mexû ûgûxûl rû guxchaâcûma nanayauxgû i maxûl i taguma gûxûl. Rû ñuxma na ngêmaâcû yîxûl, ¿rû ñuxâcû tá nûxûl nangupetûxûl i ngêma duûxûgû i chixexûl ûgûxûl rû pecaduâxgûxûl?” ñanagûrû. ¹⁹ Rû ngêmacêx ya yixema Tupana naxwêxexûâcûma ngûxûl ingegûxe, rû name nixî na mexûl taxûgûêchaxûl rû Tupana ya tûxûl ûcûmêxêgu na tanaxûxûl i tûmaâe na nûxna tûxûl nadauxûcêx. Erû nûma ya Tupana rû mecû nixî rû taguma texêxûl nawomûxêe.

5

Ucuxêgû naxcêx i ngêma yaxôgûxûl

¹ Rû ñuxmax, Pa Yaxôgûxûlârû Âêxgacûgûx, rû pexna chanaxâxchaûl i wûxi i ucuxê i mexûl, erû choma rû ta pexrûl yaxôgûxûlârû âêxgacû chixî. Rû

chomaxüchima nixi ga nüxü chadauxü ga ñuxäcü ngüxü na yangexü ga Cristu. Rü choma rü tá ta pexrüü choxü nangëxma i chauchica i mexü i ngëxguma wena núma naxüxgu. ² Rü chanaxwëxe i nüxna pedau rü nüxü perüngüxëe i guxüma i Tupanaärü duüxügü i pemëxwa ngëxmagüxü. Rü name i mexü i perü ngüchaümaä Tupana naxwëxexüäcüma penaxü i ngëma puracü, rü tama texë pexü muxguxica penaxü rü ëxna diërucëx penaxü. ³ Rü tama name i namaä penuëäcüma rü penangaäcüma i penamu i ngëma duüxügü. Natürü chanaxwëxe i mexü i perü maxü nüxü pewëx na ñuxäcü Tupana naxwëxexü na namaxëxü. ⁴ Rü ngëxguma wena núma naxüxgu ya törü Daurüxüchi ya Cristu, rü pema rü tá penayauxgü i wüxi i perü ämare i ngëxcuerüü i mexëchixü i taguma ngauxü. ⁵ Rü ngëxgumarüü ta i pemax, Pa Ngëxtüxücügüx, rü name nixi i naga pexinüe i ngëma perü äëxgacügü i Tupanaärü puracüwa puracëxü. Rü guxäma i pema i yaxögüxü, rü name nixi i wüxichigü pegü perüngüxëe rü taguma pegügu perüxüñüe na pemücügüarü yexera pixigüxü. Erü Tupanaärü ore i ümatüxüwa rü ñanagürü:

“Tupana rü tama norü me nixi i ngëma duüxügü i nügü icuëxüxügüxü. Natürü nüxü narüngüxëe rü namaä namecüma i ngëma duüxügü i tama nügü icuëxüxügüxü”,

ñanagürü i ngëma ore. ⁶ Rü ngëmacëx tama name i pegü picuëxüxü. Rü narümemae i Tupanamëxë ya poranetüxüwa pegü pengëxmagüxëe na nüma pexü yacuëxüxügüxücëx i ngëxguma nawa nanguxgu na ngëmaäcü pemaä naxüäxü. ⁷ Rü name nixi i Tupanamëxëgu penaxü i guxüma i perü oegaäëgü, erü nüma ya Tupana rü guxüguma pegu narüxüñü rü aixcüma pexna nadau. ⁸ Rü name nixi i guxüguma pegüna pedaugü rü ipexuäëgü, erü perü uwanü i Chataná rü doma wüxi ya ai ya idüraxüchicürüü nanañaäne rü tümacëx nadau na texëxü tá nachixexëëxü. ⁹ ¡Rü peporaemëx rü peyaxögüamëx i ngëxguma tacü rü chixexü pemaä naxüxchaügu! Erü nüxü pecuëx rü guxüma i taeneëgü i guxüwama ngëxmagüxü rü pexrüü ngëmatama ngüxü ningegü. ¹⁰ Natürü ngëxguma paxaxächi ñoma i naänewa ngüxü pingegüguwena, rü Tupana rü tá pexü nimexëe na aixcüma napëxewa pimexüçëx, rü tá pexü narüngüxëe na taguma nüxü perüxoexüçëx, rü tá pexü naporaexëe na aixcüma perü maxüwa peporaexüçëx. Rü daatama Tupana nixi ya tüxna naxäcü i guxüma i mexü i tüxü ngëxmaxü, rü tüxü deicü na naxütawa tüxü nangëxmaxüçëx i tachica i mexü i taguma güxü, erü Ngechuchu ya Cristuarü duüxügü tixigü. ¹¹ Rü name nixi i guxüguma nüxü ticuëxüügü ya Tupana, erü nüma nixi i guxüärü äëxgacü yixü i guxüguma. Rü ngëmaäcü yii.

Pedru rü yema yaxögüxüxü narümoxë

¹² Taeneë ya Chiribánu ya meä yaxöcümaä petanüwa chanamu i ñaä nuxmarexü i popera na pexü chixucuxëgüxücëx rü pemaä nüxü chixuxüçëx na ngëma pexü nangechaüxügagu yixü ya Tupana i aixcüma pexü nangüxëëxü. Rü ñuxma na ngëmaäcü pexü nangechaüxü, rü name nixi i guxüguma naxçëx pemaxë. ¹³ Rü pexü narümoxëgü i guxüma i taeneëgü i yaxögüxü i pexrüü Tupana dexü i núma Dumawa ngëxmagüxü. Rü ngëxgumarüü ta pexü narümoxë i chorü ngüxëerüü i Marcu ya chaunerüü ixicü. ¹⁴ Rü chanaxwëxe i wüxichigü i pema rü pegü pengechaügüäcüma pegü perümoxëgü. Rü ngëxgumarüü ta chanaxwëxe na aixcüma petaäëgüxü i guxäma i pema na Ngechuchu ya Cristuarü duüxügü pixigüxü. Rü ngëmaäcü yii.

Rü nuäma pexna,
Pedru

NORÜ TAXRE GA POPERA GA PEDRU ÜMATÜXÜ

Pedru nüxü narümoxë ga yema yaxögüxü

¹ Pa Chaueneëgüx, choma i Chimáü i Pedru nixi i pexcëx chanaxümatüxü i ñaã popera. Rü choma rü Ngechuchu ya Cristuarü ngüxëeruü chixi, rü nüma nixi ga choxü namuxü na nüxü chixuxüçëx i norü ore. Rü pexcëx chanaxümatü i pema na toxrüü aixcüma peyaxögüxü, erü törü Tupana rü törü Maxëxëeruü ya Ngechuchu ya Cristu rü aixcüma nimexëchi. ² Rü ñuxma na Tanatü ya Tupanaxü pecuáxü rü törü Cori ya Ngechuchuxü pecuáxü, rü chanaxwëxe i nümagü aixcüma pemaã namecüma rü aixcüma pexü nataãxëë.

Yaxögüxüçümacüchiga

³ Rü Tupana rü noxrütama poramaã marü tüxna nanaxã ga guxüma i ngëma nacüma i mexü i inaxwëxëxü na aixcüma meã naxcëx imaxëxüçëx. Rü yemaãcü nanaxü ga yexguma tüxü nüxü nacuëxëëgu ga guma törü Cori ya mexëchicü ga norü poramaã tüxü decü. ⁴ Rü yematama norü poramaã tüxna nanaxã ga guxüma ga norü ngüxëë i mexëchixü ga inaxunetaxü na naxrüü pimexüçëx rü nüxna pixigachixüçëx i guxüma i chixexügü i duüxügüaruü ngüchaü i chixexügagu ñoma i naãnewa ngëxmaxü. ⁵ Rü ngëmacëx penaxwëxëgü na pegü peporaexëëxü na yexeracü peyaxögüxü rü meã togüpëxewa pemaxëxü. Rü ñuxuchi name na meãma nüxü pecuáxü na tacü yiixü i Tupana pexü naxwëxëxü. ⁶ Rü ngëxgumarüü ta penaxwëxëgü na meã pegümaã ipecuáxü na tama chixexügu peyixüçëx. Rü ñuxuchi name na yaxna pegümaã pexinüëxü. Rü ngëxgumarüü ta name na aixcüma Tupanaxü pengechaügüxü. ⁷ Rü ñuxuchi penaxwëxëgü na pegü pengechaügüxü ya guxãma i pemax. Rü ngëxgumarüü ta name na guxüma i duüxügüxü pengechaügüxü. ⁸ Rü ngëxguma aixcüma ngëma pexü chaxucuxëxüãcüma pemaxëgu, rü täütãma natüçëxma nixi i perü maxü, rü täütãma natüçëxma nixi na nüxü pecuáxü ya törü Cori ya Ngechuchu ya Cristu. ⁹ Natürü yixema tama ngëma pexü chaxucuxëxüãcüma maxüxë, rü ñoma tangexetüxürüü tixi. Rü ñoma wüxi i duüxü i tama nagu rüxinüxü i ngëma yixcüra tá nüxü ngupetüxürüü tixi, erü nüxü itayarüngüma na ñuxãcü Tupana tüxü nüxü ngechaüxü ga tümaãrü pepadugü. ¹⁰ Rü ngëmacëx, Pa Chaueneëgüx, name nixi na yexeraãcü meã Tupanacëx pemaxëxü na ngëmaãcü ipenawëxüçëx na aixcüma Tupanaãrü duüxügü ya pexcëx naçaxe rü pexü dexe na pixigüxü. Rü ngëxguma ngëmaãcü pemaxëgu rü tagutãma chixexügu peyi rü tagutãma Tupanaxü ipetëx. ¹¹ Rü ngëmaãcü ya Tupana, rü tá meã pexcëx nayawãxna i ñax na tauxchaãcü pichocuxüçëx i ngextã guxügütãma ãëxgacü iyixüwa ya törü Cori ya Ngechuchu ya Cristu ya törü Maxëxëeruü. ¹² Rü ngëmacëx woo marü nüxü na pecuáxü rü nagu na pexixü i ngëma ore i aixcüma ixixü, natürü guxügütãma pexna nüxü chacuëxãchixëëëcha ga yema pexü namaã chaxucuxëxü. ¹³ Erü ñuxma na chamaxüxü i chomax, rü nagu charüxinü na namexü na pexna nüxü chacuëxãchixëëxü i ngëma ore i namaã pexü chixucuxëgüxü, na ngëmaãcü pexü changüxchaüxëëxüçëx na meã Tupanacëx pemaxëxü. ¹⁴ Rü pemaã nüxü chixu i ngëma, erü törü Cori ya Ngechuchu ya Cristu choxü nüxü nacuëxëë na paxa tá chayuxü. ¹⁵ Rü ñoma rü ta na chamaxüxü, rü meã pexü chixucuxëgü na ngëxguma chayuxguwena

rü guxüguma nüxna pecuëxächixüxcèx i ngëma chorü ucuxëgü na ñuxäcü Tupana naxwëxexü na pemaxëxü.

Pedru rü namücügü rü aixcüma Cristuxü nadaugü ga na ñuxäcü namexëchixü

¹⁶ Rü yexguma pexü tangüexëëgu na ñuxäcü naporaxü ya tóru Cori ya Ngechuchu ya Cristu rü ñuxäcü tá wena na nataegoxü, rü tama tomatama togüäewa tayaxuxü i ore nixi. Yerü tomatama toxetümaä nüxü tadau na ñuxäcü namexëchixü i nüma ya tóru Cori. ¹⁷ Rü nüxü tadau ga yexguma Tanatü ya Tupana nüxü icuëxüügu. Rü nüxü taxinüë ga yexguma gumatama Tanatü ya Tupana ya Mexëchicü ñaxgu:

“Daa nixi ya Chaune ya nüxü changechaüxüchicü. Rü choma rü poraäcü namaä chataäëxüchi”,

ñaxgu. ¹⁸ Rü aixcüma tomaxüchima nüxü taxinüë ga yema Tupanaga ga daxüguxü ga naänewa inaxüxü, yerü tomatama rü tóru Corimaä tayexmagü nawa ga guma mëxpüne ga ünene ga yexguma yema ngupetügu. ¹⁹ Rü yemaäcü nüxü tadau na aixcüma yixü ga yema ore ga nuxcümaügüxü ga Tupanaärü orearü uruügü nüxü ixugügüxü. Yerü yema nüxü yaxugügüxüürütama nixi ga nüxü tadauxü. Rü name nixi i pema rü ta aixcüma meä nagu perüxinüë i ngëma ore, erü wüxi i omü i íraxetüxü i ëänexüwa ibaxixüürü nixi. Rü ngëma ore rü tá pexü nüxü nacuëxëë i Tupanachiga ñuxmatáta ínangu ya tóru Cori ya Ngechuchu ya Cristu ya yima woramacuri ya ngunetüxü ngócürüü ixicü. Rü ngëxguma ínanguxgu i nüma rü aixcüma tá meä pexü nüxü nacuëxëë i guxüma i nachiga. ²⁰ Natürü chanaxwëxe na guxüärü yexera nüxü pecuäxü i ñaä ore i tá pemaä nüxü chixuxü. Rü dücax, taxüema tüechamatama nüxü tacuëx i tacüchiga na yixü i Tupanaärü ore i ümatüxü, ega Tupanaäë i Ünexü tama tüxü rüngüxëëgu. ²¹ Yerü taxüma ga Tupanaärü orearü uruü rü nüëchamatama nügüäëwa nanayaxu ga yema ore ga nüxü yaxugügüxü. Natürü yexguma yema orexü yaxugügügu, rü Naäë i Ünexü nixi ga yadexagüxëëxü.

2

Doramaä duüxügüxü ngüxëëxüchiga

¹ Natürü nuxcüma rü nayexma ta ga Tupanaärü orearü uruügüneta ixigüxü ga Yudiügütanüwa. Rü ngëxgumarüü tá ta petanüwa nangëxma i duüxügü i ngüxëëruügüneta ixigüxü. Rü nümagü rü tá doramaä nanaxüchicüü i Tupanaärü ore, rü ngëmaäcü tá pexü nangüxëë i ore i dora ixixü na pexü nawomüxëëgüxüxcèx. Rü nümagü rü täütáma naga naxinüëchaü ya yima tóru Cori ya Ngechuchu ya Cristu ya norü Maxëxëëruüchirëx ixicü. Rü ngëmagagu ya Tupana rü ngürüächi tá nanapoxcue i ngëma duüxügü i ngëmaäcü maxëxü, rü tá inayanaxoxëë. ² Rü nümagü rü tá nüxü nixugü na tama wüxi i chixexü yixü ega woo taxüneärü ngüchaü ixüxgu. Rü muxüma i togü i duüxügü rü tá nawe narüxi i ngëma chixexü i naxügüxüwa. Rü ngëma chixri pexü ngüxëëxügagu rü muxüma i togü i duüxügü rü tá chixri nachiga nidexagü i Tupanaärü ore i mexü i aixcüma ixixü. ³ Rü nümagü i ngëma duüxügü i chixexü rü tá nügüna nananugüchaü i guxüma. Rü ngëmacèx tá pemaä nüxü nixu i ore i chixexü ixixü na ngëmaäcü pexü nawomüxëëgüxüxcèx rü pexü ngixü nayauxgüxüxcèx i perü diëru. Natürü tá napoxcue i ngëma duüxügü, rü täütáma nibuxmü. Erü Tupana rü woetama nuxcü mama nanamexëë i ngëma poxcu. ⁴ Yerü ga Tupana rü tama nüxü

nüxü nangechaü ga norü orearü ngeruüğü ga daxüçüâx ga pecadu ügüxü. Rü yemacëx inaxëânexüwa i ngoxogüxü inapoxcuexüwa nanawogü. Rü cade-namaâ nayanëixgü na ngëma nangëxmagüxüçëx ñuxmatáta nawa nangu i ngëma ngunexü i nagu Tupana nüxna çaxü i guxüma i duüxüğü. ⁵ Rü yexgumarüü ta ga Tupana rü tama nüxü nüxü nangechaü ga yema nuxcümaüğüxü ga duüxüğü ga chixexü ügüxü. Rü yemacëx mucü ga taxüchicü naxcëx yëma nanamu na gumamaâ nadaiäxüçëx ga yema duüxüğü ga chixexü ügüxü. Natürü ga Tupana rü Noexü nadau ga na meâma duüxüğüxü yaxucüxëgüxü na nüxü naxoexüçëx ga norü chixexüğü. Rü yemacëx ga Tupana rü Noexü namaxëë namaâ ga 7 ga natanüxüğü. Natürü nanadai ga guxüma ga yema togü ga duüxüğü. ⁶ Rü Tupana rü yexgumarüü ta inayanaxoxëë ga guma ïänegü ga Chodoma rü Gomora ga poraäcü chixri duüxüğü nawa maxëne. Rü inanagu ga guma ïänegü ñuxmata norü tanimacaxicatama íyaxü. Rü yemaäcü nanaxü na guma ïänegü rü wüxi ga cuëxruü na yixüçëx nüxü ga yema duüxüğü ga chixexü ga yemawena maxëxü. ⁷ Natürü ga Chodomawa rü Tupana nanamaxëë ga Lox ga wüxi ga yatü ga mecü ixicü ga poraäcü ngechaücü ga yexguma nüxü nadëuxgu ga ñuxäcü chixri na namaxëxü ga yema duüxüğü ga natanüwa nayexmaxü. ⁸ Rü guxü ga ngunexüğü rü nüma ga Lox ga meâ maxücü rü poraäcü naäëwa nangux ga yexguma nüxü nadëuxgu rü nüxü naxinügu ga yema chixexüğü ga naxüğüxü ga yema duüxüğü ga natanüwa nayexmaxü. ⁹ Rü yema Loxü na namaxëëxü rü ga Tupana, rü nüxü natauxcha na tüxü inanguxüxëëxü i ngëxguma Chataná tüxna ïnügu ya yixema meâ maxëxë. Rü ngëxgumarüü ta ya yixema chixexü ügüxe, rü nüxü natauxcha na poxcuwa tüxü nangëxmagüxëëxü ñuxmatáta nawa nangu i ngëma ngunexü i nagu guxüma i duüxüğüxü yacagüxü. ¹⁰⁻¹¹ Rü Tupana rü aixcüma tá nanapoxcue i ngëma duüxüğü i naxüñëarü ngüchaügu íxü i tama naga ïnüëchaüxü ya tóru Cori. Rü ngëma duüxüğü rü taxüégama naxinüëchaü, rü nadauxcüraxüwëxëgü rü nügüguxicatama narüxinüë. Rü tama namuüë na namaâ naguxchigagüxü i ngëma äëxgacüğü i daxüçüâx i Tupanatüüwa ngëxmagüxü. Rü ngëmaäcü namaxë i ngëma duüxüğü. Natürü woo Tupanaärü orearü ngeruüğü i daxüçüâx i ngëma duüxüğüxü rüyexeraxüchichirëxü, rü namuüë na ngëmaäcü namaâ naguxchigagüxü i ngëma äëxgacüğü i daxüçüâx i Tupanatüüwa ngëxmagüxü. ¹²⁻¹³ Rü ngëma nguxëëruüguneta, rü ñoma naëxügürüü nixigü, rü naëxügürüü taxuüma nacüëxgü. Rü ngëma naxünegü naxwëxexü nixi i naxüğüxü. Rü nabue na ñoma naëxüğü i yayauxgüxü rü nadëixü rü yixigüxüçëx. Rü chixri nachiga nidexagü i ngëma tama nüxü nacüëxgüxü. Natürü ngëma chixexü i naxüğüxügagu tá inayarütauxe, rü ngëmaäcü ngüxü tá ningegü nagagu i ngëma ngüxü i toguäxü yangexëëgüxü. Rü nümagü rü namaâ nataäëgü i ngëma chixexü i ngunecütama naxüğüxü. Rü ngëxguma pemaâ nachibüëgu, rü wüxi i chixexüchixü rü äñëxüchi nixigü erü ngema rü ta nanaxüğü i norü chixexüğü i namaâ pexü nawomüxëëgüchaüxü. ¹⁴ Rü ngëma duüxüğü rü taxuacüma wüxi ya ngeäxü nadaugümare, erü naäëwa rü nagu narüxinüë na nüxü tangüchaüxü. Rü tama nüxü ninguéga na pecadu naxügüëchaxü. Rü naxcëx nadaugü na ñuxäcü chixexüğü tüxü nayixëëxü ya yixema duüxëgü ya turæarü maxüäxgüxe. Rü nüxü nicüëxüchi na ñuxäcü tacü nügüna nanugëxü. Natürü Tupana rü marü namaâ nanaxuegu na napoxcueäxü. ¹⁵ Rü ngëma duüxüğü rü tama nagu naxi i ngëma Tupana nüxü naxwëxexü, rü ngëmacëx inayarütauxe. Rü nagu naxi ga yema chixexü ga nagu yaxüxü ga

nuxcūmaũxũ ga Tupanaãrũ orearũ uruũ ga Baráũ ga Beú nane ga chixexũ üxũ na yemaãcü diêru ngĩxũ nayaxuxũcèx. ¹⁶ Rũ noxrũtama buru ga woo taguma idexachirèxcũ, rũ wũxi ga duũxũrũũ namaã iyadexa rũ inanga naxcèx ga yema chixexũ ga naxũxchaũxũ. Rũ yemaãcü Baráũ Ìyachaxãchixèè na tama naxũãxũcèx ga yema chixexũ ga naxũxchaũxũ. ¹⁷ Rũ ngẽma duũxũgũ rũ taxuwama nime ñoma wũxi i puchu i ngearũ dexáãxũrũũ. Rũ ñoma wũxi i caixanexũ i buanecũ icuexũrũũmare nixĩ na taxuwama yamexũ. Natũrũ Tupana rũ marũ nanamexèè i wũxi i nachica i èãnexũchixũ i ngextá guxũgutáma Ínapoxcueãxũwa i ngẽma duũxũgũ. ¹⁸ Rũ ngẽmaãcü tá nanapoxcue i ngẽma duũxũgũ, erũ nügũ yacuèxũgũãcũma chixri nìdexagũ i ore i taxuwama mexũmaã. Rũ tũxũ nixucuxègũ na tũmaxũnearũ ngũchaũgu na taxĩxũcèx ya yixema marũ ngexwacèx ngẽmaxũ rũxoechirèxe. ¹⁹ Rũ tũmamaã nüxũ nixu rũ ngẽxguma nawe tarũxĩxgu rũ tá tũxũ Ínanguxũxèè na taxuũmèxèwa tangèxmagũxũcèx rũ tũma tanaxwèxexũãcũma tamaxèxũcèx. Natũrũ ngẽma duũxũgũ i ngẽmaãcü chixri idexagũxũ, rũ nümagũtama rũ norũ chixexũtũũwa nangèxmagũ. Erũ guxũma i duũxũgũ, rũ ngẽma nüxũ rüyexeramaèxũtũũwa nügũ nangèxmagũxèè. ²⁰ Rũ guxãma ya yixema marũ tóru Cori ya Ngechuchu ya Cristu ya tóru Maxèxèerũũxũ cuèxgũxe, rũ marũ nawa Ítanguxũ i ñoma i naãneãrũ chixexũgũ. Natũrũ ngẽxguma chi wenaxãrũ naxcèx tawoegugu i ngẽma chixexũ i nawa Ítanguxũchirèxũ, rũ tũmaãrũ me yixĩgu na wena ngẽma chixexũtũũwa tangèxmagũxũ, rũ aixcũma noxriarũ yexera tichixe. ²¹ Erũ ngẽxguma chi nüxũ tacuèxgũguwena nüxũ tarũxoeгу i ngẽma ore i mexũ ga noxri tayauxgũxũ, rũ narũmemaè chi nixĩ ga noxtacũma tãũ chima nüxũ na tacuèxgũxũ i ngẽma maxũ i aixcũma mexũ. ²² Tupanaãrũ ore i ùmatũxũwa rũ ñanagũrũ:

“Ngẽma airu i nügũ oxgũxũ, rũ wenaxãrũ naxcèx nataegu i norũ oxũ na yaweaxũcèx. Rũ ngẽma cuchi i norũ yora meãma aiyachirèxũ, rũ ngèxgumatama wenaxãrũ norũ aiyanecèx nataegu”, ñanagũrũ i ngẽma orewa. Rũ ngèxgumarũ nixĩ i ngẽma duũxũgũ i marũ Tupanaãrũ orexũ cuèxgũchirèxũ rũ ñuxũchi wenaxãrũ naxcèx woeguxũ i norũ chixexũgũ ga noxri nawa Ínanguxũchirèxũ.

3

Tóru Coriarũ taeguchiga

¹ Pa Chaueneègũ ya Pexũ Changechaũgũxex, ñaã nixĩ i ngẽma norũ taxre i popera i pexcèx chaxũmatũxũ. Rũ yema nüxĩraũxũ ga poperawa pemaã nüxũ chixuxũrũũ, rũ wena pexũ chixucuxègũ rũ pexna nüxũ chacuèxãchixèè na aixcũma meã Tupanaãrũ oregu perũxĩnũèxũcèx. ² Rũ chanaxwèxe i nüxna pecuèxãchie i ngẽma ore ga nuxcūmaũgũxũ ga Tupanaãrũ orearũ uruũgũ ga ixũunexũ nüxũ ixugũgũxũ. Rũ ngèxgumarũ ta chanaxwèxe i nüxna pecuèxãchie i ngẽma tóru Cori ya Ngechuchu ya tóru Maxèxèerũũãrũ mugũ ga pexũ nangũxèèxũ ga norũ orearũ uruũgũ ga nüma pexũtawa namugũxũ. ³⁻⁴ Natũrũ chanaxwèxe i guxũãrũ yexera nagu perũxĩnũè i ñaã ore i pemaã tá nüxũ chixuxũ. Rũ dũcax, rũ ngèxguma nagũxchaũgu i ñoma i naãne, rũ tá Ínangugũ i duũxũgũ i chixexũ i nagu Íxũ i naxũneãrũ ngũchaũgũ. Rũ nümagũ rũ tá nacugũèacũma ñanagũrũgũ:

“Dũcèx, Cristu inaxuneta na wena núma naxũegaxũ. ¿Rũ Íacũ namaã nangupetũ i ñuxma na tama Ínanguxũ? Rũ marũ dũxwa nayue ga tóru oxigũ ga yaxògũxũ, natũrũ noxri naãne ùxgumama rũ nanangèxgumarũèchatama

i guxūma”, ñanagürügü tá. ⁵⁻⁶ Natürü ngēma duūxügü i ngēmaācü idexagūxū rü tama nüxū nacuèxgüchaū ga yema ngupetūxū ga yexguma Tupana ñoma ga nañewa namuāgu ga guma mucū ga tacū ga iyanaxoxēēcü ga guxūma ga tacū ga ñoma ga nañewa yexmaxū. Rü nuxcūmaxūchima naxūpa ga guma mucū rü woetama nayexma ga ñoma ga nañe rü guxūma i daxūwa nüxū idauxū ga Tupana ngoxēēxū ga yexguma namuāgu na nangóxūcēx. Rü yemaācü dexáchiüwa nangox ga ñoma ga nañe rü dexáarū ngāxūtūchiüwa nayexma, yerü yemaācü nanamu ga Tupana. ⁷ Natürü ngēma ñuxma ngēxmaxū i daxūwa nüxū idauxū rü ñoma i nañe rü Tupana namaā nanguxū na yixcama üxūwa yaxaxūcēx, yerü yemaācü namaā nanaxuegu. Rü ngēma ñoma i nañe rü ngēma daxūwa nüxū idauxū, rü yima üxū ya Tupana nüxū ixuxūnewa tá nixi i aixcūma ínaguāxū i ngēma ngunexū i nagu naxunetaxūgu na napoxcueāxū rü chixexūwa nawogūāxū i ngēma duūxügü i tama naga íñüēchaūxū. ⁸ Rü ñuxmax, Pa Chaueneēgü ya Pexū Changechaūgūxex, tama chanaxwēxe i nüxū ipeyarüngümaē na wūxitama i ngunexū rü tórü Coricēx rü 1000 ya taunecürū yīxū. Rü ngēxgumarūū ta, 1000 ya taunecū rü tórü Coricēx rü wūxitama i ngunexürūū yīxū. ⁹ Rü ñuxre i duūxügü rü nagu narūxñüē na tāūtama paxa ínanguxū ya tórü Cori yema tamaā inaxunetaxürūū. Natürü nüma ya tórü Cori rü tama nanuxcüāē na yanguxēēāxū i ngēma norū uneta, natürü nüma rü tamaā yaxna naxñūmare. Erü nüma rü tama nanaxwēxe na texé iyarütaxuxū, natürü nanaxwēxe na guxāma nüxū rüxoexū i tūmacūma i chixexū. ¹⁰ Natürü ngēma ngunexū i tórü Cori nagu ínguxū, rü taxūema nagu ínanguxēēxūgu tá nixi. Erü ngürüāchimare tá ínangu ñoma wūxi i ngítēxáxū ínguxürūū. Rü ñuxūchi guxūma i tacū i daxūguxū i nañewa ngēxmagūxū rü tá tagaācü niwāíxgü rü ngēmaācü tá inayarūtauxe. Rü yima üēxcū rü tauemacū rü woramacurígü rü ētagü rü tá nixae rü ngēxma tá nayarūxogü. Rü ngēxgumarūū tá ta i ñoma i nañe rü tá nixa namaā i guxūma i tacū i nawa ngēxmagūxū. ¹¹ Rü ñuxma na ngēmaācü tá namaā nangupetūxū i guxūma i tacū i ngēxmaxū, rü yexeraācü penaxwēxe na aixcūma Tupanapēxewa pixūñunexū rü nüma nanaxwēxexūlācūma na pemaxēxū. ¹² Rü name nixi i meā ípenanguxēē i ngēma ngunexū i nagu tá ínanguxū ya tórü Cori ya Tupana. ¡Rü paxa guxūwama nüxū pixu i norū ore rü aixcūma naxcēx pemaxē na ngēmaācü ípenanguxēēxūcēx! Rü ngēma ngunexūgu rü guxūma i daxūwa nüxū idauxū rü tá nixa rü tá inachaxichigü. Rü ñoma i nañe rü üēxcū rü tauemacū rü ētagü rü yima üxūmaā tá inachaxichigü. ¹³ Natürü yixema na yaxōgūxū rü ítananguxēē i ngēma ngexwacaxūxū i daxūguxū i nañe rü ngexwacaxūxū i ñoma i nañe ga Tupana tamaā ixunetaxū. Rü ngema rü guxūtáma name, rü yixema rü tá ta aixcūma time. ¹⁴ Rü ngēmacēx, Pa Chaueneēgü ya Pexū Changechaūgūxex, rü ñuxma na ípenanguxēēxū i ngēma, rü name nixi i aixcūma meā pemaxē rü aixcūma pegü pengechaūgü na taxuwama nachixexūcēx i perü maxū rü aixcūma petaāēgūxūcēx i ngēxguma wena nüma naxūxgu. ¹⁵ Rü name nixi i nüxna pecuēxāchie na yaxna tamaā naxñūxū ya tórü Cori, erü nanaxwēxe na tūxū nangēxmaxū i tórü maxū i taguma gūxū. Rü ngēmatama pexcēx chanaxūmatūxürūū ta nixi ga pexcēx naxūmatūāxū ga taeneē ya nüxū ingechaūgücü ya Pauru ga yexguma Tupana naporaxēēācūma pexcēx naxūmatūāgu. ¹⁶ Rü guxūma ga norū poperawa rü ñāā pexcēx chaxūmatūxūchiga nanaxūmatū ga Pauru. Natürü yema pexcēx naxūmatūxūwa rü nangēxma i ñuxre i ore i guxchaxū na nüxū icuāxū na tacūchiga yīxū. Rü ngēma duūxügü i tama aixcūma Tupanaxū cuēgūxū

rü tama aixcüma yaxõgüxü, rü nanaxüchicüügü i ngẽma ore ngẽxgumarüü na guxüma i Tupanaärü ore i ümatüxü naxüchicüügüxürüü. Natürü ngẽma chixexü na naxügüxügagu rü nügü tátama inayarütauxexẽ. ¹⁷ Rü ngẽmacèx, Pa Chaueneëgü ya Pexü Changechaügüxex, rü ñuxma na nüxü pecuáxü i tacü tá na ngupetüxü, rü name nixi i pexuãëgü na tama pexü nawomüxëëgüxücèx i ngẽma chixexü i duüxügü rü tama nüxü perüxoexücèx na meã peyaxõgüxü. ¹⁸ Rü ngẽmacèx, Pa Chaueneëgüx, penaxwèxe na pegü peporaexëëxü na wüxichigü i ngunexü yexeraãcü tórü Cori ya Ngechuchu ya Cristu ya tórü Maxëëëruüxü pecuáxücèx rü yexeraãcü nüxü picuáetanüxücèx na ñuxãcü aixcüma pexü nangechaüxü. ¡Rü ngẽmacèx rü guxügutáma rü ngixã nüxü ticuèüügü! Rü ngẽmaãcü yĩ.

Rü nuãma pexna,
Pedru

NÜXĨRA ÜXÜ GA POPERA GA CUÁÛ ÜMATÜXÜ

Ore i tüxü maxêxüchiga

¹ Pexcêx tanaxümatü nachiga ya Tupana Nane ya Cristu ya yima woetama marü nüxra yexmacü ga yexguma noxritama tauta naâne üxgu. Rü nüma rü Ore i Maxêxêruü nixi i naega erü nüma nixi i tamaã nüxü yaxuxü i Tupanachiga rü tüxü namaxêxêxü. Rü toma ga norü ngüexügü na tixigüxü, rü nüxü taxĩnüê rü toxetümaã nüxü tadaugü rü tomêxmaã nüxü tingögügü. ² Rü yima Maxêxêruü ya Cristu rü toxü nügü nawêx. Rü nüxü tadaugü rü duüxügümaã nüxü tixu na ñuxäcü yĩxü. Rü ñuxma rü pemaã rü ta nüxü tüxichiga ya yima Cristu ya tüxna naxäcü i maxü i taguma güxü. Rü noxri rü Nanatüxtawa nayexma, natürü ñoma ga naãnewa nangu rü toxcêx nangox. ³ Rü yema toma nüxü tadaugüxü rü nüxü taxĩnüêxü rü pemaã nüxü tixu na tomücügü pixigüxücêx, ngêxgumarüü i toma na Tanatü ya Tupana rü Nane ya Ngechuchu ya Cristumücügü tixigüxürrüü. ⁴ Rü ngêmacêx pexcêx tanaxümatü i ñaã ore na wüxigu aixcümäxüchi itaãêgüxücêx.

Ñoma ngóonexürüü name ya Tupana

⁵ Rü ñaã nixi ga ore ga tomaã nüxü yaxuxü ga Ngechuchu ya Cristu. Rü pemaã nüxü tixu na ñoma ngóonexürüü namexü ya Tupana, rü nawa rü nataxuma i chixexü i ñoma êãnexürüü ixixü, rü bai i íraxü. ⁶ Rü ngêxguma chi:

“Tanatü ya Tupanamücügü tixigü”, ñagügu, natürü chixri imaxêgu, rü tidoraemare erü tama aixcüma meã tamaxê. ⁷ Rü ngêxguma chi Tupanarüü ngóonexüwa imaxêgu, rü yigümücügü tixigü i yixema, rü Tupana Nane ya Ngechuchu rü nagümaã tüxü inayanatauxêê i guxüma i tórü chixexü. ⁸ Ngêxguma chi nüxü ixuxgu rü:

“Changearü pecaduãx”, ñagügu, rü yigütama tawomüxêê, rü tidoraemare. ⁹ Natürü ngêxguma chi Tupanamaã nüxü ixuxgu i tórü pecadugü, rü nüma tüxü nüxü nangechaü rü tüxü inayanatauxêê i guxüma i tórü chixexü, erü nüma rü mecü nixi rü taguma tüxü nawomüxêê. ¹⁰ Natürü ngêxguma chi:

“Tangearü pecaduãxgü”, ñagügu, rü doratêêx nüxü tawogü ya Tupana rü tama aixcüma tawa nangêxma i norü ore.

2

Cristu rü tórü chogüruü nixi

¹ Pa Chauxacügüx, pexcêx chanaxümatü i ñaã ore na tama chixexü pexügüxücêx. Natürü ngêxguma chi wüxie chixexü üxgu, rü nangêxma ya tümaêtüwa chogücü nüxna ya Tanatü ya Tupana na tama tüxü napoxcuxücêx. Rü yima nixi ya Ngechuchu ya Cristu ya aixcüma mecü ixicü. ² Rü guma Ngechuchu ya Cristu rü nügü inaxä rü nayu na naxütanüãxücêx ga tórü pecadugü. Rü tama tórü pecadugüxicatama naxütanü, natürü guxüma i duüxügüarü pecadugü ta naxütanü. ³ Rü ngêxguma chi naga ixĩnüêgu i ngêma tüxü namuxü ya Tupana, rü nüxü tacuêx na aixcüma nüxü icuáxü. ⁴ Rü ngêxguma chi wüxie:

“Choma rü Tupanaxü chacuêx”, ñagügu, natürü tama naga taxĩnügu i ngêma tüxü namuxü ya Tupana, rü wüxi i doratêxäxü tixi. ⁵ Natürü yixema

naga ĩnũxẽ i ngẽma tũxũ namuxũ ya Tupana, rũ aixcũmaxũchi Tupanaxũ tangechaũ. Rũ ngẽmawa nũxũ tacuẽxgũ na aixcũma Tupanaãrũ duũxũgũ ixĩgũxũ. ⁶ Rũ yĩxema:

“Tupanaãrũ duũxũ chixĩ”, ñagũxe, rũ name nixĩ na meã tamaxũxũ yema Ngechucha ya Cristu meã maxũxũrũ.

Tupanaãrũ mu i ngexwacaxũxũchiga

⁷ Pa Chaueneẽgũx, tama wũxi i ngexwacaxũxũ i Tupanaãrũ mu nixĩ i pexcẽx chaxũmatũxũ. Natũrũ ñaãtama noxriarũ ũgũgumama pexũ yexmaxũ ga mu nixĩ. Rũ ñaãtama nixĩ i Tupanaãrũ mu ga nuxcũmaũxũ ga marũ nũxũ pexĩnũẽxũ. ⁸ Natũrũ ñaã Tupanaãrũ mu i pexcẽx chaxũmatũxũ rũ guxũguma nangexwacaxũ. Rũ ngẽxguma naga pexĩnũẽgu i ñaã Tupanaãrũ mu na pegũ pengechaũgũxũ, rũ tama eãnexũwatama pemaxẽ, natũrũ Cristurũ ngẽma ngõonexũ i aixcũma ixĩxũwa pengẽxmagũ. ⁹ Rũ ngẽxguma chi wũxie:

“Choma rũ ngẽma ngõonexũwa changẽxma”, ñagũgu, natũrũ tũmaẽneẽchi taxaixgu, rũ eãnexũwatama tangẽxma. ¹⁰ Yĩxema tũmaẽneẽxũ ngechaũxẽ rũ ngõonexũwa tamaxũ, rũ taxucẽxma tũxcũũ pecadu taxũ. ¹¹ Natũrũ yĩxema tũmaẽneẽchi aixe, rũ eãnexũwatama tamaxũ, rũ eãnexũgu tixũ. Rũ tama nũxũ tacuẽx na ngextã taxũxũ, erũ tũmacẽx naxẽãne. ¹² Pa Chauxacũgũx, pexcẽx chanaxũmatũ erũ Cristugagu Tupana marũ pexũ nũxũ nangechaũ i perũ pecadugũ. ¹³ Pa Papãgũx, pexcẽx chanaxũmatũ i ñaã ore erũ nũxũ pecuẽxgũ ya Tanatũ ya Tupana ga noxriarũ ũgũgumama yexmacũ. Pa Ngextũxũcũgũx, pexcẽx chanaxũmatũ erũ marũ nũxũ perũyexera i ngẽma ngoxo i Chataná i chixexũãrũ ũrũ. ¹⁴ Pa Buxũgũx, pexcẽx chanaxũmatũ erũ marũ nũxũ pecuẽxgũ ya Tanatũ ya Tupana. Pa Papãgũx, pexcẽx chanaxũmatũ erũ marũ nũxũ pecuẽxgũ ya Tanatũ ya Tupana ga noxriarũ ũgũgumama yexmacũ. Pa Ngextũxũcũgũx, pexcẽx chanaxũmatũ erũ peporae, rũ guxũguma peãẽwa nangẽxma i Tupanaãrũ ore, rũ marũ nũxũ perũyexera i ngẽma ngoxo i Chataná i chixexũãrũ ũrũ. ¹⁵ ;Tãxũ i pexũ nangũchaũxũ i ñoma i naãne rũ norũ ngẽmaxũgũ! Ngẽxguma chi texẽaxũ nangũchaũgu i ñoma i naãne rũ tama Tanatũ ya Tupanaxũ tangechaũ. ¹⁶ Erũ guxũma i ngũchaũgũ i ñoma i naãnewa ngẽxmaxũ rũ ñoma i naãneãrũtama nixĩ rũ tama Tupanaãrũ nixĩ. Rũ ngẽma ngũchaũgũ rũ ngẽma nixĩ i taxũneãrũ ngũchaũgũ, rũ taxetũarũ ngũchaũgũ, rũ yigũ na icuẽxũgũxũ tórũ ngẽmaxũgũmaã. ¹⁷ Natũrũ ñoma i naãne rũ guxũma i ngũchaũgũ i nawa ngẽxmaxũ rũ tá nagux. Natũrũ yĩxema Tupanaga ĩnũxẽ rũ guxũgutãma tamaxũ.

Ore i aixcũma ixĩxũchiga rũ ore i dora ixĩxũchiga

¹⁸ Pa Chauxacũgũx, paxa tá nagux i ñoma i naãne. Pema rũ marũ nũxũ pexĩnũchiga rũ tá ĩnangu i wũxi i Cristuarũ uwanũ, natũrũ marũ ĩnangugũ i muxũma. Rũ ngẽmawa nũxũ tacuẽx na marũ nagũxchaũxũ i ñoma i naãne. ¹⁹ Rũ ngẽma Cristuarũ uwanũgũ rũ tatanũwatama nangẽxmagũchirẽx, natũrũ tama aixcũma tatanũxũ nixĩgũ, erũ ngẽxguma chi tatanũxũ yixĩgũgu rũ tatanũgu chitama narũcho. Natũrũ marũ tatanũwa ĩnachoũ na meãma nũxũ icuãxũcẽx na tama aixcũma tatanũxũ yixĩgũxũ. ²⁰ Natũrũ pema rũ Cristu marũ pexna nanamu i Naã i Ũnẽxũ, rũ ngẽmacẽx meãma nũxũ pecuẽx i Tupanaãrũ ore. ²¹ Rũ ñuxma rũ tama nixĩ na tama nũxũ pecuãxũcẽx na pexcẽx chaxũmatũxũ. Natũrũ pexcẽx chanaxũmatũ erũ marũ meãma nũxũ pecuẽx i ngẽma ore i aixcũma ixĩxũ. Rũ nũxũ pecuẽx rũ ngẽma ore i aixcũma ixĩxũwa rũ nataxuma i dora. ²² ;Texẽ tiĩxũ ya yĩxema idoratẽxãxe? Yĩxema:

“Ngechuchu rü tama aixcüma Cristu ya Tupana Nane nixĩ”, ñagüxe, tixĩ ya idoratèxáxe. Yíxema tixĩ ya Cristuarü uwanü, erü tama nüxü tacuáxchaü ya Tanatü ya Tupana rü Nane ya Ngechuchu. ²³ Guxâma ya yíxema tama nüxü cuáxchaüxê ya Tupana Nane ya Ngechuchu, rü tama nüxü tacuáxchaü ta ya Tanatü ya Tupana. Natürü yíxema Ngechuchuauxü yaxóxê, rü Tanatü ya Tupanaâxü rü ta tayaxô. ²⁴ Rü ngêmacêx name nixĩ i peyaxôgüama i ngêma ore ga noxri nüxü pexĩnüêxü. Rü ngêxguma peyaxôgüamagu i ngêma ore ga noxri nüxü pexĩnüêxü, rü aixcüma norü duüxügü pixígü ya Tanatü ya Tupana rü Nane ya Ngechuchu. ²⁵ Rü nûmatama ya Ngechuchu ya Cristu nixĩ i tamaâ inaxunetaxü na tûxna naxââxücêx i maxü i taguma gûxü. ²⁶ Nangêxma i duüxügü i chixexüwa pexü gagüchaüxü. Rü ngêmachiga nixĩ i pexcêx chanaxümatüxü i ñââ ore. ²⁷ Natürü pema rü marü Cristu pexna nanamu i Naâe i Üünexü, rü guxüguma pewa nangêxma. Rü ngêmacêx tama penaxwêxe i to i perü ngüxêêxü erü nûmatama i Naâe i Üünexü rü pexü nangüxêê i guxüma. Rü norü nguxêêtae rü aixcüma nixĩ rü tama dora nixĩ. Rü ngêmacêx name nixĩ na guxüguma Cristuaxü peyaxôgüxü, ngêma Naâe i Üünexü pexü ngüxêêxüâcüma. ²⁸ Rü ñuxmax, Pa Chauzacügüx, rü name nixĩ na meâma Cristuaxü peyaxôgüxü na tama nüxü imuüêxücêx, rü tama ixâneêxücêx napêxewa i ngêxguma wena nuâ naxüxgu. ²⁹ Pema nüxü pecuêx na Cristu rü aixcüma mecü yíixü. Rü ngêxgumarüü ta name nixĩ na nüxü pecuáxü na guxüma i duüxügü i mexü ügüxü rü Tupanaxâcügu na yixígüxü.

3

Tupanaxâcügüchiga

¹ ¡Dücêx, Pa Chaueneêgüx, ñuxâcü poraâcü tüxü nangechaü ya Tanatü ya Tupana! Rü ngêmacêx nixĩ i naxâcügümaâ tüxü naxuxü i nûmax. Rü aixcüma naxâcügü tixígü. Rü ngêmacêx ñoma i naâneçüâx i duüxügü rü tama tüxü nacuáxchaü erü Tupanaxü rü ta tama nacuáxchaügü. ² Pa Chaueneêgü ya Pexü Changechaügüxe, ñuxma rü marü Tupanaxâcügü tixígü woo tama tüxü nüxü nacuêxêê na ñuxâcü tá ixígüxü i yíxcüra. Natürü nüxü tacuêxgü na Ngechuchurüü tá ixígüxü i ngêxguma nangoxgu, erü tá nüxü tadaugü na ñuxâcü yíixü i nûmax. ³ Rü guxâma ya yíxema yaxóxê na Ngechuchurüü tá tiixü, rü tügüna tadau na Ngechuchu ya Cristurüü aixcüma Tupanapêxewa tamexü. ⁴ Natürü guxâma ya yíxema pecadu üxe, rü Tupanamaâ chixexü taxü. Erü ngêxguma tama Tupanaga taxĩnügu, rü tapecaduâx. ⁵ Pema nüxü pecuêx rü Ngechuchu ya Cristu rü ñoma ga naânewa naxü na iyanaxoxêêâxücêx i tórü pecadugü. Rü nûma rü taguma pecadu naxü. ⁶ Rü ngêmacêx guxâma ya yíxema aixcüma nüxü yaxôgüxe, rü tama pecadu taxügüecha. Natürü guxâma ya yíxema pecadu üechaxe, rü ngêmaâcü tamaxê erü taguma Cristuxü tadau, rü taguma nüxü tacuêx. ⁷ Pa Chauzacügüx, ¡tâxü i naga pexĩnüêxü i ngêma duüxügü i pexü iyarütauxexêêchaüxü! Yíxema mexü üxe rü aixcüma mecü tixĩ, ngêxgumarüü ya Cristu na aixcüma mecü yíixürrüü. ⁸ Natürü yíxema pecadu üechaxe rü ngêmawa tüxü tacuêx na Chatanáârü duüxü tiixü, erü nûma i Chataná rü noxriarü ügügumama pecadu naxüecha. Rü yemacêx ga Tupana Nane rü ñoma ga naânewa naxü na iyanaxoxêêâxücêx ga yema Chataná üxü. ⁹ Rü yíxema Tupanaxâcü ixixê rü tama pecadu taxüecha, erü naxâcüxüchi tixĩ. Rü taxuacüma pecadu taxüecha erü Tupana nixĩ ya tûmanatü. ¹⁰ Yíxema

chixexũ úxe rü tũmaẽneẽchi aixe, rü tama Tupanaxãcũ tixĩ. Rũ ngẽmawa nüxũ tacuèx na texè tixĩgũxũ ya Tupanaxãcũgũ rü texè tixĩgũxũ ya Chatanáãcũgũ.

Name nixĩ na yigũ ingechaũgũxũ

¹¹ Rũ yexguma noxritama pexũ tangúexẽẽgu, rü pemaã nüxũ tixu na guxãma yigũ ingechaxũgũxũ. ¹² Rũ tama tanaxwèxe na Caĩrũ nõgoxo i Chatanáãcũ ixĩgũxũ. Yerũ nüma rü naẽneèxũ nimèx. ¿Rũ ñacucèx nixĩ ga yamaãxũ? Nayamèx yerũ yema nüma naxũxũ rü tama name, rü yema naẽneè ùxũ rü name. ¹³ Pa Chaueneègũx, ñtãxũ i pebaixãchiãègũx ega pexchi naxaiegũ i ñoma i naãnecũãx i duũxũgũ! ¹⁴ Yixema rü marũ nüxna ñtangũxũ i ngẽma yu rü ñuxma rü marũ maxũwaama tangèxmagũ. Nüxũ tacuèxgũ i ngẽma erũ nüxũ tangechaũgũ i taeneègũ. Yixema tama tũmaẽneèxũ ngechaũxè rü yuwatama tangèxma. ¹⁵ Rũ yixema tũmaẽneèchi aixe rü wũxi i máetaxũrũ tixĩ. Rũ pema nüxũ pecuèxgũ i wũxi i máetaxũ rü nüxũ nataxuma i norũ maxũ i taguma gũxũ. ¹⁶ Rũ Ngechuchu ya Cristu rü tórũ pecaducèx nayu, rü yemaãcũ tüxũ nüxũ nadauxèè i ngẽma ngechaũ i aixcũma ixĩxũ. Rũ ngèxgumarũ ta i yixema, rü tanaxwèxe na ñimemarexũ na nüxũ rüngũxèèxũ i taeneègũ woo ngemagu iyuxgu. ¹⁷ Natürũ ngèxguma chi wũxi i yatüãxũ nangèxmagu i muxũma i norũ ngèmaxũgũ, rü chi nüxũ nadèuxgu i namücũ na nüxũ nataxuxũ, rü taxuacũma:

“Choma rü Tupanaxũ changechaũ”, ñnagürũ, ega tama nüxũ nangũxèègu i namücũ. ¹⁸ Pa Chauacũgũx, tama name i taèxmaã rü tórũ oremaãxcatama nüxũ tangechaũ i taeneè. Natürũ tanaxwèxe i tórũ maxũmaã rü tórũ ü i mexũmaã nüxũ tangechaũ.

Tama taxãneè na Tupanana ingaicamagũxũ

¹⁹⁻²⁰ Rũ ngèxguma aixcũma yigũ ingechaũgũgũ, rü nüxũ tacuèx na aixcũma naga ixĩnũèxũ i ngẽma ore i aixcũma ixĩxũ, rü Tupanapèxewa rü aixcũma naxãcũgũ ixĩgũxũ, woo ngèxguma taãèwa nagu rüxĩnũgũ:

“Tama Tupanaxãcũ chixĩ”, ñagũgu. Erũ nüxũ tacuèx rü Tupana nixĩ i taãèãrũ yexera, rü nüma nüxũ nacuèx i guxũma. ²¹ Pa Chaueneègũ ya Pexũ Changechaũgũxex, ngèxguma taãèwa nüxũ icuèxgu na Tupanaxãcũxũchi ixĩgũxũ, rü tama taxãneè na nüxna ingaicamagũxũ ya Tanatũ ya Tupana. ²² Rũ nüma tá tüxna nanaxã i guxũma i ñacu i naxcèx ñicaxũ erũ naga taxĩnũè i ngẽma tüxũ namuxũ rü tanaxũ i ngẽma nüma namaã nataãèxũ. ²³ Rũ nüma tüxũ namu na Nane ya Ngechuchu ya Cristuaxũ yaxõgũxũ rü yigũ ingechaũgũxũ, yema nüma tüxũ namuxũãcũ. ²⁴ Rũ yixema naga ñnũèxè i ngẽma Tupana tüxũ muxũ, rü aixcũma Tupanaãrũ duũxũgũ tixĩgũ rü nüma ya Tupana rü aixcũma tũmawa namaxũ. Rũ ñuxma rü nüxũ tacuèx na aixcũma Tupanaãrũ duũxũgũ ixĩgũxũ rü tawa namaxũxũ, erũ Naãè i Üünexũ ga tüxna namuxũ tüxũ nüxũ nacuèxèè.

4

Yixema tüxũ nangèxmaxè i Tupanaãè i Üünexũ rü yixema tüxũ nangèxmaxè i Cristuarũ uwanüãè

¹ Pa Chaueneègũ ya Pexũ Changechaũgũxex, ñtãxũ i nüxũ peyaxõgũxũ i guxũma i orearũ uruũgũ i nügũ ixugũgũxũ na aixcũma Tupanaãrũ orearũ uruũgũ yixĩgũxũ! Natürũ name nixĩ i penangugũ i norũ ore na nüxũ pecuãxucèx ngoxita aixcũma Tupanaãè yĩxũ i nawa idexaxũ rü èxna tama. Erũ ñoma i naãnewa rü guxũwama nangèxma i muxũma i idoratèèxgũxũ i nügũ ixugũxũ na Tupanaãrũ orearũ uruũgũ yixĩgũxũ. ² Rũ tá pemaã nüxũ

chixu na ñuxácü tá nüxü pecuáxü na texé tíxü ya yíxema aixcüma Tupanaãê tûmawa ngêxmaxê. Rú dúcax, guxüma i orearü uruügü i nüxü ixugüxü na Tupana duüxüxü yaxixêêxü ya Ngechuchu ya Cristu, rü ngêma nixí i aixcüma Tupanaãê nawa idexaxü. ³ Natürü guxüma i ngêma orearü uruügü i tama nüxü ixugüxü na Tupana duüxüxü yaxixêêxü ga Ngechuchu, rü ngêma rü tama nüxü nangêxma i Tupanaãê i Üünexü. Natürü Cristuarü uwanüãê nixí i nawa ngêxmaxü. Marü nüxü pexínüê na íngungchaüxü i Cristuarü uwanü, natürü ñuxma rü marü ñoma i naãnewa nangêxma. ⁴ Pa Chauxacügüx, pema rü Tupanaxácügü pixígü. Rú marü nüxü perüyexera i ngêma tama aixcüma Tupanaärü orearü uruügü ixígüxü. Erü ngêma Tupanaãê i Üünexü i peãewa ngêxmaxü rü nüxü narüyexera i ngêma Cristuarü uwanüãê i ñoma i naãneçüãxgüwa ngêxmaxü. ⁵ Rú nüma i Cristuarü uwanüärü duüxügü rü ñoma i naãneçüãxgü nixí. Rú ngêmacêx ñoma i naãnechigagu nidexagü. Rú ñoma i naãneçüãx i duüxügü rü nüxü inarüxínüê. ⁶ Natürü i yixema rü Tupanaxácügü tixígü. Rú yíxema Tupanaxü cuáxe rü tüxü itarüxínü. Natürü yíxema tama Tupanaxü cuáxe rü tama tüxü itarüxínü. Rú ngêmwawa nüxü tacuêxgü na texé tixígüxü ya aixcüma Tupanaärü duüxügü ixígüxe rü texé tixígüxü ya Cristuarü uwanüärü duüxügü ixígüxe.

Tupana tüxü nangechail

⁷ Pa Chaueneëgü ya Pexü Changechaügüxex, name nixí na yigü ingechaügüxü, erü Tupana nixí ya tüxü ngüxêêcü na yigü ingechaügüxü. Rú guxâma ya yíxema tûmaëneêxü ngechaüxê rü Tupanaxácü tixígü rü Tupanaxü tacuêx. ⁸ Yíxema tama tûmaëneêxü ngechaüxê rü tama Tupanaxü tacuêx, erü Tupana nixí ya tüxü ngüxêêcü na yigü ingechaügüxü. ⁹ Tupana rü ñoma ga naãnewa nanamu ga Nane ya nügümaa wüxicacü na yimagagu tüxü nangêxmaxüçêx i maxü i taguma güxü. Rú yemawa Tupana tüxü nüxü nadauxêê na ñuxácü tüxü nangechaüxü. ¹⁰ Rú woo Tupanaxü tangechaügü, natürü ngêma ngechail i guxüärü yexera ixíxü nixí na nüma tüxü nangechaüxü rü ñoma ga naãnewa na namuáxü ga Nane na taxcêx nayuxüçêx rü naxütanüáxüçêx ga tóru pepadugü. ¹¹ Pa Chaueneëgü ya Pexü Changechaügüxex, yexguma yemaácü tüxü nangechaügü ga Tupana, rü ngêmacêx name nixí i yixema rü ta yigü tangechaügü. ¹² Taguma texé Tupanaxü tadau. Natürü ngêxguma aixcüma yigü ingechaügügu, rü Tupana rü tawa namaxü rü norü ngechail rü aixcümaxüchi tóru maxüwa nangox. ¹³ Rú nüma rü marü tüxna nanamu ga Naãê i Üünexü. Rú ngêmwawa nüxü tacuêx na aixcüma norü duüxügü ixígüxü rü nüma rü tawa na namaxüxü. ¹⁴ Rú tomatama nüxü tadaugü rü nüxü tixuchigagü na Tanatü ya Tupana núma namuxü ga Nane na guxüma i duüxügüxü namaxêêêxüçêx. ¹⁵ Rú yíxema yaxóxê rü nüxü ixuchigaxe na Tupana Nane yíxü ya Ngechuchu, rü aixcüma Tupanaärü duüxü tixí, rü Tupana rü tûmawa namaxü. ¹⁶ Rú yixema nüxü tacuêxgü rü tayaxögü na Tupana rü poraácü tüxü nangechaüxü, erü nüma nixí i aixcüma guxâxü nangechaüxü. Rú yíxema aixcüma tûmaëneêxü ngechaüxê, rü Tupanaärü duüxü tixí, rü nüma ya Tupana rü aixcüma tûmawa namaxü. ¹⁷ Rú ngêxguma aixcüma Tupanaxü ingechaügügu, rü tóru maxüwa nangox i ngêma, rü täütáma nüxü tamuüê i ngêma ngunexü i nagu tüxü yacagüxügu naxcêx i tóru maxü. Erü woo ñoma i naãnewa tangêxmaxü, natürü napêxewa rü Cristurüü tixígü. ¹⁸ Rú ngêxguma aixcüma Tupanaxü ingechaügügu, rü nüxü tacuêx na täütáma tüxü napoxcuexü, rü ngêmacêx taxucêxma nüxü tamuüê. Natürü ngêxguma chi nüxü imuüêgu, rü nüxü

tacuèx na tama aixcūma nūxū ingechaūgūxū. ¹⁹ Rū yixema rū Tupanaxū tangechaūgū, yerū nūxīra tūxū nangechaū ga nūmax. ²⁰ Ngēxguma chi texe:

“Choma rū Tupanaxū changechaū”, ñagūgu, natūrū tūmaēneēchi taxaixgu, rū tidora. Erū ngēxguma tama nūxū tangechaūgu i tūmaēneē i nūxū tadauxū çrū ñuxūcūrūwa tá nūxū tangechaū ya Tupana ya tama nūxū tadaucū? ²¹ Rū Ngechuchu ya Cristu tūxū namu rū ñanagūrū:

“Yixema Tupanaxū ngechaūxē, rū name nixī na tūmaēneēxū rū ta tangechaūxū”, ñanagūrū.

5

Nūxū tarūyexera i ñoma i naāneārū ngúchaūgū

¹ Ngechuchu rū Tupana Nane ya Cristu nixī. Rū guxāma ya yixema nūxū yaxōxē, rū Tupanaxācū tixīgū. Rū yixema Tanatū ya Tupanaxū ngechaūxē, rū nūxū tangechaū ta i guxūma i naxācūgū. ² Rū ngēxguma Tupanaxū ingechaūgūgu rū naxūxgu i ngēma nūma tūxū namuxū, rū nūxū tacuèx na aixcūma nūxū ingechaūgūxū i ngēma naxācūgū ixīgūxū. ³ Rū ngēxguma aixcūma Tupanaxū ingechaūgūgu rū naga taxīnūē i ngēma tūxū namuxū. Rū ngēma tūxū namuxū rū tama naguxcha na naga ixīnūēxū. ⁴ Erū guxāma ya aixcūma Tupanaxācū ixīxē, rū tama ñoma i naāneārū ngúchaū i chixexūgu tarūxīnū. Rū yixema rū tayaxōgū, rū ngēmacèx tama name i ñoma i naāneārū ngúchaū i chixexūgu tarūxīnūē. ⁵ Rū yixema yaxōxē na Tupana Nane yīxū ya Ngechuchu, rū yixema tixī ya tama ñoma i naāneārū ngúchaū i chixexūgu rūxīnūxē.

Ore i Tupana Nanechiga

⁶ Rū nūxū tacuèx na aixcūma Tupana Nane yīxū ya Ngechuchu. Yerū yexguma ñoma ga naānewa nayexmagu rū dexāwa ínabaiegu, rū nūmatama ga Tupana nūxū nixu na Nanexūchi yīxū. Rū yexguma curuchagu nayuxgu rū nagū inabaāgu ga Ngechuchu, rū Tupana rū wenaxārū inanawéx na aixcūma Nane na yīxū. Rū ngēxgumarūū ta i ngēma Naāē i Ūūnexū i taguma idoraxū, rū tūxū nūxū nacuèxēē na aixcūmaxūchi Tupana Nane na yīxū. ⁷ Rū ngēmaācū tūxū nangēxma i tomaēxpūx i cuèxruūgū i tūxū nūxū cuèxēēxū na aixcūma Tupana Nane yīxū ya Ngechuchu. ⁸ Rū ngēma norū wūxi nixī i Naāē i Ūūnexū, rū ngēma norū taxre nixī ga yema Tupanaga ga yexguma Ngechuchu dexāwa íbaiegu, rū ngēma norū tomaēxpūx nixī ga yema Tupana ūxū ga yexguma curuchagu nagū inabaāgu ga Ngechuchu. Rū guxūma i ngēma tomaēxpūx, rū wūxigu nūxū nixu na aixcūma Tupana Nane yīxū ya Ngechuchu. ⁹ Nūxū tayaxōgū i duūxūgū ega tacūxū tamaā yaxugūgu. Natūrū Tupanaārū ore nixī i yexeraācū aixcūmaxūchi ixīxū. Rū Tupana nixī ya tamaā nūxū ixucū na Ngechuchu rū Nane yīxū. ¹⁰ Rū yixema nūxū yaxōxē ya Tupana Nane rū nūxū tacuèx na aixcūma yīxū i ngēma ore i Tupana nūxū ixuxū i Nanechiga. Natūrū yixema tama Tupanaāxū yaxōxē rū doratèx nūxū tawogū ya Tupana erū tama tayaxō i ngēma ore i Tupana nūxū ixuxū i Nanechiga. ¹¹ Rū ñāā nixī i norū ore ya Tupana i tamaā nūxū yaxuxū, rū ñanagūrū:

“Chomatama marū pexna chanaxā i maxū i taguma gūxū. Rū ñāā maxū rū Chaunegagu pexū nangēxma”, ñanagūrū. ¹² Yixema nūxū yaxōxē ya Tupana Nane rū tūxū nangēxma i ngēma maxū i taguma gūxū. Natūrū yixema tama nūxū yaxōxē ya yima Tupana Nane rū tama tūxū nangēxma i ngēma maxū.

Cuáŭ rü ñuxre ga norü ucuxêmaã inayacuèxêê ga norü popera

13 Pa Chaueneêgüx ya Tupana Naneãxü Yaxôgüxex, pexcêx chanaxümatü i ñãã ore na nüxü pecuáxüçêx na pexü nangêxmaxü i ngêma maxü i taguma gúxü. 14 Rü ngêmacêx tama taxãneê na nüxna ingaicamagüxü ya Tupana. Rü nüxü tacuêxgü ega tacüçêx nüxna icaxgu, rü nüma tüxü naxînü i ngêxguma norü ngúchaü yixîgu i ngêma naxcêx nüxna icaxü. 15 Rü ngêxguma nüxü icuêxgu na nüma tüxü naxînüxü i ngêxguma tacüçêx nüxna icaxgu, rü nüxü tacuêx ta na tüxna naxããxü i ngêma naxcêx nüxna icaxü. 16 Rü ngêxguma chi texé nüxü dèuxgu i tümaêneê na pecadu naxüxü, rü name nixî na naxcêx tayumüxexü ega tama pecadu i iyanatauxêêxü yixîgu. Rü Tupana tá nana-maxêê i ngêma tümaêneê ega tama pecadu i iyanatauxêêxü yixîgu. Nangêxma i pecadu i tüxü iyarütauxêêxü. Rü ngêxguma ngêma pecaduwe naxüãmagu i wüxi i peeneê, rü tama pemaã nüxü chixu na naxcêx peyumüxêgüxü. 17 Guxüma i chixexü i ixüxü, rü pecadu nixî. Natürü nangêxma i pecadu i tama tüxü iyarütauxêêxü. 18 Rü nüxü tacuêx, rü yixema Tupanaxãcü ixîxê, rü tama pecadu taxüecha, erü nüma ya Tupana Nane rü tüxna nadau. Rü taxuacüma tüxna nangaicama i ngoxo i Chataná i tüxü pecaduãxêêchaüxü. 19 Nüxü tacuêxgü na Tupanaxãcügu ixîgüxü, natürü guxüma i ñoma i naãnecüãx rü ngoxo i Chatanamêxêwa nangêxmagü. 20 Rü nüxü tacuêx ta na ñoma ga naãnewa nanguxü ga Tupana Nane, rü tüxna nanaxã ga cuèx na nüxü icuêxgüçêx ya yima aixcümáxüchi Tupana ixîcü. Rü norü duüxügü tixîgü ya yima aixcümáxüchi Tupana ixîcü, erü Nane ya Ngechuchu ya Cristuarü duüxügü tixîgü. Rü nüma ya Tupana Nane nixî i aixcümáxüchi Tupana yîxü rü tüxna naxããxü i maxü i taguma gúxü. 21 Pa Chauacügüx, ¡Pegüna pedaugü na tama nüxü peyaxôgüçêx i tupanachicügu! Rü ngêxcatama nixî i chorü ore i pemaã nüxü chixuxü.

Rü nuãma pexna,
Cuáŭ

NORŮ TAXRE GA POPERA GA CUÁŮ ŮMATŮXŮ

CuáŮárŮ moxě

¹ Pa ChaueneĕgŮ i YaxŮgŮxe ya Tupana PexŮ Dexex, pexcĕx chanaxŮmatŮ i choma i CuáŮ i yaxŮgŮxŮárŮ aĕxgacŮ na chŮixŮ. Choma rŮ aixcŮma pexŮ changechaŮ. RŮ tama i chaxica, natŮrŮ guxŮma i ngĕma nŮxŮ cuĕxgŮxŮ i TupanaárŮ ore i aixcŮma ixŮxŮ, rŮ ngĕxgumarŮŮ ta pexŮ nangechaŮgŮ. ² PexŮ tangechaŮ erŮ toxrŮŮ nŮxŮ pecuĕxgŮ i ngĕma ore i aixcŮma ixŮxŮ i guxŮgutáma tawa ngĕxmaxŮ. ³ RŮ nŮma ya TanatŮ ya Tupana rŮ Nane ya Ngechuchu ya Cristu rŮ poraácŮ tá pexŮ narŮngŮxĕĕgŮ rŮ nŮxŮ pengechaŮtŮmŮŮgŮ rŮ pexŮ nataaĕxĕĕgŮ, erŮ nŮxŮ pecuĕx i ngĕma ore i aixcŮma ixŮxŮ rŮ pegŮ pengechaŮgŮ. ⁴ RŮ poraácŮ chataaĕ ga yexguma nŮxŮ chadĕuxgu na űuxácŮ űuxre i petanŮxŮgŮ rŮ aixcŮma meā naga na naxŮnŮxŮ i ngĕma ore i aixcŮma ixŮxŮ, yema TanatŮ ya Tupana tŮxŮ muxŮrŮŮ. ⁵ RŮ űuxmax, Pa ChaueneĕgŮ ya PexŮ ChangechaŮgŮxex, rŮ pexna nŮxŮ chacuĕxāchixĕĕ na namexŮ na yigŮ ingechaŮgŮxŮ. RŮ ngĕma rŮ tama wŮxi i ngexwacaxŮxŮ i TupanaárŮ mu nixŮ. NatŮrŮ yematama nixŮ ga mu ga noxriarŮ ŮgŮgumama Tupana tŮxna āxŮ. ⁶ Ngĕxguma TupanaxŮ ingechaŮgŮgu, rŮ tanaxŮ i guxŮma i ngĕma tŮxŮ namuxŮ. ErŮ nŮma rŮ noxriarŮ ŮgŮgumama tamaā nŮxŮ nixu na yigŮ ingechaŮgŮxŮcĕx i wŮxichigŮ.

OrearŮ uruŮgŮ i womŮxĕĕruŮchiga

⁷ GuxŮwama i űoma i naānewa rŮ nanaxŮāne i muxŮma i womŮxĕĕruŮgŮ ixŮgŮxŮ. RŮ nŮxŮ nixuchigagŮ na tama Tupana duŮxŮxŮ yaxŮxĕĕxŮ ga Ngechuchu ya Cristu. RŮ ngĕma ngĕmaācŮ idexaxŮ, rŮ wŮxi i womŮxĕĕruŮ nixŮ, rŮ CristuarŮ uwanŮ nixŮ. ⁸ ¡pexuāĕgŮ na taxŮema pexŮ womŮxĕĕgŮxŮcĕx rŮ na tama natŮcĕxma yŮxŮcĕx i tŮrŮ puracŮ! ¡NatŮrŮ meā peyaxŮgŮama na aixcŮma penayaxuxŮcĕx i guxŮma i ngĕma Tupana pexna āxchaŮxŮ! ⁹ RŮ yŮxema nangupetŮxĕĕxĕ ga yema Cristu tŮxŮ ngŮxĕĕxŮ, rŮ tama aixcŮma TupanaxŮ tacuĕx. NatŮrŮ yŮxema tama nŮxna ŮchoxŮxĕ ga yema Cristu tŮxŮ ngŮxĕĕxŮ, rŮ aixcŮma nŮxŮ tacuĕx ya TanatŮ ya Tupana rŮ Nane ya Ngechuchu. ¹⁰ RŮ ngĕxguma chi wŮxi i duŮxŮ petanŮwa nguxgu rŮ tama yema Cristu tŮxŮ ngŮxĕĕxŮmaā pexŮ nangŮxĕĕgŮ, rŮ ¡tāŮtāma penayaxu i pechiŮwa rŮ bai i nŮxŮ perŮmoxĕgŮ! ¹¹ ErŮ ngĕxguma wŮxie tŮmachiŮwa nayauxgu, rŮ tananaāĕraxŮ rŮ natanŮxŮ tŮgŮ tixŮxĕĕ nawa i ngĕma norŮ chixexŮ.

CuáŮárŮ ore ga nawa iyacuáxŮ

¹² ChoxŮ nangĕxma i muxŮma i to i ore i pemaā nŮxŮ chixuxchaŮxŮ. NatŮrŮ tama chanaxwĕxe na űāa poperawa pemaā nŮxŮ chixuxŮ, erŮ paxa tá petanŮwa ŮchayadauxchaŮ na chomatama pemaāxŮchi nŮxŮ chixuxŮcĕx na ngĕmaācŮ wŮxigu aixcŮma itaāĕgŮxŮcĕx. ¹³ RŮ ngĕma nuā natanŮwa changĕxmaxŮ i yaxŮgŮxŮ i peeneĕgŮ ixŮgŮxŮ i Tupana dexŮ, rŮ pexŮ narŮmoxĕgŮ. RŮ ngĕxŮcatama nixŮ i chorŮ ore i pemaā nŮxŮ chixuxŮ.

RŮ nuāma pexna,
CuáŮ

NORŨ TOMAĒXPŨX GA POPERA GA CUÁŨ ŨMATŨXŨ

CuáŨ rŭ Gayumaã nataãẽ

¹ Pa Chaueneẽ, Pa Gayu i Aixcũma Cuxũ Changechaũxẽx, rŭ cuxcẽx chanaxũmatũ i choma i CuáŨ i yaxõgũxũãrũ ãẽxgacũ na chiĩxũ. ² Pa Chaueneẽx, Tupanana chaca na meã cuxna nadauxũcẽx i curũ maxũwa rŭ cuxunewa, ngẽma curũ õwa cuxna na nadauxũrũ. ³ Rũ poraãcũ chataãẽ ga yexguma nũma naxĩxgu ga ñuxre ga taeneẽgũ, rŭ chomaã nũxũ yaxugũga ga cuchiga na ñuxãcũ meã cuyaxõxũ i Tupanaãrũ ore i aixcũma ixĩxũ, rŭ guxũguma meã naga na cuxĩnũxũ. ⁴ Rũ guxũguma chataãẽxũchi i ngẽxguma nũxũ chaxĩnũgu na ñuxãcũ Tupanaãrũ ore nũxũ ixuxũãcũma meã namaxẽxũ i chauxacũgũ. Rũ aixcũma nataxuma i to i taãẽ i ngẽmaãrũ yexera ixĩxũ. ⁵ Pa Chaueneẽ i Cuxũ Changechaũxẽx, mexũ cuxũ erũ nũxũ curũngũxẽẽ i ngẽma togũ i taeneẽgũ i toxnamana ne ãxũ i cuxũtawa ngugũxũ. ⁶ Rũ nũmagũ rŭ nuã nangugũ, rŭ torũ ngutaquẽxepataũwa nũxũ nixugũe na ñuxãcũ nũxũ cungechaũxũ rŭ namaã cumecũmaxũ. Rũ chanaxwẽxe i nũxũ curũngũxẽẽ i ngẽma taeneẽgũ i ngẽxguma wena cuxũtawa nangugũgu. Rũ ngẽxguma cuxna iyaxĩxgu rŭ ñũxna naxã i tacũ i nũxũ taxuxũ i norũ namawaũ! Erũ Tupanaãrũ me nixĩ na ngẽmaãcũ nũxũ rũngũxẽẽxũ i norũ orearũ uruũgũ. ⁷⁻⁸ Rũ nũmagũ, rŭ Ngechuchu ya Cristuarũ puracũ nixĩ i naxũgũxũ, rŭ ngẽmacẽx norũ oremaã nanaxĩãne. Natũrũ tama nanayauxgũ i ngẽma tama yaxõgũxũãrũ ngũxẽẽ, rŭ ngẽmacẽx name nixĩ i yixema na nũxũ rũngũxẽẽgũxũ na ngẽmaãcũ yixema rŭ ta wũxigu namaã naxũgũxũcẽx i Tupanaãrũ puracũ.

Diõtepe rŭ chixexũ naxũ natũrũ Demẽtriu rŭ mexũ naxũ

⁹ Choma rŭ marũ chanaxũmatũ i wũxi i popera naxcẽx i ngẽma tupaucatanũũgũ i curũ ããnewa ngẽxmagũxũ. Natũrũ nũma i Diõtepe rŭ tama naga naxĩnũchaũ i ngẽma nũxũ tixuxũ, erũ nanaxwẽxe na nũmatama namuãxũ i ngẽma tupaucatanũxũ. ¹⁰ Rũ ngẽxguma ngẽma chaxũxgu rŭ tá nũxũ chaxõregũ erũ tochiga i chixexũmaã inayarũdexanexũ. Rũ woo tomaã na ngexũ nawagũxũ, rŭ naetũwa to i chixexũ naxũ, erũ tama nanayauxchaũ i ngẽma taeneẽgũ i ngẽma ngugũxũ. Rũ nanachũxu na texẽ nayaxuxũ i ngẽma taeneẽgũ. Rũ yixema nayauxchaũxẽ, rŭ ngutaquẽxepataũwa tũxũ ãnawoxũ. ¹¹ Pa Chaueneẽ i Cuxũ Changechaũxẽx, jTãxũ i nũxũ cuyadauxũxũ i ngẽma togũ i chixexũ ũgũxũ! Natũrũ name nixĩ i nũxũ cuyadauxũ i ngẽma mexũ ũgũxũ. Erũ yixema guxũguma mexũ ũxe rŭ Tupanaxãcũ tixĩ. Natũrũ yixema chixexũ ũechaxe rŭ tama Tupanaxũ tacuẽx. ¹² Guxũma i duũxũgũ nũxũ ixuxgu i Demẽtriu rŭ wũxi ya mecũ nixĩ. Rũ toma rŭ ta nũxũ tacuẽx na meã naga naxĩnũxũ i Tupanaãrũ ore i aixcũma ixĩxũ. Rũ ngẽmacẽx rŭ ta nũxũ tixu na aixcũma mecũ yĩxũ. Rũ cuma nũxũ cucuẽx na aixcũma na yĩxũ i ngẽma nũxũ tixuxũ.

CuáŨãrũ ore ga nawa iyacuãxũ

¹³ Choma choxũ nangẽxmachirẽx i muxũma i chorũ ore i cumaã nũxũ chixuxchaũxũ, natũrũ tama ñãã poperagu cuxcẽx chanaxũmatũchaũ. ¹⁴ Erũ choma rŭ paxa ngẽma chaxũxchaũ, rŭ ngẽxguma rŭ meã tá yigũmaã tidexagũ.

¹⁵ ¡Meã cuxŦ naxŦpetŦ rŦ tãxŦ i cuxoegaãẽxŦ! TamŦcŦgŦ i númacŦãx rŦ moxẽ cuxcẽx ngema namugŦ. RŦ chanaxwẽxe i nŦxŦ curŦmoxẽ i wŦxichigŦ i tamŦcŦgŦ i ngema ngẽxmagŦxŦ. RŦ ngẽxĩcatama nixĩ i chorŦ ore i cumaã nŦxŦ chixuxŦ.

RŦ nuãma cuxna,
CuãŦ

POPERA GA YUDA ÜMATÜXÜ

Yema yaxōgūxūxū narūmoxē ga Yuda

¹ Pa Yaxōgūxū i Guxūwama Ngēxmagūxūx, choma i Yuda nixī i pexcēx chanaxūmatūxū i ñaā popera. Rū choma nixī i Chaūtiágueneē chiixū, rū Ngechuchu ya Cristuarū duūxū chixi. Rū pexcēx chanaxūmatū i pema na Tanatū ya Tupana pexū dexū rū pexū ngechaūxū rū Ngechuchu ya Cristu pexna dauxū. ² Rū pexcēx chayumūxē na guxūguma Tupanaāxū pengechaūtūmūgūxūcēx, rū pexū nataāxēgēgūxūcēx, rū pexū nangechaūxūcēx.

Duūxūgū i doramaā ngūxēētaegūxūchiga

³ Pa Chaueneēgū ya Pexū Changechaūgūxex, noxri rū poraācū choxū nangūchaū na pexcēx chanaxūmatūxū nachiga i ngēma maxū i taguma gūxū i tūxū ngēxmaxū. Natūrū ñuxma na petanūgu nachocuxū i ñuxre i duūxūgū i íyatoxēēgūchaūxū i Tupanaārū ore, rū ngēmacēx chanaxwēxe na pexcēx chanaxūmatūxū na pexū chaxucūxēxūcēx rū ípenapoxūxūcēx i ngēma ore i aixcūma íxūxū ga nuxcūma wūxicanatama Tupana norū duūxūgūna āxū. ⁴ Rū ngēma duūxūgū i pexū nawomūxēēācūma petanūgu chocuxū nixī i pexū ngūxēēxū rū ñaxū:

“Tupana rū namecūmaxūchi rū ngēmacēx tāūtāma pexū napoxcue ega woo chixri pemaxēgu”, ñaxū. Rū ngēxgumarūū ta tama nūxū nacuēxgūchaū ya tórū Cori ya Ngechuchu ya Cristu ya tórū yora íxīcū. Natūrū ngēma duūxūgū i ngēmaācū maxēxū, rū woetama nuxcūmama Tupanaārū ore i ūmatūxūwa rū marū nūxū nixu na Tupana tá napoxcuxū. ⁵ Rū woo na marū nūxū pecuáxū natūrū pexna nūxū chacuēxāchixēēchaū na ñuxācū namaā nangupetūxū ga yema nuxcūmaūgūxū ga Yudūgū ga Moíchéwe rūxīxū. Rū tórū Cori ya Tupana rū poraācū nūxū narūngūxēē na Equituanewa ínanguxūxūcēx, natūrū yixcama rū nanadai ga yema tama naga ínūēchaūxū. ⁶ Rū ngēxgumarūū ta pexna nūxū chacuēxāchixēē na ñuxācū namaā nangupetūxū ga yema daxūcūāx ga orearū ngeruūgū ga noxri íxūūnechirēxū natūrū yixcama nagatama pecadu ūgūxū. Rū yemacēx ga Tupana rū ēānēxūma nanawogū, rū ngēma nanapoxcue ñuxmatāta nawa nangu i ngēma ngunexū i nagu tūxū yacagūxū. ⁷ Rū yexgumarūū ta nūxū nangupetū ga guma íānegū ga Chodoma rū Gomora rū guma íānegū ga norū ngaicamagugūne. Yerū guma íānegūāxgū, rū poraācū chixri nūgūmaā namaxē, rū yemacēx ga Tupana rū ūxūmaā ínanagu. Rū yemaācū inayanaxoxēē ga guma íānegū na yemawa tūxū nūxū nacuēxēēxūcēx na nangēxmaxū i wūxi i poxcu naxcēx i guxūma i ngēma chixexū ūgūxū. ⁸ Natūrū woo ngēmaxū na nacuēxgūxū i ngēma idoraexū i petanūgu chocuxū, natūrū norū chixexūgu narūxīnūēāma. Rū poraācū chixri nūgūmaā namaxē, rū tama tórū Cori ya Tupanaga naxīnūēchaū, rū chixri Tupanaārū orearū ngeruūgū i daxūcūāxchigagu nidexagū. ⁹ Rū ngēma duūxūgū rū naēchitamare nidexagū rū tama Tupanaārū orearū ngeruū ga Miguérerūū nūgūna nadau i norū orewa. Rū guma Miguére rū woo guxū i Tupanaārū orearū ngeruūgū i daxūcūāxārū āēxgacū na yīixū, natūrū tama ngoxo ga Chatanāmaā naguxchiga ga yexguma Moíchéxūnecēx yēma nūgūmaā yaporagatanūcūxgu, na nūxū nacuēxgūxūcēx na texearū tá yīixū ga Moíchéxūne. Natūrū nūma ga Miguére rū ínanagūrūmare:

“Cori ya Tupana tá cuxü nanga”, ñanagürümare. ¹⁰ Natürü ngëma duüxügü i doramaã i petanügu chocuxü, rü tama Tupanaxü nacüxgüäcuma chixri nachiga nidexagü, rü chixri norü orearü ngeruügü i daxücläxchiga nidexagü. Rü ñoma naëxügürüü naxünearü ngüchaüwemare narüxi, rü ngëmaäcü namaxë. Natürü ngëma chixexü i naxügüxcëx, rü Tupana tá nanapoxcue. ¹¹ Rü wüxi i ngechaüxüchi nixi naxcëx i ngëma duüxügü erü ngëmaäcü namaxë. Rü Cai ga naëneëxü imáxürüü nixigü. Rü äëxgacü ga Baráürüü dïerucëx chixexü naxügü. Rü Corërüü tama Tupanaga naxinüëchaü, rü ngëmacëx Tupana tá nanapoxcue. ¹² Rü ngëxguma tupaucawa tóru Coriarü ðnacëx pengutaquëxëgügu, rü wüxi i änexüchi nixigü. Erü narücutanüxü, rü poraäcü nachibüe rü naxaxegü, rü nügüguxicatama narüxinüë. Rü ñoma caixanexü i ngearü pucüäxü i paanexüetüwa üpetüxü natürü tama nanetüxü ixaiyagüxürüü taxuwama nime. Rü ngëma nanetügü i ngëxguma norü owa nanguxgu rü tama ixoxürüü nixigü. Rü ñoma naigü i guxüma i naxchümëxämaã napuxü rü yuxuchixürüü taxuwama nime i ngëma duüxügü. ¹³ Rü ñoma yuape i taxü i norü chixixü i äüächixü naxänacüwa yataxürüü nixigü, erü poraäcü chixexü naxügü. Rü ñoma woramacurigü ya nu ne naxïmarecürüü nixigü. Natürü Tupana rü marü namaã nanaxuegu na ngëma waanexüchixüwa guxügutáma nawogüäxü. ¹⁴⁻¹⁵ Rü nuxcümaücü ga Enó ga Adáütaa ixicü rü ngëma duüxügüchiga nidexa ga yexguma Tupana yadexaxëëgu, rü ñanagürü: “Rü nüxü chadau ya Cori ya Tupana na muxüchixü i norü orearü ngeruügü i daxücläxmaã núma ücü na duüxügüna naçaxüxcëx i norü maxüchiga rü napoxcueäxüxcëx i guxüma i ngëma duüxügü i chixexü ügüxü rü namaã guxchigagüxü”, ñanagürü. ¹⁶ Rü ngëma duüxügü rü ñacüxcëx idexagüwëxexüchixü nixigü, rü toguäxü ixuxwëxëgüxüchixü nixigü. Rü noxrütama ngüchaüxcëx daugüxü nixigü. Rü nügü icuëxüügüxü nixigü. Rü nümaxü meã tümachiga nidexagünetä ya duüxëgü, na tümaxütawa ñacü na nayauxgüxüxcëxmare.

Yuda nayaxucüxëgü ga yema yaxögüxü

¹⁷ Pa Chaueneëgü ya Pexü Changechaügüxex, jñuxna pecuëxächie ga yema ore ga pemaã nüxü yaxugügüxü ga tóru Cori ya Ngechuchu ya Cristuarü ngüxügü ga imugüxü! ¹⁸ Rü nümagü rü ñanagürügü pexü: “Ngëxguma nagüxchaügu i naäne rü tá nangëxma i duüxügü i tá nüxü cugüexü i Tupanaärü ore rü noxrütama ngüchaü i chixexügumare maxëxü”, ñanagürügü pexü. ¹⁹ Rü ngëma duüxügü nixi i pexü itoyexü na tama wüxigu perüxinüëxüxcëx rü tama meã peyaxögüxüxcëx. Rü nümagü rü naxünearü ngüchaüwe narüxi, rü tama nawa nangëxma i Tupanaãe i Üünexü. ²⁰ Natürü pema, Pa Chaueneëgü ya Pexü Changechaügüxex, jrü pegü perüngüxëëx na guxüguma yexeraäcü nagu pexixü rü peyaxögüxü i ngëma ore i üünexü i marü peyaxgüxü! jrü guxüguma Tupanaãe i Üünexüärü ngüxëemaã peyumüxëgü! ²¹ jrü guxüguma nagu pexi i ngëma Tupanaärü ngechaxü! jrü meã ipenangüxëëx i ngëma ngunexü i nagu tá núma naxüxü ya tóru Cori ya Ngechuchu ya Cristu na nüxü ingechaütümügüäcuma tüxna naxäaxüxcëx i maxü i taguma güxü! ²² jrü pexü nangechaütümügü i ngëma tama aixcüma yaxögüxü, rü nüxü perüngüxëëgü na meã yaxögüäxüxcëx! ²³ Rü togü, jrü paxa norü pecaduwa ipenayaxuchi na namaxëxüxcëx rü tama yima üxü ya Tupana mexënegu yanatauxexüxcëx! Rü woo ngëma tama yaxögüchaüxü, jrü

pexũ nangechaũtũmũũgũ! ¡Natũrũ pegũna pedaũgũ na tama norũ chixexũgu peyixũcèx! Rũ ngẽma norũ chixexũ i pexcèx mexcũraxũxũ, ¡rũ nũxũ pexo!

Tupanaxũ yacuèxũũãcũma inayacuèxẽẽ ga norũ popera

²⁴⁻²⁵ Rũ yima wũxitama ya Tupana ya tórũ Maxẽẽẽruũ ixĩcũ, rũ nũxũ nangẽxma i pora na pexna nadauxũcèx na tama pecaũdugu peyixũcèx. Rũ nũxũ nangẽxma i pora na iyanaxoxẽẽãxũcèx i guxũma i perũ chixexũgũ na petaãẽgũãcũma nũgũpẽxewa pexũ nagagũxũcèx i ngextá ãẽxgacũ iyĩxũwa. Rũ ngẽmacèx tanaxwèxe i tórũ Cori ya Ngechuchu ya Cristuégagu Tupanaxũ ticuèxũũgũ, erũ nũma rũ guxũãrũ yexera name rũ napora, rũ guxũtũwa nangẽxma, rũ guxũmaã inacuèx. Rũ yemaãcũ nixĩ ga nuxcũmaxũchima, rũ ngẽmaãcũ nixĩ i ñuxmax, rũ guxũgutãma ngẽmaãcũ yĩ.

Rũ nuãma pexna,
Yuda

YEMA CUÁÜ NÜXÜ DAUXÜ I YIXCÜRA TÁ NGUPETÜXÜCHIGA

Ore ga Cuáüxü nüxü nacuèxêxü ga Ngechuchu ga Cristu

¹ Ñãã nixi i ngêma ore ga Tupana Ngechuchu ya Cristuxü nüxü cuèxêxü na nüxi norü duüxügüxü nüxü nacuèxêxücèx i ngêma paxa tá ngupetüxü. Rü nüma ga Ngechuchu ya Cristu nixi ga norü orearü ngeruü ga daxüçüâxü namuxü na norü duüçü ga Cuáümaã nüxü na yaxuxücèx. ² Rü choma i Cuáü chixi ga aixcüma meãma nüxü chadauxü rü chanaxümatüxü ga guxüma ga yema Tupanaãrü ore ga Ngechuchu chauxcèx ngoxêxü. ³ Rü tataãe ya yixema duüxügüpêxewa nawa ngúxe i ñãã Tupanaãrü ore, rü ngêxgumarüü ta tataãegü ya yixema nüxü ñnüxè rü naga ñnüxè i ñãã ore i ümatüxü, erü paxa tá ningü i ngêma nüxü yaxuxü.

Cuáü nanaxümatü naxcèx ga yema 7 tücumü ga yaxögüxü ga Áchiaanewa yexmagüxü

⁴ Rü choma i Cuáü rü chanaxümatü i ñãã ore pexcèx i yaxögüxe ya yima 7 ya ñãne ya Áchiaarü naãnewa ngêxmagünewa ngêxmagüxe. Rü chanaxwêxe i pexü narüngüxêe rü pexü nataãêxêe ya yima Tupana ya woetama ngêxmaêchacü. Rü ngêxgumarüü ta chanaxwêxe i pexü narüngüxêe rü pexü nataãêxêe i ngêma Naãe i Üünexü i naxütawa ne üxü i perü dauruü ixixü i pema i yaxögüxe ya yima 7 ya ñãnewa na pengêxmagüxü. ⁵ Rü ngêxgumarüü ta chanaxwêxe na pexü nangüxêxü rü pexü nataãêxêxü ya Ngechuchu ya Cristu ga aixcüma meãma nüxü ixucü ga Tupanaãrü ore ga ñoma ga naãnewa. Rü nüma nixi ga nüxira yuwa ñnadaxü. Rü nüma rü guxüma i ñoma i naãnewa ngêxmagüxü i nachüñãneãrü ãëxgacügüarü ãëxgacü nixi. Rü nüma rü tüxü nangechaü, rü nagümaã tüxü inayanaxoxêe i tóru pecadugü. ⁶ Rü ñuxma na guxüarü ãëxgacü yixü i nümax, rü tüxü naxüchica i ngextá nüma ãëxgacü íyixüwa. Rü paigüxü tüxü nixigüxêe na Nanatü ya Tupanaãxü ipuracüexücèx rü nüxü icuèxüügüxücèx. Rü name nixi i guxügutáma Cristuxü ticuèxügü, erü nüma rü guxügutáma guxüarü ãëxgacü nixi. Rü ngêmaãcü yii. ⁷ ;Rü dücax, marü ningaica na chaixanexügu ñanguxü ya Cristu! Rü guxütáma i duüxügü nüxü nadau, rü woo ga yema nacanapacütüügüxü rü tá ta nüxü nadaugü. Rü guxü i duüxügü i guxü i nachüñãnecüâx i tama yaxögüxü rü norü muümaã rü norü ngechaümaã tá naxauxe i ngêxguma ñanguxgu i nümax. Rü aixcüma ngêmaãcü tá nixi. ⁸ Rü nüma ya tóru Cori ya Tupana ya guxüarü ãëxgacü ixicü ya woetama ngêxmaêchacü, rü ñanagürü:

“Chowa nixi ga inaxügüxü ga guxüma, rü nataxuma i tacü i chorü yexera ngêxmaêchaxü”, ñanagürü.

Cuáüçèx nangox ga Cristu ya mexêchicü

⁹ Rü choma i Cuáü na pexcèx chanaxümatüxü i ñãã popera, rü peeneê chixi. Rü ngêma na Ngechuchuna na chaxüxü rü chaxüchica i ngextá nüma ãëxgacü íyixüwa. Rü Ngechuchucèx pexrüü ngüxü chinge, natürü nüma pexü naporaxêxêxü rü choxü naporaxêe na yaxna namaã chaxüñüxücèx i guxüma i ngêma ngüxü i choxü üpetüxü. Rü choma rü capaxü ga Pátmugu chapoxcu naxcèx na nüxü chixuxü ga Tupanaãrü ore ga Ngechuchuchiga.

10-11 Rû wûxi ga yûxûarû ngunexûgu rû Tupanaãe i Ûünexû chomaã inacuèx, rû changoxetû rû choweama nûxû chaxînú ga wûxi ga naga ga tagaxû ga ñoma cornetagarûú ixîxû ga ñaxû choxtû:

“Choma nixî ga inaxûgûxû ga guxûma, rû nataxuma i ñacû i chorû yexera ngêxmaèchaxû. Rû ñuxma chanaxwêxe na wûxi i poperagu cunaxûmatûxû i ngêma nûxû cudauxû. Rû ñuxûchi chanaxwêxe i ngêma yaxôgûxû ya yima 7 ya îâne ya Áchiaarû naãnewa ngêxmagûnewa ngêxmagûxûtanûwa cunamu. Rû yima 7 ya îâne nixî ya Epéchiu rû Esmira rû Pérgamu, rû Tiatíra rû Chardi rû Firadérfia rû Laodichéa”, ñanagûrû. ¹² Rû chaugû ichidau na nûxû chacuáxûcèx na ñacû yîixû ga yema chomaã idexaxû. Rû yexguma chaugû ichidèuxgu rû nûxû chadau ga 7 ga weraarû úruúgû ga uirunaxcèx ixîgûxû. ¹³ Rû yema 7 ga weraarû úruúgûarû ngâxûtanûwa nûxû chadau ga wûxi ga duûxû ga chauxcèx nangechuchu ga duûxûxû ixîcûraûxû. Rû wûxi ga naxchiru ga máxûmaã naxâxchiru. Rû wûxi ga goyexû ga uirunaxcèxmaã nigoyeremû. ¹⁴ Rû nayaè rû nachoxochi ñoma ñacû i choxochixûrûú. Rû naxétû rû ñoma úxûemarûú niyauracûú. ¹⁵ Rû nacutû rû ta niyauracûú ñoma cobrexûchi i meãma ípixûrûú. Rû yexguma yadexagu rû natagaxûchi ñoma taxû i dexâ i chuxchuxû ágaxûrûú. ¹⁶ Rû norû tûgûnemèxêwa nûxû nayexma ga 7 ga woramacurígû. Rû naãxwa nayexma ga wûxi ga tara ga guxûcûwawa téxû. Rû nachiwe rû ñoma úèxcû poraãcû nguxetûgurûú nixî. ¹⁷ Rû yexguma nûxû chadèuxgu, rû napèxegu chayangu ñoma chayuxûrûú. Natûrû ga nûma rû norû tûgûnemèxêmaã choxtû ningôgû, rû ñanagûrû choxtû:

“¡Tãxû i cumuûxû! Choma nixî i chaxira chayexmaxû rû guxûgutáma changêxmaèchaxû. ¹⁸ Rû choma nixî i yuwa ícharûdaxû rû ñuxma rû chamaxû. Rû úpa rû chayû, natûrû i ñuxma rû marû guxûgutáma chamaxêcha. Rû choxmèxwa nangêxma na ñuxgu tá nayuxû i wûxichigû i duûxû. Rû ngêxgumarûú ta choma nixî i namaã ichacuáxû i ngêma nachica i ngextâ ínangêxmagûxûwa i guxûma i duûxûgû i yuexû. ¹⁹ Rû ñuxma rû chanaxwêxe i cunaxûmatû i ngêma nûxû cudauxû. Rû ngêma nixî i ñuxma ngêma yaxôgûxûmaã ngupetûxû, rû ngêma yixcûra tá ngupetûxû. ²⁰ Rû ñuxma rû tá cuxcèx chanangoxêè i ngêma èxûguxû i ngêma 7 i woramacurígû i chorû tûgûnemèxêwa nûxû cudauxûchiga rû ngêma 7 i weraarû úruúgû i uirunaxcèxchiga. Rû ngêma 7 i woramacurígû i nûxû cudauxû, rû ngêma àèxgacûgû i ngêma 7 tûcumû i yaxôgûxûtètuwa ngêxmagûxûchiga nixî. Rû ngêma 7 i weraarû úruúgû rû ngêma 7 tûcumû i yaxôgûxû i yima 7 ya îãnewa ngêxmagûxûchiga nixî”.

2

Ore ga yema 7 tûcumû ga yaxôgûxûcèx ûmatûxû Ore ga yema yaxôgûxû ga Epéchiuarû íãnewa yexmagûxûcèx ûmatûxû

¹ “Rû ñuxma chanaxwêxe i ngêma Epéchiuwa ngêxmagûxû i yaxôgûxûârû àèxgacûcèx cunaxûmatû, rû ñacurûgû nûxû: ‘Ñaa nixî i norû ore ya yima ngêma yaxôgûxûtanûgu yarûxûúúcû rû norû tûgûnemèxêmaã nûxna daucû i ngêma yaxôgûxûârû àèxgacûgû’.” ² Rû ñanagûrû i nûmax:

‘Choma nûxû chacuèx i guxûma i ngêma cuxuxû. Rû nûxû chacuèx na ñuxâcû poraãcû choxtû cupuracûxû rû ñuxâcû cunaxûamaxû i ngêma puracû woo ngêmacèx muxûma i guxchaxûgû cuxcèx ínguxgu. Rû nûxû chacuèx na tama curû me yîixû i ngêma duûxûgû i chixexû úgûxû. Rû ngêxgumarûú ta nûxû chacuèx na meã cunangugûarû maxûãxû i ngêma duûxûgû i nûgû

ixugüxü na Tupana imugüxü yixigüxü natürü tama aixcüma ixigüxü na Tupana yamugüxü. Rü cuma rü nüxü cucuëxama na idoratëëxmaregüxü yixigüxü. ³ Rü woo naguxcha i ngëma puracü i chauxcëx cuxüxü, natürü cunaxüama. Rü woo chaugagu poraäcü ngüxü na quingexü, natürü yaxna namaä cuxinü, rü tama nüxü curüchaw. ⁴ Natürü nangëxma i wüxi i cuxüxü i tama chorü me ixixü. Rü ngëma nixi na tama noxrirüü choxü cungechaxü i ñuxmax. ⁵ Rü ngëmacëx i ñuxma na ngëma chixexügu cunguxü, rü name nixi i nüxna cucuëxächi na ñuxäcü choxü cungechaxü ga noxrix. Rü name nixi i nüxü curüxo i curü chixexü rü noxrirüü choxü cungechaxücumëx cuxü. Natürü ngëxguma chi tama nüxü curüxoxgu i curü chixexü, rü paxa tá cuxü ichayadaw, rü tá cuxü chaxo na tama ngëma togü i yaxögüxütanüwa cuxächicaxücëx. ⁶ Natürü nangëxma i wüxi i cuxüxü i chorü me ixixü. Rü ngëma nixi na naxchi cuxaixü i ngëma chixexü i naxügüxü i ngëma Nicoraitagü. Rü choma rü ta naxchi chaxai i ngëma chixexü i naxügüxü. ⁷ Rü yixema ächixexë rü name nixi i naga taxinü i ngëma Tupanaäe i Üünexü nüxü ixuxü namaä i ngëma yaxögüxütücumügü”. Rü ñanagürü:

“Yixema nüxü rüporamaëxë i chixexü rü tá tüxü nüxü chamuxnetaxëë i norü o i ngëma orix i tüxü maxëxëxü i Tupanaärü orixnecüwa ngëxmaxü”, ñanagürü i Naäe i Üünexü.

Ore ga yema yaxögüxü ga Esmiraarü ñanewa yexmagüxülcëx ümatüxü

⁸ Rü yema chomaä idexaxü rü ñanagürü ta:

“Chanaxwëxe i Esmirawa ngëxmagüxü i yaxögüxüärü äëxgacücëx cunaxümatü, rü ñacurügü tá: ‘Ñaa nixi i norü ore ya yima nüxira yexmacü rü guxüguma ngëxmaëchacü ga paxaächi yucü rü wenaxarü maxücü’. ⁹ Rü ñanagürü i nümax:

‘Choma nüxü chacuëx i guxüma i ngëma cuxüxü. Rü nüxü chacuëx na ñuxäcü ngüxü quingexü. Rü nüxü chacuëx na cungearü diëruäxü i ñoma i naänewa, natürü daxüguxü i naänewa cuxü nangëxma i ngëma taguma güxü. Rü nüxü chacuëx na ñuxäcü chixri cuchiga yadexagüxü i ngëma duüxügü i nügü ixugüxü na Yudiügü yixigüxü. Natürü i nümagü rü aixcüma Chatanaärü duüxügümare nixigü. ¹⁰ Rü täxü i cumuüxü naxcëx i ngëma ngüxü i tá quingexü! Rü ngoxo i Chataná rü tá norü duüxügüxü namu na poxcupataügu pexü napoxcuëxücëx i ñuxre i pema na ngëmaäcü pexü naxüxücëx. Rü ñuxre i ngunexü tá ngüxü pingegü. Natürü woo ngëmaäcü ngüxü pingegügu rü chanaxwëxe i choxü cuyaxööma ñuxmatáta cuyux. Rü choma rü tá cuxna chanaxä i curü ämare i maxü i taguma güxü’. ¹¹ Rü yixema ächixexë rü name nixi i naga taxinü i ngëma Tupanaäe i Üünexü nüxü ixuxü namaä i ngëma yaxögüxütücumügü”. Rü ñanagürü:

“Yixema ñoma i naänewa nüxü rüporamaëxë i chixexü, rü täütáma Tupana ngoxogüxü ipoxcuëxüwa tüxü nawogü”, ñanagürü i Naäe i Üünexü.

Ore ga yema yaxögüxü ga Pérgamuärü ñanewa yexmagüxülcëx ümatüxü

¹² Rü yema chomaä idexaxü rü ñanagürü ta:

“Chanaxwëxe i Pérgamuwa ngëxmagüxü i yaxögüxüärü äëxgacücëx cunaxümatü, rü ñacurügü tá: ‘Ñaa nixi i norü ore ya yima nüxü nangëxmacü i ngëma tara i guxücwawaxü téxü’. ¹³ Rü ñanagürü i nümax:

‘Choma nüxü chacuëx na yima ñane ya Chataná poraäcü namaä ícuáxünewa na cumaxüxü. Natürü woo ngëxma na cuxächixüxü, rü tama choxü ícutëx. Rü woo yexguma chorü orearü uruü ga mecü ga Atipaxü

yamèxgügu nagu ga guma ñâne ga nawa Chataná duñxügümaã ícuáxüne, rü tama nüxü curüxo na choxü cuyaxõõmaxü. ¹⁴ Natürü nangëxma i ñuxre i ñacü i cuyüxü i tama chorü me ixixü. Rü ngëma nixí na cugüxütawa cunangëxmagüxëxü i ñuxre i curü duñxügü i tama nüxü rüxoechaüxü i ngëma nguxëetae ga nuxcüma Baráü Yudiügüarü äëxgacü ga Baráxü namaã ucuxëxü na chixexügu Yudiügüxü nayixëxütçëx. Rü yema Yudiügü rü yema ucuxëgagu nawa naxí ga yema petagü ga togü ügüxü naxcëx ga norü tupananetachicünëxägü. Rü yexgumarüü ta yema ucuxëgagu nixí ga naí ga ngemaã namaxëxü ga Yudiügü. Rü ñuxma i ñuxre i curü duñxügü i Pérgamuwa ngëxmagüxü rü nagu naxí ga yema nuxcümaüxü ga nguxëetae ga chixexü, rü tama nüxü narüxoechaü. ¹⁵ Rü ngëxgumarüü ta ngema cunangëxmagüxëe i ñuxre i duñxügü i tama nüxü rüxoechaüxü i ngëma Nicoraitagüarü nguxëetae i Baráüarü nguxëetaeruü chixexü. ¹⁶ Rü ngëmacëx chanaxwëxe i nüxü curüxo i ngëma chixexü. Rü ngëxguma chi tama nüxü curüxoxgu, rü paxa tá ngema cuxütawa chaxü rü ngëma tara i chauëxwa ngëxmaxümaã tá ngëma duñxügüxü chadai'. ¹⁷ Rü yíxema ächixëxë rü name nixí i naga taxínü i ngëma Tupanaãe i Üünexü nüxü ixuxü namaã i ngëma yaxõgüxütücumügü". Rü ñanagürü:

"Yíxema nüxü rüporamëxë i chixexü rü tá tüxna chanaxä i päü i daxücüñax. Rü tá tüxna chanaxä ya wüxi ya nuta ya chócü i wüxi i naëga i ngexwacaxüxü nagu ümatüxü. Rü yíxema nayaxuxecatama tixí ya nüxü cuáxe i ngema naéga", ñanagürü i Naãe i Üünexü.

Ore ga yema yaxõgüxü ga Tiatíraarü ñañewa yexmagüxüçëx ümatüxü

¹⁸ Rü yema chomaã idexaxü rü ñanagürü ta:

"Chanaxwëxe i Tiatírawa ngëxmagüxü i yaxõgüxüarü äëxgacüçëx cunaxümatü, rü ñacurügü tá: 'Ñañ nixí i norü ore ya yima Tupana Nane ya ñoma üxüemaruü iyauraxetüçüçü rü nacutügü rü ñoma cobre i meãma ípixürüü ixixüne'. ¹⁹ Rü ñanagürü i nümax:

'Choma nüxü chacuëx i guxüma i ngëma mexü i cuyüxü. Rü nüxü chacuëx na ñuxäcü cumüçügüxü cungechaüxü, rü ñuxäcü meãma choxü na cuyaxõxü, rü ñuxäcü nüxü na curüngüxëxü i ngëma togü i yaxõgüxü, rü ñuxäcü yaxna namaã cuxínüxü i guxchaxügü. Rü nüxü chacuëx i ñuxma na noxriarü yexera cunaxüxü i ngëma cuyü chanaxwëxexü. ²⁰ Natürü nangëxma i wüxi i cuyüxü i tama chorü me ixixü. Rü ngëma nixí na ngema cunangëxmaxëëchaxü i ngëma ngexü i Yechabé i nügü ixuxü na Tupanaarü orearü uruü na yíxü, natürü norü nguxëetaemaã chorü duñxügüxü ngema womüxëxü na chixri namaxëxüçëx, rü naí i ngemaã inapegüxüçëx, rü nangõxgüäxüçëx i ngëma õnagü i togü norü tupananetachicünëxägüçëx dëixü na ngëmamaã nüxü yacuëxüügüxüçëx. ²¹ Rü choma rü marü ngixü íchananguxëe rü yaxna ngímaã chaxínü na nüxü naxoxüçëx i ngëma ngícüma i chixexü, natürü tama inaxwëxe na nüxü naxoxü rü ínatáaxü i ngëma ngírü chixexü i naxüxü. ²² Rü ñuxma i ngëma nge rü tá ngixü chidaawexëe na ngírü ngürücarewa ngüxü yangexüçëx, rü ngëma duñxügü i ngímaã ipexü i ngëma nge rü nümagü rü tá ta ngüxü na yangegüxüçëx ega tama nüxü naxoegu i ngëma chixexü i ngímaã naxügüxü. ²³ Rü tá chanadai i ngíxäcügü i ngëma nge. Rü ngëmawa tá nüxü nacuëxgü i guxüma i yaxõgüxü na aixcüma nüxü chacuáxü i ngëma naãewa nagu naxínüxü i wüxichigü i duñxü. Rü wüxichigü i pemax rü tá pexü chanaxütanü ngëma na ñuxäcü pemaxëxüäcüma rü

ñuxăcû penaxûxłăcûma. ²⁴⁻²⁵ Natürü pemagü i Tiatíracđăx i tama năgu ĩxĕ i ngĕma ngexđărü nguxĕĕtae i chixexđ rü taguma nawa ngúexe i ngĕma ore i togü naxugügu rü Chatanăărü ore i ĕxđguxđ ĩxĭđ, rü pemaă nûxđ chixu rü ngĕma pexđ chanaxwĕxexđ nixĭ na meă namaă penguxđgüxđ rü naga pexĭnûĕxđ i ngĕma chorü ore ñuxmatăta ĩchangu i chomax. Rü ngĕxĭcatama nixĭ i pexđ chanaxwĕxexđ. ²⁶ Rü yĭxema nûxđ rüporamaĕguxe i ngĕma chixexđ rü naxügüamaxĕ i ngĕma tûxđ chanaxwĕxexđ ñuxmatăta tayemare, rü tá chaugüxđtawa tûxđ chaxüchica na wüxigu chomaă guxđărü âĕxgacü tixĭgüxđĕx. ²⁷ Rü yema Chaunatü âĕxgacüxđ choxđ na ĩxĭĕĕxđrüü tá tûxna chanaxă i pora na guxđ i nachĭŭĭanegümaă taporaexđĕx. Rü ngĕxguma ñoma i naăneĕđăx i duĭxügü tama tûmaga ĩnûĕgu rü ñoma wüxi i tûxđ ngĭxđ ĩpuxĕĕxđrüü tá namaă tixĭgü rü poraăcü tá tanapoxcue. ²⁸ Rü tá tûxna chanaxă ya yima woramacuri ya pĕxmama nûxđ ĩdaucü. ²⁹ Rü yĭxema âchixexĕ rü name nixĭ i naga taxĭnü i ngĕma Tupanaăĕ i Ūünexđ nûxđ ĩxuxđ namaă i ngĕma yaxđgüxđtûcumügü” ñanagürü.

3

Ore ga yema yaxđgüxđ ga Chardiarü tănewa yexmagüxđĕx ũmatüxđ

¹ Rü yema chomaă ĩdexaxđ rü ñanagürü ta:

“Chanaxwĕxe i Chardiama ngĕxmagüxđ i yaxđgüxđărü âĕxgacüĕx cunaxümatü, rü ñacurügü tá: ‘Ñăă nixĭ i norü ore ya Tupana Nane ya Naăĕ i Ūünexđ nawa ngĕxmacü ya yima 7 ya woramacuri nûxđ ngĕxmacü’. Rü ñanagürü i nûmax: ‘Choma nûxđ chacuĕx i guxđma i ngĕma cuxüxđ. Rü nûxđ chacuĕx ta rü woo guxđwama duĭxügü nûxđ ĩxugügu na Tupanacĕx namaxĕxđ i ngĕma yaxđgüxđ i cuxđtawa ngĕxmagüxđ natürü tama aixcûma nixĭ i ngĕma, erü ngĕma yaxđgüxđ rü tama aixcûma choxđ nayaxđgü rü tama aixcûma chauxĕxĕ namaxĕ. ² Rü name nixĭ i cubăixăchi rü cugü ĩquicueĕ rü cuyangüxĕĕ i ngĕma ĩraxđ i mexđ i cuxđ ĩyaxüxđ i marü ĩyarüoxchaüxđ. Erü nûxđ chadau rü ngĕma cuxüxđ rü tama Tupanapĕxewa name. ³ ĩRü nûxna nacuĕxăchi ga yema nguxĕĕtae ga mexđ ga noxri nûxđ cuxĭnûxđ rü cuyaxuxđ, rü năgu ĩxü! ĩRü nûxđ rüxo i ngĕma chixexđ i cuxüxđ! Natürü ngĕxguma tama nûxđ curüxoĕgu i curü chixexđ, rü ñoma wüxi i ngĭtĕxăxđ i ngürüăchi ĩnguxđrüü tá cuxđtawa chaxü. Rü tăütăma nûxđ cucuĕx na ñuxguacü yĭxđ. ⁴ Natürü ngema Chardiama cuxđ nangĕxma i ñuxre i duĭxügü i mexđ i tama ñoma i naăneărü chixexđmaă nügü âŭăchiarü maxđăxgüxđ. Rü nûmagü rü tá cômüxđmaă nixăxchiru rü ngĕmaăcü tá chomaă ĩnaxĭ, erü nûmagü rü duĭxügü i mexđ i chauxĕxĕ maxĕxđ nixĭgü. ⁵ Rü yĭxema nûxđ rüporamaĕguxe i chixexđ, rü tá cômüxđmaă tixăxchiru. Rü tăütăma nawa tûxđ ĩchapiĕga i ngĕma chorü popera i năgu chayawügüxđ i ngĕma duĭxügü i nûxđ nangĕxmaü i maxđ i taguma gúxđ. Rü Chaunatüpĕxewa rü guxđma i norü orearüngeruügü i daxüĕđăxgüpĕxewa tá tûxđ chixu na chorü duĭxügü tixĭgüxđ’. ⁶ Rü yĭxema âchixexĕ rü name nixĭ i naga taxĭnü i ngĕma Tupanaăĕ i Ūünexđ nûxđ ĩxuxđ namaă i ngĕma yaxđgüxđtûcumügü”.

Ore ga yema yaxđgüxđ ga Firdĕrfiarü tănewa yexmagüxđĕx ũmatüxđ

⁷ Rü yema chomaă ĩdexaxđ rü ñanagürü ta:

“Chanaxwĕxe i Firedĕrfiawa ngĕxmagüxđ i yaxđgüxđărü âĕxgacüĕx cunaxümatü rü ñacurügü tá: ‘Ñăă nixĭ i norü ore ya yima Ūünecü ya aixcûma Cristu ĩxĭcü ya Dabĭrüü âĕxgacü ya tacü ĩxĭcü ya nûxđ nangĕxmacü i pora

na yawāxnaāxūcēx rü nawāxtaāxūcēx i daxūguxū i naāne. Rū ngēxguma texécēx yawāxnaāgu, rü taxucürüwama texé tūmachēxwa tanawāxta. Rū ngēxguma texéchēxwa nawāxtaāgu, rü taxucürüwa texé tūmacēx tayawāxna’.

⁸ Rū ñanagürü i nümax:

‘Choma nüxū chacuèx i guxūma i ngēma cuxūxū. Rū dücax, cuxū chanatauxchaxēē na togūmaā nüxū quixuxūcēx i chorū ore, rü taxucürüwama texé cuxna tanachuxu na cunaxūxūcēx i ngēma puracū. Rū choma nüxū chacuèx na tama aixcūma cuporaxūchixū, erū noxretama nixī i ngēma yaxōgūxū i cuxūtawa ngēxmagūxū. Natürü cuma rü naga cuxīnū i chorū ore, rü tama icuyacux na chorū duūxū quīīxū. ⁹ Rū ngēmacēx i ngēma duūxūgū i Chatanāarū ixīgūxū i nügū ixugūxū na chorū duūxūgū yixīgūxū natürü tama aixcūma choxrū ixīgūxū, rü tá chanamu na cupēxegu nacaxāpūxūgūxūcēx na nüxū nacuèxūcēx na aixcūma cuxū changechaūxū. ¹⁰ Cuma rü meāma cuyanguxēē i ngēma cuxū chamuxū na aixcūma cuyaxōōmaxū naetūwa i ngēma guxchaxūgū i cuxū ngupetūxū. Rū ngēmacēx tá cuxū íchapoxū na tama cuxna nanguxūcēx i ngēma guxchaxū i taxū i ñoma i naānewa tá ínguxū na guxūma i ñoma i naānecūāx i duūxūgūxū naxūxūcēx. ¹¹ Rū paxa tá ngema cuxūtawa chaxū. Rū chanaxwēxe i ñuxma meā cumaxūxūrū meā cumaxecha, na taxūema cuxna napuxūcēx i ngēma curū āmare. ¹² Rū yixema nüxū rüporamaēgūxe i guxūma i chixexū, rü Chaunatū ya Tupanaxūtawa tá tūxū changēxmagūxū na tagutāma ngema ítachoxūxūcēx. Rū tūmagu tá chanaxūmatū i naega ya Chaunatū ya Tupana. Rū ngēxgumarūū tá ta tūmagu chanaxūmatū i naega ya Tupanaārū íāne ya Yerucharēū ya ngexwacaxūne ya Tupanaxūtawa i daxūguxū i naānewa írūxīxūne. Rū ngēxgumarūū tá ta tūmagu chanaxūmatū i chauéga i ngexwacaxūxū’. ¹³ Rū yixema āchixexē rü name nixī i naga taxīnū i ngēma Tupanaāē i Ūñexū nüxū ixuxū namaā i ngēma yaxōgūxūttūcumūgū’.

Ore ga yema yaxōgūxū ga Laodichéawa yexmagūxūcēx ūmatūxū

¹⁴ Rū yema chomaā idexaxū rü ñanagürü ta:

‘Chanaxwēxe i Laodichéawa ngēxmagūxū i yaxōgūxūārū āēxgacūcēx cunaxūmatū rü ñacurūgū tá: ‘Naā nixī i norū ore ya yima aixcūma ixīcū ya aixcūma yanguxēēcū i ngēma nüxū yaxuxū rü ore i aixcūma ixīxūxūxīcatama ixucū. Rū nüma nixī ga inaxūgūāxū ga guxūma ga yema Tupana ūxū’. ¹⁵ Rū ñanagürü i nümax:

‘Choma nüxū chacuèx i guxūma i ngēma cuxūxū. Rū nüxū chacuèx na tama wūxi i duūxū i chauxchi aixū quīīxū, natürü tama wūxi i duūxū i aixcūma choxū ngechaūxū quixī. Rū chierū noxtacūma wūxi i duūxū i chauxchi aixū quixīgu rü ēxna noxtacūma wūxi i duūxū i aixcūma choxū ngechaūxū quixīgu. ¹⁶ Natürü ñuxma na írarūwatama choxū cungechaūxū, rü ngēmacēx tá cuxū íchatēx. Erū tama noxtacūma wūxi i duūxū i chauxchi aixū quixī rü tama noxtacūma wūxi i duūxū i aixcūma choxū ngechaūxū quixī. ¹⁷ Rū cuma cugū quixuxgu rü cumuārū dīēruāx, rü cumuārū ngēmaxūāx, rü meāma cuxū naxūpetū, rü taxuūma cuxū nataxu. Natürü i cuma rü tama nüxna cucuèxāchi na chopēxewa rü wūxi i taxuwama mexū quīīxū, rü wūxi i ngechaūxūchi quīīxū, rü wūxi i taxuūma cuxū ngēmaxē quīīxū, rü ñoma wūxi i ngexetūxūrū quīīxū, rü ñoma wūxi i ngexchiruxūrū quīīxū. ¹⁸ Rū ñuxma rü cuxū chaxucuxē na chauxūtawa naxcēx cutaxexūcēx i uiru i marū ūxūwa iguxū i nüxīcatama ixīxū. Rū ngēmaācū tá

aixcūma cuxū nangēxma i curū ngēmāxū. Rū ngēxgumarūū ta cuxū chaxucuxē na chauxūtawa naxcēx cutaxexūcēx i cuxchiru i cómxūxū na ngēmagu quicūxūcēx na taxúema cuxū dauxūcēx na cungechxiruxū. Rū ngēxgumarūū ta cuxū chaxucuxē na chauxūtawa naxcēx cutaxexūcēx i curū mēixētūxū na curūmexētūxūcēx na wena quidauchixūcēx. ¹⁹ Choma rū tūxū chaxucuxē rū tūxū ichayarūwēxāchixēē ya guxāma ya yíxema tūxū changechauxē. Rū ngēmacēx name nixī i nūxū curūxo i cucūma i chixexū, rū aixcūma choxū cungechaū rū cunaxū i ngēma cuxū chanaxwēxexū. ²⁰ Rū dūcax, choma rū īāxwa tūmacēx chacagūecha. Rū ngēxguma chi texé choxū īnūgu rū chauxcēx tayawāxnagu, rū tá tūmaxūtagu chaxūcu. Rū tūmamaā tá chachibū rū tūma i chomaā. ²¹ Rū yíxema nūxū rūporamaēgūe i chixexū, rū tá chaugūxūtawa tūxū charūtogūxēē na chomaā āēxgacū tixīgūxūcēx, yexgumarūū ga choma rū nūxū na charūporamaēxū ga chixexū, rū űxūchi Chaunatūxūtawa na chayarūtōxūrūū na namaā āēxgacū chīxūcēx'. ²² Rū yíxema āchixexē rū name nixī i naga taxīnū i ngēma Tupanaāē i Ūūnexū nūxū ixuxū namaā i ngēma yaxōgūxūtūcumūgū”, űnagūrū ga yema chomaā idexaxū.

4

Tupanaxū nataxēēgū i daxūguxū i naānewa

¹ Rū yemawena ga choma ga Cuāū rū nūxū chadau ga wūxi ga īāx ga iwāxnaxū ga daxūguxū ga naānewa. Rū yema naga ga nacornetagaraūxū ga noxri nūxū chaxīnūxū ga chomaā idexaxū, rū űnagūrū choxū:

“īNuxā naxīnagū! Rū tá cuxū nūxū chadauxēē i ngēma yixcūra tá ngu-petūxū”, űnagūrū. ² Rū yexgumatama ga choma rū Tupanaāē i Ūūnexū rū chauāēmaā inacuēx, rū daxūwa nanaga. Rū yēma daxūguxū ga naānewa nūxū chadau ga wūxi ga tochicaxū ga mexēchixū ga yēma Tupana nawa rūtōxū. ³ Rū guma yema tochicaxūwa rūtōcū, rū űoma nuta ya mexēchicū ya yasperūū nixī na namexū rū űoma nuta ya cornalīnarūū nixī na namexū. Rū yema tochicaxūētūwa nayexma ga wūxi ga chirapa ga űoma nuta ga esmerádarūū mexēchicū. ⁴ Rū yema tochicaxūcūwawa nayexmagū ga 24 ga togū ga tochicaxūgū ga nūxū īnumaēgūāchixū. Rū yema tochicaxūgūwa narūtogū ga 24 ga āēxgacūgū ga yaxōgūxūtārū ixīgūxū. Rū cómxūūmaā nixāxchiru rū uirunaxcēx nixī ga norū ngēxcuerūgū. ⁵ Rū yema nachica ga Tupana írūtōxūwa īnaxūxū ga bēixbēxanexū rū durunanexū rū nagagū. Rū yema tochicaxūpēxewa nayexma ga 7 ga omūgū ga yēma naīgūxū. Rū yema omūgū nixī ga Tupanaāē i Ūūnexū ga yema 7 ga yaxōgūxūtūcumūmaā icuáxū. ⁶ Rū yema Tupanaārū tochicaxūpēxewa rū űoma dexāētūwarūū ixixūmaā nachaxu rū nichipetū woruarūū. Rū yema tochicaxūxū īnachomaēgūāchi ga āgūmūcū ga daxūcūāx ga maxēxū ga guxūwama āxētūxū naweama rū napēxewa. ⁷ Rū wūxi ga yema daxūcūāx ga maxēxū rū nanaxairaxū. Rū yema to rū nanawocaraxū. Rū yema norū tomaēxpūx rū nanaduūxūchiweraxū. Rū yema norū āgūmūcū rū nanaxīyū i gonagūxūraxū. ⁸ Rū yema āgūmūcū ga daxūcūāx ga maxēxū, rū wūxichigū nūxū nayexma ga 6 ga naxpēxatūgū. Rū guxūwama ga naxpēxatūētūwa rū naxpēxatūtūwā rū namuxētū. Rū ngunecū rū chūtacū rū űnagūrūgūecha:

“Naxūūne, naxūūne, naxūūne nixī ya tórū Cori ya Tupana ya guxūētūwa ngēxmacū rū woetama ngēxmaēchacū”, űnagūrūgūecha. ⁹⁻¹⁰ Rū yema daxūcūāx ga maxēxū, rū yexguma nūxū yacuēxūtgūūxgu ga guma tochicaxūwa rūtōcū, rū moxē nūxna naxāgūgu, rū yema 24 ga āēxgacūgū ga

yaxōgūxūārū rü yima woetama ngēxmaēchacūpēxegu nacaxāpūxūgū, rü nüxū nicuēxūūgū, rü napēxegu nananu ga norū ngēxcueruūgū. ¹¹ Rü ñanagūrūgū:

“Pa Torū Cori, Pa Torū Tupanax, cuxū nixī i namexū na ticuēxūūgūxū rü cuxū tataxēēgūxū, erū guxūētūwa cungēxma. Yerū cuma cunaxū ga guxūma rü curū ngūchaūgagu nixī i nangōxū i ñūxmax”, ñanagūrūgū.

5

Popera ga idixiūchiga rü Tupana Nane ga ñoma wūxi ga carnerurūū imācūchiga

¹ Rü ñūxūchi nüxū chadau ga guma tochicaxūwa rütocū, rü norū tūgūnemēxēwa nanange ga wūxi ga popera ga idixiū. Rü dūxētūwa rü aixepewa rü naxāmatū ga yema popera. Rü 7 wa ñiñaxtachipēxe. ² Rü nüxū chadau ga wūxi ga norū orearū ngeruū ga daxūcūāx ga poraxūchixū ga tagaācū içaxū rü ñaxū:

“¿Texé tixī ya yīxema mexe na tayagautanūxū i norū ñaxtachipēxexū rü itayadixgūxū i ñaā popera?” ñaxū. ³ Natūrū woo ga daxūgūxū ga naānewa rü bai ga ñoma ga naānewa rü bai ga yuexūtanūwa, rü tataxuma ga texé ga mexe na itayadixgūxū rü nüxū tadaumatūxū na ñūxū ñaxū ga yema popera. ⁴ Rü choma rü poraācū chaxaxu yerū tataxuma ga texé ga mexē na itayadixgūxū rü nüxū tadaumatūxū na ñūxū ñaxū ga yema popera. ⁵ Natūrū wūxi ga yema 24 ga āēxgacūgū ga yaxōgūxūārū, rü ñanagūrū choxū:

“¡Tāxū i cuxaxuxū! Erū yima Cristu ya Yudátaa ya airūxū poracū ya āēxgacū ya Dabítaa ixīcū, rü marū nüxū narūyexera i guxūma i chixexū. Rü ngēmacēx nūma nixī i namexū na yagautanūāxūcēx i ngēma 7 i norū ñaxtachipēxexū i ngēma popera rü na iyawēgūāxūcēx”. ⁶ Rü ñūxūchi nüxū chadau ga Tupana Nane ga ñoma wūxi ga carneruxacū ga mēxwa írūdaxūrūū yexma chicū naxūtagu ga guma tochicaxūwa rütocū rü natanūgu ga yema āgūmūcū ga daxūcūāx ga maxēxū rü yema 24 ga āēxgacūgū. Rü nüxū nayexma ga 7 ga nachatacuxre ga norū poraarū cuēxruū rü 7 ga naxētū. Rü guma 7 ga naxētū rü ngēma nixī i Tupanaāē i Ūñexū i guxūma i ñoma i naānewa namuxūārū cuēxruū ixīxū. ⁷ Rü guma pecaduarū ūtanūcēx yucū rü guma tochicaxūwa rütocūcēx nixū, rü nanayaxu ga yema popera ga norū tūgūnemēxēwa yexmaxū. ⁸ Rü yexguma nayauxāgu ga yema popera, rü yema āgūmūcū ga daxūcūāx ga maxēxū rü yema 24 ga āēxgacūgū rü inacaxgūāpūxū napēxegu ga guma pecaduarū ūtanūcēx yucū. Rü wūxichigū ga yema āēxgacūgū rü nüxū nayexma ga wūxi ga norū paxetarūū ga arpa. Rü yexgumarūū ta nüxū nayexma ga copa ga uirunaxcēx ga pumaratēxemaā napagūxū. Rü yema pumaratēxe rü nayixichi ga yexguma yaxaxgu. Rü yema pumaragū, rü ngēma nixī i Tupanaārū duūxūgūarū yumūxēgūarū cuēxruūgū. ⁹ Rü nagu nawiyaegū ga wūxi ga wiyae ga yexwacaxūxū ga ñaxū: “Cuma nixī i cumexū na cunayaxuxū i ngēma popera rü cuyagautanūxū i ngēma norū ñaxtachipēxexū. Yerū cuma rü marū quimēxchirēx, rü cugūmaā Tupanaāxū naxcēx cutaxe i nagūxūraūxū i duūxūgū i nagūxūraūxū i nachiūānecūāx i nagūxūraūxū i nagawa idexagūxū. ¹⁰ Rü ngēmagūxū cuxūchica i ngextā āēxgacū íquixūwa, rü Tupanaārū ngūxēerūgūxū cuyaxīgūxēē na cumaā wūxigu guxū i naānemaā inacuēxgūxūcēx”,

ñanagürügü. ¹¹ Rü yemawena ichadawenü, rü nüxü chaxínü ga naga ga muxüchixüma ga Tupanaärü orearü ngeruügü ga daxüçüâx. Rü norü ngäxüwa nayexma ga yema tochicaxü rü yema ägümücü ga daxüçüâx ga maxëxü rü yema 24 ga äëxgacügü. Rü namuxüchima ga yema Tupanaärü orearü ngeruügü ga daxüçüâx ga yéma yexmagüxü. ¹² Rü tagaäcü ñanagürügü:

“Daa nixi ya yima ñoma wüxi i carneruacürü imácü ga pecaduarü ütanüçex yücü. Rü nüma nixi i namexü na guxüärü äëxgacü yixü, rü guxüärü yora yixü, rü guxü i cuëx nüxü ngëxmaxü, rü guxüärü yexera naporaxü. Rü nüma nixi i namexü na guxäma nüxü ngechaügüxü rü nataxëëgüxü rü nüxü icuëxüügüxü”, ñanagürügü. ¹³ Rü nüxü chaxínü ta ga naga ga guxüma ga yema Tupana üxü i daxügüxü i naänewa rü ñoma i naänewa rü naänetüüwa rü taxtü i taxüwa ngëxmagüxü ga ñagüxü:

“Name nixi na guxügutäma guxäma nüxü icuëxüügüxü rü nüxü ngechaügüxü rü nataxëëgüxü ya yima pecaduarü ütanüçex yücü rü yima ngëma tochicaxüwa rütocü, erü nümagü nixi i guxüguma äëxgacügü yixügüxü”, ñanagürügü. ¹⁴ Rü yema ägümücü ga daxüçüâx ga maxëxü rü ñanagürügü:

“Ngëmaäcü yii”, ñanagürügü. Rü yema 24 ga äëxgacügü rü inacaxgüäpüxü rü nüxü nicuëxüügü.

6

Yema 7 ga ñaxtachipëxe-ruüchiga

¹ Rü ñuxüchi nüxü chadau ga yexguma guma pecaduarü ütanüçex yücü yagauyegu ga yema nüxüraüxü ga norü ñaxtachipëxexü ga yema popera. Rü nüxü chaxínü ga wüxi ga yema daxüçüâx ga maxüxü ga tagaäcü ñoma duruanexürü ñaxü choxü:

“iNuã naxü!” ñaxü. ² Rü ichadawenü rü nüxü chadau ga wüxi ga cowaru ga cómuxü. Rü yema naëtüwa rüttoxü rü nüxü nayexma ga wüxi ga norü würa. Rü wüxi ga ngëxcuerü nüxna naxä. Rü poraäëäcüma norü cowarumaä inaxüächi na duüxügüxü nayexeraxüçex. ³ Rü yexguma guma pecaduarü ütanüçex yücü yagauyegu ga yema norü taxre ga yema poperaarü ñaxtachipëxexü, rü nüxü chaxínü ga yema norü taxre ga yema daxüçüâx ga maxüxü ga ñaxü choxü:

“iNuã naxü!” ñaxü. ⁴ Rü yéma naxü ga wüxi ga cowaru ga dauxü. Rü yema naëtüwa rüttoxü rü wüxi ga tara ga taxü nüxna naxä. Rü yexgumarü ta pora nayaxu na iyanaxoxëäxüçex na nügü nangechaügüxü ga duüxügü. Rü yemaäcü nanaxü na nügü nadëxüçex ga duüxügü. ⁵ Rü yexguma guma pecaduarü ütanüçex yücü yagauyegu ga yema norü tomaëxpüx ga yema poperaarü ñaxtachipëxexü, rü nüxü chaxínü ga yema norü tomaëxpüx ga yema daxüçüâx ga maxüxü ga ñaxü choxü:

“iNuã naxü!” ñaxü. Rü ichadawenü rü nüxü chadau ga wüxi ga cowaru ga waxüxü. Rü yema naëtüwa rüttoxü rü namëxwa nüxü nayexma ga wüxi ga taçüarü yaruü ga balanza. ⁶ Rü nüxü chaxínü ga wüxi ga naga ga yema daxüçüâx ga maxëxüärü ngäxütanüwa inaxüxü ga ñaxü:

“Wüxi i ngunexüärü puracütanü rü naxätanü i wüxi i kilo i trigu. Rü wüxi i ngunexüärü puracütanü naxätanü i tomaëxpüx i kilo i chebada. iNatürü taxü i cuyanatauxëëxü i ngëma chixü rü yima binu!” ñanagürü. ⁷ Rü yexguma guma pecaduarü ütanüçex yücü yagauyegu ga yema norü ägümücü ga yema poperaarü ñaxtachipëxexü, rü nüxü chaxínü ga yema norü ägümücü ga yema daxüçüâx ga maxëxü ga ñaxü choxü:

“¡Nuã naxũ!” ñaxũ. ⁸ Rũ ichadawenũ rũ nüxũ chadau ga wüxi ga cowaru ga dexexũ. Rũ yema naetüwa rütoxũ rũ Yu nixĩ ga naega. Rũ yema naweama ne üxũ, rũ Yuexũchica nixĩ ga naega. Rũ yema taxre nanayauxgũ ga pora na ñoma ga naãnewa rũ wüxi ga yema norũ ägümücütücumũ ga duũxügümaã inacüexgüxcèx na daimaã rũ taiyamaã rũ ñaaweanemaã rũ ngoxo idüraexümaã nayuexëëãxüxcèx. ⁹ Rũ yexguma guma pecaduarũ ütanüxcèx yucü yagauyegu ga yema norũ wüximëëxpüx ga yema poperaarũ ñaxtachipëxexũ, rũ nüxũ chadau ga wüxi ga nachica ga ngextá Tupanacèx naxũnagũ nawa yagugüxũ na nüxna naxãgüãxüxcèx. Rũ yema nachicatüüwa nüxũ chadau ga naãëgü ga yema duũxügü ga Tupanaarũ orexũ na yaxugüxcèx nadëixũ. ¹⁰ Rũ yema naãëgü rũ tagaãcü ñanagürügü:

“Pa Torü Cori ya Guxüetüwa Ngëxmacü rũ Üünecü rũ Ixaixcümacüx, çñuxgura tá ta i nüxna cucaxũ rũ cunapoxcuexũ i ngëma duũxügü i chixexũ ga toxũ dëixũ?” ñanagürügü. ¹¹ Rũ ñuxüchi ga Tupana rũ wüxichigü ga yema duũxügüna nanaxã ga naxchiru ga máxũ rũ cómuxũ. Rũ yema duũxügüãëgüxũ ñanagürü:

“¡Paxaãchi iperüngüë ñuxmatáta yangu i peeneëgü i Cristuaxũ puracüexũ i pexrüũ tá dëixũ!” ñanagürü. ¹² Rũ yexguma guma pecaduarũ ütanüxcèx yucü yagauyegu ga yema norũ 6 ga yema poperaarũ ñaxtachipëxexũ, rũ nüxũ chadau ga poraãcü na naxĩãxãchianexũ. Rũ üëxcü rũ wüxi ga naxchiru ga waxcharaxürü nixĩ. Rũ tauemacü rũ guxüwama nagürüũ naduema. ¹³ Rũ woramacurigü rũ ëxtagü rũ daxüwa narüyi rũ ñoma ga naãnegu nayi. Rũ ñoma orix i doxüxüma buanecü ya tacü rüyixëëxürü nixĩ. ¹⁴ Rũ guxüma i daxüwa nüxũ idauxũ rũ inayarütaxu. Rũ ñoma wüxi i popera i dixcumãichü rũ iyyarütaxuxürü nixĩ. Rũ guxüma ga mëxpünegü rũ capaxügü rũ nixĩgachi ga nachicawa. ¹⁵ Rũ ñoma ga naãnewa yexmagüxũ ga nachiüãnegüarü äëxgacügü, rũ mëxpünemagu rũ mëxpüneärü nutatanügu nicuxgü. Rũ wüxigu yexma namaã nicuxgü ga yema togü ga äëxgacügü ga taxügü ga ñoma ga naãnewaã icüexgüxũ, rũ churaragüarü äëxgacügü ga taxügü, rũ yema duũxügü ga muärü dëruãxgüxũ, rũ yema duũxügü ga ñoma ga naãnewa poraexũ, rũ guxüma ga duũxügü ga coriãxgüxũ, rũ guxüma ga duũxügü ga ngearü coriãxgüxũ. ¹⁶ Rũ guxüma ga nümagü, rũ guma mëxpünexũ rũ guma nutagüxũ ñanagürügü:

“¡Toëtügu peyi na toxũ ipicuxgüxcèx naxchaxwa ya yima ngëma tochi-caxüwa rütocü, rũ naxchaxwa ya yima pecaduarü ütanüxcèx yucü erü tama tanaxwëxe na toxũ napoxcuexũ! ¹⁷ Erü marü ínangu i ngëma ngunexũ i äücümáxũ i nagu napoxcuexũ i ngëma duũxügü i tama Tupanaarü ixĩgüxũ. çRü texé tá namaã tapora i ngëma?” ñanagürügü.

7

Yema Yudügü ga nacatüwa cuëxruüãxgüxüchiga

¹ Rũ yemawena rũ nüxũ chadau ga ägümücü ga Tupanaarü orearü ngerüügü ga daxücüãx ga ñoma ga naãneärü ägümücüpëxegu chigüxũ. Rũ inanapoxügü ga gucüma ga buanecügü na tama waixümuãneetügu naxüxcèx, rũ tama taxũ i taxüëtügu naxüxcèx, rũ bai i tacü rũ naïëtügu naxüxcèx. ² Rũ yexgumarü ta nüxũ chadau ga wüxi ga Tupanaarü orearü ngerüügü ga daxücüãx ga üëxcü iyarügöxüwaama ne üxũ. Rũ nüxũ nayexma ga Tupana ya Maxücüarü tacüarü üëgarü. Rũ nüma rũ tagaãcü nüxna nacagü ga yema togü ga ägümücü ga Tupanaarü orearü ngerüügü ga nayauxgüxũ ga pora na

nachixexēēgūãxũcèx ga guxũma ga waixũmũ rũ guxũma ga taxũ ga taxtũ.

³ Rũ ñanagũrũ nũxũ:

“¡Tãxũ i yatacũma penachixexēēxũ i waixũmũ rũ taxtũ i taxũ rũ naĩgũ, ñuxmatãta nacatũwa tayaxũarũ cuèxruũãxgũ i ngẽma Tupanaãrũ duũxũgũ ixĩgũxũ!” ñanagũrũ. ⁴ Rũ nũxũ chaxĩnũ ga ñuxre na yĩxũ ga yema cuèxruũãxgũxũ. Rũ guxũma ga Yudiũgũtanũwa rũ 144,000 nixĩ. ⁵⁻⁸ Rũ yema cuèxruũãxgũxũ ga Yudiũgũ, rũ ñaã nixĩ:

Yudãtaagũ - 12,000

Rubẽũtaagũ - 12,000

Gadutaagũ - 12,000

Achetaagũ - 12,000

Netarĩtaagũ - 12,000

Manachẽtaagũ - 12,000

Chimeũtaagũ - 12,000

Lebĩtaagũ - 12,000

Ichacãtaagũ - 12,000

Chaburãũtaagũ - 12,000

Yũchetaagũ - 12,000

Beyamĩtaagũ - 12,000

⁹ Rũ yemawena ichadawenũ, rũ nũxũ chadau ga muxũchixũma ga nagũxũraũxũ ga duũxũgũ ga nagũxũraũxũ ga nagawa idexagũxũ ga guxũma ga nachĩũãnewa ne ãxũ. Rũ yema tochicaxũpẽxegu rũ guma pecaduarũ ũtanũcèx yucũpẽxegu nachigũ. Rũ yema na namuxũchixũ rũ taxucũrũwa texẽ tayaxugũ na ñuxre yĩxũ. Rũ naxchiru ga icómũxũ rũ imãxũmaã nixãxchiru. Rũ naxmẽxwa nanangegũ ga wairaãtũgũ. ¹⁰ Rũ guxũma ga nũmagũ rũ tagaãcũ ñanagũrũgũ:

“Yima tórũ Tupana ya tochicaxũwa rũtocũ rũ yima pecaduarũ ũtanũcèx yucũ nixĩ ya tũxũ maxẽxẽegũcũ”, ñanagũrũgũ. ¹¹ Rũ guxũma ga Tupanaãrũ orearũ ngeruũgũ ga daxũcũãx rũ nũxũ inachimaẽgũãchi ga yema tochicaxũ rũ yema 24 ga ãẽxgacũgũ rũ yema ãgũmũcũ ga daxũcũãx ga maxẽxũ. Rũ yema tochicaxũpẽxegu nanangũcuchitanũ ga yema orearũ ngeruũgũ, rũ Tupanaxũ nicuèxũũgũ. ¹² Rũ ñanagũrũgũ:

“Rũ ngẽmaãcũ yĩ. Rũ nũma nixĩ i namexũ na guxũguma guxãma nũxũ icuèxũũgũxũ, rũ nataxẽegũxũ, rũ moxẽ nũxna ixãgũxũ, rũ nũxũ ingechaũgũxũ, erũ guxũ i cuèx nũxũ nangẽxma, rũ guxũtũwã nangẽxma, rũ guxũãrũ yexera napora. Rũ ngẽmaãcũ yĩ”, ñanagũrũgũ. ¹³ Rũ ñuxũchi wũxi ga yema 24 ga ãẽxgacũgũ rũ choxna naca, rũ ñanagũrũ:

“¿Tẽgũ tixĩgũ ya yĩxema cãmũchirugũxe, rũ ngextã ne taxĩ?” ñanagũrũ.

¹⁴ Rũ choma chanangãxũ, rũ ñacharũgũ:

“Pa Corix, cuma nixĩ i nũxũ cucuãxũ na tẽgũ tixĩgũxũ”, ñacharũgũ. Rũ yexguma ga nũma rũ ñanagũrũ:

“Yĩxemagũ tixĩgũ ga nawa ngupetũtanũxẽ ga yema ngũxũ ga taxũ rũ marũ tũgũ iyauxgũchiruxe nagũwa ga guma pecaduarũ ũtanũcèx yucũ. Rũ ngẽmacèx nixĩ i ticómũchiruxũ. ¹⁵ Rũ ngẽmacèx nixĩ i Tupanaãrũ tochicaxũpẽxewa tangẽxmagũchaxũ rũ ngunecũ rũ chũtacũ rũ Tupana ingẽxmaxũwa nũxũ tapuracũxũ. Rũ nũmatama ya Tupana ya tochicaxũwa rũtocũ rũ tũxna nadau. ¹⁶ Rũ marũ tagutãma wenaxãrũ taiya tũxũ nangux, rũ tagutãma tũwã. Rũ marũ tagutãma uẽxcũ tũxũ nigu, rũ tagutãma uẽxcũarũ naĩanexũ

tüxü nangux. ¹⁷ Erü yima pecaduarü ütanüçex yucü i ngëma tochi-caxüxtawa ngëxmacü, rü tá aixcüma meã tüxna nadau ñoma carnerugüna idauxürüü. Rü nawa tá tüxü nagagü i ngëma dexaarü chuxchuxügü i maxëerüü. Rü Tupana tá tüxü ñnanapi i guxüma i tümagüüxëtü”, ñnanagürü.

8

Yema norü 7 ga ñaxtachipëxeruüchiga rü yema buetare ga uirunaxcëxchiga

¹ Rü yexguma guma pecaduarü ütanüçex yucü yagauyegu ga yema norü 7 ga yema poperaarü ñaxtachipëxexü, rü ngãxü ga ora nachipetüanemare ga daxüguxü ga naãnewa. ² Rü ñuxüchi nüxü chadau ga yema 7 ga Tupanaarü orearü ngeruügü ga daxüçüãx ga yexma Tupanapëxegu chigüxü. Rü wüxichigü nanayaxu ga norü corneta ga nüxna naxãxüne. ³ Rü yemawena ñnangu ga wüxi ga to ga Tupanaarü orearü ngeruü ga daxüçüãx. Rü yëma nanange ga wüxi ga norü buetare ga uirunaxcëx ga pumaraarü gutëxeruü. Rü yema uirunaxcëx ga pumaraarü gutëxeruütaxmüpëxegu nachi. Rü nanayauxtëxe ga taxü ga pumara ga nüxna naxãxü na yema tochiçaxüpëxewa yexmaxü ga pumaraarü gutëxeruütaxmüwa yaguãxüçex, na yemaãcü Tupanana naxããxüçex ga yema pumaratëxe na yema pumaraema rü wüxigu Tupanaarü duüxügüarü yumüxëmaã Tupanaxütawa nangüçex. ⁴ Rü yema pumaratëxe ga yema orearü ngeruüaxü yexmaxü rü daxü naxüëma wüxigu namaã ga Tupanaarü duüxügüarü yumüxëgü ñuxmata Tupanaxütawa nangu. ⁵ Rü ñuxüchi ga yema orearü ngeruü rü nanayaxu ga yema buetare ga pumaraarü gutëxeruü. Rü yema pumaraarü gutëxeruütaxmüwa nanayaxu ga äwe ga naicü, rü gumamaã nanaxüacu ga guma buetare. Rü ñuxüchi ñoma ga naãneetügu nanaña. Rü yexgumatama poraãcü naduruächiane, rü poraãcü nicuxcuane rü nibëixbëxane rü naxiãxächiane.

Tupanaarü orearü ngeruügü ga daxüçüãxarü cornetachiga

⁶ Rü yexguma ga yema 7 ga Tupanaarü orearü ngeruügü ga daxüçüãx ga icornetaãxü, rü nügü ñnamexëëgü na nagu yacuegüxüçex. ⁷ Rü wüxi ga yema Tupanaarü orearü ngeruü rü nüxira nayacue ga norü corneta. Rü yexgumatama ñoma ga naãneetügu narüyi ga gáuxü rü üxüema ga nagümaã äëxü. Rü wüxi ga yema norü tomaëxpüxarü üye ga ñoma ga naãne rü nixa. Rü yexgumarüü ta wüxi ga yema norü tomaëxpüxarü üye ga naãxneçü rü nixa. Rü guxüma ga natüane rü nixae. ⁸ Rü yema norü taxre ga Tupanaarü orearü ngeruü rü nayacue ga norü corneta. Rü ñuxüchi wüxi ga taçü ga taxüchixü ga namëxpüneraüxü ga iyauxraxü, rü yexma taxtü ga taxügu nanaña. Rü wüxi ga yema norü tomaëxpüxarü üye ga taxtü rü nagüxü nananguxuchi. ⁹ Rü wüxi ga yema norü tomaëxpüxarü üyetücumü ga yema taxtüwa maxëxü, rü nayue. Rü yexgumarüü ta wüxi ga yema norü tomaëxpüxarü üyetücumü ga wapurugü, rü ñnayı. ¹⁰ Rü yema norü tomaëxpüx ga Tupanaarü orearü ngeruü, rü nayacue ga norü corneta. Rü ñuxüchi wüxi ga taxüchicü ga woramacuri ga taemaxüchicü rü daxüwa narüngu. Rü wüxi ga omü ga ixaxürüü nixi. Rü nagu nangu ga wüxi ga yema norü tomaëxpüxarü üye ga natügü rü natüxacügü. ¹¹ Rü guma woramacuri rü üxüxü nixi ga naega. Rü wüxi ga yema norü tomaëxpüxarü üye ga guxüma ga dexá rü naxüxchiü. Rü muxüma ga duüxügü rü yema dexáwa nayue yerü naxüxchiü. ¹² Rü yema norü ägümücü ga Tupanaarü orearü ngeruü rü nayacue ga norü corneta. Rü wüxi ga yema norü tomaëxpüxarü üye ga üëxcü rü nixo. Rü yexgumarüü ta wüxi ga yema norü tomaëxpüxarü üye ga

tauemacü rü woramacurigü rü ětagü rü nixo. Rü yemaäcü wüxi ga yema norü tomaĕxpüxarü üye ga guxüma ga yema rü naxĕâne. Rü ga ngunecü rü ägümücü ga ora naxĕâne. Rü ga chütacü rü ägümücü ga ora nataxuma ga tauemacü rü bai ga woramacurigü rü bai ga ětagü. ¹³ Rü yemawena ichadawenü rü nüxü chaxínü ga wüxi ga İyü ga daxügu İxexeüxü ga tagaäcü ñaxü:

“Nangechaütümüügü i ngĕma duüxügü i yea pecaduäxü i naânewa maxĕxü i ngĕxguma yacuegüägu tá ya norü cornetagü i ngĕma togü i tomaĕxpüx i Tupanaärü orearü ngeruügü”, ñaxü.

9

¹ Rü yema norü wüximĕĕxpüx ga Tupanaärü orearü ngeruü, rü nayacue ga norü corneta. Rü nüxü chadaü ga wüxi ga woramacuri ga daxüwa rüngucü ga ñoma ga naânegu ngucü. Rü guma woramacuri nanayaxu ga yema äxmaxü ga taguma iyacuáxüärü chawi. ² Rü nayawäxna ga yema äxmaxü ga taguma iyacuáxü. Rü yema inayagoema ga caxixü ñoma wüxi i taxü i uxearü caxixüürü. Rü yema caxixü rü nanaxĕĕmaxĕĕ ga üĕxcü. ³ Rü yema caxixüwa İnachoxü ga munügü ga naâneĕtugu yixü. Rü yema munügü rü nanayauxgü ga pora ga nüxna naxäxü na ñoma tuxchinawerüü duüxügüxü nachixücĕx. ⁴ Rü yema munümaä nüxü nixu na tama natüanexü nachixexĕĕxücĕx rü bai i tacü rü nanetügü rü bai i tacü rü naĕgu. Natürü nanamu na nachixexĕĕgüäxücĕx ga yema duüxügü ga tama Tupanaärü cuĕxruü nacatüwa yexmaxü. ⁵ Natürü tama nanamu na yema duüxügüxü nadĕixücĕx. Natürü nanamu na ngüxü nüxü yangexĕĕmaregüxücĕx ga wüximĕĕxpüx ga tauemacü. Rü yema ngüxü ga nüxü yangexĕĕgüxü, rü ñoma tuxchinawe duüxügüxü chixüriü nixi. ⁶ Rü ngĕma ngunexügüga rü duüxügü tá naxcĕx nadaugü na nayuxü, natürü täütama nayue. Rü woo nanaxwĕxegüxüchi na nayuxü, natürü taxucürüwatama nayue. ⁷ Rü yema munügü rü ñoma cowaru i guerawa İxüriü nixigü. Rü naĕruwa nüxü nayexma ga tacü ga ñoma ngĕxcueruü ga uirunaxcĕxruü ixigüxü. Rü nachiwe rü nanaduüxüchiweraxügü. ⁸ Rü nayaegü rü ñoma ngeäxyaerüü nixigü. Rü napütägü rü ñoma aipütägürüü nixigü. ⁹ Rü naxünewa nayexma ga norü poxüruü ga fierunaxcĕx. Rü naxpĕxatügüga rü ñoma muxüchine ya caru ya guerawa cowaru tügünegarüü ixixü. ¹⁰ Rü nareexügü rü ñoma tuxchinawerüü naxānegu. Rü yema naneguwa rü naxāguchata na wüximĕĕxpüx ya tauemacü duüxügüxü ngüxü yangexĕĕgüxücĕx. ¹¹ Rü yema munügüarü äĕxgacü, rü yema äxmaxü ga taguma iyacuáxüärü dauruü nixi. Rü Yudiugügawa ga yema munügüarü äĕxgacü, rü Abadóü nixi. Rü Griégugügawa rü Apolióü nixi. Rü ngĕma rü: “Chixexĕĕruü”, ñaxüchiga nixi. ¹² Rü yexma nayacuĕx ga yema nüxüraüxü ga chixexü ga taxü, natürü İnayaxüma ga to ga taxre. ¹³ Rü yema norü 6 ga Tupanaärü orearü ngeruü rü nayacue ga norü corneta. Rü nüxü chaxínü ga wüxi ga naga ga yema Tupanapĕxewa yexmaxü ga uirunaxcĕx ga pumaraarü gutĕxeruütaxmüwa inaxüxü. ¹⁴ Rü yema naga rü nanamu ga yema orearü ngeruü ga cornetaäxü, rü ñanagürü nüxü:

“İYawĕgüxü i ngĕma ägümücü i orearü ngeruügü i Chatanáärü ixigüxü i taxtü i Eufatégu ngäxügüxü!” ñanagürü. ¹⁵ Rü yemaäcü niwĕgüxü ga yema ägümücü ga orearü ngeruügü na nadaiäxücĕx ga wüxi ga yema norü tomaĕxpüxarü üyetücumü ga duüxügü. Yerü ga yema orearü ngeruügü rü woetama yemacĕx İnamemaregü na yema ora rü yema ngunexü rü guma tauemacü rü guma taunecü nadaiäxücĕx ga yema duüxügü. ¹⁶ Rü nüxü

chaxînú na ñuxre na yiîxû ga yema orearû ngeruûgûarû churaragû ga cowaruétûgu îxû. Rû 200 miyónegû nixîgû. ¹⁷ Rû yemaâcü nixî ga nüxû chadauxû ga yema cowarugû ga yexguma changoxetûgu. Rû yema churaragû ga yema cowaruétûgu îxû rû nüxû nayexma ga norû ngêxcuxûnêxû ga poxûruû ixîxû ga ñoma üxûxetürûü iyauraxû. Rû yema poxûruû rû nixâmatû rû nidaumatû rû niyêuxmatû rû nidexmatû. Rû yema cowaruerugû rû ñoma aierurûü nixîgû. Rû naâxgûwa înauxû ga üxüema rû caxixû rû azufre. ¹⁸ Rû wüxi ga norû tomaêxpûxarû üyetücumû ga duûxûgû rû nayue namaâ ga yema tomaêxpûx ga chixexêeruû ga üxüema rû caxixû rû azufre ga yema cowarugûêxwa îchoxûxû. ¹⁹ Yerû ga yema cowarugû rû naâxwa rû nareexûwa nixî ga nüxû nayexmaxû ga norû pora na duûxûgûxû nadêjêxcêx. Yerû ga nareexûgû rû ñoma âxtaperûü nixîgû, rû yemamaâ nangôx ga duûxûgû rû ngûxû nüxû ningexêê rû nanadai. ²⁰ Natürû ga yema togû ga duûxûgû ga tama yema poxcuruûgûmaâ yuexû, rû tama nüxû narûxoe ga yema chixexûgû ga naxûgûxû. Rû tama nüxû narûxoe na nüxû yacuêxûügûxû ga ngoxogû rû norû tupananetachicûnêxâgû ga uirunaxcêx rû dîêrumünaxcêx rû cobrenaxcêx rû nutagünaxcêx rû naînaxcêx. Rû yemaâcü nüxû nicuêxûügûama ga yema norû tupananetachicûnêxâgû ga ngearû maxûâxû rû tama nüxû dauxû rû tama nüxû înuxû rû tama îxûxû. ²¹ Rû tama nüxû narûxoe na namáetagûxû, rû yayuüexû, rû nangêâêgûxû rû nangîtêêxgûxû.

10

Orearû ngeruû ga nüxû yexmaxû ga popera ga idixixûchiga

¹ Rû nüxû chadau ga wüxi ga to ga Tupanaârû orearû ngeruû ga daxûguxû ga naânêwa îrûxixû. Rû wüxi ga caixanexûârû ngâxûwa nayexma, rû wüxi ga chirapa naétûgu nabo. Rû nachiwe rû ñoma üêxcürûü niyauracüü. Rû naparagû rû ta ñoma üxüemaruû niyauracüü. ² Rû naxmêxwa nüxû nayexma ga wüxi ga poperaxacû ga îwêgûxû. Rû norû tûgûneparâ rû taxtû i taxûetûgu nachicutû. Rû norû toxwepara rû waixûmüânêgu nachicutû. ³ Rû ñuxûchi ga nüma rû tagaâcü aita naxû ñoma wüxi ya ai ya tagaâcü aita ücürûü. Rû yexguma aita naxûxgu rû 7 êxpûxcûna naduruâchiane. ⁴ Rû yexguma yema 7 êxpûxcûna na naduruâchianexûguwena rû chanaxûmatûchaû. Natürû nüxû chaxînú ga wüxi ga naga ga daxûguxû ga naânêwa înauxû ga ñaxû choxû:

“¡Tâxû i cunangoxêêxû i ngêma 7 i duruanexû nüxû îxuxû! ¡Rû ngexrûma na cunaxûmatûxû!” ñaxû choxû. ⁵ Rû ñuxûchi ga yema Tupanaârû orearû ngeruû ga nüxû chadauxû na taxtû ga taxûetûgu rû waixûmüetûgu nachicutûxû, rû daxû naxunagû ga norû tûgûnechacüü. ⁶ Rû înauneta nagagû ga Tupana ya yima guxûguma maxûcü ya yima naxûcü i daxûguxû i naâne rû ñoma i naâne rû taxtû i taxû rû guxûma i tacû nawa ngêxmagûxû. Rû ñanagürû ga yema orearû ngeruû:

“Ñuxma rû marû tâtûtâma nuxcü ningû i ngêma Tupana nüxû îxuxû. ⁷ Erû ngêxguma nawa nanguxgu na ngêma norû 7 i Tupanaârû orearû ngeruû înauxûgûxû na yacueâxû ya norû corneta, rû ngêxguma tá nixî i yanguxû ga yema noxri êxûguxû ga Tupanaârû uneta, yema nuxcûmaûgûxû ga norû orearû uruûgûmaâ nüxû yaxuxû”, ñanagürû. ⁸ Rû yema naga ga noxri nüxû chaxînúxû ga daxûguxû ga naânêwa înauxû, rû wenaxârû chomaâ nidexa. Rû ñanagürû choxû:

“¡Naxûtawa naxû i ngêma Tupanaârû orearû ngeruû i taxtû i taxûetûgu rû waixûmüânefûgu chicutûxû! ¡Rû nüxna nayaxu i ngêma poperaxacû i

marü íiwëgüxü i naxmëxwa ngëxmaxü!" ñanagürü. ⁹ Rü naxütawa chaxü ga yema orearü ngerüü, rü nüxna naxcëx chaca ga yema poperaxacü na choxna naxãaxüxcëx. Rü nüma rü ñanagürü choxü:

"Ñaa nixí. ¡Rü nayaxu rü nangöx! Rü cuëxwa rü berurerüü tá namaicura. Natürü cuanüwa rü tá nanaxüxãchi", ñanagürü choxü. ¹⁰ Rü yema orearü ngerüüméxëwa chanayaxu ga yema poperaxacü, rü chanangöx. Rü chauëxwa rü berurerüü namaicura. Natürü yexguma chanangöxguwena rü chauanüwa rü nanaxüxãchi rü changüxneca. ¹¹ Rü ñuxüchi chomaã nüxü nixu, rü ñanagürü choxü:

"Name nixí na wenaxärü Tupanaärü orexü quixuxü namaã i muxüma i nagüxüraüxü i duüxügü, rü muxüma i nachiuñanecüãxgü i duüxügü, rü muxüma i duüxügü i to i nagawa idexagüxü, rü muxüma i nachiuñanegüarü äëxgacügü", ñanagürü choxü.

11

Taxre ga orearü uruüchiga

¹ Rü yemawena chanayaxu ga wüxi ga dexnemenëxã ga ngugüruü ixixüne ga choxna naxãxüne. Rü guma choxna naxãcü rü ñanagürü choxü:

"¡Inachi rü nangugü ya yima Tupanapata rü ngëma pumaraarü gutëxeruütaxmü! ¡Rü yaxugü rü ñuxre yüxü i ngëma duüxügü i ngëma Tupanaxü icuëxüügüxü! ² ¡Natürü ngëma naãxtü ya Tupanapata, rü täütãma cunangugü! Erü ngëma duüxügü i tama Tupanaãxü yaxögüxüna marü nanaxã. Rü nümagü rü tomaëxpüx ya taunecüarü ngãxü tá chixexü namaã naxügü ya yima ñane ya üünene ya Yerucharéü. ³ Rü choma rü tá chanamu i taxre i chorü orearü uruügü na 1,260 i ngunexü duüxügümaã nüxü yaxugüxcëx i chorü ore. Rü nümagü i ngëma taxre rü tá niwëxchiru na ngëmawa duüxügü nüxü cuëxgüxcëx na ngechaü nüxü nguxgüxü", ñanagürü choxü. ⁴ Rü ngëma taxre i orearü uruügü nixí i norü cuëxruü i ngëma taxre i nanetü i oribu rü ngëma taxre i weraarü üruügü i tórü Cori ya ñoma i nañeärü yora ixícüpëxewa ngëxmagüxü. ⁵ Rü ngëxguma texé chixexü namaã ügüchaügu i ngëma taxre i orearü uruügü, rü nümagü rü üxüema ya naãxwa ínacuxechinemaã tüxü tá ínagu. Rü ngëmaãcü tá inayanaxoxëé i norü uwanügü. Rü ngëmaãcü tá tüxü nadai ya yixema chixexü namaã ügüchaüxë. ⁶ Rü ngëma taxre i orearü uruügü rü nüxü nangëxma i pora na íyachaxãchixüxcëx ya pucü na tama napuxüxcëx i guxüma i ngëma 1,260 i ngunexüügü i nagu Tupanaärü orexü yaxugüxü. Rü ngëxgumarüü ta nüxü nangëxma i pora na nagüxü yaxüxëëgüãxüxcëx i dexá. Rü ngëxgumarüü ta nüxü nangëxma i pora na ñoma i nañewa namugüãxüxcëx i nagüxüraüxü i poxcuruügü na ngëmaãcü ngüxü duüxügüxü yangexëëgüxüxcëx i ngëxguma ngëma taxre naxwëxëgü. ⁷ Natürü ngëxguma ngëma taxre i orearü uruügü naguxëëgügu na nüxü yaxugüxü i Tupanaärü ore, rü ngëma ngoxo i ngëma äxmaxü i taguma iyacuáxüwa íxüxüxü, rü tá ngëma taxrena nayuxu. Rü tá nüxü narüyexera, rü tá nanadai. ⁸ Rü ngëma naxünegü i ngëma taxre rü tá yima ñane ga tórü Cori nawa curuchawa ipotane ya Yerucharéüärü ítamügüwa nawogü. Rü yima ñane rü nachixe rü ngëmacëx Chodomaärü ñanemaã rü Equituanemaã nanaxugü. ⁹ Rü tomaëxpüx i ngunexüärü ngãxü rü muxüma i nagüxüraüxü i duüxügü rü muxüma i guxü i nachiuñanecüãx i duüxügü rü muxüma i duüxügü i to i nagawa idexagüchigüxü, rü tá nüxü nadaugü i naxünegü. Rü täütãma nanaxwëxëgü na texé inatëxgüxü.

¹⁰ Rû ngêma duûxûgû i ñoma i nañnewa maxêxû rû tá nataãêgû na marû nayuxê i ngêma taxre. Rû ngêma na poraãcû nataãêgûxûchixû rû tá nûgûna âmare naxâgû, yerû yema taxre ga orearû uruûgû rû poraãcû nanachixewe rû naãêwa nananguxêêgû. ¹¹ Natürû yema tomaêxpûx ga ngunexûârû ngâxûguwena, rû Tupana wenaxârû nanamaxêxêê ga yema taxre. Rû wenaxârû înarûdagû. Rû guxûma ga yema duûxûgû ga nûxû daugûxû rû poraãcûxûchi namuûê. ¹² Rû ñuxûchi ga yema taxre ga orearû uruûgû, rû nûxû naxînuê ga wûxi ga naga ga tagaãcû daxûguxû ga nañnewa inaxûxû ga ñaxû:

“¡Nuã daxûwa pexî!” ñaxû. Rû yemaãcû ga nûmagû rû wûxi ga caixanexûgu daxûguxû ga nañnewa naxî. Rû norû uwanûgû rû yema nûxû narûdaunû. ¹³ Rû yexgumatama poraãcû naxîâxâchiane. Rû wûxi ga yema norû 10 arû ùye ga guma îâne, rû niwêxgû. Rû 7,000 ga duûxûgû nayue namaã ga yema îâxâchiane. Rû yema togû ga duûxûgû ga maxêxû rû poraãcûxûchi namuûê. Rû Tupana ya daxûguxû i nañnewa ngêxmacûxû nicuèxûûgû. ¹⁴ Rû yexma nayacuèx ga yema norû taxre ga chixexû. Natürû paxa tá înangu i ngêma norû tomaêxpûx îxîxû.

Guma norû 7 ga cornetachiga

¹⁵ Rû yema norû 7 ga Tupanaârû orearû ngeruû, rû nayacue ga norû corneta. Rû nayexma ga nagagû ga tagaãcû daxûguxû ga nañnewa inaxûguxû ga ñagûxû:

“Ñuxma rû yima mecû na namaã inacuèxgûxû i ñoma i naãne, rû nûma nixî ya tórû Cori ya Tupana rû Nane ya Cristu. Rû nûma rû guxûgutâma namaã inacuèxgû”, ñagûxû. ¹⁶ Rû nûmagû ga yema 24 ga âêxgacûgû ga norû tochicaxûgûwa rûtogûxû ga Tupanapêxewa, rû yexma nanangücuchitanû, rû Tupanaxû nicuèxûûgû. ¹⁷ Rû ñanagûrûgû:

“Pa Torû Cori ya Tupana ya Guxûârû Yexera Poracûx, cuma rû woetama cuyexmaêcha, rû ñuxma rû ta cungêxmaêcha. Rû moxê cuxna taxâgû, erû marû cugûmêxêwa cunangêxmaxêê i guxûma, rû marû icunaxûgû na namaã icucuâxû. ¹⁸ Rû ngêma duûxûgû i tama cuxrû îxîgûxû rû poraãcûxûchi nanuê, natürû nawa nangu i ngêma ngunexû i naga tá cunapoxcuexû. Rû ngêxgumarûû ta marû nawa nangu na nûxû quicagûxû i guxûma i duûxûgû i yuexû. Rû marû nawa nangu na nûxû cunaxûtanûxû i ngêma curû duûxûgû i curû orearû uruûgû, rû ngêma duûxûgû i cupêxewa imexû, rû guxûma i ngêma duûxûgû i cuxû muûêxû i yaexû rû buexû. Rû marû nawa nangu na icuyanaxoxêêxû i ngêma duûxûgû i nachixexêêxû i ñoma i naãne”, ñanagûrûgû. ¹⁹ Rû ñuxûchi Tupanapata ga daxûguxû ga nañnewa yexmane, rû niwâxna. Rû yema norû aixepewa nûxû chadau ga yema baû ga Tupanaârû uneta ga nutagu ûmatûxû. Rû nibêxbêxane, rû poraãcû nicuxcuane, rû naxîâxâchiane rû poraãcû gaûxû narûyi.

12

Wûxi ga nge rû wûxi ga coya ga taxû

¹ Rû ñuxûchi daxûwa nangox ga wûxi ga cuèxruû ga taxû. Rû iyexma ga wûxi ga nge ga ûecûrûû iyaurachirucûcû. Rû ngîtûûcutûwa nayexma ga taemacû. Rû yema ngîrû ngêxcueruû ga ngîruwa yexmaxû, rû 12 ga woramacurigû nixîgû. ² Rû yema nge rû itacharaû. Rû poraãcû aita ixû yerû îxîraxacûchaû rû poraãcû inguxnecaxûchi. ³ Rû yemawena daxûwa nangox ga to ga cuèxruû. Rû yema nayexma ga wûxi ga coya ga taxûchixû ga dauxû ga 7

ga naëru nüxü yexmaxü rü 10 ga naxchatacuxre. Rü wüxichigü ga naëruwa rü nüxü nayexma ga norü ngëxcuerü. ⁴ Rü nareexümaã inayatüchigü ga wüxítücumü ga norü tomaëxpüxarü üye ga woramacurigü, rü ñoma ga naãneetüga nanawogü. Rü yema coya rü ngipëxegu nayachi ga yema nge ga íraxacüchaücü, yerü tüxü nangõxchaü ga guxema ngíxácüxe ga yexguma tabuxgu. ⁵ Rü yema nge rü íxíraxacü, rü nayatü. Rü nüma rü tá guxü i nachüíãneärü äëxgacü nixí, rü tá namaã inacüex. Natürü ga guma ngíne rü Tupana ngixna nanayaxu rü yema ínatoxüwa nanaga. ⁶ Rü yema nge rü wüxi ga nachica ga ngextá taxúema íxãpataxüwa íña. Rü yéma Tupana ngíxcëx nanamexëë ga wüxi ga ngíchica na yéma ngíxna nadauxüçëx rü ngíxü naxüwemüxüçëx ga 1,260 ga ngunexü. ⁷ Rü yemawena ga daxüwa rü nügü nadai. Rü Miguere ga Tupanaärü orearü ngeruügüarü äëxgacü íxícü rü guxüma ga natanüxü ga orearü ngeruügü, rü nügü nadai namaã ga yema coya ga taxüchixü rü norü orearü ngeruügü. Rü yema coya rü ñuxüchi norü orearü ngeruügü i chixexü rü poraãcü Tupanaärü orearü ngeruügümaã nügü nadai. ⁸ Natürü ga yema coya rü norü orearü ngeruügü rü tama Tupanaärü orearü ngeruügüxü narüporamaëgü. Rü ñuxüchi ga yema coya rü norü orearü ngeruügü rü nangechica ga daxüguxü ga naãnewa. ⁹ Rü yemaãcü ínatëxüchi ga daxüguxü ga naãnewa ga yema coya ga yema nuxcümaüxü ga äxtape. Rü nüma rü ngoxogu rü Chatanágu naxãega. Rü nüma nixí i guxüma i ñoma i naãneçüãx i duüxügüxü nawomüxëëxü. Rü nüma rü norü orearü ngeruügümaã ñoma ga naãnegu narüwoü. ¹⁰ Rü ñuxüchi nüxü chaxínü ga wüxi ga naga ga daxüguxü ga naãnewa tagaãcü ñaxü:

“Ñuxma rü marü nawa nangu na tóru Tupana rü norü duüxügüxü namaxëxëëxü. Rü ñuxma rü nüma tüxü nüxü nadauxëë na guxüärü yexera naporaxü rü guxüärü äëxgacü yíixü. Rü Nane ya Cristu rü marü tüxü nüxü nadauxëë na guxümaã inacüáxü. Yerü marü daxüguxü ga naãnewa ínatëxüchi ga Chataná ga ngunecü rü chütacü tóru Tupanapëxewa taeneëgüxü yeüçürü íxuechaxü. ¹¹ Rü nümagü ga yema taeneëgü, rü marü Chatanáxü narüyexeragü nagügagu ga guma pecaduarü útanüçëx yucü rü nagagu ga Tupanaärü ore ga nüxü yaxugüxü. Yerü ga nümagü rü tama nayanuxügü ga norü maxü, rü ínamemaregü na Tupanacëx nayuexü. ¹² ¡Rü ngëmacëx petaãëgü i guxáma i pema i daxüguxü i naãnewa ngëxmagüxel ¡Natürü pengechaltümüügü i pema i yea naãne i pecaduáxüwa ngëxmagüxe rü taxtü i taxüwa ngëxmagüxel! Erü ngëma ngoxo i Chataná rü marü petanügu narütáe. Rü poraãcü nanu i nüma erü marü noxretama i ngunexü nüxü ínayaxü na chixexü naxüxü, erü paxa tá napoxcu”, ñanagürü ga yema naga. ¹³ Rü yema coya ga taxüchixü ga Chataná nagu ícúxü rü yexguma nügü yacuëxächigu ga ñoma ga naãnegu na nataëxü, rü ngíwe ningëchigü ga yema nge ga íraxacücü. ¹⁴ Natürü ga Tupana rü ngíxü naxüxpexatü ga yema nge. Rü nanaxüyüpexatügüraxü. Rü yemaãcü nachica ga ngextá taxúema íxãpataxüwa íña naxchaxwa ga yema coya ga Chataná nagu ícúxü. Rü yema nachicawa nixí ga Tupana ngíxna dauxü, rü ngíxü üwemüxü ga tomaëxpüx ga taunecüarü ngãxü. ¹⁵ Rü yema coya ga Chataná rü dexá nügüëxwa ínaxüxüxëë na wüxi ga natü naxüxüçëx, rü yema natümaã ngíxü yachaxëëxüçëx ga yema nge. ¹⁶ Natürü ga waixümü rü ningëx na iyachexëëaxüçëx ga yema dexá ga coya nügüëxwa íxüxüxëëxü. ¹⁷ Rü ñuxüchi ga yema coya ga Chataná, rü poraãcüxüchima ngímaã nanu ga yema nge. Rü ínixü na nügü namaã yadëixüçëx ga yema togü ga ngíxácügü ga yema nge. Rü ngëma ngíxácügü i

ngēma coyamaã nügü dèixü, rü ngēma nixī i ngēma duüxügü i meã Tupanaärü orega ñnüëxü rü meã yaxögüechaxü i Ngechuchu ya Cristuarü ore i aixcüma ixixü. Rü ñüxüchi ga yema coya rü norü numaã taxtü ga taxüñnacügu nayarüñu.

13

Taxre ga ngoxogüchiga

¹ Rü nüxü chadau ga wüxi ga ngoxo ga taxü ga taxtügu ññüächixü ga 7 eruxü rü 10 chatacuxrexü. Rü wüxichigü ga naxchatacuxrewa rü nüxü nayexma ga norü ngëxcuerüñ. Rü naërugügu naxümatü ga ñuxre ga naegagü ga Tupanamaã guxchigagüxü. ² Rü yema ngoxo ga nüxü chadauxü, rü wüxi ga airüñ nixī. Rü naxmëxgü rü chatü ga taxüñmëxgürüñ nixī. Rü naãx rü wüxi ga aiëxrüñ nixī. Rü yema coya ga Chataná rü yema ngoxoxü naporaxëë na naxrüñ naporaxüçëx rü naxrüñ ãëxgacü yïixüçëx na ñoma ga naãnemaã inacüáxüçëx. ³ Rü wüxi ga naëruwa ga yema ngoxo, rü nüxü nayexma ga wüxi ga taxü ga norü oxri ga namaã nayuxchaüxü. Natürü ga yema norü oxri rü nüxü nixë, rü naxçëx nitaane. Rü guxüma ga ñoma ga naãnecüãx ga duüxügü rü poraãcü yema ngoxomaã nabaixächie, rü nawe narüxi. ⁴ Rü ga duüxügü rü yema coya ga Chatanáxü nicüëxüñgü yerü yema ngoxoxü naporaxëë na ãëxgacü yïixüçëx. Rü yexgumarüñ ta yema ngoxoxü nicüëxüñgü, rü ñanagürügü:

“¿Texé tangëxma ya ñaã ngoxorüñ poraxe? ¿Rü texé tapora na namaã tügü tadèixü?” ñanagürügü. ⁵ Natürü ga Tupana rü tama yema ngoxona nanachüxu na nügü yacuëxüñxüçëx rü ñacü Tupanamaã yaxugüñxüçëx rü ãëxgacü na yïixüçëx ga 42 ga tauemacü. ⁶ Rü yemaãcü chixexü naxü ga yema ngoxo. Rü poraãcü ñacü Tupanamaã nixügü. Rü Tupanamaã naguxchiga, rü napatamaã rü ta naguxchiga, rü tûmamaã naguxchiga ya guxäma ya yïxema daxügüñ i naãnewa ngëxmagüxe. ⁷ Rü yema coya ga Chataná rü yema ngoxoxü naporaxëë na Tupanaärü duüxügümaã nügü nadèixüçëx ñüxmatáta tüxü nayexera. Rü ãëxgacüxü nayaxīxëë na namaã inacüáxüçëx ga nagüñüraüxü ga duüxügü ga guxüma ga nachüñnecüãx ga nagüñüraüxü ga nagawa idexagüxü. ⁸ Rü tá ngēma ngoxoxü nicüëxüñgü i guxüma i duüxügü i ñoma i naãnewa maxëxü i noxritama naãne üxgu ngeégagüxü nawa i norü popera ya yima pecaduarü ñtanüçëx yücü i nagu yawügüãxü i ngēma duüxügü i marü Tupana nüxna naxäxü i maxü i taguma gúxü. ⁹⁻¹⁰ Rü ngëxguma texé äxchixëgu, rü name nixī i naga taxīñü i ñaã tá pemaã nüxü chixuxü. Rü ngëxguma texé tûmamaã naxuegugu na tüxü yayauxgüxü, rü noxtacüma tá tiyaxu. Rü ngëxguma texé tûmamaã naxuegugu na tüxü yamëxgüxü, rü noxtacüma tá tüxü nimëxgü. Rü ngëmacëx ya yïxema Tupanaärü duüxügü ixīgüxe, rü woo ñacü rü guxchaxü tüxü ngupetügu, rü tanaxwëxe na yaxna namaã taxīñüëxü rü tayaxögüamaxü. ¹¹ Rü yemawena nüxü chadau ga wüxi ga to ga ngoxo ga taxrechatacuxrexü ga waixüñmüãnewa íxüñüxü. Rü yema naxchatacuxre rü ñoma carneruchatacuxrerüñ nixī. Natürü ga naga rü wüxi ga coya ga taxüchixügarüñ nixī. ¹² Rü yexguma yema nüñüraüxü ga ngoxopëxewa nayexmagu, rü naxrüñtama napora. Rü ñoma ga naãnemaã inacüëx, rü nanamu ga ñoma ga naãnewa maxëxü ga duüxügü na yema nüñüraüxü ga ngoxo ga ixëärü oxriáxüñü na yacuëxüñgüñxüçëx. ¹³ Rü yema ngoxo nanaxü ga taxü ga cuëxrüñgü ga duüxügü tama nüxü cuáxü na naxügüãxü. Rü daxüwa nanayixëë ga üxü, rü ñoma ga naãnegu

nayi napêxewa ga duîxügü. ¹⁴ Natürü ga Tupana rü tama yema ngoxona nanachuxu na ñoma ga naãnewa maxêxü ga duîxügüxü nawomüxêxü namaã ga yema cuèxruügü ga yema nüxîraüxü ga ngoxopêxewa naxüxü. Rü yemaäcü ga yema ngoxo rü duîxügüxü namu na naxügüãxücêx ga naxchicünêxã ga yema nüxîraüxü ga ngoxo ga taramaã chexexü rü poraäcü rüxóxü rü tama yuxü. ¹⁵ Rü Tupana rü tama yema to ga ngoxona nanachuxu na namaxêêãxücêx ga yema nüxîraüxü ga ngoxochicünêxã. Rü yemaäcü ga yema ngoxo rü nanamaxêê ga yema naxchicünêxã na yadexaxücêx rü na nadaiaüxücêx ga guxüma ga yema duîxügü ga tama nüxü icuèxüügüxü. ¹⁶ Rü yexgumarüü ta guxüma ga duîxügüxü namu na norü tügünemêxêwa rü êxna nacatüwa nüxü na nayexmaxücêx ga wüxi ga cuèxruü ga yema ngoxoéga ixixü. Rü yemaäcü nanamu ga guxüma ga duîxügü rü woo buxü rü êxna yaxü, rü woo duîxügü i muärü dîeruãxgüxü rü êxna ngearü dîeruãxgüxü, rü woo duîxügü i ngearü coriãxgüxü rü êxna duîxügü i ixãärü coriãxgüxü. ¹⁷ Rü taxucürüwa texê tümaärü tacücêx tataxe rü êxna tümaärü tacümaa tataxe ga yexguma tümaärü tügünemêxêwa rü êxna tümacatüwa tüxü natauxgu ga yema ngoxoéga rü êxna yema ngoxoégarü cuèxruü ga número. ¹⁸ Rü ñaã orexü na icuáxücêx, rü tanaxwêxe na tüxü nangêxmaxü i tóru cuèx. Rü yíxema tüxü nangêxmaxê i tümaärü cuèx, rü name nixi i tanangugü i ngêma número i ngêma ngoxoéga ixixü. Erü ngêma número rü wüxi i yatüégachirêx nixi. Rü ngêma número rü 666 nixi.

14

Yema 144,000 ga duîxügüarü wiyae

¹ Rü yemawena ichadawenü, rü nüxü chadau ga guma pecaduarü ütanücêx yucü ga guma mëxpüne ga Siðügu ägeganeütügu chicü. Rü naxütawa nayexma ga 144,000 ga duîxügü ga nacatüwa ixãegaxü namaã ga guma pecaduarü ütanücêx yucüéga rü Nanatü ya Tupanaega. ² Rü ñüxüchi nüxü chaxinü ga wüxi ga naga ga tagaxü ga daxüguxü ga naãnewa inaxüxü ga ñoma taxü i cotüna i chuchchuxügarüü ixixü rü ñoma poraäcü yaduruanexürüü ixixü rü ñoma muxüchixü i duîxügü i arpawa ípaxetagüxürüü ixixü. ³ Rü yema 144,000 ga duîxügü rü nagu nawiyaeü ga wüxi ga yexwacaxüxü ga wiyae napêxewa ga Tupanaärü tochicaxü rü napêxewa ga yema ägümücü ga daxücüãx ga maxêxü rü napêxewa ga yema 24 ga äëxgacügü. Rü taxucürüwama texê ga togue nüxü tacuèxéga ga yema wiyae. Rü yema 144,000 ga duîxügüxicatama nixi ga nüxü cuèxgüxü. Rü yema nixi ga Tupana ñoma ga naãnewa deixü na namaxêêãxücêx. ⁴ Rü yema nixi ga duîxügü ga tama ñoma ga naãneärü ngüchaü i chixexümaa nügu äüächiarü maxüãxgüxü rü tama nüxü rüxoexü na Tupanaãxü yaxögüãxü. Rü nümagü rü yima Tupana Nane ga pecaduarü ütanücêx yucüwe narüxü i ngextá inaxüxüwa. Rü yemagü nixi ga ñoma ga naãneçüãxtanüwa nüxira Tupana naxcêx taxexü na noxrü rü Naneärü duîxügü i üünexü yixigüxücêx. ⁵ Rü yematanüwa rü taguma texê nüxü taxinü na doraxü yaxugüxü, erü Tupanapêxewa rü nataxuma i norü chixexü.

Orearü ngeruügü ga daxücüãxärü orechiga

⁶ Rü ñüxüchi nüxü chadau ga wüxi ga to ga orearü ngeruü ga daxüguxü ga naãnegu íxexüxü ga iyangexü ga Tupanaärü ore i guxügutáma ixixü, na guxü i nachüãneçüãxgümaa rü nagüxüraüxü i duîxügümaa rü guxüma i duîxügü i nagüxüraüxü i nagawa idexagüxümaa nüxü yaxuxücêx. Rü

yemaácü inayange ga yema Tupanaärü ore na guxüma i ñoma i nañewa maxëxü i duüxügümaã nüxü yaxuxücëx. ⁷Rü tagaácü ñanagürü:

“¡Nüxü pemuüë ya Tupana rü nüxü picuëxüüügü! Erü marü nawa nangu na guxüma i duüxügüna naçaxü. ¡Rü nüxü picuëxüüügü ya yima naxücü i daxüguxü i naäne rü ñoma i naäne rü taxtü i taxü rü guxüma i natüxacügü!” ñanagürü. ⁸Rü yemawena nangox ga to ga orearü ngeruü ga daxüçüâx, rü ñanagürü:

“Marü nagu nayarüchixe ya yima ñäne ya taxüne ya Babiróniã, rü nagu napogüe rü nayawëxtaügüxëë ya norü ñgü. Yerü yema ñanecüâx rü nanachixexëë ga guxüma ga to ga nachüñanecüâx ga duüxügü. Rü guxüma ga yema duüxügüxü namu na naxügüâxücëx ga yema chixexü ga guma ñanewa naxügüxü ga Tupanapëxewa poraácü chixexü”, ñanagürü. ⁹⁻¹⁰Rü yemawena nangox ga to ga orearü ngeruü ga tagaácü ñaxü:

“Ngëxguma chi texé nüxü icuëxüüügu i ngëma ngoxo rü naxchicünëxãxü ticuëxüüügu rü tügü itaxãxgu na tümacatüwa rü êxna tümamëxëwa ngëma ngoxoégamaã tacuëxruñãxü, rü Tupana rü poraácüxüchi tá tüxü napoxcu namaã i ngëma poxcu i guxüärü yexera ixixü i nümatama ya Tupana norü numaã namexëëxü. Rü üxümaã rü azufre i iyauraxümaã tá ngüxü tüxü ningexëë napëxewa i norü orearü ngeruü rü napëxewa ya yima Nane ga pecaduarü ütãnücëx yucü. ¹¹Rü naëma ya yima üxü ya nawa Tupana ngüxü tüxü ingexëene, rü guxügutãma ngëma nicaixqueecha. Rü bai i irarüwa tá tüxü narüna i ngëma ngüxü ya yixema ngëma ngoxoxü rü ngëma ngoxochicünëxãxü icuëxüügüxe rü tügü ixãxë na ngëma ngoxoégamaã taxãegaxü. Rü bai i ngunecü rü bai i chütacü tá tüxü narüna i ngëma ngüxü”, ñanagürü. ¹²Rü ngëmacëx ya yixema Tupanaärü duüxügü ixigüxe rü norü orega ñnëxë rü Ngechuchuaxü yaxögüxe, rü name nixi na yaxna namaã taxñnëxü rü tayaxögüamaxü ega woo çacü rü guxchaxü tüxü ngupetügu. ¹³Rü ñuxüchi nüxü chaxñnü ga wüxi ga naga ga daxüguxü ga nañewa inaxüxü ga ñaxü choxü:

“¡Naxümatü i ñaã ore i tá cumaã nüxü chixuxü! Rü ñuxmaücüü tá tataãëgü ya yixema tórü Coriaxü meã yaxögüãcüma yuexe. Erü Tupanaãë i Üünexü rü ñanagürü: ‘Ngü, ngëmaácü tá tataãëgü ya yixema, erü tá itarüngüë nüxna i tümäärü puracügü. Rü ngëma mexü i taxügüxü rü tümamaã wüxigu daxüguxü i nañewa tá naxü’”, ñanagürü.

Ñoma i nañewa nanade i ngëma duüxügü i Tupanaärü ixigüxü

¹⁴Rü ñuxüchi ichadawenü rü nüxü chadau ga wüxi ga caixanexü ga cómuxü. Rü yema caixanexüëtüwa narüto ga Tupana Nane ga duüxüxü ixicü. Rü naëruwa nayexma ga wüxi ga norü ngëxcuerü ga uirunaxcëx. Rü namëxwa nayexma ga wüxi ga cüxchi ga ínapomaguxü ga tãxexichü. ¹⁵Rü Tupanapatawa ínaxüxü ga wüxi ga to ga orearü ngeruü ga tagaácü ñaxü nüxü ga guma caixanexüëtüwa rütocü:

“¡Inaxügü na cunadexü i ngëma duüxügü i cuxrü ixigüxü! Erü marü nawa nangu na cugüxütawa cunagagüxü, erü ngëma curü duüxügü i ñoma i nañewa ngëxmagüxü rü ínamemare na cunadexü”, ñanagürü. ¹⁶Rü ñuxüchi ga guma yema caixanexüëtüwa rütocü rü ñoma trigu i buxuxürüü nañeëtügu ngümaã nayabuächu ga norü cüxchi. Rü nanade ga yema norü duüxügü ga ñoma ga nañewa yexmagüxü. ¹⁷Rü ñuxüchi daxüguxü i nañewa ngëxmane ya Tupanapatawa ínaxüxü ga wüxi ga to ga orearü ngeruü ga nüxü nayexmacü ga wüxi ga cüxchi ga ínapomaguxü ga tãxexixcü. ¹⁸Rü yema pumaraarü

gutêxeruwitaxmüwa ínaxüxü ga wüxi ga to ga orearü ngeruü ga üxümaã icuãxü. Rü nüma rü tagaãcü ñanagürü nüxü ga yema to ga orearü ngeruü ga yema cüxchi ga ínapomaguxcü ga têxechixcü nüxü yexmaxü:

“Ínaxügü na cunadexü i ngêma duüxügü i yéa naãnewa ngêxmagüxü i tama Tupanaãrü íxígüxü! Erü marü nawa nangu na Tupana napoxcuexü”, ñanagürü. ¹⁹ Rü yema orearü ngeruü rü ñoma ga naãneetügu ngímaã nayabuãchi ga norü cüxchi. Rü nayadexechi ga yema duüxügü ga tama Tupanaãrü íxígüxü ga ñoma ga naãnewa yexmagüxü. Rü wüxi ga taxü ga nachicagu nanawocu na yexma Tupana norü numaã nadêjxüçèx, ñoma ubagü imêjxtüüxürü. ²⁰ Rü yema nachica ga íãneãrü íxpemawa yexmaxügu nanadai. Rü guma nagü ga yéma íyaxüchicü, rü 300 ga kilómetru inayarübaichi, rü wüxi ga metruarü ngãxü nixí ga norü mátama ga guma nagü.

15

Tupanaãrü orearü ngeruügu ga nüxü nayexmaxü ga 7 ga poxcuruügu

¹ Rü ñüxüchi ga daxüguxü ga naãnewa rü nüxü chadau ga wüxi ga to ga taxü ga cuèxruü ga namaã íbaixächixü. Rü nayexma ga 7 ga orearü ngeruügu ga daxüçüãx ga nüxü yexmagüxü ga 7 ga poxcuruü. Rü yema poxcugu nixí ga yagüxü ga norü nú ga Tupana. ² Rü yexgumarüü ta nüxü chadau ga ñoma wüxi ga nanaxtaetüwaraüxü ga woruarüü iyauraétücüüxü ga üxüema nawa inachixü. Rü yéma tayexmagü ga guxema nüxü rüyexeraxe ga yema ngoxo rü yema ngoxochicünèxã rü yema ngoxoéga rü yema númeru ga yema ngoxoéga íxíxü. Rü yema nanaxtaetüwaraüxügu tachigü. Rü tüxü nayexmagü ga tümaãrü paxetarüügu ga arpa ga Tupana tüxna äxü. ³ Rü nagu tawiyægü ga Moiché ga Tupanaãrü duüxü íxícuarü wiyae. Rü yexgumarüü ta nagu tawiyægü ga yema wiyae ga guma Tupana Nane ga pecaduarü ütãnücèx yucuarü íxíxü ga ñaxü:

“Pa Torü Cori ya Tupana ya Guxüãrü Yexera Poracüx, nataxüchi rü namexèchi i guxüma i ngêma cuxüxü. Rü cuma rü guxügutáma guxüma i nachíüãnegüarü äëxgacü quixí. Rü cuma rü aixcüma meãma namaã icucüèx rü tagama quidora. ⁴ ¿Rü texé táütáma cuxü tamuü, Pa Corix? ¿Rü texé táütáma cuxü ticüèxüü? Erü cuma rü cuxicatama nixí i üünecü quíxü. Rü guxüma i nachíüãnecüãx rü nuã tá naxí, rü tá cuxü nicüèxüügu. Yerü marü nüxü nadaugü na quixaixcümaxü i guxüma i ngêma nüxü quixuxüwa rü aixcüma mea cunangugüxü i guxüma i ngêma chixexü ügüxü rü ngêma mexüü ügüxü”,

ñanagürü ga yema wiyae. ⁵ Rü yemawena ichadawenü rü nüxü chadau ga daxüguxü ga naãnewa na yawãxnaxü ga yema nachica ga üünexü ga Tupanapataarü aixepewa yexmaxü ga ngexta namaã ínanguxüguüxüwa ga guma nuta ga Tupanaãrü mugü nagu úmatücü. ⁶ Rü guma Tupanapatawa ínachoxü ga yema 7 ga orearü ngeruügu ga daxüçüãx ga nüxü nayexmagüxü ga yema 7 ga poxcuruügu. Rü naxchiru ga mexèchixümaã rü iyauracüüxümaã nixãxchiru. Rü yema norü goyeremüügu rü uirunaxcèx nixí. ⁷ Rü ñüxüchi wüxi ga yema ägümücü ga daxüçüãx ga maxüxü, rü wüxichigü ga yema 7 ga orearü ngeruügu na nanaxã ga wüxi ga copa ga uirunaxcèx ga Tupana ya guxüguma maxèchacuarü nu i äücümaxümaã íxãacüxü. ⁸ Rü guma Tupanapata rü namaã naxãacu ga yema caixema ga Tupana ya mexèchicü rü poracüwa ne üxü. Rü taxucürüwama texé yexma taxücu ñüxmata nagü ga yema 7 ga poxcuruü ga yema 7 ga orearü ngeruüguaxü yexmaxü.

16

copagü ga Tupanaärü numaã ixãäcuxüchiga

¹ Rû ñuxüchi nüxü chaxîñü ga wüxi ga naga ga tagaäcü guma Tupanapatawa inaxüxü ga ñaxü nüxü ga yema 7 ga orearü ngeruügu:

“iñgema pexî, rû naãneetüwa peyabagüäcü i ngêma 7 i copagü i Tupanaärü nu i äücümaxümaã ixãäcuxü!” ñanagürü. ² Rû yema naxü ga wüxi ga Tupanaärü orearü ngeruü, rû naãneetügu nayabaäcü ga norü copa. Rû guxüma ga duüxügü ga yema ngoxoégamaã ixãegaxü rû yema ngoxochicünëxãxü icuëxüügüxü, rû nawa inayarüogü ga taixna ga ngxuchixü ga taguma ixëxü. ³ Rû yema norü taxre ga orearü ngeruü, rû taxü ga taxtüëtügu nayabaäcü ga norü copa. Rû nagüxü nananguxuchi ga dexá, rû ñoma wüxi i duüxü i texé imáxügürüü nixî ga dexá. Rû guxüma ga tacü ga taxtüwa maxëxü rû nayue. ⁴ Rû yema norü tomaëxpüx ga orearü ngeruü rû natügüëtügu rû natüxacügüëtügu nayabaäcü ga norü copa. Rû guxüma ga yema natügü rû natüxacügü, rû nagüxü nanacëxichi. ⁵ Rû ñuxüchi nüxü chaxîñü ga yema Tupanaärü orearü ngeruü ga guxüma ga dexámaã icuáxü ga ñaxü:

“Pa Torü Cori ya Tupana ya Üüncü ya Woetama Yexmaëchacü rû Ñuxma Ngëxmaëchacü, cuma rû wüxi i mexü cuxü na ngëmaäcü dexá nagüxü cunacëxichixëëxü naxchaxwa i ngêma duüxügü. ⁶ Yerü nümagü rû nanadai ga yema curü duüxügü rû curü orearü uruügu, rû inanaba ga nagü. Rû ñuxma i cuma rü wüxi i mexü nixî i cuxüxü na ngêma dexá nagüxü cunacëxichixëëxü na nawa naxaxegüxücëx. Yerü yema nixî ga yema nanaxwëxegüxü rû yemacëx nixî ga curü duüxügüxü nadëjixü”, ñaxü. ⁷ Rû nüxü chaxîñü ga wüxi ga naga ga yema pumaraarü gutëxeruütaxmüwa inaxüxü ga ñaxü:

“Ngü, Pa Cori ya Tupana ya Guxüärü Yexera Poracüx, aixcüma nixî i namexü i ngêma cuxüxü”, ñaxü. ⁸ Rû yema norü ägümücü ga orearü ngeruü rû üëxcüëtügu nayabaäcü ga norü copa. Rû yemaäcü poraäcü nananaiemaxëë ga üëxcü na yema norü naïëmaxümaã inaguäxücëx ga duüxügü. ⁹ Rû guxüma ga duüxügü rû poraäcü nüxü nanguxema, natürü tama nüxü narüxoe ga nacüma ga chixexü rû tama Tupanaxü nicuëxüügü. Rû naguxchigagüama namaã ga Tupana ya guxüma i ngêma porcuruümaã icuäcü. ¹⁰ Rû yema norü wüximëxpüx ga orearü ngeruü, rû yema ngoxoarü tochicaxüëtügu nayabaäcü ga norü copa. Rû guxüwama ga ngextá äëxgacü iyixüwa ga yema ngoxo, rû naxëäne. Rû yema na poraäcü nüxü nangüxü ga duüxügü, rû nügü nangöörü conüäxgü. ¹¹ Natürü woo yemaäcü nüxü na nangupetüxü ga duüxügü, rû tama nüxü narüxoechaü ga yema chixexü ga naxügüxü. Natürü yema na poraäcü nüxü nangüxü ga norü taixnagü, rû naguxchigagüama namaã ga Tupana ya daxügücü. ¹² Rû yema norü 6 ga orearü ngeruü, rû yema taxtü ga Eufatéëtügu nayabaäcü ga norü copa. Rû inayache ga yema taxtü na wüxi ga nama na yiixücëx naxcëx ga yema nachüüänegüarü äëxgacügü ga üëxcü iyarügoxüwa ne ixü. ¹³ Rû nüxü chadau rû yema coyaäxwa, rû yema nüxüraüxü ga ngoxoëxwa, rû yema to ga ngoxo ga yema orearü uruüñetaëxwa, rû wüxiëxwachigü inaxüxü ga wüxi ga naãe ga chixexü ga ñoma curururüü ixixü. ¹⁴ Rû yema ngoxoäëgü nixî ga naxügüxü ga yema taxü ga cuëxruügü ga duüxügü taxucürüwa ügüxü. Rû yema ngoxogü rû inachoxü na nangutaquëxëëgüäxücëx i guxüma i ñoma i naãnewa ngëmagüxü i nachüüänegüarü äëxgacügü na Tupana ya Guxüärü Yexera Poracümaã nügü nadaixücëx i ngëxguma nawa nanguxgu i naãneärü

gux. ¹⁵ Natürü dücax, rü pexuãëgü erü tórü Cori ya Ngechuchu ya Cristu rü ñanagürü:

“Choma rü ngürüãchi taxúetãma choxü ñanguxëëyane íchangu, ñoma wüxi i ngítëxãxü ñinguxürüü. Rü tataãë ya yíxema ímemarexe ñoma wüxi i duüxü i naxchiru ímexëëxürüü na tama tangexchiruxüçëx rü taxãnexüçëx i ngëxguma íchanguxgu”, ñanagürü. ¹⁶ Rü yema ngoxogü, rü nanangutaquëxexëë ga guxüma ga ñoma ga naãnewa yexmagüxü ga nachiuãnecüãxgüarü ãëxgacügü. Rü yema nachica ga nawa nangutaquëxegüxü, rü Armaguedóügu naxãega i Yudíugügawa. ¹⁷ Rü yema norü 7 ga orearü ngeruü, rü buanecügumare nayabaãcu ga norü copa. Rü guma Tupanapata ya daxüguxü i naãnewa ngëxmanewa inanaxü ga wüxi ga naga ga tagaxü ga yema Tupanaãrü tochi-caxüwa inaxüxü ga ñaxü:

“Marü ningu”, ñaxü. ¹⁸ Rü nibëjxëxane, rü poraãcü nicuxcuane, rü niduruane. Rü poraãcü naxiãxãchiane. Rü noxri Tupana duüxügüxü üxgumama rü taguma nayexma ga wüxi ga íãxãchiane ga yemarüü poraxü. ¹⁹ Rü guma ñãne ga taxüne ga Babiróniã, rü tomaëxpüxgu ningüxyeane. Rü guma ñãnegü ga ñoma ga naãnewa yexmagüne rü niwëxtaüügü. Rü Tupana rü nüxna nacuxãchi ga guma ñãne ga Babiróniãrü chixexü. Rü yemacëx norü numaã poraãcü nanapoxcu ga guma ñãne, yerü poraãcüxüchi namaã nanu. ²⁰ Rü guxüma ga capaxügü rü guxüñema ga mëxpúnegü, rü inayarüxogü. ²¹ Rü daxüwa narüyi ga gauxü ga itapütaxü, rü duüxügüetügu nayi. Rü wüxpütachigü ga yema gauxü, rü 40 ga kilogu nixi ga nayaxü. Rü ga duüxügü rü Tupanamaã naguxchigagü nagagu ga yema poxcuruü ga gauxü, yerü poraãcü nüxü nangux ga yema poxcu ga Tupana namaã napoxcuexü.

17

Ñãne ga Babiróniã ga wüxi ga nge ga ngëãxü- chicügu ixixüñe

¹ Rü yema 7 ga orearü ngeruügü ga nüxü yexmagüxü ga 7 ga copagü, rü yematanüwa rü wüxi ga orearü ngeruü, rü chauxcëx nixü, rü ñanagürü choxü:

“¡Nuã naxü! Rü tá cuxü nüxü chadauxëë i tacü tá nixi i ngürü poxcu i ngëma nge i ngeãxüchicü i taxü i dexágüetüwa rütoxcü. ² Rü ñoma i naãnewa ngëxmagüxü i nachiuãnegüarü ãëxgacügü, rü ngímaã namaxë, rü yemaãcü poraãcü chixexü naxügü. Rü guxüma i ñoma i naãnecüãx, rü ngürü chixexü nüxna naxüë”, ñanagürü. ³ Rü yexguma Tupanaãe i Üñexü yemaãcü choxü ngoxetüxëëgu, rü yema orearü ngeruü rü wüxi ga nachica ga ngextã taxúema íãpataxüwa choxü naga. Rü yema ngíxü chadau ga wüxi ga nge ga wüxi ga ngoxo ga dauxüetüwa rütoxcü. Rü yema ngoxo rü guxüwama naxãegaxüne, rü yema naegagü rü Tupanamaã naguxchiga. Rü 7 nixi ga naëru rü 10 ga naxchatacxre. ⁴ Rü yema nge rü wüxi ga naxchiru ga dauxracharaxü rü dauxümaã íãxchiru. Rü uirumaã rü nutagü ga mexëchicümaã ingãxãë. Rü ngíxmëxwa ngíxü nayexma ga wüxi ga copa ga uirunaxcëx. Rü yema copa rü namaã naxãacu ga nagüxüraüxü ga yema Tupanapëxewa chixexü rü nagüxüraüxü ga chixexügü ga yema nge üxü. ⁵ Rü ngícatügu naxümatü ga wüxi ga naega ga taxúema nüxü cuaxü na ñuxü ñaxüchiga yíixü. Rü yema naëga rü ñanagürü:

“Rü yima Babiróniã rü guxüma i ngema duüxügü i chixexü ügüxü i ñoma i naãnewa maxëxüarü mamá nixi”, ñanagürü. ⁶ Rü ngíxü chadau ga yema nge ga na nangãxüxü namaã ga guma nagü ga yema duüxügü ga Tupanaãrü

ixígüxü rü yema duüxügü ga Ngechucharü orexü na yaxugüxüçèx dèixü. Rü yexguma yemaxü chadèuxgu, rü chabaixächi. ⁷ Rü yexguma ga yema orearü ngerü rü ñanagürü choxü:

“¿Tacüçèx cubaixächi? Düçèx, tá cumaã nüxü chixu na tacüchiga yïixü i ngëma nge, rü tacüchiga yïixü i ngëma ngoxo i 7 eruxü rü 10 chatacuxrexü i naetüwa natoxü. ⁸ Rü ngëma ngoxo i nüxü cudauxü, rü yema nixi ga nuxcümäxüchi maxchirèxü natürü ñuxma rü marü yuxü rü ngëma äxmaxü i taxuguma iyacuáxüwa ngëxmaxü. Natürü paxa tá ngëma íxüxüxü, rü ñuxüchi ngëma nachica i guxügutäma nagu napoxcuxüwa tá üxü. Rü ngëma ngoxoma ä tá nabaixächiäëgü i ngëma duüxügü i ñoma i naänewa maxèxü i tama nawa ngoxégagüxü i ngëma Tupanaärü popera i noxritama naäne ixügügu Tupana nagu yawügüxü i ngëma duüxügü i nüxü nangëxmaxü i maxü i taguma güxü. Rü nümagü i ngëma duüxügü rü aixcüma tá namaã nabaixächiäëgü i ngëxguma nüxü nadaugügu i ngëma ngoxo ga nuxcümäxüchi maxchirèxü rü yuxü natürü wena táxarü ínguxü. ⁹ Rü ñaã nixi i wüxi i ore naxcèx i ngëma duüxügü i nüxü natauxchaxü na nüxü nacuèxgüxü. Rü ngëma 7 i naëru i ngëma ngoxo, rü yima nixi ya 7 ya mëxpünechiga. Rü yima 7 ya mëxpünegetüwa nixi i natoxü i ngëma nge. Rü ngëxgumarü ta i ngëma naërugü, rü 7 i nachiüänegüarü äëxgacügüchiga nixi. ¹⁰ Rü wüximèëxpüx i ngëma äëxgacügü rü marü togü nüxü narüyexeragü, rü ñuxma rü marü tama äëxgacügü nixigü. Rü ngëma norü 6 i ngëma äëxgacügü, rü nüma rü ñuxma rü äëxgacü nixi. Rü ngëma norü 7 tá nixi i yixcüra ínguxü. Natürü ngëxguma ínanguxgu i ngëma norü 7 i nawa iyacuáxü i ngëma äëxgacügü, rü paxaächimare tá nixi i äëxgacü yïixü. ¹¹ Rü ngëma ngoxo ga nuxcümäxüchi maxchirèxü rü ñuxma rü marü yuxü, rü ngëma nixi i norü 8 i ngëma äëxgacügü. Rü nüma rü ngëma 7 tanüxü nixi. Natürü i nüma rü ngëma nachica i guxügutäma nagu napoxcuxüwa naxü. ¹² Rü ngëma 10 i naxchatacuxre i nüxü cudauxü, rü 10 i nachiüänegüarü äëxgacügüchiga nixi. Natürü i nümagü rü tauta inanaxügüe na duüxügümaã inacuèxgüxü. Natürü yixcüra tá nanayauxgü i pora na wüxítäma i ora ngëma ngoxomaã wüxigu äëxgacügü yixígüxüçèx. ¹³ Rü ngëma 10 i äëxgacügü rü wüxigu nagu narüxinüë na ngëma ngoxona naxägüäxüçèx i norü pora, na ngëma ngoxo namaã icuáxüçèx. ¹⁴ Rü ñuxüchi i ngëma äëxgacügü rü ngëma ngoxo rü tá nügü nadai namaã ya yima Tupana Nane ga pecaduarü ütanüçèx yucü. Natürü ya yima Tupana Nane rü tá nüxü narüyexera, erü nüma rü guxü i corigüarü Cori nixi, rü guxü i nachiüänegüarü äëxgacügüarü Äëxgacü nixi. Rü yixema namüçügü ixígüxe, rü yixemagü tixigü ya Tupana tüxü dexe rü tümacèx naçaxe. Rü tümagü rü aixcüma naga taxínüë”, ñanagürü choxü. ¹⁵ Rü yema orearü ngerü rü ñanagürü ta choxü:

“Ngëma taxü i dexä i nüxü cudauxü i naetüwa natoxü i ngëma nge i ngëäëxüchicü, rü nagüxüraüxü i duüxügüchiga nixi, rü guxüma i duüxügü i to i nagawa idexagüxüchiga nixi, rü guxüma i nachiüänecüäëxgü i duüxügüchiga nixi. ¹⁶ Rü ngëma 10 i naxchatacuxre i nüxü cudauxü i nüxü ngëxmaxü i ngëma ngoxo, rü tá ngëma nge i ngëäëxüchicüchi naxaie. Rü tá ngëma ngena nanapuxü i guxüma i tacü i ngixü ngëxmaxü, rü ngëmaäcü ngexchiruäcüma tá ngëxma irüxäüx. Rü tá ngixü nangöxgü, rü üxüwa tá ngixü nigügü. ¹⁷ Yerü ga Tupana rü yema 10 ga äëxgacügüxü nagu narüxinüëxèë na naxügüäxüçèx i ngëma nanaxwèxèxü i nüma ya Tupana. Rü ngëmacèx i ngëma äëxgacügü, rü tá wüxigu nagu narüxinüë na ngëma ngoxoxü naporaxèëgüxü na norü äëxgacü yïixüçèx ñuxmatáta Tupana yanguxèë i ngëma nüxü yax-

uxù. ¹⁸ Rù ngēma nge i ngīxù cudēuxcù, rù yima nixī ya yima ĩāne ya taxūne ya guxūma i nachīūānegūarū āēxgacūgūmaā icuáxūne”, űanagūrū.

18

Nagu nayarūchixe ga ĩāne ga Babiróniā

¹ Rù yemawena nūxù chadau ga wūxi ga to ga orearū ngeruū ga daxūguxù ga naānewa ĩrūxīxù ga taxù ga āēxgacū ixīxù. Rù yema orearū ngeruūārū yauracūūxūmaā nangōone ga űoma ga naāne. ² Rù tagaācū űanagūrū:

“Marū nagu nayarūchixe ya yima ĩāne ya Babiróniā ya itaēgacūxūne. Rù űuxma rù ngoxogūchiū nixī rù nagūxūraūxū i naāē i chixexūgūchiū nixī. Rù űuxma rù ngēma naxāchiū i nagūxūraūxū i ngurucugū rù werigū i chixexū i duūxūgū naxchi aixē. ³ Yerū guxūma ga nachīūānecūāxgū, rù guma ĩāneārū chixexū nūxna naxūe. Rù norū āēxgacūgū, rù yēma poraācū chixri namaxē. Rù guxūma ga űoma ga nachīūānecūāxgū ga taxetanūxūgū, rù nūgū namuārū dīerūāxēēgū namaā ga yema ĩāneārū yemaxūgū ga tama Tupanapēxewa mexù”, űanagūrū. ⁴ Rù űuxūchi nūxù chaxīnū ga to ga naga ga daxūguxù ga naānewa inaxūxù ga űaxù:

“ĵDūcēx i guxāma i pema ya chorū duūxūgū ixīgūxe, rù ĩpechoxū nawa ya yima ĩāne na tama ngēma ĩānecūāxrxūū pipecaduāxgūxūcēx rù tama nagu peyixūcēx i ngēma poxcu i tá yima ĩānewa nguxù! ⁵ Erū ngēma ĩānecūāxarū pecadugū, rù nūgūētūwa narūnucue, rù dūxwa marū daxūguxù i naānewa nangu. Rù űuxma ya Tupana rù nūxna nacuēxāchi i ngēma chixexū i naxūgūxù, rù ngēmacēx tá yima ĩānexū napoxcu. ⁶ Rù ngēma poraācū chixexū na naxūgūrūū, rù ngēxgumarūū tá ta nixī na chixexūmaā nūxù penaxūtānūxù i pemax. ĵRū űuxma na ngēma ĩānecūāx togūmaā chixexū naxūgūxù, rù taxreēxpūxcūna tá penachixexēē i pemax! ĵRū ngēma chixexū ga yema ĩānecūāx togūcēx mexēēgūxù, rù pema rù taxreēxpūxcūna tá ngēmaācū naxcēx penamexēē! ⁷ ĵRū ngēma na nūgū yacuēxūūgūxù rù mexēchixūwa na namaxēxù, rù ngēxgumarūū tá ta nixī na ngūxù nūxù pingexēēgūxù rù ngechaū nūxù pingexēēgūxù! Erū űuxma i ngēma ĩānecūāx rù nūgūāewa űanagūrūgū: ‘Yixema rù űoma wūxi i āēxgacūrūū mexēchixūwa tangēxmagū. Rù tagutāma wūxi i yutexūrūū tangechaūgū’, űanagūrūgū nūgūāewa i ngēma ĩānecūāx. ⁸ Rù ngēmacēx tá nixī i wūxitātama i ngunexūgu ĩnanguxù i ngēma ĩāneārū poxcuruū. Rù ngēma ĩānecūāx rù ngūanemaā tá nayue, rù poraācū tá nangechaūgū, rù poraācū taiya tá nūxù nangux, rù norū ĩāne rù ūxūmaā tá nigu. Erū naporaxūchi ya yima Tupana ya guxūārū Cori ixīcū i ngēma ĩānexū poxcucū”, űanagūrū ga yema naga. ⁹ Rù ngēma nachīūānegūarū āēxgacūgū ga yema ĩānewa poraācū chixri maxēx rù mexēchixūwa yexmagūxù, rù tá poraācū norū ngechaūmaā yima ĩānecēx naxauxe i ngēxguma nūxù nadaugūgu i ngēma ūxūema i namaā yaxaxù. ¹⁰ Natūrū ngēma āēxgacūgū rù ngēma poxcuxù na namuētēxūchēxwa rù tá yaxūwa nūxù narūdaunū, rù űanagūrūgū tá:

“Cungechaūtūmūū, Pa Itaēgacūxūne ya ĩāne ya Babirónia ya Guxù i Nachīūānegūmaā Porachirēnex. Erū wūxitāma i oragu cuxcēx ĩnangu i curū poxcu”, űanagūrūgū tá. ¹¹ Rù guxūma i űoma i naānecūāx i taxetanūxù, rù tá poraācū norū ngechaūmaā naxcēx naxauxe ya yima ĩāne. Erū marū taxūetāma naxcēx nūxù tataxe i norū ngēmaxūgū i ngema nangegūxù. ¹² Rù marū taxūetāma naxcēx nūxù tataxe i norū uiru, rù norū dīerumū, rù norū

nutagü i mexêchixü, rü naxpügü i mexêchixü i dauxracharaxü rü idauxcharaü i ngema nangegüxü. Rü ngêxgumarüü ta taxúetáma naxcêx nüxü tataxe i nagüxüraüxü i norü naixchipanügü i yixixü, rü norü ngêmaxügü i marfilnaxcêx rü mürapewa i mexêchixü naxcêx rü cobrenaxcêx rü fierunaxcêx rü nutanaxcêx i ngema nangegüxü. ¹³ Rü taxúetáma naxcêx nüxü tataxe i norü canela rü togü i norü üexüwemüxügü i yixixü, rü pumaratêxe i guruü ixixü, rü togü i pumaragü i yixixü, rü binügü rü chixügü, rü arina i mexêchixü, rü trigu i ngema nangegüxü. Rü ngêxgumarüü ta ngema nana-gagü i wocagü, rü carnerügü, rü cowarügü, rü autügü i cowaru itüchigüxü, rü duüxügü i puracüruügü. Rü ngêmaäcü woo duüxêgü rü ngema tüxü nagagü na tümamaä nataxegüxücêx. ¹⁴ Rü ngêma taxetanüxü, rü ñanagürügü tá nüxü ya yima ñâne:

“Cuwa rü marü nataxuma i ngêma orix i curü duüxügüarü me ixixü. Rü marü nataxuma i guxüma i ngêma meruügü ga noxri cuxü yexmaxü, rü tagutáma wenaxârü cuxü nangêxma”, ñanagürügü tá. ¹⁵ Rü ngêma taxetanüxü i guxüma i ngêma orixgümaä rü ngêma meruügümaä taxegüxü rü guma ñanegu nügü muârü diêruâxêxüchigüxü, rü yaxüwa tátama nüxü narüdaunü ya yima ñâne, erü nüxü namuê i ngêma poxcu i yima ñanexü üpetüxü. Rü tá poraäcü norü ngechaümaä naxauxe. ¹⁶ Rü ñanagürügü tá:

“Nangechaütümüü ya yima ñâne ya itaxégacüxüne. Erü noxri rü ñoma wüxi i nge i mexêchixü i naxchiru i dauxracharaxü rü dauxcharaxümaä äxchirucü i uirumaä rü nutagü ya mexêchicümaä ngêxâêxcürüü nixi. ¹⁷ Natürü ngürüâchi nagux i guxüma i ngêma ñâneârü meruügü”, ñanagürügü tá. Rü guxüne ya wapurugüarü âxgacügü, rü guxüma i norü duüxügü ya yima wapuruwa puracüexü, rü guxüma i duüxügü ya yima wapuruwa ixü, rü guxüma i taxetanüxügü i wapurugu yarüxüüxü, rü yaxüwa tátama nayachaxgütanüâchi, rü ngema tá nüxü narüdaunü. ¹⁸ Rü ngêxguma nüxü nadaugügu i norü caxixü na yaxaxü ya yima ñâne, rü tagaäcü tá ñanagürügü:

“Nataxuma ya ná i ya ñâne ya daa ñâne ya itaxégacüxünerüü ixixüne”, ñanagürügü. ¹⁹ Rü norü ngechaümaä nügüétügu tá waixüümü nagünagügü, rü tá poraäcü naxauxe, rü tagaäcü ñanagürügü tá:

“Nangechaütümüü ya yima ñâne ya itaxégacüxüne. Rü noxri rü norü yemaxügümaä nügü nimuârü diêruâxêêgü ga guxüne ga wapurugüarü yoragü. Natürü i ñuxma rü ngürüâchi wüxi i oragutama rü inayarüxo i guxüma i ngêma. ²⁰ Natürü ñuxma na napoxcuxü ya yima ñâne, rü name nixi i petaâêgü i pema i daxügüxü i naânewa ngêxmagüe, rü pema i Tupana pexü imugüe, rü pema i Tupanaârü orexü ixügüe, rü guxâma i pema i Tupanaârü duüxügü ixigüe. Erü ñuxma na napoxcuxü ya yima ñâne, rü ngêmaäcü Tupana pexü naxütanü naxcêx ga yema chixexü ga pemaä naxügüxü ga guma ñanecüâx”, ñanagürügü. ²¹ Rü ñuxüchi wüxi ga Tupanaârü orearü ngeruü ga daxüçüâx rü nanangenagü ga wüxi ga nuta ga taxüchicü ga ñoma tacüarü carüürüü ixicü. Rü yema orearü ngeruü rü taxtü ga taxügu nanaña ga guma nuta ga taxüchicü, rü ñanagürü:

“Ngêxgumarüü tá quixi na icuyarüxoxü, Pa ñâne ya Itaxégacüxüne ya Babiróniâx, rü tagutáma texé wena cuxü nadau. ²² Rü tagutáma wena curü itamügüwa texé nüxü taxinü i paxetarügü i arpagü rü quenagü rü cornetagü. Rü ngêxgumarüü ta cuwa nataxütáma i puracütanüxügü i tacüwa puracüexü, rü tagutáma texé nüxü taxinü na cuwa inapuracüexü i chawüarü carügü. ²³ Rü marü tagutáma texé nüxü tadau i cuwa i omü. Rü marü

tagutáma texé nüxü taxínü i ngîgüchigaarü petagüarü cuxcuane. Rü ngêmaäcü tá cumaã nangupetü woo ga noxri rü yema taxetanüxü ga cuwa taxegüxü rü guxüma ga togü ga taxetanüxüârü yexera nixigü. Rü ngêmacêx tá poraäcü cupoxcu nagagu ga yema chixexü ga namaã cunawomüxêêxü ga guxüma ga togü ga nachiuãnecüãx ga duüxügü”, ñanagürü. ²⁴ Yerü guma ñanecüãx ga duüxügü nixi ga nadêixü rü inabaxêgüxü ga nagü ga Tupanaârü orearü uruügü rü yema duüxügü ga Tupanaârü ixigüxü rü guxüma ga duüxügü ga ñoma ga naãnegu Tupanaarü oregagu nadêixü.

19

¹ Rü yemawena nüxü chaxínü ga muxüma ga duüxügüga ga daxüguxü ga naãnewa tagaäcü ñagüxü:

“¡Ngîxã Tupanaxü ticuèxüügü! Erü nüma nixi i tüxü namaxêxêêxü. Rü nüma ya tórü Tupana nixi i guxüârü yexera namexêchixü rü naporaxüchixü.

² Rü nüma rü aixcüma meãma nanangugü i guxüma i duüxügüarü maxü, rü aixcüma tá nanapoxcue i ngêma chixexü ügüxü. Rü ngêmacêx marü nanapoxcu ya yima ñãne ya itaxégacüxüne ya chixene ya norü chixexümaã nachixêgêne i guxüma i ñoma i naãnecüãx i duüxügü. Rü ñuxma i nüma ya Tupana rü norü duüxügü ga guma ñanecüãx dèixüxü naxütanü”, ñanagürügü.

³ Rü ñuxüchi wenaxârü ñanagürügü:

“¡Ngîxã Tupanaxü ticuèxüügü! Erü ngema norü caxixü na yaxaxü ya yima ñãne, rü tagutáma ngêma nayarüxo”, ñanagürügü. ⁴ Rü yema 24 ga âëxgacügü rü yema âgümücü ga daxüçüãx ga maxêxü rü yexma nanangücuchitanü, rü Tupana ya norü tochicaxüwa rütocüxü nicuèxüügü. Rü ñanagürügü:

“Rü ngêmaäcü yîi. ¡Rü ngîxã nüxü ticuèxüügü ya tórü Cori!” ñanagürügü.

⁵ Rü ñuxüchi yema tochicaxüxütawa inanaxü ga wüxi ga naga ga ñaxü:

“Name nixi i tórü Tupanaxü picuèxüügü i guxãma i pemax Pa Buxügü rü Pa Yaxügüx i norü duüxügü na pixigüxü rü nüxü na pemüêxü”, ñaxü.

Tupana Nane ga pecaduarü ütanücêx yucüarü ngîgüarü petachiga

⁶ Rü ñuxüchi nüxü chaxínü ga tacü ga ñoma muxüchixü ga duüxügü idexagüxürrü ixixü ga ñoma taxü i dexá i chuchxüxürrü ixixü ga ñoma poraäcü yaduruanexürrü ixixü ga ñaxü:

“¡Ngîxã Tupanaxü ticuèxüügü! Erü nüma ya tórü Cori ya Tupana ya guxüârü yexera poracü, rü marü ningucuchi na guxümaã inacuáxü. ⁷ ¡Rü ngîxã tataãégü rü guxü i tórü taãêmaã nüxü ticuèxüügü! Erü marü nawa nangu na iyangüxü ya yima Tupana Nane ga pecaduarü ütanücêx yucü. Rü ngêma norü duüxügü i ñoma namêxürrü ixigüxü rü marü nügü ínimexêégü.

⁸ Rü yima Tupana Nane rü ngêma nüxü yaxögüxüxü namu na mexêchixü rü comüxü rü iyauracüxüxü i naxchirumaã na yaxâxchiruxü. Rü ngêma naxchiru i mexêchixü rü ngêma nixi i ngêma duüxügüarü maxü i mexüchiga”, ñanagürügü. ⁹ Rü ñuxüchi ga Tupanaârü orearü ngerürrü, rü ñanagürü choxü:

“Chanaxwêxe i cunaxümatü i ñãã ore i cumaã tá nüxü chixuxü: ‘Tataãégü ya yixema tüxna naxuxe i norü ngîgüarü petawa ya yima Tupana Nane ga pecaduarü ütanücêx yucü’”, ñanagürü. Rü ñuxüchi ñanagürü ta:

“Ngêma ore i cumaã nüxü chixuxü, rü Tupanaârü orexüchitama nixi”, ñanagürü. ¹⁰ Rü choma rü yema orearü ngerürrüpêxegu chacaxâpüxü na nüxü chicuèxüxüçêx. Natürü ga nüma rü ñanagürü choxü:

“¡Tãxü i ngêma cuxüxü! Erü choma rü ta Tupanaârü duüxü chixi, ngêxgumarürrü i cuma rü cueneégü i Ngechucharü ore i aixcüma ixixü

ixõgüechaxürüü ta chixĩ. Rũ name nixĩ i Tupanaxũ quicuèxũü”, ñanagürü. Erũ ngẽma ore i Ngechuchuchiga ixĩxũ, rũ yematama ore nixĩ ga Tupanaãrũ orearũ uruũgũ nüxũ ixugüexũ ga yexguma Tupanaãe i Üünexũ nawa ideaxgu.

Guma Tupana Nane ga cowaru ga cõmüxüetügu tonagücüchiga

¹¹ Rũ ñuxũchi nüxũ chadau ga daxüguxũ ga naãne na yawãxnaxũ. Rũ yẽma nangox ga wüxi ga cowaru ga cõmüxũ. Rũ guma naetüwa rütocü rũ İxaixcũmacü rũ Aixcũma Yanguxẽecü nixĩ i naega. Rũ nüma rũ aixcũma guxũma i duũxügüarü maxũxũ nacuèx, rũ aixcũma tá guxũma i ngẽma chixexũ ügüxũmaã nügü nadai rũ tá nanapoxcue. ¹² Rũ naxëtügü, rũ ñoma üxüemarüü niyauracüü. Rũ naẽruwa rũ namu ga norü ngëxcueruũgü. Rũ nacatügu naxümatü ga wüxi ga naega ga nüxĩcatama nüxũ nacuáxũ. ¹³ Rũ wüxi ga naxchiru ga ducharaxügu nicux. Rũ naega rũ Tupanaãrũ Ore nixĩ. ¹⁴ Rũ nawe narüxi ga guxũma ga norü churaragü ga daxücüãx. Rũ nümagü rũ naxchiru ga imexëchixũ rũ cõmüxũmaã nixãxchiru. Rũ cowarugü ga icõmüxüetügu naxĩ. ¹⁵ Rũ naãxwa nayexma ga wüxi ga tara ga tẽxechixũ na yemamaã naplexẽãxũcëx i guxũma i ngẽma duũxügü i tama nüxũ yaxõgüxũ. Rũ tá nüma nanaxwëxexũãcũma ngẽma duũxügümaã inacuèx. Rũ nüma rũ tá poraãcũ ngẽma duũxügü i tama yaxõgüxũxũ napoxcu namaã i ngẽma poxcu ya Tupana ya Guxũxũ Rũporamaẽcü norü numaa mexëxũ. Rũ ñoma ubagü i norü maıxruũwa imëıxtüũxürüü tá nixĩ na napoxcueãxũ. ¹⁶ Rũ naxchirugu rũ naperemagu naxümatü ga wüxi ga naega ga ñaxũ:

“Guxũma i nachiũãnegüarü aẽxgacügüarü Aẽxgacü, rũ guxũma i corigüarü Cori ixĩcũ”, ñaxũ. ¹⁷⁻¹⁸ Rũ ñuxũchi nüxũ chadau ga wüxi ga Tupanaãrũ orearü ngeruũ ga daxücüãx ga üexcügu chixũ. Rũ nüma rũ tagaacü ñanagürü nüxũ ga guxũma ga ngurucugü ga yexma ixexexütanüxũ:

“ıNuã pexĩ rũ pengutaquẽxegü naxcëx i õna i taxũ i Tupana pexcëx mexëxũ na penangõxüçëx i nachiũãnegüarü aẽxgacügümachi, rũ churaragüarü aẽxgacügümachi, rũ yatügü i poraxüchixümmachi, rũ cowarügümachi, rũ ngẽma cowaruëtügu İxũ i duũxügümachi, rũ ngẽma duũxügü i coriãxgüxümmachi rũ ngẽma ngearü coriãxgüxümmachi rũ ngẽma buxügümachi rũ ngẽma yaxügümachi!” ñanagürü. ¹⁹ Rũ ñuxũchi nüxũ chadau ga yema nüxĩraũxũ ga ngoxo rũ guxũma ga nachiũãnegüarü aẽxgacügü ga norü churaragümaã yẽma ngutaquẽxegüxũ na nügü nadeıxüçëx namaã ya yima cowaruëtügu İxüçü rũ norü churaragü. ²⁰ Rũ yema nüxĩraũxũ ga ngoxo rũ niyaxu. Rũ wüxigu namaã niyaxu ga yema to ga ngoxo ga orearü uruũneta ixĩxũ ga yema nüxĩraũxũ ga ngoxopëxewa naxũxũ ga cuëxruũgü ga duũxügü tama nüxũ cuáxũ na naxügüãxũ. Rũ yema cuëxruũgümaã nixĩ ga nawomüxëãxũ ga yema duũxügü ga nüxũ icuëxüũgüxũ ga naxchicünëxã ga yema nüxĩraũxũ ga ngoxo rũ nügü ixãgüxũ na yema ngoxoégamaã na yaxüéagüxũ. Rũ yema nüxĩraũxũ ga ngoxo rũ yema to ga ngoxo ga orearü uruũneta ixĩxũ, rũ wüxigu maxëxũma nawa nawoũ ya yima naxtaa ya üxũmaã iyaurachiüne ya azufremaã ixaxüne. ²¹ Rũ yema tara ga tẽxechixũ ga guma cowaruëtüwa rütocüxewa yexmaxũmaã nanadai ga yema ngoxogüarü ngüxëeruũgü ga aẽxgacügü rũ norü churaragü. Rũ guxũma ga ngurucugü, rũ yemamachimaã nangãxcharaũgü.

20

Chataná rü 1,000 ga taunecü ninëix

¹ Rü yemawena nüxü chadau ga wüxi ga Tupanaärü orearü ngeruü ga daxüguüxü ga naänewa íruxüxü. Rü naxmëxwa nayexma ga yema äxmaxü i taxuguma iyacuáxüärü chawí rü ñuxüchi wüxi ga cadena. ² Rü yema Tupanaärü orearü ngeruü rü yema coyaxü niyaxu. Rü yematama coya nixí ga yema nuxcúmaüxü ga äxtape ga ngoxo ga Chataná ixíxü. Rü yema orearü ngeruü rü 1,000 ga taunecügücëx nayanëix. ³ Rü yema orearü ngeruü rü yema äxmaxü i taxuguma iyacuáxüga nayatëxcuchi. Rü ñuxüchi yexma meäma nanawäxtaü na nüma ga Chataná rü marü taguma wenaxärü duüxügüxü nawomüxëëxücëx ñuxmatáta 1,000 ya taunecü ngëxma yangeä. Rü ngëxguma marü yanguxëëägu ya yima 1,000 ya taunecü, rü tá paxaxächi nayangëx. ⁴ Rü ñuxüchi nüxü chadau ga ñuxre ga tochicaxügu. Rü yema tochicaxüwa tarütogü ga guxema Tupanaxütawa nayauxgüxe ga pora na duüxügüxü ticagüxücëx. Rü yexgumarüü ta nüxü chadau ga naäëgü ga yema duüxügü ga Ngechucharü orexü na yaxugüxücëx nadaünaägüxü. Rü yema nixí ga duüxügü ga meäma nüxü ixugüxü ga Tupanaärü ore rü tama yema ngoxoxü icuëxüügüxü rü bai ga yema ngoxochicünëxäxü icuëxüügüxü, rü tama nügü ixägüxü na nacatüwa rü ëxna naxmëxwa yema ngoxoégamaä yaxäegaxü. Rü nüxü chadau ga wena na namaxëxü, rü 1,000 ga taunecü Cristumaä wüxigu äëxgacü nixígü. ⁵ Rü yemagü nixí ga nüxírama írüdagüxü. Natürü ga yema togü ga yuexü rü täütama namaxë ñuxmatáta yima 1,000 ya taunecüguwena. ⁶ Rü tataäëgü ya yíxema tüxira írüdagüxe erü Tupanaärü duüxügü tixígü. Rü ngëma Tupanaärü poxcu rü marü täütama tümacëx nixí. Rü tá Tupanaärü rü Cristuarü ngüxëëruügü tixígü. Rü 1,000 ya taunecü tá Cristumaä äëxgacügü tixígü.

ngoxo i Chataná rü marü naga nayarüchixe

⁷ Rü ngëxguma marü nangupetügu ya yima 1,000 ya taunecü, rü Chataná rü tá ningëx i ngëma ínapoxcuxüwa. ⁸ Rü nüma i Chataná rü tá ínaxüxü na yawomüxëëäxücëx i guxüma i ñoma i naänecüäx i duüxügü rü Goga rü Magoga na ngëmagüxü nangutaquëxëëxücëx na Tupanaärü duüxügümaä nügü nadëjxücëx. Rü ngëma Chatanáärü churaragü, rü ñoma taxtü i taxüärü naxnecüchicütëxerüü tá namuxüchi. ⁹ Rü ngëmaäcü i Chatanáärü churaragü rü tá ñoma i naäneärü tagu ninguuchi. Rü tá Tupanaärü duüxügüxü rü yima íane ya Tupana nüxü ngechaxüne ya Yerucharéüxü ínachoeguächi. Natürü Tupana rü daxüwa tá nanayixëë ya üxü, rü yimamaä tá nixae i guxüma i ngëma namaä rüxuanügüxü. ¹⁰ Rü ngëma ngoxo i ngëma duüxügüxü womüxëëxü, rü nawa tá natäe ya yima naxtaa ya üxümaä iyaurchiüne ya azufremaä íaxüne. Rü yima nixí ya naxtaa ga marü nawa nawoüne ga yema nüxíraüxü ga ngoxo rü yema to ga ngoxo ga orearü uruünetä ixíxü. Rü yima naxtaawa tá nixí i guxügutáma ngunecü rü chütacü ngüxü yangegüxü.

Ngëma taxü i tochicaxü i cómüxüwa rütocüpëxewa nangugü i duüxügü

¹¹ Rü ñuxüchi nüxü chadau ga wüxi ga taxü ga tochicaxü ga cómüxü, rü nüxü chadau ga guma nawa rütocü. Rü gumachaxwa nibuxmü ga ñoma ga naäne rü guxüma ga daxüwa nüxü idauxü, rü inayarütaxe. ¹² Rü nüxü chadau ga yema yuexü ga yaexü rü buexü ga Tupanapëgegu chigüxü. Rü ningena ga poperagü. Rü yexgumarüü ta ningena ga yema Tupanaärü popera i naga yawügüxü i ngëma duüxügü i nüxü nangëxmaxü

i maxũ i taguma gũxũ. Rũ yema yuexũ rũ yexgumarũũ ga ñuxãcũ na namaxẽxũ ga wũxichigũ rũ yexgumarũũ ga ñuxãcũ na yema poperawa inaxũmatũxũrũũãcũma Tupana namaã nũxũ nixu na ngextã tá naxĩxũ. ¹³ Rũ yema yuexũ ga taxtũ ga taxũwa yexmagũxũ rũ wenaxãrũ ñnarũdagũ. Rũ yema yuexũ ga tauquewa yexmagũxũ rũ wenaxãrũ ñnarũdagũ. Rũ yemaãcũ ñnarũdagũ ga guxũma ga duũxũgũ ga yuexũ. Rũ guxũma ga yema yuexũ rũ Tupana nũxna nicachigũ rũ yexgumarũũ ga ñuxãcũ na namaxẽxũ ga wũxichigũ rũ namaã nũxũ nixu na ngextã tá naxĩxũ. ¹⁴ Rũ yemawena rũ guma naxtaa ga ùxũmaã iyaurchiũnewa nawoũ ga yu guxũma ga norũ poramaã. Rũ guma naxtaa ga ùxũmaã iyaurchiũne, rũ ngẽma nixĩ i poxcu i taguma iyacuãxũ i tũmacẽx ixĩxũ ya yĩxema tama Tupanaãrũ duũxũgũ ixĩgũxe. ¹⁵ Rũ guma naxtaa ga ùxũmaã iyaurchiũnewa tawoũ ga guxema ingeãgaxe nawa i ngẽma Tupanaãrũ popera i nagu tiwũgũxũ ya yĩxema tũxũ nangẽxmaxẽ i maxũ i taguma gũxũ.

21

Ngexwacaxũxũ i ñoma i naãne rũ guxũma i daxũwa ngẽxmaxũ

¹ Rũ yemawena nũxũ chadau na nayexwacaxũxũ ga ñoma ga naãne rũ guxũma ga ñacu ga daxũwa yexmagũxũ. Yerũ yema nũxĩra yexmagũxũ rũ marũ nangupetũ, rũ yema taxũ ga taxtũ rũ marũ nataxuma. ² Rũ nũxũ chadau ga guma ñãne ga mexũne ga Yerucharẽũ ga yexwacaxũne ga daxũguxũ ga naãnewa Tupanaxũtawã írũxĩxũne ga guxũwama mexẽchine ñoma wũxi i pacũ i ngẽxguma iyangĩxgu rũ ngĩtecẽx ngĩgũ mexẽxcurũũ ixĩxũne. ³ Rũ nũxũ chaxĩnũ ga wũxi ga naga ga yema tochicaxũwa inaxũxũ ga tagaãcũ ñaxũ:

“Tupana rũ duũxũgũtanũwa nangexma i ñuxmax. Rũ natanũwa tá namaxẽcha. Rũ nũmagũ rũ norũ duũxũgũ tá nixĩgũ. Rũ nũma ya Tupana rũ natanũwa tá nangẽxmaẽcha, na guxũguma norũ Tupana yĩxũcẽx. ⁴ Rũ nũma tá ñnanapi i naxgũũẽtũ i guxũma i ngẽma duũxũgũ. Rũ marũ tãũtãma texẽ tayu, rũ texẽ tũmaãrũ ngechaũmaã taxaxu, rũ texẽ ngũxũ tingegũ. Erũ guxũma i ngẽma ngũxũ rũ marũ inayarũxo”, ñnanagũrũ. ⁵ Rũ guma yema tochicaxũwa rũtocũ rũ ñnanagũrũ:

“Dũcẽx, choma rũ chanangexwacaxũxẽẽ i guxũma i ñacu i ngẽxmaxũ”, ñnanagũrũ. Rũ ñuxũchi ñnanagũrũ ta:

“¡Naxũmatũ i ñãã ore! Erũ ñãã ore rũ aixcũma nixĩ, rũ ñãã nixĩ i ore i mexũ na yaxõxũ”, ñnanagũrũ. ⁶ Rũ yemawena rũ ñnanagũrũ choxũ:

“Ñuxma rũ marũ ningu i guxũma. Rũ chowa nixĩ ga inaxũgũxũ ga guxũma, rũ nataxuma i ñacu i chorũ yexera ngẽxmaẽchaxũ. Rũ yĩxema ñtawaxe, rũ choma rũ tá nangetanũãcũma tũxũ chaxaxẽẽmare nawa i ngẽma dexã i maxẽerũ. ⁷ Rũ yĩxema nũxũ rũporamaẽgũxe i chixexũ, rũ tá tanayaxugũ i guxũma i ngẽma mexũgũ i nũxũ chixuxũ. Rũ choma rũ tá tũmaãrũ Tupana chixĩ, rũ tũma i chauxacũgũ. ⁸ Natũrũ ngẽma muũẽxũ i nũxũ rũxoexũ na chowe naxĩxũ, rũ nawa tá nawoũ ya yima naxtaa ya ùxũmaã iyaurchiũne ya azufremaã ixaxũne. Rũ ngẽxgumarũũ ta i ngẽma tama yaxõgũxũ, rũ ngẽma chixexũ ùgũxũ, rũ ngẽma mãẽtagũxũ, rũ ngẽma naĩ i ngemaã ipexũ, rũ ngẽma iyuexũ rũ ngõxwẽxegũxũ, rũ ngẽma tupananetachicũnẽxãxũ icuẽxũgũxũ, rũ ngẽma idoratẽxegũxũ, rũ nawa tá nawoũ ya yima naxtaa ya ùxũmaã iyaurchiũne ya azufremaã ixaxũne. Rũ ngẽma nixĩ i poxcu i taguma iyacuãxũ i nũxũ ñnanguxẽxũ i ngẽma tama yaxõgũãcũma yuexũ”, ñnanagũrũ.

Yexwacaxiŋe ga Yerucharéŋchiga

⁹ Rŋ yema 7 ga orearŋ ngeruŋgŋ ga nŋxŋ yexmagŋxŋ ga 7 ga copagŋ ga yema 7 ga poxcuruŋmaŋ ixŋŋcuxŋ, rŋ yematanŋwa rŋ wŋxi ga orearŋ ngeruŋ rŋ chauxcŋx nixŋ, rŋ ŋnanagŋrŋ choxŋ:

“iNuŋ naxŋ! Rŋ tŋ cuxŋ nŋxŋ chadauxŋŋ e i ngŋma yaxŋgŋxŋ i ŋŋma namŋxruŋŋ tŋ ixŋgŋxŋ ya yima Tupana Nane ga pecaduarŋ ŋtanŋcŋx yucŋ”, ŋnanagŋrŋ. ¹⁰ Rŋ yexguma yemaŋcŋ Tupanaŋŋ e ŋŋnŋxŋ choxŋ ngŋxetŋxŋŋŋ, rŋ yema orearŋ ngeruŋ rŋ wŋxi ga mŋxpŋne ga taxŋnŋwa choxŋ naga. Rŋ choxŋ nŋxŋ nadauxŋŋ ga guma iŋne ya ŋŋnŋne ga Yerucharéŋ ga daxŋgŋxŋ ga naŋnŋwa Tupanaxŋtŋwa irŋxŋxŋne. ¹¹ Rŋ guma iŋne rŋ Tupanaŋrŋ yauracŋŋŋmaŋ nangŋone. Rŋ yema norŋ yauracŋŋxŋ ga guma iŋne rŋ ŋŋma wŋxi ya nuta ya mexŋchicŋrŋŋ nixŋ. Rŋ ŋŋma nuta ya yasperŋŋ nixŋ na yachipetŋxŋ. ¹² Rŋ guma iŋne rŋ guxŋwama inapoxegu. Rŋ nataxŋchi rŋ namŋchanexŋtŋchi ga yema norŋ poxegŋxŋ. Rŋ yema norŋ poxegŋxŋ rŋ nŋxŋ nayexma ga 12 ga norŋ iŋx. Rŋ wŋxichigŋ ga yema iŋxwa nayexma ga wŋxi ga Tupanaŋrŋ orearŋ ngeruŋ. Rŋ wŋxichigŋ ga yema iŋxwa nangŋŋga ga wŋxichigŋ ga yema 12 ga Acobu nane ga Yudiŋgŋ nawa ne iŋxŋ. ¹³ Rŋ tomaŋxpŋx ga norŋ iŋx rŋ napŋxewaama nayexma, rŋ yema to ga tomaŋxpŋx rŋ norŋ toxwecŋwawa nayexma, rŋ yema to ga tomaŋxpŋx rŋ norŋ tŋgŋnecŋwawa nayexma, rŋ yema to ga tomaŋxpŋx rŋ naweama nayexma. ¹⁴ Rŋ guma iŋneŋrŋ poxegŋxŋ, rŋ 12 ga nuta ga taxŋchicŋtŋwa inaxŋgŋ. Rŋ wŋxichigŋ ga guma nutagŋwa nangŋŋga ga wŋxichigŋ ga norŋ ngŋxŋgŋ ga guma Tupana Nane ga pecaduarŋ ŋtanŋcŋx yucŋ. ¹⁵ Rŋ yema orearŋ ngeruŋ ga chŋmaŋ idexaxŋ, rŋ nŋxŋ nayexma ga wŋxi ga norŋ ngugŋxŋ ga uirumenŋŋnaxcŋx na yemamaŋ nangugŋxŋcŋx ga guma iŋne, rŋ norŋ iŋxgŋ, rŋ norŋ poxegŋxŋgŋ. ¹⁶ Rŋ guma iŋne rŋ nawŋxigumare ga guxŋcŋwawa. Rŋ norŋ mŋx rŋ nawŋxigumare namaŋ ga norŋ tatachinŋ. Rŋ yema orearŋ ngeruŋ rŋ yema uirumenŋxŋmaŋ nanangugŋ ga guma iŋne. Rŋ 2,200 kilŋmetru nixŋ ga norŋ mŋx. Rŋ yexgumarŋŋ ta 2,200 kilŋmetru nixŋ ga norŋ tatachinŋ. Rŋ 2,200 kilŋmetru ta nixŋ ga norŋ mŋchane. ¹⁷ Rŋ yemawena rŋ inanangu ga yema norŋ poxegŋxŋ ga guma iŋne. Rŋ 65 metru nixŋ ga norŋ mŋchane. Rŋ yemaŋcŋ duŋxŋgŋarŋ ngugŋxŋmaŋ nanangugŋ. ¹⁸ Rŋ yema norŋ poxegŋxŋ ga guma iŋne, rŋ nuta ga mexŋchicŋ ga yaspŋnaxcŋx nixŋ. Rŋ nŋmatama ga guma iŋne rŋ uirunaxcŋx nixŋ. Rŋ ŋŋma woruarŋŋ niyauracŋŋ. ¹⁹ Rŋ guma nutagŋ ga itacŋ ga norŋ poxegŋxŋpara ixŋgŋcŋ, rŋ nagŋxŋraŋcŋ ga nuta ga imexŋchicŋmaŋ nangŋxŋŋ. Rŋ guma nŋxŋraŋcŋ ga napara rŋ nuta ga yaspemaŋ nangŋxŋŋ. Rŋ guma norŋ taxre ga napara rŋ nuta ga safirumaŋ nangŋxŋŋ. Rŋ guma norŋ tomaŋxpŋx ga napara rŋ nuta ga ŋgatamaŋ nangŋxŋŋ. Rŋ guma norŋ ŋgŋmŋcŋ ga napara rŋ nuta ga esmerŋdamaŋ nangŋxŋŋ. ²⁰ Rŋ guma norŋ wŋximŋxpŋx ga napara rŋ nuta ga onichemaŋ nangŋxŋŋ. Rŋ guma norŋ 6 ga napara rŋ nuta ga cornalinamaŋ nangŋxŋŋ. Rŋ guma norŋ 7 ga napara rŋ nuta ga crisŋlitumaŋ nangŋxŋŋ. Rŋ guma norŋ 8 ga napara rŋ nuta ga berilumaŋ nangŋxŋŋ. Rŋ guma norŋ 9 ga napara rŋ nuta ga topŋsiumaŋ nangŋxŋŋ. Rŋ guma norŋ 10 ga napara rŋ nuta ga crisoprŋsamaŋ nangŋxŋŋ. Rŋ guma norŋ 11 ga napara rŋ nuta ga yachŋtumaŋ nangŋxŋŋ. Rŋ guma norŋ 12 ga napara rŋ nuta ga amatŋstamaŋ nangŋxŋŋ. ²¹ Rŋ yema 12 ga norŋ iŋx ga guma iŋneŋrŋ poxegŋxŋ rŋ perlanaxcŋx nixŋ. Rŋ wŋxichigŋ ga yema iŋx rŋ wŋxitama ga perla nixŋ. Rŋ yema norŋ itamŋ ga guma iŋneŋrŋ ngŋxŋwa dapetŋxŋ, rŋ uiruxicanaxcŋx

nixĩ. Rũ ñoma woruarũũ niyauracũũ. ²² Rũ guma ñãnewa rũ taxúnema ga ngutaquẽxepataxũ ga ngextá Tupanaxũ nawa yacuẽxũũgũnẽxũ chadau, yerũ nũmatama ga Tupana ya poracũ rũ Nane ga pecaduarũ ũtanũcẽx yucũ rũ yema nayexma na duũxũgũ nũxũ icuẽxũũgũxũcẽx. ²³ Rũ yima ñãne rũ taxucẽxma uẽxcũ rũ tauemacũ nũxũ nabaxi, erũ Tupanaãrũ ngóonexũtama nixĩ i nangóonexẽẽxũ. Rũ yima Tupana Nane ga pecaduarũ ũtanũcẽx yucũ nixĩ ya norũ omũ ixĩcũ. ²⁴ Rũ ngẽma Tupanaãrũ ngóonexũ i yima ñãnẽxũ ngóonexẽẽxũ tá nixĩ i nangóonexẽẽxũ naxcẽx i guxũma i ñoma i naãnecũãx i duũxũgũ. Rũ ngema tá nangugũ i guxũma i nachiũãnegũarũ ãẽxgacũgũ i yaxõgũxũ rũ tá Tupanana nayana i norũ mexũgũ. ²⁵ Rũ norũ ñãxgũ rũ tagutãma narũwãxtagũ erũ ngema rũ guxũguma nangunexecha rũ taguma nachũta. ²⁶ Rũ ngema tá nanana i guxũma i ñoma i naãnẽarũ mexũgũ. ²⁷ Natũrũ tagutãma ngẽxma naxũcu i ñacũ i Tupanapẽxewa chixexũ, rũ bai ya texé ya chixexũ úxe rũ ẽxna idoratẽxãxe. Rũ yĩxema Tupana Nane ga pecaduarũ ũtanũcẽx yucũarũ poperawa ngõxẽgagũxexicatãtama tixĩgũ ya ngẽxma chocuxe.

22

¹ Rũ ñuxũchi ga yema orearũ ngerũ rũ choxũ nũxũ nadauxẽẽ ga wũxi ga natũ ga metacũchiũxũ rũ ichipetũchiũxũ ga dexã ga maxẽẽruũ. Rũ yema tochicaxũ ga nawa natogũxũ ga Tupana rũ Nane ga pecaduarũ ũtanũcẽx yucũ, rũ nawa nixĩ ga ne nadaxũ ga yema natũ. ² Rũ guma ñãnẽarũ ngãxũwa dapetũxũ ga ítamũarũ ngãxũgu nida ga yema natũ. Rũ norũ guxũcutũwa narũxũgũ ga naĩgũ ga maxẽẽruũ. Rũ yema naĩgũ rũ wũxicanatama naxo ga wũxichigũ ga tauemacũgu rũ yemaãcũ 12 ẽxpũxcũna naxo ga wũxi ga taunecũgu. Rũ naãtũgũ ga yema naĩgũ, rũ guxũ i nachiũãnecũãx i duũxũgũ i yaxõgũũãrũ taãexẽẽruũ nixĩ. ³ Rũ ngema rũ nataxũtãma i ñacũ i Tupana chixexũ namaã naxuxuchixũ. Rũ yima ñãnewa tá nangẽxma i norũ tochicaxũ ya Tupana rũ Nane ga pecaduarũ ũtanũcẽx yucũ. Rũ norũ duũxũgũ rũ tá nũxũ nicuẽxũgũ. ⁴ Rũ ngẽma norũ duũxũgũ rũ tá nachiwexũchixũ nadaugũ, rũ tá naegamaã nixãegacatũ. ⁵ Rũ ngema rũ tagutãma nachũta. Rũ ngẽma norũ duũxũgũ, rũ taxucẽxtãma nanaxwẽxe i daparina rũ ẽxna uẽxcũ na nangóonexũcẽx. Erũ nũmatama ya tórũ Cori ya Tupana rũ tá nũxũ nabaxi. Rũ nũmagũ i ngẽma duũxũgũ rũ guxũgutãma wũxigu Tupanamaã ãẽxgacũgũ nixĩgũecha.

Marũ ñingaica na wena núma naxũxũ ya Ngechuchu ya Cristu

⁶ Rũ ñuxũchi ga yema Tupanaãrũ orearũ ngerũ rũ ñanagũrũ choxũ:

“Ñãã ore rũ aixcũma ixĩxũ nixĩ, rũ ñãã nixĩ i ore i mexũ na yaxõxũ. Rũ nũma ya tórũ Cori ya Tupana ga nuxcũma norũ orearũ uruũgũmaã nũxũ ixucũ ga ñacũ tá na ngupetũxũ, rũ nũmatama nixĩ i ñuxma inamuãxũ i norũ orearũ ngerũ i daxũcũãx na norũ duũxũgũxũ nũxũ nadauxẽẽxũcẽx na ñacũ tá paxa nangupetũxũ”, ñanagũrũ. ⁷ Rũ nũma ya tórũ Cori ya Ngechuchu rũ ñanagũrũ:

“Paxa tá íchangu. Rũ tataãẽ ya yĩxema naga ñũxẽ i ngẽma Tupanaãrũ ore i ñãã poperagu ũmatũxũ”, ñanagũrũ. ⁸ Rũ chomatama i Cuãũ rũ nũxũ chaxĩnũ rũ nũxũ chadau i guxũma i ngẽma nũxũ chixuxũ. Rũ yemaxũ chaxĩnũguwena rũ nũxũ chadẽuxguwena, rũ yema orearũ ngerũ ga yemaxũ choxũ dauxẽẽxũpẽxegu chacaxãpũxũ na nũxũ chicuẽxũxũcẽx. ⁹ Natũrũ ga nũma rũ ñanagũrũ choxũ:

“¡Tǎxǔ i ngēma cuxǔxǔ! Erǔ choma rǔ ta Tupanaǎrǔ duǔxǔ chixǐ, ngēxumarǔ i cuma rǔ cueneēgǔ i Tupanaǎrǔ orexǔ ixugǔxǔ rǔ ngēma duǔxǔgǔ i naga ĩnǔxǔ i ngēma ore i ĩǎǎ poperagu ũmatǔxǔ. Rǔ name nixǐ i Tupanaxǔ quicuēxǔ”, ĩǎǎgǔrǔ. ¹⁰ Rǔ ĩǎǎgǔrǔ ta choxǔ:

“Tama name na icuyacǔxǔ i ngēma Tupanaǎrǔ ore i ĩǎǎ poperagu ũmatǔxǔ, erǔ marǔ ningaica na yanguxǔ i ngēma ore. ¹¹ Natǔrǔ ngēma chixexǔ ũgǔxǔ, rǔ chixexǔ tá naxǔgǔtcha. Rǔ ngēma Tupanapēxewa chixri maxēxǔ, rǔ chixri tá namaxēēcha. Natǔrǔ yǐxema mexǔ ũgǔxe, rǔ name nixǐ na mexǔ taxǔgǔtchaxǔ. Rǔ yǐxema Tupanapēxewa ixǔũnēxē, rǔ name nixǐ na Tupanapēxewa tixǔũnēēchaxǔ”, ĩǎǎgǔrǔ. ¹² Rǔ ĩǎǎgǔrǔ ga Ngechuchu:

“Dǔcēx, paxa tá íchangu namaǎ i ngēma ǎmare i wǔxichigǔna tá chaxǎxǔ ngēxumarǔ na ĩnǔxǔ tanaxǔxǔ i tǔmax. ¹³ Choma nixǐ i norǔ ũgǔ i guxǔma, rǔ chowa nixǐ i yaxuǎxǔ erǔ nataxuma i țacǔ i choweama ũxǔ. ¹⁴ Rǔ tataǎēgǔ ya guxǎma ya yǐxema yima pecaduarǔ ũtanǔcēx yucǔgǔwa tǔgǔ iyauxǔgǔchiruxe na Tupanapēxewa timexǔcēx na yima ĩǎneǎrǔ ĩǎxwa tichocuxǔcēx rǔ nǔxǔ tangǔxnetagǔxǔcēx i ngēma norǔ o i ngēma naǐ i maxēēruǔ. ¹⁵ Natǔrǔ tǎũtǎma yima ĩǎnewa nichocu i ngēma tama yaxǔgǔxǔ, rǔ ngēma iyuǔxǔ rǔ ngǔxwēxegǔxǔ, rǔ ngēma naǐ i ngemaǎ ipegǔxǔ, rǔ ngēma máētagǔxǔ, rǔ ngēma tupananetachicǔnēxǎxǔ icuēxǔũgǔxǔ. Rǔ ngēxumarǔ ta i ngēma idorateēxǔgǔxǔ i norǔ me ixǔxǔ na togǔxǔ nawomǔxēēgǔxǔ, rǔ tǎũtǎma nawa nichocu ya yima ĩǎne. ¹⁶ Rǔ choma i Ngechuchu, rǔ guxǎma i pema i yaxǔgǔxǔtanǔwa chanamu i chorǔ orearǔ ngerǔ na pemaǎ nǔxǔ yaxuxǔcēx i guxǔma i ngēma chorǔ ore. Rǔ choma nixǐ i Dabǐtaa chǐxǔ. Rǔ choma nixǐ ya yima woramacuri ya pēxmama poraǎcǔ nangǔonēxēēcǔrǔ chǐxǔ”, ĩǎǎgǔrǔ. ¹⁷ Rǔ Tupanaǎē i ũnēxǔ rǔ guxǔma i yaxǔgǔxǔ, rǔ Ngechuchuxǔ ĩǎǎgǔrǔgǔ:

“¡Nuǎ naxǔ!” ĩǎǎgǔrǔgǔ. Rǔ yǐxema nǔxǔ ĩnǔxǔ i ĩǎǎ ore, rǔ:

“¡Nuǎ naxǔ!” ĩǎǎgǔrǔgǔ. Rǔ yǐxema ĩǎawǎxe rǔ tǔxǔ nachixēgaxe, rǔ name nixǐ i nuǎ taxǔ rǔ tǔxǔ nangetanǔǎcǔma nawa taxaxe i ngēma dexǎ i maxēēruǔ. ¹⁸ Rǔ guxǎma ya yǐxema irǔxǐnǔxǔē i ĩǎǎ Tupanaǎrǔ ore i ĩǎǎ poperagu ũmatǔxǔ, rǔ tǔmamaǎ nǔxǔ chixu rǔ ngēxuma chi texē íyatǔxēēgǔ i ngēma Tupanaǎrǔ ore i ĩǎǎ poperagu ũmatǔxǔ, rǔ Tupana rǔ tá tǔmacēx nanayexeraxēē i ngēma poxcuruǔgǔ i ĩǎǎ poperawa nachiga naxǔmatǔxǔ. ¹⁹ Rǔ ngēxuma chi texē nǔxǔ ũpetǔgu i wǔxitama i ĩǎǎ Tupanaǎrǔ ore i ĩǎǎ poperagu ũmatǔxǔ, rǔ Tupana rǔ tǎũtǎma tǔxǔ nǔxǔ nangoxnetaxēē i ngēma norǔ o i ngēma naǐ i maxēēruǔ i ĩǎǎ poperawa nachiga naxǔmatǔxǔ. Rǔ ngēxumarǔ tá ta tǎũtǎma tǔxǔ nimucuchi nawa ya yima ĩǎne ya ũnēne i ĩǎǎ poperawa nachiga naxǔmatǔne. ²⁰ Rǔ yima nǔxǔ ixucǔ i ĩǎǎ ore, rǔ ĩǎǎgǔrǔ:

“Ngēmǎǎcǔ, paxa tá íchangu”, ĩǎǎgǔrǔ. Rǔ ngēmǎǎcǔ yǐ. Rǔ choma i Cuǎǔ rǔ ĩǎǎcharǔgǔ:

“¡Nuǎ naxǔ Pa Cori ya Ngechuchu!” ĩǎǎcharǔgǔ. ²¹ Rǔ chanaxwēxe i tǔrǔ Cori ya Ngechuchu ya Cristu poraǎcǔ pexǔ narǔngǔxǔēē i guxǎma i pemax. Rǔ ngēmǎǎcǔ yǐ.